


Tuhun Ndyoo sihin
tyehen ñi



New Testament in Mixtec, Chayuco (MX:mih:Mixtec, Chayuco)

Tuhun Ndyoo sihin tyehen ñí

New Testament in Mixtec, Chayuco (MX:mih:Mixtec, Chayuco)

copyright © 1979 Wycliffe Bible Translators, Inc.

Language: Mixtec, Chayuco

Translation by: Wycliffe Bible Translators, Inc.

Mixteco, Chayuco [mih], Mexico

Copyright Information

© 1979, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Chayuco

© 1979, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 25 Nov 2022 from source files dated 29 Jan 2022

4924062e-6bf2-54cb-87ed-9874f41e7991

Contents

SAN MATEO	1
SAN MARCOS	57
SAN LUCAS	91
SAN JUAN	150
HECHOS	191
ROMANOS	249
1 CORINTIOS	276
2 CORINTIOS	299
GÁLATAS	315
EFESIOS	324
FILIPENSES	333
COLOSENSESES	339
1 TESALONICENSESES	345
2 TESALONICENSESES	350
1 TIMOTEO	353
2 TIMOTEO	360
TITO	365
FILEMÓN	369
HEBREOS	371
SANTIAGO	390
1 PEDRO	397
2 PEDRO	404
1 JUAN	409
2 JUAN	416
3 JUAN	417
JUDAS	418
APOCALIPSIS	421

Tuhun Vaha Sa I Tyaa Ra San Mateo

Ñiyiví sahnu sii ra Jesús

¹ Ihya cuu tandihí ñiyiví sahnu sii ra Jesucristo, ra cu ñiyiví sii ra David ta sii ra Abraham.

² Ra Abraham i cuu zutu ra Isaac. Ta ra Isaac i cuu zutu ra Jacob. Ta ra Jacob i cuu zutu ra Judá ta yañi ra.

³ Ra Judá i cuu zutu ra Fares ta ra Zara. Tamar i sinañi zihí ra. Ra Fares i cuu zutu ra Esrom. Ta ra Esrom i cuu zutu ra Aram.

⁴ Ra Aram i cuu zutu ra Aminadab. Ta ra Aminadab i cuu zutu ra Naasón. Ta ra Naasón i cuu zutu ra Salmón.

⁵ Ra Salmón i cuu zutu ra Booz. Ta Rahab nañi zihí ra. Ra Booz i cuu zutu ra Obed. Rut nañi zihí ra. Ta ra Obed i cuu zutu ra Isaí.

⁶ Ra Isaí i cuu zutu ra rey David. Ta ra rey David i cuu zutu ra Salomón vatyi i quihin ra sii ñazihí ra Urías.

⁷ Ra Salomón i cuu zutu ra Roboam. Ta Roboam i cuu zutu ra Abías. Ra Abías i cuu zutu ra Asa.

⁸ Ra Asa i cuu zutu ra Josafat. Ta ra Josafat i cuu zutu ra Joram. Ta ra Joram i cuu zutu ra Uzías.

⁹ Ra Uzías i cuu zutu ra Jotam. Ta ra Jotam i cuu zutu ra Acaz. Ta ra Acaz i cuu zutu ra Ezequías.

¹⁰ Ra Ezequías i cuu zutu ra Manasés. Ta ra Manasés i cuu zutu ra Amón. Ta ra Amón i cuu zutu ra Josías.

¹¹ Ta ra Josías i cuu zutu ra Jeconías sihin yañi ra quiví i sicoo cuatyí ta i quihin ñiyiví sii ñu hebreo sindyaca ra sii tandihí ñu ndya ñuu Babilonia cua cuu ñu muzu ñiyiví indyacuan.

¹² Yaha cuan ta ziquí ra Jeconías i cuu zutu ra Salatiel. Ta ra Salatiel i cuu zutu ra Zorobabel.

¹³ Ta ra Zorobabel i cuu zutu ra Abiud. Ta ra Abiud i cuu zutu ra

Eliaquim. Ta ra Eliaquim i cuu zutu ra Azor.

¹⁴ Ta ra Azor i cuu zutu ra Sadoc, ta ra Sadoc i cuu zutu ra Aquim. Ta ra Aquim i cuu zutu ra Eliud.

¹⁵ Ta ra Eliud i cuu zutu ra Eleazar. Ta Eleazar i cuu zutu ra Matán. Ta Matán i cuu zutu ra Jacob,

¹⁶ ta ra Jacob i cuu zutu ra José yíi ña María. Ta maa ña i cuu zihí ra Jesús ra sa nañi Cristo.

¹⁷ Ndyá quiví ra Abraham ta ndya ra David i sicoo usi cumi tahan ra sahnu sii ra Jesús cuhva vasi tata ra. Ta ndya quiví ra David ta ndya quiví i sindyaca ñiyiví sii tandihí ñu hebreo ndya ñuu Babilonia i sicoo inga usi cumi tahan ra sahnu sii ra Jesús cuhva vasi tata ra. Ta i sicoo inga usi cumi tahan ra ndya ta sa yaha sahan ñu ñuu Babilonia ta ndya quiví i cacu ra Jesús.

Cuhva i cacu ra Jesucristo

¹⁸ Ihya cuu cuhva i cacu ra Jesucristo. Sa cundaa tyiño ña María zihí ra Jesús sihin minoo ra sa nañi José, zoco cumañi ca ndu-ÿin ñu ta i sito ña vatyi sa ñihí ña minoo zehe sa cuenda Tatyi li maa ra Ndyoo.

¹⁹ Ta ra José, ra cua cuu yíi ña, i cuu ra minoo ra ndoo xaan, ta ñá cuñi ra zandoo ra sii ña minoo cuhva sa cua cahan xaan ñiyiví sii ña. I cuñi ra vatyi cua natani xehe tutu ñu.

²⁰ Zoco cuhva sa nacañi xaan iñi ra yozo caa cua zavaha ra, i quituu minoo ángel ra Ndyoo nuu ra sisi ñimahna, ta i catyi ángel cuan sihin ra: José, ñiyiví sii ra David, ma yuhun ta cuhun sii ña María sa cuu ña ñazihun vatyi zehe ña sa cua cacu cuu zehe Tatyi li ra Ndyoo.

²¹ Cua cacu zehe ña. Ta cua cuñañi ra Jesús vatyi cua zandasí ra cuatyí ñiyiví cuñi sii ra. Tacuan i catyi ángel.

²² Ta i cuu tandihí cuhva ya vatyi cua quita si tañi cuhva i catyi ra

Ndyoo quiví i cahan minoo ra profeta ta i catyi ra:

²³ Minoo ñaha yoco, cua ñihí ña minoo zehe,

ta rayíi cua cuu zehe ña.

Emanuel cua cunañí ra.

Ziví Emanuel cuan cuñí si catyi si: Ra Ndyoo ndyaa sihin yo.

²⁴ Ta cuhva sa ndoyo ra José i zavaha ra cuhva i catyi ángel cuan sihin ra. I quihin ra sii ña María sa cuu ña ñazihí ra.

²⁵ Zoco ñá quixi ra sihin ña ndya sa cacu zehe nuu ña. Ta i zacunañí ra sii ra Jesús.

2

Zuhva ra sito xaan cahvi, i quisí ndyehe ra sii ra Jesús

¹ I cacu ra Jesús ñuu Belén nu cu si Judea quiví i cuu ra Herodes rey yucuan. Ta ñuu Jerusalén i saa zuhva ra sito xaan cahvi. Mago nañí ra. Ityi caña ñicandyi i quisí ra.

² Ta i ndaca tuhun ra: ¿Ndyamaa iyo ra i cacu sa cuu ra rey cuenda ñiyíví hebreo? Ityi caña ñicandyi ndyaa ndi, ta i ndyehe ndi minoo tiñoo sa cuu cuenda ra. Ta vasi ndi vatyi cua zacahnu ndi sii ra. Catyi ra.

³ I ñihí ra rey Herodes tuhun ya, ta sica xaan iñí ra ta tacuan tucu tandihí ñiyíví ñuu Jerusalén.

⁴ I cana ra Herodes sii tandihí ra zutu nahnu ta ra cu maestro cuenda ley, ta i ndaca tuhun ra sii ra ndyamaa tahan si cacu ra Cristo.

⁵ Ta i nacatyí ra cuan sihin ra: Cua cacu ra ñuu Belén nu cu si Judea vatyi tyehen i tyaa minoo ra profeta ta sa naha:

⁶ Yoho ñuu Belén nu cu si Judea, ña luhlu ca moo ta ziquí tandihí inga ca ñuu nu cu si Judea.

Vatyi ñuu Belén cua cacu minoo ra cua cundyaca ñaha, ta cua zacuenda ra sii ñu hebreo, ñiyíví mi.

Tacuan catyi Tuhun Ndyoo nacatyí ra cuan sihin ra Herodes.

⁷ Ta ziquí xehe ñí i cana ra Herodes sii ra mago cuan, ta i ndaca tuhun ra sii ra ñaa cuhva quituu tiñoo cuan.

⁸ Ta ziquí i tasi ra sii ra ndya ñuu Belén, ta catyi ra: Nanducu vaha xaan ndo sii ra luhlu cuan. Ta tatu sa nañihí ndo sii ra, zacoto ndo sii, vatyi cua cuhun tuqui, ta cua zacahni sii ra.

⁹ Ta sa siñí ra mago cuan sa i catyi rey cuan, i quihin ra ityi cuahan ra. Ta tiñoo sa i ndyehe ra ityi caña ñicandyi, cuahan ti ityi nuu ra ndya i saa ti ta sicuiñí ti nu ndyaa lee cuan.

¹⁰ Ta sa i ndyehe ra mago vatyi i sicuiñí tiñoo cuan, zii xaan i cuñí ra.

¹¹ Ta i quihví ra sisi vehe, ta i ndyehe ra sii lee cuan sihin ña María zihí ra. Ta i sicuiñí siti ra, ta zacahnu ra sii ra Jesús. Ta ziquí i nuña ra ndaha tyiño ra, ta i saha maa ra xuhun cuaan, ta cutu ta ndutuya vixi.

¹² Ta sa yaha ndyehe ra sii ra Jesús, ta ziquí ziñ ityi i cua nuhu ra ndya ñuu ra vatyi i zacoto minoo ángel ra Ndyoo sii ra sisi ñimahna vatyi ma cunanuhu ra nu ndyaa ra Herodes.

Sino ña María ta ra José ndya nu cu si Egipto

¹³ Cuahan ra mago cuan ta ziquí i quituu minoo ángel ra Ndyoo nuu ra José sisi ñimahna, ta i catyi si: Nduvita ta cuhun sii ra luhlu ta sii zihí ra, ta cuhun ndo ndya Egipto. Yucuan ndoo ndo ndya quiví cua catyi sihin ndo vatyi cuñí cahñí ra Herodes sii ra luhlu.

¹⁴ Tacuan i catyi ángel cuan ta i nduvita ra José, ta i quihin ra sii ra luhlu ta sii zihí ra. Ta zuun ñí sa cuua cuan i quita ñu ta cuahan ñu ndya Egipto.

¹⁵ I ndoo ñu yucuan ndya i sihi ra rey Herodes. Cuhva ya i cuu si vatyi tacuan ta cua quita si cuhva i catyi minoo ra profeta nu i catyi ra cuhva i nacatyí maa ra Ndyoo:

“Cua nacane sii Zehi ndya Egipto.”
Catyi ra.

*Tava ra Herodes tyiñó vatyi cua
cuu tandihí ra ndyihí*

¹⁶ Quiví i sito ra Herodes vatyi sacu ndyaa ra mago sii ra, ta ñá zavaha ra cuhva i catyi ra, yaha xaan i cuxaan ra. Ta i tava ra tyiñó vatyi cahñi zandaru sii tandihí ra ndyihí sa uu cuiya ta sa ndyihí ca ñuu Belén ta inga ñuu ndyaa yatyi. Tacuan i zavaha ra vatyi tañi tacuan cuu cuiya ra Jesús sica iñi ra sa cuenda cuhva i catyi ra mago cuan sihin ra.

¹⁷ Ta cuhya i sahñi ra Herodes sii ra ndyihí, i quita si cuhva i tyaa ra Jeremías, minoo ra profeta ta sa naha. Tyehen i tyaa ra:

¹⁸ I quita minoo nduzu ñihí nu cu si Ramá.

Sacu xaan ñiyivi, ta sacu saa ñu.

Maha Raquel sacu sa cuenda zehé ña, ta ma cutaxi ña vatyi yoñi ca si.

I catyi Tuhun Ndyoo vatyi cua cuu si cuhva cuan. Ta zuun ñi cuhva cuan i quita si.

¹⁹ Ta sa yaha sihi ra Herodes, ta i quituu tucu minoo ángel ra Ndyoo ityi nuu ra José sisi ñimahna nu ndyaa ra Egipto, ta i catyi si sihin ra:

²⁰ Nduvita ta cuhun sii ra luhlu ta sii zíhi ra ta cunahuñu ndo ndyaa Israel vatyi sa sihi ra cuñi cahñi sii ra luhlu.

²¹ Tacuan i catyi ángel cuan, ta i nduvita ra José, ta i quihin ra sii ra luhlu ta sii zíhi ra, ta i sinanuhu ñu ndyaa Israel.

²² Zoco i ñihí ra José tuhun vatyi ndyaca ñaha ra Arquelao nu cu si Judea sa cuenda ra Herodes zutu ra, ta i yuhu xaan ra José cuhun ra yucuan. Ta i cahan tucu ángel sihin ra sisi ñimahna, ta yucuan cuenda cuahan ñu ndya nu cu si Galilea.

²³ Ta sa saa ñu yucuan, i ndoo ñu ñuu Nazaret. Ta cuhva cuan i quita si tañi catyi minoo ra profeta vatyi

i catyi ra vatyi cua catyi ñiyivi vatyi minoo ra nazareno cuu ra Jesús.

3

*Cuhva i cahan ra Juan, ra i zacoo
ndutyá sii ñiyivi*

¹ Quiví cuan i quisí ra Juan, ra zacoo ndutyá sii ñiyivi, ndya nu cu si Judea. Minoo nu ityi xaan nu yoñi maa ñiyivi iyo i saa ra, ta i nacatyí ra Tuhun Ndyoo sihin ñiyivi i saa nu ndyaa ra.

² Ihya cuu cuhva i catyi ra: Zama ndo cuhva iyo ndo vatyi sa cuñi saa quivi cundyaca ñaha ra Ndyoo ihyá ñuu ñiyivi. Catyi ra.

³ Ta ra Juan cuu ra i cahan ra Isaías tuhun quivi i tyaa ra tuhun i saha ra Ndyoo sii ra, ta i catyi ra: Cua cuiñi ndo nduzu minoo ra cana saa minoo nu ityi xaan.

Ta catyi ra cuan: “Tañi zanduvaha ndo minoo ityi,
tacuan zanduvaha ndo añima ndo vatyi cua quisí ra ndyaca ñaha sii yo.

Tañi zandundoo ndo ityi, tacuan zama ndo cuhva iyo ndo.”

Tacuan i tyaa ra Isaías ta sa naha sa cuenda ra Juan, ra cua quisí cuee ca.

⁴ Ta ra Juan cuan, siñoho ra zahma ixí camello. Ta sinuhñi zinda ñíi sisi ra. Ta i sasi ra minoo nuu quiti tañi tica, ta sihi ra tyahiñu ñuuñu.

⁵ Ñiyivi ñuu Jerusalén ta tandihí yuñuu Judea ta ñu ndyaa yatyi yuu Jordán, cuahan ñu cua tyizoho ñu sa cahan ra Juan.

⁶ Ta sa yaha nahma ñu cuatyí ñu, ta i zacoo ndutyá ra Juan sii ñu yuu Jordán cuan.

⁷ I ndyehe ra Juan vatyi saa cuaha xaan ra fariseo sihin ra sadeo vatyi cuñi ra coo ndutyá ra, ta i catyi ra Juan sihin ra: ¡Ñiyivi quiñi xaan iyo cuu ndo tañi coo! ¿Yoo sa catyi sihin ndo vatyi cuu cacu ndo sihin cuhva sa cua tasi tuñi ra Ndyoo sii ñiyivi?

⁸ Cuñi si sa zama ndisa cuii ndo cuhva iyo ndo, ta zavaha ndo sa vaha.

⁹ Ta ma caca iñi ndo sihin añima ndo vatyi ra Abraham cuu zutu ndo, ta ma caca iñi ndo vatyi maa ra cuá zacacu sii ndo. Ma zacahnu ndo sii ndo vatyi vazu sihin yuu ya, ta cuu zavaha ra Ndyoo ñiyiví sii ra Abraham sihin si.

¹⁰ Tañi yutu ña saha siti cuu maa ndo vatyi ña zavaha ndo cuhva cuñi ra Ndyoo. Ta yutu sa ña saha siti, sahndya ñiyiví sii tu. Ta sahmi ñu sii tu. Ta zuun ñi cuhva cuan cuá cuhun maa ndo nu cayu ñúhu.

¹¹ Ndisa zacoo ndutyte sii ndo sihin ndutuya tatu zama ndo cuhva iyo ndo. Zoco vasi inga ra cahnu ca ta ziquí mi. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii. Ta maa ra cuá zacoo ndutuya sii ndo sihin Tatyi Ii ta sihin ñúhu.

¹² Sa ndaha ra pala ra ta cuá zanduvii ra siti trigo ra, ta cuá tava ziin ra zoo si. Cua zandu-iiñ ra sii trigo ra, ta cuá cucumi vaha ra sii si, ta cuá cahmi ra zoo si sisi minoo ñúhu sa ma ndahva. Tacuan i catyi ra Juan sihin ñiyiví.

Cuhva i sicoo ndutuya ra Jesús

¹³ Tacuan ta i quita ra Jesús nu cu si Galilea, ta i quasi ra ndya yuu Jordán nu ndyaa ra Juan vatyi cuñi ra sa cuá zacoo ndutuya ra Juan sii ra.

¹⁴ Ta ñá cuñi ra Juan zacoo ndutuya sii ra vatyi catyi ra: Tahan si sa zacoo ndutuya moo sii mi. ¿Ta ñaa cuenda catyun sa zacoo ndutuya suun?

¹⁵ Zoco i catyi ra Jesús sihin ra: Nacuu si cuhva catyi suhun viti vatyi tacuan cuñi si zavaha yo tandihí cuhva ndoo, cuhva cuñi ra Ndyoo. Tacuan i catyi ra Jesús, ta ziquí i ndoo ra Juan vaha.

¹⁶ Ta sa yaha i sicoo ndutuya ra Jesús, ta i quita ra sisi ndutuya cuan. Ta zuun ñi caa cuhva cuan i nuña andivi, ta i ndyehe ra Jesús Tatyi Ii

ra Ndyoo. Noo si tañi noo minoo paloma ziquí ra.

¹⁷ Ta tacuan ta i cahan minoo ra cahan sisi andivi ta i catyi ra: Ihya cuu zehi. Cuñi xein sii ra. Zì xaan cuñi sihin ra.

4

Cuhva i nducu coto ihñi cuihna sii ra Jesús atu tyaa ra yahvi sii Ndyoo a sii cuihna

¹ Ta ziquí i sindyaca Tatyi Ii sii ra Jesús minoo nu ityi xaan nu yoñi maa ñiyiví iyo vatyi cua nducu coto ihñi cuihna sii ra.

² Ta ñá sasi ra Jesús uu xico quiví ta uu xico sa cuaa, ta ziquí i sizoco ra.

³ Ta cuhva cuan i tuhva cuihna sii ra vatyi cua nducu coto ihñi ra sii ra, ta catyi ra: Tatu ndisa vatyi Zehe ra Ndyoo cuu suun, catyun sihin yuu sa catuu ihyá vatyi nanduu si pan.

⁴ Zoco i nacahan ra Jesús ta catyi ra: Catyi Tuhun Ndyoo vatyi ña maa sihin sa casi ñi yo cundito yo. Sihiñ sa sasi yo ndito coño ñuhu yo, zoco sihin sa tyaa yo yahvi tuhun cahan ra Ndyoo ta ndito añima yo sa ndisa cuii. Catyi ra Jesús sihin cuihna.

⁵ Tacuan ta i sindyaca cuihna sii ra Jesús ndya ñuu Jerusalén. Ta i zandaa ra sii ra xiñi vehe ñuhu cahnu. Ta i catyi ra sihin ra Jesús:

⁶ Tatú ndisa vatyi Zehe ra Ndyoo cuu suun, ndavon ndya nu ñuhu vatyi catyi Tuhun Ndyoo: “Cua cuhva ra Ndyoo tyiño sii ángel ra vatyi zacuenda ra suun. Cua naqueen ra suun sihin ndaha ra, ta ma ñicuehe sohon sihin minoo yuu.”

⁷ Tacuan i catyi cuihna, ta i catyi ra Jesús sihin ra: Catyi tucu Tuhun Ndyoo vatyi ma nducu coto ihñi ndi sii ra Ndyoo ra ndyaca ñaha sii ndi.

⁸ Yaha cuan ta i sindyaca cuihna sii ra Jesús xiñi minoo yucu zucu xaan, ta i zañaha ra tandihí ñuu

ñiyiví sii ra ta cuhva sa tyaqui xaan caa si.

⁹ Ta i catyi ra sihin ra Jesús: Ndaha mi ndyaa tandihí ya vatyi saha ra Ndyoo sa cundyaca ñehi tandihí ñuu ñiyiví ya. Ta cua cuhve tandihí si suun tatu cua cuiñi situn nui ta zacahnun sii. Catyi cuihna.

¹⁰ Zoco i catyi ra Jesús sihin ra: Cuiñi siyo suun sii, cuihna vatyi catyi Tuhun Ndyoo vatyi iin ñi sii maa ra Ndyoo ra ndyaca ñaha sii ndi cua zacahnun ndi. Ta iin ñi tyiño maa ra cua zacuu ndi. Catyi ra Jesús sihin cuihna.

¹¹ Ta ziquí i zandoo cuihna sii ra Jesús, ta i quisi tyindyee ángel sii ra.

*I quisahara Jesús zatiyño ra tyiño
ra Ndyoo nu cu si Galilea*

¹² Quíví i ñihi ra Jesús tuhun vatyi i tyihi ñiyiví sii ra Juan vehe caa, i quita ra yucuan ta cuahan ra ndya Galilea.

¹³ Zoco ñá ndoo ra ñuu Nazaret. Cuahan ra cua cundyaa ra ñuu Capernaum. Minoo ñuu sa ndyaa yatyi ñi yahu miñi yatyi nu cu si Zabulón ta Neftalí cuu si.

¹⁴ Tacuan i cuu si vatyi cua quita si cuhva i tyaa ra Isaías, minoo ra profeta ta sa naha. Tyehen i tyaa ra Isaías:

¹⁵ Nu cu si Zabulón ta Neftalí, ityi cuahan yo miñi tatu sa yaha yo yuu Jordán, yucuan cuu nu cu si Galilea nu ndyaa ñiyiví sa yivi ñiyiví hebreo cuu.

¹⁶ Ñiyiví cuan sicoo ñu nu ñaa xaan, zoco i ndyehe ñu minoo ñúhu ndisi xaan.

Quíví cuan cua cuu cuii ñu, zoco i zandundisi ñúhu cuan nu ndyaa ñu.

¹⁷ Ndyaa quíví i quihví ra Jesús Galilea, ta i quisaha nacatyi ra Tuhun Ndyoo sihin ñiyiví. Tyehen i catyi ra: Zandoo ndo cuatyi ndo, ta zama ndo cuhva iyo ndo vatyi sa cuñi saa quíví cua cundyaca ñaha ra Ndyoo ñuu ñiyiví.

*Cuhva i cana ra Jesús sii cumi
tahan ra tiin tyiyaca*

¹⁸ Ta i sica noo ra Jesús yahu miñi Galilea. Ta i ndyehe ra sii uu tahan ra sihin yañi ra. Minoo ra nañi ra Simón, ta Pedro nañi tucu ra. Ta inga ra nañi ra Andrés. Cañi ra traya ra nu ndutya vatyi yucuan cuu tyiño i zacuu ra.

¹⁹ Ta i catyi ra Jesús sihin ra: Coho ndo sihin, ta cua cuhve cuhva nducu ndo sii ñiyiví tañi cuhva nducu ndo sii tyiyaca. Tacuan i catyi ra Jesús sihin ra.

²⁰ Ta ta sica ñi i zandoo ihno ra traya ra, ta cuahan ra sihin ra Jesús.

²¹ Ta i sica ra Jesús zuhva ca sihin ra ityi nuu ca ta i ndyehe ra sii ra Jacobo sihin ra Juan zehe ra Zebedeo. Ñoho ra minoo barco sihiñ zutu ra. Nazuhva ra traya ra. Ta i cana ra Jesús sii ra.

²² Ta zuun ñi caa cuhva cuan i zandoo ra sii zutu ra sihin barco ra, ta i sindyico ra sii ra Jesús.

*Zacuaha ra Jesús sii cuaha xaan
ñiyiví*

²³ Sica noo ra Jesús nacahnu Galilea. Zacuaha ra sii ñiyiví sisi vehe ñuhu tahan tahan ñuu. Ta nacatyi ra Tuhun Vaha sihin ñiyiví cuhva cua cundyaca ñaha ra Ndyoo. Ta i zanduvaha ra sii ñiyiví cuhu tandihí cuii nuu cuehe.

²⁴ I sito ñiyiví tuhun ra Jesús nacahnu Siria. Ta i quisi ndyaca ñu sii tandihí ñu cuhu ziñ ziñ nuu cuehe a tatu iyo sa uhu sii ñu. Ta i quisi ndyaca ñu sii ñu ñoho tatyi cuihna, ta ñu cuhu cuehe meme, ta ñu xii. Ta i zanduvaha ra Jesús sii ñu.

²⁵ Ta cuaha xaan ñiyiví sa ndyaa Galilea i sindyico ñu sii ra. Ta tacuan tucu ñiyiví ñuu Decápolis, ta ñuu Jerusalén ta nacahnu Judea ta ñiyiví ndyaa inga siyo yuu Jordán ndihí ca.

¹ I ndyehe ra Jesú斯 vatyi cuaha xaan ñiyiví, ta i ndaa ra minoo yucu, ta i sicundyaa ra yucuan. Ta i siconduu i sicundyaa ñiyiví ndyico sii ra nu ndyaa ra.

² Ta i quisaha zacuaha ra Jesú斯 sii ñu, ta tyehen catyi ra:

Ñiyiví sa zii xaan cuñi

³ Sa iyo sa vaha sii ñiyiví vityi tatu sa sito ñu vatyi siñi ñuhu ra Ndyoo sii ñu vatyi tahan si sii ñu sa cundyaca ñaha ra Ndyoo sii ñu.

⁴ Sa iyo sa vaha sii ñiyiví cuihya iñi vityi vatyi cua zanaa ra Ndyoo tucuihya iñi sii ñu.

⁵ Sa iyo sa vaha sii ñiyiví zandulu luhlu sii, vatyi cuee ca cua cuhva maa ra Ndyoo sa cundyaca ñaha ñu ñuu ñiyiví ya.

⁶ Sa iyo sa vaha sii ñiyiví cuñi xaan zavaha tandíhi sa ndoo, cuhva cuñi ra Ndyoo vatyi cua tyindyee ra Ndyoo sii ñu, ta cua cuu xaan zavaha ñu sa vaha.

⁷ Sa iyo sa vaha sii ñiyiví cundahvi iñi sii inga ñiyiví vatyi Ndyoo cua cundahvi xaan iñi ra sii maa ñu.

⁸ Sa iyo sa vaha sii ñiyiví sa ñahñi cuatyi iyo añima vatyi cua ndyehe ñu sii maa ra Ndyoo.

⁹ Sa iyo sa vaha sii ñiyiví nducu cuhva zacoo sa taxi nu iyo cuatyi vatyi cua catyi ra Ndyoo vatyi zehe maa ra cuu sii ñu.

¹⁰ Sa iyo sa vaha sii ñiyiví tatu zandyeho inga ñiyiví tundoho sii ñu sa cuenda sa vaha sa zavaha ñu. Ndisa vatyi sa ndyaca ñaha ra Ndyoo sii ñu.

¹¹ Sa iyo sa vaha sii ndo tatu quiñi xaan cahan ñiyiví sihin ndo sa cuenda mi ta tatu zavaha xaan ñu sa ndya vaha ñi sihin ndo ta tatu cahan ñu ndya vaha ñi sii ndo ta ña ndisa cuu si.

¹² Cuzii xaan iñi ndo tatu tacuan zavaha ñu sihin ndo vatyi cahnu xaan sa vaha cua ñihi ndo andiví vatyi zuun ñi cuhva ña vaha cuan i

zavaha ñiyiví sihin ra profeta quiví cumañi ca cacu maa ndo.

Tañi ñii ta ñúhu cuu maa yo ñuu ñiyiví ya

¹³ Maa ndo cuu tañi ñii sa cuenda ñuu ñiyiví ya. Zoco tatu ña uhva ca ñii, ¿yozo caa tyindyee si? Tatu ña uhva ca si ña vaha ca si. Zavita yo sii si, ta cuañi ñiyiví ziqui si.

¹⁴ Maa ndo cuu tañi ñúhu sa cuenda ñuu ñiyiví ya. Tatu ndyaa minoo ñuu xiñi minoo yucu ma cuu sa cundyaca xehe si.

¹⁵ Ta ña tuhva ñiyiví tyaa minoo lámpara ta tyihi ñu sii si xu minoo cajón. Ña tacuan vatyi zucu tyaa ñu sii si, ta zandisi si sa cuenda tandíhi ñiyiví yucu vehe.

¹⁶ Tacuan tucu maa ndo, zavaha ndo sa vaha ityi ñuu ñiyiví, ta cua ndyehe ñu tyiño ndo, ta cua zacahnu ñu sii Zutu mañi yo, ra ndyaa andiví.

Cuñi si sa tyaa yo yahvi sii ley ra Ndyoo

¹⁷ Ma caca iñi ndo vatyi yuhvi vasi zanei cuhva tyaa ñiyiví yahvi sii ley ra Ndyoo sa i tyaa ra Moisés a cuhva i tyaa ra profeta. Ña vasi zandíhi cuhva iyo sii si cuan. Vasi ta tyei yahvi sii tandíhi sa catyi tuhun cuan.

¹⁸ Sa ndisa catyi sihin ndo vatyi ñii ñi sa iyo andiví ta ñuhu ñuu ñiyiví, ma naa nu siin cuhva iyo sii ley ra Ndyoo. Tandíhi sa catyi ley sa tahan si cuu, ta cua cuu si.

¹⁹ Yucuan cuenda yoo ra ma zavaha minoo ley ra Ndyoo, vazu ley luhlu cuu ley cuan, ta tatu cua nacatyi tucu ra sihin ñiyiví vatyi ma zavaha ñu sii si, ra zavaha cuhva cuan cua cuu ra ra luhlu ca nu ndyaca ñaha ra Ndyoo. Zoco ra zavaha sii si ta zacuaha ra sii inga ñiyiví vatyi tahan si zavaha ñu sii si, minoo ra cahnu cua cuu ra nu ndyaca ñaha ra Ndyoo andiví.

²⁰ Vatyi catyi sihin maa ndo vatyi tatu ma zavaha ndo sa ndoo ca ta zavaha ndo tañi ra maestro cuenda

ley ta ra fariseo, nu yozo cuii ca ta ma cuu quihvi ndo nu ndyaca ñaha ra Ndyoo.

Ña vaha cuxaan yo sihin ñiyivi

21 Sa siñi ndo cuhva i catyi ra Ndyoo sihin ñiyivi ta sa naha. I catyi ra: “Ma cahñi ndo sii ñiyivi. Yoo ra cua cahñi sii minoo ñiyivi, tahan si sa cutuñi ra.”

22 Zoco yuhvi catyi sihin ndo tatu cuxaan ndo sihin minoo ñiyivi, tahan si sa tasi tuñi ra Ndyoo sii ndo. Ta tatu cahan cuehe ndo sii minoo ñiyivi, tahan si sa tasi tuñi ra cu tyiño sii ndo. A tatu catyi ndo vatyi laa xaan minoo ñiyivi, coto vaha ndo coto cuhun ndo andyaya.

23 Yucuan cuenda quivi cuhun vehe ñuhu ta ndohon ofrenda sa cua cuhvон sii ra Ndyoo, tatu nacohon iñun vatyi iyo sa zavohon sii inga ñiyivi

24 zandoon sa cua cuhvон sii ra Ndyoo yucuan. Ta cuhun xihnon ta ndacon tucahnу iñi sii ñu cuan, ta nacoo vohon sihin ñu, ta ziqui cuhun ta cuhvон ofrendon sii ra Ndyoo.

25 Tatu iyo ra sica cuatyи sohon, ta cuahan ra suhun nu ndyaa juez, nducun cuhva nacoo vohon sihin ra ityi cuahan ndo coto nacuhva cuenda ra suun sii ra juez. Ta ra juez cua nacuhva cuenda suun sii policía, ta cua tyihi ra cua suun vehe caa.

26 Ta sa ndisa catyi suhun vatyi tatu tacuan cua cuu, ma quiton ndya tyiyahvun tandihи sa tahan si tyiyahvun.

Nacatyи ra Jesúس vatyi ña vaha caca iñi rayи ndyehe ra inga ñaha tatu yivi ñazihи ra cuu

27 Sa siñi maa ndo tuhun i catyi ra Ndyoo ta sa naha vatyi ma cuu coo inga ñaha ndo ta ma cuu coo inga yи ndo.

28 Zoco yuhvi catyi sihin ndo vatyi tatu ndyehe ndo sii minoo ñaha ta cuñi ndo sii ña, sa zavaha ndo cuatyи sa cuu adulterio sihin

ña sisi añima ndo cuu si cuhva cuan.

29 Ta tatu ndyehe ndo minoo sa ndyehe ndo ta sa cuenda si ta cuñi xaan ndo zavaha ndo sa ña vaha, ma ndyehe ca ndo sii si coto coo cuatyи ndo ta cuhun ndo andyaya.

30 A tatu iyo sa tuhva ndo zavaha sihin ndaha ndo ta sihin si cuan quisaha coo cuatyи ndo, ma zavaha ca ndo sii si inga saha coto cuhun ndo andyaya.

Ma cuu zandoo rayи sii ñazihи ra ta tani tutu ñu

31 Ta catyi tucu Tuhun Ndyoo sihin ñiyivi ta sa naha: “Yoo ra cuñi zandoo sii ñazihи, cuñi si sa nducu ra cuhva tani tutu ñu sihin ley.”

32 Zoco yuhvi catyi sihin ndo vatyi tatu iyo minoo ra cua nducu ra cuhva tani tutu ra sihin ñazihи ra ta ñahñi cuatyи ña iyo sihin inga rayи, zoco cua coo cuatyи adulterio sii ña tatu zandoo yи ña sii ña ta quihin ña sii inga rayи. Ta ra cua tindaha sihin minoo ñaha zandoo yи sii, zavaha tucu maa ra cuatyи adulterio cuan.

Ña vaha sa tyiñaha yo Ndyoo

33 Ta sito tucu ndo vatyi i catyi ra Ndyoo sihin ñiyivi ta sa naha vatyi tatu sa tyiñaha ñu Ndyoo, cuñi si sa zavaha ñu cuhva catyi ñu.

34 Zoco yuhvi catyi sihin ndo vatyi ma cuaha xaan cahan ndo tatu cuñi ndo sa cua sino iñi ñiyivi sa cahan ndo. Ma catyi ndo: “Sito vaha Ndyoo.” Ma cahan ndo tuhun andivи vatyi yucuan cuu nu ndyaa maa ra Ndyoo.

35 Ma cahan ndo tuhun ñuu ñiyivi vatyi yucuan cuu nu sañi saha ra. Ta nu tuhun ñuu Jerusalén ta ma cahan ndo vatyi yucuan cuu ñuu ra Ndyoo, ra rey cahnu.

36 Ta nu tuhun xiñi ndo ta ma catyi ndo, vatyi maa ndo ta ma cuu zanducuisi ndo a zandutoon ndo numinoo ixi xiñi ndo sa ndisa.

37 Cuenda catyi ñi ndo: “Ndisa.” A catyi ndo: “Yivi.” Ta ñahñi ca

sa cua cahan ndo. Tatu ñaa ca sa tuhva ndo cahan, zañaha si vatyi ñu ndisa ndo.

Ma zavaha yo sa ña vaha sihin ñiyivi zavaha sa ña vaha sihin yo

³⁸ Sa siñi tucu ndo cuhva i tyaa ra Moisés ta sa naha nu catyi si vatyi tatu cañi ñiyivi sii ndo ta zativi ñu minoo sítí nuu ndo cuñi tucu si sa zativi minoo ra cu tyiño sítí nuu ñu. A tatu coco ñu minoo noho ndo, zuun ñi sihin cuhva cuan cua ndoho maa ñu, ta cua quita minoo noho ñu.

³⁹ Zoco yuhvi catyi sihin ndo: Ma zavaha ndo sa ña vaha sihin ñiyivi zavaha sa ña vaha sihin ndo. Tatu iyo ra cati minoo siyo xitun, cuhva ndihun inga siyo nacati ra.

⁴⁰ A tatu iyo ra tyaa cuatyi saton nuu ra cu tyiño ta ñahñi cuatyun ta cuñi ra quindyaa ra camison, cuhva ndihun siqueton sii ra.

⁴¹ A tatu yoo ra zañiñi suun sa cuizón carga ra minoo kilómetro, cuizón sii si uu kilómetro.

⁴² Cuhvon sii yoo ra sica suun, ta tatu cua caca noo ñiyivi sa suun, ma catyun vatyi ma cuhvon.

Cuñi si sa cuñi yo sii ñiyivi xaan iñi sii yo

⁴³ Ta sa siñi ndo cuhva tuhva ñiyivi catyi vatyi catyi ñu vatyi nacuñi xaan yo sii ra tahan yo, ta nacuxaan xaan yo ndyehe yo sii ra xaan iñi sii yo.

⁴⁴ Zoco yuhvi catyi sihin ndo vatyi cuñi ndo sii ñu xaan iñi sii ndo. Vaha cahan ndo sihin ñiyivi cahan ndya vaha ñi sihin ndo. Zavaha ndo sa vaha sihin ñiyivi ñu cuu ndyehe sii ndo. Ta cahan ndo sihin ra Ndyoo cuenda ñiyivi cahan cuehe sii ndo ta ñu zavaha sa ña vaha sihin ndo.

⁴⁵ Tatu zavaha ndo tacuan, cua cuu ndo zehe ra Ndyoo Zutu yo sa ndisa cuii, ra ndya andiví, vatyi maa ra i tyaa ñicandyi, ta zandisi si nu yucu ñiyivi ña vaha ta ñiyivi

vaha. Ta zacoon ra zavi ziqui ñu vaha ta ziqui ñu ña vaha.

⁴⁶ Tatu iñi sii ñiyivi cuñi sii ndo cuñi tucu ndo, ñahñi sa vaha zavaha ndo cuhva cuan vatyi tacuan tucu zavaha ñiyivi quiñi iyo tañi ra tava xuhun cuenda ra ndyaca ñaha. (Ta quiñi xaan iyo ra cuan cuñi maa ndo.)

⁴⁷ Ta tatu saha ndo ndyoo nacumí iñi sii ra tahan ndo, ¿ñaa sa vaha zavaha ndo cuhva cuan? Ndyo ñiyivi ña sito sii ra Ndyoo ta cahan ñu sihin tahan ñu cuhva cuan.

⁴⁸ Cuu ndo ñiyivi ñahñi maa cuatyi. Tañi Zutu yo, ra ndyaa andiví, vatyi ñahñi maa cuatyi ra iyo caña ñi.

6

Nacatyi ra Jesús yozo caa tahan si cuhva yo caridad sii ñiyivi

¹ Ma zavaha ndo sa vaha nuu ñiyivi ñi vatyi cuñi ndo sa ndyehe ñu. Tatu tacuan zavaha ndo, ñahñi sa cua cuhva Zutu yo, ra ndyaa andiví, sii ndo.

² Yucuan cuenda tatu tyindyee ndo sii ñu ndahvi, ma nacatyi ndo sihin tandihi ñiyivi tañi zavaha ra sahan vehe ñuhu ta nuyahvi ta zaha ra tuhun vatyi vaha xaan ra. Zavaha ra sa vaha vatyi cuñi ra sa cua zacahnu ñiyivi sii ra. Ta sa ndisa catyi sihin ndo vatyi sihin sa yucuan ñi ta sa ñihi ra sa vaha. Ñahñi ca sa cua cuhva maa ra Ndyoo sii ra.

³ Zoco tatu zavaha maa ndo tu-mañi iñi sii ñiyivi ndahvi, xehe ñi zavaha ndo sii si, minoo cuhva sa ma coto nu amigo ndo.

⁴ Xehe ñi tyindyee ndo sii ñiyivi ndahvi. Ta cua ndyehe ra Ndyoo Zutu yo cuhva zavaha ndo sa xehe ñi, ta cua cuhva maa ra sa vaha sii ndo sa cuenda si.

Zañaha ra Jesús yozo caa cuñi si cahan yo sihin ra Ndyoo

⁵ Ta tatu cua cahan ndo sihin ra Ndyoo, ma cuu ndo tañi ra zaha

tuhun vatyi vaha xaan ra, ta ña ndisa ra vatyi tahan iñi ra cahan ra sihin ra Ndyoo nu tuu ñiyivi vatyi cuñi ra sa cua ndyehe ñu. Yucuan cuenda cua cuiñi ndyaa ra sisi vehe ñuhu a ityi cahnu ta cahan ra sihin ra Ndyoo. Sa ndisa catyi sihin ndo vatyi sihin sa ndyehe ñiyivi sii ra sihin sa zavaha ra, ta sa ñihi ra sa cuáñi ra.

⁶ Zoco tatu cua cahan maa ndo sihin ra Ndyoo, quihvi ndo nu yoñi ndyehe, ta nacazi ndo yuvehe ta cahan ndo sihin ra Ndyoo Zutu yo sa maa ñi maa ndo. Cua ndyehe maa ra cuhva zavaha ndo sa xehe ñi, ta cua cuhva ra sa vaha sii ndo sa cuenda si.

⁷ Cuhva cahan ndo sihin ra Ndyoo ma cahan ndo zuun ñi sa cahan ndo uu a uñi saha tañi zavaha ñiyivi ña sito sii ra Ndyoo. Sica iñi ñu vatyi cua cuiñi ra Ndyoo sa cahan ñu tatu cuaha xaan cahan ñu.

⁸ Ma cuu ndo tañi maa ñu vatyi sa sito ra Ndyoo Zutu yo ñaa sa siñi ñuhu sii ndo cuee ca sa caca ndo sii ra.

⁹ Yucuan cuenda cahan ndo sihin ra Ndyoo tyehen:
Ndyoo Zutu ndi, ra ndyaa andivi, ii
xaan cuu ziví moo.

¹⁰ Nasaa quiví cua cundyaca ñohon
ihya ñuu ñiyivi.

Nazavaha ñiyivi cuhva cuñi moo
ihya ñuu ñiyivi tañi cuu si
ndya gloria.

¹¹ Cuhvon sa siñi ñuhu sii ndi minoo
minoo quiví.

¹² Ta zohon tucahnu iñi sii ndi sa
cuenda cuatyí ndi tañi maa
ndi zaha ndi tucahnu iñi sii
ñiyivi zavaha sa ña vaha si
hin ndi.

¹³ Ma cuhvon sa nducu coto ihñi
cuihna sii ndi coto zavaha
ndi sa ña vaha.

Vatyi moo cuu ra ndyaca ñaha,
ta moo cuu ra iyo xaan
tundyee iñi sii, ta tahan si
zacahnu tandihí ñiyivi suun
tandihí cuii tyiemvu. Ta
nacuu si sa ndisa.

Tacuan cahan ndo sihin ra Ndyoo.

¹⁴ Vatyi tatu zaha maa ndo tuc
ahnu iñi sii ñiyivi zavaha sa ña vaha
sihin ndo, tacuan tucu cua zavaha
Zutu yo ra ndyaa andivi. Cua zaha
ra tucahnu iñi sii maa ndo.

¹⁵ Zoco tatu ma zaha maa ndo
tucahnu iñi sii inga ñiyivi, ma zaha
tucu Zutu yo tucahnu iñi sii maa
ndo, ta ma zandasi ra cuatyí ndo.

*Zacuaha ra Jesús ziquí cuhva
cuñi si coo ndyitya yo*

¹⁶ Ta ziquí i catyi ra Jesús sihin
ñiyivi: Quiví ma casi ndo ta cahan
ndo sihin ra Ndyoo, ma zanducui
hya ndo iñi ndo tañi zavaha ñiyivi
zaha tuhun vatyi vaha xaan ñu. Ta
ma cahyi ndo ñiyaa nuu ndo tañi
zavaha maa ñu. Tacuan zavaha ñu
vatyi cuñi ñu sa cua ndyehe ñiyivi
sii ñu ta nacoto ñu vatyi ña sasi
ñu. Zoco catyi sihin ndo vatyi ñahñi
cua ñihí ñu sihin ra Ndyoo vatyi yivi
sa cuenda maa ra zavaha ñu sii si.

¹⁷ Zoco maa ndo tatu ñaa quiví
cua coo ndyitya ndo ta cahan ndo
sihin ra ndyoo, nacatya ndo nuu
ndo, ta tyihi ndo xahan xiñi ndo.

¹⁸ Tacuan zavaha ndo vatyi ma
coto ñiyivi vatyi ñá sasi ndo. Minoo
tuhun ñi maa ra Ndyoo cua ndyehe
cuhva zavaha ndo, ta cuaha sa
vaha cua cuhva ra sii ndo ta cua
ndyehe ñiyivi.

*Cuhva zavaha yo ta cua coo
cuaha sa vaha sii yo ndya andivi*

¹⁹ Ma zacaya xaan ndo xuhun
a ndaha tyiño ndo ihya ñuu ñiyivi
coto tivi si a coto zativí tiquixi sii si.
Ta coto quihvi ra zuhu ta quihin ra
sii si.

²⁰ Vaha ca tatu zacaya ndo ndaha
tyiño ndo ndya andivi vatyi yucuan
ma zatívi tiquixi sii si. Ta ma tivi si.
Ta ma cuu quihvi ra zuhu ta quihin
ra sii si.

²¹ Vatyi catyi sihin ndo vatyi nu
ndyaa sa cuca ndo, yucuan cuu nu
ndyaa añima ndo.

*Siti nuu yo cuu tañi minoo sa
zandisi sii yo ta cuu ndyehe yo nu*

cuahan yo, ta tacuan tucu tatu iyo sa ndisi sa saha ra Ndyoo añima yo, vaha ñiyivi cuu yo

²² Siti nuu ndo cuu tañi minoo sa zandisi sii ndo. Ta tacuan tucu añima ndo, tatu maa ñi sa vaha ra Ndyoo iyo añima ndo, vaha ñiyivi cuu ndo.

²³ Zoco tatu ña vaha siti nuu ndo, ñahñi sa zandisi nu cuahan ndo. Ta zuun ñi cuhva cuan, tatu ñahñi sa ndisi ra Ndyoo iyo añima ndo, a tatu iyo si zoco ña tyaa ndo yahvi sii si, cuaha xaan cuatyti ndo iyo, ta sica noo ndo nu ñaa.

Ma cuu cuñi xaan yo sii ra Ndyoo tatu cuñi xaan yo xuhun

²⁴ Ma cuu zatyino minoo muzu sa cuenda uu tahan patrón vatyi cua cuñi ca ra sii minoo patrón ra, ta ma cuñi ca ra sii inga ra. A sii minoo ra cua tyaa ra yahvi, ta sii inga ra ma tyaa ra yahvi. Ma cuu cuñi ndo sii ra Ndyoo ta cuñi ndo sii xuhun.

Zacuenda ra Ndyoo sii tandihí zehe ra

²⁵ Ta i catyi tucu ra Jesús: Yucuan cuenda catyi sihin ndo, ma caca xaan iñi ndo yozo caa cua ñihi ndo sa casi ndo ta sa coho ndo ñuu ñiyivi ya. Ta ma caca xaan iñi ndo yozo caa cua ñihi ndo zahma quihi ndo. Zoco nuu ra Ndyoo ñiñi ca añima ndo ta coño ñuhu ndo ta ziñui sa casi ndo ta sa ndihvi ndo. Maa ra saha sa ndito ndo, ta cua cuhva ra tandihí sa siñi ñuhu sii ndo.

²⁶ Ndyehe ndo cuhva iyo zaa sa sica noo ityi ziñui. Ña tasi ti. Ña zatyino ti. Ñahñi nu naquihin vaha ti tysiño zacuu ti, ndihí ca. Zoco sasi ti vatyi maa ra Ndyoo zacasi sii ti. Ta ñiñi xaan ca cuu maa ndo ityi nuu ra Ndyoo ta ziñui zaa cuan.

²⁷ ¿Ta yoo ndo cuu nduzucu ca ndo siin ca tatu caca xaan iñi ndo sa cuenda si? Ma cuu ca.

²⁸ ¿Ta ñaa cuenda sica xaan iñi ndo sa cuenda zahma ndo? Ndyehe ndo cuhva sahnu ita sisi

cuhu vatyi ña tavi si, ta ña cono si iza.

²⁹ Zoco catyi sihin ndo vatyi cuca xaan ra rey Salomón ta tyaqui xaan zahma ra, zoco ña tyaqui ca si ta ziñui minoo ita cuan.

³⁰ Ta tatu zandutyaqui xaan ra Ndyoo sii tu-ita sa iyo vityi ta ityaan cua nduu tu nducu ta cayu tu, tyaqui xaan tucu zahma cua cuhva ra sii maa ndo. Zoco maa ndo ña sino vaha iñi ndo sii ra.

³¹ Yucuan cuenda catyi sihin ndo: Ma caca xaan iñi ndo ta catyi ndo: “¿Ñaa sa cua casi ndi? ta ¿naa sa cua coho ndi? ta ¿yozo caa ñihi ndi zahma quihi ndi?”

³² Vatyi sica xaan iñi ñiyivi ña sito sii ra Ndyoo sa cuenda tandihí si cuan. Zoco maa Zutu mañi yo sa sito ra vatyi siñi ñuhu tandihí si cuan sii ndo.

³³ Vaha ca nducu ndo cuhva yozo caa cua cuhva cuenda ndo sii ndo sii ra Ndyoo vatyi cundyaca ñaha ra sii ndo ta maa ñi sa vaha xaan zavaha ndo tañi zavaha maa ra, ta tacuan ta cua cuhva ra tandihí sa siñi ñuhu sii ndo.

³⁴ Zacuenda maa ra Ndyoo sii ndo vityi ta ityaan, ndihí ca. Yucuan cuenda ma caca xaan iñi ndo sa cuenda sa cua cuñi si sii ndo ityaan. Caca iñi ndo vityi ñin ñi sa cuenda sa siñi ñuhu sii ndo vityi.

7

Ma cahan cuehe ndo sii ñiyivi

¹ Ma cahan cuehe ndo sii ñiyivi coto catyi tucu ra Ndyoo vatyi ña vaha zavaha tucu maa ndo.

² Vatyi cuhva ndyehe maa ndo sii inga ñiyivi, tacuan tucu cua ndyehe ra Ndyoo sii ndo. Ta tatu tyaa ndo cuatyti sata ñiyivi, zuun ñi cuhva cuan cua tyaa ra Ndyoo cuatyti sata maa ndo.

³ ¿Yozo caa vatyi cuu ndyehe ndo cuatyti luhlu ñi sa iyo sii inga ñiyivi ta tañi minoo mihin luhlu ñi sa ñoho siti nuu ñu cuu si? Ta ña ndyehe ndo cuatyti cahnu xaan sa

yo sii maa ndo, ta cuu si tañi minoo mihin cahnu sa ñoho nuu maa ndo.

⁴ Ta ñaa cuenda catyun sihin yañun vatyi nacuhva ra sa tavon mihin luhlu sa ñoho siti nuu ra, ta ña tuu iñun sa ñoho minoo mihin cahnu siti nuu moo.

⁵ Cuhva cuan, zohon tuhun vatyi vaha xoon, ta ña ndisa. Tava xihnon mihin sa ñoho siti nuu moo, ta ziñi cua ndundisi ndyehun, ta cua cuu tavon mihin luhlu sa ñoho siti nuu yañun.

⁶ Ta ma zañiñi ndo ta cahan ndo Tuhun Ndyoo sihin ñiyivi ña cuñi coto, coto cañi ñu sii ndo. Tañi ina cuu ñiyivi ña cuñi Tuhun Ndyoo. Ta tañi zatívi quiñi sii sa vaha, tacuan tucu iyo maa ñu. Cua cahan ñu ndya vaha ñi sii Tuhun Ndyoo.

Ma cundih iñi ndo cahan ndo sihin ra Ndyoo

⁷ Caca ndo sii ra Ndyoo, ta cua cuhva ra sa sica ndo. Nanducu ndo, ta cua nañihi ndo. Cati ndo yuvehe, ta cua nuña si.

⁸ Vatyi tandih ndoho ra sica, cua nihi ndo. Ta tatu nanducu ndo, cua nañihi ndo. Ta tatu cati ndo yuvehe, cua nuña si.

⁹ Maa ndo ra cu zutu sa ndyihi, tatu cua caca zehun minoo pan, ¿atu cua cuhva ndo minoo yuu sii ra? Ña tacuan.

¹⁰ A tatu cua caca ra minoo tyiyaca, ¿atu cua cuhva ndo minoo coo?

¹¹ Ñiyivi quiñi cuu maa ndo, zoco sito ndo yozo caa cuhva ndo sa vaha sii zehe ndo, vaha xaan ca cua zavaha Zutu yo, ra ndyaa andivi. Cua cuhva ra sa vaha sii ñiyivi sica sii ra.

¹² Ta tatu cuñi ndo sa cua zavaha ñiyivi sa vaha sihin maa ndo, tacuan zavaha tucu maa ndo sihin maa ñu tandih saha vatyi yucuan cuu sa catyi ley ra Moisés ta libro i tyaa ra profeta ta sa naha.

Tihin yuvehe ta cuiñi ityi sa cuahan nu ndyaa ra Ndyoo

¹³ Nanducu ndo cuhva quihvì ndo yuvehe tihin vatyi quihin yuvehe

ta quihin ityi sa cuahan nu cunaa ñiyivi andyaya. Ta cuaha xaan ñiyivi cuahan ityi cuan.

¹⁴ Zoco tihin yuvehe ta cuiñi ityi sa cuahan nu ma cuu ca ñiyivi, ta zuhva cuiti ñi ñiyivi cua nañihi ityi cuan.

Nacoto yo tatu vaha ñiyivi tatu zavaha ñu sa vaha

¹⁵ Zazuenda ndo sii ndo sihin ra vatyia ta catyi ra vatyi cahan ra sa cuenda ra Ndyoo. Vasi ra tañi minoo mvee ticatyi, zoco añima ra ñoho sa quiñi caa.

¹⁶ Cuu nacoto ndo sii ra sa cuenda cuhva zavaha ra. Tañi yutu ña vaha, tacuan iyo ra vatyi minoo tu mihindya ma cuu cuhva tu mango. Ta minoo iñu ma cuhva tu uva.

¹⁷ Ta tacuan cuu si. Tandih yutu vaha, saha tu siti vaha. Ta tandih yutu ña vaha, ña vaha siti tu.

¹⁸ Minoo yutu vaha, ma cuu cuhva tu siti ña vaha. Ta minoo yutu ña vaha, ma cuu cuhva tu siti vaha.

¹⁹ Ta tandih yutu sa ña saha siti vaha, tuhva ñiyivi cahndya sii tu, ta cayu tu.

²⁰ Ta zuun ñi sihin cuhva cuan, cuu nacoto yo sii ñiyivi sihin cuhva zavaha ñu.

Ña tandih ñiyivi cuu quihvì nu ndyaca ñaha ra Ndyoo andivi

²¹ Ña tandih ñiyivi sa catyi sihin: "Zutu mañi yuu, Zutu mañi yuu", cuu quihvì ñu nu ndyaca ñaha ra Ndyoo andivi. Maa ñi ñiyivi zavaha cuhva cuñi ra Ndyoo Zuti, cuu quihvì ñu.

²² Quihvì cua tasi tuñi ra Ndyoo sii ñiyivi, cuaha xaan ñu cua catyi tye-hen sihin: "Zutu mañi yuu, nduhvi i cahan ndi sihin zivì moo, ta sihin zivì moo tava ndi tatyi ña vaha, ta i zavaha ndi cuaha xaan sa ndyityi." Cua catyi ñu.

²³ Zoco yuhvi cua catyi: “Ña site sii ndo. Cuini siyo ndo sii, ta cuahan ndo vatyi ñá zavaha ndo sa vaha sa i catyi sihin ndo.”

Cuhva cua cuu si sihin ñiyivi tyaa yahvi sa cahan ra Jesús, ta cuhva cua cuu si sihin ñiyivi ña tyaa yahvi

²⁴ Tyehen catyi sihin ndo, tatu yoo ra tyizoho sa quehin ta zavaha ra sii si, cuu ra tañi minoo ra siñi tuñi vaha. Cono xaan i sitya ra ndya tahan ra minoo yuu cahnu, ta i zandaa ra vehe ra ziqui yuu cuan.

²⁵ Ta i coon xaan zavi, ta i cucono yuu. Ta ñihi xaan i ñoho taty, zoco ñá nduva vehe cuan vatyi i zandaa ra sii si ziqui yuu cuan.

²⁶ Zoco ra siñi sa quehin ta ña zavaha ra sii si, cuu ra tañi minoo ra tondo xaan, ra i zandaa vehe nu ñiyiti ñi. Ñá zavaha ra cimiento si.

²⁷ Ta i coon zavi. Ta i cucono yuu, ta ñihi xaan i sicaa taty, ta i nduva vehe cuan, ta cua naa si.

²⁸ Ta nu i ndihí cahan ra Jesús, iyo xaan i cuñi ñiyivi sihin cuhva zacuaha ra

²⁹ vatyi zacuaha ra tañi minoo ra ndyaca ñaha. Ñá zacuaha ra tañi ra maestro cuenda ley.

8

Cuhva i zanduvaha ra Jesús sii minoo ra tyahyu

¹ Cuhva i noo ra Jesús yucu cuan, cuaha xaan ñiyivi i sindyico sii ra.

² Ta i tuhva minoo ra cuhu cuehe tyahyu sii ra Jesús. Ta i sicuiñi siti ra nuu ra ta catyi ra: Tata, iyo cuhva suun, ta cuu zanduvohon sii tatu cuñun.

³ Ta i tyizo ra Jesús ndaha ra xiñi ra, ta i catyi ra: Cuñi. Sa nduvohon. Ta zuun ñi caa cuhva cuan, i quita cuehe cuan sii ra, ta ndaha nduvaha ñi ra.

⁴ Ta i catyi ra Jesús sihin ra: Ndyehun vatyi ma nacatyun sihin numinoo ñiyivi. Cuhun nu ndyaa ra cu zutu, ta cuhvon ofrenda sii ra Ndyoo tañi i catyi ra Moisés cua

cuhva ñiyivi tatu sa nduvaha ñu. Ta tacuan ta cua coto tandihí ñiyivi vatyi sa i nduvohon.

Zanduvaha ra Jesús sii minoo muzu ra ndyaca ñaha sii zandaru

⁵ I quihvi ra Jesús ñuu Caper-naum, ta minoo ra ndyaca ñaha sii minoo ziendu zandaru i tuhva sii ra ta i sica ra tumañi ifi sii ra, ta catyi ra:

⁶ Tata, cuhu xaan minoo ra luhlu, ra cu muzi. Catuu ra, ta sa cuñi xii ra, ta ndyehe xaan ra tundoho.

⁷ Ta i catyi ra Jesús sihin ra: Cua cuhin, ta cua zanduvehi sii ra.

⁸ Ta i nacahan ra ndyaca ñaha sii zandaru cuan, ta i catyi ra: Ña tahan si sa cuhun vehi vatyi ra cahnu xaan ca cuu moo. Tatu cua catyi moo vatyi cua nduvaha muzi, cua nduvaha ra.

⁹ Vatyi zuun ñi iyo tucu ra ndyaca ñaha sii, ta iyo tucu zandaru ra ndyaca ñehi. Tatu catyi sihin minoo ra vatyi cuhun ra, cuhun ra. Ta tatu catyi sihin inga ra vatyi quisi ra, cua quisi ra. Ta tatu ñaa tyiño tave sii minoo muzi, zavaha ra sii si.

¹⁰ Tacuan i catyi ra, ta sa siñi ra Jesús cuhva cahán ra, iyo xaan i cuñi ra, ta i catyi ra sihin ñiyivi ndyico sii ra: Catyi sihin ndo vatyi tañaha ca nañihu sii minoo ra hebreo ra sino iñi sii ra Ndyoo tañi sino iñi ra ya.

¹¹ Ta catyi sihin ndo vatyi cua quisi cuaha xaan ñiyivi ndya ityi caña ñicandyi ta ndya ityi cua iñi, ta cua cundyaa ñu ta casi ñu sihin ra Abraham, ta ra Isaac ta ra Jacob nu ndyaca ñaha ra Ndyoo andivi.

¹² Zoco ñiyivi i tahan si cuhun yucuan, ma cuu cuhun ñu. Cua tyihi ra Ndyoo sii ñu minoo nu ñaa nu cua vacu xaan ñu, ta cua casi quihñi noho ñu sa cuenda tundoho sa ndyehe ñu.

¹³ Ta ziqui i catyi ra Jesús sihin ra ndyaca ñaha sii zandaru: Cuahan ndya vehun vatyi cuu si tañi cuhva sino iñun. Tacuan i catyi ra Jesús, ta

zuun ñi caa cuhva cuan i nduvaha muzu ra.

Zanduvaha ra Jesús sii tyizo ra Simón Pedro

¹⁴ Cuahan ra Jesús ndya vehe ra Pedro, ta yucuan i ndyehe ra sii tyizo ra Pedro. Catuu ña nu sito. Cuhu ña sihin cahñi.

¹⁵ I tiñ ra Jesús ndaha ña, ta i quita cahñi cuan. Ta i nduvita ña, ta i quisaha zavaha ña sa casi ra.

Zanduvaha ra Jesús sii cuaha xaan ñiyiví cuhu

¹⁶ Sa tyizo ñicandyi, ta sa tyanhan cuan i quisi ndyaca ñiyiví sii cuaha xaan ñu ñoho tatyi cuihna nu ndyaa ra Jesús. Ta i tava ra tatyi ña vaha cuan sihin minoo ñi tuhun cahan ra, ta i zanduvaha tucu ra sii tandihi ñu cuhu.

¹⁷ Tacuan i cuu si vatyi cua quita si cuhva i catyi ra Isaías; minoo ra profeta i cuu ra ta sa naha. Tyehen i catyi ra: “I quindaya ra cuehe yo, ta i zanduvaha ra sii yo.”

Ñu sa cuñi cundyico sii ra Jesús

¹⁸ Ta cuhva sa ndyehe ra Jesús vatyi cuaha xaan ñiyiví siconduu cuii yucu ñu sihin ra, i catyi ra vatyi cua yaha ra inga siyo miñi.

¹⁹ Ta i tuhva minoo ra maestro cuenda ley sii ra Jesús, ta i catyi ra sihin ra: Maestro, cuñi cundyique suun vazu ndya maa cuohon.

²⁰ Ta i catyi ra Jesús sihin ra: ¿Atu cundyee iñun? vatyi ñicuui ca ta iyo vehe ti, ta zaa iyo taca ti. Zoco ra i quisi ndya gloria, ñahñi maa vehe ra iyo.

²¹ Ta ziqui inga ra ndyico sii ra Jesús, i catyi ra sihin ra: Tata, cua cundyique suun, zoco cuatu noo ndya nacuu xihna zuti ta ziqui cua cundyique suun.

²² Ta i catyi ra Jesús sihin ra: Yoho cundyicon sii vityi, ta natyihí ñiyiví ña sito sii ra Ndyoo sii tahan sihi sihin ñu sisi ñuhu.

Zacutaxi ra Jesús tatyi sihin ndutya

²³ Tacuan ta i quihví ra Jesús minoo barco sihin ra i casi ra.

²⁴ Ta i quisaha caa minoo tatyi ñihí xaan ndya cuhva ndya cuñi zahvi ndutya sii barco cuan. Ta quixi ra Jesús.

²⁵ Ta sahan ra sica noo sihin ra, ta i zandoyo ra sii ra, ta catyi ra sihin ra: ¡Tata, zacacun sii yo; sa cuñi cunaa yo!

²⁶ Ta i nacahan ra Jesús, ta catyi ra: ¿Ñacu yuhu xaan ndo? Zuhva cuui ñi sino iñi ndo. Catyi ra. Tacuan ta i nduvita ra, ta i cahan ra sihin tatyi ta sihin ndutya, ta i cutaxi si.

²⁷ Ta iyo xaan i cuñi ra ndihí sihin ra, ta catyi ra: ¿Yoo ra cuu ra ya? vatyi cuhva ndya tatyi ta cuhva ndya ndutya ta tyaa si yahvi sii ra.

Ra sa ñoho tatyi cuihna

²⁸ Ta cuhva sa i saa ra Jesús inga siyo miñi cuan ndya nu cu si Gadara, i quita uu tahan ra nu ñaña, ta i tuhva ra sii ra. Ñoho tatyi cuihna sii nduu tahan ra cuan, ta xaan xaan ra ndya cuhva yoñi cuu yaha ityi cuan.

²⁹ Ta i quisaha cana saa ra, ta catyi ra: ¿Ñaa sa cuñun sihin ndi, yoho Jesús zehe ra Ndyoo? ¿Atu wasi zandyehun tundoho sii ndi cumañi ca sa tahan si quiví?

³⁰ Tacuan i zacahan cuihna sii ra cuan. Ta yatyi ñi yucuan sica noo cuaha xaan quini. Sasi ti.

³¹ Ta i sica tatyi cuihna cuan tumañi iñi sii ra Jesús vatyi tatu cua tava ra sii si, naquihví si sisi quini cuan.

³² Ta i catyi ra Jesús sihin si: Vaha, cuahan ndo. Ta i quita tatyi cuihna sii nduu tahan rayii cuan, ta i quihví si sisi quini cuan. Ta ziqui tandihi quini cuan, i sino ti nu iñi noo yuhu miñi, ta i sihi tandihi ti sisi ndutya.

³³ Ta ra zacuenda quini cuan, i sino ra, ta cuahan ra ndya ñuu, ta i nacatyi ra sihin ñiyiví tandihi sa i tahan ra siñoho tatyi cuihna cuan.

³⁴ Ta ziqui i quita tandihí ñiyivi ñuu cuan, ta cuahan ñu nu ndyaa ra Jesús vatyí cuñi ñu ndyehe ñu sii ra. Ta sa ndyehe ñu sii ra, i zañiñi ñu sii ra sa naquita ra ñuu ñu.

9

Zanduvaha ra Jesús sii minoo ra xii

¹ I quihví ra Jesús sisi minoo barco, ta i yaha ra ta saa ra inga siyo miñi, ta i saa ra zuun ñi ñuu maa ra.

² Ta i sindyaca ñiyivi sii minoo ra cuhu nu ndyaa ra Jesús. Ndyizo ra sii ra cuan sihin minoo tyuhva. Ta sa ndyehe ra Jesús cuhva sino xaan iñi tandihí ra, ta i catyi ra sihin ra cuhu cuan: Ra luhlu, ma nducuihya iñun. Sa ndasi cuatyun.

³ Tacuan ta zuhva ra maestro cuenda ley, i sica iñi ra: “Quiñi xaan cahan ra ya sii ra Ndyoo.” (Vatyí zaha ra Jesús tuhun vatyí Ndyoo cuu ra, cuñi ra cuan.)

⁴ Ta ra Jesús i sito ra ñaa sa sica iñi ra, ta i catyi ra sihin ra cuan: ¿Ñaa cuenda sica iñi ndo minoo cuhva ña vaha?

⁵ ¿Ñaa sa yíi ca catyi yo? ¿Atu yíi ca catyi yo: “Sa ndasi cuatyun”, a yíi ca catyi yo: “Nduviton ta cacon”? (Ña yíi catyi yo: “Sa ndasi cuatyun.” Vatyí yíi sa ndyehe yo cuu cuhva cuan. Ma coto ñiyivi tatu ndisa a ña ndisa. Zoco cua ndyehe ñu tatu zanduvaha yo sii minoo ñiyivi sa ndisa.)

⁶ Cua zañehi sii ndo vatyí iyo cuhva sii vii, ra i quasi ndya gloria, sa zandasí cuatyí ñiyivi ñuu ñiyivi. Ta ziqui i catyi ra Jesús sihin ra xii: Nduviton. Nacuhun tyuhvon, ta cuhun ndya vehun.

⁷ Tacuan ta i nduvita ra xii cuan, ta cuahan ra ndya vehe ra.

⁸ Ta sa ndyehe ñiyivi cuhva cuan, i yuhu xaan ñu, ta i zacahnu xaan ñu sii ra Ndyoo vatyí i saha xaan ra cuhva sii ra Jesús.

Cana ra Jesús sii ra Mateo

⁹ I quita ra Jesús yucuan, ta i ndyehe ra sii minoo ra nañi Mateo. Ndyaa ra nu zatyiayahvi ra sii ñiyivi cuenda xuhun ra ndyaca ñaha. Ta i catyi ra sihin ra: Coho sihin. Tacuan ta i nduvita ra Mateo, ta cuahan ra sihin ra.

¹⁰ Yaha zuhva quiví ta sahan ra Jesús sa casi ra xita vehe ra Mateo. Ta iñi ñi sihin ra Jesús ta sihin ra sica noo sihin ra sasi cuaha xaan ra tava xuhun cuenda ra ndyaca ñaha ta inga ra iyo cuatyí.

¹¹ Ta sa ndyehe ra fariseo cuhva cuan, i ndaca tuhun ra sii ra sica noo sihin ra Jesús ta catyi ra: ¿Ñaa cuenda sasi ra maestro ndo sihin ra tava xuhun ta sihin inga ra iyo cuatyí?

¹² Ta i siñi ra Jesús tuhun cuan, ta i catyi ra: Ñiyivi iyo vaha, ña siñi ñuhu minoo médico sii ñu, zoco sii ñu cuhu siñi ñuhu médico.

¹³ Cuhun ndo ta cutuhva ndo cuhva catyi si nuu tutu ra Ndyoo nu catyi si tyehen: “Cuñi sa cua cundahvi iñi ndo sii ñiyivi, ta ma zañiñi xaan ndo sa cahñi ndo quiti sa cuenda cuatyí ndo.” Vatyí ña vasi cane sii ñiyivi vaha, vasi cane sii ñu iyo cuatyí vatyí cuñi sa cua zama ñu cuhva iyo ñu.

Ndaca tuhun ñiyivi sii ra Jesús tatu cuñi si sa coo ndyitya ñiyivi

¹⁴ Tacuan ta ra ndyico sii ra Juan, ra zacoo ndutyá sii ñiyivi, i tuhva ra sii ra Jesús, ta i ndaca tuhun ra sii ra: ¿Ñaa cuenda vatyí maa ndi ta ra fariseo tuhva xaan ndi coo ndyitya, ta rasa noo sihin moo, ña tuhva ra?

¹⁵ Ta i nacahan ra Jesús ta catyi ra: ¿Atu cuu sa ma casi ñu ñoho minoo vico tindaha iñi ñi sa ndyaa ra i tindaha sihin ñu? Ma cuu. Zoco cua saa quiví cua cuhun ra i tindaha, ta ziqui ndisa vatyí ma casi ñu.

¹⁶ Tacuan i catyi ra Jesús, ta ziqui i cahan ra ziqui inga cuhva ta catyi ra: Yoñi ñiyivi natyaa zuhva zahma saa sii zahma sahnu vatyí cua ndiyí

zahma saa cuan, ta cua tahndya ca zahma sahnu cuan.

17 Ta inga cuhva, yoñi zavaha ndixi panela saa sisi quizi sahnu vatyi cua cuizo si ta ndaa si ta cua cahndi quizi sahnu cuan. Cuñi si quizi saa tatu zavaha ñiyivi ndixi panela saa vatyi ma tahvi quizi cuan, ta ma ndoyo ñuhu ndixi cuan. (I cahan ra Jesús cuhva ya vatyi ma cuu nazaca yo cuhva zacuaha maa ra sihin costumbre sahnu.)

Nduvaha zehe ra Jairo, ta i tiñ minoo ñaha yuzahma ra Jesús

18 Nii ñi sa cahan ra Jesús cuhva cuan, ta i saa minoo ra cu tyiño cuenda ñu hebreo, ta i sicuñi siti ra nuu ra Jesús, ta catyi ra: Sa sihi minoo zehi, zoco tatu cua cuhun ndya vehi ta tyizon ndohon sii ña, cua nandoto ña. Catyi ra.

19 Ta i nduvita ra Jesús sihin ra sica noo sihin ra, ta cuahan ra sihin ra cuan.

20 Ta ityi cuahan ra Jesús, i tuhva minoo ñaha sii ra. Sa usi uu cuiya sa cuhun ña, cuehe sa cuu ña niñi. Ta i quisi ña ityi sata ra Jesús, ta i tiñ ña yuzahma ra.

21 Vatyi sica iñi ña: "Vazu zahma ñi ra cua tiin, ta nduvehi."

22 Zoco i nasico cava ra Jesús, ta i ndyehe ra sii ña, ta catyi ra: Cuzii xaan iñun, zih. I nduvohon vatyi i sino iñun sii. Ta zuun ñi caa cuhva cuan i nduvaha ña.

23 Ta cuhva sa saa ra Jesús vehe ra cu tyiño cuan, i ndyehe ra vatyi sa tivi música, ta cuvaa xaan ñiyivi, ta sacu saa ñu.

24 Ta i catyi ra sihin ñu: Quita ndo ihya. Ñá sihi ña luhlu ya. Quixi ña. Tacuan i catyi ra, ta i sacu ndyaa ñu sii ra.

25 Zoco i tava ra Jesús sii ñu, ta ziqui i quihvi ra, ta i tiñ ra ndaha ña, ta i nduvita ña.

26 Ta nacahnu cuii ityi cuan i sito ñiyivi cuhva i cuu.

Zanduvaha ra Jesús sii uu tahan ra cuaa

27 Ta sa quita ra Jesús yucuan, i sindyico uu tahan ra cuaa sii ra, ta cana saa ra, ta catyi ra: ¡Cundahvi iñun sii ndi Zehe ra David!

28 Ta sa yaha quihvi ra Jesús sisi vehe, i tuhva ra cuaa cuan sii ra. Ta i ndaca tuhun ra Jesús sii ra: ¿Atu sino iñi ndo vatyi cuu zanduvehi sii ndo? Ta i nacahan ra cuan, ta catyi ra: Sino iñi ndi, tata.

29 Tacuan ta i tiñ ra Jesús siti nuu ra, ta i catyi ra: Nacuu si tañi cuhva sino iñi ndo.

30 Tacuan i catyi ra Jesús, ta i nduvaha siti nuu ra cuan. Ta i nacatyri ra Jesús sihin ra vatyi ma nacatyri ra sihin numinoo ñiyivi.

31 Zoco cuahan ra ta i nacatyri ra sihin tandíhi ñiyivi ityi cuan cuhva i zavaha ra Jesús.

Zanduvaha ra Jesús sii minoo ra ñehe

32 Ta cuhva sa cua quita ra yucuan, i quisi ndyaca ñiyivi sii minoo ra ñehe sii ra Jesús. Noho minoo tatyri cuihna sii ra cuan.

33 I tava ra Jesús sii tatyri cuihna cuan, ta ziqui i quisaha cahan ra fiehe cuan. Ta iyo xaan i cuñi ñiyivi, ta i catyi ñu: Tañaha ca ndyehe maa yo ñiyivi hebreo minoo sa tyehen.

34 Zoco i catyi ra fariseo: Ihya ra tava tatyri cuihna sihin tundyee iñi sii ra cu nuu sii cuihna.

Cundahvi xaan iñi ra Jesús sii ñiyivi

35 I sica noo ra Jesús tahan tahan ñuu nahnu ta ñuu ndyihi. Zacuaha ra sii ñiyivi sisi vehe ñuhu tahan tahan nu cuahan ra. I nacatyri ra Tuhun Vaha sa cuenda cuhva ndyaca ñaha ra Ndyoo. Ta zanduvaha ra sii ñiyivi tandíhi cuii nuu cuehe.

36 Ta sa ndyehe ra sii ñiyivi, i cundahvi xaan iñi ra sii ñu vatyi ndyehe xaan ñu tundoho, ta sica noo ñu ityi cuan ityi ya tañi mvee tatyri sa yoñi zacuenda sii.

³⁷ Tacuan ta i catyi ra Jesús sihin ra sica noo sihin ra: Sa ndisa quehin vatyi cahnu xaan itu, zoco yoñi cuñi zatyíño ta zaquee ra sii si.

³⁸ Yucuan cuenda caca ndo sii sitoho itu vatyi natasi ra muzu cua zaquee sii si.

10

I casi ra Jesús usi uu tahan ra apóstol

¹ I casi ra Jesús usi uu tahan ra. Ta i saha ra tundyee iñi sii ra, ta i cuu tava ra tatyí cuihna, ta zanduvaha ra tandíhi nuu cuehe ta tundoho.

² Ta ihya cuu zívi sa usi uu tahan ra cuan. Xihna ca ra Simón. Pedro nañi tucu ra, ta ra Andrés yañi ra. Inga ra nañi Jacobo, ta ra Juan yañi ra. Nduu tahan ra cuu zehe ra Zebedeo.

³ Ta ra Felipe tucu, ta ra Bartolomé, ta ra Tomás, ta ra Mateo; ra i tava xuhun cuenda ra ndyaca ñaha cuu ra Mateo. Ta ra Jacobo zehe ra Alfeo, ta ra Lebeo. Nañi tucu ra Tadeo.

⁴ Ta inga ra nañi ra Simón. Maa ra cuu cuenda minoo ityi ra cuñi zama sii ra ndyaca ñaha. Ta inga ra nañi ra Judas Iscariote. Cuee ca ta i xico ra sii ra Jesús.

I tasi ra Jesús sii sa usi uu tahan ra i casi ra vatyi cua nacatyí ra Tuhun Ndyoo sihin ñiyívi

⁵ I tasi ra Jesús sii sa usi uu tahan ra cuan, ta ihya cuu sa i catyi ra sihin ra: Ma cuhun ndo nu yoñi ñiyívi hebreo, ta ma quihví ndo nuu nu cu si Samaria.

⁶ Zoco cuhun ndo nu yulu ñiyívi hebreo vatyi tañi mvee ticatyí sa cuu naa cuu ñu.

⁷ Ta ityi cuahan ndo, nacatyí ndo Tuhun Ndyoo sihin ñiyívi, ta catyi ndo vatyi sa cuñi saa quívi cundyaca ñaha ra Ndyoo ñuu ñiyívi.

⁸ Zanduvaha ndo sii ñu cuhu. Zanandoto ndo sii ñu i sihi. Zanduvaha ndo sii ñiyívi cuhu cuehe tyahu, ta tava ndo tatyí cuihna. Sa

caha ñi ñihi maa ndo cuhva ya, ta sa caha ñi tyindyee maa ndo sii ñiyívi.

⁹ Ma cuizo ndo xuhun cuenda ityi, nu xuhun cuaan, ta nu xuhun cuisi, ta nu xuhun cuatyí.

¹⁰ Numinoo yíti ma cuizo ndo. Ma cuizo ndo inga camisa a zapato a minoo tutatu vatyi tahan si sa cuhva ñiyívi sa casi ra zatyíño tañi maa ndo.

¹¹ Tatú cua saa ndo minoo ñuu cahnu a ñuu luhlu, nanducu ndo sii minoo ra vaha, ta ndoo ndo vehe ra ndya quívi cua quita ndo ñuu cuan.

¹² Cuhva sa saa ndo minoo vehe catyi ndo: “Nacoo sa vaha sii ra Ndyoo sihin ndo.”

¹³ Ta tatu vaha ñiyívi cuu ñu vehe cuan, nandoo si tacuan, zoco tatu yívi ñiyívi vaha cuu ñu, naquihin ndo tuhun vaha i cahan ndo sihin ñu.

¹⁴ Ta tatu ma tiñ cuenda ñiyívi sii ndo, ta ña cuñi ñu tyizoho ñu sa cahan ndo, quita ndo vehe cuan ta ñuu cuan ta naquízi ndo saha ndo vatyi ma cuhun nu ñiyaca ñuu cuan sihin ndo.

¹⁵ Sa ndisa catyi sihin ndo vatyi quívi cua tasi tuñi ra Ndyoo sii ñiyívi, cuaha ca tundoho cua ndyehe ñiyívi ñuu cuan ta ziqui ñiyívi ñuu Sodoma ta ñuu Gomorra.

Cuhva cua zavaha ñiyívi sa ña vaha sihin ñiyívi sino iñi

¹⁶ Ndyehe ndo, tañi mvee ticatyí cuu maa ndo, ta tasi sii ndo nu yulu lobo. Listo xaan cuu ndo tañi coo, zoco mazu xaan cuu iñi ndo tañi paloma.

¹⁷ Ta zacuenda vaha ndo sii ndo sihin ñiyívi vatyi cua cuhva cuenda ñu sii ndo sii ra cu tysiño. Ta cua cañi ñu sii ndo sisi vehe ñuhu.

¹⁸ Ta cundyaca ñu sii ndo nuu ra ndyaca ñaha ta nuu ra gobierno sa cuenda mi. Ta tacuan ta cua ñihi ndo cuhva cahan ndo sa cuenda mi nuu ra cuan ta nuu ñiyívi sa yívi ñiyívi hebreo cuu.

¹⁹ Ta cuhva sa cua cuhva cuenda ñu sii ndo sii ra cu tysiño, ma caca xaan iñi ndo ñaa sa cua cahan ndo

vatyi sa zuun ñi caa cuhva cuan cua cuhva maa ra Ndyoo tuhun cua cahan ndo.

²⁰ Vatyi yívi maa ndo cua cahan. Tatyi Ií maa ra Ndyoo sa iyo añima ndo cua cuhva ra tuhun cua cahan ndo.

²¹ Cua xico tuhun rayii zuun ñi sii yañi ra, ta cua cahñi ñiyivi sii ra. Ta cua xico tuhun zutu sa ndyihi sii zehe ra. Ta cua cuxaan zehe ñiyivi sihin zutu ñu ta sihin zihí ñu, ta cua cuhva cuenda ñu sii ñu vatyi cahñi ñiyivi sii ñu.

²² Tandihi ñiyivi ñuu ñiyivi cua cuxaan sihin maq ndo sa cuenda mi, zoco ra ma zaña tuhin ndya nu cua ndihi tyiemvu, yucuan ra cua cacu.

²³ Tatu quiñi xaan zavaha ñiyivi sihin ndo minoo ñuu, cono ndo ta cuhun ndo ndya inga ñuu. Vatyi sa ndisa catyi sihin ndo vatyi tañaha ca ndihi cuhun ndo tandihi ñuu ñiyivi hebreo ta cua quisi tucu ra i quisi ndya gloria.

²⁴ Ña cahnu ca cuu minoo ra ndyico sii ra ta ziqui ra cu nuu sii ra. Ta ña cahnu ca cuu minoo muzu ta ziqui patrón ra.

²⁵ Ra ndyico sii ra, nandoo ra vaha cuu ra tañi ra cu nuu sii ra. Ta nandoo ra cu muzu vaha cuu ra tañi patrón ra. Tatu mi, ra cu nuu vehe, ta catyi ñiyivi vatyi ra cu nuu sii cuihna sa nañi Beelzebú cui, cuaha ca sa cua cahan ñu sii zehi.

Ra tahan si yuhu yo

²⁶ Yucuan cuenda ma yuhu ndo sii ñiyivi. Ñahñi tuhun xehe sa ma quita nu ndisi. Ta ñahñi sa ñoho xehe ta ma coto ñiyivi sii si.

²⁷ Tandihi tuhun cahan xehi sihin ndo, nacatyi ndo sihin ñiyivi. Ta tuhun sa xehe xaan quehin sihin ndo, cana saa ndo sii si ndya xiñi vehe.

²⁸ Ma yuhu ndo sii ñiyivi cahñi coño ñuhu ndo vatyi ma cuu cahñi ñu añima ndo. Vaha ca cuyuhu ndo sii ra sa cuu cahñi sii ndo sa ndisa cuii ta zacuhun ra sii ndo andyaya.

²⁹ Cuyahvi uu tahan zaa ndyihi sa minoo peso. Caha xaan ndyaa ti, zoco ma cuu cuu numinoo ti ta canacava ti nu ñuhu tatu ma cuhva Zutu yo.

³⁰ Ta ndya cuhva ndya ixi xiñi ndo, ta sito ra Ndyoo yozo tahan si.

³¹ Yucuan cuenda ma yuhu ndo. Yahvi xaan ca ndyaa maa ndo ta ziqui ca cuaha xaan zaa ndyihi.

Ma yuhu yo cahan yo Tuhun Ndyoo sihin ñiyivi

³² Tandihi ñiyivi sa cua catyi sihin inga ñiyivi vatyi sito ñu sii, yuhvi cua catyi tuqui sihin Zuti, ra ndyaa andivi, vatyi site sii ñu cuan.

³³ Zoco ñiyivi cua catyi ityi nuu inga ñiyivi vatyi ña sito ñu sii, yuhvi cua catyi tuqui ityi nuu Zuti, ra ndyaa andivi, vatyi ña site sii ñu cuan.

Sa cuenda ra Jesú斯 ta ma cuu cu-iñin ñiyivi

³⁴ Ma caca iñi ndo vatyi vasi cuhve sa coo sa taxi ñuu ñiyivi. Ña tacuan cuu si. Vasi ndyaque cuhva cahñi tahan ñiyivi.

³⁵ Vasi zacahñi tehin rayii sihin zutu ra ta ñu zihí sihin zihí ñu. Ta cua cahñi tahan sono ñiyivi sihin tyizo ñu.

³⁶ Ta cua cuxaan tahan xaan ñiyivi sihin ñiyivi sii ñu.

³⁷ Ra cuñi ca sii zutu ra a sii zihí ra ta ziqui sii mi, ña tahan si cuu ra ñiyivi cuenda mi. Ta ra cuñi ca sii zehe yii ra a sii zehe zihí ra ta ziqui sii mi, ña tahan si cuu ra ñiyivi cuende.

³⁸ Ta ra ña cuñi cundyico sii, vazu cuu ra cuende, ña tahan si cuu ra ñiyivi cuende.

³⁹ Ra sa cuñi coo vaha xaan ta zacuenda ra sii ra ñuu ñiyivi, cunaar ra, ta cunaar ndaha tyiño ra sihin ra. Zoco ra saha sa cuu sa cuenda mi, cua cundito ra tandihi cuii tyiemvu.

Cuhva ñihi ñiyivi sa vaha sii ra Ndyoo

⁴⁰ Tatu tiin cuenda ñiyivi sii maando, tiin cuenda ñu sii mi. Ta tatu tiin cuenda ñiyivi sii mi, tiin cuenda ñu sii ra i tasi sii.

⁴¹ Ra tiin cuenda sii minoo ra profeta vatyi vasi ra sa cuenda ra Ndyoo, zuun ñi sa vaha cua cuhva ra Ndyoo sii ra tiin cuenda cuan tañi cua cuhva ra sii ra profeta cuan. Ta minoo ra tiin cuenda sii minoo ra vaha vatyi vaha ra, zuun ñi sa vaha cua cuhva ra Ndyoo sii ra tañi sa cua cuhva ra sii ra vaha cuan.

⁴² Ta yoo ra cua cuhva, vazu minoo vaso ndutya visi ñi, sii minoo ra luhlu. Ndisa cuii cua cuhve sa vaha sii ra tatu zavaha ra cuhva cuan sa cuenda sa vatyi ndyico ra sii mi.

11

Tasi ra Juan sii uu tahan ra sica noo sihin ra ndya nu ndyaa ra Jesús

¹ Sa ndihí zacuaha ra Jesús cuhva ya sii sa usi uu tahan ra i casi ra, ta ziqui i quita ra yucuan tacuahan ra ziin ziin ñuu ityi cuan cua zacuaha ra ta nacatyi ra Tuhun Ndyoo sihin ñiyivi.

² Ñoho ra Juan vehe caa, ta i saa tyiñu nu ndyaa ra sa cuenda cuhva zavaha ra Jesús. Yucuan cuenda i tasi ra sii uu tahan ra ndyico sii ra vatyi cua cahan ra sihin ra Jesús.

³ Ta i ndaca tuhun ra cuan sii ra Jesús: ¿Atu yoho cuu ra Cristo, ra cua zacacu sii ndi a cuatu ca ndi naquisi inga ra?

⁴ Ta i nacahan ra Jesús, ta i catyi ra sihin ra cuan: Cuahan ndo ta nacatyi ndo sihin ra Juan tandihí sa i ndyehe ndo ta sa siñi ndo.

⁵ Nacatyi ndo sihin ra cuhva nandyehe ra cuaa, ta nacaca ra coxo ta nduvaha ra tyahyu ta nacuiñi ra zoho, ta cuhva nandoto ñiyivi i sihi. Ta nacatyi ndo cuhva siñi ñiyivi ndahvi Tuhun Vaha, cuhva cua cacu ñu.

⁶ Ta catyi ndo sihin ra vatyi zii xaan cua cuñi ñiyivi tatu ma zaña ñu sa sino iñi ñu sii.

⁷ Tacuan i catyi ra Jesús sihin ra ndyico sii ra Juan. Ta sa yaha cuahan ra cuan ta ziqui i quisaha cahan ra Jesús sihin ñiyivi sa cuenda ra Juan, ta catyi ra: ¿Ñaa sa sindyehe ndo quivi i sahan ndo nu ityi xaan nu yoñi ñiyivi iyo? ¿Atu sahan ndo vatyi cua ndyehe ndo minoo tuñii sa zacanda tatyi?

⁸ Tatu yivi si cuan ¿ñaa sa sindyehe ndo? ¿Atu sahan ndo vatyi cua ndyehe ndo sii minoo ra ñoho zahma vaha? Ña tacuan vatyi sa sito ndo vatyi ñiyivi ñoho zahma vaha xaan, iyo ñu vehe rey.

⁹ ¿Ñaa sa sindyehe ndo? ¿Atu sahan ndo vatyi cua ndyehe ndo sii minoo profeta? Zuumi. Ta catyi sihin ndo vatyi ñiñi xaan ca ra cuu maa ra Juan ta ziqui ca tandihí ca ra profeta.

¹⁰ Vatyi ra cuan cuu ra cahan si tuhun nuu tutu ra Ndyoo nu catyi si: “Yuhvi ra Ndyoo cua tasi sii minoo ra ityi nuu ca, ta cua zanduvalha ra cuhva iyo ñiyivi vatyi cua saa moo cuee ca, ta cua tyizoho ñu sa cohon.”

¹¹ Sa ndisa catyi sihin ndo vatyi tandihí rayii ra cacu, yoñi inga ca ra ñiñi ca ta ziqui ra Juan. Zoco ra luhlu ca, ra cuhun nu ndyaca ñaha ra Ndyoo, cahnu ca ra ta ziqui ra Juan, ra zacoo ndutya sii ñiyivi.

¹² Ta ndya quivi i saa ra Juan ta ndya vityi cuahan coyo ñiyivi gloria, ñu cuñi ndisa cuii cuhun. Zoco zañihi ñu ta cua zahacanaa ñu sii si.

¹³ Tandihí ra profeta ta ley ra Moisés ndihí ca, i cahan si sa cuenda cuhva cua cundyaca ñaha ra Ndyoo ndya cuhva ndya quivi i saa ra Juan.

¹⁴ Ta tatu cuñi ndo sino iñi ndo sa quehin, ra Juan cuu ra Elías, ra tahan si quisi.

¹⁵ Tatu ndyaa zoho ndo, cuiñi ndo.

¹⁶ ¿Ñaa ñi cuhva quehin sihin ñiyivi iyo vityi? ¿Tañi yoo ñi sa caa caa ñu? Caa ñu tañi sa ndyihí sa

ndyaa nuyahvi, ta cana saa si sii tahan si, ta catyi si:

17 "Tíví ndi cutu, ta ñá sata sahando. Ta sata ndi yaa tucuihya iñi, ta ñá sacu ndo."

18 Tacuan iyo maa ndo vatyi i quisi ra Juan, ta ñá sasi vaha ra, ta ñá sihi ra vino, ta catyi ndo vatyi ndohoo minoo taty i cuihna sii ra.

19 Ta ziqui i saa mi, ra i quisi ndya gloria. Ta sasi ta sihi, ta catyi ndo vatyi tuhva xein coho ta cuahyi xein. Ta cuxaan ndo vatyi vaha ñiyiví cui sihin ra iyo cuaty i ta sihin ra tava xuhun cuenda ra ndyaca ñaha. Tacuan catyi ndo, zoco saha ra Ndyoo sa siñi tuñi maa ra sii ñiyiví sino iñi sii ra. Ta cua zañaha ñu sii maa ndo vatyi vaha sa siñi tuñi ra Ndyoo.

Cua ndyehe xaan ñiyiví tundoho vatyi ña tyaa ñu yahvi sa cahan ra Jesús

20 Tacuan ta ziqui i quisaha cuxaan ra Jesús ta cahan ra sihin sa minoo minoo ñuu nu i zavaha xaan ra sa ndyityi vatyi ñiyiví ñuu cuan, ñá zama ñu cuhva iyo ñu. Tyehen i catyi ra Jesús:

21 ¡Ndahvi yoho ñuu Corazín! ¡Ta ndahvi yoho ñuu Betsaida! Vatyi tatu i zavehi sa ndyityi ndya ñuu Tiro ta ñuu Sidón tañi sa ndyehe maa ndo, sa ndisa vatyi cua zama ñu cuhva iyo ñu, ta cua nducuihya xaan iñi ñu sa cuenda cuaty i ñu ndya cuhva ndihvi ñu zahma toon ta tyaa ñu ñiyaa xiñi ñu.

22 Zoco quivi cua tasi tuñi ra Ndyoo sii ñiyiví, ñihi ca cua tasi tuñi ra sii maa ndo ta ziqui sii ñiyiví ñuu Tiro ta ñuu Sidón cuan.

23 Ta yoho ñuu Capernaum, ¿atú sica iñun vatyi cua ndoon ndya gloria? Cua noon ndya andyaya vatyi tatu i zavehi sa ndyityi ndya ñuu Sodoma tañi sa ndyehe ñiyiví ñuu Capernaum, ndisa vatyi ma zanaa ra Ndyoo ñuu Sodoma cuan ta cua coo si ndya cuhva ndya vityi.

24 Zoco catyi sihin ndo vatyi quivi cua tasi tuñi ra Ndyoo sii ñiyiví, ñihi ca cua tasi tuñi ra sii ndoho ra ñuu Capernaum ta ziqui sii ñiyiví ñuu Sodoma.

Naha ndo, ta cuhve sa quitatu ndo, catyi ra Jesús

25 Ta cuhva cuan i catyi ra Jesús: Zacahnu xein suun Ndyoo Zuti. Yoho ndyaca ñohon andivi ta ñuu ñiyiví. Tyixehun sa siñi tuñi suun sii ñiyiví sica iñi vatyi sito xaan ñu, ta zañohon sii si sii ñu cuu tañi sa ndyihí ñuu ñiyiví ya.

26 Tacuan zavohon vatyi tacuan cuñi moo.

27 Ta ziqui i catyi tucu ra Jesús: Saha maa ra Ndyoo Zuti tandihí sa iyo sii maa ra sii mi. Ta yoñi sa sito sii. Maa ñi ra Ndyoo Zuti cuu ra sito sii. Ta maa ñi mi site sii ra Ndyoo Zuti. Yoñi inga ra sito sii ra sa ndisa cuiti. Ta zañehi sii yoo ra cuñi, cuhva iyo Zuti sa ndisa.

28 Ñáha ndo, tandihí ndoho ra sitatu xaan sa cuenda tyiño ndo ta sa cuenda sa vee xaan ndyizo ndo cuaty i ndo ta cua cuhve sa quitatu ndo.

29 Cuhva ndo sa tyize yugo sa yozo xiñi mi xiñi ndo, ta cutuhva ndo sa cua zañehi sii ndo vatyi mi, vii xaan iye, ta zanduluhlu xein sii, ta cua nañihi ndo cuhva quitatu añima ndo.

30 Vatyi ña yii maa cua cuizo ndo yugo sa cua tyize xiñi ndo, ta carga sa cua cuizo ndo sa cuenda mi, ña vee si.

12

Tohon ra i casira Jesús yoco trigo quivi quitatu ñiyiví

1 Minoo quivi quitatu ñiyiví i yaha ra Jesús mahñu itu trigo ñiyiví. Ta i sizoco ra i casi ra Jesús, ta i quisaha tohon ra zuhva yoco trigo, ta i zavii ra, ta sasi ra sii si.

2 Ta cuhva sa ndyehe ra fariseo cuhva zavaha ra, i catyi ra sihin ra Jesús: Ndyeha, zatyiño ra sica noo

suhun, ta ña catyi ley yo sa zatyïño yo quïvï quitatu ñiyivï.

³ Zoco i catyi ra Jesús sihin ra: ¿Atu tañaha ca cahvi ndo cuhva i zavaha ra David ta ra ndihï sihin ra minoo quïvï i sizoco xaan ra?

⁴ I quihvi ra sisi vehe ñuhu, ta i quihin ra pan ii. Ta i sasi ra sii si, ta ña catyi ley sa casi ra sii si ta nu ra ndihï sihin ra. Maa ñi ra cu zutu tahan si casi pan cuan.

⁵ ¿Atu tañaha ca cahvi ndo nu ley nu catyi si vatyi zatyïño ra cu zutu sisi vehe ñuhu quïvï quitatu ñiyivï ta yivï cuatyï cuu si?

⁶ Ta catyi sihin ndo vatyi ihya iyo minoo ra cahnu ca ta ziqui vehe ñuhu.

⁷ Tatu sa sito ndo ñaa cuñi si catyi si nu i catyi ra Ndyoo vatyi cuñi ra sa cundahvi iñi ndo sii ñiyivï ta yivï ca sa cahñi ndo quiti ta cuhva ndo niñi ti sa cuenda cuatyï ndo, ma tyaa ndo cuatyï sata ñiyivï sa ñahñi cuatyï iyo.

⁸ Ta ra i quasi ndya gloria cui, ta ndyaca ñaha tuquí quïvï quitatu ñiyivï.

Zanduvaha ra Jesús sii minoo ra na-ityi ndaha

⁹ Tacuan ta cuahan ra Jesús, ta i quihvi ra vehe ñuhu.

¹⁰ Ta yucuan ndyaa minoo ra na-ityi ndaha. Ta inga ra yucuan, i cuñi ra nducu ra cuhva tyaa ra cuatyï sata ra Jesús, ta yucuan cuenda i ndaca tuhun ra sii ra Jesús: ¿Atu catyi ley sa zanduvaha yo sii ñiyivï quïvï quitatu yo?

¹¹ Ta i nacahan ra Jesús ta catyi ra: ¿Yoo ndoho tatu iyo minoo mvee ticateyi zono ndo ta canacava ti sisi minoo xahva quïvï quitatu ñiyivï, atu ma tava ndo sii ti?

¹² Ta jñiñi xaan ca cuu minoo ñiyivï ta ziqui minoo mvee ticateyi! Yucuan cuenda catyi ley vatyi cuu zavaha yo sa vaha quïvï quitatu ñiyivï.

¹³ Tacuan ta i catyi ra Jesús sihin ra na-ityi ndaha cuan: Nandica

ndohon. Ta i nandica ra ndaha ra, ta i nduvaha si tañi caa inga si.

¹⁴ Tacuan ta i quita ra fariseo, ta i quisaha sihñi tahan ra tyïño yozo caa cua cahñi ra sii ra Jesús.

Zavaha ra Jesús cuhva i tyaa minoo ra profeta ta sa naha

¹⁵ Ta sa sito ra Jesús cuhva cuan, i quita ra yucuan, ta cuaha xaan ñiyivï i sindyico sii ra. Ta i zanduvaha ra Jesús sii tandihï ñu cuhu.

¹⁶ Ta i saha ra tyïño sii ñiyivï i nduvaha vatyi ma nacatyi ñu yoo ra cuu ra.

¹⁷ Cuhva cuan i natahan si cuhva i nacatyi ra Isaías, minoo ra profeta, sa cuenda ra Jesús. Ihya cuu Tuhun ra Ndyoo i tyaa ra Isaías:

¹⁸ Ihya ra cuu muzi; i casi sii ra; cuñi xein sii ra, ta zii xaan cuñi sihin ra.

Cua cuhva xein Tatyil i sii ra, Ta cua nacatyi ra sihin ñiyivï sa yivï ñiyivï hebreo cuu vatyi ndoo xaan zavehi.

¹⁹ Ma tusi tahan ra tuhun. Ta ma cana saa ñi ca ra ta cahan ra. Ta ma zacahnu ra sii ra nuu ñiyivï.

²⁰ Ma cahnu ndihï ra numinoo tuñii yacua, ta ma ndahva ndihï ra ñúhu sa siin ñi cayu. (Cuñi si catyi si vatyi ma quindyaa ndihï ra tatu siin ñi sino iñi ñiyivï.)

Cua quindyaa ra cuhva ndyaca ñaha ñiyivï ña vaha, ta cua cundyaca ñaha ra minoo cuhva ndoo xaan.

²¹ Ta tandihï cuii ñiyivï cuu cunii xaan iñi ñu sii ra vatyi cua tyindyeer a sii ñu.

Catyri ra xaan iñi sii ra Jesús vatyi zatyïño ra sihin tundyee iñi sii cuihna

²² Tacuan ta i quasi ndyaca ñiyivï sii minoo ra cuaa ta ñehe ra nu ndyaa ra Jesús. Ta ñoho minoo tatyri cuihna sii ra cuan. Ta i zanduvaha ra Jesús sii ra, ta i cuu nandyehe ra ta nacahan ra.

23 Ta iyo xaan i cuñi tandihí ñiyiví, ta i catyi ñuu: ¿Atu ra ihyá cuu ra cu tata ra David, ra cua zacacu sii yo?

24 Zoco sa i siñi ra fariseo cuhva cahan ñiyiví, ta i catyi ra: Ra ihyá tava ra tatyí cuhna maa ñi sihin tundyee iñi iyo sii ra Beelzebú, ra cu nuu sii cuhna.

25 Ta sa sito ra Jesús cuhva sica iñi ra, ta i catyi ra: Tatu sahñi tahan xaan ñiyiví minoo ñuu, ndaha cua tiví ta naa ñuu cuan. Ta tacuan tucu minoo vehe ñiyiví, tatu sahñi tahan ñu sihin tahan ñu, yatyí xaan cua ndihí cuhva vaha yucu ñu.

26 Ta ma cahñi tahan ra cu nuu sii cuhna sihin inga cuhna vatyí tatu tacuan zavaha ra, yatyí xaan cua ndihí cuhva iyo sii ra. Ma tava cuhna sii cuhna.

27 Ta tatu yuhvi tave sii cuhna sihin tundyee iñi ra Beelzebú, ¿yoo sii tundyee iñi tava ra ndyico sii maa ndo sii si? Maa ra cua zacoto sii ndo vatyí ma tava minoo cuhna sii inga cuhna.

28 Ta yuhvi tave sii cuhna sihin tundyee iñi maa ra Ndyoo. Ta cuñi si catyi si vatyí ndisa cuita saaa cuhva ndyaca ñaha ra Ndyoo.

29 Ta ¿yoo ra cua cuu quihví vehe minoo ra ñihi xaan ta quihin ra ndaha tyiño ra tatu ma cuhñi xihna ra sii ra? Cuñi si sa cuhñi xihna ra sii ra ta ziquí cuu quindya ra ndaha tyiño ra.

30 Tatu ña zatyíño ñiyiví sihin, zatívi ñu tyiñe. Ta tatu ma tyindyee ñu sii, sa nacatyí Tuhun Ndyoo sihin ñiyiví, cuñi si catyi si vatyí ña saha ñu sa coto ñiyiví tuhín.

31 Yucuan cuenda catyi sihin ndo vatyí cua zaha ra Ndyoo tucahnu iñi tandihí cuatyí zavaha ñiyiví ta tandihí sa quiñi cahan ñu, zoco tatu cahan ñiyiví ndya vaha ñi sii Tatyi Ii ra Ndyoo, ma zaha ra Ndyoo tucahnu iñi sii ñu.

32 Tatu quiñi cahan ñiyiví sii vii, ra i quisí ndya gloria, cua zaha ra Ndyoo tucahnu iñi sii ñu. Zoco yoo

ra cahan quiñi sii Tatyi Ii, ma zaha ra Ndyoo tucahnu iñi sii ra nu ihyá ñuu ñiyiví ta nu inga ñuu ñiyiví sa cua coo cuee ca.

Nacoto yo tatu vaha minoo yutu tatu saha tu yucu vixi vaha

33 Minoo yutu vaha, saha tu siti vaha. Ta minoo yutu ña vaha, saha tu siti ña vaha. Nacoto yo ñaa yutu cuu tahan tahan tu sa cuenda siti saha tu.

34 ¡Coo xaan cuu maa ndo! ¿Yozo caa cuu cahan ndo tuhun vaha ta ña vaha maa ndo? Yuhu ndo cahan sa situ cuii añima ndo.

35 Minoo ra vaha, cahan ra tuhun vaha vatyí iyo sa vaha añima ra. Ta minoo ra ña vaha, ña vaha sa cahan ra vatyí iyo sa ña vaha añima ra.

36 Ta catyi sihin ndo vatyí quiví cua tyicuhva ra Ndyoo sii ñiyiví, ta cua nacatyí ñu ñaa cuenda i cahan ñu sa minoo minoo tuhun sa ña ñiñi.

37 Vatyí sa cuenda tuhun cahan ndo ta cua catyi ra Ndyoo tatu vaha ndo a ña vaha ndo.

Ñiyiví ña vaha cuñi ñu ndyehe ñu minoo sa ndityyi

38 Tacuan ta zuhva ra fariseo ta ra maestro cuenda ley i catyi ra sihin ra Jesús: Maestro, cuñi ndi ndyehe ndi minoo zeña sa ndityyi.

39 Ta i nacahan ra Jesús, ta catyi ra sihin ra: Ñiyiví quiñi xaan iyo ta ñu ña vaha, sica ñu sa ndyehe ñu sa ndityyi, zoco ma ndyehe ca ñu inga zeña ta ziquí cuhva i cuu ra Jonás, minoo ra profeta ta sa naha.

40 Vatyí tañi i ñoho ra Jonás uñi quiví ta uñi sa cuaa sisi tyiyaca cahnu, tacuan tucu cua quihi ra i quisí ndya gloria uñi quiví ta uñi sa cuaa sisi ñuhu.

41 Ñiyiví ñuu Nínive cua nduvita ñu ta cua tyaa ñu cuatyí sata ñiyiví iyo vityí, ta cua catyi ñu vatyí iyo cuatyí ndo vatyí ñiyiví ñuu Nínive cuan, i zama ñu cuhva iyo ñu sa i nacatyí ra Jonás Tuhun Ndyoo sihin ñu. Ta ihyá iyo minoo ra ñiñi ca ta ziquí ra Jonás.

⁴² Ta tacuan tucu minoo ñaha i sindyaca ñaha ndya siyo tyañuhu, cua nandoto ña quivi cua tyicuhva ra Ndyoo sii ñiyivi, ta cua tyaa ña cuatyi sata ndo vatyi sica xaan i quisi ña quivi cuan vatyi cua tyizoho ña sa siñi tuñi sa saha, ra Ndyoo sii ra Salomón. Ta ihya iyo minoo ra ñiñi ca ta ziqui ra Salomón.

Cuhva cua nandisi tucu tatyi ña vaha inga saha

⁴³ Tatu quita minoo tatyi ña vaha sii minoo ra, sica noo tatyi cuihna cuan nu ityi xaan, ta nanducu si nu cua quitatu si, zoco ña nañihí si nu quitatu si, ta catyi si:

⁴⁴ “Cunuhu tuqui ndya vehi nu i quite.” Ta sa nasaa si, nañihí si sii ra i quita si cuan. Ta añima ra cuu tañi minoo vehe sa yoñi ndyaa. Tihvi ta nduvii vehe cuan.

⁴⁵ Tacuan ta cuahan tatyi cuihna cuan ta quihin si inga usa tahan tahan si sa xaan ca ta ziqui maa si. Ta cuahan tandihí si cuan cua ndihvi si añima ra cuan. Ta yaha ca cuhva cua nanduu ra cuan ta ziqui sa xihna ñi. Ta tacuan tucu cua tahan ñiyivi ña vaha ya.

Zihí ra Jesús ta yañi ra

⁴⁶ Cahan ca ra Jesús sihin ñiyivi, ta i saa zihí ra ta yañi ra. I sicuyucu ñu sata vehe, ta i cuñi ñu cahan ñu sihin ra.

⁴⁷ Ta i nacatyi minoo ñiyivi sihin ra Jesús: Zihun ta yañun, nandyaa ñu sata vehe, cuñi ñu cahan ñu suhun.

⁴⁸ Zoco i catyi ra Jesús sihin ra cahan sihin ra: ¿Yoo sa cuu zihí? ¿Ta yoo sa cuu yañi?

⁴⁹ Tacuan i catyi ra, ta ziqui i zañaha ndaha ra nu yulu ñiyivi sica noo sihin ra, ta i catyi ra: Ñu ihya cuu tañi zihí, ta ra ihya cuu tañi yañi.

⁵⁰ Vatyi yoo ñiyivi zavaha cuhva cuñi Zuti, ra ndyaa andivi, yucuan ñu cuu tañi cuhve ta yañi ta zihí.

22
13
Cahan ra Jesús ziqui minoo cuhva, cuhva ra tasi

¹ Quiví cuan i quita ra Jesús vehe, ta i sicundya ra yuhu miñi.

² I titahan cuaha xaan ñiyivi nu ndyaa ra, ta yucuan cuenda i quihvi ra Jesús sisi minoo barco, ta i sicundya ra. Ta i ndoo tandihí ñiyivi nu ñiyiti.

³ Tacuan ta i zacuaha ra sii ñu ziqui cuaha xaan cuhva, ta catyi ra: Cuahan minoo ra nu iyo tyiño ra vatyi cua quiti ra siti trigo nu ñuhu ra.

⁴ Ta cuhva sa quiti ra sii si, zuhva si i canacoyo ityi. Ta i quisi zaa, ta sasi ti sii si.

⁵ Ta inga si i canacoyo nu yaxi ñoho ñuhu vatyi ñoho xaan yuu. Ta yatyi xaan i caña si vatyi yaxi xaan ñoho ñuhu.

⁶ Ta cuhva i ndyehe ñicandyi i naxii si vatyi ñahñi yoho si, ta i na-ityi si.

⁷ Ta zuhva ca siti cuan i canacoyo ticui iñu. Ta i caña si, zoco i zahvi iñu sii si.

⁸ Zoco inga tucu zuhva ca siti cuan, i canacoyo si nu vaha ñuhu, ta vaha xaan i saha si. Iyo si saha si ziendu siti si sa minoo ñi si. Iyo si saha si uñi xico usi. Ta iyo si saha si oco usi.

⁹ Tatu siñi ndo, ¡cuiñi ndo!

Cuenda sa i cahan xaan ra Jesús ziqui minoo cuhva

¹⁰ Tacuan ta i tuhva ra i casi ra Jesús, ta i ndaca tuhun ra sii ra: ¿Ñaa cuenda tuhvon cahan sihin ñiyivi ziqui minoo cuhva?

¹¹ Ta i nacahan ra Jesús, ta catyi ra: Saha ra Ndyoo sa coto maa ndo tuhun xehe sa cuenda cuhva ndyaca ñaha maa ra. Zoco ma cuu coto inga ñiyivi.

¹² Ra sa cutuñi iñi zuhva, cuaha ca cua cuhva ra Ndyoo sa cutuñi iñi ra. Ta ra ña cutuñi iñi, cua quindya ndihí ra Ndyoo ndya sa siin cuii ñi cutuñi iñi ra.

13 Yucuan cuenda quehin sihin ñu ziquí minoo cuhva vatyi cua ndyehe ñu, zoco ma coto ñu ñaa sa ndyehe ñu. Cua cuiñi ñu, zoco ma cutuñi iñi ñu. Cua cuu si tañi sa ñá siñi ñu.

14 Ta sa cuenda maa ñu cua natahan si cuhva i catyi ra Isaías. Ihya cuu cuhva i catyi ra:

Ndisa cua cuiñi ndo, zoco ma cutuñi iñi ndo;

Cua ndyehe ndo, zoco ma nacoto ndo ñaa sa ndyehe ndo.

15 Vatyi ñihi xaan iñi ndo, ta ña siñi ndo, ta ndaha titahan siti nuu ndo; coto ndyehe ndo ta coto cutuñi iñi ndo ta quisi ndo nu ndyei ta zanduvehi sii ndo.

Tacuan i tyaa ra Isaías sa cuenda ñiyivi ña sino iñi cuan.

16 Zoco maa ndo, zii xaan cuu sii ndo vatyi ndyehe ndo sihin siti nuu ndo, ta siñi ndo sihin zoho ndo.

17 Ta sa ndisa catyi sihin ndo vatyi cuaha xaan ra profeta ta inga ñiyivi vaha, i cuñi ñu ndyehe ñu sa ndyehe maa ndo vityi, zoco ñá ndyehe ñu sii si. Ta i cuñi ñu cuiñi ñu sa siñi maa ndo, ta ñá siñi ñu sii si.

Nacatyi ra Jesús ñaa cuñi si catyi si cuhva ra quiti siti trigo nu ñuhu

18 Ta ziquí i catyi ra Jesús: Cuiñi ndo cuhva cuñi si catyi si sa cuenda cuhva ra quiti siti trigo nu ñuhu.

19 Ñiyivi sa siñi tuhun sa cuenda cuhva ndyaca ñaha ra Ndyoo ta ña cutuñi iñi ñu sii si cuu ñu tañi siti sa canacoyo ityi. Ta saa cuihna, ta quindyaar a tuhun i tasi ra Ndyoo añima ñu.

20 Siti sa canacoyo ticui yuu cuu tañi ñiyivi sa siñi Tuhun Ndyoo, ta zii xaan i cuñi ñu.

21 Zoco ñá quihví vaha Tuhun Ndyoo añima ñu. Ta ñá naha cua sino iñi ñu. Tatu sa quisi minoo tundoho ziquí ñu a cuxaan ñiyivi sihin ñu sa cuenda Tuhun Ndyoo, yatyi xaan cua zaña ñu sii si.

22 Ta siti sa canacoyo ticui iñu cuu tañi ñiyivi sa siñi Tuhun Ndyoo, zoco sica xaan iñi ñu sa cuenda sa iyo ñuu ñiyivi ya. Ta tuhun cuca, tuhun zandavi ñaha ñi cuu si. Ta tandihí cuhva cuan, sahñi si Tuhun Ndyoo, ta ña zatyino vaha si sihin ñiyivi cuan.

23 Zoco siti sa canacoyo nu vaha ñuhu, cuu si tañi ñiyivi sa siñi Tuhun Ndyoo ta cutuñi iñi ñu sii si, ta vaha xaan zatyino si sihin ñu. Iyo ñu cuu ñu tañi siti sa saha minoo ziendu sa minoo si. Ta inga ñu cuu tañi siti sa saha uñi xico usi. Ta inga ñu cuu tañi siti sa saha oco usi tahan sa minoo si.

Cuhva yucu ña vaha sa sahnu ticui trigo

24 Tacuan ta ziquí i cahan ra Jesús ziquí inga cuhva, ta catyi ra: Cuhva ndyaca ñaha ra Ndyoo cuu si tañi minoo cuhva i tasi minoo ra siti vaha nu ñuhu ra.

25 Zoco cuhva sa i quixi ñiyivi, ta i quihví minoo ra xaan iñi sii sitoho ñuhu cuan, ta i tasi ra siti ña vaha ticui trigo, ta cuahan ra.

26 I sahnu trigo, ta i caña yoco si. Ta ticui trigo i sahnu tucu yucu ña vaha cuan.

27 Tacuan ta sahan muzu i sinacatyi ra sihin sitoho ñuhu cuan: “Tata, tatu vaha siti i tasun nu ñuhun, ¿yozo caa vatyi i caña tucu yucu ña vaha cuan?”

28 Ta i catyi sitoho si: “Minoo ra xaan iñi sii, i zavaha cuhva cuan.” Ta ziquí i ndaca tuhun muzu ra sii ra: “¿Atu cuñun vatyi cutohon ndi yucu ña vaha cuan?”

29 Zoco i catyi ra sihin ra: “Ma tohón ndo sii si coto quita ndihí trigo cuan.

30 Vaha ca zandoo yo sii si, nacuahnu si ndya sa sisá si. Ta cua tasi muzu, ta cua tava xihna ra yucu ña vaha cuan ta cuhñi ra cuenda zucu si vatyi cua cayu si. Ta ziquí cua naquihin ra trigo ta tyihi ra sii si nu cua cucumi vehi sii si.”

Cuhva siti mostaza

³¹ Ta ziqui i cahan tucu ra Jesús ziqui inga cuhva, ta catyi ra: Cuhva ndyaca ñaha ra Ndyoo cuu si tañi minoo siti mostaza sa i tasi minoo ra nu ñuhu ra.

³² Ndisa vatyi luhlu ca maa siti cuan ta ziqui tandih i inga nuu siti, zoco tatu sa sahnu si, nducanhnu ca si ta ziqui tandih i ca numa, ta nduu si tañi minoo yutu. Ta vasi zaa ta zavaha ti taca ti zoco tu.

Tañi yusa iya cuu cuhva ndyaca ñaha ra Ndyoo

³³ Ta i cahan tucu ra Jesús ziqui inga cuhva ya: Cuhva ndyaca ñaha ra Ndyoo cuu si tañi yusa iya sa nazaca minoo ñaha sihin uñi taha arroba yutyi pan, ta cua zanandaa yusa iya cuan sii tandih i yutyi pan cuan. (Ta tacuan tucu cuahan nducanhnu ca sa ndyaca ñaha ra Ndyoo.)

Tuhva xaan ra Jesús cahan ziqui minoo cuhva

³⁴ I catyi ra Jesús tandih i hya sihin ñiyivi ziqui minoo cuhva ta ziqui inga cuhva, ta ma cahan maa ra tatu ma cahan ra ziqui minoo cuhva.

³⁵ Tacuan i cuu si vatyi cua natahan si cuhva i tyaa minoo ra profeta. Hyia cuu sa i tyaa ra: Cua quehin ziqui minoo cuhva; cua nacaty i tuhun i sicoo xehe ndya quivi i zavaha ra Ndyoo ñuu ñiyivi.

Nacaty i ra Jesús ñaa cuñi si catyi si sa cuenda cuhva sahnu yucu ña vaha ticui trigo

³⁶ Tacuan ta i natasi ra Jesús sii ñiyivi, ta i quihvi ra sisi vehe, ta i tuhva ra i casi ra sii ra, ta catyi ra: Nacatyun sihin ndi ñaa cuñi si catyi si sa cuenda yucu ña vaha sa sahnu ticui trigo cuan.

³⁷ Ta i nacahan ra Jesús, ta catyi ra sihin ra: Ra i tasi siti vaha cuu ra i quisi ndya gloria.

³⁸ Ta ñuhu ra cuu ñuu ñiyivi. Ta siti vaha cuu tañi ñiyivi sa cuu cuenda ra Ndyoo. Ta yucu ña vaha cuan

cuu tañi ñiyivi sa cuu cuenda cuihna.

³⁹ Ta ra xaan iñi sii, cuu ra tasi yucu ña vaha cuan. Cuihna cuu ra cuan. Ta ra cua nacuaan ndaha tyiño cuan cuu ángel. Ta quivi cua naquihin ra trigo cuan cuu si tañi nu cuu ndih i ñuu ñiyivi.

⁴⁰ Ta tañi cuhva i tohon ra yucu ña vaha ta i sahmi ra, tacuan tucu cua cuu si nu ndih i ñuu ñiyivi.

⁴¹ Cua tasi ra i quisi ndya gloria sii ángel ra vatyi cua tava ziñi ra sii tandih i ñiyivi tyiyuhu sii inga ñiyivi ta zavaha ñu sa ña vaha ta sii inga ñiyivi zavaha sa ña vaha, ndih i ca.

⁴² Cua tyihi ángel sii ñu nu cayu ñuhu. Ta yucuan cua vacu ñu, ta cua casi quihni noho ñu.

⁴³ Ta ñiyivi zavaha sa vaha cuhva cuñi ra Ndyoo, cua ndundisi xaan ñu tañi flicandyi nu ndyaca ñaha ra Ndyoo Zutu yo. Tatu siñi ndo sa quehin, cuiñi ndo.

Cuhva minoo sa ñoho xehe ta yahvi xaan ndyaa si

⁴⁴ Cuhva ñihi yo sa cundyaca ñaha ra Ndyoo sii yo cuu tañi minoo sa yahvi xaan ndyaa ta ñoho xehe si sisi ñuhu. Ta i nañihi minoo ra sii si, ta natyixehe tucu ra sii si zuun ñi yucuan. Ta zii xaan i cuñi ra ta cuahan ra ta i xico ra tandih i sa iyo sii ra, ta i nazata ra ñuhu cuan.

Minoo cuhva perla sa yahvi xaan ndyaa

⁴⁵ Ta cuhva ndyaca ñaha ra Ndyoo sii yo vale xaan si tañi minoo cuhva minoo ra zata ndaha tyiño ta naxico ra. Sica noo ra ta nanducu ra perla vaha xaan.

⁴⁶ Ta quivi i nañihi ra minoo sa yahvi xaan ndyaa, cuahan ra ta i naxico ra tandih i sa iyo sii ra, ta i nazata ra perla cuan. (Ta tacuan tucu vale xaan Tuhun Ndyoo tañi perla cuan.)

Minoo cuhva sa cuenda minoo taraya

47 Ta inga tucu cuhva, vatyi cuhva ndyaca ñaha ra Ndyoo cuu si tañi minoo taraya sa cañi ra tiñ tyiyaca nu tyañuhu ta ñihi ra tandihí nuu tyiyaca.

48 Tatu sa situ taraya ra, tava ra sii si nu ñiyíti ta yucuan cua cundyaa ra ta cua nacasi ra ñaa tyiyaca cuñi ra. Cua tyihi ra tyiyaca vaha sisi tyica, ta cua zavita ra tyiyaca ña vaha cuan.

49 Ta tacuan cua cuu si nu cua ndihi ñuu ñiyívi. Cua quisi ángel vatyi cua tava ziin ra sii ñiyívi ña vaha sihin ñiyívi vaha.

50 Ta ñiyívi ña vaha cuan cua tyihi ra nu cayu ñúhu, ta cua vacu ñu, ta cua casi quihñi noho ñu.

Sa vaha xaan sa saa ta sa sahnu

51 Tacuan ta ziqui i ndaca tuhun ra Jesús sii ra i casi ra: ¿Atu cutuñi iñi ndo tandihí cuhva ya? Ta i catyi ra: Cutuñi iñi ndi, tata.

52 Ta ziqui i catyi ra Jesús sihin ra: Tatu cuá cutuhva minoo maestro cuenda ley sa cuenda cuhva ndyaca ñaha ra Ndyoo vityi cua cuu ra tañi minoo ra xu vehe sa cumi vaha sa sahnu ta sa saa sa vaha xaan, ta cuu zañaha ra nduu tahan si.

Sinuhu ra Jesús ñuu ra, ñuu Nazaret

53 Sa ndihi cahan ra Jesús ziqui cuhva ya ta ziqui i quita ra yucuan, ta cuahan ra.

54 Ta i nasaa ra zuun ñi ñuu maa ra. Ta yucuan i quisaha zacuaha ra sii ñiyívi sisi vehe ñuhu. Ta iyo xaan i cuñi ñiyívi, ta catyi ñu: ¿Yozo caa ñihi ra ya cuhva sa casi xaan iñi ra? ¿Ta yozo caa ñihi ra cuhva zavaha ra sa ndyityi?

55 Ta zehe ra carpintero cuu sii ra. Ta ña María cuu zihí ra. Ta ra Jacobo, ta ra José, ta ra Simón, ta ra Judas cuu yañi ra.

56 Ta cuhva ra iyo tucu ñu ihyá sihin yo. ¿Ta yozo caa vatyi sito ra tandihí cuhva ya?

57 Tacuan i cahan ñiyívi, ta yucuan cuenda ñá cuñi ñu tyaa ñu

yahvi sii ra Jesús. Zoco i catyi ra Jesús sihin ñu: Tyaa ñiyívi yahvi sii minoo ra profeta, zoco ñiyívi ñuu ra ta ñiyívi vehe ra ña tyaa ñu yahvi sii ra.

58 Ta ñá zavaha ra Jesús cuaha sa ndyityi yucuan vatyi ñá sino iñi ñiyívi sii ra.

14

Cuhva i sihi ra Juan, ra i zacoonndutya

1 Quivi cuan, ra Herodes ndyaca ñaha nacahnu Galilea, ta i siñi ra tuhun ra Jesús.

2 Ta i catyi ra sihin muzu ra: Ra Juan Bautista cuu ra cuan. Sa nandoto ra, ta yucuan cuenda ndyityi xaan ra.

3 Tacuan i catyi ra Herodes vatyi maa ra cuu ra i tava tysiño ta i tiñi ra sii ra Juan, ta sihñi ra sii ra, ta cuahan ra vehe caa. I zavaha ra sii si sa cuenda ña Herodías, ñazihí ra Felipe yañi ra.

4 Ra Juan cuu ra i catyi sihin ra Herodes: Ña vaha sa nacuhun ñazihí yañun.

5 I cuñi ra Herodes cahñi ra sii ra Juan, zoco i yuhu ra sii ñiyívi vatyi sino iñi tandihí ñu vatyi cahan ra Juan sa cuenda ra Ndyoo.

6 Zoco quivi tahan si cuiya ra Herodes, i quita zehe ña Herodías vatyi cua cata saha ña nuu ñiyívi i quisi vico ra. Ta i tahan xaan iñi ra Herodes cuhva i sata saha ña.

7 Ta i tysiñaha ra Herodes Ndyoo, ta i catyi ra sa ndisa cuii vatyi cua cuhva ra ñaa ñi maa sa cua caca ña.

8 Ta sa i nacatyi zihí ña sihin ña ñaa sa cua caca ña, ta i catyi ña sihin ra Herodes: Cuhvon xiñi ra Juan Bautista sii sihin minoo nu coho. Catyi ña.

9 I nducuihya xaan iñi ra rey Herodes sa siñi ra sa cahan ña, zoco sa tysiñaha ra Ndyoo, ta sa siñi ñiyívi yucu vico cuan. Ta yucuan cuenda i tasi ra tysiño, ta catyi ra vatyi cuhva ra sii si sii ña.

¹⁰ Ta i catyi ra vatyi cahndya yuu ra zucu ra Juan sisi vehe caa.

¹¹ Ta i quisi ndyaca ra sii si sihin minoo nu coho, ta saha ra sii ña luhlu. Ta i saha maa ña sii si zihí ña.

¹² Tacuan ta i quisi ra sica noo sihin ra Juan, ta i quihin ra coño ñuhu ra Juan, ta i sityihi ra sii si sisi ñuhu. Ta ziqui cuahan ra ta i nacatyi ra sihin ra Jesús.

Cuhva i saha ra Jesús sa casi ohon mil rayi

¹³ Ta sa sito ra Jesús cuhva cuan, ta i quita ra sisi minoo barco, ta cuahan ra maa tuhun ñi ra ndya minoo nu yoñi maa ñiyivi iyo. Zoco i ñihí ñiyivi tuhun, ta i quita ñu ñuu ñu, ta i sindyico ñu sii ra ityi nu ñuhu.

¹⁴ Ta sa i quita ra Jesús barco, i ndyehe ra cuaha xaan ñiyivi. Ta i cundahvi xaan iñi ra sii ñu, ta i zanduvaha ra sii ñu cuhu sa sindyaca ñu.

¹⁵ Ta cuhva sa cua iñi, i quisi ra i casi ra nu ndyaa ra, ta catyi ra sihin ra: Sahiñi xaan. Ta yoñi ñiyivi iyo ihya. Catyun sihin ñiyivi nacuhun ñu. Nacuhun ñu nu iyo ñuu ta zata ñu sa casi ñu.

¹⁶ Zoco i catyi ra Jesús sihin ra: Ña tahan si sa cuhun ñu. Cuhva maa ndo sa casi ñu.

¹⁷ Ta i catyi ra i casi ra Jesús sihin ra: Ñahñi maa sa cumi ndi ihya. Ohon tahan ñi pan, ta uu tahan ñi tyiyaca.

¹⁸ Ta i catyi ra Jesús sihin ra: Ta ndyaca ndo sii si ihya.

¹⁹ Tacuan ta i tava ra Jesús tyiño vatyi nacundayaa ñiyivi nu cuhu. Ta i quihin ra sihin ndaha ra sa ohon tahan pan cuan ta uu tahan tyiyaca cuan, ta i nandyehe ndaa ra. Ta i saha ra tyahvi ndyoo sii ra Ndyoo, ta ziqui i sahnu ndiyihí ra pan cuan, ta saha ra sii si sii ra i casi ra. Ta i zasa maa ra sii si sii ñiyivi.

²⁰ Ta i sasi tandihí ñiyivi. Ta ndaha xaan iñi ñu. Ta ziqui i

zancutu ñu usi uu tahan tyica sihin yiqui pan sa nandoo ta tyiyaca cuan.

²¹ Ta ñiyivi i sasi i cuu ohon mil rayi ta ziin ñu zihí ta sa ndyihí.

Cuhva i sica ra Jesús nu ndutya

²² Tacuan ta i catyi ra Jesús sihin ra i casi ra vatyi nandihví ra barco ta cuyaha ra inga siyo miñi. Ta cua nandoo ra Jesús, ta cua catyi ra sihin tandihí ñiyivi vatyi cunuhu ñu ndya ñuu ñu.

²³ Ta sa yaha natasi ra Jesús sii ñu, ta ziqui i sahan ra minoo yucu maa tuhun ñi ra vatyi cua cahan ra sihin ra Ndyoo. Ta i cuaa, ta ndyaa ra yucuan maa tuhun ñi ra.

²⁴ Ta sa cuahan barco cuan mahñu miñi. Nandaa, nanoo tu zacuu ndutya vatyi ñihí xaan ñoho tatyí nu cuahan tu.

²⁵ Ta ñaa ca i tuhva ra Jesús nu yucu ra. Sica ra nu ndutya.

²⁶ Ta cuhva sa ndyehe ra sii ra Jesús vatyi sica ra nu ndutya, i yuhu xaan ra, ta i sacu saa ra sihin sa yuhu ra, ta catyi ra: ¡Minoo añima cuu si!

²⁷ Zoco i cahan ra Jesús, ta catyi ra: Zandyee ndo iñi ndo. Ma yuhu ndo vatyi mi cui.

²⁸ Tacuan ta i catyi ra Pedro sihin ra: Tata, tatu zuun yoho cuu, catyun sihin vatyi caque nu ndutya ta sei ndya nu vasun.

²⁹ Ta i catyi ra Jesús sihin ra: Ñaha. Ta ziqui i quita ra Pedro barco ta i quisaha sica ra nu ndutya ndya nu vasi ra Jesús.

³⁰ Zoco cuhva sa i tuu iñi ra vatyi ñihí xaan ñoho tatyí, ta i yuhu ra. Ta i quisaha ndyee ra sisi ndutya, ta i cana saa ra, ta catyi ra: ¡Tata, zacacun si!

³¹ Ta zuun ñi caa cuhva cuan i natíin ra Jesús ndaha ra, ta i catyi ra sihin ra: ¡Siin xaan sino iñun sii! ¿Ñacu ña nii iñun? Catyi ra.

³² Ta i ndihví ra Jesús ta ra Pedro sisi barco, ta i cutaxi tatyí.

33 Ta ziqui ra ñoho barco cuan, i sicutiñi siti ra, ta i zacahnu ra sii ra Jesú, ta catyi ra: Sa ndisa cuii vatyi Zehe ra Ndyoo cuu suun.

Cuhva i zanduvaha ra Jesú sii ñiyivi cuhu nu cu si Genesaret

34 Ta i yaha ra miñi, ta i saa ra nu cu si Genesaret.

35 Ta cuhva sa i nacoto ñiyivi yucuan sii ra Jesú, ta i zacoto ñu nacaa cahnu, ta i quisi ndyaca ñiyivi sii tandihí ñu cuhu ndya nu ndyaa ra Jesú.

36 Ta i sica ñu tumañi iñi sii ra vatyi nacuhva ra sa tiñ ñu vazu yuzahma ñi ra. Ta tandihí ñiyivi i tiñ sii si, i nduvaha ñu.

15

Sa zativi añima ñiyivi

1 Tacuan ta ziqui i tuhva zuhva ra fariseo ta ra maestro cuenda ley sii ra Jesú. I quisi ra ndya ñuu Jerusalén, ta i ndaca tuhun ra sii ra Jesú:

2 ¿Ñaa cuenda ña zavaha ñiyivi sica noo suhun costumbre i zandoo ñiyivi sahnu? Vatyi ña nacatyá vaha ñu ndaha ñu ta casi ñu.

3 Tacuan i catyi ra cuan, ta ziqui i ndaca tuhun ra Jesú sii ra: ¿Ta ñaa cuenda vatyi ña tyaa maa ndo yahvi sii ley ra Ndyoo vatyi cuñi ndo cundyico ndo costumbre?

4 Vatyi i catyi maa ra Ndyoo: "Tyaa ndo yahvi sii zutu ndo ta sii zihí ndo", ta "Yoo ra cahan ndya vaha ñi sihin zutu ra a sihin zihí ra, nacahñi ñiyivi sii ra."

5 Zoco catyi maa ndo vatyi cuu catyi minoo ra sihin zutu ra a sihin zihí ra: "Ma cuu tyindyee suun vatyi tandihí sa iyo sii, saha cuende sii ra Ndyoo."

6 Ta yoo ra catyi cuhva cuan, ña cuñi ca si sa tyindyee ra sii zutu ra a sii zihí ra, catyi maa ndo. Ta sihin cuhva cuan tyaa siyo ndo ley maa ra Ndyoo vatyi cuñi ndo cundyico ndo sii costumbre maa ndo.

7 ¡Zaha ndo tuhun vatyi vaha xaan ñiyivi cuu ndo, zoco ña ndisa! Vaha xaan i cahan ra Isaías sa cuenda ndo quivi i tyaa ra ihyá tuhun i saha ra Ndyoo sii ra:

8 Ihyá ñiyivi zacahnu ñu sii, sihin yuhu ñu.

Zoco ña zacahnu ñu sii, sa ndisa.

9 Nahñi tuhun cuu sa zavaha ñu culto;

Zacuaha ñu sii ñiyivi maa maa cuhva costumbre ñiyivi.

Ta ña zavaha ñu cuhva catyi Tuhun Ndyoo sa ndisa.

10 Tacuan i nacatyi ra Jesú cuhva i tyaa ra Isaías ta sa naha, ta ziqui i cana ra sii ñiyivi, ta catyi ra sihin ñu: Tyizoho ndo, ta tyituñi iñi ndo.

11 Yivi sa sasi ñiyivi ta yivi sa sihi ñu cuu sa zativi añima ñu. Zoco sa quiñi sica iñi ñu ta cahan ñu cuu sa zativi añima ñu.

12 Tacuan i catyi ra Jesú, ta ziqui i quisi ra i casi ra, ta i catyi ra sihin ra: ¿Atu siton vatyi i cuxaan ra fariseo sihin cuhva cohon?

13 Zoco i nacahan ra Jesú ta catyi ra: Tandihí yava sa ñá tasi Zuti ra ndyaa andivi, cua quita ndya yoho si.

14 Ma tyaa ndo yahvi sii ra fariseo. Cuu ra tañi ra cuaa ta zañaha ra ityi sii inga ra cuaa. Ta tatu zañaha minoo ra cuaa ityi sii inga ra cuaa cua canacava nduu tahan ra sisi minoo xahva. Catyi ra Jesú.

15 Ta ziqui i catyi ra Pedro sihin ra Jesú: Nacatyun sihin ndi ñaa cuñi si catyi si cuhva i cohon cuan.

16 Ta i catyi ra Jesú: ¿Atu ndya maa ndo ta ña cutuñi iñi ndo?

17 ¿Atu ña cutuñi iñi ndo vatyi tandihí sa sasi ñiyivi cuahan si ndya sisi ñu ta ziqui quita tucu si?

18 Zoco sa quita yuhu ñiyivi, quita si añima ñu. Ta yucuan cuu sa zativi sii ñiyivi.

19 Vatyi añima ñu quita tandihí tuhun ña vaha sa sica iñi ñu. Quita tuhun sa cuñi ñu cahñi ñu sii inga

ñiyivi, sa cuñi rayii sii inga ñaha ta yivi ñazihí ra cuu, sa quiñi zavaha ñu, sa zuhu ñiyivi, sa vatya ñiyivi, ta sa cahan ñu ndya vaha ñi sii inga ñiyivi.

²⁰ Tandihi ihya cuu sa zativi añima ñiyivi. Zoco tatu casi ñu ta ma nacatya ñu ndaha ñu tañi catyi costumbre, yivi sa yucuan cua zativi sii ñu.

Cuhva i sino iñi minoo ñaha inga ñuu sii ra Jesús

²¹ I quita ra Jesús yucuan, ta cuahan ra ndya ñuu Tiro ta ñuu Sidón.

²² Ta minoo ñaha cananea sa ndyaa yucuan i ndyehe ña sii ra Jesús, ta i cana saa ña, ta catyi ña: ¡Tata, zehe ra David, cundahvi iñun sii! Ñoho minoo taty i cuihna sii ña luhlu zehi, ta ndyehe xaan ña tundoho. Catyi ñaha cuan sihin ra Jesús.

²³ Zoco ñá nacahan ra Jesús sa cahan ña. Ta ziqui i quisira i casi ra Jesús, ta i zañiñi ra sii ra, ta catyi ra: Catyun sihin ña vatyi nacuhun ña vatyi ndyico xaan ña sii yo ta cana saa xaan ña.

²⁴ Tacuan i catyi ra, ta ziqui i catyi ra Jesús sihin ña: I tasi ra Ndyoo sii mi maa ñi sa cuenda mvee ticiayi hebreo sa cua naa. Catyi ra.

²⁵ Zoco i tuhva ñaha cuan, ta i sicuiñi siti ña nuu ra Jesús, ta catyi ña: ¡Tyindyeun sii, tata!

²⁶ Zoco i catyi ra Jesús sihin ña: Natyindyee xihna que sii ñiyivi ñui vatyi ña vaha sa quindyei pan sa casi zehi ta cuhve sii si casi ina. Catyi ra.

²⁷ Zoco i catyi maa ña sihin ra: Ndisa, tata; zoco ndya cuhva ndya ina ta sasi ti yu pan sa canacava yumesa nu sasi sitoho ti. Ta tacuan tucu ii.

²⁸ Tacuan i catyi ña, ta ziqui i catyi ra Jesús: ¡Maha, sino xaan iñun sii! Cua cuu si cuhva cuñi moo. Ta zuun ñi cuhva cuan, ndaha ndu- vaha ñi zehi ña.

Zanduvaha ra Jesús sii cuaha xaan ñu cuhu

²⁹ I quita ra Jesús yucuan, ta i yaha ra yahu miñi sa nañi Galilea, ta ziqui i ndaa ra minoo yucu, ta i sicundayaa ra yucuan.

³⁰ I saa cuaha xaan ñiyivi nu ndyaa ra. Sindyaca ñu sii ñu coxo, ta ñu cuua, ta ñu ñehe, ta ñu cumañi ndaha ta cuaha xaan inga ñu cuhu. I saqui ñu sii ñu nu ndyaa ra Jesús, ta i zanduvaha ra sii ñu.

³¹ Ta iyo xaan i cuñi ñiyivi vatyi i cuu nacahan ñu ñehe, ta ñu cumañi ndaha i nacundayaa ndaha ñu. Ta i cuu nacaca ñu coxo ta nandyehe ñu cuua. Ta i quisaha zacahnu xaan ñiyivi sii ra cu Ndyoo cuenda ñiyivi hebreo.

Cuhva i saha ra Jesús sa casi cumi mil rayii

³² Tacuan ta ziqui i cana ra Jesús sii ra i casi ra, ta i catyi ra sihin ra: Cundahvi xaan iñi sii ñiyivi ya vatyi sa uñi quiri ndyaa ñu ihyia sihin, ta ñahñi maa sasi ñu. Ña cuñi natasi sii ñu ndya vehe ñu tatu ma casi ñu coto cuañaa ñu ityi cuhun ñu.

³³ Tacuan ta i catyi ra i casi ra Jesús sihin ra: Zoco ¿ndya ityi cua quihin yo sa casi cuaha xaan ñiyivi ya sicuhu ya? Ta yoñi ñiyivi iyo ihyia. Catyi ra.

³⁴ I ndaca tuhun ra Jesús sii ra: ¿Yozo tahan pan cumi ndo? Ta i catyi ra cuan: Usa tahan ta uu tahan tyiyaca ndyihu. Catyi ra.

³⁵ Ta ziqui i catyi ra Jesús vatyi nacundayaa ñiyivi nu ñuhu.

³⁶ Ta i quihin ra sa usa tahan pan cuan ta tyiyaca ndyihu cuan sihin ndaha ra, ta saha ra tyahvi ndyoo sii ra Ndyoo. Ta ziqui i sahnu ndyihu ra sii si, ta saha ra sii ra i casi ra, ta i zasa maa ra sii si sii ñiyivi.

³⁷ I sasi tandihí ñu, ta ndaha xaan iñi ñu. Ta ziqui i zacutu ñu usa tahan tyica sihin yu pan cuan ta tyiyaca sa nandoo cuan.

³⁸ Ñiyivi i sasi i cuu cumi mil rayii ta ziqui ñu zihí ta sa ndyihu.

39 Yaha cuan ta i natasi ra Jesús sii ñiyiví ndya vehe ñu, ta i ndihví ra barco ta cuahan ra ndya nu cu si Magdala.

16

Sica ra fariseo ta ra saduceo minoo sa ndyityi sii ra Jesús

1 I quisi ra fariseo ta ra saduceo nu ndyaa ra Jesús vatyi cuñi ra coto ihñi ra sii ra, ta i sica ra sii ra vatyi zañaha ra minoo sa ndyityi sii ra sa quita ndya andívì.

2 Zoco i nacahan ra Jesús ta catyi ra sihin ra: Sa sahiñi tuhva maa ndo catyi: “Cua cundisi vaha ityaan vatyi cuaha xaan vico.”

3 Ta sa ñaha ñi tatu cuaha vico, tuhva ndo catyi: “Ña vaha cua cuu quívi vityi vatyi iñi ñaa.” Zaha ndo tuhun vatyi vaha xaan ndo, zoco ña ndisa ndo. Tuhva ndo nacoto ñaa sa cua coo sa cuenda cuhva caa andívì, zoco ña nacoto ndo ñaa sa cua cuu ñuu ñiyiví sa cuenda cuhva ya vityi.

4 Ñiyiví ña vaha sa iyo vityi, iyo xaan cuatyi ñu, ta sica ñu sa ndyehe ñu sa ndyityi, zoco minoo ñi zeña cua ndyehe ñu tañi cuhva i cuu sii ra Jonás. Tacuan i catyi ra Jesús, ta ziquí i zandoo ra sii ra cuan ta cuahan ra.

Tuhan cahan ra fariseo cuu tañi yusa i siya

5 Cuhva sa yaha ra i casi ra Jesús ndya inga siyo miñi, i naa iñi ra cuizo ra pan casi ra.

6 Ta ziquí i catyi ra Jesús sihin ra: Ndyeha ndo. Zazuenda ndo sii ndo sihin yusa i siya sii ra fariseo ta ra saduceo.

7 Tacuan i catyi ra Jesús, ta i natuhun tahan ra i casi ra, ta i catyi ra: Cahan ra tacuan vatyi ñahñi pan ndyizo yo.

8 I sito ra Jesús sa natuhun ra, ta catyi ra: ¿Ñaa cuenda catyi ndo vatyi ñahñi pan ndyizo ndo? ¡Siin xaan sino iñi ndo!

9 ¿Atu tañaha ca cutuñi iñi ndo? ¿Atu ña nacohon iñi ndo sa ohon tahan pan i zase sii ohon mil rayii? ¿Ta yozo tahan ca tyica si i naquihin ndo?

10 Ta ¿atu ña nacohon iñi ndo sa usa tahan pan i zase sii cumi mil rayii? ¿Ta yozo tahan ca tyica si i naquihin ndo?

11 ¿Ta yozo caa vatyi ña tuu iñi ndo vatyi ñá quehin sa cuenda pan cuhva i catyi vatyi nazacuenda ndo sii ndo sihin yusa i siya sii ra fariseo ta ra saduceo?

12 Tacuan i catyi ra Jesús, ta ziquí i cutuñi iñi ra i casi ra vatyi ña cahan ra Jesús tuhun pan, zoco cahan ra sa cuenda cuhva zazuenda fariseo ta ra saduceo (vatyi ña vaha si).

Nacatyi ra Pedro vatyi ra Jesús cuu ra cua zacacu sii ñiyiví

13 Cuhva i saa ra Jesús ndya nu cu si Cesarea de Filipo i ndaca tuhun ra sii ra i casi ra: ¿Ñaa catyi ñiyiví yoo ra cuu vii, ra i quisi ndya gloria?

14 Ta i catyi ra sihin ra: Iyo ñiyiví catyi vatyi minoo ra i nandoto cuun tañi ra Juan, ra i zaco ndutya sii ñiyiví a ra Elías a ra Jeremías a inga ra cu profeta ta sa naha cuun.

15 Ta ziquí i catyi ra Jesús sihin ra: Ta maa ndo, ¿yoo ra cui catyi maa ndo?

16 Ta i catyi ra Simón Pedro: Yoho cuu ra Cristo, ra cua zacacu sii ndi. Ta zehe ra Ndyoo ndito cuu suun.

17 Ta i nacahan ra Jesús, ta catyi ra sihin ra: Zii xaan cuu suun, Simón, zehe ra Jonás, vatyi yofí ñiyiví zañaha cuhva cuan suun. Maa Zuti ra ndyaa andívì i zañaha cuhva cuan suun.

18 Ta yuhvi catyi suhun vatyi yoho cuu ra Pedro. Ta nu yuu ya cua zandei vehe ñuhi, ta ma cuu zahacanaa tuhun sihi ta andyaya sii vehe ñuhi.

19 Ta yuhvi cua cuhve ndaha ticui suun sa cuenda nu ndyaca ñaha ra

Ndyoo, ta ñaa sa cua cuhñun ihyá ñuu ñiyívi, cua cunuhñi tucu si ityi nuu ra Ndyoo. Ta sa cua ndasun ihyá, ñuu ñiyívi, cua ndasi tucu si ityi nuu ra Ndyoo.

²⁰ Tacuan i catyi ra Jesús, ta ziquí ñihí xaan i saha ra tyiño sii ra i casi ra vatyí ma nacatyí ra nu sihin minoo ñiyívi vatyí ra Cristo cuu ra.

Zacoto ra Jesús cuhva cua cuu ra

²¹ Ta ndya cuhva cuan i zacoto ra Jesús casi xaan sii ra i casi ra yozo cua cuñi si sa cuhun ra ñuu Jerusalén. Ta ra mandoñi ta ra zutu nahnu ta ra cu maestro cuenda ley cua zandyehe xaan ra tundoho sii ra. I catyi ra Jesús sihin ra i casi ra vatyí cua cahñi ra cuan sii ra, zoco sa cu uñi quívi ta cua nandoto ra.

²² Ta ziquí i tava zíin ra Pedro sii ra, ta ñihí xaan i cahan ra sihin ra, ta catyi ra: ¡Numinoo saha, ta ma tahan si suun, tata! ¡Natyindyeerá Ndyoo suun, ta ma tohon sa tacuan!

²³ Zoco i nasico cava ra Jesús, ta i catyi ra sihin ra Pedro: ¡Cuiñi siyon sii, cuihna! Zayanga xoon sii, vatyí ña sica iñun cuhva sica iñi ra Ndyoo. Sica iñun cuhva sica iñi ñiyívi.

²⁴ Ta ziquí i catyi ra Jesús sihin ra i casi ra: Tatu iyo ra cuñi cundyico sii, nazama ra cuhva iyo ra. Ta ma zacahnu ra sii ra. Ta nandyehe ra tundoho sa cuenda mi. Ta nazavaha ra cuhva zavehi.

²⁵ Tatu ña cuñi ñiyívi sa cuu ñu sa cuenda Tuhun Ndyoo, cua cuu ñu, ta cua cuhun ñu andyaya, ta ma cundito ñu sihin ra Ndyoo. Zoco tatu cua cuu ñiyívi sa cuenda mi a sa cuenda Tuhun Ndyoo cua cundito ñu sihin ra Ndyoo.

²⁶ ¿Ñaa sa ñihí ñiyívi sa zahacanaa ñu tandihí sa iyo ñuu ñiyívi ta quívi cua cuu ñu, ndaha cua naa ñi ñu? ¿Ta yozo cua cuu tyiyahvi ñiyívi ta ñihí tahví añima ñu?

²⁷ Vatyí yuhvi, ra i quisi ndya gloria, cua quisi inga saha, ta tyaqui

xaan cuá cui tañi cuhva caa Zuti. Cua quisi sihin ángel, ta ziquí cua tyiyahvi sii minoo minoo ñiyívi sa cuenda cuhva i zavaha ñu.

²⁸ Sa ndisa cuui catyi sihin ndo vatyí iyo zuhva ra yucu ihyá, ma cuu ra ndya cuhva ndya cua ndyehe ra vatyí ndisi tucu ra i quisi ndya gloria inga saha sihin cuhva cua cundyaca ñaha ra sii ñiyívi.

17

Cuhva i zama ra Ndyoo cuhva caa ra Jesús minoo saha

¹ I yaha iñu quívi, ta ziquí i quihin ra Jesús sii ra Pedro ta ra Jacobo ta ra Juan yañi ra Jacobo ta cuahan ra sihin maa ñi maa ra ndya minoo yucu zucu xaan.

² Ta yucuan i zama cuhva caa ra Jesús ityi nuu ra cuan. Ndisi xaan i nduu nuu ra tañi ñicandyi, ta cuihi cuan i nduu zahma ra tañi ñúhu.

³ Ta zuun ñi cuhva cuan, i ndyehe ra sii ra Moisés ta ra Elías. (Ra i sihi ta sa naha cuu nduu tahan ra cuan.) Natuhun ra sihin ra Jesús.

⁴ Ta ziquí i catyi ra Pedro sihin ra Jesús: Tata, ¡vaha xaan yucu yo ihyá! Tatu cuñun cua zavaha ndi uñi tahan vehe tyiyahva, minoo cuenda moo, ta minoo cuenda ra Moisés, ta inga si cuenda ra Elías.

⁵ Niñi ñi sa cahan ra Pedro, ta i quisi minoo vico ndisi xaan si, ta ndaha tyazi si sii tandihí ra; ta sisi vico cuan i siñi ra minoo nduzu, ta catyi si: Ra ihyá cuu Zehi. Cuñi xein sii ra. Zíi xaan cuñi sihin ra. Cuiñi ndo sa cahan ra.

⁶ Ta sa siñi ra i casi ra Jesús tuhun cuan, i sicava ndyayu ra nu ñuhu, ta i yuhu xaan ra.

⁷ Ta ziquí i tuhva ra Jesús sii ra, ta i tyizo ra ndaha ra sii ra, ta catyi ra: Nduvita ndo. Ma yuhu ndo.

⁸ Ta cuhva sa nandyehe ra, yoñi inga ca ra ndyehe ra, maa ñi ca ra Jesús.

⁹ Ta cuhva sa vasi noo ra yucu cuan, ñihí xaan i saha ra Jesús tyiño sii ra, ta catyi ra: Ma nacatyí ndo sa

ndyehe ndo nu sihin minoo ñiyivi
ndya sa yaha nandoto ra i quisi
ndya gloria sisi sa i sihi ra.

¹⁰ Tacuan i catyi ra Jesús, ta ziqui i
ndaca tuhun ra i casi ra sii ra: ¿Ñaa
cuenda catyi ra maestro cuenda
ley vatyi tahan si sa quisi xihna ca
ra Elías?

¹¹ Ta i nacahan ra Jesús, ta catyi
ra: Sa ndisa vatyi xihna ca cua
quisi ra Elías, ta cua zanduvaha ra
tandihi.

¹² Zoco yuhvi catyi sihin ndo
vatyi sa i quisi ra Elías, ta ñá nacoto
ñiyivi sii ra. I zavaha ñu sihin ra
tandihi sa cuñi maa ñu. Ta zuun
ñi cuhva cuan cua ndyehe tucu ra
i quisi ndya gloria tundoho zacuu
ñiyivi.

¹³ Tacuan i catyi ra Jesús, ta ziqui
cutuñi iñi ra i casi ra vatyi cahan
ra Jesús tuhun ra Juan, ra i zacoo
ndutuya sii ñiyivi.

*I zanduvaha ra Jesús sii minoo ra
luhlu sa ñoho tatyi cuihna*

¹⁴ Cuhva sa i nasaa ra nu yuco
tuu xaan ñiyivi, i tuhva minoo ra sii
ra Jesús, ta i sicuiñi siti ra nuu ra, ta
catyi ra:

¹⁵ Tata, cundahvi iñun sii ra luhlu
zehi. Ñihi xaan tahan ra, ta ndyehe
xaan ra tundoho. Cuaha xaan
saha nduva ra nu ñoho ñúhu a sisi
ndutuya.

¹⁶ I quisi ndyaque sii ra sii ra sica
noo suhun, zoco ñá cuu zanduvaha
ra sii ra.

¹⁷ Ta i nacahan ra Jesús, ta i catyi
ra: ¡Ndoho cuu ñiyivi ña sino iñi,
ta ña vaha ndo! Ma cundyee iñi
cundyee sihin ndo naha xaan ca. Ta
ndyaca ndo sii ra luhlu ña ihya.

¹⁸ Tacuan ta ziqui i cahan ra Jesús
sihin tatyi cuihna, ta i tava ra sii si
sii ra luhlu, ta i nduvaha ra zuun ñi
caa cuhva cuan.

¹⁹ Cuee ca i cahan ra i casi ra
sihin maa ñi maa ra Jesús, ta i catyi
ra: ¿Ñacu ñá cuu tava maa ndi sii
tatyi cuihna cuan?

²⁰ Ta i catyi ra Jesús sihin ra: Ñá
cuu sii ndo vatyi siin cuii ñi sino iñi
ndo. Sa ndisa catyi sihin ndo vatyi
tatu sino iñi ndo vazu zuhva ñi tañi
cuhva caa minoo siti mostaza, cua
cuu catyi ndo sihin yuco ya: “Cuiñi
siyon ihya, ta cuhun inga ity.” Ta
cua cuiñi siyo si. Ta ñahfí maa sa
ma cuu sii ndo.

²¹ Zoco nuu tatyi cuihna sa ñoho
sii ra luhlu cuan, quita si maa ñi
sa caca ndo sii ra Ndyoo ta coo
ndutyta ndo.

*Zacoto tucu ra Jesús inga saha
cuhva cua cuu ra*

²² Ñii ñi sa iñi ñi sica noo ra nu cu
si Galilea, i catyi ra Jesús sihin ra:
Cua xico minoo ra sii ii, yuhvi ra i
quisi ndya gloria.

²³ Ta cua cahñi ñiyivi sii, ta sa cu
uñi quivi cua nandoto tuqui. Ta sa
catyi ra Jesús cuhva cuan, cuihyia
xaan i cuñi ra i casi ra.

Xuhun cuenda vehe ñuhu

²⁴ Cuhva i saa ra Jesús sihin ra
i casi ra ndya ñuu Capernaum, ra
zatyiyahvi sii ñiyivi xuhun cuenda
vehe ñuhu i sahan ra i sicahan ra
sihin ra Pedro, ta i ndaca tuhun ra
sii ra: ¿Atu ña tuhva ra maestro ndo
tyiyahvi xuhun cuenda vehe ñuhu?

²⁵ Ta i catyi ra Pedro: Tuhva ra.
Ta cuhva sa quihvi ra Pedro sisi
vehe i cahan xihna ra Jesús sihin
maa ra, ta catyi ra: ¿Yozo caa cuñi
oo, Simón? ¿Yoo sii zatyiyahvi ra
rey, ra ndyaca ñaha ñuu ñiyivi ya?
¿Atu zatyiyahvi ra sii ñiyivi sii ra a
sii ñiyivi inga ñuu?

²⁶ Ta i nacahan ra Pedro ta catyi
ra: Sii ñiyivi inga ñuu zatyiyahvi ra.
Ta yivi sii ñiyivi sii ra. Ta i catyi ra
Jesús sihin ra: Ndisa. Ta ñiyivi sii
ra, ña tahan si tyiyahvi ñu.

²⁷ Zoco ña cuñi yo sa zacuxaan
yo sii ñiyivi. Yucuan cuenda cuan
ndya miñi ta cañun zuelun.
Tyiyaca sa cua tiñi sii si sa xi
hna ñi, ndyehun yuhu ti, ta cua
nañuhun minoo xuhun. Ta maa
cuhva ñi tyiyahvun sa cuenda mi ta

sa cuenda moo. Cuhun sihin si, ta tyiyahvun.

18

¿Yoo ra cuu ra ñiñi ca?

¹ Cuhva cuan i tuhva ra i casi ra Jesús sii ra, ta i ndaca tuhun ra sii ra: *¿Yoo nduhvi cuu ra ñiñi ca sa cuenda ra Ndyoo?*

² Tacuan i catyi ra, ta i cana ra Jesús sii minoo ra luhlu ndya nu ndyaa ra. Ta i sañi ndyaa ra sii ra mahñu nu yucu ra.

³ Ta i catyi ra sihin ra sica noo sihin ra: Sa ndisa catyi sihin ndo vatyi tatu ma zama ndo cuhva iyo ndo ta nduu ndo tañi sa ndyihí sa ñahñi cuatyi, ma cuu quihvi ndo nu ndyaca ñaha ra Ndyoo.

⁴ Ra ñiñi ca nu ndyaca ñaha ra Ndyoo cuu ra zanduluhlu sii ra ta nduu ra tañi minoo ra luhlu.

⁵ Ta yoo cua tiñ cuenda vaha sii minoo ra luhlu tañi ra ya sa cuenda mi, tiñ cuenda tucu ra sii mi cuhva cuan.

Ica xaan tatu zavaha yo cuatyi

⁶ Yoo ra cua zañaha sii minoo ra luhlu sa sino iñi sii, tañi ra luhlu ya cuhva zavaha ra sa ña vaha ta ma cundyico ca ra sii, vaha ca tatu sa i sihñi ñiyiví zucu ra cuan sihin minoo yuu yozo vee xaan ta zavita ñu sii ra sisi tyañhu yatyi ca.

⁷ ¡Ndahvi ñiyiví ñuu ñiyiví vatyi tandihí tiemvú iyo sa ña vaha sa cuñi ñu zavaha ñu! Ta tacuan cua cuu si, zoco ndahvi ñi cuu ra tyiyuhu sii ñiyiví ta zavaha ñu cuatyi.

⁸ Yucuan cuenda tatu cuñun zavohon sa ña vaha sihin ndohon a sihin sohon, cahndya ndaxun sii si ta zaviton sii si vatyi vaha ca cuhun gloria tañi minoo ra ñahñi ndaha a minoo ra coxo ta ma cuhun andyaya sihin nduu tahan ndohon ta nduu tahan sohon sisi ñuhu sa ma ndahva.

⁹ Ta tatu cuñun ndyehun sa ña vaha sihin minoo siti nuun, tavon sii si ta zaviton sii si vatyi vaha ca

cua quihvun gloria sihin minoo ñi siti nuun nu ndyaca ñaha ra Ndyoo, ta ma cuhun sihin nduu tahan siti nuun andyaya nu cayu ñuhu.

Cahan ra Jesúz ziquí minoo cuhva, cuhva minoo mvee ticatyi sa cua naa

¹⁰ Zaha ndo cuenda sii ndo, ta ma catyi ndo sa ma tyaa ndo yahvi vazu sii ra ndyihí vatyi catyi sihin ndo vatyi ndya gloria ta ángel zacuenda sii ra ndyihí tandihí cuiti tiemvú nandyaa ra ityi nuu ra Ndyoo Zuti, ra ndyaa gloria.

¹¹ Vatyi yuhvi, ra i quisi ndya gloria, vasi zacaqui sii ra cua naa.

¹² *¿Yozo caa sica iñi ndo?* Tatu iyo minoo ra, ta iyo minoo ziendu mvee ticatyi zono ra ta tatu cua naa minoo ti, ¿atu ma zandoo ra sii inga cumi xico sahun cumi tahan ti ta cuhun ra ndya yucu ta nanducu ra sii quiti sa cua naa cuan?

¹³ Ta tatu sa nañhi ra sii ti, sa ndisa catyi sihin ndo vatyi zii xaan ca cua cuñi ra sa cuenda ti ta ziquí sa cuenda tandihí inga cumi xico sahun cumi tahan ti sa ña cua naa.

¹⁴ Ta zuun ñi cuhva cuan ña cuñi Zutu yo ra ndyaa andivi sa cua naa numinoo ra luhlu tañi ra ya.

Cuhva cuñi si sa zahayo tucahnú iñi sii hermano yo

¹⁵ Tatu zavaha minoo hermano sa ña vaha suhun. Cuahan ndya vehe ra ta nacahan vohon sihin ra maa tuhun ñi ra ta nacatyun sihin ra ñaa sa ña vaha i zavaha ra suhun. Tatu tyaa ra yahvi sa cohon ta ndaca ra tucahnú iñi suun hermano vaha cua cuu ra.

¹⁶ Zoco tatu ma tyaa ra yahvi sa cohon sa xihna ñi, cuhun inga saha sihin minoo a uu tahan hermano. Tacuan ta tandihí sa cohon sihin ra ta cua catyi inga ra ndihí suhun vatyi sa ndisa cohon, cua cuu ra sa ndaa.

¹⁷ Ta tatu ma tyaa ra yahvi sa cahan inga hermano. Nacatyun ñuu tandihí ra hermano vehe ñuhu ñaa sa ña vaha i zavaha ra suhun. Ta tatu ma tyaa ra yahvi sa cahan

tandihi hermano, catyi ndo vatyi yivi ca ra sino iñi cuu ra, ta cuu ra tañi minoo ra zavaha sa ña vaha, tañi zavaha ra tava xuhun cuenda ra ndyaca ñaha vatyi sica ra cuaha ca.

¹⁸ Sa ndisa catyi sihin ndo ñaa sa cua cuhñi ndo ñuu ñiyivi ya, cua cunuhñi tucu si andivi. Ta ñaa sa cua ndasi ndo ñuu ñiyivi ya, cua ndasi tucu si andivi.

¹⁹ Ta catyi tuqui sihin ndo vatyi tatu cua ndu-iiñ uu tahan ndo ihya ñuu ñiyivi sa cuenda sa cua caca ndo, ra Ndyoo Zuti, ra ndyaa andivi, cua cuhva ra sii si sii ndo.

²⁰ Vatyi tatu titahan vazu uu a uñi tahan ndo sa cuenda mi, yucuan ndyei sihin ndo.

²¹ Tacuan i catyi ra Jesús, ta ziqui i tuhva ra Pedro sii ra, ta i ndaca tuhun ra sii ra: Tata, ¿yozo tahan saha cuñi si sa zehi tucahnú iñi sii minoo hermano tatu zavaha ra sa ña vaha sihin? ¿Atu zehi tucahnú iñi sii ra usa tahan saha?

²² Ta i catyi ra Jesús sihin ra: Ña catyi suhun vatyi usa tahan saha ñi. Catyi vatyi ndya tañi cumi ziendu cumi xico usi tahan saha a cuaha ca.

Cuhva iyo minoo muzu ña cuñi zaha tucahnú iñi sii ñiyivi

²³ Cuhva ndyaca ñaha ra Ndyoo cuu si tañi minoo rey, ra cuñi coto yozo tavi muzu ra sii ra.

²⁴ Ta sa quisaha tava ra cuenda sa cuenda minoo minoo ra, ta i quisi ndyaca ñu minoo ra tavi xaan sii ra. Cuaha xaan millón tavi ra sii ra.

²⁵ Ñá cuu tyiyahvi ra sii ra ta yucuan cuenda i catyi rey cuan vatyi cua xico ra sii ra sihin ñazihí ra ta zehe ra, ta cua zatyiño ñu tyiño ñiyivi. Ta cua nduyahvi tandihí ndaha tyiño ra, ta tacuan ta cua nañihí rey cuan xuhun sa tavi ra cuan sii ra.

²⁶ Yucuan cuenda i sicuiñi siti muzu ra, ta i zacahnu ra sii ra, ta i catyi ra sihin ra: "Tata, zandyeun

iñun ndyehun sii, ta cua tyiyahvi tandihí sa tavi suun."

²⁷ Tacuan ta i cundahvi iñi rey cuan sii muzu ra, ta i zaña ra sii ra, ta i zaha ra tucahnú iñi sii ra sa cuenda tandihí sa tavi ra sii ra, ta ma tyiyahvi ra sii ra.

²⁸ Zoco zuun ñi muzu cuan i quita ra, ta i nañihí ra sii inga ra cu muzu sihin ra. Tavi ra uu mil ñi sii ra. Ta i tiñi cuiñi ra zucu ra, ta i catyi ra: "¡Tyiyahvun sa tavon sii!"

²⁹ Ta inga muzu cuan i sicuiñi siti ra ityi nuu ra, ta i sica ra tumañi iñi sii ra, ta i catyi ra: "Zandyeun iñun ndyehun sii. Ta cua tyiyahvi tandihí sa tavi suun." Catyi ra.

³⁰ Zoco ñá cuñi ra cundahvi iñi sii ra. Ta cuahan ra sihin ra, i sitiñi ra sii ra vehe caa ndya cua tyiyahvi ra sa tavi ra sii ra.

³¹ Ta sa ndyehe inga ra tahan ra, ra cu muzu sihin ra, cuhva i zavaha ra sihin ra ta cuihya xaan i cuñi ra, ta i sahan inga ra ta i nacatyi ra sihin rey tandihí sa i zacuu ra sii ra.

³² Ta i cana rey sii ra cu muzu, ra tavi xaan sii ra, ta i catyi ra sihin ra: "¡Yoho, muzu ña vaha cuun! Yuhvi i zaha xein tucahnú iñi suun sa cuenda tandihí sa tavon sii, ta ñá tyiyahvun vatyi i sica xoon tumañi iñi sii.

³³ Ta ¿ñaa cuenda ñá cundahvi iñun sii inga ra cu muzu suhun tañi i cundahvi iñi mi suun?"

³⁴ Tacuan i catyi rey sitoho muzu cuan, ta i cuxaan xaan ra sihin ra, ta i tava ra tyiño sa cua ndoho ra ndya cua tyiyahvi ra tandihí sa tavi ra sii ra.

³⁵ Tacuan i catyi ra Jesús, ta ziqui i catyi ra: Ta zuun ñi cuhva cuan cua zavaha Zuti, ra ndyaa andivi, sihin maa ndo tatu ma zaha ndo tucahnú iñi sa ndisa cuiñi sii inga hermano tatu zavaha ra sa ña vaha suhun.

19

Cuhva i zacuaha ra Jesús vatyi ña vaha cua zandoo minoo ra sii ñazihí ra

¹ Sa yaha cahan ra Jesús cuhva cuan, ta i quita ra Galilea, ta i nasaa ra nu cu si Judea sa ndyaa siyo ityi caña ñicandyi siyo yuu Jordán.

² Cuaha xaan ñiyivi i sindyico sii ra, ta yucuan i zanduvaha ra sii ñu cuhu.

³ Ta i tuhva tucu ra fariseo sii ra Jesús vatyi cuñi ra nducu ra cuhva tyaa ra cuatyi sata ra. Ta i ndaca tuhun ra sii ra Jesús: ¿Atu cuu zandoo rayii sii ñazihí ra sa cuñi ñi maa ra? Catyi ra.

⁴ Ta i nacahan ra Jesús, ta catyi ra sihin ra: ¿Atu ta cahvi ca ndo Tuhun Ndyoo nu catyi si vatyi ra i zavaha ñiyivi sa xihna ñi, i zavaha ra sii minoo rayii ta sii minoo ñaha?

⁵ Yucuan cuenda cua zandoo rayii sii zutu ra ta zihí ra, ta cua ndu-iin ra sihin ñazihí ra. Ta sa nduu tahan ñu cua nduu ñu tañi minoo ñi ñiyivi ityi nuu ra Ndyoo.

⁶ Yucuan cuenda ña uu tahan ñiyivi cuu ñu, minoo ñi. Ta minoo sa zandu-iin ra Ndyoo, ña vaha zanduziin ñiyivi sii si.

⁷ Tacuan i catyi ra Jesús ta ziqui i ndaca tuhun ra fariseo sii ra: ¿Ñaa cuenda i saha ra Moisés tyiño vatyi cuu cuhva rayii minoo tutu divorcio sii ñazihí ra, ta tacuan ta cuu zandoo ra sii ña?

⁸ Ta i catyi ra Jesús sihin ra: Ndava xaan iñi ndo. Yucuan cuenda i saha ra Moisés sa zandoo ndo sii ñazihí ndo. Zoco ña tacuan i cuu si nu quisaha si.

⁹ Ta catyi sihin ndo vatyi tatu zandoo minoo rayii sii ñazihí ra ta yivi cuatyi sa quixi ña sihin inga rayii cu si ta zandoo ra sii ña ta tindaha ra sihin inga ñaha. Ra zandoo sii ñazihí sa ñahñi cuatyi cuan, zavaha ra cuatyi sa nañi adulterio. Ta tatu cua tindaha inga ra sihin minoo ñaha i zandoo yii, ra cua tindaha sihin ña, zavaha tucu maa ra cuatyi adulterio.

¹⁰ Tacuan i catyi ra Jesús, ta ziqui i catyi ra i casi ra sihin ra: Tatu

tacuan cuu si sihin rayii ta ñazihí ra, vaha ca ma tindaha yo. Catyi ra.

¹¹ Ta ziqui i catyi ra Jesús sihin ra: Ña tandihí ñiyivi cuu cutuñi iñi cuhva ya, maa ñi ñiyivi sa tyindyeer Ndyoo sii.

¹² Iyo ñiyivi ma cuu tindaha ñu vatyi tacuan ndyaa maa ñu cuhva ndya quiri i cacu ñu. Ta iyo inga ñiyivi ma cuu tindaha ñu vatyi sa sicoo cuhva zavaha ñiyivi sihin ñu. Ta iyo tucu inga ñiyivi ma tindaha ñu vatyi cuñi ñu zatyiño ñu tyiño ra Ndyoo. Tatu cuu zavaha ndo cuhva ya, zavaha ndo sii si.

Cuhva i zoco ñaha ra Jesús sii sa ndiyihi

¹³ Tacuan ta ziqui i quisi ndyaca ñiyivi sii sa ndiyihi nu ndyaa ra Jesús vatyi cua tyizo ra ndaha ra xiñi si ta cahan ra sihin ra Ndyoo. Zoco i catyi ra i casi ra Jesús sihin ñiyivi vatyi ma quisi ndyaca ñu sii sa ndiyihi sii ra.

¹⁴ Zoco i catyi ra Jesús: Ma cahan ndo. Naquisi ndyaca maa ñu sii sa ndiyihi sii, vatyi tatu cuñi ñiyivi sa cua cundyaca ñaha ra Ndyoo sii ñu, cua sino iñi ñu sii, tañi sino iñi sa ndiyihi ya.

¹⁵ Tacuan i catyi ra Jesús, ta i tyizo ra ndaha ra xiñi sa ndiyihi. Ta ziqui i quita ra yucuan.

Catyi ra Jesús vatyi yii xaan cua cuhva cuenda minoo ra cuca sii ra sii Ndyoo

¹⁶ I sahan minoo ra yoco nu ndyaa ra Jesús, ta i ndaca tuhun ra sii ra: Yoho maestro vaha xoon. ¿Yozo caa zacui ta ñihí tahvi añime?

¹⁷ Ta i catyi ra Jesús sihin ra: ¿Ñaa cuenda catyun vatyi vaha xein? Minoo tuhun ñi ra vaha iyo, maa ra Ndyoo. Tatu cuñun sa ñihí tahvi añimon, zavohon cuhva catyi sa usi tahan ley ra Ndyoo.

¹⁸ Ta i catyi ra cuan sihin ra Jesús: ¿Ndyaa ley? Ta i catyi ra Jesús sihin ra: Ma cahñun sii ñiyivi. Ma cuzun sihin inga ñaha sa yivi ñazihun cuu.

Ma zuhun. Ma cohon cuendu ziqui ñiyivi.

¹⁹ Tyoon yahvi sii zutun ta sii zihun. Ta cuñi xoon sii inga ñiyivi tañi cuñun sii moo.

²⁰ Tacuan i catyi ra Jesús, ta i catyi ra yoco cuan sihin ra: Tyei yahvi sii tandihí tuhun cuan cuhva ndya ta luhli. ¿Ñaa ca sa cumañi sii?

²¹ Ta i catyi ra Jesús sihin ra: Tatu cuñun sa ma coo ca cuatyun caña ñi, cuahan, ta xicon tandihí sa iyo suun, ta cuhvón xuhun cuan sii ñiyivi ndahvi ta cua coo sa cuca suun gloria, ta quisun ta cundyicon sii. Catyi ra.

²² Ta sa siñi ra yoco cuhva cuan, ta i nducuihya xaan iñi ra vatyi cuca xaan ra.

²³ Tacuan ta ziqui i catyi ra Jesús sihin ra i casi ra: Sa ndisa cuii catyi sihin ndo vatyi yii xaan ta cua quihvi ñiyivi cuca nu ndyaca ñaha ra Ndyoo.

²⁴ Ta catyi tuqui inga saha vatyi yii ca quihvi minoo ra cuca nu ndyaca ñaha ra Ndyoo ta ziqui ca minoo camello yaha ti xuú minoo yicuitici.

²⁵ Ta sa siñi ra i casi ra Jesús cuhva i cahan ra, ta iyo xaan i cuñi ra, ta i catyi ra: Tatu tacuan cuu si ñyoo ra cuu cacu?

²⁶ Ta i ndyehe ra Jesús sii ra, ta catyi ra sihin ra: Tandihí sa ña cuu zavaha ñiyivi, cuu zavaha ra Ndyoo sii si. Catyi ra.

²⁷ Tacuan ta i catyi ra Pedro sihin ra: Sa zandoo ndi tandihí sa sii ndi, ta ndyico ndi suun. ¿Ñaa sa cua ñihi maa ndi?

²⁸ Ta i catyi ra Jesús sihin ra: Sa ndisa catyi sihin ndo vatyi ndoho ra ndyico sii, cuee ca, quivi cua cundyaa ra i quisi ndya gloria nu tyayu vaha ra sisi gloria ta cua cundyaa tucu maa ndo nu tyayu vaha. Minoo si sii minoo minoo ndo, ta cua tycuhva ndo sii ñiyivi hebreo, tandihí sa usi uu tahan ityi ñu.

²⁹ Ta tandihí ñiyivi sa zandoo yehe ñu a tahan ñu a zutu ñu a zihí ñu a ñuhu ñu sa cuenda mi, cua ñihi ñu minoo ziendu ca si, ta cua ñihi tahvi añima ñu, ta cua cundito ñu tandihí cuii tyiemvu.

³⁰ Zoco cuaha ñiyivi ñiñi vityi, yivi ca ñiyivi ñiñi cua cuu ñu. Ta ñiyivi ña ñiñi, cua nduu ñu ñiyivi ñiñi xaan.

20

Cahan ra Jesús ziqui minoo cuhva, cuhva ra zatyino

¹ Cuhva ndyaca ñaha ra Ndyoo cuu si tañi minoo sitoho ñuhu. I quita ra ñaha ñi, ta cuahan ra vatyi cua nducu ra muzu sa cua tohon uva ra.

² Ta sa yaha zandaa ra tyiño sihin muzu cuan vatyi cua tyiyahvi ra oco usi peso sa minoo quivi, ta ziqui i tasi ra sii ra nu ndyaa tyiño ra.

³ Ta i quita tucu sitoho si cuhva caa iin sa ñaha ñi, ta i ndyehe ra vatyi yucu xaan ñiyivi nuyahvi, yucu ñi maa ra.

⁴ Ta i catyi ra sihin ra: Cuahan tucu ndoho nu iyo tyiñe, ta cua tyiyahvi sii ndo cuhva tahan si. Ta cuahan muzu cuan cuhva catyi ra.

⁵ Ta i quita tucu sitoho si cuhva maa ora, ta zuun ñi cuhva cuan i zavaha tucu ra. Ta tacuan tucu caa uñi sa sahiñi.

⁶ Ta caa ohon sa sahiñi i sahan tucu ra nuyahvi, ta i nañihi ra sii inga ra ña zatyino, ta i catyi ra sihin ra: “¿Ñacu yucu ñi maa ndo ihyá ndiyiyaca, ta ña zatyino ndo?”

⁷ Ta i catyi ra cuan sihin ra: “Vatyi yoñi i saha tyiño sii ndi.” Ta ziqui i catyi sitoho si: “Cuahan tucu ndoho. Cua zatyino ndo nu iyo tyiñe. Ta cua tyiyahvi sii ndo cuhva tahan si.”

⁸ Ta tacuan i cuu si, ta sa sahiñi cuan i catyi sitoho ndaha tyiño cuan sihin ra zacuenda xuhun ra: “Cana sii ra zatyino, ta tyiyahvun sii ra. Quisohon sihin ra i quisaha

zatyño sa sahiñi ta ndya cuhva ndya ra i quisaha sa xihna ñi.”

⁹ Tacuan ta i saa ra i quisaha zatyño cuhva caa ohon. Ta minoo minoo ra i ñíhi ra oco usi peso.

¹⁰ Cuee ca i tahan si tyiyahvi ra sii ra i quisaha zatyño sa ñaha ñi, ta i sica ñi ra cuan vatyi cua ñíhi ra cuaha ca, zoco zuun ñi cuhva i ñíhi maa ra, oco usi peso sa minoo minoo ra.

¹¹ Sa yaha quihin ra sii si, ta ziqui i quisaha cahan ra sii ra cu patron ra.

¹² Ta catyi ra: “Inga ra cuan, i saa ra ndya nu ndíhi. I zatyño ra minoo ora ñi, ta iin ñi cuhva i tyiyahvun sii ra tañi i tyiyahvun sii maa ndi, ta maa ndi ñíhi xaan i zatyño ndi ndiyiyaca cuii nu ndyii.”

¹³ Zoco i catyi sitoho si sihin minoo ra cuan: “Amigo, ñahñi sa ña vaha i zavehi suhun. ¿Atu ñá zandaa yo tyiño vatyi cua tyiyahvi oco usi peso suun?

¹⁴ Quihin xuhun ya ta cuhun. Inuu ñi cua tyiyahvi sii ra i saa ta sa cuñi ndíhi tyiño tañi cua tyiyahvi suun.

¹⁵ ¿Atu ñahñi cuhva iyo sii, sa zavehi cuhva cuñi sihin xuhin? ¿Atu cuxoon sa vaha ñiyivi cui?”

¹⁶ Ta ziqui i catyi tucu ra Jesú: Zuun ñi cuhva cuan, ra saa nu ndíhi, cua cuu ra ra nuu. Ta ra quisaha sa xihna ñi, cua cuu ra nu ndíhi vatyi cane sii cuaha xaan ñiyivi, zoco zuhva cuii ñi cuu ñiyivi i casi.

Nacatyi ra Jesú inga saha vatyi cua cahñi ñiyivi sii ra

¹⁷ Cuahan ra Jesú ñuu Jerusalén. Ta ityi cuahan ra i tava ziin ra sii sa usi uu tahan ra i casi ra, ta i catyi ra sihin ra:

¹⁸ Cuahan yo ñuu Jerusalén ya. Ta cua cuhva cuenda ñiyivi sii ra i quisi ndya gloria ndaha ra cu zutu nahnu ta ra cu maestro cuenda ley, ta cua catyi ra vatyi cua cuu ra.

¹⁹ Ta cua cuhva cuenda ra sii ra sii ñiyivi sa yivi ñiyivi hebreo cuu, ta cua vacu ndyaa ñu sii ra, ta cua cañi xaan ñu sii ra, ta cua cahñi ñu sii ra nu cruz. Ta sa cu uñi quivi cua nandoto tucu ra.

Minoo sa i sica zíhi ra Jacobo ta ra Juan

²⁰ Ta ziqui i tuhva zíhi ra Jacobo ta ra Juan sii ra Jesú. Yí ña sii ra Zebedeo. I zacahnu ña sii ra Jesú, ta i sica ña minoo tumañi iñi sii ra.

²¹ Ta i ndaca tuhun ra Jesú sii ña, ta i catyi ra: ¿Ñaa sa cuñun zavehi? Ta i catyi ña sihin ra: Cuhvon vatyi quivi cua cundyaca ñohon, cua cundyaa nduu tahan zehi suhun. Minoo ra siyo cuohon ta minoo ra siyo zatyun.

²² Zoco i catyi ra Jesú: Ña siton ñaa sa sicon. Ta i catyi ra sihin ra Jacobo ta ra Juan: ¿Atu cundyee ndoho ndyehe ndo tundoho tañi cua ndyehe mi? Ta i catyi ra: Cundyee iñi ndi.

²³ Ta i catyi ra Jesú sihin ra: Ndisa cuii cua ndyehi tundoho ta cua ndyehe ndoho tundoho sa cuenda mi. Zoco sa cundyaa ndo siyo cuehi, ta siyo zatyi, ña tahan si sa yuhvi cuhva. Maa ra Ndyoo Zuti cua catyi yoo ra cua ñíhi ndatu cuan.

²⁴ Ta sa siñi inga usi tahan ra i casi ra Jesú ta i cuxaan ra sihin ra Jacobo ta ra Juan.

²⁵ Zoco i cana ra Jesú sii tandíhi ra, ta i catyi ra sihin ra: Sa sito maa ndo cuhva ndyaca ñaha ñiyivi ñuu ñiyivi. Iyo ra cu nuu, ta zacoto ra sii tandíhi ñiyivi vatyi ndyaca ñaha ra sii ñu.

²⁶ Zoco ña tacuan cuu si sa cuenda ndoho. Zama si cuhva. Tatu cuñi minoo ra cuu ra ra cahnu, natyindyee ra sii ra tahan ra.

²⁷ Ta yoo ra cuñi sa cuu ra minoo ra cahnu ityi nuu ra Ndyoo, cuñi si sa nduu ra muzu sii tandíhi ndo.

²⁸ Vatyi cuhva ndya ra i quisi ndya gloria, ña vasi ra sa vatyi

tyindyeer ñiyivi sii ra. Vasi ra sa tyindyeer ra sii ñiyivi. Ta vasi ra sa cuenda sa cua cuu ra sa cuenda ñiyivi, ta ziqui cua cuu cuhun cuaha ñiyivi gloria.

Zanduvaha ra Jesùs sii uu tahan ra cuaa

²⁹ Quita ra ñuu Jericó, ta cuaha xaan ñiyivi i sindyico sii ra.

³⁰ Ta ityi cuahan ra ndyaa uu tahan ra cuaa yu-ityi. Ta sa i siñi ra sa cua yaha ra Jesùs, i cana saa ra, ta catyi ra: ¡Yoho Jesùs, zehe ra David, cundahvi iñun sii ndi! Catyi ra.

³¹ Cuaha xaan ñiyivi i cuxaan, ta catyi ñu nacutaxi ra, zoco ñihí ca nduu ra cana saa ra, ta catyi ra: ¡Yoho ra ndyaca ñaha ta ñiyivi ra David cuun! ¡Cundahvi iñun sii ndi!

³² Tacuan ta i sicuñi ra Jesùs, ta i cana ra sii ra, ta catyi ra: ¿Ñaa sa cuñi ndo sa zavehi sihin ndo?

³³ Ta i catyi ra cuaa cuan: Maestro, cuñi xaan ndi sa nandyehe ndi. Catyi ra.

³⁴ Ta i cundahvi xaan iñi ra Jesùs sii ra, ta i tiñi ra siti nuu ra, ta zuun ñi caa cuhva cuan i cuu nandyehe ra, ta i sindyico ra sii ra Jesùs.

21

Cuhva i quihvì ra Jesùs ñuu Jerusalén

¹ Ta cuhva sa cua saa ra ñuu Jerusalén, i saa ra sa xihna ñi ndya ñuu Betfagé yatyi ñi minoo yucu sa nañi yucu Olivos, ta ziqui i tasi ra Jesùs sii uu tahan ra sica noo sihin ra minoo tysiño.

² I catyi ra sihin ra: Cuahan ndo minoo ñuu sa ndyaa yatyi ñi yucuan, ta cuhva sa quihvì ndo ñuu cuan, cua nañihi ndo sii minoo burro. Nuhñi ti, ta nandyaa zehe ti sihin ti. Ndasi ndo sii ti, ta quisí ndo sihin ti.

³ Ta tatu iyo ñiyivi ndaca tuhun sii ndo ñaa cuenda ndasi ndo sii ti, catyi ndo: "Siñi ñuhu ti sii ra ndyaca

ñaha sii yo." Ta tacuan ta cua cuhva ra sii ti.

⁴ Ta i cuu tandihí cuhva cuan vatyi cua natahan si cuhva i catyi minoo ra profeta nu i tyaa ra tye-hen:

⁵ Ndyehe ndo, vasi rey ndo.

Zanduluhlu xaan ra sii ra, ta yozo ra minoo burro luhlu.

⁶ Ta cuahan ra sica noo sihin ra Jesùs, ta i zavaha ra cuhva i tava ra Jesùs tysiño sii ra.

⁷ I quisí ndyaca ra sii burro cuan sihin zehe ti, ta i tyizo ra zahma sata ti, ta i sicozo ra Jesùs sii ti.

⁸ Ta cuaha xaan ñiyivi i saqui zahma ñu ityi. Inga ñu i sahndya ndaha numa ta saqui ñu ityi nu cuahan ra.

⁹ Ta ñu cuahan ityi nuu ra Jesùs, ta ñu vasi ityi sata ra, i cana saa ñu, ta catyi ñu: ¡Cahnu xaan cuu zehe ra David! ¡Vaha xaan cuu ra vasi sa cuenda ra Ndyoo! ¡Nazacahnu yo sii ra Ndyoo!

¹⁰ Ta cuhva sa quihvì ra ñuu Jerusalén, i nduthví tandihí ñiyivi ñuu cuan, ta catyi tandihí ñu: ¿Yoo ra cuu ra ya?

¹¹ Ta i catyi ñu: Ihya ra cuu ra Jesùs, minoo ra cu profeta. Ra ñuu Nazaret cuu ra nu cu si Galilea.

Tava ndyizo ra Jesùs sii ñiyivi zavaha ndya vaha ñi yuvehe ñuhu cahnu

¹² Tacuan ta i quihvì ra Jesùs nu cuu nuquehe vehe ñuhu cahnu, ta i tava ndyizo ra sii ñu xico ta ñu zata yucuan. Ta i zanduva ihno ra mesa ñiyivi nazama xuhun ñiyivi, ta tacuan tucu tyayu ñiyivi xico paloma.

¹³ Ta i catyi ra sihin ñu: Catyi Tuhun Ndyoo: "Vehe mi cuu vehe nu cahan ñiyivi sihin ra Ndyoo"; zoco maa ndo zacuu ndo vehe ra zuhu sii si. Catyi ra.

¹⁴ Ta i quisí ra cuaa ta ra coxo nu ndyaa ra Jesùs sisi vehe ñuhu, ta i zanduvaha ra sii ra.

¹⁵ Zoco i ndyehe ra zutu nahnu ta ra maestro cuenda ley sa ndyityi i

zavaha ra Jesús. Ta i siñi ra vatyicana saa sa ndyihi sisi vehe ñuhu, ta catyi si: "Cahnu xaan cuu Zehera David." Ta i cuxaan xaan ra.

¹⁶ Ta i catyi ra sihin ra Jesús: ¿Atu siñun sa cahan sa ndyihi cuan? Ta i catyi ra Jesús sihin ra: Siñi sa cahan si. ¿Atu ta cahvi cando Tuhun Ndyoo nu cahan si sa cuenda cuhva ya? Catyi si:

Maa ra Ndyoo saha sa cata sa ndyihita sa lee, ta vaha xaan cuu cuhva zacahnu si sii ra.

¹⁷ Tacuan ta ziqui i zandoo ra Jesús sii ñiyivi sisi vehe ñuhu. I quita ra ñuu Jerusalén, ta cuahan rana ndya ñuu Betania cua cuzu ra.

Ña zii maa i cuñi ra Jesús sihin minoo yutu ñahñi yucu vixi iñi nuu

¹⁸ Inga quivi ñaha ñi cua nanuhutucu ra Jesús ndya ñuu Jerusalén, ta i sizoco ra.

¹⁹ Ityi cuahan ra i ndyehe ra minoo yutu higuera, ta i sahan ra i sindyehe ra tatu iñi siti tu, zoco ñá ñihia maa ra ndaha ñi. Maa maa ndaha ñi tu iñi. Ta i catyi ra Jesús sihin yutu cuan: Ma cuhva ca moo yucu vixi casi ñiyivi. Ta zuun ñi caa cuhva cuan, ndaha i na-ityi ñi tu.

²⁰ Ta cuhva sa ndyehe ra i casi ra Jesús sii tu, iyo xaan i cuñi ra ta i catyi ra sihin ra Jesús: ¡Yatyi xaan i na-ityi yutu higuera ya!

²¹ Ta i nacahan ra Jesús, ta catyi ra sihin ra: Sa ndisa catyi sihin ndo vatyi tatu niñxaan cuu iñi ndo, ta ma caca xaan iñi ndo tatu cuu a ma cuu zavaha ndo, cua zavaha ndo cuhva i zavehi sihin yutu higuera ya. Ta ña maa ñi tacuan. Cua cuu tucu cahan ndo sihin yucu ya: "Cuiñi siyon ihya, ta cua ndihvun sisi tyauhun", cua catyi ndo.

²² Ta tandihí cuii ñaa sa cua caca ndo sii ra Ndyoo, tatu cua sino iñi ndo vatyi cua ñihia ndo sii si, cua ñihia ndisa cuii ndo sii si.

Iyo xaan cuhva sii ra Jesús

²³ I quihví ra Jesús sisi vehe ñuhu, ta i tuhya ra zutu nahnu ta ra mandoñi sii ra cuhva zacuaha ra, ta i ndaca tuhun ra sii ra: ¿Yoo sa saha tyiño suun vatyi zavohon tandihí cuhva ya? ¿Ta yoo ra catyi suhun vatyi zavohon sii si?

²⁴ Ta i nacahan ra Jesús, ta catyi ra sihin ra: Cuñi tuqui nducu tuhin minoo cuhva sii maa ndo. Tatu nacatyi ndo, tacuan ta ziqui cua nacatyi sihin ndo yoo ra saha cuhva sii, ta zavehi cuhva ya.

²⁵ ¿Yoo i tasi sii ra Juan sa zacoonndutyra? ¿Atu i tasi ra Ndyoo sii ra a ñiyivi? Catyi ndo. Tacuan ta i natuhun tahan ra cuan sihin tahan ra, ta catyi ra: Tatu catyi yo vatyi i tasi ra Ndyoo sii ra Juan, cua catyi ra ya: "¿Ñaa cuenda ñá sino iñi ndo sa cahan ra?"

²⁶ Zoco ma cuu catyi yo vatyi ñiyivi i tasi sii ra Juan vatyi yuhu yo sii ñiyivi vatyi sica iñi tandihí maa ñu vatyi ra Juan cuu minoo ra profeta.

²⁷ Yucuan cuenda i catyi ra sihin ra Jesús: Ña sito ndi yoo ra i tasi sii ra Juan. Ta i catyi ra Jesús sihin ra: Ta yuhvi tucu ma nacatyi tucu vii yoo ra i saha cuhva ya sii.

Cahan ra Jesús cuhva minoo ra iyo uu tahan zehe

²⁸ I catyi tucu ra Jesús sihin ra zutu nahnu ta sihin ra mandoñi: ¿Yozo caa sica iñi ndo sa cuenda tuhun ya? Sicoo minoo ra, ta sicoo uu tahan zehe yií ra. Ta i cahan ra sihin minoo ra, ta catyi ra: "Zehe luhli, cuahan vatyi cua tohon uva."

²⁹ Ta i catyi zehe ra: "Ma cuhin." Zoco cuee ca i ndu-uu iñi ra cuhva ña vaha i cahan ra sihin zutu ra, ta cuahan ra.

³⁰ Ta i sahan zutu ra i sicahan ra zuun ñi cuhva cuan sihin inga zehe ra. Ta i catyi inga zehe ra: "Cuhin, tata." Catyi ra. Zoco ñá sahan ra.

³¹ Ta vityi catyi ndo ¿ndya ra i zavaha cuhva cuñi zutu ra? Ta i catyi ra cuan sihin ra Jesús: Ra sa xihna ñi. Ta i catyi ra Jesús sihin

ra: Sa ndisa catyi sihin ndo vatyi sa cuu quihví ra tava xuhun cuenda ra ndyaca ñaha ta ñiyíví zíi iñi nu ndyaca ñaha ra Ndyoo, zoco maa ndo ma cuu quihví ndo.

³² Vatyi i quisi ra Juan, ta i zacuha ra minoo cuhva ndoo xaan sii ndo, ta ñá sino iñi ndo sii ra, zoco ra tava xuhun cuenda ra ndyaca ñaha ta ñu zíi iñi i sino iñi ñu sa cahan ra. Ta vazu ndyehe maa ndo cuhva cuan, zoco ñá zama ndo cuhva iyo ndo, ta ñá sino iñi ndo.

Tañi ra ña cuñi zatyíño vaha tacuan iyo ra cua cahñi sii ra Jesús

³³ Cuiñi ndo inga cuhva ya. Sicoo minoo ra iyo ñuhu, ta i zavaha ra minoo sacu, ta i tasi ra yoho uva sisi si. Ta zíqui i zavaha ra nu cua tava ra ndutya uva ta minoo vehe tyiyahva vatyi cua zacuenda ra sacu ra. Ta i saha noo ra sacu ra sii minoo ityi ra cua zatyíño yucuan. Ta cuahan ra nusica.

³⁴ Ta saa quivi sa iyo yucu vixi cuan ta i tasi ra sii muzu rä nu ndyaa ra zatyíño yucuan vatyi cua quiñin ra zuhva yucu vixi cuhva tahan si sii patrón ra.

³⁵ Zoco ra zatyíño yucuan, i tñin ra sii muzu cuan. I cañi ra sii minoo ra. Minoo rä i sahñi ra. Ta i cañi ra sihin yuu sii inga ra.

³⁶ Inga saha i tasi tucu patrón cuan sii inga muzu ra. Cuaha ca ra i tasi ra ta zíqui sa xihna ñi. Ta zuun ñi cuhva ña vaha cuan i zavaha ra sihin ra.

³⁷ Ta nu ndihí tuhun, i tasi ra sii zehe ra nu ndyaa ra zatyíño cuan vatyi catyi ra: “Cua tyaa ra cuan yahvi sii zehi.”

³⁸ Zoco cuhva sa ndyehe ra zatyíño sii zehe ra, i natuhun tahan ra sihin tahan ra, ta i catyi ra: “Ihya ra cuu ra cua nañihi ndaha tyíño quivi cua cuu zutu ra. Nacahñi yo sii ra vatyi ndoo maa yo sihin sacu ya.” Catyi ra.

³⁹ Ta i tñin ra cuan sii zehe ra, ta i tava ndyizo ra sii ra sata sacu, ta i sahñi ra sii ra.

⁴⁰ Tacuan i catyi ra Jesús, ta zíqui i ndaca tuhun ra sii ra tyizoho: ¿Yozo caa cua zavaha sitoho sacu cuan sihin ra sahñi sii zehe ra?

⁴¹ Ta i nacahan ra yucu yucuan, ta catyi ra: Cua zanaa ra sii ra ña vaha cuan, ta cua cuhva noo ra sacu ra sii inga ra zatyíño vaha, ra cua cuhva yucu vixi cuhva tahan si sii ra.

⁴² Ta i catyi ra Jesús sihin ra: ¿Atu ta cahvi ca ndo Tuhun Ndyoo? nu catyi si tyehen: “I zavita ihno ñiyíví zandaa vehe sii yuu sa cuñi si sa cuenda siquí vehe. Ta vityi yuu cuan cuu sa ñiñi ca ta zíqui tandihí sa cuenda vehe cuan vatyi tacuan catyi maa ra Ndyoo. Ta vaha xaan cuñi yo sihin cuhva ya.”

⁴³ Yucuan cuenda catyi sihin ndo vatyi ma cuu cuhun ndo nu ndyaca ñaha ra Ndyoo, zoco inga ñiyíví sa yíví ñiyíví hebreo cuu cua cuhun ñu vatyi vaha cuhva zavaha ñu.

⁴⁴ Ta yoo ra cua nduva zíqui yuu sa quehin tuhun cuan, cua tahnu cuatyí ra, zoco yoo ra cua canacava yuu cuan zíqui, cua cahnu cuatyí si sii ra sehe sehe.

⁴⁵ Ta sa siñi ra zutu nahnu ta ra fariseo cuhva cahan ra Jesús, i cutuñi iñi ra vatyi cahan ra Jesús sa cuenda maa ra.

⁴⁶ I cuñi ra tñin ra sii ra Jesús, zoco i yuhu ra sii ñiyíví vatyi sica iñi ñu vatyi minoo profeta cuu ra Jesús.

22

Cuhva minoo vico tindaha

¹ I quisaha cahan ra Jesús inga saha zíqui minoo cuhva, ta i catyi ra:

² Cuhva ndyaca ñaha ra Ndyoo cuu si tañi minoo rey i zavaha minoo vico tindaha sa cuenda zehe ra.

³ Ta i tasi ra sii muzu ra vatyi cua cana ra sii ñiyíví cua quisi vico cuan, zoco ñá cuñi ñu quisi.

⁴ Inga saha i tasi tucu ra sii inga muzu ra, ta catyi ra sihin ra: “Catyi ndo sihin ñiyíví i cane vatyi sa

ndyaa listo sa casi ñu. Sa sahñi zindiquí zone ta inga quití xahan. Sa ndyaa listo tandihi. Naquisi maa ñu vico."

⁵ Ta tacuan i nacatyi muzu ra, zoco ñá tyaa ñiyiví yahvi. Minoo ra cuahan ra nu iyo itu ra, ta inga ra cuahan ra nu iyo inga tyiño ra.

⁶ Ta inga ñiyiví i tiín sii muzu rey cuan, ta i cañi xaan ra sii ra ndya cuhva ndya sahñi ra sii ra.

⁷ Ta sa siñi rey cuan cuhva cuan, i cuxaan xaan ra, ta i tasi ra sii zandaru ra vatyi cua cahñi ra sii ra sahñi sii ra cuan, ta i sahmi ra ñuu ra.

⁸ Ta ziquí i catyi rey cuan sihin muzu ra: "Sa ndyaa listo tandihi sa cuenda vico tindaha, zoco ñiyiví i cane, ña vaha ñu vatyi ñá tyaa ñu yahvi sa quehin, ta ña tahan si sii ñu quisi ñu.

⁹ Yucuan cuenda cuahan ndo calle nahnu, ta yoo ra ndyehe ndo cana ndo sii ra naquisi ra vico tindaha."

¹⁰ Ta cuahan muzu ra, ta i zati-tahan ra sii tandihi ñiyiví i nañihí ra, ñiyiví vaha ta ñiyiví ña vaha, ta i sicoo cuaha xaan ñiyiví vico tindaha cuan.

¹¹ Tacuan ta i quihví rey cuan vatyi cua ndyehe ra sii ñiyiví i saa vico cuan, ta yucuan i ndyehe ra sii minoo ra ña ñoho zahma cuenda vico tindaha.

¹² Ta i catyi ra sihin ra: "Amigo, ¿yozo caa i quihvun ta ña ñohon zahma sa cuenda vico tindaha?" Catyi ra. Zoco ñá nacahan maa ra cuan.

¹³ Ta ziquí i catyi rey cuan sihin muzu ra: "Cuhñi ndo saha ra ta ndaha ra ta zavita ndo sii ra nu ñaa, ityi sata nu cua vacu xaan ñiyiví ndya cuhva casi quihñi noho ñu.

¹⁴ Vatyi i cane sii cuaha xaan ñiyiví, zoco zuhva ñi ñu i casi ta cuu quihví ñu."

Tahan si tyaa yo yahvi sii ra cu tyiño ta sii ra Ndyoo

¹⁵ Tacuan ta ziquí i titahan ra fariseo ta i zacasi tahan ra tyiño minoo cuhva cua zavaha ra ta cua nducu ra cuhva sihin ñaa minoo tuhun ña vaha cua cahan ra Jesú, ta cua tyaa ra cuatyi sata ra.

¹⁶ Ta i taši ra fariseo sii zuhva ra ndyico sii ra sihin ra ndyico sii ra rey Herodes, ta i catyi ra sihin ra Jesú: Maestro, sito ndi vatyi ra vaha xaan cuun ta zañohon ityi ra Ndyoo sa ndisa. Ta inuu ndita ñi tyoon yahvi sa cahan ñiyiví cuca ta ñiyiví ndahvi.

¹⁷ Yucuan cuenda nacatyun sihin ndi, ¿yozo caa sica iñun? ¿Atu vaha tyiyahvi yo xuhun sii ra ndyaca ñaha César a ña vaha? Catyi ra.

¹⁸ Zoco i tuu iñi ra Jesú vatyi ña vaha añima ra cuan. Ta i catyi ra sihin ra: ¿Ñaa cuenda nducu coto ihñi ndo sii? ndoho ra zaha tuhun vatyi vaha xaan ndo zoco ña ndisa ndo.

¹⁹ Zañaha ndo minoo xuhun sii. Catyi ra. Ta i quisí ndyaca ra minoo xuhun sii ra.

²⁰ Ta i ndaca tuhun ra Jesú sii ra: ¿Yoo sii nuu ndyaa ya? ¿Ta yoo sii ziví ndyaa ya?

²¹ Ta i catyi ra cuan. Sii ra gobierno César. Ta ziquí i catyi ra Jesú sihin ra: Cuhva ndo sii ra César sa cuu sii maa ra. Ta cuhva ndo sii ra Ndyoo sa cuu sii ra Ndyoo.

²² Ta sa siñi ra cuan sa cahan ra Jesú, ta iyo xaan i cuñi ra, ta i zandoo ra sii ra ta cuahan ra.

Ndaca tuhun ra tatu cua nandoto tucu ñiyiví

²³ Zuun ñi quiví cuan sahan zuhva ra saduceo cua cahan ra sihin ra Jesú. Ra saduceo cuu ra catyi vatyi ma nandoto tucu ñiyiví i sihi. Yucuan cuenda i ndaca tuhun ra sii ra Jesú cuhva ya:

²⁴ Maestro, i catyi ra Moisés vatyi tatu sihi minoo rayíi ta ndoo ndahvi ñazíhi ra ta yoñi zehe ra, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

25 Sicoo usa tahan rayii sihin yañi ra. I tindaha ra nuu. Ta i sihi ra, ta yoñi zehe ra i sicoo. I zandoo ra sii ñazihii ra cuenda yañi ra.

26 Ta tacuan tucu i zavaha ra cuuu, ta ra cu uñi ta cuhva ndya ra cu usa.

27 Ta nu ndihii tuhun i sihi ndihii tucu maa ñaha cuan.

28 Yucuan cuenda cuñi ndi coto ndi, ¿yoo ra cua cuu yii ña quivi cua nandoto ñiyivi? vatyi ñazihii tandihii sa usa tahan ra i cuu sii ña. Tacuan i catyi ra cuan sihin ra Jesús.

29 Ta i nacahan ra Jesús, ta i catyi ra sihin rä: Ñasito ndo ñaa sa cahan ndo vatyi ña sito ndo ñaa sa catyi Tuhun Ndyoo. Ta ña sito ndo vatyi iyo xaan cuhva sii ra Ndyoo.

30 Ñiyivi cua nandoto inga ñuu ñiyivi saa, ma tindaha ca ñu indyacuan, ta ma cuhva ca ñiyivi sii zehe ñu sa tindaha ñu. Cua nduu ñu tañi ángel ra Ndyoo sa iyo andivi.

31 Ta sa cuenda tuhun tatu nandoto ñiyivi a ma nandoto ñu, ¿atu ta cahvi ca ndo sa i cahan ra Ndyoo sihin ndo? nu i catyi ra:

32 "Yuhvi cui Ndyoo sii ra Abraham ta sii ra Isaac ta sii ra Jacob." Yivi Ndyoo sii ñiyivi ndaha sihi cuii cuu ra. Ndyoo cuu ra sii ñiyivi cua cundito tandihii cuii tyiemvu.

33 Tacuan i catyi ra Jesús, ta sa siñi tandihii ñiyivi, iyo xaan i cuñi ñu sihin cuhva i zacuaha ra.

Minoo ley ra Ndyoo sa ñiñi ca

34 Zoco cuhva i siñi ra fariseo vatyi i zacutaxi ra Jesús sii ra saduceo, ta i titahan ra fariseo.

35 Ta minoo ra fariseo, ra cu minoo abogado, i ndaca tuhun ra sii ra Jesús vatyi cuñi ra nducu coto ihñi ra sii ra. Ihya cuu sa ndaca tuhun ra:

36 Maestro, ¿ndya cuu ley ra Ndyoo sa ñiñi ca?

37 Ta i catyi ra Jesús sihin ra: Ley sa ñiñi ca sii ra Ndyoo catyi si: "Nihi xaan cuñi ndo sii Ndyoo Zutu ndo sihin añima ndo. Hin ñi sii ra caca iñi

ndo; iñi sihin ra cahan ndo; iñi ñi tyiño ra zatyiño ndo."

38 Ihya cuu sa xihna ñi ley ra Ndyoo, ta ley sa ñiñi ca cuu si.

39 Ta sa cu uu ley, iñi ñi sasi tahan si sihin ley sa xihna ñi cuan. Catyi si: "Cuñi xaan ndo sii tandihii inga ñiyivi tañi cuñi ndo sii maa ndo."

40 Ñahñi inga ca ley ñiñi ca ta ziñui nduu tahan ley ya. Tandihii inga ley ra Ndyoo ta tandihii sa i tyaa tandihii ra profeta, sasi tahan si sihin nduu tahan ley ya, ta tyaa si yahvi sii si.

¿Yoo sii zehe cuu sii ra Jesus?

41 Cuhva sa yucu ra fariseo iñi ñi yucuan i ndaca tuhun ra Jesús sii ra:

42 ¿Yozo caa sica iñi maa ndo sa cuenda ra Cristo? ¿Yoo zehe sii ra? Ta i catyi ra fariseo cuan sihin ra: Zehe ra David.

43 Ta ziñui i catyi ra sihin ra: Ñaa cuenda vatyi cuhva i cahan ra David cuhva cuñi Tatyi II ta i catyi ra vatyi ra ndyaca ñaha sii ra cuu ra Cristo? Ihya cuu sa i tyaa ra David:

44 Cahan ra Ndyoo sihin ra ndyaca ñaha sii mi, ta catyi ra: "Cundyoon siyo cuehi ndya cuhva ndya cua saa quivi cua cuhve cuhva cua zahacanoon sii ñiyivi xaan iñi suun."

Tacuan i tyaa ra David catyi ra Jesús.

45 Tatu zuun ñi ra David catyi vatyi ra ndyaca ñaha sii ra cuu ra Cristo, ¿yozo caa cuu cuu ra Cristo zehe ra David?

46 Ta sa catyi ra Jesús cuhva cuan, ta yoñi i cuu nacatyi cuhva sa ndaca tuhun ra. Ta ndya quivi cuan, yoñi ca i caña iñi ndaca tuhun ñaa inga tuhun sii ra.

23

Tyaa ra Jesús cuatyi sata ra fariseo ta ra maestro cuenda ley

¹ Tacuan ta ziqui i cahan ra Jesús sihin tandihí ñiyivi ta sihin ra i casi ra, ta i catyi ra:

² Sica iñi ra maestro cuenda ley ta ra fariseo vatyi cuu nacatyi ra tandihí cui sa cuñi catyi ley ra Moisés.

³ Yucuan cuenda tandihí sa catyi ra cuan, tyaa ndo yahvi sii si, ta zavaha ndo sii si, zoco ma zavaha ndo cuhva zavaha maa ra vatyi cahan ra minoo cuhva ta zavaha ra inga si.

⁴ Zanducuaha ca ra ley i tasi ra Ndyoo ta sa naaha. Yoñi sa cuu zavaha tandihí sii. Ta nu maa ra ta ña zavaha ra tandihí si vatyi sa sito ra vatyi ma cuu.

⁵ Ta tandihí sa zavaha ra, zavaha ra sii si vatyi cuñi ra sa cua ndyehe ñiyivi. Cuaha xaan Tuhun Ndyoo tyaa ra nu tutu quehen xaantatyaaa ra sii si yiqui nuu ra ta zulu ndaha ra, ta nañi xaan yuhva tyaqui yuzahma ra.

⁶ Cuñi xaan ra cundyaa ra tyayu vaha nu sasi ñiyivi zavaha vico. Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu.

⁷ Ta cuñi ra vatyi tyaa xaan ñiyivi yahvi sii ra ta cuhva ñu nacumi sii ra nuyahvi ta catyi ñu maestro sihin ra.

⁸ Zoco maa ndo, ma cuhva ndo sa catyi ñiyivi maestro sii ndo vatyi iyo minoo ñi ra cuu Maestro ndo, ra Cristo. Ta tandihí maa ndo, yañi ndo cuu sihin tahan ndo.

⁹ Ta ma catyi ndo zutu ndo sii ra iyo ihya ñuu ñiyivi vatyi iyo minoo ñi ra cu Zutu yo. Ra ndyaa andivi.

¹⁰ Ta ma catyi ndo vatyi minoo ndo cuu ra cu nuu, vatyi maa ñi ra Cristo cuu ra cu nuu sii ndo.

¹¹ Ra cahnu ca nu yucu maa ndo cuu ra cua nduu muzu sii tandihí ndo.

¹² Ta yoo ra cua zanducahnu sii ra, cua zanduluhlu ra Ndyoo sii ra. Ta ra zanduluhlu sii, cua zanducahnu ra Ndyoo sii ra.

¹³ Zoco jndahvi ndoho ra maestro cuenda ley ta ra fariseo! Zaha ndo tuhun vatyi vaha xaan ndo, zoco ña ndisa vatyi nacazi ndo yuvehe gloria, ta ña cuu quihvi ñiyivi. Ñá quihvi maa ndo, ta nu ña saha ndo quihvi inga ñiyivi cuñi quihvi.

¹⁴ jNdhahvi ndoho ra maestro cuenda ley ta ra fariseo! Zaha ndo tuhun vatyi vaha xaan ndo, zoco ña ndisa vatyi quindyaanndo vehe ñundahvi, ñu sihi yii, ta ziqui zandavi ñaha ndo vatyi vaha xaan ndo, ta naha xaan cahan ndo sihin ra Ndyoo. Sa cuenda sa zavaha ndo cuhva ya, ta ñiñi xaan ca cua tasi tuñi ra Ndyoo sii ndo.

¹⁵ jNdhahvi ndoho ra maestro cuenda ley ta fariseo! Zaha ndo tuhun vatyi vaha xaan ndo, zoco ña ndisa. Nanducu ndo nacahnu ñuu ñiyivi, ta yaha ndo tyañuhu vatyi cuñi ndo nañihii ndo yazu minoo tuhun ñi ñiyivi cua zasino ndo iñi ñu cuhva sino iñi maa ndo. Ta sa nañihii ndo sii ra cuan ta zananduu ndo sii ra uu cuhva quiñi ca ta ziqui maa ndo. Ta ndisa xaan cuu si vatyi cua cuhun tandihí ndo andaya.

¹⁶ jNdhahvi ndoho! Ra cuaa cuu ndo, ta cuñi ndo zañaha ndo ityi sii inga ñiyivi. Catyi ndo: "Cuu tyiñaha ñiyivi Ndyoo nuu ñiyivi ta cahan ñu zivi vehe ñuhu cahnu, zoco ma zavaha ñu cuhva catyi ñu. Zoco tatu cahan ñu sa cuenda xuhun cuaan sa iyo sisi vehe ñuhu cuan, tacuan ta ziqui ñiñi xaan cua zavaha ñu cuhva catyi ñu." Catyi ndo.

¹⁷ Ra tondo cuu ndo ta ra laa cuu ndo. ¿Atu cahnu ca cuu xuhun cuaan ta ziqui vehe ñuhu sa zandu-ii sii si? Ña tacuan.

¹⁸ Ta catyi ndo: "Yoo ra cua tyiñaha Ndyoo nuu ñiyivi ta cahan ra zivi altar, zoco ma zavaha ra cuhva catyi ra. Zoco tatu cahan ra tuhun sa yozo nuu altar cuhva cuan, tacuan ta ziqui iyo cuatyi ra

tatu ma zavaha ra cuhva catyi ra.”
Catyi maa ndo.

19 Ra tondo ta ra laa cuu ndo.
¿Atu cahnu ca cuu sa yozo nuu altar
cuan ta ziquí altar sa zandu-ii sii si?
Ñ tacuan.

20 Ta yoo ra tysiñaha Ndyoo nuu
ñiyiví ta cahan ra ziví altar, zavaha
ra sii si sa cuenda altar ta ndya sa
cuenda tandihí sa yozo nuu si.

21 Ta yoo ra tysiñaha Ndyoo nuu
ñiyiví ta cahan ra ziví vehe ñuhu,
zavaha ra sii si sa cuenda vehe
ñuhu ta sa cuenda ra Ndyoo, ndihí
ca.

22 Ta ra tysiñaha Ndyoo nuu ñiyiví
ta cahan ra ziví andiví, zavaha ra sii
si ndya sa cuenda tyayu ra Ndyoo
ta ndya sa cuenda ra Ndyoo ra
ndyaya nuu si.

23 ¡Ndahvi ndoho ra maestro
cuenda ley ta ra fariseo! Zaha ndo
tuhun vatyi vaha xaan ndo, zoco ña
ndisa vatyi cahvi ndo ndaha menta
ndo ta siti anís sihin siti comino
ta saha ndo minoo minoo sisi sa
usi tahan si sii ra Ndyoo, zoco ña
tyaa ndo yahvi sa ñifí ca sa catyi
ley tañi sa zavaha ndo sa ndoo ta
sa cundahvi iñi ndo sii ñiyiví ta sa
cuní xaan iñi ndo sii ra Ndyoo.
Cuñi si sa zavaha ndo cuhva ya,
ta ma zaña ndo sa cuhva tucu ndo
deizmo cuan.

24 Ra cuua cuu ndo, ta cuñi ndo
zañaha ndo ityi sii inga ñiyiví. Za-
cuenda xaan ndo sii ndo ta ña
zavaha ndo cuatyí ndyihí, zoco
zavaha ndo cuatyí nahnu xaan sa
ñá tyaa ndo yahvi ley cuan. Cuu
si tañi tava ndo tyiyucu ndyihí nuu
calu ndo ta ziquí coco ndo quiti
nahnu ca sa nañi camello.

25 ¡Ndahvi ndoho ra maestro
cuenda ley ta ndoho ra fariseo!
Zaha ndo tuhun vatyi vaha xaan
ndo, zoco ña ndisa. Nacatya xaan
ndo sata coho ta sata vaso, zoco
añima ndo situ cuii sa ña vaha sa
zavaha ndo tañi sa zuhu ndo ta
cuhva ña cuu cundyaca ñaha ndo
sii ndo.

26 Ndoho ra fariseo cuaa, catyi ra
Jesús, xihna ca zandundiun ityi sisi
vaso ta coho, ta ziquí cua ndundií
tucu ityi sata si.

27 ¡Ndahvi ndoho ra maestro
cuenda ley ta ra fariseo! Zaha ndo
tuhun vatyi vaha xaan ndo, zoco
ñá ndisa. Cuu ndo tañi ñaña sa
zandutyaqui xaan ñiyiví ityi sata,
zoco ityi sisi maa maa yiqui ndiyí
ñoho ta tandihí inga nuu sa quiñi
caa.

28 Ta tacuan iyo maa ndo. Vaha
xaan ñiyiví cuu ndo cuhva caa ndo
ityi nuu ñiyiví, zoco afíima ndo situ
cuii si sihin cuhva zandavi ñaha
ndo ta tandihí inga nuu sa ña vaha
sa zavaha ndo.

29 ¡Ndahvi ndoho ra maestro
cuenda ley ta ra fariseo! Zaha ndo
tuhun vatyi vaha xaan ndo, zoco ña
ndisa vatyi tyaqui zavaha ndo ñaña
ra i cuu profeta ta zandutyaqui ndo
ñaña ñiyiví vaha.

30 Ta catyi ndo: “Tatu sa vatyi i
sindito maa ndi quivi i sahñi ñiyiví
sahnú sii ndi sii ra profeta, maa ndi
ma ndoo ndi vaha sa cahñi ra sii
ra.”

31 Ta sihin cuhva cahan ndo,
zuun ñi maa ndo saha sa ndaa sa
cuenda ndo vatyi zutu ndo sii ra i
sahñi sii ra profeta.

32 ¡Zavaha ca ndo cuhva ña vaha
sa i quisaha zutu ndo!

33 ¡Tañi coo cuu ndo, zehe quiti
xaan! ¿Yozo caa cuu cacu ndo ta ma
cuhun ndo andyaya? Ma cuu.

34 Yucuan cuenda cua tasi sii ra
profeta ta sii ra iyo xaan sa siñi tuñi
ra Ndyoo sii, ta sii ra cua zacuaha
Tuhun Ndyoo sii ndo. Zoco maa
ndo cua cahñi ndo sii zuhva ra ta
zuhva ra cua tyaa ndo nuu cruz.
Ta inga ra cua cañi ndo sisi vehe
ñuhu ndo ta cua zayanga ndo sii ra
ta zayuhu ndo sii ra, ta cua cono ra
ndya minoo ñuu ta ndya inga ñuu.

35 Ta yucuan cuenda sata maa
ndo cua ndoo cuatyí sa cuenda
tandihí ñiyiví vaha i sahñi ñiyiví
ndya ra Abel, ra ndoo xaan, ta

ndya cuhva ndya ra Zacarías zehe
ra Berequías, ra i sahñi ndo sisi
vehe ñuhu mahñu nu ii xaan sihin
altar.

³⁶ Sa ndisa catyi sihin ndo vatyi
cua ndoo cuatyi sa cuenda tandihí
ya sata ñiyivi iyo vityi.

*Sacu xaan ra Jesús sa ndyehe ra
ñuu Jerusalén.*

³⁷ ¡Ndahvi yoho ñuu Jerusalén! Sahñi ñiyivi sii ra profeta ihya, ta
ra tasi ra Ndyoo ihya, cañi ñu sii ra
sihin yuu. ¡Cuaha xaan cuaha xaan
saha cuñi zandu-iin sii ñiyivi ñuu
ya ta zacuende sii ñu tañi zacuenda
minoo ndiví sii zehe ti sisi ndisi ti,
zoco ña cuñi ñu!

³⁸ Ndyehe ndo vityi, ndoho ñiyivi
ñuu Jerusalén, vatyi vityi zandoi sii
ndo.

³⁹ Vatyi catyi sihin ndo vatyi ma
ndyehe ca ndo sii, ndya cuhva
ndya quiví cua catyi ndo vatyi vaha
xaan cuu ra vasi sa cuenda ra ndy-
aca ñaha sii yo.

24

*Cuhva i catyi ra Jesús cuhva cua
tani vehe ñuhu cahnu*

¹ I quita ra Jesús vehe ñuhu ta sa
cuahan ra ityi ta i tuhva ra i casi ra
sii ra ta i quisaha zañaha ra sii ra
Jesús cuhva caa vehe ñuhu.

² Zoco i nacahan ra Jesús ta
catyi ra sihin ra: ¿Atu ndyehe ndo
tandihí ihya? Sa ndisa catyi sihin
ndo vatyi numinoo yuu ya ta ma
ndoo si ziqui tahan si. Cua tani
tandihí si. (Sihin cuhva ya zacoto
ra Jesús vatyi cua zatívi ndihí ñiyivi
vehe ñuhu cuan.)

Zeña sa cua naa ñuu ñiyivi

³ Tacuan ta ziqui cuahan ra yucu
sa nañi Olivos. Ta sa sindyaa ra
Jesús yucuan, ta i tuhva ra i casi ra
sii ra, ta xehe ñi i cahan ra sihin ra,
ta catyi ra: Cuñi ndi sa natayun
sihin ndi ama cua coo cuhva cuan.
¿Ñaa zeña cua ndyehe ndi, ta cua
coto ndi vatyi sa cuñi quisun ta sa
cuñi naa ñuu ñiyivi? Catyi ra.

⁴ Ta i nacahan ra Jesús, ta catyi ra
sihin ra: Zazuenda ndo sii ndo coto
zandavi ñaha ñiyivi sii ndo.

⁵ Vatyi cuaha xaan ra cua quisi,
ta cua catyi ra vatyi vasi ra sa
cuenda mi, ta cua catyi ra: "Yuhvi
cui Cristo." Ta cua zandavi ñaha ra
sii cuaha xaan ñiyivi.

⁶ Cua cuiñi ndo tuhun vatyi cua
coo cuatyi ta cahñi tahan xaan
ñiyivi, zoco ma yuhu ndo. Xihna
ca cua cuu tandihí cuhva cuan,
cumáni ca sa saa quiví naa ñiyivi.

⁷ Vatyi cua cahñi tahan minoo
ñuu sihin inga ñuu, ta cua coo
cuatyi ñuu nahnu sihin inga ñuu
nahnu. Ta cua coo tama ta cuehe
ta cua coo sa taan nahnu xaan ziin
ziin ityi.

⁸ Ta tandihí cuhva ya, nu nacaa
cua quisaha ndyehe ñiyivi tun-
doho.

⁹ Ta ziqui cua cuhva cuenda
ñiyivi sii ndo sii ra ndyaca ñaha
vatyi cua ndoho ndo. Ta cua cahñi
ñiyivi sii zuhva ndo. Ta tandihí
ñiyivi ñuu ñiyivi cua cuxaan xaan
ñu ndyehe ñu sii ndo sa cuenda mi.

¹⁰ Ta quiví cuan, cuaha xaan
ñiyivi sino iñi sii, cua ndoyo ñuhu
ñu. Ta cua xico tuhun ra sii tahan
ra. Ta ma cuu ca ndyehe ra sii
tahan ra.

¹¹ Cua coo cuaha xaan ra vatyia.
Cua catyi ra vatyi cahan ra sa
cuenda ra Ndyoo, ta cua zandavi
ñaha ra sii cuaha xaan ñiyivi.

¹² Cuaha xaan sa quiñi cua coo
ndya cuhva ndya ma cuñi ca ñiyivi
sii tahan ñu.

¹³ Zoco ra ma zañá tuhin ndya nu
cua ndihí ñuu ñiyivi, cua cacu ra.

¹⁴ Ta Tuhun Vaha sa cuenda
cuhva ndyaca ñaha ra Ndyoo, cua
zacoto ñiyivi sii si nacahu ñuu
ñiyivi, ta cua cuiñi tandihí ñiyivi sii
si, ta ziqui cua naa ñuu ñiyivi.

¹⁵ Tatu ndyehe ndo minoo sa
zatívi xaan ta quiñi xaan zacuu si,
ta nandyaa si cuan nu ii cuhva i
catyi ra profeta Daniel, cutuñi iñi
ndo ndoho ra cahvi tuhun ya,

¹⁶ tatu ndyehe ndo sii si cuan, na-cono ñiyivi ñoho Judea, ta naquihvi xehe ñu ndya yucu.

¹⁷ Tatu iyo ra yozo xiñi vehe ra quivi cuan, ma cuatu ra numaa iyo ndaha tyiño cuñi ra tava ra sisi vehe ra.

¹⁸ Ta ra ñoho itu ra, ma cunuhu ra ndya vehe ra sa cua naquihin ra zahma ra.

¹⁹ Ta ndahvi ñu zihí sa ñoho zehé quivi cuan a tatu iyo zehé ñu sa tyaxi quivi cuan vatyi cahnu xaan tundoho cua ndyehe ñu.

²⁰ Ta caca ndo sii ra Ndyoo vatyi ma tahan si cono ndo quivi vico zavi a minoo quivi quitatu ñiyivi

²¹ vatyi tatu tacuan tahan si, yaha xaan cuaha tundoho cua coo, minoo cuhva ta coo ca ndya cuhva ndya quivi i sino ñuu ñiyivi ta ma coo ca tundoho cahnu xaan tañi tundoho ya inga saha ndaha ñi.

²² Tatu ma zanduzuhva ra Ndyoo quivi tundoho cuan, yoñi ñiyivi cua cacu. Zoco cua zanduzuhva ca ra sii si sa cuenda ñiyivi i casi ra.

²³ Tatu catyi minoo ra sihin ndo: "Ihya ndyaa ra Cristo" a "Yucuan ndyaa ra", catyi ra, ma sino iñi ndo.

²⁴ Vatyi cua nduvita cuaha xaan ra zandavi ñaha, ta cua catyi ra vatyi Cristo cuu ra, ta cua catyi ra vatyi cahan ra tuhun saha ra Ndyoo sii ra. Ta cua zavaha ra zeña nahnu ta sa ndyityi ndya cuhva ndya sii ñiyivi i casi ra Ndyoo cua zandavi ñaha ra tatu sa vatyi cuu cuhva cuan, zoco ma cuu.

²⁵ Ndyehe ndo, sa nacatyi tandihí sihin ndo cuee ca sa tahan si.

²⁶ Yucuan cuenda tatu catyi ñiyivi sihin ndo: "Ndyehe ndo, ndyaa ra Jesús sisi cuhu." Catyi ñu. Zoco ma cuhun ndo cundyehé ndo. A tatu catyi ñu: "Iyo minoo nu ñoho xehe ra." Ma sino iñi ndo.

²⁷ Vatyi quivi cua quasi inga saha, cua ndyehe tandihí ñiyivi sii. Tañi ndyehe tandihí ñiyivi tatu yaha tasa zavi ityi caña ñicandyi ta cuhva ndya ityi cua iñi, tacuan cua cuu

si quivi quasi tucu ra i quasi ndya gloria.

²⁸ Vatyi nu catuu ndiyi, yucuan cua titahan tyasii.

Cuhva cua quasi tucu ra i quasi ndya gloria

²⁹ Tatu sa yaha ndyehe ñiyivi tun-doho cuan ta ziqui ña naha ca ta cua nduñaa ñicandyi ta ma ndyehe ca nu yoo. Cua nacoyo tiñoo, ta ndya cuhva ndya cua canda andivi.

³⁰ Tacuan ta ziqui cua ndyehe ñiyivi sii ra i quasi ndya gloria ityi andivi, ta cua nducuihya xaan iñi tandihí tata ñiyivi ñuu ñiyivi. Cua ndyehe ñu vatyi vasi ra nu vico, ta sihin cuaha xaan cuhva. Ta tyaqui xaan caa ra.

³¹ Ta cua tasi ra sii ángel ra ndya tandihí sa cumi tahan siqui ñuu ñiyivi, ta cua tivi ra cutu sihin minoo nduzu ñihi xaan. Ta cua zatahan ra sii tandihí ñiyivi i casi ra Ndyoo ndya nacahnu ñuu ñiyivi.

³² Vityi coto ndo minoo cuhva iyo yutu higuera ta tandihí inga yutu. Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vatyi sa cua nducahñi.

³³ Ta tacuan tucu tatu sa ndyehe ndo vatyi sa cuu tandihí tuhun sa quehin sihin ndo ihya, tacuan ta cua coto ndo vatyi sa cua cuyatyi sa cunaa ñuu ñiyivi.

³⁴ Sa ndisa catyi sihin ndo vatyi cua cuu cuhva ya cuee ca sa cuu ñiyivi sa iyo vityi.

³⁵ Yutyi andivi ta ñuhu ñuu ñiyivi cunaa si. Zoco tuhun quehin, ma naa si.

³⁶ Zoco yoñi ñiyivi sito ñaa quivi a ñaa cuhva cua cuu si. Nu ángel andivi ta ña sito ra. Maa tuhun ñi ra Ndyoo Zuti sito.

³⁷ Tañi i cuu si quivi ra Noé, tacuan cua cuu tucu si quivi cua quasi tucu ra i quasi ndya gloria.

³⁸ Quivi cumañi ca cuu ñiyivi sihin ndutyta, sasi ñu. Sihu ñu. Tindaha ñu. Ta saha ñu sii zehe ñu

tindaha ñu ndya cuhva ndya quiví i quihví ra Noé sisi barco.

³⁹ Ta zana ñi iñi ñu, ta i zanaa ndutya sii tandihí ñu. Zuun ñi cuhva cuan, cua cuu tucu si quiví cua quisi tucu ra i quisi ndya gloria.

⁴⁰ Quiví cuan, uu tahan ra ñoho itu ra, cua quihin sii minoo ra. Ta inga ra cua nandoo.

⁴¹ Ta uu tahan ñuzihí ndyico iin ñi quiví cuan, cua quihin sii minoo ña. Ta inga ña cua nandoo.

⁴² Yucuan cuenda cuatu listo ndo vatyi ña sito ndo ñaa quiví cua quisi ra ndyaca ñaha sii ndo.

⁴³ Coto ndo cuhva ya, tatu sa i sito ra xu vehe ñaa cuhva cua quihví ra zuhu, cua cuatu listo ra, ta ma cuhva ra sa nuña ra zuhu cuan vehe ra.

⁴⁴ Yucuan cuenda cuatu listo tucu maa ndo vatyi minoo quiví sa ña sica iñi ndo, cua quisi tucu ra i quisi ndya gloria.

Muzu vaha ta muzu ña vaha

⁴⁵ ¿Yoo ra cuu minoo muzu vaha, muzu sa iyo sa siñi tuñi vaha ta saha patrón ra sa cundyaca ñaha ra vehe ra ta cuhva ra sa casi inga muzu ra cuhva tahan si?

⁴⁶ Zii xaan cua cuñi muzu cuan tatu nasaa patrón ra ta nañhi ra sii ra zaváha ra cuhva cuan, cuhva catyi patrón ra.

⁴⁷ Sa ndisa catyi sihin ndo vatyi cua cuhva patrón ra sa cundyaca ñaha ra tandihí sa sii ra.

⁴⁸ Zoco tatu ña vaha muzu cuan ta sica iñi ra sihin añima ra: "Naha xaan cuahan patroin."

⁴⁹ Ta yucuan cuenda quisaha cañi ra sii inga muzu ta sasi cuahyi ra ta sihi xaan ra ndixi ta siñi ra.

⁵⁰ Tacuan ta zana ñi iñi ra ta cua nasaa patrón ra minoo quiví sa ña ndatu ra sii ra, minoo cuhva sa ña sito ra,

⁵¹ ta cua tasi tuñi xaan patrón ra sii ra. Ta cua tahan si sii ra tañi cua tahan si sii ñiyiví zaha tuhun vatyi vaha xaan ñu, zoco ña ndisa. Ñihi

xaan cua vacu saa ñu, ndya cuhva cua casi quihñi noho ñu.

25

Minoo cuhva sa cuenda usi tahan ñu yoco

¹ Cuhva ndyaca ñaha ra Ndyoo cuu si tañi cuhva i tahan usi tahan ñu yoco sa cuahan minoo vico tandaña. I quihin ñu lámpara ñu sa sahmi azetye, ta cuahan ñu vatyi cua zatahan ñu sii ra cua tindaha.

² Ta ohon tahan ñu cuan, listo xaan ñu. Ta ohon tahan ñu, laa xaan ñu.

³ Ta ñu laa cuan, i quihin ñu lámpara ñu, zoco ñá quihin ñu cuaha ca azetye.

⁴ Ta ñu listo cuan, i quihin ñu lámpara ñu, ta i quihin tahan tahan ñu minoo yutyi azetye vatyi cua zacutu tucu ñu sii si.

⁵ Ta ñi iñi sa cucuee xaan ra cua tindaha, i quixi tandihí ñu.

⁶ Tacuan ta maañuu i siñi ñu cana saa ñiyiví, ta catyi ñu: "¡Sa vasi ra cua tindaha; cuahan ndo cua zatahan ndo sii ra!"

⁷ Ta i nduvita tandihí ñu, ta i zanduvaha ñu lámpara ñu.

⁸ Ta i catyi ñu laa cuan sihin ñu listo cuan: "Cuhva ndo zuhva azetye ndo sii ndi vatyi sa cuñi ndahvá lámpara ndi."

⁹ Zoco i nacahan ñu listo cuan, ta catyi ñu: "Ma cuu, coto ma ñihi si sa cuenda tandihí yo. Vaha ca tatu cuhun ndo nu cuyahvi si ta zata ndo zuhva sa cuenda maa ndo." Catyi ñu.

¹⁰ Zoco niñi ñi sa cuahan ñu sa cua zata ñu sii si, ta i saa ra cua tindaha cuan, ta ñu sa ndyaa listo i quihví ñu sihin ra nu iyo vico tindaha, ta i nucundazi yuvehe.

¹¹ Cuee ca i nasaa inga ñu yoco cuan, ta i catyi ñu: "¡Tata, tata, nuña yuvehe!"

¹² Zoco i nacahan ra ta catyi ra: "Sa ndisa catyi sihin ndo vatyi ña site sii ndo."

¹³ Ta ziquí i catyi ra Jesús: Yucuan cuenda cuatu listo ndo vatyi ña sito

ndo ñaa quiví a ñaa cuhva cua quasi tucu ra i quasi ndya gloria.

Cuñi si sa cutyiño yo tandihí sa saha ra Ndyoo sii yo

¹⁴ Cuhva ndyaca ñaha ra Ndyoo cuu si tañi minoo ra sa cuñi cuhun minoo ñuu nusica, ta i cana ra sii tandihí muzu ra, ta saha cuenda ra xuhun ra sii ra.

¹⁵ Sii minoo ra saha ra tañi ohon mil, sii inga ra tañi uu mil, ta sii inga ra minoo mil ñi. Cuhva cuu sii sa minoo minoo ra sa zatyíño ra sihin si, tacuan saha ra sii si sii ra. Ta i quihin ra ityi cuahan ra.

¹⁶ Tacuan ta ra i ñihi sa ohon mil cuan, cuahan ra, ta i zatyíño ra sihin si, ta i ñihi ra inga ohon mil ziquí si.

¹⁷ Ta zuun ñi cuhva cuan, ra i ñihi uu mil, i ñihi ra inga uu mil ziquí si.

¹⁸ Zoco ra i ñihi minoo mil ñi, i sahan ra, ta i sitya ra minoo yavi, ta i tyixehe ra xuhun patrón ra.

¹⁹ Cuee xaan ca, i nasaa patrón, ta i tava ra cuenda sihin muzu cuan.

²⁰ Xihna ca i saa ra i ñihi ohon mil cuan, ta i saha cuenda ra inga ohon mil sii patrón ra, ta i catyi ra: "Tata, i sohon ohon mil sii. Ica si ya sihin inga ohon mil i zahacanei ziquí si."

²¹ I catyi patrón ra sihin ra: "Vaha xaan; yoho cuu minoo muzu vaha, ta ndoo xoon. Vaha xaan i zatyíñon sihin sa zuhva ñi xuhun i zandoi suhun. Yucuan cuenda vityi cua cuhve sa cundyaca ñohon cuaha ca. Quihví ta cuzíi xaan iñun iñi ñi sihin mi."

²² Cuee ca i saa muzu sa ñihi sa uu mil cuan, ta i catyi ra: "Tata, i sohon uu mil sii; ica si ya sihin inga uu mil i zahacanei ziquí si."

²³ I catyi patrón ra sihin ra: "Vaha xaan; yoho cuu minoo muzu vaha, ta ndoo xoon. Vaha i zatyíñon sihin sa zuhva ñi xuhun i zandoi suhun. Yucuan cuenda vityi cua cuhve sa cundyaca ñohon cuaha ca. Quihví ta cuzíi xaan iñun iñi ñi sihin mi." Catyi ra.

²⁴ Tacuan ta i saa muzu sa ñihi minoo mil ñi, ta i catyi ra sihin patrón ra: "Tata, site suun vatyi minoo ra xaan cuun, ta tuhvon naquihin sa yíví suun cuu, ta nacuhun tyíño zacuu inga ra.

²⁵ Ta i yuhi suun, ta sehin ta i tyixehe xuhun sisi ñuhu. Naquihin sa suun vityi."

²⁶ Ta i nacahan patrón ra, ta catyi ra: "Yoho, minoo muzu ña vaha ta ra zusa cuun. Sa siton vatyi tuhve naquihin sa yíví sii, ta naquihin tyíño zacuu inga ra.

²⁷ Yucuan cuenda ¿ñaa cuenda ñá tyuhun xuhin banco, ta sa cua nasei ta cua naquihin sii si, zoco sa zahacanaa si zuhvaa?" Catyi patrón cuan.

²⁸ Ta i catyi ra sihin inga ra yucu yucuan: "Quindyaña ndo xuhun sa sehi sii ra ya, ta cuhva ndo sii si sii ra sa cumi usi mil cuan.

²⁹ Vatyi ra zatyíño vaha sihin sa sehi sii ra, cua cuhve cuaha ca sii ra, ta cua coo cuaha xaan ca sii ra. Ta ra ña cuñi zatyíño sihin sa sehi sii ra, cua quindyei sii si.

³⁰ Ta muzu ña vaha cuan, zavita ndo sii ra ityi sata nu ñaa xaan, nu cua vacu xaan ñiyíví ndya cuhva cua casi quihñi noho ñu."

Cuhva cua tyicuhva ra Jesús sii ñiyíví ñuu ñiyíví

³¹ Quiví cua quasi tucu ra i quasi ndya gloria sihin ángel ra, tyaqui xaan ra. Ta cua cundyaa ra tyayu nu cua cundyaca ñaha ra.

³² Ta tandihí ñiyíví ñuu ñiyíví cua titahan ñu ityi nuu ra, ta cua zaziñ ra sii ñu tañi zaziñ minoo ra cu pastor sii mvee ticatyi zono ra sihin mvee zono ra.

³³ Mvee ticatyi zono ra cua tyaa ra siyo cuaha ra. Ta mvee zono ra cua tyaa ra sii ti siyo zatyi ra.

³⁴ Ta ziquí cua catyi Rey sihin ñu ndyaa siyo cuaha ra: "Ñaha ndo, Cuñi xaan Zuti sii ndo. Cumañi ca sino ñuu ñiyíví, ta sa ndyaa listed gloria vatyi cua quihví ndo.

³⁵ Vatyi yuhvi i sizoque, ta saha ndo sa casi. Ityi xein, ta saha ndo sa cohi. I sica noi ta ñahñi vehi, ta i saha ndo vehe ndo cundyei.

³⁶ Ñahñi zahme, ta saha ndo zahma sii. I cuhi ta sahan ndo i sindyehe ndo sii. I siñohi vehe caa, ta sahan ndo i sindyehe ndo sii.” Cua catyi ra.

³⁷ Ta ziqui cua catyi ñiyivi vaha cuan sihin ra: “Tata, ¿ama i ndyehe ndi suun sizocon ta saha ndi sa casun, a ityun ta saha ndi sa cohon?

³⁸ ¿Ta ama i ndyehe ndi suun sica noo ta saha ndi sa cundyoon vehe ndi a ndyehe ndi suun ta ñahñi zahmon, ta saha ndi zahma suun?

³⁹ ¿Ta ama i ndyehe ndi suun sa cuhun a ñohon vehe caa ta sahan ndi sa ndyehe ndi suun?” Cua catyi ñu.

⁴⁰ Ta cua nacahan Rey cuan ta catyi ra sihin ñu: “Sa ndisa catyi sihin ndo, tandihí sa i zavaha ndo sihin yañi, vazu ra ndyihí ca, zoco sihin mi i zavaha ndo cuhva cuan.”

⁴¹ Ta ziqui cua catyi Rey cuan sihin ñiyivi ndyaa siyo zatyi ra: “Cuiñi siyo ndo sii, ndoho ñiyivi sa cuxaan ra Ndyoo sihin. Cuquihí ndo nu cayu ñihu nu i zavaha Ndyoo sa cuenda cuihna ta tatyi cuihna sa ndyico sii ra.

⁴² Vatyi i sizoque, ta ñá saha ndo sa casi. I cu-ityi, ta ñá saha ndo ndutya cohi.

⁴³ I sica noi, ta ñahñi vehi, ta ñá saha ndo vehe ndo cundyei. Ñahñi zahme, ta ñá saha ndo zahma sii. I cuhi, ta i siñohi vehe caa, ta ñá sindyehe ndo sii.”

⁴⁴ Ta ziqui cua catyi tucu ñiyivi cuan sihin Rey cuan: “Tata, ¿ama i ndyehe ndi suun sizocon a ityun a sica noo ta ñahñi vehun? ¿Ta ama i ndyehe ndi suun sa ñahñi zahmon a cuhun a ñohon vehe caa ta ñá tyindyee ndi suun?”

⁴⁵ Ta cua nacahan Rey ta catyi ra: “Sa ndisa catyi sihin ndo vatyi

tandihí sa ñá zavaha ndo sihin minoo ñiyivi luhlu ca, ñá zavaha ndo sii si sihin mi.” Cua catyi ra.

⁴⁶ Ta ziqui cua cuhun ñu nu cuu ndoho ñu tandihí cuui tyiemvu. Zoco ñiyivi vaha, cua cuhun ñu nu cuu cundito ñu tandihí cuui tyiemvu.

26

Sihñi tahan ra tyiñoyozo caa cua tiñi ra sii ra Jesús

¹ Sa yaha cahan ra Jesús tandihí tuhun ya, ta ziqui i catyi ra sihin ra i casi ra:

² Sa sito ndo vatyi uu quivi ñi ca, ta cua cuu si vico zuhun, ta cua xico minoo ra sii ra i quisi ndya gloria, ta cua cahñi ñiyivi sii ra nu cruz. Catyi ra.

³ Ta sisi quivi cuan i titahan ra zutu nahnu sihin ra maestro cuenda ley ta ra mandoñi. Tandihí ra cuan cuu ra ra hebreo nahnu, ta i titahan ra nuquehe vehe ra Caífas ra cu zutu ya cahnu.

⁴ Ta yucuan i natuhun tahan ra yozo caa cua tiñi xehe ra sii ra Jesús, ta cua cahñi ra sii ra.

⁵ Zoco i catyi ra sihin ra tahan ra: Zoco ma cuu si quivi vico vatyi cuaha xaan ñiyivi yucu, ta coto cahñi tahan ñu sihin yo.

I tyozo minoo ñaha azetye vixi xiñi ra Jesús

⁶ Ñoho ra Jesús ñuu Betania vehe ra Simón, ra i cuhu cuehe tyahyu.

⁷ Ta i tuhva minoo ñaha sii ra. Ñaa ña minoo yutyi sino sihin minoo yuu yahvi xaan, ta ñoho azetye vixi. Ta i tyozo ña sii si xiñi ra Jesús cuhva sa sasi ra xita.

⁸ Ta sa ndyehe ra i casi ra Jesús cuhva zavaha ña, i cuxaan ra, ta catyi ra: ¿Ñacu zatívi ña sii si?

⁹ Vaha ca tatu sa i xico ña sii si ta ñihi ña cuaha xuhun ta cuhva ña sii ñiyivi ndahvi.

¹⁰ Ta sa sito ra Jesús sa cahan ra cuan, ta ziqui i catyi ra sihin ra: ¿Ñacu cuyuhu xaan ndo sihin ñaha

ya? I zavaha ña minoo sa vaha sihin.

11 Tandihí tyiemvu cua coo ñiyivi ndahvi sihin ndo, ta cuu tyindyee ndo sii ñu tatu cuñi ndo. Zoco yuhvi ma cundyei sihin ndo tandihí tyiemvu.

12 Cuhva i zavaha ña ya sa tyozo ña azetye vixi coño ñuhi cuu sa zanduvaha ña sii, sa cuenda sa cuquihi ñaña.

13 Sa ndisa catyi sihin ndo vatyi vazu ndyacamaa nacatyi ñiyivi Tuhun Ndyoo, zoco cua nacatyi ñu cuhva i zavaha ña ya sihin, ta cua nacohon iñi ñiyivi sii ña. I catyi ra Jesúz.

Cuhva i xico ra Judas sii ra Jesúz

14 Yaha cuan ta ziquí minoo sa usi uu tahan ra i casi ra Jesúz, ra sa nañi Judas Iscariote, cuahan ra cua cahan ra sihin ra zutu nahnu.

15 Ta i catyi ra sihin ra: ¿Yozo cua cuhva ndo sii, tatu cuhva cuende sii ra sii ndo? Ta i zandaa ra tyiño sa cua cuhva ra oco usi tahan xuhun cui.

16 Ta ndya quivi cuan, i quisaha nducu xaan ra Judas cuhva cua cuhva cuenda ra sii ra Jesúz sii ra cuan.

I cuxiñi ra Jesúz sihin sa usi uu tahan ra i casira

17 Nu quisaha vico nu tuhva ñiyivi hebreo sasi pan ña ndaa, i tuhva ra i casi ra Jesúz sii ra, ta i catyi ra sihin ra: ¿Ndyamaa cuñun vatyi cua zanduvaha ndi sa cua cuxiñun sa cuenda vico zuhun ya?

18 Ta i catyi ra Jesúz: Cuahan ndo ndya ñuu cahnu vehe ra sa cahan yo tuhun, ta catyi ndo sihin ra: "Catyi ra Maestro, cua saa cuhva sa cua cui. Vehe moo cua cuxiñi sa cuenda vico zuhun ya sihin ra i casi."

19 Ta tacuan i zavaha ra, cuhva i catyi ra Jesúz sihin ra, ta i zanduvaha ra sa cuxiñi ra sa cuenda vico cuan.

20 Ta cuhva sa sa cuua cuan, sa ndyaa ra Jesúz mesa sihin sa usi uu tahan ra i casi ra.

21 Ta ñii fi sa sasi ra xita i catyi ra Jesúz sihin ra: Sa ndisa catyi sihin ndo vatyi cua xico minoo ndo sii. Catyi ra.

22 Ta i nducuihya xaan iñi ra ndihí sihin ra, ta i quisaha ndaca tuhun minoo minoo ra sii ra Jesúz: Tata, ¿atu yuhvi cui?

23 Ta i nacahan ra Jesúz, ta catyi ra: Ra sa sasi sihin iñi ñi coho, yucuan ra cuu ra cua xico sii.

24 Cuahan ra i quasi ndya gloria cuhva catyi Tuhun Ndyoo; zoco jndahvi ñi cuu ra xico sii! Vaha ca tatu sa ñá cacu ra vatyi cua ndyehe xaan ra tundoho.

25 Tacuan i catyi ra Jesúz, ta ziquí ra Judas ra sa xico sii ra i ndaca tuhun ra sii ra, ta catyi ra: Maestro, ¿atu zuun yuhvi cui? Ta i catyi ra sihin ra: Tacuan cu si, tañi catyi moo.

26 Ta cuhva sa cuxiñi ra, i quihin ra Jesúz pan, ta i saha ra tyahvi ndyoo sii ra Ndyoo, ta ziquí i sahnu ra sii si ta saha ra sii si sii ra i casi ra, ta i catyi ra: Quihin ndo sii si ta casi ndo. Íhya cuu tañi coño ñuhi.

27 Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i saha ra sii si sii ra, ta i catyi ra: Coho tandihí ndo zuhva zuhva

28 vatyi ihyá cuu tañi niñi sa cuenda tyiño saa sa zandaa ra Ndyoo. Cua cati si, ta sa cuenda maa si, cua ndasi cuatyi cuaha xaan ñiyivi.

29 Zoco catyi sihin ndo vatyi ma coho que vino ndya quivi cua cohi sii si sihin maa ndo minoo cuhva saa nu ndyaca ñaha ra Ndyoo.

Catyi ra Jesúz vatyi cua catyi ra Pedro vatyi ña sito ra sii ra

30 I sata tandihí ra minoo yaa Ndyoo, ta ziquí cuahan ra ndya yucu Olivos.

³¹ Tacuan ta i catyi ra Jesús sihin ra: Sa cuaa vityi tandihí cuii ndo cua zandoo ndo sii. Ta ma cuñi ca ndo cundyico ndo sii, vatyi catyi Tuhun Ndyoo: "Cua cuu ra cu pastor, ta cua quiti cuatyi tandihí cuii mvee ticateyi zono ra."

³² Zoco sa yaha nandote ta cua cuhin yatyi ca ta ziqui maa ndo ndya Galilea.

³³ Ta ziqui i catyi ra Pedro sihin ra: Vazu zandoo tandihí ca ra ya suun, zoco yuhvi cua cundyique suun.

³⁴ Ta i catyi ra Jesús sihin ra: Sa ndisa catyi suhun vatyi zuun ñi sa cuaa vityi, cuee ca sa vacu saa ndiví tyahnu, cua catyun uñi tahan saha vatyi ña siton sii.

³⁵ Ta i catyi ra Pedro sihin ra: Vazu cui suhun, zoco ma catyi sa ña site suun. Ta tacuan tucu i cahan tandihí ca ra i casi ra Jesús.

Cahan ra Jesús sihin ra Ndyoo minoo nu yucu yutu tyaqui nu nañi si Getsemani

³⁶ Tacuan ta ziqui i saa ra Jesús sihin ra i casi ra ndya minoo nu yucu yutu tyaqui nu nañi si Getsemani, ta i catyi ra sihin ra: Cundyaa ndo ihya vatyi cuehin cua quehin sihin ra Ndyoo ity i nuu ca.

³⁷ Ta i quihiñ ra Jesús sii ra Pedro ta sii nduu tahan zehe ra Zebedeo cuahan sihin ra, ta i quisaha nducuihya xaan iñi ra, ta ndahvi xaan cuñi ra.

³⁸ Tacuan ta i catyi ra: Cuihya xaan cuñi añime cuhva ndya sa cuñi cui. Ndoo ndo ihya ñi, ta cundyaa tyacu ndo sihin.

³⁹ Ta ziqui cuahan ra Jesús zuhva ca ityi nuu, ta i sicava ndyayu ra nu ñuhu, ta i sica tahvi ra sii ra Ndyoo, ta catyi ra: Ndyoo Zuti, tatu sa vatyi cuu, cuhvon sa ma ndyehi tundoho sa cua ndyehi vityi, zoco ma cuu si cuhva cuñi mi, nacuu si cuhva cuñi moo.

⁴⁰ Tacuan i catyi ra Jesús, ta ziqui i sahan ra nu yucu ra ndihí sihin ra, ta i nañihi ra sii ra quixi ra, ta i

catyi ra sihin ra Pedro: ¿Yozo caa? ¿Ñacu ñá cuu cundyaa tyacu ndo sihin numinoo ora?

⁴¹ Cutyacu ndo ta cahan ndo sihin ra Ndyoo coto nducu coto ihñi cuihna sii ndo. Cuñi ndo zavaha ndo sa yaha, zoco ña cuu sii ndo sa maa tuhun ñi ndo.

⁴² Tacuan ta i sahan tucu ra Jesús inga saha sa cua cahan ra sihin ra Ndyoo, ta i catyi ra: Ndyoo Zuti, tatu cuu sa ma ndyehi tundoho ya, vaha xaan, zoco tatu ma cuu, nacuu si cuhva cuñi moo. Catyi ra.

⁴³ Ta ziqui i nasaa ra, ta i nañihi ra sii ra ndihí sihin ra quixi tucu ra vatyi sitatu xaan ra.

⁴⁴ Ta i zandoo ra sii ra, ta cuahan ra sa cu uñi saha, ta zuun ñi tuhun cuan i cahan ra sihin ra Ndyoo.

⁴⁵ Ta ziqui i nasaa tucu ra nu yucu ra i casi ra, ta i catyi ra sihin ra: Cuzu ndo vityi, ta quitatu vaha ndo. Sa saa cuhva sa cua nacuhva ñiyivi sii ra i quisi ndya gloria sii ra iyo cuatyi.

⁴⁶ Ta nduvita ndo. Coho yo. Sa vasi ra xico sii.

Tiñ ra sii ra Jesús

⁴⁷ Nu cahan ca ra Jesús, ta i saa ra Judas; minoo sa usi uu tahan ra i casi ra Jesús cuu ra. Ta i quisi cuaha xaan ñiyivi sihin ra. I tasi ra zutu nahnu ta ra mandoñi sii ra, ta ñaa ra mityi ta yutu.

⁴⁸ Ra sa xico sii ra Jesús, i saha ra minoo cuhva sii ra cuan, ta catyi ra: Ra cua cohi xiti cuan, yucuan cuu ra tiñ ndo. Tiñ vaha ndo sii ra.

⁴⁹ Ta i saa ra Judas, ta i tuhva ra sii ra Jesús, ta i catyi ra: Nacumi suun, Maestro. Ta i sihi ra xiti ra.

⁵⁰ Ta i catyi ra Jesús sihin ra: Amigo, ¿ñaa cuenda vasun? Catyi ra. Ta ziqui i tiñ ra sii ra Jesús, ta cuahan ra sihin ra.

⁵¹ Ta minoo ra ndihí sihin ra Jesús, i tava ra mityi ra, ta i cañi ra sii ra cu muzu ra cu zutu ya cahnu, ta i sahndya ra zoho ra siyo cuaha.

⁵² Ta ziqui i catyi ra Jesús sihin ra: Natyuhun mityun sisi veno si. Ra

cahñi tahan sihin mityi, cua cuu ra sihin mityi.

⁵³ ¿Atu sica iñun vatyi ma cuu caque sii Zuti ta vityi vityi cua tasi ra tañi usi uu ityi ángel cua za-cuenda sii?

⁵⁴ Zoco tatu tacuan zavehi, ¿yozo caa ta natahan si cuhva catyi Tuhun Ndyoo vatyi cua tahan si sii?

⁵⁵ Ta ziñui i catyi ra Jesús sihin ñiyivi: ¿Atu vasi tiñ ndo sii minoo ra zuhu vatyi ñaa ndo mityi ta ndaha tysiño xaan? Tahan tahan quivi i sehin vehe ñuhu cahnu ta yucu ndo, zoco ñá tiñ ndo sii yucuan.

⁵⁶ Zoco tacuan cu si tandihí cuhva ya vatyi cua natahan tandihí cuhva i tyaa ra profeta nuu tutu ra Ndyoo. Tacuan i catyi ra Jesús, ta ziñui i zandoo tandihí ra i casi ra sii ra, ta i sino ra.

I sindyaca ra sii ra Jesús nu titahan ra cu tysiño hebreo

⁵⁷ Ra i tiñ sii ra Jesús, i sindyaca ra sii ra ityi nuu ra Caifás. Ra Caifás cuu ra cu nuu sii tandihí ra cu zutu. Ta yucuan i titahan ra maestro cuenda ley ta ra mandoñi.

⁵⁸ Ta i sindyico ra Pedro sica sica ñi ndya cuhva ndya saa ra nuquehe vehe ra cu zutu ya cahnu, ta yucuan i quiví ra, ta i sicundyaa ra sihin ra policía vatyi cua ndyehe ra yozo caa cua cundaa tysiño sa cuenda ra Jesús.

⁵⁹ Ra cu zutu ya cahnu sihin ra mandoñi ta tandihí ra cu tysiño hebreo, i nanducu xaan ra ñiyivi cua cuhva sa ndaa sa cuenda ra Jesús vazu maa cuendu ñi cuu si vatyi cuñi ra cahñi ra sii ra.

⁶⁰ Zoco ñá ñihi ra cuhva sa yatyi vazu cuaha ñiyivi saha sa ndaa, vatyi ñá nacasi tahan sa cahan ra. Ndya nu ndihí tuhun i ñihi ra sii uu tahan ra.

⁶¹ Ta i catyi ra cuan: Ihya ra i catyi: "Cuu cani vehe ñuhu cahnu

ra Ndyoo, ta cuu zanandei sii si sisi sa uñi quivi ñi."

⁶² Ta ziñui i induvita ra cu zutu ya cahnu, ta i catyi ra sihin ra Jesús: ¿Ñacu ña nacohon ii caña ñi? ¿Ñaa sa cuu sa cahan ñiyivi ya zicun? Catyi ra.

⁶³ Zoco ñá nacahan maa ra Jesús. Tacuan ta i catyi ra cu zutu ya cahnu: Sihin zivi ra Ndyoo ndito quehin, ta catyi suhun vatyi cohon sa ndisa ta nacatyun sihin ndi tatu ra Cristo cuun, ra cu Zehe ra Ndyoo.

⁶⁴ Ta i catyi ra Jesús sihin ra: Zuun ra cui tañi catyun. Ta catyi tuqui sihin maa ndo vatyi cua ndyehe ndo sii ra i quasi ndya gloria cuhva cundyaa ra siyo cuaha ra Ndyoo ta cuhva cua quasi ra ndya andivi sisi vico.

⁶⁵ Tacuan catyi ra Jesús, ta ziñui ra cu zutu ya cahnu, cuxaan ra ta i ndata ra zuun ñi zahma maa ra, ta i catyi ra: ¿Ñaa ca sa ndaa cuñi si vityi? Sa siñi ndo sa cahan ra ndya vaha ñi sii ra Ndyoo.

⁶⁶ ¿Ñaa catyi ndo vityi? Ta i nacahan tandihí ra, ta i catyi ra: Nacuu ra vatyi iyo cuatyri ra.

⁶⁷ Ta ziñui i quisaha tyicu zii ra nuu ra, ta inga ra cati ra nuu ra sihin ndaha ra.

⁶⁸ Ta i catyi ra: Tatu ndisa vatyi ra Cristo cuun, nacoton yoo ra cañi suun.

I catyi ra Pedro vatyi ña sito ra sii ra Jesús

⁶⁹ Nii ñi sa yaha tandihí cuhva cuan, ndyaa ra Pedro nuquehe, ta i tuhya minoo muzu sii ra, ta i catyi ña sihin ra: Cutahan aan sica noon sihin ra Jesús, ra i quita Galilea.

⁷⁰ Zoco i catyi ra Pedro ityi nuu tandihí ñiyivi vatyi yivi ra cuu ra. I catyi ra sihin ña: Ña site ñaa tuhun cohon. Catyi ra.

⁷¹ Tacuan ta sa quita ra Pedro ndya yuvehe nuzama, ta i ndyehe inga muzu sii ra, ta i catyi ña sihin ñiyivi yucu yucuan: Ra ihya,

ra tahan ra cuu sii ra Jesús, ra ñuu Nazaret.

⁷² Ta i tyiñaha ra Pedro ndyoo nuu ñiyivi yucuan, ta i catyi ra: Ña site sii ra cohon tuhun ña.

⁷³ Ta i yaha zuhva cuhva, ta i tuhva ra nandyaa yucuan sii ra Pedro, ta i catyi ra sihin ra: Ndisa cuii vatyi minoo ra tahan ra cuu tucu oo vatyi cohon tañi cahan ñiyivi nu cu si Galilea. Catyi ra.

⁷⁴ Tacuan ta i quisaha cahan ra Pedro ndya vaha ñi, ta catyi ra: Ña site sii ra cuan. Catyi ra. Ta zuun ñi caa cuhva cuan, i sacu saa ndivi tyahnu.

⁷⁵ Ta ziqui i nacohon iñi ra Pedro cuhva i catyi ra Jesús sihin ra: "Cuee ca sa vacu saa ndivi tyahnu, cua catyun uñi saha vatyi ña siton sii." Ta sa nacohon iñi ra Pedro cuhva cuan, i quita ra, ta i sacu xaan ra vatyi i nducuihya xaan iñi ra.

27

Nacuhva cuenda rasii ra Jesús sii ra Pilato

¹ Ta sa cundisi i zandoo ra tyiño, tandihí ra zutu nahnu ta ra mandoñi. Sa ndu-iiñ ra minoo cuhva, cuhva cua cahñi ra sii ra Jesús.

² Ta i sihñi ra sii ra Jesús, ta i sindyaca ra sii ra nu ndyaa ra Poncio Pilato, ra cu gobernador.

Cuhva i sihi ra Judas

³ Ra Judas, ra i xico sii ra Jesús, i ndyehe ra vatyi cua cahñi ra sii ra Jesús, ta ziqui i ndu-uu iñi ra cuatyri, ta i nacuhva ra sa oco usi tahan xuhun cuiisi sii ra zutu nahnu ta ra mandoñi,

⁴ ta i catyi ra sihin ra: Cahnu xaan cuatyri i zavehi vatyi i saha cuende sii minoo ra ñahñi cuatyri, ta vityi cua cuu ra. Zoco i nacahan ra cuan, ta catyi ra: ¿Ta ñaa sa cuenda nduhvi? ¡Ndyeho moo yozo caa za-cuun vityi!

⁵ Tacuan ta i zavita ihno ra Judas xuhun cuan sisi vehe ñuhu cahnu

ta cuahan ra, ta i sahñi ra sii ra. Tyihi ra minoo yoho zucu ra.

⁶ Inacuaan ra zutu nahnu xuhun cuan, ta catyi ra: Ma cuu tyihi yo xuhun ya sihin xuhun ofrenda vatyi xuhun sa cuenda sa cua cati niñi minoo ra cu si.

⁷ Ta ziqui i ndu-iiñ ra minoo cuhva, ta sihin xuhun cuan, i zata ra minoo ñuhu nañi si Nu Tava Ñiyivi Ndyahyu sa cua Zavaha Ñu Ndaha Tyiño. Ta tyaa ra cuhva vatyi ñuhu cuan cua cuu nuñaña sa cuenda ñiyivi inga ñuu tatu cua cuu ñu ñuu Jerusalén.

⁸ Ta yucuan cuenda ndya cuhva ndya vityi nañi ñuhu cuan, Ñuhu Cuenda Niñi.

⁹ Ta cuhva cuan i natahan si cuhva i catyi ra Jeremías, minoo ra cu profeta ta sa naha. Tyehen i tyaa ra: "I naquihin ra sa usi uu tahan xuhun cuiisi. Yucuan cuu yahvi i sindyaya ra i zacuu ñiyivi hebreo.

¹⁰ Ta sihin xuhun cuan i zata ra ñuhu sii ra zavaha quiyi tañi i catyi maa ra Ndyoo sihin." Tacuan i tyaa ra Jeremías sa cuenda cuhva cua tahan ra Jesús.

Cua cundaa tyiño ra Jesús nuu ra Pilato

¹¹ I sindyaca ra sii ra Jesús ityi nuu ra Pilato, ra cu gobernador, ta i ndaca tuhun ra Pilato sii ra Jesús: ¿Atu yoho cuu rey cuenda ñiyivi hebreo? Ta i catyi ra Jesús: Tacuan cu si tañi catyi moo.

¹² Tacuan ta i tyaa ra zutu nahnu ta ra mandoñi cuatyri sata ra Jesús, zoco ñá nacahan ra ndaha ñi.

¹³ Ta ziqui i catyi ra Pilato: ¿Atu ña siñun sa cahan ra ya, cuhva tyaa ra cuatyri saton? Catyi ra.

¹⁴ Zoco ñá nacahan ra Jesús ndaha ñi, ta iyo xaan i cuñi ra Pilato.

Saha ra Pilato sa cuu ra Jesús

¹⁵ Ta vico cuan, tuhva ra gobernador tava sii minoo ra ñoho vehe caa, yoo ra cua catyi ñiyivi.

¹⁶ Ta sicoo minoo ra sa sito tandihí ñiyivi. Barrabás nañi ra.

17 Ta cuhva i titahan tandihí ñiyívi, i ndaca tuhun ra Pilato sii ñuu: ¿Yoo ra cuñi ndo sa zañe, a sii ra Barrabás a sii ra Jesús sa nañi Cristo?

18 Vatyi sa sito ra Pilato vatyi ña tahan iñi ra cu tyiño hebreo sii ra Jesús, ta yucuan cuenda i saha cuenda ra sii ra sii ra.

19 Nii ñi sa ndyaa ra Pilato tyayu ra nu zandaa ra tyiño, i tasi ñazihí ra tyiño nu ndyaa ra, ta catyi ña: "Coto ñaha ñaa sá zavohon sihin ra vaha cuan vatyi i ndyehi minoo ñimahna quiñi xaan sa cuenda ra cuñi." Tacuan catyi tutu i tyaa ña.

20 Zoco i zasino ra zutu nahnu cuan ta ra mandoñi iñi ñiyívi vatyi cua caca ñu sii ra Barrabás, ta cua catyi ñu vatyi nacuu ra Jesús.

21 I cahan ra gobernador inga saha, ta catyi ra: ¿Yoo ra cuñi ndo sa cua zañe? Ta i catyi ñu: Sii ra Barrabás.

22 Ta zíqui i ndaca tuhun ra Pilato: Ta ñaa sa cua zavehi sihin ra Jesús sa nañi Cristo? Ta i nacahan tandihí ñu, ta catyi ñu: ¡Nacuu ra nu cruz!

23 Ta i catyi ra Pilato: ¿Ñaa cuenda? ¿Ñaa sa ña vaha i zavaha ra? Zoco i cana saa ñu ñihi ca, ta catyi ñu: ¡Nacuu ra nu cruz!

24 Ta zíqui i ndyehe ra Pilato vatyi ñá cuu zacuu ra. I nduyaa ñi maa ñiyívi. Yucuan cuenda i quihin ra ndutya, ta i nacatya ra ndaha ra ityi nuu ñiyívi, ta catyi ra: Yívi cuatyí mi cuu ta cua cati niñi ra vaha ya. Ndyehe maa ndo cua ndoo cuatyí sata maa ndo.

25 Ta i nacahan tandihí ñiyívi, ta catyi ñu: Nacuu si cuatyí maa ndi ta cuatyí zehe ndi. Catyi ñu.

26 Ta zíqui i zaña ra Pilato sii ra Barrabás, ta i tava ra tyiño vatyi cua cañi zandaru sii ra Jesús, ta zíqui i saha cuenda ra sii ra vatyi cua cuu ra nu cruz.

27 I sindyaca zandaru ra Pilato sii ra Jesús sisi vehe tyiño, ta i titahan tandihí inga zandaru sihin ra.

28 I tava ra zahma ra Jesús, ta i natyihí ra minoo zahma tixinda sii ra.

29 Ta i zavaha ra minoo corona iñu ta tylíra xiñi ra Jesús, ta saha ra minoo tuyoo caxtyila cuñaa ra, ta zíqui i sicuiñi siti zandaru ityi nuu ra, ta i sacu ndyaa ra sii ra, ta catyi ra: Nacumi suun, yoho ra cu rey cuenda ñiyívi hebreo.

30 I tyicu zíi zandaru sii ra Jesús, ta i naquihin ra tuyoo caxtyila cuan, ta i cañi xaan ra xiñi ra.

31 Ta sa yaha sacu ndyaa ra sii ra, i tava ra zahma tixinda cuan, ta i natyihí ra zahma maa ra sii ra. Ta zíqui i quihin ra sii ra vatyi cua cahñi ra sii ra nu cruz.

Nu i tyaa ra sii ra Jesús nu cruz

32 Ta cuhva sa cuahan ra ityi, i tahan ra sii minoo ra ñuu Cirene. Simón nañi ra. Ta i zacuizo zandaru cuan cruz ra Jesús sii ra.

33 Ta cuahan tandihí ra nu nañi si Gólgota. Tuhun Gólgota cuan cuñi si catyi si Nu Yucu Yíqui Xiñi Ndiyí.

34 Ta cuhva sa saa ra yucuan, i saha ra vino zaca si sihin minoo sa uva xaan vatyi cua coho ra Jesús, zoco i sihi ra Jesús siin ñi ta zíqui ñá cuñi ca ra coho sii si.

35 Ta sa yaha tyaa zandaru sii ra Jesús nu cruz ta zíqui i siziñi ra vatyi cua ndyehe ra yoo ra cua zahacanaa minoo minoo zahma ra. Cuhva cuan i natahan si cuhva i tyaa minoo ra profeta sa cuenda ra Jesús nu catyi si tyehen: "I zasa ra zahme sii tahan ra, ta i siziñi ra yoo ra cua ñihi zahma cañi vii."

36 Ta zíqui i sicundya zandaru, ta i zacuenda ra sii ra Jesús.

37 Ta xiñi cruz i tyaa ra minoo tutu, ta catyi si ñaa cuenda cua cuu ra, ta catyi si: "Ihya ra cuu ra Jesús, rey cuenda ñiyívi hebreo."

38 Ta i sihi tucu uu tahan ra zuhu sihin ra Jesús, minoo ra siyo cuaha ra, ta inga ra siyo zatyi ra.

39 Cuhva sa yaha ñiyívi nu ndyaa ra Jesús, i sacu ndyaa ñu sii ra, ta zavico xiñi ñi ca ñu

⁴⁰ ta catyi ñu: Yoho, ra catyi vatyi cua canun vehe ñuhu ta uñi quivi ñi ta cua zanduvohon sii si, tatu sa ndisa vatyi zehe ra Ndyoo cuu suun, noon nu cruz.

⁴¹ Ta i sacu ndyaa tucu ra zutu nahnu ta ra maestro cuenda ley ta ra mandoñi sii ra, ta catyi ra:

⁴² I zacacu ra sii inga ñiyivi, zoco ña cuu zacacu ra sii ra. Tatu rey cuenda ñiyivi hebreo cuu ra, nanoo ra nu cruz vityi, ta cua sino iñi yo sii maa ra.

⁴³ Sino xaan iñi ra sii ra Ndyoo, nazacacu ra Ndyoo sii ra vityi tatu sa ndisa vatyi cuñi ra Ndyoo sii ra vatyi i catyi ra vatyi Zehe ra Ndyoo cuu sii ra. Catyi ra.

⁴⁴ Ta ndya cuhva ndya ra zuhu, ra sihi iin ñi sihin ra Jesús, ta i cahan tucu ra ndya vaha ñi sii ra Jesús.

Nu i sihi ra Jesús

⁴⁵ Tacuan ta i nduñaa xaan nacahnu ñuu ñiyivi ndya maa ora ta ndya cuhva ndya caa uñi sa sahiñi.

⁴⁶ Ta cuhva caa uñi i cana saa ra Jesús minoo sa ñihii xaan, ta i catyi ra: Elí, Elí ¿lama sabactani? Cuñi si catyi si: Zutu mañi yu, Zutu mañi yu, ¿ñaa cuenda i zandoon sii? Catyi ra.

⁴⁷ Zuhva ñiyivi nandyaa yucuan, i siñi ñu ta catyi ñu: Ra ihya cana saa ra sii ra profeta Elías. Catyi ñu.

⁴⁸ Ta zuun ñi caa cuhva cuan, i cacono minoo ra cuan, ta i quihin ra sii minoo sa ñihama, ta i zatyyi ra sii si sihin ndutya iya. I tyaa ra sii si numinoo yutu, ta i zandaa ra sii si nu ndyaa ra Jesús vatyi cua coho ra.

⁴⁹ Ta i catyi inga ra yucu yucuan: Cuatu noo, nandyehe yo tatu cua quisi zanoo ra Elías sii ra.

⁵⁰ I sacu saa ra Jesús inga saha minoo sa ñihii xaan, ta ziquí i sihi ra.

⁵¹ Zuun ñi caa cuhva cuan, i ndata zava zama coco sa ndita sisi vehe ñuhu cahnu ndya ziquí ta ndya xuu. I taan minoo sa ñihii xaan, ta i ndata yuu nahnu,

⁵² ta i nuña ñaña, ta i nandoto cuaha xaan ñiyivi i sino iñi sii ra Ndyoo.

⁵³ Sa yaha nandoto ra Jesús, ta ziquí i quita maa ñu ñaña, ta saa ñu ñuu Jerusalén, ñuu ra Ndyoo, ta cuaha xaan ñiyivi i ndyehe sii ñu.

⁵⁴ Ta minoo ra cu nuu sii minoo ziendu zandaru ta zandaru ra za-cuenda sii ra Jesús iin ñi sihin ra cuan, i ndyehe ra cuhva i taan ta tandihü inga sa i cuu, ta i yuhu xaan ra, ta i catyi ra: Ndisa cuii ra ihya vatyi zehe Ndyoo cu sii ra.

⁵⁵ Ndyá zava ñi i siyucu cuaha xaan ñu zihí. Ndyehe ñu sii ra Jesús. I sindyico ñu sii ra ndya Galilea, ta i tyindyee ñu sii ra.

⁵⁶ Minoo ña cuan, nañi ña María Magdalena, ta inga ña cuu ña María zihí ra Jacobo ta ra José, ta inga ña cuu ñazihí ra Zebedeo.

I tyihi ra sii ra Jesús sisi ñaña

⁵⁷ Minoo ra cuca sa nañi José, ra ñuu Arimatea cuu ra, ta ndyico ra sii ra Jesús. Ta sa tyahan cuan

⁵⁸ i sahan ra nu ndyaa ra Pilato, ta i sica ra coño ñuhu ra Jesús. I saha ra Pilato tyiño vatyi cuu quihin ra sii si.

⁵⁹ Ta i quihin ra José coño ñuhu ra Jesús, ta i cava noo ra minoo zahma vaha sii si,

⁶⁰ ta i saqui ra sii si sisi ñaña saa maa ra sa i zavaha ra sisi minoo yuu. I tyazi ra yuhu ñaña cuan sihin minoo yuu cahnu, ta cuahan ra.

⁶¹ Ta cuhva cuan i siyucu ña María Magdalena ta inga ña María yatyi ñi yuñaña cuan.

Cuhva i zacuenda ra ñaña ra Jesús

⁶² Inga quivi, quivi sa cua qui-tatu ñiyivi, sa ndihü zanduvahá ñu sa cuenda vico cuan, ta i sahan ra zutu nahnu ta ra fariseo nu ndyaa ra Pilato.

⁶³ Ta i catyi ra sihin ra: Tata, nacohon iñi ndi vatyi nii ñi sa ndito ra vatyia cuan ta i catyi ra vatyia tatu

sa yaha uñi quívi cua nandoto ra sisi sa i sihi ra.

⁶⁴ Yucuan cuenda cuñi ndi vatyi tavon tyiño vatyi cundyaa zeyun yuhu ñaña ra ndya cuhva ndya sa yaha uñi quívi coto quisi ra tahan ra sa sa cuaa ta zuhu ra coño ñuhu ra, ta zíqui cua catyi ra sihin ñiyivi vatyi i nandoto ra sisi sa i sihi ra. Tatu tacuan cua cuu, yaha ca cua sino iñi ñiyivi tuhun vatyta sa cahan ra ta zíqui sa xihna ñi. Catyi ra.

⁶⁵ Ta i catyi ra Pilato sihin ra: Quihin ndo zuhva zandaru. Ta cuhun ndo ta cazi cutu vaha ndo yozo ca cuhva cuu sii ndo. Catyi ra.

⁶⁶ Tacuan ta cuahan ra, ta i tyazi cutu vaha ra ñaña cuan, ta i tyaa ra zeyu yuhu si, ta i zandoo ra sii zandaru yucuan vatyi cua zacuenda ra.

28

Cuhva i nandoto ra Jesús

¹ I yaha quívi quitatu ñiyivi hebreo. Ta quívi tumingu cuhva sa vasi cundisi i saa ña María Magdalena sihin inga ña Mariá vatyi cua ndyehe ñu ñaña cuan.

² Ta zuun ñi caa cuhva cuan i taan minoo sa ñihi xaan vatyi i quita minoo ángel ra Ndyoo ndya andivi, ta i noo ra ndya nu ñuhu, ta i saa ra ndya ñaña. I tyaa siyo ra yuu sa ndazi yuñaña cuan, ta i sicundaya ra nuu si.

³ Ndisi xaan ra tañi minoo tasa zavi, ta cuii xaan zahma ra tañi caa nieve cuii.

⁴ Cuhva sa ndyehe zandaru sii ra, ta ñihi ra sihin sa yuhu ra, ta i cuañaa ra.

⁵ Ta i catyi ángel cuan sihin ñu zíhi cuan: Ma yuhu ndo. Site vatyi nanducu ndo sii ra Jesús, ra i sihi nu cruz.

⁶ Yoñi ca ra ihya. Sa i nandoto ra tañi i nacatyi ra. Naha ndo, ta ndyehe ndo nu i caa coño ñuhu ra.

⁷ Yatyi cuii fi cuhun ndo, ta nacatyi ndo sihin ra i casi ra vatyi sa nandoto ra. Ta catyi ndo: "Xihna

ca ra Jesús cuahan ndya Galilea ta zíqui maa ndo. Yucuan cua ndyehe ndo sii ra," catyi ndo. Ihya cuu sa tahan si nacatyi sihin ndo, catyi ángel cuan sihin ñu zíhi cuan.

⁸ Ta i yuhu xaan ñu zíhi cuan, ta zíi xaan i cuñi ñu, ndihi ca, ta yatyi xaan i naquihin ñu ityi cuahan ñu, ta i cacono ñu vatyi cua nacatyi ñu sihin ra i casi ra Jesús.

⁹ Ityi cuahan ñu i quituu ra Jesús ityi nuu ñu, ta i catyi ra: Nacumi sii maa ndo. Ta i tuhva ñu sii ra Jesús, ta i tiin ñu saha ra, ta i zacahnu xaan ñu sii ra.

¹⁰ Tacuan ta i catyi ra Jesús sihin ñu: Ma yuhu ndo. Cuahan ndo ta nacatyi ndo sihin ra yañi vatyi nacuhun ra ndya Galilea, ta yucuan cua ndyehe ra sii.

Cuhva i nacatyi zandaru

¹¹ Niñi ñi sa cuahan ñu zíhi cuan, ta zuhva zandaru, ta zacuenda ñaña cuan, cuanuhu ra ndya ñuu, ta i nacatyi ra sihin ra zutu nahnu tandíhi sa i cuu.

¹² Ta i sahan ra zutu nahnu cuan, ta i natuhun ra sihin ra mandoñi yozo caa cua zavaha ra ta i ndu-iñi ra minoo cuhva. Ta zíqui i saha ra cuaha xaan xuhun sii zandaru,

¹³ ta i catyi ra sihin ra: Catyi ndo vatyi i quisi ra tahan ra sa sa cuaa, ta i zuhu ra coño ñuhu ra niñi ñi sa quixi ndo.

¹⁴ Ta tatu cua coto ra gobernador cuhva ya, cua zasino ndi iñi ra, ta tacuan ta ñahñi cua tahan ndo.

¹⁵ Tacuan ta i quihin zandaru xuhun cuan, ta cuahan ra, ta i cahan ra cuhva i nacatyi ra cuan sihin ra. Ta sino iñi ñiyivi hebreo tuhun cuan ndya cuhva ndya vityi.

Cuhva i saha ra Jesús tyiño sii ra i casi ra

¹⁶ Tacuan ta cuahan sa usi iñi tahan ra i casi ra Jesús ndya Galilea ndya minoo yucu sa i zacoto ra Jesús sii ra.

¹⁷ Ta cuhva sa ndyehe ra sii ra Jesús, i zacahnu ra sii ra, zoco

zuhva ra ñá sino vaha iñi sa zuun
ra cuu ra.

¹⁸ Ta ziquí i tuhva ra Jesús sii ra,
ta i catyi ra sihin ra: Saha ra Ndyoo
tandíhi cuii cuhva sii sa cundyaca
ñehi andívi ta nu ñuhu ñuu ñiyivi.

¹⁹ Cuahan ndo nacahnu ñuu
ñiyivi, ta zacuaha ndo sii tandíhi
ñiyivi. Zacoó ndutya ndo sii ñu
sihin zívi ra Ndyoo Zutu yo ta sihin
zívi Zehe ra ta sihin zívi Tatyi Ii ra
Ndyoo.

²⁰ Tandíhi sa i zacuehi sii ndo,
nacatyi ndo sii si sihin ñu cua sino
iñi vatyi natyaa ñu yahvi sii si. Ta
coto ndo vatyi yuhvi ndyei sihin
ndo tandíhi cuii quívi ndya cuhva
ndya cua ndíhi ñuu ñiyivi. Ta nacuu
si tacuan, ta nacuu si sa ndisa.

Tuhun Vaha Sa I Tyaa Ra San Marcos

*Cuhva i cahan ra Juan, ra i zacoo
ndutya sii ñiyivi quivi cuan*

¹ Ihya cuhva quisaha Tuhun Vaha sa cuenda ra Jesucristo, ra cu zehe Ndyoo.

² Cuhva i zatyaa ra Ndyoo sii ra Isaías tuhun ra ta tyiemvu, ta i tyaa ra Isaías cuhva i cahan ra Ndyoo sihin ra Cristo ta catyi ra:

Cua tasi sii minoo ra sa xihna ñi, ta cua zacoto ra sii ñiyivi vatyi cuahun.

Vatyi quivi cua soon ta cua tyizoho ñu sa cohon.

³ Cua cana saa ra cuan sisi cuhu ta catyi ra sihin ñiyivi:

“Zama ndo cuhva iyo ndo vatyi sa cua saa ra ndyaca ñaha sii yo.”

⁴ Ta i quisi ra i tasi ra Ndyoo, ra cua cana saa sisi cuhu. Sinañi ra Juan. Izacoo ndutya ra sii ñiyivi. Ta i zacuaha ra sii ñu vatyi coo ndutya ñu ta zama ñu cuhva iyo ñu, ta ziqui cua zandasi ra Ndyoo cuatyi ñu.

⁵ Ñiyivi ñuu Jerusalén ta tandihi ñuu nu cu si Judea i sahan ñu nu ndyaa ra Juan. Ta sa yaha nahma ñu cuatyi ñu nuu ra Ndyoo, ta ziqui i sicoo ndutya ñu i zacuu ra Juan yuu sa nañi río Jordán.

⁶ Ixi camello i cuu zahma ra Juan, ta i sinuhñi zinda ñii sisira. Ta i sasi ra minoo nuu quiti tañi tica ta sihi ra tyahiñu ñuñu.

⁷ I cahan ra sihin ñiyivi ta catyi ra: Ta cua yaha zuhva quivi ta cua quisi inga ra cahnu ca. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii.

⁸ Zacoo ndutye sii ndo sihin ndutya, zoco maa ra cua zacoo ndutya sii ndo sihin Tatyi li. Tacuan i catyi ra Juan.

Cuhva i sicoo ndutya ra Jesús

⁹ Ta i yaha zuhva ñi quivi ta i quita ra Jesúz ñuu Nazaret nu cu si Galilea, ta i saa ra yuu Jordán, ta i zacoo ndutya ra Juan sii ra.

¹⁰ Zuun ñi caa cuhva sa nduvita ra Jesúz nu ndutya cuan ta i nandyehe ndaa ra, ta i ndyehe ra vatyi nuña ityi andivi, ta i noo xica Tatyi li sii maa ra tañi noo minoo paloma.

¹¹ Ta i siñi ra minoo nduzu sa cahan ityi ziqui, ta catyi si: Yoho cuu zehi. Ta cuñi xein suun. Ziixaan cuñi suhun.

*Cuhva i nducu coto ihñi cuihna
sii ra Jesúz atu cua tyaa ra yahvi sii
Ndyoo a sii cuihna*

¹² Ta zuun ñi quivi cuan i saca Tatyi li sii ra Jesúz, ta cuahan ra minoo cuhu cahnu.

¹³ Ta yucuan i ñoho ra uu xico quivi nu sicoo quiti cuhu. Ta i nducu ra cu nuu sii cuihna cuhva coto ihñi ra sii ra vatyi cuñi ra sa tyaa ra Jesúz yahvi sii ra. Ta ziqui i quisi tyindyeé ángel Ndyoo sii ra Jesúz.

*Cuhva i quisaha zacuaha ra
Jesúz nu cu si Galilea*

¹⁴ Tacuan ta ziqui i tyihi ñiyivi sii ra Juan vehe caa, ta i quisi nuhu ra Jesúz nu cu si Galilea, ta i zacoto ra sii ñiyivi Tuhun Vaha sa cuenda cuhva ndyaca ñaha ra Ndyoo.

¹⁵ Ta i catyi ra Jesúz: Vityi sa cuñi saa quivi cua cundyaca ñaha ra Ndyoo ihyá ñuu ñiyivi. Zandoo ndo cuatyi ndo, ta sino iñi ndo Tuhun Vaha.

*Cuhva i cana ra Jesúz sii cumi
tahan ra tiñi tyiyaca*

¹⁶ I sica noo ra Jesúz yumiñi Galilea, ta i ndyehe ra sii ra Simón sihin yañi ra, ra Andrés. Cañi ra traya ra nu ndutya vatyi yucuan cuu tyiño zacuu maa ra.

¹⁷ Ta i cana ra Jesúz sii ra ta catyi ra: Coho ndo sihin, ta cua cuhve cuhva nducu ndo sii ñiyivi

tañi cuhva nducu ndo sii tyiyaca. Tacuan i catyi ra Jesús sihin ra.

¹⁸ Ta ta sica ñi i zandoo ihno ra traya ra, ta cuahan ra sihin ra Jesús.

¹⁹ Ta i sica ra Jesús zuhva ca sihin ra ityi nuu ca, ta i ndyehe ra sii ra Jacobo sihin ra Juan yañi ra. Ta zehe ra Zebedeo cuu sii ra. Ñoho ra barco. Nazuhva ra traya ra.

²⁰ I cana ra Jesús sii ra, ta i zandoo ra sii ra Zebedeo zetu ra sihin muzu ra sisi barco. Ta i sindyico ra sii ra Jesús.

Cuhva i ñoho tatyi cuihna sii minoo ra

²¹ I saa ra Jesús sihin ra i cana ra ñuu Capernaum, ta quivi tuhva ñiyivi quitatu i quihvra Jesús vehe ñuhu. Ta i zacuaha ra sii ñiyivi.

²² Ta iyo xaan i cuñi ñiyivi sihin cuhva i zacuaha ra vatyi ña zacuaha ra tañi zacuaha ra maestro cuenda ley, zoco i zacuaha ra tañi sa saha ra Ndyoo sa siñi tuñi sii ra.

²³ Ta sisi vehe ñuhu cuan i ñoho minoo ra, ra ñoho tatyi cuihna añima. Ta i quisaha cana saa ra. Ta catyi ra:

²⁴ ¿Ñaa sa cuñun sihin ndi? Jesús, ra ñuu Nazaret. ¿Atu vasun sa vasi zandyehun tundoho sii ndi? Site yoo ra cuun. Moo cuu ra cu zehe Ndyoo, ra ñahñi cuatyi. Tacuan i cahan ra cuan.

²⁵ Tacuan ta xaan xaan i cahan ra Jesús sihin tatyi cuihna cuan ta catyi ra: Cazi yuhun ta ma cohon. Ta quita ndo sii ra ya.

²⁶ Ta ñihí xaan i zanihi tatyi cuihna cuan sii rayii cuan, ta saa xaan i sacu saa si, ta i quita si añima ra.

²⁷ Ta iyo xaan i cuñi ñiyivi, ta i nducu tuhun tahan ñu: ¿Yozo caa? Minoo cuhva saa cuu si vatyi ra ihyá iyo cuhva sii ra vatyi cahan ra sihin tatyi cuihna, ta tyaa si yahvi sii ra.

²⁸ Ta yatyi xaan i sito ñiyivi nacahnu nu cu si Galilea cuhva i zavaha ra Jesús.

Cuhva i zanduvaha ra Jesús sii tyizo ra Pedro

²⁹ Tacuan ta ziqui i quita ra vehe ñuhu ta cuahan ra Jesús sihin ra Jacobo ta ra Juan ndya vehe ra Simón ta ra Andrés.

³⁰ I caa tyizo ra Pedro nu sito. Cuhu ña cahñi. Ta i nacatyi ñu sihin ra Jesús vatyi cuhu ña.

³¹ I tuhva ra nu ndyaa ña, ta i tñin ra ndaha ña, ta i tyindyee ra sii ña, ta i nduvita ña. Zuun ñi caa cuhva cuan i ndyico cahñi sii ña, ta i nduvita ña. Ta i zavaha ña sa casi ra.

Cuhva i zanduvaha ra Jesús sii cuaha xaan ñiyivi cuhu

³² Sa tyizo ñicandyi ta sa tyahan cuan i quisi ndyaca ñiyivi sii tandihí ñu cuhu, ziñn ziñn nuu cuehe, ta ñu ñoho tatyi cuihna.

³³ Ta i quisi tuu xaan ñiyivi yuvehe nu ñioho ra Jesús.

³⁴ Ta i zanduvaha ra Jesús sii cuaha xaan ñu cuhu cuaha xaan nuu cuehe, ta i tava ra sii cuaha xaan tatyi cuihna sii ñiyivi, zoco ña saha maa ra sa cahan tatyi cuihna cuan vatyi i nacoto si sii ra.

Cuhva i zacoto ra Jesús sii ñiyivi Tuhun Ndyoo nu cu si Galilea

³⁵ Ta inga quivi ñaa ca i nduvita ra Jesús ta sahan ra minoo cuhu, ta i quisaha cahan ra sihin ra Ndyoo Zutu ra, ra iyo andivi.

³⁶ Ta ra Simón sihin ra tahan ra i sinanducu ra sii ra.

³⁷ Ta nu nañihi ra sii ra Jesús i catyi ra sihin ra: Nanducu xaan ñiyivi suun.

³⁸ Zoco i catyi ra Jesús: Coho yo tandihí inga ñuu yatyi ñi ihyá vatyi indyacuan cua cahan tuqui Tuhun Ndyoo vatyi yucuan cuenda vasi.

³⁹ Ta i sica noo ra tandihí ñu cu si Galilea. I zacoto ra sii ñiyivi Tuhun Ndyoo tahan tahan vehe ñuhu, ta i tava ra tatyi cuihna sii ñiyivi.

Cuhva i zanduvaha ra Jesús sii minoo ra tyahyu

⁴⁰ Minoo saha i tuhva minoo ra nu ndyaa ra Jesús. Cuhu xaan ra sihin cuehe sa tyahyu ra. I sicuñi siti ra, ta i catyi ra: Iyo cuhva suun, tatu cuñun cuu zanduvohon sii.

⁴¹ Ta i cundahvi iñi ra Jesús sii ra cuan, ta i tñin ra ndaha ra ta catyi ra: Cuñi. Zanduvehi suun.

⁴² Ta zuun ñi caa cuhva cuan i quita cuehe cuan sii ra, ta ndaha nduvaha ñi ra.

⁴³ Ta ziqui i catyi ra Jesús sihin ra vatyi cuu cunuhu ra, zoco ñihíxaan i saha ra tuhun sii ra ta catyi ra:

⁴⁴ Ndyehun, vatyi ma nacatyun sihin ñiyivi. Cuhun nu ndyaa ra cu zutu vehe ñuhu hebreo, ta cuhvón sii ra Ndyoo sa i catyi ra Moisés sa cua cuhva ñiyivi tatu nduvaha ñu. Tacuan ta cua coto ñiyivi vatyi i nduvohon.

⁴⁵ Tacuan ta cuahan ra i nduvaha, ta i nacatyi ra sihin tandihí ñiyivi cuhva i cuu sii ra. Ta yucuan cuenda ñá cuu ca quihví ra Jesús inga ñuu. Isica noo ra nu yoñi ñiyivi iyo. Zoco i sahan xaan ñiyivi zíin zíin ñuu ndya nu ndyaa ra.

2

Cuhva i zanduvaha ra Jesús sii minoo ra xii

¹ Ta i yaha zuhva quiví ta ziqui i quisi nuhu ra Jesús ndya ñuu Capernaum, ta yatyi xaan i sito ñiyivi vatyi sa nasaa nuhu ra.

² Ta ta sica cuii ñi i titahan ñiyivi cuhva ndya ñá cuu ca quihví ñu yuvehe. Ta i zacuaha ra Jesús sii ñu Tuhun Ndyoo.

³ Ta i quisi minoo ityi ñiyivi ta ndyizo cumi tahan ra sii minoo ra xii.

⁴ Ta ñá cuu yaha ra yuvehe nu ñoho ra Jesús vatyi tuu xaan ñiyivi yucu. Cuu, i ndaa ra xiñi vehe, ta i nuña ra xiñi vehe, ta i zanoo ra sii ra xii sihin minoo tyuhva nu nandyaa ra Jesús.

⁵ Indyehere Jesús cuhva sa nii iñi tandihí ra, ta i catyi ra Jesús sihin

ra xii cuan: Zandasi cuatyun, zehe luhli. Catyi ra.

⁶ Ta yucu uu tahan ra maestro cuenda ley yucuan, ta sica iñi ra sihin añima ra:

⁷ “¿Ñacu cahan ra ya tacuan? Yoñi ra cuu zandasi cuatyí ñiyivi. Maa ñi ra Ndyoo cuu zandasi cuatyí ñiyivi.”

⁸ Ta i sito ra Jesús cuhva sica iñi ra sihin añima ra, ta i quisaha ndaca tuhun ra: ¿Ñacu sica iñi ndo tacuan sihin añima ndo?

⁹ Sica iñi ndo vatyi ña vaha quehin vatyi i catyi sihin ra ya: “Zandasi cuatyun.” Ta vityi cua zañehi sii ndo vatyi iyo cuhva sii, ta cua catyi sihin ra: “Nduviton ta nacuhun yuun, ta cunuhun.”

¹⁰ Cua zañehi sii ndo vatyi iyo cuhva sii vii, vatyi ra i quisi ndya gloria cui. Ta cua zandasi cuatyí ñiyivi ñuu ñiyivi. Ta i cahan ra sihin ra xii cuan, ta catyi ra:

¹¹ Quehin suhun vatyi nduviton, ta nacuhun tyuhvon, ta cunuhun ndya vehun.

¹² Ta yatyi xaan i nduvita ra xii cuan. I naquihin ra tyuhva ra, ta i quita ra. I ndyehe tandihí ñiyivi, ta iyo xaan i cuñi ñu, ta i catyi ñu vatyi iyo xaan cuhva sii ra Ndyoo. Ta catyi ñu: Tañaha ca ma ndyehe yo sa tyehen yozo vasi si.

Cuhva i catyi ra Jesús sihin ra Leví vatyi cuhun ra sihin ra

¹³ Tacuan ta ziqui cuahan tucu ra Jesús ityi yuhu tyañuhu. Ta i tatahan cuaha xaan ñiyivi. Ta i zacuaha ra sii ñu.

¹⁴ Ta sa cuahan tucu ra Jesús i ndyehe ra sii ra Leví, zehe ra Alfeo. I zatyiayvi ra sii ñiyivi sa cuenda xuhun ra ndyaca ñaha. Ta i catyi ra Jesús sihin ra: Coho sihin. Ta yatyi xaan i nduvita ra Leví, ta cuahan ra sihin ra.

¹⁵ Ta sa i sasi ra Jesús xita vehe ra Leví, iin ñi mesa i siyucu ra sihin ra sica noo sihin ra ta sihin cuaha xaan ra zatyiayvi sii ñiyivi

sa cuenda xuhun ra ndyaca ñaha ta sihin inga ra iyo cuatyi vatyi i sindyico cuaha xaan ra iyo cuatyi sii ra Jes s.

¹⁶ Ta i ndyehe ra maestro cuenda ley ta ra fariseo vatyi sasi ra Jes s xita sihin ra cuan, ta i catyi ra sihin ra ndih i sihin ra Jes s:  Nacu sasi ra xita sihin ra zatyiyahvi sii  iyivi ta ra iyo cuatyi?

¹⁷ Ta sa si i ra Jes s sa cahan ra ta i catyi ra:  Na cu i si m dico sii ra iyo vaha, zoco sii ra cuhu cu i si.  Na vasi sa cuenda  iyivi sica i i vatyi vaha xaan  u. Vasi sa cuenda  iyivi sito vatyi iyo cuatyi  u.

Ndaca tuhun  iyivi sii ra Jes s  aa cuenda  a cu i ra sica noo sihin ra cah i zoco ra sii ra

¹⁸  iyivi i sindyico sii ra Juan sihin  iyivi i sindyico sii ra fariseo  ah i maa sasi ra tatu sica tahvi ra sii ra Ndyoo. Ta i ndyehe inga  iyivi. Ta i ndaca tuhun  u sii ra Jes s ta catyi  u:  Nacu sasi  iyivi ndyico suun xita tandih i  iv i vazu sica tahvi  u sii Ndyoo? Ta  iyivi ndyico sii ra Juan ta  iyivi ndyico sii ra fariseo  ah i maa sasi ra tatu sica tahvi ra sii Ndyoo.

¹⁹ Ta i cahan ra Jes s minoo cuhva sihin  u ta catyi ra:  Nacu ma casi  iyivi xita tatu cuahan  u minoo vico tindaha? Tatu ndyaa ra tindaha, sasi vaha tandih i  iyivi vatyi z i cu i  u. Ta tacuan tucu  iyivi ndyico sii. Z i cu i  u vatyi ndyei sihin  u.

²⁰ Zoco tatu sa cuahan ra tindaha, tacuan ta z i ma casi ca  u.

²¹  Na vaha cua cutyi o  iyivi zahma saa sa natyaa  u minoo zahma sahnu vatyi zahma saa cuan cua ndiy i si, ta z i cua tahndya ca zahma sahnu cuan.

²² Ta inga cuhva vatyi ma zavaha  iyivi ndixi panela sisi quizi sahnu vatyi cua cuizo si ta ndaa si. Ta cua cahndi quizi cua tatu sahnu si. Tatu cua zavaha  u ndixi panela,

cu i si quizi saa. Ta tandih i cuhva zacuehi cuu sa saa. Ta  a vaha nacuzaca si sihin sa sahnu. Cu i si sa zama ndo cuhva iyo ndo.

Cuhva  iv i quitatu  iyivi

²³ Minoo saha  iv i quitatu  iyivi, cuahan ra Jes s sihin ra sica noo sihin ra, ta i yaha ra sisi itu trigo sa zavaha  iyivi yutyi pan. Ta i quisaha tohon ra ndih i sihin ra Jes s zuhva si.

²⁴ Tacuan ta i catyi ra fariseo: Ndyeh i,  Nacu zaty o ra ndih i suhun? Ta vityi cuu  iv i quitatu  iyivi vatyi tacuan catyi ley.

²⁵ Zoco i catyi ra Jes s sihin ra:  Atu ta cahvi ca ndo Tuhun Ndyoo cuhva i zavaha ra rey David minoo saha sihin amigo ra? vatyi i sizoco xaan ra.

²⁶ I quih i ra David vehe  uhu  iv i i cuu ra Abiatar ra cu zutu ya cahnu. Ta i sasi ra pan ii. Ta yucuan pan ii, maa fi ra cu zutu cuu casi. Zoco i sasi ra David sii si. Ta i saha ra i sasi ra tahan ra.

²⁷ Ta inga cuhva catyi tucu ra Jes s: Iyo  iv i quitatu  iyivi sa vatyi cua tyindyee si sii  u.  Na zavaha ra Ndyoo sii  iyivi sa cuenda  iv i cuan. I zavaha ra  iv i cuan vatyi cua tyindyee si sii  iyivi.

²⁸ Ta yuhvi, ra i quasi ndya gloria cui. Ta iyo cuhva sii, sa catyi  aa sa cua zavaha  iyivi  iv i quitatu  iyivi.

3

Cuhva i zanduvahara Jes s sii ra na-ityi ndaha

¹ I quih i tucu ra Jes s vehe  uhu, ta yucuan ndyaa minoo ra na-ityi ndaha.

² Ndyeh i ih i ra fariseo nu  oho ra Jes s tatu ndisa cuii cua zanduvahara sii ra na-ityi ndaha cuan  iv i quitatu  iyivi vatyi cu i ra tyaa ra cuatyi sata ra.

³ Ta i catyi ra Jes s sihin ra na-ityi ndaha cuan:  Na mah u ya.

⁴ Ta ziqui i ndaca tuhun ra Jesús sii ra fariseo: ¿Ñaa sa cua zavaha yo quivi quitatu ñiyivi? ¿Atu vaha cua zavaha yo sa vaha a sa ña vaha? ¿Atu cua zanduvaha yo sii ñiyivi a cuhva yo sa cuu ñu? Ta ña nacahan ra fariseo ndaha cuii ñi.

⁵ Tacuan ta i cuxaan ra Jesús sihin ra, ta i inducuihya iñi ra sihin ra vatyi ñihi xaan iñi ra. Ta i catyi ra Jesús sihin ra na-ityi ndaha cuan: Nandica ndohon. Ta i nandica ra ndaha ra, ta zuun ñi caa cuhva cuan i nduvaha si.

⁶ Tacuan ta i quita tandihi ra fariseo nu ñoho ra Jesús, ta i natuhun tahan ra sihin minoo ityi amigo ra Herodes. Ta i quisaha nducu ra cuhva cahni ra sii ra Jesús.

Cuhva i quisi tuu xaan ñiyivi yuhu tyañuhu

⁷ Ta ra Jesús cuahan ra sihin ra sica noo sihin ra ndya tyañuhu, ta i sindyico cuahan xaan ñiyivi Galilea sii ra.

⁸ Ta sa sito ñu vatyi tysiño vaha zavaha ra Jesús, ta i quita ñu Judea, ta ñuu Jerusalén, ta Idumea ta inga siyo yuu Jordán. Ta tandihi ñuu ndyaa yatyi sii ñuu Tiro ta ñuu Sidón, ta i quisi ndyehe ñu sii ra.

⁹ Yucuan cuenda i catyi ra Jesús sihin ra ndihi sihin ra vatyi nazaquisi ra minoo barco vatyi quihi ra Jesús, ta ma catyihi xaan ñiyivi sii ra.

¹⁰ Sa zanduvaha ra Jesús sii cuaha xaan ñiyivi cuhu, ta yucuan cuenda i quisi tuu xaan ñiyivi cuhu vatyi cua tiñ ñu sii ra.

¹¹ Ta sa ndyehe ñiyivi ñoho taty i cuihna cuan sii ra Jesús sicuiñi siti ñu, ta cana saa cuihna ñoho sii ñu: ¡Yoho, zehe ra Ndyoo cuu suun!

¹² Ta ñihi xaan i cahan ra Jesús sihin taty i cuihna cuan vatyi ma nacaty i ca si yoo ra cuu ra.

I casi ra Jesús sii usi uu tahan ra apóstol

¹³ Tacuan ta ziqui i ndaa ra Jesús minoo yucu, ta i cana ra yoo ra cua cuizo tysiño, ta i sahan ra cuan nu ndyaa ra Jesús.

¹⁴ I quihin ra Jesús sii usi uu tahan ra vatyi cua cutahan ra sihin ra, ta cua tasi ra Jesús sii ra, ta cua zacoto ra sii ñiyivi Tuhun Ndyoo.

¹⁵ Ta i saha ra Jesús cuhva sii ra vatyi cuu zanduvaha ra sii ñiyivi cuhu, ta cuu tava ra taty i cuihna sii ñiyivi.

¹⁶ Ihya cuu zivi sa usi uu tahan ra i casi ra Jesús: Simón, i zacunañi ra Jesús sii ra Pedro;

¹⁷ ra Jacobo sihin yañi ra, ra Juan, zehe ra Zebedeo cuu sii nduu tahan ra, ta i zacunañi ra Jesús sii ra, ra xaan;

¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo zehe ra Alfeo; ra Tadeo, inga ra Simón, maa ra cuu cuenda minoo ityi ra cuñi zama sii ra ndyaca ñiha,

¹⁹ ta ra Judas Iscariote, maa ra cuu ra cua xico sii ra Jesús cuee ca.

Cuhva i catyi ñiyivi vatyi ñoho taty i cuihna sii ra Jesús

²⁰ Tacuan cuu cuhva i cana ra Jesús sii ra i casi ra, ta ziqui i quihvi ra Jesús sisi minoo vehe sihin sa usi uu tahan ra cuan, ta i quisi tucu cuaha xaan ñiyivi cuhva ña cuyatyi ca ra casi ra xita.

²¹ Ta sa sito zihí ra ta yañi ra Jesús tuhun cuan, ta cuahan ñu vatyi cua naquihin ñu sii ra vatyi cahan xaan ñiyivi, ta catyi ñu vatyi zana xiñi ra Jesús.

²² Ta ra maestro cuenda ley, ra i quisi ndya ñuu Jerusalén, i catyi ra: Ra ihya, ñoho ra cu nuu sii cuihna sii ra. Ta tava ra taty i cuihna sihin tundyee iñi iyo sii ra Beelzebú, ra cu nuu sii cuihna.

²³ Tacuan ta i cana ra Jesús sii ñiyivi, ta i quisaha zacuaha ra sii ñu sihin minoo cuhva ta catyi ra: ¿Ñaa sa sica iñi ndo? ¿Atu cua tava ra cu nuu sii cuihna sii inga cuihna?

²⁴ Tatu iyo minoo ñuu ta sahñi tahan xaan ñiyiví sihin inga ñiyiví sa zuun ñi ñuu cuan, yatyi xaan cua tiví ñuu cuan.

²⁵ Ta tatu sahñi tahan ñiyiví sihin tahan ñu, sihin cuhva ñu, sihin yañi ñu, yatyi xaan cua tiví cuhva yucu ñu.

²⁶ Ta ma cahní tahan ra cu nuu sii cuihna sihin inga cuihna vatyi tatu tacuan zavaha ra, yatyi xaan cua ndihí cuhva iyo sii ra.

²⁷ Ñihi xaan cuu ra cuihna, ta sa sito yo vatyi ma cuu quihví ñiyiví vehe minoo ra ñihí xaan ta quihín ñu ndaha tyiño ra tatu ma cuhñi xihna ñu sii ra. Tatu sa nuhñi ra ñihí cuan, tacuan ta ziquí cuu quihví yoo ra cuñi ta quihin ra ndaha tyiño ra.

²⁸ Ndisa cuii cuu si vatyi cuu zandasi ra Ndyoo tandíhi cuatyi zavaha ñiyiví ta tandíhi sa quiñi cahan ñu.

²⁹ Zoco tatu ndyehe ñiyiví cuhva zatyiño Tatyí Ii ra Ndyoo ta catyi ñu vatyi cuihna zatyiño, ma zandasi ra Ndyoo cuatyi ñu nu yozo cui ca. Tandíhi cuii tyiemvu cua ndoo cuatyi cuan ziquí ñu.

³⁰ Tacuan i catyi ra Jesús vatyi numaa zatyiño ra sihin cuhva sii Tatyí Ii ra Ndyoo, zoco i catyi ñiyiví vatyi zatyiño ra sihin cuhva iyo sii cuihna.

Zihí ra Jesús ta yañi ra

³¹ Tacuan ta ziquí i saa zihí ra Jesús sihin yañi ra, ta i tasi ñu tyiño ñu ñoho ra Jesús vatyi naquisi ra nu ndyaa ñu.

³² Ta ñiyiví yucu siconduu sihin ra Jesús i catyi ñu sihin ra: Saa zihun ta yañun. Nanducu ñu suun. Yucu ñu sata vehe.

³³ Ta i catyi ra Jesús: ¿Yoo sa cuu zihí? ¿Ta yoo sa cuu yañi?

³⁴ Ta ziquí i nandyehe ra nu yucu ñiyiví siconduu sihin ra, ta i catyi ra: Ñu ihya cuu tañi zihí. Ta ra ihya cuu tañi yañi. Ta ñu ihya cuu tañi cuhve.

³⁵ Vatyi yoo ñiyiví zavaha tandíhi sa catyi ra Ndyoo, yucuan cuu ñu cuñi tañi ñiyiví sii. Tacuan i catyi ra Jesús.

4

Cuhva ra tasi

¹ Inga saha i quisaha zacuaha ra Jesús sii ñiyiví ityi yuhu tyánuhu. Ta cuaha xaan ñiyiví i titahan nu ndyaa ra, ta i quihví ra Jesús sisi minoo barco vatyi tuu xaan ñiyiví. Ta i sicundyaa ra. Ta tandíhi ñiyiví i nandoo nuu ñiyiti cuan.

² Ta i zacuaha ra sii ñiyiví ziquí minoo cuhva ta inga cuhva. Ta ihya cuu minoo cuhva i cahan ra:

³ Tyizoho ndo cuhva ya vatyi minoo saha sahan minoo ra cua tasi siti trigo.

⁴ Zuhva si i canacava si ityi nu ndava ñuhu. I quisí zaa, ta tandíhi cuij si i sasi tì.

⁵ Zuhva si i canacava nu yaxi ñoho ñuhu vatyi ñoho xaan yuu. Yatyi xaan i caña si vatyi ña coco caa ñuhu.

⁶ Tacuan ta ndyii xaan i nanduu. Ta i xii yava ndyihi cuan vatyi ñá tñi yoho si.

⁷ Ta inga si i canacava si sisi iñu. Ta yatyi ca sahnu iñu cuan. Ta i zahvi iñu cuan sii si, ta ñá saha si siti si.

⁸ Zoco zuhva si i canacava si nu vaha ñuhu. Yucuan cuu sa sahnu vaha. Ta i saha si siti si. Iyo si saha si ziendu siti si sa minoo ñi si. Iyo si saha si uñi xico usi. Ta iyo si saha si oco usi.

⁹ Ta i catyi ra sihin ñu: Tatu siñi ndo, ¡cuiñi ndo!

Cuenda sa tuhva xaan ra Jesús cahan ziquí minoo cuhva

¹⁰ Tacuan ta ziquí i nandoo zuhva ca ñiyiví sihin ra Jesús ta sihin ra i casi ra. Ta i ndaca tuhun ñu sii ra Jesús: ¿Ñaa cuñi si catyi si sa cuenda cuhva cuan?

¹¹ Ta i catyi ra Jesús sihin ñu: Saha ra Ndyoo sa coto maa ndo yozo caa ndyaca ñaha maa ra. Zoco

cuhva cuan maa ñi sihin cuhva quehin sihin inga ñiyivi.

12 Vatyi maa ñu, cua ndyehe ñu. Zoco ma cuu coto ñu ñaa sa ndyehe ñu. Cua tyizoho ñu. Zoco ma cutuñi iñi ñu. Vatyi tatu cua cuiñi ñu, cua zama ñu cuhva iyo ñu. Ta cua zandasí ra Ndyoo cuatyi ñu.

Inacatyi ra Jesús ñaa cuñi si catyi si cuhva ra tasi trigo cuan

13 Tacuan ta ziqui i ndaca tuhun ra Jesús sii ñu. Ta i catyi ra: ¿Atu ña siñi ndo cuhva cuan? Tatu ña siñindo sii si, ¿yozo caa cua cuiñi ndo inga cuhva?

14 Tañi ra i tasi siti yutu cuan, tacuan iyo ra nacatyi sihin ñiyivi Tuhun Ndyoo.

15 Tañi siti i canacava ityi, tacuan iyo zuhva ñiyivi. Siñi ñu sa cahan ra Ndyoo, zoco yatyi xaan quasi cuihná. Ta quihin ra tuhun sa siñi ñu.

16 Ta iyo inga ñiyivi tañi siti sa canacava nu yaxi ñuhu. Tacuan iyo maa ñu. Siñi ñu Tuhun Ndyoo, ta cuñi xaan ñu sii si.

17 Zoco ña quihvi vaha si añima ñu. Ta ña naha cua sino iñi ñu. Tatu sa quasi minoo tundoho ziqui ñu a cuxaan ñiyivi sihin ñu sa cuenda Tuhun Ndyoo, yatyi xaan cua zaña ñu sii si.

18 Ta inga ñiyivi, tañi siti sa canacava sisi iñu cuu ñu. Siñi ñu Tuhun Ndyoo.

19 Zoco sica iñi ñu tuhun sa iyo ñuu ñiyivi. Ta tuhun cuca, tuhun zandavi ñaha ñi cuu si cuan. Ta cuñi xaan ñu tandihí nuu ndaha tyiño. Ta tandihí cuhva cuan zanaa si iñi ñu Tuhun Ndyoo. Ta ma zatyiño vaha si sihin ñu.

20 Zoco iyo inga ñiyivi siñi ñu Tuhun Ndyoo. Ta sino iñu ñu. Yucuan cuu ñiyivi vaha zatyiño, tañi siti sa i canacava nu ñuhu vaha. Iyo ñiyivi vaha xaan zatyiño ñu tyiño ra Ndyoo tañi siti i saha minoo ziendu sa minoo si. Ta inga ñu cuu tañi siti i saha uñi xico usi ñi. Ta inga ñu cuu tañi siti i saha oco usi ñi.

Cuhva sii minoo lámpara

21 Ta i catyi tucu ra Jesús sihin ñu: Tatu cayu minoo lámpara vehe ñiyivi, ¿atu cua tyihi ñu sii si sisi tyica a xu sito? Ña tacuan. Zucu tyaa ñu sii si cuñi si vatyi tacuan ta ndundisi sisi vehe.

22 Ta tañi lámpara tatu ñoho xehe si sisi tyica, tacuan iyo cuhva zacuehi sii ndo vityi. Zoco cua coo quivi ta cua cuiñi ñiyivi nacahnu ñuu ñiyivi cuhva zacuehi ihya.

23 Yoo ra tyizoho, natyizoho vaha ra.

24 Tyizoho vaha ndo ñaa sa siñi ndo. Tatu zuhva ñi cua tyizoho ndo, zuhva ñi cua coto ndo. Tatu tyizoho vaha ndo cua coto ndo cuaha ca vatyi cua cuhva ra Ndyoo sii ra tyizoho vaha vatyi cua coto ra cuaha ca.

25 Sii ra sa iyo cuaha ca, cuaha ca cua cuhva ra. Ta sii ra iyo zuhva ñi, cua naquihin ndihí ra Ndyoo sii si.

Cuhva sahnu siti

26 Catyi tucu ra Jesús: Ñiyivi ndyaca ñaha ra Ndyoo, nducuaha ca ñu tañi nducuaha siti. Tasi minoo ra ndaha tyiño nu ñuhu.

27 Quixi ra sa sa cuua. Ta nduvita ra ñaha ñi. Ta caña siti cuan, ta cua cuahnu maa tuhun ñi si. Ña sito ra cuan yozo caa sahnu si.

28 Ñuhu cuan saha tundyee iñi, ta cua cuahnu siti cuan. Sa xihna ñi cua coo yutu tu. Ta ziqui coo yoco tu.

29 Tatu sa sisa siti cuan. Ta ziqui cua cahndya ra sii si ta naquihin ra sii si vatyi sa saa tyiemvu si.

Cuhva siti mostaza

30 Ta i catyi tucu ra Jesús: ¿Ñaa sihin cuu zacasi tahan yo cuhva ndyaca ñaha ra Ndyoo? ¿Ñaa cuhva cua nacatyi sihin ndo vatyi cua cuiñi ndo?

31 Tañi minoo siti mostaza, tacuan iyo si. Ñahñi siti luhlu ca sa nuu mostaza iyo nacahnu ñuu ñiyivi. Quihin minoo ra sii si, ta tasi ra sii si nu ñuhu ra.

³² Ta cuee ca cua cuahnu si. Ta cua nduu si cahnu xaan, cahnu ca ta ziqui cuaha xaan inga nuu siti sa tasi yo. Nahnu xaan zoco tu. Ta ndya cuhva ndya zaa ta cua quisi cozo ti zoco tu.

Tuhva xaan ra Jesús cahan ziqui minoo cuhva

³³ Tacuan i cahan ra Jesús sihin ñiyivi. Ta i sityiño ra cuaha xaan cuhva tañi cuhva ya. Tandihi ñaa sa cuu cuiñi ñu, i cahan ra sihin ñu.

³⁴ Ta ma cahan maa ra tatu ma cahan ra ziqui minoo cuhva. Ta cuee ca ta i nacatyi casi ra sihin ñiyivi ndyico sii ra.

Zacutaxi ra Jesús taty i ta ndutya

³⁵ Zuun ñi quiví cuan ta sa tyahan i catyi ra Jesús sihin ra i casi ra: Coho yo inga siyo miñi.

³⁶ Ta i zandoo ra sii ñiyivi cuan, ta cuahan ra Jesús sihin ra i casi ra sisi barco sa ñoho ra. Ta cuahan uu a uñi tahan ca barco sihin ra.

³⁷ Ta i quisaha minoo taty i cahnu xaan. Ta i quisaha quihví ndutya sisi barco cuan. Ta zuhva zuhva ñi cua cutu tu.

³⁸ Ta ra Jesús quixi ra ityi zuhma barco. Ñoho minoo zahma xiñi ra. Ta i zandoyo ra i casi ra sii ra. Ta catyi ra sihin ra: Maestro, ¿ñacu ña cohon ta sa cuñi cunaa yo?

³⁹ Ta i nduvita ra Jesús, ta i cahan ra sihin taty i: ¡Taxi ñi! Ta i catyi ra sihin ndutya: ¡Ma ndyayu con! Ta taxi cuii ñi i nduu taty i. Ta tacuan tucu ndutya.

⁴⁰ Ta ziqui i catyi ra Jesús sihin ra i casi ra: ¿Ñacu yuhu xaan ndo? ¿Ñacu ña niñi iñi ndo?

⁴¹ Ta iyo xaan i cuñi ra i casi ra. Ta i natuhun tahan ra, ta catyi ra: ¿Ñaa ra cuu ra ya vaty i cuhva ndya taty i ta cuhva ndya ndutya ta tyaa si yahvi sii ra?

5

Ra ñoho taty i cuihna

¹ I saa ra inga siyo miñi nu cu si Gadara,

² ta i quita ra Jesús barco cuan. Ta i quisi minoo ra iyo nu ñaña. Ñoho taty i cuihna sii ra.

³ Ndyaa maa ra nu ñaña, ta yoñi maa cuu cuhñi sii ra numaa sihin cadena.

⁴ Cuaha xaan saha i sihñi ñiyivi saha ra ta ndaha ra sihin cadena, zoco tandih i saha sahnu ndyihi ra sii si. Ta ñá cuu zandumazu ñiyivi sii ra.

⁵ Ndyiyaca ta ñiyaca ndihvi noo ra yucu ta nu ñaña. Sacu saa ra, ta sahndya ra sii ra sihin yuu.

⁶ I ndyehe ra sii ra Jesús sica ca. Ta i caconra. Ta i sicuiñi siti ra nu vasi ra Jesús.

⁷ Saa xaan i cahan ra, ta catyi ra: ¿Ñaa sa cuñun sihin mi, Jesús? Moo cuu zehe ra Ndyoo, ra cahnu ca. Sa ndyoo ñi ma zandyehun tundoho sii.

⁸ Tacuan i catyi ra vaty i sa catyi ra Jesús: Yoho taty i cuihna, quita sii ra ya.

⁹ Ta ziqui i ndaca tuhun ra Jesús sii taty i cuihna cuan, ta catyi ra: ¿Ñaa nañi moo? Ta i catyi si: Nañi Legión vaty i cuaha xaan ndi iyo.

¹⁰ Ta i cahan ndahvi xaan si sihin ra Jesús sa ma tava ra sii si ta cuhun si ndya vaha ñi.

¹¹ Ta yaty i ñi yucu cuan siyucu cuaha xaan quiñi. Nanducu ti sa casi ti.

¹² Ta i quisaha cahan ndahvi tandih i taty i cuihna cuan. Ta catyi si sihin ra Jesús: Tasun sii ndi nu yucu quiñi cuan. Ta cua quihví ndi sisi ti.

¹³ I catyi ra Jesús sihin si vaty i cuu. Ta ziqui i quita tandih i taty i cuihna cuan sii rayii cuan, ta i quihví si sisi quiñi cuan. Ta tandih i sa uu mil quiñi cuan, i sino ti nu iñi noo yuhu miñi. Ta i sihi tandih i ti sisi ndutya.

¹⁴ Tacuan ta iyo xaan i cuñi ra zacuenda quiñi cuan. I sino xaan ra. Sahan ra nacahnu sa nacatyi ra sihin ñiyivi. Ta i quisi ndyehe ñiyivi ñaa sa cuu.

15 I saa ñu nu ndyaa ra Jesús, ta i ndyehe ñu sii ra i siñoho tatyí cuihna cuan. Sa ndyaa ra taxi ñi. Ñoho ra zahma ra, ta sa nduvaha cuñi xiñi ra. Ta i yuhu xaan ñu.

16 Ta ra i ndyehe cuan, i nacatyí ra sihin ñiyiví cuhva i tahan ra i ñoho tatyí cuihna sii cuan ta cuhva i tahan quini cuan.

17 Ta ziqui i catyi ñu sihin ra Jesús sa ndyoo ñi naquita ra ñuu ñu.

18 Tacuan ta i quihvi ra Jesús sisi barco. Ta i quisaha cahan ndyoo ra siñoho tatyí cuihna sii cuan sihin ra Jesús vatyí cuñi ra cuhun ra sihin ra.

19 Zoco ñá saha ra Jesús sa cuhun ra. I catyi ra: Cuahan ndya vehun nu iyo ñiyiví suun. Ta nacatyun sihin ñu tandihí cuhva i tyindyeer a Ndyoo suun. Ta yozo caa i cundahvi iñi ra suun.

20 Ta cuahan ra cuan. Ta i nacatyí ra sihin tandihí ñiyiví tandihí ñuu nu cu si Decápolis tandihí sa i zavaha ra Jesús sihin ra. Ta iyo xaan i cuñi ñiyiví.

Nduvaha zehe ra Jairo, ta i tiñ minoo ñaha yuzahma ra Jesús

21 Saa tucu ra Jesús sihin ra i casi ra inga siyo miñi. Ta cuaha xaan ñiyiví i titahan yuhu miñi nu i saa ra.

22 Ta i quisira minoo ra cu tyiño vehe ñuhu. Jairo nañi ra. Ta cuhva sa ndyehe ra sii ra Jesús i sicuiñi siti ra.

23 Ta i quisaha sacu ndahvi ra nuu ra Jesús ta catyi ra: Sa cuñi cuu cuii ña luhlu zehi. Coho ta tyizon ndohon sii ña. Ta cua nduvaha ña, ta ma cuu ña.

24 Tacuan ta cuahan ra Jesús sihin ra. Ta i sindyico tuu xaan ñiyiví sii ra. Ñihi xaan i catyihi ñu sii ra.

25 Ta ticui ñiyiví cuan ñoho minoo ñaha cuhu. Sa usi uu cuiya sa cuhu ña cuehe sa cuu ña niñi.

26 Sa cuaha xaan tundoho ndyehe ña. Cuaha xaan médico i zacuu tata sii ña. I zanaa ña tandihí

cuii sa iyo sii ña. Zoco ñá nduvaha ña. Xaan ca i nduu cuehe cuan.

27 Ta sa i siñi ña sa cahan ñiyiví tuhun ra Jesús, i quisira ityi sata ra zava mahñu ñiyiví cuan, ta i tiñ ña yuzahma ra.

28 Vatyí i sica iñi ña: "Vazu zahma ñi ra cua tiñ, ta nduvehi."

29 Ta zuun ñi caa cuhva cuan i sicutia niñi ña. Ta i sito ña vatyí sa nduvaha ña sihin tundoho sa i tahan ña.

30 Ta yatyí xaan i sito ra Jesús sa i quita zuhva tundyee iñi sii ra. I nandyehe ra siconduu nu yucu ñiyiví cuan. Ta i catyi ra: ¿Yoo cuu sa tiñ zahme?

31 Ta i catyi ra i casi ra sihin ra: ¿Atu ña siton vatyí tuu xaan ñiyiví cuahan suhun? ¿Ta yozo caa cuu ndaca tuhun yoo sa tiñ zahmon?

32 Ta ra Jesús i nandyehe ra siconduu nu yucu ñiyiví cuan vatyí cua ndyehe ra yoo sa i tiñ sii ra.

33 Yuhu xaan ñaha cuan ndya cuhva nihi ñi ca ña vatyí sito ña ñaa sa cuu sa tahan ña. I quisira ña, ta i sicuiñi siti ña nuu ra Jesús. Ta i nacatyí ña sihin ra tandihí cuii.

34 Ta i catyi ra Jesús sihin ña: Zihi, i nduvohon vatyí i sino iñun sii. Cuahan vityí, ta ma caca ca iñun vatyí sa nduvohon sihin tundoho i tohon.

35 Ta zuun ñi caa cuhva sa cahan ra Jesús sihin ñaha cuan, ta i quisira cahan ñiyiví sihin ra cu tyiño vehe ñuhu. Ta catyi ñu: Sa sihi zehun. Ma zayanga con sii ra Maestro ya.

36 Ta i siñi ra Jesús sa cahan ñu. Ta i catyi ra sihin ra cu tyiño: Ma yuhun. Sino iñun.

37 Ta ñá saha ca ra Jesús sa cuhun cuaha xaan ñiyiví sihin ra. Ra Pedro ñi sihin ra Jacobo ta ra Juan, yañi ra Jacobo, cuahan sihin ra.

38 Ta sa cua saa ra Jesús vehe ra cu tyiño cuan, i siñi ra sa cuvaa xaan ñiyiví. Sacu ñu. Ta sacu saa ñu.

39 I quihvi ra sisi vehe, ta i catyi ra: ¿Ñacu cuvaa xaan ndo ta sacu

xaan ndo? Ñá sihi ña luhlu ya. Quixi ña.

⁴⁰ Zoco i sacu ndyaa ñiyivi sii ra. Tacuan ta i tava ra Jesús sii tandihí ñu. Ta i quihin ra zutu ña ta zihí ña luhlu cuan, ta ra i quisi sihin ra ndya nu candyaa ña luhlu cuan.

⁴¹ I tiñi ra ndaha ña, ta i cahan ra sihin zahan maa ra: Talita, cumi. Tuhun cuan cuñi si catyi si: Ñaha luhlu, catyi suhun vatyi nduviton. Nacuiñi ndyaa.

⁴² Zuun ñi caa cuhva cuan i nduvita ña luhlu sa iyo usi uu cuiya cuan. Ta ndaha nacaca ña. Ta iyo xaan i cuñi ñiyivi.

⁴³ Ñihi xaan i saha ra Jesús tyiño sii ñu sa ma nacatyi ñu nu sihin minoo ñiyivi. Ta i catyi ra vatyi cuhva ñu sa casi ña luhlu cuan.

6

Sinuhu ra Jesús ñuu ra, ñuu Nazaret

¹ I quita ra Jesús ñuu cuan, ta cuahan ra ndya ñuu ra. Ta cuahan ra i casi ra sihin ra.

² Ta tahan si quivi quitatu ñiyivi. Isahan ra vehe ñuhu, ta i zacuaha ra sii cuaha xaan ñiyivi. Ta iyo xaan i cuñi ñu, ta catyi ñu: ¿Ndyamaa i cutuhva ra ya tuhun ya? ¿Yozo caa i ñihi ra cuhva sa casi xaan iñi ra? ¿Yozo caa ñihi ra cuhva zavaha ra sa ndyityi?

³ ¿Atu yivi ra ya cuu ra cu carpintero, zehe ña María, ta yañi ra Jacobo, ra José, ra Judas ta ra Simón? Ta cuhva ra iyo ñu ihya sihin yo, ndihi ca. Tacuan i catyi ñu. Ta yucuan cuenda ñá tyaa ca ñu yahvi sii ra Jesús.

⁴ Ta i catyi ra Jesús sihin ñu: Tyaa ñiyivi inga ñuu yahvi sii minoo ra profeta, zoco ndya ñuu ra, ndya vehe ra, nu ndyaa ñiyivi sii ra, ña tyaa ñu yahvi sii ra. Tacuan i catyi ra Jesús.

⁵ Ta yucuan cuenda ñá zavaha ra Jesús cuaha xaan sa ndyityi tañi i zavaha ra inga ñuu. I tyizo ra

ndaha ra ziqui zuhva ñi ñiyivi cuhu, ta i zanduvaha ra sii ñu. Ta tacuan ñi.

⁶ Ta iyo xaan i cuñi ra vatyi ñá sino iñi ñu sii ra. Ta cuahan ra tandihí inga ñuu yucuan. Ta i zacuaha ra sii ñiyivi yucuan.

I tasi ra Jesús sii sa usi uu tahan ra i casi ra vatyi cua nacatyi ra Tuhun Ndyoo sihin ñiyivi

⁷ I cana ra Jesús sii sa usi uu tahan ra i casi ra vatyi cuñi ra sa cua tasi ra uu uu ra. Ta i saha ra cuhva sii ra, cuhva sa tava ra tatyi cuihna sii ñiyivi.

⁸ Ta i catyi ra sihin ra vatyi ñahñi maa cua cuizo ra sa casi ra ityi. Minoo tuhun ñi tutatu cuñaa ra. Ta ñahñi ca sa cuizo ra nu yono ta nu xita ta nu xuhun.

⁹ Ndisa ndahvi ñi cundyaa saha ra. Minoo tuhun ñi camisa quihí ra, ta ma cuu sa uu tahan.

¹⁰ Ta i catyi ra Jesús sihin ra: Tatú saha ñiyivi minoo vehe cundyaa ndo, yucuan ñi ndoo ndo ndya cua cuhun ndo inga ñuu.

¹¹ Tatú saa ndo minoo ñuu ta ña cuñi ñiyivi sii ndo ta ña tyizoho ñu sa cahan ndo, quita ndo ñuu cuan. Naquizi ndo saha ndo vatyi ma cuhun nu ñiyaca sii ñuu cuan sihin ndo. Tacuan ta cua coto ñiyivi vatyi i zavaha ñu sa ña vaha sihin ndo. Ñihi xaan cua coo tundoho sii ñiyivi ñuu Sodoma ta ñiyivi ñuu Gomorra quivi cua tasi tuñi ra Ndyoo sii ñiyivi, zoco ñihi xaan ca cua coo tundoho sii ñiyivi ña cuñi tiñi cuenda sii ndo. Tacuan i catyi ra Jesús.

¹² Ta ziqui cuahan ra, ta i zacoto ra sii ñiyivi vatyi nazandoo ñu cattyi ñu.

¹³ Ta i tava xaan ra tatyi cuihna sii ñiyivi. Ta i natyihí ra azetye sii cuaha xaan ñiyivi cuhu, ta i zanduvaha ra sii ñu.

Cuhva i sihi ra Juan, ra i zacoo ndutyta

14 Ta i sito ra rey Herodes, ra ndyaca ñaha yucuan, cuhva cuan vatyi i cahan tandihí ñiyivi tandihí sa i zavaha ra Jesú. Ta i sica iñi ra Herodes: Ra Juan, ra i zacoo ndutya cuan, cuu ra. I nandoto ra, ta yucuan cuenda ndyityi xaan ra.

15 Ta i catyi tucu inga ñiyivi: Ra Elías cuu ra. Ta inga ñiyivi i catyi: Minoo ra profeta cuu ra tañi ra profeta sicoo ta sa naha.

16 Ta sa siñi ra Herodes cuhva cuan, ta i catyi ra: Ra Juan cuu ra, ta i nandoto ra. Ta yuhvi i tave tyiño sii ra sahndya yuu zucu ra.

17 Vatyi zuun ñi ra Herodes i tava tyiño sii ñiyivi sa tyihi sii ra Juan vehe caa. Ta i sihñi ra sii ra sihin cadena sa cuenda ña Herodías. Ta ña Herodías cuan i cuu ñazihí ra Felipe yañi ra Herodes. Zoco i quihin ra Herodes sii ña sa cuu ñazihí ra.

18 Ta ra Juan i catyi ra sihin ra Herodes: Ña vaha cua cuhun ñazihí yañun. Catyi ra.

19 Xaan xaan i nduu ña Herodías sihin ra Juan. Ta cuñi ña sa cahní ña sii ra. Zoco ñá cuu

20 vatyi yuhu ra Herodes sii ra Juan vatyi sito ra vatyi ñiyivi vaha cuu ra Juan. Ta ñahñi cuatyii i zacuu ra. Ta yucuan cuenda ñá saha ra sa zavaha ña maña sii ra. Ta vazu ñá cutuñi iñi ra Herodes cuaha xaan sa cahan ra Juan, zoco i tahan iñi ra tyizoho ra sa cahan ra.

21 Ta ña Herodías i ñihí ña minoo cuhva quiví i nandusi cuiya ra Herodes. I saha ra sa cuxiñi tandihí ra ndyizo tyiño ra, sihin ra cu nuu sii zandaru, ta sihin tandihí ra nahnu nu cu si Galilea.

22 Ta i quihví ña yoco zehe ña Herodías nu siyucu ra. Ta i sata saha maa tuhun ñi ña. Ta tahan xaan iñi ra Herodes sihin tandihí ra yucu sihin ra. Ta i catyi ra Herodes sihin ña: Caca moo ñaa sa cuñun, ta cua cuhve sii si suun.

23 Ta i tyiñaha ra Ndyoo ta catyi ra sa ndisa cuii vatyi cua cuhva ra ñaa sa cua caca ña vazu zava cuii ñuu ndyaca ñaha ra.

24 I quita ña, ta i catyi ña sihin zihí ña: ¿Ñaa sa cua caque? Ta i catyi zihí ña: Cacon xiñi ra Juan, ra zacoo ndutya.

25 Ta ta sica cuii ñi i ndihví ña nu ndyaa ra Herodes, ta i catyi ña: Cuñi vityi vityi ñi xiñi ra Juan, ra i zacoo ndutya sihin minoo nu coho.

26 Ta i nducuihya xaan iñi ra Herodes, zoco sa tyiñaha ra Ndyoo, ta sa siñi tandihí ñiyivi. Ta yucuan cuenda ñá cuñi ra catyi ra sa ma cuhva ra sa sica ña.

27 Zuun ñi caa cuhva cuan i tasi ra minoo zandaru cua quihin xiñi ra Juan.

28 Sahan zandaru cuan vehe caa, ta i sahndya ra zucu ra Juan, ta i quihin ra xiñi ra. Ta i quisi ndyaca ra sii si sihin minoo nu coho, ta i saha ra sii si sii ña yoco cuan. Ta i saha maa ña sii si sii zihí ña.

29 Ta sa i sito ñiyivi ndyico sii ra Juan vatyi sa i sihí ra, ta i sinaquihin ñu sii coño ñuhu ra. Ta i tyihi ñu sii si ñuhu.

Cuhva i saha ra Jesú sa casi ohon mil rayi

30 Tacuan ta ziqui i titahan tucu ra i casi ra Jesú. Ta i nacatyi ra sihin ra tandihí sa i zavaha ra ta tandihí sa i zacuaha ra sii ñiyivi.

31 Ta i catyi ra Jesú sihin ra: Coho yo; cua quitatu yo nu yoñi maa ñiyivi iyo. Tacuan i catyi ra vatyi tuu xaan ñiyivi i quisi. Ta tuu xaan ñu ndyico sii ra. Ta nu sa casi ra xita ta ñá cuyatyi ca ra.

32 Tacuan ta cuahan ra Jesú sihin ra i casi ra sihin minoo barco ndya minoo nu yoñi maa ñiyivi iyo.

33 Zoco i ndyehe ñiyivi sa cuahan ra. Ta i nacoto ñu sii ra Jesú. Tandihí ñuu i quita ñu. Ta i sino ñu. Ta yatyi ca i saa ñu ta ziqui maa ra.

34 I quita ra Jesú barco cuan, ta i cundahvi xaan iñi ra sii ñu vatyi tañi mvee ticatyi sa yoñi sitoho i cuu ñu. Ta i quisaha zacuaha ra sii ñu cuaha xaan cuhva.

³⁵ Ta cuhva sa cua iñi i quisi ra i casi ra nu ndyaa ra, ta i catyi ra sihin ra: Sahiñi xaan. Ta yoñi ñiyivi iyo ihya.

³⁶ Catyun sihin ñiyivi nacuhun ñu tandihí ñuu, tandihí cuadria, cua zata ñu sa casi ñu vatyi ña ndyizo ñu sa casi ñu.

³⁷ Ta i nacahan ra Jesús, ta catyi ra: Cuhva maa ndo sa casi ñu. Ta i catyi ra sihin ra Jesús: Ma cuu zata maa ndi oco mil pan ta cuhva ndi casi ñiyivi.

³⁸ Tacuan ta i ndaca tuhun ra Jesús sii ra ta catyi ra: ¿Yozo tahan pan ndyizo ñiyivi? Cua ndyehe xihna ndo. Ta sa sito ra i catyi ra: Ohon tahan pan, ta uu tahan tyiyaca.

³⁹ Ta ziqui i catyi ra Jesús vatyi nacundyaa ñiyivi iin iin ityi ñu nu itya.

⁴⁰ Ta i sicundyyaa ñu iin iin ityi ñu. Ziendu ñu a uu xico usi ñu sa minoo minoo ityi ñu.

⁴¹ Tacuan ta i quihin ra Jesús sa ohon tahan pan cuan ta uu tahan tyiyaca cuan. Ta i nandyehe ndaa ra ityi andivi, ta i nacuhva ra tyahvi ndyoo sii ra Ndyoo Zutu ra. Ta i sahnu ndyihí ra pan cuan. Ta i saha ra sii si sii ra i casi ra vatyi cua zasa ra sii si sii ñiyivi. Ta tacuan tucu sa uu tahan tyiyaca cuan.

⁴² Tandihí ñiyivi cuan i sasi, ta i ndaha xaan ifi ñu.

⁴³ Ta i zacutu ñu usi uu tahan tyica sihin sa nandoo yuhu pan cuan ta tyiyaca cuan.

⁴⁴ Ohon mil sa maa rayii ñi ta ziin ñu zihí ta sa ndyihí sasi ñu, ndihí ca.

Cuhva i sica ra Jesús nu ndutya

⁴⁵ Tacuan ta ziqui i catyi ra Jesús sihin ra i casi ra vatyi nandihví ra barco vatyi cua yaha ra inga siyo miñi ndya ñuu Betsaida. Ta ra Jesús cua catyi ra sihin tandihí ñiyivi cuan vatyi cunuhu ñu ndya ñuu ñu.

⁴⁶ Ta sa natasi ra Jesús sii ñu ndya ñuu ñu, ta i sahan ra minoo yucu

vatyi cua cahan ra sihin ra Ndyoo Zutu ra, ra iyo andivi.

⁴⁷ Ta cuhva sa i cuaa i saa barco ñoho ra i casi ra zava mahñu miñi, ta ra Jesús i nandoo maa tuhun ñi ra.

⁴⁸ Ta ziqui i ndyehe ra Jesús vatyi yii xaan i zacaca ra barco vatyi ñihi xaan quiñi ndaha tatyi sii barco cuan. Ta ñaa ca cuan i tuhya ra Jesús nu yucu ra. Sica ra nu ndutya. Ta i cuñi ra Jesús yaha ra nu yucu ra.

⁴⁹ Ta i ndyehe ra vatyi sica ra Jesús nu ndutya, ta sica iñi ra vatyi minoo añima cuu ra. Ta i sacu saa ra

⁵⁰ vatyi tandihí ra i ndyehe sii ra. Ta i yuhu xaan ra. Ta i cahan ra Jesús sihin ra, ta catyi ra: Zandyee ndo iñi ndo. Yuhvi cui. Ma yuhu ndo.

⁵¹ Ta i quihví ra Jesús sisi barco, ta i sicutia tatyí. Ta iyo xaan i cuñi ra i casi ra Jesús

⁵² vatyi tañaha ca cutuñi vaha iñi ra vatyí cahnu xaan cuu cuhva iyo sii ra Jesús vazu sa ndyehe ra sa ndyityi i zavaha ra.

Cuhva i zanduvaha ra Jesús sii ñiyivi nu cu si Genesaret

⁵³ I yaha zava ra sihin ra i casi ra nu miñi cuan. Ta i saa ra nu cu si Genesaret. Ta i sihñi ra barco cuan yuhu miñi.

⁵⁴ I quita ra barco cuan, ta yatyí xaan i nacoto ñiyivi sii ra Jesús.

⁵⁵ Ta i sino xaan ñiyivi nacahnu ityi cuan, ta i quisaha quisi ndyaca ñu sii ñiyivi cuhu sihin nu sito ndya nu ndyaa ra Jesús.

⁵⁶ Ta tandihí nu cuahan ra vazu ñuu nahnu a ñuu ndyihí a sicuhú, i saqui ñiyivi sii ñu cuhu ityi. Ta i cahan ndyoo ñu sihin ra Jesús vatyi natiiñ ñiyivi cuhu sii ra vazu yuzahma ra. Ta tandihí ñu i tiñ sii ra, i nduvaha ñu.

¹ Ra maestro cuenda ley, ra i quisi ityi ñuu Jerusalén sihin ra fariseo, i tuhva ra nu nandyaa ra Jesús.

² Sa i ndyehe ra vatyi ra i casi ra Jesús ña tuhva ra nacatya vaha ndaha ra sa sasi ra xita tañi iyo costumbre ñiyivi hebreo. Ta yucuan cuenda i cahan ra ndya vaha ñi sii ra vatyi ñá zavaha ra costumbre iyo yucuan.

³ Ta ra fariseo sihin tandihí ñiyivi hebreo ña zaña ñu costumbre sa ndoo vaha xaan ndaha ñu ta casi ñu xita vatyi tacuan i zacuaha ñiyivi sahnu sii ñu.

⁴ Ta sa nasaas ñu sa sahan ñu nuyahvi, ma casi ñu tatu ma nandaha vaha xaan ñu. Ta iyo cuaha xaan ca costumbre sii ñu. Nacatya ñu tasa, ta quizi, ta caa sa tuhva ñu cutyiño ta cuhva ndya sito ñu.

⁵ Tacuan ta i ndaca tuhun ra fariseo ta ra maestro cuenda ley ta catyi ra: ¿Ñaa cuenda ña zavaha ñiyivi ndyico suun costumbre sa i zavaha ñiyivi sahnu vatyi ña nacatya vaha ñu ndaha ñu ta casi ñu?

⁶ Ta i catyi ra Jesús sihin ra: Vaha xaan i cahan ra Isaías cuhva iyo maa ndo vatyi zaha ndo tuhun vatyi vaha xaan ndo, zoco ña ndisa. Ta tacuan i tyaa ra Isaías ta sa nahá. I catyi ra vatyi i catyi maa ra Ndyoo tyehen:

Ihya ñiyivi zacahnu ñu sii, sihin yuhu ñu.

Zoco ña zacahnu ñu sii, sa ndisa.

⁷ Zacuaha ñu sii ñiyivi maa maa costumbre ñiyivi ñi.

Ta ña zavaha ñu cuhva catyi Tuhun Ndyoo sa ndisa.

⁸ Ta i catyi tucu ra Jesús sihin ra: Maa ndo i zandoo ley ra Ndyoo vatyi cua cundyico ndo costumbre ñiyivi, tañi sa nacatya xaan ndo quizi ndo ta tasa ndo ta inga cuhva sa tacuan.

⁹ Tyaa siyo xaan ndo sa catyi Tuhun Ndyoo vatyi cuñi ndo zacahnu ndo costumbre ñiyivi sahnu.

¹⁰ Ihya cuu cuhva i tyaa ra Moisés: "Zacahnu ndo sii zutu ndo ta sii zihí ndo." Ta "Yoo ra cahan sa quiñi sii zihí ra a sii zutu ra, nacahñi ñiyivi sii ra."

¹¹ Zoco maa ndo catyi vatyi cuu catyi minoo ñiyivi sihin zutu ra a sihin zihí ra: "Ma cuu tyindyei suun vatyi tandihí ndaha tyiñe corbán cuu si." (Tuhun corbán cuan cuñi si catyi si vatyi sii ra Ndyoo cuu.)

¹² Tatú tacuan cahan minoo ñiyivi, maa ndo catyi ndo vatyi ma cuu tyindyei ca ra sii zutu ra a sii zihí ra.

¹³ Tacuan cuu cuhva zanduluhlu ndo tuhun cahan ra Ndyoo vatyi cuñi ndo zanducahnu ndo costumbre ndo. Ta cuaha xaan ca cuhva sa tacuan ndyicuu ndo.

¹⁴ Ta i cana tucu ra Jesús sii ñiyivi ta catyi ra sihin ñu: Tyizoho tandihí ndo, ta tyituñi vaha iñi ndo.

¹⁵ Yivi sa sasi ñiyivi ta yivi sa sihi ñu cuu sa zatiñi añima ñu. Zoco sa quiñi sica iñi ñu cuu sa zatiñi añima ñu.

¹⁶ Tatú siñi ndo, cuiñi ndo.

¹⁷ Ta sa zandoo ra Jesús sii ñiyivi cuan, ta i quihví ra minoo vehe. Ta ra i casi ra, i ndaca tuhun ra sii ra: ¿Ñaa cuñi si catyi si cuhva cuan?

¹⁸ Ta i catyi ra Jesús sihin ra: ¿Atu ña siñi tucu maa ndo vatyi yivi sa sasi ñiyivi ta yivi sa sihi ñu cuu sa zatiñi añima ñu?

¹⁹ Vatyi yivi añima ñu quihví si. Quihví si sisi siti cahnu ñu ta ziqui quita si. Tacuan i catyi ra vatyi ñiahñi sa ica iyo sa ma cuu casi ñiyivi. Cuu casi ñiyivi ñaa sa cuñi maa ñu. Ta yivi cuatyi cuu si.

²⁰ Ta i catyi tucu ra: Sa quiñi sica iñi ñiyivi, yucuan cuu sa zatiñi añima ñu. Ta yucuan cuu cuhva cua coo cuatyi ñu.

²¹ Vatyi añima ñiyivi quita tandihí sa sica iñi ñu, sa quiñi zavaha ñu, sa nama minoo rayii ñazihí inga ra, a sa coo cuaha xaan ñaha ra, a sa cahñi ra sii inga ñiyivi,

²² sa zuhu yo, sa cucuihna iñi yo sa cuenda ndaha tyiño inga ñiyivi, tandihí sa quiñi zavaha yo, sa zandavi ñaha yo, sa cuxi xaan iyo yo, sa cuihna iñi yo, sa vatya yo, sa cahnu xaan zaha yo sii yo ta sa ña zavaha yo sa vaha.

²³ Tandihí cuii cuhva quiñi ya, quita si añima ñiyivi, ta zativi si sii ñuu.

Cuhva i sino iñi minoo ñaha inga ñuu sii ra Jesús

²⁴ I quita ra Jesús yucuan, ta cuahan ra ndya ñuu Tiro ta ñuu Sidón. I quihví ra minoo vehe vatyi cuñi ra sa ma coto ñiyivi sa i saa ra. Zoco ñá cuu.

²⁵ Yatyi xaan i sito zihí minoo ñaha luhlu sa ñoho tatyi cuihna sii. Ta i quisí ña nu ndyaa ra Jesús. Ta i sicuiñi siti ña saha ra.

²⁶ Ta ñaha cuan i cacu ña ñuu Sirofenicia. Ta yívi ñiyivi hebreo cuu ña. Ta i sica ña tumañi iñi sii ra Jesús sa tava ra tatyi cuihna sa ñoho sii zehe ña.

²⁷ Zoco i cahan ra Jesús minoo cuhva sihin ña, ta i catyi ra: Natyindyee xihne sii ñiyivi ñui vatyi ña vaha quihin mi sa cua casi sa ndyihí ta cuhve casi ina sii si.

²⁸ Ta i catyi maa ña: Ndisa, tata, zoco tañi ina lee cui vatyi cua casi yazu yuxita zanacoyo sa ndyihí. Yucuan cuenda tyindyeun sii, zuhva.

²⁹ Tacuan ta i catyi ra Jesús: Vaha cohon. Sa cuu cuhun. Sa quita tatyi cuihna sii zehun.

³⁰ Ta sa nasaa ña vehe ña, ta i ndyehé ña sii zehe ña nu sito, ta sa quita tatyi cuihna sii ña.

Zanduvahara Jesús sii razoho ta ñehe ra

³¹ I quita ra Jesús ñuu Tiro ta cuahan ra ndya Sidón ta ndya tandihí ñuu ndyihí nu cu si Decápolis. Ta i saa ra yumiñi Galilea.

³² Ta i quisí ndyaca ñiyivi sii minoo ra zoho ta ñehe ra. Ta i sica ñu tumañi iñi sa cua tyizo ra Jesús ndaha ra sii ra.

³³ Ta i quihin ra Jesús sii ra, ta i tuhva ra sihin ra ndya zava. I zanandoo noo ra sii ñiyivi. Ta i tyihi ra Jesús nu ndaha ra nduu siyo zoho ra zoho cuan. Ta ziqui i tyaa ra Jesús zii ra nu ndaha ra, ta i tñin ra yaa ra ñiehe cuan.

³⁴ Ta i nandyehe ndaa ra Jesús ityi ziqui, ta i sinoo ra, ta i catyi ra sihin tuhun maa ra: ¡Efata! Tuhun cuan, cuñi si catyi si: ¡Nanuña!

³⁵ Ta zuun ñi caa cuhva cuan i nuña zoho ra. Ta ndaha nacahan vaha ra.

³⁶ Ta i ndisi tucu ra Jesús nu yucu ñiyivi. Ta i catyi ra sihin ñu vatyi ma nacatyi ñu nu sihin minoo ñiyivi. Zoco sa ñihí ca catyi ra Jesús sihin ñu, cuaha ca nacatyi ñu sihin ñiyivi.

³⁷ Ta iyo xaan i cuñi ñiyivi, ta i catyi ñu: Tandihí cuii sa vaha zavaha ra Jesús cuhva ndya nacuiñi ra zoho, ta nacahan ra ñehe.

8

Cuhva i saha ra Jesús sa casi cumi mil rayi

¹ Ta quivi cuan i tuhva cuaha xaan ñiyivi. Ta ñahñi maa sa casi ñu. Ta i catyi ra Jesús sihin ra i casi ra:

² Cundahví xaan iñi sii ñiyivi ya vatyi sa iyo uñi quivi sa yucu ñu sihin, ta ñahñi maa sa casi ñu.

³ Tatu natasi sii ñu cunuhi ñu vehe ñu ta ma casi ñu, coto cuañaa ñu ityi cuhun ñu vatyi sica xaan i quisí ñu.

⁴ Ta i catyi ra i casi ra Jesús sihin ra: ¿Ndyá ityi cua quihin yo sa casi ñu ya sicuhu ya? Ta yoñi ñiyivi iyo ihya.

⁵ Ta i ndaca tuhun ra Jesús sii ra: ¿Yozo tahan pan ndyizo ndo? Ta i catyi ra: Usa tahan.

⁶ Tacuan ta i catyi ra Jesús vatyi nacundyaa ñiyivi cuan nu ñuhu. Ta i quihin ra sa usa tahan pan cuan, ta i saha ra tyahví ndyoo sii ra Ndyoo. Ta i sahnu ndyihí ra pan

cuan. Ta i saha ra sii ra i casi ra. Ta ra yucuan saha sii ñiyivi.

⁷ Ta ndyizo ñiyivi cuan zuhva tyiyaca ndyihhi. Ta i saha tucu ra Jesùs tyahvi ndyoo sii ra Ndyoo sa cuenda ti. Ta i saha ra sii ra i casi ra. Ta i zasa ra sii si sii ñiyivi cuan.

⁸ Sasi ñu, ta i ndaha xaan iñi ñu, ta ziquí i zacutu ñu usa tahan tyica sihin sa nandoo cuan.

⁹ Ta sa i sasi tañi cumi mil ñiyivi ta ziquí i natasi ra Jesùs sii ñu ndya vehe ñu.

¹⁰ Ta i ndihvi ra barco sihin ra i casi ra, ta cuahan ra ndya nu cu si Dalmanuta.

Sica ra fariseo minoo sa ndyityi sii ra Jesùs

¹¹ Tacuan ta ziquí i quisí ra fariseo, ta i quisaha natuhun tahan ra sihin ra Jesùs. Cuñi ra ndyehe ra minoo sa ndyityi tañi zavaha ra Ndyoo vatyi cuñi ra coto ra atu ndisa i tasi ra Ndyoo sii ra Jesùs.

¹² Ta ra Jesùs i sinoo xaan ra. Ta i catyi ra: ¿Ñacu sica xaan ñiyivi sa ndyehe ñu sa ndyityi? Catyi vatyi ma zavehi minoo sa ndyityi sa ndyehe ñi maa ñu.

¹³ Ta i zandoo ra Jesùs sii ra fariseo. Ta i nandihvi tucu ra barco, ta cuahan ra inga siyo miñi cuan.

Tuhun cahan ra fariseo cuu tañi yusa i siya

¹⁴ I naa iñi ra i casi ra Jesùs sa casi ra ta sa cuahan ra sihin barco cuan. Minoo ñi pan ndyizo ra.

¹⁵ Ta i catyi ra Jesùs sihin ra: Ndyehe ndo, zacuenda ndo sii ndo sihin yusa i siya ra fariseo ta ra Herodes.

¹⁶ Ta i natuhun tahan ra i casi ra Jesùs, ta i catyi ra: Cahan ra tacuan vatyi ñahñi pan ndyizo yo. Tacuan i sica iñi ra cuan vatyi ñá cutuñi iñi ra tuhun i cahan ra Jesùs sa cuenda yusa i siya cuan. Ñá cutuñi iñi ra vatyi cahan ra Jesùs minoo cuhva vatyi cua zacuenda ra sii ra sihin cuhva zacuaha ra fariseo ta ra Herodes.

¹⁷ I sito ra Jesùs sa natuhun tahan ra, ta i catyi ra: ¿Ñacu sica xaan iñi ndo sa ña ndyizo ndo pan? ¿Atu ña cutuñi iñi ndo? ¿Atu tañaha ca ñihi ndo cuhva?

¹⁸ ¿Atu ña ndyehe ndo sihin siti nuu ndo, ta ña siñi ndo sihin zoho ndo? ¿Atu ña nacohon iñi ndo?

¹⁹ Quiví i sehi sa ohon tahan pan i sasi ohon mil rayíi, ¿ta yozo tahan tyica si i naquihin ndo? Ta i catyi ra: Usi uu tahan.

²⁰ Ta i catyi ra Jesùs: Ta sa i sehi sa usa tahan pan i sasi cumi mil ñiyivi, ¿yozo tahan tyica i situ i naquihin ndo? Ta i catyi ra: Usa tahan.

²¹ Ta i catyi ra Jesùs: ¿Ñacu ña cutuñi iñi ndo?

Zanduvaha ra Jesùs sii minoo ra cuua ñuu Betsaida

²² I saa ra Jesùs ñuu Betsaida. Ta i sindyaca ñiyivi sii minoo ra cuua nu ndyaa ra. Ta i sica xaan ñu tumañi iñi sa tyizo ra ndaha ra sii ra cuua cuan.

²³ Ta i tiñi ra Jesùs ndaha ra, ta i sahan ra sihin ra ndya yuñuu. Ta i tyaa ra Jesùs ziñi ra nuu ra cuua cuan, ta i tyizo ra ndaha ra ziquí ra. Ta i ndaca tuhun ra sii ra tatu sa cuu ndyehe ra zuhva.

²⁴ Ta i ndyehe ra cuua cuan, ta i catyi ra: Ndyehi ñiyivi. Tañi caa yutu caa ñu. Ta sica ñu.

²⁵ Ta i tyizo tucu ra Jesùs inga saha ndaha ra nuu ra, ta i nduvaha ra. Sa nandyehe vaha ra tandihí.

²⁶ Tacuan ta i natasi ra Jesùs sii ra ndya vehe ra, ta i catyi ra: Ma quihvun sisi ñuu. Ta ma nacatyun sihin ñiyivi.

Nacatyi ra Pedro vatyi ra Jesùs cuu ra cua zacacu sii ñiyivi

²⁷ Tacuan ta cuahan ra Jesùs sihin ra i casi ra tandihí ñuu ndyihhi nu cu si Cesarea de Filipo. Ta ityi cuahan ra i ndaca tuhun ra Jesùs sii ra ta catyi ra: ¿Yoo ra cui catyi ñiyivi?

²⁸ Ta i catyi ra i casi ra: Iyo ñiyivi catyi vatyi minoo ra i nandoto cuun tañi ra Juan, ra i zacoo ndutya a minoo ra profeta. Ta catyi inga ñiyivi vatyi ra Elías cuun.

²⁹ Ta i ndaca tuhun ra Jesús sii ra: Ta maa ndo, ¿yoo ra cui catyi maa ndo? Ta i catyi ra Pedro: Yoho cuu ra Cristo, ra i tasi ra Ndyoo vatyi cua zacacun sii ndi.

³⁰ Ta i catyi ra Jesús sihin ra vatyi ma nacatyri sihin ñiyivi.

Zacoto ra Jesús cuhva cua cuu ra

³¹ Ta i quisaha zacuaha ra Jesús sii ra i casi ra vatyi cua ndyehe xaan ra i quisi ndya gloria tundoho. Ta ra mandoñi, ta ra zutu nahnu, ta ra maestro cuenda ley cua cuxaan xaan ra sihin ra. Ta cua cahñi ra sii ra. Ta sa cu uñi quivi, cua nandoto tucu ra.

³² Ta tandihí cuhva cuan casi xaan i nacatyri ra Jesús sihin ra. Tacuan ta i taya ra Pedro sii ra ndya zava, ta ñihi xaan i cahan ra Pedro sihin ra Jesús, ta catyi ra: Ña vaha cua tahan si suun cuhva sa cohon ña.

³³ Ta i nandyehe ra Jesús nu yugu inga ra i casi ra. Ta xaan xaan i cahan ra sihin ra Pedro, ta catyi ra: Ma cahan con tacuan vatyi cohon tañi cahán cuihna. Ña sica iñun cuhva sica iñi ra Ndyoo. Sica iñun cuhva sica iñi ñiyivi.

³⁴ Tacuan ta i cana ra Jesús sii ra i casi ra ta sii inga ñiyivi. Ta i catyi ra: Tatu iyo ra cuñi ra cundyico ra sii, nazama ra cuhva iyo ra. Ta ma zacahnu xaan ra sii ra. Ta nandyehe ra tundoho sa cuenda mi. Ta nazavaha ra cuhva zavehi.

³⁵ Tatu ñia cuñi ñiyivi sa cuu ñu sa cuenda Tuhun Ndyoo, cua cuu ñu, ta cua cuhun ñu andyaya. Ta ma cundito ñu sihin ra Ndyoo. Zoco tatu cua cuu ñiyivi sa cuenda mi a sa cuenda Tuhun Ndyoo, cua cundito ñu sihin ra Ndyoo.

³⁶ ¿Ñaa sa ñihi ñiyivi sa zahacanaa ñu tandihí sa iyo ñuu ñiyivi ta quiivi cua cuu ñu ndaha cua naa ñi ñu?

³⁷ ¿Ta yozo caa cuu tyiyahvi ñiyivi ta ñihi tahvi añima ñu?

³⁸ Tatu iyo ra cahan nuu sa cuenda mi a sa cuenda Tuhun Ndyoo nuu ñiyivi iyo cuatyri ya, tacuan tucu cua cucahan nui sii ra. Vatyri yuhvi, ra i quisi ndya gloria cui, ta cua quisi tuqui sihin ángel. Ta cua ndyehe ñiyivi vatyi cahnu xaan cuu Zuti.

9

¹ Ndisa cuii sa quehin sihin ndo vatyi iyo ñu yulu ihya ma cuu ñu ndya cua ndyehe ñu cuhva cundyaca ñaha ra Ndyoo vatyi iyo xaan cuhva sii ra Ndyoo.

Cuhva i zama ra Ndyoo cuhva caa ra Jesús minoo saha

² Sa yaha iñu quivi ta cuahan ra Jesús sihin ra Pedro, ta ra Jacobo ta ra Juan ndya minoo yulu zucu xaan. Ta yucuan i zama cuhva caa ra Jesús nu yulu ra sihin ra.

³ Zahma ra xiño xaan i nduu si ta cuisi xaan si tañi nieve. Yoñi numino ñiyivi cuu zanducuisi zahma tañi i nducuisi zahma ra Jesús.

⁴ Ta i ndyehe ra i casi ra Jesús sii ra Elías ta ra Moisés. Ra zacuaha Tuhun Ndyoo ta sa naha cuu nduu tahan ra cuan. I quisi ra ndya gloria. Ta i natuhun ra sihin ra Jesús yucuan.

⁵ Ta i catyi ra Pedro sihin ra Jesús: Maestro, vaha xaan yulu yo ihya. Nazavaha ndi uñi tahan vehe tyiyahva; minoo cuenda moo, ta minoo cuenda ra Moisés, ta inga si cuenda ra Elías.

⁶ Yuhu xaan tandihí uñi tahan ra i casi ra Jesús. Ta yucuan cuenda i cahan ra Pedro tacuan vatyi ña sito ra ñaa sa cahan ra.

⁷ Ta ziqui i quisi minoo vico. Ta ndaha tyazi si sii tandihí ra. Ta i cahan minoo sa cahan sisi vico cuan. Ta catyi si: Ra ihya cuu zehi. Cuñi xein sii ra. Tyaa ndo yahvi sa cahan ra.

⁸ Ta zuun ñi caa cuhva cuan i nandyehe ra i casi ra Jesús siconduu nu yucu ra. Ta ña ndyehe ca ra sii ra Moisés ta nu ra Elias. Maa tuhun ñi ca ra Jesús nandyaa sihin ra.

⁹ Ta cuhva sa cua noo ra yucu cuan i catyi ra Jesús sihin ra vatyi ma nacatyi ra nu sihin minoo ñiyivi sa ndyehe ra ndya cua saa quiivi cua nandoto tucu ra i quisi ndya gloria sisi sa i sihi ra.

¹⁰ Ta i sicumi xehe ra tuhun cuan, zoco i nducu tuhun tahan xaan ra: ¿Yozo caa cuu nandoto ñiyivi tatu sa i sihi ñu?

¹¹ Ta i ndaca tuhun ra sii ra Jesús ta catyi ra: ¿Nacu catyi ra maestro cuenda ley vatyi xihna ca ra Elías cua quisi ta ziqui ra Cristo?

¹² Ta i catyi ra Jesús: Ndisa cuii, xihna ca ra Elías i quisi, ta i zanduvaha ra tandihí tyiño vatyi cua quisi ra Cristo. Ta ¿ñaa catyi Tuhun Ndyoo sa cuenda ra i quisi ndya gloria? Catyi si vatyi cua ndyehe xaan ra tundoho ta ma tyaa ñiyivi yahvi sii ra.

¹³ Yuhvi catyi sihin ndo vatyi ra Elías sa i quisi ra, ta i zavaha ñu tandihí sa cuñi maa ñu sihin ra. Tañi catyi Tuhun Ndyoo, ta tacuan i cuu si.

Izanduvaha ra Jesús sii minoo ra luhlu sa ñoho tatyi cuihna

¹⁴ Ta cuee ca i ndisi tucu ra Jesús nu yucu zuhva ca ra i casi ra. Nandyaa ra cuan zava mahñu. Ta yucu cuaha xaan ñiyivi siconduu cuii ñu sii ra. Ta natuhun tahan ra maestro cuenda ley sihin ra.

¹⁵ Ta sa i nandyehe ñiyivi sii ra Jesús, iyo xaan i cuñi ñu. Ta i sino xaan ñu ta i zatahan ñu sii ra.

¹⁶ Tacuan ta i ndaca tuhun ra Jesús: ¿Ñaa tuhun natuhun xaan ndo?

¹⁷ Ta i nacahan minoo ra nandyaa yucuan. Ta i catyi ra: Maestro, vasi ndyaque minoo zehi. Ñoho tatyi cuihna sii ra. Ta ña saha si cahan ra.

¹⁸ Ta ndya vaha cuii ñi cuhva nduxaan si sii ra. Ta zanduva si sii ra nu ñuhu. Ta saa tiñi yuhu ra. Ta sasi quihñi noho ra. Ta ndaha ndurutu ra. Ta yucuan cuenda cuehe xaan ra. Ta sa catyi vatyi taya ra i casun sii si. Zoco ñá cuu sii ra.

¹⁹ Ta i catyi ra Jesús sihin tandihí ñiyivi: Ndoho cuu ñiyivi ña sino iñi. ¿Yozo tahan ca quiivi cua ndoi sihin ndo ta ziqui cua sino iñi ndo? Sa naха xaan i cundyee iñi sihin ndo. Ta ndyaca ndo sii ra luhlu ña.

²⁰ I sindyaca ra sii ra, ta i ndyehe tatyi cuihna cuan sii ra Jesús. Ta i nduxaan si sii ra luhlu cuan. Ta i nduva ra nu ñuhu. Sicotuu ra. Zañihi ra. Ta saa tiñi yuhu ra.

²¹ I ndaca tuhun ra Jesús sii zutu ra luhlu cuan: ¿Sa yozo tahan cuiya sa tahan ra tacuan? Ta i catyi zutu ra: Ndyta luhlu ra.

²² Ta cuaha xaan saha cañi ñuhu si sii ra nu ñuhu a si ndutya vatyi cuñi si cahñi si sii ra. Tatu cuu zanduvohon sii ra cundahvi iñun sii ndi, ta tyindyeun sii ndi.

²³ Ta i catyi ra Jesús sihin ra: Cuu zanduvehi sii ra tatu cuu sino iñun vatyi cuu sii vatyi zavaha ra Ndyoo ñaa sa sica ñiyivi sino iñi sii ra.

²⁴ Ta i cana saa zutu ra luhlu cuan ta catyi ra: ¡Sino iñi, ta tyindyeun sii, cuhva sino ca iñi!

²⁵ I ndyehe ra Jesús vatyi cuaha xaan ñiyivi cua titahan, ta xaan xaan i cahan ra Jesús sihin tatyi cuihna cuan, ta catyi ra: Yoho cuihna zañehe sii ñiyivi, cuihna zazoho sii ñiyivi, yuhvi catyi vatyi quiton. Zañon sii ra luhlu ya. Ta ma ndihvi con sii ra.

²⁶ I sacu saa tatyi cuihna cuan, ta i zacuñaas i sii ra luhlu cuan, ta i quita si. Tañi ra sihi nduu ra. Ta i catyi cuaha xaan ñiyivi vatyi sa sihi ra.

²⁷ Zoco i tñin ra Jesús ndaha ra, ta i cañihi ra sii ra, ta i nduvita ra.

²⁸ Ta ziqui i quihvra Jesús minoo vehe, ta i ndaca tuhun xehe ra i casi

ra sii ra: ¿Ñacu ñá cuu tava nduhvi taty i cuihna cuan?

²⁹ Ta i catyi ra Jesús sihin ra: Cuu zacuu ndo tatu coo ndyitya ndo ta cahan ndo sihin ra Ndyoo.

I zacoto tucu ra Jesús inga saha cuhva cua cuu ra

³⁰ Ta i quita ra yucuan, ta i yaha ra nu cu si Galilea. Ta ñá cuñi ra Jesús sa coto numinoo ñiyivi nu cuahan ra.

³¹ I zacuaha ra sii ra i casi ra, ta catyi ra sihin ra: Cua xico minoo ra sii ii, ra i quisi ndya gloria. Ta cua tiñ ñiyivi sii. Ta cua cahñi ñu sii. Ta sa cu uñi quiñi cua nandoto tuqui.

³² Zoco ñá nacoto ra sa cahan ra Jesús, ta ñá ndaca tuhun ra vaty i cahan nuu ra.

¿Yoo ra cuu ra ñiñi ca?

³³ Tacuan ta ziñi i saa ra Jesús nuu Capernaum. Ta sa ñoho ra minoo vehe, ta i ndaca tuhun ra Jesús sii ra i casi ra ta catyi ra: ¿Ñaa tuhun natuhun xaan ndo ity i quisi yo?

³⁴ Zoco taxi cuii ñi i nduu ra. Ta i cucahan nuu ra vaty i natuhun tahan ra ity i quisi ra yoo ra cuu ra ñiñi ca sii ra.

³⁵ Ta i sicundyaa ra Jesús, ta i cana ra sii tandih i sa usi uu tahan ra i casi ra, ta i catyi ra: Tatu iyo minoo ra cuñi ra cuu ra ra ñiñi ca, vaha ca ma zacahnu ra sii ra. Natyndyee ra sii inga ñiyivi.

³⁶ Ta ziñi i quihin ra Jesús sii minoo ra luhlu, ta i tyihi ra sii ra mahñu ñiyivi, ta i sicunumi ra sii ra, ta catyi ra:

³⁷ Tatu zavaha ñiyivi sa vaha sihin minoo ra luhlu sa cuenda mi, tañi sa zavaha ñu sa vaha sihin mi cuu si. Ta tatu zavaha ñiyivi sa vaha sihin mi, zavaha ñu sa vaha sihin Zuti.

Tatu ña cahan ñiyivi ndya vaha ñi sii yo, tyindyee ñu sii yo cuhva cuan

³⁸ Ta ziñi i catyi ra Juan: Maestro, i ndyehe ndi minoo ra tava ra taty i cuihna sihin ziv i moo, zoco

yiv i ra tahan ndi cuu ra. Ta i catyi maa ndi vaty i ma zavaha ra sa tacuan.

³⁹ Ta i catyi ra Jesús: Ña vaha sa ñá saha ndo. Vaha tatu cua cutyiño ra ziv i; ma cuu tucu cahan ra sa ndya vaha ñi ziqui.

⁴⁰ Vaty i tatu ma cahan ñiyivi ndya vaha ñi ziqui yo, tyindyee ñu sii yo.

⁴¹ Tatu cuhva ñiyivi ndutya cohon ndo vaty i tasi ra Ndyoo sii, ta ra i casi cuu maa ndo, catyi vaty i cua tyiyahvi Ndyoo sii ñu.

⁴² Yoo ra cua zañaha sii minoo ra luhlu tañi ra luhlu ya cuhva zavaha ra sa ña vaha ta ma cundyico ca ra sii, vaha ca tatu sa i sihñi ñiyivi zucu ra cuan sihin minoo yuu yozo vee xaan ta zavita ñu sii ra sisi tyañuhu yaty i ca.

⁴³ Tatu cuñun zavohon sa ña vaha sihin ndohon, cahndya ndaxun sii si vaty i vaha ca cuhun gloria sihin minoo ñi ndohon ta ma cuhun sihin nduu tahan ndohon andyaya sisi ñuhu sa ma ndahva

⁴⁴ nu ña sihi tindacu sasi sii ñiyivi ta nu cayu ñuhu tandih i cuii tyiemvu.

⁴⁵ Tatu cuñun zavohon sa ña vaha sihin sohon, cahndya ndaxi tucun sii si cuan vaty i vaha ca cuhun gloria sihin ii siyo ñi sohon, ta ma cuhun sihin nduu tahan sohon andyaya sisi ñuhu sa ma ndahva

⁴⁶ nu ña sihi tindacu sasi sii ñiyivi, ta nu cayu ñuhu tandih i cuii tyiemvu.

⁴⁷ Ta tatu cuñun ndyehun sa ña vaha sihin siti nuun, tavon sii si vaty i vaha ca cua quihvun sihin minoo ñi siti nuun nu ndyaca ñaha ra Ndyoo, ta ma cuhun sihin nduu tahan siti nuun andyaya

⁴⁸ nu ña sihi tindacu sasi sii ñiyivi, ta nu cayu ñuhu tandih i tyiemvu.

⁴⁹ Zoco ñiyivi ndyico sii, cua nduvaha añima ñu tañi ñi vaha vaty i cua tahan ñu tundoho ihy a ñuu ñiyivi sa cuenda mi. Ta tundoho cuan, tañi ñuhu cuu si vaty i sito

xaan ñu tundoho. (Ta tacuan cua nduvaha añima ñu.)

⁵⁰ Vaha xaan cuu ñii, zoco ¿yozo caa cutyiño ñiyivi sii si tatu ña uhva ca si? Tañi ñii vaha cua cuu maa ndo tatu vaha cua zavaha ndo sihin inga ñiyivi.

10

Cuhva i zacuahara Jesús vatyi ñava cua zandoo minoo ra ñazihí ra

¹ I quita ra Jesús ñuu Capernaum, ta cuahan ra nu cu si Judea inga siyo yuu Jordán. Yucuan, cuaha xaan ñiyivi i titahan nu ndyaa ra, ta inga saha i zacuahara sii ñu tañi cuhva sa tuhva ra.

² Ta ziqui i quisi ra fariseo nu ndyaa ra Jesús, ta i ndaca tuhun ra sii ra Jesús ta catyi ra: ¿Atu iyo ley sa zandoo minoo rayii sii ñazihí ra? Tacuan cahan ra vatyi cuñi ra fariseo tyaa ra cuatyi sata ra Jesús.

³ Ta i ndaca tuhun ra Jesús sii ra: ¿Ñaa sa i catyi ra Moisés?

⁴ Ta i catyi ra fariseo: Saha ra Moisés cuhva sa sino minoo tutu, ta ziqui cuu zandoo ra sii ña sihin ley.

⁵ Ta i catyi ra Jesús sihin ra: I saha ra Moisés ley cuan sii ndo vatyi ñihi xaan iñindo.

⁶ Zoco sa xihna ñi i zavaha ra Ndyoo tandihí sa iyo ñuu ñiyivi, ta i zavaha ra minoo rayii ta minoo ñaha.

⁷ Ta yucuan cuenda cua zandoo rayii sii zutu ra ta sii zihí ra, ta cua cu-iñi ra sihin ñazihí ra.

⁸ Sa nduu tahan ñu cua nduu ñu tañi minoo ñi. Cuhva sa ndyehe ra Ndyoo sii ñu, minoo ñi ñiyivi cuu ñu.

⁹ Cuu, ña vaha zandoo rayii sii ñazihí ra. Nu maa ña ta ma zandoo ña sii maa ra vatyi ra Ndyoo i zandu-iñi ra sii ñu.

¹⁰ Ta sisi vehe i ndaca tuhun ra i casi ra Jesús sii ra ñaa tuhun cuu si cuan.

¹¹ Ta i catyi ra Jesús sihin ra: Ra zandoo sii ñazihí ra ta quihin ra

inga ñaha, yucuan cuu ra iyo cuateyi vatyi ña ndoo zavaha ra sihin ñazihí ra.

¹² Tacuan tucu ñaha zandoo sii yii ña ta cuhun ña sihin inga rayii, iyo cuatyi ña vatyi ña ndoo zavaha ña.

Cuhva i zoco ñaha ra Jesús sii sadyihu

¹³ Tacuan ta ziqui i quisi ndyaca ñiyivi sii sa ndyihu nu ndyaa ra Jesús vatyi cua tyizo ra ndaha ra sii si ta cahan ra sihin ra Ndyoo. Ta i catyi ra i casi ra Jesús sihin ñiyivi cuan vatyi ma quisi ñu.

¹⁴ Ta i ndyehe ra Jesús, ta i cuxaan ra ta catyi ra: Ma cahan ndo. Naquisi ndyaca maa ñu sii sa ndyihu sii, vatyi tatu cuñi ñiyivi sa cua cundyaca ñaha ra Ndyoo sii ñu, cua sino iñi ñu sii, tañi sino iñi sa ndyihu ya.

¹⁵ Ndisa cuii sa quehin vatyi ñiyivi ña sino iñi tañi sino iñi sa ndyihu ya, ña saha ñu sa cundyaca ñaha ra Ndyoo sii ñu.

¹⁶ Ta i quihin ra sii sa ndyihu, ta i tyizo ra ndaha ra sii minoo minoo si. Ta i catyi ra: Nacuhva ra Ndyoo sa vaha sii ndo.

Cuhva i cahan minoo ra yoco, cuca sihin ra Jesús

¹⁷ Ta sa quita ra Jesús, ta i quisi minoo ra. Sino xaan ra, ta i sicuiñi siti ra nuu ra Jesús. Ta i ndaca tuhun ra sii ra: Maestro, vaha xaan ra cuun. ¿Ñaa sa cua zavehi, ta ñihi tahví añime gloria?

¹⁸ Ta i catyi ra Jesús sihin ra: ¿Ñacu catyun vatyi vaha xaan ra cui? Minoo tuhun ñi ra vaha iyo, ra Ndyoo.

¹⁹ Sa siton tandihí ley ra Ndyoo: Ma cuhun minoo ñaha tatu yivi ñazihun cuu. Ma cahñun ñiyivi. Ma cohon cuendu sata ñiyivi. Ma zandavi ñohon sii ñiyivi. Tyoon yahvi sii zutun ta sii zihun.

²⁰ Ta ra cuan i nacahan ra: Tacuan iyo mi ndya ta luhli. Catyi ra.

²¹ Ta i cuñi xaan ra Jesús sii ra ta catyi ra: Cumañi minoo ñi ca cuhva suun. Cuahan ta xicon tandihí sa iyo suun, ta cuhvón xuhun cuan sii ñiyiví ndahvi. Ta ma cumañi si suun nu cua soon gloria. Ta ziqui quisi cundyicon sii.

²² Ta sa siñi ra cuan cuhva cuan ta i nducuihya xaan iñi ra ta cuahan ra vatyi cuca xaan ra (ta ñá cuñi ra sa zanaa ra xuhun ra).

²³ Ta i nandyehe ra Jesús siconduu nu yugu ñiyiví ndyico sii ra ta catyi ra: Yii xaan ta cuu quihví ñiyiví cuca nu ndyaca ñaha ra Ndyoo.

²⁴ Ta iyo xaan i cuñi ñu sihin cuhva cahan ra Jesús. Ta i catyi tucu ra Jesús sihin ñu: Zehe luhli, yii xaan cua quihví minoo ra iyo xaan ndaha tysiño nu ndyaca ñaha ra Ndyoo vatyi sica iñi ra vatyi cua tyindye ndaha tysiño ra sii ra ta cua cuu quihví ra.

²⁵ Yii ca quihví minoo ra cuca nu ndyaca ñaha ra Ndyoo ta ziqui ca minoo camello yaha tì xuu minoo yicui ticui.

²⁶ Ta sa siñi ñu cuan cuhva cuan ta iyo xaan i cuñi ñu. Ta i natuhun tahan ñu. Ta i ndaca tuhun ñu sii ra Jesús: ¿Yoo ñiyiví cua cacu ta ma cuhun ñu andayaya?

²⁷ Ta i ndyehe ra Jesús sii ñu ta catyi ra: Ma cuu zavaha ñiyiví cuhva cuan, zoco Ndyoo cuu zavaha ra vatyi Ndyoo ñahñi sa yii nuu ra.

²⁸ Ta ziqui i catyi ra Pedro: Tata, nduhvi sa zandoo ndi tandihí ndaha tysiño ndi, ta ndyico ndi suun.

²⁹ Ta i catyi ra Jesús sihin ra: Ndisa cuii sa quehin sihin ndo vatyi ra zandoo vehe ra, a yañi ra, a cuhva ra, a zutu ra, a zihí ra, a ñazihí ra, a ñuhu ra sa cuenda mi ta sa cuenda Tuhun Ndyoo

³⁰ cua ñihí ra cuaha xaan ca ihya ñuu ñiyiví tañi minoo ziendu ca vehe ra, ta yañi ra, ta cuhva ra, ta zihí ra, ta zehe ra, ta ñuhu ra vazu

cua tahan ra tundoho. Zoco inga ñuu ñiyiví cua cundito ra tandihí cuii tyiemu.

³¹ Ta cuaha xaan ñiyiví ñiñi vityi, yivi ñiyiví ñiñi cua cuu ñu. Ta ñiyiví ña ñiñi, cua nduu ñu ñiyiví ñiñi xaan.

Nacatyi ra Jesús inga saha vatyi cua cahñi ñiyiví sii ra

³² Tacuan ta ziqui cuahan ra ityi ñuu Jerusalén. Ityi nuu iñi ra Jesús, ta ityi sata vasi ra i casi ra, ta iyo xaan cuñi ra. Ta ñiyiví ndihí sihin ra, yuhu xaan ñu. Tacuan ta i cana ra Jesús sii sa usi uu tahan ra ndya zava, ta i nacatyi ra sihin ra tandihí cuhva sa cua cuu sii ra.

³³ Ta i catyi ra Jesús sihin ra: Ndyeho ndo vatyi sa cuahan yo ityi ñuu Jerusalén nu cua xico tuhun ñiyiví sii ra i quisi ndya gloria. Ta cua tiñi ra zutu nahnu ta ra maestro cuenda ley sii ra. Ta cua catyi ra cuan vatyi cua cuu ra. Ta cua cuhva ra sii ra sii ñiyiví sa yivi ñiyiví hebreo cuu.

³⁴ Ta cua vacu ndyaa ñu sii ra. Ta cua cañi xaan ñu sii ra. Ta cua tyicu zii ñu sii ra. Ta cua cahñi ñu sii ra. Zoco sa cu uñi quiví ta cua nandoto tucu ra sisi sa i sihi ra.

I sica ra Jacobo ta ra Juan minoo tumañi iñi sii ra Jesús

³⁵ Ta ziqui i tuhva ra Jacobo ta ra Juan nu ndyaa ra Jesús. Zehe ra Zebedeo cuu sii nduu tahan ra. Ta i catyi ra: Maestro, cuñi ndi zayohon minoo tumañi iñi sa sica ndi suun.

³⁶ Ta i ndaca tuhun ra Jesús sii ra ta catyi ra: ¿Ñaa sa cuñi ndo zavehi?

³⁷ Ta i catyi ra: Cuhvon vatyi quiví cua cundyaca ñohon ta cua cundyaa maa ndi suhun. Minoo ndi siyo cuohon ta minoo ndi siyo zatyun.

³⁸ Ta i catyi ra Jesús sihin ra: Ña sito ndo ñaa sa sica ndo. ¿Atu cundyee ndoho ndyehe ndo tundoho tañi tundoho cua ndyehe mi?

39 Ta i catyi ra: Cundyee iñi ndi. Ta i catyi ra Jesúsi sihin ra: Ndisa cuii cua ndyehi tundoho, ta cua ndyehi ndo tundoho sa cuenda mi.

40 Zoco sa cundyaa ndo siyo cuehi ta siyo zatyi, ña tahan si sa yuhvi cuhva. Maa ra Ndyoo cua catyi yoo ra cua ñihii ndatu cuan.

41 Ta sa siñi inga sa usi tahan ra i casi ra Jesúsi, ta i cuxaan ra sihin ra Jacobo ta ra Juan.

42 Ta i cana ra Jesúsi sii ra ta catyi ra: Sa sito maa ndo cuhva ndyaca ñaha ñiyivi ñuu ñiyivi. Iyo ra cu nuu, ta zacoto ra sii tandihii ñiyivi vatyi ndyaca ñaha ra sii ñuu.

43 Zoco ña tacuan cuu si sa cuenda ndoho. Zama si cuhva. Tatu cuñi minoo ra cuu ra ra cahnu, natyindyee ra sii ra tahan ra.

44 Ta yoo ra cuñi sa cuu ra minoo ra cahnu ityi nuu ra Ndyoo, nanduu ra muzu sii tandihii ndo.

45 Vatyi cuhva ndya ra i quisi ndya gloria, ta ña vasi ra sa vatyi tyindyee ñiyivi sii ra. Vasi ra sa tyindyee ra sii ñiyivi. Tacuan iyo ra. Ta yucuan cuenda cua cuu ra sa cuenda ñiyivi, ta ziñi cuu quiñvi ñu gloria.

Izanduvahara Jesúsi sii minoo ra cuaa, ra nañi Bartimeo

46 I saa ra Jesúsi ñuu Jericó, ta cuhva sa cua quita tucu ra ñuu cuan sihin ra i casi ra ta i sindyico cuaha xaan ñiyivi sii ra. Ta minoo ra cuaa, ra nañi Bartimeo, zehe ra Timeo, ndyaa ra ityi vatyi caya ra.

47 Ta sa sito ra vatyi ra Jesúsi, ra ñuu Nazaret, cua yaha ityi cuan ta i cana saa ra ta catyi ra: ¡Jesúsi, yoho cuu ñiyivi sii ra rey David, cundahvi iñun sii!

48 Cuaha xaan ñiyivi catyi sihin ra nacutaxi ra, zoco ñihii ca nduu ra cana saa ra, ta catyi ra: ¡Yoho ñiyivi i ra David, cundahvi iñun sii!

49 Tacuan ta i sicuiñi ra Jesúsi ta i catyi ra: Cana ndo sii ra. Ta i

cana ñu sii ra cuaa ta catyi ñuu: Zanduzii iñun, ta nduviton vatyi cana ra Jesúsi suun.

50 Ta ta sica cuii ñi i nduvita ra, ta i zandoo ihno ra zahma ndisi ra. Ta i tuhva ra sii ra Jesúsi.

51 Ta i ndaca tuhun ra Jesúsi sii ra: ¿Ñaa sa cuñun zavehi suhun? Ta i catyi ra cuaa cuan: Maestro, cuñi zanduvohon nui.

52 I catyi ra Jesúsi sihin ra: Sa cuu cuhun. Sa nduvohon vatyi i sino ñuu. Ta zuun ñi caa cuhva cuan ndaha nandyehe ñi ra cuaa cuan. Ta cuahan ra sihin ra Jesúsi.

11

Cuhva i quiñvi ra Jesúsi ñuu Jerusalén

1 Ta sa saa ra yatyi ñi ñuu Jerusalén nu ndyaa ñuu Betfagé ta ñuu Betania yatyi ñi yulu sa nañi Olivos, ta i tasi ra Jesúsi sii uu tahan ra i casi ra.

2 Ta i catyi ra: Cuahan ndo ñuu ndyaa yatyi ñi ya sa ndoo ñi. Tatú saa ndo cua ndyehi ndo minoo burro, nuhñi ti, quiti ta yoñi ca maa cozo. Ndasi ndo sii ti, ta quisi ndo sihin ti.

3 Tatú iyo ñiyivi ndaca tuhun sii ndo ñaa sa ndyicuu ndo ta catyi ndo: "Cuñi ra cu nuu sii yo sii ti, ta tañi ca cua quisi nuhu ti."

4 Ta cuahan ra, ta i nañihi ra burro cuan. Nuhñi ti ityi, vatyi ñi yuvehe. Ta i ndasi ra sii ti.

5 Ta i catyi ra yulu yucuan sihin ra: ¿Ñaa sa ndyicuu ndo? ¿Ñacu ndasi ndo burro ña?

6 Tacuan ta i nacatyi ra cuhva sa catyi ra Jesúsi sihin ra. Ta i saha ñiyivi sa cuhun ra sihin burro cuan.

7 I sindyaca ra sii ti nu ndyaa ra Jesúsi, ta i tyizo ra zahma ra sata ti, ta ziñi i sicozo ra Jesúsi sii ti.

8 Ta cuaha xaan ñiyivi i saqui ñu zahma ñu ityi. Ta inga ca ñiyivi i sahndya ñu ndaha numa, ta i saqui ñu ityi.

⁹ Ta ñuu cuahan ityi nuu ra, ta ñuu vasi ityi sata ra i cana saa ñuu ta catyi ñuu: ¡Aleluya! ¡Nazacahnu yo sii ra Ndyoo vatyi vaha xaan cuu ra vasi sa cuenda ra Ndyoo!

¹⁰ ¡Vaha xaan cua cundyaca ñaha maa ra cuhva i sindyaca ñaha ra rey David, ra i cuu ñiyivi sii yo! ¡Aleluya! ¡Nazacahnu yo sii ra iyo ityi ziqui! Catyi ñuu.

¹¹ Tacuan i quihví ra Jesús ñuu Jerusalén. Ta i quihví ra vehe ñuhu. Ta i ndyehe ra tandihí sa iyo yu-cuan, ta ziqui cuahan ra ñuu Betania sihin sa usi uu tahan ra i casi ra vatyi sa cua iñi xaan.

Ña zii maa i cuñi ra Jesús sihin minoo yutu ñahñi yucu vixi iñi nuu

¹² Ta inga quihví i quita ra ñuu Betania. Ta i sizoco xaan ra Jesús.

¹³ Tacuan ta i ndyehe ra minoo yutu sa nañi higuera sihin ndaha tu. Ta sahan ra i sindyehe ra tatu iñi sititu, zoco ñá ñihí maa ra ndaha ñi. Maa maa ndaha ñi tu iñi vatyi yivi tyiemvu iyo siti tu cuu si.

¹⁴ Ta i catyi ra Jesús sihin yutu cuan: Ma coo ca situn vatyi ma casi ca ñiyivi sii si ndaha cuii ñi. Ta i siñi ra i casi ra sa cahan ra.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

¹⁵ I saa tucu ra Jesús ñuu Jerusalén. Ta sa i quihví ra vehe ñuhu ta i quisaha tava ndyizo ra sii ñiyivi xico ta ñiyivi zata. Ta i zanduva ihno ra mesa nu nazama ñiyivi xuhun sii inga ñiyivi, ta tacuan tucu tyayu nu xico ñiyivi paloma.

¹⁶ Ñá saha ca ra sa cuizo ñiyivi ndaha tysiño sisi vehe ñuhu.

¹⁷ Ta i quisaha zacuaha ra Jesús sii ñu ta catyi ra: Catyi Tuhun Ndyoo: “Vehe mi cunañi si vehe nu cahan ñiyivi sihin ra Ndyoo. Ta sa cuenda tandihí cuii ñiyivi ñuu ñiyivi cuu si.” Zoco maa ndo zacuu ndo vehe ra zuhu sii si.

¹⁸ I siñi ra zutu nahnu ta ra maestro cuenda ley sa cahan ra. Ta i quisaha nducu ra cuhva cahñi ra sii ra. I yuhu xaan ra sii ra Jesús vatyi iyo xaan i cuñi tandihí ñiyivi sihin tandihí cuhva i zacuaha ra.

¹⁹ Zoco sa tyahan cuan, i quita ra Jesús ñuu cuan ta cuahan ra.

Ndaha na-ityi yutu higuera

²⁰ Ta inga quihví i yaha ra ñaha ñi, ta i ndyehe ra vatyi sa na-ityi yutu i cahan ra Jesús sihin ndya cuhva ndya yoho tu.

²¹ Ta i nacohon iñi ra Pedro, ta catyi ra sihin ra Jesús: Ndyehe Maestro, sa i na-ityi yutu i cohon sihin.

²² Ta i catyi ra Jesús: Sino iñi ndo sii ra Ndyoo.

²³ Quehin sa ndisa sihin ndo vatyi yoo ra cua catyi sihin yucu ya: “Cuiñi siyon ihyá, ta cua ndihvun sisi tyañuhu.” Tatu sino iñi ra tacuan, tacuan cua cuu si sa ndisa cuii.

²⁴ Tyehen catyi vii sihin ndo: Sino iñi ndo sa cua ñihí ndo tandihí sa cua caca ndo sii ra Ndyoo. Ta cua cuhva ra tandihí si sii ndo.

²⁵ Tatu sica tahvi ndo sii ra Ndyoo ta iyo cuatyí ndo sihin inga ñiyivi, zanaa ndo iñi ndo cuatyí i zacuu ñu sihin ndo. Ta tacuan tucu ra Ndyoo Zutu yo, ra iyo andivi, cua zandasi ra cuatyí maa ndo.

²⁶ Zoco tatu ma zanaa ndo iñi ndo cuatyí i zavaha ñiyivi sihin ndo, tacuan tucu ra Ndyoo Zutu yo, ra iyo ityi ziqui, vatyi ma zandasi ra cuatyí maa ndo.

Iyo xaan cuhva sii ra Jesús

²⁷ Inga saha i quisí tucu ra Jesús ñuu Jerusalén. Ta sa quihví ra vehe ñuhu ta i quisí ra zutu nahnu sihin ra maestro cuenda ley sihin ra mandoñi nu ndyaa ra Jesús.

²⁸ Ta i ndaca tuhun ra sii ra Jesús ta catyi ra: ¿Yoo ra i tasi suun vatyi cua tava ndyizon sii ñiyivi sisi vehe ñuhu ya? ¿Yoo sa saha tuhun

suun vatyi cuu zavohon tandih
cuii cuhva ya?

²⁹ Ta i catyi ra Jesúsi sihin ra: Cua
ndaca tuhin minoo cuhva sii ndo.
Tatu cuu nacatyi ndo, tacuan ta
cua nacatyi sihin ndo yoo sa saha
cuhva sii mi.

³⁰ Ta i catyi ra: ¿Yoo ra i tasi sii
ra Juan sa zacoo ndutya ra? ¿Atu i
tasi ra Ndyoo sii ra a ñiyivi? Nacatyi
ndo.

³¹ I quisaha natuhun tahan xehe
ra, ta i catyi ra sihin tahan ra: Tatu
catyi yo vatyi Ndyoo i tasi sii ra, ta
ziqui cua catyi ra Jesúsi: “¿Ñacu ñá
sino iñi ndo?”

³² ¿A catyi yo vatyi ñiyivi i tasi sii
ra? Catyi ra. Zoco i yuhu ra sii
ñiyivi vatyi sa sito ra vatyi tandih
cuii ñiyivi sino iñi ñu vatyi i cahan
ra Juan sa cuenda ra Ndyoo.

³³ Ta yucuan cuenda i catyi ra
sihin ra Jesúsi: Ña sito ndi. Ta i catyi
ra Jesúsi: Tacuan tucu ii, ma nacatyi
yoo ra i saha cuhva ya sii.

12

*Tañi ra ña cuñi zatyin vaha,
tacuan iyo ra cua cahni sii ra Jesúsi*

¹ Tacuan ta ziqui i quisaha cahan
ra Jesúsi sihin minoo cuhva ta catyi
ra: Sico minoo ra i tasi minoo
sacu yoho uva. Ta i zavaha ra
nu i tava ra ndutya uva ta minoo
vehe tyiyahva vatyi cua zacuenda
ra sacu ra, ta i saha noo ra sacu ra
sii inga ityi ra zatyin. Ta cuahan
ra inga ñuu.

² Ta i saa quivi i sicoo uva cuan.
Ta i tasi sitoho si minoo muzu ra
vatyi cua caca ra zuhva, cuhva sa
tahan si sii patron ra.

³ Ta i tiin ra sii muzu ra cuan, ta
i cañi xaan ra sii ra. Ta i natasi ra
sii ra. Ta ñá saha ra nu zuhva uva
cuau.

⁴ Ta i tasi tucu sitoho si sii inga
muzu ra. Ta i cañi xaan ra sii ra
suhva yuu. I tahvi ra xiñi ra. Ta
quiñi xaan i zavaha ra sihin ra.

⁵ Ta ziqui i tasi tucu sitoho si sii
inga tucu ra. Ta i sahñi ra sii ra.

Ta i tasi sitoho si cuaha ca muzu
minoo minoo ra. Zuhva ra i cañi ra,
ta zuhva ra i sahñi ra.

⁶ Ta iyo minoo tuhun ñi zehe
sitoho si, ta cuñi xaan ra sii ra. Ta
nu ndih tahan i tasi ra sii ra vatyi
sica iñi ra: “Cua tyaa ra yahvi sii
zehi.”

⁷ Ta i catyi ra zatyin cuan sihin
tahan ra: “Ihya cuu ra cua nañhi
ndaha tyan quivi cua cuu zutu ra.
Nacahñi yo sii ra vatyi ndoo maa yo
sihin sacu ya.”

⁸ I tiin ra sii ra. Ta i sahñi ra. Ta i
taya ra coño ñuhu ra sata sacu.

⁹ Ta i ndaca tuhun ra Jesúsi ta
catyi ra: ¿Yozo caa cua zavaha
sitoho ñuhu cuan vityi? Cua cuhun
ra, ta cua cahñi ra sii ra zatyin
cuán. Ta cua cuhva noo ra ñuhu
cuán sii inga ñiyivi.

¹⁰ ¿Atu tañaha ca cahvi ndo
Tuhun Ndyoo? nu catyi si:

I zavita ihno ñiyivi zandaa vehe sii
yuu sa cuñi si cuenda siqui
vehe.

Ta vityi, yuu cuan cuu sa ñiñi ca ta
ziqui tandih sa cuenda vehe
cuán vatyi tacuan catyi ra
Ndyoo.

¹¹ Ta vaha xaan cuñi yo sihin cuhva
ya.

¹² Ta i nducu ra ndyizo tyan
cuhva tiin ra sii ra Jesúsi vatyi i siñi
ra cuhva cahan ra Jesúsi, cuhva iyo
maa ra. Zoco i yuhu ra sii ñiyivi. Ta
yucuan cuenda i zandoo ra sii ra ta
cuahan ra.

*Tahan si tyaa yo yahvi sii ra cu
tyin ta sii ra Ndyoo*

¹³ I tasi ñiyivi sii zuhva ra fariseo
ta ra ñoho cuenda ra Herodes vatyi
cua zandavi ñaha ra sii ra Jesúsi,
ta cua nducu ra cuhva sihin ñaa
minoo cuhva cua cahan ra Jesúsi ta
ziqui cua cuu tyaa ra cuatyi sata ra.

¹⁴ I quisi ra cuan ta i catyi ra:
Maestro, sito ndi vatyi cohon sa
ndisa, ta inuu ndita ñi tyoon yahvi
sa cahan inga ñiyivi a cuca ñu a
ndahvi ñu. Ndisa cuii zañohon ityi
ra Ndyoo. ¿Atu vaha cua tyiyahvi

yo xuhun sa sica ra gobierno César, a ña vaha? ¿Atu cua tyiyahvi ndi a ma tyiyahvi ndi?

¹⁵ Ta i sito ra Jesús vatyi ña vaha añima ra cuan, ta i catyi ra sihin ra: ¿Ñacu saqui xaan ndo xayu sehi? Quisi ndyaca ndo minoo xuhun vatyi ndyehi.

¹⁶ Ta i sindyaca ra sii si. Ta sa ndyehe ra Jesús, ta i catyi ra: ¿Yoo sii nuu ndyaa ya? ¿Ta yoo sii zivi ndyaa ya? Ta i catyi ra: Sii ra gobierno César.

¹⁷ Tacuan ta i catyi ra Jesús sihin ra: Cuhva ndo sii ra gobierno César sa cuu sii ra. Ta cuhva ndo sii ra Ndyoo sa cuu sii ra Ndyoo. Ta iyo xaan i cuñi ra sihin cuhva i cahan ra Jesús.

Ndaca tuhun ra tatu cua nandoto tucu ñiyiví

¹⁸ I sahan tucu minoo ityi ra saduceo nu ndyaa ra Jesús. I sica iñi tandihí ra saduceo vatyi ma nandoto tucu ñiyiví, ta yucuan cuenda i ndaca tuhun ra sii ra Jesús ta catyi ra:

¹⁹ Maestro, i tyaa ra Moisés minoo ley vatyi tatu sihi minoo rayíi ta ndoo ndahví ñazihí ra, ta yoñi zehe ra, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁰ Sicoo usa tahan rayíi sihin yañi ra. I tindaha ra nuu, ta i sihi ra, ta yoñi zehe ra i sicoo.

²¹ Ta ziquí i tindaha ra cu uu sihin ñandahví cuan. Sihi tucu ra cuan. Ta yoñi zehe ra i sicoo. Ta tacuan tucu ra cu uñi.

²² Ta tacuan i tindaha tandihí sa usa tahan ra sihin ñaha cuan. Ta i sihi ra. Ta numinoo ra yoñi zehe ra i sicoo. Ta nu ndihí tuhun, i sihi tucu maa ñaha cuan.

²³ ¿Yoo ra cua cuu yíi ña quiví cua nandoto tucu ñiyiví vatyi ñazihí tandihí sa usa tahan ra i cuu sii ña? Tacuan i catyi ra sihin ra Jesús.

²⁴ Ta i catyi ra Jesús sihin ra: Ña sito ndo ñaa sa cahan ndo vatyi ña

sito ndo Tuhun ra Ndyoo. Ta ña sito ndo yozo caa iyo cuhva sii ra.

²⁵ Quiví cua nandoto ñiyiví i sihi, ma tindaha ca ñu. Ta ma cuhva ca ñu sii zehe ñu sa tindaha ñu. Tañi ángel sa iyo andiví tacuan cua nduu ñu.

²⁶ Ta tatu cuñi ndo coto ndo tatu cua nandoto tucu ñiyiví, cuñi si sa nacohon iñi ndo sa i tyaa ra Moisés nu i saha ra cuenda yozo caa i cayu minoo taca iñu. Ta i cahan ra Ndyoo sihin ra sisi tu ta catyi ra: "Yuhvi cui Ndyoo sii ra Abraham ta sii ra Isaac, ta sii ra Jacob."

²⁷ Tacuan i cahan ra Ndyoo vazu sa sihi tandihí ra cuan ta sa naha vatyi sito ra Ndyoo vatyi ndito ra cuan ta cua nandoto tucu ra. Yívi Ndyoo sii ra ndaha sihi cuui cuu Ndyoo Zutu yo. Ndyoo sii ñiyiví cua cundito tandihí tyiemvu cuu maa ra. Ta zama xaan yuhu ndo vatyi sica iñi ndo vatyi ma nandoto tucu ñiyiví.

Minoo ley ra Ndyoo sa ñiñi ca

²⁸ I saa tucu minoo ra maestro cuenda ley, ta i siñi ra sa ndaca tuhun xaan ñiyiví sii ra Jesús, ta i sito ra vatyi vaha xaan i nacahan ra Jesús sihin ñu, ta yucuan cuenda i ndaca tuhun ra sii ra ta catyi ra: ¿Ndyá cuu ley ra Ndyoo sa ñiñi ca?

²⁹ Ta i catyi ra Jesús sihin ra: Ley sa ñiñi ca sii ra Ndyoo catyi si: "Ndoho ñiyiví hebreo, cuiñi ndo. Ndyoo, ra ndyaca ñaha sii ndo, minoo tuhun ñi ra iyo.

³⁰ Ñihi xaan cuñi ndo sii ra Ndyoo Zutu ndo sihin añima ndo. ñin ñi sii ra caca iñi ndo; iñin ñi sihin ra cahan ndo; iñin ñi tyiño ra zatyiño ndo. Ta tacuan cua coto ra vatyi cuñi xaan ndo sii ra."

³¹ Ta catyi ley ra Ndyoo sa cuuu: "Cuñi xaan ndo sii tandihí inga ñiyiví tañi cuñi ndo sii maa ndo." Ñahñi ca inga ca ley ñiñi ca ta ziquí nduu tahan ley ya.

³² Ta i catyi ra cu maestro cuenda ley cuan sihin ra Jesús: Vaha xaan

cohon, Maestro. Ndisa cuun sa cohon vatyi minoo tuhun ñi ra Ndyoo iyo. Ta yoñi inga ca Ndyoo iyo.

³³ Ta tatu cuñi ñiyiví sii ra sihin añima ñu, ta zatyinó ñu tyinóra ta tandihí cuhva cuan ta tatu cuñi ñu sii inga ñiyiví tañi cuñi ñu sii maa ñu, vaha xaan ca cuu si tacuan. Vaha ca tacuan ta ziqui cuhva zavaha ndi, cuhva sa sahmi ndi mvee ticatyí a ñaa sa saha ndi sa zacahnu ndi sii ra Ndyoo.

³⁴ I sito ra Jesús vatyi vaha xaan i nacahan ra maestro cuenda ley, ta i catyi ra Jesús sihin ra: Zuhva ñi ca cumañi suun, ta cua cuu quihvun nu ndyaca ñaha ra Ndyoo. Catyi ra. Ta i yuhu xaan ñiyiví sa ndaca tuhun ca ñu sii ra Jesús.

¿Yoo sii zehe cuu sii ra Cristo?

³⁵ I zacuaha ra Jesús sisi vehe ñuhu ta catyi ra: Catyi ra maestro cuenda ley vatyi ra Cristo cuu ñiyiví sii ra rey David, ta ndisa cuu si cuhva cahan ra cuan.

³⁶ Zoco zuun ñi maa ra rey David i cahan ta sa naha i zacuu Tatyí II. Ta i tyaa ra cuhva cahan ra Ndyoo sihin ra Cristo. Tyehen i tyaa ra David:
Cahan ra Ndyoo sihin ra ndyaca

ñaha sii mi, ta catyi ra:

“Cundyoon siyo cuehi ndya cuhva ndya cua saa quiví cua cuhve cuhva cua zahacanoon sii ñiyiví xaan iñi suun.”

³⁷ *¿Ta yozo caa cuu cuu ra Cristo ñiyiví ra David tatu zuun ñi maa ra David catyi vatyi ndyaca ñaha ra Cristo sii ra?* Tacuan i catyi ra Jesús, ta zii xaan i cuñi tandihí ñiyiví sa siñi ñu tuhun i cahan ra.

Tyaa ra Jesús cuatyí sata ra maestro cuenda ley

³⁸ I zacuaha ra Jesús sii ñiyiví ta catyi ra: Zacuenda vaha ndo sii ndo. Ta ma zacuu ndo cuhva zacuu ra maestro cuenda ley. Tahan xaan iñi ra quihi ra zahma nañi vatyi cua nacoto ñiyiví sii ra vatyi ra ñiñi cuu

ra. Ta cuhun ra nuyahvi vatyi cuñi xaan ra sa tyaa ñiyiví yahvi sii ra.

³⁹ Ta cuñi xaan ra sa cundayaa ra nu ndyaa ñiyiví ñiñi sisi vehe ñuhu. Ta cuñi xaan ra sa cundayaa ra tyayu vaha nu sasi ñiyiví zacahnu vico.

⁴⁰ Cuaha ca cua cutuñi ra maestro cuenda ley ta ziqui inga ñiyiví vatyi zuhu ra ndaha tyinó ñu ndahvi. Ta zandavi ñaha ra sii ñiyiví vatyi naha xaan sica tahvi ra sii Ndyoo vatyi cuñi ra sa cua ndyehe ñiyiví, ta cua caca iñi ñu vatyi sito xaan ra sii Ndyoo.

Cuhva i saha minoo ñandahvi xuhun

⁴¹ Minoo saha ndyaa ra Jesús sisi vehe ñuhu hebreo yatyí ñi nu ndyaa satu nu quihví xuhun. Ta i ndyehe ra vatyi cuaha xaan ñiyiví tyihi xuhun. Ta ra cuca, cuaha xaan i tyihi ra.

⁴² Tacuan ta i saa minoo ñaha ndahvi. Ta i tyihi ña uu tahan xuhun ndyihi sa cuu ohon zendavu sisi satu cuan vatyi cuñi xaan ñu sii ra Ndyoo, ra iyo andivi.

⁴³ Ta ziqui i cana ra Jesús sii ra i casi ra ta catyi ra: Ndisa cuii sa quehin. I tyihi ñandahvi cuan cuaha ca xuhun ta ziqui tandihí ca ra.

⁴⁴ Saha maa ra sa ndoo ñi ca sii ra, zoco ñandahvi cuan, ndihí i saha ñi ca ña xuhun cuita casi ña.

13

Cuhva i catyi ra Jesús cuhva cua tani vehe ñuhu cahnu

¹ Ta i quita ra Jesús vehe ñuhu cuan ta i catyi minoo ra i casi ra sihin ra: ¡Ndyeho, Maestro, tyaqui xaan i sino vehe ñuhu ya! ¡Vaha xaan yuu i sino si!

² Ta i catyi ra Jesús sihin ra: Ndyehun vehe nahnu ya vatyi cua tani si, ta tandihí si cua quihi cuatyí.

Zeña sa cua naa ñuu ñiyiví

³ Tacuan ta ziqui cuahan ra yucu sa nañi Olivos, yucu sa ndyehe ñiyiví sa ndyaa ñu yuvehe ñuhu. Ta

sa ndyaa ra Jes s yucuan, i ndaca tuhun xehe ra Pedro ta ra Jacobo ta ra Juan ta ra Andr s sii ra ta catyi ra:

⁴ Cuhvon cuenda sii ndi. ¿Naa qui i cua cuu sa catyun? ¿Naa ze n cua ndyehe ndi, ta ziqui cua coto ndi vatyi cua tahan si?

⁵ Ta i catyi ra Jes s: Zazuenda ndo sii ndo coto zandavi  aha  iyivi  ndo.

⁶ Vatyi cuaha xaan ra cua quisi ta cua catyi ra: "Yuhvi cui Cristo." Ta tacuan cua zandavi  aha ra cuaha xaan  iyivi.

⁷ Ta cua cui i ndo tuhun vatyi cua coo cuatyi ta cah i tahan xaan  iyivi, zoco ma yuhu ndo. Xihna ca cua cuu tandih i cuhva cuan, cuma i ca sa saa qui i naa  iyivi.

⁸ Cua cah i tahan minoo  uu sihin inga  uu, ta cua coo cuatyi  uu nahnu sihin inga  uu nahnu. Cua coo cuaha xaan sa taan, ta cua coo tama, ta cua yuhu xaan  iyivi. Ta tacuan  i cua quisaha ndyehe  iyivi tundoho.

⁹ Zazuenda ndo sii ndo vatyi cua ti n  iyivi sii ndo, ta cua cuhun ndo nu yucu ra cu tyi o nahnu. Ta cua ca i  iyivi sii ndo sisi vehe  uhu. Ta sa cuenda mi cua tasi ra sii ndo nu ndyaa ra gobernador ta ra rey. Ta cua  ihli ndo cuhva cahan ndo tuhun mi nuu ra.

¹⁰ Ta ma naa  uu  iyivi ndya cua cui i  iyivi nacahnu  uu  iyivi Tuhun Ndyoo.

¹¹ Tatu cundyaca  iyivi sii ndo nu ndyaa ra cu tyi o nahnu, ma caca  i ndo sa cua cahan ndo. Ta ma caca xaan  i ndo. Cahan ndo  aa sa cahan ra Ndyoo sihin ndo cuhva cuan vatyi  ivi maa ndo cua cahan. Tatyi Ii ra Ndyoo cua cahan.

¹² Cua xico tuhun  iyivi sii tahan  u, ta ziqui cua cah i  iyivi sii  uu cuan. Ta cua xico tuhun zutu  iyivi sii zehe ra. Cua cah i tahan  iyivi sihin zutu  u ta sihin  ihli  u. Ta cua cuhva  u sii  u sii inga  iyivi vatyi cah i  u sii  u.

¹³ Cua cuxaan tandih i  iyivi sihin maa ndo sa cuenda mi, ta yoo ra ma cui i siyo sii ndya nu cua ndih i  uu  iyivi, cua cacu ra.

¹⁴ Tatu ndyehe ndo minoo sa zat i xaan ta qui i xaan zacuu si, ta nandya si cuan nu ii, cuhva i catyi ra profeta Daniel, cutu i  i ndo ndoho ra cahvi ihya, tatu ndyehe ndo sii si cuan, nacono  iyivi  oho Judea, ta naquih i xehe  u ndya yucu.

¹⁵ Tatu iyo ra yozo xi i vehe ra qui i cuan, ma cuatu ra numaa iyo ndaha tyi o cu i ra tava ra sisi vehe ra.

¹⁶ Ta ra  oho itu ra, ma cunuha ra ndya vehe ra sa cua naquihin ra zahma ra.

¹⁷ Ta ndahvi  u  ihli sa  oho zehe qui i cuan a tatu iyo zehe  u sa tyaxi qui i cuan vatyi cahnu xaan tundoho cua ndyehe  u.

¹⁸ Ta caca ndo sii ra Ndyoo vatyi ma tahan si cono ndo vico zavi a minoo qui i quitatu  iyivi

¹⁹ vatyi cua coo cuaha xaan tundoho qui i cuan, cuhva ta ndyehe ca  iyivi ndya i zavaha ra Ndyoo  uu  iyivi. Ta ma coo inga ca tundoho sa tacuan ndaha cui i  i.

²⁰ Tatu ma zanduzuhva ra Ndyoo qui i tundoho cuan, yo i  iyivi cua caci. Zoco cua zanduzuhva ca ra sii si sa cuenda  iyivi i casi ra.

²¹ Tatu catyi minoo ra sihin ndo: "Ihya ndyaa ra Cristo a yucuan ndyaa ra", catyi ra; ma sino i i ndo.

²² Vatyi cua nduvita cuaha xaan ra zandavi  aha, ta cua catyi ra vatyi Cristo cuu ra, ta cua catyi ra vatyi cahan ra tuhun saha ra Ndyoo sii ra. Ta cua zavaha ra ze n nahnu ta sa ndyityi ndya cuhva ndya sii  iyivi i casi ra Ndyoo cua zandavi  aha ra tatu sa vatyi cuu cuhva cuan, zoco ma cuu.

²³ Ndyehe ndo, sa nacatyi tandih i sihin ndo cuee ca sa tahan si.

Cuhva cua quisi tucu ra i quisi ndya gloria

24 Ta i catyi tucu ra Jesús: Tatu sa yaha ndyehe ñiyivi tundoho cuan ta ziqui ña naha ca ta cua nduñaa ñicandyi, ta ma ndyehe ca yoo.

25 Cua nacoyo tiñoo andiví ndya nu ñuhu, ta ndya cuhva ndya cua canda andiví.

26 Tacuan ta ziqui cua ndyehe ñiyivi sii ra i quisi ndya gloria ityi andiví. Cua ndyehe ñuu vatyí vasi ra nu vico ta sihin cuaha xaan cuhva. Ta tyaquí xaan caa ra.

27 Ta cua tasi ra sii ángel ra ndya tandihí sa cumi tahan ziqui ñuu ñiyivi, ta cua zatahan ra sii tandihí ñiyivi i casi ra Ndyoo ndya nacahnu ñuu ñiyivi.

28 Vityi coto ndo minoo cuhva iyo yutu higuera ta tandihí inga yutu. Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vatyí sa cua nducanhí.

29 Ta tacuan tucu tatu sa ndyehe ndo vatyí sa cuu tandihí tuhun sa quehin sihin ndo ihya, tacuan ta cua coto ndo vatyí sa cua cuyatyi sa cunaa ñuu ñiyivi.

30 Sa ndisa catyi sihin ndo vatyí cua cuu cuhva ya cuee ca sa cuu ñiyivi sa iyo vityi.

31 Yityi andiví ta ñuhu ñuu ñiyivi cunaa si, zoco tuhun quehin, ma naa si.

32 Zoco yoñi ñiyivi sito ñaa quiví a ñaa cuhva cua cuu si. Nu ángel andiví ta ña sito ra ta nu Zehe ra Ndyoo. Maa tuhun ñi ra Ndyoo Zuti sito.

33 Cuiñi vaha ndo sa quehin; cuyucu listo ndo, ta cahan ndo sihin ra Ndyoo vatyí ña sito ndo ñaa quiví cua cuu si.

34 Tañi minoo cuhva sii minoo ra cua cuhun nu sica, cuee ca sa quita ra vehe ra saha ra cuenda sii muzu ra. Saha cuenda ra ñin ñin tyiñoo zacuu ra. Ta saha ra tyiñoo sii ra zacuenda yuvehe ra vatyí zacuenda vaha ra. Ta tañi ra cuhun nu sica cui.

35 Yucuan cuenda cundyaa listo ndo vatyí ña sito ndo ñaa cuhva cua quisi, tañi ña sito muzu cuan ñaa cuhva cua quisi patrón ra, a nu cuu tyahan a maa ñuu a cuhva sacu ndiví a ñaha ñi.

36 Cuatu vaha ndo, coto yatyí xaan quisi ta ña ndatu listo ndo.

37 Quehin cuhva ya sihin maa ndo ta sihin tandihí cuii ñiyivi: Cuyucu listo ndo.

14

Sihñi tahan ra tyiñoo yozo caa cua tiñin ra sii ra Jesús

1 Cumañi uu ca quiví ta cua tahan si vico sihi mvee ticatyí, quiví sasi ñiyivi pan ña ndaa. Ta ra zutu nahnu sihin ra maestro cuenda ley nducu ra cuhva yozo caa cua cua tiñin xehe ra sii ra Jesús. Ta cua cahñi ra sii ra.

2 Zoco i catyi ra: Ña vaha vityi vatyí iyo vico. Ta coto cahñi tahan ñiyivi sihin yo.

I tyozo minoo ñaha azetye vixi xiñi ra Jesús

3 Ñoho ra Jesús ñuu Betania vehe ra Simón, ra i cuhu cuehe tyahyu. Ta cuhva sa ndyaa ra mesa ta i tuhva minoo ñaha sii ra. Ñaa ña minoo yutyi ñoho azetye vixi. Nañi si nardo, ta yahvi xaan ndyaa si. I tahvi ña yutyi, ta i tyozo ña azetye vixi cuan xiñi ra Jesús.

4 Ta ñiyivi yucu yucuan i cuxaan ñu sihin ña, ta i nducu tuhun tahan ñu. Ta catyi ñu: ¿Ñacu zatívi ña azetye vixi cuan?

5 Vaha ca tatu sa i xico ña sii si, ta ñihi ña tañi uu mil peso ta tyindyee ña sii ñiyivi ndahvi. Ta xaan xaan i cahan ñu sihin ña.

6 Ta i catyi ra Jesús: Zandihí ndo tuhun sihin ña. ¿Ñacu cuyuhu xaan ndo sihin ña? Vaha xaan i zavaha ña sihin.

7 Tandihí tyiemvu cua coo ñiyivi ndahvi sihin ndo. Ta cua cuu zavaha ndo sa vaha sihin ñu ñaa

quiví cuñi ndo, zoco yuhvi, ma cundyei sihin ndo tandih i tyeimvu.

⁸ I zavaha ñaha ya minoo sa vaha. Tañaha ca cua quihví si ñuhu. Zoco i tyozo ña azetye vixi coño ñuhu cuee ca sa cui ta cuhin nuñaña.

⁹ Ndisa cuii sa quehín sihin ndo vatyi vazu ndyacamaa nacatyi ñiyiví Tuhun Ndyoo sihin ñiyiví, zoco cua nacatyi ñu cuhva i zavaha ña ya sihin, ta cua nacohon iñi ñiyiví sii ña. Tacuan i catyi ra Jesús.

Cuhva i xico ra Judas sii ra Jesús

¹⁰ Yaha cuan ta ziquí minoo sa usi uu tahan ra i casi ra Jesús, ra sa nañi Judas Iscariote, cuahan ra cua cahan ra sihin ra zutu nahnu vatyi cuñi ra xico ra sii ra Jesús.

¹¹ Zii xaan i cuñi ra zutu nahnu sihin sa i catyi ra, ta i catyi ra vatyi cua tyiyahvi ra sii ra. Ta ziquí i quisaha ndedu ra Judas cuhva cua cuhva cuenda ra sii ra Jesús sii ra.

I cuxiñi ra Jesús sihin ra i casi ra

¹² Quivi i quisaha vico sa sasi ñiyiví pan ña ndaa ta i sahñi ñu mvee ticateyi vatyi tyaa fú yahvi sii ra Ndyoo. Ta quivi cuan i ndaca tuhun ra i casi ra Jesús sii ra ta catyi ra: ¿Ndyamáa cuñun vatyi cua zanduvaha ndi nu cua cuxiñun sa cuenda vico ya?

¹³ Tacuan ta i tasi ra Jesús sii uu tahan ra ta catyi ra sihin ra: Cuahan ndo ndya ñuu cahnu. Ta yucuan cua nañihí ndo sii minoo ra; ndyizo ra minoo quiyí ndutya. Cundyico ndo sii maa ra.

¹⁴ Ta nu quihví ra cahan ndo sihin sitoho vehe cuan ta catyi ndo: “Catyi ra Maestro: ¿Ndyamáa iyo cuarto nu cua casi ra xita sa cuenda vico ya sihin ra i casi ra?”

¹⁵ Ta cua zañaha ra minoo cuarto cahnu ndya ziquí. Sa yaha nduvii si. Yucuan zanduvaha ndo sa cuxiñi yo. Tacuan i catyi ra Jesús sihin ra.

¹⁶ Ta cuahan ra cuan ta i saa ra ndya ñuu ta i nañihí ra cuarto cuan

tañi cuhva i catyi ra Jesús. Ta i zanduvaha ra sa cuxiñi ra vico zuhun cuan.

¹⁷ Ta sa sa cuaa cuan i saa ra Jesús yucuan sihin sa usi uu tahan ra i casi ra.

¹⁸ Ta nií ñi sa sasi ra xita i catyi ra Jesús sihin ra: Sa ndisa catyi sihin ndo vatyi minoo ndoho sa sasi sihin ihya, cua xico ra sii. Catyi ra.

¹⁹ Ta i nducuihya xaan iñi ra ndihí sihin ra, ta i quisaha ndaca tuhun minoo minoo ra sii ra Jesús: ¿Atu yuhvi cui?

²⁰ Ta i nacahan ra Jesús ta catyi ra: Minoo sa usi uu tahan ndo sa sasi sihin iñi ñi coho ya cuu ra.

²¹ Cuahan ra i quasi ndya gloria cuhva catyi Tuhun Ndyoo, zoco indahvi ñi cuu ra xico sii! Vaha ca tatu sa ñá cacu ra vatyi cua ndyehe xaan ra tundoho.

²² Ta cuhva sa cuxiñi ra i quihin ra Jesús pan, ta i saha ra tyahvi ndyoo sii ra Ndyoo, ta ziquí i sahnu ra sii si ta saha ra sii si sii ra i casi ra, ta i catyi ra: Quihin ndo sii si ta casi ndo. Ihya cuu tañi coño ñuhu.

²³ Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i saha ra sii si sii ra, ta i sihi tandihí ra zuhva zuhva si.

²⁴ Ta i catyi ra Jesús sihin ra: Ihya cuu tañi niñi. Cua cati si sa cuenda cuaha xaan ñiyiví. Vityi zandaa ra Ndyoo minoo tyiño saa. Cua zandasi ra cuatyi ñiyiví sihin niñi.

²⁵ Sa ndisa catyi sihin ndo vatyi ma coho que vino ndya cua cohi sii si minoo cuhva saa nu ndyaca ñaha ra Ndyoo.

Catyi ra Jesús vatyi cua catyi ra Pedro vatyi ña sito ra sii ra

²⁶ I sata tandihí ra minoo yaa Ndyoo, ta ziquí cuahan ra ndya yucu Olivos.

²⁷ Tacuan ta i catyi ra Jesús sihin ra: Sa cuaa vityi tandihí cuii ndo cua zandoo ndo sii. Ta ma cuñi ca ndo cundyico ndo sii, vatyi catyi

Tuhun Ndyoo: "Cua cuu ra cu pastor, ta cua quiti cuatyi tandihí cuii mvee ticateyi zono ra."

²⁸ Zoco sa yaha nandote ta cua cuhin yatyi ca ta ziqui maa ndo ndya Galilea.

²⁹ Ta ziqui i catyi ra Pedro sihin ra: Vazu zandoo tandihí ca ra ya suun, zoco yuhvi cua cundyique suun.

³⁰ Ta i catyi ra Jesús sihin ra: Sa ndisa catyi suhun vatyi zuun ñi sa cuaa vityi, cuee ca sa vacu saa ndívi tyahnu uu yuhu ti, cua catyun uñi tahan saha vatyi ña siton sii.

³¹ Ta ñihi xaan i cahan ra Pedro ta catyi ra: Vazu cui suhun, zoco ma catyi sa ña site suun. Ta tacuan tucu i cahan tandihí ca ra.

Cahan ra Jesús sihin ra Ndyoo minoo nu yucu yutu tyaqui nu nañi si Getsemaní

³² Tacuan ta ziqui i saa ra Jesús sihin ra i casi ra ndya minoo nu yucu yutu tyaqui nu nañi si Getsemaní, ta i catyi ra sihin ra: Cundyaa ndo ihya vatyi cuehin cua quehin sihin ra Ndyoo ityi nuu ca.

³³ Ta i quihin ra Jesús sii ra Pedro ta ra Jacobo ta ra Juan cuahan sihin ra, ta i quisaha nducuihya xaan iñi ra, ta ndahvi xaan cuñi ra.

³⁴ Tacuan ta i catyi ra sihin ra: Cuihya xaan cuñi añime cuhva ndya sa cuñi cui. Ndoo ndo ihya ñi ta cundyaa tyacu ndo.

³⁵ Ta ziqui cuahan ra Jesús zuhva ca ityi nuu, ta i sicava ndyayu ra nu ñuhu, ta i sica tahvi ra sii ra Ndyoo sa ma ndyehe ra tundoho sa cua cuu sii ra tatu sa vatyi cuu cuhva cuan.

³⁶ Ta cuhva sa sica tahvi ra sii ra Ndyoo i catyi ra: Ndyoo Zuti, cuu tandihí suun. Tyindyeun sii sa ma ndyehi tundoho cuan, zoco ma cuhvón tañi cuñi mi. Nacuu si tañi cuñi moo.

³⁷ Tacuan i catyi ra Jesús, ta ziqui i sahan ra nu yucu ra ndihí sihiun ra, ta i ndyehe ra sii ra quixi ra, ta i catyi ra sihin ra Pedro: Simón,

¿a quixun? ¿Ñacu ñá cuu cundyaa tyacu ndo sihin numinoo ora?

³⁸ Cutyacu ndo ta cahan ndo sihin ra Ndyoo coto nducu coto ihñi cuihna sii ndo. Cuñi ndo zavaha ndo sa vaha, zoco ña cuu sii ndo sa maa tuhun ñi ndo.

³⁹ Tacuan ta i sahan tucu ra Jesús inga saha sa cua cahan ra sihin ra Ndyoo, ta zuun ñi tuhun cuan i cahan ra inga saha.

⁴⁰ Ta ziqui i nasaa ra, ta i ndyehe ra sii ra ndihí sihin ra quixi tucu ra vatyi sitatu xaan ra, ta ñá ñihi ra cuhva ñaa sa cua cahan ra sihin ra Jesús.

⁴¹ Ta i sahan ra Jesús ta i naquita tucu ra nu yucu ra sa cu uñi saha, ta i catyi ra: ¿Atu quixi ndo? ¿Atu quitatu ndo? Vaha ñi vityi. Sa saa cuhva cua nacuhva ñiyivi sii ra i quisí ndya gloria sii ra iyo cuatyi.

⁴² Ta nduvita ndo. Coho yo. Sa vasi ra xico sii.

Tiin ra sii ra Jesús

⁴³ Nu cahan ca ra Jesús, ta i saa ra Judas; minoo sa usi uu tahan ra i casi ra Jesús cuu ra. Ta i quisí cuaha xaan ñiyivi sihin ra. Ñaa ra mityi ta yutu. I tasi ra zutu nahnu ta ra maestro cuenda ley ta ra mandoñi sii ra.

⁴⁴ Ra sa xico sii ra Jesús, i saha ra minoo cuhva sii ra cuan, ta catyi ra: Ra cua cohi xiti cuan, yucuan cuu ra tiin ndo. Tiin vaha ndo sii ra, ta quihin ndo sii ra.

⁴⁵ Ta i saa ra Judas, ta i tuhva ra sii ra Jesús ta catyi ra: Nacumi suun, Maestro. Ta i sihi ra xiti ra.

⁴⁶ Ta ziqui i tiin ñiyivi cuan sii ra Jesús.

⁴⁷ Ta minoo ra ndihí sihin ra Jesús, i tava ra mityi ra, ta i cañi ra sii ra cu muzu ra cu zutu ya cahnu, ta i sahndya ra zoho ra.

⁴⁸ Ta ziqui i catyi ra Jesús sihin ñiyivi cuan: ¿Atu vasi tiin ndo sii minoo ra zuhu vatyi ñaa ndo mityi ta ndaha tysiño xaan?

⁴⁹ Tahan tahan quíví i sehin vehe ñuhu cahnu ta i zacuehi sii ñiyiví, zoco ñá tiín ndo sii yucuan. Zoco vityi zavaha ndo cuhva ña vaha ya vatyi tacuan ta cua naquita si cuhva catyi Tuhun Ndyoo sa cuende.

⁵⁰ Ta sa yaha cahan ra Jesús cuhva cuan ta zíqui i zandoo tandihí ra i casi ra sii ra ta i sino ra.

I sino minoo rayoco

⁵¹ I sindyico minoo ra yoco sii ra Jesús, ta ndisi ra minoo ñi zahma cahnu. Ta i tiín zandaru sii ra.

⁵² Zoco i zandoo ra zahma ra ta cuahan vavihi ra ñii ndii ñi ra.

I sindyaca ra sii ra Jesús nu titahan ra cu tyiño hebreo

⁵³ I sindyaca ra sii ra Jesús nu titahan ra cu zutu ya cahnu sihin ra zutu nahnu ta ra mandoñi ta ra maestro cuenda ley.

⁵⁴ Ta i sindyico ra Pedro sica sica ñi ndya cuhva ndya saa ra nuquehe vehe ra cu zutu ya cahnu, ta yucuan i quíhví ra ta i sicundyaa ra sihin ra policía yunuuhu vatyi visi ra.

⁵⁵ Ra zutu nahnu sihin tandihí inga ra cu tyiño hebreo, i oanducu xaan ra ñiyiví cua cuhva sa ndaa sa cuenda ra Jesús vatyi cuñi ra cahñi ra sii ra. Zoco ñá ñihi ra cuhva sa yatyí

⁵⁶ vazu cuaha ñiyiví saha sa ndaa ta i cahan ra cuendu zíqui ra Jesús, zoco ñá nacasi tahan sa cahan ra.

⁵⁷ Ndya nu ndihí tuhun i ñihi ra sii uu tahan ra, ta i cahan ra cuendu sata ra Jesús ta catyi ra:

⁵⁸ I siñi ndi catyi ra: "Cua cani vehe ñuhu cahnu ra Ndyoo sa i zavaha ñiyiví, ta sisi sa uñi quívi ñi ta cua zandei inga si sa yíví ñiyiví zavaha."

⁵⁹ Tacuan i catyi ra cuan, zoco zuun ñi ñá nacasi tahan cuhva i cahan ra sa cuenda ra Jesús.

⁶⁰ Ta zíqui i nduvita ra cu zutu ya cahnu nu yucu ra cuan. Ta i ndaca tuhun ra sii ra Jesús ta catyi ra:

¿Ñacu ña cohon ndaha ñi? ¿Ñaa sa cuu sa cahan ñiyiví ya zicun? Catyi ra.

⁶¹ Zoco ñá nacahan maa ra Jesús. Ta i ndaca tuhun tucu ra cu zutu ya cahnu sii ra inga saha ta catyi ra: ¿Atu ra Cristo cuun? ¿Atu zehe ra Ndyoo ra ii xaan cuun?

⁶² Ta i catyi ra Jesús sihin ra: Zuun ra cui, ta cua ndyehe ndo sii ra i quisi ndya gloria cuhva cundyaa ra siyo cuaha ra Ndyoo ta cuhva cua quisi ra ndya andiví sisivico.

⁶³ Tacuan i catyi ra Jesús, ta zíqui ra cu zutu ya cahnu, i cuxaan ra, ta i ndata ra zuun ñi zahma maa ra, ta i catyi ra: ¿Ñaa ca sa ndaa cuñi si vityi?

⁶⁴ Sa siñi ndo sa cahan ra ndya vaha ñi sii ra Ndyoo. ¿Ñaa catyi ndo vityi? Ta i nacahan tandihí ra ta i catyi ra vatyi nacuu ra vatyi iyo cuatyí ra.

⁶⁵ Ta zíqui i quisaha tyicu zíi ra nuu ra, ta i sihñi ra nuu ra, ta i cañi ra sii ra ta catyi ra sihin ra: ¡Nacoton yoo ra cañi suun! Ta i cati ra policía nuu ra.

I catyi ra Pedro vatyi ña sito ra sii ra Jesús

⁶⁶ Ta ndyaa ra Pedro nuquehe, ta i tuhva minoo muzu ra cu zutu ya cahnu cuan sii ra.

⁶⁷ Ta sa ndyehe ña vatyi ndyaa ra Pedro cuan yunuuhu cuan nduvixi ra ta i ndyehe vaha ña sii ra ta catyi ña: Cutahan aan sica noon sihin ra Jesús, ra ñuu Nazaret.

⁶⁸ Zoco i catyi ra Pedro: Ña site sii ra cuan, ta ña site ñaa tuhun cohon. Catyi ra. Ta i siñi siyo ra zuhva, ta zíqui i sacu saa minoo ndiví tyahnu.

⁶⁹ Ta i nandyehe ña cu muzu cuan sii ra inga saha ta catyi ña sihin ra yucu yucuan: Ra tahan ra Jesús cuu minoo ra ya.

⁷⁰ Ta i catyi tucu ra Pedro vatyi ña ndisa. Ta cuee ca i catyi tucu ra yucu cuan inga saha sihin ra

Pedro: Ndisa cuii vatyi minoo ra tahan ra cuu tucu oo vatyi cohon tañi cahan ñiyivi nu cu si Galilea. Catyi ra.

⁷¹ Tacuan ta i cahan ra Pedro ndya vaha ñi ta i tyiñaha ra ndyoo ta catyi ra: Ña site sii ra cahan ndoho tuhun.

⁷² Ta zuun ñi caa cuhva cuan, i sacu saa ndivi tyahnu sa cu uu yuhutí. Ta ziqui i nacohon iñi ra Pedro cuhva i catyi ra Jesús sihin ra: “Cuee ca sa vacu saa ndivi tyahnu sa cu uu yuhu ti, yoho cua catyun uñi saha vatyi ña siton sii.” Ta sa nacohon iñi ra Pedro cuhva cuan, i sacu xaan ra vatyi i nducuihya xaan iñi ra.

15

Nacuhva cuenda rasii ra Jesús sii ra Pilato

¹ Ta sa cundisi i zandoo ra tyiño, tandihí ra zutu nahnu ta ra mandoñi ta ra maestro cuenda ley ta tandihí inga ra cu tyiño hebreo. Ta i sihñi ra sii ra Jesús, ta i sindyaca ra sii ra nu ndyaa ra Pilato (ra cu gobernador).

² Ta i ndaca tuhun ra Pilato sii ra Jesús ta catyi ra: ¿Atu yoho cuu rey cuenda ñiyivi hebreo? Ta i catyi ra Jesús: Tacuan cu si tañi catyi moo.

³ Tacuan ta i tyaa ra zutu nahnu cuatyí sata ra Jesús cuaha xaan cuhva.

⁴ Ta ziqui i ndaca tuhun ra Pilato sii ra inga saha ta catyi ra: ¿Ñacu ña cohon ndaha cuii ñi? Ta cuaha xaan cuhva tyaa ra ya cuatyí saton.

⁵ Zoco ñá cahan ra Jesús ndaha cuii ñi. Ta iyo xaan i cuñi ra Pilato.

Saha ra Pilato sa cuu ra Jesús

⁶ Ta vico cuan tuhva ra Pilato tava sii minoo ra ñoho vehe caa, yoo ra cuu catyi ñiyivi.

⁷ Ta quivi cuan siñoho minoo ityi ra i sahñi tahan sihin ra cu tyiño. Minoo ra cuan nañi ra Barrabás, ta ñoho ra vatyi sahñi ra ñiyivi.

⁸ Ta i quasi cuaha xaan ñiyivi ta i sica ñu sii ra Pilato vatyi tava ra sii minoo ra ñoho vehe caa cuhva tuhva ra zavaha tahan cuiya.

⁹ Ta i ndaca tuhun ra Pilato sii ñu: ¿Atu cuñi ndo vatyi cua tave sii ra cu rey sii maa ndo ñiyivi hebreo?

¹⁰ Tacuan i catyi ra Pilato vatyi sito ra vatyi i nacuhva cuenda ra zutu nahnu sii ra Jesús sii ra vatyi cucuihna xaan iñi ra sii ra.

¹¹ Zoco ñihi xaan i tyihi ra zutu nahnu tyiño sihin ñiyivi vatyi nacaca ñu sii ra Barrabás.

¹² Ta ziqui i ndaca tuhun ra Pilato inga saha ta catyi ra: ¿Ta ñaa sa cuñi ndo cua zavehi sihin ra zacunañi ndo rey sii ñiyivi hebreo?

¹³ Ta i cana saa ñu ta catyi ñu: ¡Nacuu ra nu cruz!

¹⁴ Ta i catyi ra Pilato sihin ñu: ¿Ñaa cuenda? ¿Ñaa sa ña vaha i zavaha ra? Zoco i cana saa ñu ñihi ca ta catyi ñu: ¡Nacuu ra nu cruz!

¹⁵ I cuñi ra Pilato coo vaha ra sihin ñiyivi, ta yucuan cuenda i tava ra sii ra Barrabás. Ta i nacuhva cuenda ra sii ra Jesús vatyi cua ndoho ra sihin cuarta ta ziqui cua cuu ra nu cruz.

¹⁶ Ta i quihin zandaru sii ra Jesús, ta i sindyaca ra sii ra sisi vehe tyiño cahnu, ta i cana ra sii tandihí inga zandaru.

¹⁷ Ta ziqui i natyihí ra minoo zahma tixinda sii ra Jesús, ta i tyihi ra minoo corona iñu xiñi ra.

¹⁸ Ta i quisaha sacu ndyaa ra sii ra. I cana saa ra ta catyi ra: ¡Nacumi suun tata; yoho cuu rey sii ñiyivi hebreo!

¹⁹ I cañi xaan zandaru tuyoo caxytila xiñi ra Jesús, ta i tyicu zii ra sii ra. Ta i sicuñi siti ra nuu ra ta sacu ndyaa ra sii ra.

²⁰ Ta sa yaha sacu ndyaa ra sii ra, i tava ra zahma tixinda cuan, ta i natyihí ra zahma maa ra sii ra. Ta ziqui i quihin ra sii ra vatyi cua cahñi ra sii ra nu cruz.

Nu i tyaa ra sii ra Jesús nu cruz

²¹ Ta cuhva sa cuahan ra ityi i tahan ra sii minoo ra ñuu Cirene. I

quita ra sicuhu ta vasi ra ndya ñuu Jerusalén. Simón nañi ra. Zutu ra Alejandro sihin ra Rufo sii ra. Ta i zacuizo zandaru cuan cruz ra Jesús sii ra.

²² Ta cuahan tandihí ra nu nañi si Gólgota. Tuhun Gólgota cuan cuñi si catyi si Nu Yucu Yiqui Xiñi Ndiyí.

²³ Ta i saha ra vino zaca si sihin minoo sa nañi mirra vatyi coho ra Jesús, zoco ñá sihi ra sii si.

²⁴ Ta sa yaha tyaa ra zandaru sii ra Jesús nu cruz, ta ziqui i siziiqui ra vatyi cua ndyehe ra yoo ra cua zahacanaa minoo minoo zahma ra Jesús.

²⁵ Caa iin sa ñaha ñi cuu cuhva i tyaa ra sii ra Jesús nu cruz.

²⁶ Ta xiñi cruz cuan ndyaa letra i tyaa ra ta saha cuenda si ñaa sa cuu cuatyi ra. Tyehen catyi si: "Rey cuenda ñiyivi hebreo."

²⁷ I sañi ra cruz sa ndyaa minoo ra zuhu nuu siyo cuaha ra Jesús, ta inga ra siyo zatyi.

²⁸ Cuhva cuan i quita si cuhva catyi Tuhun Ndyoo nu catyi si: "Cua catyi ñiyivi vatyi ra iyo cuatyi cuu ra."

²⁹ I yaha ñiyivi nu ndyaa ra Jesús, ta i sacu ndyaa ñu sii ra, ta zavico xiñi ñi ca ñu. Ta catyi ñu: Yoho ra catyi vatyi cua canun vehe ñuhu ta uñi quivi ñi ta cua zanduvohon sii si,

³⁰ zacacun suun ta noon nu cruz.

³¹ Tacuan tucu ra zutu nahnu sihin ra maestro cuenda ley, i sacu ndyaa ra sii ra. Ta i catyi ra sihin ra tahan ra: I zacacu ra sii inga ñiyivi, zoco ña cuu zacacu ra sii ra.

³² Tatú cua noo ra nu cruz, tacuan ta cua sino iñi yo vatyi ra Cristo cuu ra. Ta rey sii maa yo ñiyivi hebreo cuu ra. Catyi ra cuan. Ta tacuan tucu ndya cuhva ndya ra zuhu, ra sihi iin ñi sihin ra Jesús, ta i cahan tucu ra ndya vaha ñi sii ra Jesús.

Nu i sihi ra Jesús

³³ Ta cuhva maa ora i nduñaa xaan nacahnu ñuu ñiyivi ndya cuhva ndya caa uñi sa sahiñi.

³⁴ Ta cuhva caa uñi cuan i cana saa ra Jesús minoo sa ñihi xaan, ta i catyi ra: Elí, Elí, ¿lama sabactani? Cuñi si catyi si: Zutu mañi yu, Zutu mañi yu, ¿ñaa cuenda i zandoon sii?

³⁵ Zuhva ñiyivi nandyaa yucuan, i siñi ñu ta catyi ñu: Tyizoho ndo; cana ra sii ra profeta Elías.

³⁶ Ta zuun ñi caa cuhva cuan i cacono minoo ra, ta i quihin ra sii minoo sa ñahma, ta i zatyii ra sii si sihin ndutya iya. I tyaa ra sii si nu minoo yutu, ta i zandaa ra sii si nu ndyaa ra Jesús vatyi cua coho ra ta catyi ra: Cuatu noo, nandyeho yo tatu cua quisi zanoo ra Elías sii ra.

³⁷ I sacu saa ra Jesús inga saha minoo sa ñihi xaan, ta ziqui i sihi ra.

³⁸ Zuun ñi caa cuhva cuan, i ndata zava zahma coco sa ndita sisi vehe ñuhu cahnu ndya ziqui ta ndya xuu.

³⁹ Ta minoo ra cu nuu sii minoo ziendu zandaru i iñi ndyaa ra ityi nuu ra Jesús. Ta sa ndyehe ra cuhva i sacu saa ra ta cuhva i sihi ra, i catyi ra: Ndisa cuii ra ihyia vatyi zehé Ndyoo cu sii ra.

⁴⁰ Ndyaa zava ñi i siyucu cuaha xaan ñu zahi. Ndyehe ñu sii ra Jesús. Minoo ña nandyaa sihin ñu nañi ña María Magdalena. Inga ña cuu ña María zahi ra Jacobo, ra luhlu ca, ta ra José. Ta inga ña nañi ña Salomé.

⁴¹ Yucuan ñu cuu ñu i sindyico sii ra ta i tyindyee ñu sii ra quivi i sica noo ra nu cu si Galilea. Ta sihin inga ñu cuan i quisi ñu ndya ñuu Jerusalén sihin ra.

I tyihi ra sii ra Jesús sisi ñaña

⁴² Ta sahiñi viarni i cuu si, quivi zanduvaha ñiyivi sa cua casi ñu zavuru vatyi zavuru cuu quivi tuhva ñu quitatu.

⁴³ Ta i quisi ra José ra ñuu Arimatea. Minoo ra mandoñi cuu ra ta catyi ñiyivi vatyi vaha xaan ñiyivi

cuu ra. Ndatu ra quiví cua tasi ra Ndyoo minoo ra cua cundyaca ñaha ñuu ñiyiví. Ná yuhu ra, ta i sahan ra nu ndyaa ra Pilato, ta i sica ra tumañi iñi sii ra vatyi cuu quihiñ ra coño ñuhu ra Jesús.

44 Iyo xaan i cuñi ra Pilato vatyi yatyi xaan i sihi ra Jesús. Ta i cana ra sii ra ndyaca ñaha sii zandaru, ta i ndaca tuhun ra sii ra tatu sa tañi i sihi ra Jesús.

45 Ta cuhva sa sito ra Pilato vatyi catyi ra cuan vatyi sa sihi ndisa cuii ra Jesús, ta ziñui i saha ra Pilato sa quihiñ ra José coño ñuhu ra.

46 I zata ra José minoo zahma vaha. I zanoo ra coño ñuhu ra Jesús, ta i cava noo ra zahma cuan sii si, ta i saqui ra sii si sisi minoo ñaña sa zavaha ñiyiví sisi yuu. Ta i tyazi ra yuhu ñaña cuan sihin minoo yuu cahnu.

47 I ndyehe ña María Magdalena sihin ña María zihí ra José nu i tyihi ra sii ra Jesús.

16

Cuhva i nandoto ra Jesús

1 I yaha quiví quitatu ñiyiví hebreo. Ta ziñui i zata ña María Magdalena ta ña María zihí ra Jacobo ta ña Salomé ndutya vixi xaan sahan vatyi cua natyihí ñu sii coño ñuhu ra Jesús.

2 Ta ñaha cuii ñi quiví tumingu i saa ñu ndya ñaña cuan cuhva sa caña ñicandyi ñi.

3 Ta i natuhun tahan ñu ta catyi ñu: ¿Yoo ra cua tyaa siyo yuu sa ndazi yuñaña cuan?

4 Tacuan ta i ndyehe ñu vatyi yuu cahnu sa sindazi yuñaña cuan sa siñi siyo si.

5 Ta i quihví ñu sisi ñaña cuan. Ta yucuan i ndyehe ñu minoo ángel. Tañi caa minoo ra yoco caa ra. Nandyee ra nu i cuu si siyo cuahra Jesús. Noho ra minoo zahma cañi. Cuisi xaan si. Ta iyo xaan i cuñi ñu.

6 Zoco i catyi ángel cuan sihin ñu: Ma yuhu ndo. Nanducu ndo sii ra Jesús, ra ñuu Nazaret, ra i sihi nu cruz. Zoco sa i nandoto ra. Yoñi ca ra ihyá. Ñaha ndo, ta ndyehe ndo nu i caa coño ñuhu ra.

7 Ta vityi cuahan ndo ta nacatyi ndo sihin ra i casi ra ta sihin ra Pedro. Tyehen catyi ndo: “Xihna ca ra Jesús cuahan ndya Galilea ta ziñui maa ndo. Yucuan cua ndyehe ndo sii ra, tañi sa nacatyi ra sihin ndo.”

8 Tacuan ta yatyi cuii ñi i quita ñu zihí cuan ñaña cuan. I cacono ñu. Iyo xaan i cuñi ñu. Nihi tacuan ñi ca ñu. Ta ñá nacatyi maa ñu nu sihin minoo ñiyiví vatyi yuhu xaan ñu.

I quituu ra Jesús nuu ña María Magdalena

9 Ta sa yaha nandoto ra Jesús, ta ñaa ca quiví tumingu xihna cuii ca i quituu ra nuu ña María Magdalena, ñaha sa i tava ra usa tahan tatyi cuihna.

10 Ta cuahan ña, ta i nacatyi maa ña sihin amigo ra Jesús vatyi i nducuihya xaan iñi ra. Ta sacu xaan ra.

11 Ta sa siñi ra sa catyi ña vatyi ndito ra Jesús ta sa ndyehe ña sii ra, ñá sino iñi ra.

12 Tacuan ta i quituu tucu ra Jesús inga saha nuu uu tahan amigo ra ityi cuahan ra sicuhu.

13 Ta i sahan ra cuan, ta i nacatyi ra sihin inga ra, zoco ñá sino tucu iñi ra sa cahan ra.

Cuhva i saha ra Jesús tyiño sii ra i casi ra

14 Tacuan ta i quituu tucu ra Jesús nuu sa usi iñin tahan ca ra i casi ra zuun ñi cuhva sa yucu ra mesa sasi ra xita. Ta i ndaca tuhun ra Jesús sii ra ñaa cuenda ña sino iñi ra sa nandoto ra vazu sa ndyehe ra tahan ra sii ra ta nacatyi ra sihin ra. Ta i catyi ra Jesús sihin ra vatyi ñihi xaan iñi ra ta ña niñi maa iñi ra ndaha ñi.

15 Ta i catyi tucu ra Jesús sihin ra: Cuahan ndo nacahnu ñuu ñiyiví, ta

zacoto ndo sii tandihí ñiyiví Tuhun Ndyoo.

¹⁶ *Tatu sino iñi ñu ta coo ndutya ñu cua cacu ñu. Ta ñiyiví ña sino iñi, ma ñihi tahvi añima ñu gloria.*

¹⁷ *Cua coo zeña sihin tandihí ñiyiví sino iñi sii. Tyehen cua zacuu ñu ta cua coto inga ñiyiví vatyi zacuaha ñu sa ndisa. Cua cutyiño ñu zivi ta cua tava ñu tatyi cuihna. Cua cuu cahan ñu zahan sa ñia tuhva ñu cahan.*

¹⁸ *Tatu cua tiin miñoo coo sii ñu a tatu cua coho ñu minoo sa xaan, ñahñi cua tahan ñu. Ta cua tyizo ñu ndaha ñu sii ñiyiví cuhu, ta cua nduvaha ñu.*

I ndaa xica ra Jesús ityi andiví

¹⁹ *Ta sa ndihí cahan ra Jesús ta i ndaa xica ñi ra ityi andiví, ta i sicundyaa ra siyo cuaha ra Ndyoo Zutu yo.*

²⁰ *Ta i quita ra i casi ra, ta i zacoto ra Tuhun Ndyoo nacahnu ñuu ñiyivi. Ta zuun ñi ra Jesús i tyindyee sii ra vatyi saha ra Jesús sa zavaha ra cuaha xaan sa ndyityi. Ta tacuan ta i sito ñiyiví vatyi sa ndisa cuu sa zacuaha ra. Ndihí si vityi.*

Tuhun Vaha Sa I Tyaa Ra San Lucas

Tasi ra Lucas minoo tuhun sii ra Teófilo

¹ Sa cuaha xaan ñiyivi nducu ñu cuhva tyaa ñu cuhva yozo caa i sicoo sa minoo minoo cuhva sa sino iñi yo

² tañi i nacatyi ra sica noo sihin ra Jesùs ndya ta xihna ñi, nu i quisaha zatyño ra, ta i tyindyee ra cuan sihin tyiño ra. Ta i ndyehe ra tandíhi sa zavaha ra.

³ Ta yuhvi tucu, i nducu cote tandíhi sa nacatyi ra cuan tatu ndisa cuii. Ta yucuan cuenda cuñi tyei sii si minoo minoo si vatyi coton, yoho Teófilo.

⁴ Cuñi sa cua coton vatyi sa ndisa cuii cuu cuhva sa zacoto ñiyivi suun.

Zacoto minoo ángel vatyi cua cacura Juan, ra cuazacoo ndutya sii ñiyivi

⁵ Quivi i sindyaca ñaha ra rey Herodes nu cu si Judea, sicoo minoo ra cu zutu cuenda vehe ñuhu hebreo, ta i sinañi ra Zacarías. Siñoho ra minoo ityi ra cu zutu sa nañi Abías. Elisabet i sinañi ñazíhi ra. Ta ra Aarón i cuu ñiyivi sahnu sii ña ta sa naha.

⁶ Ndoo xaan i cuu nduu tahan ñu ityi nuu ra Ndyoo vatyi i tyaa xaan ñu yahvi ley ra, ta yoñi i cuu tyaa cuatyi sata ñu.

⁷ Zoco yoñi maa zehe ña Elisabet i sicoo. Ta sahnu xaan nduu tahan ñu.

⁸ Ta minoo quivi sa i tahan si sii ra Zacarías sa cua zatyño ra ityi nuu ra Ndyoo

⁹ tañi sicoo costumbre cuenda ra cu zutu, ta i siziñi ra ta i tahan si sii ra Zacarías sa quihvi ra sisi vehe ñuhu cahnu nu ii, cua cahmi ra cutu ityi nuu ra Ndyoo.

¹⁰ Ta nii ñi sa sahmi ra cutu sisi vehe ñuhu ta tandíhi inga ñiyivi i

siyucu ñu ityi sata ta cahan ñu sihin ra Ndyoo.

¹¹ Ta i quituu minoo ángel ra Ndyoo ityi nuu ra Zacarías. Nandyaa ra ityi siyo cuaha nu sahmi ra cutu.

¹² Ta sa ndyehe ra Zacarías sii ángel cuan, iyo xaan i cuñi ra, ta i yuhu xaan ra.

¹³ Zoco i catyi ángel cuan sihin ra: Ma yuhun Zacarías vatyi i siñi ra Ndyoo sa cohon, ta cua ñihí ña Elisabet ñazíhun minoo zehe, ta cua zacunañi ndo sii ra Juan.

¹⁴ Zii xaan cua cuñun, ta cuaha xaan ñiyivi cua cuzii iñi vatyi cua cacu ra.

¹⁵ Vatyi cahnu xaan cua cuu ra nuu Ndyoo. Ma coho ra vino ta nu ndixi. Ta cua cutu cuii Tatyi Ii sii ra ndya ta ñoho ra sisi zihí ra cuee ca sa cacu ra.

¹⁶ Ta sa cuenda maa ra, cuaha xaan ñiyivi hebreo cua sino iñi ñu sii ra Ndyoo, ra ndyaca ñaha sii yo.

¹⁷ Cua zatyño ra tyiño ra Ndyoo vatyi cua coo xaan Tatyi Ii ra Ndyoo sihin ra, ta cuaha xaan tundyee iñi ra Ndyoo cua coo sii ra. Ta cua cuu ra tañi ra Elías, ra cahan Tuhun Ndyoo ta sa naha. Sa cuenda maa ra ta cua coo sa taxi sii ñiyivi sahnu sihin zehe ñu. Ta sa cuenda maa ra ta ñiyivi quiñi iyo cua zama ñu cuhva iyo ñu, ta cua tyaa ñu yahvi. Cua zandulisto ra sii ñiyivi, ta cua tiñin cuenda vaha ñu sii ra ndyaca ñaha sii yo. Tacuan i catyi ángel cuan.

¹⁸ Ta i nducu tuhun ra Zacarías sii ángel cuan: ¿Yozo cua cuu cote tatu sa ndisa cuii cuu cuhva ya? Vatyi sa sahnu xein, ta sahnu xaan ñazíhi.

¹⁹ Ta i catyi ángel cuan sihin ra: Yuhvi nañi Gabriel. Tuhve sica tyiño ra Ndyoo. Ta tasi ra sii, sa quehin suhun, ta zacote tuhun ya suun.

²⁰ Ta vityi cua nduñihun, ta ma cuu cohon ndya quivi cua tahan si cuhva sa catyi suhun vatyi ña sino iñun sa quehin. Ta cua cuu tandíhi

si tañi sa catyi suhun, catyi ángel cuan.

²¹ Ta ñiyiví i sindatu sii ra Zacarías sata vehe ñuhu, iyo xaan i cuñi ñu vatyi naha xaan i ñoho ra sisi vehe ñuhu.

²² Ta ziqui i quita ra, ta ñá cuu cahan ra sihin ñu, ta i sito ñu vatyi i ndyehe ra minoo sa ndyehe ra sisi vehe ñuhu. Ta i quisaha cahan ra sihin ñu sihin zeña ñi vatyi ña cuu cahan ra.

²³ Tacuan i cuu si, ta i saa quivi sa ndihí ndyizo tysiño ra Zacarías vehe ñuhu cuan. Ta i sinuhu ra ndya vehe ra.

²⁴ Ta sa yaha cuan ta ziqui i ñihí ña Elisabet minoo zehe. Ta ñá quita ña sata vehe ohon tahan yoo, ta i sica iñi ña:

²⁵ "Vaha xaan cuu cuhva zavaha maa ra Ndyoo sihin vatyi vityi ma cahan cuehe ca ñiyiví sii."

I zacoto minoo ángel sii ña María vatyi cua cacu ra Jesús

²⁶ Ta sa iñu yoo sa ñoho zehe ña Elisabet, ta ziqui i tasi ra Ndyoo sii ángel Gabriel ndya nu cu si Galilea ndya minoo ñuu sa nañi Nazaret

²⁷ vatyi cua cahan ra sihin minoo ñaha yoco sa cuñi tindaha sihin minoo ra sa nañi José. Ra rey David i cuu ñiyiví sahnu sii ra ta sa naha. Ta ñaha cuan, María nañi ña.

²⁸ I quituu ángel cuan nu ndyaa ña, ta catyi ra: Nacumi suun. Saha xaan ra Ndyoo sa vaha suun. Maa ra ndyaa suhun.

²⁹ Ta cuhva sa siñi ña sa cahan ángel cuan, ta iyo xaan i cuñi ña. Ta i sica iñi ña ñaa cuenda cahan ra cuhva cuan sihin ña.

³⁰ Ta i catyi tucu ángel cuan sihin ña: Ma yuhun María vatyi saha xaan ra Ndyoo sa vaha suun.

³¹ Cua coo minoo zehun. Ta Jesús cua zacunañun sii ra.

³² Cahnu xaan cua cuu ra, ta cua cunañi ra Zehe ra Ndyoo ra cahnu ca. Ta cua zacuu ra Ndyoo minoo rey sii ra tañi i cuu ra David, ñiyiví sii ra ta sa naha.

³³ Ta cua cundyaca ñaha ra sii ñiyiví hebreo tandihí cuii tyiemvu. Ta ma ndihí maa sa ndyaca ñaha ra. Catyi ángel cuan.

³⁴ Tacuan ta i ndaca tuhun ña María sii ángel, ta catyi ña: ¿Yozo caa cuu si cuhva ya vatyi tañaha ca coo yii? Catyi ña.

³⁵ Ta i catyi ángel cuan sihin ña: Tatyi Ii maa ra Ndyoo cua quasi zicun. Ta tundyee iñi sii Zutu mañi yo cua coo suhun. Yucuan cuenda lee sa cua cacu cuan cua cunañi ra Zehe ra Ndyoo.

³⁶ Ta tacuan tucu ña Elisabet tyixun. Sahnu xaan ña, zoco sa ñihí tucu ña minoo zehe. Tuhva xaan ñiyiví catyi vatyi ma cuu coo zehe ña, zoco vityi sa iñu yoo sa ñoho zehe ña

³⁷ vatyi ñahñi sa ma cuu zavaha maa ra Ndyoo. Catyi ángel sihin ña.

³⁸ Ta i catyi ña María: Muza maa ra Ndyoo cui. Nazacuu maa ra sihin cuhva catyun. Catyi ña. Tacuan ta cuahan ángel cuan.

Cuahan ña María cua ndyehe ña sii ña Elisabet

³⁹ Ta quivi cuan numi ñi i quita ña María, ta yatyi xaan cuahan ña minoo ñuu nu maa yucu ñi cuu si, nu cu si Judea.

⁴⁰ Ta i quihví ña vehe ra Zacarías, ta i saha ña minoo nacumi sii ña Elisabet.

⁴¹ Ta cuhva sa siñi ña Elisabet sa cahan ña María ta i natyoño lee sa ñoho sisi ña, ta i situ cuii Tatyi Ii sii ña.

⁴² Ta saa xaan i cahan ña, ta catyi ña: Cuaha ca sa vaha saha ra Ndyoo suun ta ziqui sii tandihí inga ñuzihi. Ta saha xaan ra sa vaha sii zehun sa ñoho sisun.

⁴³ ¿Ta ñaa ña cuu vii? ta vasi zíhi ra ndyaca ñaha sii; vasi cahan ña sihin.

⁴⁴ Ta zuun ñi cuhva sa siñi tuhun cohon, ta i natyoño lee sisi sihin sa zíhi xaan cuñi ra.

⁴⁵ Zíhi xaan cua cuñun, vatyi i sino iñun, ta cua cuu tuhun sa cahan ra Ndyoo suhun. Catyi ña Elisabet.

46 Ta i quisaha catyi ña María:
Zacahni sii ra Ndyoo sihin tandihí
cuii añime.
47 Ta zii xaan cuñi vatyi zacacu ra
Ndyoo sii.
48 Cundahvi iñi ra Ndyoo sii mi,
ñiha ndahvi. Ta vityi tandihí
tyiemvu cua catyi ñiyiví
sihin vatyi saha xaan ra
Ndyoo sa vaha sii.
49 Vatyi ra Ndyoo ra cahnu ca cuu
ra.
Ta cahnu xaan cuu sa zavaha ra
sihin.
Ii xaan cuu ziví ra.
50 Ta cua cundahvi iñi ra sii tandihí
ñiyiví yuhu sii ra.
51 Cahnu xaan cuu tyiño zavaha
ra. Cua tyaa siyo ra sii ñiyiví
zacahnu sii ñu.
52 Cua zanduluhlu ra sii ñu. Ta
cua zanducahnu ra sii ñiyiví
ndyihi.
53 Ñiyiví sa cuñi xaan coto sii ra,
saha xaan ra sa vaha sii ñu.
Ta ñu sica iñi vatyi sa vaha
ñu, ñahñi cua cuhva ra sii ñu.
54 Tyindyee ra sii ñiyiví hebreo, ñu
cuu muzu ra.
Ña naa iñi ra sii ñu, ta cundahvi iñi
ra sii ñu
55 tañi i catyi ra sihin ra Abraham
siin yo ta sihin zehe ra.
Catyi ña María.

56 Ta i ndoo ña María sihin ña
Elisabet uñi yoo, ta ziqui i sinuhu
ña ndya vehe ña.

Quivi i cacu ra Juan, ra cua zacoo ndutyá

57 I saa quivi sa cua cacu zehe ña
Elisabet, ta rayii i cuu zehe ña.

58 Ta ñiyiví sa yucu vatyi sihin ñu
ta ñiyiví sii ña i sito ñu vatyi vaha
xaan sa zavaha ra Ndyoo sihin ña.
Ta zii xaan i cuñi ñu iñi ñi sihin ña.

59 Ta sa cu uña quivi sa cacu lee
cuan, ta i sahan ñu sa tahndya ñii
xiñi xuu ra tañi catyi costumbre.
Ta i zacunañi ñu sii ra Zacarías
cuhva nañi zutu ra.

60 Zoco i catyi zihí ra: Ña tacuan
cuu si. Juan cua cunañi ra. Catyi ña.

61 Ta i catyi inga ñu sihin ña: ¿Ñaa
cuenda cua zacunañun Juan sii ra?
Yoñi ñiyiví sii ndo sa nañi tacuan.
Catyi ñu.

62 Ta i quisaha ndducu tuhun ñu
sihin zeña sii zutu ra vatyi cuñi ñu
coto ñu ñaa ziví cuñi ra sa cunañi ra.

63 Ta i sica ra minoo vitu vatyi
cua tyaa ra. Ta i tyaa ra ziví ra:
Juan cuu ziví ra. Tyaa ra. Ta tandihí
ñiyiví yucu yucuan, iyo xaan i cuñi
ñu.

64 Ta zuun ñi caa cuhya cuan
i cuu nacahan ra Zacarías, ta i
quisaha zacahnu ra sii ra Ndyoo.

65 Ta tandihí ñiyiví sa ndyaa yatyí
yucuan i yuhu xaan ñu. Ta i sito
tandihí ñiyiví yucu nu cu si Judea.

66 Ta tandihí ñiyiví sa siñi tuhun
cuan, i sica iñi ñu ta catyi ñu sihin
tahan ñu: ¿Ñaa ra cua cuu lee cuan?
Catyi ñu. Ta i tyindyee xaan ra
Ndyoo sii ra.

Zacahnura Zacarías sii ra Ndyoo

67 Ta i situ cuii Tatyi Ii sii ra
Zacarías zutu ra. Ta i quisaha ca-
han ra tuhun sa saha ra Ndyoo sii
ra. Ta catyi ra:

68 Cahnu xaan cuu ra Ndyoo Zutu
mañi yo, ra Ndyoo cuenda
maa yo hebreo vatyi i quasi
ra nu ndyaa yo, ta i zacacu ra
sii yo.

69 Ta saha ra minoo ra cahnu sii yo;
ñiyiví sii ra David muzu ra
Ndyoo cua cuu sii ra, ta cua
zacacu ra sii yo.

70 Tacuan i cahan ra Ndyoo sihin ra
profeta ta sa naha.

71 I catyi ra vatyi cua zacacu ra sii
yo ndaha ra xaan iñi sii yo ta
sii ra ña cuu ndyehe sii yo.

72 Ta tañi sa catyi ra Ndyoo sihin
ñiyiví sahnu sii yo, cua cun-
dahvi xaan iñi ra sii yo. Ta
ma naa iñi ra tuhun sa cahan
ra.

73 Ihyia cuu tuhun i catyi ra Ndyoo
sihin ra Abraham siin sahnu
yo.

⁷⁴ I catyi ra vatyi cua zacacu ra sii yo sii ra xaan iñi sii yo, ta ma cuyuhu yo zacahnu yo sii ra Ndyoo.

⁷⁵ Vatyi maa ra zanduvaha xaan sii yo ityi nuu ra. Ta zandundo xaan ra sii yo tandihí quiví cua coo yo ñuu ñiyiví ya.

Catyi ra Zacarías.

⁷⁶ Ta i cahan ra Zacarías sa cuenda ra Ndyoo ta catyi ra sihin lee cuan:

Ta yoho zehi, cua catyi ñiyiví vatyi minoo profeta ra Ndyoo cahnu cuun. Vatyi cua cuhun ityi nuu ra ndyaca ñaha sii yo, ta cua catyun sihin ñiyiví vatyi cua quisi ra.

⁷⁷ Ta cua zacoton sii ñiyiví vatyi cua zandasi ra Ndyoo cuatyí ñuu, ta cua zacacu ra sii ñuu.

⁷⁸ Vatyi cuñi xaan ra Ndyoo sii yo. Ta cundahvi iñi ra sii yo, ta zaquisi ra sii minoo ra cua tyindyee sii yo. Tañi minoo ñúhu ñicandyi cua cuu ra.

⁷⁹ Vatyi sihin sa zañaha ra sii ñiyiví, natava ra sii ñuu iyo nu ñaa sa cuenda cuatyí ñuu. Yuhu ñuu vatyi iyo ñuu nu ñaa, ta cua cuu cuui ñuu. Zoco cua zañaha ra sii ñuu yozo caa cua quihiví ñuu ityi vaha.

Catyi ra Zacarías.

⁸⁰ Ta ra luhlu cuan, i sahnu ra, ta i ndundyee ra sihin Tatyi Ii. Ta i sicoo ra minoo nu ityi xaan. Ta ziqui cuee ca zañaha ra sii ra sii ñiyiví hebreo, ta i quisaha cahan ra sihin ñuu.

2

Cuhva i cacu ra Jesús

¹ Ta quiví cuan sicoo minoo ra ndyaca ñaha sa nañi Augusto, ta i tasi ra tyiño vatyi cua coo minoo censo sii tandihí ñiyiví ñuu ñiyiví.

² Ta quiví cuan ndyaca ñaha ra Cirenio nacahnu nu cu si Siria.

³ Ta tahan si cunuhi tandihí ñiyiví ñuu ñuu vatyi cua cuhva ñu zivi ñuu yucuan.

⁴ Yucuan cuenda i quita ra José nu cu si Galilea ñuu Nazaret, ta cuahan ra nu cu si Judea ndya ñuu Belén. Yucuan cuu ñuu nu i cacu ra rey David ta sa naha. Cuahan ra José yucuan vatyi ñiyiví sii ra David cuu sii ra.

⁵ Cuahan ra sa cua cuhva ra zivi ra sihin ña María vatyi sa cuñi tindaha ñu. Ta sa cuñi cacu zehe ña María.

⁶ Ta nii ñi sa ndyaa ñuu yucuan, ta i tahan si quiví cacu zehe ña.

⁷ Ta i zacacu ña sii zehe ña, ra nuu, ta i zucu ña zahma sii ra. Ta i saqui ña sii ra sisi minoo canua nu sasi quiti vatyi ñá ñahi ñuu minoo vehe cundayaa ñuu vatyi ña nuña ca vehe hotél.

I cahan ángel sihin ra zacuenda mvee

⁸ Yatyi ñuu cuan yucu zuhva ra sisi cuhu vatyi zacuenda ra sii quiti zono ra sa sa cuua.

⁹ Ta zana ñi iñi ra ta i quituu minoo ángel Ndyoo nu yucu ra. Ta sa ndisi sii Zutu mañi yo i zandundisi si nacahnu nu yucu ra, ta i yuhu xaan ra.

¹⁰ Ta i catyi ángel cuan sihin ra: Ma yuhu ndo vatyi vasi nacatyí minoo sa vaha xaan sihin ndo. Zii xaan cua cuñi tandihí ñiyiví sa cuenda si.

¹¹ Vatyi vityi i cacu minoo ra ñuu ra David. Vasi ra sa cuenda maa ndo vatyi cua zacacu ra sii ñiyiví. Ra Cristo cuu ra, ta ra ndyaca ñaha sii yo.

¹² Ta ihya cuu cuhva cua nacoto ndo sii ra. Cua nañihi ndo sii lee cuan zucu ra zahma, ta catuu ra sisi minoo canua.

¹³ Ta zuun ñi caa cuhva cuan i saa cuaha xaan ca ángel sihin ángel cuan. Ta zacahnu ángel cuan sii ra Ndyoo, ta catyi ra:

¹⁴ Cahnu xaan cuu maa ra Ndyoo ra ndyaa gloria, ta nacoo sa vaha ta sa taxi sii ñiyiví ñuu ñiyiví.

Catyi ángel cuan.

15 Ta ziqui cua nanuhu ángel cuan ndya gloria, ta i catyi ra zacuenda mvee sihin tahan ra: Coho yo Belén. Cua ndyehe yo ñaa sa cuu cuhva i zacoto ra Ndyoo sii yo.

16 Ta numi xaan cuahan ra, ta saa ra ñuu Belén, ta i nañihí ra sii ña María sihin ra José. Ta catuu lee cuan sisi canua.

17 Ta sa yaha i ndyehe ra sii lee cuan, ta i nacatyi ra cuhva i catyi ángel cuan sihin ra sa cuenda lee cuan.

18 Ta tandihí ñiyivi i siñi tuhun cuan iyo xaan i cuñi ñu.

19 Zoco ña María, cuenda nacañi ñi iñi ña sa cuenda tuhun cuan.

20 Ta cuanuhu ra zacuenda mvee, ta zacahnu xaan ra sii ra Ndyoo sa cuenda tandihí sa i ndyehe ra ta sa i siñi ra cuhva i catyi ángel cuan sihin ra.

Saha cuenda ñu sii ra Jesús sii ra Ndyoo sisi vehe ñuhu cahnu

21 Ta sa ndu-uña quiví lee cuan, i sahndya ñu ñii xiñi xuu ra tañi catyi costumbre ñu, ta i zacunañi ñu sii ra Jesús tañi catyi ángel cuee ca sa ñihi ña María sii ra.

22 Ta sa yaha quiví cuhva catyi ley ra Moisés sa cuenda sa nduvaha ña ityi nuu Ndyoo, ta ziqui sindyaca ñu sii ra Jesús ndya ñuu Jerusalén vatyi cua cuhva cuenda ñu sii ra sii ra Ndyoo.

23 Tacuan i zavaha ñu vatyi catyi ley ra Ndyoo: "Rayii ra cacu sa xihna ñi zacuu minoo ñaha, cua cuhva cuenda ñu sii ra sii ra Ndyoo", catyi ley.

24 Ta i sahan ñu, ta saha cuenda ñu uu tahan quití tañi catyi ley maa ra Ndyoo nu catyi si tyehen: "Cuhva ndo uu tahan curuu a uu tahan paloma", catyi ley.

25 Ta quiví cuan sicoo minoo ra ñuu Jerusalén sa nañi Simeón. Minoo ra ndoo xaan i cuu ra, ta i zacahnu ra sii ra Ndyoo sa ndisa cuii. Ta ndatu ra sa cua quisí ra cua

zacacu sii ñiyivi hebreo. Ta ñoho Tatyi Ii ra Ndyoo sii ra.

26 Ta i zacoto Tatyi Ii sii ra vatyi ma cuu ra ndya cuhva ndya ndyehe ra sii ra cua zacacu sii ñiyivi. Cua ndyehe ra sii ra Cristo, ra cua tasi ra Ndyoo.

27 Ta i sahan ra Simeón vehe ñuhu cuhva catyi Tatyi Ii ra Ndyoo sihin ra. Ta i saa zutu ra ta zihí ra Jesús sihin maa ra vatyi cua zavaha ñu cuhva catyi ley.

28 Ta cuhva sa saa ñu nu ndyaa ra Simeón, ta i quihin ra sii ra Jesús i tyihi zucu ndaha ra. Ta i quisaha zacahnu ra sii ra Ndyoo ta catyi ra:

29 Zutu mañi yuu, nacui vityi sihin sa taxi añime.

Vatyi sa zavohon cuhva sa catyun sihin muzun.

30 Vatyi sa ndyehi sihin sití nui sii ra cua zacacu sii ñiyivi.

31 Sa cua zañohon sii ra sii tandihí ñiyivi.

32 Ihya ra cua zanducahnu ca sii ñiyivi hebreo, ñiyivi i casun.

Ta cua cuhva ra ya ñúhu sa cua zandundisi ityi sii inga ñiyivi sa yivi ñiyivi hebreo cuu.

Catyi ra Simeón.

33 Ta ra José sihin zihí ra Jesús, iyo xaan i cuñi ñu sihin cuhva cahan ra Simeón cuenda lee cuan.

34 Tacuan ta i cahan ra Simeón sihin ra Ndyoo sa cuenda ñu, ta ziqui i catyi ra sihin ña María, zihí ra Jesús: Ndyehun vatyi lee ya cua zanduva a cua zanduvita ra sii cuaha xaan ñiyivi hebreo. Cua cuu ra tañi minoo zeña, ta cuaha xaan ñiyivi cua cuxaan sii ra.

35 Ta uhvi xaan cua cuu añimon, María, tañi sa yaha zava minoo tyicca añimon. Ta cuhva sa sica iñi ñiyivi sisi añima ñu, casi xaan cua quita si. Catyi ra Simeón.

36 Ta yucuan ndyaa tucu minoo ñaha sa cahan Tuhun Ndyoo. Nañi ña Ana. Ra Fanuel i cuu zutu ña, ñiyivi sii ra Aser. Sa sahnu xaan ña, Ndyo luhlu ña ta tindaha ña, zoco usa cuiya ñi ta i sihi yii ña.

³⁷ Ta quivi cuan ñandahvi i cuu ña, ta cumi xico cumi cuiya ña. Ta ñá quita ña sisi vehe ñuhu vatyi ñiyaca ta ndiyiyaca i cahan ña sihin ra Ndyoo. Ta iyo saha ñá sasi ña ta cahan ña sihin ra Ndyoo.

³⁸ Ta zuun ñi caa cuhva sa cahan ra Simón ta i saa tucu ña Ana nu ndyaa ra José ta ña María sihin lee. Ta i nacuhva ña tyahvi ndyoo sii ra Ndyoo cuenda ra. Ta i quisaha cahan ña cuenda ra Jesús sihin tandihí ñiyiví sa ndatu quivi cua cacu ñiyiví ñuu Jerusalén.

I sinanuhu ñu ndya ñuu Nazaret

³⁹ Ta sa ndihí zavaha ñu tandihí sa catyi ley ra Ndyoo ta i sinanuhu ñu ndya nu cu si Galilea ndya ñuu Nazaret nu cuu ñuu ñu.

⁴⁰ Ta i sahnu ra Jesús. Ta i ndundyee ca ra sihin sa siñi tuñi ra Ndyoo. Ta i tyindyeer xaan ra Ndyoo sii ra.

Cuhva i cahan ra luhlu Jesús sihin ra sito xaan sisi vehe ñuhu cahnu

⁴¹ Ta ra José sihin zihí ra Jesús tuhva ñu sahan ñuu Jerusalén tahan tahan cuiya sa cuenda vico zuhun.

⁴² Ta sa ndusi ra Jesús sa usi uu cuiya ra, ta i sahan ñu ñuu Jerusalén tañi tuhva tandihí ñiyiví sahan sa cuenda vico cuan.

⁴³ Ta sa ndihí vico cuan ta cuanu ñu, zoco i ndoo ra Jesús ñuu Jerusalén, ta ñá sito ra José ta zihí ra.

⁴⁴ I sica iñi ñu vatyi ndihí ra sihin ñu vatyi cuaha xaan ñiyiví cuahan sihin ñu. Ta sa minoo quivi sica itiy ñu, ta ziquí i nanducu ñu sii ra ticui amigo ñu ta ñiyiví sii ñu.

⁴⁵ Zoco ñá nañihí ñu sii ra. Yu-cuan cuenda i sinanuhu sata ñu ndya ñuu Jerusalén cua nanducu ñu sii ra.

⁴⁶ I yaha uñi quivi ta ziquí i nañihí ñu sii ra sisi vehe ñuhu cahnu. Ndyaa ra mahñu ra maestro. Tyizoho ra Jesús sa cahan ra ta nducu tuhun ra sii ra.

⁴⁷ Ta tandihí ra i siñi sa cahan ra Jesús, iyo xaan i cuñi ra sihin sa siñi tuñi sii ra Jesús ta sihin tuhun cahan ra, ndihí ca.

⁴⁸ Ta sa ndyehe zutu ra ta zihí ra sii ra, iyo xaan i cuñi ñu. Ta i catyi zihí ra sihin ra: Zehe luhli, ¿ñaa cuenda i zavohon cuhva ya sihin ndi? Catyi ña. Zutun ta yuhvi i sica xaan iñi ndi sa cuendon, ta i nanducu xaan ndi suun. Catyi ña.

⁴⁹ Ta i catyi ra Jesús sihin ñu: ¿ñaa cuenda nanducu ndo sii? ¿Atu ña sito ndo vatyi cuñi si sa zatyine tyiño Zuti? Catyi ra.

⁵⁰ Zoco ñá cutuñi iñi ñu tuhun cahan ra sihin ñu.

⁵¹ Ta cua nuhu ra sihin ñu ndya ñuu Nazaret, ta i tyaa ra yahvi sii ñu. Ta i nacañi iñi ña María sa cuenda cuhva i cahan ra.

⁵² Ta ra Jesús i sahnu ra, ta cahnu ca nduu ra, ta i nducuaha ca sa siñi tuñi sii ra. Ta zihí xaan i cuñi ra Ndyoo sihin ra ta ñiyiví ndihí ca.

3

Cuhva i cahan ra Juan, ra i zacoo ndutya sii ñiyiví

¹ Ta sa sahun cuiya sa ndyaca ñaha ra Tiberio nacahnu, ta ra Poncio Pilato i cuu ra gobernador nu cu si Judea. Ta ndyaca ñaha ra Herodes nu cu si Galilea. Ta yañi ra, ra Felipe cuu ra ndyaca ñaha nu cu si Iturea sihin Traconite. Ta ra Lisianas ndyaca ñaha ra nu cu si Abilinia quivi cuan.

² Ta ra Anás sihin ra Caífas i cuu ra cu nuu sii tandihí ra cu zutu. Ta quivi cuan i cahan ra Ndyoo sihin ra Juan zehe ra Zacarías minoo nu itiy xaan nu sindyaa ra.

³ Ta i sica noo ra Juan tandihí ñuu sa ndyaa yatyí ñi nu ndyaa yutya sa nañi Jordán. I nacatyí ra sihin ñiyiví vatyí nazama ñu cuhva iyo ñu ta coo ndutya ñu. Ta ziquí cua zandasi ra Ndyoo cuatyí ñu.

⁴ Tañi catyi si nuu libro i tyaa ra Isaías, minoo ra profeta ta sa naña. Nu catyi ra tyehen:

Cua cuiñi ndo nduzu minoo ra cana
saa minoo nu ityi xaan.

Ta catyi ra cuan: "Tañi zanduvaha
ndo minoo ityi, tacuan zan-
duvaha ndo afíima ndo vatyi
cua quisi ra ndyaca ñaha sii
yo. Tañi zandundoo ndo ityi,
tacuan nazama ndo cuhva
iyo ndo.

⁵ Ta tañi zanandutu ndo tandihí
xahva, ta tañi zandundaa
ndo tandihí yucu ta zandun-
doo ndo nu yacula ityi ta zan-
duvaha ndo nu quiñi caa,
tacuan cuñi si sa zama ndo
cuhva iyo ndo.

⁶ Tacuan ta tandihí ñiyiví cua
ndyehe sii Zehe ra Ndyoo,
ra cua zacacu sii yo."

Tacuan i tyaa ra Isaías ta sa naha
vattyi cuhva cuan cua cahan ra
Juan sihin ñiyiví.

⁷ Tacuan i cahan ra Juan sihin
ñiyiví. Ta cuhva sa siñi ñu sa cahan
ra ta i catyi ñu sihin ra vattyi cuñi ñu
sa zacoo ndutyta ra sii ñu. Ta ziqui
i catyi ra sihin ñu: ¡Ñiyiví quiñi
xaan iyo cuu ndo tañi coo! ¿Yoo
sa nacatyi sihin ndo vattyi cuu cacu
ndo sihin cuhva sa cua tasi tuñi
xaan ra Ndyoo sii ñiyiví?

⁸ Cuñi si sa zama ndisa cuii ndo
cuhva iyo ndo, ta zavaha ndo sa
vaha. Ta ma catyi ndo vattyi maa ra
Abraham cuu zetu ndo, ta ma catyi
ndo vattyi maa ra cua zacacu sii
ndo. Ma zacahnu ndo sii ndo vattyi
vazu sihin yuu ya ta cuu zavaha ra
Ndyoo ñiyiví sii ra Abraham sihin
si.

⁹ Tañi minoo yutu sa ña saha
siti cuu ndo. Vattyi ña zavaha ndo
cuhva cuñi ra Ndyoo. Ta yutu sa ña
saha siti, sahndya ñiyiví sii tu. Ta
sahmi ñu sii tu. Ta zuun ñi cuhva
cuan cua cuhun maa ndo nu cayu
ñúhu. Catyi ra Juan.

¹⁰ Ta i ndaca tuhun ñiyiví sii ra
ta catyi ñu: ¿Ñaa sa cuñi si zavaha
ndi? Catyi ñu.

¹¹ Ta i nacatyi ra Juan sihin ñu:
Ndoho ra iyo uu tahan camisa,

nacuhva ndo minoo sii ra ñahñi. Ta
ra iyo sa casi, nacuhva tucu ra sii ra
ñahñi. Catyi ra.

¹² Ta i saa coyo tucu zuhva ra
zatyiyahvi sii ñiyiví xuhun cuenda
ra ndyaca ñaha, ta i cuñi ra coo
ndutya ra. Ta i ndaca tuhun ra sii
ra Juan: Maestro, ¿ñaa sa cuñi si
zavaha ndi? Catyi ra.

¹³ Ta i catyi ra Juan sihin ra: Ma
zatyiyahvi zana ndo sii ñiyiví mi-
noo cuhva ña catyi ley. Catyi ra Juan.

¹⁴ Tacuan ta i ndaca tuhun tucu
zuhva ra zandaru sii ra Juan ta
catyi ra: Ta nduhvi tucu, ¿ñaa sa
cuñi si zavaha ndi? Catyi ra. Ta i
catyi ra Juan sihin ra: Ma quindaya
ndo ndaha tyiño ñiyiví. Ta ma za-
yuhu xaan ndo sii ñiyiví. Ma tyaa
ndo cuatyi sata ñu tatu ña ndisa.
Ta ndoo ndo vaha ta yahvi ñi ndo.
Catyi ra Juan.

¹⁵ Ta i nacañi iñi ñiyiví sa cuenda
ra Juan tatu ra Cristo cuu ra a
yiví vattyi ndatu ñu sa cua quisi ra
Cristo.

¹⁶ Ta i catyi ra Juan sihin tandihí
ñu: Ndisa zacoo ndutye sii ndo si-
hin ndutyta, zoco wasi inga ra cahnu
ca ta ziqui mi. Ña tahan si sii, nu
sa cui muzu ra ta cuize ndisa ra,
zoco zuun ñi maa ra i saha tyiño sii.
Ta maa ra cua zacoo ndutya sii ndo
sihin Tatyi Ii ta sihin ñúhu.

¹⁷ Sa ndaha ra pala ra, ta cua zan-
duvii ra siti trigo ra, ta cua tava zin
ra zoo si. Cua zandu-iin ra sii trigo
cuan, ta cua cucumi vaha ra sii si,
ta cua cahmi ra zoo si sisi minoo
ñúhu sa ma ndahva ca. Tacuan i
catyi ra Juan sihin ñiyiví.

¹⁸ Ta sihin cuaha xaan ca cuhva
i cahan ra Juan sihin ñiyiví, ta i za-
yuhu ra sii ñu, ta i nacatyi ra vattyi
cua quisi minoo ra cua zacacu sii
ñiyiví.

¹⁹ I nacatyi ra Juan sihin ra rey
Herodes tandihí cuii sa ña vaha sa
i zavaha ra vattyi i quiñi ra sii ña
Herodías, ñazihí ra Felipe yañi ra.

²⁰ Cuñi si sa zanduvaha ra Herodes cuhva iyo ra, zoco i zavaħa ra minoo ca sa ña vaha ta i tyihi ra sii ra Juan vehe caa.

Cuhva i sicoo ndutya ra Jesús

²¹ Cuaha xaan ñiyiví i zacoo ndutya ra Juan, ta i zacoo ndutya ra sii ra Jesús. Ta cuhva sa sicoo ndutya ra Jesús, i cahan ra sihin ra Ndyoo, ta i nuña andívı.

²² Ta i noo Tatyi Ii ziqui ra tañi minoo paloma. Ta i siñi ñiyiví minoo nduzu sa quita andívı ta catyi si: Yoho cuu zehi, ra cuñi xein. Zii xaan cuñi suhun. Catyi nduzu cuan.

Ñiyiví sahnu sii ra Jesús

²³ Oco usi cuiya ra Jesús ta i quisaha zatyiño ra. Tandihí ñiyiví i sica iñi ñu vatyi zehe ra José cuu sii ra. Ta ra José, zehe ra Elí cuu sii ra.

²⁴ Ta ra Elí, zehe ra Matat cuu sii ra. Ta ra Matat, zehe ra Leví cuu sii ra. Ta ra Leví, zehe ra Melqui cuu sii ra. Ta ra Melqui, zehe ra Jana cuu sii ra. Ta ra Jana, zehe ra José cuu sii ra.

²⁵ Ta ra José cuan, zehe ra Matatías cuu sii ra. Ta ra Matatías, zehe ra Amós cuu sii ra. Ta ra Amós, zehe ra Nahum cuu sii ra. Ta ra Nahum, zehe ra Esli cuu sii ra. Ta ra Esli, zehe ra Nagai cuu sii ra.

²⁶ Ta ra Nagai, zehe ra Maat cuu sii ra. Ta ra Maat, zehe ra Matatías cuu sii ra. Ta ra Matatías, zehe ra Semei cuu sii ra. Ta ra Semei, zehe ra José cuu sii ra. Ta ra José cuan, zehe ra Judá cuu sii ra.

²⁷ Ta ra Judá, zehe ra Joana cuu sii ra. Ta ra Joana, zehe ra Resa cuu sii ra. Ta ra Resa, zehe ra Zorobabel cuu sii ra. Ta ra Zorobabel, zehe ra Salatiel cuu sii ra. Ta ra Salatiel, zehe ra Neri cuu sii ra.

²⁸ Ta ra Neri, zehe ra Melqui cuu sii ra. Ta ra Melqui, zehe ra Adi cuu sii ra. Ta ra Adi, zehe ra Cosam cuu sii ra. Ta ra Cosam, zehe ra Elmodam cuu sii ra. Ta ra Elmodam, zehe ra Er cuu sii ra.

²⁹ Ta ra Er, zehe ra Josué cuu sii ra. Ta ra Josué, zehe ra Eliezer cuu sii ra. Ta ra Eliezer, zehe ra Jorim cuu sii ra. Ta ra Jorim, zehe ra Matat cuu sii ra.

³⁰ Ta ra Matat, zehe ra Leví cuu sii ra. Ta ra Leví, zehe ra Simeón cuu sii ra. Ta ra Simeón, zehe ra Judá cuu sii ra. Ta ra Judá, zehe ra José cuu sii ra. Ta ra José, zehe ra Jonán cuu sii ra. Ta ra Jonán, zehe ra Eliaquim cuu sii ra.

³¹ Ta ra Eliaquim, zehe ra Melea cuu sii ra. Ta ra Melea, zehe ra Mainán cuu sii ra. Ta ra Mainán, zehe ra Matata cuu sii ra. Ta ra Matata, zehe ra Natán cuu sii ra.

³² Ta ra Natán, zehe ra David cuu sii ra. Ta ra David, zehe ra Isaí cuu sii ra. Ta ra Isaí, zehe ra Obed cuu sii ra. Ta ra Obed, zehe ra Booz cuu sii ra. Ta ra Booz, zehe ra Salmón cuu sii ra. Ta ra Salmón, zehe ra Naasón cuu sii ra.

³³ Ta ra Naasón, zehe ra Aminadab cuu sii ra. Ta ra Aminadab, zehe ra Aram cuu sii ra. Ta ra Aram, zehe ra Esrom cuu sii ra. Ta ra Esrom, zehe ra Fares cuu sii ra. Ta ra Fares, zehe ra Judá cuu sii ra.

³⁴ Ta ra Judá, zehe ra Jacob cuu sii ra. Ta ra Jacob, zehe ra Isaac cuu sii ra. Ta ra Isaac, zehe ra Abraham cuu sii ra. Ta ra Abraham, zehe ra Taré cuu sii ra. Ta ra Taré, zehe ra Nacor cuu sii ra.

³⁵ Ta ra Nacor, zehe ra Serug cuu sii ra. Ta ra Serug, zehe ra Ragau cuu sii ra. Ta ra Ragau, zehe ra Peleg cuu sii ra. Ta ra Peleg, zehe ra Heber cuu sii ra. Ta ra Heber, zehe ra Sala cuu sii ra.

³⁶ Ta ra Sala, zehe ra Cainán cuu sii ra. Ta ra Cainán, zehe ra Arfaxad cuu sii ra. Ta ra Arfaxad, zehe ra Sem cuu sii ra. Ta ra Sem, zehe ra Noé cuu sii ra. Ta ra Noé, zehe ra Lamec cuu sii ra.

³⁷ Ta ra Lamec, zehe ra Matusalén cuu sii ra. Ta ra Matusalén, zehe ra Enoc cuu sii ra. Ta ra Enoc, zehe ra Jared cuu sii ra. Ta ra Jared, zehe ra Mahalaleel cuu sii ra. Ta ra

Mahalaleel, zehe ra Cainán cuu sii ra.

³⁸ Ta ra Cainán, zehe ra Enós cuu sii ra. Ta ra Enós, zehe ra Set cuu sii ra. Ta ra Set, zehe ra Adán cuu sii ra. Ta ra Adán, zehe ra Ndyoo cuu sii ra.

4

Cuhva i nducu coto ihñi cuihna sii ra Jesús

¹ Ta i situ cuui Tatyi Ii Ndyoo sii ra Jesús sa yaha sicoo ndutya ra. Ta i quita ra nu cu si yuu Jordán, ta sindyaca Tatyi Ii ra Ndyoo sii ra minoo nu ityi xaan.

² Yucuan i sindyaa ra uu xico quivi, ta i nducu coto ihñi cuihna sii ra. Ta sisi quivi cuan ñahñi maa i sasi ra. Ta yaha cuan, ta i sizoco xaan ra.

³ Ta i catyi cuihna sihin ra: Tatu ndisa vatyi Zehe ra Ndyoo cuu suun, catyun sihin yuu sa catuu ihyá vatyi nanduu si pan. Catyi cuihna sihin ra Jesús.

⁴ Ta i catyi ra Jesús sihin cuihna: Catyi Tuhun Ndyoo vatyi ña maa sihin sa casi ñi yo ta cundito yo. Sihin sa sasi yo ndito coño ñuhu yo, zoco sihin sa tyaa yo yahvi tuhun cahan ra Ndyoo ta ndito añima yo sa ndisa cuii. Catyi ra Jesús sihin cuihna.

⁵ Tacuan ta i sindyaca cuihna sii ra Jesús xiñi minoo yucu zucu xaan, ta i zañaha ra tandihí cuii ñuu niyivi sii ra.

⁶ Ta i catyi cuihna sihin ra Jesús: Ndaha mi ndyaa tandihí ya vatyi saha ra Ndyoo sa cundyaca ñehi tandihí ñuu niyivi ya. Ta cuu cuhve sii si sii yoo ra cuñi, ta cua cundyaca ñaha ra.

⁷ Ta cua cuhve tandihí si suun tatu cua cuiñi situn nui ta zacah-nun sii. Catyi cuihna sihin ra Jesús.

⁸ Zoco i catyi ra Jesús sihin cuihna: Cuiñi siyo suun sii, cuihna, vatyi catyi Tuhun Ndyoo vatyi iin ñi sii maa ra Ndyoo ra ndyaca ñaha sii ndi cua zacahnu ndi. Ta iin ñi

tyiñ maa ra cua zacuu ndi. Catyi ra Jesús sihin cuihna.

⁹ Yaha cuan ta i sindyaca cuihna sii ra Jesús ndya ñuu Jerusalén. Ta i zandaar sii ra xiñi vehe ñuhu cahnu. Ta i catyi ra sihin ra Jesús: Tatú ndisa vatyi Zehe ra Ndyoo cuu suun, ndavon ndya nu ñuhu.

¹⁰ Vatyi catyi Tuhun Ndyoo: "Cua cuhva ra Ndyoo tysiño sii ángel ra vatyi zacuenda ra suun.

¹¹ Cua naqueen ra suun sihin ndaha ra ta ma ñiquehe sohon sihin minoo yuu." Catyi cuihna sihin ra Jesús.

¹² Ta i catyi ra Jesús sihin ra: Catyi Tuhun Ndyoo vatyi ma nducu coto ihñi ndi sii ra Ndyoo ra ndyaca ñaha sii ndi. Catyi ra.

¹³ Ta ñá cuu zandavi ñaha cuihna sii ra Jesús. Ta cuahan cuihna zuhva ñi quivi.

Iquisaha ra Jesús zatyiñ o ra tysiño ra Ndyoo nu cu si Galilea

¹⁴ Ta sa yaha sa nducu coto ihñi cuihna sii ra Jesús, ta ziqui i quisí nanuhu ra Jesús ndyaa Galilea. Situ cuui ra sihin tundyee iñi Tatyi Ii. Ta i cahan ñiyivi tuhun ra nacahnú cuii ityi cuan.

¹⁵ Ta i zacuaha ra sii ñiyivi sisi vehe ñuhu tahan tahan ñuu. Ta i zacahnu tandihí ñiyivi sii ra.

Cuhva i zavaha ñiyivi sihin ra Jesús ñuu Nazaret

¹⁶ Tacuan ta i nasaa ra Jesús ñuu Nazaret nu i sahnú ra. Ta minoo quivi quitatu ñiyivi i quihvi ra vehe ñuhu tañi sa tuhva maa ra zavaha, ta i sicuiñi ndyaa ra vatyi cua cahvi ra Tuhun Ndyoo.

¹⁷ Ta i saha ñu minoo libro Tuhun Ndyoo sii ra sa i tyaa ra Isaías, minoo ra profeta ta sa naha. Ta i nuña ra libro, ta i nañhi ra nu catyi si tyehen, ta i cahvi ra tuhun ya:

¹⁸ Ndyaa Tatyi Ii ra Ndyoo sihin, vatyi maa ra i tyaa tysiño sii, vatyi nacatyi tuhun vaha ra sihin ñiyivi ndahvi.

I tasi ra sii, sa zacote sii ñu ndyaa ndaha ra ña vaha vatyi cua quita ñu.

Ta zacote sii ñu cuaa vatyi cua nandyehe ñu.

Ta zacote sii ñu ndyeehe tundoho vatyi cua cacu ñu.

19 Ta zacote sii ñiyivi vatyi sa saa quivi cua cuhva xaan ra Ndyoo sa vaha sii ñu.

Tacuan i cahvi ra Jesùs.

20 Ta sa ndihi cahvi ra, ta i nacazi ra libro, ta nacuhva ra sii minoo ra zatyinõ vehe ñuhu cuan. Ta i sicundayaa ra. Ta i ndyeehe xaan tandihí ñiyivi yucuan sii ra.

21 Ta i quisaha catyi ra sihin ñu: Zun ñi vityi natahan si ityi nuu maa ndo cuhva catyi tuhun ya. Catyi ra Jesùs.

22 Ta tandihí ñiyivi yucuan yucuan, vaha i cahan ñu sa cuenda ra Jesùs. Ta iyo cuñi ñu sihin sa cahan ra vatyi vaha xaan si. Ta i nducu tuhun ñu sii tahan ñu: ¿Atu yivi ra ihya cuu zehe ra José? Catyi ñu.

23 Ta i catyi ra Jesùs sihin ñu: Site cuhva sica ifi ndo. Ta tyehen cua catyi ndo sihin: "Yoho ra cu médico, xihna ca sii moo zanduvohon." Ta cua catyi tucu ndo: "Sa siñi ndi sa zavohon ñuu Caper-naum. Cuhya cuan zavaha tucun ñuu moo." Tacuan cua catyi ndo sihin. Catyi ra Jesùs.

24 Tacuan ta i catyi ra Jesùs: Sa ndisa catyi sihin ndo vatyi minoo ra profeta, ña tyaa ñiyivi ñuu ra yahvi sii ra.

25 Ta catyi sa ndisa sihin ndo vatyi cuaha xaan ñundahvi hebreo, ñu sihi yi, i sico quivi i sica noo ra Elías. Ta ñá coon zavi uñi cuiya zava. Ta sico xaan tama nacahnu.

26 Zoco ñá tasi ra Ndyoo sii ra Elías vatyi tyindyeer a sii numinoo ñundahvi hebreo. I tasi ra Ndyoo sii ra nu ndyaa minoo ñiandahvi minoo ñuu nañi Sidón nu cu si Sarepta. Catyi ra Jesùs.

27 Ta i catyi tucu ra Jesùs: Cuaha xaan ra hebreo cuhu sihin cuehe sa tyahyu ra quivi i sica noo ra Eliseo, ra cu profeta. Zoco ñá nduvaha numinoo ra hebreo, zoco i nduvaha ra Naamán, minoo ra ñuu Siria. Catyi ra Jesùs.

28 Ta sa siñi ñiyivi ñoho vehe ñuhu tuhun cuan, i cuxaan xaan tandihí ñu.

29 Ta i nduvita ñu. Ta i tiin ñu sii ra Jesùs sindyaca ñu sii ra yuñuu nu iñi noo vatyi cua zavita ñu sii ra yucuan.

30 Zoco i yaha ra Jesùs mahñu ñu, ta cuahan ra.

Zanduvaha ra Jesùs sii minoo ra ñoho tatyi cuihna

31 Ta cuahan ra Jesùs ñuu Caper-naum nu cu si Galilea. Ta tahan quivi quitaru ñiyivi i zacuaha ra sii ñu.

32 Ta iyo xaan i cuñi ñu sihin cuhva cahan ra vatyi cahan ra tañi minoo ra sito xaan tañi cahan ra ndyaca ñaha vatyi cahan ra sihin sa siñi tuñi ra Ndyoo.

33 Ta sisí vehe ñuhu sico minoo ra ñoho minoo tatyi ña vaha sii, ta saa xaan i cana saa ra ta catyi ra:

34 Zañon sii ndi, yoho ra Jesùs. ¿Ñaa sa cuñun sihin ndi? Catyi ra. ¿Atu vasi zanoon sii ndi? Site yoo ra cuun. Yoho cuu ra Ii, ra tasi ra Ndyoo. Tacuan i catyi ra cuan zacuu tatyi cuihna.

35 Ta i cahan ra Jesùs sihin tatyi ña vaha cuan, ta i catyi ra: Taxi ñi, ta zañon sii ra ya. Catyi ra. Tacuan ta i zanduva tatyi cuihna sii ra cuan mahñu nu yucu ñiyivi, ta i quita si, ta ñá zañicuehe si sii ra.

36 Ta i yuhu xaan tandihí ñiyivi i ndyeehe. Ta i catyi ñu sihin tahan ñu: ¿Ñaa tuhun cuu ya? Iyo xaan cuhva ta tundyee iñi sii ra Jesùs, ta cuu cahan ra sihin tatyi cuihna ta quita si. Catyi ñu.

37 Ta nacahnu cuii yucuan i cahan xaan ñiyivi tuhun ra.

Zanduvaha ra Jesús sii tyizo ra Simón Pedro

³⁸ Ta i quita ra Jesús vehe ñuhu cuan, ta i quihví ra vehe ra Simón. Ta cuhu xaan tyizo ra Simón sihin cahñi. Ta i cahan ñu sihin ra Jesús sa cuenda ñia.

³⁹ Ta i saa ra Jesús nu catuu ñia, ta i catyi ra sihin cuehe cuan vatyi naquita si. Ta i quita cahñi cuan sii ñia. Ta zuun ñi cuhva cuan i nduvita ñia, ta i zavaha ñia sa casi ra.

Zanduvaha ra Jesús sii cuaha xaan ñiyiví cuhu

⁴⁰ Ta cuhva sa cua cuizo ñicandyi i quisi ndyaca ñiyiví sii tandihí ñiyiví cuhu iyo vehe ñu, ñaa ndihí cuii ca cuehe. Ta i tyizo ra Jesús ndaha ra ziquí minoo minoo ñu, ta i zanduvaha ra sii ñu.

⁴¹ Ta i quita tucu tatyi cuihna sii cuaha xaan ñiyiví cuan, ta i cana saa si ta catyi si: Yoho cuu ra cu Zehe Ndyoo. Catyi si. Zoco ñá saha ra Jesús sa cahan ca si vatyi nacoto si sii ra vatyi ra zacacu sii ñiyiví cuu ra.

Nacatyi ra Jesús Tuhun Ndyoo nacahnu Galilea

⁴² Ta sa cundisi inga quivi, ta i quita ra Jesús ñuu cuan. Cuahan ra minoo nu ityi xaan nu yoñi ñiyiví iyo. Zoco i nanducu ñiyiví sii ra, ta i saa ñu nu ñoho ra, ta cuñi ñu sa ndoo ra sihin ñu.

⁴³ Zoco i catyi ra Jesús sihin ñu: Cuñi si sa zacote sii ñiyiví inga ñuu cuhva ndyaca ñaha ra Ndyoo vatyi yucuan cuenda i tasi ra Ndyoo sii.

⁴⁴ Ta tacuan i sica noo ra Jesús, ta i nacatyi ra Tuhun Ndyoo tandihí vehe ñuhu nacahnu Galilea.

5

Cuhva i saha ra Jesús ndatu sii ra tiin tyiyaca, ta i ñihi xaan ra tyiyaca

¹ Minoo saha nandyaa ra Jesús yuhu miñi sa nañi Genesaret, ta i saa coyo ñiyiví. Ta tiñin xaan i siyucu ñu vatyi cuñi ñu cuiñi ñu Tuhun Ndyoo.

² Ta i ndyehe ra Jesús uu tahan barco yatyí ñi yumiñi. Ta sa quita coyo ra tiin tyiyaca ta nacatya ra taraya ra.

³ Tacuan ta i quihví ra Jesús sisi minoo barco sa cuu sii ra Simón, ta i catyi ra sihin ra vatyi nazatuhva ra zuhva ca sii tu nu cono ca. Ta ziquí i sicundyaa ra Jesús sisi barco, ta i quisaha zacuaha ra sii ñiyiví yucu yumiñi cuan.

⁴ Cuhva sa ndihí cahan ra ta i catyi ra sihin ra Simón: Zacuhun barcun ndya nu cono ca ta cañi ndo taraya ndo nu ndutya vatyi cua tiin ndo tyiyaca. Catyi ra Jesús.

⁵ Ta i nacahan ra Simón ta catyi ra: Maestro, sa zatyíño xaan ndi ñiyaca cuii, ta ñá ñihi maa ndi. Zoco tatu moo catyi, cua cañi tucu ndi taraya. Catyi ra Simón.

⁶ Ta sa zavaha ra cuhva cuan, ta i tiin ra cuaha xaan tyiyaca, ndya cuhva i tahndya taraya ra sihin sa vee ti.

⁷ Ta i saha ra zeña sii ra tahan ra sa ñoho inga barco vatyi naquisi tyindyee ra sii ra. Ta i quisi ra, ta i zacutu ra nduu tahan barco cuan sihin tyiyaca cuan, ta ndya cuhva i cuñi ndyee tu.

⁸ Ta sa ndyehe ra Simón Pedro cuhva cuan, ta i sicuiñi siti ra nuu ra Jesús. Ta i quisaha catyi ra sihin ra: Zandoon sii, tata, vatyi ra iyo xaan cuatyi cui.

⁹ Iyo xaan i cuñi ra Simón ta tandihí ra ndihí sihin ra vatyi cuaha xaan tyiyaca i tiin ra.

¹⁰ Ta iyo xaan cuñi tucu ra Jacobo sihin ra Juan zehe ra Zebedeo. I zatyíño ra iin ñi sihin ra Simón. Ta i catyi ra Jesús sihin ra Simón: Ma iyo xaan cuñun. Ndya vityi ma tiin con tyiyaca. Cua tiun sii ñiyiví vatyi cua zacoton Tuhun Ndyoo sii ñu. Catyi ra Jesús sihin ra Simón.

¹¹ Ta sa yaha zandaa ra barco ra nu ñuhu ityi, i zandoo tandihí uñi tahan ra sii tandihí ndaha tyíño ra, ta cuahan ra sihin ra Jesús.

Zanduvaha ra Jesús sii minoo ra tyahyu

¹² Ta minoo quivi ndyaa ra Jesús minoo ñuu nu ndyaa minoo ra tyahyu. Ta sa ndyehe ra sii ra Jesús, sicuiñi siti ra nuu ra Jesús, ta i nacañi noo ra xiñi ra ndya nu ñuhu. Ta i sica xaan ra sii ra ta catyi ra: Tata, iyo cuhva suun; ta cuu zanduvohon sii tatu cuñun. Catyi ra.

¹³ Ta i tyizo ra Jesús ndaha ra xiñi ra, ta i catyi ra: Cuñi. Sa nduvohon. Ta zuun ñi caa cuhva cuan i quita cuehe tyahyu cuan sii ra.

¹⁴ Ta i catyi ra Jesús sihin ra: Ma nacatyun sihin numinoo ñiyivi. Zoco cuhun nu ndyaa ra cu zutu ta cuhvón ñaa ndihí sa tahan si cuhvón tañi i catyi ra Moisés, ta cua cuu si minoo sa ndaa sii ra cu zutu vatyi sa nduvohon. Catyi ra Jesús sihin ra.

¹⁵ Zoco vazu i catyi ra Jesús sihin ra vatyi ma nacatyi ra sihin ñiyivi, zoco cuaha xaan ñiyivi i ñihi tuhun cuan. Ta cuaha xaan cuaha xaan ñiyivi i titahan vatyi cuñi ñu tyizoho ñu sa cahan ra Jesús, ta cuñi ñu sa zanduvaha ra sii ñu.

¹⁶ Zoco i quita ra Jesús nu yucu ñu ndya minoo nu ityi xaan nu yoñi ñiyivi iyo, ta yucuan i cahan ra sihin ra Ndyoo.

Zanduvaha ra Jesús sii minoo ra xii

¹⁷ Minoo quivi zacuaha ra Jesús sii ñiyivi, ta yucu zuhva ra fariseo ta ra maestro cuenda ley hebreo. I quita ra cuan ñuu Jerusalén ta inga ñuu ndyihí nacahnu Galilea ta Judea. Ta sicoo xaan tundyee iñi ra Ndyoo sihin ra Jesús quivi cuan, ta i zanduvaha xaan ra sii ñiyivi cuhu.

¹⁸ Tacuan ta i saa coyo ra ndyizo sii minoo ra cuhu sihin minoo tyuhva. I inducu ra cuhva quihví ra sisi vehe vatyi cuñi ra caqui ra sii ra nu ndyaa ra Jesús.

¹⁹ Zoco ñá ñihi ra cuhva quihví ra vatyi tuu xaan ñiyivi. Tacuan ta i ndaa ra xiñi vehe, ta i tyaa siyo ra

zuhva tyiyo, ta i zanoo ra sii ra nu nandyaa ra Jesús mahñu ñiyivi.

²⁰ Ta sa ndyehe ra Jesús vatyi sino xaan iñi tandihí ra, ta i catyi ra sihin ra cuhu: Tata, sa ndasi tandihí cuatyun. Catyi ra Jesús.

²¹ Tacuan ta ra maestro cuenda ley cuan sihin ra fariseo i quisaha sica iñi ra: “¿Yoo ra cuu ra ya? Quiñi xaan cahan ra sii ra Ndyoo. Sica iñi ra vatyi cuu zandasí ra cuatyí yo, zoco minoo tuhun ñi maa ra Ndyoo cuu zandasí cuatyí yo.”

²² Zoco i sito ra Jesús cuhva sica iñi ra, ta i quisaha catyi ra sihin ra: ¿Ñaa cuenda sica iñi ndo tacuan?

²³⁻²⁴ ¿Ñaa sa ña yíi ca catyi yo? ¿Atu yíi ca catyi yo? “Sa ndasi cuatyun”, a yíi ca catyi yo: “Nduviton ta cacon; sa nduvohon.” Ña yíi catyi yo: “Sa ndasi cuatyun.” Vatyi yíi sa ndyehe yo cuu cuhva cuan. Ma coto ñiyivi tatu ndisa a ña ndisa. Zoco cua ndyehe ñu tatu zanduvaha yo sii minoo ñiyivi sa ndisa. Ta vityi cua zañehi sii ndo vatyi cuu zacui tandihí vatyi ra i quisi ndya gloria cui. Cuu zandasí cuatyí ñiyivi, ta cuu zanduvehi sii ra ya. Catyi ra Jesús. Ta i catyi ra sihin ra cuhu catuu yucuan: Catyi suhun, nduviton. Naquihin tyuhvon ta cunuhun ndya vehun.

²⁵ Ta zuun ñi caa cuhva cuan i nduvita ra, ta i naquihin ra tyuhva ra, ta cua nuhu ra ndya vehe ra. Ta ityi cuahan ra zacahnu xaan ra sii ra Ndyoo.

²⁶ Ta iyo xaan i cuñi tandihí ñiyivi, ta i zacahnu ñu sii ra Ndyoo. Ta i yuhu xaan ñu, ta i catyi ñu: Vityi ndisa i ndyehe yo minoo sa iyo xaan caa.

Cana ra Jesús sii ra Leví

²⁷ Ta sa yaha cuan, ta i quita ra Jesús vehe cuan, ta cuahan ra. Ta i ndyehe ra sii minoo ra tava xuhun cuenda ra ndyaca ñaha romano. Levínañira. Ta i catyi ra Jesús sihin ra: Coho sihin.

28 Tacuan ta i nduvita ra Leví. I zandoo ra tandihí sa sii ra, ta cuahan ra sihin ra Jesú.

29 Tacuan ta i zavaha ra Leví minoo vico cahnu xaan vehe ra sa cuenda ra Jesú. Ta cuaha xaan ra tava xuhun cuenda ra ndyaca ñaha sindyaa mesa sihin inga ca ñiyivi.

30 (I sica iñi ra fariseo ta ra maestro cuenda ley hebreo vatyi ñahñi cuatyi maa ra), ta yucuan cuenda i quisaha cahan cuehe ra sihin ra sica noo sihin ra Jesú, ta catyi ra: ¿Ñaa cuenda sasi ndo ta sihi ndo sihin ra tava xuhun ta ra iyo xaan cuaty?

31 Ta i catyi ra Jesú sihin ra: Ra iyo vaha, ña siñi ñuhu minoo médico sii ra. Zoco ra cuhu, siñi ñuhu médico sii ra.

32 Ta maa ndo sica iñi ndo vatyi vaha xaan ndo; ñahñi cuatyi ndo cuñi ndo. Yucuan cuenda ña vasi tyindyei sii maa ndo. Vasi tyindyei sii ñu sito vatyi iyo cuatyi ñu vatyi cua nazama ñu cuhva iyo ñu. Catyi ra Jesú.

Ndaca tuhun ñiyivi sii ra Jesú ñaa cuenda ña cuñi ra sica noo sihin ra cahñi zoco ra sii ra

33 Tacuan ta i quisaha ndaca tuhun ra cuan sii ra Jesú ta catyi ra: Ra ndyico sii ra Juan ta sii ra fariseo, tuhva ra sahñi zoco sii ra, ta cahan ra sihin ra Ndyoo. Zoco ra sica noo sihin moo, tandihí quivi sasi ra xita ta sihi ra ndutya. ¿Ñaa cuenda?

34 Ta i catyi ra Jesú sihin ra: ¿Atu cuu sa ma cuhva ndo casi ñu yucu minoo vico tindaha tatu ndyaa ra i tindaha sihin ñu? Ma cuu. Cuñi ñu casi ñu vatyi zii xaan cuñi ñu.

35 Zoco cua saa quivi cua ndihí vico. Cua cuhun ra i tindaha vatyi cua quindya ñiyivi sii ra. Tacuan ta ziqui ma casi ra sica noo sihin ra xita.

36 Tacuan ta i cahan ra Jesú ziqui minoo cuhva, ta i catyi ra: Yoñi ñiyivi cua cahndya minoo zahma

saa ta natyaa ñu zuhva si sii minoo zahma sahnu vatyi cua ndiyi zahma saa cuan, ta ziqui cua tahndya ca zahma sahnu cuan. Ta ña vaha naha si ndihí ca tatu natyaa ñu zahma saa sii zahma sahnu.

37 Ta yoñi zavaha ndixi panela sisi quizi sahnu vatyi cua cuizo si ta ndaa si. Ta cua cahndi quizi cuan tatu sahnu si. Ta cua cati ndixi ta cua tiví quizi.

38 Cuñi si quizi saa tatu zavaha ñiyivi ndixi panela, ta ma ndoyo ñuhu si.

39 Ta tatu sa sihi minoo ra ndixi panela sa ndaa, ma cuñi ra sa ña ndaa vatyi catyi ra: "Vaha ca ndixi sa ndaa." Ndixi sahnu ca cuu si cuan. (Ta tacuan iyo ñiyivi sihin costumbre ñu. Sa caan xaan ñu sii sa sahnu, ta ma cuu nazaca si sihin minoo cuhva saa.)

6

Tohon ra sica noo sihin ra Jesú yoco trigo quivi quitatu ñiyivi

1 Minoo quivi quitatu ñiyivi i yaha ra Jesú mahñu itu trigo ñiyivi. Ta ra sica noo sihin ra i tohon ra zuhva yoco trigo ta i zavii ra sihin ndaha ra, ta sasi ra sii si.

2 Tacuan ta i catyi zuhva ra fariseo sihin ra: Ña catyi ley yo sa zatyño yo quivi quitatu ñiyivi. ¿Ñaa cuenda zatyño ndo?

3 Ta i catyi ra Jesú sihin ra: ¿Atu tañaha ca cahvi ndo cuhva i zavaha ra David ta ra ndihí sihin ra minoo quivi i sizoco xaan ra?

4 I quihví ra sisi vehe ñuhu, ta i quihin ra pan ii. Ta i sasi ra sii si, ta saha ra sii ra ndihí sihin ra. Ta catyi ley vatyi maa ñi ra cu zutu tahan si casi pan cuan. Catyi ra Jesú.

5 Ta i catyi tucu ra Jesú sihin ra: Ra i quisi ndya gloria cui, ta ndyaca ñaha tuqui quivi quitatu ñiyivi.

Zanduvaha ra Jesú sii minoo ra na-ityi ndaha

6 Ta inga quivi quitatu ñiyivi i quihví ra Jesú sisi vehe ñuhu ta

zacuaha ra sii ñiyivi. Ta yucuan i ndyehe ra sii minoo ra na-ityi ndaha siyo cuaha.

⁷ Ta ra maestro cuenda ley hebreo sihin ra fariseo i ndyehe xaan ra sii ra Jesús tatu cua zanduvaha ra sii ra cuan quivi quitatu ñiyivi. Tacuan ta cua cuu tyaa ra cuatyi sata ra.

⁸ Zoco sa sito ra Jesús cuhva sica iñi ra, ta i catyi ra sihin ra na-ityi ndaha: Nduvita. Ta cuiñi ndyoon mahñu. Ta i nduvita ra, ta sicuiñi ndyaa ra mahñu.

⁹ Ta ziñqui i ndedu tuhun ra Jesús sii ra yucu yucuan ta catyi ra: Minoo ñi tuhun cua nduçu tuhin sii ndo. ¿Atu catyi ley vatyi zavaha yo sa vaha a sa ña vaha quivi quitatu ñiyivi? ¿Atu zacacu yo sii ñiyivi a cañhi ndihí yo sii ñu?

¹⁰ Ta i ndyehe ra Jesús sii minoo minoo ra yucu yucuan. Ta i catyi ra sihin ra cuhu: Nandica ndohon. Ta i nandica ra ndaha ra, ta i nduvaha ndaha ra.

¹¹ Ta zuhva ra yucu yucuan, i cuxaan xaan ra, ta i natuhun tahan ra yozo caa cua zavaha ra sihin ra Jesús.

I casi ra Jesús usi uu tahan ra apóstol

¹² Ta minoo quivi i ndaa ra Jesús minoo yucu vatyi cua caca tahvi ra sii ra Ndyoo. Ta i cahan ra sihin ra Ndyoo ñiyaca cuii.

¹³ Ta cuhva sa cundisi i cana ra sii tandihí ra sica noo sihin ra, ta i casi ra usi uu tahan ra vatyi cuu ra apóstol, ta cua tava ra Jesús tyiño sii ra.

¹⁴ Ta ihyá cuu zivi sa usi uu tahan ra: Ra Simón Pedro, ta yañi ra, ra Andrés. Ra Jacobo, ra Juan, ra Felipe, ta ra Bartolomé.

¹⁵ Ta ra Mateo, ta ra Tomás, ta ra Jacobo zehe ra Alfeo ta ra Simón Zelote.

¹⁶ Ta ra Judas, yañi ra Jacobo, ta ra Judas Iscariote, ta cua xico sii ra Jesús.

Zacuaha ra Jesús sii cuaha xaan ñiyivi

¹⁷ Ta i noo ra Jesús yucu cuan sihin sa usi uu tahan ra cuan. Ta i sicuiñi ndyaa ra minoo nu ndaa sihin ra sica noo sihin ra ta sihin cuaha ca ñiyivi, ñu i quita coyo nacahnu Judea ta ñuu Jerusalén ta ñuu Tiro sihin ñuu Sidón sa ndyaa yuhu tyañuhu. I saa ñu yucuan vatyi cua cuiñi ñu sa cahan ra Jesús. Ta ñu cuhu, cuñi ñu sa zanduvaha ra sii ñu.

¹⁸ Ta ñiyivi ñoho tatyi ña vaha, i nduvaha tucu ñu.

¹⁹ Ta tandihí ñu, cuñi ñu tiñ ñu sii ra Jesús vatyi iyo tundyee iñi ra Ndyoo sii ra Jesús, ta i zanduvaha si sii tandihí ñu.

Niyivi ñihi tumañi iñi ta ñiyivi ma ñihi tumañi iñi

²⁰ Tacuan ta i ndyehe ra Jesús sii ñiyivi sica noo sihin ra. Ta i catyi ra: Tandihí ndoho sa ndahvi, zii xaan cuu sii ndo vatyi tahan si sii ndo sa cundyaca ñaha ra Ndyoo sii ndo.

²¹ Ta tandihí ndoho sa sizoco vityi, zii xaan cuu sii ndo vatyi cua coo quivi ta ma ndyehe ca ndo zoco. Ta tandihí ndoho sa sacu xaan vityi, zii xaan cuu sii ndo vatyi cua coo quivi ñahñi ca tucuihya iñi cua coo sii ndo. Ta cua vacu ndo sihin sa zii cuñi ndo.

²² Zii xaan cuu sii ndo tatu ña cuu ndyehe ñiyivi sii ndo, ta tatu cua tava ñu sii ndo nu yucu ñu, a tatu cahan cuehe ñu sii ndo a tatu catyi ñu vatyi ñiyivi ña vaha cuu ndo vatyi sino iñi ndo sii mi, ra i quisí ndya gloria cui.

²³ Zii xaan cuñi ndo quivi ndyehe ndo tundoho cuan, ta ndava ndo sihin sa zii cuñi ndo vatyi cahnu xaan sa cua cuhva ra Ndyoo sii ndo gloria. Zuun ñi cuhva ña vaha cuan i zavaha ñiyivi sahnú ta tylemu sihin ra profeta.

²⁴ Zoco ndahvi ndoho ra cuca vityi vatyi sa iyo sa zii sii ndo ihyá ñuu ñiyivi ya.

25 Ta ndahvi ndoho ra sica iñi vatyi ñahñi sa cumañi sii ndo vityi vatyi cua coo quiñi cua ndyehe xaan ndo zoco. Ta ndahvi ndoho tatu zii xaan cuñi ndo vityi vatyi cua coo quiñi cua nducuihya xaan iñi ndo, ta cua vacu xaan ndo.

26 Ta ndahvi ndoho tatu catyi tandihí ñiyiví vatyi vaha xaan ndo vityi vatyi zuun fi cuhva cuan i cahan ñiyiví sahnu sii fi cuenda ra i catyi vatyi profeta ra Ndyoo cuu ra, ta ña ndisa ra.

Cuñi xaan ndo sii ñiyiví xaan iñi sii ndo

27 Tandihí ndoho ra siñi sa quehin, catyi sihin ndo vatyi cuñi xaan ndo sii fi xaan iñi sii ndo. Zavaha ndo sa vaha sihin ñiyiví ña cuu ndyehe sii ndo.

28 Cahan vaha ndo sihin ñiyiví cahan ndya vaha ñi sii ndo, ta cahan ndo sihin ra Ndyoo cuenda ñiyiví zavaha sa ña vaha sihin ndo.

29 Tatu iyo ra cati ii siyo xiti ndo, cuhva ndihí ndo inga siyo nacati ra. Tatu iyo ra quindyaa siqueta ndo, cuhva ndihí ndo camisa ndo sii ra.

30 Cuhya ndo ñaa ndihí sa sica ñiyiví sii ndo, ta tatu iyo ra quindyaa sa sii ndo, ma nandaca ndo sii si.

31 Tatu cuñi ndo sa cua zavaha ñiyiví sa vaha sihin maa ndo, tacuan zavaha tucu maa ndo sihin maa fi.

32 Tatu iin fi sii ñiyiví cuñi xaan sii ndo cuñi ndo, ¿ñaa sa vaha zavaha ndo cuhva cuan? vatyi tacuan tucu zavaha ñiyiví quiñi xaan iyo. Cuñi xaan fi sii ñiyiví sa cuñi sii maa fi.

33 A tatu zavaha ndo sa vaha sihin ñiyiví zavaha sa vaha sihin ndo, ¿ñaa sa vaha zavaha ndo cuhva cuan? vatyi tacuan tucu zavaha ñiyiví quiñi xaan iyo.

34 A tatu saha noo ndo ndaha tyiño ndo sii ñiyiví vatyi cuñi ndo sa zaha fi tumañi iñi sii ndo, ¿ñaa sa vaha zavaha ndo cuhva cuan? vatyi ñiyiví quiñi xaan iyo, saha

noo fi sa sii fi ta ndatu fi sa cua nacuhva tucu ñiyiví sii si.

35 Zoco maa ndo, cuñi xaan ndo sii fi xaan iñi sii ndo. Ta zavaha ndo sa vaha. Ta cuhva noo ndo sa sii ndo, zoco ma cuatu ndo ñaa tumañi iñi cua zavaha tucu maa fi sii ndo. Ta tacuan ta cahnu xaan sa vaha cua ñihí ndo nu ndyaa ra Ndyoo. Ta sa ndisa cuii cua cuu ndo zehe ra Ndyoo, ra cahnu ca. Vatyi ra Ndyoo, vaha ñiyiví cuu ra sihin ñiyiví quiñi xaan iyo ta sihin fi ña saha tyahvi ndyoo sii ra.

36 Yucuan cuenda cundahvi xaan iñi ndo sii ñiyiví tañi maa ra Ndyoo cundahvi xaan iñi ra sii fi.

Ma cahan cuehe yo sii ñiyiví

37 Ma cahan cuehe ndo sii ñiyiví coto catyi ra Ndyoo vatyi ña vaha zavaha tucu maa ndo. Ma catyi ndo vatyi ña vaha ñiyiví, ta ma catyi tucu ra Ndyoo vatyi ña vaha ndo. Zaha ndo tucanhui iñi sii ñiyiví, ta cua zaha ra Ndyoo tucanhui iñi sii maa ndo.

38 Cuhva maa ndo sa siñi ñuhu sii ñiyiví, ta cua cuhva tucu maa ra Ndyoo sa siñi ñuhu sii maa ndo. Tañi ñiyiví vaha tatu xico fi ñaa sa xico fi sii ndo, situ cuii saha fi ndya cuhva sitya cuii ñi ca si. Tacuan tucu cua zavaha ra Ndyoo sihin ndo. Vaha xaan cua tyicuhva ra sa vaha ndya cuhva sitya cuii si, ta cua cuhva ra sii ndo. Vatyi tañi cuhva cua cuhva maa ndo sii ñiyiví, tacuan cuu cuhva cua cuhva ra Ndyoo sii maa ndo. Catyi ra Jesú.

39 Ta ziqui i cahan ra Jesú sihin fi sihin minoo cuhva ta catyi ra: Ma cuu zañaha minoo ra cuaa ityi sii inga ra cuaa. Cua canacava nduu tahan ra sisi xahva.

40 Ta cahnu ca cuu minoo ra cu maestro ta ziqui ra zacuaha sihin ra, zoco tatu sa ndihí zacuaha ra, cuu nduu ra tañi maestro ra.

41 ¿Ñaa cuenda ndyehun mihin luhlu cuii fi sa ñoho siti nuu yañun, ta ña zohon cuenda mihin cahnu sa ñoho siti nuun?

⁴² Ta ñaa cuenda catyun sihin yañun vatyi nacuhva ra sa tavon mihin luhlu sa ñoho siti nuu ra? ta ña tuu iñun vatyi minoo mihin cahnu xaan ñoho siti nuun. Cuhva cuan zohon tuhun vatyi vaha xoon, ta ña ndisa. Tava xihnon mihin cahnu sa ñoho siti nuun, ta cua ndundisi ndyehun, ta cua cuu tavon mihin sa ñoho siti nuu yañun.

Nacoto yo tatu vaha minoo yutu tatu saha tu yucu vixi vaha

⁴³ Minoo yutu vaha, ña saha tu siti ña vaha. Ta minoo yutu ña vaha, ña saha tu siti vaha.

⁴⁴ Nacoto yo ñaa yutu cuu tahan tahan tu sa cuenda siti saha tu. Vatyi minoo tu mihndya ma cuhva tu mango, ta minoo iñu ma cuhva tu yucu vixi sa nañi uva.

⁴⁵ Ta tacuan tucu sihin ñiyivi. Minoo ra vaha, cahan ra tuhun vaha sa iyo añima ra. Ta ñiyivi ña vaha, ña vaha añima ñu, ta cahan ñu sa quiñi sa iyo añima ñu vatyi ñaa ndihi sa situ añima ñiyivi, yucuan cuu sa cahan ñu.

Cuhva cua cuu si sihin ñiyivi tyaa yahvi sa cahan ra Jesús, ta cuhva cua cuu si sihin ñiyivi ña tyaa yahvi

⁴⁶ ¿Ñaa cuenda catyi ndo sihin: “Zutu mañi yuu, Zutu mañi yuu”, ta ña zavaha ndo cuhva catyi sihin ndo?

⁴⁷ Tatu iyo ra cua quisi nu ndyei, ta siñi ra sa quehin, ta zavaha ra sii si, ihya cuu cuhva iyo ra:

⁴⁸ Cuu ra tañi minoo ra i zandaa vehe. Cono xaan sitya ra ndya tahan ra minoo yuu cahnu, ta i zandaa ra vehe ra ziñi yuu cuan. Ta quivi i coon xaan zavi, ñihi xaan i yaha ndutya saha vehe ra, zoco ña cuu zanduva si vehe ra vatyi ndyaa si ziñi yuu cuan.

⁴⁹ Zoco ra ña siñi sa quehin, ta ña zavaha ra sii si, cuu ra tañi minoo ra ña zavaha cimiento, ta i zandaa ra vehe ra nu ñuhu ñi. Ta ñihi xaan i yaha ndutya saha vehe ra, ta

tañi tyehen ñi i nduva vehe ra, ta i ndoyo ñuhu si.

7

Zanduvaha ra Jesús sii minoo muzu ra ndyaca ñaha sii zandaru

¹ Cuhva sa ndihi cahan ra Jesús sihin ñiyivi ta cua nanuhu tucu ra inga saha ndya ñuu Capernaum.

² Ta yucuan ndyaa minoo ra ndyaca ñaha sii minoo ziendu zandaru. Ta minoo muzu ra, ra sa cuñi xaan ra, cuhu xaan ra, ta cuñi cuu ra.

³ Quiví sa sito ra cu nuu sii zandaru cuan tuhun ra Jesús, i tasi ra sii zuhva ra sahnu hebreo vatyi caca ra tumañi iñi sii ra Jesús sa quisi zanduvaha ra sii muzu ra.

⁴ Ta i saa coyo ra sahnu cuan nu ndyaa ra Jesús, ta i sica xaan ra tumañi iñi sii ra ta catyi ra: Iyo minoo ra romano. Ra cu nuu sii zandaru cuu ra.

⁵ Ta vaha xaan ñiyivi cuu ra sihin maa yo ñiyivi hebreo ndya cuhva ndya i tyiyahvi maa ra ta i ndaa minoo vehe ñuhu ndi.

⁶ Tacuan ta cuahan ra Jesús sihin ra sahnu cuan, zoco cumañi ca saa ra vehe ra cu nuu cuan, ta i tasi ra cuan zuhva amigo ra, ta i catyi ra sihin ra Jesús: Tata, catyi ra cu nuu cuan vatyi ma zayangon suun sa cuhun ndya vehe ra vatyi cahnu xaan ca cuu moo, ta cahan nuu ra vatyi iyo cuatyi ra. Ta yoho, ra vaha xaan cuun.

⁷ Yucuan cuenda ña cuñi ra quisi ra nu ndyoon. Zoco tatu cua catyi moo vatyi nduvaha muzu ra, cua nduvaha ra vazu ma cuhun, catyi ra.

⁸ Vatyi maa ra, ra ndyaca ñaha sii zandaru cuu ra. Ta cuu catyi ra sihin minoo ra: “Cuahan”, ta cuhun ra. Ta catyi ra sihin inga ra: “Ñaha”, ta vasi ra. Ta catyi ra sihin muzu ra: “Tyehen zavohon”, ta zavaha ra sii si. Ta tacuan tucu moo, catyi ra, vatyi tatu catyun vatyi nduvaha muzu ra, cua nduvaha ra. Catyi ra cuan sihin ra Jesús.

⁹ Ta sa siñi ra Jesús cuhva cahan ra cuan, ta iyo xaan i cuñi ra sa cuenda ra cu nuu cuan. Ta i nasico cava ra, ta i catyi ra sihin ñiyivi ndyico sii ra: Catyi sihin ndo vatyi tañaha ca nañihi sii minoo ra hebreo ra sino iñi sii ra Ndyoo tañi sino iñi ra cuan. Catyi ra.

¹⁰ Ta cuanuhu ra i tasi ra cu nuu cuan, ta sa nasaa ra i ndyehe ra vatyi sa nduvaha muzu cuan.

Zanandoto ra Jesús sii zehe minoo ñandahvi sa sihi yii

¹¹ Yaha cuan ta inga quivi cuahan ra Jesús minoo ñuu sa nañi Naín. Ta cuahan tucu ra sica noo sihin ra ta cuaha xaan ca ñiyivi.

¹² Ta cuhva sa cua saa ra yatyi ñi ñuu cuan, ta ndyehe ra vatyi quita cuaha xaan ñiyivi ñuu cuan. Ta ndyizo ñu minoo ndiyi. Minoo tuhun ñi zehe ña iyo cuu ra i sihi cuan. Ta ñandahvi cuu maa ña.

¹³ Ta sa ndyehe ra Jesús sii ña, i cundahvi xaan iñi ra sii ña, ta i catyi ra; Ma vacun.

¹⁴ Ta i tuhva ra Jesús, ta i tiin ra satu ñoho ndiyi. Ta ra ndyizo satu cuan, i sicuiñi ra. Ta i catyi ra Jesús sihin ra ñoho cuan: Ra yoco, catyi suhun vatyi nduviton.

¹⁵ Tacuan ta i nduvita ra cuan, ta i quisaha cahan ra. Ta i nacuhva cuenda ra Jesús sii ra sii zihí ra.

¹⁶ Ta i yuhu xaan tandihí ñiyivi i ndyehe. Ta i zacahnu xaan ñu sii ra Ndyoo, ta i catyi ñu: Ihya ra cuu minoo profeta cahnu. Ta inga ñu i catyi: Cahnu xaan sa zavaha ra Ndyoo sihin yo vityi.

¹⁷ Ta i sito ñiyivi nacahnu Judea ta nacahnu ityi cuan cuhva i zavaha ra Jesús.

Tasi ra Juan sii uu tahan ra sica noo sihin ra ndya nu ndyaa ra Jesús

¹⁸ Ta i nacatyi ra sica noo sihin ra Juan sihin ra tandihí sa zavaha ra Jesús. Ta i cana ra Juan sii uu tahan ra sica noo sihin ra.

¹⁹ Ta i tasi ra sii ra nu ndyaa ra Jesús vatyi cua ndaca tuhun ra

sii ra tatu ra Cristo cuu ra, ra cua zacacu sii ñiyivi, a tatu cuñi si sa cuatu ra ndya cua quisí inga ra.

²⁰ Ta saa ra i tasi ra Juan nu ndyaa ra Jesús, ta i catyi ra sihin ra: ¿Atu yoho cuu Cristo, ra cua zacacu sii ndi a cuatu ca ndi naquisí inga ra?

²¹ Ta zuun ñi cuhva sa yucu ra cuan, i zanduvaha ra Jesús sii cuaha xaan ñiyivi cuhu, cuaha nuu cuehe, ta ñu ñoho tatyi cuihna. Ta cuaha xaan ñiyivi cuaa i nandyehe zacuu ra.

²² Tacuan ta i catyi ra Jesús sihin ra i tasi ra Juan: Cuahan ndo ta nacatyi ndo sihin ra Juan tandihí sa i ndyehe ndo ta sa siñi ndo. Nacatyi ndo cuhva nandyehe ra cuaa, ta cuhva nacaca ra coxo, ta cuhva nduvaha ra tyahyu, ta cuhva nacuiñi ra zoho, ta cuhva nandoto ñiyivi i sihi. Ta nacatyi ndo cuhva siñi ñiyivi ndahvi Tuhun Vaha, cuhva cua cacu ñu.

²³ Ta catyi ndo sihin ra vatyi zii xaan cua cuñi ñiyivi tatu ma zaña ñu sa sino iñi ñu sii. Catyi ra Jesús sihin ra.

²⁴ Ta sa yaha cuahan ra i tasi ra Juan, ta i quisaha ndaca tuhun ra Jesús sii ñiyivi, ta catyi ra: ¿Ñaa sa sindyehe ndo quivi i sahan ndo nu ityi xaan nu yoñi ñiyivi iyo? ¿Atu sahan ndo vatyi cua ndyehe ndo minoo tuñii sa canda zacuu tatyi?

²⁵ ¿A atu sahan ndo vatyi cua ndyehe ndo sii minoo ra ñoho zahma vaha? Zoco ña tacuan vatyi ñiyivi ñoho zahma vaha xaan, iyo ñu vehe rey.

²⁶ ¿Atu yivi minoo ra cu profeta cuu sa sindyehe ndo? Zuun. Ta cahnu ca ra cuu ra ta ziqui tandihí inga ra cahan tuhun i saha ra Ndyoo sii ra.

²⁷ Zuun ra cuu ra sa cahan si tuhun nuu tutu ra Ndyoo nu i tyaa ra Isaías tyehen: “Yuhvi ra Ndyoo cua tasi sii minoo ra ityi nuu ca, ta cua zanduvaha ra cuhva iyo ñiyivi

vatyi cua saa moo cuee ca, ta cua tyizoho ñuu sa cohon."

²⁸ Ta catyi sihin ndo vatyi tandihí rayíi ra cacu, yoñi inga ca ra ñiñi ca ta ziquí ra Juan. Zoco ra luhlu ca, ra cuhun nu ndyaca ñaha ra Ndyoo, cahnu ca ra ta ziquí ra Juan, ra zacoo ndutya sii ñiyiví. Catyi ra Jesús.

²⁹ Ta tandihí ñiyiví sa siñi sa cahan ra Jesús ta ra tava xuhun cuenda ra ndyaca ñaha, i zacahnu xaan ñu sii ra Ndyoo, ta nacoto ñu vatyi ndoo xaan sa zavaha ra Ndyoo. Sa yaha sicoo ndutya maa ñu i zacuu ra Juan.

³⁰ Zoco ra fariseo ta ra maestro cuenda ley hebreo ñá cuñi ra qui-hin ra sa saha ra Ndyoo sii ra. Yu-cuan cuenda ñá cuñi ra coo ndutya ra.

³¹ Ta i catyi ra Jesús sa cuenda ra: ¿Ñaa ñi cuhva quehin sihin ñiyiví iyo vityi? ¿Tañi yoo ñi sa caa caa ñu?

³² Caa ñu tañi sa ndyihi sa ndyaa nuyahví, ta cana saa si sii tahan si, ta catyi si: "Tívi ndi cutu, ta ñá sata saha ndo. Ta sata ndi yaa tucuihya iñi, ta ñá sacu ndo."

³³ Tacuan iyo maa ndo vatyi ra Juan, ra i zacoo ndutya sii ñiyiví, i quisi ra ta ñá sasi vaha ra, ta ñá sihi ra vino. Ta catyi ndo vatyi ñoho minoo tatyí cuihna sii ra.

³⁴ Ta ziquí i saa mi, ra i quisi ndya gloria. Ta sasi ta sihi. Ta catyi ndo vatyi tuhva xein coho ta cuahyi xein. Ta cuxaan ndo vatyi vaha ñiyiví cui sihin ra iyo cuatyi ta sihin ra tava xuhun cuenda ra ndyaca ñaha.

³⁵ Ta catyi sihin ndo vatyi saha ra Ndyoo sa siñi tuñi maa ra sii ñiyiví sino iñi sii ra. Ta cua zañaha ñu sii maa ndo vatyi vaha sa siñi tuñi ra Ndyoo.

Sasi ra Jesús xita vehe minoo ra fariseo sa nañi Simón

³⁶ Ta i cana minoo ra fariseo sii ra Jesús sa cua casi ra xita vehe ra.

Ta cuahan ra Jesús vehe ra fariseo cuan, ta sicundyaar a mesa.

³⁷ Tacuan ta minoo ñaha zii iñi ñuu cuan i sito ña vatyi ndyaa ra Jesús vehe ra fariseo cuan, ta i quisi ña sihin minoo yutyi azetye vixi.

³⁸ Ta i sicutiñi ndyaa ña saha ra Jesús, ta i sacu xaan ña vatyi ndu-uu iñi ña cuatyi ña, ta i quisaha nacatya ña saha ra Jesús sihin ndutya nuu ña. Ta ziquí i zana-ityi ña saha ra sihin ixi xiñi ña. Ta sihi ña saha ra. Ta i saca ña azetye vixi cuan saha ra.

³⁹ Ta cuhva sa ndyehe ra Simón tacuan, ta i sica iñi ra: "Tatu ndisa vatyi minoo ra profeta cuu ra ya, cua nacoto ra yozo caa iyo ñaha sa tñi sii ra vatyi iyo xaan cuatyi ña."

⁴⁰ Ta i catyi ra Jesús sihin ra Simón: Simón, iyo minoo tuhun cuñi nacatyi suhun. Ta i catyi ra Simón: Vaha, maestro. Nacatyun sihin.

⁴¹ Ta i catyi ra Jesús sihin ra: Sicoo minoo ra, ta uu tahan ra i sitavi sii ra. Minoo ra tavi ra ohon ziendu denario (tañi ohon mil peso cuu si). Ta inga ra tavi ra uu xico usi ñi denario (tañi ohon ziendu peso ñi).

⁴² Ta nduu tahan ra cuan, ñá cuu tyiyahví ra sa tavi ra. Ta ra sa saha noo xuhun cuan, zaha ra tucahnu iñi sii nduu tahan ra, ta ñá tyiyahví ca ra sii ra. Ta vityi catyun, Simón, ¿ndya ra cua cuñi ca sii ra sa saha noo cuan? Catyi ra Jesús.

⁴³ Ta i nacahanra Simón ta catyi ra: Ra sa cuaha ca tavi cuan. Catyi ra. Tacuan ta i catyi ra Jesús: Ndisa sa cohon.

⁴⁴ Ta ziquí i nandyehe ra Jesús sii ñaha cuan, ta i catyi ra sihin ra Simón: Ndyehun sii ñaha ya. Yuhvi i quihví vehun, ta ñá sohon ndutya ndoo sehi. Zoco maa ña i nacatya ña sehi sihin ndutya nuu ña, ta zana-ityi ña sihin ixi xiñi ña.

⁴⁵ Yoho ñá suhun xiti. Zoco ndya cuhva ndya quihví ihya ta ñá zaña maa ña sa sihi ña sehi.

46 Ñá tyuhun azetye xiñi. Zoco ihya ñaha i tyihi azetye vixi sehi.

47 Yucuan cuenda catyi suhun, Simón, vatyi vazu cuaha xaan cuyati ña iyo, zoco sa zehi tucahnu iñi sii ña tandihí si. Yucuan cuenda cuñi xaan ña sii. Inga ñiyivi sa zuhva ñi cuatyi ñu iyo, zuhva ñi zehi tucahnu iñi sii ñu, ta zuhva ñi cuñi ñu sii.

48 Ta i catyi ra Jesús sihin ñaha cuan: Sa ndasi cuatyun. Catyi ra.

49 Tacuan ta inga ra yucu mesa sihin ra, i quisaha sica iñi ra sihin añima ra: “¿Yoo ra cuu ra ya vatyi zandasi tucu ra cuatyi ñiyivi?”

50 Ta i catyi ra Jesús sihin ñaha cuan: Cuahan vityi, sa cacun vatyi sino iñun. Cuahan sihin sa vaha.

8

Ñuzihí sa tyindyee sii ra Jesús

1 Yaha cuan ta cuee ca ta cuahan ra Jesús tahan tahan ñuu nahnu ta ñuu ndyihi. I cahan ra Tuhun Ndyoo nuu ñiyivi. Ta i zacoto ra sii ñu Tuhun Vaha, cuhva cuñi ra Ndyoo cundyaca ñaha ra sii ñu. Ta ndihí sa usi uu tahan ra i casi ra sihin ra.

2 Ta cuahan tucu ñu zihí sihin ra. Maa ñu cuu ñu i zanduvaha ra ta cuhu ñu a i ñoho tatyi cuihna sii ñu ta i tava ra. Ta cuahan ña María minoo ñaha ñuu Magdala sihin ñu. I siñoho usa tahan tatyi cuihna sii ña, ta nduvaha ña.

3 Ta cuahan tucu ña Juana, ñazihí ra Chuza. Minoo ra cu tyiño sa cuenda ra rey Herodes cuu maa ra. Ta cuahan ña Susana ta cuaha xaan ca ñu cuahan. Ta i tyindyee ñu sii ra Jesús sihin xuhun ñu.

Cahan ra Jesús ziqui minoo cuhva, cuhva ra tasi

4 Cuaha xaan ñiyivi i quita sa ziñi ziñi ñuu, ta titahan ñu vatyi cua tyizoho ñu sa cahan ra Jesús. Ta i cahan ra sihin ñu ziqui minoo cuhva ta catyi ra:

5 Cuahan minoo ra nu iyo tyiño ra vatyi cua quiti ra siti trigo nu

ñuhu ra. Ta cuhva sa quiti ra sii si, zuhva si canacoyo si ityi. Ta i sañi ñiyivi sii si, ta i sasi zaa sii si.

6 Ta zuhva siti cuan, i canacoyo si nu yaxi ñoho ñuhu vatyi ñoho xaan yuu. Ta quivi i caña si, i na-ityi si vatyi ña coco caa ñuhu ta i cumañi ndutya sii si.

7 Ta zuhva siti cuan, i canacoyo si ticui iñu. Ta i caña si sisi iñu, zoco i zahvi iñu sii si. Ta ñá saha si siti si.

8 Ta zuhva ca siti cuan, i canacoyo si nu vaha ñuhu, ta saha xaan si siti si. Iyo si saha si minoo ziendu siti si. Catyi ra Jesús. Ta sa yaha cahan ra tuhun cuan, i cana saa ra, ta i catyi ra: Tatú siñi ndo, cuiñi ndo sa quehin. Catyi ra.

9 Tacuan ta i ndaca tuhun ra i casi ra sii ra ñaa cuñi si catyi si cuhva cahan ra sihin ñiyivi.

10 Ta i catyi ra Jesús sihin ra: Saha ra Ndyoo sa coto maa ndo tuhun xehe sa cuenda cuhva ndyaca ñaha maa ra. Zoco sihin inga ñiyivi, maa ñi sihin minoo cuhva quehin vatyi cua ndyehe ñu, zoco ma nacoto ñu ñaa sa ndyehe ñu. Cua cuiñi ñu, zoco ma cutuñi iñi ñu.

11 Ihya cuu cuhva cuñi si catyi si: Siti cuan cuu tañi Tuhun Ndyoo.

12 Ta tañi sa canacoyo siti cuan ityi, tacuan iyo minoo ityi ñiyivi siñi Tuhun Ndyoo. Ta saa cuihna, ta quindaya ra sii si sisi añima ñu coto cua sino iñi ñu ta cacu ñu.

13 Ta tañi sa canacoyo siti nu ñoho xaan yuu iyo inga ityi ñiyivi sa siñi Tuhun Ndyoo. Ziñi xaan cuñi ñu sihin si zuhva ñi quivi, zoco ña quihvi vaha si añima ñu. Ta ña nahua cua sino iñi ñu. Tatú cua quisí minoo tundoho ziqui ñu a cuxaan ñiyivi sihin ñu sa cuenda Tuhun Ndyoo, yatyi xaan cua zaña ñu sii si.

14 Ta inga ñiyivi cuu tañi sa canacoyo siti nu ndyaa iñu. Siñi ñu Tuhun Ndyoo, zoco sica xaan iñi ñu inga tuhun, tuhun sa iyo ñuu ñiyivi. Sica iñi ñu tuhun sa nducuca ñu ta cuhva cua cuzii iñi ñu ñuu ñiyivi ya.

Ta ma zatyíñó vaha Tuhun Ndyoo sihin ñu.

¹⁵Zoco tañi siti canacoyo nu vaha ñuhu, tacuan iyo inga ñiyivi. Ndoo xaan iyo ñu, ta vaha xaan añima ñu. Siñi ñu Tuhun Ndyoo, ta zavaha ñu sii si. Ta cundye xaan iñi ñu. Ta cuaha xaan sa vaha zavaha ñu cuhva catyi Tuhun Ndyoo.

Cuhva sii minoo lámpara

¹⁶Tatu tyaa ñiyivi minoo lámpara sisi vehe ñu, ma tyihi ñu sii si xu sito a inga nu xehe. Ña tacuan vatyi tyaa ñu sii si nu zucu vatyi tacuan ta ndundisi sisi vehe, ta cuu ndyehe ñiyivi quihví sisi vehe.

¹⁷Ta tañi lámpara tatu ñoho xehe si, tacuan iyo cuhva zacuehi sii ndo vityi. Zoco cua coo quiví ta cua cuiñi ñiyivi nacahnu ñuu ñiyivi cuhva zacuehi ihya.

¹⁸Yucuan cuenda coto vaha ndo sii ndo sihin sa siñi ndo vatyi tatu tyaa ndo yahvi sa quehin, cuaha ca cua zacuehi sii ndo. Zoco tatu ma tyizoho ndo cua quindyei ndya cuhva ndya sa zuhva ñi sa sica iñi ndo vatyi sa cutuñi iñi ndo.

Zihí ra Jesús ta yañi ra

¹⁹Tacuan ta i saa zihí ra ta yañi ra Jesús, zoco ñá cuu quihví ñu nu ndyaa ra vatyi tuu xaan ñiyivi.

²⁰Ta i zacoto ñiyivi yucuan sii ra ta catyi ñu: Zihun ta yañun, nandyaa ñu sata vehe, ta cuñi ñu cahan ñu suhun.

²¹Ta i nacahan ra Jesús, ta catyi ra: Ñiyivi sa cuu zihí ta yañi cuu ñu siñi Tuhun Ndyoo ta zavaha ñu sii si.

Zacutaxi ra Jesús tatyí ta ndutya

²²Minoo quiví i quihví ra Jesús minoo barco sihin ra i casi ra. Ta i catyi ra sihin ra: Coho yo inga siyo miñi. Ta cuahan ra sihin barco cuán.

²³Ta cuhva sa cuahan ra mahñu miñi cuan, ta quixi ra Jesús. Ta sicava minoo tatyí cahnu xaan. Ta quihví ndutya sisi barco. Ta i situ tu, ta i quisaha ndyee tu.

²⁴Ta i zandoyo ra sii ra Jesús ta catyi ra: ¡Maestro! ¡Maestro! ¡Sa cuñi cunaa yo! Catyi ra. Ta i nduvita ra Jesús, ta i cahan ra sihin tatyí ta sihin ndutya, ta i cutaxi si.

²⁵Ta i catyi ra sihin ra yucu sihin ra: ¿Ñacu ña nii iñi ndo? Catyi ra. Zoco ra cuan, yuhu xaan ra, ta iyo xaan i cuñi ra. Ta i quisaha ndaca tuhun ra sii ra tahan ra: ¿Yoo ra cuu ra ya? vatyi cuhva ndya tatyí ta cuhva ndya ndutya ta tyaa si yahvi sii ra.

Minoo ra ñoho tatyí cuihna

²⁶Tacuan ta i saa ra Jesús nu cu si Gadara sa ndyaa inga siyo miñi cahnu sa nañi Galilea.

²⁷I quita ra Jesús barco, ta i tuhva minoo ra ñuu cuan sii ra. Sa naha xaan ñoho tatyí cuihna sii ra, ta ña ñoho ra zahma ra, ta ña ndyaa ra vehe ra. Sica noo ñi maa ra nu ñaña.

²⁸⁻²⁹Ta tuhva tatyí ña vaha cuan tiñi sii ra, ta yucuan cuenda sihñi ñu cadena ndaha ra ta saha ra vatyi ma cuu cuhun ra. Zoco i sahnu ra cadena sihin fuerza sa saha tatyí ña vaha cuan sii ra, ta i zacono tatyí cuan sii ra ndya nu yoñi ñiyivi iyo. Ta cuhva sa ndyehe ra sii ra Jesús, i sicuiñi siti ra nuu ra, ta i cana saa ra, ta catyi ra: ¿Ñaa sa cuñun sihin mi, Jesús? Moo cuu zehe Ndyoo ra cahnu ca. Sa ndyoo ñi ma zandyehun tundoho sii. Tacuan i catyi ra vatyi sa catyi ra Jesús sihin tatyí cuihna vatyi naquita si sisi añima ra.

³⁰Ta ziquí i ndaca tuhun ra Jesús sii ra: ¿Ñaa nañun? Ta tatyí cuan nacahan si ta catyi si: Nañi Legión. Tacuan catyi tatyí ña vaha cuan vatyi cuaha xaan si ñoho sii ra.

³¹Ta i sica tatyí ña vaha cuan tumañi iñi sii ra Jesús sa ma zacuhun ra sii si sisi minoo xahva cono xaan nu ma cuu quita si.

³²Ta sica tatyí ña vaha cuan sii ra Jesús vatyi nacuhva ra sa quihví

si sisi quiní vatyi yucu xaan ti yucuan. Ta i saha ra Jesús sa quihví si sisi quiní cuan.

³³ Ta i quita tatyi ña vaha cuan sii ra ndahví cuan, ta i quihví si sisi quiní cuan. Ta ñihí xaan i cacono quiní cuan nu iñi noo yuhu miñi. Ta i sihi tandihí ti sisi ndutuya.

³⁴ Ta cuhva sa ndyehe ra zacuenda quiní cuan sa tahan ti, i sino xaan ra, ta i nacatyi ra sihin ñiyiví sa ndyehe ra sisi cuhu ta sisi ñuu.

³⁵ Ta i quita coyo ñiyiví vatyi cua ndyehe ñu ñaa sa cuu, ta i saa ñu nu ndyaa ra Jesús. Ta i ndyehe ñu sii ra sa quita tatyi cuihna cuan. Nandyee ra nuu ra Jesús. Sa ñoho ra zahma ra, ta sa nduvaha cuñi xiñi ra. Ta i yuhu xaan ñu.

³⁶ Ta ñiyiví i ndyehe, i nacatyi ñu sihin inga ñu cuhva i quita tatyi ña vaha sii ra ta i nduvaha ra.

³⁷ Tacuan ta cuaha xaan ñiyiví nacahnu Gadara i catyi ñu sihin ra Jesús vatyi nacuhun ra vatyi i yuhu xaan ñu sa cuenda cuhva i zavaha ra sihin tatyi cuihna cuan. Ta i nandihví ra Jesús sisi barco.

³⁸ Ta ra sa quita tatyi cuihna cuan, i sica ra sii ra Jesús sa cuhun ra sihin ra, zoco i catyi ra Jesús sihin ra:

³⁹ Cuanuhun ndya vehun. Ta nacatyun sihin ñiyiví suun ñaa sa i zavaha ra Ndyoo suhun, cuhva sa cahnu xaan i tyindyeer suun. Ta cuahan ra cuan, ta i nacatyi ra nacahnu ñuu ra cuhva sa cahnu xaan i zavaha ra Jesús sihin ra.

Nduvaha zehe ra Jairo, ta i tiñ minoo ñaha yuzahma ra Jesús

⁴⁰ Ta quiví sa nasaa ra Jesús inga siyo miñi, cuaha xaan ñiyiví ndatu sii ra. Ta zii xaan cuñi ñu vatyi nasaa ra.

⁴¹ Tacuan ta i saa minoo ra sa nañi Jairo. Minoo ra cu tyiño cuenda vehe ñuhu ñuu cuan cuu ra. Ta i sicuiñi siti ra nuu ra Jesús, ta i sica xaan ra tumañi iñi sii ra sa cuhun ra sihin ra ndya vehe ra.

⁴² Vatyi minoo tuhun ñi zeha ra iyo. Usi uu cuiya ña, ta sa cuñi cuu ña sihin cuehe. Ta cuahan ra Jesús vehe ra cuan. Ta i sindyico cuaha xaan ñiyiví sii ra. Ñihí xaan i catyihí ñu sii ra.

⁴³ Ta ticui ñiyiví cuan ñoho minoo ñaha cuhu. Sa usi uu cuiya sa cuhu ña cuehe sa cuu ña niñi. Cuaha xaan médico i zacuu tata sii ña. I zanaa ña tandihí cuii sa iyo sii ña. Zoco ñá nduvaha ña sihin cuhva zavaha médico.

⁴⁴ Ta i quisi ña ityi sata ra Jesús zava mahñu ñiyiví cuan, ta i tiñ ña yuzahma ra. Ta zuun ñi caa cuhva cuan i sicuita niñi ña.

⁴⁵ Ta i catyi ra Jesús: ¿Yoo sa tiñ sii? Ta tandihí ñiyiví cuahan sihin ra catyi ñu vatyi yiví maa ñu. Ta ra Pedro ta inga ra ndihí sihin ra Jesús i catyi ra: Maestro, tuu xaan ñiyiví cuahan suhun, ta catyihí ñu suun. ¿Ta ñaa cuenda ndaca tuhun yoo sa tiñ suun?

⁴⁶ Zoco i catyi ra Jesús: Iyo minoo ñiyiví i tiñ sii, vatyi tuu iñi vatyi cuahan zuhva tundyee iñi sii.

⁴⁷ Ta sa sito ñaha cuan vatyi ma cuu tyixehe ña, ta i quisaha nihi ña vatyi yuhu xaan ña. Ta i sicuiñi siti ña nuu ra Jesús. Ta ityi nuu tandihí ñiyiví i nacatyi ña sihin ra ñaa cuenda i tiñ ña sii ra ta yozo caa i nduvaha ña sa zuun ñi caa cuhva cuan.

⁴⁸ Ta i catyi ra Jesús sihin ña: Zihi, i nduvohon vatyi i sino iñun sii. Cuahan sihin sa vaha. Catyi ra.

⁴⁹ Niñ ñi sa cahan ra Jesús tuhun ya, ta i quisi minoo ra iyo vehe ra Jairo cuan. Ta i catyi ra sihin ra Jairo: Sa sihi zehun. Ma zayanga con sii ra maestro ya.

⁵⁰ Ta sa siñi ra Jesús tuhun cuan, i catyi ra: Ma yuhun. Sino iñun ta cua nduvaha ña.

⁵¹ Ta sa saa ra Jesús vehe ra Jairo, ñá saha ra quihví ñiyiví, maa ñi ra Pedro ta ra Jacobo ta ra Juan ta ra Jairo, zutu ña, sihin ñazihí ra.

⁵² Ta i sacu xaan tandihí ñiyiví vatyi i sihi ña, zoco i catyi ra Jesú: Ma vacu ndo. Ná sihi ña. Quixi ña.

⁵³ Ta i sacu ndyaa ñu sii ra vatyi sito ñu vatyi sa sihi ña.

⁵⁴ Tacuan ta i tiin ra Jesú ndaha ña luhlu cuan, ta i catyi ra sihin ña: Náha luhlu, nduviton.

⁵⁵ Ta i nandihví añima ña, ta zuun ñi caa cuhva cuan i nduvita ña. Ta i catyi ra sihin ñu nacuhva ñu sa casi ña.

⁵⁶ Iyo xaan i cuñi zutu ña ta zíhi ña, zoco ñihi xaan i saha ra tyiño sii ñu sa ma nacatyi ñu nu sihin minoo ñiyiví cuhva i cuu.

9

Tasi ra Jesú sii sa usi uu tahan ra i casi ra vatyi cua nacatyi ra Tuhun Ndyoo sihin ñiyiví

¹ I zandu-iin ra Jesú sii sa usi uu tahan ra i casi ra, ta i saha ra tundyee iñi sii ra vatyi cua tava ra tatyi ña vaha, ta cua zanduvaha ra sii ñiyiví cuhu.

² Ta i tasi ra sii ra sa cahan ra Tuhun Ndyoo, ta cua nacatyi ra sihin ñiyiví cuhva ndyaca ñaha ra Ndyoo. Ta cua zanduvaha ra sii ñiyiví cuhu.

³ Ta i catyi ra Jesú sihin ra: Náhñi sa cuizo ndo ityi cuhun ndo. Ma cuñaa ndo numinoo tutatu, ta numinoo yiti, ta nu sa casi ndo. Ma cuizo ndo xuhun. Ndihí ñoho ñi ndo zahma ndo cuhun ndo, ta ma cuizo ndo inga.

⁴ Tatu saha ñiyiví minoo vehe cundyaa ndo, yucuan ndoo ndo ndya cua cuhun ndo inga.

⁵ Ta tatu saa ndo minoo ñuu ta ña cuñi ñiyiví tyizoho ñu sa cahan ndo, quita ndo ñuu cuan. Naquizi ndo saha ndo vatyi ma cuhun nu ñiyaca ñuu cuan sihin ndo. Tacuan ta cua coto ñiyiví vatyi i zavaha ñu sa ña vaha sihin ndo. Tacuan i catyi ra Jesú.

⁶ Ta i quihin ra ityi cuahan ra tahan tahan ñuu. I nacatyi ra

Tuhun Vaha sihin ñiyiví, ta nacahnu i zanduvaha ra sii ñu cuhu.

Cuñi ra rey Herodes coto ra yoo ra cuu ra Jesú

⁷ Ra Herodes i cuu ra ndyaca ñaha nacahnu Galilea. Ta i ñihi ra tuhun sa cuenda tandihí sa zavaha ra Jesú. Ta ñá ñihi vaha ra cuhva yoo ra cuu ra Jesú vatyi zuhva ñiyiví i catyi ñu vatyi ra Juan cuu ra ta i nandoto ra.

⁸ Ta inga ñiyiví i catyi ñu vatyi ra Elías cuu ra Jesú. Ta inga ñu i catyi ñu vatyi i nandoto minoo ra profeta.

⁹ Zoco i catyi ra Herodes: Zuun ñi mi i tava tyiño sii ra sahndya yuu zucu ra Juan. ¿Ta yoo ra cuu ra siñi xein tuhun vityi? Ta i cuñi xaan ra Herodes ndyehe ra sii ra Jesú.

Cuhva i saha ra Jesú sa casi ohon mil rayii

¹⁰ Ta i nasaa coyo ra apóstol, ta i nacatyi ra sihin ra Jesú tandihí sa i zavaha ra. Tacuan ta i quihin ra Jesú sii ra ta cuahan ra sihin maa ñi maa ra ityi ñuu Betsaida.

¹¹ Zoco i sito ñiyiví, ta sindyico tuu xaan ñu sii ra, ta i cahan vaha ra sihin ñu sa cuenda cuhva ndyaca ñaha ra Ndyoo. Ta i zanduvaha ra sii ñiyiví cuhu.

¹² Ta sahiñi i tuhva ra i casi ra sii ra, ta i catyi ra sihin ra Jesú: Catyun sihin ñiyiví nacuhun ñu tandihí ñuu, tandihí cuadria sa ndyaa yatyi ñi cuzata ñu sa casi ñu ta cuzu ñu vatyi ñahñi maa sa iyo ihya.

¹³ Zoco i catyi ra Jesú sihin ra: Cuhva maa ndo sa casi ñu. Ta i catyi ra sihin ra Jesú: Náhñi maa sa cumi ndi ihya, ohon tahan ñi pan ta uu tahan ñi tyiyaca. ¿A atu sica iñun sa cuu zata ndi sa casi tandihí ñu ya? Catyi ra.

¹⁴ Vatyi tañi ohon mil rayii yucu yucuan. (Ta zíin ñu zíli ta sa ndyihí.) Ta i catyi ra Jesú sihin ra i casi ra: Catyi ndo sihin ñu vatyi

nacundayaa ñu. Uu xico usi tahan ñu sa minoo minoo ityi ñu.

15 Ta tacuan i sicundayaa ñu i zacuu ra.

16 Ta ziqui i quihin ra Jesús sa ohon tahan pan ta uu tahan tyiyaca, ta i nandyehe ndaa ra ityi andiví, ta i saha ra tyahvi ndyoo sii ra Ndyoo. Ta i sahnu ndyihí ra pan ta tyiyaca cuan. Ta i nducuaha si. Ta i saha ra sii si sii ra i casi ra vatyí cuá zasa ra sii si sii ñiyiví.

17 Ta i sasi tandihí ñu, ta i ndaha xaan iñi ñu. Ta ziqui i zanacutu ñu usi uu tahan tyica sihin yíquí pan sa nandoo ta tyiyaca cuan.

Nacatyi ra Pedro vatyi ra Jesús cuu ra cua zacacu sii ñiyiví

18 Minoo quíví i quita ziin ra Jesús sihin ra i casi ra minoo nu taxi ñi, ta i sica tahvi ra Jesús sii ra Ndyoo. Ta yaha cuan ta ziqui i ndaca tuhun ra sii ra ndihí sihin ra ta catyi ra: ¿Yoo ra cui, catyi ñiyiví?

19 Ta i nacahan ra ta catyi ra: Iyo ñu catyi ñu vatyi ra Juan, ra i zacoo ndutyá quíví cuan cuun. Ta inga ñu catyi vatyi ra Elías cuun. Ta inga tucu ñu catyi vatyi i nandoto minoo profeta, ta zuun ra cuan cuun. Catyi ñu.

20 Tacuan ta i ndaca tuhun ra Jesús sii tandihí ra ta catyi ra: ¿Ta yoo ra cui catyi maa ndo? Ta i nacahan ra Pedro ta catyi ra: Yoho cuu ra Cristo. Zehe ra Ndyoo.

Nacatyi ra Jesús yozo caa cua cuu ra

21 Ta i nacatyi ra Jesús sihin ra i casi ra vatyi ma nacatyi ra tuhun cuan sihin numinoo ñiyiví.

22 Ta i catyi ra: Cuaha xaan tundoho cua ndyehe ra i quasi ndya gloria. Cua cuxaan ra mandoñi ta ra zutu nahnu ta ra maestro cuenda ley hebreo sihin ra. Ta cua cahñi ra cuan sii ra. Ta sa cu uñi quíví cua nandoto ra.

23 Ta i catyi ra Jesús sihin tandihí ra: Tatú iyo ra cuñi ra cundyico ra sii, nazama ra cuhva iyo ra. Ta

ma zacahnu ra sii ra. Ta nandyehe ra tundoho sa cuenda mi. Ta nazavaha ra cuhva zavehi.

24 Tatú ña cuñi ñiyiví sa cuu ñu sa cuenda Tuhun Ndyoo, cua cuu ñu. Ta cua cuhun ñu andaya. Ta ma cundito ñu sihin ra Ndyoo. Zoco tatu cua cuu ñiyiví sa cuenda mi a sa cuenda Tuhun Ndyoo, cua cundito ñu sihin ra Ndyoo.

25 ¿Naa sa ñihí ñiyiví sa zahacanaa ñu tandihí sa iyo ñuu ñiyiví ta quíví cua cuu ñu ndaha cua naa ñu?

26 Tatú iyo ra cahan nuu sa cuenda mi a sa cuenda Tuhun Ndyoo, tacuan tucu cua cucahan nui sihin ra. Vatyi ra i quasi ndya gloria cui, ta cua quasi tuqui sihin ángel. Ta cua ndyehe ñiyiví vatyi cahnu xaan cuu Zuti.

27 Ta sa ndisa cuiti catyi sihin ndo vatyi iyo zuhva ra yucu ihyá, ma cuu ra ndya cuhva ndya cua ndyehe ra cuhva cua cundyaca ñaha ra Ndyoo.

Cuhva i zama ra Ndyoo cuhva caa ra Jesús minoo saha

28 I yaha tañi uña quíví sa yaha catyi ra Jesús cuhva cuan. Ta ziqui i ndaa ra Jesús xiñi minoo yucu cua cahan ra sihin ra Ndyoo, ta cuahan ra Pedro ta ra Juan ta ra Jacobo sihin ra.

29 Ta cuhva sa sica tahvi ra sii ra Ndyoo, ta i zama cuhva caa nuu ra, ta i nducuisi xaan zahma ra ta xiño xaan si.

30 Ta i quituu uu tahan ra natuhun sihin ra. Minoo ra cuu ra ra Moisés, ta inga ra cuu ra ra Elías. (Ra i sihi ta sa naha cuu nduu tahan ra cuan.)

31 Ndisi xaan nu siyucu ra, ta i cahan ra tuhun yozo caa cua cuu ra Jesús ñuu Jerusalén.

32 Ta ra Pedro ta ra tahan ra cuñi xaan ra cuzu ra, zoco ñá quixi ra vatyi ndyehe ra sa ndisi xaan nu nandyaa ra Jesús sihin sa uu tahan ra nandyaa sihin ra.

33 Ta cuhva sa cuahan ra yucu sihin ra Jesús, i catyi ra Pedro sihin

ra Jesús: Maestro, vaha xaan yuco yo ihyo. Nazavaha ndi uñi tahan vehe tyiyahva, minoo cuenda moo, ta minoo cuenda ra Moisés, ta minoo cuenda ra Elías, catyi ra. Zoco ñá sito ra Pedro ñaa tuhun cahan ra.

³⁴ Ta cuhva sa cahan ra Pedro tacuan ta i noo minoo vico ta ndaha tyazi si sii tandihí ra. Ta i yuhu xaan ra sa quíhví ra sisi vico cuan.

³⁵ Ta sisi vico cuan i siñi ra minoo nduzu sa catyi: Ra ihyo cuu Zehi. Cuñi xein sii ra. Cuiñi ndo sa cahan ra.

³⁶ Ta sa yaha cahan nduzu cuan, tuhun cuan, ta i ndyehe ra ndihí sihin ra Jesús vatyi ña ndyaa ca inga ra cuan sihin ra Jesús. Maa tuhun ñi ca maa ra. Ta i sicumi xehe ra tandihí sa i ndyehe ra, ta sisi quíví cuan ñá nacatyi ra sihin numinoo ñiyiví.

Zanduvaha ra Jesús sii minoo ra luhlu sa ñoho tatyí cuihna

³⁷ Ta inga quíví cuhva sa noo ra yuco cuan, cuaha xaan ñiyiví i zatahan sii ra Jesús.

³⁸ Ta minoo ra ñoho ticui ñiyiví cuan i cana saa ra ta catyi ra: Maestro, sica xein tumañi iñi suun sa cua ndyehun sii zehi vatyi minoo tuhun ñi zehi iyo.

³⁹ Ñoho minoo tatyí cuihna sii ra, ta ndya vaha ñi cuhva nduxaan si sii ra. Ta sacu saa ra, ta zanduva si sii ra nu ñuhu, ta saa tiñi yuhu ra. Ña zaña si sii ra, ta zañicuehe si sii ra.

⁴⁰ Sa catyi vatyi natava ra i casi moo sii si, zoco ñá cuu sii ra.

⁴¹ Ta i nacahan ra Jesús, ta catyi ra (sihin tandihí ñiyiví): Ndoho cuu ñiyiví ña sino iñi. ¿Yozo tahan ca quíví cua ndoi sihin ndo ta ziqui cua sino iñi ndo? Ma cundyee iñi cundyee sihin ndo nahá xaan ca. Sa nahá xaan cundyee iñi sihin ndo. Ta ndyaca sii zehun ihyo.

⁴² Ta cuhva sa vasi ra luhlu cuan, i zanduva tatyí cuihna cuan sii ra

ta quiñi xaan i tahan ra. Ta xaan xaan i cahan ra Jesús sihin tatyí ña vaha cuan. Ta i zanduvaha ra sii ra luhlu cuan, ta ziquí i nacuhva cuenda ra sii ra sii zutu ra.

⁴³ Ta iyo xaan i cuñi tandihí ñiyiví vatyi cahnu xaan cuu tundyee iñi maa ra Ndyoo.

Zacoto tucu ra Jesús inga saha cuhva cua cuu ra
Nii ñi sa iyo xaan cuñi tandihí ñiyiví sihin sa zavaha ra Jesús ta i quisaha catyi ra sihin ra i casi ra:

⁴⁴ Tyizoho vaha ndo sa quehin vatyi cua xico minoo ra sii ra i quisah ndya gloria. Ta cua tiñi ñiyiví sii. Catyi ra Jesús.

⁴⁵ Zoco, ñá cutuñi iñi ra ñaa tuhun cahan ra. Ta ñá nacatyi ra Jesús sihin ra ñaa cuñi si catyi si. Ta yuhu ra ndaca tuhun ra sii ra Jesús ñaa tuhun cahan ra.

¿Yoo ra cuu ra ñiñi ca?

⁴⁶ Tacuan ta i quisaha natuhun tahan xaan ra i casi ra Jesús sa cuenda cuhva yoo ra cuu ra ñiñi ca sii ra.

⁴⁷ Ta i sito ra Jesús ñaa sa sica iñi ra cuan sihin añima ra. Ta i quihin ra sii minoo ra luhlu, i sañi ndyaa ra sii ra ii siyo xiin ra.

⁴⁸ Ta i catyi ra sihin ra ndihí sihin ra: Tatu zavaha ñiyiví sa vaha sihin minoo ra luhlu sa cuenda mi, tañi sihin mi zavaha ñu sa vaha cuu si. Ta tatu zavaha ñiyiví sa vaha sihin mi, zavaha ñu sa vaha sihin Zuti. Ta ra sa luhlu ca zaha maa ndo tuhun, yucuan ra cuu ra cahnu ca ityi nuu ra Ndyoo. Ta ra sa cahnu ca cuñi ndo, yucuan ra cuu ra luhlu ca ityi nuu ra Ndyoo. Catyi ra Jesús.

Tatu ña cahan ñiyiví ndya vaha ñi sii yo, tyindyee ñu sii yo cuhva cuan

⁴⁹ Tacuan ta i catyi ra Juan: Maestro, i ndyehe ndi minoo ra tava tatyí cuihna sihin ziví moo, zoco yiví ra tahan ndi cuu ra. Ta i catyi maa ndi sihin ra vatyi ma zavaha ra tacuan.

50 Ta i catyi ra Jesús sihin ra: Ña vaha sa ñá saha ndo. Vatyi tatu ña cahan ñiyiví ndya vaha ñi sii yo, tyindyee ñu sii yo.

Catyi ra Jesús vatyi ña vaha cuhva sica iñi ra Jacobo ta ra Juan

51 Ta sa cuñi saa quivi cunanuhu ra Jesús ndya gloria, ityi i quisira. Yucuan cuenda cuñi ra Jesús cuhun ra ñuu Jerusalén nu cua cuu ra. Ta i quihin ra ityi cuahan ra.

52 Ta i tasi ra tysiño ityi nuu ca nu cuahan ra, ta i quihví ra i tasi ra minoo ñuu nu cu si Samaria vatyi cua nducu ra minoo nu cua quitatu ra Jesús.

53 Ta ñá saha ra samaritano sa cundyaa ra Jesús ñuu ra vatyí cuahan ra Jerusalén. (Ta ña cuu ndyehe ñiyiví samaritano sii ñiyiví ñuu Jerusalén.)

54 Ta cuhva sa sito ra Jacobo ta ra Juan vatyi ñá saha ra samaritano sa cundyaa ra ñuu ra ta i cuxaan ra ta catyi ra: Tata, ¿atu cuñun vatyí zavaha yo cuhva i zavaha ra Elías ta sa naha? Cuu caca yo sii ra Ndyoo nazaquisi ra ñúhu ziquí ñiyiví Samaria, ta cua cayu tandihí ñu. Catyi ra.

55 Zoco xaan xaan i cahan ra Jesús sihin ra ta catyi ra: Taxi ñi ndo. Ña cutuñi iñi ndo ñaa tysiño vasi.

56 Ra i quisí ndya gloria cui, ta ña vasi zanei sii ñiyiví, vasi zacaqui sii ñu. Catyi ra. Ta ziquí cuahan coyo ra inga ñuu.

Ñu cuñi cundyico sii ra Jesús

57 Ta cuhva sa cuahan ra ityi, i catyi minoo ra sihin ra Jesús: Tata, cuñi cundyique suun vazu ndya ndya maa cuohon.

58 Ta i catyi ra Jesús sihin ra: ¿Atu ndison? vatyí yuhví, ñahñi sa iyo sii. Iyo vehe ñicuii, ta iyo taca zaa. Zoco ra i quisí ndya gloria ñahñi vehe ra iyo.

59 Tacuan ta i catyi ra Jesús sihin inga ra: Cundyicon sii. Zoco i catyi

ra cuan: Tata, cuatu ndya nacuu zuti, ta ziquí cua cundyique suun.

60 Ta i catyi ra Jesús sihin ra: Ña vaha sa ñoho xaan iñun tuhun ñiyiví suun. Natyihí ñiyiví ña sito sii ra Ndyoo sii tahan sihi sihin ñu sisi ñuhu, zoco yoho cuahan ta nacatyun sihin ñiyiví cuhva ndyaca ñaha ra Ndyoo.

61 Tacuan ta ziquí i catyi inga ra sihin ra Jesús: Tata, cua cundyique suun, zoco cuhvon sa cunuhu xi-hne cua naquehin sihin ñiyiví sii.

62 Zoco i catyi ra Jesús sihin ra: Yoo ra quisaha zatyisño ra tysiño ta ndu-uu iñi ra, ma cuu quihví ra nu ndyaca ñaha ra Ndyoo.

10

Tasi ra Jesús sii uñi xico usi tahan ra cua nacatyi Tuhun Ndyoo sihin ñiyiví

1 Sa yaha cuan ta ziquí i casi ra Jesús uñi xico usi tahan ca ra. Ta i tasi ra sii ra ityi nuu ra. Uu uu ra cuahan tandihí ñuu ta tandihí ityi nu cua cuhun ra Jesús cuee ca.

2 Ta i catyi ra sihin ra: Tañi minoo itu cahnu xaan, tacuan iyo tysiño zavehi. Zoco ña cuaha muzu iyo. Yucuan cuenda caca ndo sii ra Ndyoo natasi ca ra muzu vatyí cua tyindyee ra sihin tysiño, ta cua nacatyi tucu ra Tuhun Ndyoo sihin ñiyiví.

3 Cuahan ndo ta ma naa iñi ndo vatyí tañi mvée ticateyi lee cuu ndo, ta tasi sii ndo nu yucu xaan ina nduvahu.

4 Ta ma cuizo ndo xuhun nu sa quihi xuhun ndo a inga ndisa ndo. Zanumi ndo, ta ma cucuee xaan ndo ityi sa natuhun ndo sihin ñiyiví.

5 Ta yoo sii vehe saa ndo, sa xihna ñi catyi ndo: “Nacoo sa taxi sa saha ra Ndyoo sii ndo.” Catyi ndo.

6 Ta tatu ndisa vatyí iyo ñiyiví vaha vehe cuan, cua ndoo sa vaha sihin ñu. Zoco tatu yoñi ñu vaha añima, ma ndoo sa vaha sihin ñu.

⁷ Ta minoo ñi vehe nu cua saa ndo, yucuan ndoo ndo. Casi ndo ta coho ndo ñaa sa saha maa ñu, sii ndo. Vatyi minoo ra zatyiñi, iyo cuhva sii ra sa ñihí ra sa casi ra. Ta ma quita ndo vehe nu ndyaa ndo ta cundyaa ndo ziñi ziñi vehe.

⁸ Ta ñaa ñi maa ñuu saa ndo, tatu vaha cahan ñu sihin saa ndo, casi ndo ñaa sa cua cuhva ñu sii ndo.

⁹ Zanduvaha ndo sii ñiyivi cuhu ñuu cuan, ta catyi ndo sihin ñiyivi: "Sa cuñi saa cuhva cundyaca ñaha ra Ndyoo."

¹⁰ Zoco tatu quihvi ndo minoo ñuu ta ña tiñi cuenda ñu sii ndo, quita ndo ityi cahnu ta catyi ndo sihin ñu:

¹¹ "Ndyá cuhva ndya ñiyaca ñuu ndo sa iñi saha ndi ta cua tava ndi sii si. Minoo zeña cuu si vatyi cua ndoo cuatyi ndo ziquí ndo. Zoco coto ndo vatyi sa cuñi quisi quivi cundyaca ñaha ra Ndyoo." Tacuan catyi ndo sihin ñu. Catyi ra Jesús.

¹² Ta catyi tucu ra Jesús sihin ra: Ta catyi ndo vatyi quivi cua tasi tuñi ra Ndyoo sii ñiyivi, ñihí ca cua tasi tuñi ra sii ñiyivi ñuu ña tiñi cuenda sii ndo ta ziquí ca ñiyivi ñuu Sodoma.

Cua ndyehe xaan ñiyivi tundoho vatyi ña tyaa ñu yahvi sa cahan ra Jesús

¹³ Tacuan ta i catyi ra Jesús: Ndahvi ndoho ñiyivi ñuu Corazín. Ta ndahvi ndoho ñiyivi ñuu Betsaida vatyi ña zama ndo cuhva iyo ndo vazu ndyehe ndo sa ndyityi nahnu. I zanaa ra Ndyoo sii ñiyivi ñuu Tiro ta ñuu Sidón ta sa naha sa cuenda cuatyi ñu. Zoco tatu sa i ndyehe maa ñu sa ndyityi nahnu tañi sa ndyehe maa ndo, cua zando ndisa cuii ñu cuatyi ñu, ta cua zama ñu cuhva iyo ñu, ta cacu ñu.

¹⁴ Yucuan cuenda, ndoho ñiyivi ñuu Corazín ta ñiyivi ñuu Betsaida, ñihí ca cua tasi tuñi ra Ndyoo sii ndo ta ziquí sii ñiyivi ñuu Tiro ta ñuu Sidón cuan.

¹⁵ Ta ndoho ñiyivi ñuu Caper-naum, sica iñi maa ndo vatyi cua ndaa ndo ndya andivi, zoco cua noo ndo ndya andyaya vatyi ña tyaa ndo yahvi sii Tuhun Ndyoo.

¹⁶ Ta i catyi ra Jesús sihin sa uñi xico usi tahan ra cuan: Ñiyivi tyizoho sa cahan maa ndo, tañi tyizoho tucu ñu sa cahan mi cuu si. Ta ñiyivi ña tyaa yahvi sii maa ndo, ña tyaa tucu ñu yahvi sii mi. Ta tatu ña tyaa ñu yahvi sii mi, ña tyaa ñu yahvi sii ra i tasi sii.

Nasaa coyo sa uñi xico usi tahan ra i tasi ra Jesús

¹⁷ Tacuan ta cuee ca i nasaa coyo sa uñi xico usi tahan ra cuan, ta ziñi xaan cuñi ra, ta catyi ra sihin ra Jesús: Tata, ndya cuhva ndya tatyi cuihna ta tyaa si yahvi sa cahan ndi tatu cahan ndi zivun. Catyi ra.

¹⁸ Tacuan ta i catyi ra Jesús sihin ra: I ndyehi cuhva i canacava cuihna cu nuu sa nañi Satanás ndya andivi. Tañi caa minoo tasa zavi; tacuan caa cuhva canacava ra.

¹⁹ Ta sehi tundyee iñi sii maa ndo, ta cuu zahacanaa ndo ziquí tandihí cuhva sa iyo sii cuihna. Ta cuu cuañi ndo ziquí coo ta ziquí tizuhma, ta ñahñi maa sa cuu zañicuehe sii ndo.

²⁰ Zoco ma ziñi xaan cuñi ndo vatyi cuu tava ndo tatyi cuihna cuan. Ziñi ca cuñi ndo vatyi sa ndyaa zivi ndo nu libro ra Ndyoo andivi.

Zacahnu ra Jesús sii ra Ndyoo vatyi cuaha xaan sa zañaha ra Ndyoo sii ñiyivi ndahvi

²¹ Cuhva cuan ta ziñi xaan i cuñi ra Jesús zacuu Tatyi Ii, ta i catyi ra: Zacahnu xein suun Ndyoo Zuti. Yoho ndyaca ñohon andivi ta ñuu ñiyivi. Tyixehun sa siñi tuñi suun sii ñiyivi sica iñi vatyi sito xaan ñu, ta zañohon sii si sii ñu cuu tañi sa ndyihi ñuu ñiyivi ya. Tacuan zavohon vatyi tacuan cuñi moo. Catyi ra Jesús.

22 Ta i catyi ra Jesúsi sihin tandíhi ra zatyiño tyiño ra: Saha maa ra Ndyoo Zuti tandíhi sa iyo sii ra sii mi. Ta yoñi sa sito sii. Maa ñi ra Ndyoo Zuti cuu ra sito sii. Ta maa ñi mi sito sii ra Ndyoo Zuti. Yoñi inga ra sito sii ra sa ndisa cuii. Ta zañehi sii yoa ra cuñi, cuhva iyo Zuti sa ndisa.

23 Ta ziqui i nandyehe ra Jesúsi sii ra i casi ra, ta i catyi ra iñi ñi sihin maa ra: Ziñi xaan cuu sii maando vatyi ndyehe ndo tandíhi sa ndyehe ndo.

24 Vatyi catyi sihin ndo vatyi cuaha xaan rey ta ra profeta ta sa naha, i cuñi xaan ra ndyehe ra sa ndyehe maa ndo vityi, zoco ñándyehe ra sii si. Ta i cuñi xaan ra cuñi ra sa siñi maa ndo, ta ñá siñi ra sii si.

Zacuaha ra Jesúsi vatyi tahan si tyindye yo sii ñiyivi ndya vaha ñi

25 Tacuan ta i cahan minoo ra maestro cuenda ley hebreo. I cuñi ra ndedu coto ihñi ra sii ra Jesúsi, ta i ndaca tuhun ra sii ra: Maestro, ¿yozo caa zavehi ta ñihisahvi añime?

26 Ta i catyi ra Jesúsi sihin ra: ¿Ñaa sa catyi ley? ¿Ñaa sa cahvun yucuan?

27 Ta i nacahan ra cuan, ta catyi ra: Catyi si vatyi cuñi xaan yo sii ra Ndyoo sihin tandíhi cuii añima yo, sihin sa iñi iñi yo, sihin tandíhi tundyee iñi sii yo, ta sihin tandíhi sa siñi tuñi sii yo. Ta catyi tucu ley vatyi cuñi si sa cuñi xaan yo sii inga tahan yo tañi cuñi yo sii maa yo. Tacuan catyi si. Catyi ra cuan.

28 Ta i catyi ra Jesúsi sihin ra: Ndisa sa cohon. Tacuan zavohon, ta cua ñihisahvi añimon. Catyi ra Jesúsi.

29 Zoco ra maestro cuenda ley hebreo cuan, i cuñi ra zañaha ra vatyi vaha cuhva i ndaca tuhun ra. Yucuan cuenda i catyi tucu ra: Zoco ¿yoo ra cuu tehin?

30 Ta i nacahan ra Jesúsi ta catyi ra: I quita minoo ra ñuu Jerusalén ta cuahan ra ndya ñuu Jericó. Ta i tahan ra sii ra zuhu. Ta i zuhu ra tandíhi cuii sa ndyizo ra ndya cuhva ndya zahma ra, ta i cañi xaan ra sii ra ndya cuhva sa yatyi cañi ra sii ra. Ta ziqui i zandoo ra sii ra.

31 Tacuan ta i yaha minoo ra cuzutu ityi cuan. Ndyehe ra sii ra catuu ra yucuan, ta i yaha ra ndya zava.

32 Ta ziqui i yaha tucu inga ra cuenda vehe ñuhu. Minoo ra tyindye sii ra cuzutu cuu ra. Zoco i saa ra, ta i ndyehe ra sii ra catuu ra yucuan, ta ziqui i yaha ra ndya zava.

33 Tacuan ta i yaha minoo ra samaritano sihin burro zono ra ityi cuan. Ta i ndyehe ra sii ra, ta i cundahvi xaan iñi ra sii ra.

34 Ta i noo ra burro zono ra, ta i zavaha ra tata sii ra. I tyihi ra aze-tye ta vino nu cahvi ra, ta i nazucu ra zahma sii ra, ta i tyizo ra sii ra sata burro zono ra. Ta i quihin ra sii ra ta i sindetu ra minoo nu cua cundyaa ra ta zacuu ca ra tata sii ra.

35 Ta inga quiví i cuñi ra samaritano cuan cuhun ra, ta i tava ra xuhun ta saha ra sii ra xu vehe. Ta i catyi ra sihin ra: "Zacuendón sii ra ya. Ta ñaa ca sa cua zanaa ndo sihin ra, yuhví cua nacuhve sii ndo naquisi inga saha." Tacuan i catyi ra ta cuahan ra. Catyi ra Jesúsi.

36 Tacuan ta ziqui i ndaca tuhun ra Jesúsi sii ra maestro cuenda ley cuan ta catyi ra: Sisi sa uñi tahan ra cuan, ¿yoo ra cuu ra tahan ra ndahvi cuan?

37 Ta i catyi ra maestro cuan: Ra sa cundahvi iñi sii ra. Ta i catyi ra Jesúsi sihin ra: Cuahan, ta zuun ñi cuhva cuan zavaha tucu moo.

Sahan ra Jesúsi vehe ña Marta ta ña María

38 Ta cuahan ra Jesúsi minoo ityi, ta saa ra minoo ñuu. Ta yucuan

ndyaa minoo ñaha sa nañi Marta. Ta i tiin cuenda ña sii ra vehe ña.

³⁹ Ta iyo minoo cuhu ña Marta. Nañi ña María. Ta i sicundyaa ña saha ra Jesús ta tyizoho ña sa cahan ra.

⁴⁰ Zoco cuaha xaan tysiño i zavaha ña Marta sa zavaha ña sa casi ra, ta i quasi ña nu ndyaa ra Jesús ta catyi ña sihin ra: Tata ¿atü ña sica iñi oo sa zandoo cuhi sii, ta zatyine maa tuhun ñi? Catyun sihin ña natyindyee ña sii.

⁴¹ Zoco i catyi ra Jesús sihin ña: Marta, Marta, sica xaan iñun cuaha xaan cuhva.

⁴² Zoco iyo minoo ñi sa ñiñi xaan, ta sa i cutuñi vaha iñi ña María cuhva vaha cuan. Ta yoñi cua cuu quindyaa cuhva cuan sii ña. Catyi ra Jesús.

11

Zañaha ra Jesús yozo caa caca tahvi yo sii ra Ndyoo

¹ Ta minoo saha sa sica tahvi ra Jesús sii ra Ndyoo ta sa ndihí sica tahvi ra, ta i catyi minoo ra i casi ra sihin ra: Tata, zañohon sii ndi yozo caa caca tahvi ndi sii ra Ndyoo tañi i zañaha ra Juan sii ra i sica noo sihin ra.

² Tacuan ta i catyi ra Jesús sihin ra: Cuhva sa cua cahan ndo sihin ra Ndyoo tyehen catyi ndo: "Ndyoo Zutu ndi ra ndyaa andiví, ii xaan cuu ziví moo. Nasaa quiví cua cundyaca ñohon ihya ñuu ñiyiví. Nazavaha ñiyiví cuhva cuñi moo ihya ñuu ñiyiví tañi cuu si ndya gloria.

³ Cuhvon sa siñi ñuhu sii ndi minoo minoo quiví.

⁴ Ta zohon tucahnú iñi sii ndi sa cuenda cuatyí ndi tañi maa ndi zaha ndi tucahnú iñi sii ñiyiví zavaha sa ña vaha sihin ndi. Ma cuhvon sa nducu coto ihñi cuihna sii ndi coto zavaha ndi sa ña vaha." Tacuan i zacuaha ra Jesús sii ra.

⁵ Ta ziquí i catyi tucu ra: Tatu maañuu cua soon vehe amigun ta

catyun sihin ra: "Xaa, cuhva noo uñi tahan pan sii.

⁶ Vatyi nacaa saa ra tehin. Sica xaan i quasi ra, ta ñahñi maa sa cuhve casi ra."

⁷ Ta ndya sisi vehe cua cahan amigun, ta cua catyi ra: "Ma zayan-gon sii. Sa ndazi cutu yuvehi. Ta quixi sa ndyihí zehi. Ta coto ndoyo si, ma cuu nduvite ta cuhve suun vityi." Tacuan cua catyi ra suhun.

⁸ Ta catyi suhun vatyi vazu amigun sii ra cuan, zoco ma nduvita ra ta cuhva ra sa yatyi. Zoco tatu ndoon yucuan ta ndita ñi cacon sii ra, tacuan ta cua nduvita ra ta cuhva ra yozo tahan si cuñun.

⁹ Ta tacuan tucu maa ndo. Caca ndo sii ra Ndyoo, ta cua cuhva ra sa sica ndo. Nanducu ndo, ta cua nañihí ndo. Cati ndo yuvehe, ta cua nañña si.

¹⁰ Vatyi tandihí ndoho ra sica, cua ñihí ndo. Ta tatu nanducu ndo, cua nañihí ndo. Ta tatu cati ndo yuvehe, cua nuña si.

¹¹ Ndoho, ra cuu zutu sa ndyihí, tatu cua caca zehun minoo pan ¿atu cua cuhva ndo minoo yuu sii ra? Ña tacuan. A tatu caca ra minoo tyiyaca ¿atu cua cuhva ndo minoo coo?

¹² A tatu cua caca ra minoo ndiví ¿atu cua cuhva ndo minoo tizuhma? Ña tacuan.

¹³ Ñiyiví quiñi xaan cuu maa ndo, zoco sito ndo yozo caa cuhva ndo sa vaha sii zehe ndo; vaha xaan ca cua zavaha ra Ndyoo, ta cua cuhva ra Tatyi li sii ñiyiví sica sii ra.

Catyi ra xaan iñi sii ra Jesús vatyi zatyinó ra sihin tundyee iñi sii cuihna

¹⁴ Tava ra Jesús minoo tatyí cuihna sii minoo ra ñehe. Ta cuhva sa quita tatyí cuihna cuan ta i cuu nacahan ra ñehe. Ta iyo xaan i cuñi ñiyiví.

¹⁵ Zoco zuhva ñu i catyi ñu: Tava ra ya tatyí cuihna sihin tundyee iñi ra Beelzebú, ra cu nuu sii cuihna. Catyi ñu.

16 Ta inga ñu nducu coto ihñi ñu sii ra Jesús, ta i sica ñu sa zañaha ra minoo zeña ityi andivi.

17 Zoco i sito ra Jesús cuhva sica iñi ñu, ta i catyi ra sihin ñu: Tatu sahñi tahan xaan ñiyivi minoo ñuu, ndaha cua tivi ta naa ñuu cuan. Ta tacuan tucu minoo vehe ñiyivi, tatu sahñi tahan ñu sihin tahan ñu, yatyi xaan cua ndihí cuhva vaha nu yucu ñu.

18 Ta ma cahñi tahan ra cu nuu sii cuihna sihin inga cuihna vatyi tatu tacuan zavaha si, yatyi xaan cua ndihí cuhva iyo sii si. Ma tava cuihna sii cuihna. Ta catyi ndo vatyi yuhvi tave sii cuihna sihin tundyee iñi sii ra cu nuu sii cuihna.

19 Zoco tatu yuhvi tave sii cuihna sihin tundyee iñi ra Beelzebú, tacuan tucu zavaha ra ndyico sii maa ndo. Zoco maa ra cuan cua nacatyi sihin ndo vatyi ma tava minoo cuihna sii inga cuihna.

20 Ta yuhvi tave sii cuihna sihin tundyee iñi maa ra Ndyoo. Ta cuñi si catyi si vatyi ndisa cui sa saa cuhva ndyaca ñaha ra Ndyoo.

Zañaha ra Jesús vatyi ñihi ca tundyee iñi iyo sii ra Ndyoo ta ziqui sii cuihna

21 Tatu minoo ra ñihi xaan zacuenda ra vehe ra sihin mityi ra, yoñi cuu quihin ndaha tyiño ra.

22 Zoco tatu quasi inga ra ñihi ca ta ziqui ra cuan ta quindya ra mityi ra, ma cuu ca zacacu ra sii ra. Ta cuu quihin inga ra ndaha tyiño ra ta zasa ra sii ra tahan ra.

23 Tatu ña zatyiño ñiyivi sihin, zativí ñu tyiñe. Ta tatu ma tyindyee ñu sii, sa nacatyi Tuhun Ndyoo sihin ñiyivi, cuñi si catyi si vatyi ña saha ñu sa coto ñiyivi tuhin.

Cuhva nandisi tucu tatyi ña vaha inga saha tatu naa iñi ñiyivi sii ra Ndyoo

24 Tatu quita minoo tatyi ña vaha sii minoo ra, sica noo tatyi cuihna cuan nu ityi xaan, ta nanducu si nu cua quitatu si. Zoco ña nañihi si

nu quitatu si, ta catyi si: "Cunuhi tuqui ndya vehi nu i quite", catyi si.

25 Tacuan ta nasaa si añima ra cuan nu i quita si. Ta ndyehe si vatyi ndihí xaan; yoñi ndyaa yucuan.

26 Ta ziqui cuahan si, ta quihin si usa tahan ca tatyi cuihna xaan ca ta ziqui maa si. Ta ndihvi tandihí tatyi cuihna cuan añima ra cuan, ta ndoo si. Ta yaha ca cuhva cua nanduu ra cuan ta ziqui sa xihna ñi.

Ñiyivi sa zii xaan cuñi sa ndisa

27 Ta nii ñi sa cahan ra Jesús cuhva cuan, ta i cana saa minoo ñaha sa ñoho tictui ñiyivi, ta catyi ña: *Zii xaan cuu sii ñaha i zacacu suun, ñaha i zacaxi suun.*

28 Zoco i catyi ra Jesús sihin ña: Ndison sa cohon, zoco zii xaan ca cua cuu sii ñu siñi Tuhun Ndyoo ta zavaha ñu sii si.

Maa maa ñi sa ndyityi cuñi ñiyivi ña vaha ndyehe ñu

29 I siconduu cuii ñiyivi nu ndyaa ra Jesús, ta i catyi ra sihin ñu: Quiñi xaan iyo ñiyivi iyo vityi. Cuñi xaan ñu ndyehe ñu minoo zeña, zoco ñahñi inga ca zeña cua ndyehe ñu ta ziqui sa i cuu sa cuenda ra Jonás.

30 Ra Jonás i cuu ra minoo zeña sii ñiyivi ñuu Nínive, ta tacuan tucu cua cuu ra i quasi ndya gloria sihin ñiyivi sa iyo vityi.

31 Quiví cua tyicuhva ra Ndyoo sii ñiyivi, cua nandoto minoo ñaha sa sindyaca ñaha sii ñiyivi ndya siyo tyañihu ta sa naha. Ta maa ña cua tyaa cuatyi sata maa ndo vatyi sa ndisa iyo cuatyi ndo, vatyi ña tyizoho ndo sa cahan Zehe ra Ndyoo. Ta maa ña, sica xaan i sahan ña i sityizoho ña sa siñi tuñi sa saha ra Ndyoo sii ra rey Salomón. Ta vityi ndyaa inga ra cahnu ca ta ziqui ra Salomón sihin ndo, ta ña tyizoho ndo sa quehin.

32 Ta tacuan tucu ñiyivi ñuu Nínive, cua tyaa ñu cuatyi sata ndo quiví cua zandaa ra Ndyoo tyiño cuenda ñiyivi vatyi i tyizoho ñu sa

cahan ra Jonás, ta i ndu-uu iñi ñu cuatyí ñu. Ta cahnu ca mi ta zíqui ra Jonás, ta ña cuñi ndo tyizoho ndo sa quehin.

Nazaha vaha yo cuenda sii yo coto ñahñi sa ndisi ra Ndyoo iyo sii yo

³³ Yoñi yo cua tyaa yo minoo tyuma ta tyihi yo sii si minoo nu xehe a sisi minoo caja vatyí ñúhu cuan tahán si cozo si minoo nu zucu vatyí tacuan ta ndisi ndyehe ñiyiví quihví sisi vehe.

³⁴ Siti nuu yo cuu tañi minoo sa zandisi sii yo ta cuu ndyehe yo nu cuahan yo. Tatu vaha siti nuu yo, ndisi ndyehe yo nu cuahan yo. Ta tacuan tucu añima yo, tatu iyo sa ndisi sa saha ra Ndyoo añima yo, vaha ñiyiví cuu yo. Tatu ñahñi sa ndisi sa saha ra Ndyoo iyo añima minoo ñiyiví, iví ñiyiví vaha cuu ñu. Tañi minoo ra cuaa cuu ñu.

³⁵ Yucuan cuenda zaha ndo cuenda sii ndo tatu ndyaa sa ndisi ra Ndyoo sihin ndo a sa ñaa.

³⁶ Tatu situ cuii sa ndisi ra Ndyoo añima ndo, nu siin ta ma cuu zavaha ndo sa ña vaha. Ñahñi ca sa quiñi ta sa ña vaha iyo sii ndo. Tatu sino iñi ndo, cuu si tañi minoo ñúhu cahnu zandisi sii ndo.

Tyaa ra Jesús cuatyí sata ra fariseo ta ra maestro cuenda ley hebreo

³⁷ Cuhva sa ndihí cahan ra Jesús ta i cana minoo ra fariseo sii ra vatyí cua casi ra xita vehe ra. Ta cuahan ra Jesús vehe ra. Ta i si cundyaa ra mesa.

³⁸ Ta i ndyehe ra fariseo cuhva zavaha ra. Ta iyo xaan i cuñi ra vatyí ña zavaha ra Jesús costumbre sa nacatya xaan ra ndaha ra tañi tuhya maa ñu zavaha cuee ca sa casi ñu xita.

³⁹ Ta i catyi ra Jesús sihin ra: Ndoho ra fariseo nacatya xaan ndo sata vaso ta sata coho, zoco sisi añima maa ndo yaha xaan quiñi iyo ndo ta zuhu xaan ndo.

⁴⁰ Tondo xaan iyo maa ndo. I zavaha ra Ndyoo sata vaso ta coño ñuhu maa ndo, zoco zatu sica iñi ndo vatyí ña zavaha tucu ra añima ndo?

⁴¹ Cuñi si sa cuhva ndo xuhun sii ñiyiví ndahvi ta zavaha ndo sa vaha sihin ñu. Tacuan ta cua ndundií tucu añima ndo.

⁴² Ndahvi ndoho ra fariseo vatyí saha ndo diezmo sii ra Ndyoo tandíhi yucu sa tasi ndo tañi menta ta ruda ta inga sa sasi ndo, zoco ña zavaha ndo sa ñiñi ca vatyí ña zavaha ndo sa ndoo sihin ñiyiví, ta ña cuñi ndo sii ra Ndyoo sa ndisa cuii. Ta yucuan cuu sa ñiñi ca, ta ma naa iñi ndo sa cuhva ndo diezmo, ndihí ca.

⁴³ Ndahvi ndoho ra fariseo vatyí cuñi ndo cundyaa ndo tyayu vaha vehe ñuhu. Ta cuñi ndo sa zacahnu ñiyiví sii ndo nuyahvi.

⁴⁴ Ndahvi ndoho ra maestro cuenda ley ta ndoho ra fariseo vatyí zaha ndo tuhun vatyí vaha xaan ndo ta ña ndisa. Cuu ndo tañi ndiyí sa ñoho sisi ñaña, ta yaha ñiyiví zíqui si, zoco ña sito ñu ñaa sa ñoho. Catyi ra Jesús.

⁴⁵ Tacuan ta i nacahan minoo ra maestro cuenda ley sihin ra, ta catyi ra: Maestro, tatu cohon cuhva cuan, tyaa tucun cuatyí sata maa ndi.

⁴⁶ Ta i catyi tucu ra Jesús sihin ra: Ndahvi tucu ndoho ra maestro cuenda ley vehe ñuhu vatyí zandcuaha ca ndo ley i tasi ra Ndyoo ta sa naha, ta ña tahan si zavaha ndo tacuan. Yoñi sa cuu zavaha tandíhi si. Ta nu maa ndo ta ña zavaha ndo tandíhi si vatyí sa sito ndo vatyí ma cuu.

⁴⁷ Ndahvi ndoho vatyí zandutyáqui xaan ndo ñaña cuenda ra i cuu profeta ta sa naha, ta zuun ñi ñiyiví sahnu sii ndo ta sa naha i sahñi ñu sii ra cuan.

⁴⁸ Sihin cuhya zavaha ndo zañaha ndo vatyí ndoo ndo vaha cuhva i zavaha ñiyiví sahnu sii ndo ta sa naha vatyí maa ra i sahñi sii ra

profeta, ta maa ndo zandutyaqui xaan ndo ñaña ra profeta cuan.

⁴⁹ Yucuan cuenda i catyi ra Ndyoo ta sa naha: Cua tasi sii ra cua cahan tuhun sa cua cuhve sii ra, ta cua tasi sii ra cua tave tyiño sa zatyiño ra tyiñe. Ta cua cahñi ñiyiví sii zuhva ra, ta sii inga ra cua zayanga xaan ñu.

⁵⁰ Ta ndisa vatyi tacuan zavaha ndo. Ta cua tasi tuñi ra Ndyoo sii maa ndo sa cuenda tandihí ra profeta i sahñi ñiyiví ta sa naha ta ndya cuhva ndya vityi.

⁵¹ Ndyo cuhva ndya ñiñi ra Abel, ra i sahñi ra Caín yañi ra, ta ndya cuhva ndya niñi ra Zacarías, ra i sahñi ñiyiví sisi vehe ñuhu, ta catyi sihin ndo sa ndisa cuii vatyi cua tasi tuñi ra Ndyoo sii ñiyiví iyo vityi sa cuenda tandihí si cuan.

⁵² Ndaahvi ndoho ra maestro cuenda ley vehe ñuhu vatyi i tyixehe ndo ndaha ticui cuenda yuvehe nu quihví ñiyiví ityi ra Ndyoo. Ñá quihví maa ndo ityi cuan, ta inga ñiyiví sa cuñi quihví, ña saha ndo sa quihví ñu.

⁵³ Sa ndihí cahan ra Jesús tuhun cuan, ta ra maestro cuenda ley ta ra fariseo i cuxaan xaan ra sihin ra, ta i quisaha nducu tuhun xaan ra sii ra cuaha xaan cuhva

⁵⁴ vatyi nducu ra cuhva sa cahan ra Jesús minoo cuhva ña vaha. Ta ziñui cua tyaa ra cuatyi sata ra.

12

Nacatyi ra Jesús vatyi ma cuu tyixehe yo cuatyi yo

¹ Cuenda mil ñiyiví i titahan ndya cuhva catyhi tahan ñu vatyi cuaha xaan ñu. Ta sa xihna ñi i catyi ra Jesús sihin ra i casi ra: Zazuenda vaha ndo sii ndo sihin cuhva iyo ra fariseo vatyi ra zandavi ñaha cuu ra.

² Vatyi tandihí sa ña vaha sa zavaha ñiyiví ta tyixehe ñu sii si, cuee ca ta cua quita si nu ndisi, ta cua coto inga ñiyiví sii si.

³ Yucuan cuenda ñaa ndihí ca sa cahan xehe ndo sisi vehe ndo, cua coo quivi cua cuiñi tandihí ñiyiví sii si. Ta vazu xehe xaan cahan ndo minoo tuhun, zoco cua coto tandihí cuii ñiyiví sii si cuee ca.

Cuñi si sayuhuyo sii ra Ndyoo ta yivi sii ñiyiví

⁴ Ta catyi sihin ndoho ra cuu amigi vatyi ma yuhu ndo sii ra cuu cahñi sii coño ñuhu ñi ndo vatyi yaha cuan ta ñahñi ca sa cuu zacuu ra.

⁵ Zoco cua catyi sihin ndo yoo sii tahan si cuyuhu ndo. Cuyuhu ndo sii ra sa cuu cahñi sii ndo sa ndisa cuii ta zacuhun ra sii ndo andyaya.

⁶ Ña yahvi ndyaa zaa. Cuu zata yo ohon tahan ti sa uu peso. Ta ña naa iñi ra Ndyoo sii numinoo ti.

⁷ Ta sito ra Ndyoo yozo tahan ixi xiñi ndo iyo. Yucuan cuenda ma yuhu ndo sii ra cahñi sii ndo vatyi yahvi xaan ca ndyaa maa ndo ta ziñui ca cuaha xaan zaa.

Ma yuhu yo cahan yo Tuhun Ndyoo sihin ñiyiví

⁸ Ta catyi sihin ndo vatyi tandihí ndo sa nacatyi ndo sihin ñiyiví vatyi sito ndo sii, yuhvi cua catyi sihin ángel ra Ndyoo ndya gloria vatyi site sii ndo. Ta ra i quisí ndya gloria cui.

⁹ Zoco yoo ra catyi vatyi ña sito ra sii, yuhvi cua catyi ityi nuu ángel vatyi ña site sii ra.

¹⁰ Ra i quisí ndya gloria cui, ta vazu cahan ñiyiví ndya vaha ñi sii, zoco cua zaha ra Ndyoo tucahnú iñi sii ñu. Zoco tatu cahan ñiyiví ndya vaha ñi sii Tatyi Ii ra Ndyoo, ma zaha ca ra Ndyoo tucahnú iñi sii ñu.

¹¹ Ta cuhva cundyaca ñiyiví sii ndo sisi vehe ñuhu a nuu ra cu juez a ra cu tyiño, ma caca xaan iñi ndo ñaa sa cua cahan ndo.

¹² Vatyi zuun ñi caa cuhva cuan cua cuhva Tatyi Ii tuhun cua cahan ndo.

Ica xaan tatu caca xaan iñi yo yozo caa ñihí yo xuhun

¹³ Cuaha xaan ñiyivi i siyucu sihin ra Jesús, ta minoo ra ndihí sihin ñu i catyi ra sihin ra Jesús: Maestro, catyun sihin yañi vatyi natahvi zava ra ndaha tyiño sa zandoo zutu ndi sii ndi.

¹⁴ Tacuan ta i catyi ra Jesús sihin ra: Xaa, ¿yoo ra saha tyiño sii sa cui juez a cui minoo ra sa tahvi zava ndaha tyiño?

¹⁵ Ta i catyi ra Jesús sihin tandihí ñiyivi: Zaha vaha ndo cuenda ta ma ndyiyó iñi ndo ndaha tyiño vatyi ña siñi ñuhu sa coo cuaha xaan ndaha tyiño yo ta coo vaha yo.

¹⁶ Ta i cahan ra Jesús ziquí minoo cuhva sihin ñiyivi, ta i catyi ra: Sicoo minoo ra cuca xaan, ta vaha xaan i cuu ndaha tyiño ra.

¹⁷ Ta i sica iñi ra sihin añima ra, ta i catyi ra: “¿Yozo caa cua zavehi? Ñahñi nu quihi tandihí ndaha tyiñe.

¹⁸ Zoco tyehen cua zavehi. Cua cani yaca ndyihí, ta cua zavaha que sa nahnu ca. Ta yucuan cua quihi tandihí niñi.

¹⁹ Tacuan ta ma zatyiño que cuaha xaan cuiya. Cua quitati, ta zii xaan cua cuñi. Cuá casi vehi ta coho vehi.” Tacuan i sica iñi ra.

²⁰ Zoco i catyi ra Ndyoo sihin ra: “Tondo xaan sica iñun vatyi vityi sa cuaa cua cuun. Ta ndaha tyiño sa sicumi vaha xoon, cua ndoo si sihin inga ñiyivi.”

²¹ Ta tacuan iyo ñiyivi sa zacaya xaan ndaha tyiño sa cuenda ñi maa ñu, ta ñahñi maa sa iyo sii ñu nu ndyaa ra Ndyoo. Catyi ra Jesús.

Ma caca xaan iñi yo sa cuenda nnaa sa siñi ñuhu sii yo

²² Ta i catyi ra Jesús sihin ra i casi ra: Catyi sihin ndo vatyi ma caca xaan iñi ndo yozo caa cua ñihí ndo sa casi ndo ñuu ñiyivi ya. Ta ma caca xaan iñi ndo yozo caa cua ñihí ndo zahma quihi ndo.

²³ Vatyi iyo inga sa siñi ñuhu ca sii yo ta ziquí sa casi yo ta sa quihi yo.

²⁴ Ndyehe ndo cuhva iyo zaa. Ña tasi ti, ta ña naquihin ti tyiño zacuu ti, ta ña tyihi vaha ti ndaha tyiño ti. Zoco sasi ti vatyi maa ra Ndyoo saha sa casi ti. Ta ñiñi xaan ca cuu maa ndo ityí nuu ra Ndyoo ta ziquí zaa cuan.

²⁵ ¿Ta yoo ndo cuu nduzucu ca ndo siin ca tatu caca xaan iñi ndo sa cuenda si? Ma cuu ca.

²⁶ Ta tatu ma cuu zavaha ndo numinoo cuhva luhlu cuan, ¿ñaa cuenda sica xaan iñi ndo sa cuenda tandihí inga cuhva?

²⁷ Zaha ndo cuenda cuhva iyo ita vatyi ña tavi si ta ña cono si iza, zoco catyi sihin ndo vatyi vazu cuca xaan i cuu ra Salomón ta tyaqui xaan zahma ra, zoco ña tyaqui ca si ta ziquí minoo ita cuan.

²⁸ Ta tatu zandutyaqui xaan ra Ndyoo sii tu-itá sa iyo vityi ta ityaan cua nduu tu nducu ta cayu tu, tyaqui xaan tucu zahma cua cuhva ra sii maa ndo. Zoco maa ndo ña sino vaha iñi ndo sii ra.

²⁹ Ma caca xaan iñi ndo ta nanducu ndo sa casi ndo ta sa cohendo. Ta ma caca xaan iñi ndo tatu cua cuhva ra Ndyoo sii si a ma cuhva ra.

³⁰ Vatyi sica xaan iñi ñiyivi ña sito sii ra Ndyoo sa cuenda sa casi ñu. Zoco ma caca xaan iñi maa ndo tuhun cuan vatyi sito Zutu ndo vatyi siñi ñuhu si sii ndo.

³¹ Vaha ca nducu ndo cuhva yozo caa cua cuhva cuenda ndo sii ndo sii ra Ndyoo vatyi cundyaca ñaha ra sii ndo. Ta tacuan ta cuá ñihí ñdo tandihí cuíi sa siñi ñuhu sii ndo.

Cuhva vaha xaan sa iyo ndya gloria

³² Ma yuhu ndo, mvee tictatyi zone. Vazu ña cuaha ndo zoco zii xaan cuñi Zutu yo, ta cua cuhva ra quihví ndo nu ndyaca ñaha ra.

³³ Xico ndo sa sii ndo ta cuhva ndo sii ñiyivi ndahvi. Tatu tacuan zavaha ndo, zacaya ndo sa vaha nu ndyaa ra Ndyoo. Ta yucuan ma ndihí sa vaha cuan vatyi ma cuu quihví ra zuhu, ta yoñi tiquixi zatívi sii si.

³⁴ Nu ndyaa sa cuca ndo, yucuan cuu nu ndyaa añima ndo.

Cuñi si sa cundyaa listo yo

³⁵ Cundyaa listo ndo, ta cuatu ndo quiví cua quasi inga saha.

³⁶ Cuu ndo tañi minoo muzu sa ndatu listo sii patrón ra ñaa quiví cua nasaa ra sa cuahan ra minoo vico tindaha. Ta cayu ñúhu sisi vehe vatyi tatu nasaa patrón ta cati ra yuvehe, yatyi xaan cua nuña muzu yuvehe.

³⁷⁻³⁸ Ta cuhva cuan zii xaan cua cuñi patrón ndyehe ra sii muzu ra vatyi ndatu listo ra ñaa ñi cuhva cuá nasaa ra vazu sa cuaa a vazu ñaa ca. Ta cua tyaa ra sii muzu ra yumesa ta cuhva ra sa casi ra vatyi i ndatu ra sii ra. Ta zii xaan cua cuñi muzu cuan vatyi tacuan zavaha patrón ra sihin ra.

³⁹ Ta coto ndo cuhva ya vatyi tatu cua coto minoo ra xu vehe ñaa cuhva cua quihví ra zuhu vehe ra, cua zacuenda xaan ra vehe ra. Ta ma cuzu ra. Ta ma cuhva ra sa nuña ra zuhu vehe ra ta zuhu ra ndaha tyiño ra.

⁴⁰ Zuun ñi cuhva cuan cundyaa listo tucu maa ndo vatyi zana ñi iñi ndo ta cuhva cuan cua nasaa ra i quasi ndya gloria.

Muzu vaha ta muzu ña vaha

⁴¹ Tacuan ta i ndaca tuhun ra Pedro sii ra Jesús ta catyi ra: Tata, ¿Yoo sii cuenda cohon tuhun ya? ¿Atu sa cuenda sa maa ñi maa ndi a sa cuenda tandihí ñiyivi?

⁴² Tacuan ta i nacahán ra Jesús, ta i catyi ra sihin ra: Muzu sa tyizoho sa cahan patrón ra, yucuan cuu muzu vaha vatyi zacuenda ra vehe patrón ra. Ta saha ra sa casi tandihí inga muzu minoo cuhva vaha.

⁴³ Ta zii xaan cua cuñi muzu cuan tatu nasaa patrón ra cuhva sa zatiyo ra ta zavaha ra tandihí sa catyi patrón ra.

⁴⁴ Sa ndisa catyi sihin ndo vatyi cua cuhva patrón ra sa cundyaca ñaha ra tandihí sa sii ra vatyi tyaa xaan ra yahvi sii patrón ra.

⁴⁵ Zoco tatu sica iñi muzu cuan vatyi naha xaan cuahan patrón ra, ta yucuan cuenda quisaha cañi ra sii inga muzu ta sasi cuahyi ra ta sihi xaan ra ndixi ta siñi ra,

⁴⁶ tacuan ta zana ñi iñi ra ta cua nasaa patrón ra minoo quiví sa ña ndatu ra sii ra. Ta cua tasi tuñi xaan patrón ra sii ra. Ta cua tahan si sii ra tañi cua tahan si sii ñiyivi ña sino iñi.

⁴⁷ Ta minoo muzu sa sito ñaa sa cuñi patrón ra zavaha ra, zoco ña ndyaa listo ra ta ña zavaha ra cuhva cuñi patrón ra, cuaha xaan tundoho cua zandyeha patrón ra sii ra.

⁴⁸ Ta tatu ña sito minoo muzu ñaa sa cuñi patrón ra ta ña zavaha ra sii si, tahan si sa ndoho ra. Zoco zuhva ñi cua ndoho ra vatyi ña sito ra. Ta tatu saha ra Ndyoo cuaha ca sa siñi tuñi sii minoo ra, cuaha ca sa vaha cuñi si zavaha ra. Ta tatu cuaha ca tyiño ndyizo minoo ra, cuñi si vatyi ñihi ca zatyiño ra.

Ña cuu cu-iiñ ñiyivi sa cuenda ra Jesús

⁴⁹ Tañi sa zatehin minoo ñúhu ñuu ñiyivi, yucuan cuu tyiño vasi. Ta ñúhu cuan cua zanduvaha si sii ñu sino iñi sii, ta cua zanaa si sii ñu ña sino iñi. Sa quisaha cayu ñúhu cuan, zoco cumañi zacayu que sii si.

⁵⁰ Ta cuaha xaan tundoho cua ndyehi ndya cuhva ndya cua ndihí tyiño zacui.

⁵¹ Sica iñi maa ndo vatyi vasi cuhve sa taxi ñuu ñiyivi, zoco ña tacuan. Vasi zacuziin sii ñiyivi.

⁵² Ta ndya vityi ta ityi nuu ca ihyá cuu cuhva cua cuu si. Tatu ohon tahan ñiyivi iyo minoo vehe, uñi tahan ñu cua cahñi tahan sihin uu tahan ñu, ta uu tahan ñu cua cahñi tahan sihin uñi tahan.

⁵³ Cua cahñi tahan zutu sa ndiyihi sihin zehe ra ta zehe ra sihin zutu ra. Ta zihí ña cua cahñi tahan sihin zehe ña, ta zehe ña sihin zihí ña. Ta cua cahñi tahan tyizo ña sihin sono ña ta sono ña sihin tyizo ña.

Nacatyi ra Jesús sihin ñiyiví vatyi ña nacoto ñu vatyi sa ndyaa Zehe ra Ndyoo

⁵⁴ Tacuan ta i catyi ra Jesús sihin ñiyiví yucu yucuan: Tatu ndyehe ndo vatyi iñi ñaa vityi, catyi ndo vatyi cua coon zavi. Ta ndisa ndo sa cahan ndo.

⁵⁵ Ta tatu ndyehe ndo vatyi vasi tatyi ityi tyauhu, catyi ndo vatyi sa cua ndu-cahñi. Ta tacuan cuu si.

⁵⁶ Ra tondo xaan cuu maa ndo. Nacoto ndo sa iyo andiví ta nu ñuhu. ¿Yozo caa vatyi ña nacoto ndo ñaa tyiemu cuu si vityi?

Nducu ndo cuhva coo sa taxi siindo sihin ra xaan iñi sii ndo

⁵⁷ ¿Ñaa cuenda ña cutuñi iñi ndo ñaa sa cuu sa ndoo?

⁵⁸ Tatu iyo minoo ra cuñi ra cuatyi suhun ta cuhun sihin ra nu ndyaa ra cu tyiño, nducun cuhva nacoo vohon sihin ra cuee ca sa saa ndo nuu ra cu tyiño coto catyi ra cu tyiño vatyi cuhun vehe caa. Ta cua cuhva ra suun sii ra cu policía. Ta cua tyihi ra suun vehe caa.

⁵⁹ Tatu tacuan cua cuu si, ma quiton ndya tyiyahvun tandihí sa tahan si tyiyahvun, (ta tacuan cua zavaha ra Ndyoo suhun andyaya tatu ma nduvohon sihin ra).

13

Cuñi si sa zama yo cuhva iyo yo

¹ Cuhva cuan yucu zuhva ra nacatyi sihin ra Jesús cuhva i zavaha ra Pilato sihin zuhva ra Galilea. Catyi ra nacatyi sihin ra Jesús vatyi i tava ra Pilato tyiño sa cahñi zandaru sii ra Galilea cuan niñi ña sa saha ra ofrenda sii ra Ndyoo sisi vehe ñuhu. Ta i nazaca ra niñi ra cuan sihin niñi quiti sa cuu ofrenda ra.

² Ta i nacahan ra Jesús, ta catyi ra sihin ra: Sica iñi ndo vatyi cahnu xaan cuatyi ra Galilea cuan. Ta yucuan cuenda ndyehe ra tundoho ta sihi ra.

³ Zoco catyi sihin ndo vatyi ña tacuan. Ta tatu ma zama maa ndo cuhva iyo ndo cunaa tucu maa ndo.

⁴ Ta sito ndo vatyi i sihi sahun uñi tahan ra quiví i nduva torre Siloé cuan ziquí ra. ¿Atu sica iñi ndo vatyi cuaha ca cuatyi ra cuan ta ziquí inga ra ñuu Jerusalén?

⁵ Ña tacuan. Ta tatu ma zama maa ndo cuhva iyo ndo, cunaa tucu maa ndo.

Ndatu ra Ndyoo sa nazama yo cuhva iyo yo

⁶ Tacuan ta i cahan ra Jesús ziquí cuhva ya, ta catyi ra: Sicoo minoo yutu higuera sii minoo ra nu ndyaa yoho uva ra. Ta i sahan ra ta i sinanducu ra yucu vixi nuu tu, ta ñá nañihi ra.

⁷ Ta i catyi ra sihin ra zanduvii nu ndyaa ndaha tyiño ra: “Ndyehe, sa uñi cuiya quasi nanduqui yucu vixi nuu tu ya, ta ña nañihi. Cahndyon sii tu vatyi nandyaa ñi tu, ta ñahñi maa saha tu.” Catyi ra.

⁸ Zoco i nacahan inga ra, ta catyi ra sihin ra: “Tata, nandoo tu minoo ca cuiya. Cua zanduvite ñuhu saha tu ta tyihi ñuhu tyahyu.

⁹ Ta tatu cuhva tu yucu vixi, vaha, ta tatu ma cuhva tu cua cahndye sii tu.”

Quiví quitatu ñiyiví zanduvaha ra Jesús sii minoo ña tehe sata

¹⁰ Minoo quiví quitatu ñiyiví zacuaha ra Jesús sii ñiyiví sisi vehe ñuhu.

¹¹ Ta yucuan ndyaa minoo ñaha sa ñoho minoo tatyi ña vaha. Sa sahun uñi cuiya, ña cuu ndundoo ña.

¹² Ta i ndyehe ra Jesús sii ña. Ta i cana ra sii ña ndya nu ndyaa ra, ta i catyi ra sihin ña: Maha, sa nduvohon.

¹³ Ta i tyizo ra ndaha ra xiñi ña, ta zuun ñi caa cuhva cuan i ndundoo ña. Ta i zacahnu xaan ña sii ra Ndyoo.

¹⁴ Zoco i cuxaan xaan ra cu nuu sii vehe ñuhu cuan vatyi i zanduvaha ra Jesús sii ña quívi quitatu ñiyivi. Ta i catyi ra sihin ñiyivi yucu yucuan: Iyo ñuu tahan quívi tahan si zatyiño yo. Yucuan cuenda quisido quívi cuan ta nduvaha ndo ta yívi quívi sa quitatu ñiyivi.

¹⁵ Ta i catyi ra Jesús sihin ra: Ra ña vaha cuu ndo. ¿Atu ma ndasi ndo quíti zono ndo sa cuu zacoho ndo ndutya sii ti quívi quitatu ñiyivi?

¹⁶ Ta tacuan tucu maha ya. Zehe ra Abraham cuu sii ña, ta sa sahun uñi cuiya nuhñi ña zacuu cuehe ya. ¿Atu ña vaha sa cua ndasi ña quívi quitatu ñiyivi? Catyi ra Jesús.

¹⁷ Ta sa yaha catyi ra cuhva ya, i cucahan xaan nuu ra xaan iñi sii ra. Ta zii xaan i cuñi tandihí ñiyivi sihin sa vaha xaan sa zavaha ra Jesús.

Tañi minoo siti mostaza, tacuan caa sa ndyaca ñaha ra Ndyoo

¹⁸ Tacuan ta i catyi ra Jesús: ¿Yozo caa iyo sa ndyaca ñaha ra Ndyoo? ¿Ñaa sihin zacasi tehin sa ndyaca ñaha ra Ndyoo?

¹⁹ Cuu si tañi minoo siti mostaza sa i tasi minoo ra nu ñuhu ra, ta i sahnu tu. I cucahnu xaan tu ndya cuhva cua cozo zaa zoco tu.

Tañi yusa iya cuu sa ndyaca ñaha ra Ndyoo

²⁰ Ta i catyi tucu ra Jesús inga saha: ¿Ñaa sihin zacasi tehin sa ndyaca ñaha ra Ndyoo?

²¹ Cuu si tañi yusa iya sa quihin minoo ñaha ta nazaca ña sihin uñi tahan arroba yutyi pan. Yusa iya cuan cuu sa cua zanandaa sii tandihí yusa pan cuan. (Ta tacuan tucu cuahan nducahnu ca sa ndyaca ñaha ra Ndyoo.)

Yuvehe tihin ta ityi cuiñi cuu sa cuahan nu ndyaa ra Ndyoo

²² Tacuan ta cuahan ra Jesús tahan tahan ñuu nahnu ta ñuu ndyihí, zacuaha ra sii ñiyivi. Cuahan ra ndya Jerusalén.

²³ Ta minoo quívi i ndaca tuhun minoo ra sii ra: Tata, ¿atu zuhva ñi ñiyivi cua cacu? Ta i catyi ra Jesús sihin ra:

²⁴ Nducu xoon cuhva quihvun yuvehe tihin vatyi yii xaan cua quihví ñiyivi nu ndyaca ñaha ra Ndyoo. Catyi suhun vatyi cuaha xaan ñiyivi cua cuñi ñu quihví ñu, ta ma cuu.

²⁵ Tañi ra xu vehe, tacuan iyo ra Ndyoo. Ta ra xu vehe cuan cua nacazi ra yuvehe ra. Ta cua cuyucu ndo sata vehe, ta cua cati ndo, ta cua catyi ndo: “Tata, tata, nuña yuvehe naquihvi ndi.” Ta cua catyi ra sihin ndo: “Ña site yoo ndoho cuu ndo.”

²⁶ Tacuan ta cua catyi maa ndo: “Sasi ndi ta sihi ndi suhun, ta i zacuohon sii ndi ñuu ndi.”

²⁷ Ta cua catyi ra Ndyoo sihin ndo: “Ña site yoo ndoho cuu ndo. Cuiñi siyo ndo sii, vatyi ñá zavaha ndo sa vaha sa i catyi sihin ndo.” Cua catyi ra.

²⁸ Ta cua vacu xaan ndo ndya cuhva cua casi quihñi noho ndo vatyi cua ndyehe ndo vatyi ñoho ra Abraham ta ra Isaac ta ra Jacob ta tandihí ra profeta. Ñoho tandihí ra cuan nu ndyaca ñaha ra Ndyoo, ta maa ndo cua ndoo ndo ityi sata.

²⁹ Ta cua quisi ñiyivi ityi caña ñicandyi ta ityi cuahiñi ta ityi yucu ta ityi tyañuhu, ta cua cundyaa ñu nu ndyaca ñaha ra Ndyoo.

³⁰ Ta iyo ñiyivi ña ñiñi vityi, ta cua nduu ñu ñiyivi ñiñi xaan yucuan. Ta ñiyivi ñiñi vityi cua nduu ñu ñiyivi ña ñiñi.

Sacu xaan ra Jesús sa ndyehe ra ñuu Jerusalén

³¹ Ta zuun ñi quívi cuan i quisi zuhva ra fariseo, ta i catyi ra sihin ra Jesús: Quiton ihyia ta cuhun

vatyi cuñi cahñi ra rey Herodes suun.

³² Ta i catyi ra Jesús sihin ra: Cuahan ndo ta nacatyi ndo sihin ra ñicuui cuan vatyi yuhvi catyi vatyi tave tatyi cuihna ta zanduvehi sii ñiyivi vityi ta ityaan. Ta iza cua sei nu cuehin.

³³ Zoco tahan si sa caca ityi vityi ta ityaan ta iza vatyi ma cuu cuu minoo ra cahan Tuhun Ndyoo tatu ta saa ca ra ñuu Jerusalén.

³⁴ ¡Ndahvi yoho ñuu Jerusalén! Sahñi ñiyivi sii ra profeta ihya. Ta ra tasi ra Ndyoo ihya, cañi ñuu sii ra sihin yuu. ¡Cuaha xaan cuaha xaan saha cuñi zandu-iin sii ñiyivi ñuu ya ta zacuende sii ñu tañi zacuenda minoo ndiví sii zehe ti sisi ndisi ti, zoco ña cuñi ñu!

³⁵ Ndyehe ndo vityi, ndoho ñiyivi ñuu Jerusalén, vatyi vityi zandoi sii ndo. Ta sa ndisa cuui catyi sihin ndo vatyi ma ndyehe ca ndo sii, ndya cuhva ndya quivi cua catyi ndo vatyi vaha xaan cuu ra vasi sa cuenda ra ndyaca ñaha sii yo.

14

Zanduvaha ra Jesús sii minoo ra ndaa

¹ Minoo quivi quitatu ñiyivi i sahan ra Jesús vehe minoo ra cu nuu sii ra fariseo cua casi ra xita. Ta ndyehe xaan ra fariseo ñaa sa cua zavaha ra Jesús.

² Ta ñoho minoo ra cuhu yucuan; ndaa xaan ra.

³ Ta i catyi ra Jesús sihin ra maestro cuenda ley ta ra fariseo: ¿Atu catyi ley vatyi cuu zanduvaha yo sii ñiyivi quivi quitatu ñiyivi a ma cuu?

⁴ Tacuan ta tandihí ra cuan, taxi cuui ñi yucu ra ta ña cahan ra. Ta ziqui i quihin ra Jesús sii ra cuhu cuan, ta i zanduvaha ra sii ra, ta i natasi ra sii ra sa cunuhi ra.

⁵ Ta ziqui i catyi ra Jesús sihin ra fariseo: Tatú canacava minoo burro zono ndo a minoo zindiqui zono ndo sisi minoo xahva quivi

quitatu ñiyivi ¿atu ma tava ndo sii ti yatyí ñi vazu quivi quitatu ñiyivi cuu si? Catyi ra.

⁶ Tacuan ta ña cuu ca nacahan ra cuan.

Ma zacahnu yo sii yo

⁷ I ndyehe ra Jesús cuhva i zavaha tandihí ñiyivi yucu vico cuan vatyi saa ra cuan ta i casi ra maa ñi tyayu vaha ca cundyaa ra, ta i cahan ra Jesús sihin minoo cuhva sihin ra, ta i catyi ra:

⁸ Tatú cana minoo ra suun sa cuhun minoo vico tindaha, ma nanducun tyayu vaha ca cundyoon coto quisi inga ra ñiñi ca.

⁹ Ta ra i cana suun sa cuenda vico cuan cua quisi ra ta cua catyi ra suhun: “Cuhvon tyayu ya cundyaa inga ra ya.” Ta cua cucahan xaan nuun, ta cua cuhun nu ndyaa tyayu cuenda ñiyivi ña ñiñi.

¹⁰ Vaha ca tatu caña ñu suun minoo vico, cuhun xihnon nu ndyaa tyayu ña ñiñi cundyoon. Ta ziqui cua quisi ra i cana suun ta cua catyi ra: “Amigo, cuhun nu ndyaa tyayu vaha ca.” Cua catyi ra. Ta sihin cuhva cuan cua zacahnu ra suun nu ñiyivi yucu suhun yumesa.

¹¹ Vatyí yoo ra zacahnu sii, cua zanduluhlu ñiyivi sii ra. Ta yoo ra zanduluhlu sii, cua zacahnu ñiyivi sii ra.

¹² Ta ziqui i catyi ra Jesús sihin ra i cana sii ra sa cua casi ra: Tatú cua cuhyon minoo sa cuzama a sa cuxiñi sii ñiyivi, ma canon sii amigun a tohon a sii ñiyivi suun a sii ra cuca sa ndyaa yatyí yuvehun. Vatyí quivi nacoo tucu minoo vico vehe maa ra ta cua cana tucu ra suun.

¹³ Zoco tatu cua zavohon minoo vico, canon sii ñuu ndahvi, ñuu coxo, ñuu xii ta ñu cuaa.

¹⁴ Ta zii xaan cua cuñun. Vatyí ra yucuan ma cuu nacuhva ra sa casun, zoco cua tyiyahvi ra Ndyoo suun quivi cua nandoton sihin ñiyivi vaha.

*Cuhva cua cuu si quivi cua quihvi
ñiyivi nu ndyaca ñaha ra Ndyoo*

¹⁵ Ta siñi minoo ra ndyaa mesa cuan sa cahan ra Jesús, ta catyi ra sihin ra: Zii xaan cua cuñi ra casi xita nu ndyaca ñaha ra Ndyoo.

¹⁶ Ta ziqui i catyi ra Jesús sihin ra: I zavaha minoo ra minoo sa cuxiñi cahnu xaan vehe ra.

¹⁷ Ta cuhva sa cua cuhva ra sa cuxiñi ñu, i tasi ra sii muzu ra sa nacana ra sii ñu sa i cana ra vatyi sa ndyaa listo si, ta sa cuu quisí casi ñu.

¹⁸ Zoco tandihí ñu i catyi ñu vatyi ma cuu cuhun ñu. Ra sa xihna ñi i catyi ra: "Nacaa zate minoo ñuhu, ta cuñi sa cundyehi sii si. Catyun sihin ra vatyi nazaha ra tucahnu iñi sii, vatyi ma cuhin."

¹⁹ Ta inga ra i catyi ra: "Nu zate ohon tahan yunta, ta cuehin cua ndyehe tatu vaha ti. Catyun sihin ra vatyi nazaha ra tucahnu iñi sii, vatyi ma cuhin."

²⁰ Ta inga tucu ra i catyi ra: "Nacaa tindehi, ta yucuan cuenda ma cuhin." Catyi ra.

²¹ Ta cua nuhu muzu cuan, ta i nacatyi ra tandihí cuhva ya sihin patrón ra. Ta i cuxaan xaan patrón ra, ta i catyi ra sihin muzu ra: "Cuahan yatyi cuii ñi tandihí ityi cahnu ta ityi ndyihí ta cuhun sii ra ndahvi ta ra coxo ta ra xii ta ra cuaa, ta quisí ndyacon sii ra ihya." Catyi ra.

²² Ta i zavaha muzu ra cuhva catyi ra, ta ziqui i catyi ra: "Tata, sa zavehi tandihí cuhva catyun, ta nuña ca." Catyi ra.

²³ Ta i catyi patrón ra sihin ra: "Cuahan tandihí cuii ityi, ta zañiñun sii ñiyivi vatyi naquisí ñu. Cuñi sa cua cutu cuii vehi.

²⁴ Vatyi catyi suhun vatyi numino ra i cane sa xihna ñi, ma cuhva que sa casi ra sihin."

*Cuaha xaan tundoho cua ndyehe
yo tatu cua cundyico yo sii ra Cristo*

²⁵ Cuaha xaan ñiyivi cuahan sihin ra Jesús. Ta i ndyehe ra sii ñu ta i catyi ra sihin ñu:

²⁶ Tandihi ndoho ra ndyico sii, tatu cuñi ca ndo sii ñiyivi sii ndo ta ziqui sii mi, ma cuu cuu ndo ñiyivi sii mi.

²⁷ Vatyi yoñi ra cuu cuu ñiyivi sii mi tatu ma ndyehe ra tundoho sa cuende, ta vazu cuu ra sa cuende.

²⁸ Vatyi yoñi minoo ra tatu cua zandaa ra minoo torre ta ma cundyaa xihna ra ta tava ra cuenda tatu ñihi xuhun ra ta cundyee iñi ra zandihí ra tyiño cuan.

²⁹ Coto sa zavaha ra cimiento ta ziqui ma cuu zandihí ra tyiño. Ta tandihí ñiyivi cua ndyehe sii si, ta cu vacu ndyaa xaan ñu sii ra.

³⁰ Ta cua catyi ñu: "Ihya ra i quisaha zandaa ra minoo torre, ta ñá cuu zandihí ra sii si."

³¹ A tatu iyo minoo rey sa cuñi cahñi tahan sihin inga rey sa iyo oco mil zandaru. Rey sa xihna ñi cuan cua cundyaa xihna ra ta nacañi iñi ra tatu cuu zahacanaa ra sihin sa usi mil zandaru sa iyo sii maa ra.

³² Ta tatu sa sito ra vatyi ma cuu, cua tasi ra tyiño ñiñi sa ndyaa inga rey cuan nusica, ta cua caca ra sii ra vatyi nandihí ñi maa tuhun.

³³ Ta tacuan tucu maa ndo, tatu ma cahndya iñi ndo tandihí sa cuñi xaan ndo ta tandihí sa cumi ndo, ma cuu cuu ndo ñiyivi sii mi sa ndisa cuii.

*Catyi ra Jesús vatyi iyo ñiyivi tañi
ñiñi sa ña uhva ca*

³⁴ Vaha xaan cuu ñii, zoco tatu ña uhva ca si ¿yozo caa cuu cutyíño ñiyivi sii si?

³⁵ Ñahñi çá sa cuu zaçuu ñu sihin si. Nu sa tyindye si sii ñuhu ta ma cuu. Nu ndihí tuhun zavita ñu sii si. Tatu ndyaa zoho ndo, cuiñi ndo tuhun ya. Catyi ra Jesús.

15

*Tañi mvee ticatyi sa cua naa cuu
ñiyivi iyo cuatyi*

¹ Ta tandihí ra tava xuhun cuenda ra ndyaca ñaha ta ra iyo

cuatyi, i tuhva ra sii ra Jesús vatyi cuñi ra tyizoho ra sa cahan ra.

² Ta i cahan xehe ra fariseo ta ra maestro cuenda ley sa cuenda ra Jesús, ta i catyi ra: Ra ihya, cahan ra sihin ra iyo cuatyi, ta sasi ra sihin ra.

³ Tacuan ta i cahan ra Jesús sihin ra ziqui minoo cuhva ta catyi ra:

⁴ Yoo ndoho, ra iyo minoo ziendu mvee ticateyi zono, tatu cua naa minoo ti ¿atū ma zandoo ndo tandihí ti sicuhu? Ta cua nanducu ndo sii sa minoo ti cuan ndya nañihí ndo sii ti.

⁵ Ta cuhva sa cua nañihí ndo sii ti, cua cozo zoco ndo sii ti, ta zii xaan cua cuñi ndo.

⁶ Ta tatu sa nasaa ndo vehe ndo cua cana ndo sii amigo ndo ta sii ñiyivi yugu yatyi, ta cua catyi ndo: "Cuzii xaan iñi ndo sihin, vatyi i nañihí mvee ticateyi zone quiti sa cua naa."

⁷ Ta catyi sihin maa ndo vatyi zuun ñi cuhva cuan, zii xaan cua cuñi ángel gloria sa cuenda minoo ra cua ndu-uu iñi cuatyi. Zii ca cua cuñi ángel sihin sa minoo ra cuan ta ziqui sihin sa cumi xico sahun cumi tahan ñiyivi vaha sa ñahñi cuatyi ta ña zama ñu cuhva iyo ñu.

Tañi xuhun sa cua naa cuu ñiyivi iyo cuatyi

⁸ Ta inga tucu cuhva, tatu iyo minoo ñaha sa cumi usi tahan xuhun, ta tatu cua naa minoo xuhun ña. ¿Atu ma tyaa ña minoo candil ta nathihi ña sisi vehe ña ta nanducu ña xuhun cuan ndya cuhva ndya cua nañihí ña sii si?

⁹ Ta tatu sa nañihí ña sii si, cua cana ña sii amigo ña ta sii ñiyivi yugu yatyi, ta cua catyi ña: "Cuzii xaan iñi ndo sihin, vatyi i nañihí xuhin sa cua naa."

¹⁰ Ta zuun ñi cuhva cuan catyi sihin maa ndo vatyi zii xaan cua cuñi ángel ra Ndyoo sa cuenda minoo ra cua ndu-uu iñi cuatyi.

Tañi ra ñá tyaayahvi sii zutu cuu ñiyivi sa cua naa

¹¹ Tacuan ta i catyi tucu ra Jesús cuhva ya: Sicoo minoo ra, ta uu tahan zehé yii ra i sicoo.

¹² Ta minoo saha i catyi ra luhlu ca sihin zutu ra: "Tata, cuhvon ndaha tyiño sa tahan si sii." Ta i natahvi zutu ra ndaha tyiño sa tahan si sii minoo minoo zehé ra.

¹³ Ta ña cuaha ñi quivi ta ziqui i xico ra luhlu ca cuan tandihí cuii sa nacuhva zutu ra sii ra. Ta i zatahan ra xuhun ra, ta cuahan ra nusica. Ta yucuan i zanaa ra tandihí cuii xuhun ra sihin sa cuzii iñi ra. Ta zana xaan i sicoo ra.

¹⁴ Ta sa yaha zanaa ra tandihí, ta ziqui i sicoo minoo tama ñuu cuan, ta i quisaha sizoco ra.

¹⁵ Tacuan ta sahan ra vehe minoo ra ñuu cuan. Ta i tasi ra cuan sii ra nu iyo quini zono ra vatyi cua cuhva ra sa casi ti.

¹⁶ Ta i sizoco xaan ra ndya cuhva cuñi ra casi ra sa sasi quini. Ta yoñi maa sa saha sa casi ra.

¹⁷ Tacuan ta i quisaha nacañi iñi ra ta i catyi ra: "Tandihí cuii muzu zuti, sasi vaha ra ndya cuhva ndoo ca sa sasi ra. Ta yuhvi, cuñi cahñi zoco sii.

¹⁸ Vityi cunaruhi nu ndyaa zuti, ta tyehen cua catyi sihin ra: Tata, sicoo cuatyi nuu Ndyoo ta nuu moo.

¹⁹ Zohon tuhun sa yivi ca zehun cuu sii, zoco cuhvon sa cui minoo muzun." Tacuan i sica iñi ra.

²⁰ Ta i nduvita ra, ta i quihin ra ityi cua nanuhu ra ndya vehe zutu ra. Zoco sica ca vasi ra ta sa i ndyehe zutu ra sii ra. Ta i cundahvi iñi ra sii zehé ra, ta i cacono ra cua zatahan ra sii ra. Ta i sicutumí ra sii ra, ta i sihi ra xiti ra.

²¹ Ta i catyi zehé ra sihin ra: "Tata, sicoo cuatyi nuu ra Ndyoo ta nuu moo. Zohon tuhun sa yivi ca zehun cuu sii." Catyi ra.

²² Zoco i catyi zutu ra sihin muzu ra: "Ta ndyaca ndo zahma vaha ca, ta natyihí ndo sii ra. Ta tyihi ndo minoo xehe nundaha ra. Ta natyihí ndo zapato saha ra.

23 Ta cahñi ndo minoo zindiqui luhlu, quiti xahan ca, vatyi casi yo, ta nacuzii xaan iñi yo.

24 Vatyi zehi, sa i zehi tuhun vatyi sa i sihi ra, ta vityi ndito ra. Cua naa ra ta vityi naquita ra.” Catyi zutu ra. Ta i quisaha zavaha ñu minoo vico. Ta zii xaan i cuñi ñu.

25 Ta inga zehe ra cuan, ra nuu, zatyiño ra sisi cuhu. Ta cuhva sa cua nasaa ra ndya vehe, ta siñi ra yaa ta sa sata saha ñiyivi.

26 Ta i cana ra sii minoo muzu, ta i ndaca tuhun ra ñaa sa cuu.

27 Ta i catyi muzu sihin ra: “Nasaa yañun, ta i tava zutun tyiño sa cuu minoo zindiqui luhlu, quiti xahan xaan, vatyi vaha ñi i nasaa yañun.” Catyi ra.

28 Ta i cuxaan xaan ra nuu cuan, ta ña cuñi ra quihví sisi vehe. Yu-cuan cuenda i quita zutu ra, ta i cana ra sii ra.

29 Zoco i catyi ra sihin zutu ra: “Ndyehe, sa cuaha xaan cuiya zatyiñe suhun, ta ñahñi cuhva sa ña tyei yahvi sa cohon. Zoco numinoo saha ta ñá sohon minoo mvee luhlu sii, vatyi cua zavehi minoo vico sihin amigi.

30 Ta sa nasaa zehun, ra i zanaa xuhun moo sihin ñu zihí zii iñi, ta yatyi xaan sahñun minoo zindiqui cuenda ra.” Catyi ra.

31 Tacuan ta i nacahan zutu ra, ta i catyi ra sihin ra: “Zehe luhli, ndyoon sihin tandihí cuii tyiemvu. Ta tandihí sa sii, sii tucu moo cuu.

32 Zoco vityi tahan si sa zacahnu yo vico ya ta cuzii xaan iñi yo vatyi i zehi tuhun vatyi sa i sihi yañun, ta vityi ndito ra. Cua naa ra ta naquita ra.”

16

Cuhva cuñi si tyindyee yo sii ñiyivi sihin sa iyo sii yo

1 Tacuan ta i quisaha catyi ra Jesúsi sihin ra i casi ra: Sicoo minoo ra cuca, ta sicoo minoo ra zacuenda xuhun ra. Zoco i catyi inga

ñiyivi sihin ra cuca cuan vatyi zativi xaan rä zacuenda cuan xuhun ra.

2 Ta i cana ra cuca cuan sii ra, ta i catyi ra sihin ra: “Cuaha xaan tuhun ñihi sa cuendon. Nacuhva cuendon tandihí cuii tyiño i zacuun sii, vatyi ma zatyiño con sihin.”

3 Ta ziqui i sica iñi ra zacuenda xuhun cuan sihin añima ra: “¿Yozo caa zacui vityi? Cuñi quindya patroin tyiñe, ta ñahñi tundyee iñi iyo sii, sa zatyiñe. Ta cahan xaan nui caque caridad sii ñiyivi.

4 Zoco site yozo caa cua zavehi vatyi vaha sa coo amigi, ta ziqui tatu ñahñi tyiñe, zoco cuu cuhin vehe ra.”

5 Tacuan i sica iñi ra cuan, ta ziqui i cana ra sii sa minoo minoo ra tavi sii patrón ra. Ta i catyi ra sihin ra i saa sa xihna ñi: “¿Yozo tavun sii patroin?” Catyi ra.

6 Ta i catyi ra cuan: “Tavi cumi millitro azetye.” Catyi ra. Ta i catyi ra sihin ra: “Quihin inga tutu ya, ta tyoon uu mil ñi, ta tyoon zivun, ta zaviton tutu sahnu cuan.” Catyi ra. Ta tacuan i zavaha ra ta cuahan ra.

7 Ta ziqui i saa ñinga ra, ta i catyi ra sihin ra: “¿Yozo tavun sii patroin?” Ta i catyi ra cuan: “Tavi minoo mil arroba trigo.” Catyi ra. Ta i catyi ra sihin ra: “Quihin inga tutu ya, ta tyoon uña ziendu arroba ñi, ta tyoon zivun, ta zaviton tutu sahnu cuan.”

8 Tacuan ta i sito patrón ra sa ña vaha sa zavaha ra, ta iyo xaan i cuñi ra vatyi casi xaan iñi ra zavaha ra sa ña vaha. Catyi ra Jesúsi. Ta i catyi tucu ra sihin ra i casi ra: Casi ca iñi ñiyivi ña vaha añima ta ziqui ñiyivi vaha añima.

9 Ta catyi sihin ndo vatyi cutyíño ndo ndaha tyiño ndo sa iyo ñuu ñiyivi ya, ta tyindyee ndo sii ñiyivi. Ta quiví cua ndihí si, cua ñihi ndo minoo nu cundyaa ndo sa ma naa ca nu ndyaa ra Ndyoo.

10 Ra zavaha sa ndoo sihin sa zuhva ñi sa iyo sii ra, tacuan cua zavaha tucu ra vazu sihin cuaha

ca. Ta ra ña zavaha sa ndoo sihin sa zuhva fi, ma zavaha tucu ra sa ndoo sihin sa cuaha ca iyo sii ra.

¹¹ Yucuan cuenda tatu ña zavaha ndo sa ndoo sihin sa iyo ñuu ñiyivi ya, ma cuhva ra Ndyoo sa vaha xaan sa iyo andivi sii ndo.

¹² Tandihí sa iyo sii ndo, maa ra Ndyoo saha noo sii si sii ndo. Ta tatu ña zavaha ndo sa ndoo sihin si, ma cuhva maa ra sa cuu sii maa ndo.

¹³ Ma cuu zatyiño minoo muzu sa cuenda uu tahan patrón vatyi cua cuñi ca ra sii minoo patrón ra, ta ma cuñi ra sii inga ra. A sii minoo ra cua tyaa ra yahvi, ta sii inga ra ma tyaa ra yahvi. Ma cuu cuñi ndo sii ra Ndyoo ta cuñi ndo sii xuhun. Catyi ra Jesús.

¹⁴ Ta i siñi ra fariseo tandihí sa cahan ra Jesús. Ta i sacu ndyaa ra sii ra vatyi cuñi xaan ra fariseo cuan xuhun.

¹⁵ Ta i catyi ra Jesús sihin ra: Ityi nuu ñiyivi zaha maa ndo tuhun vatyi vaha xaan ñiyivi cuu ndo, zoco sito maa ra Ndyoo añima ndo. Ta tandihí sa zacahnu xaan ñiyivi, ña cuu ndyehe ra Ndyoo sii si.

Ma naa ley maa ra Ndyoo

¹⁶ Ley ra Ndyoo sa i tyaa ra Moisés ta tuhun i tyaa ra profeta ta sa naha, yucuan cuu sa zañaha ityi sii ndo ndya quivi i saa ra Juan. Quivi i saa ra Juan ta i quisaha nacatyi ra sihin ñiyivi cuhva ndyaca ñaha ra Ndyoo. Ta cuaha xaan ñiyivi cuñi xaan ñu cuhva cuan.

¹⁷ Zoco catyi sihin ndo vatyi vazu cunaa ñuu ñiyivi a sa iyo ityi ziqui, zoco ley ra Ndyoo sa i tyaa ra Moisés ma cuu naa si nu siin.

Ña vaha sa zandoo rayii sii ñazithi ra ta tani tutu ñu

¹⁸ Tatu iyo minoo rayii ta zandoo ra sii ñazithi ra ta tani tutu sa tindaha ra ta tindaha ra sihin inga ñaha, zavaha ra cuan sa cuu adulterio. A tatu tindaha inga ra sihin

ñaha sa zandoo yii sii, zuun ñi cuateyi cuan zavaha ra.

Cuhva i cuu sii minoo ra cuca, ta cuhva i cuu sii ra Lázaro

¹⁹ I sicoo minoo ra cuca, ta tyaqui xaan i cuu zahma ra tyacu yuhva tixinda, ta yahvi xaan ndyaa si. Ta sasi vaha xaan ra tandihí quivi.

²⁰ Ta sicoo tucu minoo ra ndahvi sa nañi Lázaro. Iñi xaan ra ityi, ta catuu ra yuvehe ra cuca cuan.

²¹ Cuñi xaan ra casi ra vazu sa canacava yumesa ra cuca cuan. Ta i saa ina nu catuu ra ndahvi cuan, ta yuyaa ti nu cahvi ra.

²² Ta minoo quivi i sihi ra, ta i sindyaca ángel ra Ndyoo sii ra ndya nu ndyaa ra Abraham gloria. Ta i sihi tucu ra cuca cuan, ta tyihi ñu sii ra sisi ñuhu.

²³ Ta cuahan añima ra andyaya, ta ndyehe xaan ra tundoho yucuan. Ta i nandyehe ndaa ra, ta sica xaan i ndyehe ra sii ra Abraham sihin ra Lázaro.

²⁴ Ta i cana saa ra ñoho andyaya cuan ta catyi ra: “Tata Abraham, cundahvi iñun sii, ta tasun sii ra Lázaro nazatyii ra siin nundaha ra ta quisi zatoon ra nu yei vatyi yaha xaan cahnu tundoho ndyehi sisi ñúhu ya.” Catyi ra.

²⁵ Zoco i catyi ra Abraham sihin ra: “Nacohon iñun vatyi cuaha xaan sa vaha sicoo suun quivi i sinditon ñuu ñiyivi. Ta ra Lázaro ndahvi xaan i cuu ra ñuu ñiyivi. Ta vityi iyo sa vaha sii ra, ta yoho ndyehun tundoho.

²⁶ Ta inga tucu cuhva vatyi iyo minoo xahva cahnu xaan mahñu nu yucu yo. Ta vazu cuñi ra ihyu cuhun ra nu ndyoon, zoco ma cuu. Ta ma cuu quisi minoo ra ñoho nu ñohon nu ndyaa ndi.”

²⁷ Ta ziqui i catyi ra cuca cuan: “Tata Abraham, zohon tumañi iñi sii, ta tasun sii ra Lázaro ndya vehe zuti.

²⁸ Vatyi iyo ohon tahan yañi, ta cuñi vatyi cunacatyi ra sihin ra

yozo caa iye ihya nu ndyehi tun-doho coto quisi tucu ra ihya.”

²⁹ Tacuan ta i catyi ra Abraham sihin ra: “Iyo ley sa i tyaa ra Moisés ta iyo tuhun i tyaa ra profeta ta sa naha. Nazavaha yañun sa catyi si cuan.”

³⁰ Tacuan ta i catyi ra cuca cuan: “Tata Abraham, ma tyaa ra yahvi sii si cuan. Zoco tatu cua nandoto minoo ra sa i sihi ta cuhun ra nu ndyaa ra, yucuan ndisa cua tyaa ra yahvi, ta cua zama ra cuhva iyo ra.”

³¹ Ta i catyi ra Abraham sihin ra: “Tatu ma tyaa ra yahvi sii ley i tyaa ra Moisés ta sii tuhun i tyaa ra profeta, ma sino iñi ra vazu cua nandoto minoo ñiyiví ta cahan ra sihin ra.”

17

Ica xaan tatu zavaha yo cuatyí

¹ Tacuan ta i catyi ra Jesús sihin ra i casi ra: Tandihi cuii tyiemvu cua coo sa quiñi caa sa zativí sii ñiyiví, zoco ndahvi ñi cuu ra tyiyuhu sii ñiyiví ta zavaha ñu cuatyí ta tiví ñu.

² Vaha ca tatu cuhñi yo minoo yuu vee xaan zucu ra ta zavita yo sii ra sisi tyauhu coto zativí ra sii ñu sino iñi sii Ndyoo.

³ Zaha ndo cuenda sii ndo. Tatu zavaha minoo ra tahan ndo minoo sa ña vaha suhun, catyun sihin ra ñaa sa ña vaha i zavaha ra. Ta tatu zama ra cuhva iyo ra, zohon tucahnu iñi sii ra.

⁴ Ta tatu usa tahan saha sa minoo quiví zavaha ra sa ña vaha suhun ta tandihi usa tahan saha catyi ra suhun: “Zohon tucahnu iñi sii.” Zohon tucahnu iñi sii ra.

Tatu sino iñi yo sii ra Jesús cuu zavaha yo cuaha sa vaha

⁵ Tacuan ta i catyi ra apóstol sihin ra Jesús: Cuhvon cuhva sii ndi ta cua sino xaan ca iñi ndi suun.

⁶ Ta i catyi ra Jesús sihin ra: Tatu sino iñi ndo sii mi siin ñi vazu tañi caa minoo siti mostaza luhlu ñi cuu cuhva sino iñi ndo, ta cua cuu

catyi ndo sihin yutu sicómoro sa nandyaa ihya vatyi cuiñi siyo tu nu ndyaa tu ta cuhun tu sisi tyauhu, ta cua tyaa tu yahvi sa cahan ndo.

Cuhva tahan si tyaa yo yahvi sii ra Ndyoo

⁷ Ta ziquí i catyi ra Jesús: Yoo ndoho tatu tahvi muzu ndo ñuhu a saha ra sa casi zindiqui zono ndo ta ziquí nasaa ra vehe, ézatu cua catyi ndo sihin ra: “Cundyaa ta casun xita”?

⁸ Tyehen cua catyi ndo sihin ra: “Zavohon sa cuxiñi, ta tyizon coho nu mesa. Ta tatu sa sasi ta ziquí casi tucu moo.” Cua catyi ndo.

⁹ ¿Atu nacuhvon tyahvi ndyoo sii ra vatyi zavaha ra tyiño tavon sii ra? Ña tacuan vatyi tahan si zavaha ra tyiñon.

¹⁰ Ta tacuan tucu maa ndo. Tatu sa zavaha ndo tandihi cuii tyiño sa tava ra Ndyoo sii ndo. Catyi ndo: “Ñahñi maa sa vaha zavaha ndi. Maa ñi cuhva tahan si zavaha ndi i zavaha ndi.” Tacuan tahan si catyi ndo.

Zanduvaha ra Jesús sii usi tahan ra tyahyu

¹¹ Ta cuhva sa cuahan ra Jesús ndya ñuu Jerusalén, i yaha ra nu cu si Galilea ta nu cu si Samaria.

¹² Ta sa i saa ra minoo ñuu ta i quita usi tahan ra tyahyu ta yucu ra ndya zava.

¹³ Ta i cana saa tandihi ra, ta catyi ra: Maestro Jesús, cundahvi iñun sii ndi.

¹⁴ Ta sa ndyehe ra Jesús sii ra, ta i catyi ra sihin ra: Cuahan ndo cua zañaha ndo sii ndo sii ra cu zutu. Tacuan i catyi ra Jesús sihin ra cuan, ta ityí cuahan ra i nduvaha ra.

¹⁵ Ta minoo ra, cuhva sa ndyehe ra vatyi sa nduvaha ra, i sinanuhu sata ra. Ta ñihí xaan i cana saa ra ta i zacahnu ra sii ra Ndyoo.

¹⁶ Ta i sicuñi siti ra, ta i sicava ndyayu ra nu ñuhu nu ndyaa saha ra Jesús, ta i saha xaan ra tyahvi

ndyoo sii ra. Ta minoo ra samari-tano cuu ra nduvaha cuan.

¹⁷ Tacuan ta i catyi ra Jesús: ¿Atu ña usi tahan ra i nduvaha? ¿Ndyamaa cuahan iin tahan ca ra?

¹⁸ ¿Atu minoo tuhun ñi ra inga ñuu ya cuu ra i ndisi nanuhu sata sa nacuhva ra tyahvi ndyoo sii ra Ndyoo?

¹⁹ Ta i catyi ra Jesús sihin ra i nduvaha: Nduvita ta cuhun. I nduvohon vatyi sino iñun.

Cuhva cua cuu si quivi cua quisaha cundyaca ñaha ra Ndyoo ñuu ñiyivi

²⁰ I ndaca tuhun ra fariseo sii ra Jesús: ¿Ama cua quisaha cundyaca ñaha ra Ndyoo ñuu ñiyivi? Ta i catyi ra Jesús sihin ra: Ma coto ndo ama cua quisaha cundyaca ñaha ra Ndyoo vatyi yivi sa cuu ndyehe yo cuu si.

²¹ Ma cuu catyi ñiyivi: “Ihya ndyaa ra”, a “Ityi cuan ndyaa ra” vatyi zii cuu cuhva ndyaca ñaha ra. Sisi añima ñiyivi cuu nu ndyaca ñaha ra, añima ñiyivi sa tyaa yahvi sii ra.

²² Tacuan ta i catyi ra Jesús sihin ra i casi ra: Cua coo quivi ta cua cuñi ndo ndyehe ndo sii ra i quasi ndya gloria, zoco ma ndyehe ca ndo sii ra.

²³ Ta cua catyi ñiyivi sihin ndo: “Ihya ndyaa ra”, a “Yucuan ndyaa ra.” Zoco ma cuhun ndo cundyeho ndo. Ta ma cundyico ndo sii ra cuan vatyi yivi yuhvi cuu ra.

²⁴ Vatyi quivi cua quasi inga saha, cua ndyehe tandihí ñiyivi sii. Tañi ndyehe tandihí ñiyivi tatu yaha tasa zavi nacahnu andivi, tacuan cua cuu si quivi cua quasi tucu ra i quasi ndya gloria.

²⁵ Zoco xihna ca tahan si ndyehi tundoho cuaha xaan cuhva. Ta ñiyivi sa iyo vityi ma cuñi ñu sii.

²⁶ Tañi i cuu si quivi ra Noé, tacuan cua cuu tucu si quivi cua quasi tucu ra i quasi ndya gloria.

²⁷ Quivi ra Noé, sasi ñu. Sihi ñu. Tindaha ñu. Ta saha ñu sii zehe ñu sa tindaha ñu ndya cuhva ndya quivi i quihvi ra Noé sisi barco ta i coon zavi xaan. Ta i naa tandihí ñiyivi.

²⁸ Tacuan i cuu tucu si quivi ra Lot. Sasi ñu. Sihi ñu. Zata ñu. Naxico ñu. Tasi ra itu. Ta zavaha ra vehe ra.

²⁹ Ta zuun ñi quivi i quita ra Lot ñuu Sodoma cuan, i coon xaan ñúhu sihin azufre ndya andivi, ta i naa tandihí cuii ñiyivi ñuu cuan.

³⁰ Ta zuun ñi tacuan cua cuu si quivi cua quasi tucu ra i quasi ndya gloria.

³¹ Quivi cuan tatu ñoho minoo ndo xiñi vehe, ma noo ndo ta tava ndo ndaha tysiño ndo. A tatu ñoho ndo itu ndo ma cunuhu ndo ndya vehe ndo.

³² Nacohon iñi ndo cuhva i tahan si sii ñazihí ra Lot.

³³ Yoo ra cua nducu cuhva zacacu ra sii ra, cunaa ra. Ta yoo ra cua cuhva sa cuu ra sa cuenda mi, cua cacu ndisa cuii ra.

³⁴ Ta catyi sihin ndo vatyi sa cuaa cuan, uu tahan ñiyivi quixi iñi ñi nito. Cua naquihin sii minoo ñi ta minoo cua nandoo.

³⁵ Ta uu tahan ñuzihí ndyico iñi ñi quivi cuan, cua naquihin sii minoo ñi ña. Ta inga ña cua nandoo.

³⁶ Ta uu tahan ra ñoho itu ra, cua quihin sii minoo ra. Ta inga ra cua nandoo.

³⁷ Tacuan catyi ra Jesús. Ta cuhva sa siñi ñiyivi tuhun ya, i ndaca tuhun ñu sii ra: ¿Ndyamaa cua cuhun ñiyivi cuan? Ta i catyi ra Jesús sihin ñu: Nu catuu ndiyi, yucuan cua titahan tyasii.

18

Cuhva cuñi ra Ndyoo sa caca yo siii ra

¹ Tacuan ta i cahan ra Jesús ziqui minoo cuhva ya vatyi cuñi ra sa cua coto ñu vatyi tahan si sa caca ñiyivi tumañi iñi sii ra

Ndyoo tandihí saha, ta ma zandihí yo tuhun sa caca yo sii ra.

² Ihya cuu cuhva i catyi ra Jesús: Minoo ñuu sicoo minoo ra juez. Ta ña yuhu ra sii ra Ndyoo. Ta ña tyaa ra yahvi sii ñiyivi.

³ Ta zuun ñi ñuu cuan sicoo minoo ñandahvi. Ta i sahan ña nu ndyaa ra juez cuan, ta catyi ña sihin ra vatyi sica ña cuatyi saha minoo ra xaan iñi sii ña.

⁴ Ta ña tyizoho ra juez cuan sa cahan ña. Ña cuñi ra zandaa ra tysiño ña. Ta sa naha xaan sica ña. Ta ziñi i sica iñi ra juez: "Vazu ña yuhi sii ra Ndyoo ta ña tyei yahvi sii ñiyivi,

⁵ zoco zayanga xaan maha ya sii. Yucuan cuenda cua zandei tysiño ña coto quisi ca ña ta zayanga ca ña sii."

⁶ Ta i catyi ra Jesús: Sa siñi ndo cuhva catyi ra juez, ra ña vaha cuan.

⁷ Ta maa ra Ndyoo ¿atu ma zacacu ra sii ñiyivi i casi ra vatyi sica ñu tumañi iñi sii ra ora ta sa cuaa? ¿Atu cuatu xaan ra ta ziñi tyindyeer a sii ñu?

⁸ Catyi sihin ndo vatyi yatyi xaan cua zacacu ra sii ñu. Zoco quiví cua quisi tucu ra i quisi ndya gloria, sito Ndyoo tatu nañihi que sii ñu sino iñi sii, sa ndisa cui.

Minoo cuhva cuenda ra tava xuhun cuenda ra ndyaca ñaha ta ra fariseo

⁹ Tacuan ta i cahan ra Jesús ziñi minoo cuhva cuenda ñiyivi zaha tuhun vatyi vaha xaan ñu ta ña cuu ndyehe ñu sii inga ñiyivi. Ta ihya cuu cuhva i catyi ra:

¹⁰ I quihví uu tahan ra vehe ñuhu vatyi cua cahan ra sihin ra Ndyoo. Minoo ra cuu ra minoo ra fariseo, ta inga ra cuu minoo ra tava xuhun cuenda ra ndyaca ñaha.

¹¹ Iñi ndyaa ra fariseo, ta ihya cuhva i sica iñi ra sisi añima ra: "Zutu mañi yuu, nacuhve tyahvi ndyoo suun vatyi ña iye tañi iyo inga ñiyivi. Ña zuhi. Ña quiñi iye.

Yoñi tyañi. Ta ña iye tañi ra tava xuhun ya.

¹² Vaha xaan tyei yahvi tuhun cohon vatyi uu saha sa minoo vitya sahñi zoque sii, ta sehi diezmo suun sihin tandihí cuii sa iyo sii." Catyi ra.

¹³ Ta ndya zava, iñi ndyaa ra tava xuhun cuenda ra ndyaca ñaha. Ta nu ña nandyehe ndaa ra andiví. Ta cati ra yiñi ndyica ra vatyi ndu-uu iñi ra cuatyi ra. Ta tyehen cahan ra sihin ra Ndyoo: "Zutu mañi yuu, cundahvi iñun sii, vatyi iyo xaan cuatyi." Tacuan i catyi ra.

¹⁴ Ta catyi sihin ndo vatyi sii maa ra cuan i zaha ra Ndyoo tucahnú iñi ta yivi sii inga ra. Zanaa ra Ndyoo cuatyi ra tava xuhun cuan, ta cuanuhu ra ndya vehe ra. Zoco ra fariseo cuan, ñahñi tucahnú iñi ñihi ra vatyi ña vaha cuhva sica ra. Ta ziñi sa zacahnu xaan ra sii ra. Yucuan cuenda luhlu ñi ndyehe ra Ndyoo sii ra. Zoco tatu zanduluhlu yo sii yo, cua nducahnú yo nuu ra Ndyoo.

Zoco ñaha ra Jesús sii sa ndyihí

¹⁵ Ta i quisi ndyaca tucu ñiyivi sii sa ndyihí vatyi cua tyizo ra Jesús ndaha ra xiñi si. Ta sa ndyehe ra i casi ra Jesús cuhva zavaha ñu, ña saha ca ra.

¹⁶ Zoco i cana ra Jesús sii ra, ta i catyi ra sihin ra: Cuhva ndo sa quisi sa ndyihí nu ndyei, ta ma catyi ndo vatyi ma cuu vatyi tañi iyo sa ndyihí tacuan iyo ñiyivi saha sa cundyaca ñaha ra Ndyoo sii ñu.

¹⁷ Ta catyi sihin ndo vatyi tatu ma cuhva ndo sii ndo sii ra Ndyoo ta sino iñi ndo sii ra tañi sino iñi sa ndyihí sii zutu si, ma cuu quihví ndo nu ndyaca ñaha ra Ndyoo.

Catyi ra Jesús vatyi yíi xaan cua cuhva cuenda minoo ra cuca sii ra sii ra Ndyoo

¹⁸ Tacuan ta i ndaca tuhun minoo ra ndyaca ñaha cuenda vehe ñuhu

sii ra Jesús ta catyi ra: Yoho maestro vaha xoon, ¿yozo caa zacui ta ñihí tahví añime?

¹⁹ Ta i catyi ra Jesús sihin ra: ¿Ñaa cuenda catyun vatyi vaha xein? Minoo tuhun ñi ra vaha iyo, maa ra Ndyoo.

²⁰ Sa siton tandíhi cuii ley maa ra Ndyoo cuhva catyi si: "Ma cuzun sihin inga ñaha sa yívì ñazihun cuu. Ma cahñun sii ñiyivi. Ma zuhun. Ma cohon cuendu ziquí ñiyivi. Ta tyoon yahvi sii zutun ta sii zihun." Catyi ra Jesús sihin ra.

²¹ Ta i catyi ra cuan: Tyei yahvi sii tandíhi tuhun cuan cuhva ndya luhli.

²² Ta sa siñi ra Jesús cuhva catyi ra, ta i catyi ra sihin ra: Minoo ñi ca cuhva cumañi suun. Xicon tandíhi sa iyo suun, ta cuhvón xuhun cuan sii ñiyivi ndahvi, ta cua coo sa cuca suun ndya gloria, ta quisun ta cundyicon sii. Catyi ra.

²³ Ta sa siñi ra cuan cuhva catyi ra Jesús, ta i nducuihya xaan iñi ra vatyi cuca xaan ra.

²⁴ Ta sa ndyehe ra Jesús vatyi cuihyá xaan cuñi ra, ta i catyi ra sihin ra: Yíi xaan cua quihvi ñiyivi cuca nu ndyaca ñaha ra Ndyoo.

²⁵ Yíi ca quihvi minoo ra cuca nu ndyaca ñaha ra Ndyoo ta ziquí ca minoo camello yaha tí xuu minoo yicui ticui. Catyi ra.

²⁶ Ta ñiyivi sa siñi cuhva catyi ra Jesús i ndaca tuhun ñu: Tatú tacuan cuu si ¿yoo ra cuu cacu?

²⁷ Ta i catyi ra Jesús sihin ñu: Tandíhi sa ña cuu zavaha ñiyivi, cuu zavaha ra Ndyoo sii si. Catyi ra.

²⁸ Tacuan ta i catyi ra Pedro sihin ra: Sa zandoo ndi tandíhi sa sii ndi, ta ndyico ndi suun.

²⁹ Ta i catyi ra Jesús sihin tandíhi ra: Sa ndisa catyi sihin ndo vatyi tandíhi ndo sa zandoo vehe ndo a ñazihí ndo a tahan ndo a zutu ndo a zíhi ndo a zehe ndo ta nducu ndo sa vaha sa cuenda nu ndyaca ñaha ra Ndyoo,

³⁰ cuaha xaan sa vaha cua ñihí ndo ihyá ñuu ñiyivi ya, ta inga ñuu ñiyivi saa cua cundito ndo tandíhi cuii tyiemvu.

Nacatyi ra Jesús inga saha vatyi cua cahñi ñiyivi sii ra

³¹ I cana ra Jesús sii sa usi uu tahan ra i casi ra, ta i catyi ra sihin ra: Vityi cua cuhun yo ñuu Jerusalén. Ta yucuan cua cuu tandíhi sa i tyaa ra profeta ta sa naha sa cuenda ra i quisi ndya gloria.

³² Vatyi cua cuhva cuenda ñiyivi sii ra sii ñiyivi sa yívì ñiyivi hebreo cuu, ta cua vacu ndyaa ñiyivi sii ra. Quiñi xaan cua zavaha ñu sihin ra, ta cua tyicu zíi ñu sii ra.

³³ Ta cua cañi xaan ñu sii ra, ta cua cahñi ñu sii ra. Ta sa cu uñi quiví cua nandoto tucu ra. Catyi ra Jesús.

³⁴ Ta ra apóstol cuan ñá cutuñi iñi ra nusiiñ sa cahan ra Jesús vatyi tañaha ca cuhva ra Ndyoo sa cutuñi iñi ra sii si.

Zanduvaha ra Jesús sii minoo ra cuaa yatyi ñi ñuu Jericó

³⁵ Tacuan ta sa cuñi saa ra ra Jesús ñuu Jericó, ta yu-ityi ndyaa minoo ra cuaa, sica ra caridad.

³⁶ Ta siñi ra cuaa vatyi yaha cuaha xaan ñiyivi, ta i ndaca tuhun ra ñaa cuenda.

³⁷ Ta i catyi ñiyivi sihin ra vatyi cua yaha ra Jesús, ra ñuu Nazaret.

³⁸ Ta i cana saa ra, ta catyi ra: ¡Yoho Jesús, zehe ra David, cundahvi iñun sii! Catyi ra.

³⁹ Ta ra sa cuahan coyo ityi nuu i catyi ra sihin ra vatyi nacutaxi ra. Zoco ñihí ca i cana saa ra ta catyi ra: ¡Zehe ra David, cundahvi iñun sii!

⁴⁰ Ta i sicuñi ra Jesús yucuan, ta i catyi ra sihin ñiyivi naquisi ndyaca ñu sii ra. Ta cuhva sa saa ra cuaa nu ndyaa ra Jesús, i ndaca tuhun ra Jesús sii ra ta catyi ra:

⁴¹ ¿Ñaa sa cuñun zavehi suhun? Ta i catyi ra cuaa cuan: Cuñi xein sa nandyehi.

⁴² Ta i catyi ra Jesús sihin ra: Nandyehe. Sa nduvaha siti nuun vatyi sino iñun sii.

⁴³ Ta zuun ñi caa cuhva cuan i cuu nandyehe ra, ta i sindyico ra sii ra Jesús. Zacahnu xaan ra sii ra Ndyoo. Ta tandihí ñiyiví sa ndyehe cuhva cuan, i zacahnu xaan ñu sii ra Ndyoo.

19

Ra Jesús sihin ra Zaqueo

¹ I quihví ra Jesús ñuu Jericó, ta cua yaha ra mahñu ñuu cuan.

² Ta ñuu cuan ndyaa minoo ra sa nañi Zaqueo. Cuca xaan ra. Ta ra cu nuu cuu ra sa cuenda ra tava xuhun cuenda ra ndyaca ñaha.

³ Cuñi xaan ra ndyehe ra sii ra Jesús yoo ra cuu ra. Zoco ñá cuu ndyehe ra vatyi tyaha xaan ra.

⁴ Yucuan cuenda i cacono ra ityi nuu nu cuahan ra Jesús, ta i ndaa ra minoo nu yutu sicómoro sa nandyaa yu-ityi nu cua yaha ra Jesús.

⁵ Ta sa saa ra Jesús yucuan i ndyehe ndaa ra, ta i ndyehe ra sii ra. Ta i catyi ra sihin ra: Zaqueo, zanumi ta noon vatyi vityi cua ndoi vehun.

⁶ Ta i zanumi ra Zaqueo ta i noo ra. Ta zíi xaan i cuñi ra, ta cuahan ra sihin ra ndya vehe ra.

⁷ Ta sa ndyehe ñiyiví cuhva cuan i quisaha cahan ñu ndya vaha ñi sii ra Jesús ta catyi ñu vatyi cuahan ra Jesús vehe minoo ra iyo cuatyi.

⁸ Ta sa ñoho ra vehe ra, i sicutiñi ndyaa ra Zaqueo, ta i catyi ra sihin ra Jesús: Zava ndaha tysiñe cua cuhve sii ñiyiví ndahvi. Ta tatu i zandavi ñehi ta zuhi xuhun ñiyiví, cua nacuhve cumi saha sii ñu.

⁹ Ta i catyi ra Jesús sihin ra: Vityi sa cacun, ta ñiyiví ra Abraham cuu suun vatyi sino iñun sii ra Ndyoo tañi i sino iñi ra Abraham.

¹⁰ Ta yuhví, ra i quisi ndya gloria cui, ta vasi ñuu ñiyiví vatyi cua nanduqui ta zacaquí sii ñiyiví sa cua naa.

Cuñi si sa cutyiño yo tandihí sa saha ra Ndyoo sii yo

¹¹ Ta níi ñi sa siñi ñiyiví sa cahan ra Jesús, ta i quisaha cahan tucu ra inga cuhva ya vatyi sa cuñi saa ra ñuu Jerusalén, ta sica iñi ñiyiví vatyi cua quisaha cundyaca ñaha raya yucuan.

¹² Yucuan cuenda i catyi ra Jesús: Sicoo minoo ra vaha, ta cuñi ra cuhun ra minoo ñuu nusica vatyi yucuan cua nduu ra rey ta zíqui cua ndisi ra ñuu ra zoco sa cuu ra minoo rey.

¹³ Ta cumañi ca cuhun ra, i cana ra sii sa usi tahan muzu ra, ta saha ra minoo ziendu peso sii sa minoo minoo ra. Ta i catyi ra sihin ra: "Zatiyíño ndo sihin xuhun ya ndya quivi cua quisi."

¹⁴ Zoco ñiyiví ñuu ra, ñá cuñi ñu sa cuu ra rey sii ñu. Ta sa cuahan ra ityi, i tasi ñu tysiño sihin zuhva ra ta catyi ñu: "Ma cuhva ndi sa cundyaca ñaha ra ya sii ndi."

¹⁵ Zoco ra cuan i nduu ra rey, ta zíqui i nasaa ra ndya ñuu ra. Ta sa nasaa ra i cana ra sii muzu ra, ra i zandoo ra xuhun cuan sihin vatyi cuñi ra coto ra yozo i zahacanaa xuhun ra níi ñi sa sahan ra.

¹⁶ Ta saa minoo muzu cuan ta catyi ra: "Tata, i zahacanei minoo mil sihin sa minoo ziendu i zandoon sii."

¹⁷ Ta i catyi rey cuan sihin ra: "Vaha xaan. Minoo muzu vaha cuun. Vaha i zatyíñon sihin sa zuhva ñi xuhun i zandoi suhun. Yucuan cuenda vityi sehi sa cundyaca ñohon usi tahan ñuu."

¹⁸ Tacuan ta i saa tucu inga ra sa i saha ra xuhun sii. Ta i catyi ra: "Tata, i zahacanei ohon ziendu sihin sa minoo ziendu i zandoon sii."

¹⁹ Ta i catyi tucu rey cuan sihin ra: "Cuu cundyaca ñaha tucu moo; ohon tahan ñuu cua cundyaca ñohon."

²⁰ Tacuan ta i quisi inga ra, ta i catyi ra: "Tata, ica xuhun ya sa

minoo ziendu cuan, I sicumi vehi
sii si nuu minoo pañitu

²¹ vatyi yuhi suun vatyi minoo
ra xaan cuun, ta tuhvón naquihin
sa yívi suun cuu, ta nacuhun týiño
zacuu inga ra.”

²² Tacuan ta i catyi rey cuan sihin
ra: “Yoho minoo muzu ña vaha
cuun. Vityi sihin cuhva cohon ta
cua catyi tuqui suhun vatyi siton
vatyi xein ta tuhve naquihin sa yívi
sii cuu, ta naquihin týiño zacuu
inga ra.

²³ Yucuan cuenda ¿ñaa cuenda
ñá tyuhun xuhin banco, ta sa cua
nasei ta cua naquihin sii si, zoco
sa zahacanaa si zuhva?” Catyi rey
cuán.

²⁴ Ta i catyi ra sihin inga ra yucu
yucuan: “Quindyaña ndo xuhun sa
sehi sii ra ya, ta cuhva ndo sii si sii
ra sa cumi cuaha ca.”

²⁵ Ta i catyi ra cuan sihin ra:
“Zoco sa cumi minoo mil.”

²⁶ Ta i catyi rey cuan: “Ta catyi si-
hin ndo vatyi ra zatyíño vaha sihin
sa sehi sii ra, cua cuhve cuaha ca
sii ra. Ta ra ña cuñi zatyíño sihin sa
sehi sii ra, cua quindyei sii si.

²⁷ Ta ñu xaan iñi sii, ñu ña cuñi sa
cundyaca ñehi sii ñu, quasi ndyaca
ndo sii ñu ihya, ta cahñi ndo sii ñu
nui.” Catyi rey cuan i catyi ra Jesú.

Cuhva i quihví ra Jesú ñuu Jerusalén

²⁸ Ta sa yaha cahan ra Jesú
cuhva cuan ta cuahan ra ityi nuu
ca ndya ñuu Jerusalén.

²⁹ Ta cuhva sa cuñi saa ra ñuu
Betfagé ta ñuu Betania yatyi ñi mi-
noo yucu sa nañi yucu Olivos, ta i
tasi ra sii uu tahan ra apóstol.

³⁰ I catyi ra sihin ra: Cuahan
ndo minoo ñuu sa ndyaa yatyi ñi
yucuan, ta cuhva sa quihví ndo
ñuu cuan cua nañihi ndo sii minoo
burro nuhñi ti. Quiti ta yoñi ca
cozo. Ndasi ndo sii ti, ta quasi ndo
sihin ti.

³¹ Ta tatu iyo ñiyiví ndaca tuhun
sii ndo ñaa cuenda ndasi ndo sii ti,

catyi ndo: “Vatyi siñi ñuhu ti sii ra
ndyaca ñaha sii yo.”

³² Ta ra apóstol cuan, cuahan ra,
ta i nañihi ra sii ti tañi cuhva i catyi
ra Jesú sihin ra.

³³ Ta cuhva sa cua ndasi ra sii ti i
catyi sitoho ti sihin ra: ¿Ñaa cuenda
ndasi ndo burro ña?

³⁴ Ta i catyi ra cuan: Siñi ñuhu ti
sii ra ndyaca ñaha sii yo. Catyi ra.

³⁵ Ta sindyaca ra sii ti sii ra Jesú.
Ta i tyizo ra zahma ra sata ti, ta i
tyizo ra sii ra Jesú sata ti.

³⁶ Tacuan ta cuahan ra Jesú. Ta
i saqui ñiyiví zahma ñu ityi nu cua
yaha ra.

³⁷ Ta cuhva sa cua cuyatyi ñu ñuu
Jerusalén, saa ñu nu iñi noo yucu
Olivos cuan. Ta tandihí cuii ñiyiví
ndyico sii ra Jesú i quisaha cuzií
xaan iñi ñu. Ta saa xaan cana saa
ñu, ta zacahnu ñu sii ra Ndyoo sa
cuenda sa ndyityi nahnu xaan i
ndyehe ñu.

³⁸ Ta i catyi ñu: ¡Nazacahnu yo sii
ra cuu rey, ra vasi sa cuenda ra
Ndyoo! ¡Nazacahnu xaan yo sii maa
ra Ndyoo! ¡Vaha xaan, vaha xaan
cuu maa ra Ndyoo! Catyi ñu.

³⁹ Tacuan ta zuhva ra fariseo
sa cuahan coyo sihin ñiyiví cuan
i quisaha catyi ra: Maestro, zacu-
taxun sii ñu sica noo suhun.

⁴⁰ Zoco i catyi ra Jesú sihin ra:
Catyi sihin ndo vatyi tatu cua cu-
taxi ñiyiví ya, cua cana saa yuu.

⁴¹ Tacuan ta sa cuñi saa ra Jesú
ñuu Jerusalén, ta cuhva sa ndyehe
ra ñuu cuan i sacu xaan ra.

⁴² Ta i catyi ra: Tatú sa i sito ndo
ta cutuñi iñi ndo yozo caa cuu coo
sa taxi sii ndo sihin ra Ndyoo, cuu
nduvaha ndo. Zoco vityi sa yaha
cuhva. Ta sa siñi tuñi cuan, ñoho
xehe si sii ndo, ta ma cuu coto ndo
sii si.

⁴³ Ta cua quasi quivi, ta ra xaan
iñi sii ndo cua zavaha ra minoo
sacu viconduu nu yucu ndo, ta ma
cua quita ndo.

⁴⁴ Ta ndaha cua zativí ra ñuu ndo.
Cua cuu tandihí cuii ndo. Ta ma

zandoo ra numinoo yuu ziqui inga si vatyi ña cuñi ndo nacoto ndo sa quisi ra Ndyoo nu ndyaa ndo.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

⁴⁵ Tacuan ta i quihvi ra Jesús nu cuu nuquehe vehe ñuhu cahnu, ta i quisaha tava ndyizo ra sii ñu xico ta ñu zata yucuan.

⁴⁶ Ta i catyi ra sihin ñu: Catyi tutu Tuhun Ndyoo: "Vehe mi cuu vehe nu cahan ñiyivi sihin ra Ndyoo." Zoco maa ndo zacuu ndo vehe ra zuhu sii si. Catyi ra.

⁴⁷ Ta tahan tahan quivi i zacuahra Jesús sii ñiyivi sisi vehe ñuhu. Ta ra zutu nahnu, ta ra maestro cuenda ley ta ra cu tyiño ñuu cuan i nducu ra cuhva yozo caa cuu cahni ra sii ra.

⁴⁸ Zoco ña ñihi ra cuhva yozo caa cua zacuu ra vatyi i tyizoho tandihi ñiyivi tandihi sa cahan ra Jesús.

20

Ndaca tuhun ra fariseo sii ra Jesús yoo ra i saha tyiño sii ra ta zavaha ra cuhva zavaha ra

¹ Minoo quivi sa quivi cuan zacuahra Jesús sisi vehe ñuhu cahnu, ta nacatyi ra tuhun vaha sihin ñiyivi. Ta saa coyo ra zutu nahnu ta ra maestro cuenda ley ta ra sahnu ñuu cuan.

² Ta i catyi ra sihin ra Jesús: Nacatyun sihin ndi ñyoo sa saha tyiño suun vatyi zavohon tandihi cuhva ya?

³ Ta i nacahan ra Jesús, ta catyi ra sihin ra: Cuñi tuqui nducu tuhin minoo tuhun sii maa ndo, ta nacatyi ndo sihin.

⁴ ¿Yoo ra i tasi sii ra Juan sa zacoo ndutya ra? ¿Atu i tasi ra Ndyoo sii ra a ñiyivi? Catyi ndo.

⁵ Ta i natuhun tahan ra cuan sihin tahan ra ta catyi ra: Tatu catyi yo vatyi i tasi ra Ndyoo sii ra Juan cua catyi ra ya: "¿Ñaa cuenda ña sino iñi ndo sa cahan ra?"

⁶ Zoco tatu catyi yo vatyi ñiyivi i tasi sii ra Juan, cua cahni ñiyivi sii yo sihin yuu vatyi sica iñi tandihi maa ñu vatyi maa ra Ndyoo i tasi sii ra Juan ta minoo profeta i cuu ra. Catyi ra cuan sihin tahan ra.

⁷ Yucuan cuenda i catyi ra sihin ra Jesús vatyi ña sito ra yoo ra i tasi sii ra Juan.

⁸ Ta i catyi ra Jesús sihin ra: Ta ma nacatyi tucu vii yoo ra i saha cuhva ya sii.

Tañi ra ña cuñi zatyiño vaha tacuan iyo ra cua cahni sii ra Jesús

⁹ Tacuan ta i quisaha cahan ra Jesús sihin ñiyivi ziqui cuhva ya ta catyi ra: I tasi minoo ra yoho uva minoo sacu. Ta i saha noo ra sii si sii inga ra cua zatyiño ra yucuan, ta cuahan ra nusica naha xaan.

¹⁰ Ta saa quivi sa iyo yulu vixi cuan, ta i tasi ra sii minoo muzu nu ndyaa ra zatyiño yucuan vatyi cua quihin ra zuhva yulu vixi cuhva tahan si sii patron ra. Zoco i cañi xaan ra sii muzu cuan. Ta ñahñi sa saha ra sii ra. Ta i natasi ra sii ra.

¹¹ Ta i tasi sitoho yoho uva cuan sii inga muzu ra, ta i cañi xaan tucu ra sii ra. Ta quini xaan i zavaha ra sihin ra. Ta ñahñi maa i saha ra sii ra, ta i natasi ra sii ra.

¹² Ta i tasi tucu patron cuan inga muzu ra, sa cu uñi saha i cuu si. Ta zuun ñi cuhva cuan i zavaha ra sihin ra. I zañicuehe ra sii ra, ta tava ndyizo ra sii ra.

¹³ Yaha cuan, ta i catyi sitoho sacu cuan: "¿Yozo caa zacui vityi? Cua tasi sii zehi. Cuñi xein sii ra, vazu tyaa ra yahvi sii maa ra vatyi zehi cuu sii ra."

¹⁴ Zoco cuhva sa ndyehe ra zatyiño yucuan sii ra, i natuhun tahan ra sihin tahan ra ta catyi ra: "Ihya ra cuu ra cua nañihu ndaha tyiño quivi cua cuu zutu ra. Nacahñi yo sii ra vatyi ndoo maa yo sihin sacu ya." Catyi ra.

¹⁵ Ta i tava ndyizo ra sii ra sata sacu, ta i sahñi ra sii ra. Catyi ra Jesús. Ta ziqui i ndaca tuhun

ra sii ñiyivi tyizoho: ¿Yozo caa cua zavaha sitoho sacu cuan sihin ra sahñi sii zehe ra?

¹⁶ Cua quisi ra, ta cua zanaa ra sii ra, ta cua cuhva noo ra sacu cuan sii inga ra. Catyi ra Jesús. Ta sa siñi ñiyivi tuhun cuan ta catyi ñu: Zoco ma zavaha ra Ndyoo cuhva cuan.

¹⁷ Ta i nandyehe ra Jesús sii ñu, ta catyi ra: Tatu tacuan sica iñi ndo ¿ñaa cuñi si catyi si cuñi maa ndo nu catyi si tyehen? “I zavita ihno ñiyivi zandaa vehe sii yuu sa cuñi si sa cuenda siquí vehe. Ta vityi yuu cuan cuu sa ñiñi ca ta ziquí tandihí sa cuenda vehe cuan vatyi tacuan catyi ra Ndyoo.

¹⁸ Ta yoo ra cua nduva ziquí yuu cuan cua tahnu cuatyri, zoco yoo ra cua canacava yuu cuan ziquí, cua caxi cuatyri si sii ra ndyihi ndyihí.”

Tahan si tyaa yo yahvi sii ra cu tyiño ta sii ra Ndyoo

¹⁹ Ta ra zutu nahnu ta ra maestro cuenda ley i nducu ra cuhva zuun ñi cuhva cuan sa tiin ra sii ra Jesús vatyi tuu iñi ra vatyi i cahan ra Jesús cuhva iyo maa ra. Zoco i yuhu ra sii ñiyivi.

²⁰ Yucuan cuenda i tasi ra sii zuhva ra cua nducu coto ihñi sii ra Jesús. Cua zaha ra cuan tuhun vatyi ra vaha cuu ra, zoco cua nducu ra cuhva ñaa minoo tuhun ñi vaha cua cahan ra Jesús, ta cua ñihi ra cuhva tyaa ra cuatyri sata ra nuu ra cu gobernador.

²¹ Yucuan cuenda i catyi ra tyehensihin ra Jesús: Maestro, sito ndi vatyi ndoo xaan cohon, ta ndoo xaan cuhva zacuohon. Ña tyaa con yahvi sii minoo ñiyivi ta ziquí sii inga ñu zoco zacuohon ityi ra Ndyoo sa ndisa cuii.

²² Yucuan cuenda cuñi ndi coto ndi: ¿Atu vaha tyiyahvi yo xuhun sii ra ndyaca ñaha a ña vaha? Catyi ra.

²³ Zoco i tuu iñi ra Jesús vatyi ñi vaha añima ra cuan, ta i catyi ra

sihin ra: ¿Ñaa cuenda nducu coto ihñi ndo sii?

²⁴ Zañaha ndo minoo xuhun sii. ¿Yoo sii nuu ndyaa ya? ¿Ta yoo sii zivi ndyaa ya? Ta i nacahan ra cuan ta catyi ra: Sii ra gobierno César.

²⁵ Ta i catyi ra Jesús sihin ra: Cuhva ndo sii ra gobierno César sa cuu sii maa ra. Ta cuhva ndo sii ra Ndyoo sa cuu sii maa ra Ndyoo. I catyi ra Jesús.

²⁶ Ta ña cuu maa zandavi ñaha ra cuan sii ra Jesús sihin tuhun cahan ra nuu ñiyivi. Ta iyo xaan i cuñi ra cuhva i cahan ra Jesús, ta i cutaxi ra.

Ndaca tuhun ra tatu cua nandoto tucu ñiyivi

²⁷ Yaha cuan ta ziquí i saa coyo zuhva ra saduceo nu ndyaa ra Jesús. Catyi ra saduceo cuan vatyi ma nandoto ñiyivi tatu sa sihi ñu. Ta i ndaca tuhun ra cuan sii ra Jesús cuhva ya:

²⁸ Maestro, i tyaa ra Moisés minoo ley vatyi tatu sihi minoo rayii ta ndoo ndahvi ñazihí ra ta yoñi zehe ra i sicoo, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁹ Sicoo usa tahan rayii sihin yañi ra. I tindaha ra nuu. Ta i sihi ra, ta yoñi zehe ra i sicoo.

³⁰ Ta ziquí i tindaha ra cu uu sihin ñandahví cuan. Sihi tucu ra cuan. Ta yoñi zehe ra i sicoo.

³¹ I tindaha tucu ra cu uñi sihin ña. Ta tacuan tucu cuahan tyiño ndya i tindaha tandihí sa usa tahan ra sihin ña. Ta i sihi tandihí sa usa tahan ra, ta yoñi zehe ra i sicoo.

³² Ta nu ndihi tuhun i sihi ndihi tucu maa ñaha cuan.

³³ Yucuan cuenda cuñi ndi coto ndi ¿yoo ra cua cuu yii ña quivi cua nandoto ñiyivi? vatyi ñazihí tandihí sa usa tahan ra i cuu sii ña. Tacuan i catyi ra cuan sihin ra Jesús.

³⁴ Ta i catyi ra Jesús sihin ra: Ihya ñuu ñiyivi tindaha rayii ta ñu zíhi.

35 Zoco ñiyivi cua nandoto inga ñuu ñiyivi saa nu ndyaca ñaha ra Ndyoo, ma tindaha ca ñu indyacuan.

36 Ta ma cuu ca ñu vatyi sa nduu ñu tañi ángel. Ta zehe ra Ndyoo cuu sii ñu sa ndisa cuii vatyi cua nandoto ñu.

37 Sa ndisa cuu si vatyi nandoto ñiyivi vatyi i zandoo ra Moisés tuhun cuan nu tutu i tyaa ra. Vatyi quivi i cahan ra Ndyoo sihin ra nu cayu taca iñu cuan zoco ñá ndihisi, i cahan ra Moisés cuhva ya sihin ra Ndyoo ta catyi ra: "Zutu mañi yuu, Ndyoo cuun sii ra Abraham ta sii ra Isaac ta sii ra Jacob." (Tacuan i catyi ra Moisés vatyi sito ra vatyi ndito ra Abraham sihin tandihí zehe ra vazu sa sihi coño ñuhu ra.)

38 Vatyi yivi Ndyoo sii ñiyivi ndaha sihi cuii cuu ra Ndyoo. Ndyoo cuu ra sii ñiyivi cua condito tandihí cuii tyiemvu. Ta ndito añima ñiyivi sa cuenda maa ra Ndyoo. Ña sihi ñu.

39 Tacuan ta i cahan zuhva ra maestro cuenda ley ta catyi ra: Vaha xaan tuhun cohon, Maestro.

40 Ta yaha cuan ta ñá caña ca iñi ra ndaca tuhun ra numinoo ca tuhun sii ra Jesús.

¿Yoo sii zehe cuu sii ra Cristo?

41 Tacuan ta i catyi ra Jesús: Catyi ra maestro cuenda ley vatyi ra Cristo cuu ñiyivi sii ra rey David, ta ndisa cuu si cuhva cahan ra cuan.

42 Zoco zuun ñi maa ra rey David i cahan ta sa naha tuhun i saha ra Ndyoo sii ra, ta i tyaa ra cuhva cahan ra Ndyoo sihin ra Cristo. Tye-hen i tyaa ra David:

Cahan ra Ndyoo sihin ra ndyaca ñaha sii mi ta catyi ra:

"Cundyoon siyo cuehi

43 ndya cuhva ndya cua saa quiivi cua cuhve cuhva cua zahacanoon sii ñiyivi xaan iñi suun."

Tacuan i tyaa ra David.

44 ¿Ta yozo caa vatyi catyi ra maestro cuenda ley vatyi ñiyivi ra David cuu sii ra Cristo ta zuun ñi maa ra David catyi vatyi ndyaca ñaha ra Cristo sii ra? Catyi ra Jesús.

Tyaara Jesús cuatyi sata ra maestro cuenda ley

45 Ta cuhva i tyizoho tandihí ñiyivi i catyi ra Jesús sihin ñiyivi sica noo sihin ra:

46 Zazuenda vaha ndo sii ndo, ta ma zacuu ndo cuhva zacuu ra maestro cuenda ley. Tahan xaan iñi ra quihi ra zahma nañi vatyi cua nacoto ñiyivi sii ra vatyi ra ñiñi cuu ra. Ta cuhun ra nuyahvi vatyi cuñi xaan ra sa tyaa ñiyivi yahvi sii ra. Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu. Ta cuñi xaan ra sa cundyaa ra tyayu vaha nu sasi ñiyivi zacahnu vico.

47 Cuaha ca cua cutuñi ra maestro cuenda ley ta ziqui inga ñiyivi vatyi zuhu ra ndaha tyiño ñundahvi. Ta zandavi ñaha ra sii ñiyivi vatyi naha xaan sica tahvi ra sii Ndyoo vatyi cuñi ra sa cua ndyehe ñiyivi ta cua catyi ñu vatyi sito xaan ra sii Ndyoo. Catyi ra Jesús.

21

Cuhva i saha minoo ñandahvi xuhun

1 I ndyehe ra Jesús vatyi tyihi ra cuca xuhun sisi minoo satu sisi vehe ñuhu cahnu.

2 Ta i ndyehe tucu ra sii minoo ñaha ndahvi. Tyihi ña uu tahan xuhun ndyahi sa cu ohon zendavu sisi satu cuan.

3 Ta i catyi ra Jesús: Ndisa cuii catyi sihin ndo vatyi i tyihi ñandahvi cuan cuaha ca xuhun ta ziqui tandihí ca ra cuca.

4 Saha maa ra sa nandoo ñi ca sii ra. Zoco ñandahvi cuan, ndihí i saha ñi ca ña xuhun cuita casi ña.

Cuhva i catyi ra Jesús cuhva cua tani vehe ñuhu cahnu

5 Tacuan ta zuhva ñu i natuhun ñu tuhun vehe ñuhu cahnu cuan. Catyi ñu vatyi tyaqui xaan yuu i

sino si. Ta tyaqui xaan sa tacaa sa saha maa ñiyivi, ndihí ca. Tacuan ta i catyi ra Jesú:

⁶ Cua coo quivi ta tandihí sa ndyehe ndo ihya cua tani si. Numinoo yuu ya ta ma ndoo si ziquí tahan si. Cua nacoyo tandihí si.

⁷ Ta i ndaca tuhun ra sii ra Jesú ta catyi ra: Maestro, ¿ama cua coo cuhva cuan? ¿Ñaa zeña cua ndyehe ndi, ta ziquí cua coto ndi vatyí sa cua tahan si?

⁸ Ta i catyi ra Jesú: Zacuenda ndo sii ndo coto zandavi ñaha ñiyivi sii ndo. Vatyí cuaha xaan ra cua quisi ta cua catyi ra: "Yuhvi cui Cristo, ta sa cuñi naa ñiyivi." Cua catyi ra. Zoco ma sino iñi ndo sii ra, ta ma cundyico ndo sii ra.

⁹ Ta cua cuiñi ndo tuhun vatyí cua coo cuatyí ta cahñi tahan xaan ñiyivi, zoco ma yuhu ndo. Xihna ca cua cuu tandihí cuhva cuan, cumañi ca sa saa quivi naa ñiyivi. Catyi ra.

¹⁰ Ta catyi tucu ra: Cua cahñi tahan minoo ñuu sihin inga ñuu, ta cua coo cuatyí ñuu nahnu sihin inga ñuu nahnu.

¹¹ Ta cua coo sa taan ñihi xaan ziin ziin ityi. Ta cua coo cuehe tandihí ityi. Ta cua coo tama. Ta cua coo sa zayuhu xaan sii ñiyivi. Ta cua coo cuaha xaan zeña andivi.

¹² Zoco cumañi ca sa cuu tandihí cuhva cuan, cua cuxaan xaan ñiyivi ndyehe ñu sii ndo. Cua zayanga xaan ñu sii ndo, ta cua tiin ñu sii ndo vatyí caca ñu cuatyí saha ndo sisi vehe ñuhu. Ta cua tyihi ñu sii ndo vehe caa. Ta cua cuhva maa ndo sa ndaa sa cuenda mi ityi nuu ra cu rey ta ra cu tyiño.

¹³ Ta cua cuu cahan ndo sa cuenda mi.

¹⁴ Zoco zaha ndo cuenda, ta ma caca iñi ndo ñaa sa cua cahan ndo nuu ra cu tyiño cuan.

¹⁵ Vatyí yuhvi cua cuhve tuhun cahan ndo, ta cua cuhve sa siñi tuñi xiñi ndo. Ta numinoo ra xaan iñi sii

ndo ta ma cuu zahacanaa ra sii ndo sihin tuhun cahan ra.

¹⁶ Zoco zuun ñi ñiyivi sii ndo cua xico tuhun sii ndo, zutu ndo ta zihí ndo, ta tahan ndo ta ra tahan ndo, ta amigo ndo. Cua cuhva ñu sii ndo sii ñu xaan iñi sii ndo. Ta cua cahñi ñu sii zuhva ndo.

¹⁷ Tandihí ñiyivi cua cuxaan xaan ñu ndyehe ñu sii ndo sa cuenda mi.

¹⁸ Zoco ma cunaa numinoo ixi xiñi ndo.

¹⁹ Ta tatu ma ndu-uu iñi ndo, cua cundito ndo tandihí cuii tylemvu.

²⁰ Ta quivi cua ndyehe ndo vatyí yucu zandaru siconduu ñuu Jerusalén ya, cua coto ndo vatyí sa cuñi saa quivi cunaa ñuu ya.

²¹ Tacuan ta ñiyivi ndyaa nacahnu Judea, nacono ñu ta naquihví xehe ñu ndya yucu. Ta ñu yucu sisi cuhu, ma cunuhi ñu ndya ñuu ñu.

²² Vatyí quivi cuan cua tasi tuñi ra Ndyoo sii ñiyivi ñuu ya. Ta tacuan ta cua cuu si tandihí cuhva catyi tutu ra Ndyoo.

²³ Zoco cuaha xaan tundoho cua ndyehe ñu zihí, ñu ñoho zehe, quivi cuan a tatu iyo zehe ñu sa tyaxi quivi cuan vatyí cahnu xaan tundoho cua coo quivi cuan vatyí cua cuxaan xaan ra Ndyoo sihin ñiyivi ñuu Jerusalén.

²⁴ Cua cahñi zandaru sii ñiyivi sihin mityi ra, ta inga ñiyivi cua tiin ra ta cundyaca ra sii ñu ziin ziin ñuu. Ta ñiyivi sa yivi ñiyivi hebreo cuu, cua cuyucu ñu ñuu Jerusalén ndya quivi cua catyi maa ra Ndyoo.

Cuhva cua quisi tucu ra i quisi ndya gloria

²⁵ Ta cuaha sa iyo cua ndyehe ñiyivi nu ñicandyi ta nu yoo ta cuhva iyo tiñoo. Ta cua yuhu xaan ñiyivi ñuu ñiyivi ya cuhva cua ndaa noo xaan tyañuhu.

²⁶ Yaha xaan yaha xaan cua yuhu ñiyivi sihin sa sica xaan iñi ñu sa cuenda sa iyo sa cua cuu ñuu ñiyivi. Ta tandihí sa iyo andivi cua canda si.

27 Tacuan ta ziqui cua ndyehe ñiyivi sii ra i quisi ndya gloria. Cua quisi tucu ra sihin vico ta sihin cuaha xaan cuhva. Ta tyaqui xaan caa ra.

28 Ta tatu sa quisaha cuu tandihí cuhva ya, zii xaan cuñi ndo vatyi sa yatyí cuii cua cacu ndo.

29 Tacuan i catyi ra Jesús, ta ziqui i cahan ra ziqui minoo cuhva ya ta catyi ra: Ndyehe ndo cuhva iyo yuto higuera ta tandihí inga yuto.

30 Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vatyi sa cua nducanhí.

31 Ta tacuan tucu tatu sa ndyehe ndo vatyi sa cuu tandihí tuhun sa quehin sihin ndo ihya, tacuan ta cua coto ndo vatyi sa cua cuyatyi cundyaca ñaha ra Ndyoo ñuu ñiyivi ya.

32 Sa ndisa catyi sihin ndo vatyi cua cuu cuhva ya cuee ca sa cuu ñiyivi sa iyo vityi.

33 Yutyi andivi ta ñuhu ñuu ñiyivi cunaa si. Zoco tuhun quehin ma naa si.

34 Coto yaha ndo sii ndo coto ñáha zandava ndo iñi ndo sa cuenda cuatyí zavaha ndo tañi sa zavaha xaan ndo vico ta sihi xaan ndo ndixi ta sica xaan iñi ndo tuhun sa iyo ñuu ñiyivi. Tatu tacuan iyo ndo ta ña ndatu listo ndo, zana ñi iñi ndo ta cua quisi tundoho ziqui ndo.

35 Vatyi tacuan cua cuu si sihin tandihí ñiyivi ñuu ñiyivi. Zana ñi iñi ñu, ta cua cuu si tañi minoo sa nacazi ra Ndyoo nu ñoho ñu, ta ma cuu ca quita ñu.

36 Yucuan cuenda cuatu listo ndo, ta caca xaan ndo sii ra Ndyoo tandihí quivi vatyi cua cuhva ra sa ma ndyehe ndo tundoho cahnu xaan sa cua coo. Ta caca ndo sii ra vatyi cuhva ra sa cua saa vaha ndo ityi nuu ra i quisi ndya gloria. Tacuan i catyi ra Jesús.

37 Ora i zacuaha ra Jesús sii ñiyivi sisi vehe ñuhu cahnu ta sa sa cuaa

tuhva ra sahan ndya yucu sa nañi Olivos.

38 Ta tahan ñaha ñi saa coyo ñiyivi vehe ñuhu vatyi cuñi ñu tyizoho ñu sa cahan ra.

22

Xico ra Judas Iscariote sii ra Jesús

1 Sa cuñi tahan si vico sihi mvee ticateyi. Quivi sasi ñiyivi pan ña ndaa. Pascua nañi vico cuan. Ta catyi maa yo vico zuhun.

2 Ta ra zutu nahnu sihin ra maestro cuenda ley, sa nducu ra cuhva yozo caa cuu cahñi ra sii ra Jesús, zoco yuhu ra sii ñiyivi.

3 Tacuan ta i quihví cuihna sii ra Judas Iscariote. Ta minoo sa usi uu tahan ra i casi ra Jesús cuu ra.

4 Ta cuahan ra cua cahan ra sihin ra zutu nahnu ta ra cu nuu sii ra zacuenda vehe ñuhu cahnu. Natuhun tahan ra yozo caa cua xico ra Judas sii ra Jesús.

5 Ta zii xaan i cuñi ra cuan ta i zandaa ra tyiño vatyi cua cuhva ra xuhun sii ra Judas.

6 Ta i ndoo ra Judas vaha, ta i quisaha nducu ra cuhva yozo caa cua cuhva cuenda ra sii ra Jesús sii ra cuan cuhva sa yoñi ñiyivi yucu sihin ra.

I cuxiñi ra Jesús sihin ra i casi ra

7 Ta sa saa quivi tuhva ñu hebreo sasi pan ña ndaa, quivi sa tahan si cahñi ñu sii minoo mvee ticateyi.

8 Ta i tasi ra Jesús sii ra Pedro ta ra Juan sihin minoo tyiño, ta catyi ra sihin ra: Cuahan ndo cua zanduvaha ndo minoo mvee ticateyi vatyi cua cuxiñi yo.

9 Ta i ndaca tuhun ra sii ra Jesús ta catyi ra: ¿Ndyamaa cuñun sa zanduvaha ndi sa cuxiñi yo? Catyi ra.

10 Ta i catyi ra Jesús sihin ra: Cuahan ndo sisi ñuu. Ta yucuan cua ndyehe ndo sii minoo ra ndyizo ra minoo quivi ndutya. Cundyico ndo sii ra, ta quihví ndo vehe nu cua quihví maa ra.

¹¹ Ta catyi ndo sihin sitoho vehe cuan: “Catyi ra Maestro: ¿ndyamaa ndyaa cuarto nu cua cuxiñi sa cuenda vico ya sihin ra i casi?” Tacuan catyi ndo sihin ra catyi ra Jesús.

¹² Ta cua zañaha ra minoo cuarto cahnu ndya ziqui. Sa yaha nduvii si. Yucuan zanduvaha ndo sa cuxiñi yo.

¹³ Tacuan catyi ra Jesús sihin ra. Ta cuahan ra, ta i nañihi ra cuarto cuan tañi cuhva i catyi ra Jesús. Ta i zanduvaha ra sa cuxiñi ra sa cuenda vico zuhun cuan.

¹⁴ Ta sa saa cuhva ta i sicundyaa ra Jesús yumesa sihin sa usi uu tahan ra i casi ra.

¹⁵ Tacuan ta i catyi ra Jesús sihin ra: Cuñi xein cuxiñi sihin ndo sisi vico zuhun ya cuee ca sa ndyeхи tundoho.

¹⁶ Ta catyi sihin ndo vatyi ma casi que inga saha sihin ndo sa cuenda vico ya ndya cua cuu si inga saha nu ndyaca ñaha ra Ndyoo.

¹⁷ Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i catyi ra: Quihin ndo vaso ya, ta coho minoo minoo ndo zuhva zuhva.

¹⁸ Vatyi catyi sihin ndo vatyi ma coho que vino ndya cua cundyaca ñaha ra Ndyoo sii ñiyivi.

¹⁹ Tacuan ta i quihin ra pan. Ta i saha ra tyahvi ndyoo sii ra Ndyoo, ta i sahnu ra sii si, ta i saha ra sii si sii ra. Ta i catyi ra: Ihya cuu tañi coño ñuhi sa cua cuhve sa cuenda maa ndo. Zavaha ndo cuhva ya vatyi nacohon iñi ndo sii. Catyi ra.

²⁰ Ta sa yaha cuxiñi ra i quihin ra minoo vaso vino, ta i catyi ra: Ihya cuu tañi niñi. Cua cati si sa cuenda maa ndo. Vityi zandaa ra Ndyoo minoo tyiñi saa. Cua zandasí ra cuatyi ñiyivi sihin niñi.

²¹ Zoco vityi ra sa xico sii, iñi ñi ndyaa ra mesa ya sihin.

²² Ta ndisa vatyi ra i quisí ndya gloria cua cuu tandihí sii ra tañi sa

ndyaa cuu sii ra, zoco jndahvi ñi cuu ra xico sii! Catyi ra Jesús.

²³ Tacuan ta i quisaha ndducu tuhun tahan ra i casi ra sii ra tahan ra, ndya ra cuu ra zacuu cuhva cahan ra Jesús tuhun.

Natuhun tahan ra i casi ra Jesús ndya ra cuu ra ñiñi ca

²⁴ Yaha cuan ta i quisaha natuhun tahan xaan ra i casi ra Jesús sa cuenda ndya ra cuu ra ñiñi ca nu yucu ra.

²⁵ Ta i catyi ra Jesús sihin ra: Ra cu rey sii ñiyivi ñuu ñiyivi ya cuñi ra vatyi zacahnu ñiyivi sii ra. Ta cuñi ra vatyi catyi ñiyivi vatyi tyindyeer a sii ñu.

²⁶ Zoco ña tacuan cua cuu si sa cuenda maa ndo. Tatu cuñi ndo cuu ndo ra cu nuu, zandulu hlu ndo sii ndo. Ta ra cuñi cundyaca ñaha sii inga ndo, cuñi si sa cuu ra muzu sii tandihí ndo.

²⁷ Ihya ñuu ñiyivi, ra ñiñi ca cuu ra ña zatyiñi. Ndyaa ra yumesa ra, ta tyizo muzu ra coho nu mesa. Zoco ña tacuan zavaha mi vatyi zatyiñe tañi muzu cui sii ndo.

²⁸ Ta maa ndo cuu ra i sindyaa sihin sisi quivi ñia vaha ya nu ndyehe xein tundoho.

²⁹ Yucuan cuenda cua cuhve minoo nu cua cundyaca ñaha ndo tañi cua cuhyá Zuti minoo nu cua cundyaca ñehi.

³⁰ Ta cua cuhve sa cua casi ndo ta cua coho ndo numesa sihin mi nu cua cundyaca ñehi. Ta cua tyicuhva ndo sii sa usi uu tahan ityi ñiyivi hebreo.

Catyi ra Jesús vatyi cua catyi ra Pedro vatyi ña sito ra sii ra

³¹ Tacuan ta i catyi ra Jesús sihin ra Pedro: Ndyee vohon yoho Simón vatyi cuñi ra cu nuu sii cuihna suun vatyi cuñi ra ndrucu coto ihñi ra suun.

³² Zoco i cahan xein sihin ra Ndyoo sa cuendon vatyi ma naa sa sino iñun sii ra Ndyoo. Ta quivi cua ndu-uu iñun cuatyun, zandundyee con iñi ra tohon.

33 Ta i catyi ra Simón sihin ra: Tata, sa ndyaa listi sa cuhin suhun vazu ndya vehe caa ta vazu cui suhun. Catyi ra.

34 Ta i catyi ra Jesús sihin ra: Catyi suhun yoho Pedro vatyi cumañi ca sa vacu saa ndiví tyahnu sa cuaa vityi ta cua catyun uñi tahan saha vatyi ña siton sii.

Sa cuñi saa cuhva cua cuhva cuenda ra Judas sii ra Jesús

35 Tacuan ta i ndaca tuhun ra Jesús sii ra i casi ra ta catyi ra: Nacohon iñi ndo quivi i tasi sii ndo sa nacatyi ndo tuhin sihin ñiyivi ta ñahñi sindyizo ndo, nu xuhun ta nu sa casi ndo ta nu inga zahma ndo. ¿Atu i cumañi si sii ndo quivi cuan? Ta i nacahan ra cuan ta catyi ra: Ñahñi i cumañi sii ndi.

36 Ta ziqui i catyi ra Jesús sihin ra: Zoco vityi tatu iyo xuhun ndo a sa casi ndo a zahma ndo, cuizo ndo sii si. Ta tatu ñahñi mityi ndo, xico ndo minoo zahma ndo ta zata ndo minoo si.

37 Vatyi catyi sihin ndo vatyi cuhva ndyaa si nu tutu ra Ndyoo sa cuenda mi, sa cuñi tahan si cuhva catyi si: "Cua tasi tuñi ñiyivi sii ra tañi ra iyo cuatyi." Tacuan catyi si, ta cua cuu tandihí cuhva ndyaa si.

38 Ta i catyi ra cuan sihin ra Jesús: Tata, cumi yo uu tahan mityi. Ta i catyi ra Jesús sihin ra: Maa vatu ñi.

Cahan ra Jesús sihin ra Ndyoo minoo nu yucu yutu tyaqui nu nañi si Getsemaní

39 I quita ra Jesús vehe cuan ta cuahan ra ndya yucu Olivos tañi tuhva maa ra sahan. Ta cuahan tucu ra i casi ra sihin ra.

40 Ta cuhva sa saa ra yucuan i catyi ra sihin ra i casi ra: Caca tahvi ndo sii maa ra Ndyoo vatyi ma cuhva ra sa nducu coto ihñi cuihna sii ndo.

41 Tacuan ta cuahan ra Jesús zuhva ca maa ñi maa ra. Tañi cuhva zavita yo minoo yuu, tacuan ñi cuu cuhva cuahan ra. Ta yucuan

i sicuiñi siti ra, ta i cahan ra sihin ra Ndyoo.

42 Ta i catyi ra sihin ra Ndyoo: Ndyoo Zuti, tatu cuhva cuñi moo cuu, cuhvon sa ma ndyehi tundoho ya. Zoco ma cuhvon tañi cuhva cuñi mi. Nacuu si tañi cuhva cuñi moo.

43 Tacuan ta i quituu minoo ángel nu ndyaa ra, ta saha ca si tundyee iñi sii ra.

44 Cuaha xaan tundoho ndyehe ra Jesús vatyi cuihya xaan cuñi ra, ta ñihi ca sica tahvi ra sii ra Ndyoo. Ta cuaha xaan tyeen ra i quita tañi toon niñi nu ñuhu.

45 Ta sa nduvita ra sa ndihi cahan ra sihin ra Ndyoo ta sahan ra nu yucu ra ndihi sihin ra, ta nañihi ra sii ra quixi ra vatyi cuihya xaan cuñi ra.

46 Ta i catyi ra sihin ra: ¿Ñacu quixi xaan ndo? Nduvita ndo ta cahan ndo sihin ra Ndyoo coto nducu coto ihñi cuihna sii ndo.

Tin ra sii ra Jesús

47 Nu cahan ca ra Jesús ta i saa ra Judas, minoo sa usi uu tahan ra i casi ra Jesús cuu ra. Ta i saa cuaha xaan ñiyivi sihin ra. I tuhva ra Judas sii ra Jesús vatyi cua coho ra xiti ra.

48 Ta i catyi ra Jesús sihin ra: Judas, ¿atu sihin sa cohon xiti cua nacuhva cuendon sii ra i quisi ndya gloria? Catyi ra.

49 Ndyehe ra yucu sihin ra Jesús cuhva sa cuu, ta ndaca tuhun ra sii ra: Tata, ¿atu cañi ndi sii ra sihin mityi? Catyi ra.

50 Ta minoo ra cuan i sahndya ra zoho minoo ra cu muzu ra cu zutu ya cahnu, siyo cuaha.

51 Zoco i catyi ra Jesús sihin ra: Zaña ndo. Vaha ñi. Catyi ra. Ta i naquihin ra Jesús zoho ra cuan ta natyaa ra. Ta i zanduvaha ra zoho ra.

52 Tacuan ta i catyi ra Jesús sihin ra zutu nahnu, ta ra cu policía cuenda vehe ñuhu ta ra mandoñi: ¿Atu vasi tin ndo sii minoo ra zuhu

vatyi ñaa ndo mityi ta ndaha tysiño xaan?

⁵³Tahan tahan quivi i sehin vehe ñuhu cahnu ta yucu ndo, zoco ñá tiin ndo sii yucuan. Vityi cuu cuhva ndyaca ñaha ra ña vaha, ta yucuan cuenda vityi cua tiin ndo sii.

Icatyira Pedro vatyi ña sito ra sii ra Jesús

⁵⁴Tacuan i tiin ra sii ra Jesús, ta i sindyaca ra sii ra ndya vehe ra cu nuu sii ra cu zutu. Ta i sindyico ra Pedro sii ra sica sica ñi.

⁵⁵Ta cuhva sa saa coyo ra yucuan i zatahan ra ñuhu nuquehe ta sicundyaa ra, ta i sicundyaa ra Pedro mahñu.

⁵⁶Ta cuhva sa ndyaa ra Pedro yunuhi ta i ndyehe minoo ña cu muzu sii ra, ta nacoto ña sii ra, ta catyi ña: Ra ihya, ra tahan ra cuu sii ra.

⁵⁷Zoco i catyi ra Pedro: Maha, ña site sii ra.

⁵⁸Ta i yaha zuhva cuhva, ta i ndyehe tucu inga ra sii ra Pedro, ta catyi ra: Yoho tucu, ra tahan oo cuu sii ra. Ta i catyi ra Pedro sihin ra: Yivi yuhvi, tata.

⁵⁹Ta i yaha tañi minoo ora, ta i catyi tucu inga ra: Ndisa cuii vatyi ra ihya cuu tucu minoo ra tahan ra vatyi zuun ñi ra Galilea cuu tucu ra.

⁶⁰Ta i catyi ra Pedro sihin ra: Tata, ña site ñaatuhun cohon. Catyi ra. Ta zuun ñi caa cuhva sa cahan ra Pedro, ta i sacu saa minoo ndiví tyahnu.

⁶¹Tacuan ta i nasico cava ra Jesús, ta i nandyehe ra sii ra Pedro. Ta i nacohon iñi ra Pedro cuhva sa i catyi ra Jesús sihin ra: "Cumañi ca vacu saa ndiví tyahnu, cua catyun uñi tahan saha vatyi ña siton sii."

⁶²Ta cuhva cuan i quita ra Pedro, ta i sacu xaan ra vatyi i nducuihya xaan iñi ra.

Sacu ndyaa ñiyivi sii ra Jesús

⁶³Tacuan ta ra i sicumi sii ra Jesús i quisaha sacu ndyaa ra sii ra, ta i cañi ra sii ra.

⁶⁴I sihñi ra minoo zahma nuu ra, ta ziqui i cati ra nuu ra ta catyi ra: Nacoton yoo ra i cañi suun. Catyi ra.

⁶⁵Ta cuaha xaan inga sa quiñi i cahan ra sihin ra.

I sindyaca ra sii ra Jesús nu titahan ra cu tysiño hebreo

⁶⁶Ta cuhva sa cundisi i titahan ra mandoñi sihin ra zutu nahnu sihin ra maestro cuenda ley. Ta i quiñin ra sii ra Jesús, ta sindyaca ra sii ra nu cuu junta cahnu cuenda tandihí ra ñiñi hebreo. Ta i catyi ra sihin ra:

⁶⁷Nacatyun sihin ndi ¿atu ra Cristo cuun, ra cua zacacu sii ndi? Ta i catyi ra Jesús sihin ra: Tatu catyi sihin ndo vatyi zuun ra cui, ma sino iñi ndo.

⁶⁸A tatu ndaca tuhin ñaa minoo cuhva sii maa ndo, ma nacahan ndo. Ta zuun ñi sa ma zaña ndo sii.

⁶⁹Zoco ndya vityi cua cundyaa ra i quisí ndya gloria siyo cuaha ra Ndyoo. Catyi ra.

⁷⁰Tacuan ta i ndaca tuhun tandihí ra sii ra Jesús ta catyi ra: ¿Ziqui zehe ra Ndyoo cuu suun? Ta i catyi ra Jesús sihin ra: Zuun cui tañi catyi maa ndo.

⁷¹Tacuan ta i catyi ra cuan sihin tahan ra: Xihna sa cahan ra. Ñahñi ca sa ndaa cuñi si vityi. Zuun ñi maa yo i siñi sa cahan ra sihin yuhu ra.

23

Nacuhva cuenda ra sii ra Jesús sii ra Pilato

¹I nduvita tandihí ra xaan iñi sii ra Jesús, ta i sindyaca ra sii ra nu ndyaa ra Pilato, ra cu gobernador.

²Ta i quisaha tyaa ra cuatyi sata ra Jesús nuu ra Pilato ta catyi ra: Ra ihya, zatiñi xaan ra sii ñiyivi sihin tuhun cahan ra nuu ñu. Ta catyi ra vatyi ña vaha sa tyiyahvi ndi xuhun sii ra ndyaca ñaha. Ta catyi ra vatyi Cristo cuu ra, minoo ra cu rey. Tacuan i nacatyi tandihí ra cuan sihin ra Pilato.

³Ta ziqui i ndaca tuhun ra Pilato sii ra Jesús: ¿Atu yoho cuu rey

cuenda ñiyivi hebreo? Ta i catyi ra Jesùs: Tacuan cu si tañi catyi moo.

⁴ Tacuan ta i catyi ra Pilato sihin ra zutu nahnu ta sihin inga ñiyivi: Ñahñi cuatyri ya iyo. Catyi ra.

⁵ Zoco i nduxaan ca ñiyivi ta i catyi ñu: Cahnu xaan cuatyri ya. Cuaha xaan tizih saha ra vatyi zacuha ra sii ñiyivi ta zanandiqui ra sii ñu ndya Galilea ta ndya ihya.

Tasi ra Pilato sii ra Jesùs nuu ra Herodes

⁶ Cuhva sa siñi ra Pilato tuhun cuan ta i ndaca tuhun ra tatu ra Galilea cuu ra Jesùs.

⁷ Ta sa sito ra vatyi zuun ra cuu ra, ta ziqui i zacuhun ra sii ra nu ndyaa ra Herodes vatyri Herodes i cuu gobernador nacahnu Galilea. Ta quivi cuan ñoho ra Herodes ñuu Jerusalén.

⁸ Ta zii xaan i cuñi ra Herodes sa ndyehe ra sii ra Jesùs vatyi sa naha xaan cuñi ra ndyehe ra sii ra. Sa siñi xaan ra Herodes tuhun ra Jesùs, ta cuñi ra ndyehe ra sa zavaha ra Jesùs minoo sa ndyityi.

⁹ Cuaha xaan cuhva i ndaca tuhun ra sii ra Jesùs, zoco ñá nacahan maa ra Jesùs sa cahan ra.

¹⁰ Ta yucu tucu ra zutu nahnu ta ra maestro cuenda ley cuhva cuan, ta i tyaa xaan ra cuatyri sata ra Jesùs.

¹¹ Ta ra Herodes sihin zandaru ra, i sacu ndyaa ra sii ra Jesùs. Ta i natyihia minoo zahma yahvi xaan sii ra, ta tyaqui xaan si tañi sa sityiño minoo rey, ta i natasi ra Herodes sii ra nu ndyaa ra Pilato.

¹² Ta quivi cuan i nduu amigo ra Pilato sii ra Herodes vatyi nu quisí quivi ñá cuu ndyehe ra sii tahan ra.

Saha ra Pilato sa cuu ra Jesùs

¹³ I zandu-iin ra Pilato sii ra zutu nahnu ta ra cu tyiño ta tandihi ñiyivi.

¹⁴ Ta i catyi ra sihin ñu: I quisí ndyacando sii ra ya sii, ta catyi ndo vatyi zativi xaan ra sii ñiyivi. Zoco

sa tycuhve sii ra nuu ndo. Ta ñahñi cuatyri iyo cuhva catyi maa ndo.

¹⁵ Ta ra Herodes tucu ñá nañili ra numinoo cuatyri, ta i natasi tucu ra sii ra ihya. Sa ndyehe ndo vatyi ñahñi sa zavaha ra ta cua cuu ra.

¹⁶ Yucuan cuenda cua cañi sii ra, ta cua zañe sii ra.

¹⁷ Tacuan i catyi ra Pilato vatyi cuñi si sa zaña ra sii minoo ra ñoho vehe caa tañi iyo costumbre sa cuenda vico cuan.

¹⁸ Zoco iin ñi i cana saa tandihi ñiyivi ta catyi ñu: Cahñun sii ra ya, ta zañon sii ra Barrabás. Catyi ñu.

¹⁹ Ta ra Barrabás cuan ñoho ra vehe caa vatyi iyo cuatyri ra sa cuñi ra nduvita ra ziqui ra cu tyiño. Ta i sañi ra ñiyivi.

²⁰ Ta ra Pilato cuñi ra zaña ra sii ra Jesùs, ta i cahan ra sihin ñiyivi inga saha vatyi cua zaña ra sii ra.

²¹ Zoco i cana saa ñu ta catyi ñu: Nacuu ra nu cruz. Nacuu ra nu cruz.

²² Ta i catyi tucu ra Pilato sihin ñu sa cu uñi saha: ¿Ñaa cuenda? ¿Ñaa sa ña vaha i zavaha ra? Ñahñi cuatyri i nañili ta cua cuu ra. Yucuan cuenda cua cañi sii ra, ta cua zañe sii ra. Catyi ra Pilato.

²³ Zoco i cana saa xaan ñiyivi, ta i zañiñi ñu vatyi nacuu ra nu cruz. Yaha xaan i cana saa ñiyivi, ta ra zutu nahnu ndya cuhva ndya sa cuu cuhva cuñi ñu.

²⁴ Ta i zandaa ra Pilato tyiño cuhva cuñi maa ñu.

²⁵ Ta tañi cuhva cuñi ñiyivi, i zaña ra sii ra Barrabás, ra ñoho vehe caa sa cuenda sa sahñi ra ñiyivi ta nduvita ra ziqui ra cu tyiño. Ta i zavaha ra sihin ra Jesùs cuhva catyi ñiyivi.

Nu i tyaa ra sii ra Jesùs nu cruz

²⁶ Tacuan ta i quihin zandaru sii ra Jesùs ta cuahan ra sihin ra. Ta i tiin zandaru sii minoo ra ñuu Cirene. Simón nañi ra. I quita ra sicuhu, ta vasi ra ñuu Jerusalén. Ta i zacuizo zandaru cruz ra Jesùs sii ra, ta cuahan ra sata ra Jesùs.

²⁷ Ta i sindyico tucu cuaha xaan inga ñiyivi sii ra Jesús. Ta cuaha xaan ñu zihí i sacu xaan ñu vatyi cuihya xaan cuñi ñu sa cuenda ra.

²⁸ Ta i ndyehe ra Jesús sii ñu, ta i catyi ra sihin ñu: Tandihu ndoho ñu zihí ñuu Jerusalén, ma vacu ndo sa cuenda mi. Vacu ndo sa cuenda maa ndo ta sa cuenda zehe ndo.

²⁹ Vatyi cua quisi quivi cua ndyehe xaan ndo tundoho. Ta cua cahan ñiyivi sa cuenda ñu sa yoñi zehe, ta cua catyi ñu: "Zii xaan cuñi ñu yoñi zehe iyo vatyi ma yaha xaan ndyehe ñu tundoho tañi ñiyivi iyo zehe."

³⁰ Vatyi quivi cuan, cua cuñi ñu sa nduva yucu xiñi ñu ta zahvi si sii ñu.

³¹ Vatyi tatu tyehen zavaha ñu sihin mi ta ñahñi cuatyi, yaha ca cua zavaha ñu sihin maa ndo ra iyo cuatyi. Catyi ra Jesús.

³² Ta i quihin tucu zandaru sii uu tahan ra quiñi xaan iyo vatyi cua cahñi ra sii ra iñi ñi sihin ra Jesús.

³³ Ta sa saa coyo ra minoo nu nañi si Yiqui Xiñi Ndiyi, yucuan i tyaa ra sii ra Jesús nuu cruz. Ta i tyaa ra sii minoo ra ña vaha cuan nuu inga cruz ta sañi ndyaa ra siyo cuaha ra Jesús. Ta inga ra siyo zatyi ra.

³⁴ Ta cuhva sa ndyaa ra Jesús nu cruz ta i catyi ra: Ndyoo Zuti, zohon tucahnu iñi sii ra ya vatyi ña sito ra ñaa sa ndyicuu ra sihin. Tacuan i cahan ra Jesús sihin ra Ndyoo. Ta i siziñi zandaru cuan vatyi cua ndyehe ra yoo ra cua zahacanaa minoo minoo zahma ra Jesús.

³⁵ Ta yucu ñiyivi, ta ndyehe ñu. Ta ra cu tyiñi sa yucu sihin ñu i sacu ndyaa ra sii ra Jesús ta catyi ra: I zacacu ra sii inga ñiyivi. Nazacacu ra sii maa ra tatu ndisa vatyi ra Cristo cuu ra, ra i casi ra Ndyoo.

³⁶ Ta i sacu ndyaa tucu zandaru sii ra. I tuhva ra sii ra, ta saha ra vinagre coho ra.

³⁷ Ta i catyi ra: Tatu rey cuenda ñiyivi hebreo cuun, zacacun suun. Catyi ra.

³⁸ Ta i tyaa ra letra xiñi cruz ra sihin zahan griego, ta zahan latín ta zahan hebreo ta catyi si: "Rey ñiyivi hebreo cuu ra."

³⁹ Ta minoo ra quiñi, ra ndyaa nu cruz ii siyo ra Jesús, quiñi xaan i cahan ra sihin ra ta i catyi ra: Tatu ndisa vatyi ra Cristo cuun, zacacun sii moo ta sii maa ndi. Catyi ra.

⁴⁰ Zoco inga ra cuan i catyi ra sihin ra tahan ra: ¿Atu ña yuhun sii ra Ndyoo? Ta zuun ñi tundoho sa ndyehe maa ra, ndyehun vityi.

⁴¹ Ta maa yo tahan si ndyehe yo tundoho ya vatyi iyo cuatyi yo, zoco maa ra ya ñahñi cuatyi ra iyo. Catyi ra.

⁴² Ta i catyi ra sihin ra Jesús: Jesús, nacohon iñun sii, quivi cua cundyaca ñohon.

⁴³ Ta i catyi ra Jesús sihin ra: Sa ndisa catyi suhun vatyi vityi cua cundyoon sihin mi nu cuahan añima ñu sino iñi sii ra Ndyoo.

Nu i sihi ra Jesús

⁴⁴ Tacuan i catyi ra Jesús. Ta i cuu si maa ora, ta i quisaha nduñaa. Ta ñaa xaan i nduu nacahnu ñuu ñiyivi ndya caa uñi sa sahiñi.

⁴⁵ I nduñaa fiicandyi. Ta zahma coco sa ndita sisi vehe ñuhu cahnu i ndata zava si.

⁴⁶ Ta i cana saa ra Jesús minoo sa ñihi xaan ta i catyi ra: Ndyoo Zuti, ndaha moo tyei añime. Ta sa yaha cahan ra Jesús cuhva cuan ta ndaha i sihi ñi ra.

⁴⁷ Ta sa ndyehe minoo ra cu nuu sii zandaru tandihu sa cuu, ta i zacahnu ra sii ra Ndyoo, ta catyi ra: Ndisa cuii vatyi ñahñi cuatyi ra i sicoo.

⁴⁸ Ta tandihu ñiyivi sa i titahan yucuan vatyi cua ndyehe ñu ñaa sa cua cuu, i quita ñu ta cuahan ñu. Yaha xaan cuihya i cuñi ñu.

⁴⁹ Ta tandihu amigo ra Jesús ta ñu zihí sa sindyico sii ra ndya Galilea

i si-iñi ndyaa ñu ndya zava. Ta i ndyehe ñu tandihí sa i cuu.

Ityihi ra sii ra Jesús sisi ñaña

⁵⁰ Sicoo minoo ra nañi José. Vaha xaan ra, ta ndoo xaan ra. Ta i cuu ra minoo ra cu nuu cuenda ra hebreo.

⁵¹ Ra ñuu Arimatea cuu ra José, ta ndatu ra quívi cua cundyaca ñáha ra Ndyoo. Ta ñá ndoo ra vaha sihin sa zavaha ra hebreo ra tahan ra.

⁵² Ta i sahan ra José nu ndyaa ra Pilato, ta i sica ra coño ñuhu ra Jesús.

⁵³ Ta i zanoo ra sii si nuu cruz. Ta i cava noo ra zahma sii si. Ta i saqui ra sii si sisi minoo ñaña nu cuu minoo yavi yuu. Minoo ñaña saa cuu si ta yoñi ca cutyiño sii si.

⁵⁴ Ta i cuu si viarni, quívi i zanduvaha ñiyivi sa cua casí ñu zavuru vatyi zavuru cuu quívi tuhva ñu quitatu.

⁵⁵ Ta ñu zihí sa i quisi sihin ra Jesús ndya Galilea i sindyico ñu sii ra, ta i ndyehe ñu ñaña ta cuhva catuu coño ñuhu ra Jesús sisi si.

⁵⁶ Ta ziquí cuahan ñu ta zanduvaha ñu xahan vixi (sa cua vaca ñu sii coño ñuhu ra Jesús cuee ca), ta i quitatu ñu zavuru tañi catyi ley hebreo.

24

Cuhva i nandoto ra Jesús

¹ Ta quívi tumingu ñaha cuii ñi i sinanuhu ñu zihí ndya ñaña ra. Ndaha ñu xahan vixi sa zanduvaha ñu. Ta i sahan tucu inga ñu zihí sihin ñu.

² Ta cuhva sa saa ñu i ndyehe ñu vatyi yuu cahnu sa sindazi yuñaña cuan sa siñi siyo si.

³ I quíhví ñu sisi ñaña cuan, zoco ña nañihí ñu coño ñuhu ra Jesús, ra ndyaca ñaha sii yo.

⁴ Ta ñá ñihí ñu cuhva ñaa sa cuu. Ta cuhva cuan i quisi uu tahan ra nu nandyaa ñu; ñoho ra zahma xiño xaan si.

⁵ Ta i yuhu xaan ñu. Ta i sicava ndyayu ñu nu ñuhu. Ta i catyi ra

cuan sihin ñu: ¿Ñacu nanducu ndo sii minoo ra ndito ihya nu iyo ñiyivi i sihi?

⁶ Yoñi ca ra ihya; sa i nandoto ra. Nacohon iñi ndo cuhva i cahan ra sihin ndo quívi sa sica noo ra Galilea.

⁷ Vatyi i catyi ra: “Tahan si sa cuhva cuenda ñu sii ra i quisi ndya gloria ndaha ra iyo cuatyi. Ta cua cahñi ra sii ra nuu cruz. Ta sa cu uñi quívi cua nandoto tucu ra.”

⁸ (Tacuan i catyi ángel cuan sihin ñu.) Ta i nacohon iñi ñu tuhun i cahan ra Jesús quívi cuan.

⁹ Ta i quita ñu nuñaña, ta i sinuhu ñu. Ta i nacatyi ñu tandihí cuhva cuan sihin sa usi iin tahan ca ra i casí ra Jesús ta sihin tandihí inga ñu sino iñi.

¹⁰ Ta ñu nacatyi tuhun cuan sihin ra cuan cuu ña María Magdalena, ta ña Juana, ta ña María zihí ra Jacobo ta inga zuhva ca ñu.

¹¹ Zoco ñá sino iñi ra cuan sa cahan ñu vatyi sica iñi ra vatyi cahan fi maa ñu.

¹² Zoco i nduvita ra Pedro, ta i cacono ra ta cuahan ra ndya ñaña. Ta i ndyehe ra sisi yavi yuu cuan. Ta i ndyehe ra vatyi zahma ñi ca ra catuu ndya zava. Ta i sinuhu ra. Ta iyo xaan i cuñi ra vatyi ñá catuu ca coño ñuhu ra Jesús sisi ñaña cuan.

I quituu ra Jesús nuu uu tahan ra i sica noo sihin ra

¹³ Ta zuun ñi quívi cuan cuahan uu tahan ra i sica noo sihin ra Jesús ndya minoo ñuu luhlu sa nañi Emaús. Ñuu cuan ndyaa si tañi usi iin kilómetro sata ñuu Jerusalén.

¹⁴ Ta cuhva sa cuahan ra, natuhun tahan ra sa cuenda tandihí sa i cuu.

¹⁵ Ta cuhva sa natuhun tahan ra sihin ra tahan ra, i natahan ra Jesús sii ra ta cuahan ra sihin ra.

¹⁶ Zoco vazu i ndyehe ra sii ra Jesús, ñá nacoto ra yoo ra cuu ra Jesús.

¹⁷ Tacuan ta i catyi ra Jesús sihin ra: ¿Ñaa sa natuhun xaan ndo itiyi

cuahan ndo? Ta ¿ñacu nducuihya xaan iñi ndo?

¹⁸ Tacuan ta i nacahan minoo ra sa nañi Cleofas, ta catyi ra: ¿Yozo caa cuu si vatyi i sohon ñuu Jerusalén, ta ña siton cuhva sa i cuu ñuu cuan?

¹⁹ Ta i catyi ra Jesús sihin ra: ¿Ñaa sa i cuu? Catyi ra. Ta i catyi ra cuan sihin ra: Sa cuenda ra Jesús, ra ñuu Nazaret vatyi i cuu ra minoo ra profeta. Ta sihin tundyee iñi ra Ndyoo i zavaha xaan ra sa ndyityi. Vaha xaan i cuu ra nuu ra Ndyoo, ta vaha xaan i cahan ra nuu ñiyiví ndihí ca.

²⁰ Zoco ra zutu nahnu ta ra cuu vehe ñuhu i saha cuenda ra sii ra sii zandaru romano vatyi cahñi ra sii ra. Ta i sihi ra nuu cruz.

²¹ Ta vityi sa cuu si uñi quiví sa i cuu cuhva cuan. Ta i sica iñi maa ndi vatyi maa ra cuu ra cua zacacu sii ñiyiví hebreo.

²² Ta inga tucu cuhva vatyi iyo xaan cuñi ndi sihin cuhva catyi zuhva ñu zíhi vatyi ñaha cuii ñi i sahan ñu nu ndyaa ñaña ra.

²³ Ta ñá nañihu ñu coño ñuhu ra yucuan. Ta i quisí nacatyi ñu sihin ndi vatyi i ndyehe ñu sii uu tahan ángel. Ta catyi ángel cuan vatyi ndito ra Jesús.

²⁴ Ta sahan zuhva ra tahan ndi nu ndyaa ñaña ra. Ta i ndyehe ra vatyi sa ndisa cuu cuhva catyi ñu zíhi cuan. Ta ñahñi ca coño ñuhu ra Jesús ñoho.

²⁵ Tacuan i catyi ra cuan. Ta i catyi ra Jesús sihin ra: Zuhva cuii ñi cutuñi iñi ndo. Ta cuee xaan sino iñi ndo tuhun i tyaa ra profeta ta sa naha.

²⁶ ¿Atu ña sito ndo vatyi tahan si sa ndyehe xihna ra Cristo tun-doho? ta zíqui cua ñihi ra tyiño sa cundyaca ñaha ra. Catyi ra Jesús sihin ra.

²⁷ Ta zíqui i quisaha nacatyi ra yozo caa cuahan tuhun nu tutu ra Ndyoo. I quisaha ra sihin tuhun i tyaa ra Moisés ta zíqui sa i tyaa tandihí ra profeta. Ta i zañaha ra

Jesús cuhva i cahan Tuhun Ndyoo sa cuenda maa ra.

²⁸ Ta cuhva sa saa ra ñuu nu cuahan ra, i zaha ra Jesús tuhun vatyi cuahun ra ityi nuu ca.

²⁹ Zoco i zañiñi inga ra cuan sii ra ta catyi ra: Ndoon sihin ndi vatyi sa cua iñi xaan. Ta i quiví ra Jesús vatyi cua ndoo ra sihin ra.

³⁰ Ta cuhva sa sacundyaar sihin ra mesa, i quiví ra pan. Ta saha ra tyahvi ndyoo sii ra Ndyoo. Ta i sahnu ra sii si, ta saha ra sii si sii ra.

³¹ Ta cuhva cuan i nacoto ra sii ra Jesús, zoco i naa ñi ra Jesús, ta ñá ndyehe ca ra sii ra.

³² Ta i catyi ra sihin ra tahan ra: ¿Ñacu ñá nacoto yo sii ra cuhva sa vasi yo sihin ra? Vatyi zíi xaan i cuñi yo cuhva sa natuhun ra sihin yo ta cuhva zacuaha ra sii yo yozo caa cuahan Tuhun Ndyoo.

³³ Tacuan i catyi ra cuan, ta zuun ñi caa cuhva cuan i nduvita ra ta i sananuhu ra ndya ñuu Jerusalén. Yucuan i nañihu ra sii sa usi iin tahan ca ra i casi ra Jesús. ñin ñi yucu ra sihin inga ra.

³⁴ Ta i catyi ra sihin ra: Ndisa vatyi i nandoto ra ndyaca ñaha sii yo, ta sa ndyehe ra Pedro sii ra.

³⁵ Tacuan i catyi ra, ta i nacatyi tucu ra i saa cuan cuhva i natuhun ra Jesús sihin ra ityi cuahan ra ta cuhva i nacoto ra sii ra nu i sahnu ra pan.

Quituu ra Jesús nuu sa usi iin tahan ra i casi ra

³⁶ Ta cuhva sa natuhun tahan ra tuhun cuan, ta i quituu ra Jesús mahñu nu yucu ra, ta i catyi ra sihin ra: Nacoo xaan sa taxi añima ndo. Catyi ra.

³⁷ Zoco i yuhu xaan ra cuan vatyi sica iñi ra vatyi ndyehe ra sii minoo añima.

³⁸ Ta i catyi ra Jesús sihin ra: ¿Ñacu yuhu xaan ndo? Ta ¿ñacu sica xaan iñi ndo? ta yuhvi cui.

³⁹ Ndyehe ndo ndehi ta sehi vatyi zuun yuhvi cui. ñin ndo sii, ta cua coto ndo vatyi yiví minoo añima

cui. Ŧahñi yiqui ta coño ūnu iyo sii minoo añima tañi iyo sii mi.

⁴⁰ Ta cuhva sa ndihí cahan ra Jesús tuhun ya, i zañaha ra ndaha ra ta saha ra sii ra.

⁴¹ Zoco maa ra cuan, iyo xaan cuñi ra ta zii xaan cuñi ra ndya cuhva ndya ña cuu ca sino iñi ra sa ndyehe ra. Ta i catyi ra Jesús sihin ra: ¿Atu iyo sa casi?

⁴² Ta i saha ra zuhva tyiyaca sa tyihyo ta zuhva xita tyahiñu sii ra.

⁴³ Ta i quihin ra sii si, ta i sasi ra nuu tandihí ra.

⁴⁴ Ta i catyi ra sihin ra: Tandihí sa i cuu sii, cuu sa nacatyi sihin ndo ta ndyei sihin ndo. I catyi vatyi cua cuu tandihí cuhva ndyaa nuu Tutu ra Ndyoo sa cuenda mi, tandihí sa catyi tuhun i tyaa ra Moisés, ta tuhun i tyaa ra profeta ta sa ndyaa nu libro salmos ndihí ca.

⁴⁵ Tacuan i catyi ra Jesús sihin ra, ta i saha ra sa cutuñi iñi ra cuhva catyi si nuu tutu ra Ndyoo.

⁴⁶ Ta i catyi tucu ra Jesús sihin ra: Tacuan ndyaa si vatyi tahan si sa cui. Ta sa cu uñi quivi cua nandoto tuqui, catyi si. Vatyi ra Cristo cui, ra zacacu sii ndo.

⁴⁷ Ta vityi tahan si sa cuhun ndo tandihí ñuu nacahnu ñuu ñiyivi ta nacatyi ndo sihin ñiyivi vatyi cuñi ra Ndyoo sa ndu-uu iñi ñu cuatyi ñu ta cua zandasi ra Ndyoo cuatyi ñu. Quisaha ndo cahan ndo tuhun ya ñuu Jerusalén ya.

⁴⁸ Ta maa ndo cuu sa ndaa tandihí tuhun ya.

⁴⁹ Ta cua zaquisi Tatyi Ii ra Ndyoo ziqui ndo tañi catyi Zuti vatyi cua cuhva ra sii ndo. Zoco ndoo ndo ñuu Jerusalén ya ndya cua quisi Tatyi Ii, ta cua ñihi ndo tundyee iñi sa cua quisi ndya andivi.

Indaa xica ra Jesús ityi andivi

⁵⁰ Tacuan i cahan ra Jesús sihin ra i casi ra, ta i sindyaca ra sii ra ndya ñuu Betania. Ta i zandaa ra ndaha ra, ta i nazoco ra sii ra.

⁵¹ Ta cuhva sa nazoco ra sii ra ta i ndaa xica ñi ra ityi andivi.

⁵² Ta i zacahnu xaan ra yucu yucuan sii ra Jesús. Ta i sinanuhu ra ndya ñuu Jerusalén. Ta zii xaan zii xaan i cuñi ra.

⁵³ Ta ñiyaca ta ndiyiyaca yucu ra vehe ñuhu cahnu yucuan. Ta zacahnu xaan ra sii ra Ndyoo. Ndihí si vityi.

Tuhun Vaha Sa I Tyaa Ra San Juan

Tuhun Ndyoo i nduu si minoo rayii

¹ Quivi i sino ñuu ñiyivi ta sa iyo Tuhun Ndyoo; maa ra, ra cu Tuhun Ndyoo, sa ndyaa ra sihin ra Ndyoo quivi cuan vatyi Ndyoo cuu tucu maa ra.

² Ndyaa sa xihna cuii ñi ta sa iyo ra sihin ra Ndyoo Zutu yo.

³ Sihin ra cuan i zavaha ra Ndyoo Zutu yo tandihi cuii sa iyo, ta ñahñi sa zavaha ra Ndyoo sa maa tuhun ñi ra.

⁴ Tandihi sa ndito ta ndito si sa cuenda ra cuan. Ta zañaha ra sii ñiyivi ñaa sa cuu sa ndisa. Tañi minoo ñúhu cuu ra.

⁵ Ñúhu cuan zandisi si nu ñaa. Ta ña cuu ndahva sa ñaa ya sii si.

⁶ Sicoo minoo ra i tasi ra Ndyoo. Sinañi ra Juan.

⁷ I quisí ra vatyi cuu ra minoo sa ndaa ta cahan ra tuhun sa cuenda ra cu ñúhu cuan vatyi tacuan ta cua sino iñi ñiyivi.

⁸ Maa ra Juan cuan, yivi ñúhu cuan cuu ra. Sa ndaa ñi i cuu ra. I tava ra Ndyoo tyiño sii ra vatyi cahan ra sa cuenda ra cu ñúhu cuan.

⁹ Vatyi ra cu ñúhu sa ndisa cuan, sa cua saa ra, ta cua cuhva ra sa siñi tuñi vaha sii tandihi ñiyivi.

¹⁰ I zavaha ra ñuu ñiyivi sihin ra Ndyoo Zutu yo, zoco quivi i quisí ra ñuu ñiyivi ya, ta ñá nacoto ñiyivi sii ra.

¹¹ I quisí ra zuun ñi ñuu ñiyivi sa i zavaha ra, ta zuun ñi ñiyivi ra ñá naquihin vaha ñu sii ra.

¹² Zoco ñiyivi i naquihin vaha sii ra sa ndisa, i saha ra cuhva sii ñu sa nduu ñu zehe ra Ndyoo. Maa ñu cuu ñu sino iñi sa ndisa cuii sii ra.

¹³ Ña caa ca ñu tañi caa zehe ñiyivi cuhva iyo si ñuu ñiyivi ya vatyi sa i nacacu saa ñu cuhva cuñi ra Ndyoo.

¹⁴ Ta ra cu Tuhun Ndyoo i nduu ra minoo ñiyivi, ta sindyaa ra sihin yo zuhva quivi. Saha xaan ra tu-mañi iñi sii ñiyivi, ta cahan ra maa ñi sa ndisa. Sa ndyehe yo vatyi cahnu xaan cuu maa ra tañi Ndyoo zutu ra. Minoo tuhun ñi ra cuu zehe Ndyoo sa ndisa, ta yucuan cuenda cuaha xaan cuhva iyo sii ra.

¹⁵ I cahan ra Juan sa cuenda ra, ta catyi ra: Ihya ra cuu ra i catyi vatyi vasi minoo ra cuee ca, zoco ñiñi ca ra ta ziqui mi vatyi sa iyo ra ta ziqui i caqui. Catyi ra Juan.

¹⁶ Sii tandihi cuii yo tyindyee xaan ra cuaha xaan cuaha xaan saha.

¹⁷ Sa cuenda ra Moisés ta sito yo ley ra Ndyoo, zoco sa cuenda ra Jesucristo, ta cuu ñihi yo tumañi iñi sihin ra Ndyoo, ta cuu coto yo ñaa sa cuu sa ndisa cuii.

¹⁸ Ta yoñi ca ndyehe sii ra Ndyoo numinoo saha. Zoco sa minoo tuhun ñi ra cuu zehe ra, cuñi xaan ra Ndyoo sii ra, ta maa ra ndyehe sii ra Ndyoo. Ta i nacatyi ra tandihi sihin yo yozo caa iyo ra Ndyoo Zutu yo.

Ra Juan ra i zacoo ndutya sii ñiyivi, cahan ra sa cuenda ra Jesucristo

¹⁹ Ra hebreo ra ñiñi ñuu Jerusalén i tasi ra sii ra cu zutu ta sii ra tyindyee sii ra cu zutu vatyi cua nducu tuhun ra sii ra Juan yoo ra cuu ra.

²⁰ Ta i catyi casi ra Juan: Yivi ra Cristo cuu yuhvi.

²¹ Ta ziqui i nducu tuhun tucu ra ta catyi ra: ¿Yoo ra cuu oo? ¿Atu ra Elías cuun? Ta i catyi ra Juan: Yivi yuhvi. Ta ziqui i nducu tuhun ra inga saha sii ra Juan ta catyi ra: ¿Atu yoho cuu ra cua quisí, ra cua cahan Tuhun Ndyoo? Ta i catyi tucu ra Juan: Yivi.

²² Ta ziqui i catyi tucu ra cuan sihin ra: ¿Yoo ra cuu oo? Cuñi si vatyi nacatyi ndi sihin ra tasi sii

ndi. ¿Ñaa sa cua catyun? ¿Yoo ra cuun?

²³ I nacahan ra Juan ta catyi ra: Yuhvi cui minoo ra cana saa sisi cuhu ta catyi: "Vasi ra ndyaca ñaha sii yo. Yucuan cuenda zandundoo ndo ityi tañi i catyi ra cahan Tuhun Ndyoo", ra Isaías. Tacuan i catyi ra Juan.

²⁴ Ta ra i quisi cuenda ra fariseo

²⁵ i nducu tuhun ra sii ra Juan ta catyi ra: Tatu yivi ra Cristo cuun ta yivi ra Elías ta yivi inga ra cahan Tuhun Ndyoo cuun ¿ñaa cuenda zacoo ndutyon sii ñiyivi?

²⁶ Ta i catyi ra Juan: Zacoo ndutye sihin ndutya. Nu yucu maa ndo nandyaa minoo ra sa ña sito ndo yoo ra cuu ra.

²⁷ I sei sa xihna ñi ñuu ñiyivi ya ta ziqui i saa maa ra, zoco ñiñi xaan ca ra ta ziqui mi. Ta yucuan cuenda ma cuu cui nu muzu ra ta ndasi tyiendi ndisa ra. Catyi ra Juan.

²⁸ Ta tandihi ihya, i cuu si nu nañi si Betábara. Ndyaa si cuan ityi caña ñicandyi ndya nu ndyaa yuu Jordán nu tuhva ra Juan zacoo ndutya sii ñiyivi.

Ra Jesús cuu tañi mvee ticateyi ra Ndyoo

²⁹ Ta inga quivi i ndyehe ra Juan vatyi tuhva ra Jesús sii ra, ta i catyi ra: Ndyehe ndo, ihya vasi ra cuu mvee ticateyi ra Ndyoo. Zandasi ra cuatyi sii tandihi ñiyivi ñuu ñiyivi.

³⁰ Ihya ra cuu ra quehin tuhun quivi i catyi: "Cuee ca cua quisi inga ra, zoco ñiñi xaan ca ra ta ziqui mi vatyi sa iyo ra ta ziqui i caqui."

³¹ Ta ñá site yoo ra cuu ra quivi cuan, zoco cuñi sa cua coto ñiyivi hebreo sii ra, ta yucuan cuenda vasi zacoo ndutye sii ñiyivi sihin ndutya. Catyi ra Juan.

³² Ta i saha ra Juan minoo sa ndaa ta catyi ra: I ndyehi quivi i noo Tatyi Ii ndya ityi ziqui tañi noo minoo paloma, ta i ndoo si sihin ra.

³³ Ta ñá nacote sa xihna ñi yoo ra cuu ra Jesús, zoco ra Ndyoo Zutu yo

i tava ra tysiño sii, sa zacoo ndutye sihin ndutya, ta i catyi ra: "Tatu cua ndyehun vatyi noo Tatyi Ii ta ndoo si sihin minoo ra, yucuan ra cuu ra cua zacoo ndutya sihin Tatyi II." Catyi ra.

³⁴ Ta sa i ndyehi cuhva cuan, catyi ra Juan, ta sehi sa ndaa vatyi ihya cuu ra cuu zehe ra Ndyoo.

Ra i casi ra Jesús sa xihna ñi

³⁵ Ta i yaha minoo quivi. Ta inga quivi ndyaa ra Juan yucuan inga saha sihin uu tahan ra cutahan sihin ra.

³⁶ Ta sa i ndyehe ra vatyi cua yaha ra Jesús ta i catyi ra: Ica ra cu mvee ticateyi ra Ndyoo. Catyi ra.

³⁷ Ta sa siñi sa uu tahan ra cutahan sihin ra sa cahan ra Juan, ta i sindyico ra cuan sii ra Jesús.

³⁸ Ta ziqui i nandyehe ra Jesús ityi sata ra, ta i ndyehe ra vatyi ndyico ra cuan sii ra, ta i catyi ra Jesús: ¿Ñaa sa nanducu ndo? Ta i catyi ra cuan: Maestro, ¿ndyamaa iyo vehun?

³⁹ Ta i catyi ra Jesús: Coho ndo ta cua ndyehe ndo. Ta cuahan ra cuan sihin ra, ta i ndyehe ra nu ndyaa ra Jesús, ta i ndoo ra minoo quivi cuan sihin ra vatyi sa i cuu si tañi caa cumi sa sahiñi cuhva sa i saa ra yucuan.

⁴⁰ Ta minoo sa uu tahan ra cuan sa i siñi ra sa catyi ra Juan ta sindyico ra sii ra Jesús, cuu ra Andrés yañi maa ra Simón Pedro.

⁴¹ Ta ra Andrés, ñahñi inga ca sa i zavaha ra. Sa xihna cuii ñi i sahan ra ta nanducu ra sii yañi ra, ra Simón, ta i catyi ra: Sa nañihi ndi sii ra Mesías. Catyi ra. (Tuhun Mesías cuan cuñi si catyi si Cristo a minoo ra sa cua zacacu sii ñiyivi.)

⁴² Ta ziqui i sahan ra Andrés sihin ra Simón ndya nu ndyaa ra Jesús. Ta sa ndyehe ra Jesús sii ra Simón, i catyi ra: Yoho cuu ra Simón zehe ra Jonás, zoco cua cunañun Cefas. (Cuñi si catyi si Pedro a minoo yuu.)

Cana ra Jesús sii ra Felipe ta ra Natanael

⁴³ Ta inga quivi cua cuhun ra Jesús ndya nu cu si Galilea, ta i nañihí ra sii ra Felipe ta catyi ra: Cundyicon sii.

⁴⁴ Ta ra Felipe cuan cuu ra minoo ra ñuu Betsaida. Ín ñi ñuu maa ra sihin ñuu ra Andrés ta ra Pedro.

⁴⁵ Ta i sahan ra Felipe ta nanducu ra sii ra sa nañi Natanael, ta i catyi ra: Sa i ndyehe ndi sii ra i cahan ra Moisés tuhun nu i tyaa ra nu tutu. Ta i tyaa tucu ra profeta sa cuenda ra cuan. Ra Jesús cuu ra sa cahan ra cuan tuhun, ta zehe ra José cuu ra, ra ñuu Nazaret.

⁴⁶ Ta i catyi ra Natanael: Ma cuu quita minoo sa vaha ñuu Nazaret cuan. Ta i nacahan ra Felipe ta catyi ra: Coho ta cua ndyehun.

⁴⁷ Ta sa i ndyehe ra Jesús sii ra Natanael vasi ra, ta i catyi ra Jesús: Ica minoo ra sa cuu ñiyivi hebreo sa ndisa cuii. Ña tuhva maa ra zandavi ñaha.

⁴⁸ Ta ziqui i ndedu tuhun ra Natanael ta catyi ra: ¿Yozo caa siton sii? Ta i catyi ra Jesús: I ndyehi suun cuee ca sa cana ra Felipe suun, cuhva sa ndyoon saha yutu higuera cuan.

⁴⁹ Ta i catyi ra Natanael: Maestro, yoho cuu zehe ra Ndyoo Zutu yo. Ra ndyaca ñaha cahnu sii ñiyivi hebreo cuun.

⁵⁰ I nacahan ra Jesús ta catyi ra: ¿Atu sihin sa yucuan ñi sino iñun sii vatyí catyi suhun vatyí ndyehi suun saha yutu higuera cuan? Cahnu xaan ca inga sa cua ndyehun ta ziqui ca sa ihya.

⁵¹ Sa ndisa catyi suhun vatyí cua ndyehun vatyí cua nuña ityi ziqui ityi andiví ta ángel Ndyoo cua ndaa cua noo ziqui ra i quisí ndya gloria.

2

Minoo vico tindaha ñuu Caná nu cu si Galilea

¹ Ta i yaha uñi quivi ta ziqui sicoo minoo vico tindaha ñuu Caná nu

cu si Galilea. Ta ñoho zíhi ra Jesús yucuan.

² Ta i cana ñiyivi sii ra Jesús sihin ra i casi ra vatyí cuhun tucu ra vico tindaha cuan.

³ Ta cuahan ra, ta nu yucu ñiyivi yucuan i ndihí vino sihi ñu, ta catyi zíhi ra Jesús sihin ra: Ndihí vino.

⁴ Ta i nacahan ra Jesús ta catyi ra: Maha, ¿ñaa cuenda cohon tuhun ña sihin? Tañaha ca tahan si quivi zatyíñe.

⁵ Zoco i catyi maa ña sihin ñu cu muzu: Zavaha ndo tandihí sa catyi maa ra.

⁶ Ta yucuan siyucu iñu tahan quizi yuu nahnu, tahan sa sityiño ñiyivi hebreo sa cuenda costumbre sa nacatyá xaan ñu ndaha ñu a ñaa ca. Ta sa minoo minoo quizi cuan cuu cutahan cumi xico a minoo ziendu litro ndutya.

⁷ Ta i catyi ra Jesús sihin ñiyivi zatyíño: Zacutu ndo quizi ya sihin ndutya. Ta i zacutu cuii ñu.

⁸ Ta ziqui i catyi ra Jesús: Vityi tava ndo zuhva si ta cundyaca ndo sii ra cu nuu sii vico ya. Ta tacuan i zavaha ñu.

⁹ Ta i sihi ra cu nuu sii vico cuan sii ndutya cuan ta sa i nduu si vino, ta ñá sito ra yozo caa sino si. Zoco i sito maa ñu cu muzu cuan vatyí maa ñu i tyihi ndutya sisi quizi cuan vatyí maa ra Jesús catyi, ta i nduu si vino. Ta ra cu nuu sii vico cuan i cana ra sii ra tindaha cuan.

¹⁰ Ta i catyi ra sihin ra: Tandihí ñiyivi tuhva ñu saha sa xihna ñi vino vaha, ta tatu sa i sihi ñiyivi cuaha vino ta ziqui cua cuhva tucu ñu vino ndahvi ca coho ñiyivi. Zoco yoho i sicumi vohon vino vaha, ta vityi sohon sii si. (Tacuan i catyi ra vatyí ña sito ra vatyí maa ra Jesús zavaha vino cuan sihin ndutya.)

¹¹ Ihya cuu sa xihna ñi sa ndyityi i zavaha ra Jesús ñuu Caná nu cu si Galilea, ta sihin cuhva ya zañaha ra vatyí iyo xaan cuhva sii ra, ta i sino iñi ra i casi ra sii ra.

12 Ta sa ndihí vico cuan, ta cuahan ra Jesús ñuu Capernaum. Ta cuahan zíhi ra ta yañi ra ta ra i casi ra sihin ra. Ta yucuan i ndoo ñu zuhva quíví.

*Tava ra Jesús sii ñiyiví zavaha sa
ña vaha yuvehe ñuhu cahnu*

13 Sa cuñi tahan si quíví coo vico zuhun cuenda ñiyiví hebreo, ta cuahan ra Jesús ndya ñuu Jerusalén.

14 Ta yucuan nuquehe vehe ñuhu i ndyehe ra vatyi xico ñiyiví zindiquí, mvee taticyi ta paloma, ta inga ñiyiví ndyaa ñu sa nazama ñu xuhun ñiyiví.

15 Ta sa ndyehe ra Jesús tacuan, i zavaha ra minoo cuarta, ta i tava ndyizo ra sii ñu sata vehe ñuhu cuan sihin mvee taticyi ta zindiquí. Ta sii ñiyiví nazama xuhun, i quití cuatyí ra xuhun ñu nu ñuhu ta i zanduva ra mesa ñu.

16 Ta sihin ñiyiví xico paloma i catyi ra: Tava ndo sii ti lhya. Ma zavaha ndo minoo vehe nuyahvi sii vehe Zuti.

17 Ta sa i ndyehe ra i casi ra cuhva i zavaha ra, ta i nacohon iñi ra vatyi i catyi ra David quíví i tyaa ra Tuhun Ndyoo: "Cuñi zatívi si sii, vatyi zavaha ñiyiví sa ña vaha sisi vehun."

18 Ta zíqui i nducu tuhun ra hebreo sii ra Jesús ta catyi ra: ¿Ñaa zeña cua zañohon sii ndi ta zíqui cua coto ndi vatyi ra cahnu cuunt ta cuu zavohon sa tyehen?

19 I nacahan ra Jesús ta catyi ra: Cani ndo vehe ñuhu ya, ta sa cu uñi quíví ta cua zanduvehi sii si inga saha.

20 Tacuan ta zíqui i catyi ra hebreo: Uu xico iñu cuiya i zatíño ra zandaa vehe ñuhu ya. ¿Ta ñacu catyun vatyi cua zandoon sii si sisi sa uñi quíví ñi?

21 Zoco vehe ñuhu sa cahan ra Jesús tuhun, zuun ñi coño ñuhu maa ra cuu.

22 Yucuan cuenda, quíví i nadoto ra Jesús ta i nacohon iñi ra i casi ra vatyi sa i catyi ra cuhva ya. Ta zíqui i sino iñi ra cuhva catyi tutu Ndyoo ta tuhun cahan ra Jesús sihin ra.

*Sito ra Jesús tandihí sa iyo añima
ñiyiví*

23 Ta quíví sa sindyaa ra Jesús ñuu Jerusalén vico zuhun cuan ta cuaha xaan ñiyiví sino iñi sii ra vatyi ndyehe ñu cuaha xaan sa ndityi i zavaha ra.

24 Zoco ñia nii iñi ra Jesús sihin ñiyiví cuan vatyi sa sito vaha ra cuhva iyo tandihí ñiyiví.

25 Ta ñia siñi ñuhu minoo, yoo sa cua cuhva sa ndaa sii ra vatyi zuun ñi maa ra ta sa sito ra yozo caa iyo añima ñiyiví.

3

Ra Jesús sihin ra Nicodemo

1 Sicoo minoo ra fariseo nañi ra Nicodemo. Minoo ra ndyizo tyiño sihin ra hebreo cuu ra.

2 Ta i sahan ra minoo sa cuaa sa cua cahan ra sihin ra Jesús, ta catyi ra: Maestro, sito ndi vatyi maa ra Ndyoo i tava tyiño suun vatyi zacuohon sii ndi vatyi yoñi ra cuu zavaha sa ndityi tañi zavaha moo tatu yívi ra Ndyoo tyindyee sii ra.

3 Ta i nacatyí ra Jesús sihin ra: Sa ndisa ta sa ndisa catyi suhun vatyi tatu ma nacacu saa ñiyiví, ma cuu cundyaca ñaha ra Ndyoo sii ñu.

4 Ta i nducu tuhun ra Nicodemo ta catyi ra: ¿Zoco yozo caa cuu nacacu saa minoo ñiyiví tatu sa sahnu ra? Ma cuu nandihví ra sisi zíhi ra inga saha ta nacacu ra.

5 Ta i nacahan ra Jesús ta catyi ra: Sa ndisa ta sa ndisa catyi suhun, ra ma coo ndutyá ta ra ma ma ñihi Tatyi Ii ra Ndyoo, ma cuu quihví ra nu ndyaca ñaha ra Ndyoo.

6 Ra cacu ñiyiví, ñiyiví cuu ra. Zoco ra nacacu saa sa cuenda Tatyi Ii, sa ndito añima ra.

7 Ma iyo xaan cuñun vatyi catyi suhun vatyi cuñi si sa nacacu soon. Nahñii ca cuhva.

8 Caá tatyi tandihí ñi maa ityi. Siñun nduzu si, zoco ña cuu catyun ndyamaa i quisi si a ndyamaaa cuahan si. Ta tacuan tucu iyo ñiyiví sa nacacu cuenda Tatyi li.

9 Tacuan i catyi ra Jesús, ta ziqui i quisaha ndedu tuhun tucu ra Nicodemo sii ra ta catyi ra: ¿Ta yozo caa cuu cuhva ya?

10 Ta i nacatyi ra Jesús sihin ra: Ta yoho minoo ra ñifí cuun, minoo ra zacuaha sii ñiyiví hebreo, ta ña cutuñi iñun tuhun ya.

11 Sa ndisa ta sa ndisa catyi suhun vatyi quehin cuhva site ta cui sa ndaa cuhva sa ndyehi, zoco ña sino iñi ndo sa catyi.

12 Tatu quehin sihin ndo cuhva iyo ñuu ñiyiví ya ta ña sino iñi ndo, ¿yozo caa cuu sino iñi ndo tatu quehin sa cuenda sa iyo ndya gloria?

13 Yoñi ra sa i ndaa xica ndya gloria, maa ñi maa ra sa i noo ndya gloria, ra i quisi ndya gloria, zeha ra ndyaa ndya gloria.

14 Ta ñi i cañihí ra Moisés coo caa cuan sisi cuhu, tacuan tucu cua cañihí ñiyiví sii ra i quisi ndya gloria.

15 Vatyi tacuan ta tandihí ñiyiví sino iñi sii ra, ma cunaa ñu. Cua cundito ñu tandihí cuii tyiemvu.

Cuñi xaan ra Ndyoo sii ñiyiví ñuu ñiyiví

16 (Cahan ca ra Jesús, ta catyi ra:) Cuñi xaan ra Ndyoo sii ñiyiví, ta i saha ra sii sa minoo tuhun ñi zeha ra vatyi tandihí ñiyiví, ñu sino iñi sii ra, ma cunaa ñu. Cua cundito ñu tandihí tyiemvu sihin ra.

17 Ñá zaquisi ra Ndyoo sii zeha ra ñuu ñiyiví ya sa cuenda sa cua tasi tuñi ra sii ñiyiví. I zaquisi ra sii ra vatyi cua zandasí ra cuatyi ñiyiví ta cua zacacu ra sii ñu.

18 Ñiyiví sa sino iñi sii zeha ra Ndyoo, ma tasi tuñi ra Ndyoo sii ñu, zoco ñiyiví sa ña sino iñi cua tasi

tuñi ra Ndyoo sii ñu vatyi ña sino iñi ñu sii sa minoo tuhun ñi ra cu zeha Ndyoo.

19 Ta ihyá cuu cuenda cua tasi tuñi ra Ndyoo sii ñu vatyi i quisi ñúhu ñuu ñiyiví, zoco cuñi xaan ca ñiyiví sa ñaa, ta ña cuñi ñu sii ñúhu vatyi yaha xaan ña vaha cuu cuhva zavaha ñu.

20 Tandihi ñiyiví sa zavaha sa ña vaha, cuxaan xaan ñu ndyehe ñu ñúhu cuan, ta ña tuhva ñu sii si coto ndundisi cuhva ña vaha sa ndyicuu ñu ta cua ndoho ñu.

21 Zoco ñiyiví zavaha cuhva sasi tahan sihin sa ndisa, tuhva ñu sii ñúhu, vatyi tacuan ta cua coto inga ñiyiví vatyi ra Ndyoo tyindye sii ñu sihin cuhva vaha zavaha ñu.

Cahan tucu ra Juan sa cuenda ra Jesús

22 Ta sa i yaha cahan ra Jesús ta ziqui cuahan ra sihin ra i casi ra ndya nu cu si Judea, ta i ndoo ra zuhva quiví yucuan, ta i zacoo ndutuya ra sii ñiyiví.

23 Ta zuun ñi zacoo ndutuya tucu ra Juan ñuu Enón yatyi ñi ñuu Salim vatyi cuaha xaan ndutuya iyo yucuan. Ta cuaha xaan ñiyiví i quisi, ta sicoo ndutuya ñu.

24 Tacuan i cuu si vatyi tañaha ca cua tyihi ñiyiví sii ra Juan vehe caa.

25 Tacuan ta ziqui i quisaha natuhun tahan xaan ra cu tahan sihin ra Juan sihin minoo ra hebreo sa cuenda yozo caa nduvaha cuhva iyo ñiyiví.

26 Ta i sahan ñiyiví nu ndyaa ra Juan ta catyi ñu sihin ra: Maestro, ra sa sindyaa suhun inga siyo yutya Jordán, ra sa cahan xoon tuhun, vityi zacoo ndutuya ra, ta tandihí ñiyiví ndyico sii maa ra.

27 Ta i nacahan ra Juan ta catyi ra: Yoñi minoo yo ta cuu coo sa sii yo tatu yivi maa ra Ndyoo saha.

28 Zuun ñi maa ñdo cuu sa ndaa vatyi sa i catyi sihin ndo vatyi yivi ra Cristo cui. Minoo ra i tasi ra Ndyoo ityi nuu cui.

29 Vityi cua quehin minoo cuhva, cuhva iyo minoo vico tindaha. Ra cua tindaha cuan cuu ra sa cua quihin minoo ñaha. Ta amigo ra tindaha cuan, ndyaa ra yucuan. Tyizoho ra, ta cuzii xaan cuñi ra sihin cuhva cahan ra cua tindaha. Tacuan tucu mi vityi. Zii xaan cuñi.

30 Ra sa cahan ndo tuhun, cuñi si nducahnú ca ra, ta yuhvi cua nduluhlu que.

Ra i quisi ndya gloria

31 Ra i quisi ndya gloria, ra cahnu ca cuu ra ta ziqui tandihí inga ñiyivi. Ta ñiyivi ihya, cuenda ñuu ñiyivi ya cuu yo. Cahan yo cuhva iyo ñuu ñiyivi. Zoco ra i quisi ndya gloria ñiñi ca cuu maa ra ta ziqui tandihí ca yo.

32 Ta saha ra sa ndaa sa cuenda sa i ndyehe ra ta sa i siñi ra, zoco yoñi sino iñi sa catyi ra.

33 Zoco tatu iyo minoo ra sa sino iñi sa ndaa sa saha ra cuan, saha tucu maa ra sa ndaa vatyi cahan ra Ndyoo sa ndisa.

34 Vatyi ra i tasi ra Ndyoo, cahan ra Tuhun Ndyoo. Vatyi saha maa ra Ndyoo Tatyi li sii ra cuaha xaan.

35 Cuñi xaan ra Ndyoo Zutu yo sii Zehe ra, ta tandihí cuii ñaa sa iyo, saha maa ra Ndyoo sii si sii Zehe ra.

36 Ñiyivi sino iñi sii Zehe ra Ndyoo, cua cundito ñu tandihí cuii tyiemvu. Zoco ñiyivi ña sino iñi, ma cundito ñu sihin ra Ndyoo. Yaha xaan cua ndoho ñu cua zacuu ra Ndyoo.

4

Natuhun ra Jesús sihin minoo ñaha samaritana

1-3 I sito ra fariseo vatyi cuaha ca ñiyivi ndyico sii ra Jesús ta cuaha ca ñiyivi zacoo ndutya ra ta ziqui ra Juan. Vazu yivi ra Jesús zacoo ndutya sii ñu. Maa ra i casi ra zacoo ndutya sii ñu. Ta sa sito ra Jesús vatyi sa sito ra fariseo cuhva cuan, ta ziqui i quita ra Judea ta cua nuhu ra ndya Galilea.

4 Ta ityi cuhun ra, cua yaha ra nu cu si Samaria.

5 Yucuan cuenda saa ra minoo ñuu sa nañi Sicar. Cuenda Samaria cuu ñuu cuan, ta ndyaa si yatyi minoo ñuhu i saha ra Jacob sii ra José zehe ra ta tyiemvu.

6 Yucuan iyo zoco sa nañi zoco ra Jacob. Sitatu xaan ra Jesús vatyi sica ityi ra, ta yucuan cuenda sicundya ra yatyi ñi yuhu zoco cuan. Ta i cuu si maa ora.

7-8 Ta ra i casi ra Jesús, cuahan ra ndya ñuu vatyi cua zata ra zuhva sa casi ra. Tacuan ta ziqui i saa minoo ñaha nu ndyaa ra Jesús. Minoo ñaha samaritana cuu ña. Vasi quihin ña: Cuhva siin ndutya cohi.

9 Ta i nacahan ñaha samaritana cuan ta catyi ña: Ra hebreo cuun, ta yozo caa vatyi sicon ndutya sii, ta ñaha samaritana cui. Tacuan i catyi ña vatyi iyo tizihi ñiyivi hebreo sihin ñiyivi samaritana.

10 Tacuan ta ziqui i nacahan ra Jesús ta catyi ra: Tatú sa vatyi siton ñaa sa saha maa ra Ndyoo ta yoo ra sica ndutya suun, cua cacon sii, ta cua cuhve ndutya sa cunditon.

11 Ta ziqui i catyi ña sihin ra: Tata, ñahñi sa ndohon sa cua tavon ndutya ya, ta cono xaan ñoho ndutya ya. ¿Ta ndyamaa cua cuhun ndutya sa saha sa cundito ñiyivi ta cuhvon sii?

12 ¿Atu cahnu ca moo ta ziqui ra Jacob ra cu ñiyivi sahnu sii ndi? Ihya ndutya i sihi maa ra ta zehe ra ta quití zono ra, ta i zandoo ra ndutya ya sii ndi. Catyi ña.

13 Ta i catyi ra Jesús sihin ña: Tandihí ñiyivi sa cua coho ndutya ya, cua cu-ityi ñu inga saha.

14 Zoco ñiyivi sa cua coho ndutya sa cua cuhve, ma cu-ityi ca ñu numino saha. Vatyi ndutya sa cua cuhve, cua caña si sisi añima ñu, ta cua cuhva si sa cundito añima ñu sihin ra Ndyoo.

15 Tacuan ta ziqui i catyi ñaha cuan sihin ra: Tata, cuhvon ndutya

cuan sii vatyi ma cu-ityi que, ta ma quisi quihin que ndutya zoco ya.

¹⁶ Ta i catyi ra Jesús sihin ña: Cuanhan cua canon sii yïun ta quisi ndo.

¹⁷ Ta i nacahan ña ta catyi ña: Yoñi yïi iyo. Ta i catyi ra Jesús sihin ña: Ndison sa cohon vatyi yoñi yïun iyo.

¹⁸ Vatyi sa sicoo ohon tahan yïun. Ta ra sa ndyaa suhun vityi, yivi yïun cuu sii ra cuan sa ndisa. Ndisa sa cohon vatyi yoñi yïun iyo.

¹⁹ Tacuan ta i catyi ñaha cuan sihin ra: Tata, tuu ifií vatyi minoo ra cahan Tuhun Ndyoo cuun.

²⁰ I zacahnu ñiyiví sahnu sii nduhvi samaritana sii ra Ndyoo ihyá yucu ya, zoco ndoho ñiyiví hebreo catyi ndo vatyi Jerusalén cuu nu cuñi si zacahnu ñiyiví sii ra Ndyoo, catyi ña.

²¹ Ta i catyi ra Jesús sihin ña: Sino iñun sa quehin, maha, vatyi sa cua saa quivi ta cua zacahnu ndo sii ra Ndyoo Zutu yo, zoco yiví yucu ya ta yiví ndya Jerusalén.

²² Ndoho samaritana ña sito ndo ñaa sa zacahnu ndo, zoco nduhvi sito ndi yoo ra zacahnu ndi. Vatyi cuhva cacu yo vasi si sa cuenda ñiyiví hebreo.

²³ Zoco sa cua saa cuhva, ta vityi cuu si, ta ñiyiví sa zacahnu sii ra Ndyoo sa ndisa, cua zacahnu ñu sii ra sihin tandihí añima ñu ta sihin sa ndisa. Vatyi nanducu ra Ndyoo Zutu yo sii ñiyiví sa cua zacahnu sii ra cuhva cuan.

²⁴ Ndyoo cuu ra tatyi, ta ñiyiví zacahnu sii ra, cuñi si vatyi zacahnu ñu sii ra sihin cuhva saha Tatyi lì ra ta minoo sa ndisa. Tacuan catyi ra Jesús sihin ña.

²⁵ Ta ziqui i catyi ñaha cuan: Site vatyi cua quisi minoo ra sa cua zacacu sii yo, ta Cristo cua cunañi ra. Ta quivi cua quisi ra, cua nacatyi ra tandihí sihin yo, catyi ña.

²⁶ Ta i catyi ra Jesús sihin ña: Zuun yuhvi cui ra cahan suhun ya.

²⁷ Ta cuhva sa cahan ra Jesús ta i nasaa ra i casi ra, ta iyo xaan i cuñi ra ñaa cuenda natuhun xaan ra Jesús sihin minoo ñaha. Zoco numinoo ra, ta ñá cuñi ra nducu tuhun ñaa sa cuñi ña a ñaa tuhun cahan ra sihin ña.

²⁸ Ta ziqui i zandoo ñaha cuan quiyi ña, ta cuahan ña ndya ñuu, ta i nacatyi ña sihin ñiyivi:

²⁹ Coho ndo cua ndyehe yo sii minoo ra nacatyi sihin tandihí cuii sa zavehi. ¿Atu yiví ra Cristo cuu ra? Catyi ña.

³⁰ Tacuan ta ziqui i quita ñu ñuu cuan ta cuahan ñu ndya nu ndyaa ra Jesús.

³¹ Cuee ca sa saa ñiyiví yucuan ta i zañifíri ra i casi ra Jesús sii ra ta catyi ra: Maestro, casi zuhva.

³² Zoco i catyi ra Jesús sihin ra: Iyo sa sa sasi, zoco ña sito ndo.

³³ Tacuan ta ziqui i quisaha nducu tuhun tahan ra i casi ra sii tahan ra, ta catyi ra: ¿Atu iyo minoo ñiyiví sa quisi ndyaca sa sasi ra ya? Catyi ra.

³⁴ Zoco i catyi ra Jesús sihin ra: Sa saha tundyee iñi sii, cuu sa zavehi cuhva cuñi ra tasi sii, ta sa zandihí tyiño ra.

³⁵ Ma catyi ndo: “Cumañi cumi ca yoo, ta cua naquihin ñiyiví tyiño i zacuu ñu.” Vatyi yuhvi catyi: Ndyeha vaha ndo itu vatyi sa sisasi. Sa cuu zaquee ñiyiví sii si.

³⁶ Ta ra sa cua naquihin, cua coo yahvi ra. Ta sa cua naquihin ra, cuu cuenda tandihí cuii tyiemvu. Ma cunaa si. Vatyi ra tasi ta ra cua naquihin cua cuzii xaan iñi nduu tahan ra.

³⁷ Ta ihyá cuu minoo sa ndisa cuhva cahan ñiyiví: “Minoo ra tasi ta inga ra naquihin.”

³⁸ Tave tyiño sii ndo vatyi naquihin ndo nu ñá ndyehe ndo tun-doho. Inga ra zatyiño ta vityi nañihí maa ndo sa vaha nu zatyiño ra cuan. (Tacuan i catyi ra Jesús sihin ra i casi ra.)

39 Ta cuaha xaan ñiyivi ñuu Samaria i sino iñi ñu sii ra Jesús sa cuenda sa i nacatyi ñaha cuan vatyi i catyi ña: "I nacatyi ra sihin tandihí cuii sa i zavehi."

40 Yucuan cuenda zañiñi ñu sii ra Jesús vatyi ndoo ra sihin ñu. Ta i ndoo ra Jesús uu quivi yucuan.

41 Ta cuaha xaan ca ñu i sino iñi ñu sii ra Jesús sa cuenda tuhun i cahan ra sihin ñu.

42 Ta ziqui i catyi ñu sihin ñaha cuan: Vityi sino iñi ndi sii ra ta ña iin ñi sa cuenda tuhun i nacatyi moo, zoco vityi zuun ñi maa ndi siñi ndi sa cahan ra, ta sito ndi vatyi ndisa ra Cristo cuu ra, ra cua zacacu sii ñiyivi ñuu ñiyivi.

Zanduvaha ra Jesús sii zehe minoo ra ndyaca ñaha

43 I yaha uu quivi, ta i quita ra Jesús yucuan ta cuahan ra ndya nu cu si Galilea.

44 Vatyi sa catyi maa ra vatyi minoo ra cahan Tuhun Ndyoo, ña tyaa ñiyivi yahvi sii ra ñuu ra.

45 Ta sa i saa ra Jesús ndya Galilea, ta yucuan zii xaan i cuñi ñiyivi sihin ra vatyi sa i sahan ñu vico zuhun ñuu Jerusalén ta i ndyehe ñu tandihí sa i zavaha ra Jesús yucuan.

46 Tacuan ta ziqui i naquita tucu ra Jesús ndya ñuu Caná sa ndyaca ñaha Galilea nu i zanduu ra vino sii ndutya quivi cuan. Ta yucuan iyo minoo ra ñuu Capernaum. Cahnú xaan tyiño ndyizo ra cuenda ra cu rey. Ta cuhu xaan zehe ra ndya ñuu ra.

47 Ta sa sito ra cuan vatyi sa i quita ra Jesús Judea ta nasaa ra Galilea, i sahan ra nu ndyaa ra sa cua cahan ra sihin ra vatyi cuhun ra ndya vehe ra ta zanduvaha ra sii zehe ra vatyi sa cuñi cuu ra.

48 Tacuan ta i catyi ra Jesús sihin ra: Tatú ma ndyehe ndo zeña ta sa ndyityi, ma sino iñi ndo sii.

49 Zoco i catyi ra ndyizo tyiño cuan sihin ra: Tata, coho vityi vityi fi cuee ca sa cuu zehi.

50 Ta i catyi ra Jesús sihin ra: Cuahan ndya vehun. Sa nduvaha zehun. Tacuan ta i sino iñi ra sa catyi ra Jesús, ta i quihin ra ityi cuahan ra.

51 Ta ityi cuahan ra ta i ñihi tahan muzu ra sihin ra ta catyi ra: Ñá sihi zehun.

52 Tacuan ta ziqui i nducu tuhun ra: ¿Ñaa cuhva i quisaha nduvaha zehi? Ta i catyi muzu cuan: Icu, cuhva caa iin sa yaha ora i quita cahñi cuan.

53 Tacuan ta i sito ra vatyi i cuu si zuun ñi cuhva sa i catyi ra Jesús sihin ra: "Sa nduvaha zehun." Ta i sino iñi ra cuan sii ra Jesús sihin tandihí ñiyivi sii ra.

54 Ta ihya cuu sa cu uu sa ndyityi i zavaha ra Jesús sa quita ra Judea ta nasaa ra Galilea.

5

Zanduvaha ra Jesús sii minoo ra xii nu iyo minoo pila sa nañi Betesda

1 Ta sa yaha cuan ta ziqui i cuu si minoo quivi sa zacahnu ñiyivi hebreo minoo vico, ta cuahan ra Jesús ndya ñuu Jerusalén.

2 Ta ñuu Jerusalén iyo minoo pila sa nañi Betesda sihin zahan hebreo. Iyo ohon tahan yuvehe nu cuu quihvi ñiyivi ndya nu ndyaa si. Ndya yuñuu iyo pila cuan yatyi minoo yuhu nuzama sa nañi: Nu Quihvi Mvee Ticatyi.

3 Ta yatyi ñi yu pila cuan candyaa cuaha xaan ñiyivi cuhu, tañi: ñu cuua, ta ñu coxo, ta ñu xii. Ndatu ñu sa cua canda ndutya sisi pila cuan.

4 Vatyi iyo saha, noo minoo ángel ndya pila cuan ta zacanda si ndutya, ta ziqui yoo ra cua quihvi si ndutya cuan sa xihna ñi, yucuan cuu ra cua nduvaha, ñaa ndihí cuii ca cuehe cuhu ra.

5 Ta yucuan ndyaa minoo ra sa oco sahun uñi cuiya sa cuhu ra.

⁶ Ta i ndyehe ra Jesús sii ra candardyaa ra yucuan, ta i nacoto ra vatyisa naha xaan tahan ra tacuan, ta i nducu tuhun ra sii ra: ¿Atu cuñun nduvohon? catyi ra.

⁷ I nacahan ra cuhu cuan ta catyi ra: Tata, yoñi sa cua tyihi sii sisi ndutya ya cuhva sa canda si. Tandihi saha cuñi quihvi, zoco quihvi inga ra sa xihna ñi.

⁸ Tacuan ta i catyi ra Jesús sihin ra: Nduviton; natuun yuun ta cacon.

⁹ Ta zuun ñi caa cuhva cuan ndaha nduvaha ñi ra, ta i natuu rayuu ra ta quisaha sica ra. Ta quivi cuan, minoo quivi quitatu ñiyivi cuu si.

¹⁰ Yucuan cuenda i catyi ñiyivi hebreo sihin ra nduvaha cuan: Vityi cuu quivi quitatu yo. Ña tahan si cuizon yuun.

¹¹ Ta i nacahan ra sa nduvaha cuan ta catyi ra: Ra zanduvaha sii, i catyi ra: "Nacuhun yuun ta cacon."

¹² Tacuan ta ziqui i nducu tuhun ñiyivi sii ra sa nduvaha cuan ta catyi ñu: ¿Ta yoo ra cuu ra sa i catyi suhun vatyi nacuhun yuun ta cacon?

¹³ Zoco ña sito ra sa nduvaha cuan yoo ra zanduvaha sii ra vatyisa quihvi ra Jesús ticui ñiyivi, ta cuaha xaan ñiyivi yucu yucuan.

¹⁴ Ta cuee ca i nañhi ra Jesús sii ra sisi vehe ñuhu, ta i catyi ra sihin ra: Ndyeha vityi vatyi sa nduvohon. Ma zavaha con cuaty, coto quasi inga tundoho cahnu ca zicun.

¹⁵ Tacuan ta ziqui cuahan ra cuan, ta i nacaty i ra sihin ñiyivi hebreo vatyi ra Jesús cuu ra i zanduvaha sii ra.

¹⁶ Ta yucuan cuenda i cuxaan xaan ñiyivi hebreo sihin ra Jesús ta i cuñi cahñi ñu sii ra vatyi i zavaha ra cuhva cuan quivi quitatu ñiyivi.

¹⁷ Zoco i catyi ra Jesús sihin ñu: Tandihi tyiemvu zatyiño ra Ndyoo Zuti, ta yuhvi zatyiño tuqui. Catyi ra.

¹⁸ Ta yucuan cuenda cuñi xaan ca ñiyivi hebreo sa cahñi ñu sii ra

Jesús vatyi ña tyaa ra yahvi ley sa cuenda quivi quitatu ñiyivi, ta catyi tucu ra vatyi ra Ndyoo cuu Zetu ra ta zacuu ra sa iin ñi ra cuu ra sihin ra Ndyoo.

Iyo xaan cuhva sii Zehe ra Ndyoo

¹⁹ Tacuan ta ziqui i catyi ra Jesús: Sa ndisa catyi sihin ndo vatyi ñahñi sa cuu zavaha ra cu Zehe ra Ndyoo sa maa ñi maa ra. Zavaha ra cuhva sa ndyehe ra vatyi zavaha Zetu ra, vatyi tandihi cuhva zavaha ra Ndyoo Zetu ra, ta tacuan tucu zavaha Zehe ra.

²⁰ Cuñi xaan ra Ndyoo Zetu yo sii Zehe ra, ta zañaha ra sii ra tandihi cuii sa zavaha maa ra. Ta cua zañaha tucu ra inga cuhva cahnu ca sii Zehe ra, tacuan ta iyo xaan cua cuñi ndo.

²¹ Vatyi tañi tuhva ra Ndyoo Zetu yo zanandoto sii ñiyivi i sihi ta saha ra sa cundito ñu, ta tacuan tucu Zehe ra, saha ra sa cundito yoo ñiyivi cuñi ra.

²² Ta Ndyoo Zetu yo, ña tyicuhva ra sii ñiyivi. Saha ra tandihi cuhva cuan sii Zehe ra sa tyicuhva ra sii ñiyivi.

²³ Tacuan i zavaha ra Ndyoo vatyi cuñi ra sa cua zacahnu ñiyivi sii Zehe ra tañi zacahnu ñu sii ra Ndyoo Zetu ra. Ñiyivi ña zacahnu sii Zehe ra Ndyoo, ña zacahnu tucu ñu sii Zetu ra vatyi maa ra i tasi sii ra.

²⁴ Sa ndisa catyi sihin ndo: Ra sa siñi sa quehin ta sino iñi ra sii ra i tasi sii, cua cundito ra tandihi cuii tyiemvu. Ma tasi tuñi ca ra Ndyoo sii ra. Ma cuu cuii añima ra, cua cundito ra tandihi cuii tyiemvu.

²⁵ Sa ndisa catyi sihin ndo vatyi sa cua saa cuhva, ta vityi cuu si, ta iyo ñiyivi tañi sa sihi ñu sa cuenda cuaty ñu zoco cua cuiñi ñu sa cahan Zehe ra Ndyoo. Ta ñiyivi tyaa yahvi, cua cundito ñu tandihi cuii tyiemvu sihin ra Ndyoo.

²⁶ Vatyi iyo cuhva sii Ndyoo Zuti sa cuhva ra sa cundito ñiyivi tandihi cuii tyiemvu. Ta tacuan

tucu i saha ra sii Zehe ra sa cuhva
ra sa cundito ñiyivi.

²⁷ Ta i saha tucu ra Ndyoo cuhva
sii Zehe ra vatyi zandaa ra tyiño
cuenda ñiyivi vatyi ra i quisi ndya
gloria cuu ra.

²⁸ Ma iyo xaan cuñi ndo vatyi
quehin tuhun ya vatyi cua saa
cuhva ta tandihí ñiyivi i sihi cua
cuñi fiu sa cahan Zehe ra Ndyoo.

²⁹ Ta cua quita ñu sisi ñaña. Ñiyivi
i zavaha sa vaha, cua nandoto ñu ta
cua cundito ñu. Zoco ñiyivi i zavaha
sa ña vaha, cua nandoto ñu ta cua
ndoho ñu.

*Cuhva cuu coto yo vatyi cuu za-
cuu ra Jesús tandihí*

³⁰ (Cahan ca ra Jesús ta catyi ra:) Ñahñi sa cuu zavehi sa maa ñi mi. Cuhva catyi maa ra Ndyoo sihin, ta tacuan zandei tyiño cuenda ñiyivi. Ta ndoo xaan cuu cuhva zandei tyiño vatyi ña nduqui cuhva zavehi cuhva cuñi mi, zoco zavehi cuhva cuñi ra i tasi sii.

³¹ Tatu zuun ñi mi saha sa ndaa
sa cuende, ña sito ñiyivi tatu quehin
sa ndisa.

³² Zoco iyo inga ra saha sa ndaa
sa cuende, ta site vatyi ndisa cuu sa
ndaa sa saha ra sa cuende.

³³ I tasi ndo tyiño, ta i nducu
tuhun ndo sii ra Juan. Ta cuhva i
catyi maa ra, sa ndisa cuu si.

³⁴ Zoco ña siñi ñuhu sa cuhva
ñiyivi sa ndaa sa cuende. Zoco catyi
cuhva ya vatyi cuñi sa cua cacu
ndo.

³⁵ I cuu ra Juan tañi minoo
lámpara. Cayu si ta zandisi si. Ta zii
xaan i cuñi ndo zuhva quivi sihin
ñúhu i saha maa ra.

³⁶ Zoco iyo minoo sa ndaa sii.
Ñiñi ca si ta ziqui sa ndaa sa saha
ra Juan. Zuun ñi cuhva zavehi cuu
sa ndaa. Ta zañaha si vatyi i tasi ra
Ndyoo Zuti sii, sa ndisa. Ta maa ra
cuu ra i catyi vatyi zavehi cuhva ya
ta zandehi sii si.

³⁷ Ta ra Ndyoo Zuti, ra i tasi
sii, cahan tucu ra sa cuenda mi.

Tañaha ca cuñi ndo sa cahan ra a
ndyehe ndo sii ra.

³⁸ Ta ñahñi tuhun ra iyo añima
ndo vatyi ña sino iñi ndo sii ra i
zaquisi ra.

³⁹ Nanducu xaan ndo sisi tutu
Tuhun Ndyoo vatyi sica iñi ndo
vatyi yucuan cua nañihí ndo cuhva
cacu añima ndo ta ma cuu cuii ndo.
Ta zuun ñi yucuan cuu nu saha si
sa ndaa sa cuende.

⁴⁰ Zoco ña cuñi ndo sino iñi ndo
sii ta ñihí ndo sa cundito ndo.

⁴¹ Ña sica xaan iñi tatu tahan iñi
ñiyivi sii a ña tahan iñi ñu.

⁴² Zoco sa site sii ndo, ta site vatyi
ña cuñi ndo sii ra Ndyoo.

⁴³ Vasi sa cuenda ra Ndyoo Zuti,
ta ña sino iñi ndo sii. Zoco tatu cua
quisi inga ra sa cuenda sa zuun ñi
maa ra, sii maa ra cuan cua sino iñi
ndo.

⁴⁴ ¿Yozo caa cuu sino iñi ndo?
Ma cuu vatyi saha ndo sa zacahnu
ñiyivi sii ndo ta zacahnu ndo sii ñu.
Ta sii sa minoo ñi ra cuu Ndyoo, ña
nanducu ndo cuhva cuzii iñi maa
ra sihin ndo.

⁴⁵ Ma caca iñi ndo vatyi yuhvi
cua tyei cuatyi sata ndo nuu ra
Ndyoo Zuti. Iyo minoo ra sa tyaa
cuatyi sata ndo. Zuun ñi maa ra
Moisés cuu ra. Ta nii xaan iñi ndo
vatyi maa ra cua zacacu sii ndo.

⁴⁶ Zoco tatu sa i sino iñi ndo sa
ndisa cuhva cahan ra Moisés, ta
vityi cua sino iñi ndo sii, vatyi i tyaa
ra Moisés sa cuende.

⁴⁷ Zoco tatu ña sino iñi ndo sa i
tyaarra, zuun ñi cuhva cuan ma cuu
sino iñi ndo sa quehin. (Catyi ra
Jesús sihin ñiyivi hebreo cuan.)

6

*Saha maa ra Jesús sa casi ohon
mil rayii*

¹ Ta sa ndihí cahan ra Jesús tuhun
cuan, ta ziqui cuahan ra ndya inga
siyo miñi cahnu sa nañi Galilea. Ta
inga zivi si cuu Tiberias.

² Ta cuaha xaan ñiyivi ndyico sii
ra vatyi i ndyehe ñu sa ndyityi i

zavaha ra sihin ñiyivi cuhu nu i zanduyaha ra sii ñu.

³ Ta i ndaa ra Jesús minoo yucu, ta yucuan i sicundyaa ra sihin ra i casi ra.

⁴ Ta sa cuñi tahan si quivi coo minoo vico cuenda ñiyivi hebreo.

⁵ Ta nandyehe ra Jesús vatyi cuaha xaan ñiyivi ndyico sii ra, ta i catyi ra sihin ra Felipe: ¿Ndyamaa cua zata yo sa casi ñiyivi ya?

⁶ Tacuan i catyi ra vatyi cuñi ra ndyeyehe ra ñaa sa cua catyi ra Felipe vatyi sa sito ra Jesús ñaa sa cua zayaha ra.

⁷ Tacuan ta i catyi ra Felipe sihin ra: Vazu uñi mil peso pan, zoco ma ñihi si casi ñiyivi zuhva zuhva ñi.

⁸ Ta ra Andrés, minoo ra i casi ra Jesús cuu ra ta yañi ra Simón Pedro, ta maa ra Andrés cuan i catyi:

⁹ Iyo minoo ra luhlu ihya; ndyizo ra ohon tahan pan ta uu tahan tyiyaca. Zoco ñahñi ñi cuu si cuan nuu sa cuaha xaan ñiyivi ya.

¹⁰ Tacuan ta ziqui i catyi ra Jesús: Catyi ndo sihin ñiyivi vatyi ncundyaa ñu. Catyi ra. Ta iyo cuaha cuhu yucuan, ta i sicundyaa ñiyivi tañi ohon mil sa maa ñi rayii (ta ziqui ca ñu zihí ta sa ndyihí).

¹¹ Tacuan ta i quihin ra Jesús pan cuan, ta sa yaha saha ra tyahvi ndyoo sii ra Ndyoo ta ziqui i saha ra sii si sii ra i casi ra. Ta i zasa ra cuan sii si sii ñiyivi yucu yucuan. Ta tacuan tucu i zavaha ra sihin tyiyaca cuan. I saha ra ndya cuhva ndya sa ndaha iñi ñu.

¹² Ta sa ndaha iñi ñu ta catyi ra Jesús sihin ra i casi ra: Naquihin ndo sa nandoo, ta tacuan ta ñahñi si cua tivi.

¹³ Tacuan ta i naquihin ra sii si, ta i zacutu ra usi uu tahan tyica sihin yiqui pan cuan sa nandoo ta sa ndihí sasi ñiyivi.

¹⁴ Ta sa ndyeyehe ñiyivi cuan sa ndyityi i zavaha ra Jesús, i catyi ñu: Ndisa cuii vatyi ihya ra cuu ra sa ndyaa tyiño sa quisí ra ñuu ñiyivi ta cahan ra Tuhun Ndyoo. Catyi ñu.

¹⁵ Ta i tuu iñi ra Jesús vatyi cuñi ñu quisí tiñi ñu sii ra ta zañiñi ñu sii ra vatyi cuu ra minoo rey, ta sa sito ra cuhva cuan i quita ra yucuan ta cuahan ra minoo yucu maa ñi maa ra.

Sica ra Jesús nu ndutya

¹⁶ Ta sa cuaa cuan cuahan ra i casi ra Jesús ndya yuhu miñi cuan.

¹⁷ Ta i quihví ra minoo barco, ta i quisaha yaha zava ra miñi cuan vatyi cuñi ra cuhun ra ñuu Caper-naum. Ta sa cuaa cuu si cuhva cuan, ta tañaha ca nasaa ra Jesús.

¹⁸ Ta ñihi xaan i quisaha canda ndutya vatyi ñihi xaan ñoho tatyí.

¹⁹ Ta cuhva sa i yaha ra tañi minoo ohon a iñu kilómetro, tacuan ta ziqui i ndyeyehe ra sii ra Jesús. Sica ra nu ndutya, ta tuhva ra sii barco cuan. Ta i yuhu xaan ra i casi ra.

²⁰ Zoco i catyi ra Jesús: Zuun yuhvi cui. Ma yuhu ndo.

²¹ Tacuan ta ziqui i cuñi xaan ra i casi ra vatyi naquihví ra Jesús sisi barco. Ta sa i quihví ra, ta yatyí cuii ñi i saa tu nu cuahan ra.

Nanducu ñiyivi sii ra Jesús

²² Cundisi inga quivi ta i sito ñiyivi sa nandoo inga siyo miñi cuan vatyi sa cuahan ra i casi ra Jesús sihin sa minoo barco sa sindyaa yucuan, ta ña cuahan ra Jesús sihin ra.

²³ Zoco cuhva cuan ta i saa inga ca barco, yutu i quita ñuu cahnu Tiberias. I saa tu yatyí ñi nu i sasi ñiyivi pan sa yaha saha ra Jesús tyahvi ndyoo sii ra Ndyoo.

²⁴ Tacuan ta sa ndyeyehe ñiyivi vatyi yoñi ra Jesús yucuan ta nu ra i casi ra, tacuan ta ziqui i quihví ñu sisi barco sa i saa cuan, ta cuahan ñu ndya ñuu Capernaum cua nanducu ñu sii ra Jesús.

Ra Jesús cuu pan sa saha sa cundito ñiyivi

²⁵ Ta sa i saa ñiyivi inga siyo miñi cuan, i nañihi ñu sii ra Jesús ta

nducu tuhun ñu: Maestro, ¿ama i soon ihya? Catyi ñu.

26 Ta i catyi ra Jesús sihin ñu: Sa ndisa catyi sihin ndo, nanducu ndo sii vatyi i sasi ndo, ta ndaha iñi ndo. Yívi sa cuenda vatyi i cutuñi iñi ndo sa ndyityi i zavehi.

27 Ma zatyño ndo maa ñi sa cuenda ndyayu sa cua casi ndo vatyi cunaa si cuan. Vaha ca zatyño ndo sa cuenda ndyayu sa cua coo tandihí tyiemvu, ndyayu sa cua cuhva sa condito ndo tandihí tyiemvu. Ihya ndyayu cua cuhva ra i quisi ndya gloria vatyi maa ra Ndyoo Zutu yo saha cuhva cuan sii ra sa cuhva ra. (Tacuan i catyi ra Jesús.)

28 Tacuan ta i nducu tuhun ñiyivi sii ra: ¿Ñaa sa cuñi si zavaha ndi ta cua zavaha ndi tandihí cui cuhva cuñi ra Ndyoo? Catyi ñu.

29 Ta i nacahan ra Jesús ta catyi ra sihin ñu: Ihya cuu sa cuñi ra Ndyoo zavaha ndo. Sino iñi ndo sii ra i tasi ra.

30 Tacuan ta ziqui i nducu tuhun ñu sii ra: ¿Ñaa zeña cua zañohon sii ndi ta ndyehe ndi ta sino iñi ndi suun? ¿Ñaa sa cua zavohon?

31 Ñiyivi sahnu sii ndi ta sa naha, i sasi ñu maná sisi cuhu tañi catyi tutu ra Ndyoo: “Saha maa ra Ndyoo pan sa quisi ndya ityi ziqui vatyi casi ñu.”

32 Tacuan ta i catyi ra Jesús sihin ñu: Sa ndisa catyi sihin ndo vatyi yivi ra Moisés saha pan sa quisi ndya ityi ziqui. Ra Ndyoo Zuti cuu ra saha pan sa cuu pan sa quita ityi ziqui sa ndisa cuii.

33 Vatyi pan sa saha maa ra Ndyoo cuu ra i quita ndya andivi ta saha ra sa condito ñiyivi ñuu ñiyivi.

34 Tacuan ta i catyi ñiyivi sihin ra: Tata, cuhva pan cuan sii ndi tandihí cui tyiemvu.

35 Ta i catyi ra Jesús sihin ñu: Yuhvi cui pan sa saha sa condito

ñiyivi. Ñiyivi cua sino iñi sii, ma cuzoco ca ñu ndaha ñi. Ta ma cu-ityi ca ñu numinoo saha.

36 Zoco tañi sa catyi sihin ndo vatyi vazu sa ndyehe ndo sii, zoco ña sino iñi ndo sii.

37 Tandihi ñiyivi sa saha ra Ndyoo Zuti sii, cua sino iñi ñu sii. Ta ñu sino iñi sii, ma tave sii ñu ityi sata.

38 Vatyi ña quite ndya gloria sa zavehi cuhva cuñi mi, zoco vasi vatyi cua zavehi cuhva cuñi ra i tasi sii.

39 Ta ihya cuu sa cuñi ra i tasi sii vatyi ma zacunei numinoo ñiyivi sa i saha ra sii. Zoco cua zanandote sii tandihí ñu quivi cua tyicuhva ra Ndyoo sii ñiyivi.

40 Cuhva cuñi ra Ndyoo Zuti cuu, tandihí ñiyivi sa ndyehe sii Zehe ra ta sino iñi ñu sii ra, cua condito ñu tandihí tyiemvu. Ta cua zanandote sii ñu quivi cua tyicuhva ra Ndyoo sii ñiyivi. Tacuan i catyi ra Jesús.

41 Ta sa ndihí cahan ra tacuan, ta ziqui i quisaha natuhun xaan ra hebreo vatyi catyi ra Jesús: “Yuhvi cui pan sa i quita ndya andivi.”

42 Ta i catyi ñu: ¿Atu yivi ra Jesús cuu ra ya, zehe ra José? Sito yo sii zutu ra ta sii zihí ra. ¿Ñacu catyi ra vatyi ra i quita ndya andivi cuu ra?

43 Tacuan ta i catyi ra Jesús: Ma natuhun tahan xaan ndo.

44 Yoñi sa cuu sino iñi sii tatu ma tyindyee ra Ndyoo Zutu yo sii ra cuan. Ra Ndyoo i tasi sii. Ta cua zanandote sii ñiyivi cuan quivi cua tyicuhva ra Ndyoo sii ñiyivi.

45 Sisi libro i tyaa ra profeta catyi si tyehen: “Cua zacuaha ra Ndyoo sii tandihí ñu.” Catyi si. Tacuan cu si, ta tandihí ñiyivi sa siñi ta cutuhva ñu sa zacuaha ra Ndyoo Zutu yo, cua sino iñi ñu sii.

46 Yoñi numinoo ñiyivi sa ndyehe sii ra Ndyoo Zutu yo. Minoo tuhun ñi ra i ndyehe cuu ra i quita ndya nu ndyaa ra Ndyoo.

47 Sa ndisa catyi sihin ndo vatyi ra sa sino iñi sii, sa ñihi ra sa condito ra tandihí tyiemvu.

48 Yuhvi cui pan sa saha sa cundito ñiyivi.

49 I sasi ñiyivi sahnu sii ndo maná sisi cuhu, zoco sihi ñu.

50 Ta quehin tuhun pan sa quisí ndya andivi vatyi cua casi ñiyivi sii si, ta ma cuu ñu.

51 Ta yuhvi cui pan ndito sa i quita ndya andivi. Ta ñiyivi sa cua casi pan ya, cua cundito ñu tandihí cuiti tyiemvu. Ta pan sa cua cuhve cuu coño ñuhi. Cua cuhve sii si vatyi tacuan ta cua cundito ñiyivi sihin ra Ndyoo.

52 Tacuan i catyi ra Jesús, ta ziqui i quisaha natuhun tahan xaan ra hebreo sihin tahan ra ta catyi ra: ¿Yozo caa cuu cuhva ra ya coño ñuhi ra casi yo?

53 Tacuan ta i catyi ra Jesús sihin ra: Sa ndisa catyi sihin ndo vatyi tatu ma casi ndo coño ñuhi ra i quisí ndya gloria ta coho ndo niñi ra, ma cundito añima ndo.

54 Ñiyivi sa cua casi coño ñuhi ta coho ñu niñi, cua cundito añima ñu, ta cua zanandote sii ñu quirivi cua tyicuhva ra Ndyoo sii ñiyivi.

55 Vatyi coño ñuhi cuu sa ndisa ndyayu, ta niñi cuu sa ndisa sa coho ñiyivi.

56 Ñiyivi sa cua casi coño ñuhi ta coho ñu niñi, iin ñi cua cuu ñu sihin, ta iin ñi cua cui sihin ñu.

57 Tañi sa tasi ra Ndyoo ndito sii ta ndite sa cuenda ra, ta zuun ñi cuhva, ñiyivi sa cua casi coño ñuhi, cua cundito añima ñu sa cuenda mi.

58 Ta ihya cuu pan sa i quita andivi. Na iyo si tañi maná sa sasi ñiyivi sahnu sii ndo ta sihi ñu; vatyi ñiyivi cua casi pan sa quehin tuhun, cua cundito ñu tandihí cuiti tyiemvu sihin ra Ndyoo.

59 I zacuaha ra Jesús cuhva ya nu titahan ñiyivi sisi vehe ñuhi ñuu Capernaum.

Ihya tuhun saha si cuhva coto yo yozo caa cundito yo tandihí cuiti tyiemvu

60 Ta sa i siñi ñiyivi ndyico sii ra Jesús cuhva cahan ra ta cuaha xaan ñu catyi ñu: Yii xaan cuhva cahan ra. Yoñi sa cuu cutuñi iñi sa cahan ra. Catyi ñu.

61 Zoco i tuu iñi ra Jesús cuhva natuhun tahan xaan ñu ndyico sii ra sa cuenda cuhva i cahan ra, ta i catyi ra sihin ñu: ¿Atu ña tahan iñi ndo tuhun cuan?

62 ¿Ta yozo caa tatu ndyehe ndo sii ra i quita ndya gloria nandaa tucu ra ndya nu i quita ra? ¿Ñaa sa cua caca iñi ndo?

63 Tatyi li cuu sa saha sa cundito añima ñiyivi. Ñahñi tyindye coño ñuhi ñu. Tuhun quehin sihin ndo cuu sa cuenda añima ndo, ta saha si sa cundito añima ndo.

64 Zoco iyo zuhva ndo sa ña sino iñi ndo. Tacuan catyi ra Jesús vatyi sa sito ra ndya sa xihna ñi yoo ñu cuu ñu sa ña sino iñi ta yoo ra cua xico tuhun sii ra.

65 Ta i catyi ra: Yucuan cuenda catyi vatyi yoñi numinoo ndo ta cuu sino iñi ndo sii tatu ma cuhva ra Ndyoo Zuti cuhva cuan sii ndo.

66 Ta sa ndihi cahan ra Jesús cuhva cuan, ta cuaha ñiyivi ndyico sii ra, i zandoo ñu sii ra ta ñá sindyico ca ñu sii ra.

67 Tacuan ta ziqui i catyi ra Jesús sihin sa usi uu tahan ra i casi ra: ¿Atu cua cuhun ndihi tucu ndoho?

68 Ta i nacahan ra Simón Pedro ta catyi ra: Tata, ¿Yoo sihin cuhun ndi? Moo cuu ra nacatyi sihin ndi yozo caa cua ñihi ndi sa cundito ndi tandihí tyiemvu.

69 Ta sa sino iñi maa ndi ta nacoto vaha ndi vatyi yoho cuu ra Cristo, zehe ra Ndyoo ndito.

70 Ta i nacahan ra Jesús ta catyi ra: I casi sii ndo sa usi uu tahan ndo, ta minoo ndo cuu minoo cuihna. Catyi ra.

71 I cahan ra Jesús cuhva ya sa cuenda ra Judas Iscariote zehe ra Simón vatyi maa ra cuu ra cua xico tuhun sii ra. Ta minoo sa usi uu tahan ra i casi ra cuu ra.

7

Ñá sino iñi yañi ra Jesús sii ra

1 Ta sa yaha cuhva cuan ta i sica noo ra Jesús nu cu si Galilea. Ña cuñi ca ra caca noo nu cu si Judea vatyi cuñi cahñi ra hebreo sii ra.

2 Ta sa cuñi tahan si quívi zacahnu ñiyivi hebreo minoo vico nu zavaha ñu vehe tyiyahva.

3 Ta i catyi yañi ra Jesús sihin ra: Quiton ihyá ta cuhun ndya Judea vatyi tacuan ta cua ndyehe ñiyivi sino iñi suun ityi cuan tysiño zavohon.

4 Vatyi tatu cuñi minoo ra sa cua coto ñiyivi sii ra, ñahñi sa xehe zavaha ra. Tatu zavohon cuhva ya, zavohon sii si nuu tandihí ñiyivi.

5 Tacuan catyi yañi ra vatyi nu yañi ra ta ñá sino iñi ra sii ra.

6 Tacuan ta ziquí i catyi ra Jesús sihin ra: Ta saa ca quívi, zoco sa cuenda maa ndo ta cuu ndya vaha ñi maa quívi.

7 Ma cuu cuxaan ñiyivi sihin maa ndo, zoco cuxaan xaán ñu sihin mi vatyi nacatyi sa ña vaha sa zavaha ñu.

8 Cuahan maa ndo vico. Ma cuhin vityi vatyi ta saa ca cuhva cuhin.

9 Tacuan i cahan ra Jesús sihin ra, ta i ndoo ra Galilea.

Cuahan ra Jesús vico nu sino vehe tyiyahva

10 Ta sa cuahan yañi ra, ta ziquí cuahan tucu ra Jesús, zoco ña cuahan ndisi ra. Cuahan xehe ñi ra.

11 Ta i nanducu ra ndyaca ñaha sii ñiyivi hebreo sii ra vico cuan, ta catyi ra: ¿Ndyamaa iyo ra cuan?

12 Ta natuhun tahan xaán tandihí ñiyivi sa cuenda ra. Iyo ñu catyi ñu: "Vaha ñiyivi cuu ra." Ta inga ñu catyi: "Ña vaha ra. Zandavi ñaha xaán ra sii ñiyivi." Catyi ñu.

13 Zoco xehe ñi cahan ñiyivi sa cuenda ra vatyi yuhu ñu sii ra ndyaca ñaha hebreo.

14 Ta sa yaha zava vico cuan, ta ziquí i quihví ra Jesús vehe

ñuhu cahnu cuenda ñu hebreo ta quisaha zacuaha ra.

15 Ta iyo xaan i cuñi ra hebreo ta catyi ra: ¿Yozo caa sito xaan ra ya ta ñá sahan ra zicuela?

16 I nacahan ra Jesús ta catyi ra: Cuhva zacuehi, yivi sa cuenda ñi mi cuu. Cuenda ra i tasi sii cuu si.

17 Tatu cuñi minoo ndo zavaha ndo cuhva cuñi ra Ndyoo, cua coto ndo tatu cuhva zacuehi cuu sii ra Ndyoo a sa cuenda ñi mi.

18 Tatu cahan minoo ñiyivi cuhva sa sica ñi iñi maa ra, cuñi ra cuan vatyi zacahnu ñiyivi sii ra. Zoco ra cuñi vatyi zacahnu ñiyivi sii ra i zaquisi sii ra, cahan ra cuan sa ndisa ta ñahñi cuatyi ra.

19 I saha ra Moisés ley sii ndo, zoco numinoo ndo ta ña cuñi ndo tyaa ndo yahví sii si. ¿Ta ñaa cuenda cuñi ndo cahñi ndo sii?

20 Ta i nacahan ñiyivi ta catyi ñu: Iyo minoo tatyi ña vaha suun. Yoñi sa cuñi cahñi suun.

21 I nacahan ra Jesús ta catyi ra sihin ñu: I zavehi minoo sa ndyityi quívi quitatu yo, ta iyo xaan cuñi tandihí ndo.

22 I saha ra Moisés minoo ley sa tahndya ñii xiñi xuu lee. Zoco yivi ra Moisés i quisaha sihin si. Zutu sahnu yo i quisaha sihin si ndya tyiemu. Yucuan cuenda sahndya ndo ñii xiñi xuu lee vazu quívi quitatu yo cuu.

23 Ta tatu sa cuenda sa ma cumañi ley ra Moisés ta tahndya ñii xiñi xuu lee vazu quívi quitatu yo cuu, ¿ñaa cuenda cuxaan ndo sii vatyi ndaha zanduvehi sii minoo ra quívi quitatu yo?

24 Ma tyaa ndo cuatyi sata ñiyivi tatu ña sito vaha ndo ñaa sa zavaha ñu. Cuatu ndo ndya ndyehe vaha ndo ta ziquí cahan ndo.

Cuñi ñiyivi coto ñu yoo ra cuu ra Jesús

25 Tacuan ta ziquí i quisaha nanducu tuhun zuhva ñiyivi ñuu Jerusalén ta catyi ñu: ¿Atu yivi ra ihyá cuu ra sa cuñi cahñi ñiyivi?

²⁶ Zoco ndyehe ndo yucuan, cahan ra nuu ñiyivi, ta ñiahñi catyi ñu. ¿Atu sa sino iñi ra cu tyiño vatyi ra Cristo cuu ra?

²⁷ Zoco sito yo sii ra ya, ta sito yo ndyamaa i quisi ra. Ta quivi cua quisi ra Cristo, yoñi cua coto ndyamaa cua quisi ra.

²⁸ Ta sito ra Jesús sa cahan ñu cuhva zacuaha ra sisi vehe ñuhu cahnu, ta saa xaan cahan ra ta catyi ra: Sito ndo sii, catyi ndo ta sito ndo ndya ityi i quisi, zoco ña vasi sa cuenda ñi mi. Iyo minoo ra tasi sii. Ra vaha xaan cuu ra, ta ña sito ndo sii ra.

²⁹ Yuhvi site sii ra vatyi sa cuenda maa ra vasi, ta maa ra i tasi sii.

³⁰ Tacuan ta i cuñi ra tiin ra sii ra Jesús, zoco yoñi tyihi ndaha sii ra vatyi ta saa ca cuhva cua tahan si sii ra.

³¹ Zoco cuaha ñiyivi sa yucu yucan sino iñi ñu sii ra vatyi ra Cristo cuu ra, ta catyi ñu: Ma cuu zavaha inga ra cuaha ca sa ndyityi ta ziquí ra ya.

Zacuhun ra fariseo zandaru vatyi cua tiin ra sii ra Jesús

³² I siñi ra fariseo cuhvá natuhun ñiyivi sa cuenda ra Jesús. Ta ra fariseo ta ra zutu nahnu i zacuhun ra zandaru cuenda vehe ñuhu hebreo vatyi cua tiin ra sii ra Jesús ta cuhun ra vehe caa.

³³ Tacuan ta i catyi ra Jesús: Cua cundyei zuhva cuii ñi ca quivi sihin ndo, ta ziquí cunanuhin ndya nu ndyaa ra i tasi sii.

³⁴ Cua nanducu ndo sii, zoco ma nañihi ndo sii. Ta nu cuhin, ma cuu cuhun ndo.

³⁵ Tacuan ta i catyi ra hebreo zuun ñi sihin ra tahan ra: ¿Ndyamaa cua cuhun ra ya ta ma nañihi yo sii ra? ¿Atu cua cuhun ra nu iyo ñiyivi sii yo ñuu griego, ta yucuan cua zacuaha ra?

³⁶ ¿Ta ñaa cuñi si catyi si sa catyi ra tyehen: “Cua nanducu ndo sii, ta ma nañihi ndo sii. Ta nu cua cundyei ma cuu cuhun ndo”?

Cua cuhva ra Ndyoo Tatyi Ii sii ñiyivi sino iñi sii ra Jesús

³⁷ Quivi sa nducahnú xaan vico cuan, nandyaa ra Jesús, ta ñihi xaan cahan ra, ta catyi ra: Tatú iyo ndo ityi ndo, quisi ndo nu ndyei ta coho ndo.

³⁸ Ñiyivi sa sino iñi sii, ndya añima ñu cua caña ndutya sa saha sa condito ñiyivi tañi sa catyi Tuhun Ndyoo. Ta tañi yuu cahnu cua cuu ndutya cuan.

³⁹ Cahan ra Jesús cuhva ya sa cuenda Tatyi Ii. Vatyi sii ñiyivi sa sino iñi sii ra Jesús cua cuhva ra Ndyoo Tatyi Ii vatyi tañaha ca cuhva ra Ndyoo Tatyi Ii quiivi cuan vatyi tañaha ca cunanuhu ra Jesús ndya gloria.

Ná cuu ndu-iin ñiyivi

⁴⁰ Ta sa siñi ñiyivi cuhva cahan ra Jesús, iyo ñu catyi ñu: Ndisa cuii vatyi ra ihya cuu ra profeta, ra sa cua quisi cumañi ca sa quisi inga ra sa cua zacacu sii yo.

⁴¹ Ta inga ñu catyi ñu: Ihya cuu ra Cristo. Zoco inga tucu ñu catyi ñu: Yivi ra Galilea cua cuu ra Cristo.

⁴² Catyi Tuhun Ndyoo vatyi ñiyivi ra rey David cua cuu sii ra Cristo. Belén cua cuu ñuu ra nu i cuu ñuu ra rey David. Catyi ñu.

⁴³ Ta yucuan cuenda ñá cuu ndu-iin ñiyivi sa cuenda ra Jesús.

⁴⁴ Ta zuhva ñiyivi cuñi ñu quihin ñu sii ra cuhun ra vehe caa, zoco yoñi i tiin sii ra.

Yoñi inga ra cahan tañi cahan ra Jesús

⁴⁵ Tacuan ta ziquí i nasaa ra zandaru cuenda vehe ñuhu nu yucu ra fariseo ta ra zutu nahnu, ta i nducu tuhun ra sii ra: ¿Ñacu ñá tiin ndo sii ra?

⁴⁶ Ta i nacahan ra zandaru ta catyi ra: Ta yoñi ca maa cahan tañi cahan ra cuan. Catyi ra.

⁴⁷ Tacuan ta i catyi ra fariseo: Ndyaa sii maa ndo ta zandavi ñaha ra.

⁴⁸ ¿Atu sica iñi ndo vatyi sino iñi minoo ra ndyaca ñaha a minoo ra fariseo? Numinoo ndi ta ña sino iñi ndi sii ra cuan.

⁴⁹ Zoco ñiyivi sa ñahñi maa sito ta nu ley ta ña sito ñu, cua cuxaan xaan ra Ndyoo sihin ñu.

⁵⁰ Tacuan ta i cahan minoo ra sa nañi Nicodemo. Zuun ñi ra cuu ra sa i sahan nu ndyaa ra Jesús minoo sa cuaa. Ta minoo ra ndyaca ñaha cuu tucu ra sihin inga ra, ta i catyi ra sihin ra tahan ra:

⁵¹ Catyi ley yo vatyi ma cuu catyi yo atu vaha a ña vaha sa zavaha minoo ra tatu ma tyizoho xihna yo sa cahan ra ta coto yo ñaa sa zavaha ra. Catyi ra.

⁵² Ta i nacahan minoo ra tahan ra ta catyi ra: Vaziqui ra Galilea cuu tucu yoho vatyi cahan xoon tuhun ra. Nanducun sisi Tuhun Ndyoo, ta cua ndyehun vatyi yoñi minoo ra Galilea cua cuu ra minoo profeta. (Yucuan cuenda yivi ra cahan Tuhun Ndyoo cuu ra Jesús cuñi ra fariseo vatyi ra Galilea cuu ra Jesús.)

⁵³ Tacuan ta cuanuhu minoo minoo ra ndya vehe ra.

8

Minoo ñaha zana iyo

¹ Sahan ra Jesús ndya yulu sa nañi Olivos.

² Ta inga quivi ñaha ñi i nasaa tucu ra ndya vehe ñuhu cahnu, ta quisi tandih ñiyivi nu ndyaa ra, ta i sicundyaa ra ta zacuaha ra sii ñu.

³ Tacuan ta rä cu maestro cuenda ley sihin ra fariseo i sindyaca ra sii minoo ñaha i nañihí ra sihin minoo ra ndya vaha ñi. Ta i tyaa ra sii ña mahñu ñiyivi.

⁴ Tacuan ta i catyi ra sihin ra Jesús: Maestro, i nañihí ndi sii ñaha ya sihin minoo ra ndya vaha ñi.

⁵ Nu ley ra Moisés catyi si vatyi cañi ñiyivi sii ña sihin yuu ndya cua cuu ña. ¿Ta yoho, yozo caa catyun?

⁶ Catyi ra cuhva ya vatyi cuñi ra coto ra sii ra Jesús vatyi cuñi

ra sa cua tyaa ra cuatyi sata ra. Zoco i nacañi noo ra Jesús xiñi ra ta quisaha tyaa ra nu ñuhu sihin nu ndaha ra.

⁷ Ta ñá zaña ra cuan sa nducu tuhun ra sii ra, ta ziñqui i nandyehe ra Jesús sii ra ta catyi ra: Yoo ra ñahñi cuatyi iyo, nacañi xihna ca maa ra sii ña sihin yuu. Catyi ra.

⁸ Ta i nacañi noo tucu ra xiñi ra ta quisaha tyaa tucu ra nu ñuhu.

⁹ Ta sa siñi ra cuhva cuan, i quisaha quita minoo minoo ñi ra vatyi tuu iñi ra vatyi iyo tucu cuatyi maa ra. Xihna ca ra sahnu ca cuahan minoo minoo ra ta cuhva ndya ra ndyihí, ta i ndoo minoo tuhun ñi ra Jesús sihin ñaha cuan.

¹⁰ Ta sa nduvita ra Jesús ta yoñi ca ndyehe ra, minoo tuhun ñi ca ñaha cuan, ta i catyi ra: Maha, ñaha ra tyaa cuatyi saton. ¿Atu yoñi ca ra catyi vatyi iyo cuatyun?

¹¹ Ta i catyi maa ña: Yoñi ca ra, tata. Ta i catyi ra Jesús: Ta nu mi ta ña tyei cuatyi saton. Cuahan, ta ma zavaha con cuatyi. Catyi ra.

Tañi minoo ñúhu ñuu ñiyivi cuu ra Jesús

¹² Ta inga tucu saha i cahan ra Jesús sihin ñiyivi, ta catyi ra: Yuhvi cui ñúhu sii ñuu ñiyivi. Ñiyivi ndyico sii, ma caca noo ca ñu nu ñaa vatyi ndyaa ñuhu sihin ñu.

¹³ Tacuan ta i catyi ra fariseo sihin ra: Zuun ñi moo saha sa ndaa sa cuendon, ta ña ndisa sa cohon.

¹⁴ Ta i nacahan ra Jesús, ta catyi ra sihin ra: Vazu sehi sa ndaa sa cuenda mi, zoco sa ndisa cuu si vatyi site ndya ityi i quisi ta ndya ityi cuhin. Zoco maa ndo ña sito ndo ndya ityi i quisi a ndya ityi cuhin.

¹⁵ Maa ndo tyicuhva ndo cuhva iyo si ñuu ñiyivi ya. Zoco mi ña tyicuhve.

¹⁶ Zoco tatu cua tyicuhve, minoo cuhva vaha xaan cua cuu si vatyi ña minoo tuhun ñi mi. Ra Ndyoo Zuti, ra i tasi sii, ndyaa ra sihin.

¹⁷ Sisi ley maa ndo, catyi tucu si vatyi sa ndaa sa saha uu tahan ñiyivi, ndisa cuu si.

¹⁸ Yuhvi cuu minoo ra saha sa ndaa sa cuende, ta ra Ndyoo Zutu yo, ra i tasi sii, saha ra sa ndaa sa cuende.

¹⁹ Tacuan ta i catyi ra fariseo sihin ra: ¿Ndyamaa iyo zutun? catyi ra. I nacahan ra Jesús ta catyi ra: Nu sii mi ta ñia nacoto ndo ta nu sii Zuti. Tatu sa vatyi nacoto ndo sii, cua nacoto tucu ndo sii Zuti.

²⁰ Ihya tuhun i cahan ra Jesús nu ndyaa satu nu tyihí ñiyivi xuhun sisi vehe ñuhu cahnu, zoco yoñi i tñin sii ra sa cuhun ra vehe caa vatyi ta saa ca cuhva cua tahan si sii ra.

Nu cuhin ma cuu cuhun ndo

²¹ Tacuan ta ziqui i catyi tucu ra Jesús sihin ñu: Cua cuhin ta cua nanducu ndo sii. Zoco cua cuu ndo sa cuenda cuatyi ndo, ta ma cuu cuhun ndo nu cuhin. Catyi ra.

²² Tacuan ta i catyi ra hebreo: Vaziqui zuun ñi maa ra cua cahñi sii ra vatyi catyi ra vatyi ma cuu cuhun yo nu cuhun ra.

²³ Ta i catyi ra Jesús sihin ra: Maa ndo cuu cuenda ihya. Yuhvi i quisí ndya andivi. Ra ñuu ñiyivi ya cuu maa ndo. Ta yuhvi, yivi ra ñuu ñiyivi ya cui.

²⁴ Yucuan cuenda catyi sihin ndo vatyi cua cuu ndo sa cuenda cuatyi ndo. Tatu ña sino iñi ndo sii vatyi yuhvi cuu ra zacacu sii ndo, cua ndoo cuatyi ndo ziqui ndo, ta cua cuu ndo.

²⁵ Tacuan ta i catyi ñiyivi sihin ra: ¿Yoo ra cuun? Ta i catyi ra Jesús sihin ñu: Zuun ñi ra cui tañi sa nacatyi sihin ndo ndya quivi i quisaha quehin sihin ndo.

²⁶ Iyo cuaha xaan sa cuñi catyi cuhva iyo ndo, ta cua catyi ñaa sa cuu cuatyi ndo. Ta ra i tasi sii, ñahñi sa vatyá iyo sii ra. Ta ihya ñuu ñiyivi nacatyi tuhun cuhva i siñi cuhva catyi maa ra. Tacuan i catyi ra Jesús sihin ñu.

²⁷ Zoco ñá cutuñi iñi ñiyivi vatyi cahan ra sa cuenda Ndyoo Zutu ra.

²⁸ Tacuan ta ziqui i catyi ra Jesús sihin ñu: Quivi cua cañihi ndo sii ra i quisí ndya gloria, ta ziqui cua coto ndo vatyi yuhvi cuu ra. Ta ñahñi sa zavehi sa cuñi ñi mi, zoco tañi sa zacuaha Zuti sii ta tacuan quehin.

²⁹ Ta ra i tasi sii, ndyaa ra sihin. Ña zandoo maa tuhun ra sii vatyi tandihí saha zavehi cuhva cuñi ra.

³⁰ Ta sa ndihí cahan ra Jesús tuhun ya, ta cuaha xaan ñiyivi i sino iñi sii ra.

Tuhun sa ndisa cuan, cua zacacu si sii yo

³¹ Tacuan ta ziqui i catyi ra Jesús sihin ñiyivi hebreo, ñu sino iñi sii ra: Tatu ma zaña ndo tuhun zacuehi sii ndo, cua cuu ndo ñiyivi sino iñi sii mi sa ndisa.

³² Ta cua coto ndo ñaa sa cuu sa ndisa, ta sa ndisa cuan cua ndasi si sii ndo.

³³ Ta i nacahan ñiyivi ta catyi ñu: Ñiyivi sahnu sii ndi cuu sii ra Abraham. Tañaha ca cuu ndi muzu sii numinoo ñiyivi. ¿Ta ñaa cuenda catyun vatyi cua ndasi ndi?

³⁴ Ta i nacatyi ra Jesús sihin ñu: Sa ndisa ta sa ndisa catyi sihin ndo. Tandihí ñiyivi zavaha cuatyi, muzu cuu ñu sii cuatyi cuan.

³⁵ Ta ra cu muzu, ma ndoo ra vehe sitoho ra tandihí tyiemvu. Zoco zehe ra cuu sitoho cuan, ndoo ra yucuan tandihí tyiemvu.

³⁶ Tatu zehe ra cuu sitoho vehe cuan saha sa cacu ndo, cua cacu ndisa cuii ndo, ta ma cuu ca ndo muzu sii sa ña vaha.

³⁷ Site vatyi ñiyivi ra Abraham cuu sii ndo. Zoco cuñi ndo cahñi ndo sii vatyi ña cuñi ndo sino iñi ndo tuhun quehin sihin ndo.

³⁸ Quehin cuhva sa ndyehi nu ndyaa Zuti. Ta maa ndo ndyicuu ndo cuhva catyi zutu maa ndo.

Cuihna cuu zutu ndo

³⁹ Ta i nacahan ñiyivi, ta catyi ñu sihin ra: Zutu ndi cuu sii ra Abraham. Ta i catyi ra Jesús sihin ñu:

Tatu sa ndisa vatyi zutu ndo cuu sii ra Abraham, cua zavaha ndo cuhva i zavaha ra Abraham.

⁴⁰ Zoco vityi cuñi ndo cahñi ndo sii vatyi minoo ra cahan sa ndisa sihin ndo cui. Ta tuhun quehin sihin ndo, cuhva i siñi cuhva catyi ra Ndyoo cuu si. Ta cuhva cuñi maa ndo zavaha ndo, ña tacuan i zavaha ra Abraham.

⁴¹ Zavaha ndo cuhva zavaha zutundo. Catyi ra Jesús. Tacuan ta i nacahan ñiyivi cuan ta catyi ñu: Ñá cacu maa ndi tacuan ñi. Iyo minoo ñi ra cuu zutu ndi, ra Ndyoo.

⁴² Ta i nacatyi ra Jesús sihin ñu: Tatú sa vatyi ra Ndyoo cuu Zutu ndo sa ndisa, cua cuñi xaan ndo sii, vatyi ndya nu ndyaa ra Ndyoo i quite ta vasi. Ña vasi cuhva cuñi mi. Maa ra i tasi sii.

⁴³ Ña cutuñi iñi ndo tuhun quehin sihin ndo vatyi ña cuñi ndo tyizoho ndo tuhun quehin sihin ndo.

⁴⁴ Zutu ndo cuu sii ra cu cuihna. Ta cuñi xaan ndo zavaha ndo sa ña vaha cuhva cuñi zutu ndo. Sahñi ra sii ñiyivi ndya ta xihna ñi ta ñahñi maa sa ndisa iyo sii ra. Cuhva cahan ra sa vatyia, tacuan cahan ra vatyi tacuan cuhva iyo ra, vatyi ra vatyia cuu ra ta zutu sa vatyia cuu sii ra.

⁴⁵ Ta sa cuenda sa vatyi quehin sa ndisa, ta yucuan cuenda ña sino iñi ndo sii.

⁴⁶ Yoñi ndo cuu catyi indo sa ndisa vatyi iyo cuatyi. Ta tatu quehin sa ndisa, ¿ñacu ña sino iñi ndo sii?

⁴⁷ Ra cuu cuenda ra Ndyoo, tyizoho ra sa cahan ra Ndyoo. Ta yucuan cuenda ña tyizoho ndo sa catyi ra Ndyoo vatyi yivi zehe ra cuu sii ndo.

Saxihna ñi sa iyo ra Jesús ta ziqui i sicoo ra Abraham

⁴⁸ Ta i nacahan ra hebreo ta catyi ra: Sa ndisa cuii catyi ndi vatyi minoo ra samaritano cuun ta ñoho minoo cuihna suun.

⁴⁹ Ta i catyi ra Jesús: Ñahñi cuihna ñoho sii. Tyei yahvi sii Zuti, zoco ña tyaa ndo yahvi sii.

⁵⁰ Ta ña ndedu xein sa zacahnu ñiyivi sii, zoco iyo minoo ra cuñi sa zacahnu ñiyivi sii. Ta cua tyicuhva ra sii ndo.

⁵¹ Sa ndisa ta sa ndisa catyi sihin ndo vatyi ñiyivi zavaha cuhva catyi, ma cuu ñu.

⁵² Ta i catyi ñiyivi hebreo: Vityi nacoto vaha ndi suun vatyi ñoho minoo cuihna suun. I sihi ra Abraham ta tandihí ra profeta ta sa naaha. Ta catyun vatyi ma cuu ñiyivi tatu zavaha ñu cuhva catyun.

⁵³ ¿Atu ñiñi ca cuu moo ta ziqui ñiyivi sahnu sii ndi, ra Abraham? Zoco i sihi ra Abraham ta tandihí inga ra i cuu profeta ta tyiemvu. Ta yoho, ¿yoo ra cuun vatyi catyun vatyi ma cuu ndi tatu sino iñi ndi suun?

⁵⁴ Ta i catyi ra Jesús: Tatú maa ñi mi catyi vatyi ra ñiñi cui, ña vale si. Zoco maa Zuti cuu ra catyi vatyi ra ñiñi cui. Ta zuun ñi ra cuan cuu ra catyi ndo vatyi Ndyoo ndo cuu sii ra.

⁵⁵ Ta tañaha ca coto ndo sii ra, zoco yuhvi site sii ra. Ta tatu catyi vatyi ña site sii ra, cua cui minoo ra vatyia tañi maa ndo. Zoco site sii ra, ta zavehi cuhva catyi ra.

⁵⁶ Ñiyivi sahnu sii ndo, ra Abraham, zii xaan i cuñi ra vatyi cua tahan si quivi caqui. Ta i ndyehe ra sii si, ta zii xaan i cuñi ra.

⁵⁷ Tacuan ta i catyi ra hebreo cuan sihin ra Jesús: Ta quita ca uu xico usi cuiyon, ta ¿yozo caa catyun vatyi sa ndyehun sii ra Abraham?

⁵⁸ Ta i nacatyi ra Jesús sihin ra: Sa ndisa ta sa ndisa catyi sihin ndo vatyi cumañi ca cacu ra Abraham ta sa iye. Catyi ra.

⁵⁹ (Ta i cuxaan xaan ra hebreo), ta i quihin ra yuu sa cua cañi ra sii ra Jesús. Zoco i quihvi xehe ra Jesús ticui ñiyivi, ta i quita ra sisi vehe ñuhu cahnu cuan, ta cuahan ra.

9

Zanduvaha ra Jesús sii minoo ra cuua

¹ Ta sa cua yaha ra Jesús, ta i ndyehe ra sii minoo ra cuua. Cuua ra i cacu ra.

² Ta i ndducu tuhun ra i casi ra Jesús sii ra ta catyi ra: Maestro, ¿yoo sa zavaha cuaty, zutu ra a zihi ra ya a zuun ñi maa ra? Vatyi ndyehe, cuua ra i cacu ra.

³ Ta i catyi ra Jesús sihin ra: Yívi cuaty, ta yívi cuenda ñiyívi sii ra. Itahan ra ya cuhva ya vaty tacuan ta cua coto ñiyívi vaty cuu sii ra Ndyoo zanduvaha ra sii ra.

⁴ Ñiñi xaan cuñi si zavehi cuhva cuñi ra i tasi sii, niiñi sa ndisi vaty cuua ta yoñi cua cuu zatyño.

⁵ Niiñi sa ndyei ñuu ñiyívi ya, tañi minoo ñúhu cui ñuu ñiyívi. Tacuan i catyi ra Jesús.

⁶ Ta sa ndihí cahan ra cuhva cuan ta ziqui i tyicu zii ra nu ñuhu. Ta i zavaha ra ndyahyu sihin zii ra, ta i tyaa ra sii si nuu ra cuua cuan.

⁷ Ta i catyi ra Jesús sihin ra: Cahan ta nacatyon siti nuun nu ndyaa tanque Siloé. Zivi Siloé cuan cuñi si catyi si: I tasi suun. Ta i sahan ra cuan, ta i nacatya ra, ta sa nasaar ra ta sa cuu ndyehe ra.

⁸ Ta ñiyívi sa ndyaa yatyi yuvehe ra ta ñiyívi sa tuhva ndyehe sii ra vaty cuua ra i catyi ñu: ¿Atu yívi ra ihya cuu ra sica xaan caridad?

⁹ Zuhva ñu catyi ñu: Zuun ra cuu ra. Ta inga ñu catyi: Tañi caa ra caa. Zoco maa ra i catyi: Zuun yuhvi cui.

¹⁰ Yucuan cuenda catyi ñiyívi sihin ra: ¿Yozo caa i cuu vaty i ndundisi ndyehun?

¹¹ Ta i nacahan ra ta catyi ra: Minoo ra sa nañi Jesús i zavaha ra ndyahyu, ta i tyaa ra sii si siti nui, ta i catyi ra sihin: "Cuahan cua nacatyon nuun nu ndyaa tanque Siloé." Ta i sehin ta nacatye siti nui, ta ndundisi ndyehi vityi. Catyi ra.

¹² Tacuan ta i catyi ñiyívi sihin ra: ¿Ndyamaa iyo ra cuan? Ta i catyi maa ra: Ña site.

Nducu tuhun xaan ra fariseo sii ra sa nduvaha siti nuu cuan

¹³ I quihin ñiyívi sii ra sa ndundisi ndyehe, ta sindyaca ñu sii ra nu yucu ra fariseo.

¹⁴ Ta quívi quitatu ñiyívi i cuu quívi i zavaha ra Jesús ndyahyu ta zanduvaha ra siti nuu ra cuua cuan.

¹⁵ Ta i ndducu tuhun tucu ra fariseo sii ra nduvaha cuan ta catyi ra: ¿Yozo caa nduvaha siti nuun? Ta i catyi ra: Ndyahyu i tyaa ra siti nui, ta i nacatye, ta vityi ndundisi ndyehi. Catyi ra.

¹⁶ Tacuan ta ziqui i catyi zuhva ra fariseo: Ra cuan, yivi cuenda ra Ndyoo cuu ra vaty ña tyaa ra yahvi sii quívi quitatu yo. Ta inga ra fariseo catyi: Tatu ra iyo cuaty cuu ra, ma cuu zavaha ra sa ndyityi tañi ya. Ta sa cuenda cuan, ta ñá cuu ndu-iin ra fariseo.

¹⁷ Ta i catyi tucu ra sihin ra i nduvaha nuu inga saha: ¿Ñaa catyi moo cuenda ra i zanduvaha siti nuun? Ta i catyi ra: Minoo ra profeta cuu ra. Catyi ra.

¹⁸ Zoco ra ndyaca ñaha sii ñiyívi hebreo, ñá sino iñi ra sii ra vaty cuua ra ta ziqui i ndundisi ndyehe ra ndya sa cana ra sii zutu ra ta sii zihi ra.

¹⁹ Ta i ndducu tuhun ra sii ñu ta catyi ra: ¿Atu zehe maa ndo cuu sii ra ya? ¿Atu cuua ra i cacu ra? ¿Ta yozo caa cuu vaty i ndundisi ndyehi vityi?

²⁰ Ta i nacahan zutu ra ta catyi ra: Sito ndi vaty zehe ndi cuu sii ra ta cuua ra i cacu ra.

²¹ Zoco ña sito ndi yozo caa vaty ndyehe ra vityi a yoo sa zanduvaha siti nuu ra. Sa iyo cuiya ra. Nducu tuhun ndo sii maa ra. Cuu cahan ra sa cuenda maa ra.

²² I cahan zutu ra ta zihi ra cuhva cuan vaty yuhu ñu sii ra ndyaca ñaha sii ñiyívi hebreo vaty sa i yaha

ndu-iiñ ra cuan minoo cuhva ta catyi ra vatyi yoo ra catyi vatyi i quisi ra Jesús cuenda ra Ndyoo ma cuu ca cuhun ra vehe ñuhu.

²³ Yucuan cuenda i catyi zutu ra ta zihi ra: "Sa iyo cuiya ra. Nduku tuhun ndo sii maa ra."

²⁴ Ta inga saha i cana ra hebreo sii ra i nduvaha, ta catyi ra: Zacaahnun sii ra Ndyoo vatyi sito maa ndi vatyi ra iyo cuatyti cuu ra zanduvaha suun.

²⁵ Ta i nacahan ra i nduvaha ta catyi ra: Ña site tatu ra iyo cuatyti cuu ra a yivi, zoco minoo ñi cuhva site vatyi ra cuua i cui, ta vityi ndundisi ndyehi. Catyi ra.

²⁶ Tacuan ta ziqui i catyi ra sihin ra inga saha: ¿Ñaa sa zavaha ra suhun? ¿Yozo caa i zanduvaha ra siti nuun?

²⁷ Ta i catyi ra sihin ra: Sa nacatyti sihin ndo, ta ñá tyizoho ndo. ¿Ñaa cuenda cuñi ndo coto ndo inga saha? ¿Atu cuñi tucu maa ndo vatyi cundyico ndo sii ra?

²⁸ Tacuan ta i cuxaan ra hebreo, ta catyi ra: Minoo ra ndyico sii ra cuun. Zoco maa ndi ndyico ndi sii ra Moisés.

²⁹ Sito ndi vatyi i cahan ra Ndyoo sihin ra Moisés. Zoco inga ra cuan, ña sito ndi ndyamaa i quisi ra cuan. Catyi ra.

³⁰ Tacuan ta i nacahan ra nduvaha cuan ta catyi ra: Ihya cuu minoo sa vaha xaan vatyi vazu ña sito maa ndo sii ra, zoco i zandundisi ra ndyehi.

³¹ Ta sito yo vatyi ña tyizoho ra Ndyoo sa cahan ñiyivi iyo cuatyti. Zoco tatu iyo minoo ra zacahnu sii ra Ndyoo ta zavaha ra cuhva cuñi ra, tyizoho ra Ndyoo sa cahan maa ra cuan.

³² Ta ndya ta sino ñuu ñiyivi, ta tañaha ca coto yo tatu iyo minoo ra sa cuu zandundisi nuu minoo ra cuua ndya quivi i cacu ra.

³³ Tatú sa yivi ra Ndyoo tasi sii ra cuan, ma cuu zacuu ra cuhva ya. Catyi ra.

³⁴ Ta i nacahan ra hebreo ta catyi ra: Yoho sa cäcun sisi tandihí nuu cuatyti, ta vityi cuñun zacuohon sii maa ndi. Ta i quihin ra sii ra, ta i tava ndyizo ra sii ra ityi sata.

Cuua ñiyivi cuenda sa ndisa

³⁵ Ta i sito ra Jesús vatyi i tava ndyizo ñiyivi sii ra i nduvaha. Ta i nañihi ra Jesús sii ra, ta catyi ra: ¿Atu sino ifun sii Zehe ra Ndyoo?

³⁶ Ta i nacahan ra cuan ta catyi ra: ¿Yoo ra cuu ra cuan, tata? vatyi cuu sino iñi sii ra.

³⁷ Ta i catyi ra Jesús sihin ra: Sa i ndyehun sii ra, ta zuun ra cuu sa natuhun suhun. Catyi ra.

³⁸ Ta i catyi ra cuan: Sino iñi suun; yoho ra ndyaca ñaha cuun. Ta i zacahnu ra sii ra Jesús.

³⁹ Ta i catyi ra Jesús: Vasi ñuu ñiyivi ya vatyi cua tyicuhve sii ñiyivi. Ta ñiyivi sa ña cuu ndyehe cua ndyehe ñu. Ta ñiyivi sa ndyehe vityi, cua nducuaa ñu. Catyi ra.

⁴⁰ Ta tayucu zuhva ra fariseo yatyi ñi yucuan, ta siñi ra sa cahan ra Jesús ta catyi ra sihin ra: ¿Atu cuua tucu nduhvi?

⁴¹ Ta i catyi ra Jesús sihin ra: Tatú sa vatyi cuua ndo sa ndisa, ma coo cuatyti ndo. Zoco sa cuenda sa vatyi catyi ndo vatyi ndisi ndyehe ndo ta yucuan cuenda ndoo cuatyti ndo ziqui ndo.

10

Cahan ra Jesús sihin minoo cuhva, cuhva iyo minoo sacu

¹ Sa ndisa ta sa ndisa catyi sihin ndo: Ra sa ma quihvi yu sacu, ndaa ra xiñi sacu ta quihvi ra; ra zuhu cuu ra.

² Vatyi ra quihvi yu sacu cuan, sitoho mvee ticatyti cuan cuu sii ra.

³ Ta ra zacuenda yuvehe cuan, nuña ra ta quihvi sitoho mvee. Sito mvee ticatyti zono ra nduzu ra, ta cana ra sii ti sihin zivi ti, ta quita ra, ta ndyico ti sii ra.

⁴ Ta sa ndihí tava ra sii mvee ticatyti zono ra, maa ra cuahan ityi

nuu ti. Ta ndyico ti sii ra vatyi nacoto ti nduzu ra.

⁵ Zoco sii inga ra sa ña sito ti, ma cundyico ti. Cua cono ti sii ra vatyi ña nacoto ti nduzu ra.

⁶ I cahan ra Jesús sihin ñiyivi sihin minoo cuhva, zoco ñá cutuñi iñi ñu tuhun cahan ra sihin ñu.

Ra zacuenda vaha cuu ra Jesús

⁷ Tacuan ta ziqui i cahan ra Jesús inga saha, ta catyi ra: Sa ndisa ta sa ndisa catyi sihin ndo vatyi yuhvi cui tañi yu sacu nu quihví coyo mvee ticateyi.

⁸ Tandihí cuii ra i quisi cuee ca sa quisi mi, ra zuhu cuu ra cuan. Zoco ña tyizoho mvee ticateyi zone sa cahan ra.

⁹ Yuhvi cui yuvehe. Tandihí ñiyivi sa cua quihví coyo, cua cacu ñu. Ta cua quita ñu, ta cua nandihví ñu, ta cua nañihí ñu sa vaha.

¹⁰ Ra zuhu cuan, vasi ra vatyi zuhu ra ta cahñi ra. Vasi zativi ra. Yuhvi vasi vatyi cuhve sa cundito ñiyivi tandihí tyiemvu ta coo vaha xaan ñu.

¹¹ Yuhvi cuu ra zacuenda vaha sii ndo. Ta sehi sa cui sa cuenda mvee ticateyi zone.

¹² Zoco minoo ra sa cuu muzu, zatyiñi ra ta iyo yahvi ra. Ndyeha ra vatyi vasi ina nduvahu, ta zandoo ra sii mvee ticateyi cuan vatyi yivi zona ra cuu sii ti. Ta tiñin ina nduvahu sii ti ta quiti cuatyi ti sii ti.

¹³ Ta sino ra cu muzu cuan vatyi muzu ñi cuu ra, ta ñahñi sa cuu cuñi maa ra sa cuenda mvee ticateyi cuan.

¹⁴ Zoco yuhvi cuu ra zacuenda vaha. Nacote sii mvee ticateyi zone, ta nacoto ti sii.

¹⁵ Tañi nacoto Zuti sii ta nacoto tuqui sii ra. Ta sehi sa cui sa cuenda mvee ticateyi zone.

¹⁶ Ta iyo inga mvee ticateyi zone. Yoñi ti ihya. Cuñi si sa naquihin sii ti. Cua cuiñi ti nduzi, ta cua ndu-iñi ti sihin inga ti, ta minoo ñi ra cua zacuenda sii ti.

¹⁷ Yucuan cuenda cuñi xaan Zuti sii, vatyi sehi sa cui, ta cuee ca ta cua nandoto tuqui.

¹⁸ Yoñi sa cuu cahñi sii tatu ma cuhve sa cui, zoco cua cuhve sa cui. Cuu cui, ta cuu nandoto tuqui. Ihya tyiñi i saha ra Ndyoo Zuti sii.

¹⁹ Ta sa ndihí cahan ra Jesús tuhun ya, ta ziqui ña cuu ca ndu-iñi ra hebreo sa cuenda sa i catyi ra Jesús.

²⁰ Ta i catyi cuaha xaan ra: Ñoho minoo cuihna sii ra cuan, ta zana xiñi ra. ¿Ñacu tyizoho ndo sa cahan ra?

²¹ Zoco inga ra catyi: Cuhva cahan ra, yivi cuhva cahan minoo ra sa ñoho cuihna. ¿Atu cuu zandundi cuihna nuu ñiyivi cuaa?

Ña tyaa ra hebreo yahvi sii ra Jesús

²² Vico cahñi i cuu si, ta nducahnu minoo vico ñuu Jerusalén. Vico cuenda nu ndihí ndaa vehe ñuhu cahnu ta tyiemvu, ta nducahnu vico tahan cuiya cuenda si.

²³ Ta i sica noo ra Jesús sisi vehe ñuhu cahnu cuan nu nañi si corredor ra Salomón.

²⁴ Tacuan ta tyihi mahñu ra hebreo sii ra Jesús, ta i catyi ra: ¿Ndyeha ama ta cahan casun sihin ndi? Tatru ra Cristo cuun, catyi casun.

²⁵ Ta i nacahan ra Jesús ta catyi ra: Sa i nacatyi sihin ndo, ta ña sino iñi ndo. Tyiñi zavehi sa cuenda Zuti, yucuan saha sa ndaa cuende.

²⁶ Zoco ña sino iñi maa ndo vatyi yivi mvee ticateyi zone cuu sii ndo. Tañi sa nacatyi sihin ndo.

²⁷ Mvee ticateyi zone, siñi ti nduzi. Ta nacote sii ti, ta ndyico ti sii.

²⁸ Ta sehi sa cundito ti tandihí cuii tyiemvu. Ta ma cuu ca ti. Ta yoñi ra cua tava sii ti sisi ndehi.

²⁹ Ñiñi ca cuu Zuti ta ziqui tandihí ca, ta i saha maa ra sii ti sii. Ta yoñi ra cuu tava sii ti sisi ndaha Zuti.

³⁰ Yuhvi sihin Zuti iñi ñi cuu ndi.

31 Tacuan ta i quihin ra hebreo yuu inga saha sa cua cañi ra sii ra Jesús.

32 Ta i cahan ra Jesús inga saha, ta catyi ra: Sa cuaha xaan tysiño vaha zañehi sii ndo sa cuenda Zuti. ¿Ndya sa ña tahan iñi ndo ta cuñi ndo cañi ndo yuu sii?

33 Ta i nacahan ra hebreo ta catyi ra: Yivi sa cuenda minoo tysiño vaha i zavohon, zoco sa cuenda vatyi ña vaha cohon vatyi minoo ñiyivi ñi cuun, ta catyun vatyi ra Ndyoo cuun.

34 Ta i catyi ra Jesús sihin ra: Nuu tutu Tuhun Ndyoo ndyaa si nu i catyi ra Ndyoo vatyi ndyoo cuu tucu maa ndo.

35 I catyi ra Ndyoo vatyi ñiyivi sa tyizoho Tuhun ra cuu tañi Ndyoo. Ta ma cuu catyi Tuhun Ndyoo minoo sa ña ndisa.

36 I zandu-ii ra Ndyoo Zuti sii ra i tasi ra ñuu ñiyivi. Ta maa ndo catyi ndo vatyi quehin ndya vaha ñi sii ra Ndyoo vatyi catyi vatyi Zehe ra Ndyoo cuu sii.

37 Tatu ña zavehi cuhva cuñi Zuti, ma sino iñi ndo sii.

38 Zoco zavehi cuhva cuan, ta vazu ma sino iñi ndo sii, zoco sino iñi ndo sa cuenda sa vaha i zavehi. Tacuan ta cua cuu nacoto ndo. Ta cua nacoto vaha ca ndo vatyi ndyaa ra Ndyoo Zutu yo sihin, ta iin ñi cui sihin ra. Tacuan i catyi ra Jesús.

39 Yucuan cuenda i cuñi tucu ra tiñi ra sii ra sa cuhun ra vehe caa. Zoco i quita ra ta cuahan ra, ta ña cuu.

40 Ta cuahan tucu ra inga saha ndya inga siyo yuu Jordán ndya nu i zacoo ndutya ra Juan sii ñiyivi sa xihna ñi. Ta i ndoo ra yucuan.

41 Ta cuaha xaan ñiyivi cuahan coyo ndya nu ndyaa ra. Ta i catyi ñu: Ñahñi sa ndyityi i zavaha ra Juan, zoco tandihí cuii sa catyi ra cuenda ra ya, ta ndisa cuu si.

42 Ta cuaha xaan ñiyivi i sino iñi sii ra Jesús yucuan.

11

I sihi ra Lázaro

1 I cuhu minoo ra sa nañi Lázaro, cuhva ña María ta ña Marta. Betaña cuu ñuu ñu.

2 Ta ña María cuhva ra Lázaro, zuun ñi ña cuu ña sa tyozo azetye vixi saha ra Jesús ta zana-ityi ña sihin ixi xiñi ña minoo saha.

3 Tacuan ta ziqui i zacuhun cuhva ra Lázaro tysiño nu ndyaa ra Jesús ta catyi ñu: Tata, cuhu ra sa cuñi xoon.

4 Ta sa i siñi ra Jesús tuhun cuan i catyi ra: Ma cahñi cuehe cuan sii ra. Zoco cua ndyehe ñiyivi vatyi cuu xaan zacuu ra Ndyoo, ta cua zacahnu xaan ñiyivi sii Zehe ra. Catyi ra Jesús.

5 Ta cuñi xaan ra Jesús sii ña Marta ta sii cuhu ña ta sii ra Lázaro.

6 Ta sa i sito ra vatyi cuhu ra ta i ndoo ra uu ca quivi nu ndyaa ra.

7 Tacuan ta ziqui i catyi ra sihin ra i casi ra: Cohon yo Judea inga saha.

8 Ta i catyi ra sihin ra: Maestro, nacaa cuñi ñiyivi hebreo yucuan cañi ñu yuu suun. ¿Atu cuhun yucuan inga saha?

9 Ta i catyi ra Jesús: Iyo usi uu ora sa minoo ndiyiyaca. Ra sa sica noo ora, ma catyihí saha ra vatyi ndisi ndyehe ra ta zavaha ra sa vaha.

10 Zoco tatu cua caca noo minoo ra sa sa cuua ta zavaha ra sa ña vaha, cua catyihí saha ra vatyi cumañi ñúhu nu cuahan ra.

11 Tacuan i catyi ra Jesús ta ziqui i catyi ra: Quixi xaan ra Lázaro amigo yo, zoco cuhin cua zandoye sii ra.

12 Tacuan ta catyi ra i casi ra: Tata, tatu quixi ra, cua nduvaha ra.

13 Zoco i cahan ra Jesús tuhun sa sihi ra, zoco i sica iñi ra i casi ra vatyi cahan ra tuhun sa quixi ndisa cuii ra ta quitatu ra.

14 Ta tacuan ta i catyi casi ra Jesús sihin ra: Sa sihi ra Lázaro.

15 Ta zii cuñi vatyi yoñi ndyaa yucuan. Vaha ca tacuan sa cuenda

maa ndo vatyi cua sino ca iñi ndo.
Coho yo nu catuu ra.

¹⁶ Taçuan ta i cahan ra Tomás sa nañi Dídimo sihin inga ra i casi ra Jesús, ta i catyi ra: Coho tucu maa yo vatyi cuu yo iin ñi sihin ra Jesús.

Zanandoto ra Jesús sii ra Lázaro

¹⁷ Ta sa i saa ra Jesús yucuan, i sito ra vatyi sa ñoho ra Lázaro cumi quívi sisi ñaña.

¹⁸ Ñuu Betania cuan yatyí ñi ndyaa si sihin ñuu Jerusalén tañi uñi kilómetro zazava.

¹⁹ Ta i saa cuaha xaan ra hebreo; cua cuhva ra tundyee iñi sii ña Marta ta ña María vatyi sihi cuhva ñu.

²⁰ Ta sa sito ña Marta vatyi vasi ra Jesús, cuahan ña cua zatahan ña sii ra. Zoco i ndoo ña María sisi vehe.

²¹ Tacuan ta i catyi ña Marta sihin ra Jesús: Tata, tatu sa vatyi ndyoon ihya, ma cuu cuhve.

²² Zoco site vatyi tandihí cuii ñi sa cua cacon sii ra Ndyoo, maa ra Ndyoo cua cuhva sii si suun.

²³ Ta i catyi ra Jesús sihin ña: Cua nandoto cuhvon.

²⁴ Ta i catyi ña Marta sihin ra: Site vatyi cua nandoto ra quívi cua tyicuhva ra Ndyoo sii ñiyivi.

²⁵ Ta i catyi ra Jesús sihin ña: Yuhvi cuu ra zanandoto, ta sehi sa cundito ñiyivi. Ra sa sino iñi sii, vazu sa sihi ra, zoco cua nandoto ra.

²⁶ Ta ñiyivi ndito ta sino iñi ñu sii, ma cuu ca ñu. ¿Atu sino iñun cuhva ya?

²⁷ Ta i catyi ña sihin ra: Ndisa tata. Sino iñi vatyi ra Cristo cuun, ta Zehe ra Ndyoo cuu suun. Ra sa cua quisi ñuu ñiyivi cuun. Catyi ña.

Sacu ra Jesús nu ndyaa ñaña ra Lázaro

²⁸ Ta sa sa ndihí cahan ña tacuan, ta ziquí cuahan ña ta cana xehe ña sii ña María cuhu ña, ta catyi ña: Sa saa ra Maestro ta cana ra suun.

²⁹ Ta sa i siñi ña María tuhun cuan, ta yatyí xaan i nduvita ña ta cuahan ña nu ndyaa ra Jesús.

³⁰ Ta tañaha ca cua quívi ra Jesús sisi ñuu cuan. Ta cuhva ndyaa ñi ra nu tahan ña Marta sii ra.

³¹ Ta ra hebreo, ra ndyaa sihin ña María vehe cuan, i ndyehe ra vatyi yatyí xaan i nduvita ña ta i cacono ña cuahan ña. Ta i sindyico ra sii ña vatyi catyi ra: Cuahan ña cua vacu ña nu ndyaa ñaña ra Lázaro.

³² Tacuan ta i saa ña María nu ndyaa ra Jesús, ta i sicuiñi siti ña nuu ra ta catyi ña: Tata, tatu sa vatyi ndyoon ihya sihin ndi ndya icuñuu ca, ma cuu cuhve.

³³ Ta sa ndyeha ra Jesús vatyi sacu ña ta sacu tucu ra hebreo, ra ndihí sihin ña, ta i nducuihya xaan cuñi añima ra Jesús.

³⁴ Ta i catyi ra: ¿Ndyamaa i tyihi ndo sii ra? Ta i catyi maa ñu sihin ra: Coho, tata, vatyi cua ndyehun.

³⁵ Ta i sacu ra Jesús.

³⁶ Tacuan ta ziquí i catyi ra hebreo: Ndyeha ndo cuhva cuñi xaan ra sii ra sihi cuan.

³⁷ Zoco i catyi inga ra: Ihya ra i zandundisi ndyeha ra cuaa cuan. ¿Ñacu ñá zavaha ra minoo cuhva ta ma cuu ra ya?

Nandoto ra Lázaro

³⁸ I quisi minoo sa ndahvi xaan cuñi ra Jesús inga saha sa ndyeha ra ñaña nu ñoho ra Lázaro. Minoo yavi yuu, i cuu si, ta ndazi minoo yuu yuhu si.

³⁹ I catyi ra Jesús: Tyaa siyo ndo yuu ña. Ta i catyi ña Marta, cuhva ra i sihi cuan: Tata, sa iñi sahan ra vatyi sa cumi quívi sa sihi ra.

⁴⁰ Ta i catyi ra Jesús sihin ña: Sa catyi suhun vatyi tatu cua sino iñun, cua ndyehun vatyi cahnu xaan cuu cuhva iyo sii ra Ndyoo, ta cuu zacuu ra tandihí.

⁴¹ Tacuan ta ziquí i tyaa siyo ñu yuu nu ñoho ndiyí cuan. Ta i nandyehe ndaa ra Jesús itiy ziquí,

ta catyi ra: Tyahvi ndyoo suun Ndyoo Zuti vatyi siñun sa quehin.

42 Ta site vatyi siñun sa quehin tandihí saha, zoco catyi tacuan sa cuenda ñiyivi sa yucu ihya vatyi tacuan ta cua sino iñi ñu vatyi moo i tasi sii.

43 Ta sa ndihí cahan ra tacuan, ta ziquí i cana saa ra ta catyi ra: Lázaro quita xiña.

44 Ta ra i sihi cuan, i quita ra. Zucu ra zahma. Ta nuhñi minoo zahma nuu ra. Ta i catyi ra Jesús sihin ñiyivi: Ndasi ndo sii ra, naquita ra.

Nducu cahñi ñiyivi sii ra Jesús

45 Tacuan ta ziquí i sino iñi cuaha xaan ra hebreo, ra ndihí sihin ña María ta ndyehe ra cuhva i zavaha ra Jesús.

46 Zoco sahan zuhva ra nu yucu ra fariseo ta nacatyi ra cuhva i zavaha ra Jesús.

47 Yucuan cuenda i titahan ra zutu nahnu sihin ra fariseo, ta catyi ra: ¿Yozo caa zacuu yo vatyi cuaha xaan sa ndyityi zavaha ra cuan?

48 Tatú cuhva yo sa zavaha ca ra tacuan, cua sino xaan iñi tandihí cuii ñiyivi sii ra. Ta cua quisi zandaru ñuu Roma ta cahñi ra sii yo ta zatívi ra ñuu yo. Catyi ra.

49 Ta minoo ra nañi Caifás, maa ra cuu ra cu nuu sii tandihí cuii ra cu zutu cuiya cuan. Ta i catyi ra sihin ra: Ñahñi maa sa sito ndo.

50 Ña cutuñi iñi ndo vatyi vaha ca sa nacuu minoo tuhun ñi ra sa cuenda ñiyivi, ta yivi ca sa cuu tandihí cuii yo. Catyi ra.

51 Ñá cahan ra cuan sihin sa siñi tuñi xiñi ñi maa ra. Ra cu nuu sii tandihí cuii ra cu zutu i cuu ra cuiya cuan. Ta vazu ña sito ra, zoco i cahan ra profecía vatyi cua cuu ra Jesús sa cuenda tandihí ñiyivi hebreo.

52 Ta yivi sa cuenda sa maa ñi maa ñu, zoco cua zandu-iñi ra sii tandihí zehe ra Ndyoo, ñu indyacuan ta indyehe.

53 Ta ndya quivi cuan i zacasi tahan ra hebreo, ra ndyizo tyiño cuan, tyiño vatyi cua cahñi ra sii ra Jesús.

54 Yucuan cuenda ñá sica noo ndisi ca ra Jesús nu yucu ra hebreo. I quita ra yucuan ta saa ra ñuu Efraín yatyi nu ndyaa minoo nu ndahvi xaan caa, sa catyi yo desierto. Ta yucuan i ndoo ra sihin ra i casi ra.

55 Ta sa cua tahan si quivi coo vico zuhun cuenda ñu hebreo. Ta i quita cuaha xaan ñu ñuu ñu, ta cuahan ñu ñuu Jerusalén cuee ca sa tahan si quivi coo vico vatyi cuñi ñu nduvaha ñu cuhva iyo costumbre maa ñu.

56 Ta yucuan i nanducu ñu sii ra Jesús, ta catyi ñu sihin tahan ñu nu ñoho ñu vehe ñuhu cahnu: ¿Ñaa sa sica iñi ndo? ¿Atu ma quisi ra vico ya? Catyi ñu.

57 Ra zutu nahnu sihin ra fariseo, sa i saha ra tyiño vatyi tatu yoo sa cua coto ndyamaa ndyaa ra Jesús cua zacoto ra sii ra cuan vatyi cua tiñi ra sii ra.

12

I tyozo minoo ñaha azetye vixi saha ra Jesús

1 Íñu quivi ca cuee ca sa tahan si vico zuhun cuan, i saa ra Jesús ñuu Betania nu iyo ra Lázaro, ra sa i sihi ta i zanandoto ra Jesús sii ra.

2 Ta yucuan i zavaha ñu sa cuxiñi ra Jesús. I tyizo ña Marta coho nu mesa, ta ndyaa ra Lázaro sihin ra Jesús mesa.

3 Tacuan ta ziquí i quihin ña María zava litro azetye vixi sa yahvi xaan ndyaa, ta i tyozo ña sii si saha ra Jesús, ta i zana-ityi ña saha ra sihin ixi xiñi ña. Ta i situ cuii vehe cuan sihin xico vixi.

4 Ta i catyi minoo ra i casi ra Jesús, ra sa nañi Judas Iscariote zehe ra Simón, zuun ra cuu ra sa cua xico tuhun sii ra Jesús. Maa ra cuan i catyi:

⁵ ¿Ñacu ñá xico ñu azetye ya? ta cua ñihí ñu tañí cumi mil zazava ta tyindyee ñu sii ñiyiví ndahvi sihin si. Catyi ra.

⁶ Zoco ñá catyi ra tacuan vatyi cuñí xaan ra sii ñiyiví ndahvi. I catyi ra tacuan vatyi minoo ra zuhu cuu ra, ta ndyizo ra yití sa ñoho xuhun ra Jesús, ta quihin xehe ra xuhun cuan.

⁷ Tacuan ta i catyi ra Jesús: Ma cahan ca ndo sihin ña. Zavaha ña sii si cuee ca sa cui ta cuhin nuñaña.

⁸ Ñiyiví ndahvi cuan, cua coo ñu sihin ndo tandihí cuii tyeimvu. Zoco yuhví ma cundyei sihin ndo tandihí tyeimvu.

Cuñi cahñi ñiyiví sii ra Lázaro

⁹ Ta sa ñihí ñiyiví hebreo tuhun vatyi ndyaa ra Jesús ñuu Betania, cuaha xaan ra saa coyo. Ña iin ñi sa cuenda ra Jesús i quisi ra, quisi ra vatyi cuñí ra ndyehe ra sii ra Lázaro, ra i zanandoto ra Jesús.

¹⁰ Zoco ra zutu nahnu i natuhun tahan ra yozo caa ta cuu cahñí ra sii ra Lázaro.

¹¹ Vatyi sa cuenda ra Lázaro, ta cuaha xaan ra hebreo zaña ra tuhun zacuahá ra cu zutu ta sino iñi ra sii ra Jesús.

I quihví ra Jesús ñuu Jerusalén

¹² Ta inga quíví i saa cuaha xaan ñiyiví ñuu Jerusalén sa cuenda vico zuhun, ta sa i sito ñu vatyi vasi ra Jesús

¹³ i sahndya ñu ndaha tuticaha ta i quita coyo ñu ta cua zatahan ñu sii ra, ta cana saa ñu ta catyi ñu: ¡Cahnu xaan cuu ra vasi sa cuenda ra Ndyoo! ¡Rey, ra ndyaca ñaha sii yo cuu ra! Catyi ñu.

¹⁴ Ta i ñihí ra Jesús minoo burro luhlu, ta yozo ra sii ti tañí catyi si sisi Tuhun Ndyoo:

¹⁵ Ma yuhu ndo ñiyiví ñuu Sión; Ica rey ndo vasi ya; Yozo ra minoo burro luhlu. Tacuan catyi si.

¹⁶ Ña cutuñi iñi ra i casi ra Jesús cuhva ya sa xihna ñi, zoco ta sa

cua nanuhu ra Jesús ndya gloria ta ziquí i nacohon iñi ra i casi ra vatyi tacuan ndyaa si sa cuenda ra Jesús, ta i nacohon iñi ra vatyi tacuan i zavaha ñiyiví sihin ra.

¹⁷ Ta i saha ñiyiví sa ndaa, ñiyiví sa yucu sihin ra Jesús nu i cana ra sii ra Lázaro sisi ñaña ta i zanandoto ra sii ra.

¹⁸ Ta yucuan cuenda cuaha xaan ñiyiví i zatahan sii ra Jesús vatyi sa sito ñu vatyi i zavaha ra sa ndyityi cuan.

¹⁹ Zoco i catyi ra fariseo sihin tahan ra: Ndyehe ndo vatyi ma cuu ca zavaha yo ñaa sa cuñi yo sihin ra vatyi sa tandihí cuii ñiyiví sino iñi sii ra.

Nanducu ra griego sii ra Jesús

²⁰ Ta yucu tucu zuhva ra griego, ra i saa sihin ñiyiví vico cuan sa cua zacahnu ra sii ra Ndyoo.

²¹ Ta i tuhva ra sii ra Felipe ra ñuu Betsaida nu cu si Galilea, ta i catyi ra sihin ra: Tata, cuñí xaan ndi natuhun ndi sihin ra Jesús.

²² Ta i sahan ra Felipe, ta nacatyí ra sihin ra Andrés. Ta ziquí i sahan ra Andrés sihin ra Felipe cua nacatyí ra sihin ra Jesús.

²³ Ta i catyi ra Jesús sihin ra: Sa saa cuhva cua cui, ta ra i quisi ndya gloria cua cunanuhu ra ndya gloria.

²⁴ Sa ndisa ta sa ndisa catyi sihin ndo vatyi minoo siti trigo tatu ma canacava si nu ñuhu ma cuu si, zoco minoo tuhun ñi si cuá coo sa tacuan. Ta tatu cua cuu si, cuaha xaan siti si cuá nanduu.

²⁵ Ra sa cuñí coo vaha, cunaa ra sihin si. Ta inga ra tatu ndoo ra vaha vazu cahan ñiyiví sii ra sa cuenda Tuhun Ndyoo, cua coo vaha ra cuan ndya gloria, ta ma cuu afíima ra.

²⁶ Tatú iyo ndo cuñí ndo zatyíño ndo tysiñe, cundyico ndo sii. Ta nu cua cundyei, yucuan cua cundyaa tucu maa ndo. Ta tatu iyo ndo sa cua zatyíño ndo tysiñe, cua zacahnu Zuti sii ndo.

Nacatyi ra Jesús vatyi cua cuu ra

27 Ta vityi ndahvi xaan cuñi añime. ¿Ta ñaa sa cua catyi? ¿Atu cua catyi: "Zuti zacacun sii, sihin tundoho sa cua ndyehi vityi"? Ma catyi tacuan vatyi vasi ñuu ñiyiví sa cuenda sa cua ndyehi tundoho ya.

28 Vaha ca nacatyi: "Zuti zanducahnun zivun." Tacuan i catyi ra Jesús. Ta ziquí i quisi minoo nduzu ndya andiví ta catyi si: Sa i zanducahnui mi zívi, ta cua zanducahnui sii si inga saha.

29 Ta i siñi ñiyiví sa yulu yucuan nduzu cuan, ta i catyi ñu vatyi cahan zavi. Ta inga ñu i catyi ñu vatyi cahan minoo ángel ra Ndyoo sihin ra Jesús.

30 Ta i nacahan ra Jesús ta catyi ra: Ña vasi nduzu ya sa cuenda mi. Vasi si sa cuenda maa ndo.

31 Ta vityi cua tasi tuñi ra Ndyoo sii ñuu ñiyiví ya. Ta ra ndyaca ñaha sii ñuu ñiyiví ya, vityi cua tava ra Ndyoo sii ra ityi sata.

32 Ta yuhvi tatu cua tyaa ñiyiví sii nu cruz, cuaha xaan ñiyiví cua sino iñi sii.

33 Ta sa i cahan ra Jesús tuhun ya, saha ra sa cua coto ñiyiví cuhva cua cuu ra.

34 Ta i nacahan ñiyiví ta catyi ñu: Sa siñi ndi vatyi catyi si nuu ley ra Ndyoo vatyi ra Cristo, tacuan ñi cua coo ra tandihí cuii tylemu. ¿Ta ñacu catyun vatyi cuñi si sa tyaa ñiyiví sii ra i quisi ndya gloria nu cruz? ¿Yoo ra cuu ra i quisi ndya gloria?

35 Tacuan ta ziquí i nacatyi ra Jesús sihin ñu: Zuhva ñi ca cuhva cua coo ñúhu nu yulu ndo. Caca ndo nii ñi sa ndyaa ñúhu ya, coto quisi sa ñaa ta ma cuu ca caca ndo. Vatyi ra sica noo nu ñaa, ña sito ra ndya ityi cuahan ra.

36 Nii ñi sa ndyaa ñúhu sihin ndo, sino iñi ndo sii ra. Vatyi tacuan ta cua cuu ndo zehé ñúhu. (Cua cuu ndo ñiyiví sa zama cuhva iyo.)

Ña sino iñi ra hebreo sii ra Jesús

Tacuan i catyi ra Jesús, ta cuahan ra ta i quihví xehe ra sii ñu.

37 Vazu sa cuaha xaan sa ndyityi i zavaha ra nuu ñiyiví cuan, zoco ñá sino iñi ñu sii ra

38 vatyi tacuan ta cua quita si tañi i catyi ra Isaías, minoo ra cu profeta, quíví i catyi ra tyehen: Tata ¿yoo ra sino iñi sa quehin? Ta ¿yoo sii i zañaha ra ndyaca ñaha sii yo cuhva cuu zacuu ra?

39 Yucuan cuenda ña cuu sino iñi ñu vatyi zuun ñi i catyi tucu ra Isaías:

40 I zanducuaa ra siti nuu ñiyiví cuan, ta i zanduñihi ra iñi ñu. Ta tacuan ta ma ndyehe ñu sihin siti nuu ñu, ta ma cutuñi iñi ñu sihin añima ñu ta nazama ñu cuhva iyo ñu, ta ma zanduvehi sii ñu.

Catyi ra Ndyoo.

41 I catyi ra Isaías tuhun ya quíví i ndyehe ra vatyi cahnu xaan cuu maa ra Ndyoo ta tyaqui xaan ra. Ta i cahan ra cuenda ra.

42 Zoco cuaha xaan ra cu tylño ñuu cuan, i sino iñi ra sii ra Jesús. Zoco ñá saha ra sa ndaa vatyi yuhu ra sii ra fariseo coto tava ndyizo ra sii ra sisi vehe ñuhu.

43 Vatyi cuñi xaan ca ra cuan sa tyaa ñiyiví yahvi sii ra, ta ña sica iñi ra tatu cua cuzíi iñi ra Ndyoo sihin ra a ma cuzíi iñi ra.

Tuhun cahan ra Jesús cua tyicuhva si sii ñiyiví

44 I cana saa ra Jesús ta catyi ra: Ra sa sino iñi sii, ña iñi ñi sii mi sino iñi ra. Zoco sino tucu iñi ra sii ra i tasi sii.

45 Ta ra sa ndyehe sii, ndyehe tucu ra sii ra i tasi sii.

46 Vasi ñuu ñiyiví ya tañi minoo ñúhu vatyi yoo ra sino iñi sii, ma ndoo ca ra nu ñaa.

47 Ta tatu sa siñi ñiyiví sa quehin ta ma tyaa ñu yahvi, ma tyicuhve sii ñu vatyi ña vasi tyicuhve. Vasi zacaqui sii ñiyiví ñuu ñiyiví.

48 Ra sa ña cuñi sii mi caña ñi, ta ña tyaa ra yahvi tuhun quehin, sa

iyo sa cua tyicuhva sii ra. Tuhun sa i quehin, yucuan cuu sa cua tyicuhva sii ra quiví cua tyicuhva ra Ndyoo sii ñiyivi.

⁴⁹ Vatyi ña quehin sa cuenda ñi mi. Zuti, ra i tasi sii, i saha ra tyiño sii, tandihí cuii sa cuu nacatya.

⁵⁰ Ta site vatyi tyiño i saha ra sii, cuu cuhva cundito ñiyivi tandihí tyiemvu sihin ra. Yucuan cuenda tandihí cuii sa catyi sihin ndo, quehin cuhva saha Zuti tyiño sii.

13

I nacatya ra Jesús saha ra i casi ra

¹ Ta sa yatyi vico zuhun, ta sa sito ra Jesús vatyi sa cua tahan si cuhva quita ra ñuu ñiyivi ya ta cuhun ra nu ndyaa Zutu ra. I cuñi xaan ra sii ñiyivi sino iñi sii ra ihya ñuu ñiyivi ta cuhva cuñi ra sii ñu, ma ndihí maa si.

² Ta cuhva sa cuxiñi ra, ta i quihvi cuihna añima ra Judas Iscariote zehe ra Simón, vatyi cua xico tuhun ra sii ra Jesús.

³ Ta sa sito ra Jesús vatyi sa i saha Zutu ra tandihí cuii tyiño sii maa ra. Ta sa sito ra vatyi ndya nu ndyaa ra Ndyoo i quita ra, ta ndya indyacuan cua cunanuhu ra.

⁴ Ta cuhva sa cuxiñi ra i nduvita ra, ta i tava ra zahma sa ndisi ra, ta sihñi ra minoo toalla sisi ra.

⁵ Ta ziquí i tyihi ra ndutya sisi minoo caa, ta quisaha nacatya ra saha ra i casi ra. Ta zana-ityi ra saha ra sihin toalla sa nuhñi sisi ra.

⁶ Ta sa saa ra nu ndyaa ra Simón Pedro, i catyi ra Pedro sihin ra: Tata, ¿atu cua nacatyon sehi?

⁷ Ta i nacahan ra Jesús ta catyi ra: Ña cutuñi iñun sa zavehi vityi, zoco cuee ca cua cutuñi iñun. Catyi ra.

⁸ Ta i catyi ra Pedro sihin ra: Numinoo saha ta ma nacatyon sehi caña fi. Ta i catyi ra Jesús sihin ra: Tatu ma nacatye sohon, yivi ñiyivi sii cuu suun.

⁹ Ta i catyi ra Simón Pedro sihin ra: Tata, ña maa ñi sehi nacatyon, nacatya tucun ndehi ta xiñi.

¹⁰ Ta ziquí i catyi ra Jesús sihin ra: Ra sa sityi, maa ñi saha ra cuñi si ndoo vatyi sa ndii maa ra. Ta sa ndii maa ndo, zoco ña tandihí ndo.

¹¹ Tacuan i catyi ra Jesús vatyi sa sito ra yoo ra cua xico tuhun sii ra. Yucuan cuenda i catyi ra: “Ña ndii tandihí ndo.”

¹² Tacuan ta sa ndihí nacatya ra saha ra, ta i naquihin ra zahma ra, ta sicundya ra mesa. Ta ziquí i nacatya ra sihin ra: ¿Atu cutuñi iñi ndo cuhva i zavehi sihin ndo?

¹³ Catyi maa ndo maestro cui, ta catyi ndo ra ndyaca ñaha cui, ta vaha cahan ndo vatyi zuun ra cui.

¹⁴ Tatú yuhvi cuu maestro ta ra ndyaca ñaha ta i nacatye saha ndo. Tacuan tucu maa ndo, tahan si nacatya ndo saha tahan ndo.

¹⁵ Vatyi sa i sehi minoo cuhva sii ndo, ta cuñi si sa cua zavaha tucu ndo cuhva i zavehi sihin ndo.

¹⁶ Sa ndisa ta sa ndisa catyi sihin ndo vatyi ña cahnu ca ra cu muzu ta ziquí patrón ra. Ta cahnu ca cuu ra tava tyiño sii ñiyivi ta ziquí ca ra cuahan sihin tyiño.

¹⁷ Tatú sito ndo tuhun ya, zii xaan cua cuñi ndo tatu zavaha ndo sii si.

¹⁸ Ña quehin sa cuenda tandihí ndo. Sa site yoo ndo i casi. Zoco cua cuu si cuhva catyi tutu Tuhun Ndyoo: “Ra sa sasi pan sihin, cua nduvita ra ziquí.”

¹⁹ Ta vityi sa nacatyi sihin ndo cuee ca sa tahan si vatyi quiví cua tahan si ta cua sino iñi ndo vatyi yuhvi cuu ra sa nacatyi sihin ndo.

²⁰ Sa ndisa ta sa ndisa catyi sihin ndo vatyi ra naquihin vaha sii ra tasi, naquihin vaha ra sii. Ta ra naquihin vaha sii, naquihin vaha ra sii ra sa tasi sii.

Zacoto ra Jesús sii ra i casi ra vatyi cua xico tuhun ra Judas sii ra

²¹ Ta sa ndihí cahan ra Jesús tuhun cuan, ta i quisi minoo sa

cuihya xaan cuñi añima ra, ta i catyi ra: Sa ndisa ta sa ndisa catyi sihin ndo vatyi iyo minoo ndo cua xico tuhun ndo sii.

²² Ta cuhva cuan i nandyehe ra i casi ra Jesú斯 sii tahan ra vatyi ña sito ra yoo ra cuu ra cahan ra Jesú斯 tuhun.

²³ Ta minoo ra i casi ra Jesú斯, ra sa cuñi xaan ra, nañaa ra sii ra Jesú斯.

²⁴ Ta i saha ra Simón Pedro minoo zeña sii ra cuan sihin ndaha ra vatyi nanducu tuhun ra sii ra Jesú斯 yoo ra cuu ra sa cahan ra tuhun.

²⁵ Ta ra yucuan, i tuhva ca ra sii ra Jesú斯 ta nducu tuhun ra: Tata, ¿yoo ra cuu ra sa cohon tuhun?

²⁶ Ta i nacahan ra Jesú斯 ta catyi ra: Cua zatyii pan, ta cua cuhve sii si sii minoo ra. Yucuan ra cuu ra. Ta sa zatyii ra Jesú斯 pan cuan, ta i saha ra sii si sii ra Judas Iscariote, zehe ra Simón.

²⁷ Ta sa ndihí sasi ra Judas pan cuan, i quihví cuihna añima ra. Ta ziquí i catyi ra Jesú斯 sihin ra: Cuhva sa cua zavohon, zavohon sii si yatyi ca.

²⁸ Zoco ña sito numinoo ra ndyaa mesa sihin ra Jesú斯 ñaa cuenda i cahan ra tacuan sihin ra Judas.

²⁹ Iyo ra i sica iñi ra vaziquí i catyi ra Jesú斯: "Cuahan cua zaton ñaa sa cua cuñi si sii yo cuenda vico zuhun ya." A catyi ra: "Cuhvon xuhun sii ñiyíví ndahvi." Vatyi cumi ra Judas yiti sa ñoho xuhun ra Jesú斯.

³⁰ Ta sa ndihí sasi ra Judas pan cuan, ta zuun ñi caa cuhva cuan i nduvita ra ta cuahan ra. Ta sa cuaa ñi cuu si.

Minoo tyiño saa saha ra Jesú斯, ta ñiñi xaan si

³¹ Ta sa yaha cuahan ra Judas ta ziquí i catyi ra Jesú斯: Vityi sa tahan si cuhva vatyi cua coto ñiyíví vatyi iyo xaan cuhva sii ra i quasi ndya gloria ta cua zacahnu ñu sii ra, ta cua zacahnu xaan ñu sii ra Ndyoo sa cuenda ra.

³² Vatyi tatu ra i quasi ndya gloria zañaha ra vatyi cahnu xaan cuu maa ra Ndyoo. Zuun ñi cuhva cuan cua zañaha ra Ndyoo vatyi cahnu xaan cuu maa ra cuan. Ta numi xaan cua nacoto vaha ndo sii si.

³³ Ndoho zehe luhli, zuhva ñi ca cuhva cua cundyei sihin ndo. Cuee ca cua nanducu ndo sii, ta tañi sa i catyi sihin ra hebreo nacatyi sihin maa ndo vityi vatyi nu cuhin ma cuu cuhun ndo.

³⁴ Sehi minoo tyiño saa sii ndo vatyi cuñi ndo sii tahan ndo tañi cuñi mi sii ndo.

³⁵ Ihya cuhva cua coto tandihí ñiyíví vatyi ndyico ndo sii, tatu cuñi ndo sii tahan ndo.

Zacoto ra Jesú斯 sii ra i casi ra vatyi cua catyi ra Pedro vatyi ña sito ra sii ra

³⁶ Ta i catyi ra Simón Pedro sihin ra: Tata, ¿ndyamaa cua cuhun? Ta i catyi ra Jesú斯 sihin ra: Nu cuhin ma cuu cuhun sihin vityi, zoco cuee ca ta cua cuhun. Catyi ra.

³⁷ Ta i catyi tucu ra Pedro sihin ra: Tata, ¿ñaa cuenda ma cuu cuhun suhun vityi? Cuhin vazu cui sa cuendon.

³⁸ Ta i nacahan ra Jesú斯 ta catyi ra: ¿Atu cuu cuun sa cuende? Sa ndisa ta sa ndisa catyi suhun vatyi cuee ca sa vacu saa ndiví tyahnu ta cua catyun uñi tahan saha vatyi ña siton sii.

14

Tañi minoo ityi cuu ra Jesú斯, ta cuu cuhun yo nu ndyaa Zutu ra

¹ I catyi ra Jesú斯: Ma caca xaan iñi ndo. Sa sino iñi ndo sii ra Ndyoo. Sino tucu iñi ndo sii mi.

² Vehe Zuti, iyo cuaha xaan nu cuu cundyaan ndo. Tatu sa ña ndisa, ma nacatyi sihin ndo. Cuhin cua zanduvehi nu cua cundyaan ndo.

³ Ta tatu cuhin ta zanduvehi nu cua cundyaan ndo, cua quasi inga saha ta naquihin sii ndo vatyi cuhun ndo ta cundyaan ndo nu cua cundyei.

⁴ Sito ndo ndyamaa cuehin, ta sito ndo ityi.

⁵ Ta i catyi ra Tomás sihin ra: Tata, ña sito ndi ndyamaa cuohon ¿ta yozo caa cuu coto ndi ityi? Catyi ra.

⁶ Ta i catyi ra Jesús sihin ra: Yuhví cui ityi. Ta maa ñi sa ndisa cuii quehin, ta sehi cuhva cundito ñiyivi. Yoñi cuu saa nu ndyaa Zuti tatu ma sino iñi ñuu sii.

⁷ Tatu sa vatyi nacoto ndo sii, nacoto tucu ndo sii Zuti. Ta ndya vityi sa nacoto ndo sii ra, ta sa ndyehe ndo sii ra.

⁸ Ta i catyi ra Felipe sihin ra: Tata, zañohon sii ra Ndyoo Zutun sii ndi. Ta sihin sa yucuan ñi ta sa vaha ñi.

⁹ Ta i catyi ra Jesús: Felipe, sa cuaha xaan quívi ndyei sihin ndo. ¿Atu ta nacoto con sii? Ra sa ndyehe sii, sa ndyehe ra sii ra Ndyoo Zuti. ¿Ta ñaa cuenda catyun vatyi zañehi sii ra Ndyoo Zuti sii ndo?

¹⁰ ¿Atu ña sino iñun vatyi ndyaa ra Ndyoo Zuti sihin ta iñi ñi cui sihin ra? Ta tuhun quehin, ña quehin sa cuenda ñi mi. Quehin tuhun ra Ndyoo Zuti, ra ndyaa sihin. Ta tyiño zavehi, maa ra zavaha sii si.

¹¹ Sino iñi ndo vatyi iñi ñi cui sihin ra Ndyoo Zuti ta ndyaa ra sihin. Zoco tatu ña sino iñi ndo cuhva cuan, zoco sino iñi ndo sa cuenda tyiño zavehi.

¹² Sa ndisa ta sa ndisa catyi sihin ndo, ra sa sino iñi sii, cua zavaha ra tyiño tañi tyiño zavehi. Ta tyiño cahnu ca cua zavaha tucu ra vatyi cuehin nu ndyaa ra Ndyoo Zuti.

¹³ Ta tandihí sa cua caca ndo sii, sihin zívi mi, cua cuhve sii si. Ta tacuan ta cua zacahnu ca ñiyivi sii ra Ndyoo Zuti sa cuenda sa cua zavaha Zehe ra.

¹⁴ Tandihí sa cua caca ndo sii, sihin zívi mi, cua cuhve sii si sii ndo.

I catyi ra Jesús vatyi cua zaquisi ra sii Tatyi Ii

¹⁵ Tatu cuñi ndo sii, zavaha ndo cuhva catyi sihin ndo.

¹⁶ Ta cua caca tahvi sii ra Ndyoo Zuti ta cua zaquisi ra sii inga ra cua tyindyee sii ndo. Ta cua ndoo ra cuan sihin ndo tandihí cuii tyiemvu.

¹⁷ Tatyi Ii cuu ra, ta maa ñi sa ndisa cahan ra. Ña cuu ñihi ñiyivi ndya vaha ñi sii ra vatyi ña ndyehe ñu sii ra, ta ña nacoto ñu sii ra. Zoco sa sito maa ndo sii ra vatyi ndyaa ra sihin ndo, ta cua coo ra sisi añima ndo.

¹⁸ Ta ma zandoi sii ndo tacuan ñi. Cua quisi tuqui nu ndyaa ndo.

¹⁹ Zuhva ñi ca cuhva, ta ma ndyehe ca ñiyivi ndya vaha ñi sii. Zoco maa ndo cua ndyehe ndo sii. Cua cundito, ta yucuan cuenda cua cundito tucu maa ndo sihin.

²⁰ Ta quívi cuan, cua coto ndo vatyi iñi ñi cui sihin Zuti, ta iñi ñi cua cuu ndo sihin ta mi sihin maa ndo.

²¹ Ta ra sa cumi vaha tandihí cuii tuhun i nacatyi sihin ndo ta zavaha ra sii si, yucuan ra cuu ra sa cuñi xaan sii. Ta ra sa cuñi sii, cuñi xaan Zuti sii ra. Ta cua cuñi xein sii ra, ta cua quisi nu ndyaa ra. Tacuan i catyi ra Jesús.

²² Ta i catyi ra Judas, zoco yivi ra Judas Iscariote cuu ra, ta i catyi ra sihin ra: Tata, ¿ñaa cuenda cua quisun nu ndyaa maa ndi, ta ma cuhun nu ndyaa inga ñiyivi ndya vaha ñi?

²³ Ta i nacahan ra Jesús ta catyi ra sihin ra: Tatu cuñi minoo ra sii mi sa ndisa, cua tyaa ra yahví tuhun quehin. Ta cua cuñi xaan Zuti sii ra. Ta cua cuhun ndi nu ndyaa ra, ta cua ndoo ndi sihin ra.

²⁴ Zoco ra ña cuñi sii, ña tyaa ra yahví tuhun quehin. Ta tuhun quehin ta sa siñi ndo, yivi tuhun ñi mi cuu si. Sa cuenda ra Ndyoo Zuti cuu si, ra i tasi sii.

²⁵ Ta sa nacatyi cuhva ya sihin ndo nii ñi sa ndyei sihin ndo vityi.

²⁶ Ta ra sa cua tyindyee sii ndo, ra cua Tatyi Ii, cua tasi ra Ndyoo Zuti sii

ra sa cuenda mi. Cua zacuaha ra sii
ndo tandihí. Ta cua zanacohon ra
iñi ndo tandihí sa i catyi sihin ndo.

²⁷ Ta sa coo vaha ndo sehi sii ndo.
Ta sa coo vaha ndo zandoi sihin
ndo. Ña sehi sii si cuhva saha ñiyiví
ñuu ñiyiví ya. Ma cuhva ndo sa caca
xaan iñi ndo, ta ma yuhu ndo.

²⁸ Ta vityi sa siñi ndo sa catyi
vatiy cuhin, ta cua quisi tuqui nu
ndyaa ndo. Tatu ndisa vatyí cuñi
xaan ndo sii, zii xaan cua cuñi ndo
vatiy cuhin nu ndyaa ra Ndyoo Zuti
vatiy cahnu ca cuu maa ra ta ziqui
ca mi.

²⁹ Ta vityi sa nacatyi sihin ndo
cuee ca sa tahan si vatyi quiví cua
tahan si ta cua sino iñi ndo.

³⁰ Ña cuaha ca tuhun cua quehin
sihin ndo vatyi sa vasi ra ndyaca
ñaha ñuu ñiyiví ya, ta ña ndyaca
ñaha ra sii.

³¹ Zoco sa cua nacoto ñiyiví ñuu
ñiyiví vatyi cuñi xein sii ra Ndyoo
Zuti, yucuan cuenda cua zavehi
tyiño i tava ra sii. Ta vityi nandu-
vita yo ta cuhun yo.

15

*Ra Jesúus cuu ra tañi minoo yoho
uva sihin zoco tu*

¹ Yuhvi cui tañi minoo yoho uva,
ta Zuti cuu tañi ra zatyiño nu ndyaa
tu.

² Ta tandihí zoco yoho uva cuan
sa ñahñi yulu vixi vaha saha cua
cahndya ra sii si. Ta tandihí zoco
yoho sa ndyizo yulu vixi vaha, zan-
duvii ra sii si, ta tacuan ta cua
cuhva si cuaha ca.

³ Ta maa ndo sa nduvii ndo sihin
tuhun quehin sihin ndo.

⁴ Iin ñi cuu ndo sihin. Tañi mi
iin ñi cui sihin ndo. Tañi minoo
zoco yoho, ma cuu cuhva si yulu
vixi sa maa ñi maa si, tatu ña iin
ñi cuu si sihin yoho sa cuu saha si.
Ta tacuan tucu maa ndo; ma cuu
zavaha ndo cuhva catyi sihin ndo
tatu ña iin ñi cua cuu ndo sihin.

⁵ Yuhvi cui tañi yoho uva cuan,
ta maa ndo cuu tañi zoco tu. Ra
sa nañaa sii, nañei sii ra. Ta cuaha

xaan sa vaha zavaha ra. Vatyi tatu
ma tyindyei sii ndo ñahñi maa sa
cuu zavaha ndo.

⁶ Ta ra sa ña nañaa sii, cua zavite
sii ra tañi minoo zoco yoho. Ta cua
na-ityi zoco yoho cuan, ta cua quisi
naquihin ñiyiví sii si, ta cua tyihi ra
sii si nu cayu ñúhu vatyi cua cayu
si.

⁷ Tatu nañaa ndo sii, ta tuhun
quehin iyo vaha si sihin ndo, cua
caca ndo ñaa sa cuñi ndo ta cua ñihi
ndo sii si.

⁸ Cuhva cuan zacahnu xaan si
sii Zuti tatu cuaha xaan sa vaha
zavaha ndo. Ta tacuan ta cua cuu
ndo ñiyiví ndyico sii mi sa ndisa.

⁹ Cuhva cuñi xaan Zuti sii, ta
tacuan cuñi sii maa ndo. Ma naa iñi
ndo cuhva cuñi xein sii ndo.

¹⁰ Tatu zavaha ndo tandihí sa
catyi sihin ndo, cua cuñi xein sii
ndo. Tañi sa i tyaa xein yahvi
tandihí sa i catyi Zuti sihin, ta cuñi
xaan ra sii.

¹¹ Quehin cuhva ya sihin ndo
vatiy cuzii cuñi ndo tañi sa zii cuñi
mi. Ta sa zii cuñi maa ndo, ma ndihí
si.

¹² Ihya cuu tyiño sehi sii ndo
vatiy cuñi xaan ndo sii minoo ndo
ta sii inga ndo tañi cuñi xein sii ndo.

¹³ Tatu cuñi ndisa cuii yo sii
inga ñiyiví, cuhva yo sa cuu yo sa
cuenda ñu. Ñahñi inga ca cuhva
ñihi ca cuñi yo sii ñu.

¹⁴ Maa ndo cuu ñiyiví sa cuñi xein
tatu zavaha ndo tandihí cuhva sa i
catyi sihin ndo.

¹⁵ Ndyo vityi ma cahan que muzu
sihin ndo vatyi minoo muzu ña sito
ra ñaa sa zavaha patrón ra. Zoco
catyi vatyí ñiyiví sa cuñi xein cuu
sii maa ndo vatyi sa i nacatyi sihin
ndo tandihí cuii sa i nacatyi Zuti
sihin.

¹⁶ Ñá casi ndo sii. Yuhvi cuu ra
i casi sii ndo. Ta i sehi tyiño sii
ndo vatyi cuhun ndo ta zatyiño ndo
tyiñe. Ta cua quita vaha tyiño ndo,
ta ma cuna si. Ta tandihí sa cua
caca ndo sii Zuti sihin ziví mi cua
cuhva ra sii si sii ndo.

¹⁷ Ta ihya cuu tyiñ sehi sii ndo vatyi cuñi xaan ndo sii minoo ndo ta sii inga ndo.

Cua cuxaan ñiyiví ndya vaha ñi sihin ndo

¹⁸ Tatú ña cuu ndyehe ñiyiví ña sino iñi sii ndo, sa sito ndo vatyi sa xihna ñi sii mi ña cuu ndyehe ñu ta ziqui sii maa ndo.

¹⁹ Tatú ñiyiví cuenda ñuu ñiyiví ya cuu ndo, cua cuñi xaan ñiyiví ñuu ñiyiví ya sii ndo. Zoco yiví ca ñiyiví ñuu ñiyiví ya cuu ndo vatyi sa i casi sii ndo sisi ñuu ñiyiví ya. Yucuan cuenda, ña cuu ndyehe ñiyiví ndya vaha ñi sii ndo.

²⁰ Nacohon iñi ndo vatyi sa i nacatyi sihin ndo vatyi ña cahnu ca cuu ra cu muzu ta ziqui ca patrón ra. Tatú sa cuxaan ñiyiví sihin mi, cua cuxaan tucu ñu sihin maa ndo. Tatú zavaha ñu cuhva catyi, cua zavaha tucu ñu cuhva catyi maa ndo.

²¹ Zoco tandihí cuii nuu sa ña vaha cua zavaha ñu sihin maa ndo sa cuenda mi vatyi ña sito ñu sii ra i tasi sii.

²² Tatú sa ñá quisi quehin sihin ñu, ñahñi cuatyí ñu. Zoco vityi ñahñi cuhva cuu tyixehe ñu cuatyí ñu.

²³ Ra sa ña cuu ndyehe sii, ña cuu ndyehe tucu ra sii Zuti.

²⁴ Tatú sa ñahñi sa ndyityi i zavehi nu yucu ñu tañi sa yoñi zavaha, ñahñi cuatyí ñu. Zoco vityi sa i ndyehe ñu sii, ta i cuxaan ñu sihin mi ta sihin Zuti.

²⁵ Tacuan cua cuu si vatyi cua tahan si cuhva catyi si sisi zuun ñi ley maa ñu nu catyi si: "Vazu ñahñi cuatyí, zoco ma cuu ndyehe ñu sii." Catyi si.

²⁶ Zoco quiví naquisi Tatyí Ii, ra cua tasi ndya nu ndyaa ra Ndyoo Zuti, cuatyindyee ra sii ndo, ta maa ñi sa ndisa cua cahan ra. Ra cuan cua cuhva sa ndaa sa cuenda mi.

²⁷ Ta maa tucu ndo cua cuhva ndo sa ndaa vatyi i sindihí ndo sihin ndya quiví i quisaha zatyíñe.

16

¹ Ihya tuhun i quehin sihin ndo vatyi ma catyi saha ndo.

² Cua tava ndyizo ñiyiví sii ndo sata vehe ñuhu. Ta cua saa cuhva vatyi yoo ra sa cua cahñi sii ndo ta cua caca iñi ra vatyi tyiñ ra Ndyoo zatyíñe ra.

³ Ta cua zavaha ñu cuhva ya vatyi ña sito ñu sii ra Ndyoo Zutu yo a sii mi.

⁴ Zoco vityi sa i nacatyi cuhva ya sihin ndo vatyi quiví cua tahan si ta cua nacohon iñi ndo vatyi sa i catyi sihin ndo.

Cuhva cua zavaha Tatyí Ii ra Ndyoo

Ñá catyi tuhun ya sihin ndo sa xi-hna ñi vatyi ndyei sihin ndo.

⁵ Zoco vityi cua cuhin ndya nu ndyaa ra i tasi sii. Ta yoñi ndo cua nducu tuhun ndo sii, ndyamaa cuhin.

⁶ Ta vityi sa nducuihya cuñi añima ndo vatyi sa i catyi tuhun ya sihin ndo.

⁷ Ta catyi sa ndisa sihin ndo vatyi ñiñi xaan cuu si sa cuhin vatyi tatu ma cuhin ma quisi Tatyí Ii ziqui ndo. Cua cuhin ta cua zaquisi sii ra ziqui ndo.

⁸ Ta quiví cua quisi ra, cua zacoto ra sii ñiyiví vatyi iyo cuatyí ñu. Ta cua zañaha ra vatyi iyo minoo ityi ndoo. Ta cua tasi tuñi ra Ndyoo sii ñiyiví sa ma ndu-uu iñi cuatyí.

⁹ Cua catyi ra sihin ñiyiví vatyi iyo cuatyí ñu vatyi ña sino iñi ñu sii.

¹⁰ Cua zañaha ra sii ñu vatyi iyo minoo ityi ndoo vatyi cuhin nu ndyaa Zuti, ta ma ndyehe ca ndo sii.

¹¹ Ta cua zañaha ra cuhva cua tasi tuñi ra Ndyoo vatyi cua tasi tuñi ra Ndyoo sii ra ndyaca ñaha ñuu ñiyiví ya.

¹² Iyo cuaha xaan ca sa cuñi catyi sihin ndo, zoco ma cutuñi iñi ndo sii si vityi.

13 Zoco quivi cua quasi Tatyi Ii, cua cahan ra sa ndisa vatyi ra cahan sa ndisa cuu ra. Maa ra cuan, cua zañaha ityi sii ndo sii tandihí cuii sa ndisa. Ma cahan ra sa cuenda ñi maa ra. Tandihí sa siñi ra nu ndyaa ra Ndyoo Zutu yo, cua zacoto ra sii ndo. Ta cua zacoto ra sii ndo ñaa sa cua coo ityi nuu ca.

14 Cua zacahnu ra sii mi vatyi cua quihin ra tuhun quehin sihin ra, ta cua zacoto ra sii ndo.

15 Tandihí cuii sa iyo sii Zuti ta sii mi cuu tucu si. Yucuan cuenda catyi vatyi cua quihin ra tuhun quehin sihin ra, ta cua zacoto ra sii ndo.

Cuihya cuñi ra i casi ra Jesús, zoco cuee ca ta cua nduzii cuñi ra

16 Zuhva cuii ñi ca quivi, ta ma ndyehe ca ndo sii. Ta inga zuhva ca quivi ta cua nandyehe ndo sii, vatyi cuhin nu ndyaa Zuti. Catyi ra.

17 Tacuan ta i quisaha natuhun tahan ra i casi ra Jesús sihin tahan ra: ¿Ñaa tuhun cuu si sa catyi ra sihin yo? vatyi catyi ra: "Zuhva cuii ñi ca quivi ta ma ndyehe ca ndo sii, ta inga zuhva ca quivi ta cua nandyehe ndo sii vatyi cuhin nu ndyaa Zuti". Catyi ra.

18 ¿Ñaa cuñi si catyi si sa catyi ra zuhva cuii ñi ca quivi? Ña cutuñi iñi yo ñaa tuhun cahan ra. Catyi ra i casi ra Jesús.

19 Ta i tuu iñi ra Jesús vatyi cuñi nducu tuhun ra sii ra, ta i catyi ra sihin ra: ¿Atu nducu tuhun ndo sii tahan ndo sa cuenda tuhun i catyi vatyi zuhva ñi ca quivi ta ma ndyehe ca ndo sii ta inga zuhva ca quivi ta cua nandyehe ndo sii?

20 Sa ndisa ta sa ndisa catyi sihin ndo vatyi cua vacu xaan ndo ta cua coo xaan tucuihya iñi sii ndo, zoco ñiyivi ñuu ñiyivi ya, cua cuzii xaan cuñi ñu. Ta cua nducuuihya xaan iñi maa ndo, zoco cuee ca ta cua nduzii xaan cuñi ndo.

21 Quiyi sa cua cacu zehe minoo ñaha, ndyaa xaan ña tundoho vatyi

sa saa cuhva cacu si. Zoco tatu sa yaha cacu zehe ña, ña nacohon ca iñi ña tundoho. Sa nduzii cuñi ña vatyi i cacu minoo rayii ñuu ñiyivi.

22 Ta maa ndo vityi, cuihya xaan cuñi ndo. Zoco cua ndyehi sii ndo inga saha, ta cua nduzii xaan cuñi ndo. Ta yoñi cua cuu tyaa siyo sa zii cuñi ndo.

23 Ta quivi cuan, ma nducu tuhun ca ndo sii. Sa ndisa ta sa ndisa catyi sihin ndo, tandihí sa cua caca ndo sii ra Ndyoo Zuti sihin zivi mi, cua cuhva ra sii si sii ndo.

24 Nu vityi ta tañaha ca caca ndo sihin zivi mi. Caca ndo ta cua ñihi ndo, ta tacuan ta zii xaan cua cuñi ndo.

I zahacanaa ra Jesús ziqui ñuu ñiyivi ya

25 I quehin tuhun ya sihin ndo sihin minoo cuhva. Zoco cua saa cuhva ta ma cahan que sihin ndo sihin minoo cuhva. Cua catyi casi vehi sihin ndo cuhva iyo ra Ndyoo Zuti.

26 Ta quivi cuan cua caca ndo sii ra Ndyoo sihin zivi. Ta ña catyi vatyi cua caca tahvi sii ra Ndyoo Zuti sa cuenda ndo

27 vatyi zuun ñi maa ra Ndyoo Zuti cuñi xaan ra sii ndo vatyi cuñi xaan ndo sii, ta sino iñi ndo vatyi i quasi ndya nu ndyaa ra Ndyoo.

28 Ndyaa nu ndyaa ra Ndyoo Zuti i quite ta vasi ñuu ñiyivi. Ta cua zandoo tuqui ñuu ñiyivi ya ta cunahuhi nu ndyaa ra Ndyoo Zuti inga saha.

29 Tacuan ta i catyi ra i casi ra sihin ra: Vityi casi vaha cohon, ta ña cahan con sihin minoo cuhva.

30 Vityi sito ndi vatyi siton tandihí, ta ña cuñi si sa nducu tuhun numinoo ra suun (vatyi sa siton tandihí sa sica iñi ndi). Yucuan cuenda sino iñi ndi vatyi ndya nu ndyaa ra Ndyoo i quisun.

31 Ta i catyi ra Jesús sihin ra: ¿Atu sino iñi ndo vityi?

32 Sa cua saa cuhva, ta zuun ñi vityi cuu si, ta cua quiti cuatyi ndo minoo minoo ndo ndya vehe ndo,

ta cua zandoo ndo sii, maa tuhun ñi. Zoco ña maa tuhun ñi cua ndoo. Ndyaa ra Ndyoo Zuti sihin.

³³ I quehin tuhun ya sihin ndo vatyi tacuan ta cua coo sa taxi añima ndo sa cuenda mi. Ñuu ñiyivi ya cua ndyehe ndo tundoho, zoco ma yuhu ndo vatyi sa i zahacanei ziqui ñuu ñiyivi ya.

17

Sica tahvi ra Jesús sii ra Ndyoo cuenda ra i casi ra

¹ I cahan ra Jesús tuhun ya, ta ziqui i nandyehe ndaa ra ity andivi ta catyi ra: Ndyoo Zuti, sa saa cuhva. Zacaahnun sii zehun ta cuhva cua cuu zacaahnun zehun suun.

² I sohon sa cundyaca ñehi ziqui tandihi ñiyivi sa iyo ñuu ñiyivi, ta i sohon sa vatyi cuu cuhve sa cundito ñu tandihi cuii tyiemvu, tandihi ñu sa i sohon sii.

³ Ta ihya cuu cuhva cua cuu cundito ñu sihin, tatu nacoto ñu suun vatyi minoo tuhun ñi ra cuu Ndyoo sa ndisa cuii cuun. Ta sa nacoto ñu sii yuhvi ra Jesucristo, ra i tasun.

⁴ I zacaahni suun ñuu ñiyivi ya. I zandihi tyiño sa i sohon sii.

⁵ Ta vityi, Ndyoo Zuti, zacaahnun sii nu ndyoon sihin cuhva sa sicoo sii, quivi i sindyei suhun indyacuan cumañi ca sino ñuu ñiyivi.

⁶ I zañehi sii ra i sohon sii, cuhva iyo moo. Sii moo cuu sii ra, ta i sohon sii ra sii, sisi ñuu ñiyivi ya. Ta i tyaa ra yahvi tuhun cahan moo.

⁷ Ta vityi sa sito ra vatyi tandihi cuii sa i sohon sii, cuenda moo cuu si.

⁸ Vatyi tuhun sa i sohon sii, i zañehi sii ra ya, ta i naquihin vaha ra sii si. Ta sito ra sandisa cuii vatyi ndya nu ndyaa moo i quite. Ta sino iñi ra ya vatyi moo i tasi sii.

⁹ Sica tahvi suun sa cuenda ra ya. Ña sica tahvi cuenda tandihi ñiyivi ñuu ñiyivi zoco cuenda ñiyivi sa i sohon sii, vatyi cuenda moo cuu sii ñu.

¹⁰ Ta tandihi ñu cuu sii, sii moo cuu sii ñu. Ta ñu cuu suun cuu tucu sii mi, ndihi ca. Ta zacaahnun ñu sii.

¹¹ Ta vityi ma cundyaa que ñuu ñiyivi ya vatyi quasi nanuhin nu ndyaa moo. Zoco ra ya cua ndoo ra ñuu ñiyivi ya. Zuti, ra ii, zacuendon sii ñu sihin zivi moo, ñu i sohon sii, ta tacuan ta cua ndu-iñin ñu tañi maa yo.

¹² Niñi sa ndyei sihin ra ya, i zacuende sii ra sihin zivi moo. I sicumi vehi sii ra ya, ta yoñi ra cua naa zoco minoo tuhun ñi ra cua naa tañi catyi Tuhun moo.

¹³ Zoco vityi cua quasi nu ndyoon. Ta niñi sa ndyei ñuu ñiyivi ya nacatyi tuhun ya, ta tacuan ta cua coo sa zii sii mi sihin ra ya, ta cua cuzii xaan iñi ra.

¹⁴ Sa i nacatyi Tuhun moo sihin ra, ta ña cuu ca ndyehe ñiyivi ñuu ñiyivi ya sii ra vatyi yivi ca cuenda ñuu ñiyivi ya cuu ra. Tañi mi yivi ra cuenda ñuu ñiyivi ya cui.

¹⁵ Ña sique suun sa tavon sii ra ñuu ñiyivi ya. Zoco sique suun sa vatyi cua zacuendon sii ra sisi sa ña vaha iyo ñuu ñiyivi ya coto ndoyo ñuhu ra.

¹⁶ Yivi ca cuenda ñuu ñiyivi ya cuu sii ra. Tañi mi yivi cuenda ñuu ñiyivi ya cui.

¹⁷ Zanduvaha con cuhva iyo ra sihin tuhun ndisa sii moo. Tuhun cahan moo, tuhun ndisa cuii cuu si.

¹⁸ Tañi i tasun sii mi ñuu ñiyivi ya, zuun ñi tacuan tasi sii ra ya ñuu ñiyivi.

¹⁹ Tyaa siye sii, sii sa ña vaha sa cuenda ra ya vatyi tacuan ta cua tyaa siyo tucu maa ra sii ra sii sa ña vaha ta cundyico ra sii, sa ndisa.

²⁰ Ña iñin ñi sa cuenda ra ya sica tahvi, zoco ndya sa cuenda ñiyivi cua sino iñi sii sihin tuhun sa cua cahan ra ya.

²¹ Ta tacuan ta cua ndu-iñin tandihi ñu tañi maa yo vatyi iñin ñi iyon sihin, ta iñin ñi iye suhun, Ndyoo Zuti. Ta tacuan ta cua ndu-iñin tucu maa ñu sihin yo. Ta

tacuan ta cua sino iñi ñiyivi ñuu ñiyivi vatyi i zaquisun sii.

²² Ta sa vaha xaan sa sohon sii, i sehi sii ra ya vatyi ndu-iin ra tañi maa yo iin ñi cuu yo.

²³ Yuhvi ta ra ya iin ñi cuu ndi tañi yoho sihin mi iin ñi cuu yo, ta nandu-iin maa ra minoo sa ndisa cuii vatyi tacuan ta cua coto ñiyivi ñuu ñiyivi vatyi moo i tasi sii ta cuñi xoon sii ra ya tañi cuñun sii.

²⁴ Ndyoo Zuti, cuñi sa vatyi ñiyivi sa i sohon sii, cua cundyaa ñu iin ñi sihin mi nu cua cundyei, ta tacuan ta cua ndyehe ñu sa vaha xaan sa i sohon sii. Vatyi i cuñi xoon sii, cumañi ca sino ñuu ñiyivi.

²⁵ Ndyoo Zuti, ra ndoo xaan, ña nacoto ñiyivi ñuu ñiyivi ya suun, zoco yuhvi site suun, ta sito ra ya vatyi moo i tasi sii.

²⁶ Sa i zacote sii ra ya cuhva iyo moo, ta cua zacote cuaha ca sii ra. Tacuan ta cuhva cuñi xoon sii, cua coo si sisi añima ra, ta cua coo tucu yuhvi sisi añima ra.

18

Cuahan ra Jesús vehe caa

¹ Ta sa ndihí cahan ra Jesús tuhun ya, i quita ra sihin ra i casi ra ta cuahan ra inga siyo yuu sa nañi Cedrón ndya minoo nu iyo cuaha xaan yutu ta ita. Ta yucuan i quihví ra sihin ra i casi ra.

² Ta ra Judas, ra sa xico tuhun sii ra Jesús, sa sito tucu maa ra nu cuahan ra vatyi tuhva xaan ra Jesús sahan yucuan sihin ra i casi ra.

³ Tacuan ta sa quihin ra Judas minoo ityi zandaru ta cuaha xaan policía cuenda ra zutu nahnu ta ra fariseo, ta cuahan ra sihin lámpara ta yiti ta sihin ndaha tyiño xaan.

⁴ Ta sa sito ra Jesús tandihí tundoho sa cua tahan ra. Ta xihna ca maa ra i quita, ta i nducu tuhun ra sii ra sa vasi cuan: ¿Yoo sii nanducu ndo?

⁵ Ta i nacahan ra ta catyi ra: Sii ra Jesús, ra ñuu Nazaret. Tacuan

ta i catyi ra Jesús: Zuun yuhvi cui. Catyi ra. Ta ndihí ra Judas sihin ra cuan. Maa ra cuu ra i xico sii ra Jesús.

⁶ Ta zuun ñi caa cuhva sa i catyi ra Jesús sihin ra: "Zuun yuhvi cui", ta i sica sata tandihí ra cuan, ta i nduva tandihí cuii ra nu ñuhu.

⁷ Tacuan ta i nducu tuhun ra Jesús sii ra inga saha: ¿Yoo sii nanducu ndo? Ta i catyi ra cuan: Sii ra Jesús, ra ñuu Nazaret.

⁸ Ta i nacahan ra Jesús ta catyi ra: Sa catyi sihin ndo vatyi zuun yuhvi cui. Tatú sii mi nanducu ndo, cuatu ndo nacuhun xihna ra ndihí sihin ya. Catyi ra.

⁹ Tacuan cua cuu si, vatyi cua quita si tañi cuhva catyi Tuhun Ndyoo vatyi catyi si: "Ra sa i sohon sii, ña zacunei numinoo ra."

¹⁰ Tacuan ta ziquí i tava ra Simón Pedro mityi sa ndyizo ra. Ta i cañi ra sii ra cu muzu sii ra cu nuu sii tandihí ra cu zutu, ta i sahndya ra zoho ra siyo cuaha ra. Malco nañi ra cu muzu cuan.

¹¹ Tacuan ta i catyi ra Jesús sihin ra Pedro: Natyuhun mityun sisi veno si. ¿Atu ña cuñun sa ndyeхи tundoho sa saha Zuti sii?

Cuahan ra Jesús nu ndyaa ra cu nuu sii tandihí ra cu zutu

¹² Tacuan ta ziquí minoo ityi zandaru cuan, sihin ra cu nuu sii ra ta ra cu policía cuenda ra hebreo, i tiin ra sii ra Jesús, ta i sihñi ra sii ra.

¹³ Ta sa xihna ñi i sindyaca ra sii ra ndya vehe ra Anás vatyi tyizo ra Caifás cuu sii ra. Ta ra Caifás cuu ra cu nuu sii tandihí ra cu zutu cuiya cuan.

¹⁴ Ta ra Caifás, zuun ñi ra cuu ra sa catyi sihin ra hebreo quivi cuan vatyi vaha ca nacuu minoo ñi ra sa cuenda tandihí, ta ma cuu tandihí ñiyivi.

I catyi i ra Pedro vatyi ña sito ra sii ra Jesús

¹⁵ Ta i sindyico ra Simón Pedro sii ra Jesús, ta tacuan tucu inga ra. Sito ra mandoñi sahnu Anás sii

inga ra cuan, ta yucuan cuenda i cuu quihví ra sihin ra Jesús ndya yuvehe ra cu nuu sii tandihí ra cu zutu.

¹⁶ Zoco i ndoo ra Pedro sata nuzama. Tacuan ta ziquí i quita inga ra. Sa sito ra cu nuu sii tandihí ra cu zutu sii ra cuan. I cahan ra cuan sihin ñaha zacuenda yuvehe, ta i cuu quihví ra Pedro.

¹⁷ Ta ñaha sa zacuenda yuvehe cuan, i catyi ña sihin ra Pedro: ¿Atu yíví minoo ra ndyico sii ra cuan cuun? Ta i catyi ra Pedro: Yíví ra cui.

¹⁸ Ta yucuan yugu muzu ta tandihí ra policía. Sa zatahan ra ñúhu vatyí visi xaan, ta yucuan ndyaa ra yunu. Tuhva ra Pedro ta nandyaa ra sihin ra.

Inducu tuhun xaan ra Anás sii ra Jesús

¹⁹ Tacuan ta ziquí i ndedu tuhun xaan ra mandoñi sahnu, ra Anás, sii ra Jesús yoo ra ndyico sii ra, ta ñaa sa zacuaha ra.

²⁰ Ta i nacahan ra Jesús, ta catyi ra sihin ra: I quehin ityi nuu tandihí ñiyivi. I zacuehi sisi vehe ñuhu tahan ñuu ta sisi vehe ñuhu cahnu ihya nu titahan tandihí ñiyivi hebreo. Ta ñahñi maa sa nacatyi xehi.

²¹ ¿Ñaa cuenda ndedu tuhun sii? Ndedu tuhun sii ñiyivi i siñi ñaa sa nacatyi sihin ñu. Sito maa ñu ñaa sa nacatyi sihin ñu.

²² Ta sa ndihí cahan ra Jesús tacuan, ta minoo ra cu policía sa ndyaa yatyí ñi i cati ra sii ra Jesús sihin ndaha ra ta catyi ra: Ña tacuan tahan si cohon sihin ra mandoñi sahnu.

²³ Ta i nacahan ra Jesús ta catyi ra: Tatu i quehin ndya vaha ñi, catyun ñaa sa ña vaha quehin. Zoco tatu vaha quehin ¿Ñaa cuenda catun sii? Catyi ra.

²⁴ Tacuan ta i tasi ra Anás sii ra Jesús zoco nuhñi ra ndya nu ndyaa ra Caifás, ra cu nuu sii tandihí ra cu zutu.

I catyi ra Pedro inga saha vatyí ña sito ra sii ra Jesús

²⁵ Ta nandyaa ra Simón Pedro yunu. Tacuan ta ziquí i catyi ñiyivi sihin ra: ¿Atu yíví minoo ra ndyico sii ra cuan cuun? Ta i catyi ra Pedro: Yíví ra cui. Catyi ra.

²⁶ Minoo muzu ra cu zutu ya cahnu cuu ñiyivi sii ra i sahndya ra Pedro zoho, ta i catyi ra cuan sihin ra Pedro: ¿Atu yivun i ndyehi sihin ra cuan yucuan nu iyo cuaha xaan yutu?

²⁷ Ta i catyi ra Pedro inga saha vatyí yivi. Ta zuun ñi caa cuhva cuan i sacu saa ndiví tyahnu.

Cuahan ra Jesús nuu ra Pilato

²⁸ Tacuan ta i sindyaca ra sii ra Jesús nu ñoho ra vehe ra Caifás ndya vehe tyiño cuenda ra gobernador. Ta nu ñaha ñi cuu si. Ta ña quihví ra hebreo sisi vehe tyiño vatyí yíví vehe hebreo cuu si, ta catyi ley hebreo vatyí tatu cua quihví ra, cua nducuxi caa ra, ta ma cuu ca cuxiñi ra sisi vico zuhun.

²⁹ Yucuan cuenda i quita ra Pilato ityi sata nu yugu ra cuan, ta catyi ra: ¿Ñaa cuatyí tyaa ndo sata ra ya? Catyi ra.

³⁰ Ta i nacahan ra ta catyi ra: Tatu yíví ra iyo cuatyí cuu ra, ma nacuhva ndi sii ra suun.

³¹ Tacuan ta i catyi ra Pilato sihin ra: Quihin maa ndo sii ra ta tyicuhva ndo sii ra cuhva catyi ley maa ndo. Ta i catyi ra hebreo sihin ra: Ña catyi ley ndi sa cahñi ndi numinoo ñiyivi. Catyi ra.

³² Tacuan cua cuu si ta cuhva cua quita si cuhva catyi ra Jesús yozo cua cuu ra.

³³ Tacuan ta ziquí i nandihví ra Pilato sisi vehe tyiño, ta i cana ra sii ra Jesús naquisi ra nu ndyaa ra, ta i catyi ra sihin ra: ¿Atu rey cuenda ñiyivi hebreo cuun?

³⁴ Ta i nacahan ra Jesús ta catyi ra: ¿Atu cohon cuhva sa sica ñi iñi moo a sa iyo ñiyivi nacatyi suhun?

35 Ta i nacahan ra Pilato ta catyi ra: Yíví ra hebreo cui. Zuun ñi ñiyíví ñuu moo sihin ra zutu nahnu i quisi ndyaca suun sii. ¿Ñaa sa zacuun?

36 Ta i nacahan ra Jesús ta catyi ra: Nu ndyaca ñehi, yíví ñuu ñiyíví ya cuu si. Vatyi tatu cuñi cundyaca ñehi ihya, cua cahñi tahan ra ndyico sii, ta ma cuhva ra sii, sii ñiyíví hebreo. Zoco nu ndyaca ñehi, yíví ñuu ñiyíví ya cuu si.

37 Tacuan ta i catyi ra Pilato sihin ra: Vaziquí minoo rey cuun. Ta i catyi ra Jesús: Zuun cui cuhva catyun. Yucuan cuenda i caqui ta vasi ñuu ñiyíví ya vatyi cua cuu cuhve sa ndaa sa cuenda sa ndisa. Ta tandihí ñiyíví zavaha sa vaha, tyaa ñu yahví sa quehin.

38 Ta i catyi ra Pilato sihin ra Jesús: ¿Ñaa sa cuu sa ndisa? Ta sa catyi ra tacuan ta i quita tucu ra ndya ityi sata nu yucu ñu hebreo, ta i catyi ra sihin ñu: Ñahñi maa cuatyi ra iyo caña ñi.

39 Ta iyo minoo costumbre sii maa ndo sisi vico zuhun vatyi cua zañe sii minoo ra ñoho vehe caa. ¿Atu cuñi ndo vatyi zañe sii ra cu rey cuenda ñiyíví hebreo?

40 Ta i cana saa ñiyíví ta catyi ñu: Yíví ra ihya zañon. Zañon sii ra Barrabás. Catyi ñu. Ta ra Barrabás cuan, ra zuzu cuu ra cuan.

19

¹ Ta yucuan cuenda i quihin ra Pilato sii ra Jesús, ta i saha ra sa cañi xaan zandaru sii ra.

² Ta i quihin zandaru iñu, ta zavaha ra minoo corona, ta i tyihi ra sii si xiñi ra Jesús. Ta i tyihi ra minoo zahma cañi tyacu zahma tixinda sii ra.

³ Ta i catyi zandaru: ¡Nacumi suun yoho rey, ra ndyaca ñaha cahnu sii ñiyíví hebreo! Ta i cati ra sii ra Jesús sihin ndaha ra. Ta i sacu ndyaa ra sii ra.

4 Tacuan ta zíqui i quita tucu ra Pilato inga saha ityi sata, ta i catyi ra sihin ñiyíví hebreo: Ndyehe ndo, vasi ndyaque sii ra sii ndo vatyi coto ndo vatyi ñahñi maa cuatyi ra iyo sa cuenda mi.

5 Ta i quita ra Jesús. Ñoho corona iñu xiñi ra ta ñoho ra zahma tyacu tixinda cuan. Ta i catyi ra Pilato sihin ñu: Ica ra ya.

6 Ta sa ndyehe ra zutu nahnu ta ra ndihí sihin ra sii ra Jesús, ta i cana saa ra ta catyi ra: Tyoon sii ra nu cruz. Tyoon sii ra nu cruz. Zoco i catyi ra Pilato sihin ra cuan: Quihin maa ndo sii ra ta tyaa ndo sii ra nu cruz tatu cuñi ndo, zoco sa cuenda mi ñahñi maa cuatyi ra iyo caña ñi.

7 Ta i nacahan ra hebreo ta catyi ra: Iyo minoo ley sii maa ndi, ta catyi si vatyi tahan si sa cuu ra vatyi catyi ra vatyi Zehe ra Ndyoo cuu sii ra.

8 Ta sa siñi ra Pilato cuhva catyi ñu, ta i yuhu ca ra.

9 Ta i nandihíví ra sisi vehe tyiño, ta i catyi ra sihin ra Jesús: ¿Ta ndyamaa i quisun? Zoco ñá cahan ra Jesús sa cahan ra.

10 Tacuan ta zíqui i catyi ra Pilato sihin ra: ¿Ñacu ña cohon sa quehin? ¿Atu ña siton vatyi iyo cuhva sii, ta cuu catyi vatyi cahñi ñiyíví suun nu cruz, ta cuu zañe suun?

11 Ta i nacahan ra Jesús, ta catyi ra: Ñahñi maa sa cuu zavohon sihin tatu sa yíví ra Ndyoo i saha cuhva suun. Yucuan cuenda cahnu ca cuatyi ra saha cuenda sii suun.

12 Ta sa ndihí cahan ra Jesús tacuan, ta i nducu ra Pilato cuhva zaña ra sii ra. Zoco i quisaha cana saa ra hebreo ta catyi ra: Tatu zañon sii ra ñia, yíví amigo ra César cuun. Yoo ra catyi vatyi minoo rey cuu ra, cuñi ra quindyaar a tyiño ra César.

13 Ta sa siñi ra Pilato cuhva cuan, ta zíqui i sindyaca ra sii ra Jesús ityi sata, ta i sicundyaar a tyayu ra

nu tuhva ra zandaa tysiño, nu nañi si Gabata sihin zahan hebreo. Ta cuñi si catyi si Nu Ndava.

¹⁴ Ta quivi sa zanduvaha ñiyiví cuenda vico zuhun i cuu si tañi maa ora, ta i catyi ra Pilato sihin ñiyiví hebreo: Ica rey ndo ya.

¹⁵ Tacuan ta ziqui i cana saa ñiyiví inga saha, ta catyi ñu: ¡Quihin ndo sii ra! ¡Quihin ndo sii ra! Tyaa ndo sii ra nu cruz. Ta i catyi ra Pilato sihin ñu: ¿Atu cuñi ndo sa cahñi sii rey ndo? Ta i nacahan ra zutu nahnu, ta catyi ra: Yoñi ca inga rey ndi. Maa fi ra César.

¹⁶ Ta yucuan cuenda i saha cuenda ra Pilato sii ra vatyi cahñi ra sii ra nu cruz. Ta i quihin zandaru sii ra Jesús, ta cuahan ra sihin ra.

Nu i tyaa ra sii ra Jesús nu cruz

¹⁷ Ta ndyizo ra Jesús cruz ra cuahan ra sihin ra ndya nu nañi si Yiqui Xiñi Ndíyi. Ta sihin zahan hebreo nañi si Gólgota.

¹⁸ Ta yucuan i tyaa ra sii ra nuu cruz sihin clavo. Ta inga uu tahan ra, minoo ra siyo cuaha ta minoo ra siyo zatyri ra Jesús, ta ra Jesús mahñu.

¹⁹ Ta i tyaa ra Pilato minoo zivi, ta i catyi ra vatyi cundyaa si xiñi cruz cuan ta catyi si: “Ra Jesús ñuu Nazaret, rey cuenda ñiyiví hebreo cuu ra.”

²⁰ Cuaha xaan ra hebreo i cahvi tuhun sa ndyaa xiñi cruz cuan. Vatyi nu sihi ra Jesús, yatyi ndyaa si yuhu ñuu. Ta tuhun sa ndyaa xiñi cruz cuan, ndyaa si sihin zahan hebreo, zahan griego za zahan latín.

²¹ Ta ra zutu nahnu i catyi ra sihin ra Pilato: Ma tyoon: “Rey cuenda ñiyiví hebreo.” Tyoon vatyi maa ra catyi vatyi rey cuenda ñiyiví hebreo cuu ra.

²² Zoco i nacahan ra Pilato: Cuhva i tyei, sa ndyaa si.

²³ Ta sa yaha i tyaa zandaru sii ra Jesús nu cruz, ta i quihin ra zahma ra. Sa cumi tahan ra i quihin ra minoo minoo si. Ta minoo zahma

cañi sa ndisi ra, i cacu si ñin ñi; ñahñi nu i ndicu ñu sii si.

²⁴ Yucuan cuenda i catyi zandaru sihin tahan ra: Ma ndata yo sii si. Nacuziqui yo, ta cua ndyehe yo yoo ra cua zahacanaa. Catyi ra. Ta cuhva ya i quita si cuhva catyi Tutu ra Ndyoo:

I zasa ra zahme sii tahan ra, Ta i siziqui ra yoo ra cua ñihi zahma cañi vii.

Ta tacuan i zavaha zandaru.

²⁵ Ta nandyaa zihí ra Jesús yatyi ñi saha cruz nu ndyaa ra Jesús nu cruz. Ta nandyaa tucu cuhu ña ta ña María ñazihí ra Cleofas ta ña María Magdalena tucu.

²⁶ Ta sa ndyehe ra Jesús vatyi yatyi nandyaa zihí ra ta minoo ra i casi ra, ra sa cuñi xaan ra, ta i catyi ra Jesús sihin zihí ra: Ndyaa vityi, ra ihya cua cuu zehun. Catyi ra.

²⁷ Ta ziqui i catyi ra sihin ra i casi ra: Ta maa ña cua cuu zihun. Ta ndya cuhva cuan i quihin ra sii ña, ta cuahan ña vehe ra.

²⁸ Ta sa yaha cuan, ta ziqui i sito ra Jesús vatyi sa i zavaha ra tandihí ta sa i cuu tandihí cuhva catyi si nuu Tutu ra Ndyoo. Ta ziqui i catyi ra: Ityi xein.

²⁹ Ta yatyi ñi yucuan nandyaa minoo quizi siti cuui ndutyia iya. Ta i zatyii zandaru minoo sa ñahma, ta i tyaa ra sii si minoo nuu zoco yutu sa nañi hisopo, ta i tyiñaa ra sii si yuhu ra Jesús.

³⁰ Ta sa i sihi ra Jesús ndutyia iya cuan, ta ziqui i catyi ra: Sa ndihí tysiño. Ta i nacañi noo ra xiñi ra, ta i nacuhva cuenda ra añima ra.

I tusi minoo zandaru minoo caa xaan xiin ra Jesús

³¹ Cumañi minoo ñi ca quivi ta cua cuu si quivi cahnu sisi vico zuhun cuenda ñiyiví hebreo. Ñá cuñi ra hebreo sa ndoo coño ñuhu cuan nu cruz quivi quitatu ñiyiví vatyi cahnu xaan quivi zacuu ñiyiví quivi cuan sa cuenda vico zuhun. Yucuan cuenda i sica ra tumañi iñi sii ra Pilato vatyi cuhva ra sa cahnu

zandaru yiqui ndoo ra sa ndyaa nu cruz. (Ta sa ndihí sahnu ra yiqui ndoo ra cuan ta yatyí ca cua cuu ra.) Ta cua cuu tyaa siyo ra sii ra.

³² Tacuan ta i saa zandaru, ta i sahnu ra yiqui ndoo minoo ra ta inga tucu ra sa ndyaa inga nu cruz.

³³ Zoco sa saa ra nu ndyaa ra Jesús ta i ndyehe ra vatyí sa sihi ra, ta ñí sahnu ca ra saha ra.

³⁴ Zoco i tusi minoo zandaru minoo caa xaan xiin ra Jesús, ta i quita niñí ta ndutya.

³⁵ Ta minoo ra i ndyehe, saha ra sa ndaa, ta sa ndisa cahan ra. Sito maa ra vatyí sa ndisa cuu sa cahan ra. Ta nacatyí ra sii si vatyí cua cuu sino tucu iñí maa ndo.

³⁶ Ta cuhva cuan i cuu tandíhi si vatyí cua quita si tañí catyi Tutu ra Ndyoo nu catyi si: "Ma cahnu ñiyiví numinoo yiqui ra."

³⁷ Ta inga tucu nu tutu ra Ndyoo catyi si: "Cua ndyehe ñiyiví sii ra cuhva cua quihví minoo caa xaan xiin ra."

I tyihi ra sii ra Jesús sisi ñaña

³⁸ Ta sa yaha cuan, ta ziquí i quisi ra José ra ñuu Arimatea. Sino iñí ra sii ra Jesús, zoco xehe ñí vatyí yuhu ra sii ra hebreo. Ta i sica ra tumañí iñí sii ra Pilato vatyí cuu quihin ra coño ñuhu ra Jesús. Ta i saha ra Pilato. Ta ziquí i sahan ra, ta i quihin ra coño ñuhu ra Jesús.

³⁹ Ta i quisi tucu ra Nicodemo, ra sa sahan sa xihna ñí nu ndyaa ra Jesús minoo sa cuaa. Ndaha ra cuaha xaan azetye vixi. Nazaca si sihin mirra ta áloe. Tañí minoo oco usi kilo si.

⁴⁰ Tacuan ta ziquí i quihin ra José ta ra Nicodemo coño ñuhu ra Jesús, ta i cava noo ra zahma sa cahyu ra azetye vixi cuan cuhva iyo costumbe ñiyiví hebreo tatu cua tyihi ñú sii minoo ñiyiví sisi ñaña.

⁴¹ Ta yatyí nu i sihi ra Jesús nu cruz sicoo cuaha xaan yutu tyaqui, ta yucuan sicoo minoo ñaña sa ta yoñí ca cutyuiño.

⁴² Ta yucuan i tyihi ra sii ra Jesús vatyí yatyí ñí ndyaa si. Ta sa cua cuu si quivi quitatu ñiyiví hebreo.

20

Inandoto ra Jesús

¹ Ta quivi tumingu ñaa ca i saa ña María Magdalena ndya ñaña, ta i ndyehe ña vatyí sa siñí siyo yuu sa sindazi yuñaña cuan.

² Tacuan ta ziquí i sino xaan ña ndya nu ndyaa ra Simón Pedro ta inga ra sa cuñí xaan ra Jesús, ta i catyi ña sihin ra: Sa sitava ñiyiví coño ñuhu ra Jesús sisi ñaña cuan, ta ña sito yo ndyamaa i natyihi ñú sii si.

³ Yucuan cuenda i quita ra Pedro ta inga ra ta cuahan ra ndya ñaña.

⁴ Nduu tahan ra i cacono ra, zoco ñihi xaan ca sino inga ra ta ziquí ra Pedro, ta xihna ca ra cuan i saa ñaña.

⁵ Ta i ndyehe noo ra sisi ñaña, ta i ndyehe ra zahma sa i cava noo sii ra Jesús; catuu si nu ñuhu, zoco ñá quihví ra.

⁶ Ta ziquí i saa ra Simón Pedro, ta i quihví ra sisi ñaña, ta i ndyehe ra zahma sa i cava noo sii ra Jesús; catuu si.

⁷ Ta zahma luhlu sa ñoho xiñí ra Jesús, ña iin ñi catuu si sihin inga zahma cuan. Nacuñí tahnu vaha si, ta catuu ziñ si.

⁸ Tacuan ta ziquí i quihví tucu inga ra sa saa sa xihna ñí. Ta i ndyehe ra. Ta i sino iñí ra.

⁹ Zoco tañaha ca coto ra vatyí catyi Tuhun Ndyoo vatyí ndyaa si sa cua nandoto tucu ra Jesús sa sa i sihi ra.

¹⁰ Tacuan ta i quita ra i casi ra Jesús, ta cua nuhu ra ndya vehe ra.

I quituu ra Jesús nuu ña María Magdalena

¹¹ Ta i nasaa ña María ndya ñaña, ta sa nandyaa ña yuhu ñaña, ta cuihyá xaan i cuñí ña, ta i sacu xaan ña. Ta cuhva sa sacu ña, ta i nandyehe noo ña sisi ñaña.

¹² Ta i ndyehe ña uu tahan ángel sa ñoho zahma cuisi. Minoo ra ndyaa ityi nu sicaa xiñi ra Jesús, ta inga ra ityi nu i sicaa saha ra nu sicaa coño ñuhu ra.

¹³ Ta i catyi ángel sihin ña: Maha, ¿ñacu sacu xoon? Ta i catyi ña: Vatyi i quihin ñiyiví coño ñuhu ra Jesús, ta ña site ndyamaa i tyihi ñu sii si.

¹⁴ Ta sa ndihí cahan ña tacuan, ta i nasico cava ña, ta ndyehe ña sii ra Jesús nandyaar. Zoco ñá nacoto ña tatu zuun ra cuu ra.

¹⁵ Ta i catyi ra Jesús sihin ña: Maha, ¿ñacu sacu xoon? ¿Yoo sii nanducun? Ta ña María sica iñi ña vatyi ra zacuenda yucuan cuu ra cahan, ta i catyi ña sihin ra: Tata, tatu yoho i quihin coño ñuhu ra ya, nacatyun sihin ndyamaa i tyuhun sii si vatyi cua naquihin sii si.

¹⁶ Tacuan ta ziquí i catyi ra Jesús sihin ña: María. Ta i nandyehe vaha ña sii ra, ta i catyi ña sihin ra: ¡Rabboni! Zahan hebreo cuu si cuan, ta cuñi si catyi si Maestro.

¹⁷ Ta i catyi ra Jesús sihin ña: Ma tiún sii vatyi tañaha ca nandaa xique ndya nu ndyaa Zuti. Zoco cuahan nu ndyaa tandihí ra sa cuñi xein, ta nacatyun sihin ra vatyi cuehin nu ndyaa Zuti, ta Zutu tucu maa ndo cuu sii ra. Ta nu ndyaa Ndyoo mi, ta Ndyoo tucu maa ndo.

¹⁸ Ta ziquí cuahan ña María Magdalena nu yucu ra i casi ra Jesús, ta i nacatyi ña sihin ra vatyi sa i ndyehe ña sii ra Jesús ta i cahan ra tuhun cuan sihin ña.

Cahan ra Jesús sihin ra i casi ra

¹⁹ Tacuan ta ziquí zuun ñi quívi tumingu cuan sa sahiñi i siyucu ra i casi ra Jesús iñi ñi, ta ndazi cutu yuvehe vatyi yuhu ra sii ra hebreo, ta i quisi ra Jesús ta i sicuñi ndyaa ra mahñu, ta catyi ra sihin ra: Nacoo sa yaha sii ndo.

²⁰ Ta sa yaha catyi ra tacuan, ta ziquí i zañaha ra ndaha ra ta xiín ra. Ta zii xaan i cuñi ra i casi ra sa i ndyehe ra sii ra Jesús.

²¹ Tacuan ta i catyi ra Jesús sihin ra inga saha: Nacoo sa vaha sii ndo. Tañi sa tasi Ndyoo Zuti sii, sihin tyiño ra, zuun ñi cuhva cuan cua tasi sii maa ndo.

²² Ta sa ndihí catyi ra tacuan, ta i tivi ra tatyi ra sii ra, ta catyi ra sihin ra: Naquihin ndo Tatyi Ii.

²³ Yoo sii cuatyi cua zandasi ndo, cua ndasi si sa ndisa. Ta yoo sii cuatyi ma zandasi ndo, ma ndasi cuatyi ñu. Catyi ra.

Ñihi xaan iñi ra Tomás

²⁴ Ta ra Tomás minoo sa usi uu tahan ra i casi ra Jesús cuu ra. Nañi tucu ra Dídimo. Ta yoñi ra ndyaa cuhva sa quisi ra Jesús.

²⁵ Ta i nacatyi inga ra i casi ra Jesús sihin ra: I ndyehe ndi sii ra Jesús. Zoco i catyi ra Tomás sihin ra: Tatu ma ndyehi nu cahví ndaha ra nu i quihví clavo ta tyihi nu ndehi yucuan, ta tatu ma ndyehi xiín ra nu quihví caa xaan ta tyihi ndehi yucuan, ma sino iñi. Catyi ra.

²⁶ Ta yaha uña quívi, ta ziquí ñoho ndazi tucu ra i casi ra Jesús, ta ndyaa ra Tomás sihin ra. Ta ndazi cutu yuvehe, zoco i quihví ra Jesús ta i sicuñi ndyaa ra mahñu, ta i catyi ra: Nacoo sa vaha xaan sii ndo.

²⁷ Ta ziquí i catyi ra sihin ra Tomás: Zatuhvon ndohon ta tyuhun nu ndohon ndehi, ta zatuhvon ndohon ta tyuhun sisi xiín. Ta ma cuu con minoo ra ña sino iñi, zoco sino iñun. Catyi ra.

²⁸ Tacuan ta i catyi ra Tomás sihin ra: Moo cuu ra ndyaca ñaha sii. Ta moo cuu Ndyoo sii.

²⁹ Ta i catyi ra Jesús sihin ra: Tomás, sa i ndyehun sii, ta yucuan cuenda sino iñun. Vaha xaan ca ñiyiví ma ndyehe sii, ta sino iñi ñu.

Iyo cuenda sa vatyi iyo libro ya

³⁰ Ta iyo cuaha xaan inga sa ndyetyi i zavaha ra Jesús nuu ra i casi ra, ta ña ndyaa si nuu libro ya.

³¹ Zoco i teyi zuhva si ihyá vatyi cua cuu sino iñi ndo vatyi ra Jesús

cuu ra Cristo, zehe ra Ndyoo. Ta sihin sa sino iñi ndo, cua ñihí ndo sa cacu añima ndo tandihí cuii tyiemvu sa cuenda maa ra.

21

Cahan ra Jesús sihin usa tahan ra i casi ra

¹ Ta sa yaha tandihí cuhva cuan, ta ziquí ihya cuu cuhva i cahan tucu ra Jesús inga saha sihin ra i casi ra yumiñi sa nañi Tiberias.

² Ìn ñi tayucu ra Simón Pedro sihin ra Tómas, ra nañi Dídimo, ta ra Natanael, ra ñuu Caná nu cu si Galilea, ta zehe ra Zebedeo ta inga uu tahan ra i casi ra Jesús.

³ Ta i catyi ra Simón Pedro sihin inga ra: Cuehin cua tiin tyiyaca. Ta i catyi inga ra sihin ra: Cua cuhun tucu maa ndi suhun. Ta cuahan ra, ta i quihví ra minoo barco. Zoco ñahñi maa tyiyaca i ñihí ra sa cuaa cuan.

⁴ Ta cuhva sa vasi cundisi, sicuiñi ndyaa ra Jesús nu ñiyiti, zoco ñá nacoto ra vatyí ra Jesús cuu ra.

⁵ Ta ziquí i catyi ra Jesús sihin ra: Zehe luhli, ¿atu ñahñi tyiyaca i ñihí ndo? Ta i catyi ra: Yoñi ti.

⁶ Ta i catyi ra Jesús sihin ra: Cañi ndo taraya ndo siyo cuaha, ta cua ñihí ndo. Ta i cañi ra sii si, ta ziquí ñá cuu ca tava ra taraya ra vatyí cuaha xaan tyiyaca ñoho.

⁷ Ta ra sa cuñi xaan ra Jesús i catyi ra sihin ra Pedro: Ra Jesús cuu ra. Ta sa siñi ra Simón Pedro vatyí ra Jesús cuu ra, ta i nazucu ra zahma ra sii ra vatyí sa i tava ra sii si sa cua tiin ra tyiyaca. Ta i quihví ra nu miñi.

⁸ Ta i quisi inga ra sihin barco luhlu. Xita ra taraya sa ñoho tyiyaca vatyí ña sica ndyaa yuhu miñi tañi minoo ziendu metro ñi.

⁹ Ta sa i quita tandihí ra nu ñuhu, i ndyehe ra tuñuhu, ta yucuan catuu minoo tyiyaca ta pantucu.

¹⁰ Ta i catyi ra Jesús: Quisi ndyaca ndo zuhva ca tyiyaca sa nacaa tiin ndo.

¹¹ Ta i sahan ra Simón Pedro ndya nu ndyaa barco, ta xita ra taraya tyiyaca nahnu cuan ndya nu ñiyiti. Ziendu uu xico usi uñi tahan ti ñoho, ta ñá tahndya taraya vazu cuaha xaan ti.

¹² Ta i catyi ra Jesús sihin ra: Ñaha ndo vatyí curumuza ndo. Ta yoñi ra cuñi nducu tuhun sii ra Jesús yoo ra cuu ra vatyí sa sito ra vatyí ra Jesús cuu ra.

¹³ Ta i sahan ra Jesús, ta i quihin ra pan, ta i saha ra sii si sii ra. Ta tacuan tucu tyiyaca.

¹⁴ Ta ihya cuu sa cu uñi tahan saha i cahan ra Jesús sihin ra i casi ra ta sa yaha sa nandoto ra sisi sa i sihi ra.

Zacuendon mvee ticatyí zone

¹⁵ Ta sa yaha i curumuza ra, ta i catyi ra Jesús sihin ra Simón Pedro: Simón, zehe ra Jonás, ¿atu cuñi xaan con sii ta ziquí ca inga ra ya? Ta i catyi ra Pedro sihin ra: Avi, tata, sa siton vatyí cuñi suun. Ta i catyi ra Jesús: Cuhvon sa casi mvee ticatyí lee zone.

¹⁶ Ta ziquí i catyi ra Jesús sihin ra inga saha: Simón, zehe ra Jonás, ¿atu cuñi xoon sii? Ta i catyi ra Pedro: Avi, tata, sa siton vatyí cuñi suun. Ta i catyi ra Jesús sihin ra: Zacuenda vohon sii mvee ticatyí zone.

¹⁷ Ta ziquí i catyi ra Jesús sihin ra sa cu uñi saha: Simón, zehe ra Jonás, ¿atu cuñun sii? Ta cuihyá xaan i cuñi ra Pedro vatyí sa i nducu tuhun ra Jesús sii ra sa cu uñi tahan saha: ¿Atu cuñun sii? Ta i catyi ra sihin ra: Tata, sa sito moo tandihí cuii. Siton vatyí cuñi suun. Ta i catyi ra Jesús sihin ra: Cuhvon sa casi mvee ticatyí zone.

¹⁸ Sa ndisa ta sa ndisa catyi suhun vatyí quiví i culuhlun ta i cuu ndihvun zahmon maa tuhun ñun, ta sohon ndyamaa cuñun cuhun. Zoco quiví cua cusahnun cua zandundoon ndohon, ta inga ra cua natyhi ra zahmon suun. Ta

cua cundyaca ra suun nu ña cuñun cuhun. Tacuan i catyi ra Jesús sihin ra Pedro.

¹⁹ Ta sa i catyi ra Jesús tuhun cuan, i saha ra cuhva cutuñi iñi ra yozo caa cua tahan si sii ra Pedro sa cua cuu ra, ta cua zacahnu ra sii ra Ndyoo cuhva cuan. Ta sa ndihí cahan ra Jesús tacuan, ta i catyi ra sihin ra: Cundyicon sii.

Minoorai casira Jesús, ra sa cuñi xaan ra

²⁰ Tacuan ta ziquí i nandyehe sata ra Pedro, ta i ndyehe ra vatyi ndyico inga ra i casi ra Jesús, ra sa cuñi xaan ra Jesús. Zuun ra cuu ra sa nañaa sii ra Jesús minoo sa cuaa nu cua cuxiñi ra nu i nducu tuhun ra sii ra Jesús: ¿Yoo ra cua xico tuhun suun?

²¹ Ta sa ndyehe ra Pedro sii ra cuan, ta i nducu tuhun ra sii ra Jesús: Tata, ¿ta ñaa sa cua cuu sii ra ya?

²² Ta i catyi ra Jesús sihin ra: Tatu cuñi vatyi ndoo ra ñuu ñiyivi ndya quívi cua quisi ¿ta ñaa sa cuenda oo? Yoho cundyicon sii. Catyi ra.

²³ Yucuan cuenda i quita tuhun ya, ta i sica iñi tandihí ñiyivi sino iñi vatyi i catyi ra Jesús vatyi ma cuu ra cuan, zoco ñá catyi ra Jesús sa ma cuu ra. I catyi ra: “Tatu cuñi vatyi ndoo ra ndya quívi cua quisi ¿ta ñaa sa cuenda oo?”

²⁴ Ta zuun ñi maa ra cuu ra saha sa ndaa sa cuenda tuhun ya. Ta sito ndi vatyi ndisa cuii sa ndaa sa saha ra.

²⁵ Ta iyo cuaha xaan ca sa i zavaha ra Jesús. Ta sica iñi vatyi tatu cua tyaa ñiyivi sii si minoo mi- noo si, ma cutahan tandihí libro nu sisi ñuu ñiyivi. Ndihí si vityi.

Hechos

I catyi ra Jesús vatyi cua tasi ra Tatyi Ii ra Ndyoo

¹ Ta quivi cuan i tyei minoo carta suun Teófilo. Ta yucuan carta saha cuenda tandihí sa i zavaha ra Jesús ta tandihí sa zacuaha ra ndya casaha zatyino ra cuhva

² ndya quivi i ndaa xica ñi ra ta cuahan ra gloria. Zoco cuee ca sa cuhun ra gloria ta sihin cuhva iyo sii Tatyi Ii ra Ndyoo i tahvi ra Jesús tyiño nuu sa usi iin tahan ca ra apóstol vatyi nacatyi ra tuhun ra Jesús.

³ Ta ziqui i sihi ra Jesús ta sa yaha i sihi ra ta zuun ñi maa ra Jesús i quituu nuu ra apóstol. Uu xico quivi i quituu ra tacuan, ta cuhva cuan i sito ñiyivi vatyi ndisa cuii i nandoto tucu ra. Ta i zacuaha ra sii ra yozo caa ndyaca ñaha ra Ndyoo.

⁴ Ta sa ndyaa ra Jesús sihin ra i catyi ra sihin ra vatyi ma quita ra ñuu Jerusalén. Cua cuatu ra sii sa i cahan ra Ndyoo Zutu yo tuhun vatyi catyi ra Jesús sihin ra:

⁵ Sa catyi sihin ndo vatyi ndisa cuii i zacoo ndutya ra Juan sihin ndutya, zoco ña cuaha ca quivi ta cua coo ndutya ndo sihin Tatyi Ndyoo.

Cuahan ra Jesús ityi ziqui

⁶ Tacuan ta quivi i titahan tucu ra Jesús sihin ra apóstol i ndaca tuhun ra cuan sii ra Jesús ta catyi ra: Tata, ¿atu sa cua cuhva tucun sa cundyaca ñaha ñiyivi hebreo tata maa ndi?

⁷ Ta i catyi ra Jesús sihin ra: Ma coto maa ndo ñaa quivi a ñaa yoo cua cundyaca ñaha tucu ñiyivi hebreo. Maa ñi maa ra Ndyoo Zutu yo tahan si coto cuhva cuan.

⁸ Zoco cua ñihi ndo tundyee iñi sii ra Ndyoo vatyi cua noo xica Tatyi Ii sii ndo, ta cua cahan ndo sa cuenda mi ñuu Jerusalén, nacahnu Judea ta

nacahnu Samaria ta nacahnu ñuu ñiyivi.

⁹ Ta sa ndihí cahan ra Jesús tacuan ta zuun ñi cuhva cuan i ndyehe ra apóstol vatyi i ndaa xica ñi ra Jesús ityi andivi, ta i tyazi minoo vico nu cuahan ra. Ta ñá ndyehe ca ra apóstol cuan sii ra.

¹⁰ Ta zuun ñi cuhva sa ndyehe ra sa i ndaa ra ityi andivi ta nu yucu ra i quituu uu tahan ra yoco ñoho ra zahma cuiisi.

¹¹ Ta i catyi ra yoco cuan sihin ra: Ndoho ra ñuu Galilea, ¿ñiacu ndyehe xaan ndo ityi ziqui? Cuahan ra Jesús gloria, ta zuun ñi cuhva cuahan ra cua quisí tucu ra.

Naquihin ra Matías tyiño i sindyizo rafudas

¹² Tacuan ta ziqui i quita ra apóstol yucu Olivos cuan. Cuahan ra ñuu Jerusalén. Yatyi ñi ndyaa yucu cuan sihin ñuu Jerusalén, tañi zava ora.

¹³ Ta sa saa ra yucuan, i quivi ra minoo vehe toto ndya ziqui vatyi yucuan ndyaa ra. Ra Pedro ta ra Juan, sihin ra Jacobo ta ra Andrés ta ra Felipe. Ra Tomás ta ra Bartolomé ta ra Mateo sihin ra Jacobo, zehe ra Alfeo. Ta ra Simón Zelote ta ra Judas yañi ra Jacobo.

¹⁴ Tandihí quivi i sica tahvi ra sii Ndyoo yucuan iñi ñi sihin ña María zihí ra Jesús sihin inga ñu zihí ta sihin yañi ra.

¹⁵ Ta minoo quivi i titahan cuaha xaan ñiyivi tañi ziendu oco ñu, ta i nduvita ra Pedro (mahñu ñiyivi cuan) ta i catyi ra:

¹⁶ Ndoho yañi xaa, i cuñi si sa natahan si cuhva sa i catyi Tuhun Ndyoo nu i cahan ra David i zacuu Tatyi Ii ta saha cuenda ra sa cuenda ra Judas, ra i zañaha sii ra Jesús sii ra cua tiñi sii ra.

¹⁷ Ta ra tahan yo i cuu sii ra Judas, ta zuun ñi tyiño zavaha yo i zavaha tucu ra.

¹⁸ I zata ra Judas cuan minoo ñuhu sihin xuhun i ñihi ra sihin cuatyi ra. Ta zuun ñi maa ra i cuñi

cahñi sii ra. I tyihi ra minoo yoho zucu ra, zoco i canacava ra sihin nuu ra ta i ndata sisi ra ta i quita tandihí siti ra. Ta i sihi ra.

¹⁹ Sito tandihí ñiyivi ñuu Jerusalén cuhva i tahan ra Judas. Yucuan cuenda i zacunañi ñu ñuhu cuan Acéldama sihin tuhun maa ñu. Cuñi si catyi si: Ñuhu nu i sati niñi ra.

²⁰ Sisi libro Salmos catyi ra Ndyoo sa cuenda ra Judas: Cua ndoo ihno vehe ra. Yoñi ñiyivi cua cundayaa yucuan. Ta tyiño i sindyizo maa ra cua naquihin inga ra. Catyi si.

²¹⁻²² Ta ziqui i catyi tucu ra Pedro: Yucuan cuenda cua naquihin inga ra tyiño i sindyizo ra Judas ta cua nacatyi tucu ra sihin ñiyivi vatyi ndisa sa i nandoto tucu ra Jesús. Cuñi si sii minoo ndoho ra i casaha sica sihin ra Jesús quivi i zacoo ndutya ra Juan sii ra ta cutahan ra sihin ra ndya quivi i ndaa xica ñi ra Jesús ityi andivi. ¿Yoo ndoho cuu ndo? Catyi ra Pedro.

²³ Tacuan ta i ñihi ra uu tahan ra. Minoo ra nañi ra José ta nañi tucu ra Barsabás. Justo xiñi zivi ra. Ta inga ra nañi ra Matías.

²⁴ Tacuan ta i sica tahví tandihí ñu sii ra Ndyoo ta i catyi ñu: Zutu mañi yuu, siton añima tandihí ñiyivi. Zañohon sii ndi yoo ra cuñi móo

²⁵ sa naquihin ra tyiño i sindyizo ra Judas vatyi i ndoyo ñuhu ra ta cuahan ra nu tahan si sii maa ra sa cuhun ra, nu xaan. Catyi ñiyivi.

²⁶ Ta i siziquí ra zuhva cua ndyehe ra yoo ra cua zahacanaa, ta i tahan si sii ra Matías. Tacuan ta i nduu tucu ra cuan minoo apostól sihin inga sa usi iñin tahan ra.

2

I quisí Tatyi Ii ra Ndyoo

¹ I saa quivi sa zacahnu ñiyivi hebreo minoo vico sa nañi Pentecostés, ta i titahan tandihí ñiyivi ndyico sii ra Jesús.

² Yatyi xaan i quisaha quisí minoo nduzu ndya yutyi andivi. Tañi minoo tatyi cahnu, tacuan i cuu nduzu cuan, ta i situ cuii nduzu vehe nu yucu ñu.

³ Ta i ndyehe ñu minoo tañi caa yaa ñuhu. I quiti cuatyi si ta i sicozo si xiñi iñin ñu.

⁴ I situ Tatyi Ii ra Ndyoo sii tandihí ñu, ta i quisaha cahan ñu tuhun sa ña tuhva ñu cahan. I cahan ñu sihin cuhva saha Tatyi Ii sii ñu.

⁵ Ta quivi cuan i siyucu cuaha xaan ñiyivi hebreo ñuu Jerusalén. Ziñi ziñi ñuu i quisí ra ta saa ra ñuu Jerusalén. Ndyico vaha ra sii costumbre maa ra.

⁶ Ta i siñi tucu maa ra cuan nduzu sa quita andivi. Yucuan cuenda i tuhva tandihí ra. Ñá cutuñi iñi ra ñaa cuenda siñi ra sa cahan ñiyivi. Vatyi tandihí cuhva cahan ñu, siñi ra hebreo cuan vatyi cahan ñu cuhva cahan ñiyivi ziñi ziñi ñuu, nu i quita ra hebreo.

⁷ Iyo xaan i cuñi ra hebreo cuan, ta i quisaha catyi ra sihin tahan ra: Tandihí ñiyivi ya, ñiyivi Galilea cuu ñu, zoco cahan ñu cuhva cahan maa yo.

⁸ Siñi yo sa cahan ñu. Cahan ñu cuhva cahan ñiyivi ñuu nu quita maa yo, ta ziñi ziñi ñuu yo.

⁹ Ñiyivi ñuu Partia, Media, ta Elam cuu yo sihin ñiyivi ñuu Mesopotamia, Judea, Capadocia, Ponto ta Asia.

¹⁰ Iyo yo cuu yo ra ñuu Frigia, Panfilia, Egipto ta Libia yatyi ñi Cirene, ta iyo yo cuu yo ra ñuu Roma

¹¹ tata hebreo, ta inga yo ra ñuu Roma, zacuaha yo costumbre ñiyivi hebreo. Iyo yo quita ñuu Creta ta ñuu Arabia ta siñi yo sa cahan ñu tandihí cuhva cahnu xaan zavaha ra Ndyoo. Catyi ra cuan.

¹² Ta iyo xaan i cuñi ra ta ñá sito ra ñaa sa cuu. Ta i natuhun tahan ra ta catyi ra: ¿Ñaa sa cuu? Catyi ra.

13 Zoco inga ra i sacu ndyaa ta catyi ra: Sihi xaan ñuu ya ndixi (ta siñi ñuu).

Cuhva i cahan ra Pedro sihin ñiyiví

14 Tacuan ta i nacuiñi ndyaa ra Pedro sihin sa usi iin tahan ca ra apóstol ta saa xaan i cahan ra Pedro sihin ñiyiví cuan ta catyi ra: Ndoho sa ndyaa ihya nu cu si Judea ta tandihí inga ndo sa vasi ñuu Jerusalén ya, tyizoho vaha ndo ta cuiñi ndo sa quehin.

15 Ña siñi ndi tañi sica iñi maa ndo vatyi nacaa cuu si caa iin sa ñaha ñi.

16 Sicoo minoo ra sinañi Joel ta tyiemvu. I cahan ra sa cuenda ra Ndyoo ta i catyi ra vatyi cua tahan si cuhva sa ndyehe ndo vityi vatyi catyi ra:

17 Nu cua ndihí tyiemvu cua tasi Tatyi Ii, catyi ra Ndyoo, ta cua noo ra ziquí tandihí ñiyiví.

Zehe ndo cua cahan ñuu tuhin. Cua ndyehe ra yoco sa cua zañehi sii ra. Ta cua cahan ñimahna xiñi ra sahnu.

18 Ndisa, vatyi cua noo Tatyi Ii sii tandihí ñiyiví ndyico sii mi sa ndisa, ta cua cahan ñuu cuhva cua quehin sihin ñuu.

19 Ta cua zavehi sa ndyityi ityi andiví ta nu ñuhu ñuu ñiyiví. Niñi ta ñuhu ta ñuhma.

20 Cua nduñaa ñicandyi ta cua nducuaha yoo tañi niñi. Tacuan cua cuu si ta cua coo minoo quíví cahnu xaan, quíví cua tasi tuñi sii ñiyiví.

21 Ta tandihí ra cua cahan ndahvi sihin mi, cua cacu ra.

Tacuan i catyi ra Ndyoo, i catyi ra Joel.

22 Ta sa yaha nacatyi ra Pedro cuhva cuan ta i catyi tucu ra: Ndoho, ñiyiví hebreo tyizoho ndo tuhun ya: Ra Jesú Nazaret i sindyizo ra tyiño saha ra Ndyoo sii ra. Ta tañi sa sito ndo i saha ra Ndyoo sa zavaha ra cuaha xaan

sa ndyityi ta cuaha xaan zeña nuu ndo.

23 Ta i sito ra Ndyoo vatyi cua cuhva ra sa tyaa ñiyiví cuatyi sata ra Jesú. Ta maa ndo i saha ndo sa cañi ñiyiví fia sito sii ra Ndyoo sii ra nu cruz.

24 Zoco i zanandoto ra Ndyoo sii ra Jesú, ta i tava ra sii ra nu iyo ñiyiví i sihi vatyi ma cuu ndoo ra yucuan.

25 I cahan ra David ta tyiemvu sa cahan ra Jesú ta catyi ra:
Site vatyi ndyaa ra sahnu sihin.

Tandihí cuii tyiemvu iyo ra sihin. Yucuan cuenda ma cuyuhi.

26 Yucuan cuenda zii xaan cuñi, ta cua nacatyi sihin ndo vatyi zii cuñi. Site vatyi cua nan-dote sisi sa i sihi.

27 Ma caca xaan iñi vatyi ma zandoon sii, nu caa ndiyí Ndyoo Zuti. Ta ma cuhvon sa tyahyu coño ñuhi vatyi zehe iun sii.

28 Sa zañohon sii yozo caa cua cundite suhun. Zii xaan cua cuñi vatyi cua cundyei suhun.

Tacuan i cahan ra David cuhva i cahan ra Jesú sihin ra Ndyoo Zutu ra ta tyiemvu.

29 Ta i cahan ca ra Pedro ta catyi ra: Ndoho amigos, ndoo xaan cua nacatyi sihin ndo ñaa sa i tahan ra sahnu David, ñiyiví sii yo ta tyiemvu. I sihi ra, ta i quihví ra ñuhu. Ta ihya iyo ñaña ra ndya cuhva ndya vityi. Ta tacuan cuu cuhva sito yo vatyi yiví tuhun sa zuun fi maa ra cahan ra.

30 I cahan ra David cuhva i cahan Tatyi Ii ra Ndyoo sihin ra, ta i sito ra vatyi cua zavaha ra Ndyoo tuhun i cahan ra sihin ra vatyi i catyi ra Ndyoo sihin ra: "Ityi nuu ca cua cundyaca ñaha minoo ñiyiví suun. Tañi ndyaca ñaha moo tacuan cua cundyaca ñaha maa ra."

31 I sito ra David tyiño cuan ta tyiemvu, ta i catyi ra vatyi cua nan-doto tucu ra Jesú. Yucuan cuenda

i catyi ra David sa cuenda ra Cristo vatyi ma ndoo ra nu caa ndiyi. Ta ma tyahyu coño ñuhu ra. Catyi ra.

³² I zanandoto ra Ndyoo sii ra Jesús ta i ndyehe tandihí ndi sii ra.

³³ Ta cuahan ra Jesús gloria, ta saha ra Ndyoo cuaha xaan cuhva sii ra. Ndyaa ra ityi siyo cuaha ra Ndyoo. Ndyaa ta sa naha xaan ca i catyi ra Ndyoo: "Cua saa quivi cua cuhun Tatyi li vii ñuu ñiyivi." Ta yucuan cuenda i tasi ra Jesús sii Tatyi li ihya. Tatyi li ra Ndyoo zavaha tandihí sa ndyehe ndo ta sa siñi ndo vityi vatyi sa i saa ra. Catyi ra Pedro.

³⁴ Ta ziqui i catyi tucu ra Pedro: I saha ra David cuenda yozo caa cua tahan si sii ra Jesús ityi ziqui vatyi yivi ra David i sahan gloria. Zoco i cahan ra tuhun cuhva cua tahan si sii ra Jesús ta i catyi ra:

Moo cuu ra ndyaca ñaha sii mi.

Ta catyi ra Ndyoo Zutu yo suhun: "Cundyoon ihya siyo cuehi.

³⁵ Iyo cuaha xaan ra cuxaan suun, zoco cua zahacanoon sii ra vatyi sehi cuhva suun."

Tacuan i catyi ra Ndyoo sihin ra Jesús, catyi ra David.

³⁶ Tacuan i cahan ra Pedro sihin ñiyivi hebreo tandihí cuhva cuan, ta i catyi tucu ra: I tyaa maa ndo sii ra Jesús nu cruz, zoco i zanducanhnu xaan ra Ndyoo sii ra, ta vityi ndyaca ñaha maa ra, ta zacacu ra sii ñiyivi. Yucuan cuenda tyizoho ndo ta coto ndo sa quehin. Catyi ra.

³⁷ Ta sa siñi ñiyivi sa cahan ra Pedro ta i sica xaan iñi ñuu, ta i catyi ñuu sihin ra Pedro ta sihin tandihí inga ra apóstol: ¿Amigo, ñaa sa cuñi si zavaha ndi? Catyi ñuu.

³⁸ Ta i catyi ra Pedro sihin ñuu: Tahan tahan ndo ndu-uu iñi ndo cuatyi ndo ta coo ndutya ndo cuenda ra Jesucristo, ta cua zandasi ra Ndyoo cuatyi ndo. Ta cua cuhva ra Ndyoo sa noo Tatyi li sii ndo vatyi yucuan cuu sa cua cuhva ra Ndyoo sii ndo.

³⁹ Vatyi ta tysiemu i saha ra Ndyoo tuhun ra sii ndo ta sii zehe ndo ta sii tandihí cuii ñiyivi, tandihí ñuu sa cua nacana ra Ndyoo. Cua sino iñi ñuu sii ra. Ta maa ra cua cundyaca ñaha sii yo.

⁴⁰ Cuaha xaan tuhun i cahan ra Pedro ta i saha ra sa siñi tuñi sii ñiyivi. I catyi ra sihin ñuu: Zavaha ndo sa vaha nuu ra Ndyoo coto zanaa ra sii ndo sihin ñiyivi ña vaha. Catyi ra.

⁴¹ Ta cuaha xaan ñiyivi i sino iñi tuhun cahan ra Pedro ta i sicoo ndutyra ñuu. Yucuan quivi i sino iñi tañi uñi mil ñiyivi sii Tuhun Ndyoo.

⁴² Tandihí quivi i titahan ñuu cuan. I zacuaha xaan ñuu sihin ra apóstol. Sasi ñuu pan ta sihi ñuu ndutya uva vatyi nacohon iñi ñuu vatyi sihi ra Jesús, sa cuenda maa ñuu, ta iñi ñi i sica tahvi ñuu sii Ndyoo tandihí quivi.

Cuhva i sicoo ñiyivi sino iñi Tuhun Ndyoo ta quivi cuan

⁴³ Cuaha xaan sa ndyityi i zavaha ra apóstol, ta iyo xaan i cuñi ñiyivi vatyi i ndyehe ñuu sa zavaha ra cuan ta yuhu ñuu vatyi i ndyehe ñuu yozo caa iyo ra Ndyoo.

⁴⁴ Tandihí ñiyivi sa sino iñi, iñi ñi i siyucu ñuu, ta i tyindyee tahan ñuu sii tahan ñuu.

⁴⁵ Ta tañu cumañi xuhun i naxico ñuu ñaa sa iyo sii ñuu. I naxico ñuu ñuhu ñuu sihin ndaha tyiño ñuu ta i saha ñuu xuhun ñihi ñuu sii inga ñiyivi sino iñi tatu cumañi si sii ñuu.

⁴⁶ Tandihí quivi i titahan ñuu vehe ñuhu hebreo ta vehe ñiyivi ta i sasi ñuu pan ta sihi ñuu ndutya uva sa cuenda ra Jesús ta iñi ñi i sasi ñuu xita tandihí quivi. Ziñxaan i cuñi ñuu ta ña cuihna iñi ñuu sii ñiyivi.

⁴⁷ I zacahnu xaan ñuu sii ra Ndyoo, ta vaha xaan cahan tandihí ñiyivi sa cuenda ñuu. Ta tandihí quivi i saha ra Ndyoo sa sino iñi inga ca ñiyivi Tuhun ra.

3

Nduvaha minoo ra xii

¹ Minoo quivi cuahan ra Pedro ta ra Juan vehe ñuhu hebreo cuhva caa uñi sa sahiñi. Yucuan cuhva tuhva ñiyivi hebreo cahan sihin ra Ndyoo.

² Ta sa cua saa ra yucuan ta i quisi ndyaca ñiyivi sii minoo ra xii. Tacuan sindyaca ñu sii ra tandihí quivi ta caa ra yuvehe nañi yuvehe tyaqui vatyi caca ra caridad.

³ Ta sa ndyehe ra sii ra Pedro ta ra Juan sa cua quihví ra vehe ñuhu ta i sica ra caridad sii ra.

⁴ I ndyehe xaan ra Pedro ta ra Juan sii ra, ta ziquí i catyi ra Pedro: Ndyehun sii ndi.

⁵ Ta i ndyehe ra xii cuan vatyi sica iñi ra sa cua cuhva ra xuhun sii ra.

⁶ Zoco i catyi ra Pedro: Ñahñi xuhun ndyize sa cuhve suun zoco iyo cuhva sii sa tyindyei suun vatyi iyo cuhva sii maa ra Jesucristo, ra ñuu Nazaret, sa tyindyei ra suun. Sa cuenda maa ra cuan catyi suhun: Nduviton ta cacon. Catyi ra Pedro.

⁷ I tñin ra Pedro ndaha siyo cuahara, ta i zanduvita ra sii ra. Ta zuun ñi caa cuhva cuan ndaha i nduvaha ñi saha ra.

⁸ I ndava ra xii cuan ta i quisahara sica ra. I quihví ra si vehe ñuhu sihin ra Pedro ta ra Juan. Sica ra. Ndava ndava ñi ra, ta zacahnu xaan ra sii Ndyoo.

⁹ I ndyehe tandihí ñiyivi sa sica ra, ta i zacahnu xaan ñu sii Ndyoo.

¹⁰ Ta i nacoto ñu sii ra vatyi ra sica caridad yuvehe ñuhu cuu ra, ra sa tuhva sindyaa yuvehe sa nañi yuvehe tyaqui. Ta iyo xaan i cuñi ñu sihin cuhva sa tahan ra.

Cahan ra Pedro sihin ñiyivi nu cu corredor ra Salomón

¹¹ Ta ñá zaña ra cuan sii ra Pedro sihin ra Juan. Iyo xaan i cuñi ñiyivi, ta yatyi xaan i titahan ñu nu ndyaa ra corredor cuan. Nañi si corredor sii ra Salomón.

¹² I ndyehe ra Pedro sa titahan ñiyivi ta i quisaha catyi ra: Iyo xaan cuñi ndo amigo vatyi ndyehe ndo sa nduvaha saha ra ya. Ndyehe xaan ndo sii ndi vatyi sica iñi ndo vatyi iyo xaan cuhva sii maa ndi a sica iñi ndo vatyi vaha xaan ñiyivi cuu ndi ta yucuan cuenda i zanacaca ndi sii ra ya. Zoco ña tacuan amigo.

¹³ Ñiyivi sahnu sii yo, ra Abraham, ra Isaac, ta ra Jacob i zacahnu ra sii Ndyoo. Ta zuun ñi maa ra Ndyoo i zacahnu sii ra Jesús, zehe ra. (I saha maa ndo sii ra Jesús sii ra ndyaca ñaha) ta i catyi maa ndo nuu ra Pilato vatyi ña vaha ra. Sa sica iñi ra Pilato sa cua zaña ra sii ra Jesús, zoco ñá saha maa ndo.

¹⁴ Ñá saha ndo sa zaña ra Pilato sii ra ta ra ii xaan cuu ra Jesús. Ra vaha xaan cuu maa ra. I sica ndo tumañi iñi sii ra Pilato sa zaña ra sii inga ra cuhva iyo costumbre sa cua zaña ra sii minoo ñiyivi quivi vico cuan. Ta yucuan cuenda i zaña ra sii inga ra cuan, ra sahñi sii ñiyivi.

¹⁵ Cuhva cuan i sahñi maa ndo sii ra Jesús vazu maa ra saha cuhva cundito ñiyivi sihin Ndyoo. Zoco i zanandoto tucu ra Ndyoo sii ra. Ñá ndoo ra nu iyo ndiyi. Ta i ndyehe maa ndi sa yaha nandoto ra.

¹⁶ Sa ndyehe ndo sii ra xii ya, nacoto ndo sii ra. Sino iñi ndi vatyi iyo cuhva sii ra Jesús ta yucuan cuenda i zanduvaha ra Ndyoo saha ra. Sino iñi ndi sii ra Jesús. Yucuan cuenda i nduvaha ra ya, ta i ndyehe tandihí ndo.

¹⁷ Amigo. Site vatyi ña sito ndo sa zavaha ndo sa ña vaha (sa sahñi ndo sii ra Jesús) ta tacuan tucu ra ndyaca ñaha sii ndo.

¹⁸ Ta tyiemvu i nacatyi ra Ndyoo sihin yo vatyi cua tahan ra Cristo tundoho. Maa ra cuu ra i casi ra Ndyoo vatyi cua zacacu ra sii yo, ta cua cuu ra vatyi tacuan i catyi ra Ndyoo sihin tandihí ra profeta. Ta

tacuan i tahan si sii ra Jesús, zuun ñi cuhva i catyi ra Ndyoo.

¹⁹ Ta vityi zandoo ndo cuatyi ndo ta nanducu ndo sii Ndyoo ta cua zandasí ra cuatyi ndo ta cua nduvaha añima ndo ta zii cua cuñi ndo.

²⁰ Ta cua tasi tucu ra Ndyoo sii ra Jesús inga saha vatyi maa ra cuu ra ndyizo tyiño i zacuu ra Ndyoo. Nu ndyaa ndo cua tasi tucu ra Ndyoo sii ra.

²¹ Zoco vityi ndyaa ra gloria ndya quivi cua ndusaa ñuhu ñuu ñiyivi inga saha tañi i catyi ra Ndyoo. Vatyi tacuan i catyi ra Ndyoo sihin ra profeta ta sa naha.

²² Ta sa naha i catyi ra Moisés: “Cua tasi ra Ndyoo minoo ra cuu ñiyivi sii yo tañi i tasi ra sii mi, ta cua cahan ra Tuhun Ndyoo. Tyizoho ndo tandihí ñaa sa cua cahan ra sihin ndo.

²³ Tatú ma tyizoho ñiyivi sa cahan ra cuan, cua cuu ñu, ta ma cuu quihví ñu sihin ñiyivi i casi ra Ndyoo.” Tacuan i catyi ra Moisés i catyi ra Pedro. Ta ziquí i catyi tucu ra:

²⁴ Ndisa vatyi tandihí ra profeta ta tyiemvu ndya quivi i quisaha cahan ra Samuel i catyi ra yozo caa cua quisi ra Jesús nu cua quisi quivi. Ta sa i tahan si cuhva catyi ra cuan.

²⁵ Ta maa yo ñiyivi hebreo cuu ñiyivi sii ra profeta cuan, ta i saha ra Ndyoo tuhun ra sii ñiyivi sii maa yo vatyi i catyi ra Ndyoo sihin ra Abraham: “Cua cuhve ndatu sii tandihí ñiyivi ñuu ñiyivi sa cuenda minoo ñiyivi suun.” Catyi ra.

²⁶ Ta yucuan cuenda i saha ra Ndyoo tyiño sii ra Jesús, zehe ra. I tasi ra Ndyoo sii ra nu iyo maa ndo sa xihna ñi vatyi cuñi ra zavaha ra tumañi iñi sii tandihí ndo. Cuñi ra sa zandoo tandihí ndo cuatyi ndo. Tacuan i catyi ra Pedro sihin ñu.

4

Tiñ ra cu tyiño sii ra Pedro sihin ra Juan

¹ Ta cahan ca ra Pedro ta ra Juan sihin ñiyivi ta i quisi ra cu zutu ta ra cu nuu sii policía sa cuenda vehe ñuhu ta ra saduceo. (Ña sino iñi maa ra saduceo cuan vatyi cua nandoto ñiyivi tatu sa sihi ñu.)

² Cuxaan ra cuan vatyi zacuaha ra apóstol sii ñiyivi cuhva i nandoto tucu ra Jesús sisi sa i sihi ra.

³ I tiñ ra sii ra Pedro ta ra Juan, ta i tyihi ra sii ra vehe caa sa iyo cuenda vehe ñuhu cuan. Ndya inga quivi cua cutuñi ra vatyi sa cua cuua cuhva i tiñ ra sii ra.

⁴ Cuaha xaan ñiyivi i siñi ñu tuhun zacuaha ra Pedro ta ra Juan ta i quisaha sino iñi ñu sii ra Jesús. I sino iñi sa yatyi ñi ohon mil rayii quivi cuan ta ziiñ ñu zíhi.

⁵ Ta inga quivi i titahan tandihí ra cu zutu nahnu sihin ra mandoñi ta ra maestro cuenda ley. I titahan ra cuan ñuu Jerusalén.

⁶ I quisi ra Anás, ra cu nuu sii zutu nahnu sihin ra Caifás ta sihin ra Juan ta ra Alejandro ta tandihí ñiyivi sii ra cu nuu sii zutu nahnu cuan, ndihí ca.

⁷ I cana ra sii ra Pedro ta ra Juan ta i quihví ra nu yucu ra cu tyiño cuan ta i quisaha ndaca tuhun ra cuan sii ra ta catyi ra: ¿Yozo caa i zanduvaha ndo sii ra xii cuan? ¿Yoo ra i saha cuhva cuan sii ndo? Catyi ra.

⁸ I tyindye Tatyi Ii ra Ndyoo sii ra Pedro, ta i quisaha catyi ra Pedro: Ndoho ra ndyaca ñaha ta ra nahnu,

⁹ ndaca tuhun xaan ndo sii ndi vityi sa cuenda minoo sa vaha i zavaha ndi sihin ra xii ndahví ya. Cuñi ndo coto ndo yozo caa i nduvaha ra.

¹⁰ Tatú yucuan cuñi ndo coto ndo, cua nacatyi sihin ndo ta cua coto ndo sihin tandihí ñiyivi hebreo vatyi i nduvaha ra vatyi iyo xaan cuhva sii ra Jesús, ra ñuu Nazaret. I tyaa ndo sii ra nu cruz, zoco i zanandoto ra Ndyoo sii ra.

11 Tañi minoo ra zandaa vehe sihin yuu cuu ndo ta zavita ndo yuu vaha. Tañi minoo yuu vaha xaan cuu ra Jesú, ta i tava ndo sii ra, ta ra ñiñi xaan cuu ra.

12 Zacacu ra Jesú sii ñiyivi, ta yoñi inga ca ra nacahnu ñuu ñiyivi sa cuu zacacu sii yo ta ma cuhun yo andyaya. Tacuan i catyi ra Pedro.

13 Ta i ndyehe ra cu tysiño vatyi ña yuhu ra Pedro ta ra Juan ta sito ra vatyi ñahñi zicuela siñoho ra (ta yivi ra tuhva cuu ra). Ta yucuan cuenda iyo xaan i cuñi ra zoco i nacoto ra vatyi ra i sica noo sihin ra Jesú cuu ra.

14 Ta i ndyehe ra cu tysiño vatyi ndyaa ra xii cuan sihin ra. Sa nduvaha ra. Ta yucuan cuenda ñá ñihi ca ra cuhva cahan ra.

15 Tacuan ta i tava ra sii tandihí uñi tahan ra sata vehe vatyi cuñi ra sa natuhun tahan xihna ra.

16 I catyi ra: ¿Ñaa sa cuu zacuu yo sihin ra ya? Ma cuu catyi yo vatyi zavaha ra sa ña vaha vatyi i zavaha ra minoo sa ndyityi cahnu xaan ta sito vaha tandihí ñiyivi ñuu ya.

17 Cua zayuhu yo sii ra ta cua catyi yo: "Ma cahan ca ndo tuhun ra Jesú." Tacuan cua catyi yo ta ma coto cuaha ca ñiyivi cuhva i nduvaha ra xii. Catyi ra.

18 Tacuan ta ziqui i cana ra sii ra ta i catyi ra: Ma cahan ca ndo tuhun ra Jesú, ta ma zacuaha ca ndo sii ñiyivi. Catyi ra.

19 Zoco i catyi ra Pedro ta ra Juan: Nacañi xihna iñi ndo ta ziqui catyi ndo ñaa sa cuu sa vaha sa cuenda ra Ndyoo. ¿Atu vaha cua tyaa ndi yahvi sa cahan maa ndo a vaha tyaa ndi yahvi sa cahan ra Ndyoo?

20 Catyi ndi vatyi ma cuu sa ctaxi ndi vatyi ñiñi xaan cua nacatyti ndi sa ndyehe ndi. Cua nacatyti ndi sa siñi ndi. Tacuan i catyi ra Pedro.

21 Tacuan i cuu si, ta i zayuhu ra cu tysiño sii ra inga saha, ta ziqui i zaña ra sii ra vatyi ñá ñihi ra cuhva tyaa ra cuatyti sata ra coto

cuxaan ñiyivi ñuu. Zacahnu xaan ñiyivi cuan sii ra Ndyoo vatyi sito ñu cuhva i nduvaha ra xii cuan.

22 Vatyi sa uu xico cuiya sa ndyaa ra cuan tundoho ta i nduvaha ra. I ndyehe ñiyivi cuhva iyo ra Ndyoo vatyi i zanduvaha ra sii ra xii cuan.

Sica tahvi ñiyivi sino iñi sii ra Jesú sii ra Ndyoo vatyi ma yuhu ñu

23 I quita ra Pedro ta ra Juan ta cuahan ra ndya nu yucu inga ñiyivi sino iñi sii ra Jesú. I nacatyti ra sihin ñu tandihí sa i catyi ra zutu nahnu ta ra sahnu cuan sihin ra.

24 I tyizoho ñu sa cahan ra, ta ziqui iñi cuhva i sica tahvi ñu sii ra Ndyoo ta catyi ñu: Zutu mañi yo, i zavohon yutyi andivi ta ñuhu ñuu ñiyivi sihin tyañuhu. Yoho i zavaha tandihí cuii sa iyo.

25 Ta tyiemvu i cohon sihin ra David ra i cuu muzun ta ñiyivi sahnu sii ndi. Ta i tyaa ra cuhva i cohon:

Ndisa cuxaan xaan ñiyivi inga ñuu. Ta ndisa vatyi cuaha xaan cuhva sica iñi ñiyivi hebreo ta sa caha ñi cuu cuhva sica iñi ñu.

26 Cua titahan ra cu tysiño sii ñu sihin ra cu tysiño hebreo. Cua cuñi ra cahñi tahan ra sihin ra Ndyoo ta sihin ra Cristo, ra ndyizo tysiño ra Ndyoo.

Tacuan i tyaa ra David ta tyiemvu.

27 Ta i cahan ca ñiyivi cuan sihin ra Ndyoo ta catyi ñu: Ihya ñuu ya ndisa cuii vatyi i titahan ra Herodes ta ra Poncio Pilato ta ra i quisí inga ñuu ta ra tata hebreo, ta i sahñi ra sii ra Jesú, ra cuu muzu iun. Ta ra Jesú cuu ra i tasun vatyi cua cuizo ra tysiñon.

28 Zoco tacuan i zavaha ra cuan vatyi ta tyiemvu i tyoon cuhva yozo caa cua tahan si.

29 Ta vityi Zutu mañi yo, cuñi ra zayuhu ra sii ndi. Cuhvon tundyee iñi sii ndi vatyi muzun cuu sii ndi. Ma cuhvon sa cua yuhu ndi nu zuhva. Ta cuhvon sa cua zacoto maa ndi sii ñiyivi Tuhun moo.

³⁰ Zanduvohon sii ñiyiví cuhu ta zavohon sa ndyityi sa cuenda ra Jesú, ra cuu muzu iun. Catyi ñu.

³¹ Ta sa ndihí sica tahvi ñu sii Ndyoo, ta i taan nu yucu ñu, ta i situ Tatyi Ii ra Ndyoo sii tandihí ñu, ta ñá yuhu ca ñu, ta i nacatyi ñu Tuhun Ndyoo sihin ñiyiví.

Nahñi sa i cumañi sii ñiyiví sino iñi sii ra Jesú

³² Inuu ndita ñi i sicoo tandihí ñu sino iñi. Numinoo ra ta ñá catyi ra vatyi iyo ndaha tyiño ra vatyi inuu ndita ñi i sicoo tandihí ñu.

³³ Sihin cuaha xaan cuhya i nacatyi ra apóstol sihin ñiyiví cuhva i nandoto tucu ra Jesú. Ta i saha xaan ra Ndyoo tumañi iñi sii tandihí ñu sino iñi.

³⁴ Nahñi i cumañi sii tandihí ñu vatyi tatu iyo ñuhu a vehe ñu i xico ñu sii si tatu cumañi xuhun. Ta i quisahyaca ñu xuhun sa cuyahvi si.

³⁵ Ta i saha ñu sii si sii ra apóstol, ta i saha maa ra sii ñu nu cumañi si.

³⁶ Tacuan i zavaha minoo ra nañi José. I zama ra apóstol ziví ra. Bernabé i zacunañi ra sii ra vatyi i saha xaan ra tundayee iñi sii tandihí ñiyivi. Ra ñuu Chipre i cuu ra ta ñiyivi sii ra Leví, ra i sihi ta tiemvu.

³⁷ I xico ra ñuhu ra, ta i quisahyaca ra xuhun yahvi si, ta i saha ra sii si sii ra apóstol.

5

Cuatyi i zavaha ra Ananías ta ña Safira

¹ Ta sicoo minoo ra nañi Ananías. Ta Safira nañi ñazihí ra. I xico tucu maa ñu minoo ñuhu ñu.

² I tava ra Ananías zuhva xuhun sa cuu yahvi si, ta sito tucu ñazihí ra. Ta i sindyaca ra tandihí ca si, sii ra apóstol ta catyi ra: Vasi ndyaque tandihí xuhun sa cuu yahvi ñuhu i xique.

³ Ta i quisahyaca catyi ra Pedro sihin ra: Yoho Ananías, sohon sa zatívi cuihna suun vatyi zandavi ñohon

sii Tatyi Ii. I tavon zuhva xuhun sa cuu yahvi ñuhu cuan.

⁴ Ndisa, ñuhu moo i cuu si, ta yoñi sa catyi suhun vatyi xicon sii si. Ta ndisa vatyi yahvi ñuhu cuan cuu sii moo sa i xicon sii si. Ta ¿ñaa cuenda sica iñun cuhva ña vaha ya? Yiví sii ñiyiví zandavi ñohon. Sii ra Ndyoo zandavi ñohon.

⁵ Ta sa siñi ra Ananías tuhun cahan ra Pedro ta i nduva ra, ta i sihi ra. Ta tandihí ñiyiví i sito tuhun cuan, i yuhu xaan ñu.

⁶ I quihví ra yoco ta i nazucu ra zahma sii coño ñuhu ra, ta i quihin ra sii ra, ta tyihi ra si ñuhu.

⁷ Ta i yaha tañi uñi ora ta i saa ñazihí ra. Ta coto ca ña ñaa sa tahan yíi ña.

⁸ I quisahyaca ndaca tuhun ra Pedro sii ña ta catyi ra: ¿Atu ihyá ñi yahvi i xico ndo ñuhu ndo? Ta i catyi tucu maa ña: Avi. Tacuan ñi i cuu yahvi si.

⁹ I catyi tucu ra Pedro sihin ña: Ña vaha sa zacasi tahan ndo tuhun ta zandavi ñaha ndo sii Tatyi Ii. Ndyehé, vatyi sa vasi tucu ra yoco. Ndyá sehe ca i tyihi ra sii yíun si ñuhu. Ta vityi vasi quihin tucu ra suun.

¹⁰ Ta ta sica cuui ñi i nduva ña saha ra Pedro ta i sihi ña. I quihví ra yoco ta i ndyehe ra vatyi sa i sihi ña, ta i cañihí ra sii ña ta tyihi ra sii ña si ñuhu yatyi ñi nu i quihví yíi ña.

¹¹ I sito tandihí ñiyiví sa tahan ñu ta yuhu xaan ñu, ta yuhu xaan ñiyiví sino iñi sii Ndyoo.

Zavaha ra apóstol cuaha xaan sa ndyityi

¹² Zavaha ra apóstol cuaha xaan sa ndyityi nu yucu ñiyiví. Tandihí ñiyiví sino iñi sii ra Jesú i titahan ñu sisi vehe ñuhu hebreo minoo corredor nañi si Corredor sii ra Salomón.

¹³ Yoñi inga ñiyiví i cahan ndya vaha ñi sii ñu vatyi i sito tandihí ñiyiví vatyi vaha xaan ñiyiví cuu ñu sino iñi.

14 Ta vazu i yuhu ñiyivi, zoco cuaha xaan ca ñu i sino iñi sii ra Jesú. I sino iñi rayii ta tacuan tucu ñu zíhi.

15 Ta sa cuenda tysiñra apóstol i saqui ñiyivi sii ñiyivi cuhu ityi, nu sito a nu yuu vatyi tatu cua yaha ra Pedro vazu xiñahñu ñi ra cua nañi sii ñu ta cua nduvaha ñu.

16 Ta ñiyivi inga ñuu yatyi ñi Jerusalén i quisi ndyaca tucu ñu sii ñiyivi cuhu ta ñiyivi iyo tatyi cuihna añima, ta i nduvaha tandihí ñu.

Tahan ra Pedro ta ra Juan tun-doho

17 Tacuan ta i cucuihna xaan iñi ra cu nuu sii ra cu zutu ta cuaha xaan ra saduceo sii ra apóstol.

18 Yucuan cuenda i tñin ra sii ra, ta i tyihi ra sii ra vehe caa.

19 Zoco sa cuaa cuan i quisi minoo ángel ra Ndyoo, ta i nuña ra yuvehe caa cuan ta i tava ra sii ra apóstol. Ta i catyi ra sihin ra:

20 Cuahan ndo vehe ñuhu hebreo ta nacatyi ndo sihin ñiyivi yozo caa cuu nduvaha añima ñu. Catyi ángel cuan.

21 I tyaa ra apóstol yahvi sa cahan ra. Ta sa vasi cundisi i quihvi ra vehe ñuhu ta zacuaha ra sii ñiyivi. Tacuan ta i cana ra cu nuu sii ra cu zutu ta ra zutu nahnu sii tandihí ra mandoñi vatyi cua titahan ra. Ta i tasi ra tysiñra ndyaca vehe caa vatyi cua tava ra sii ra apóstol vatyi cua quisi ra nu yucu ra.

22 Zoco sa saa ra policía ndyaca vehe caa cuan, ta ñá nañihí ca ra sii ra apóstol ta cua nanuhu tucu ra ndyaca nu yucu ra cu tysiñra, ta i catyi ra:

23 I sahan maa ndi vehe caa ta ndyehe ndi vatyi ndazi cutu yuvehe ta yucu tandihí ra zacuenda yuvehe. Zoco sa nuña ndi yuvehe cuan ta ñá nañihí ndi numinoo ñiyivi sisi si.

24 Ta sa siñi ra cu nuu sii policía sihin ra zutu nahnu ta ra cu nuu sii ra cuhva i nacatyi ra ta iyo xaan i cuñi ra ta sica iñi ra yozo ca cua cua cuu ra cuhva cuan.

25 Tacuan ta i quihvi minoo ra ta catyi ra: Ra i tyihi ndo si vehe caa cuan, vityi nandyaa ra sisi vehe ñuhu ta zacuaha ra sii ñiyivi.

26 Tacuan ta cuahan ra cu nuu sihin policía ra, ta i tava ra sii ra apóstol. Vii ñi i tava ra sii ra coto cuxaan ñiyivi ta cañi ñu sii ra policía sihin yuu.

27 I sindyaca ra sii ra apóstol ndyaca nu yucu ra cu tysiñra, ta i cahan ra cu nuu sii ra cu zutu sihin ra ta catyi ra:

28 Sa saha maa ndi cuenda sii ndo vatyi i catyi ndi vatyi ma zacuaha ca ndo sa cuenda ra Jesú. Ta vityi ñihi ca zacuaha ndo. Nacahnu Jerusalén sito ñiyivi tuhun ya, ta tyaa ndo cuatyi sata maa ndi vatyi i sihi ra Jesú.

29 Ta ziqui i catyi ra Pedro ta inga ra apóstol: Ñiñi xaan ca sa tyaa ndi yahvi sii Ndyoo ta yivi sii ñiyivi.

30 I tyaa xaan ñiyivi sahnu sii yo yahvi sii Ndyoo. Ta zuun ñi ra Ndyoo cuan i zanandoto ra sii ra Jesú. Ta maa ndo cuu ra i sahñi sii ra vatyi i tyaa ndo sii ra nu cruz.

31 Ta vityi zanducahnua xaan ca ra Ndyoo sii ra Jesú. Yucuan cuenda ndyaca ñaha ra tandihí, ta cuu cacu ñiyivi maa ñi sa cuenda maa ra ta zanduvaha ra añima yo, maa yo ñiyivi hebreo. Ta zandasí ra cuatyi yo.

32 Zacuaha maa ndi tuhun ya vatyi sito ndi vatyi tuhun ndisa cuu si. Ta tacuan tucu zacuaha Tatyi Ii, ra saha ra Ndyoo sii ñiyivi tyaa yahvi sii ra.

33 Ta sa siñi ra cu tysiñra catyi ra, ta i cuxaan xaan ra, ta i cuñi ra sa cahñi ra sii ra apóstol.

34 Zoco minoo ra fariseo nañi ra Gamaliel ta i nduvita ra zava mahñu. Minoo maestro cuu ra cuenda ley ra Moisés, ta i tyaa xaan ñiyivi yahvi sii ra. I catyi ra vatyi natava ra cu tysiñra sii ra apóstol.

35 Ta ziqui i catyi ra sihin inga ra cu tysiñra: Amigo, tandihí inga

ndoho ra ndyizo tysiño, cuñi si zacuenda xaan yo ñaa sa zavaha yo sihin rayii ya.

³⁶ Nacohon iñi ndo vatyi quivi cuan i sico minoo ra nañi Teudas. I sica iñi ra vatyi ñiñi xaan ra, ta cuaha xaan ra i cutahan sihin ra, tañi cumi ziendu ra. Zoco i sahní ñiyivi sii ra Teudas ta i quiti cuatyi tandihí ra sindyico sii ra, ta i naa cuhva sa zacuu ra sihin ñiyivi.

³⁷ Ta ziqui zuun ñi quivi sa i cahvi ñiyivi sii ñiyivi iin iin vehe ñu ta i sico minoo ra nañi Judas, ra ñuu Galilea. I zatitahan ra sii cuaha xaan ñiyivi. Zoco zuun ñi i sihi tucu ra cuan, ta i quiti cuatyi ra sindyico sii ra.

³⁸ Ta vityi catyi sihin ndo vatyi nazaña yo sii rayii ya ta cuhva yo sa zavaha ra cuhva cuñi ra. Tatu zavaha ra cuhva cuñi ñiyivi ñi, cuanaa tysiño ra.

³⁹ Zoco tatu zavaha ra cuhva cuñi ra Ndyoo, ma cuu zanaa yo sa zavaha ra. Nazaña yo sii ra coto cuxaan ra Ndyoo sihin yo.

⁴⁰ Tacuan i catyi ra Gamaliel, ta i tyaa ra cu tysiño yahvi sa cahan ra. Tacuan ta i cana ra cu tysiño sii ra apóstol. I cañi ra sii ra, ta ñihi xaan i catyi ra sihin ra vatyi ma cahan ca ra tuhun ra Jesús, ta ziqui i zaña ra sii ra.

⁴¹ I quita ra apóstol nu yucu ra cu tysiño cuan. Zii xaan i cuñi ra vatyi saha ra Ndyoo sa ndyehe ra ticanhan nuu sa cuenda ra Jesús.

⁴² Ta tandihí quivi i zacuaha ra sii ñiyivi vehe ñiyivi ta vehe ñuhu hebreo. I zacuaha ra sii ñu vatyi sa i quisira Jesús ta i sihi ra sa cuenda cuatyi maa ñu.

6

Tyaa tysiño ra sii usa tahan ra cua tyindyee sii ra apóstol

¹ Ta quivi cuan i nducuaha ca ñiyivi sino iñi sii ra Jesús. Tandihí ñu i cuu ñu ñu hebreo, zoco i cuu ñu ñiyivi cahan zahan griego ta ñiyivi cahan zahan hebreo. I quisaha

cuxaan ñiyivi cahan griego ta catyi ñu vatyi ña ñihi ñundahvi ñu tahan ñu, ñu sihi yii, xuhun i zasa ra apóstol.

² Tacuan ta i cana sa usi uu tahan ra apóstol sii tandihí ñiyivi sino iñi sii ra Jesús vatyi cua titahan ñu ta i catyi ra sihin ñu: Ña vaha sa zaña maa ndi tysiño sa zacuaha ndi sii ñiyivi Tuhun Ndyoo ta zasa ndi xuhun.

³ Yucuan cuenda, ndoho amigo, nducu ndo usa tahan ra tahan ndo. Ra iyo xaan Tatyi Ii ra Ndyoo añima ta ra iyo sa siñi tuñi vaha xiñi. Ta cua cuizo maa ra tysiño ya sa zasa ra xuhun.

⁴ Ta maa ndi, tandihí tysiemu cua caca tahvi ndi sii ra Ndyoo ta cua zacuaha ndi sii ñiyivi.

⁵ Tacuan, ta vaha nduu cuñi tandihí ñu sihin cuhva i cahan ra apóstol, ta i casi ñu sii ra Esteban vatyi vaha xaan sino iñi ra sii ra Jesús ta iyo xaan Tatyi Ii ra Ndyoo sihin ra. Ta i casi tucu ñu sii ra Felipe, ra Prócoro, ra Nicanor, ra Timón, ra Parmenas, ta ra Nicolás. Ra ñuu Antioquía cuu ra Nicolás. Ta quivi ta coto ca ra sii ra Jesús i tyaa xaan ra yahvi sii costumbre ñiyivi hebreo. Zoco yivi ra hebreo cuu ra.

⁶ I yaha sa usa tahan ra cuan ityi nuu ra apóstol, ta i sica tahvi ra sii ra Ndyoo, ta i tyizo ra ndaha ra sii ra vatyi cua cuizo tysiño ra cuan.

⁷ I nducahnau ca tysiño ra Ndyoo. I ndutuu xaan ñiyivi sino iñi sii ra Jesús ñuu Jerusalén ta sino iñi tucu cuaha ra cu zutu.

Tiin ra cu tysiño cuenda vehe ñuhu sii ra Esteban

⁸ I tyindyee xaan ra Ndyoo sii ra Esteban ta i zavaha xaan ra sa ndyityi. Ta vaha xaan ñiyivi i cuu ra. Ta cuaha xaan sa ndyityi ta zeña i zavaha ra nu yucu ñiyivi.

⁹ Zoco zuhva ra i cuxaan ra sihin ra. Minoo ityi ra nañi ra ra libre. Ñiyivi hebreo ñuu Cirene ta ñuu Alexandría cuu ra. Maa ra sihin inga ra hebreo nu cu si Cilicia

ta nu cu si Asia i quisaha cahan ra sihin ra Esteban.

¹⁰ Zoco i saha Tatyi Ii cuaha xaan sa siñi tuñi sii ra Esteban, ta tatu sa cahan ra Esteban ñia ñihi ca inga ra cuhva cahan ra.

¹¹ Yucuan cuenda i tyiyahvi inga ra cuan sii ra cua catyi: “Siñi ndi sa cahan ra Esteban ndya vaha ñi sii ra Moisés ta sii ra Ndyoo.” Ta tacuan i catyi inga ra cuan.

¹² Ta yucuan cuenda i nduxaan ñiyivi. I cuxaan ra mandoñi ta ra maestro cuenda ley ra Moisés. I sahan ra nu ndyaa ra Esteban, ta i tiñi ra sii ra ta i sindyaca ra sii ra nu yucu ra cu tyiño.

¹³ Ta ziqui i ñihi ra sii ra cu sa ndaa sii ra vatyi cua cahan ra cuendu ziqui ra Esteban. I catyi ra cuan: Ihya rayii, cahan xaan ra ndya vaha ñi sii vehe ñihu maa yo ta sii ley ra Moisés.

¹⁴ Sa siñi ndi vatyi catyi maa ra vatyi cua zanduva ra Jesú, ra ñuu Nazaret, vehe ñihu ya ta cua zanaa ra costumbre i zacuaha ra Moisés. Tacuan i catyi ra cu sa ndaa cuan, ra cahan cuendu cuan.

¹⁵ I ndyehe xaan tandihí ra cu tyiño sii ra Esteban ta i ndyehe ra vatyi ndisi xaan i nduu nuu ra tañi cuhva caa nuu ángel.

7

Cuhva i cahan ra Esteban

¹ Ta i ndaca tuhun ra cu nuu sii zutu sii ra Esteban ta catyi ra: ¿Atu ndisa ra cuan sa cahan ra?

² Tacuan ta i catyi ra Esteban sihin ra cu tyiño cuan: Amigos. Tyizoho ndo sa quehin. Ñiyivi sahnu sii yo i cuu maa ra Abraham. Ta tyiemvu i ndyehe ra sii ra Ndyoo ra cahnu. Ndyaa ra Abraham ñuu Mesopotamia quivi cuan, ta cuhun ca ra ñuu Harán ta i ndyehe ra sii ra Ndyoo.

³ I cahan ra Ndyoo sihin ra Abraham ta catyi ra: “Quiton ñuun ta

ñiyivi suun ta cua cuhun inga ñuu sa cua zañehi suun.”

⁴ Tacuan ta i quita ra Abraham ñuu Caldea ta cuahan ra cua cundyaa ra ñuu Harán. Ta sa sihi zutu ra Abraham ta i zaquisi ra Ndyoo sii ra Abraham ihya ñuu nu ndyaa ndo vityi.

⁵ Ñá saha ra Ndyoo ñihu cuan nu zuhva si sii ra Abraham, zoco saha ra Ndyoo tuhun ra vatyi cua cuhva ra sii si sii ra, ta sii maa ra cua cuu si ta sii ñiyivi sii ra sa i sihi ra. Ta quivi cuan ta coo ca zehe ra Abraham.

⁶ Ihya cuu cuhva i cahan ra Ndyoo sihin ra: “Cua cundito ñiyivi suun inga ñuu nu iyo inga ñiyivi. Cumi ziendu cuiya cua zatyiño ñu tyiño ñiyivi ñuu cuan sihin tundoho vatyi cua cañi ñiyivi ñuu cuan sii ñu.

⁷ Zoco cua tasi tuñi sii ñiyivi ñuu cuan, ta sa yaha cuhva cuan ta cua quita ñiyivi suun ñuu cuan, ta cua zacahnu ñu sii mi ihya.”

⁸ Tacuan i catyi ra Ndyoo, ta ziqui i saha ra sii ra Abraham minoo costumbre sa cua tahndya ñii xiñi xuu lee. Tacuan ta cua coo minoo cuhva sii ñiyivi cuan ta cua nacohon iñi ñu vatyi saha ra Ndyoo tuhun ra sii ñu. Ta sa yaha cacu ra Isaac zehe ra Abraham ta i zavaha Abraham costumbre cuan sihin ra Isaac sa quita uña quivi ra. Ta tacuan tucu i zavaha ra Isaac sihin ra Jacob zehe ra, ta i zavaha tucu ra Jacob sii si sihin tandihí sa usi uu tahan zehe ra. Maa ra cuu ñiyivi sahnu sii yo.

⁹ Ta zuun ñi ra Esteban cuan cahan sihin ra cu tyiño cuan ta catyi ra: Ta minoo zehe ra Jacob, nañi ra José. Ta i cucuihna iñi tandihí yañi ra sii ra. Yucuan cuenda i xico ra sii ra sii ra inga ñuu. Cuahan ra ñuu Egipto, zoco ñia zandoo ra Ndyoo sii ra José.

¹⁰ I tyindyee xaan ra Ndyoo sii ra José vazu i ndyehe ra tundoho. Quivi i saa ra José nu ndyaa ra Faraón, ra cu rey ñuu Egipto, i saha ra Ndyoo sa siñi tuñi sii ra José ta i

tahan iñi ra Faraón sii ra ta i saha
ra Faraón tyiño sii ra José sa cuu ra
gobernador sii tandihí ñuu cuan ta
cuhva ndya vehe ra Faraón.

¹¹ Tacuan ta i quasi minoo tama
nacahnu nu cu si Egipto sihin nu cu
si Caanán, ta i ndyehe xaan ñiyivi
tundoho. Ñá ñihí ñiyivi sahnu sii yo
sa casi ñu.

¹² I sito ra Jacob vatyi iyo trigo
ñuu Egipto, ta i tasi ra sii zehé ra,
zuun ñi ra cu ñiyivi sahnu sii yo.
Yucuan cuu sa xihna ñi saha i sa-
han ra.

¹³ Ta sa cu uu saha i sahan ra,
i zacoto ra José sii ra vatyi yañi
ra cuu sii ra. Ta yucuan quivi i
quisaha sito ra Faraón sii ñiyivi sii
ra José.

¹⁴ Ta ziqui i tasi ra José tyiño sii
ra Jacob zutu ra vatyi quasi ra sihin
tandihí ñiyivi sii ra. Ta sa tandihí
ñiyivi sii ra, uñi xico sahun tahan
ñu.

¹⁵ Ta cuahan ra Jacob ñuu Egipto.
Ta yucuan i ndoo ra cuhva ndya i
sihi ra, ta tacuan tucu tandihí zehé
ra i sihi ra yucuan. Ñá sananuhu ca
ra ñuu ra.

¹⁶ Ta i saa quivi sa sindyaca ñiyivi
yiqui ra Jacob ta yiqui zehé ra ndya
ñuu Siquem. Yucuan i quihvi ra
ñuhu vatyi sa i nazata ra Abraham
ñuhu cuan sii zehé ra Hamor.

¹⁷ Ta ñiyivi sii ra Abraham i ndu-
cuaha xaan ñu ñuu Egipto, ta sa
cua saa quivi cua cuhva ra Ndyoo
ñuhu sii ñu tañi sa i catyi ra sihin ra
Abraham.

¹⁸ Ta i quisaha sindyaca ñaha
inga rey ñuu Egipto cuan, rey ra ñá
sito sii ra José.

¹⁹ I zandyeha xaan ra tundoho sii
ñiyivi sahnu sii yo. Quiñi xaan cuu
cuhva i zavaha ra sihin ñu vatyi i
catyi ra vatyi tatu cua cacu zehé ñu
cua zavita ñu sii si. Tacuan i catyi
ra vatyi cuñi ra sa cuu si.

²⁰ Ta zuun ñi tyiemvu cuan i cacu
ra Moisés ta ndasa xaan ra nuu ra
Ndyoo. I tyixehe zihí ra sii ra sisi
vehe uñi yoo.

²¹ Ta minoo quivi ñá cuu ca tyix-
ehe ña sii ra ta i tyihi ña sii ra sisi
minoo tyica ta saqui ña sii ra sisi
tuyoo caxtyila yuyuu. Ta yucuan
nañihí zehé ra Faraón sii ra. I nduu
zehé ra sii ña. Maa ña i zacuahnu
sii ra.

²² Yucuan cuenda i cahvi ra
Moisés tandihí cuhva i sito ñiyivi
Egipto. I nducahnu xaan ra. Vaha
xaan i cuu cahan ra ta cuaha sa
vaha i zavaha ra.

²³ Zuun ñi ra Esteban cuan cahan
sihin ra cu tyiño cuan ta catyi ra: Ta
sa i ndusi ra Moisés uu xico cuiya
ra ta i cuñi ra sa cua ndyehe ra sii
ñiyivi sii ra, ñiyivi hebreo.

²⁴ Tacuan ta minoo quivi i
ndyehe ra vatyi i cañi minoo ra
Egipto sii minoo ra hebreo, ta
cuahan ra Moisés cua tyindyee ra
sii ra hebreo cuan, ta i sahñi ra sii
ra Egipto.

²⁵ Sica iñi ra vatyi cua coto ñiyivi
sii ra vatyi i tasi ra Ndyoo sii ra
sa zacacu ra sii ñu sii ñiyivi Egipto.
Zoco ñá cutuñi iñi ñu.

²⁶ Ta inga quivi i ndyehe ra
Moisés vatyi sahñi tahan uu tahan
ra hebreo, ta i ndedu ra Moisés
cuhva sa coo vaha ra cuan ta ma
cahñi tahan ca ra ta catyi ra: “Ty-
izoho ndo, amigo. Ñá vaha cahñi
tahan ndo.”

²⁷ Zoco minoo ra sahñi tahan
cuan i quiñi ndaha ra sii ra Moisés
ta catyi ra: “¿Yoo ra catyi suhun
vatyi cundyaca ñohon sii ndi?

²⁸ Cuñun cahñun sii, tañi i sahñun
sii ra Egipto icu.”

²⁹ Ta sa siñi ra Moisés cuhva
cuan, ta i sino ra ta cuahan ra ndya
inga ñuu vatyi yuhu xaan ra. I
quita ra Egipto ta cuahan ra ndya
Madián. Yucuan i sicoo ñazihí ra, ta
i cacu uu tahan zehé ra.

³⁰ I yaha uu xico cuiya. Tacuan
ta minoo quivi ñoho ra Moisés sisi
cuhu, ta i ndyehe ra minoo taca iñu
yatyi fii yucu Sinaí. Cayu tu zoco ñá
ndihí tu. Tacuan ta i quituu minoo
ángel mahñu tu.

31 Iyo xaan i cuñi ra Moisés sa ndyehe ra, ta i tuhva ra nu ndyaa taca iñu cuan vatyi cua ndyehe vaha ra. Ta i siñi ra vatyi cahan ra Ndyoo sihin ra ta catyi ra Ndyoo:

32 "Yuhvi cui Ndyoo. I zacahnu ñiyiví sahnun sii. Ra Abraham, ra Isaac, ta ra Jacob i zacahnu tandíhi ra sii." Nihi tacuan ñi ca ra Moisés, ta i yuhu xaan ra sa ndyehe ca ra.

33 Ta ziquí i catyi ra Ndyoo sihin ra: "Tavon ndison vatyi ihya nu nandyoon ñuhu ii cuu si vatyi ihya ndyei."

34 Ta ziquí catyi tucu ra Ndyoo: "Sa ndyehi ta site vatyi tahan xaan ñiyiví i casi tundoho nu iyo ñu ñuu Egipto cuan. Siñi sa cahan ñu ta site vatyi ña cundyee ca iñi ñu tun-doho. Ta vityi noo xique vatyi cua zacaqui sii ñu. Ñaha. Coho yo ñuu Egipto." I catyi ra Ndyoo.

35 Ta zuun ñi ra Moisés cuan cuu ra sa cahan ñiyiví sihin ta catyi ñu: "¿Yoo ra catyi suhun vatyi cuun juez sii ndi ta cundyaca ñohon sii ndi?" Catyi ñu. Ta vityi zuun ñi maa ra cuu ra i tasi ra Ndyoo vatyi cua zacacu ra sii ñiyiví cuan ta cua cundyaca ñaha ra sii ñu. Vatyi tacuan i catyi ángel sa cahan si sihin ra sisi taca iñu cuan.

36 I tava ra Moisés sii ñiyiví ñuu Egipto. I zavaha ra cuaha xaan sa ndyityi ñuu Egipto ta Tyañuhu Cuaha. Ta i zavaha tucu ra sa ndyityi nu i sica noo ñiyiví cuan minoo nu yoñi ñiyiví iyo sisi sa uu xico cuiya.

37 Zuun ñi maa ra Moisés cuan i catyi sihin ñiyiví hebreo: "Cua tasi ra Ndyoo sii minoo ra cua cahan Tuhun Ndyoo. Tañi i tasi ra sii mi, tacuan tucu cua quisi ra. Minoo ra hebreo cua cuu ra." Catyi ra Moisés.

38 Ta maa ra Moisés cuan cuu ra i sica sihin ñiyiví sa sica noo ñu nu yoñi ñiyiví iyo. Sihin maa ra i cahan ángel cuan yucu Sinaí cuan. Yucuan i siyucu ra sihin ñiyiví sahnú

sii yo, ta i ñihi ra Ley ra Ndyoo sa saha ra sii yo.

39 Maa ra Esteban cuu ra cahan tandíhi cuhva ya sihin ra cu tyiño ta catyi ra: Zoco ñá tyaa ñiyiví sahnú sii yo yahvi sii ra Moisés. Ñá cuñi ñu tyizoho ñu sa cahan ra. I cuñi ñu sa cunanuhu tucu ñu ndya ñuu Egipto.

40 Ta quivi sa ñoho ra Moisés xiñi yucu Sinaí i catyi ñu sihin ra Aarón: "Zavohon inga ndyoo sii ndi vatyi cua zañaha si sii ndi ityi. Ña sito ndi ndya ma cua naa ra Moisés, ra i tava sii ndi ñuu Egipto."

41 Yucuan cuu nu i zavaha ñu minoo ndyoo. Tañi caa minoo zindiquí luhlu caa si, ta i zacahnu ñu minoo vico cuenda si, ta sahñi ñu quiti vatyi cua zacahnu ñu vico ndyoo ñu. Ta i sica tahvi ñu sii si. Ta zii xaan i cuñi ñu sihin cuhva i zavaha ñu.

42 Yucuan cuenda i saha ra Ndyoo sa zavaha ñu cuhva cuñi maa ñu. Saha ra sa zacahnu ñu ñicandyi ta luna ta tiñoo. I zavaha ñu cuhva catyi minoo profeta ta tyiemvu. I catyi ra cuan vatyi catyi ra Ndyoo:

Ndoho ñiyiví hebreo.

Yivi sii mi i zacahnu ndo sa sica noo ndo sa uu xico cuiya cuan.

43 I cuñi ca ndo sii ndyoo sa yivi Ndyoo cuu sa ndisa. Nacahnu nu i sica noo ndo i sica noo tucu minoo vehe ñii sa cuenda ra Moloc.

Ta inga ndyoo sindyizo ndo caa si cuhva caa tiñoo. Nañi si Renfán.

Maa ndo i zavaha sii ndyoo cuan, ta maa ndo i zacahnu sii si.

Ta yucuan cuenda cua tasi sii ndo sica xaan.

Cua yaha ndo ñuu Babilonia.

Tacuan i catyi ra Ndyoo sihin ñiyiví cuan.

44 Ta i cahan ca ra Esteban sihin ñiyiví ta catyi ra: Ñiyiví sahnú sii yo, i sica noo minoo vehe ñii sihin ñu nu i sica noo ñu nu yoñi ñiyiví iyo. Ta sisi si i zacahnu ñu sii ra

Ndyoo. I zañaha ra Ndyoo sii ra Moisés cuhva cua sino si, ta zuun cuhva i catyi ra Ndyoo, tacuan i sino si.

⁴⁵ Ta quivi i sindyaca ñaha ra Josué i quisi ndyaca ñiyivi vehe cuan ihya ñuu Jerusalén, ta sahñi tahan ñu sihin ñiyivi ihyá ta i tava ra Ndyoo sii ñu. Tacuan i ñihí ñiyivi sahnu sii yo ñuhu nu ndyaa yo vityi vatyi saha ra Ndyoo sa zahacanaa ñu. Ta sisi vehe ñii cuan i zacahnu ñu sii Ndyoo ndya ta quivi ra rey David.

⁴⁶ I saha xaan ra Ndyoo ndatu sii ra David. Tacuan ta i sica ra David minoo tumañi iñi sii Ndyoo sa cua zandaa ra minoo vehe yaha sa cuenda Ndyoo. Zuun ñi Ndyoo ra i zacahnu ra Jacob ta tyiemvu cuu ra.

⁴⁷ Ta ñá saha ra sa zandaa ra David vehe ra. Maa ra rey Salomón cuu ra i zandaa vehe ra Ndyoo.

⁴⁸ Zoco ña ndyaa ra Ndyoo sisi vehe zavaha ñiyivi. I catyi minoo profeta:

⁴⁹ Catyi ra Ndyoo: Yuhvi ndyaca ñehi andivi ta ñuu ñiyivi.

Ma cuu zavaha ndo minoo vehe vaha xaan ta cua cundyei sisi si vatyi ña cuñi si nu cua cundyei ta nu cua quitati.

⁵⁰ Yuhvi cuu ra i zavaha tandihi. Catyi ra Ndyoo.

⁵¹ Ta ziqui i catyi tucu ra Esteban sihin ñiyivi cuan: Ñihí xaan iñi ndo. Inuu cuii ñi caa ndo tañi i cuu ñiyivi sahnu sii yo. Ña saha ndo sa cundyaca ñaha ra Ndyoo añima ndo. Ña tyisaha ndo sa ndisa. Sahñi tahan ndo sihin Tatyi li ra Ndyoo.

⁵² I cañi ñiyivi sahnu sii ndo sii tandihi cuii ra i cuu profeta. Isahñi ñu sii tandihi ra i nacatyi vatyi nu cua quisi quivi ta cua quisi minoo ra vaha xaan. Ta sa quisi ra vaha xaan cuan, ra Jesús cuu ra. Ta maa ndo i tyaa ndo cuatyi sata ra, ta i sahñi ndo sii ra.

⁵³ Maa ndo cuu ra ñihí ley Ndyoo i saha ángel sii ndo, ta ña tyaa ndo yahvi sii si. Catyi ra Esteban.

Sihí ra Esteban

⁵⁴ I siñi ra cu tyiño sa cahan ra Esteban, ta i cuxaan xaan ra sihin ra ndya cuhva sasi quihñi noho ra.

⁵⁵ Zoco i situ cuii Tatyi li sii ra Esteban. I nandyehe ndaa ra Esteban ityi ziqui, ta i ndyehe ra sii ra Ndyoo cahnu, ta i ndyehe ra sii ra Jesús nandyaa ra ityi siyo cuaha ra Ndyoo.

⁵⁶ Ndyehe ndo, catyi ra. Ndyehi sa nuña gloria ta ndyehi sii ra i quisi ndya gloria. Nandyaa ra ityi siyo cuaha ra Ndyoo.

⁵⁷ Tacuan ta i tyazi ndaha ra cu tyiño cuan zoho ra. I cana saa xaan ra vatyi cuxaan ra. Yatyi cuii ñi i tuhva ra nu iñi ndyaa ra Esteban vatyi cuñi ra queen ra sii ra.

⁵⁸ I tava ra sii ra Esteban ndya yu ñuu vatyi cua cañi ra sii ra sihin yuu ta cua cahñi ra sii ra. I zandoo ra cu tyiño cuan zahma cahnu ndisi ra sihin minoo ra yoco nañi Saulo vatyi cua cucumi ra sii si.

⁵⁹ Ta i cañi ra sii ra Esteban sihin yuu, ta maa ra Esteban i sica tahvi xaan ra sii ra Ndyoo ta catyi ra: Jesús yoho ndyaca ñohon sii. Nacuhun afíime suhun.

⁶⁰ Ta yucuan i sicuñi siti ra Esteban, ta i cana saa ra: Jesús, ma tyoon cuatyi ndyicuu ra ya ziqui ra. Tacuan i cahan ra Esteban ta i sihi ra.

8

Sahñi tahan ra Saulo sihin ñiyivi sino iñi sii ra Jesús

¹⁻² Tahan xaan iñi ra Saulo sa i sahñi ñiyivi sii ra Esteban. Tacuan ta i quisi zuhva ra ndyico sii ra Jesús, ta i tyihi ra sii ra Esteban si ñuhu. Sacu ra vatyi i sihi ra Esteban. Ta zuun ñi quivi cuan i sahñi tahan ñiyivi ña sino iñi sihin ñiyivi sino iñi sii ra Jesús ñuu Jerusalén cuan. Ta i sino ñiyivi sino

iñi. Zuhva ñu i sino ndya nu cu si Judea, ta inga ñu i sino ñu ndya Samaria. Zoco sa usi uu tahan ra apóstol ñá sino ra cuan.

³ Ta ra Saulo cuan i zayanga xaan ra sii ñiyivi ndyico sii ra Jesú. Cuaha xaan nu i quihvi ra vehe ñiyivi ta cañoho ra sii rayii a sii ñu zihí, ta tyihi ra sii ñu vehe caa.

Cuhva i sito ñiyivi nu cu si Samaria Tuhun Ndyoo

⁴ Ta sa i quita ñiyivi ñuu Jerusalén cuan sa i sino ñu ta i zacoto ñu sii ñiyivi tandihí ñuu nu i yaha ñu Tuhun Ndyoo.

⁵ Ta minoo ra sa nañi Felipe i saa ra nu cu si Samaria, ta i quisaha ra nacatyi ra sihin ñiyivi tuhun ra Jesú.

⁶ I titahan ñiyivi, ta vaha xaan i tyizoho tandihí ñu sa cahan ra Felipe, ta i ndyehe ñu sa ndyityi i zavaha ra.

⁷ Vatyi i tava ra cuaha xaan tatyi cuihna sii ñiyivi. I cana saa xaan tatyi cuihna sa quita si sii ñiyivi, ta ziqui i nduvaha ñu. Cuaha xaan ra xii i nduvaha ta ra coxo.

⁸ Yucuan cuenda i tahan xaan iñi tandihí ñiyivi ñuu cuan.

⁹ Zoco minoo ra sinañi Simón, i cuu ra ra tazi ñuu cuan, ta i zandavi ñaha ra sii cuaha xaan ñiyivi ityi Samaria vatyi catyi ra vatyi ra ñiñi xaan cuu ra. Iyo xaan i cuñi tandihí ñiyivi sa cuenda maa ra quiví cuan.

¹⁰ Ta tandihí ñiyivi cuca cuhva ndya ñiyivi ndahvi i tyizoho ñu sa cahan ra ta catyi ñu: Cahnuaan cuu cuhva ra ya vatyi maa ra Ndyoo cuu ra saha cuhva cuan sii ra.

¹¹ Ta i tyizoho ñu sa cahan ra vatyi sa naha xaan i zandavi ñaha ra sii ñu sihin cuhva i zavaha ra.

¹² Tacuan ta i saa ra Felipe, ta i zacuaha ra sii ñiyivi cuhva ndyaca ñaha ra Ndyoo ta cuhva cahnu xaan iyo cuhva sii ra Jesucristo. Tacuan ta i sino iñi ñu sa cahan ra Felipe.

Ta i sicoo ndutya cuaha rayii ta ñu zihí.

¹³ Ta i sino tucu iñi ra Simón, ratazi cuan, ta i sicoo ndutya ra ta ndutahan ra sihin ra Felipe. Iyo xaan i cuñi ra sihin sa ndyityi nahnu i zavaha ra Felipe.

¹⁴ Ta ra apóstol i ndoo ra ñuu Jerusalén ta sa siñi ra vatyi sino iñi ñiyivi ñuu Samaria sii ra Jesú. Ta ziqui i tasi ra sii ra Pedro ta ra Juan ndya indyacuan.

¹⁵ Isaa ra Pedro ta ra Juan ta i sica tahvi ra sii Ndyoo sa natasi ra Tatyi Ii ra añima ñiyivi sino iñi sii ra Jesú indyacuan.

¹⁶ Vatyi i sicoo ndutya ñiyivi cuan maa ñi sa cuenda ra Jesú ta tañaha ca noo xica Tatyi Ii sii ñu.

¹⁷ Tacuan ta i tyizo ra Pedro ta ra Juan ndaha ra sii ñu ta i quihvi Tatyi Ii añima ñu.

¹⁸ Indyehe ra Simón cuhva i tyizo ra apóstol ndaha ra sii ñiyivi cuan ta i quisi Tatyi Ii sii ñu ta i catyi ra Simón:

¹⁹ Cua tyiyahvi sii ndo tatu cuhva ndo cuhva cuan sii, vatyi yoo ra cua tyize ndehi ta cua quihvi Tatyi Ii añima ra.

²⁰ Tacuan i catyi ra. Ta catyi ra Pedro sihin ra: Nacunaa moo sihin xuhun vatyi sica iñun vatyi cuu zaton sa saha maa ra Ndyoo.

²¹ Ma cuu zatiño moo tyiño ya vatyi ña vaha añimon sihin ra Ndyoo.

²² Zañon cuhva sa quiñi xaan sica iñun ta caca tahvun sii Ndyoo sa cua zandasí ra cuatyun.

²³ Vatyi site yozo caa iyon. Vatyi cucuihna xaan iñun. Tañaha ca zandoon cuatyi zacuun. Ta cua zatívi si suun.

²⁴ Tacuan i catyi ra Pedro, ta i catyi ra Simón sihin ra: Caca tahvi ndo sii ra Ndyoo sa cuenda mi vatyi ma tahan si sii cuhva sa catyi ndo. Catyi ra.

²⁵ Tacuan i cuu. Ta sa yaha zacuaha ra Pedro ta ra Juan Tuhun Ndyoo, ta i saha ra cuenda yozo

caa zavaha ra Ndyoo, ta nacaty i
ra sihin ñiyivi yozo caa cuu cacu
ñu ta ma cuhun ñu andyaya. Nac-
ahnu Samaria i sahan ra, ta ziqui i
sinanuhu ra ndya ñuu Jerusalén.

*Natuhun ra Felipe sihin minoo
ra ñuu Etiopía*

²⁶ Ta sa yaha cuhva cuan ta ziqui i
cahan minoo ángel ra Ndyoo sihin
ra Felipe ta catyi si: Nduviton ta
cuahan ityi tyañuhu ityi quita ñuu
Jerusalén ya ta cuhun ndya nu cu
si Gaza. Ityi cuan cuu nu yoñi maa
ñiyivi iyo.

²⁷ I nduvita ra Felipe ta cuahan
ra. Ta ityi cuahan ra i ñihí tahan
ra sihin minoo ra ñuu Etiopía. Ra
yucuan, ica iyo ra. Ta ndyizo ra
minoo tyiño cahnu sa sicumi ra
tandihi xuhun ña Candace, ñaha
ndyaca ñaha sii ñiyivi ñuu Etiopía
cuan. Sahan ra cuan ñuu Jerusalén
vatyi tuhva maa ra zacahnu sii ra
Ndyoo tañi zavaha ñiyivi hebreo.

²⁸ Ñoho ra cuan sisi carreta ra sa
cua nuhu ra. Ta cahvi ra tuhun
i tyaa ra Isaías, minoo profeta ta
tyiemvu.

²⁹ Tacuan ta i catyi Tatyi II sihin
ra Felipe: Cuahan cua zatohon sii
ra vasi sihin carreta cuan.

³⁰ Ta sa tuhva ra Felipe nu vasi ra
ta i siñi ra sa cahvi ra nuu libro ra
Isaías, ta i ndaca tuhun ra Felipe sii
ra ta catyi ra: ¿Atu cutuñi iñun sa
cahvun?

³¹ Ta i catyi ra cuan sihin ra: Ña
cutuñi iñi vatyi yoñi ra cuu nacaty i
sihin ñaa cuñi si catyi si. Ta i ca-
han ra sihin ra Felipe sa ndaa ra ta
cundyaa ra sihin ra.

³² Ihya cuu tuhun i cahvi ra cuan:
Quihin ñiyivi sii mvee ticaty i ta
yoco ñu ixi ti ta ñahñi sa ca-
han ti.

Ta quihin ñu sii ti, ta cua cahñi ñu
sii ti ta ñahñi sa cahan ti.
Ta tacuan tucu maa ra, cua ndyehe
ra tundoho ta ñahñi cua catyi
ra.

³³ Cua vacu ndyaa xaan ñu sii ra ta
ñi ndoo cua zandaa ñu tyiño
cuenda ra.

Cua caca iñi ñiyivi zavaha ndya
vaha ñi sihin ra vatyi yoñi
zehe ra cua coo vatyi sahní
ñu sii ra.

Yucuan cuu tuhun cahvi ra cuan.

³⁴ Tacuan ta i catyi ra Etiopía si-
hin ra Felipe: Nacatyun sihin sa
ndyoo ñi. ¿Yoo sii cuenda cahan ra
Isaías? ¿Atu zuun ñi tuhun maa ra
cahan ra? a ¿atü cahan ra sii inga
ra?

³⁵ Yucuan ta zuun ñi sihin tuhun
cuan i quisaha ra Felipe nacaty i
ra, ta i sityiño tucu ra inga Tuhun
Ndyoo, nu cahan si sa cuenda ra
Jesús. Ta i zacuaha ra sii ra vatyi
ra Jesús cuu ra cua zacacu sii ñiyivi.
Ra sa ndatu xaan ñu.

³⁶ Ta sa cua yaha ra nu iyo
ndutya ta i catyi ra Etiopía: Ndyehe,
ihya iyo ndutya. ¿Atu cuu
coo ndutya?

³⁷ Ta catyi ra Felipe sihin ra: Cuu
tatu sino iñun sii ra Jesús sihin
tandihi cuii añimon. Ta i catyi ra
cuan: Sino iñi vatyi ra Jesús, zehe
ra Ndyoo Zutu yo cuu sii ra.

³⁸ Tacuan ta i catyi ra Etiopía
vatyi nanacuiñi carreta, ta i noo
nduu tahan ra. Ta i sicoo ndutya ra
i zacuu ra Felipe sisi ndutya cuan.

³⁹ Ta sa cua quita ra sisi ndutya,
ta i quihin Tatyi II sii ra Felipe. Ñá
ndyehe ca ra Etiopía cuan sii ra
Felipe, ta zii xaan i cuñi ra Etiopía
sa ñihí ra cuhva cuenda ra Jesús.

⁴⁰ Ta i sindyaca Tatyi II sii ra Fe-
lipe ndya ñuu Azoto. Yucuan sahan
ra minoo minoo ñuu sa zacuaha
ra sii ñiyivi sa cuenda ra Jesús ta
cuhva cua cacu ñiyivi ta ma cuhun
ñu andyaya. Ta cuhva cuan ca-
han ra ndya cuhva ndya i saa ra
Cesarea.

¹ Ta ra Saulo tañahá ca cua zaña ra cuhva sa sahñi tahan ra sihin ñiyiví ndyico sii ra Jesú斯, ta ñá zaña ra sa nducu cahñi ra sii ñu. Ta yucuan cuenda sahan ra nu ndyaa ra cu nuu sii ra cu zutu.

² Ta i sica ra Saulo sa tyaa ra cu nuu carta sa cuhun sihin ra ñuu Damasco ndya vehe ñuhu hebreo. Ta tacuan cua ñihi ra Saulo cuhva vatyí tatu nañhi ra sii ñiyiví ndyico sii ra Jesú斯 ta cua cuu tiin ra sii ñu cundyaca ra sii ñu vehe caa ñuu Jerusalén, tandihí ñu, ñu zihí ta rayii.

³ Ta i quihin ra Saulo ityi cuahan ra. Ta sa cua saa ra ñuu Damasco ta zuun ñi caa cuhva cuan i ndyehe ra minoo ñuhu cahnu xaan. I zandisi si nacahnu nu cuahan ra.

⁴ Ta i nduva ra nu ñuhu ta i siñi ra nduzu ra Jesú斯 sa cahan ra sihin ra ityi ziquí ta catyi ra sihin ra: Saulo, Saulo. Sahñi tohon sihin mi.

⁵ Ta i catyi ra Saulo: ¿Yoo sa cahan, tata? Ta i catyi ra Jesú斯 sihin ra: Yuhvi cui Jesú斯. Sahñi tohon sihin mi, zoco zuun ñi sii moo zañicuehun.

⁶ Tacuan ta i yuhu xaan ra Saulo ta catyi ra: ¿Ñaa sa cuñun zavehi? Ta i catyi ra Jesú斯 sihin ra: Nduviton ta cuhun ndya ñuu ya, ta cua nacatyí ñiyiví suhun ñaa sa cua zavohon.

⁷ Ta ra ndihí sihin ra Saulo iyo xaan i cuñi ra ndya cuhva ñá cuu ca cahan ra vatyí i siñi ra nduzu sa cahan, zoco yoñi ñiyiví i ndyehe ra.

⁸ I nduvita ra Saulo, ta i nuña ra nuu ra, zoco ñá cuu ca ndyehe ra. Yucuan cuenda i tiin amigo ra ndaha ra, ta i sindyaca ra sii ra ndya ñuu Damasco cuan.

⁹ Yaha uñi quiví sa ñá cuu ndyehe ra Saulo. Ñá sasi maa ra, ta nu ñá sihi ra ndutya.

¹⁰ Ta zuun ñi ñuu Damasco cuan iyo minoo ra nañi Ananías. I sindyico ra sii ra Jesú斯. Minoo saha i cahan ra Ndyoo sihin ra sisi ñimahna ta catyi ra: ¡Yoho Ananías! Ta i catyi

ra Ananías: ¿Ñaa sa cuñun sihin, tata?

¹¹ Ta i catyi ra Ndyoo Zutu yo sihin ra: Nduvita ta cuhun calle sa nañi iin ndoo ndita ñi. Ta sisi vehe ra Judas cua nanducun sii minoo ra ñuu Tarso. Nañi ra Saulo ta sica tahví ra sii mi vityi.

¹² Sa tahan tucu maa ra Saulo ñimahna ta sisi ñimahna i ndyehe ra vatyí vasun. I ndyehe ra vatyí quihvun ta tyizon ndohon sii ra vatyí cua nandyehe tucu ra. Tacuan i catyi ra Ndyoo sihin ra Ananías.

¹³ Ta sa siñi ra Ananías cuhva cuan ta i catyi ra: Ndyoo Zuti, sa cuaha xaan ñiyiví i nacatyí ñu sihin mi vatyí cuaha xaan sa ña vaha i zavaha ra cuan sihin ñiyiví sino iñi suun ñuu Jerusalén.

¹⁴ Ta vityi vasi ra ihyá ta iyo cuhva sii ra sihin ra cu nuu sii zutu nahnu vatyí cua tiin ra sii tandihí ñiyiví sica tahví suun ta tyihí ra sii ndi vehe caa.

¹⁵ Zoco i catyi ra Ndyoo sihin ra Ananías: Cuahan vatyí i casi mi sii ra Saulo cuan vatyí cua cahan ra sa cuenda mi sihin ñiyiví sa yiví ñiyiví hebreo cuu, ta sihin rey ñiyiví cuan ta cua zacuaha ra sii ñiyiví hebreo, ñiyiví sii ndo, ndihí ca.

¹⁶ Ta cua zañehí sii ra cuhva cua tahan ra tundoho sa cuenda mi.

¹⁷ Tacuan ta ziquí cuahan ra Ananías ndya vehe nu iyo ra Saulo. I quihví ra ta i tyizo ra ndaha ra sii ra ta i catyi ra: Amigo Saulo, ra Jesú斯 cuu ra ndyaca ñaha sii yo. Ta i quituu ra nuu moo ityi vasun. Ta vityi i tasi ra sii mi ihyá vatyí cua nandyehun inga saha ta cua quihví Tatyí li añimon.

¹⁸ Ta zuun ñi caa cuhva cuan i quita minoo sa quita tañi caa zoo tyiyaca siti nuu ra Saulo. Ta ziquí i cuu nandyehe ra. Tacuan ta cuahan ra Saulo ta i sicoo ndutya ra (vatyí cua cundyico ra sii ra Jesú斯).

¹⁹ Ta ziquí i sasi ra xita, ta i nacoo tundayee iñi sii ra. Ta i ndoo ra

zuhva quiví sihin ñiyivi sino iñi sii ra Jesús ñuu Damasco.

Zacuaha ra Saulo Tuhun Ndyoo sii ñiyivi ñuu Damasco

²⁰ Tacuan i cuu ta ziquí i quisaha ra Saulo zacuaha ra sii ñiyivi tandihí vehe ñuhu hebreo ñuu Damasco. I nacatyi ra sihin ñu vatyi ra Jesús, zehe Ndyoo cuu sii ra.

²¹ Ta sa siñi ñiyivi sa cahan ra, ta iyo xaan i cuñi tandihí ñu. Ta i quisaha catyi ñu sihin tahan ñu: Zuun ñi ra ihya cuu ra sahñi tahan xaan sihin ñiyivi sino iñi sii ra Jesús ñuu Jerusalén. Ta i saa ra ihya vatyi cua tiñi ra sii ñiyivi sino iñi sii ra Jesús ñuu ya ta cundyaca ra sii ñu ndya nu ndyaa ra cu nuu sii zutu nahnu. Catyi ñu.

²² Zoco ñá zaña ra Saulo sa zacuaha ra sii ñiyivi. I zacuaha ra sii ñu vatyi ra Jesús cuu ra cu Cristo sa ndisa. Ta ñá ñihi ca ñiyivi hebreo ñuu Damasco cuhva cahan ñu inga cuhva.

I sino xehe ra Saulo

²³ Naha zuhva ta ziquí i zacasi tahan ra hebreo, ra ña sino iñi Tuhun Ndyoo, tyiño sa cua cahñi ra sii ra Saulo.

²⁴ Zoco i sito ra Saulo cuhva sa sica iñi ra cuan. Ta ñuu cuan sicoo minoo nuzama siconduu. Niýaca ta ndiyiyaca i sicumi xaan ra hebreo cuan tandihí yuvehe si vatyi cua tiñi ra sii ra Saulo tatu cua yaha ra ta cua cahñi ra sii ra.

²⁵ Zoco i zacacu amigo ra Saulo sii ra minoo sa cuaa vatyi i zanoo ra sii ra nuzama cuan sisi minoo tyica cahnu, ta i sino ra Saulo.

Cuahan ra Saulo ñuu Jerusalén

²⁶ Cuahan ra Saulo ñuu Jerusalén. I cuñi ra sa cua ndutahan ra sihin ñiyivi sino iñi sii ra Jesús yucuan, zoco yuhu xaan ñu sii ra. Ñá sino iñi ñu sa cua cundyico ra sii ra Jesús sa ndisa cuii.

²⁷ Tacuan ta i quihin ra Bernabé sii ra Saulo ta sindyaca ra sii ra

ndya nu ndyaa ra apóstol ta catyi ra sihin ra: Ica ra Saulo ya i ndyehe ra sii ra Jesús ityi, ta i cahan ra Jesús sihin ra. Ta ziquí vaha xaan i zacuaha ra Saulo sii ñiyivi ñuu Damasco sa cuenda ra Jesús ta ñá yuhu ra. Catyi ra Bernabé.

²⁸ Tacuan ta i ndoo ra Saulo sihin ñiyivi sino iñi sii ra Jesús.

²⁹ Ta nacahnu ñuu Jerusalén i zacuaha ra sii ñiyivi tuhun ra Jesús. Ta i natuhun xaan ra Saulo sihin ñiyivi hebreo, ra cahan zahan griego. Ta i cuñi ra cuan sa cahñi ra sii ra Saulo (vatyi ñá sino iñi ra sa cahan ra).

³⁰ Ta sa sito ra sino iñi sii ra Jesús cuhva cuan ta i sindyaca ra sii ra Saulo ndya ñuu Cesarea. Ta yucuan i tyihi ra sii ra Saulo sisi minoo barco ta natasi ra sii ra ityi ñuu ra, ñuu Tarso.

³¹ Tacuan ta i ndutaxi nu yucu ñiyivi sino iñi sii ra Jesús nacahnu nu cu si Judea ta Galilea ta Samaria. Ta ñá cuxaan inga ñiyivi sihin ñu. Ta cuaha xaan ca ñiyivi i quisaha sino iñi ñu Tuhun Ndyoo, ta i tyindyee xaan Tatyi Ii sii tandihí ñu. Ta i yuhu ñu sa mattyaa ñu yahvi sii Ndyoo.

Nduvaha ra Eneas

³² Cuahan ra Pedro nacahnu ñuu nu iyo ñiyivi sino iñi sii ra Jesús. Ta i saa ra ñuu Lida.

³³ Yucuan i ndyehe ra sii minoo ra xii. Nañi ra Eneas. Sa uña cuiya caa ra vatyi ñá cuu caca ra.

³⁴ Tacuan ta i catyi ra Pedro sihin ra: Eneas, zanduvaha ra Jesucristo suun. Nduviton ta natuun yuun. Tacuan ta i nduvita ra Eneas vatyi sa i nduvaha ra.

³⁵ Tandihí ñiyivi ñuu Lida cuan sihin ñu ñuu Sarón i ndyehe ñu sa nduvaha ra Eneas. Ta i sino iñi ñu sii ra Jesús. Ta i zandoo ñu costumbre sahnu sii ñu.

Nandoto tucu ña Dorcas

³⁶ Ta ñuu Jope cuan sicoo minoo ñaha nañi ña Tabita. Ta sihin zahan griego nañi ña Dorcas. Sino iñi ña

sii ra Jesús, ta tandihí quívi i zavaha ña sa vaha, ta i tyindyee ña sii ñiyiví ndahvi.

³⁷ Ta quívi cuan i quihin cuehe sii ña Dorcas, ta i sihi ña, ta i zacutyi ñiyiví sii coño ñuhu ña, ta i saqui ñu sii ña si vehe ña, sa cu uu vehe toto ndya zíqui.

³⁸ Ta sa ñihí ñiyiví tuhun vatyi ndyaa ra Pedro inga ñuu nañi Lida yatyi ñi ñuu Jope cuan. Ta i tasi ñu sino iñi sii uu tahan ra cua zañiñi ra sii ra sa quisí ra.

³⁹ Tacuan, ta cuahan ra Pedro sihin ra cuan. Ta sa saa ra yucuan ta i sindyaca ñu sii ra ndya nu caa ndiyí sisi vehe toto cuan ndya zíqui. Yucu tandihí ñu ndahvi, ñu sihi yíi, sisi vehe cuan. Sacu xaan ñu. Zañaha ñu tandihí vestido, tandihí coto i zavaha ña Dorcas ta ndito ña.

⁴⁰ Tacuan ta i tava ra Pedro sii tandihí ñu, ta i sicutiñi siti ra, ta i sica tahvi ra sii Ndyoo. Ta zíqui i catyi ra sihin ñaha cuan: Nduviton maha Tabita. Tacuan ta nandyehe ña. I ndyehe ña sii ra Pedro ta nacundaya ña.

⁴¹ I tiñi ra Pedro ndaha ña ta i zanacuiñi ndyaa ra sii ña. Tacuan ta i caña ra sii ñu sino iñi ta sii ñu ndahvi, ñu sihi yíi cuan, vatyi sa nandoto ña.

⁴² Ta i sito tandihí ñiyiví ñuu Jope. Ta cuaha xaan ñu i sino iñi sii ra Jesús.

⁴³ Ta i ndoo ra Pedro zuhya ca quívi ñuu cuan vehe ra nañi Simón. Ta ra Simón zatyahu ra ñii vatyi yucuan cuu tyiño ra.

10

Ra Pedro sihin ra Cornelio

¹ Ñuu Cesarea i sicoo minoo ra nañi Cornelio. Ra cu nuu i cuu ra sii minoo ziendu zandaru. Ra Italia i cuu zandaru sa ndyaca ñaha ra.

² Vaha xaan ra i cuu ra Cornelio sihin tandihí ñiyiví sii ra. I zacahnu ra sii Ndyoo, ta yuhu ra sa ma tyaar ra yahvi sii ra. I tyindyee xaan ra sii ñiyiví hebreo sihin xuhun ra. Ta

i cahan ra sihin ra Ndyoo tandihí cuhva.

³ Minoo saha tañi caa uñi sa sahiñi i ndyehe ra minoo ángel. I quihví si nu ndyaa ra ta catyi si: ¡Cornelio!

⁴ Yuhu xaan ra Cornelio ta i ndyehe xaan ra sii ángel cuan ta catyi ra: ¿Ñaa sa cuñun sihin, tata? Tacuan ta i catyi ángel cuan sihin ra: Sa siñi ra Ndyoo tandihí cuhva i cohon sihin ra. Ta zii cuñi ra vatyi tyindyee xoon sii ñiyiví ndahvi.

⁵ Ta vityi cuñi si sa tasun uu a uñi tahan muzun ndya ñuu Jope. Indyacuan iyo minoo ra nañi Simón. Ta zuun ñi nañi tucu ra Pedro. Cua canon sii ra vatyi quisí ra ihya.

⁶ Ndyaa ra vehe inga ra nañi Simón. Ra zatyahu ñii cuu ra. Yuhu tyañuhu iyo vehe ra. Cua catyi maa ra Pedro cuan ñaa sa cua zavohon. Tacuan i catyi ángel cuan.

⁷ Ta sa cuahan ángel cuan ta i cana ra Cornelio sii uu tahan muzu ra sihin minoo zandaru ra cumi sii ra. Sino iñi zandaru cuan sii Ndyoo.

⁸ I nacatyi ra Cornelio sihin ra tandihí sa ndyehe ra ta zíqui i tasi ra sii ra ndya ñuu Jope.

⁹ Ta inga quívi i quihin ra ityi cuahan ra. Ta sa cua saa ra ñuu Jope tañi maa ora ta zuun ñi caa cuhva cuan i ndaa ra Pedro xiñi vehe ra vatyi cua cahan ra sihin Ndyoo.

¹⁰ Sizoco ra ta cuñi ra sa cuzama ra zoco nii ñi sa zavaha ñu sa casi ra i ndaa ra xiñi vehe. Tacuan ta i quisaha zandyehe ra Ndyoo sii ra minoo sa ndyehe ra.

¹¹ I ndyehe ra vatyi nuña yutyi andiví ta i noo xica minoo tañi minoo zahma yuu cahnu. I noo si sihin cumi tahan siquí si.

¹² Sisi zahma yuu cuan ñoho tandihí cuii nuu quíti sa iyo cumi tahan saha sihin coo nahnu ta sihin zaa.

¹³ Tacuan ta i siñi ra Pedro sa cahan ra Ndyoo ta catyi ra: Nduviton Pedro ta cahñun sii ti ta casun.

¹⁴ Zoco i catyi ra Pedro: Ma cuu tata vatyi ña tuhve casi tandihí ñaa sa ica cuenda costumbre maa ndi.

¹⁵ Inga saha i catyi tucu ra Ndyoo sihin ra: Ña vaha catyi moo vatyi ica sa sehi suun.

¹⁶ Ta tacuan i cahan tucu ra Ndyoo sihin ra. Ta sa cu uñi saha i cahan ra tacuan ta ziqui i nandaa tucu zahma cuan ityi ziqui.

¹⁷ Ta i sica iñi ra Pedro ñaa cuhva cuu si cuan, ta zuun ñi caa cuhva cuan i saa sa uñi tahan ra i tasi ra Cornelio yuvehe. Vatyi i ndaca tuhun ra sii ñiyivi ta tacuan i nañihu ra vehe ra Simón.

¹⁸ Ta sa saa ra yuvehe cuan, i cana saa ra ta catyi ra: ¿Atu iyo minoo ra nañi Simón Pedro ihya?

¹⁹ Ta zuun ñi cuhva cuan, sica iñi ra Pedro ñaa sa ndyehe ra ta i catyi Tatyi li sihin ra: Nanducu uñi tahan ra suun.

²⁰ Cua noon ta cua cuhun sihin ra. Ma caca iñun vazu yivi ñiyivi hebreo cuu ra vatyi yuhvi cuu ra i tasi sii ra nu ndyoon.

²¹ Tacuan ta i noo ra Pedro nu yucu ra i tasi ra Cornelio ta catyi ra: Zuun yuhvi cui ra nanducu ndo. ¿Ñaa cuenda vasi ndo?

²² Ta i catyi inga ra cuan: Vasi maa ndi cuenda ra Cornelio. Minoo ra vaha xaan cuu ra. Ta cuñi xaan ra sii Ndyoo ra zacahnu ndoho ñiyivi hebreo. Sa catyi minoo ángel Ndyoo sihin ra vatyi vaha cua cana ra suun sa cuhun ndya vehe ra. Ta cua tyizoho ra ñaa sa cua nacatyun sihin ra.

²³ Tacuan ta i quihví ra cuan sisi vehe. Ta i ndoo ra sihin ra Pedro minoo ñuu. Ta inga quívi cuahan ra Pedro sihin ra ta cuahan tucu zuhva ra sino iñi sii ra Jesús, ra ñuu Jope cuan.

²⁴ Ta sa cu uu quívi i saa ra ñuu Cesarea nu i ndatu ra Cornelio sii ra sihin cuaha xaan ñiyivi sii ra sihin amigo ra vatyi i cana ra Cornelio sii tandihí ra.

²⁵ Ta sa saa ra Pedro vehe ra ta i quita ra Cornelio si vehe ra ta i

sicuiñi siti ra nuu ra vatyi cua zacahnu ra sii ra.

²⁶ Zoco i zanduvita ra Pedro sii ra ta catyi ra: Nduviton vatyi ñiyivi cuu mi tañi moo.

²⁷ Ta ziqui i quisaha natuhun ra ta i quihví ra sisi vehe ra Cornelio. I ndyehe ra Pedro vatyi tuu xaan ñiyivi yucu.

²⁸ Ta i catyi ra Pedro: Sito maa ndo vatyi ña saha costumbre maa ndi ñiyivi hebreo sa titahan ndi sihin ra sa yivi ñiyivi hebreo cuu, nasa quihví ndi vehe ra. Zoco i zañaha ra Ndyoo sii vatyi ñia vaha cua catyi vatyi cuxi caa iyo ndo ta ña vaha cua catyi vatyi ma cuu titehin sihin ndo.

²⁹ Yucuan cuenda yatyi xaan vasi sa i cana ndo sii. Ta ñá catyi sa ma cuu quisi. Ta vityi cuñi cote ¿ñaa cuenda i cana ndo sii?

³⁰ Tacuan i cahan ra Pedro ta ziqui i catyi ra Cornelio: Sa yaha cumi quívi ta zuun ñi tyehen cuhva i sica tahvi sii ra Ndyoo sisi vehi vatyi tacuan tuhve zacuu sa sahiñi, ta i quituu minoo ra nui. Cuisi xaan zahma ra.

³¹ Ta i catyi ra cuan sihin: "Cornelio, i siñi ra Ndyoo sa cohon sihin ra ta nacohon iñi ra tandihí sa zavohon ta cuhva tyindyeun sii ñiyivi ndahvi.

³² Vityi cua tasun tyiño ndya ñuu Jope vatyi cua canon sii minoo ra sa nañi Simón Pedro. Ndyaa ra vehe minoo ra zatayahu ñii. Nañi tucu ra cuan Simón. Yuhu tyañuhu iyo vehe ra. Naquisi maa ra ta cua zacuaha ra suun."

³³ Tacuan i cuu si, ta yatyi i tasi tyiño sa nanducu ñiyivi suun. Ta vaha vatyi i quisun. Ta vityi yucu yo ihya nuu ra Ndyoo, ta cuñi ndi tyizoho ndi tandihí cuii cuhva tasi ra Ndyoo suun sa zacoton sii ndi.

Cuhva i cahan ra Pedro vehe ra Cornelio

³⁴ Tacuan ta i quisaha cahan ra Pedro ta catyi ra: Vityi cutuñi iñi vatyi inuu ñi cuñi ra Ndyoo sii

tandihi cuii ñiyivi. Ñahñi sa ziin iyo yo cuhva cuñi ra sii yo.

³⁵ Ta tandihi ñuu cuñi ra Ndyoo sii yoo ra zavaha sa vaha, sii yoo ra yahu ta tyaa ra yahvi sii ley ra Ndyoo.

³⁶ I cahan ra Ndyoo sihin nduhvi ñiyivi hebreo, ta nacatyi ra sihin ndi vatyi cua coo sa taxi ñi añima yo sa cuenda ra Jesucristo. Ta maa ra cuu ra ndyaca ñaha sii tandihi sa iyo.

³⁷ Sito vaha maa ndo ñaa sa sicoo ñuu ra hebreo. I quisaha si ñuu sa nañi Galilea. Xihna ca i zacoo ndutya ra Juan sii ñiyivi, ta i zacuaha ra sii ñu.

³⁸ Ta ziqui i quita ra Jesús, ra ñuu Nazaret, ta saha ra Ndyoo cuhva sii ra sa cuenda Tatyi Ii. Ta i sica noo ra Jesús, ta i zavaha ra sa vaha, ta i zanduvaha ra sii ñu ndyehe tundoho cuenda cuihna. Tacuan i zavaha ra vatyi i tyindyeer Ndyoo sii ra.

³⁹ Ta maa ndi cuu ra cu sa ndaa sa cuenda tandihi sa i zavaha ra Jesús nu cu si Judea ta ñuu cahnu Jerusalén. Ta i tyaa ñu sii ra nu cruz, ta i sahñi ñu sii ra.

⁴⁰ Zoco sa yaha uñi quiví ta i zanandoto ra Ndyoo sii ra. Ta i saha ra sa ndyehe maa ndi sii ra Jesús.

⁴¹ Ñá quituu ra nuu tandihi ñiyivi. Maa ñi nuu maa ndi, ra i casi ra Ndyoo vatyi cua cuu ndi sa ndaa. Sasi ndi sihin ra ta sihi ndi ndutya sihin ra ta sa yaha nandoto ra sa sihi ra.

⁴² Ta i tasi ra sii ndi sa nacatyi ndi sihin ñiyivi. Ta sa ndaa cuu ndi vatyi vityi i saha ra Ndyoo tyiño sii ra Jesús sa cuu ra juez sii ñiyivi ndito ta sii ñiyivi i sihi.

⁴³ Sa cuenda ra Jesús i cahan tandihi ra profeta ta tyiemvu ta catyi ra vatyi tandihi ñiyivi sino iñi sii ra Jesús cua zandasi ra cuatyi ñu.

Cuhva i quihvi Tatyi Ii añima ñiyivi sa yivi ñiyivi hebreo cuu

⁴⁴ Ta zuun ñi cuhva sa cahan ra Pedro ta i noo Tatyi Ii sii tandihi ñu tyizoho.

⁴⁵ Ta ra hebreo sa sino iñi Tuhun Ndyoo, ra i quisai sihin ra Pedro, iyo xaan i cuñi ra vatyi saha ra Ndyoo Taty Ii ra sii inga ñiyivi sa yivi ñiyivi hebreo cuu.

⁴⁶ Vatyi siñi ra sa cahan ñu inga tuhun sa ña tuhva ñu cahan ta zacahnu ñu sii Ndyoo.

⁴⁷ Tacuan ta i catyi ra Pedro: Sa i saa Taty Ii sii ñiyivi ya cuhva i saa ra sii maa yo. Ta vityi yoñi ra cua catyi vatyi ma cuu coo ndutya ñu.

⁴⁸ Tacuan, ta i catyi ra Pedro vatyi cua coo ndutya ñu sa cuenda ra Jesucristo. Ta sa yaha sicoo ndutya ñu ta i sica ca ñu sa ndoo ra Pedro zuhva ca quiví ñuu ñu.

11

Saha ra Pedro cuenda sii ra ndyizo tyiño nu iyo ñiyivi sino iñi ñuu Jerusalén

¹ Ra apóstol ta inga ra sino iñi Tuhun Ndyoo nu cu si Judea i ñihi ra tuhun vatyi sino iñi ñiyivi Tuhun Ndyoo. Ta yivi ñiyivi hebreo cuu ñu.

² Ta sa naquita ra Pedro ñuu Jerusalén ta ra hebreo ra sino iñi sii ra Jesús i cahan ra sii ra Pedro vatyi ra hebreo cuan ñihi xaan ndyico ra costumbre ñiyivi hebreo ta sica iñi ra vatyi ñiñi xaan sa tahndya ñiñi xiñi xuu rayiñi ndihi ca, ta tacuan ta cua cacu añima ra, sica iñi ra cuan.

³ Ta i catyi ra: ¿Ñaa cuenda sohon vehe ñiyivi cuan ta yivi ñiyivi hebreo cuu ñu? ¿Ta ñaa cuenda sasun sihin ñu ta ña ndyico ñu costumbre maa yo?

⁴ Tacuan ta i nacatyi ra Pedro tandihi sihin ra ndya cuhva quisaha tyiño cuan ta catyi ra:

⁵ Ta sindyaa mi ñuu Jope ta zuun ñi cuhva sa sica tahvi sii ra Ndyoo ta i ndyehi minoo sa ndyehi. I noo minoo tañi minoo zahma yuu cahnu. I noo si sihin cumi tahan siquí si ndya nu ndyei.

⁶ Ta i ndyehe vehi vatyi cua ndyehi ñaa sa ñoho sisi si, ta i ndyehi vatyi ñoho tandihí nuu quiti iyo cumi tahan saha ta ñoho coo ta ñoho zaa.

⁷ Ta i siñi sa cahan ra Ndyoo ta catyi ra: "Nduviton Pedro. Cahñun sii ti ta casun."

⁸ Zoco i catyi: "Ma cuu tata vatyi tañaha ca casi sa cuxi caa." (Ta ica casi quiti cuan sa cuenda costumbre maa yo.)

⁹ Tacuan ta ziqui i cahan tucu ra Ndyoo ta catyi ra: "Ma catyun vatyi ica sa sehi suun."

¹⁰ Tacuan i cuu si uñi tahan saha, ta ziqui i nandaa tucu si ityi ziqui.

¹¹ Ta zuun ñi caa cuhva cuan i saa uñi tahan ra vehe nu ndyei. I tasi ñiyivi sii ra ndya ñuu Cesarea vatyi cua nanducu ra sii.

¹² Ta i tasi Tatyi Ii sii sa cuhin sihin ra ta i catyi si sihin vatyi ma caca xaan iñi. Ta i sahan tuçu maa ra ihya sa iñu tahan ca ra sino iñi Tuhun Ndyoo. Tandihí ndi i quihví ndi vehe ra sa i cana sii ndi.

¹³ Ta i nacatyi maa ra sihin ndi cuhva i ndyehe ra minoo ángel sisi vehe ra. Nandyaa si ta catyi si: "Tasun sii ra cua cana sii ra Simón Pedro ndya ñuu Jope.

¹⁴ Ta cua nacatyi ra Pedro cuan suhun yozo caa cua cacun sihin ñiyivi suun." Tacuan i catyi ángel cuan sihin ra.

¹⁵ Ta sa quisehi quehin sihin ñu ta i noo Tatyi Ii sii ñu tañi i noo ra sii maa yo sa xihna ñi.

¹⁶ Tacuan ta i nacohon iñi cuhva i catyi ra Jesús: "Ndisa i zacoo ndutya ra Juan sii ñiyivi sihin ndutya, zoco sihin Tatyi Ii cua coo ndutya maa ndo."

¹⁷ Ta vityi tatu iñi cuhva saha tucu ra Ndyoo sii ñu inuu ñi tañi saha ra sii maa yo ra sino iñi sii ra Jesucristo, ¿ñaa cuenda ma tahan iñi yo cuhva zavaha ra Ndyoo? I catyi ra Pedro.

¹⁸ Tacuan i cuu ta sa siñi ra sino iñi Tuhun Ndyoo ñuu Jerusalén cuhva cuan, ta ñá cahan ca ra, ta i

zacahnu ra sii ra Ndyoo. Ta i catyi ra: Saha ra Ndyoo sa sino tucu iñi inga ñiyivi vazu yiví ñiyivi hebreo cuu ñu. Ta vityi cua zama ñu cuhva iyo ñu, ta tacuan ta cua ñihi ñu sa cundito ñu tandihí cuii tyiemvu.

Ñiyivi sino iñi Tuhun Ndyoo ñuu Antioquia

¹⁹ Ta sa i sahñi ñiyivi sii ra Esteban ta ziqui i quisaha sicoo tun-doho sii inga ñiyivi sino iñi Tuhun Ndyoo. Ta tandihí ñu i sitya cuatyi. Zuhva ñu i saa nu cu si Fenicia ta ñuu Antioquia ta inga ñu i saa minoo ñuhu sa nañi Chipre sa ndyaa mahñu tyañuhu. Ta i nacatyi maa ñu Tuhun Ndyoo maa ñi sihin ñiyivi hebreo.

²⁰ Zoco zuhva ñu sino iñi, ñiyivi ñuu Chipre ta ñuu Cirene, cuahan ñu ndya ñuu Antioquia ta i nacatyi maa ñu Tuhun Ndyoo sihin ñiyivi sa yiví ñiyivi hebreo cuu. I nacatyi ñu sihin ñu tuhun ra Cristo Jesús.

²¹ I saha xaan ra Ndyoo cuhva sii ñu, ta cuaha xaan ñiyivi i sino iñi ta i zandoo ñu costumbre sahnu sii ñu. Ta i sindyico ñu sii ra Jesús.

²² I saa tyiño ya ndya nu yucu ñu sino iñi ñuu Jerusalén, ta i tasi ñu sii ra Bernabé ndya ñuu Antioquia.

²³ Ta sa saa ra, ta i ndyehe ra vatyi ndisa i tyindyee xaan ra Ndyoo sii ñiyivi cuan. Zií xaan i cuñi ra, ta i saha ra tyiño sii ñu sa tyaa xaan ñu yahvi sii ra Jesús ta cundyico ñu sii ra sihin tandihí cuii añima ñu.

²⁴ Vaha xaan ra cuu ra Bernabé, iyo xaan Tatyi Ii sii ra, ta niñi xaan iñi ra. Ta cuaha xaan ñiyivi i sino iñi sii ra Jesús sa cuenda maa ra.

²⁵ Tacuan ta ziqui cuahan ra Bernabé ndya ñuu Tarso vatyi cua nanducu ra sii ra Saulo.

²⁶ Ta sa nañihi ra sii ra, i sindyaca ra sii ra ndya ñuu Antioquia. Ta minoo maa cuiya i sindyaa nduu tahan ra sihin ñiyivi sino iñi yucuan, ta i zacuaha ra sii cuaha xaan ñiyivi. Ta ñuu Antioquia cuan cuu

ñuu sa xihna ñi nu i zacunañi ñiyivi cristiano sii flu ndyico sii ra Cristo.

²⁷ Ta quivi cuan i quita zuhva ra profeta ñuu Jerusalén ta cuahan ra ndya ñuu Antioquía.

²⁸ Minoo ra nañi ra Agabo. Induvita ra nu yucu ra sino iñi Tuhun Ndyoo ta i cahan ra cuhva catyi Tatyi li sihin ra. I catyi ra vatyi cua quasi minoo tama cahnu xaan nacahnu ñuu ñiyivi. Ta tacuan i tahan si cuhva i catyi ra zuun ñi sisi quivi i sindyaca ñaha ra emperador Claudio.

²⁹ Tacuan ta ñu sino iñi ñuu Antioquía i sica iñi ñu vatyi cua tasi ñu xuhun ta tyindyee ñu sii ñu sino iñi nu cu si Judea. Cua tasi tahan tahan ñu yozo cuhva sa cundyee iñi ñu.

³⁰ Ta tacuan i zavaha ñu. I tasi ñu xuhun i zacasi tahan ñu sihin ra Bernabé ta ra Saulo ndya nu ndyaa ra ndyizo tyiño nu yucu ñu sino iñi Tuhun Ndyoo ñuu cuan.

12

Sihir Jacobo ta quihvi ra Pedro vehe caa

¹ Ta zuun ñi tyiemvu cuan i quisaha ra rey Herodes zavaha ra sa ña vaha sihin ñiyivi sino iñi Tuhun Ndyoo.

² Sahñi ñiyivi sii ra Jacobo yañi ra Juan sihin minoo mityi i zacuu ra Herodes.

³ Ta sa ndyehe ra Herodes vatyi tahan iñi ñiyivi hebreo sa tacuan ta ziquí i tiin ra sii ra Pedro. Ta i cuu si quivi vico zavaha ñiyivi hebreo sa nacohon iñi ñu quivi i quita ñu ñuu Egipto. Ta vico cuan tuhva ñu casi pan ña ndaa.

⁴ Ta i tiin ra Herodes sii ra Pedro ta i tyihi ra sii ra vehe caa. Cumi ityi zandaru i sicumi sii ra. Ta cumi tahan zandaru i cuu tahan tahan ityi ra. Sa cumi tahan zandaru i sicumi sii ra tahan tahan ora. Sica iñi ra Herodes vatyi ndya sa yaha vico tacuan ta ziquí cua cutuñi ra

Pedro ta cua cuu ra nuu ñiyivi hebreo vatyi tacuan ta zii cua cuñi ñu.

⁵ Noho ra Pedro vehe caa ta sicumi xaan zandaru sii ra, zoco ñiyivi sino iñi Tuhun Ndyoo sica tahvi xaan ñu sii ra Ndyoo sa cuenda ra.

Zacacurra Ndyoo sii ra Pedro sisi vehe caa

⁶ Tacuan ta zuun ñi sa cuaa cuan sica iñi ra Herodes vatyi inga quivi cua tasi ra sii ra Pedro cunahma ra nu yucu ñiyivi. Ta sa cuaa cuan i quixi ra Pedro ticui uu tahan zandaru. Nuhñi ra sihin uu tahan cadena. Ta cumi inga zandaru yuvehe caa cuan.

⁷ Ta ta sica ñi i quihvi minoo ángel Ndyoo sisi vehe caa ta i ndundisi. I tiin ángel cuan zoco ra Pedro vatyi cua zandoyo ra sii ra. Ta i catyi ra sihin ra: Zanumi. Nduviton. Ta ta sica ñi i ndasi cadena ndaha ra Pedro.

⁸ Ta i catyi ángel sihin ra: Nacuhñi vaha sisun ta natyuhun zapato sohon. Ta tacuan i zavaha ra. Ta i catyi ángel sihin ra: Nazucun zahmon suun. Ta quasi ndyicon sii.

⁹ I sindyico ra Pedro sii ángel cuan sisi vehe caa cuan. Ña sito ra a sa ndisa zacuu ángel a ñimahna tahan ra.

¹⁰ I yaha nduu tahan ra sa xihna ñi nu cumi minoo zandaru, ta ziquí i yaha ra sa cu uu nu cumi inga ra ta i saa ra minoo yuvehe cahnu. Vee xaan si. Maa caa cuu si. Ta yucuan yuvehe quita si ndya calle. I nuña ñi maa yuvehe cuan ta i quita ra. I sica ra zuhva ca ta i zandoo ángel sii ra Pedro.

¹¹ Tacuan ta ziquí i sito ra Pedro sa ndisa ta i catyi ra: Vityi site vatyi ndisa cuu si. I tasi ra Ndyoo minoo ángel ta i zacacu ra sii mi si ndaha ra Herodes ta cuhva sa ña vaha sa cuñi ñiyivi hebreo zavaha ñu sihin.

¹² Tacuan i sica iñi ra Pedro ta cuahan ra ndya vehe ña María zii Juan Marcos. Yucuan siyucu

cuaha xaan ñiyivi. Sica tahvi ñu sii Ndyoo.

¹³ I cati ra Pedro yuvehe nuzama. Ta i quisi minoo ña cu muzu. Nañi ña Rode.

¹⁴ I nacoto ña nduzu ra Pedro sa cahan ra, ta zii xaan i cuñi ña ta nu yuvehe ñá nuña ña. Sino ñi i sinacatyi ña sihin ñiyivi vatyi ndyaa ra Pedro yuvehe cuan.

¹⁵ Zoco ñiyivi cuan i catyi ñu sihin ña: Zana tahan xiñun. Ta i catyi maa ña vatyi ndisa cuii vatyi maa ra cuu ra. Ta ziqui i catyi ñiyivi: Ángel sa zacuenda sii ra cuu si.

¹⁶ Ta ra Pedro ndita ñi i cati ra yuvehe cuan. Tacuan ta i nuña ñu yuvehe ta iyo xaan i cuñi ñu sa nandyehe ñu sii ra Pedro.

¹⁷ Ta saha ra Pedro zeña sii ñu sihin ndaha ra nacutaxi ñu, ta i nacatyi ra sihin ñu yozo caa i tava ra Ndyoo sii ra vehe caa. Ta catyi ra sihin ñu: Tacuan nacatyi ndo sihin ra Jacobo ta sihin inga ra sino iñi Tuhun Ndyoo, i catyi ra. Tacuan i cahan ra ta ziqui cuahan ra.

¹⁸ Ta sa vasi cundisi ta sica xaan iñi tandihí zandaru vatyi ña sito ra ndyamaa cuahan ra Pedro.

¹⁹ I tasi ra Herodes tyiño sa cua nanducu ra sii ra Pedro, zoco ñá nañihi ra sii ra. Tacuan ta ziqui i zanahma xaan ra Herodes sii zandaru cuan. Ñá ñihi zandaru cuhva nacatyi ra. Tacuan i cuu, ta i catyi ra Herodes vatyi cua cuu tandihí zandaru cuan. Tacuan ta cuahan ra Herodes inga ñuu sa nañi Cesarea cua cundyaa ra.

Sihí ra Herodes

²⁰ Xaan xaan cuñi ra Herodes sihin ñiyivi ñuu Tiro ta ñiyivi ñuu Sidón ta ñá cuñi ra tyindyee ra sii ñu. Ta ziqui i saa ñiyivi ñuu cuan nu iyo ra ta i cahan ñu sihin ra Blasto. Minoo ra ndyizo tyiño nuu ra Herodes cuu ra. I tyiyahvi ñiyivi sii ra sa cuu ra yuhu ñu nuu ra Herodes. I sica ñiyivi cuan sa coo sa taxi ñi sihin ra Herodes ta sihin ñuu

ñu vatyi tandihí sa sasi ñu quita si ñuhu nu ndyaca ñaha ra Herodes.

²¹ Ta i sata ra Herodes quivi sihin ñu. Ta sa saa quivi i ndihivi ra zahma vaha ra ta i sindyaa ra tyayu cahnu ra ta i cahan ra sihin ñu.

²² Ta sa ndihí cahan ra ta tandihí cuii ñiyivi i catyi: Yivi ñiyivi cuu ra cahan ya. Ndyoo cuu ra.

²³ Zuun ñi caa cuhva cuan i quihin cuehe sii ra Herodes i zacuu minoo ángel Ndyoo vatyi tahan iñi ra Herodes sa catyi ñiyivi vatyi Ndyoo cuu maa ra. Cahnu xaan tundoho i ndyehe ra vatyi sasi tindacu sii ra ta sihi ra.

²⁴ Tacuan i cuu ta Tuhun Ndyoo cuahan ca nducanhnu ca si. Nacatyi xaan ca ñiyivi Tuhun Ndyoo sihin inga ñiyivi.

²⁵ Sa ndihí tyiño ra Bernabé ta ra Saulo ñuu Jerusalén, ta i ndisi nanuhu ra ndya ñuu Antioquía. I quihin ra sii ra Juan Marcos ta vasi ra sihin ra.

13

*Zatyiño tucu ra Bernabé ta ra
Saulo tyiño Ndyoo*

¹ Ihya cuu ziví ra profeta ta ra zacuaha Tuhun Ndyoo sii ñiyivi ñuu Antioquía. Minoo ra nañi ra Bernabé, inga ra nañi ra Simón, ra nengu cuu inga ziví ra. Inga ra nañi ra Lucio ra ñuu Cirene sihin ra Saulo ta ra Manaén. ñin ñi i sahnu ra Manaén sihin ra Herodes ra ndyaca ñaha nu cu si Galilea.

² Minoo quivi i siyucu tandihí ra cuan. Ta ñá sasi ra xita vatyi zacahnu ra sii ra Ndyoo ta ziqui i catyi Tatyi li sihin ra: Cua tasi ndo sii ra Bernabé sihin ra Saulo nu cua zatyiño ra sa cuenda mi vatyi cua cuhve tyiño sii ra.

³ Tacuan ta i sica tahvi ca ra cuan sii Ndyoo ta ñá sasi ra xita, ta ziqui i tyizo ra ndaha ra sii ra vatyi cua cuizo tyiño ra ta i tasi ra sii ra.

*Nacatyi ra Pablo Tuhun Ndyoo
nu cu si Chipre*

⁴ Tacuan i tava Tatyi Ii tysiño sii ra Bernabé sihin ra Saulo ta cuahan ra ndya Seleucia, ta indyacuan i quihin ra barco vatyi cua cuhun ra ndya minoo ñuhu sa ndyaa mahñu tyañuhu, nañi si Chipre.

⁵ Ta yucuan i saa ra, minoo yuhu tyañuhu nu nañi si Salamina ta i quisaha zacuaha ra Tuhun Ndyoo sii ñiyivi vehe ñuhu ñiyivi hebreo. Ta cuahan tucu ra Juan sihin ra cua tyindyeer a sii ra.

⁶ I sica noo ra nacahnu ñuhu Chipre ta i saa ra ñuu Pafos. Indyacuan i tahan ra sii minoo ra nañi Barjesús. Minoo ra tazi cuu ra. Vatya xaan ra ta catyi ra vatyi cahan ra sa cuenda ra Ndyoo.

⁷ Ndyaa ra cuan sihin ra Sergio Paulo, ra cu gobernador. Casi xaan iñi ra Sergio cuan. I cana ra sii ra Bernabé ta ra Saulo vatyi cuñi ra tyizoho ra Tuhun Ndyoo.

⁸ Zoco ra tazi cuan, Elimas cuu inga zivi ra. Ná saha ra sa tyizoho ra gobernador sa cahan ra Saulo vatyi ná cuñi ra sa cua sino iñi ra sii ra Jesú.

⁹ Ta ra Saulo, ta nañi tucu ra Pablo, situ xaan Tatyi Ii sii ra ta ñihi xaan i ndyehe ra sii ra ta catyi ra:

¹⁰ Ra zandavi ñaha cuun. Tandihi cuii sa ña vaha zavohon. Zehe cuihna cuu suun ta numinoo sa vaha ña zavohon. Ta zamon cuhva cahan ra Ndyoo sa ndisa ta nacatyun sa vatya.

¹¹ Ta vityi cua tasi tuñi ra Ndyoo suun. Cua cuoon zuhva quivi, ta ma ndyehun ñuhu ñicandyi. Ta ta sica ñi i cuua ra. Ta i ndedu ra yoo ra tiñi ndaha ra ta cundyaca ra sii ra vatyi ña cuu ndyehe ra.

¹² Ta sa ndyehe ra gobernador sa tahan ra tazi cuan ta i sino iñi ra sii ra Jesú vatyi iyo xaan i cuñi ra sa ndyehe ra yozo caa iyo tuhun sa cuenda ra Jesú.

Cuahan ra Pablo ta ra Bernabé ndya ñuu Antioquia sa cuu cuenda Pisidia

¹³ I quita ra Pablo sihin ra tahan ra ñuu Pafos sihin barco ta cuahan ra ndya ñuu Perge sa iyo cuenda Panfilia. Yucuan i zandoo ra Juan sii ra ta cua nanuhu ra ndya ñuu Jerusalén.

¹⁴ Ta ziqui i quita ra Pablo ñuu Perge ta cuahan ra minoo ñuu cahnu sa nañi Antioquia sa cuu cuenda Pisidia. Ta yucuan sahan ra vehe ñuhu ñiyivi hebreo quivi quitatu ñiyivi, ta i sicundyaar a.

¹⁵ Sa xihna ñi i cahvi ñiyivi zuhva sa ityaa ra Moisés ta ziqui i cahvi ñu sa tyaa inga ra profeta ta tyiemu. Tacuan i cuu ta ziqui i tasi ra cu nuu sii vehe ñuhu cuan tysiño sii ra Pablo ta catyi ra: Yañi xaa, tatu iyo minoo tuhun sa cuñi ndo zacoto ndo sii ñiyivi. Cuu nacatyi ndo sihin ndi vityi.

¹⁶ Tacuan ta i nduvita ra Pablo ta saha ra minoo zeña sihin ndaha ra sa cua cutaxi ñiyivi ta catyi ra: Tyizoho ndo yañi xaa, ndoho ra hebreo, ta tandih i inga ndoho, ra yuhu sii ra Ndyoo.

¹⁷ Ra cu Ndyoo sii maa yo ñiyivi hebreo i casi ra sii ñiyivi sahn sii yo. Ta i tyindyeer a sii ñu, ta i nduu ñu minoo ityi ñiyivi cahnu xaan vazu i sica noo ndahvi ñu ñuu Egipto. Ta ziqui sihin cuhva iyo sii maa ra i taya ra sii ñu ñuu cuan.

¹⁸ I cundyee xaan iñi ra Ndyoo sihin ñu tañi uu xico cuiya sa sica noo ñu nu yoñi maa ñiyivi iyo ta i zayaha ñu cuhva cuñi maa ñu.

¹⁹ Ta i zanaa ra usa tahan ityi ñiyivi nu cu si Canaán vatyi cua cuhva ra ñuhu cuan sii ñiyivi sahn sii yo.

²⁰ Ta ziqui cumi ziendu uu xico usi cuiya saha ra Ndyoo sa cundyaca ñaha juez sii ñiyivi ndya quivi i naquihin ra Samuel tysiño cuan. Ta ra Samuel i cuu tucu ra minoo ra cu profeta.

²¹ Ta ziqui i sica ñiyivi minoo rey, ra cua cundyaca ñaha sii ñu. Ta i saha ra Ndyoo sii ra Saúl zehe ra Cis sii ñu. Ñiyivi sii ra Benjamín i cuu sii

ra. I sindyaca ñaha ra Saúl sii ñu uxico cuiya.

²² Ta i tava ra Ndyoo sii ra. Ta ziquí i saha ra sii ra David sa cuu ra rey, ta sa cuenda maa ra i catyi ra Ndyoo: “Site sii ra David zehe ra Isaí. Zii xaan cuñi sihin ra vatyi cua zavaha ra tandihí cuii sa cuñi.”

²³ Ta ñiyiví sahnu sii ra Jesús i cuu sii ra David. Ta i tasi ra Ndyoo sii ra Jesús vatyi cua zacacu ra sii ñiyiví hebreo tañi sa i catyi ra Ndyoo ta tyiemvu.

²⁴ Cumañi ca saa ra Jesús ta i nacatyi xaan ra Juan sihin tandihí ñiyiví hebreo vatyi ndu-uu iñi ñu cuatyi ñu ta coo ndutuya ñu.

²⁵ Ta sa cuñi ndihí tyiño ra Juan ta i catyi ra: “Ndatu ndo sii minoo ra cahnu xaan. Ta sica iñi ndo vatyi zuun ra cui. Zoco yiví ra cui. Ra i tasi ra ityi nuu cui. Ra vaha xaan ca cuu maa ra, ta ñiñi xaan ra, ta yucuan cuenda ma cuu tyindyei sii ra nu zuhva tañi sa ndasi tyiendu ndisa ra.” Tacuan i catyi ra Juan.

²⁶ Ta cahan ca ra Pablo ta catyi ra: Yañi xaa, ndoho ñiyiví ra Abraham ta tandihí inga ndo, ra yuhu sii ra Ndyoo. Saha ra Ndyoo cuhva cacu ndo.

²⁷ Ñiyiví ñuu Jerusalén sihin ra ndyaca ñaha sii ñu, ñá sito ñu yoo ra cuu ra Jesús vatyi zehe Ndyoo cuu sii ra, ta ñá ñihi ñu cuhva sihin tuhun i tyaa ra profeta ta tyiemvu vazu cahvi ñu sii si vehe ñuhu ñu tahan xiñi vitya. Ta zuun ñi ñiyiví cuan i tyaa cuatyi sata ra Jesús. Ta tacuan i natahan si tañi sa catyi ra profeta.

²⁸ Ta vazu ñá ñihi ñiyiví cuhva sa tyaa ñu cuatyi sata ra Jesús sa ndisa cuii, zoco i sica ñu sii ra Pilato sa cuu ra.

²⁹ Ta sa yaha zavaha ñu tandihí cuhva catyi Tuhun Ndyoo sa cuenda ra Jesús ta ziquí i zanoo ñu sii ra nuu cruz ta tyihi ñu sii ra ñaña sisi minoo yavi yuu.

³⁰ Zoco i zanandoto ra Ndyoo sii ra sisi sa i sihi ra.

³¹ Ta cuaha xaan quivi i quituu ra Jesús nuu ñiyiví i quasi sihin ra ndya Galilea ta ñoho ñu ñuu Jerusalén. Ta vityi maa ñu cu ñu nacatyi sihin ñiyiví vatyi i ndyehe ñu sii ra.

³² Ta vityi nacatyi maa ndi minoo cuhva vaha sihin ndo vatyi tañi sa sito ndo vatyi ta tyiemvu saha ra Ndyoo cuenda sii ñiyiví sahnu sii yo yozo caa cua zavaha ra nu cuahan quivi.

³³ Ta vityi sito yo vatyi sa zavaha ra Ndyoo cuhva catyi ra vatyi saha ra tundyee iñi sii ra Jesús, ta i nandoto tucu ra. I tyaa ra David salmo número uu. I tyaa ra David cuhva i cahan ra Ndyoo sa cuenda ra Jesús ta catyi ra: “Zehe mi cuu suun, ta vityi cua ndyehe ñiyiví vatyi sehi sa cua nandoton.”

³⁴ Iyo inga nu catyi tucu ra Ndyoo sa cuenda ra Jesús: “Cua tyindyei suun sa ndisa, cuhva i catyi sihin ra David.” Tacuan i catyi ra Ndyoo vatyi cua zanandoto ra sii ra Jesús sisi sa i sihi ra. Ma cuhva ra Ndyoo sa tyahyu coño ñuhu ra Jesús.

³⁵ Yucuan cuenda catyi tucu inga salmo: “Ma cuhvon sa tyahyu coño ñuhu ra tyaa xaan yahvi suun.”

³⁶ Sa ndisa cuu si vatyi i zavaha ra David cuhva cuñi ra Ndyoo sa sindito ra ñuhu ñiyiví, ta ziquí i sihi ra ta i tyihi ñiyiví sii ra sisi ñaña ta i tyahyu coño ñuhu ra.

³⁷ Zoco coño ñuhu rä i zanandoto ra Ndyoo, ña tyahyu si.

³⁸ Yañi xaa, cuñi si sa coto ndo vatyi sa cuenda ra Jesús ta cua zandasra Ndyoo cuatyi ndo.

³⁹ Ma nduvaha añima ndo vazu cumi vaha xaan ndo ley i saha ra Ndyoo sii ra Moisés. Vatyi ma nduvaha añima ndo sa tacuan ñi. Ra Jesús cua zanduvaha añima ndo tatu cua sino iñi ndo sii ra.

⁴⁰ Zacuenda vaha ndo sii ndo coto cua tahan ndo cuhva i tyaa ra profeta ta tyiemvu. I catyi ra:

41 Ndyehe ndoho, ra ña sino iñi. Cu-ijo xaan ndo ta cua cunaa ndo. Vatyi cua zavehi minoo cuhva. Ta iyo xaan cua cuñi ndo. Ta ma sino iñi ndo. Numaa nacatyi xaan ñiyivi sito sihin ndo. Ta ihyá i ndihí sa cahan ra Pablo sihin ñiyivi.

42 Ta sa quita ra Pablo sihin ra tahan ra sisi vehe ñuhu hebreo cuan. Ta i sica ñiyivi sa yivi ñiyivi hebreo cuu sii ra Pablo vatyi cua zacuaha tucu ra sii ñu inga quiivi quitatu ñiyivi.

43 Ta sa quita tandihí ñiyivi vehe ñuhu ta cuaha xaan ñiyivi hebreo ta ñiyivi tyaa xaan yahvi ley ñiyivi hebreo, i sindyico ñu sii ra Pablo ta ra Bernabé. Ta i nacatyi xaan ra Pablo ta ra Bernabé sihin ñu vatyi ma naa iñi ñu sa nacatyi ra sihin ñu ta nacañi vaha iñi ñu yozo caa zavaha xaan ra Ndyoo tumañi iñi sii ñu.

44 Ta inga vitya quiivi quitatu ñiyivi i titahan sa yatyi tandihí ñiyivi ñuu cuan vatyi cua tyizoho ñu Tuhun Ndyoo.

45 Zoco sa ndyehe ñiyivi hebreo, ra ña sino iñi, vatyi i titahan cuaha xaan ñiyivi ta i cucuihna iñi ra. Ta i quisaha catyi ra vatyi ña vaha sa cahan ra Pablo ta i cahan ra ndya vaha ñi sii ra.

46 Zoco ñá yuhu ra Pablo ta ra Bernabé ta i quisaha catyi ra sihin ñu. Cuñi si sa nacatyi ndi Tuhun Ndyoo xihna ca sihin maa ndo vatyi ñiyivi hebreo cuu ndo, zoco ña cuñi ndo tyizoho ndo. Ta cuhva zavaha ndo zañaha ndo vatyi ña cuñi ndo sa cuhun ndo gloria. Ta yucuan cuenda cua cuhun ndi nu iyo inga ñiyivi sa yivi ñiyivi hebreo cuu.

47 Tacuan cua zavaha ndi vatyi ndya ta tyiemvu i catyi maa ra Ndyoo: "Tañi minoo ñúhu cua cuu maa ndo sii tandihí ñiyivi ñuu ñiyivi vatyi cua nacatyi ndo sihin tandihí cuii ñiyivi yozo caa cua nduvaha

añima ñu." Ta i cahan ra Ndyoo cuhva cuan sa cuenda maa ndi.

48 Ta sa siñi ñiyivi, ñu sa yivi ñiyivi hebreo cuu, ta zii xaan i cuñi ñu, ta i quisaha catyi ñu vatyi vaha cuan cuu Tuhun Ndyoo. Ta tandihí ñu i casi ra Ndyoo vatyi cuhun ñu gloria, i sino ifi ñu.

49 Tacuan i cuu ta i sitya Tuhun Ndyoo tandihí ñuu yucuan.

50 Zoco i cahan ra hebreo, ra ña sino iñi, sihin minoo ityi ñu zihí, ñu zacahnu sii ra Ndyoo cuhva iyo costumbre maa ñu, ta i cahan tucu ra hebreo sihin ra ñiñi ñuu cuan ta i quisaha ra cuatyi cuhva ndya i tava ra sii ra Pablo ta ra Bernabé ñuu cuan.

51 Tacuan ta ziqui i quizi ra Pablo ta ra Bernabé saha ra ta i tava ra ñiyaca ñuu cuan vatyi ma ndoo ca ra sihin ñiyivi ñuu cuan ta cuahan ra ndya minoo ñuu cahnu sa nañi Iconio.

52 Zoco zii xaan i cuñi ñu sino iñi ñuu Antioquia cuan, ta i sicoa xaan Tatyí li sihin ñu.

14

Ñoho ra Pablo ta ra Bernabé ñuu Iconio

1 Ñoho ra Pablo ta ra Bernabé ñuu Iconio ta i quihví ra vehe ñuhu ñiyivi hebreo. Vaha xaan i cahan ra yucuan ndya cuhva ndya i sino iñi cuaha xaan ñiyivi, ñu hebreo ta inga ñiyivi.

2 Zoco ra hebreo, ra ña sino iñi, i cahan ra ndya vaha ñi sii ra sino iñi Tuhun Ndyoo ta i zasino ra iñi ñiyivi sa yivi ñiyivi hebreo cuu minoo cuhva ña vaha.

3 Yucuan cuenda i ndoo ra Pablo ta ra Bernabé naha xaan indyacuan. Ñá yuhu ra ta cahan ra Tuhun Ndyoo vatyi nii cuu iñi ra sii Ndyoo. Ta i saha ra Ndyoo cuhva sii ra sa zavaha ra sa ndyityi vatyi tacuan ta cua coto ñiyivi vatyi cahan ra sa ndisa sa catyi ra vatyi cuñi xaan ra Ndyoo sii ñu.

⁴ Ñá ndu-iin ñiyiví ñuu Iconio cuan. Iyo ñu sino iñi ñu sa cahan ra hebreo, ra ña sino iñi, ta iyo ñu sino iñi ñu sa cahan ra apóstol.

⁵ Tacuan ta ziquí ra hebreo ta inga ra sa yiví ra hebreo cuu i ndu-iin ra sihin ra cu tyiño vatyí cua zavaha ra ndya vaha ñi sihin ra Pablo ta ra Bernabé. Ta cua cañi ra sii ra sihin yuu ndya cua cuu ra.

⁶ Zoco i ñihí ra Pablo ta ra Bernabé tuhun cuan, ta sa sito ra sii si i sino ra ta cuahan ra ndya ñuu Listra ta ndya ñuu Derbe nu cu si Licaonia ta tandihí inga ñuu iyo yu-cuan.

⁷ Ta i nacatyí ra sihin ñiyiví yozo caa cua zacacu ra Ndyoo sii ñu.

Cañi xaan ñiyiví sii ra Pablo sihin yuu ñuu Listra

⁸ Ñuu Listra sicoo minoo ra coxo. Ñá cuu caca ra. Maa sa ndyaa ñi ra vatyí coxo ra cacu ra.

⁹ I tyzoho ra coxo sa cahan ra Pablo ta ndyehe ra Pablo sii ra ta nacoto ra vatyí nii cuu iñi ra ta cua nduyaha ra.

¹⁰ Tacuan ta ñihí xaan i cahan ra Pablo ta catyi ra: Nacuiñi ndyaa vohon. Tacuan ta i nduvita ra ta i quisaha sica ra.

¹¹ Ta sa ndyehe ñiyiví sa zavaha ra Pablo ta i quisaha cana saa ñu sihin zahan maa ñu, zahan ñuu Licaonia ta catyi ñu: Sa vasi uu tahan ndyoo ihya nu iyo yo. Caa ra cuhva caa maa yo. Catyi ñu.

¹² Ta tiyemvu sica iñi ñiyiví vatyí ra Júpiter ta ra Mercurio cuu ra cuu Ndyoo. Yucuan cuenda i catyi ñu vatyí minoo ndyoo nañi Mercurio cuu ra Pablo vatyí maa ra cuu ra cahan. Ta ra Bernabé cuu ra ndyoo sa nañi Júpiter.

¹³ Ta i sicoo minoo zutu cuenda ra Júpiter. Ta i sicumi ra vehe ñiu-hu yu ñuu cuan. I sindyaca ra uu tahan zindiqui. Ta i sindyaca ra corona ita. I cuñi maa ra ta i cuñi ñiyiví sa zacahnu ñu vico nu saa ra Pablo ta ra Bernabé vatyí sica iñi ñu vatyí Ndyoo cuu ra. Ta yucuan

cuenda cua cahñi ñu sii zindiqui cuan.

¹⁴ Zoco sa sito ra Pablo ta ra Bernabé tuhun cuan ta iñdata ra zahma ndisi ra vatyí ñá tahan iñi ra sa zacuu ñiyiví Ndyoo sii ra. Ta cacono ra quihví ra ndya mahñu ñiyiví ta i cana saa ra Pablo ta catyi ra:

¹⁵ Ndoho tata, ¿ñaa cuenda zavaha ndo tacuan ta ñiyiví cuu ndi tañi maa ndo? ta vasi nacatyí ndi sihin ndo vatyí zandoo ndo sa zavaha ndo cuhva ya vatyí ñahñi tyindyee si. Sino iñi ndo sii ra Ndyoo sa ndisa cuii vatyí maa ra i zavaha andiví, ñuu ñiyiví ta tyañuhu ta tandihí sa iyo.

¹⁶ Ndya ta tiyemvu ta ndya vityí saha ra Ndyoo sa zavaha tandihí ñiyiví cuhva cuñi maa ñu

¹⁷ vazu zañaha ra sii ñu yoo ra cuu ra vatyí zavaha ra cuaha xaan sa vaha. Saha ra sa coon zavi ta sa coo vaha itu tandihí cuiya. Saha ra sa casi yo ta sa cuzí iñi yo. Catyi ra Pablo.

¹⁸ Zoco vazu i nacatyí ra Pablo tuhun cuan, yíi xaan ta i ñihí ra cuhva zandumazu ra iñi ñiyiví ta ma cahñi ñu zindiqui cuan ta ma zacahnu ñu vico sa cuenda ra.

¹⁹ Tacuan ta i saa minoo ityi ñiyiví hebreo, ra ña sino iñi. Ra ñuu Antioquia ta ra ñuu Iconio cuu ra. I sino iñi ñiyiví sa cahan ra ndya vaha ñi sii ra Pablo. Ta i cañi xaan ñu sii ra Pablo sihin yuu cuhva ndya sica iñi ñu vatyí sa sihi ra, ta i xita cañoho ñu sii ra i sindyaca ñu sii ra ndya zava yu ñuu.

²⁰ Ta i titahan ra sino iñi Tuhun Ndyoo siconduu nu caa ra Pablo, ta i nduvita ra ta nandihví tucu ra ñuu cuan. Ta inga quíví i quita ra yucuan sihin ra Bernabé, cua cuhun ra ñuu Derbe.

²¹ Ta sa yaha nacatyí ra Tuhun Ndyoo ñuu Derbe ta i sino iñi cuaha xaan ñiyiví, ta ziquí cua nanuhu tucu ra ndya ñuu Listra, ñuu Iconio ta ñuu Antioquia.

22 Indyacuan saha tucu ra tundyee iñi sii tandihí ñiyiví sino iñi Tuhun Ndyoo. Ta i catyi ra sihin ñu: Sino vaha iñi ndo sii ra Jesús, ta ma zaña ndo sii ra. Cua coo tundoho sii yo, zoco tacuan ta cua quihví yo nu ndyaca ñaha ra Ndyoo, catyi ra.

23 Tacuan i cuu ta i tyaa tysiño ra sii uu a uñi tahan ra tahan tahan ñuu nu sino iñi ñiyiví Tuhun Ndyoo vatyi cua zacuenda ra sii ñu. Ta ñá sasi ra Pablo ta ra Bernabé xita ta i sica tahvi ra sii Ndyoo sa cuenda ra cuan. Ta ziquí i catyi ra: Sa sino iñi ndo sii ra Ndyoo. Maa ra cuu ra cua cucumi vaha sii ndo. Catyi ra.

Cua nanuhu tucu ra Pablo ta ra Bernabé ñuu Antioquía, nu cu si Siria

24 Tacuan ta ziquí i yaha tucu ra nu cu si Pisidia, ta saa ra nu cu si Panfilia.

25 I nacatyi ra sihin ñiyiví Tuhun Ndyoo ñuu cahnu sa nañi Perge, ta ziquí cuahan ra ndya Atalia.

26 Yucuan i quihví ra minoo barco ta cua nanuhu ra ndya ñuu Antioquía nu i quita ra sa xihna ñi. Yucuan cuu ñuu nu i sica ñiyiví tumañi iñi sii ra Ndyoo sa xihna ñi sa cua tyindyeer a sii ra Pablo ityi cuahan ra. Ta vityi ndihí tysiño ra.

27 Ta sa saa ra ñuu Antioquía i zatitahan ra sii ñiyiví sino iñi Tuhun Ndyoo ta i nacatyi ra sihin ñu tandihí sa i zavaha ra Ndyoo ta cuhva i tyindyeer a Ndyoo sii ra. Ta cuhva i saha ra Ndyoo sa sino iñi inga ñiyiví vazu yivi ñiyiví hebreo cuu ñu.

28 Tacuan cuu ta i ndoo ra Pablo ta ra Bernabé naha ca sihin ñiyiví sino iñi ñuu cuan.

15

Cuhva i titahan ra apóstol ñuu Jerusalén

¹ Ta sa ndyaa ra Pablo ta ra Bernabé ñuu Antioquía sihin ñu sino iñi Tuhun Ndyoo, ta i saa minoo ityi ñiyiví, ra i quita nu cu si Judea. Ta i quisaha zacuaha ra sii ñiyiví vatyi

tatu cuñi rayví sa cacu añima ra cuñi si vatyi yivi sa sino ñi iñi ra sii ra Jesúz zoco cua cuhva ra sa tahndya ñii xiñi xuu ra vatyi tacuan i catyi ley ra Ndyoo ta tyiemvu cuhva i tyaa ra Moisés.

² Ñihí xaan i natuhun ra Pablo ta ra Bernabé sihin ra vatyi ñá ndu-iin ra sihin ra, cuhva cuan. Tacuan ta ziquí i saha ñiyiví tysiño sii ra Pablo ta ra Bernabé ta sii zuhva ca ra cua cuhun ra ñuu Jerusalén vatyi cua natuhun ra sihin ra apóstol ta sihin ra ndyizo tysiño nu iyo ra sino iñi indyacuan. Vatyi tacuan ta cua nacoto ra yozo caa cua ndundoo tysiño cuan.

³ Ñiyiví sino iñi Tuhun Ndyoo ñuu Antioquía cuu ñu i tasi sii ra. Ta sa cuahan ra i yaha ra nu cu si Fenicia, ta nu cu si Samaria. Ta i nacatyi ra sihin ñiyiví yozo caa i zandoo ñiyiví sa yivi ñiyiví hebreo cuu costumbre sahnu ñu. Ta vityi tyaa ñu yahvi sii Ndyoo. Ta zii xaan i cuñi tandihí ñu, sa siñi ñu tuhun cuan.

⁴ Ta sa saa ra Pablo ta ra Bernabé ñuu Jerusalén ta i ndyehe vaha ra apóstol ta ra ndyizo tysiño nu iyo ra sino iñi nu saa ra. Ta tacuan tucu i zavaha tandihí ñiyiví sino iñi Tuhun Ndyoo yucuan. Tacuan ta ziquí i quisaha nacatyi ra Pablo tandihí sa zavaha ra Ndyoo tandihí ñuu nu sahan ra.

⁵ Tacuan i zavaha ra ta i nduvita uu, a uñi tahan ra. Ra fariseo cuu ra, ta sa sino iñi ra sii ra Jesúz. Maa ra cuan i catyi: Cuñi si sa tahndya ñii xiñi xuu tandihí ra quihví cuenda ra Jesúz ta nacatyi yo sihin ra vatyi tyaa tucu ra yahvi sii ley i saha ra Moisés.

⁶ Tacuan ta i titahan tandihí ra apóstol sihin ra ndyizo tysiño nu iyo ñiyiví sino iñi vatyi cua nacañi iñi ra ñaa sa cuñi si sa ndisa.

⁷ Sa naha xaan natuhun ra ta i nduvita ra Pedro ta catyi ra: Yañi xaa, sito ndo vatyi sa iyo quivi i casi ra Ndyoo sii, sihin maa ndo

vatyi cua nacatyi Tuhun Ndyoo sihin ñiyivi sa yivi ñiyivi hebreo cuu vatyi cua coto ñu ta cua sino iñi ñu.

⁸ Ta maa ra Ndyoo, sito ra añima tandih i ñiyivi, ta zañaha ra sii yo vatyi cua quihin ra sii ñu vatyi saha ra Tatyi li sii ñu inuu ñi tañi saha ra sii maa yo.

⁹ Ta ña catyi ra Ndyoo sihin yo vatyi ña vaha maa ñu ta vaha xaan maa yo. Zanduvaha ra añima ñu vatyi sino iñi ñu sii ra.

¹⁰ Vityi caca iñi yo cuhva cuñi ra Ndyoo. Ña vaha sa cua cuhva yo tundoho sii ñiyivi sino iñi sii ra ta cua catyi yo vatyi cua zavaha ñu costumbre i saha ra Moisés. Sito yo vatyi ña cuu cundyee iñi ñiyivi sahnu sii yo sa zavaha ñu tandih i sa catyi ra Moisés, ta sito yo vatyi ña cundyee tucu iñi maa yo zavaha yo sii sii.

¹¹ Ña tacuan ta nduvaha añima yo. Sito yo vatyi nduvaha añima yo vatyi iyo xaan tumañi iñi sii ra Jesús. Ta ñahñi ca cuhva nduvaha añima ñiyivi.

¹² Taxi ñi i nduu tandih i ñiyivi sa siñi ñu cuhva nacatyi ra Pablo ta ra Bernabé tandih i sa i cuu ta tandih i sa ndyityi i zavaha ra Ndyoo nu sahan ra nu iyo ñiyivi sa yivi ñiyivi hebreo cuu.

¹³ Ta sa ndih i cahan ra ta i cahan ra Jacobo ta catyi ra: Tyizoho ndo, yañi xaa.

¹⁴ Sa saha ra Simón Pedro cuenda yozo caa i quisaha ra Ndyoo zasino ra iñi inga ñiyivi vatyi sii maa ra Ndyoo cua cuu ñu vazu yivi ñiyivi hebreo cuu ñu.

¹⁵ Ta zuun ñi cuhva ya cuu cuhva i cahan Tuhun Ndyoo ta tyiemvu vatyi i tyaa minoo ra profeta cuhva cahan ra Ndyoo:

¹⁶ Nu vasi quivi cua quasi ra Cristo vatyi cua cuhve tyiño sii ra. Quivi i sicoo ra rey David i zacahnu ñiyivi sii sa ndisa cuii. Zoco zuhva ñi quivi ta i zaña tucu ñu sii.

Cuhva i zacahnu ñu sii, ta quivi ra David cua zacahnu tucu ñiyivi hebreo sii nu vasi quivi.

¹⁷ Ta sa cuenda maa ñu hebreo ta tacuan tucu cua zavaha inga ñiyivi, ñu yivi ñiyivi hebreo cuu, ta cua sino iñi ñu sii.

¹⁸ Tacuan i catyi ra Ndyoo vatyi sa sito ra vatyi cua zavaha ra cuhva cuan cumañi ca sino ñuu ñiyivi. Ta yucuan cuenda i catyi ra tacuan.

¹⁹ Tacuan ta ziqui i catyi tucu ra Jacobo sihin ñiyivi. Sica iñi vatyi vaha ca ma cuhva yo tundoho sii ñiyivi, ñu yivi ñiyivi hebreo cuu tatu sa i zandoo ñu costumbre sahnu ñu ta ndyico ñu sii Ndyoo sa ndisa cuii.

²⁰ Vaha ca tatu cua tyaa yo minoo carta sii ñu ta catyi yo sihin ñu vatyi ma casi ñu sa saha ñiyivi sii zandu ta naquihin tucu ñu. Ta cua coo minoo rayii sihin minoo ñi ñaha ta minoo ñi ñaha sihin minoo ñi rayii. Ta inga cuhva cua cahan yo sihin ñu sa ma casi ñu coño quitü tatu ña sati vaha niñi ti ta ma casi ca ñu niñi quitü.

²¹ Vatyi ndya ta tyiemvu xaan iyo ra tandih i ñuu, ra cahvi ley saha ra Moisés sisi vehe ñuhu hebreo. Tahan tahan vitya cahvi ra sii si quiivi quitatu ñiyivi. Tacuan i catyi ra Jacobo.

²² Tacuan i cuu si, ta i catyi ra apóstol ta ra ndyizo tyiño nu iyo ñiyivi sino iñi ta tandih i inga ñiyivi sino iñi Tuhun Ndyoo yucuan vatyi cua tasi ra sii a uu, a uñi tahan ra tahan ra, cua cuhun ra ndya ñuu Antioquía sihin ra Pablo ta ra Bernabé. Ta i saha ra tyiño cuan sii ra Judas. Nañi tucu ra Barsabás ta sii ra Silas. Nduu tahan ra cuu ra ndyizo tyiño cahnu nu iyo ñiyivi sino iñi.

²³ Ihya cuu sa catyi carta i tasi ra sihin ra ndya nu iyo ñiyivi sa yivi ñiyivi hebreo cuu ñuu Antioquía ta nu cu si Siria ta Cilicia. Catyi si: "Maa ndi cuu ra apóstol ta ra

ndyizo tyiño nu iyo ñiyivi sino iñi ta sihin tandihí ñuu sino iñi Tuhun Ndyoo ityi ya. Saha ndi minoo ndyoo nacucumi sii maa ndo.

²⁴ Ñihi ndi tuhun vatyi sahan ñiyivi ñuu ya ndya ñuu ndo, ta yivi maa ndi saha tyiño sii ñuu ta i zayanga ñuu sii ndo vatyi catyi ñuu sihinndo vatyi cuñi si sa cahndya ndo ñii xiñi xuu tandihí rayii ta tyaa ndo yahvi ley ra Moisés.

²⁵ Yucuan cuenda sica iñi tandihí ndi vatyi cua tasi ndi sii zuhva ra iyo ihya vatyi cua cuhun ra nu ndyaa ndo sihin ra tahan yo, ra Bernabé ta ra Pablo, ra sa cuñi xaan ndi.

²⁶ Sa cuaha xaan saha cuñi cahñi ñiyivi sii ra sa cuenda tyiño ra Jesucristo.

²⁷ Tacuan cuu. Ta yucuan cuenda i tava ndi tyiño sii ra Judas ta ra Silas vatyi cuhun ra ta nacatyi ra sihin ndo tandihí sa i tyaa ndi nuu carta ya.

²⁸ Vatyi sa ndu-iiñ ndi sihin Tatyi II ta sica iñi ndi vatyi ma zavaha ndo cuaha xaan cuhva. Ihya ñi cuu cuhva ñiñi cua zavaha ndo:

²⁹ Ma casi ndo sa saha ñiyivi sii zandu ta naquihin tucu ñu. Ma casi ndo niñi quiti, ta ma casi ndo coño quiti tatu ñá sati vaha niñi ti. Ta minoo ñi ñaha cua coo sii minoo rayii ta minoo ñi rayii sihin minoo ñaha. Tatu cua cucumi vaha ndo cuhva ya, vaha tacuan ñi.”

³⁰ Tacuan i tyaa ra cuan nuu carta ta ra ndyizo tyiño cuan i quihin ra ityi cuahan ra ndya ñuu Antioquía. Ta yucuan i zatitahan ra sii tandihí ñiyivi sino iñi Tuhun Ndyoo. Ta i saha ra carta cuan sii ñu.

³¹ Ta sa cahvi ñu sii si, zii xaan i cuñi ñu vatyi vaha xaan cuu cuhva cuahan si cuñi ñu.

³² Ta ra Judas ta ra Silas i cuu cuhan ra profecía, ta i quisaha cuahan ra, ta i tyindye xaan ra sii ñiyivi ta zii xaan i cuñi ñu.

³³ Ta sa yaha zuhva quivi ta cua nanuhu tucu ra. Ta i catyi ñiyivi

sino iñi Tuhun Ndyoo sihin ra: Ndyoo cua tyindye sii ndo ityi cuahan ndo.

³⁴ Zoco i cuñi ra Silas sa ndoo ra.

³⁵ Tacuan tucu ra Pablo ta ra Bernabé i ndoo ra ñuu Antioquía. Maa ra cuan sihin cuaha ca ñiyivi sito Tuhun Ndyoo, i zacuaha ra sii ñiyivi ta i nacatyi ra Tuhun Ndyoo sihin ñu.

Quihin tucu ra Pablo ityi cuahan ra vatyi cua nacatyi ra Tuhun Ndyoo

³⁶ I yaha zuhva ca quivi ta ziqui catyi ra Pablo sihin ra Bernabé: Coho tucu yo tandihí ñuu nu i sahan yo. Cua ndyehe yo sii ra tahan yo, tandihí ñiyivi i sino iñi Tuhun Ndyoo nu i nacatyi yo sihin ñu. Cua ndyehe yo yozo caa iyo ñu.

³⁷ I cuñi ra Bernabé sa cuhun tucu ra Juan, ra sa nañi tucu Marcos sihin ra.

³⁸ Zoco i sica iñi ra Pablo vatyi vaha ca ma quihin ra sii ra vatyi ñá ndoo ra sa sahan ra sihin ra sa xiñna ñi. Quivi cuan i zandoo ra Juan Marcos sii ra Pablo ta ra Bernabé nu cu si Panfilia ta i sinuhu ra.

³⁹ Ña nacasi tahan sa cuahan ra Bernabé sihin ra Pablo sa cuenda tyiño cuan. I cuxaan ra zuhva. Tacuan ta ziqui i cuziñ tahan ra. I quihin ra Bernabé sii ra Marcos ta i quihvii ra minoo barco ta cuahan ra nu cu si Chipre.

⁴⁰ Ta i quihin ra Pablo sii ra Silas. Ta i sica ñiyivi tumañi iñi sii Ndyoo sa tyindye ra sii ra Pablo inga saha. Ta ziqui cuahan ra.

⁴¹ I yaha ra nu cu si Siria. I yaha ra Cilicia. Ta i saha ra tundye iñi sii ñiyivi sino ifi Tuhun Ndyoo yucuan.

16

Cuahan ra Timoteo sihin ra Pablo ta ra Silas

¹ I saa ra Pablo ta ra Silas ndya ñuu Derbe ta ñuu Listra. Yucuan i nañihi ra sii minoo ra sino iñi. Nañi ra Timoteo. Ñiyivi hebreo cuu zihí

ra ta sino iñi ña sii ra Jesú. Ta zutu
ra, ra cahan zahan griego cuu ra.

² Vaha ñiyivi cuu ra Timoteo catyi
ñiyivi sino iñi Tuhun Ndyoo ñuu
Listra ta ñuu Iconio.

³ I cuñi ra Pablo sa cuhun ra
Timoteo sihin ra. Zoco i quihin
xihna ra sii ra ta i sahndya ra ñii
xiñi xuu ra coto cahan xaan ñiyivi
hebreo ñuu cuan vatyi sito ñu vatyi
ra griego cuu zutu ra ta ña tuhva ra
zavaha costumbre maa ñu.

⁴ Tacuan ta sahan ra tahan tahan
ñuu. I nacatyi ra sihin ñiyivi tuhun i
nacatyi ra apóstol ta ra ndyizo tyiño
nu iyo ñiyivi sino iñi ñuu Jerusalén
vatyi tacuan ta cua zacuenda ñu sii
ñu cuhva i tyaa ra nuu carta cuan.

⁵ Tacuan ta sicoo ca tundyee iñi
sii ñiyivi sino iñi Tuhun Ndyoo, ta
vaha xaan ca sino ifi ñu sii ra
Ndyoo ta tandih iquivi i ndutuu ca
ñu.

*Tahan ra Pablo ñimahna ta
ndyehe ra sii minoo ra nu cu si
Macedonia*

⁶ Ñá saha Tatyi Ii sa nacatyi ra
Pablo Tuhun Ndyoo sihin ñiyivi nu
cu si Asia. Yucuan cuenda i yaha ña
ra ndya nu cu si Frigia ta Galacia.

⁷ Ta i saa ra nu cu si Misia. Ndyo
indyacuan cua cuhun ra ndya nu
cu si Bitinia sica iñi ra, zoco ñá saha
tucu Tatyi Ii sa cuhun ra yucuan.

⁸ Tacuan ta i yaha ra nu cu si
Misia, ta i quihvi ra ñuu Troas sa
cua cuenda Misia. Ta Troas cuan
ndyaa si yuhu tyañuhu.

⁹ Yucuan i tahan ra Pablo
ñimahna ta sisi ñimahna i ndyehe ra
sii minoo ra nu cu si Macedonia.
Ta i sica ra cuan tumañi ifi sii ra
Pablo ta catyi ra: “Quisun ndya
Macedonia ta tyindyeun sii ndi.”

¹⁰ Ta sa yaha ndyehe ra Pablo
ñimahna cuan ta yuhvi ra Lucas si-
hin ra Pablo ta inga ra i zanumi
ndi sa cuhun ndi ndya Macedonia
vatyi sito ndi vatyi sa tasi ra Ndyoo
sii ndi sa cua nacatyi ndi tuhun ra
indyacuan.

*Ndyaa ra Pablo ta ra Silas ñuu
Filipos*

¹¹ I quihvi ndi barco ñuu Troas ta
sa ndoo ñi cuahan ndi ndya cuhva
ndya saa ndi minoo ñuhu mahñu
tyañuhu. Nañi si Samotracia ta inga
quivi i saa ndi ñuu Neápolis.

¹² Ndyo indyacuan i quisaha sica
ndi sihin saha ndi ndya ñuu Filipos.
Cahnu xaan ñuu cuan. Ñahñi inga
ca ñuu ñiñi ca iyo yucuan. Ndyaca
ñaha ñiyivi romana sii si. Yucuan i
ndoo ndi zuhva quivi.

¹³ Minoo quivi quitatu ñiyivi i
quita ndi sata ñuu ndya nu iyo mi-
noo yuu vatyi yucuan tuhva ñiyivi
sahan ta sica tahvi ñu sii Ndyoo.
Yucuan i sindyaa ndi ta i nacatyi
ndi Tuhun Ndyoo sihin ñu zihi, ñu
i titahan yucuan.

¹⁴ Minoo ña nañi ña Lidia. Ñuu
Tiatira cuu ñuu ña. Xico ña zahma
vaha, zahma yuhva tixinda, vatyi
yucuan cuu tyiño ña. Zacahnu ña
sii ra Ndyoo cuhva zacahnu ñiyivi
hebreo sii ra. I tyizoho ña sa cahan
ra Pablo, ta i nuña ra Ndyoo sa siñi
tuñi sii ña, ta i sino iñi ña sa catyi ra
Pablo.

¹⁵ Sicoo ndutya ña sihin ñiyivi sii
ñá, ta ziqui i catyi ña: Sa sito ndo
vatyi ndisa cuii sino ifi sii ra Jesú,
yucuan cuenda cuhun ndo ta cua
ndoo ndo zuhva quivi vehi. Catyi
ñá ta i zañiñi ña sii ndi ta cuahan
ndi vehe ña.

¹⁶ Minoo quivi sahan ndi nu sica
tahvi ñiyivi sii Ndyoo ta tahan ndi
sii minoo ña yoco. Ñoho tatyi cui-
hna sii ña, ta cuu nacatyi ña ñaa sa
cua tahan ñiyivi nu cuahan quivi.
Cuhva cuan i zahacanaa ña xuhun
ta ñihi sitoho ña xuhun cuan.

¹⁷ I quisaha ndyico ña sii ra Pablo
ta sii maa ndi ta i cana saa ña ta
catyi ña: Ra ihyá zavaha ra cuhva
cuñi ra Ndyoo cahnu. Ta vasi
nacatyi ra sihin ndo yozo caa cua
cacu añima ndo ta ma cuhun ndo
andyaya. Catyi ña.

¹⁸ Tacuan i zavaha ña cuaha xaan
quivi cuhva ndya ña cundyee ca iñi

ra Pablo, ta ziqui i nandyehe sata ra ta i catyi ra sihin taty i cuihna cuan: Yuhvi catyi vaty i quiton añima ña ya vaty i iyo tundyee iñi sii ra Jesú s. Catyi ra. Ta zuun ñi caa cuhva cuan i quita taty i cuihna añima ña.

19 Ta sa sito sitoho ña vaty i ma ñihi ca ra xuhun sihin ña vaty i sa i quita taty i cuihna añima ña ta i tiin ra sii ra Pablo ta ra Silas ta sindyaca ra sii ra ndya vehe tyiño.

20 I sindyaca sitoho ña sii ra nuu ra juez ta catyi ra sihin ra juez: Ra ihya zativi tyiño ñuu yo ta ñiyivi hebreo cuu ra.

21 Zacuaha ra costumbre sa ma cuu sino iñi yo ta ma cuu zavaha yo vaty i ñiyivi romano cuu yo. Tacuan i catyi ra cuan.

22 Tacuan ta i tyaa tandih i ñiyivi cuaty i sata ra Pablo ta ra Silas. Ta i tava ra cu tyiño tyiño sa quita zahma ra Pablo ta ra Silas. Ta i catyi ra sihin ra policía: Cañi vaha vaha ndo sii ra sihin yutu.

23 Ta sa yaha cañi xaan ra sii ra ta i tyihi ra sii ra vehe caa ta catyi ra sihin ra cumi vehe caa vaty i nacumi vaha xaan ra sii ra.

24 Ta sa ñihi ra cumi vehe caa cuan tuhun cuan ta i tyihi ra sii ra vehe nu cutu ca, ta i tyihi ra saha ra sisi vitu.

25 Tañi cuhva maa ñuu sata ra Pablo ta ra Silas yaa Ndyoo ta sica tahvi ra sii Ndyoo ta i tyizoho inga ra ñoho si vehe caa cuan.

26 Ta ta sica cuii ñi i taan minoo sa ñihi xaan. Ñihi xaan i quizi si vehe caa cuan. Ta zuun ñi caa cuhva cuan i nuña tandih i yuvehe ta i ndasi cadena sa nuhñi ra ñoho vehe caa cuan.

27 I natahvi iñi ra cumi vehe caa cuan. Ta ndyehe ra vaty i nuña tandih i yuvehe, ta sica iñi ra vaty i sa sino tandih i r a ñoho si vehe cuan. Yucuan cuenda i tava ra mity i ra ta cua cahñi ra zuun ñi sii maa ra.

28 Zoco i catyi ra Pablo: Ma cahñun suun. Ñoho tandih i ndi ihya.

29 I sica ra cumi vehe caa cuan ñuhu ta i cacono ra sisi vehe cuan. Nihi tacuan ñi ca ra vaty i yuhu xaan ra. I sicuiñi siti ra nuu ra Pablo ta ra Silas.

30 Ta ziqui i tava ra sii ra ta i ndaca tuhun ra sii ra: ¿Ñaa sa cuñi si zavehi, tata, ta cua cacu añime?

31 Ta i catyi ra Pablo sihin ra: Sino ifun sii ra Jesú s, ta cua cacun, yoho ta tandih i ñiyivi suun.

32 Tacuan ta zi qui i nacaty i ra Pablo Tuhun Ndyoo sihin ra ta sihin tandih i ñiyivi vehe ra.

33 Ta zuun ñi sa cuaa cuan i nacaty a ra cumi vehe caa cuan nuñicuehe nduu tahan ra. Ta i sicoo nduty a ra cumi vehe caa cuan sihin tandih i ñiyivi sii ra.

34 Tacuan ta i quihin ra sii ra Pablo ta cuahan ra sihin ra ndya vehe ra, ta saha ra sa casi ra. Ta zii xaan i cuñi ra ta ñiyivi sii ra vaty i sa sino iñi ñu sii ra Jesú s. (Tacuan ta zi qui i nandihvi tucu ra Pablo ta ra Silas vehe caa cuan coto cuxaan ra cu tyiño sihin ra cumi vehe caa.)

35 Ta inga quiivi sa ñaha ñi i tasi ra juez sii ra policía ta catyi ra sihin ra cumi vehe caa: Zaña ndo sii ra cuan.

36 Ta tacuan i catyi ra cumi vehe caa cuan sihin ra Pablo vaty i sa cuu quita ra sihin ra Silas.

37 Zoco i catyi ra Pablo: Ra ñuu Roma cuu nduhvi. Ta ñahñi cuhva iyo sii ra ihya sa cañi ra sii ndi nuu ñiyivi ta tyihi ra sii ndi vehe caa. Ta ña saha ra sa cahan ndi ta nu sa ña cutuñi ndi. Ta vity i cuñi ra sa cua zaña xehe ra sii ndi. Ña tacuan cuu si. Nacaty i ndo sihin ra juez vaty i naquisi tava maa ra sii ndi ta cua cuhun ndi. Tacuan i catyi ra Pablo.

38 Ta tacuan i nacaty i ra policía sihin ra juez. Ta i yuhu ra juez sa ñihi ra tuhun vaty i ra ñuu Roma cuu ra Pablo ta ra Silas.

39 Yucuan cuenda sahan ra nuñoho ra Pablo sihin ra Silas ta i sica ra tumañi iñi sii ra sa ma cuxaan ra, ta zi qui i tava ra sii ra, ta i catyi ra

sihin ra vatyi sa ndyoo ñi naquita
ra ñuu cuan.

⁴⁰ Ta sa quita ra Pablo ta ra Silas
vehe caa ta cuahan ra vehe ña
Lidia. Ta i ndyehe ra sii inga ñiyivi
sino iñi Tuhun Ndyoo ta saha ra
tundyee iñi sii ñu ta ziqui i quita ra
ñuu cuan.

17

*Siñi ñiyivi ñuu Tesalónica Tuhun
Ndyoo*

¹ I yaha ra Pablo ta ra Silas ñuu
Anfípolis ta ñuu Apolonia ta cuah-
han ra minoo ñuu cahnu. Nañi si
Tosalónica. Yucuan iyo minoo vehe
ñuhu hebreo.

² Ta tañi sa tuhva ra Pablo sa-
han, tacuan i sahan ra yucuan.
Uñi quivi, quivi quitatu ñiyivi, i
zacuaha ra sii ñiyivi cuhva catyi
Tuhun Ndyoo.

³ Tyehen i catyi ra: I catyi Tuhun
Ndyoo vatyi cua ndyehe ra Cristo
tundoho. Cua cuu ra, ta ziqui
cua nandoto tucu ra. Yuhvi catyi
vatyi ra Jesúus cuu ra cu Cristo vatyi
tacuan i tahan si sii ra. Ta cua za-
cacu ra sii ñiyivi nu iyo ñu ndyehe
tundoho. Tacuan i catyi ra Pablo.

⁴ Ta ñiyivi i tyizoho, cuaha ñu i
sino iñi. Ta cuaha ca ra, ra griego
cuu ra. Ta sa sino iñi ra cuhva
zacuaha ñiyivi hebreo. Ta inga ñu
cuu ñu ñazihí ra cuca ñuu cuan.

⁵ Tacuan ta sa ndyehe ra hebreo,
ra ña sino iñi, vatyi sino xaan iñi
ñiyivi ta i cucuihna iñi ra sa cuenda
si. I quihin ra sii minoo ityi ra sica
noo ñi, ra ña zatyiño, ta ra yucuan
i zatitahan sii ñiyivi, ta i zanduvaa
ra sii ñu. Sahan ra vehe ra Jasón sa
nanducu ra sii ra Pablo vatyi cua
cundyaca ra sii ra nu yucu tandihí
ñiyivi.

⁶ Zoco ñá nañihí ra sii ra. Tacuan
ta ziqui i xita cañoho ra sii ra Jasón
ta sii zuhva ca ra sino iñi nuu ra cu
tyiño. Ta i cana saa ra ta catyi ra:
Ra ihyá zayanga sii ñiyivi nacahnu
ñuu ñiyivi ta vityi vasi zayanga ra
sii ñiyivi ñuu yo.

⁷ I saha ra Jasón ya sa cundayaa
ra cuan vehe ra. Catyi ra ya vatyi
ra Jesúus cuu ra cu rey ta yivi ra
César. Cuatyi cuu si sa tacuan vatyi
ra César cuu rey sii maa yo.

⁸ Tacuan i cahan ra cuñi cuatyi
cuán cuhva ndya zanduvaa xaan
ra sii ñiyivi sihin ra cu tysiño.

⁹ Zoco i saha ra Jasón ta inga ra
zuhva xuhun, ta i quita ica ra.

*Cuahan ra Pablo ta ra Silas ñuu
Berea*

¹⁰ Zuun ñi sa cuaa cuan i zan-
umi ra sino iñi Tuhun Ndyoo sii
ra Pablo ta ra Silas ta cuahan ra
ndya ñuu Berea. Ta cuhva sa saa
ra yucuan, i sahan ra vehe ñuhu
hebreo.

¹¹ Ñiyivi hebreo ñuu cuan vaha
ca ñiyivi cuu ñu. Ñá zavaha ñu
cuhva i zavaha ñiyivi hebreo ñuu
Tosalónica. Cuñi xaan ñiyivi ñuu
Berea sa tyizoho ñu Tuhun Ndyoo.
Ta tandihí quivi i cahvi ñu Tuhun
Ndyoo vatyi cuñi ñu coto ñu tatu
ndisa sa cahan ra Pablo.

¹² Yucuan cuenda i sino iñi cuaha
xaan ra hebreo, ta cuaha ñuzihí
griego, ñu ñiñi.

¹³ Zoco sa ñihi ñiyivi hebreo ñuu
Tosalónica tuhun vatyi zacuaha ra
Pablo Tuhun Ndyoo ñuu Berea ta
ziqui sahan ra cua zanduvaa ra sii
ñiyivi ñuu Berea ta cua cahñi ñu sii
ra Pablo.

¹⁴ Yatyi xaan i tasi ñiyivi sino
iñi Tuhun Ndyoo sii ra Pablo ndya
yuhu tyanuhu. Ta i ndoo ra Silas ta
ra Timoteo ñuu Berea.

¹⁵ Cuahan uu tahan ñiyivi sihin
ra Pablo. Sindyaca ra sii ra ndya
ñuu Atenas. Ta ziqui i tasi ra Pablo
tyiño sihin ra sa nacatyi ra sihin ra
Silas ta ra Timoteo vatyi zanumi ra
ta cuhun ra nu iyo ra Pablo.

Ndyaa ra Pablo ñuu Atenas

¹⁶ I ndatu ra Pablo ñuu Atenas
ndya cua quisi ra Silas ta ra Timo-
teo. Ta sica xaan iñi ra Pablo vatyi
ndyehe ra vatyi cuaha xaan zandu
yutu iyo ñuu cuan.

17 Yucuan cuenda sahan ra vehe ñuhu vatyi cua natuhun ra sihin ñiyivi hebreo ta sihin inga ñiyivi sino iñi sii Ndyoo. Ta tandihi quivi i nacatyi ra sihin ñiyivi i ndyehe ra nuyahvi.

18 Ta ziqui i natuhun tahan ñiyivi cuhva i cahan ra Pablo. Iyo ñu zacuaha ñu tuhun ra Epicúreo ta iyo ñu zacuaha ñu tuhun ñiyivi estoico. Ta zuhva ñu i catyi: ¿Ñaa tuhun cuu si sa nacatyi xaan ra ya vatyi cahan xaan ra tuhun inga ndyoo, ra ña sito yo? Tacuan i catyi ra cuan vatyi cahan ra Pablo tuhun ra Jesús ta cuhva i nandoto ra Jesús.

19 Tacuan ta ziqui i sindyaca ñu sii ra Pablo ndya xiñi yulu Areópago nu titahan ra ndyizo tyiño ñuu cuan ta i catyi ra sihin ra Pablo: Cuñi ndi coto ndi ñaa tuhun cuu si sa zacuohon sii ñiyivi.

20 Tucu xaan cuu tuhun nacatyun, ta cuñi ndi coto ndi ñaa sa cuu si. Tacuan i catyi ñu.

21 Vatyi tandihi ñiyivi ñuu Atenas sihin ñiyivi inga ñuu, ñu iyo ñuu Atenas cuan, ñahñi tyiño zavaha ñu. Maa ñi sa tyizoho ñu ta sa nacatyi ñu ñaa cuhva saa iyo.

22 Tacuan i cuu ta ziqui i nduvita ra Pablo mahñu nu yulu ra cuan xiñi yulu Areópago ta i catyi ra sihin ra ñuu Atenas, ndyehi vatyi zacahnu xaan ndo ndyoo sii maa ndo sihin tandihi cuii añima ndo.

23 Vatyi sehiñ sa ndyehi nu zacahnu ndo sii ndyoo ndo ta i ndyehi minoo altar ta ndyaa letra. Tyehen catyi si: “Cuenda ndyoo sa ña sito yo.” Zacañhu ndo sii ra vazu ña sito ndo sii ra. Ta vityi cua nacatyi sihin ndo yoo ra cuu ra.

24 Ndyoo, ra zavaha ñuu ñiyivi cuu ra. I zavaha ra tandihi sa iyo. Sitoho yutyi andivi ta ñuhu ñuu ñiyivi cuu sii ra. Ña iyo maa ra sisi vehe ñuhu zavaha ñiyivi.

25 Ña cuñi si sa cua tyindye ñiyivi sii ra vatyi ñahñi sa cumañi sii ra

vatyi zuun ñi maa ra saha tandihi sa iyo. Saha ra sa cundito yo. Saha ra sa coo tatyi yo.

26 Minoo tuhun ñi ñiyivi i zavaha ra Ndyoo sa xihna ñi. Tacuan i cuu ta ziqui i ndutuu ca ñiyivi ta i catyi ra Ndyoo vatyi cua coo ñiyivi nacahnu ñuu ñiyivi. I catyi maa ra ndyamaa cua coo sa ziñ ziñ tata ñiyivi ñuu ñiyivi, ta i saha ra ñaa ñuhu cua cuu sii ñu. Ta i catyi ra ñaa ñiyivi cua cundyaca ñaha sa ziñ ziñ ñuhu ta ama cua cundyaca ñaha ñu.

27 Tacuan i zavaha ra Ndyoo vatyi cua nanducu ñiyivi sii ra. Sica iñi ra vatyi ña yii ta cua nañhi ñu sii ra. Vatyi ña sica iyo ra sihin yo.

28 Vatyi sa cuenda maa ra ta ndito yo, cuu caca yo ta cuu coo yo cuhva iyo yo. Tañi sa i tyaa minoo ra ñuu ndo ta tyiemvu vatyi catyi ra: “Maa ra Ndyoo i zavaha sii yo.” Catyi ra.

29 Ta ndisa vatyi i zavaha ra sii yo, ta yucuan cuenda ña vaha caca iñi yo vatyi caa ra tañi caa minoo ndyoo xuhun cuaan a xuhun cui, a yuu a ñaa sa zavaha ñiyivi cuhva caa ra.

30 Ta tyiemvu ñá sito maa ñiyivi ñaa sa zavaha ñu. Ta ñá cuxaan ra Ndyoo sihin ñiyivi quivi cuan vatyi ñá sito ñu. Zoco vityi catyi ra vatyi nazandoo ñiyivi nacahnu ñuu ñiyivi cuatyi zavaha ñu.

31 Vatyi sa sata ra quivi sa cua tasi tuñi ra sii ñiyivi ñuu ñiyivi sihin sa ndoo. Ta saha ra tyiño sii minoo ra sa cua ndyehe ra a sa vaha zavaha ñiyivi a sa ña vaha. I zañaha ra Ndyoo sii yo vatyi iyo cuhva sii ra cuan vatyi i zanandoto ra sii ra.

32 Ta sa siñi ñiyivi vatyi catyi ra Pablo vatyi i nandoto minoo ñiyivi ta zuhva ñu tyizoho cuan, i sacu ndyaa ñu sii ra Pablo. Zoco inga ñu i catyi ñu: Cuñi ndi sa tyizoho ndi sa cohon inga saha.

33 Tacuan ta i quita ra Pablo nu titahan ñiyivi.

34 Ta zuhva ra cuan i sino iñi ra ta i titahan ra sihin ra Pablo. Minoo

ra nañi ra Dionisio. Ra ndyizo tysiño ñuu cuan cuu ra. Ta minoo ñaha sino iñi, nañi ña Dámaris. Ta iyo ca ñu sino iñi ndihí ca.

18

Cuahan ra Pablo ñuu Corinto

¹ Tacuan ta ziqui i zandoo ra Pablo ñuu Atenas ta cuahan ra ñuu cahnu Corinto.

² Yucuan i nañihi ra sii minoo ra hebreo tañi maa ra. Aquila nañi ra. Ñuu Ponto i cacu ra. Ta cunaha ca sa quita ra nu cu si Italia sihin ñazihí ra. Nañi ña Priscila. I quita ñu ñuu cuan vatyi i tava ra ndyaca ñaha Claudio sii tandihí ñiyivi hebreo ñuu Roma nu sindyaa ñu. Sahan ra Pablo vehe ñu nu ndyaa ñu ñuu Corinto.

³ Yucuan i ndoo ra Pablo ta i zatyiño ra sihin ñu vatyi sa tuhva ra zatyiño tañi zatyiño maa ñu. I zavaha ñu vehe zahma. Ta tacuan i zahacanaa ñu xuhun.

⁴ Ta i natuhun ra Pablo sihin ñiyivi vehe ñuhu hebreo tandihí quiví sa cu quiví quitatu ñiyivi. I natuhun tahan ra sihin ñiyivi hebreo ta i natuhun tahan ra sihin ñiyivi griego vatyi cuñi ra sa cua sino iñi ñu sii ra Jesús.

⁵ Ta sa quita ra Silas ta ra Timoteo ñuu Macedonia ta i saa ra nu ndyaa ra Pablo, ta ziqui i zaña ra Pablo inga tysiño ra ta tandihí tysiemu i zacuaha ra Tuhun Ndyoo. I nacatyi ra sihin ñiyivi hebreo vatyi ra Jesús cuu ra sa ndatu ñu, ra cua tasi ra Ndyoo. Ta cua zacacu ra sii ñiyivi nu iyo ñu ndyehe tundoho.

⁶ Tacuan ta ziqui i quisaha nduxaan ñiyivi hebreo cuan sihin ra Pablo ta i cahan ñu ndya vaha ñi sii ra Jesús. Tacuan i cuu si ta i naquizi ra Pablo zahma ra vatyi ña cundyee ca iñi ra sa cahan ñu. I catyi ra sihin ñu: Cuatyi maa ndo cuu ta ma cuhun ndo gloria. Yivi cuatyi mi. Ta vityi cuhin cua nacatyi Tuhun Ndyoo maa ñi sihin ñiyivi, sa yivi ñiyivi hebreo cuu.

⁷ I quita ra vehe ñuhu hebreo ta cuahan ra vehe minoo ra nañi Justo vatyi zacahnu maa ra Justo sii Ndyoo. Ta iyo vehe ra yatyi ñi xiin vehe ñuhu.

⁸ Sino iñi minoo ra nañi Crispo Tuhun Ndyoo. Ra cu nuu sii vehe ñuhu hebreo cuu ra. Sino iñi tandihí ñiyivi vehe ra. Ta i sino tucu iñi cuaha xaan inga ñiyivi ñuu Corinto sa siñi ñu Tuhun Ndyoo. Ta i sicoo ndutya ñu.

⁹ Tacuan ta minoo sa cuaa i ndyehe ra Pablo sii ra Jesús sisi ñimahna ta i catyi ra Jesús sihin ra: Ma yuhun Pablo, ta ma cutaxun. Zazuohon Tuhun Ndyoo.

¹⁰ Vatyi zacuenda mi suun. Yoñi ñiyivi cuu tiin suun sa zaha ñu maña suun vatyi iyo cuaha xaan ñiyivi ñuu ya sa cua sino iñi sii.

¹¹ Yucuan cuenda i ndoo ra Pablo minoo cuiya zazava ñuu Corinto sa zacuaha ra sii ñiyivi Tuhun Ndyoo.

¹² Zoco tysiemu sa cuu ra Galión gobernador nu cu si Acaya, i ndu-iin ñiyivi hebreo sa ña sino iñi, ta i tiin ñu sii ra Pablo. I sindyaca ñu sii ra nuu ra ndyaca ñaha.

¹³ Ta i catyi ñu sihin ra Galión: Ra ihyá, nacatyi xaan ra sihin ñiyivi cuhva zacahnu ñu sii Ndyoo, zoco yivi cuhva catyi ley ndi cuu si cuan.

¹⁴ Sa cua cahan ra Pablo ta i catyi ra Galión sihin ñiyivi hebreo: Tyizoho ndo. Ñahñi sa i zavaha ra ya. Tatu zavaha ra sa ña vaha a cuatyi cua zayange sii ta cua tyizohi sa cahan ndo. Zoco ña tacuan cuu si vatyi ñahñi sa zavaha ra. Ta ma tyizohi sa cahan ndoho ñiyivi hebreo.

¹⁵ Cuñi ndo cuatyi sihin ra vatyi zacuaha ra inga tuhun. Inga tuhun nacatyi ra ta tucu iyo ley maa ndo. Ma ndyehi tysiño cahan ndo. Catyi ra.

¹⁶ Tacuan ta i tava ra sii ra hebreo sata vehe.

¹⁷ Tandihí ñiyivi griego, i tiin ñu sii ra Sóstenes. Ra cu nuu sii vehe ñuhu hebreo cuu ra. I cañi xaan ñu sii ra zuun ñi yuvehe tysiño vatyi

cuñi ñuu cuaty i sihin ñiyivi hebreo. Ta ñá cahan maa ra gobernador Galión.

Sa nanuhu tucu ra Pablo ndya ñuu Antioquía ta ziqui i quihin tucu ra ityi cuahan ra sa cu uñi saha

¹⁸ Cuaha ca quivi i ndoo ra Pablo yucuan. Tacuan ta ziqui i cuziin tahan ra sihin ñiyivi yucuan. Ta cuahan ra ñuu Cencrea. I zatya tyehe ra Pablo xiñi ra vaty i cua zavaha ra minoo cuhva sa catyi ra sihin ra Ndyoo. Ta ziqui i quihi i ra barco vaty i cua cuhun ra ityi Siria sihin ña Priscila ta ra Aquila. Yíi maa ña Priscila sii ra Aquila.

¹⁹ Ta saaa ñu ñuu Efeso i zandoo ra sii ra Aquila ta sii ña Priscila ta cuahan ra vehe ñuhu hebreo ta cahan ra sihin ñu hebreo ñu titahan yucuan.

²⁰ I sica ñu sii ra sa ndoo ra naha ca, zoco ñá cuñi ra.

²¹ Tacuan ta ziqui cua cuziin tahan ra sihin ñiyivi ta catyi ra: Cuñi si sa cuhin ñuu Jerusalén sa cuenda vico. Zoco tatu cuhva ra Ndyoo cua quasi tuqui nu ndyaando. Ta i quihi i ra ityi cuahan ra. I quita ra ñuu Efeso sihin barco.

²² Ta saaa ra Pablo ñuu Cesarea i quihi i ra ityi cuahan ra ñuu Jerusalén, ta i saa ra nu iyo ra ndyizo tyiño cuenda ñiyivi sino iñi Tuhun Ndyoo yucuan. Ta i nacaty i ra Pablo sihin ra tandih i sa i zavaha ra nu sahan ra. Ta ziqui cuahan ra ñuu Antioquía.

²³ I ndoo ra zuhva quivi ñuu Antioquía cuan ta ziqui i quihi i tucu ra ityi cuahan ra nu cu si Galacia ta nu cu si Frigia. Tahan tahan ñuu sahan ra ta saha ra tundyee iñi sii ñiyivi sino iñi Tuhun Ndyoo.

Zacuaha ra Apolos sii ñiyivi Tuhun Ndyoo ñuu Efeso

²⁴ I quasi minoo ra hebreo ñuu Efeso. Nañi ra Apolos. Ra ñuu Alejandría cuu ra. Casi xaan zacuaha ra Tuhun Ndyoo. Sito xaan ra Tuhun Ndyoo, tutu sahnu.

²⁵ Zacuaha ra yozo caa iyo ra Ndyoo. Zacuaha ra sihin tandih i cui añima ra. Vaha xaan zacuaha ra cuhva sito ra sa cuenda ra Jesús, zoco ta coto ca ra tandih i sa cuenda ra Jesús. Sito ra maa ñi cuhva i zacuaha ra Juan sa zacoo ndutya ra sii ñiyivi.

²⁶ Ñá yuhu ra Apolos ta i quisaha zacuaha xaan ra sii ñiyivi sisi vehe ñuhu hebreo. I siñi ña Priscila ta ra Aquila sa cahan ra. Ta ziqui i quihi ñu sii ra ta sahan ñu ndya zava ta i nacaty i ñu sihin ra tandih i sa cumañi ca coto ra, tandih i sa i zavaha ra Ndyoo ta cuhva zacacu ra sii ñiyivi sa cuenda ra Jesús, i nacaty i ñu sihin ra.

²⁷ Tacuan ta i cuñi ra Apolos sa cuhun ra ndya nu cu si Acaya, ta i tyindyee ñiyivi sino iñi Tuhun Ndyoo sii ra vaty i saha ñu xuhun ta i tyaa ñu minoo carta sii inga ñiyivi sino iñi Tuhun Ndyoo ityi cuan vaty i cua nacoto ñu sii ra. Ta saaa ra Apolos nu cu si Acaya i tyindyee xaan ra sii ñiyivi yucuan. Sa sino iñi ñu sii ra Jesús vaty i iyo xaan tumañi iñi sii ra Ndyoo.

²⁸ I ndyehe tandih i ñiyivi yucuan vaty i vaha xaan cahan ra Apolos sihin ñiyivi hebreo sa ña sino iñi vaty i saha xaan ra Ndyoo cuhva sii ra. Ta i zañaha ra cuhva catyi Tuhun Ndyoo. I catyi ra sihin ñu: Ndatu ndo sii ra Cristo. Yuhvi catyi vaty i ra Jesús cuu ra vaty i i tava ra Ndyoo tyiño sii ra sa cua zacacu ra sii ñiyivi nu iyo ñu ndyehe tundoho. Catyi ra Apolos.

19

Sahan tucu ra Pablo ñuu Efeso

¹ Ta sa ndyaa ra Apolos ñuu Corinto ta i yaha ra Pablo ityi yucu nu cu si Asia cuan ta cuahan ra ñuu Efeso. Yucuan nañihi ra sii zuhva ra sino iñi Tuhun Ndyoo.

² Ta i ndaca tuhun ra Pablo sii ra ta catyi ra: ¿Atu i naquihin ndo Tatyi li quivi i sino iñi ndo Tuhun

Ndyoo? Ta i catyi ra cuan sihin ra Pablo: Tañaha ca ma coto ndi tuhun sa cuenda Tatyi II.

³ Ta i catyi ra Pablo: ¿Ta yozo caa i sicoo ndutya ndo? Ta i catyi ra sihin ra Pablo: I sicoo ndutya ndi cuhva catyi ra Juan.

⁴ Ta ziqui i catyi ra Pablo sihin ra: I zacoo ndutya ra Juan sii ñiyivi sa yaha ndu-uu iñi ñu cuatyi ñu. I nacatyi ra sihin ñu vatyi cua quasi inga ra cuee ca ta sii maa ra cuan cua sino iñi ñu. Ra yucuan cuu Jesús. Tacuan i zacuaha ra Juan, catyi ra Pablo.

⁵ Ta sa siñi ra cuan tuhun cuan ta i sicoo ndutya ra sa cuenda ra Jesús.

⁶ Ta ziqui i tyizo ra Pablo ndaha ra ziqui ra, ta i noo xica Tatyi II sii ra, ta i quisaha cahan ra inga zahan sa ña tuhva ra cahan ta i zaha ra profetizar, ndihí ca.

⁷ Tañi usi uu tahan ra cahan tacuan.

⁸ I sahan ra Pablo vehe ñuhu ñiyivi hebreo. Uñi yoo i zacuaha ra sii ñiyivi yucuan. Ñá yuhu ra ta i natuhun tahan xaan ra sihin ñiyivi hebreo sa ña sino iñi. Ta i nacatyi ra sihin ñu cuhva ndyaca ñaha ra Ndyoo. Ta i zañiñi ra sii ñu vatyi ndu-uu iñi ñu cuatyi ñu.

⁹ Zoco zuhva ñiyivi yucuan ñihi xaan iñi ñu. Ñá cuñi ñu sa sino iñi ñu. Ta quiñi xaan i cahan ñu sii tuhun ra Jesús nuu ñiyivi yucuan. Tacuan ta i zandoo ra Pablo sii ñu. I quihin ra sii ñu sino iñi, ta tandihí quiñi i natuhun tahan xaan ra sihin ñu sa cuenda Tuhun Ndyoo nu iyo zicuela ra maestro nañi Tiranno.

¹⁰ Ta tacuan i sicoo tyiño uu cuiya cuhva ndya tandihí ñiyivi hebreo ta tandihí inga ñiyivi nacahnu Asia i siñi ñu tuhun ra Jesús.

¹¹ Cuaha xaan sa ndyityi i zavaha ra Pablo i zacuu ra Ndyoo.

¹² Cuhva ndya pañitu a ñaa zahma cua tiñi ra Pablo ta cuhun si sihin ñiyivi ndya nu caa ñu cuhu

ta i quita cuehe a ñaa tatyi cuihna ñoho añima ñu.

¹³ Tacuan ta sicoo minoo ityi ñiyivi hebreo. Ndihvi noo ñu ta catyi ñu vatyi cuu tava ñu tatyi cuihna sii ñiyivi, ta i cuñi ñu sa cua cutyiño ñu zivi ra Jesús. I cahan ñu cuan sihin tatyi cuihna ta catyi ñu: Catyi xaan ra Pablo yozo caa iyo ra Jesús. Cuenda ra Jesús cuan catyi ndi vatyi cua quiton. Catyi ñu.

¹⁴ Tacuan i zavaha usa tahan ñiyivi, zeha ra Esceva, minoo ra cu zutu cahnu sii ñiyivi hebreo. Usa tahan ñu i zavaha tacuan.

¹⁵ Zivi ra Jesús i cahan ñu sihin tatyi cuihna ta catyi si sihin ñu: Nacote sii ra Jesús. Ta nacote sii ra Pablo, zoco ña nacote yoo ndoho cuu ndo vatyi ñahñi cuhva iyo sii ndo. Catyi si.

¹⁶ Tacuan ta i ndava ra ñoho tatyi cuihna ziqui ñu ñihi xaan. I tiñi ra sii ñu ta cañi xaan ra. Zañicuehe ra sii ñu. I sahndya ra zahma ñu ta i sino ñu vehe ra.

¹⁷ Tacuan i cuu si ta i sito tandihí ñiyivi ñuu Efeso cuhva i tahan ñu. I sito ñu hebreo ta tandihí inga ñiyivi. Ta yuhu xaan ñu. Ta i quisaha catyi ñu vatyi cahnu xaan cuu ra Jesús.

¹⁸ Cuaha xaan ñiyivi sa sino iñi Tuhun Ndyoo i quisahma ñu nuu ra Pablo tandihí sa ña vaha i zavaha ñu vatyi i zatiño ñu sihin tuhun tazi.

¹⁹ I sahmi ñu libro sa sityiño ñu sa zatazi ñu sii ñiyivi. Ta i sahmi ñu tandihí sa sityiño ñu sa cuenda tyiño cuan. Ta sa yaha sahmi ñu tandihí libro ñu ta i zaha ñu cuenda yozo xuhun i siquihí si ta catyi ñu vatyi siquihí si uu xico usi mil xuhun cuiși.

²⁰ Tacuan i nducahnu ca Tuhun Ndyoo, ta cuaha ca ñiyivi sino iñi ñu, ta saha xaan ca Ndyoo tundyeer iñi sii ñu (sa cundyico ñu sii ra).

²¹ Tacuan ta i sica iñi ra Pablo sihin añima ra vatyi cua yaha tucu ra nu cu si Macedonia. Cua yaha tucu ra nu cu si Acaya, ta cua cuhun tucu ra ñuu Jerusalén vatyi catyi ra:

Cua cuhun xihne ñuu Jerusalén. Ta zíqui cuñi xaan si sa cuhun tuqui ñuu Roma. Catyi ra.

²² I tasi ra Pablo sii ra Timoteo sihin ra Erasto, uu tahan ra zatyiño sihin ra, ityi nu cu si Macedonia. Ta i ndoo ca ra Pablo nu cu si Asia.

Cuhva i cuvaa xaan ñiyivi ñuu Efeso

²³ Ta tyiemvu cuan sicoo sa sahñi tahan ñiyivi ñuu Efeso sa cuenda Tuhun Ndyoo.

²⁴ Minoo ra nañi Demetrio quisaha sihin si vatyi cuaha xaan ñiyivi sino iñi Tuhun Ndyoo. Maa ra Demetrio cuan tuhva zavaha inga ndyoo xuhun cui, nañi si Diana. Ta sihin tyiño zavaha ra cuaha xaan zahacanaa ra sihin ra zatyiño sihin ra.

²⁵ Yucuan cuenda i cana ra sii tandihí ra sihin inga ra zatyiño tañi zatyiño maa ra ta i catyi ra sihin ra: Yañi xaa, sito ndo vatyi vaha xaan zahacanaa yo sihin tyiño ya.

²⁶ Ta vityi sa ndyehe yo ta sa siñi yo cuhva cahan ra Pablo. Catyi ra vatyi ndyoo zavaha ñiyivi yivi ndyoo cuu si. Ta cuaha xaan ñiyivi sa sino iñi sa cahan ra ihya ñuu Efeso ta nacahnu Asia.

²⁷ Tatu tacuan cua cuu si, ta ma zata ca ñiyivi sa zavaha yo. Ta tatu cua zaña ñiyivi sa zacahnu ñuu sii vehe ñuhu ña Diana, ña vaha sa tacuan vatyi cahnu xaan ndyoo cuu ña. Vityi zacahnu tandihí ñiyivi nu cu si Asia ta tandihí ñiyivi ñuu ñiyivi sii ña. Ta nu cuahan quivi ma zacahnu ca ñuu sii ña tatu sino iñi ñu sa cahan ra Pablo. Catyi ra Demetrio.

²⁸ Ta sa siñi inga ra sa nacatyi ra ta i cuxaan xaan ra ta i cana saa ra ta catyi ra: Cahnu xaan ndyoo cuu ña Diana ña cu sitoho yo ñuu Efeso ya.

²⁹ Tacuan i cuu ta i cuvaa ñiyivi nacahnu ñuu cuan. I tiin ñu sii ra Gayo ta ra Aristarco. Uu tahan ra tahan ra Pablo cuu ra, ra ñuu Macedonia, ta sica noo ra sihin ra

Pablo. Ta i xita cañoho ñiyivi sii ra ndya nu cua cundaa tyiño.

³⁰ I cuñi ra Pablo cuhun ra nu cuvaa ñiyivi ta cahan ra sihin ñu, zoco ña saha inga ra sino iñi Tuhun Ndyoo.

³¹ Ta zuhva ra cu tyiño cuenda Asia, amigo ra Pablo cuu sii ra. Ta i tasi tucu ra cu tyiño cuan tyiño ta catyi ra vatyi ma cuhun ra Pablo.

³² Ta nu titahan ñiyivi iyo ñu cana saa minoo cuhva ta inga ñu cana saa inga cuhva vatyi cuaha xaan ñu cuvaa. Ta cuaha xaan ñu ñá sito ñu ñaa cuenda titahan ñu.

³³ Tacuan ta i tyaa ñiyivi hebreo sii minoo ra nañi Alejandro ityi nuu, ta i nacatyi ñu sihin ra ñaa sa cua cahan ra. Vatyi ñá sito tucu maa ra cuan ñaa sa cuu. Tacuan ta i saha ra Alejandro minoo zeña sihin ndaha ra vatyi cua cutaxi ñiyivi vatyi cuñi ra catyi ra vatyi ñahñi cuatyi ndyicuu ñiyivi hebreo. Zoco inga ñiyivi i cuvaa xaan ca ñu.

³⁴ Ta sa sito ñu vatyi ra hebreo cuu ra ta quisaha cana saa tandihí ñu vatyi ñá tahan iñi ñu. Tañi uu ora i cana saa ñu ta catyi ñu: ¡Cahnu xaan ndyoo cuu ña Diana ña cu sitoho yo ñuu Efeso ya! Tacuan ñi i cana saa ñu.

³⁵ Tacuan ta cuee ca i zacutaxi ra cu secretario sii ñiyivi ta i catyi ra: Ndoho ra ñuu Efeso, sito tandihí ñiyivi ñuu ñiyivi vatyi cumi vaha yo vehe ñuhu ña Diana vatyi cahnu xaan ndyoo cuu ña. Ta cumi yo sii ña vatyi i quisí ña ndya ityi zíqui ta i canacava ña.

³⁶ Yoñi ñiyivi cua catyi vatyi ña ndisa. Cutaxi ndo. Ta ñahñi ca sa zavaha ndo tatu ma nacañi vaha iñi ndo sa xihna ñi.

³⁷ Vatyi nduu tahan ra sindyaca ndo ihya, ñahñi cuatyi i zavaha ra, ta ñahñi ndya vaha ñi i cahan ra sii ndyoo yo.

³⁸ Yucuan cuenda catyi tatu cuatyi cuñi ra Demetrio ta inga ra zatyiño sihin ra. Cuu cutyihí ra

cuatyi saha ra nuu ra cu tysiño. Yucuan cuenda iyo ra juez ta iyo ra cu tysiño. Cuu zandaa ra sihin ra.

³⁹ Ta tatu inga tysiño cuñi ndo. Titahan tucu ndo cuhva catyi ley.

⁴⁰ Ta sa cuenda sa ndyicuu ndo vityi cuu tyaa ñiyivi cuatyi sata ndo nuu ra cu tysiño. Cuu catyi ñiyivi vatyi cuñi ndo cahñi tahan ndo sihin ra cu tysiño vatyi i titahan maa ndo tacuan ñi. Tatu cuñi ra cu tysiño coto ra ñaa cuenda cuvaa xaan ndo, ma ñihi yo cuhva cahan yo sihin ra. Tacuan i catyi ra secretario cuan.

⁴¹ Tacuan i catyi ra ta natasi ra sii ñu nacunuhi ñu ndya vehe ñu.

20

Yaha ra Pablo nu cu si Macedonia ta cuahan ra nu cu si Grecia

¹ Ta sa cutaxi ñiyivi ta ziqui i cana ra Pablo sii tandihí ñiyivi sino iñi Tuhun Ndyoo. I tahvi ra tysiño nuu ñu, ta saha ra tundyee iñi sii ñu. Ta ziqui i catyi ra vatyi cuhun ra. Ta i quita ra ta cuahan ra ndya nu cu si Macedonia.

² I saa ra nu cu si Macedonia, ta saha ra tundyee iñi sii ñiyivi sino iñi Tuhun Ndyoo. Ta ziqui cuahan ra Grecia.

³ Yucuan i ndoo ra uñi yoo, ta ziqui sa cuñi quihví ra barco ta cuhun ra nu cu si Siria, zoco i ñihi ra tuhun vatyi cuñi ñu hebreo, sa ñi sino iñi, cahñi ñu sii ra. Yucuan cuenda i sica iñi ra vatyi vaha ca cua cunuhi ra ityi nu ñuhu ndya nu cu si Macedonia.

⁴ Ihya cuu ra cutahan sihin ra. Ra Sópater, ra ñuu Berea cuu ra, ra Aristarco ta ra Segundo. Ra ñuu Tesalónica cuu nduu tahan ra. Ra Gayo, ra ñuu Derbe cuu ra ta ra Timoteo. Ra Tíquico ta ra Trófimo. Nduu tahan ra cuan i cacu nu cu si Asia.

⁵ Xihna ca tandihí maa ra cuahan ityi nuu ta ndatu ra sii ra Pablo ta sii mi ñuu Troas. (Ra Lucas cuu ra tyaa tutu ya.)

⁶ Maa ndi, i ñoho ndi zuhva ca quiví ñuu Filípos ndya sa yaha vico sa sasi ñiyivi pan ña ndaa, ta ziqui i quita ndi ñuu cuan sihin barco. Ta sa yaha ohon quiví ta ziqui i ñihi tahan ndi sihin inga ra ñuu Troas. Yucuan i ndoo ndi usa quiví.

Sindyehe ra Pablo nu yulu ñiyivi sino iñi ñuu Troas

⁷ Quiví tumingu i tatahan tandihí ñu sino iñi Tuhun Ndyoo. Sasi ñu pan ta sihi ñu ndutyu uva vatyi cua nacohon iñi ñu cuhva sihi ra Jesús sa cuenda ñu. Ta i zacuaha ra Pablo sii ñu cuhva ndya maañuu vatyi cua cuhun ra inga quiví.

⁸ I titahan ndi minoo vehe toto ndya ziqui nu cayu cuaha xaan lámpara (cuhva cuu ndyehe ndi).

⁹ Ta ndyaa minoo ra yoco, nañi ra Eutico, ventana vehe sa cu uñi toto cuan. Ta naha xaan i cahan ra Pablo ta cuñi xaan ra Eutico cuzura. Ta i quixi ra ta i canacava ra ndya nu ñuhu. Ta ndaha sihi ra, ta i naquihin ñu sii ra.

¹⁰ Tacuan ta i noo ra Pablo ndya nu candyaa ra. Ta sa cunumi ra sii ra ta i catyi ra sihin ñu sino iñi Tuhun Ndyoo: Ma yuhu ndo. Sa nandoto ra.

¹¹ Tacuan ta i nandaa tucu ra Pablo ndya ziqui cuan. Sasira sihin ñu, ta naha ca i zacuaha ra sii ñu cuhva ndya sa vasi cundisi. Ta ziqui cuahan ra.

¹² Ta ra yoco cuan, i nduvaha ra, ta cuanuhu ra ndya vehe ra. Ta zii xaan i cuñi tandihí ñiyivi.

Quita ra ñuu Troas ta cuahan ra ñuu Mileto

¹³ Ta maa ndi yatyi ca cuu ndi ñuu. Cuahan ndi sihin barco ndya ñuu Asón. Yucuan cua ñihi tahan ndi sihin ra Pablo, ta cua cuhun ra sihin ndi. Vatyi maa ra cuñi ra cuhun ra ityi nu ñuhu ndya ñuu Asón.

¹⁴ Ta sa ñihi tahan ndi sihin ra ñuu Asón, i quihví ra sisi barco ta cuahan ra sihin ndi ndya minoo

ñuhu mahñu tyañuhu. Nañi si Mitilene.

¹⁵ I quita tucu ndi yucuan, ta inga quiví i yaha ndi Quío, sa cuu inga ñuhu mahñu tyañuhu. Ta inga tucu quiví i saa ndi Samos minoo ñuhu mahñu tyañuhu. I quitatu ndi ñuu Trogilio nu cu si Asia ta inga quiví i saa ndi Mileto.

¹⁶ I yaha ñi ndi ñuu Efeso vatyi ñá cuñi ra Pablo ndoo ra naha Asia cuan. Tacuan i zavaha ra vatyi numi ra. Tatu cua cuu, cuñi ra zacahnu ra vico Pentecostés ndya ñuu Jerusalén.

Natuhun ra Pablo sihin ra ndyizo tyiño cuenda ñiyivi sino iñi ñuu Efeso

¹⁷ I cana ra Pablo sii ra ndyizo tyiño cuenda ñiyivi sino iñi ñuu Efeso ndya ñuu Mileto nu ndyaa ra.

¹⁸ Ta sa saa ra cuan i catyi ra Pablo sihin ra: Sa sito ndo yozo caa i cui ta sindyei sihin ndo quiví i sei sa xihna ñi Asia ya.

¹⁹ I zatyíño xein tyiño ra Ndyoo. Ñá zacahni sii. Cuihya xaan i cuñi añime sa ndyehi cuhva zavaha ñiyivi. I ndyehe xein tundoho ta cuaha xaan sa cuñi zavaha ñiyivi hebreo, ñu ña sino iñi cuan, sihin.

²⁰ Sito ndo vatyi ñá yuhi ta nacatyi sihin ndo tandihí cuhva ñaa sa cua tyindyee sii ndo. I zacuehi sii ndo nu titahan ndo. Ta i zacuehi sii ndo ndya vehe ndo.

²¹ I nacatyi sihin ñiyivi hebreo ta sihin inga ñiyivi vatyi cuñi si sa zama ñu cuhva iyo ñu. Nazandoo ñu cuatyi ñu ta nasino iñi ñu sii ra Jesucristo.

²² Ta vityi cuehin ñuu Jerusalén vatyi tacuan catyi Tatyí Ii sihin. Ñá site ñaa sa cua cuu sii yucuan.

²³ Zoco tandihí ñuu yehi catyi Tatyí Ii sihin vatyi cuaha xaan tundoho cua ndyehi ta cua quihi vehe caa.

²⁴ Zoco nu ña sica iñi sa cuenda cuan ta vazu cui ñahñi sa cuu. Cuñi xein zavehi tyiño saha ra Jesús sii.

Tacuan ta nduzii cuñi. Cuñi xein zacote cuhva saha xaan ra Ndyoo tumañi iñi sii ñiyivi.

²⁵ Ta sa i nacatyi xein sihin ndo cuhva ndyaca ñaha ra Ndyoo, ta site vatyi ma ndyehe ca ndo sii.

²⁶ Yucuan cuenda cuñi nacatyi sihin ndo vatyi yivi ca cuatyi mi cuu tatu ña cuñi ndo sino iñi ndo sii ra Jesús.

²⁷ Vatyi i nacatyi tandihí cuii sa cuñi ra Ndyoo zavaha ndo. Ñahñi sa i tyixehi.

²⁸ Yucuan cuenda zacuenda ndo sii ndo ta zacuenda ndo sii tandihí ñiyivi sino iñi Tuhun Ndyoo vatyi maa Tatyí Ii saha tyiño cuan sii ndo vatyi i zata ra Jesús sii ñiyivi sino iñi sii ra sihin niñi ra.

²⁹ Site vatyi tatu sa cuehin cua quasi inga ñiyivi, ta ma tahan iñi ñu sa sino iñi ndo Tuhun Ndyoo. Ta tañi zavaha ina nduvahu maña sii mvee tacyi tacuan cua zavaha ñu maña sii ndo.

³⁰ Ta cuhva ndya nu yulu maa ndo ta cua coo ñu zacuaha sa ña ndisa vatyi cuñi ñu sa cundyico ndo sii ñu.

³¹ Zacuenda xaan ndo sii ndo sihin ñu. Ta nacohon iñi ndo vatyi uñi cuiya i sindyei sihin ndo, ta i zacuehi sii ndo ñiyaca ta ndiyiyaca ndya cuhva sacu ñi que vatyi cuñi xein sa zavaha ndo sa vaha.

³² Ta vityi, yañi xaa, zandoi sii ndo sihin ra Ndyoo ta zandoi Tuhun ra sihin ndo vatyi cuñi xaan ra sii ndo, ta cuu cuhva ra tundyee iñi sii ndo. Ta cua cuhva ra tandihí sa cuñi ra cuhva ra sii ndo vatyi zehe ra sii ndo sihin tandihí ñiyivi sa zanduvaha ra añima.

³³ Ñá quihin xuhun ndo, ta nu zahma ta ñá sique sii ndo.

³⁴ Sito vaha ndo vatyi i zatyíne sihin ndehi ta ñihí tandihí sa siñi ñuhu sa cuenda mi ta sa cuenda ra ndihí sihin.

³⁵ Tandihí tyiemvu i zacuehi sii ndo vatyi cuñi si sa zatyíño ndo ta tyindyee ndo sii ñiyivi ndahvi ca. Nacohon iñi ndo vatyi zuun ñi maa

ra Jesú斯 i catyi: "Zii cua cuñi ndo tatu tyindyee ñiyivi sii ndo, zoco zii xaan ca cua cuñi ndo tatu tyindyee ndo sii ñiyivi."

³⁶ Ta sa ndihí cahan ra Pablo ta i sicuiñi siti tandihí ñiyivi ta i sica tahvi ra Pablo sii Ndyoo sa cuenda tandihí ñu.

³⁷ Ta tandihí ñu i sacu xaan ñu ta i sicunumi ñu sii ra Pablo ta sihi ñu xiti ra.

³⁸ Cuihya xaan cuñi ñu vatyi sa catyi ra vatyi ma ndyehe ca ñu sii ra. Ta ziqui i sindyaca ñu sii ra ndya nu ndyaa barco.

21

Cuahan tucu ra Pablo ñuu Jerusalén

¹ Ta zandoo ndi sii ñiyivi ñuu Efeso ta cuahan ndi sihin barco. Ta sa ndoo ñu cuahan ndi ta saa ndi minoo ñuhu mahñu tyañuhu nañi si Cos. Ta inga quivi cuahan ndi inga ñuhu mahñu tyañuhu sa nañi Rodas. Ta yucuan i quita ndi ta cuahan ndi ñuu Pátara.

² Ta ñuu Pátara cuan i quihví ndi inga barco, yutu cuahan nu cu si Fenicia. I quihví ndi sii tu ta cuahan ndi.

³ Ta sa yaha ndi, ndyehe ndi minoo ñuhu luhlu nañi si Chipre. I yaha ndi sii si ityi siyo zatyi ndi ta cuahan ndi ndya nu cu si Siria. Ta ziqui cuahan barco ñuu Tiro vatyi cua zandoo tu carga. Ta yucuan cuenda i ndoo ndi ñuu Tiro cuan.

⁴ I nanducu ndi sii ñiyivi sino iñi Tuhun Ndyoo, ta i ndoo ndi sihin ñu usa tahan quivi. Ta maa ñu i nacatyi ñu sihin ra Pablo vatyi ña vaha cuhun ra ñuu Jerusalén vatyi tacuan catyi Tatyi II sihin ñu.

⁵ Zoco sa ndihí sa usa quivi cuan ta i quita ndi. Tandihí ñiyivi sino iñi Tuhun Ndyoo ta ñu zihí ta sa ndyihi i cutahan ñu sihin ndi i sindyaca ñu sii ndi ndya yuñuu cuan. Ta i sicuiñi siti ndi yuhu tyañuhu ta sica tahvi ndi sii Ndyoo.

⁶ Tacuan ta i nacahan ndi sihin ñu. I quihví ndi barco ta cuanuhu tandihí ñu ndya vehe ñu.

⁷ I quita ndi ñuu Tiro ta cuahan ndi ñuu Tolemaida. Ta yucuan i zandoo ndi barco ta i sahan ndi nu ndyaa ñiyivi sino iñi Tuhun Ndyoo yucuan. Minoo ñi quivi i ndoo ndi sihin ñu.

⁸ Ta inga quivi i quita ra Pablo ta tandihí ndi, ra ndihí sihin ra, ta cuahan ndi ñuu Cesarea. Yucuan i saa ndi vehe minoo ra sa nacatyi xaan Tuhun Ndyoo sihin ñiyivi. Nañi ra Felipe. Maa ra cuu minoo sa usa tahan ra i casi ñiyivi vatyi cua tyindyee ra sii ra apóstol.

⁹ Ta iyo cumi tahan zehe zihí ra Felipe. Ñu yoco cuu ñu. Ta i zaha ñu profetizar.

¹⁰ Ta sa yucu ndi ñuu cuan zuhva quivi ta i saa minoo ra ndya nu cu si Judea. Nañi ra Agabo. Ta i zaha tucu maa ra profetizar.

¹¹ I quisí ndyehe ra sii ndi. Ta sa i saa ra i quihin ra ñii ñoho sisi ra Pablo ta i sihñi ra saha ra ta i sihñi ra ndaha ra ta i catyi ra: Catyi Tatyi II vatyi ñuu Jerusalén cua cunuhñi sitoho ñii ya tañi nuhñi mi, ta cua cuhva ñu sii ra sii ñiyivi sa yivi ñiyivi hebreo cuu.

¹² Ta sa siñi ñiyivi sa cahan ra cuan ta maa ndi ra ndihí sihin ra Pablo ta ñiyivi ñuu Cesarea i catyi xaan ndi sihin ra Pablo vatyi sa ndyoo ñi ma cuhun ra ñuu Jerusalén.

¹³ Zoco i catyi ra Pablo: ¿Ñacu sacu xaan ndo? ¿Ñaa cuenda saha ndo tucuihya iñi sii? Vatyi yuhvi sa ndyaa listi yivi sa cunuhñi ñi sehi ta vazu cui ñuu Jerusalén sa cuenda ra Jesú斯 vatyi maa ra ndyaca ñaha sii.

¹⁴ Tacuan i catyi ra, ta ñá cuu zama ndi cuhya sica iñi ra. Yucuan cuenda i zandoo ndi tyiño cuan ta catyi ndi: Nazavaha maa ra Ndyoo cuhva cuñi ra.

¹⁵ Ta ziqui i tyihi vaha ndi ndaha tyiño ndi ta cuahan ndi ñuu Jerusalén.

¹⁶ Cuahan zuhva ra ñuu Cesarea sihin ndi, ra sino iñi Tuhun Ndyoo. Ta cuahan minoo ra ñuu Chipre. Mnasón nañi ra. Sa iyo cuiya sino iñi ra sii ra Jesús. Vehe ra Mnasón sindyaca ra cuan sii ndi vatyi cua cundyaa noo ndi sihin ra nu iyo vehe ra ñuu Jerusalén.

Natuhun ra Pablo sihin ra Jacobo

¹⁷ Ta sa saa ndi ñuu Jerusalén zii xaan i cuñi tandihí ñu sino iñi Tuhun Ndyoo sa ndyehe ñu sii ndi.

¹⁸ Ta inga quivi sahan ndi sihin ra Pablo vatyi cua natuhun ra sihin ra Jacobo. Ta i titahan tandihí ra ndyizo tyiño sa cuenda ñiyivi sino iñi.

¹⁹ Ta i catyi ra Pablo: Nacumi sii maa ndo. Ta ziqui i nacatyi ra tandihí cuii cuhva i zavaha ra Ndyoo. Ta i saha ra cuenda yozo caa i tyizoho ñiyivi sa yivi ñiyivi hebreo cuu Tuhun Ndyoo tandihí ñuu nu sahan ra.

²⁰ Ta sa siñi ñu cuhva cuan i zacahnu xaan ñu sii Ndyoo. Ta i catyi ñu sihin ra Pablo: Vaha yañi xaa, zoco sa siton vatyi iyo cuaha xaan ñiyivi hebreo sa sino iñi sii ra Jesús vityi. Tandihí ñu catyi vatyi ñiñi xaan cua cundyico yo tandihí ley saha ra Moisés.

²¹ Ta catyi xaan ñiyivi sihin ñu vatyi moo zacuaha sii tandihí ñiyivi hebreo, ñu iyo ñuu nu iyo inga ñiyivi, vatyi nazaña ñu tandihí costumbre i saha ra Moisés. Catyi ñu vatyi moo catyi sihin ñu vatyi ma tahndya ca ñii xiñi xuu lee ta ma zavaha ca ñu costumbre sahnu ñu.

²² Yucuan cuenda ña ñihi ndi cuhva ñaa sa cua zavaha yo vatyi cua titahan ñiyivi tatu sa ñihi ñu tuhun vatyi saa ndo.

²³ Yucuan cuenda vaha tatu cua zavohon cuhva catyi ndi. Iyo cumi tahan ra tahan yo ihya. Cua zavaha ra minoo cuhva sa catyi ra sihin Ndyoo.

²⁴ Ta catyi maa ndi vatyi vaha xaan tatu cua cuhun sihin ra vehe

ñuhu hebreo. Ta cua coo ica moo sihin ra sa cuenda ra Ndyoo. Cua tyiyahvun yahvi cuenda mvee ticiayi sa cua cahmi ra sa cua cuhva ra sii Ndyoo. Ta cua zatya tyehe xiñi ra cuhva iyo costumbre. Tacuan ta cua coto ñiyivi sii yo vatyi yivi sa ndisa cuu sa cahan ñiyivi sa cuendon. Cua ndyehe ñu vatyi cumi vaha moo costumbre maa yo.

²⁵ Ta sa cuenda ñiyivi sa yivi ñiyivi hebreo cuu ta sino iñi ñu Tuhun Ndyoo. Sa tyaa ndi carta sii ñu ta catyi ndi vatyi ma caca ifi ñu cuenda costumbre hebreo. I catyi ndi maa ñi sa ma casi ñu coño sa saha ñiyivi sii inga ndyoo. Ma casi ñu ñiñi quiti ta ma casi ñu coño quiti tatu ñá sati vaha niñi ti. Ta ñá vaha cua coo minoo ñaha sihin ndya vaha ñi rayii tatu yivi yii ñu cuu. Ta tacuan tucu rayii. Tacuan i catyi ra cuan sihin ra Pablo.

Tiin ñiyivi sii ra Pablo vehe ñuhu hebreo

²⁶ Tacuan cuu ta i quihin ra Pablo sii sa cumi tahan ra cuan. Ta inga quivi cuahan ra vehe ñuhu hebreo vatyi cua coo ica ra sa cuenda ra Ndyoo. Cuahan ra vehe ñuhu hebreo vatyi cua zacoto ra sii ra cu zutu hebreo ñaa quivi cua ndihi sa coo ica ra ta ñaa quivi cua cuhva ra ofrenda sii ra Ndyoo (vatyi tacuan i cuu costumbre sii ñiyivi hebreo).

²⁷ Zoco sa cuñi ndihi ra sihin sa usa quivi sa iyo ica ra ta i quisí minoo ityi ñiyivi hebreo, ñu ña sino iñi, ñu Asia ta i ndyehe ñu sii ra Pablo sisi vehe ñuhu hebreo, ta i zacuваа ñu sii ñiyivi. Ta i tiin ñu sii ra Pablo.

²⁸ I cana saa ñu ta catyi ñu: Ñiyivi ñuu Israel, tyindyee ndo sii ndi. Ra ihyá cuu ra zacuaha sii tandihí ñiyivi ñuu ñiyivi ta catyi ra vatyi ña vaha ley saha ra Moisés ta ñahñi tyindyee vehe ñuhu ya. Ta vityi i tyihi ra sii ra griego vehe ñuhu ya ta zatiivi ra ihya ta ii xaan cuu ihya. Ta

ñña zacahnu ra sii ra Ndyoo sa ndisa cuii.

²⁹ Tacuan i cahan ñu vatyi sa ndyehe ñu vatyi ndihí ra Trófimo ra ñuu Efeso sihin ra Pablo si ñuu ta sica iñi ñu vatyi sindyaca ra Pablo sii ra sisi vehe ñuhu hebreo, zoco ña tacuan.

³⁰ Tacuan ta i quisaha cuvaa tandihí ñiyivi, ta i cacono ñiyivi ndya vehe ñuhu cua ndyehe ñu ñaa sa cuu. Ta yucuan i tiin ñu sii ra Pablo ta i xita cañoho ñu sii ra cuhva ndya sata vehe ñuhu ta ta sica ñi i nacazi ñu yuvehe.

³¹ I cuñi ñu cahñi ñu sii ra ta i saa tuhun cuan ndya nu ndyaa ra cu nuu sii minoo mil zandaru vatyi i cuvaa nacahnu ñuu Jerusalén.

³² Ta ta sica cuii ñi i quihin ra cu nuu sii zandaru sii inga ra ñiñi cuenda zandaru sihin zandaru ra. Ta i cacono tandihí ra ndya nu yucu tuu ñiyivi. Ta sa ndyehe ñiyivi vatyi vasi zandaru ta i zaña ñu sa cañi ñu sii ra Pablo.

³³ I tuhya ra cu nuu cuan nu ndyaa ra Pablo, ta i tava ra tyiño vatyi cua tiin zandaru sii ra ta cua cuhñi ra sii ra sihin uu tahan cadena. Ta ziquí i ndaca tuhun ra cu nuu sii ra Pablo yoo ra cuu ra. Ta i ndaca tuhun ra ñaa cuatyi i zavaha ra.

³⁴ Zoco i cana saa xaan ñiyivi. Ziin ziin cuhva cahan ñu ta ñá siñi ra cu nuu sa cahan ñu vatyi cuvaa xaan ñu. Ta ziquí i tava ra tyiño sii zandaru vatyi cundyaca ra sii ra Pablo ndya vehe nu ndyaa zandaru.

³⁵ Ta sa saa zandaru nu iyo cuayu yuvehe ra ta i cañihi ra sii ra Pablo ndyizo ra vatyi i nduxaan xaan ñiyivi.

³⁶ Ndyico tandihí ñu sii ra ta cana saa ñu: ¡Nacuu ra cuan! Catyi ñu.

Nacatyi ra Pablo cuhva i zavaha ra

³⁷ Sa cua quihvi ra sisi vehe ra zandaru ta i quisaha cahan ra Pablo sihin ra cu nuu sii zandaru ta catyi ra: Cuñi quehin minoo tuhun

suhun. Ta iyo xaan i cuñi ra cu nuu ta catyi ra: Aan, ziquí cuu cahan moo zahan griego.

³⁸ Vaziqui yivi yoho cuu ra i quisi ndya Egipto, ra cuñi cahñi tahan sihin ra ndyaca ñaha quiví cuan, ra i zandu-iñi sisi cuhu cumi mil ra cahñi sii ñiyivi.

³⁹ Tacuan i cahan ra ta i catyi ra Pablo: Yivi yuhvi. Ra hebreo cui. Ra ñuu Tarso sa iyo cuenda Cilicia cui. Cahnu xaan ñui. Sa ndyoo ñi cuhvon minoo tumañi iñi sii, naquehin sihin ñiyivi yulu ihya.

⁴⁰ I saha ra cu nuu cuan permiso vatyi cahan ra Pablo. Ta i sicuiñi ndyaa ra Pablo nu iyo cuayu ta saha ra zeña sihin ndaha ra vatyi cua cutaxi ñiyivi. Ta sa cutaxi ñu ta ziquí i cahan ra sihin ñu sihin zahan hebreo. Zahan cahan maa ñu cuu si cuan. Ta catyi ra:

22

¹ Ndoho tata sahnu ta ndoho yañi xaa, tyizoho ndo tuhun cua quehin sihin ndo vityi vatyi ñahñi cuatyi i zavehi. Catyi ra.

² Ta sa siñi ñiyivi vatyi cahan ra zahan hebreo ta i cutaxi ca ñu. Ta i catyi ra Pablo.

³ Ra hebreo cui tañi maa ndo. I caquí ñuu Tarso, ñuu iyo cuenda Cilicia, zoco ñuu ya i sahnu mi vatyi i zacuehi sihin ra sahnu Gamaliel. Vaha xaan i zacuaha ra sii, cuhva iyo ley sa cuenda ñiyivi sahnu sii yo. Tandihí quiví sica iñi cuhva cua tyei yahvi sii Ndyoo sihin tandihí cuii añime tañi sica iñi tucu maa ndo.

⁴ Ta quiví cuan i sahñi tahan xein sihin ñiyivi sino ifi sii ra Jesú, ta iyo ñu i sahñi. Ta i quihin sii rayii ta sii ñu zhi, ta i tyihi sii ñu vehe caa.

⁵ Sa ndaa cuu ra cu nuu sii zutu sihin tandihí ra sahnu vatyi maa ra cuu ra i saha tutu sii, sa sindyize ta sehin nu ndyaa ra hebreo yañi yo ñuu Damasco. Sehin sa nanduqui sii ñu sino iñi sii ra Jesú cua quisi

ndyaque sii ñuu ihyá ñuu Jerusalén vatyi cua ndoho ñuu.

Nacatyi ra Pablo yozo caa i zama cuhva iyo ra

⁶ Ta cuehin ta maa ora sa cuñi sei ñuu Damasco. Ta ta sica ñi i quituu minoo ñúhu ndisi xaan. Siconduu si sii.

⁷ I nduve nu ñuhu. Ta ziquí i siñi sa cahan minoo ra cahan ta catyi ra: "Saulo, Saulo. Ña vaha sa cahñi tohon sihin mi," catyi ra.

⁸ Ta i ndaca tuhin ta catyi: "¿Yoo ra cuun, tata?" Ta i catyi ra: "Yuhvi cui ra Jesús, ra ñuu Nazaret. Sihin mi sahñi tohon." Catyi ra Jesús.

⁹ I yuhu xaan ra ndíhi sihin vatyi ndyehe ra ñúhu cuan, zoco ña siñi ra sa cahan ra cahan sihin.

¹⁰ Tacuan ta i catyi: "¿Ñaa sa cuñun zavehi tata?" Ta i catyi ra Jesús: "Nduviton ta cuhun ñuu Damasco. Indyacuan cua nacatyi ñiyiví suhun tandíhi sa cua zavohon."

¹¹ Zoco ñá cuu ndyehi. Ndaha i cuei zacuu ñuhu cuan. Yucuan cuenda i tñin ra ndíhi sihin ndehi, ta i sindyaca ra sii ndya ñuu Damasco.

¹² Yucuan iyo minoo ra nañi Ananías. Zacahnu ra sii Ndyoo tañi catyi ley saha ra Moisés. Tandíhi ñiyiví hebreo iyo yucuan catyi ñu vatyi ra vaha xaan cuu ra.

¹³ Saa ra Ananías nu ndyei ta i quisaha catyi ra: "Yoho yañi Saulo, cua ndundisi tucu ndyehun vityi." Catyi ra. Ta zuun ñi caa cuhva cuan i ndundisi tucu ndyehi. Ta i cuu ndyehi sii ra Ananías.

¹⁴ Ta i catyi ra sihin: "Ndya ta sa naha ta cuhva ndya vityi i zacahnu ñiyiví sahnu sii yo sii ra Ndyoo, ta zuun ñi maa ra i casi suun ta tyiemvu vatyi cua coton ñaa sa cuñi ra zavohon ta cua ndyehun sii ra Jesús, ra ñahñi cuatyi iyo. Ta i saha ra Ndyoo sa cuiñi moo tuhun cahan ra suhun.

¹⁵ Ta vityi cua nacatyun sihin ñiyiví nacahnu ñuu ñiyiví cuhva iyo

ra. Cua nacatyun tandíhi sa i ndye-hun ta tandíhi sa i tyizohon.

¹⁶ Ta vityi ma cuatu con. Nduviton ta coo ndutyon cuenda ra Jesús. Ta cua zandasi ra cuatyun."

Nacatyi ra Pablo cuhva i sahan ra inga ñuu nu iyo ñiyiví sa yiví ñiyiví hebreo cuu

¹⁷ Tacuan i tahan si sii tañi sa nacatyi sihin ndo ta ziquí i quisi nanuhi ndya ñuu Jerusalén ya. Se-hin vehe ñuhu hebreo cua caca tahví sii Ndyoo, ta i ndyehi sii ra Jesús.

¹⁸ Ta i cahan ra sihin ta catyi ra: "Zanumon, ta quiton yatyi ñi ñuu Jerusalén. Vatyi ma sino iñi ñiyiví ya sa nacatyun sihin ñu sa cuenda mi."

¹⁹ Tacuan ta i catyi sihin ra: "Tata, sito ñiyiví vatyi i sehin tandíhi vehe ñuhu hebreo. Ta i tñin sii ñiyiví sino iñi suun, ta i tyihi sii ñu vehe caa. Ta i cañi sii ñu.

²⁰ Ta sito ñiyiví cuhva i sihi ra Esteban, ra i cahan xaan sa cuenda moo. Ta sito ñu vatyi tahan xaan iñi sa sahñi ñiyiví sii ra. Ta yuhvi cuu ra i sicumi zahma ndisi ra sahñi sii ra."

²¹ Zoco i catyi tucu ra Jesús sihin: "Cuahan vityi vatyi mi tava tyiño suun sa cohon sa cuenda mi, ta cua cuhun nu sica ca nu iyo inga ñiyiví, ñu yiví ñiyiví hebreo cuu." Tacuan i nacatyi ra Pablo sa cahan ra sihin ñiyiví yuvehe nu ndyaa zandaru.

Cuhva i zavaha ra cu nuu sii zan-daru sihin ra Pablo

²² I tyizoho ñiyiví sa cahan ra Pablo sa xihna ñi, zoco ñá tyi-zoho ca ñu sa quisaha cahan ra sa cuenda inga ñiyiví, ñu yiví ñiyiví hebreo cuu. I quisaha cana saa ñu ta catyi ñu: ¡Nacuu ra ya vatyi yiví sa vaha zavaha ra!

²³ I cana saa ñu, ta i zavico ñu zahma ñu, ta i cañi ihno ñu ñiyitítyi ziquí.

²⁴ Tacuan ta i catyi ra cu nuu sii zandaru vatyi nacundyaca zandaru sii ra Pablo sisi vehe. I catyi

ra cu nuu sihin inga zandaru vatyi cua cañi ra sii ra sihin cuarta ndya cua nacatyi ra ñaa cuenda cana saa xaan ñiyivi. Cuñi ra cu nu coto ra ñaa cuatyi cuñi ñu sihin ra Pablo.

²⁵ I sihñi zandaru sii ra Pablo sihin minoo yutu sihin ñii. Ta ziñui i quisaha catyi ra Pablo sihin minoo ra cu capitán: Ña saha ley ndo sa cañi ndo sii minoo ra ñuu Roma. Ta tañaha ca cuhin nuu ra juez, ndihíca.

²⁶ Ta sa siñi ra capitán sa cahan ra Pablo ta cuahan ra nu iyo ra cu nuu sii zandaru ta catyi ra: Zacuendon cuhva zavohon vatyi ra yucuan, ra ñuu Roma cuu ra.

²⁷ Tacuan ta cuahan ra cu nuu sii zandaru nu ndyaa ra Pablo ta i ndaca tuhun ra sii ra ta catyi ra: ¿Atu ndisa cuii vatyi ra ñuu Roma cuun? Ta i catyi ra Pablo: Zuun.

²⁸ Ta ziñui i catyi ra cu nuu sii zandaru: Cuaha xaan xuhun i tyiyahvi ta i ndui ra ñuu Roma. Ta i catyi ra Pablo: Yuhvi, ra cuenda ñuu Roma cui vatyi i caqui minoo ñuu nu ndyaca ñaha ñuu Roma.

²⁹ Tacuan i catyi ra Pablo, ta yatyi xaan i zandihí zandaru tuhun sa cua cañi ra sii ra. Ta i yuhvi xaan ra cu nuu sii zandaru sa sito ra vatyi ra ñuu Roma cuu ra Pablo. Ta sa saha ra sa cuhñi zandaru sii ra.

Sahan ra Pablo nuu tandihí ra ñiñi hebreo

³⁰ Cuñi ra cu nuu sii zandaru coto ra ñaa cuatyi cuñi ñiyivi hebreo sihin ra Pablo. Yucuan cuenda inga quivi i zatitahan ra sii ra zutu nahnu sihin tandihí inga ra ñiñi. Tacuan ta i ndasi zandaru sii ra Pablo ta sindyaca ra sii ra nu titahan ra cuan.

23

¹ Ta sa saa ra Pablo nu yucu ra cuan, ta i ndyehe ra sii tandihí ra hebreo, ra ñiñi ñuu cuan, ta i catyi ra sihin ra: Tandihí ndoho tata sahnu, yuhvi catyi vatyi iyo vehi sa cuenda ra Ndyoo ndya cuhva ndya

vityi vatyi ñahñi cuatyi i zavehi. Tacuan i catyi ra Pablo.

² Tacuan ta i catyi ra Ananías, ra cu nuu sii ra cu zutu, sihin ra ndyaa yatyi ñi nu nandyaa ra Pablo vatyi cua cati ra yuhu ra Pablo.

³ Tacuan i cuu ta i catyi ra Pablo sihin ra cu nuu sii ra cu zutu: Yoho, zaha xoon tuhun vatyi vaha xoon, zoco ña ndisa. Cua zandyeha ra Ndyoo tundoho suun. Ihya ndyoon ta catyun vatyi cua tasi tuñun sii, cuhva catyi ley. Ta ¿ñaa cuenda catyun vatyi cua cati ra cuan yuhi? Ñahñi cuhva sa tacuan catyi ley.

⁴ Tacuan i cahan ra Pablo ta i catyi inga ra yucu yucuan: Ña vaha cohon ndya vaha ñi sihin ra cu nuu sii ra cu zutu vatyi ra zatyiño tyiño Ndyoo cuu ra.

⁵ Ta ziñui i catyi tucu ra Pablo sihin tandihí ra: Yañi xaa, ñá site vatyi ra cu nuu sii ra cu zutu cuu ra. Tatu sa site ma quehin tacuan vatyi catyi Tuhun Ndyoo vatyi ma cahan yo ndya vaha ñi sihin ra ndyaca ñaha sii yo.

⁶ Tacuan i cuu ta ziñui i nacoto ra Pablo vatyi ziiñ ziiñ iyo cuhva sii ra cu tyiño cuan. Zuhva ra iyo cuenda ley saduceo ta inga ra cuu cuenda ley fariseo. Ña inuu ñi sino iñi ra. Yucuan cuenda i cana saa ra Pablo nu yucu ra ta catyi ra: Ndoho tata sahnu ta ndoho yañi xaa, yuhvi ra fariseo cui. Ta ra fariseo i cuu zuti. Cua tasi tuñi ndo sii, ihya saha sa vatyi sino iñi vatyi cua nandoto tucu ñiyivi i sihi.

⁷ Ta sa catyi ra Pablo tacuan ta ta sica ñi i quisaha natuhun tahan ra fariseo sihin ra saduceo, ta ñá ndu-iin ra.

⁸ Catyi ra saduceo vatyi ma nandoto tucu ñiyivi tatu sa i sihi ñu ta yoñi ángel Ndyoo iyo ta ñahñi tatyi cuihna iyo catyi ra cuan. Ra fariseo cuu ra catyi vatyi cua nandoto tucu ñiyivi i sihi. Ta iyo ángel Ndyoo ta iyo tatyi cuihna cuñi ra. Tacuan

cuu ta ñá ndu-iiñ ra sihin ra tahan ra.

⁹ Tacuan ta ziquí saa xaan i nduu cahan tandihí ra, ta zuhva ra fariseo, ra cu maestro cuenda ley, i nduvita ra ta ñíhi xaan cahan ra ta catyi ra: Ñahñi cuatyí i zavaha ra ya. Vaziquí cahan minoo ángel sihin ra. Tatu tyaa yo cuatyí sata ra sahñi tahan yo sihin Ndyoo. Catyi ra.

¹⁰ Ñíhi ca i nduu sahñi tahan ñiyívi. Nama tahan ra sii ra Pablo, ta i yuhu xaan ra cu nuu sii zandaru coto cahñi ra sii ra Pablo. Yucuan cuenda i tasi ra sii zandaru cua tava sii ra Pablo ticui ñiyívi cuan ta cundyaca ra sii ra ndya vehe zandaru.

¹¹ Tacuan i cuu si. Ta zuun ñíquívi cuan ta sa cuua i quituu ra Jesús nuu ra Pablo. I quisi ra nu ndyaa ra Pablo ta catyi ra sihin ra: Zandyen iñun. I cohon sa cuenda mi ihyá ñuu Jerusalén, ta cua cahan tucun cuenda mi ñuu Roma.

Ndu-iiñ ra hebreo vatyi cua cahñi ra sii ra Pablo

¹² Inga quívi i ndu-iiñ ra hebreo vatyi cua cahñi ra sii ra Pablo. I sihñi tahan ra tuhun sihin ra tahan ra ta catyi ra: Ma casi maa yo ta ma coho yo ndya cuhva ndya cahñi yo sii ra Pablo. Cua cahñi yo sii ra vazu cuxaan ra Ndyoo sii yo.

¹³ Yaha uu xico tahan ra ndu-iiñ sa tacuan.

¹⁴ Tacuan ta cuahan ra nu iyo ra zutu nahnu ta catyi ra sihin ra: Sa sihñi tahan ndi tuhun vatyi ñahñi maa cua casi ndi cuhva ndya cahñi ndi sii ra Pablo. Cua cahñi ndi sii ra vazu cuxaan ra Ndyoo sii ndi.

¹⁵ Ta maa ndo ta ra mandoñi cuñi si sa tasi ndo tysiño nu ndyaa ra cu nuu sii zandaru vatyi cua quisi ndyaca ra sii ra Pablo nuu ndo ihyá. Catyi ndo vatyi cua nducu tuhun vaha ndo sii ra. Cua cundyaa listo maa ndi tysiño vasi ra ta cua cahñi ndi sii ra cuee ca sa saa ra ihyá. Tacuan i catyi ra cuan.

¹⁶ Tacuan i cuu si, ta i siñi minoo zasi ra Pablo, zehe cuhva ra, cuhva cahan ra cuan yozo caa cua cahñi ra sii ra Pablo. Ta cuahan ra ndya vehe zandaru cua nacatyí ra sihin ra Pablo.

¹⁷ Tacuan ta i cana ra Pablo sii minoo ra cu capitán ta catyi ra sihin ra: Zavohon minoo tumañi iñi sii sa ndyoo ñi. Cundyacon sii ra luhlu ya nuu ra cu nuu vatyi iyo sa cua nacatyí ra sihin ra.

¹⁸ I quihin ra capitán sii ra sindyaca ra sii ra nu iyo ra cu nuu sii zandaru ta i catyi ra capitán sihin ra cu nuu: Ra Pablo, ra ñoho vehe cua, i cana sii, ta catyi ra vatyi quisi ndyaque sii ra luhlu ya vatyi iyo sa cua nacatyí ra suhun.

¹⁹ Ta ziquí i tiñ ra cu nuu sii zandaru ndaha ra luhlu cuan ta sahan ra ndya zava. Ta i ndaca tuhun ra sii ra: ¿Ñaa sa cuñun nacatyun sihin?

²⁰ Ta i quisaha nacatyí ra luhlu cuan sihin ra ta catyi ra: Sa ndyaa tuhun sa cua caca ra hebreo tumañi iñi suun. Cuñi ra sa cuhun ra Pablo ityaan nu cua titahan ra cu tysiño. Cua catyi ra vatyi cuñi ra sa cua ndaca tuhun vaha ca ra sii ra Pablo.

²¹ Ma tyoon yahvi sa cahan ra vatyi yaha uu xico tahan ra cua quíhi xehe ta cua cuatu ra sii ra Pablo ityi cuhun ra. Sa sihñi tahan tandihí ra tuhun sa ma casi ra ta ma coho ra ndya cuhva ndya cahñi ra sii ra Pablo. Sa ndyaa listo ra vatyi sica iñi ra vatyi cua cuhva moo sa cuhun ra Pablo nu titahan ra cu tysiño. Tacuan i nacatyí ra luhlu cuan sihin ra cu nuu.

²² Ta ziquí i catyi ra cu nuu sihin ra: Ma nacatyun nu sihin minoo ñiyívi tuhun sa zacoton sii vityi. Ta ziquí i natasi ra sii ra luhlu cuan.

Tasi zandaru sii ra Pablo nu iyo ra gobernador Félix

²³ Tacuan ta i cana ra cu nuu sii zandaru sii uu tahan ra cu capitán ta catyi ra sihin ra: Cua tyihi vaha

ndo ndaha tysiño ndo vatyi cua cuhun ndo ñuu Cesarea. Caa iin sa sa cuaa cua quita ndo ihya. Uu ziendu zandaru cua cuhun sihin saha ra, inga uñi xico usi tahan ra cua cozo ra caballo, ta inga uu ziendu ra cua cuñaa ra lanza iñu ta cuhun ra.

²⁴ Cuhva ndo uu a uñi tahan caballo cozo ra Pablo vatyi sica xaan nu cuhun ra ta cucumi vaha ndo sii ra ndya cua saa ra nuu ra gobernador Félix. Tacuan i catyi ra sihin ra.

²⁵ Ta ziqui i tyaa ra cu nuu sii zandaru minoo carta cua tasi ra sii ra Félix. Ihya cuu sa catyi ra nuu carta cuan:

²⁶ “Nacumi suun tata gobernador Félix catyi yuhvi ra Claudio Lisiás.

²⁷ Ihya cuu minoo cuhva cuñi quehin suhun. I tiñi ñiyiví hebreo sii ra ya ta cuñi ñu cahñi ñu sii ra. Zoco i ñihi tuhun vatyi ra ñuu Roma cuu ra, ta yucuan cuenda i tasi zandaru ta i zacaqui sii ra.

²⁸ Cuñi cote ñaa cuu cuatyti tyaa ñiyiví hebreo sata ra. Yucuan cuenda i sindyaque sii ra nu titahan ra ndyaca ñaha sii ñiyiví hebreo.

²⁹ Ta yucuan i site vatyi tyaa ra cuatyti sata ra cuenda ley hebreo fi. Ñahñi cuatyti zavaha ra ta cahñi yo sii ra sa cuenda ley maa yo. Ta nu ñahñi sa zavaha ra ta tyihi yo sii ra vehe caa.

³⁰ Zoco i ñihi tuhun vatyi sa sica iñi ra hebreo cuhva cahñi ra sii ra. Yucuan cuenda tasi sii ra nu ndyoon, ta i catyi sihin ñiyiví hebreo vatyi cua quasi nacatyti ra sihin moo ñaa cuu cuatyti cuñi ra sihin ra. Tacuan ñi tyei vityi.” Ta tacuan i ndihí carta i tyaa ra Claudio.

³¹ Tacuan ta i quihin zandaru ityi cuahan ra cuhva sa catyi ra Claudio sihin ra. I quihin ra sii ra Pablo sa sa cuaa ta i sindyaca ra sii ra ndya ñuu Antípatris.

³² Ta inga quivi cua nanuhu zandaru, ra sahan sihin saha ra, ta

maa ñi ca ra yozo caballo cuahan sihin ra Pablo.

³³ Ta sa saa ra ñuu Cesarea i saha ra carta i tasi ra Claudio sii ra gobernador Félix, ta i nacuhva cuenda ra sii ra Pablo sii ra.

³⁴ I cahvi ra gobernador cuan carta cuan. Ta ziqui i ndaca tuhun ra ndya cuu ñuu ra Pablo. Ta sa sito ra vatyi ra cuenda Cilicia cuu ra.

³⁵ Ta ziqui i catyi ra sihin ra Pablo: Ndyo quasi xihna ra tyaa cutatyti saton ta ziqui cuatyzohi ñaa sa cua catyun sihin. Tacuan i cahan ra ta ziqui i catyi ra vatyi cua cucumi zandaru sii ra sisi vehe tysiño i zandaa ra Herodes ta sa naha.

24

Cuhva i nacatyti ra Pablo nuu ra Félix

¹ I yaha ohon quivi ta ziqui i saa ra Ananías, ra cu nuu sii ra cu zutu. I saa ra ñuu Cesarea sihin inga uu, a uñi tahan ra sahnu ca ta sihin minoo ra nañi Tértulo. Ra Tértulo cutahan sihin ñiyiví hebreo ta tyaa ra cuatyti sata ra Pablo vatyi sito xaan ra Tértulo ley romana. Ta cua cuu ra yuhu ra hebreo cuan tañi minoo abogado. Ta cua tyiyahvi ra hebreo sii ra. Cuahan tandihí ra nuu ra gobernador Félix vatyi cua tyaa ra cuatyti sata ra Pablo.

² Ta ziqui i tasi ra Félix tysiño vatyi cua quasi ndyaca zandaru sii ra Pablo. Ta sa i saa ra i quisaha tyaa ra Tértulo cuatyti sata ra. I catyi ra Tértulo sihin ra Félix: Tata Félix, nacuhva ndi tyahvi ndyoo suun vatyi vaha xaan iyo ndi. Sito xaan moo ta yucuan cuenda iyo sa taxi ñi vityi tandihí ñuu nu iyo ndi. Vaha xaan ndyaca ñohon.

³ Tandihí nduhvi ra hebreo nacuhva ndi uu xico tyahvi ndyoo suun. Ta zacahnu xaan ndi suun tata Félix.

⁴ Ta vityi zandyeun iñun zuhva ta tyizohon minoo tuhun cua cahan ndi vatyi ña naha xaan cua cahan ndi.

5 Sa ñihi ndi cuhva vatyi yivi ra vaha cuu ra Pablo ya. Zayanga xaan ra vatyi zacuvaa ra sii ñiyivi hebreo nacahnu ñuu ñiyivi. Ta maa ra cuu ra ñiñi sa cuenda minoo ityi ñiyivi ndyico sii ra Jesùs, ra ñuu Nazaret.

6 Ta i cuñi ra zavaha ra ndya vaha ñi sisi vehe ñuhu cahnu ndi. Zoco i tiñi ndi sii ra. Cuñi ndi tasi tuñi ndi sii ra cuhva catyi ley maa ndi.

7 Zoco i quisí ra Lisias, ra cu nuu sii zandaru. Ñihi xaan i tyaa siyo ra sii ndi, ta i quihiñ ra sii ra Pablo.

8 Ta i catyi ra vatyi tatu cua tyaa ndi cuatyí sata ra cuñi si sa quisí ndi nuu moo. Tatu cua zanahma moo sii ra cua coton vatyi sa ndisa cuu cuhva tyaa ndi cuatyí sata ra. Tacuan cuu cuhva cahan ra Tértulo.

9 Ta tandihí ra hebreo i catyi ra vatyi sa ndisa cuu tandihí sa nacatyi ra.

10 Tacuan ta i catyi ra gobernador vatyi nacahan ra Pablo. Ta i quisaha cahan ra Pablo sihin ra ta catyi ra: Zií cuñi vatyi moo cuu ra cua tyizoho cuhva cua quehin. Site vatyi sa cuaha cuiya ndyaca ñaha moo sii ñiyivi hebreo.

11 Tatú cua ndaca tuhun cua coton vatyi iyo usi uu quivi ñi sa sei ñuu Jerusalén. Sehin yucuan vatyi cua zacahni sii ra Ndyoo.

12 Ñá natuhun tahan xein nu sihin minoo ñiyivi. Ta ñá zacuvei sii ñiyivi vehe ñuhu cahnu. Ñá zacuvei sii ñiyivi vehe ñuhu ndyili. Ta ñahñi zacuvei sii ñiyivi sisi ñuu cuan.

13 Ñahñi cuhva cuu tyaa ra ya cuyati sate vatyi yivi sa ndisa cahan ra.

14 Zoco ndisa cua catyi suhun vatyi zacahni sii ra Ndyoo. Zuun ñi Ndyoo ra i zacahnu ñiyivi sahnu sii ndi ta sa naha cuu ra. Sino iñi tandihí tuhun i tyaa ra Moisés sa cuu ley ndi. Ta sino iñi tandihí tuhun i tyaa tandihí ra profeta. Ndisa vatyi zacahni sii ra Ndyoo cuhva catyi ra Jesùs. Ta cuhva cuan ña vaha catyi ñiyivi hebreo.

15 Sino iñi vatyi cua zanandoto ra Ndyoo sii tandihí ñiyivi nu cuahan quivi. Ta yucuan cuhva sino iñi ñiyivi hebreo, ndihí ca. Cua nandoto ñiyivi vaha, ta cua nandoto ñiyivi ña vaha.

16 Yucuan cuenda ndedu xein cuhva coo vaha mi sihin ra Ndyoo ta sihin ñiyivi tandihí cuhva.

17 Cuaha cuiya i ñohi inga ñuu ta ziñi i nasei ñui vatyi cua tyindyei sii ñiyivi ndahvi ta cua cuhve ofrenda sii ra Ndyoo.

18 Tacuan fi Zacui, vatyi sa sicoo ique sa cuenda ra Ndyoo, ta i nduvaha tuqui cuenda ra cuhva catyi costumbre maa ndi. Ta i nañihi ñiyivi hebreo sii sisi vehe ñuhu cuan. Ñiyivi ñuu Asia cuu ñu i tiñi sii. Zoco ñá ñohi sihin cuaha xaan ñiyivi sisi vehe ñuhu ta ñá cuvaa ndi.

19 Cuñi si sa quisí ñu Asia cuan ta tyaa ñu cuatyí sate tatu iyo cuatyí sa ndisa cuii. Zoco ñá quisí ñu cuan.

20 Vaha, vityi cuñi si sa nacatyi ra ihyá ñaa cuatyí i zavehi. Sa ndaca tuhun ra sii, quivi i sehin nu titahan ra.

21 Ñahñi cuatyí i zavehi, zoco iyo minoo tuhun i quehin sihin ra quivi cuan. Tyehen i catyi sihin ra: "Vityi cua tasi tuñi ndo sii vatyi catyi vatyi cua nandoto tucu ñiyivi." Tacuan i catyi sihin ra cuan, catyi ra Pablo sihin ra Félix.

22 Sito vaha ra Félix yozo caa iyo cuhva sii ñiyivi sino iñi sii ra Jesùs. Yucuan cuenda i catyi ra sihin ra Pablo ta sihin tandihí inga ra cuan: Vaha ñi vityi. Sa cuu cuhun ndo. Naquisi xihna ra Lisias, ra cu nuu sii zandaru, ta ziñi cua catyi yozo caa cundoo tyiño ya. Catyi ra.

23 Tacuan ta i catyi ra Félix sihin ra cu capitán vatyi cucumi ra sii ra Pablo vehe caa, zoco catyi tucu ra: Cuu tava ndo zuhva sii ra Pablo. Cuhva ndo sa quisí ñiyivi nu ñoho ra vatyi quisí ndyaca ñu ñaa sa siñi ñuhu sii ra.

²⁴ I yaha zuhva quivi ta i sahan tucu ra Félix sihin ñazihí ra ndya vehe tyiño. Nañi ñazihí ra Drusila. Ñaha hebreo cuu ña. I cana ra Félix sii ra Pablo. Ta i tyizoho ra sa cahan ra Pablo cuhva sino iñi ñiyivi sii ra Jesucristo.

²⁵ Ta i cahan tucu ra Pablo sa cuenda cuhva cua zavaha ñiyivi sa vaha ta cuhva cua zacuenda vaha ñu sii ñu ta ma zavaha ca ñu sa ndya vaha ñi, cuhva cuñi maa ñu. I nacatyi ra Pablo vatyi ña cuaha ca quivi ta cua tasi tuñi ra Ndyoo sii ñiyivi. Tacuan ta i quisaha yuhu ra Félix ta i catyi ra sihin ra: Sa cuu cuhun vityi. Nacuyatyi inga saha ta cua cana tuqui suun.

²⁶ Cuñi ra Félix sa tyiyahvi ra Pablo sii ra ta cua zaña ra sii ra. Yucuan cuenda i cana ra Félix sii ra cuaha saha. Ta i natuhun ra sihin ra.

²⁷ Tacuan ta i yaha uu cuiya ta ziqui i quita ra Félix tyiño gobernador cuan. Cuñi ra sa coo vaha ra sihin ñiyivi hebreo. Yucuan cuenda i zanandoo ra sii ra Pablo vehe caa. Ta i quihví inga ra nañi Porcio Festo tyiño gobernador.

25

Cuhan ra Pablo nuu ra Festo

¹ Tacuan ta i saa ra Festo ta i quihin ra tyiño gobernador. I yaha uñi quivi ta i quita ra ñuu Cesarea ta cuahan ra ñuu Jerusalén.

² Yucuan i cahan ra zutu nahnu ta inga ra ñifíi hebreo sihin ra. I catyi ra ñaa cuu cuatyí i tyaa ra sata ra Pablo.

³ Sica xaan ra hebreo tumañi iñi sii ra Festo sa natasi ra sii ra Pablo ñuu Jerusalén. Sica iñi ra hebreo vatyi cua quihví xehe ra ta cua cahñi ra sii ra Pablo ityi wasi ra.

⁴ Zoco i catyi ra Festo: Cua ndoo ra Pablo ñuu Cesarea vatyi ña naha ca ta cunahuhi yucuan.

⁵ Yucuan cuenda catyi vatyi nacuhun ra ndyizo tyiño sii ndo indyacuan. Natyaa ra cuatyí sata ra Pablo indyacuan tatu ndisa

vatyi iyo cuatyí ra. Tacuan i catyi ra Festo.

⁶ Ta sindyaa ra Festo uña, a usi tahan quivi ñuu Jerusalén ta ziqui i sinanuhu ra ndya ñuu Cesarea. Ta inga quivi cuahan ra vehe tyiño ta i tava ra tyiño sa cua quisí ndyaca zandaru sii ra Pablo.

⁷ Tacuan ta i quihví ra Pablo nu ndyaa ra, ta sa yucu ra hebreo. Sa quisí ra ndya ñuu Jerusalén. Ituhva ra hebreo ta i tyaa xaan ra cuatyí sata ra Pablo. Zoco ñá cuu cuhva cuñi ra vatyi ña ndisa ra.

⁸ Tacuan ta i catyi ra Pablo sihin ra Festo: Ñahñi numinoo cuatyí i zavehi. Ñá zavehi cuatyí cuenda ley ñiyivi hebreo. Ñá zavehi cuatyí cuenda vehe ñuhu cahnu ndi. Ta ñahñi cuatyí i zavehi cuenda ra César, ra cu tyiño cahnu ñuu Roma. Tacuan i catyi ra Pablo.

⁹ Cuñi ra Festo sa coo vaha ra sihin ñiyivi hebreo ta yucuan cuenda i ndaca tuhun ra sii ra Pablo: ¿Atu cuñun sa cuhun tucun ñuu Jerusalén? Ta yucuan cua catyi yozo caa cua cundoo tyiño ya. Catyi ra.

¹⁰ Ta i catyi ra Pablo sihin ra: Sa ndyei nuu moo ta moo cuu ra ndyaca ñaha cuenda ra César, ra cu tyiño cahnu. Ihya cuu nu cuñi si sa cundoo tyiño ya vatyi ra ñuu Roma cui. Sito vohon vatyi ñahñi cuatyí i zavehi sihin ñiyivi hebreo.

¹¹ Zoco tatu minoo cuatyí cahnu i zavehi ta saha si cuhva cahñi ñiyivi sii, ma nduqui cuhva caqui. Zoco tatu ña ndisa cuhva cahñi ra hebreo, ma cuu cuhvon sii, sii ra. Yuhvi catyi vatyi nacatyi maa ra César yozo caa cua cundoo tyiño ya. Catyi ra.

¹² Tacuan ta ziqui i natuhun tahan ra Festo sihin ra ndyizo tyiño sihin ra ta ziqui i catyi ra: Sa catyun vatyi cuñun sa cua catyi ra César yozo caa cua cundoo tyiño ya. Vaha, cua cuhun nuu ra.

Cuahan ra Pablo nuu ra rey Agripa

¹³ I yaha zuhva quivi ta ziqui i quisi ra Agripa, ra cu rey cuenda ñiyivi hebreo. I saa ra sihin ña Berenice ñuu Cesarea cuan. Vasi zaha ñu saludar sii ra Festo.

¹⁴ Cuaha quivi i ndoo ñu yucuan ta ziqui i nacatyi ra Festo sihin ra rey cuan ñaa sa cuu sa cuenda ra Pablo. Tyehen i catyi ra: Iyo minoo ra zandoo ra Félix vehe caa quivi i quita ra sa cuu ra ra cu tyiño.

¹⁵ Ta sa sehin ñuu Jerusalén i quisi ra zutu nahnu ta ra ñiñi sii ñiyivi hebreo nu ndyei ta i nacatyi xaan ra sihin sa cuenda ra Pablo ta cuñi xaan ra sa cua cahñi sii ra.

¹⁶ Zoco i nacatyi sihin ra yozo caa iyo cuhva sii maa ndi. Vatyi ra cu tyiño cuenda ñuu Roma cui. I catyi sihin ra vatyi ña tuhva ndi cahñi sii ñiyivi tatu ñá cundaa vaha tyiño. Ta saha ndi sa zacacu ñiyivi sii ñu yozo caa tyaa ñiyivi cuatyi sata ñu.

¹⁷ Tacuan ta i quisi tucu ra hebreo cuan ihya. Yucuan cuenda ñá ndatu que. Inga quivi i sehin vehe tyiño. Ta i tasi tyiño vatyi cua quisi ndyaca zandaru sii ra Pablo.

¹⁸ Sica iñi vatyi cahnu xaan cuu cuatyi i zavaha ra, zoco ña tacuan cuu cuatyi ra cuhva catyi ra hebreo.

¹⁹ Cuñi ra hebreo cuatyi sihin ra vatyi ña sino iñi ra cuhva iyo costumbre maa ndo hebreo. Cahan ra hebreo cuenda minoo ra nañi Jesú. Catyi ra vatyi ña ndito ca ra Jesú, zoco catyi ra Pablo vatyi ndito ra.

²⁰ Tacuan ta ñá ñihi cuhva ñaa sa cua zavehi vatyi zin zin cahan ra. Yucuan cuenda i nducu tuhin sii ra Pablo tatu ña cuñi ra sa cuhun ra ndya ñuu Jerusalén vatyi yucuan cua cutuñi ra sa cuenda tyiño ya.

²¹ Zoco i sica ra sa ndoo ra vehe caa ndya cua cuu cuhun ra ta cutuñi ra nuu ra César ñuu Roma. Yucuan cuenda ñoho ca ra vehe caa ndya cua cuu tasi sii ra ñuu Roma. Tacuan i catyi ra Festo.

²² Ta ziqui i catyi ra Agripa sihin ra: Cuñi tucu mi tyizohi ñaa sa cua catyi ra Pablo. Ta i catyi ra Festo sihin ra: Zuun ñi ityaan cua tyizohon sa cahan ra.

²³ Inga quivi i quisi ndyaca ñiyivi sii ra Agripa sihin ña Berenice. Tyaqui xaan zahma ndisi ñu. I quihvi ñu vehe nu cua tyizoho ñu sa cahan ra Pablo. I quihvi tucu zandaru ra ndyizo tyiño nahnu ta tandihí ra mandoñi ñuu cuan. Tacuan ta i tasi ra Festo tyiño vatyi cua quisi ndyaca zandaru sii ra Pablo. Ta sa saa ra yucuan

²⁴ ta ziqui i cahan ra Festo sihin tandihí ñiyivi yucu yucuan ta catyi ra: Yoho rey Agripa ta tandihí ndoho ra yucu ihya, ica ndo sii ra ya. Cuaha xaan ra hebreo cuñi cuatyi sihin ra ityi ñuu Jerusalén. Ta tacuan tucu ñu ihya. Ña zaña ñu cuhva sa catyi ñu sihin, vatyi nacuu ra.

²⁵ Sica iñi vatyi ñahñi cuatyi ra sa cua cuu ra, zoco maa ra Pablo i catyi vatyi nacatyi maa ra César yozo caa cua cundoo tyiño ya. Yucuan cuenda sica iñi vatyi cua tasi sii ra nu iyo ra César.

²⁶ Cua tasi minoo carta sii ra César. Zoco ña ñihi cuhva ñaa sa cua catyi sihin ra. Yucuan cuenda catyi vatyi cua quisi ra Pablo nuu moo tata Agripa ta nuu inga ndoho, ndihí ca. Cua tyizoho ndo ñaa sa cua catyi ra, ta cua nacatyi ndo sihin yozo caa sica iñi ndo. Tacuan ta cua cote ñaa tuhun cua tasi sii ra César.

²⁷ Sica iñi vatyi ña vaha cua tasi sii minoo ra nuhñi, nuu ra cu tyiño cuan tatu ma nacatyi sihin ra cu tyiño ñaa cuatyi ra iyo. Tacuan i catyi ra Festo.

26

Cuhva i cahan ra Pablo nuu rey Agripa

¹ Tacuan ta i catyi ra Agripa sihin ra Pablo: Sa cuu cahan moo vityi. Ta ziqui i zaha ra Pablo saludar sii

ra rey Agripa sihin ndaha ra ta i quisaha catyi ra sihin ra Agripa:

² Yoho rey Agripa, zii xaan cuñi vityi vatyi saha moo sa nacatyi suhun. Cuaha xaan cuatyi cuñi ñiyivi hebreo ra tahan yo sihin.

³ Zoco zii cuñi vatyi sito moo tandihí costumbre iyo sii maa yo ñiyivi hebreo. Ta sa sica iñun sa cuenda tandihí sa sino iñi maa yo hebreo. Yucuan cuenda sique tamañi iñi suun sa nacoo tundyee iñi suun ta tyizohon tandihí cuii sa cua quehin suhun.

Nacatyi maa ra Pablo yozo caa i cuu ra ta ta coto ca ra sii ra Cristo

⁴ Ta cahan ca ra Pablo sihin ra Agripa ta catyi ra: Tandihí ñiyivi hebreo sito vaha ñu vatyi i sahnu mi cuhva iyo costumbre maa yo. Sito ñu yozo caa i cui ndya ta luhli ndya ñui. Ta sito ñu yozo caa i cui ndya ñuu Jerusalén.

⁵ Cuaha xaan cuiya sa sito ñu sii. Tatú cua cuhva ñu cuenda cua catyi ñu vatyi ra fariseo cui ndya ta luhli. Ta ra fariseo, ñihi ca zatyino ra sa tyaa ra yahvi sii tandihí ley hebreo ta ziqui tandihí inga ra hebreo.

⁶ Ta vityi cuñi ñiyivi hebreo cuatyi sihin vatyi sino iñi vatyi sa quisi minoo ra cua zacacu sii yo tañi sa catyi ra Ndyoo sihin ñiyivi sahnu sii yo ta tyiemvu.

⁷ Zoco ña sino iñi tandihí sa usi uu tahan ityi ñiyivi hebreo vatyi sa i quisi ra ta ndatu ca ñu sii ra. Yucuan cuenda zacahnu ñu sii Ndyoo ta zavaha ñu tyiño ra ñiyaca ta ndiyiyaca. Ta zuun ñi cuenda cua tyaa ñu cuatyi sate vatyi catyi vatyi sa yaha quisi ra zacacu sii yo.

⁸ ¿Ñacu ña cuu sino iñi ndo vatyi i zanandoto ra Ndyoo sii ra sisi sa i sihi ra?

Nacatyi ra Pablo yozo caa i sahñi tahan ra sihin ñiyivi ndyico sii ra Jesús ta quivi ca

⁹ Ta cahan ca ra Pablo sihin ra Agripa ta catyi ra: Ta quivi ca zuun

ñi mi sica iñi vatyi vaha cua zavehi ndya vaha ñi sihin ñiyivi sino iñi sii ra Jesú, ra ñuu Nazaret.

¹⁰ Tacuan i zavehi ñuu Jerusalén. Saha ra zutu nahnu tundyee iñi sii sa cua tyihi cuaha xaan ñiyivi ndyico sii ra Jesú vehe caa. Ta i tahan iñi sa sahñi ñiyivi sii ñu.

¹¹ Cuaha xaan saha i cañi sii ñiyivi tatu ma zaña ñu tuhun ra Jesú. Sehin vehe ñuhu hebreo nu zacahnu ñu sii Ndyoo ta i cañi sii ñu. I cuxaan xein sihin ñu ndya cuhva i sehin inga ñuu nu cuahan ñu ta i cañi sii ñu indyacuan.

Nacatyi ra Pablo yozo caa zama cuhva iyo ra

¹² Cahan ca ra Pablo sihin ra Agripa ta catyi ra: Tacuan ta ziqui i ñihi cuhva sihin ra zutu nahnu. Saha ra tundyee iñi sii sa cua tyihi sii ñiyivi vehe caa, ta yucuan cuenda i quihin ityi cua cuhin ñuu Damasco.

¹³ Yoho rey, yuhvi catyi vatyi zuun ñi ityi cuehin ta maa ora i ndyehi minoo ñuhu ityi andivi. Ñihi ca si ta ziqui ñuhu ñicandyi. Nacahnu ndundisi ityi cuehin sihin inga ra ndihi sihin.

¹⁴ Tacuan ta i nduya tandihí ndi nu ñuhu ta siñi sa cahan ra cahan. Cahan ra zahan hebreo ta catyi ra sihin: “Saulo, Saulo. Ña vaha cañi tohon sihin mi. Zuun ñi sii moo zañicuehun. Tañi minoo burro sañi ndyaa tatu cañi sitoho ti sii ti.”

¹⁵ Tacuan ta ziqui i catyi: “¿Yoo sa cahan, tata?” Ta i catyi ra: “Ra Jesú cui. Sahñi tahan xoon sihin.

¹⁶ Vityi nduviton. Nacuñi ndyoon. I quitui nuun vatyi cua zatyinon tyiñe, ta cua nacatyun sihin ñiyivi cuhva sa ndyehun sii vityi ta cuhva cua ndyehun sii cuee ca.

¹⁷ Cua zacuenda mi suun sii ñiyivi hebreo ta sii inga ñiyivi. Ta vityi cua tasi suun nu iyo ñiyivi sa yivi ñiyivi hebreo cuu.

¹⁸ Cua zañohon sii ñu minoo sa ndisa cuii ta cua zaña ñu sa zavaha

ñu ndya vaha ñi ta cua sino iñi ñu sii. Ma zavaha ca ñu cuhva cuñi cuihna, ta cua zavaha ñu cuhva cuñi mi. Tacuan ta cua ndasi cuatyi ñu ta cua coo vaha ñu sihin mi tañi iyo ñiyiví sino iñi sii.” Tacuan i catyi ra Jesús sihin. Catyi ra Pablo.

Nacatyi ra Pablo vatyi tyaa ra yahvi sa catyi ra Ndyoo sihin ra

19 Cahan ca ra Pablo sihin rey Agripa ta catyi ra: I tyei yahvi sa cahan ra Jesús sihin, yoho rey Agripa, vatyi i ndyehi sii ra.

20 I nacatyi sihin ñiyiví vatyi cuñi si sa ndu-uu ifíñi ñu cuatyi ñu ta tyaa ñu yahvi sii Ndyoo. Nazavaha ñu sa vaha cuhva zavaha ñiyiví sino iñi sii ra Jesús. Tacuan i quehin sa xihna ñi ñuu Damasco. Ta tacuan i cahan tuqui ñuu Jerusalén. Zuun ñi tuhun cuan i quehin nu cu si Judea ta inga ñuu nu iyo inga ñiyiví, ñu yiví ñiyiví hebreo cuu.

21 Yucuan cuenda i tiin ra hebreo sii, vehe ñuhu cahnu ta ndducu ra cuhva cahñi ra sii.

22 Zoco ndya quiví cuan ta cuhva ndya vityi tyindyeer ra Ndyoo sii. Nacatyi sihin ñiyiví ñiñi ta nacatyi sihin ñiyiví ndahvi Tuhun Ndyoo. Ñin ñi cuhva quehin tañi i cahan ra profeta ta tyiemvu ta tañi i cahan ra Moisés, ndihí ca. Ña zama mi sii si.

23 Vatyi i catyi ra cuan vatyi cua tahan ra Cristo tundoho ta cua cuu ra. Ta maa ra cuu ra cua nandoto sa xihna ñi sisi sa i sihi ra. Ta cua nacatyi ra sihin ñiyiví hebreo ta sihin inga ñiyiví yozo caa cua cacu añima ñu. Tacuan i catyi ra Pablo cuhva i nacatyi ra Tuhun Ndyoo.

Catyi ra Pablo vatyi nasino iñi ra Agripa sii ra Jesús

24 Tacuan i cahan ra Pablo ta ziquí ñihi xaan i cana saa ra Festo ta catyi ra: Yoho Pablo, zana xiñun. Cuaha xaan i cahvun ndya cuhva ndya sa nduzana xiñun.

25 Ta i catyi ra Pablo: Tata sahnu Festo, ña zana xiñi. Ta tuhun quehin, maa ñi sa ndisa, maa ñi sa vaha cuu si.

26 Sito vaha rey Agripa ya tuhun quehin. Ña sica iñi ta quehin tuhun ya sihin maa ra vatyi site vatyi sa sito ra tandihí tuhun nacatyi sihin ndo. Sito ra vatyi sito tandihí ñiyiví cuhva i cuu ra Jesús. Ñahñi sa xehe i sicooc.

27 Tacuan i catyi ra Pablo sihin ra Festo ta ziquí i cahan tucu ra sihin rey Agripa: Yoho rey Agripa, site vatyi sino iñun sa i tyaa ra profeta ta tyiemvu.

28 Ta i catyi rey Agripa sihin ra Pablo: ¿Atu sica iñun vatyi ta sica ñi cua sino iñi sii ra Jesús?

29 Ta i catyi ra Pablo: Nacuhva ra Ndyoo vatyi cua sino iñun sii ra Jesús a vityi a cuee ca. Cuñi xein sa cua sino iñi tandihí ndo. Cuñi xein sa cua coo ndo cuhva iyo mi, zoco ña cuñi sa cua quihi ndo vehe cua cuhva ñohi. Catyi ra.

30 Ta sa yaha cahan ra Pablo ta ziquí i sicuiñi ndyaa ra rey sihin ra gobernador cuan sihin maha Berenice ta tandihí inga ra yucu yucuan.

31 I quita ñu vatyi cua natuhun tahan ñu tuhun sa siñi ñu. Ta i catyi ñu: Ñahñi sa i zavaha ra cuan ta cua cuu ra. Ta ñahñi sa i zavaha ra ta cua ndoo ra vehe caa. Catyi ñu.

32 Ta i catyi ra Agripa sihin ra Festo: Sa xihna ñi cuu zaña moo sii ra Pablo, zoco vityi ma cuu ca vatyi sa sica ra sa cua cutuñi ra nuu ra César.

27

Tasi ra cu tyiño sii ra Pablo ñuu Roma

1 Tacuan ta ziquí i nacasi tahan tyiño vatyi cua cuhun ra Pablo nu cu si Italia nuu ra César. Ta i quihin minoo ra cu capitán sii ra Pablo sihin zuhva ca ra ñoho vehe cua tañi cuhva i catyi ra cu tyiño. Julio nañi capitán cuan ta iyo ra cuenda

zandaru ra Augusto. Yuhvi ra Lucas cuehin sihin ra Pablo.

² Cuahan tucu ra Aristarco, ra ñuu Tesalónica. Cuenda Macedonia cuu ñuu Tesalónica cuan. I quihví ndi minoo barco sa i quita ñuu Adramitio minoo ñuu sa ndyaa yuhu tyañuhu. Cua nanuhu tu, ta yaha tu ñuu sa iyo yuhu tyañuhu nu cu si Asia. Tacuan i quita ndi sihin maa tu.

³ Inga quiví i saa ndi ñuu Sidón. Vaha zaváha ra Julio sihin ra Pablo vatyi saha ra sa cua cuhun ra nu iyo amigo ra ñuu cuan. Ta i saha ñu ñaa sa siñi ñuhu sii ra.

⁴ Tacuan ta ziquí i nandihví tucu ndi barco cuan ta i zandaa ra zahma sa zacuhun sii barco cuan sihin tatyí ta cuahan ndi. I yaha tu minoo ñuhu sa ndyaa mahñu tyañuhu sa nañi Chipre. I yaha ndi ticui Chipre ta ñuhu cahnu vatyi ñihi xaan quiñi ndaha tatyí inga siyo cuan ta ñá cuu yaha ndi yucuan.

⁵ I yaha ndi ityi yuhu tyañuhu nu cu si Cilicia. Ta i yaha ndi ityi yuhu tyañuhu ñuu Panfilia. Ta ziquí i saa ndi ñuu Mira sa iyo cuenda Licia.

⁶ Ta ñuu Mira cuan i nañihi capitán cuan inga barco, yutu sa quita ñuu Alejandría. Cua cuhun tu ndya nu cu si Italia. Ta i catyi ra capitán vatyi cuhun ndi sihin tu cuan.

⁷ Tacuan ta i quita tucu ndi cuahan ndi. Cuaha quiví cuahan barco cuee cuee ñi, ta sihin tundoho i saa tu yatyí inga ñuhu mahñu tyañuhu sa nañi Gnido. Ñá cuu ca cuhun barco ityi nuu vatyi ñihi xaancaa tatyí. Yucuan cuenda i yaha ndi ticui minoo ñuhu mahñu tyañuhu sa nañi Creta ta inga sa nañi Salmón. Ñá ñihi xaan ñoho tatyí yucuan.

⁸ Cuahan barco yuhu yuhu tyañuhu ñi yuhu ñuhu Creta cuan. Tacuan ta i quihví barco yatyí ñi ñuu Lasea nu nañi si Nu Vaha Cua Nacuiñi Barco.

⁹ Sa yaha xaan quiví, ta sa yaha minoo vico sii ñiyívi hebreo nu

ñahñi maa sasi ñu, ta ziquí ñá cuu ca cuhun barco vatyi sa cua saa quiví cua nduñihi xaan tatyí vatyi sa cuñi noo zavi. Ta ñá vaha cuhun barco coto ndyee tu. Yucuan cuenda i catyi ra Pablo sihin ra zacaca barco cuan:

¹⁰ Tata, cutuñi iñi vatyi tatu cua cuhun yo cua coo xaan tundoho sii yo. Cua ndyee barco sihin ndaha tatyí ñi ta cua cuu ñiyívi.

¹¹ Ñá tyaa ra capitán cuan yahvi sa cahan ra Pablo, zoco i tyaa ra yahvi sa cahan ra zacaca barco ta sa cahan ra cu sitoho tu.

¹² Ñá vaha cua ndoo barco nu sicuiñi tu vatyi cua coon xaan zavi ta ñihi xaan cua quiñi tatyí quiví cuan. Yucuan cuenda tandihí ra i catyi: Naquita yo ihya ta ndedu yo cuhva cuhun yo ñuu Fenice sa iyo zuun ñi cuenda Creta ya. Tatu cuu saa yo yucuan, vaha cua ndoo barco. Ñá ñihi xaan caa tatyí yucuan ta ndyaa ñuu cuan siyo caña ñicandyi. Ta cua yaha yo vico zavi yucuan. Tacuan i catyi ra.

Níhi xaan caa tatyí nu tyañuhu

¹³ Tacuan ta ziquí i quisaha caa tatyí ityi tyañuhu zoco ñá ñihi xaan. Yucuan cuenda i sica iñi ra vatyi cua cuu cuhun ra cuhva cuñi ra. Tacuan ta i tava ra minoo caa vee xaan sa ñoho sisi ndutya sa ñá saha caca barco ta ziquí cuahan ndi. Yatyí ñi yuhu tyañuhu cuan cuahan ndi nu iyo ñuhu Creta.

¹⁴ Zuhva ñi cuahan ndi ta ziquí ñihi xaan quisaha caa tatyí. Ityi caña ñicandyi ta ityi yucu quisati tatyí cuan.

¹⁵ Ñá cuu ca caca barco ityi nuu vatyi ñihi xaan caa tatyí. Yucuan cuenda i saha ra cuhun tu sihin tatyí nu yivi ityi cuhun ra.

¹⁶ Tacuan i cuu ta i yaha ndi minoo ñuhu luhlu mahñu tyañuhu nañi si Clauða. Siyo zatyí i yaha ndi sihin barco vatyi ñihi ca caa tatyí inga siyo. Ñá ñihi xaan caa tatyí nu yaha ndi yucuan. Cuu, i natyíhi ra

lancha luhlu sisi barco vatyi cuñi ndyee xaan lancha.

¹⁷ I tyihi ra sii tu sisi barco coto cunaa tu. Tacuan ta i cava ra yoho nahnu sii barco cahnu cuan. I sihñi ra sii tu coto tahvi cuatyti tu. Tacuan ta i quisaha yuhu ra coto cañi ndutya sii barco nu ñiyiti yuhu tyañuhu nu cu si Sirte. Yucuan cuenda i zanoo ra zahma sa iyo sii barco sa quiñi ndaha tatyti ta saha ra sa cuhun tu ndya vaha ñi.

¹⁸ Inga quivi zuun ñi ñihi xaan coon zavi ta ñihi xaan quiñi ndaha tatyti sii barco. Yucuan cuenda i casaha zavita ra carga tu sisi tyañuhu.

¹⁹ Ta quivi cu uñi cuan i zavita ndi ndaha tysiño barco cuan.

²⁰ Cuaha xaan quivi ñá ndyehe ndi ñicandyi ta ñá ndyehe ndi tiñoo. Tacuan ta i sica iñi ndi vatyi ma cacu ca ndi vatyi ñihi xaancaa tatyti ta coon xaan zavi.

²¹ Cuaha xaan quivi ñá sasi ndi. Tacuan ta i catyi ra Pablo sihin tandihí ra: Ndoho amigo, vaha xaan ca tatu sa i tyizoho ndo sa quehin quivi cuan ta ñá quita yo nu cu si Creta. Vatyi ndyehe, cahnu xaan tundoho ndyehe yo vityi, ta cuaha xaan ndaha tysiño cua naa.

²² Zoco vityi catyi vatyi zanduziñi ndo iñi ndo. Yoñi maa cua naa. Barco ñi cua naa.

²³ Sito ndo vatyi ndyaca ñaha ra Ndyoo sii ta zatyiñe tysiño ra. Cuñi i quisi minoo ángel Ndyoo nu ndyei.

²⁴ Ta catyi ra: "Ma yuhun Pablo. Cuñi ra Ndyoo sa cua nacatyi moo tuhun ra nu ndyaa ra César. Catyi ra Ndyoo vatyi cua zavaha ra tumañi iñi suun. Cua zacacu ra suun ta sa cuenda moo cua cacu tandihí inga ra ñoho sisi barco ya." Tacuan i catyi ángel cuan.

²⁵ Yucuan cuenda catyi vatyi zanduziñi ndo iñi ndo, xaa. Sino iñi mi sii ra Ndyoo. Site vatyi cua zavaha ra cuhva catyi ángel cuan sihin.

²⁶ Iyo minoo ñuhu nu cua catyihí barco ya, ñuhu sa iyo mahñu tyañuhu ya. Catyi ra Pablo.

²⁷ Sa yaha uu vitya sa sica ndi tacuan. Ityi cuan ityi ya cuahan barco zacuu tatyti. Ta minoo sa cuaa cuahan barco tyañuhu sa nañi Adria. Ta maañuu i nacoto ra zacaca barco vatyi yatyi ñi ndya ñuhu yucuan.

²⁸ Tacuan ta ziqui i tyicuhva ra yozo cuhva sa cono ñoho ndutya nu yaha ndi. Ta ndyehe ra vatyi oco sahun iñin metro. Cuahan ndi zuhva ca ityi niuu, ta i tyicuhva tucu ra ta ndyehe ra vatyi oco usa metro ñoho ndutya.

²⁹ Yuhu xaan ra zacaca barco coto tahvi cuatyti tu tatu nañi tu nu yuu. Yucuan cuenda i zanoo ra cumi tahan caa vee xaan sisi ndutya ityi zuhma tu vatyi zanacuiñi si sii barco. Tacuan ta i ndatúra ta cuñi xaan ra sa cundisi.

³⁰ Nducu xaan zuhva ra zatyiño sisi barco culhva cono xehe ra. Yucuan cuenda i quisaha zanoo ra lancha. I catyi ra vatyi cua zanoo ra caa nahnu ityi xiñi barco zoco zandavi ñaha ra.

³¹ Tacuan ta i catyi ra Pablo sihin ra capitán ta sihin inga ra cu zandaru: Tatu ma ndoo ra ya sisi barco sihin maa yo ma cacu ndo. Catyi ra.

³² Tacuan ta i sahndya zandaru yoho nuhñi lancha cuan. Cuahan ñi tu.

³³ Sa vasi cundisi ta catyi ra Pablo sihin tandihí ra: Casi ndo. Vityi sa iyo uu vitya sa ñá sasi ndo ta ñá quixi ndo.

³⁴ Catyi sihin ndo vatyi sa ndyoo ñi casi ndo vatyi tacuan ta cua coo tundyee iñi sii ndo. Ta yoñi maa cua tahan tundoho ndaha ñi. Catyi ra.

³⁵ Ta sa yaha cahan ra Pablo tacuan ta i quihin ra minoo pan. Saha ra tyahvi ndyoo sii Ndyoo nuu tandihí ra yucu yucuan. Ta ziqui i sahnu ra sii si ta quisaha sasi ra.

³⁶ Tacuan ta i nduzii ca iñi inga ra ta sasi ra.

³⁷ Uu ziendu uñi xico sahun iiñ tahan nduhvi ra ñoho sisi barco cuan.

³⁸ Sasi ndi ndya sa ndaha iñi ndi ta ziqui i zavita ra siti trigo sisi tyañuhu vatyi cua nduñahma ca barco.

Cuhva i ndyee barco

³⁹ Tacuan ta ziqui i cundisi, ta i ndyehe ra zacaca barco vatyi yatyi ñi iyo ñuhu, zoco ñá sito ra ñaa ñuhu cuu si. I ndyehe ra minoo ityi nu cuu quihví barco, ta vaha xaan iyo yuhu tyañuhu yucuan. Yucuan cuenda cuñi ra tyihi ra barco yucuan.

⁴⁰ Tacuan ta i sahndya ra yoho nuhñi caa sa zacuiñi sii barco cuan. Ta ziqui i ndasi ra yoho sa sinuhñi vitu sa zavico cava barco. Ta i zandaa tucu ra zahma tu vatyi cua zacuhun taty i sii tu. Tacuan ta ziqui i quisaha cuahan barco ndya ñuhu cuan.

⁴¹ Zoco i sicuiñi barco nu ñiyiti, ta i ndoo tu. Ñá cuu ca natava ra barco vatyi sa ndyee ityi xiñi tu sisi ñiyiti, ta ityi yiñ tu i quisaha tahvi cuaty i tyañuhu vatyi ñih ixaan quiñi ndaha si sii barco.

⁴² I cuñi zandaru cahñi ra sii ra ñoho vehe caa, ra cuahan sihin ra, coto cua zutya ra ta quita ra nu ñuhu ityi ta cono ra.

⁴³ Zoco ñá saha ra capitán sa cahñi zandaru sii ra ñoho vehe caa vatyi ñá cuñi ra sa cuu ra Pablo. I catyi ra vatyi naquihví xihna ra cuu zutya tyañuhu, ta cua saa ra ndya ñuhu ityi sa xihna ñi.

⁴⁴ Ta ziqui cua cuhun inga ra ityi sata ra nu vitu vaha a nu vitu barco sa tahvi cuaty i. Ta tacuan cuu cuhva i cacu tandih i ndi ta i quita ndi nu ñuhu ityi.

28

Iyo ra Pablo minoo ñuhu mahñu tyañuhu sa nañi Malta

¹ Tacuan cuu cuhva i cacu ndi. I catyi ñiyiví yucuan vatyi Malta nañi ñuhu cuan sa iyo mahñu tyañuhu.

² I cundahvi iñi ñiyiví sii ndi ta zatahan ñu ñúhu vatyi coon xaan zavi ta visi xaan ndi. Tacuan i tyindyeet ñu sii ndi.

³ I naquihin ra Pablo zuhva nducu ndyih i cua tyihi ra nu ñúhu. Ta ziqui i quita minoo coo xaan sihin sa ihñi. Ta i tiñ tñ ndaha ra ta ñá zaña ti.

⁴ I ndyehe ñiyiví yucuan vatyi ñá zaña ti ndaha ra Pablo, ta i quisaha catyi ñu sihin tahan ñu: Ra sahñi sii ñiyiví cuu ra ya. Sa cacu ra sisi tyañuhu, zoco ñá saha ra Ndyoo sa condito ra ñuu ñiyiví ya. Catyi ñu:

⁵ Tacuan ta ziqui i naquizi ra Pablo ndaha ra ta i canacaya coo cuan sisi ñuhu, ta ñahñi sa tahan ra Pablo.

⁶ I ndatu ñiyiví ta sica iñi ñu tatu zandaa si sii ra Pablo a ta sica ñi cua cuu ra. Naha xaan i ndatu ñu, ta i ndyehe ñu vatyi ñahñi i tahan ra. Tacuan ta i sica iñi ñu inga cuhva ta catyi ñu: Minoo ndyoo cuu ra.

⁷ Yaty i ñi nu i siyucu ndi ndyaa terreno minoo ra nañi Publio. Ra ndyaca ñaha yucuan cuu ra. I saha ra sa cundyaa ndi vehe ra. Ta vaha xaan i siyucu ndi uñi quiví i zacuu ra.

⁸ Ñih ixaan caa zutu ra Publio vatyi cuhu ra. Zaa ra ta siyo ra niñi. Cuahan ra Pablo nu caa ra. Sica fahvi ra sii Ndyoo ta tyizo ra ndaha ra sii ra ta zanduvaha ra sii ra.

⁹ I ndyehe ñiyiví vatyi tacuan i cuu si, ta ziqui i quisah tandih iñiyiví cuhu iyo ñuu cuan. Ta i nduvaha ñu.

¹⁰ Ta ziqui cuaha xaan sa saha maa ñu sii ndi. Ta quiví i quita tucu ndi sihin barco i saha maa ñu tandih iñi ñuhu sii ndi sa cuenda ityi.

Saa ra Pablo ñuu Roma

¹¹ Uñi yoo i sindyaa ndi Malta cuan, ta ziqui i quihví ndi minoo barco sa iyo yucuan. Yucuan i

ndoo tu vico zavi. Yutu sa quita ñuu Alejandría cuu tu, ta ndyaa uu tahan ndyoo, ra nañi Cástor ta ra nañi Pólux sa zanandacu ñiyiví xiñi barco.

¹² I quihví ndi sisi tu ta cuahan ndi ñuu Siracusa. Ta yucuan i ndoo ndi uñi quiví.

¹³ Ta ziquí i quita ndi yucuan ta cuahan ndi ñuu Regio. Inga quiví i quisi minoo tatyí ityi yuhu tyañuhu ta i sica barco uu quiví ca ta i saa ndi ñuu Puteoli.

¹⁴ Ñuu cuan i nañihí ndi zuhva ñiyiví sino iñi sii ra Jesús. I sica ñu sa cua ndoo ndi sihin ñu minoo vitya. Tacuan ta ziquí i quita ndi ta cuahan ndi ñuu Roma sihin saha ndi.

¹⁵ Ta sa ñihi ñiyiví sino iñi sii ra Jesús tuhun vatyí vasi ndi ta i quita ñu ñuu Roma ta i quisi zatahan ñu sii ndi ityi vasi ndi. Zuhva ñu i quisi, ñihi tahan ñu sihin ndi minoo nuyahvi nu nañi si Foro Apio. Ta inga ñu quisi, ñihi tahan ñu sihin ndi nu nañi si Uñi Tahan Vehé Posada. Sa ndyehe ra Pablo sii ñu ta saha ra tyahvi ndyoo sii Ndyoo ta sicoo ca tundyee iñi sii ra ta zii ca cuñi ra.

¹⁶ Tacuan ta i saa ndi ñuu Roma. Saha cuenda ra capitán sii ra Pablo ta sii inga ra sindyaca ra sii ra cumi vehe caa. I tyaá ica ra cuan sii ra Pablo. Ndyaa zíñi ra minoo vehe, ta minoo ñi zandaru cumi sii ra.

Zacuaha ra Pablo Tuhun Ndyoo ñuu Roma

¹⁷ I yaha uñi quiví ta ziquí i cana ra Pablo sii tandihi ra ñañi hebreo. Ta sa titahan ra i catyi ra sihin ra: Yañi xaa, ñahñi cuatyí i zavehi sihin ñiyiví hebreo ñu tahan yo. Ñahñi sa ña vaha i zavehi sa cuenda costumbre sahnu sa zavaha ñiyiví sahnu sii yo ta sa naha. Zoco i tñiñ ñiyiví sii, ñuu Jerusalén ta saha ñu sii, sii ra ndyaca ñaha cuenda ñuu Roma.

¹⁸ I tasi tuñi ra cuan sii, ta ziquí i cuñi zaña ra sii, vatyí ñahñi cuatyí i zavehi ta cui.

¹⁹ Zoco ñá saha ra hebreo sa zaña ra ndyaca ñaha ñuu Roma sii. Yu-cuan cuenda i catyi vatyí cua cuhin nuu ra César ta cua cundaa tyiño ya. Tacuan i catyi vazu ña cuñi cuatyí sihin ñiyiví hebreo.

²⁰ Yucuan cuenda i sique sa ndyehi sii ndo ta sa quehin sihin ndo. Cuñi zandeí sihin ndo vatyí sino iñi vatyí sa yaha quisi ra cua zacacu sii tandihi yo. Maa ra cuu ra sa ndatu xaan tandihi maa yo ñiyiví hebreo. Ta yucuan cuenda nuhñi sihin cadena ya. Tacuan cuu cuhva i catyi ra Pablo.

²¹ Tacuan ta ziquí i nacatyí ra hebreo cuan sihin ra Pablo: Ñahñi carta i tasi ra hebreo sii ndi sa cuenda moo. Ta ñiyiví hebreo ñu tahan yo, ñu i quita ñuu Jerusalén ta saa ñu ihya, ñahñi ndya vaha ñi i cahan ñu suun.

²² Cuñi ndi tyizoho ndi sa cohon. Cuñi ndi coto ndi yozo caa sica iñi moo vatyí sito ndi vatyí catyi ñiyiví nacahnu ñuu ñiyiví vatyí ña vaha ñiyiví cuu ñiyiví ndyico sii ra Jesús. Tacuan i catyi ra hebreo cuan.

²³ Tacuan i cahan ra, ta ziquí i sata ra hebreo cuan minoo quiví cua titahan tucu ra sihin ra Pablo. Ta quiví cuan tuu xaan ñiyiví i quisi vehe nu ndyaa ra Pablo. Ndyiyaca cuui i nacatyí tucu ra Pablo sihin ñu yozo caa cuñi ra Ndyoo cundyaca ñaha ra sii yo. I catyi ra vatyí nacatyí ra Moisés ndya ta tyiemvu yozo caa cua cuu ra Jesús. Ta zuun ñi cuhva cuan i cahan ra profeta ta tyiemvu, catyi ra Pablo. Tacuan i nacatyí xaan ra Pablo sihin ñu vatyí cuñi xaan ra sa cua sino iñi ñu sii ra Jesús.

²⁴ Ta sicoo zuhva ñu sino iñi sa cahan ra Pablo, ta inga ñu ñá sino iñi ñu.

²⁵ Ñá ndu-ñiñ ñu. Ta sa numi ñu cunuhu ñu ndya vehe ñu ta ziquí i catyi ra Pablo minoo ca cuhva sihin ñu. Catyi ra: Ndisa cuui cuu si cuhva i cahan ra Isaías sa cahan

ra cuenda Ndyoo i zacuu Tatyi Ii ta
tyiemvu sihin ñiyiví sahnu sii yo.

²⁶ Vatyi i catyi ra:

Cua cuhun nu iyo ñiyiví ya ta cua
catyun sihin ñu:

“Tyizoho xaan ndo Tuhun Ndyoo,
zoco ña cutuñi ifi ndo sa tyi-
zoho ndo.

Ndisa, ndyehe ndo yozo caa iyo ra
Ndyoo, zoco ña sito ndo ñaa
sa cuu sa ndyehe ndo.”

²⁷ Ta cahan ca Tatyi Ii sihin ra
Isaías ta tyiemvu ta catyi ra:

Ndisa cuñi zanduñihí xaan ñiyiví iñi
ñu coto cua nduvaha añima
ñu.

Ña cuñi ñu tyizoho ñu coto cua cu-
tuñi iñi ñu.

Ña cuñi ñu sa nducu ñu cuhva, coto
cua quisi ñu sii ta cua zame
cuhva iyo ñu ta zanduvehi
sii ñu.

Tacuan i catyi Tatyi Ii sihin ra
Isaías.

²⁸ Ta ziquí i catyi tucu ra Pablo
sihin ñiyiví yucuan: Nacoto
vaha ndo vatyi ndya vityi cua
nacatyi ndi Tuhun Ndyoo sihin
ñiyiví, ñu sa yiví ñiyiví hebreo cuu.
Cua tyizoho ñu cuhva zanduvaha
ra Ndyoo añima ñiyiví, ta cua sino
ifi ñu. Tacuan i catyi ra Pablo.

²⁹ Ta sa yaha cahan ra Pablo
tacuan ta i quita tandihí ñu he-
breo. Sahñi tahan ñu zuhva vatyi
ñá ndu-iin ñu sihin tahan ñu sa
cuenda cuhva cahan ra Pablo.

³⁰ Uu cuiya i ndoo ra Pablo ñuu
cuan. I sica noo rä minoo vehe ta
tyiyahví ra yahví si. Ta vaha xaan
i cahan ra sihin tandihí ñiyiví i saa
vehe ra.

³¹ I nacatyi ra sihin ñu yozo caa
cuñi ra Ndyoo cundyaca ñaha ra sii
yo. Ta i zacuaha ra sii ñu yozo caa
iyo ra Jesús. Ñá yuhu ra ta nacatyi
ra, ta yoñi i zayanga sii ra.

Carta Sa I Tyaa Ra San Pablo Sii Ñiyiví Sino Iñi Sii Ra Ndyoo Ñuu Roma

*I tyaa ra Pablo carta ya sii ñiyiví
sino iñi sii ra Ndyoo ñuu Roma*

¹ Yuhvi ra Pablo tasi carta ya siindo. Minoo muzu ra Jesucristo cui. I casi ra Jesucristo sii, ta i saha ra tyiño sii vatyi cui minoo ra sa cua zacoto Tuhun Vaha ra sii ñiyiví, cuhva cacu ñuu.

² Ta ihya Tuhun Vaha cuu zuun ñi tuhun sa i catyi ra Ndyoo ta sa naha vatyi cua quasi si. I cahan ra Ndyoo sa cuenda si quivi i cahan ra profeta ta sa naha.

³ Cuenda zehe ra Ndyoo cuu tuhun ya. I zacacu minoo ñaha sii ra cuhva cacu maa yo. Ta ñiyiví ra rey David i cuu sii ra.

⁴ Ta i sihi ra Jesús, ta i zanandoto ra Ndyoo sii ra. Ta cuhva cuan i zavaha ra Ndyoo minoo sa cahnu xaan, ta i zañaha ra vatyi zehe ra cuu sii ra Jesús. Ta ii xaan cuu ra Jesús, ra ndyaca ñaha sii yo, tañi ii maa ra Ndyoo.

⁵ Sa cuenda ra Jesús i cundahvi iñi ra Ndyoo sii, ta i saha ra tyiño sii sa zacote Tuhun ra. Ta tacuan ta cua sino iñi ñiyiví sa yivi ñiyiví hebreo cuu, ta cua tyaa ñuu yahvi. Ta cua zacahnu ñuu sii ra Jesucristo.

⁶ Ta zuun ñi ñiyiví cuan cuu tucu maa ndo. I casi ra Ndyoo sii ndo vatyi cuu ndo ñiyiví sii ra Jesucristo.

⁷ Tyei carta ya sii maa ndo, ra sino iñi ñuu Roma. Cuñi xaan ra Ndyoo sii ndo, ta i casi ra sii ndo vatyi cuu ndo ñiyiví ra. Cuñi vatyi nacundahvi xaan ca iñi ra Ndyoo ta ra Jesucristo sii ndo, ta nacuhva ra sa coo sa taxi añima ndo. Ta ra Jesucristo, cuu ra ndyaca ñaha sii yo.

Cuñi ra Pablo cuhun ra ñuu Roma

⁸ Sa xihna ñi sehi tyahvi ndyoo sii ra Ndyoo, ra zacahni. Sehi tyahvi ndyoo sii ra sa cuenda sa i zavaha ra Jesucristo ta vityi sino iñi tandihíndo. Ta cuhva sa sino xaan iñi maa ndo, sa sito ñiyiví nacahnu cuhva sino iñi ndo.

⁹ Muzu maa ra Ndyoo cui. Tyaa xein yahvi sii ra sihin tandihícuii añime, ta zacote Tuhun ra sa cuenda Zehe ra. Ta sito vaha ra vatyi ña zañe sa quehin sihin ra cuenda ndo.

¹⁰ Ta sique sii ra vatyi tatu cuñi maa ra, nacuhva ra vatyi cuhin cundyehi sii ndo. Sa naha xaan cuñi ndyehi sii ndo, ta ñá cuu.

¹¹ Cuñi xein cuhin nu yulu ndo, ta cua nacatyi que Tuhun Ndyoo sihin ndo, ta cua sino ca iñi ndo.

¹² Cuñi cuhve tundyee iñi sii ndo, ta cua cuhva tucu maa ndo tundyee iñi sii. Cua tyindyeen tahan yo sii yo sihin cuhva sino iñi yo sii maa ra Ndyoo.

¹³ Cuñi sa coto ndo yañi xaa vatyi sa cuaha xaan saha cuñi cuhin nu yulu ndo, zoco ndya vityi ta ña cuu cuhin. Cuñi cuhin vatyi cuñi zacote Tuhun Ndyoo nu yulu ndo, ta cua sino ca iñi ndo, ta cua nducuaha ca ndoho ra sino iñi sa yivi ñiyiví hebreo cuu.

¹⁴ Ñiñi xaan cuñi si zacote sii ñiyiví cahan zahan griego ta ñiyiví ña cahan zahan griego ta sihin ñiyiví sito ta ñiyiví ña cuaha sito.

¹⁵ Cuñi si sa zacote sii tandihíñiyiví, ta yucuan cuenda cuñi xein zacote sii maa ndo, ra ndyaa ñuu Roma.

Iyo xaan tundyee iñi sihin Tuhun Vaha ra Ndyoo

¹⁶ Ña cahan nui sa cuenda Tuhun Vaha ra Ndyoo vatyi cuhva cuu si sii maa ra Ndyoo, ta cua zacacu si sii yoo ra sino iñi. Sa xihna ñi i saa si nu iyo ñiyiví hebreo, ta cuee ca i saa si nu iyo inga ñiyiví.

¹⁷ Vatyi cuhva zacacu ra Ndyoo sii ñiyivi zañaha si vatyi zandasi ra cuatyi ñu ta zanduvaha ra añima ñu sihin sa sino iñi ñu sii ra. Tañi cuhva catyi Tuhun Ndyoo: "Minoo ra sa zanduvaha ra Ndyoo añima, cua cundito ra tandihi cuii tyiemvu vatyi i sino iñi ra."

Iyo xaan cuatyi ñiyivi ñuu ñiyivi

¹⁸ Zoco cuxaan xaan ra Ndyoo sa cuenda cuatyi ñiyivi, ta cua tasi tuñi ra sii ñu sa cuenda tandihi sa ña vaha zavaha ñu. Cuaha xaan cuatyi ñiyivi iyo, ta cuatyi ñu cuan cuu ta ña cuu sino iñi inga ñiyivi.

¹⁹ Ta cuhva cuu coto ñiyivi cuhva iyo ra Ndyoo, casi xaan iyo si vatyi i zañaha maa ra sii yo, ta sa sito ñiyivi.

²⁰ Ndyo ta sino ñuu ñiyivi ta casi xaan cuu ndyehe ñiyivi cuhva iyo ra Ndyoo. Tandihi sa i zavaha ra zañaha si vatyi iyo xaan cuhva sii ra, ta cuaha xaan ca sa siñi tuñi iyo sii maa ra ta ziqui sii maa yo. Ndyoo cuu ra sa ndisa. Ta sito ñiyivi vatyi iyo ra Ndyoo vazu ña cuu ndyehe yo sii ra. Zoco cuu sino iñi yo sii ra. Yucuan cuenda ma cuu catyi ñiyivi sa ndisa vatyi ña sito ñu ñaa sa cuu sa vaha.

²¹ Sa i sito ñiyivi vatyi iyo ra Ndyoo, zoco ña cuñi ñu zacahnu ñu sii ra tañi tahan si zacahnu yo sii ra. Ta ña saha ñu tyahvi ndyoo sii ra. I quisaha sica iñi ñu tuhun sa ña ñiñi, ta i naa sa siñi tuñi vaha sii ñu.

²² Catyi ñu vatyi sa cuaha xaan i cutuhva ñu ta siñi tuñi xaan ñu, catyi ñu, zoco i nduu ñu ñiyivi ña sito yozo caa iyo ra Ndyoo.

²³ Ñá zacahnu ca ñu sii sa minoo ñi Ndyoo, ra ndito tandihi cuii tyiemvu, ra Ndyoo ra ndisi xaan ta tyaqui xaan. Zoco i zavaha ñu ndyoo sa cua zacahnu ñu, ta caa si cuhva caa ñiyivi a cuhva caa zaa a quiti a cuhva caa coo.

²⁴ Yucuan cuenda i zaña ra Ndyoo sii ñu, ta i zavaha ñu tandihi cuii sa ña vaha sa cuñi añima ñu.

I zavaha ñu cuatyi zuun ñi sihin tahan ñu.

²⁵ I zaña ñu sii sa ndisa sa cuenda ra Ndyoo, ta cuñi ca ñu sii inga ndyoo sa yivi Ndyoo sa ndisa cuii. Ta inga tucu cuhva vatyi i zacahnu ñu ta i tyaa ca ñu yahvi sii sa zavaha ra Ndyoo ta ziqui sii maa ra vazu maa ra i zavaha tandihi cuii. Ta tahan si zacahnu yo sii ra tandihi cuii cuhva. Ta nacuu si tacuan, ta nacuu si sa ndisa.

²⁶ Yucuan cuenda i zaña ra Ndyoo sii ñu, ta i zavaha ñu tandihi cuii cuhva ña vaha. I zandoo ñu cuhva vaha sa coo minoo rayii sihin minoo ñi ñaha. Ta i zama ñu inga cuhva, minoo cuhva ña vaha. I zavaha ñu zihí sa ña vaha sihin inga ñu zihí,

²⁷ ta tacuan tucu i zavaha rayii sihin inga rayii. I zandoo ra cuhva tahan si coo ra sihin ñu zihí, ta i zavaha ra sii si sihin inga rayii. Ta sihin coño ñuhu ra tasi tuñi ra Ndyoo sii ra vatyi cahnu xaan cutayi ra.

²⁸ Ñá cuñi ca ñiyivi nacohon iñi ñu sii ra Ndyoo a tyaa ñu yahvi sii ra. Ta yucuan cuenda i zaña ra Ndyoo sii ñu ta saha ra sa coo minoo sa siñi tuñi ña vaha sii ñu, ta ziqui i zavaha ñu tandihi cuii sa ña vaha.

²⁹ Ta i situ cuii sa quiñi caa sii ñu sa cuenda tandihi cuii cuhva ña vaha i zavaha ñu. Quihin rayii sii ñu zihí ta ña tandaña ra sihin ñu. Tandihi cuii cuhva ña vaha zavaha ñu. Ndyiyo ifi ñu ndaha tyiño inga ñiyivi. Ñahñi sa ndoo iyo sii ñu. Cuxaan ñu tatu iyo sa vaha sii inga ñiyivi. Sahñi ñu ñiyivi. Nduco ñu tizihi. Zandavi ñaha ñu. Quiñi xaan iyo ñu. Cahan ñu ndya vaha ñi sii inga ñiyivi zoco xehe fi.

³⁰ Quiñi cahan ñu sii ñiyivi vazu ña ndisa. Cuxaan xaan ñu sihin ra Ndyoo. Cahan ñu ndya vaha ñi sihin ñiyivi. Zacañu xaan ñu sii ñu, ta catyi ñu vatyi vaha xaan ñu. Cuaha xaan cuhva ña vaha tava ñu.

Ña tyaa ñu yahvi sii zutu ñu ta sii zihi ñu.

³¹ Ñahñi sa siñi tuñi vaha iyo xiñi ñu vatyi ña cutuñi iñi ñu ñaa sa cuu sa vaha. Saha ñu tuhun ta ña tyaa ñu yahvi sii si. Ña cuñi ñu nu sii ñiyivi sii ñu. Cuxaan ñu sihin ñiyivi, ta ma zaha ñu tucahnu iñi sii ñu. Ta ña cundahvi iñi ñu sii ñiyivi.

³² Sito vaha ñu cuhva i catyi maa ra Ndyoo vatyi tahan si sa cuu cuii ñiyivi zavaha cuhva ña vaha cuan. Zoco zavaha ñu sii si. Ta ña tacuan ñi, ndya cuhva cuzii xaan iñi ñu tatu zavaha tucu inga ñiyivi sii si.

2

Cua tasi tuñi ra Ndyoo sii ñiyivi cuhva iyo ñu

¹ Yucuan cuenda yoho, yoo ra cuun, tatu ndyehe xoon tatu zavaha inga ñiyivi sa vaha a sa ña vaha, zuun ñi ziqui moo cua ndoo cuatyí, ta ma zandasi ra Ndyoo cuatyun. Vatyí tyicuhvon sii inga ñiyivi, ta zuun ñi cuatyí zavaha ñu, zavohon.

² Ta sito yo vatyi tasi tuñi ra Ndyoo sihin minoo cuhva ndoo sii ñiyivi zavaha cuhva cuan.

³ ¿Atu sica iñun vatyi cuu tyicuhvon sii ñiyivi? Ta zuun ñi cuhva ña vaha zavaha ñu zavaha tucu moo. ¿Atu sica iñun vatyi ma tasi tuñi ra Ndyoo suun?

⁴ Ndyee xaan iñi ra Ndyoo sihin ñiyivi, ta cundahvi xaan iñi ra sii ñu. ¿Atu sica iñun vatyi yucuan cuenda ma tasi tuñi ra suun? Tatu tacuan sica iñun, ña cutuñi iñun vatyi cuñi ra Ndyoo sa cua zandoon cuatyun, ta yucuan cuenda cundahvi iñi ra suun.

⁵ Ta cuenda sa ndava xaan iñun ta ña cuñun zandoon cuatyun, ta yucuan cuenda zanducahnu con cuatyun, ta cua cuxaan xaan ra Ndyoo suhun quiví cua tasi tuñi ra sii ñiyivi sihin minoo cuhva ndoo ta cua cuhva ra tundoho ndyehe ñu.

⁶ Quiví cuan cua cuhva maa ra Ndyoo sii sa minoo minoo ñiyivi

cuhva tahan si sii ñu sa cuenda tysiño i zavaha ñu.

⁷ Ñiyivi ña zaña sa zavaha sa vaha, cuñi ñu vatyi cua cuzii iñi ra Ndyoo sihin ñu. Ta cuñi ñu vatyi catyi ra vatyi vaha zavaha ñu. Ta nducu ñu cuhva ñihi ñu sa cundito ñu tandihí cuii tyiemvu. Sii maa ñu cuan cua cuhva ra sa cundito ñu.

⁸ Zoco ñihi xaan cua tasi tuñi ra Ndyoo sii ñiyivi ña tyaa yahvi sii maa ra ta sii sa ndisa. Zavaha ñu sa ña vaha. Yucuan cuenda ñihi xaan cua tasi tuñi ra sii ñu cuhva tahan si sii ñu.

⁹ Cua coo xaan tucuihya iñi ta tundoho sii ñiyivi zavaha sa ña vaha, xihna ca sii ñiyivi hebreo ta ziqui sii tandihí inga ñiyivi.

¹⁰ Ta cua cuzii xaan iñi ra sihin ñiyivi zavaha sa vaha, ta cua catyi ra vatyi vaha zavaha ñu. Ta cua coo sa taxi ñi sii ñu sihin ra, ta ma caca xaan ca iñi ñu. Sa xihna ñi cua cuhva ra cuhva ya sii ñiyivi hebreo ta ziqui sii tandihí inga ñiyivi.

¹¹ Tacuan cua zavaha ra vatyi minoo cuhva ndoo zavaha ra Ndyoo, ta cua cuhvra ra cuhva tahan si sii sa minoo minoo yo.

¹² Tandihí ñiyivi zavaha cuatyí ta ña sito ñu tuhun i saha ra Ndyoo sii ra Moisés, cua cuu ñu zoco yivi sa cuenda tuhun i saha ra Ndyoo sii ra Moisés. Ta ñiyivi sa sito tuhun i saha ra Ndyoo sii ra Moisés ta zavaha ñu sa ña vaha, cua tasi tuñi ra Ndyoo sii ñu cuhva catyi tuhun i saha ra sii ra Moisés.

¹³ Vatyí yivi ñiyivi sa siñi ñi Tuhun Ndyoo cuu ñu cua quita vaha ityi nuu maa ra. Ñiyivi zavaha cuhva catyi Tuhun ra cuu ñu cua catyi ra vatyi ñahñi cuatyí ñu.

¹⁴ Iyo ñiyivi sa ña sito tuhun i saha ra Ndyoo sii ra Moisés, zoco zuun ñi zavaha ñu cuhva catyi si vazu ña sito ñu vatyi iyo si. Sa siñi tuñi vaha sii ñu cuu sa catyi sihin ñu ñaa sa cuu sa vaha vazu ña sito ñu tuhun i saha ra Ndyoo.

¹⁵ Zoco zañaha ñu vatyi iyo si añima ñu. Inuu ñi cahan sa siñi tuñi

vaha sii ñu sihin ñu tañi cuhva catyi Tuhun i saha ra Ndyoo. Ta tyaa sa siñi tuñi vaha sii ñu cuatyi sata ñu a catyi si sihin ñu vatyi vaha cuu cuhva zavaha ñu.

¹⁶ Ta tacuan cua cuu si quiví cuu cuhva ra Ndyoo tyiño sii ra Jesucristo sa cua tyicuhva ra sii ñu, ta cua ndyehe ra tatu zavaha ñu sa vaha a sa ña vaha. Sa i zacote cuhva ya sii ndo quiví i nacatyi Tuhun Vaha ra sihin ndo. Vazu xehe xaan zavaha ñiyiví sa ña vaha a cuenda sa sica ñi iñi ñu, zoco sito ra Ndyoo, ta cua tyicuhva ra Jesucristo sii ñu.

Tyaa ñiyiví hebreo yahvi tuhun i saha ra Ndyoo sii ra Moisés

¹⁷ Catyi ndo vatyi ñiyiví hebreo cuu ndo. Ta ndisa. Ta catyi ndo vatyi tyaa xaan ndo yahvi tandihí tuhun i saha ra Ndyoo sii ra Moisés vatyi tacuan ta cua cacu ndo cuñi ndo. Ta zacahnu ndo sii ndo vatyi maa ñi maa ndo zacahnu sii ra Ndyoo sa ndisa, catyi ndo.

¹⁸ Ta catyi ndo vatyi sito ndo cuhva cuñi maa ra. Ta sito ndo ñaa sa cuu sa vaha xaan vatyi sito ndo tuhun i saha ra. Catyi ndo.

¹⁹ Sica iñi ndo vatyi cuu zaquihin ityi vaha ndo sii ñiyiví ñia sito. Ta sica iñi ndo vatyi cuu ndo tañi minoo ñúhu ndisi zandisi sii ñiyiví sica noo nu ñaa.

²⁰ Cuu zacuahua ndo sii ñiyiví ña sito sa vaha, cuñi ndo, ta zaquihin ityi vaha ndo sii ñu tañi sa ndiyahi cuu ñu vatyi sihin tuhun i saha ra Ndyoo sii ra Moisés ta sa sito ndo tandihí cuii sa vaha ta sa ndisa, catyi ndo.

²¹ Zacuahua ndo sii inga ñiyiví, zoco ta cutuhva ca maa ndo. Zacuahua xaan ndo sii ñiyiví vatyi ma zuhu ñu, zoco zuun ñi maa ndo zuhu ndo. ¿Atu ña ndisa?

²² Catyi ndo vatyi ña vaha cuu cuzu minoo rayíi sihin minoo ñaha tatu yiví ñazihí ra cuu, zoco zavaha ndo cuhva cuan. ¿Atu ña tacuan? Cuxaan ndo tatu zacahnu ñiyiví

zandu yutu, zoco zuhu ndo ndaha tyiño nu iyo vehe ñuhu si.

²³ Vaha xaan ñiyiví cuu maa ndo vatyi tyaa ndo yahvi tuhun i saha ra Ndyoo sii ra Moisés, catyi ndo. Zoco ña tyaa ndo yahvi sii si sa ndisa cuii, ta sihin cuhva cuan ña zacahnu ndo sii ra Ndyoo.

²⁴ Tañi catyi Tuhun Ndyoo: “Ñiyiví sa yiví ñiyiví hebreo cuu, cahan ñu ndya vaha ñi sii ra Ndyoo sa cuenda sa ña vaha sa zavaha maa ndo.”

²⁵ Tatu ndisa cuii vatyi zavaha ndo cuhva catyi tuhun i saha ra Ndyoo sii ra Moisés, tyindye si sa tyaa ndo yahvi costumbre sa tahndya ñii xiñi xuu lee. Zoco tatu ña tyaa ndo yahvi tandihí tuhun i saha ra Ndyoo, yiví ñiyiví ra cuu sii ndo. Ñahñi tyindye si sa tyaa ndo yahvi sii costumbre cuan. Tañi minoo zeña ñi cuu si vatyi ñiyiví cuenda ra Ndyoo cuu sii ndo, zoco yiví.

²⁶ Ta ñiyiví tyaa yahvi sa ndisa tuhun i saha ra Ndyoo sii ra Moisés, vazu ña tyaa ñu yahvi costumbre cuan, zoco zuun ñi cua tiin cuenda ra Ndyoo sii ñu tañi tatu zavaha ñu sii si.

²⁷ Vazu ña zavaha ñu costumbre cuan, zoco tyaa ñu yahvi sii tuhun i saha ra Ndyoo. Maa ñu cuu ñu cua zañaha sii maa ndo vatyi iyo cuatyi ndo. Vatyi maa ndo i ñihi ndo tuhun i saha ra Ndyoo sii ra Moisés ta zavaha ndo costumbre cuan, zoco ña tyaa ndo yahvi cuhva catyi tuhun i saha ra Ndyoo sa ndisa.

²⁸ Vazu ñiyiví hebreo cuu ndo zoco ña cuñi si catyi si vatyi ñiyiví cuenda ra Ndyoo cuu sii ndo sa ndisa. Ta costumbre sa tahndya ñii xiñi xuu lee, ña zatyiño si maa ñi sa cuenda coño ñuhu ñiyiví.

²⁹ Zoco ñiyiví sa cuu ñiyiví hebreo sa ndisa cuii cuu ñu sa zama cuhva iyo ñu ndya añima ñu. Tyaa ñu yahvi tuhun i saha ra Ndyoo, ta zavaha tucu ñu costumbre cuan vatyi cuñi ñu zañaha ñu vatyi zehe

ra Ndyoo cuu sii ñu sa ndisa. Ta vazu ma zacahnu ñiyivi sii ñu cuhva cuan, zoco cua catyi ra Ndyoo vatyi vaha ñu.

3

¹ ¿Atu vaha ca sa cuu yo ñiyivi hebreo? ¿Atu tyindyee costumbre circuncisión cuan sii yo?

² Iyo cuaha xaan cuhva tyindyee si sa cuu yo ñiyivi hebreo, ta sa ñiñi ca cuu sa saha maa ra Ndyoo tandihí tuhun ra sii ñiyivi sahnu sii yo.

³⁻⁴ Vazu cuaha xaan ra hebreo ña sino iñi cuhva catyi ra Ndyoo, zoco zuun ñi cua zavaha maa ra Ndyoo cuhva catyi ra. Vazu catyi tandihí cuii ñiyivi vatyi ma zavaha ra cuhva catyi ra, zoco cua zavaha ra sii si. Tañi catyi si nuu tutu ra Ndyoo: "Cua ndyehe ñiyivi vatyi tuhun cohon cuu sa ndisa, ta cua coto ñu vatyi ra cahan sa ndisa cuun."

⁵ Ta vityi cua quehin cuhva cahan ñiyivi. Catyi ñu vatyi vaha xaan ca sa zavaha yo sa ña vaha, ta sihin cuhva cuan zañaha si vatyi vaha xaan ca cuu ra Ndyoo. Ta catyi ñu vatyi ña vaha sa tasi tuñi ra Ndyoo sii yo vatyi tyindyee si sii ra sa zavaha yo sa ña vaha vatyi zañaha si vatyi vaha xaan maa ra, catyi ñu.

⁶ Zoco ña ndisa sa tacuan vatyi tatu tacuan cuu si, ma tyicuhva ra Ndyoo sii ñiyivi ñuu ñiyivi.

⁷ Tatu sica iñi yo vatyi vaha ca sa cuvatya yo ta ziqui cua coto ñiyivi vatyi ndisa xaan cuu tuhun cahan maa ra Ndyoo ta cua zacahnu ca ñu sii ra. Zoco ña tacuan cuñi si vatyi tatu tacuan sica iñi yo, ma cutuñi iñi yo ñaa cuenda cua tyicuhva ra Ndyoo sii yo tañi ñiyivi iyo cuatyti.

⁸ Iyo ñiyivi catyi ñu: "Nazavaha ca yo sa ña vaha ta cua zañaha si vatyi vaha xaan ca ra Ndyoo vatyi cuaha xaan cuatyti yo cua

zandasi ra." Ta catyi ñiyivi cahan ndya vaha ñi sii maa yo vatyi zuun ñi cuhva cuan zacuaha yo, catyi ñu. Ñihi xaan cua zandyeha ra Ndyoo tundoho sii ñiyivi cahan cuhva cuan vatyi tacuan tahan si sii ñu.

Iyo cuatyti sii tandihí cuii yo

⁹ Ta yozo caa ¿atu vaha ca cuu maa yo ñiyivi hebreo ta ziqui inga ñiyivi? Ña ndisa. Sa nacatyi ndi sihin ndo vatyi iyo cuatyti sii tandihí cuii ñiyivi. Iyo cuatyti sii ñiyivi hebreo ta sii ñiyivi sa yivi ñiyivi hebreo cuu.

¹⁰ Tañi catyi Tuhun ra Ndyoo: Yoñi minoo ñiyivi vaha sa ndisa cuii, numinoo.

¹¹ Yoñi minoo ñu sa cutuñi iñi. Yoñi maa nanducu sii ra Ndyoo.

¹² Tandihí cuii ñu i naa iñi ñu sii ra Ndyoo.

I zandoo ñu ityi ra, ta ñahñi minoo cuhva vaha zavaha ñu sa cuenda ra Ndyoo. Numinoo ñu ña zavaha sa vaha, yoñi maa.

¹³ Quiñi xaan cahan ñu, ta vatya xaan ñu sihin yuhu ñu.

Cuu si minoo xico iñi xaan sahan sa quita sisi ñaña sa tacoho yuhu.

¹⁴ Cahan ñu ndya vaha ñi sihin ñiyivi.

Ta quiñi xaan cahan ñu sii ñu.

¹⁵ Yatyi xaan cua cahñi ñu ñiyivi.

¹⁶ Nu yulu ñu saha ñu tundoho, ta saha xaan ñu sa cuihya iñi sii inga ñiyivi.

¹⁷ Ña sito ñu yozo caa zacuu ñu ta coo sa taxi sii ñu sihin ra Ndyoo ta sihin inga ñiyivi.

¹⁸ Ta ña yuhu maa ñu sii ra Ndyoo. Catyi Tuhun ra Ndyoo.

¹⁹ Sito yo vatyi tandihí tuhun i saha ra Ndyoo sii ra Moisés, cahan si sa cuenda ñiyivi hebreo. Ta cua coto tandihí ñu vatyi iyo cuatyti ñu nuu ra Ndyoo, ta ma cuu catyi ñu vatyi ñahñi cuatyti ñu. Ta tacuan tucu tandihí ñiyivi ñuu ñiyivi.

²⁰ Yoñi numinoo ñiyivi cua nduvaha añima ityi nuu maa ra Ndyoo sihin sa tyaa xaan ñu yahvi tuhun i saha ra Ndyoo sii ra Moisés vatyi tuhun cuan cuenda zacoto ñi si sii ñu ñaa sa cuu cuatyi ñu.

Níhi yo sa cacu añima yo sihin sa sino ñi iñi yo sii ra Ndyoo

²¹ Vityi sito yo vatyi yivi sihin tuhun i saha ra Ndyoo sii ra Moisés ta nduvaha añima yo ityi nuu maa ra. Zuun ñi Testamento Sahnu catyi si cuhva cuan.

²² Vityi zanduvaha ra Ndyoo cuhva iyo ñiyivi sihin sa sino ñi iñi ñu sii ra Jesucristo. Ta inuu cuii ñi tiñ cuenda ra sii ñu sino iñi tacuan vazu ñu hebreo a inga ñu vatyi ñia ziañ ndyehe ra sii yo.

²³ Ta iyo cuatyi sii tandihí cuii ñiyivi. Sica xaan ndyaa tandihí yo nuu ra Ndyoo ta sihin cuhva cuñi ra.

²⁴ Zoco i zavaha maa ra Ndyoo minoo tumañi iñi cahnu xaan sii yo sa tyiyahvi ra Jesucristo sa cuenda cuatyi yo. Ta vityi catyi ra Ndyoo vatyi ñahñi ca cuatyi maa yo sa sino iñi sii ra Cristo vatyi i zavaha ra cuhva cuan.

²⁵ I zaquisi ra Ndyoo sii ra Cristo. Ta i ndoho ra. Ta i sihi ra sa cuenda cuatyi maa yo. Ta ma cuxaan ca ra Ndyoo sihin yo tatu sino iñi yo vatyi sati niñi ra Cristo sa cuenda maa yo. Ta i zandyee xaan ra Ndyoo iñi ra ndyehe ra sii yo, ta ña cañi ra sii yo cuenda cuatyi i zavaha yo quivi cumañi ca coto yo Tuhun ra.

²⁶ Ta i zañaha ra vatyi vaha xaan ra sihin yo vatyi i ndoho ra Cristo sa cuenda cuatyi maa yo. Ta yucuan cuenda catyi ra Ndyoo vatyi ñahñi cuatyi iyo sii ñiyivi sino iñi sii ra Jesús.

²⁷ Ihya cuu cuenda sa ma cuu catyi yo vatyi vaha xaan maa yo. Ma cuu cahan yo tacuan vatyi ma nduvaha añima yo ityi nuu ra Ndyoo sihin sa zavaha yo sa vaha.

Maa ñi sihin sa sino iñi yo sii ra Jesucristo ta nduvaha añima yo nuu ra Ndyoo.

²⁸ Sito ndi vatyi catyi ra Ndyoo vatyi ñahñi cuatyi iyo sii minoo ra tatu sino iñi ra sii ra Cristo vazu ña tyaa ra yahvi sii tuhun i saha ra Ndyoo sii ra Moisés.

²⁹ Ndisa vatyi zacahnu ñiyivi hebreo sii ra Ndyoo, zoco zacahnu tucu inga ñiyivi sii ra. Zandasi ra Ndyoo cuatyi ñiyivi hebreo, ta tacuan tucu sihin inga ñiyivi vatyi yivi Ndyoo cuenda ñiyivi hebreo ñi cuu ra. Ndyoo cuu ra sa cuenda tandihí ñiyivi.

³⁰ Minoo tuhun ñi ra Ndyoo iyo, ta catyi ra vatyi ñahñi ca cuatyi iyo sii ñiyivi sino iñi sii ra Cristo vazu zavaha ñu costumbre circuncisión cuan a vazu ma zavaha ñu sii si.

³¹ ¿Atu sa cuenda sa sino iñi yo ta catyi yo vatyi ña ñiñi ca tuhun i saha ra Ndyoo sii ra Moisés? Ma catyi yo tacuan. Vityi iyo cuhva sii yo ta cuu tyaa yo yahvi sii si sa ndisa cuii vatyi tyindyee ra Cristo sii yo.

4

Cuhva i zañaha ra Abraham cuhva i sicoo ra

¹ ¿Ta yozo caa cuu si sa cuenda ra Abraham, ra cu ñiyivi sahnu sii maa yo ñiyivi hebreo? ¿Ñaa cuenda catyi ra Ndyoo vatyi vaha ra Abraham?

² Tatu catyi ra Ndyoo vatyi ñahñi cuatyi ra Abraham vatyi i zavaha ra sa vaha, cuu catyi maa ra Abraham vatyi vaha xaan ra. Zoco ña cuu catyi ra Abraham tacuan ityi nuu ra Ndyoo.

³ I catyi ra Ndyoo vatyi vaha ra Abraham cuhva catyi Tuhun Ndyoo: “I sino ifi ra Abraham sa catyi ra Ndyoo, ta yucuan cuenda catyi ra Ndyoo vatyi ñahñi cuatyi ra.” Catyi si.

⁴ Minoo ra zatyiño, ña ñihí ra xuhun sa caha ñi. Tyiyahví ñu sii ra vatyí zatyiño ra.

⁵ Zoco minoo ra ña zatyiño sa cuenda cuhva cacu añima ra zoco sino iñi ra sii ra zandasi cuatyí ñiyívi, sihin sa sino ñi iñi ra cuan ta ñihí ra cuhva catyi ra Ndyoo sihin ra vatyí ñahñi cuatyí ra.

⁶ I catyi tucu ra David vatyí zíi xaan cuñi minoo ra tatu catyi ra Ndyoo sihin ra vatyí ñahñi cuatyí ra. Ñahñi sa zavaha ra ta ñihí ra sa tacuan. Tumañi iñi ñi cuu si sa saha maa ra Ndyoo sii ra.

⁷ Ihya cuu cuhva i catyi ra David: Zíi xaan cuñi ñiyívi, ñu i zandasi ra Ndyoo cuatyí.

⁸ Zanaa ra sii si.
Zíi xaan cuñi ñiyívi, ñu ña tyaa ca ra Ndyoo cuatyí zíqui.

⁹ Ma cuu catyi yo vatyí maa ñi ñiyívi tyaa yahvi costumbre circuncisión cuu ñu ñihí tumañi iñi cuan sii ra Ndyoo. Zuun ñi cuhva cua ñihí ñiyívi ña tyaa yahvi costumbre cuan. Sihin sa sino ñi iñi ra Abraham ta catyi ra Ndyoo sihin ra vatyí ñahñi ca cuatyí ra.

¹⁰ ¿Ta ama i catyi ra Ndyoo vatyí ñahñi cuatyí ra Abraham? ¿Atu sa yaha zavaha ra costumbre circuncisión a cumañi ca? Cumañi ca zavaha ra sii si ta sa i catyi ra Ndyoo sihin ra vatyí sa i nduvaha añima ra.

¹¹ Ta zíqui i zavaha ra costumbre cuan tañi minoo zeña vatyí sa yaha nduvaha añima ra sihin sa sino iñi ra, cuee ca sa zavaha ra cuhva cuan. Ta zíqui i nduu ra minoo ñiyívi sahnu sii tandihí ñiyívi sino iñi sii ra Ndyoo ta ña zavaha ñu costumbre cuan. Sa cuenda sa sino ñi iñi ñu ta catyi ra Ndyoo vatyí ñahñi ca cuatyí ñu.

¹² Ta nduu tucu ra Abraham minoo ñiyívi sahnu sii ñiyívi zavaha costumbre cuan, zoco tatu maa ñi costumbre cuan zavaha ñu, yívi ñiyívi ra Abraham cuu sii ñu. Nduu ra ñiyívi sii ñu ndyico sii ra sa ndisa

sihin cuhva sino xaan iñi ra. Ta sino ndisa cuui iñi ñu cuan sii ra Ndyoo cuee ca sa zavaha ñu costumbre cuan.

Sihin sa sino ñi iñi yo ta ñihí yo tumañi iñi sii ra Ndyoo

¹³ Ndyo ta sa naha i catyi ra Ndyoo sihin ra Abraham vatyí maa ra sihin ñiyívi sii ra cua ñihí ñu tandihí ñuu ñiyívi. Ñá ñihí ñu cuhva cuan sihin sa tyaa ñu yahvi sii tuhun i saha ra Ndyoo sii ra Moisés. I ñihí ñu sii si sihin sa sino ñi iñi ñu sii ra Ndyoo vatyí zavaha ra cuhva catyi ra. Ta i catyi ra Ndyoo vatyí ñahñi cuatyí ñu.

¹⁴ Vatyí tatu maa ñi ñiyívi tyaa xaan yahvi ley sa saha ra Ndyoo sii ra Moisés cuu ñu cua ñihí ndatu sii ra Ndyoo, tacuan ta ñahñi cua tyindye si sa sino iñi yo sii ra Jesucristo, zoco ña tacuan cuu si, vatyí tatu tacuan cuu si, ña zavaha ra Ndyoo cuhva catyi ra sa ndisa.

¹⁵ Sa cuenda tuhun i saha ra Ndyoo sii ra Moisés ta catyi ra Ndyoo vatyí iyo cuatyí ñiyívi. Tatu ñahñi sa catyi ñaa sa cuu sa ña vaha, ma cuu tyaa ñiyívi yahvi sii si, ta ma cuu sa ma tyaa ñu yahvi sii si.

¹⁶ Yucuan cuenda sihin sa sino ñi iñi yo ta ñihí yo sa vaha vatyí tacuan ta cuu cuu si minoo tumañi iñi saha maa ra Ndyoo sii yo. I catyi ra Ndyoo sihin ra Abraham vatyí cua ñihí ra minoo sa vaha. Ta i catyi tucu ra Ndyoo vatyí tandihí ñiyívi sino iñi sii ra cua ñihí ñu sa vaha vatyí sino iñi ñu cuhva i sino iñi ra Abraham. Cua cuhva ra Ndyoo sii si sii ñiyívi tyaa xaan yahvi tuhun i saha ra sii ra Moisés tatu sino iñi ñu sii ra Jesucristo. Ta cua cuhva ra sii si sii ñiyívi sino ñi iñi tañi maa ra Abraham. Ta maa ra cuu minoo ñiyívi sahnu sii tandihí cuii yo sa sino iñi.

¹⁷ Catyi tutu ra Ndyoo sa cuenda ra Abraham: “Cuaha xaan zehun cua coo nacahnu ñuu ñiyívi.” Zutu yo cuu sii ra Abraham nuu ra Ndyoo. Sino xaan iñi ra Abraham

sii ra Ndyoo. Cuu zanandoto ra Ndyoo sii ñiyivi i sihi. Ta tandihí sa cua cuu ityi nuu ca, cua cuu si vatyi maa ra Ndyoo cua zavaha sii si.

¹⁸ I sino iñi ra Abraham sa cahan ra Ndyoo vazu ma cuu si cuñi ra, zoco i cuu si. Ta i nduu ra zutu sahnu sii cuaha xaan ñiyivi. Tañi i catyi ra Ndyoo sihin ra: “Tyehen cua nducuaha ñiyivi suun.”

¹⁹ I sito ra Abraham vatyi sa sahnu xaan ra. Sa yatyí minoo ziendu cuiya ra. Sahnu xaan tucu maa ña Sara, ta ma cuu ca coo zehe ña. Zoco ña siin sino iñi ra Abraham vazu sa sahnu xaan nduu tahan ñu.

²⁰ Ñá sica iñi ra Abraham vatyi ma cuu ca coo zehe ñu, zoco i sino iñi ra tuhun i catyi ra Ndyoo sihin ra. Ñá ndu-uu iñi ra. I zacahnu ra sii ra Ndyoo.

²¹ I sito vaha xaan ra vatyi cuu zacuu ra Ndyoo tandihí sa i catyi ra sihin ra.

²² Yucuan cuenda i catyi ra Ndyoo vatyi ñahñi cuatyí ra Abraham vatyi i sino iñi ra.

²³⁻²⁴ Tacuan i catyi ra Ndyoo sa cuenda ra Abraham. Ta i cahan tucu ra tuhun cuan ndya sa cuenda maa yo. Cua catyi tucu ra vatyi ñahñi cuatyí iyo sii maa yo vatyi sino iñi yo sii ra Ndyoo, ra i zanandoto sii ra Jesús sa i sihi ra. Ta ra Jesús cuu ra ndyaca ñaha sii yo.

²⁵ I sihi ra Jesús sa cuenda catyi maa yo. Ta i nandoto ra vatyi tacuan ta cua cuu catyi maa ra Ndyoo vatyi ñahñi ca cuatyí yo iyo.

5

Ñahñi cuatyí cua tyaa ra Ndyoo sata yo

¹ Yucuan cuenda catyi ra Ndyoo vatyi ñahñi ca cuatyí yo vatyi sino iñi yo. Sa iyo sa taxi sii yo sihin ra Ndyoo vityí sa cuenda maa ra Jesucristo.

² Sa cuenda maa ra ñihi yo tumañi iñi sii ra Ndyoo vatyi sino iñi

yo. Ñihi xaan yo tumañi iñi sii ra Ndyoo, ta zii xaan cuñi yo. Ta nii cuu iñi yo vatyi cua cuhun yo nu ndyaa ra Ndyoo ta cua nduu yo tañi maa ra.

³ Ta ña tacuan ñi, zoco zii cuñi tucu yo vazu ndyehe yo tundoho vatyi sito yo vatyi tyindye si sii yo ta cua coo ca tundyee iñi sii yo tatu cuaha tundoho ndyehe yo.

⁴ Ta tatu iyo tundyee iñi sii yo vaha xaan cuu yo ityi nuu ra Ndyoo. Ta tatu vaha xaan yo nuu ra, nii xaan cua cuu iñi yo vatyi cua ñihi yo tandihí sa vaha sa saha maa ra.

⁵ Ta tatu sa cunii vaha iñi yo, sito yo vatyi ma zandavi ñaha ra Ndyoo sii yo. Tacuan sito yo vatyi sito yo vatyi cuñi xaan ra Ndyoo sii yo. Ta Tatyi Ii sa saha maa ra sii yo, iyo si añima yo ta zacoto si sii yo vatyi cuñi xaan maa ra Ndyoo sii yo sihin minoo cuhva vaha xaan.

⁶ Ñá cuu zacacu yo sii yo, zoco sa tahan si quívi sa i catyi ra Ndyoo ta ziqui i quisi ra Cristo. Ta i sihi ra sa cuenda ñiyivi ña vaha tañi maa yo.

⁷ Sito yo vatyi ma cuu cuu yo sa cuenda ñiyivi ña vaha. Zoco iyo saha cua cuu minoo ñiyivi sa cuenda inga ñiyivi vaha xaan ca.

⁸ Ta maa ra Ndyoo zañaha ra vatyi cuñi xaan ra sii yo vatyi vazu ñiyivi iyo xaan cuatyí cuu maa yo, zoco i sihi ra Cristo sa cuenda yo.

⁹ Ta vityí sa cuenda niñi ra Cristo ta catyi ra Ndyoo vatyi ñahñi ca cuatyí yo. Sa cuenda ra Cristo i tiin cuenda ra Ndyoo sii yo, ta ma zandyhe ra tundoho sii yo quívi cua cuxaan ra ta cua zandyhe ra tundoho sii ñiyivi iyo cuatyí, quívi cua ndihí ñuu ñiyivi.

¹⁰ Ta maa yo i cuu ñiyivi xaan iñi sii ra Ndyoo, zoco i zanduvaha ra sii yo sihin ra quívi i sihi Zehe ra sa cuenda yo. Ta vityí ndito ra tandihí cuii tyiemvu, ta sito yo vatyi iyo xaan ca cuhva sa cua zacacu ra sii yo vatyi iyo ra sisi añima yo.

¹¹ Ta ña taquan ñi. Zii xaan cuñi yo vityi vatyi iyo sa taxi sii yo sihin ra Ndyoo sa cuenda cuhva i zavaha ra Jesucristo, ra ndyaca ñaha sii yo.

Cuhva i zavaha ra Adán ta cuhva i zavaha ra Cristo

¹² Sa cuenda minoo ra ta i quihvi cuatyi ñuu ñiyivi. Ta cuenda cuatyi i zavaha ñiyivi, ta i quisaha cuhva sa sihi tandihí ñuu vatyi iyo cuatyi sii tandihí yo.

¹³ Ta sa iyo cuatyi ñuu ñiyivi cumañi ca cuhva ra Ndyoo tuhun ra sii ra Moisés. Ta quiví cumañi ca cuhva ra Ndyoo tuhun ra, ñá tyaa ra cuatyi sata ñiyivi sa minoo minoo cuatyi zavaha ñu vatyi ta coto ca ñu tuhun i saha ra sii ra Moisés.

¹⁴ Zoco i sihi ñu ndya quiví i zavaha ra Adán cuatyi cuan ndya cuhva ndya quiví i sicoo ra Moisés vazu ñá zavaha ñu sa zuun ñi cuatyi i zavaha ra Adán. Ta i cuu ra Adán tañi minoo ra sa cua quasi ityi nuu ca.

¹⁵ Saha maa ra Ndyoo tumañi iñi sii ñiyivi, ta tucu xaan cuu cuhva i zavaha ra Ndyoo ta ziquí cuhva i zavaha ra Adán. Vatyi sihin sa minoo tuhun ñi cuatyi i zavaha ra Adán ta cuaha xaan ñiyivi i sihi, zoco sihin tumañi iñi sa saha xaan ra Ndyoo ta i zavaha ra Jesucristo minoo cuhva vaha xaan sa cua zanaa ra cuatyi sii cuaha xaan ñiyivi.

¹⁶ Tucu ca cuu tumañi iñi sa saha maa ra Ndyoo ta ziquí cuhva i zavaha ra Adán. Minoo ñi cuatyi i zavaha ra cuan, ta yucuan cuenda cua tasi tuñi ra Ndyoo sii tandihí ñiyivi. Zoco vityi sihin tumañi iñi sa saha maa ra Ndyoo ta ña tyaa ca ra cuatyi ziquí ñiyivi vazu cuaha xaan cuatyi ñu.

¹⁷ Ndisa vatyi i sihi cuaha xaan ñiyivi sa cuenda sa i zavaha sa minoo tuhun ñi ra Adán. Zoco vityi cuaha xaan ñiyivi cua ñihi tumañi iñi sa saha maa ra Ndyoo, ta cua cundito ñu tandihí cuii tyiemvu.

Cua nduvaha añima ñu sa cuenda sa zavaha minoo ñi ra, ra Jesucristo.

¹⁸ Sa cuenda cuatyi sa i zavaha minoo ñi ra, ta i catyi ra Ndyoo vatyi iyo cuatyi sii tandihí ñiyivi, ta tahan si sa cuu ñu. Ta zuun ñi cuhva sa cuenda minoo sa vaha sa i zavaha minoo ñi ra ta i catyi ra Ndyoo vatyi ñahñi cuatyi iyo sii tandihí ñiyivi, ta cua cundito ñu tandihí cuii tyiemvu.

¹⁹ Sa cuenda sa ñá tyaa minoo ra yahvi, ta i nduu tandihí ñiyivi ñiyivi cuatyi. Zoco sa cuenda sa i tyaa inga ra yahvi, ta cua tñin cuenda ra Ndyoo sii ñiyivi tañi sa ñahñi ca cuatyi ñu.

²⁰ I saa quiví i saha ra Ndyoo tuhun ra sii ra Moisés, ta i ncoto ñiyivi vatyi cuaha xaan cuatyi ñu. Zoco vazu cuaha xaan cuatyi ñu, zoco vaha xaan añima maa ra Ndyoo, ta i saha xaan ca ra tumañi iñi.

²¹ Sa cuenda cuatyi ñiyivi ta i quisaha sihi ñu. Ndyaca ñaha tuhun sihi sii ñu. Ta vityi sa cuenda sa i zavaha ra Jesucristo, ra ndyaca ñaha sii yo, ta saha ra Ndyoo tumañi iñi sii ñiyivi. Catyi ra vatyi ñahñi ca cuatyi ñu. Yucuan cuenda cua cundito ñu tandihí cuii tyiemvu. Vityi sihin sa saha maa ra Ndyoo tumañi iñi sii yo, ta ña ndyaca ñaha ca tuhun sihi sii yo.

6

Ma zavaha ca yo cuatyi

¹ ¿Atu vaha catyi yo nazavaha ca yo cuatyi vatyi tacuan ta cua cundahvi ca iñi ra Ndyoo sii yo?

² Ña tacuan. Tatú sa i zaña yo cuatyi yo sa ndisa, ma cuu ca zavaha ca yo sii si.

³ I sicoo ndutya yo sa cuenda ra Cristo Jesús, ta sa sicoo ndutya yo cuu tañi sa sihi yo sihin ra Cristo.

⁴ Cuu si tañi sa i sihi yo ta i quihvi coño ñuhu yo sisi ñaña iñi ñi sihin ra nu i sicoo ndutya yo cuenda ra,

ta i nandoto yo sihin ra vatyi iin ñi cuu yo sihin ra. Ta iyo xaan cuhva sii Zutu ra, ta i zanandoto ra sii ra Jesús vatyi tacuan ta nduu maa yo ñiyivi saa ta coo yo minoo cuhva saa.

⁵ Tatu sa ndu-iin yo sihin ra nu i sihi ra, cua ndu-iin tucu yo sihin ra inga cuhva, ta cua coo yo minoo cuhva saa sihin ra.

⁶ Sito yo vatyi i ndihí cuhva sa sicoo ityi sata. Ña iyo ca yo cuhva i tyaa yo yahvi sii coño ñuhu yo ta zavaha yo cuhva ña vaha sa cuñi si. Ña tacuan.

⁷ Vatyi maa yo sa i sihi sihin ra Cristo, ñahñi ca cuhva cuu zacuu cuatyi sihin yo. Ma cuu ca cundyaca ñaha si sii yo.

⁸ Ta tatu sa i sihi yo sihin ra Cristo, sino iñi yo vatyi cua cundito tucu yo sihin ra.

⁹ Vatyi sito yo vatyi i nandoto ra Cristo sisi sa i sihi ra, ta ma cuu ca ra. Ma cundyaca ñaha ca tuhun sihi sii maa ra.

¹⁰ Minoo saha ñi i sihi ra sa cuenda cuatyi ñiyivi. Ta vityi ndito ra. Ta iyo ra iin ñi sihin ra Ndyoo tandihí cuii tyiemvu.

¹¹ Yucuan cuenda maa ndo, zaha ndo tuhun sa i sihi ndo ityi nuu cuatyi cuan vatyi ma cuu ca cundyaca ñaha si sii ndo. Zoco ndito ndo sa cuenda ra Ndyoo vatyi sa ndu-iin ndo sihin ra Cristo Jesús, ra ndyaca ñaha sii yo.

¹² Yucuan cuenda ma cuhva ca ndo sa cundyaca ñaha cuatyi cuan sii ndo. Ma tyaa ca ndo yahvi cuhva ña vaha sa cuñi coño ñuhu ndo zavaha si.

¹³ Ma cuhva cuenda ndo coño ñuhu ndo sii cuatyi cuan, ta ma zavaha ndo sa ña vaha. Cuhva ndo sii ndo sii ra Ndyoo vatyi ñiyivi sa i nandoto cuu ndo. Ta zatyiño ndo sa cuenda ra Ndyoo, ta zavaha ndo sa vaha.

¹⁴ Vatyi cuatyi cuan, ñahñi ca sa cuu zacuu si sihin ndo vatyi ña ndyaca ñaha ca tuhun i saha ra Ndyoo sii ra Moisés sii ndo. Ña tacuan ñihi

ndo cuhva cacu añima ndo. Vityi ndito ndo sa cuenda tumañi iñi sa saha maa ra Ndyoo sii ndo.

Nacuhva ndo sii ndo sii ra Ndyoo ta zavaha ndo maa ñi sa vaha

¹⁵ Ta yozo caa vityi ¿atu zavaha ca yo cuatyi vatyi ña ndyaca ñaha ca tuhun i saha ra Ndyoo sii ra Moisés sii yo ta vityi saha xaan maa ra Ndyoo tumañi iñi sii yo? Ña tacuan cuñi si.

¹⁶ Sito ndo vatyi tatu nduu ndo muzu sii minoo ñiyivi, tyaa ndo yahvi sa catyi ra. Ta muzu cuu ndo sii ra sa tyaa ndo yahvi. Tatu tyaa ndo yahvi sii cuatyi, cua cuu cuii ndo. A tatu tyaa ndo yahvi sii ra Ndyoo cua catyi ra vatyi sa nduvaha ndo sihin cuhva iyo ndo.

¹⁷ Ityi sata maa ñi cuatyi i zavaha ndo, zoco vityi sehi tyahvi ndyoo sii ra Ndyoo vatyi vityi sihin tandihí cuii afiima ndo tyaa ndo yahvi Tuhun Vaha sa i sino iñi ndo.

¹⁸ Sa ndasi cuatyi ndo. Ña cuu ca ndo muzu sii cuatyi cuan. Sa i nduu ndo muzu sii sa vaha tañi cuñi ra Ndyoo.

¹⁹ Quehin ziqui minoo cuhva vatyi ta coto ca ndo tandihí yozo caa iyo maa ra Ndyoo. Ityi sata i zavaha ndo cuatyi. Maa ñi sa ña vaha i zavaha ndo. Ta quiñi xaan ca nandu cuhva zavaha ndo. Zoco vityi nacuhva ndo sii ndo sii ra ta zavaha ndo maa ñi sa vaha sa ndisa cuii vatyi cua nduu ndo ñiyivi vaha xaan cuhva cuñi ra Ndyoo.

²⁰ Quiñi sa i cuu ndo muzu sii cuatyi cuan, ñá cuu zavaha ndo sa vaha.

²¹ ¿Ta ñaa sa vaha ñihi ndo sihin cuhva i zavaha ndo? Ñahñi maa. Ta vityi cucahan nuu ndo sa cuenda sa i zavaha ndo vatyi sa cuenda cuhva ña vaha cuan ta cua ndoho ñiyivi zavaha sii si tandihí cuii tyiemvu.

²² Zoco vityi sa zandasi ra Ndyoo cuatyi ndo, ta ña ndyaca ñaha ca

si sii ndo. Ta sa i nduu ndo muzu maa ra Ndyoo. Ta sa ñihí ndo sihin cuhva ya cuu sa nduu ndo ñiyiví vaha. Ta quíví cua ndihí sa ndito ndo ihyá ñuu ñiyiví ya, cua cundito ndo tandihí cuii tyiemvu sihin ra Ndyoo.

²³ Tatu zavaha yo sa ña vaha, sa cua ñihí yo sihin cuhva cuan cuu sa cua cuu cuii yo. Zoco tatu tiín cuenda yo sa vaha xaan sa saha maa ra Ndyoo sii yo, cua cundito yo tandihí cuii tyiemvu sihin ra Jesucristo, ra ndyaca ñaha sii yo.

7

Ziquí minoo cuhva, cuhva iyo ñiyiví tatu sa tindaha ñu

¹ Ndoho yañi xaa, sa sito maa ndo tuhun i saha maa ra Ndyoo sii ra Moisés. Ta sito ndo vatyi tatu sa i sihi minoo ñiyiví, ña cuñi ca si sa tyaa ñu yahvi sii si.

²⁻³ Cua quehin ziquí minoo cuhva. Tatu tindaha minoo ñaha sihin minoo rayíi, catyi tuhun i saha ra Ndyoo sii ra Moisés vatyi ñazihí ra cuu sii ña ndya quíví cua cuu ra. Nií ñi sa ndito ra ta cua cuu ña minoo ñaha zana tatu cua coo ña sihin inga ra ta ndito ca ra tindaha sihin ña. Zoco tatu sa sihi ra, ña ndyaca ñaha ca tuhun sa tindaha sii ña. Cuu tindaha ña inga saha, ta ma cuu catyi ñiyiví vatyi ñaha zana cuu ña.

⁴ Ta zuun ñi cuhva cuan iyo sihin ndoho yañi xaa. Cuu catyi yo vatyi iin ñi cuu ndo sihin ra Cristo. Quíví i sihi ra ta cuu si tañi sa sihi tucu maa yo. Ta yucuan cuenda ña iyo ca ndo cuenda tuhun i saha ra Ndyoo sii ra Moisés. Vityi ñiyiví ra Cristo cuu sii ndo. Maa ra cuu ra i nandoto sisi sa i sihi ra, ta sihin cuhva cuan ta cuu zatyíño vaha ndo tyíño maa ra Ndyoo.

⁵ Quíví sa tañaha ca sino iñi yo sii ra Cristo, cuaha xaan sa ña vaha i zavaha yo. I sito yo cuhva catyi tuhun i saha ra Ndyoo sii ra Moisés vatyi ma zavaha ca yo sa

ña vaha, ta yucuan cuenda cuñi ca yo zavaha yo sa ña vaha cuan. Ta sihin cuhva cuan ta cua cuu cuii yo.

⁶ Zoco vityi ña ndyaca ñaha ca tuhun i saha ra Ndyoo sii ra Moisés sii yo vatyi sa i sihi yo sihin ra Cristo, ta i ndihí cuhva cuan sa cuenda maa yo. Ta yucuan cuenda ña iyo ca yo cuhva catyi si nuu tutu, tuhun sahnu. Iyo yo minoo cuhva saa vatyi tyindyee Tatyi lí maa ra Ndyoo sii yo.

Iyo ca cuatyi yo vazu sa sino iñi yo

⁷ ¿Ta yozo caa vityi? ¿Atu catyi tuhun sahnu vatyi zavaha ca yo cuatyi? ¡Ña catyi si numinoo saha! Zoco vityi site ñaa sa cuu cuatyi sa cuenda tuhun cuan. Catyi si: “Ma ndyiyo iñun ndaha tyíño inga ñiyiví.” Ta yucuan cuenda site vatyi ña vaha zavehi cuhva cuan.

⁸ Tatu sa vatyi ñahñi tuhun cuan, ma cote ñaa sa cuu cuatyi, ta ma cuñi zavehi sii si. Zoco quíví sa site vatyi ña vaha sa ndyiyo iñi yo, ta i cuñi zavehi sii si vatyi iyo cuatyi añime.

⁹ Ta quíví ñá site ñaa sa catyi tuhun i saha ra Ndyoo sii ra Moisés, i sica iñi vatyi vaha ñiyiví cui. Zoco i saa quíví ta i cutuñi iñi cuhva catyi tuhun cuan, ta ziquí i site vatyi iyo cuatyi añime, ta i site vatyi minoo ñiyiví ña vaha cui.

¹⁰ Catyi tuhun cuan vatyi tatu tyaa ñiyiví yahvi sii si cua cundito ñu tandihí cuii tyiemvu. Zoco zuun ñi tuhun cuan cuu sa i zativí sii, vatyi ñá tyei yahvi sii si. Vatyi catyi si vatyi ra ña tyaa yahvi sii si, tahan si sa cua cuu cuii ra.

¹¹ Ta cuhva sa ña vaha i cuñi zavehi, i zandavi ñaha si sii. Ta cuhva catyi tuhun i saha ra Ndyoo sii ra Moisés vatyi ma cuu zavehi, i zavehi sii si. Ta yucuan cuenda tahan si sa cui.

¹² Tuhun i saha ra Ndyoo sii ra Moisés, vaha xaan si vatyi tuhun i saha maa ra Ndyoo cuu si cuan.

Ta tandih i tysiñ sa catyi ra Ndyoo vatyi zavaha yo, vaha xaan ta ndoo xaan si.

¹³ Ta tuhun vaha xaan cuan *żatu* sa yucuan cuu sa i zativi sii? Yivi. Sa ña vaha sa i cuñi zavehi cuu sa i zativi sii. Sa cuenda sa zavehi sii si ta tahan si sa cui. Tuhun i saha ra Ndyoo sii ra Moisés cuu sa i zañaha sii, vatyi cuatyi cuu cuhva cuñi zavehi, zoco zuun ñi i zavehi sii si. Ta sihin cuhya cuan ta i zañaha tuhun cuan sii, vatyi quiñi xaan cuu cuhva cuñi zavehi.

¹⁴ Sito yo vatyi tuhun cuan nacatyi si sihin yo cuhva cuñi ra Ndyoo sa zavaha yo. Ta yuhvi cui minoo ñiyivi iyo cuatyi vatyi zavehi cuhva ña vaha sa cuñi zavehi, ta ndyaca ñaha cuatyi cuan sii.

¹⁵ Ña cutuñi iñi ñaa sa tehin vatyi ña zavehi cuhva cuñi zavehi sa ndisa. Ta sa ña tahan maa iñi, yucuan cuu sa zavehi.

¹⁶ Ta tatu zavehi minoo cuhva ña vaha, sa siñi tuñi vaha sa iyo sii, catyi si sihin vatyi ña vaha cuu cuhva zavehi, ta catyi si vatyi vaha tuhun i saha ra Ndyoo sii ra Moisés.

¹⁷ Ta vityi ña cuñi zavehi sa ña vaha, zoco iyo ca cuatyi. Ta yucuan cuenda zavehi sii si.

¹⁸ Nacote vatyi minoo ñiyivi iyo cuatyi cui. Ñahñi numinoo cuhva vaha iyo sii. Cuñi zavehi sa vaha, zoco ña ñihi cuhva yozo caa zavehi sii si vatyi minoo ñiyivi cuatyi cui.

¹⁹ Vatyi ña zavehi sa vaha sa cuñi zavehi, zoco zavehi sa ña vaha vazu ña cuñi zavehi sii si.

²⁰ Ta sa zavehi sa ña vaha, zañaha si sii, vatyi iyo ca cuatyi. Ta cuatyi cuan cuu sa ndyaca ñaha sii.

²¹ Tacuan cuu si. Iyo minoo cuhva sii. Vazu cuñi zavehi sa vaha, zoco maa ñi sa ña vaha zavehi tandih saha.

²² Vatyi sihin sa siñi tuñi vehi tahan xaan iñi tandih tuhun i saha maa ra Ndyoo.

²³ Zoco iyo inga cuhva sii, ta ña tahan iñi si cuhva cuñi sa siñi tuñi vehi. Ta cuhva sa iyo sii, ña cuñi

maa si zavaha si sa vaha. Maa maa ñi sa ña vaha cuñi si zavaha si. Ta ndyaca ñaha si sii.

²⁴ ¡Ndañvi yuhvi ra ndahvi! ¿Yoo sa cua zacacu sii, sihin cuhva sa zavehi sa ña vaha cuan?

²⁵ Sehi tyahvi ndyoo sii ra Ndyoo sa cuenda ra Jesucristo ra ndyaca ñaha sii yo vatyi maa ra cua zacacu sii. Siñi tuñi vehi cuñi xein cundyique tandih tuhun i saha maa ra Ndyoo, zoco sihin inga cuhva sa iyo sii, ta zativi si sii, ta zavaha que sa ña vaha.

8

Tyindye xaan Tatyi Ii ra Ndyoo sii yo ta cuu coo yo minoo cuhva saa

¹⁻² Vityi ma zandoho ca ra Ndyoo sii ñiyivi sa ndu-ñin sihin ra Cristo Jesú vatyi ña zavaha ca ñu cuhva cuñi coño ñuhu ñu, zoco zavaha ñu cuhva cuñi Tatyi II. Vatyi Tatyi II cuan saha xaan si sa vaha sii yo sa cuenda ra Cristo Jesú. Ta i ndasi si sii, cuhva i sindyaca ñaha cuatyi sii, ta tuhun sihi.

³ I zaquisi ra Ndyoo sii Zehe ra cuhva caa maa yo ñiyivi cuatyi. I quisi ra vatyi cua tyiyahvi ra sa cuenda cuatyi ñiyivi, ta i zandih i ra cuhva ndyaca ñaha sa ña vaha sii yo. Vatyi tuhun i saha ra Ndyoo sii ra Moisés ña cuu zavaha si cuhva cuan vatyi ñahñi tundyee iñi iyo sii si sa cuenda cuatyi sa ndyaca ñaha sii ñiyivi.

⁴ Zoco i quisi ra Cristo vatyi cua cuhva ra cuhva sii yo, ta cua cuu tyaa yo yahvi sii cuhva vaha sa catyi tuhun sahnu cuan. Maa yo cuu ñiyivi zavaha cuhva cuñi Tatyi II ta yivi ca cuhva ña vaha sa cuñi maa yo.

⁵ Ñiyivi zavaha cuhva cuñi maa ñu, ndyico ñu ta zacuu ñu cuhva ña vaha sa cuñi ñu. Zoco ñiyivi cuu cuenda Tatyi II, ndyico ñu cuhva cuñi ra Ndyoo.

⁶ Tatú ndyico ñiyivi minoo cuhva ña vaha, cuhva cuñi maa ñu, cua cuu ñu. Zoco tatú ndyico ñu ta

zavaha ñu cuhva cuñi Tatyi Ii cua coo sa taxi sii ñu sihin ra Ndyoo, ta cua cundito ñu sihin ra.

⁷ Vatyi tatu ndyico ñu minoo cuhva ña vaha, cuhva cuñi maa ñu, ñahñi sa taxi iyo sii ñu sihin ra Ndyoo vatyi ña tyaa ñu yahvi tuhun i saha ra Ndyoo sii ra Moisés, ta nu ñu cuu zacuu ñu sihin si.

⁸ Ta ñiyiví zavaha sa ña vaha cuhva cuñi maa ñu, ña cuu zavaha ñu cuhva tahan iñi ra Ndyoo.

⁹ Zoco maa ndo, ña zavaha cando sa ña vaha cuhva cuñi ndo, zavaha ndo cuhva cuñi Tatyi Ii tatu ndisa vatyi iyo Tatyi Ii ra Ndyoo sihin ndo. Vatyi tatu ñahñi Tatyi Ii sa saha ra Cristo iyo sihin minoo ñiyiví, yiví ñiyiví ra Cristo cuu ñu cuán.

¹⁰ Ta tatu iyo ra Cristo sisi añima ndo, tañi sa sihi coño ñuhu ndo cuu si sa cuenda cuatyí, zoco ndítio añima ndo vatyi catyi ra Ndyoo vatyi ñahñi ca cuatyí ndo.

¹¹ I zanandoto ra Ndyoo sii ra Jesúis sisi sa i sihi ra. Ta tacuan tucu maa ndo tatu iyo Tatyi Ii ra Ndyoo sihin ndo cua zanandoto tucu ra sii ndo sihin coño ñuhu ndo.

¹² Ta vityi ndoho yañi xaa, sa cuenda sa vatyi iyo Tatyi Ii ra Ndyoo sii yo ta ña tahan ca si sa tyaa yo yahvi sii cuhva ña vaha sa iyo sii yo ta cuhva ña vaha sa cuñi yo.

¹³ Vatyi tatu iyo ndo cuhva ña vaha, cuhva cuñi coño ñuhu ndo, cua cuu cuii ndo. Zoco tatu sihin tundyee iñi sa saha Tatyi Ii ra Ndyoo sii ndo ta zaña ndo sa ña vaha cuan, cua cundito ndo sa ndisa cuii.

¹⁴ Vatyi ñiyiví ndyico cuhva zañaha Tatyi Ii maa ra Ndyoo, yucuan ñu cuu zehe ra Ndyoo.

¹⁵ Ndyo quivi i tiñ cuenda ndo Tatyi Ii maa ra Ndyoo ta ña yuhu cando sii ra. Yuhu minoo muzu sii ra ndyaca ñaha sii ra tatu xaan xaan ra, zoco ña yuhu ca maa ndo vatyi i tiñ cuenda ndo Tatyi Ii ra, ta i nduu

ndo zehe ra. Ta yucuan cuenda cuu catyi ndo sihin ra: “¡Ndyoo Zuti!”

¹⁶ Ta zuun ñi Tatyi Ii maa ra Ndyoo cuu sa zacoto sii yo vatyi zehe ra Ndyoo cuu sii yo.

¹⁷ Ta vityi cua ñihí yo sa vaha sa saha maa ra Ndyoo sii zehe ra. Iñi ñi cua ñihí yo sii si sihin ra Cristo tatu ndyehe yo tundoho iñi ñi sihin ra. Ta ziqui cua catyi ra Ndyoo vatyi vaha xaan ñiyiví cuu yo iñi ñi sihin ra Cristo.

¹⁸ Sito vehi vatyi tundoho sa ndyehe yo vityi ma cuu caca iñi yo vatyi cahnu xaan si. Vatyi ityi nuu ca cua zañaha maa ra Ndyoo sii yo cuhva caa ra ta zii xaan cua cuñi yo quivi cuan.

¹⁹ Tandihi cuii sa i zavaha ra Ndyoo ndatu si ta ñihí xaan cuñi si sa cua tahan si quivi ta cua zañaha maa ra Ndyoo yoo sa cuu tandihi zehe ra.

²⁰ Vatyi tandihi sa i zavaha ra Ndyoo i tiví si. Vazu ñahñi cuatyí i zavaha si, zoco i saha ra Ndyoo vatyi tandihi sa i zavaha ra cua tahan si tundoho ta cua tiví si (sa cuenda cuatyí sa zavaha ñiyiví). Ndyo quivi cua catyi ra Ndyoo, ta cua ndusaa tucu si inga saha.

²¹ Tandihi cuii sa i zavaha ra Ndyoo ta cua ndusaa tucu si inga saha quivi cua zama ra Ndyoo cuhva iyo si vityi, ta ma tiví ca si. Ta ñahñi ca tundoho cua ndyehe si. Ta tacuan tucu tandihi cuii zehe ra Ndyoo.

²² Sito yo vatyi tandihi sa i zavaha ra Ndyoo ta ndyehe xaan si tundoho. Cahnu xaan cuu tundoho ndyehe si.

²³ Ta ña maa ñi ñuu ñiyiví sa zavaha ra Ndyoo cua ndyehe si tundoho, ndya maa yo ñiyiví sa i tiñ cuenda Tatyi Ii ra Ndyoo sa saha ra Ndyoo sii yo sa xihna ñi, ta ndyehe xaan tucu yo tundoho. Cahnu xaan tundoho ndyehe yo, ta ndahvi xaan cuñi yo vatyi cuñi xaan yo sa cua tahan si quivi cua zama ra Ndyoo cuhva iyo yo. Ta

quíví cuan cua zandihi ra tandihi tundoho sa ndyehe yo ta tandihi cuatyí yo. Cua zama ra cuhva iyo coño ñuhu yo. Ta cua nduu yo minoo cuhva saa.

²⁴ Vazu tañaha ca ndyehe yo cuhva cuan, zoco sino iñi yo vatyi cua tahan si quíví cua nduu yo cuhva caa maa ra Ndyoo. Tatu ndatu yo quíví cuan ña cuñi si catyi si vatyi sa ñihí yo sa ndatu yo. Tatu sa yaha ñihí yo sii si, ma cuatu ca yo.

²⁵ Zoco tatu sino ndisa cuii iñi yo vatyi cua saa quíví ityi nuu ca ta cua zavaha ra Ndyoo cuhva cuan ta vazu ña ndyehe yo sii si vityi zoco zandyee yo iñi yo ta cuatu yo sii si. (Sino iñi yo vatyi cua ñihí yo sii si, ta yucuan cuenda ndatu yo sii si.)

²⁶ Ta zuun ñi cuhva cuan tyindyee Tatyi Ii ra Ndyoo sii yo sihin sa ña cuu sii yo vatyi ña sito yo yozo caa cua caca yo sii ra Ndyoo cuhva cuñi si. Ta Tatyi Ii cuan sica si sii ra Ndyoo sa cuenda maa yo nu ña ñihí ca yo cuhva cahan yo sihin ra.

²⁷ Sito maa ra Ndyoo ñaa sa sica iñi yo sihin añaima yo, ta sito ra ñaa sa cuñi Tatyi Ii cuan caca si vatyi sica si cuhva cuñi maa ra Ndyoo sa cuenda ñiyiví sino iñi sii ra Ndyoo sa ndisa cuii.

Ñahñi sa cuu tyaa siyo sii yo sihin cuhva cuñi xaan maa ra Ndyoo sii yo

²⁸ Sito yo vatyi ñiyiví cuñi sii ra Ndyoo, tandihi cuii sa tahan ñu zoco tyindyee si sii ñu. Maa ñu cuu ñu i casi ra Ndyoo vatyi ñiyiví ra cua cuu sii ñu.

²⁹ Ndyo sa xihna cuii ñi ta sa sito ra Ndyoo yoo cuu ñiyiví cua cundyico sii ra, ta i catyi ra vatyi cua nduu ñu tañi cuhva caa Zehe ra. Ta ra Jesucristo cuu Zehe ra Ndyoo. Maa ra cuu Zehe Ndyoo sa ndisa sa xihna fi, ta ziquí i nacacu saa cuaha xaan ca yo vatyi cuu yo yañi ra.

³⁰ Ta i cana ra Ndyoo sii ñiyiví sa sito ra vatyi cua cundyico ñu sii ra. Ta sii ñiyiví sa i cana ra i catyi ra vatyi ñahñi ca cuatyí ñu. Ta vaha xaan cua zanduu ra sii ñu tañi cuhva caa Zehe ra.

³¹ ¿Ta ñaa ca sa cuu catyi yo vityi? Ndyaa maa ra Ndyoo sihin yo. Ta yoñi sa cuu tyaa siyo sii yo sii maa ra Ndyoo.

³² Vatyi i zaquisi maa ra Ndyoo sii sa zuun ñi maa Zehe ra, ta i saha ra Ndyoo sa cuu ra Jesús sa cuenda tandihí cuii yo. Yucuan cuenda sito yo vatyi tañi cuhva i saha ra Ndyoo sa cuu Zehe ra cuenda yo, ta tacuan tucu cua cuhva tucu maa ra tandihí cuii ca sa vaha sii yo.

³³ Ta ityi nuu maa ra Ndyoo ¿yoo sa cuu tyaa cuatyí sata ñiyiví i casi ra? Yoñi. Vatyi maa ra cuu ra catyi vatyi ñahñi ca cuatyí ñu.

³⁴ Yoñi cua catyi ityi nuu ra Ndyoo vatyi iyo cuatyí yo vatyi ra Cristo cuu ra i sihi sa cuenda cuatyí yo, ta ziquí i nandoto ra. Ta vityi ndyaa ra siyo cuaha ra Ndyoo. Ta cahan ra sihin ra Ndyoo sa cuenda maa yo.

³⁵ ¿Yoo sa cuu tyaa siyo sii yo sihin cuhva cuñi xaan ra Cristo sii yo? Yoñi. Vazu ndyehe xaan yo tu-cuihya iñi a tundoho a sahñi tahan ñiyiví sihin yo sa cuenda Tuhun Ndyoo a vazu iyo tama a ñahñi zahma yo iyo a cuaha xaan sa zayuhu sii yo a cuñi cahñi ñiyiví sii yo, zoco ma zañi ra Cristo sa cuñi ra sii yo.

³⁶ Ndisa cua tahan yo tundoho tañi catyi si nuu tutu ra Ndyoo: Sa cuenda moo ta cuñi cahñi ñiyiví sii ndi tandihí quíví.

Ta zacuu ñiyiví sii ndi tañi minoo mvee ticiatyí sa cua cahñi ñu. Tacuan catyi Tuhun ra Ndyoo.

³⁷ Zoco vazu tahan yo tandihí cuii cuhva ya, zoco vaha xaan cua zahacanaa yo ziquí si sa cuenda ra sa cuñi xaan sii yo.

38-39 Sito vehi vatyi ñahñi maa sa cuu tyaa siyo sii yo sihin cuhva cuñi xaan maa ra Ndyoo sii yo. Ta zañaha ra sii yo vatyi cuñi xaan ra sii yo sihin cuhva i sicoor Cristo ta cuhva i zavaha ra. Vazu ndito ca yo a vazu sa sihi yo zoco cua cuñi ca ra Ndyoo sii yo. A vazu ángel a tatyi cuihna cuñi tyaa siyo sii yo, zoco ma cuu. A ñaa sa tahan yo vityi a sa cua ndyehe yo ityi nuu ca a sa iyo ityi ziqui a nu ñuhu. A ñaa cuii ca maa sa iyo, zoco ma cuu tyaa siyo si sii yo sihin cuhva cuñi xaan maa ra Ndyoo sii yo sa cuenda ra Cristo Jesú, ra ndyaca ñaha sii yo.

9

I casi ra Ndyoo sii ñiyiví hebreo

¹ Ñiyiví ra Cristo cui, ta quehin sa ndisa. Ña vaty. Ta tyindye Tatyi Ii ra Ndyoo sii sa siñi tuñi sii, ta site vatyi (tandihí sa tyei ihya ta) sa ndisa cuu si.

² Cuihya xaan cuñi añime. Ta yaha xaan ndahvi cuñi si. (Sa cuenda ñu hebreo, ñiyiví sii.)

³ Ta ndya cuhva cuñi sa cua tyaa siyo ra Ndyoo sii, sii ra Cristo ta zacuhun ra sii ñu xaan tatu zacacu zuhva ra sii ñu hebreo, ñiyiví sii. Tatu sa vatyi cuu tacuan, zoco ma cuu sa tacuan.

⁴ Quehin sa cuenda ñiyiví hebreo vatyi i casi ra Ndyoo sii ñu vatyi cuñi ra zañaha ra vatyi cuñi xaan ra sii ñu. Zuun ñi sii maa ñu i zañaha ra Ndyoo cuhva caa ra sa ndisi xaan ra. Ta sihin maa ñu i catyi ra Ndyoo cuhva cua zavaha ra sa vaha xaan sihin ñu. Ta i saha ra tuhun sa i saha ra sii ra Moisés sii ñu, ta i catyi ra sihin ñu yozo caa cua zavaha ra sa vaha sihin ñu ityi nuu ca. Ta i zañaha ra sii ñu cuhva cuñi ra sa cua zacahnu ñu sii ra.

⁵ Ra hebreo i cuu tandihí ñiyiví sahnu sii yo, ta i sino xaan iñi ra sii ra Ndyoo (tañi maa ra Abraham, ra Isaac, ta ra Jacob). Ta zuun ñi ñiyiví hebreo cuu ra Cristo. Ndyaca ñaha

ra ziqui tandihí cuii sa iyo. Nazacahnu yo sii maa ra Ndyoo tandihí cuii tylemvu. Ta nacuu si tacuan.

⁶ Ña catyi sa ñá zavaha ra Ndyoo cuhva i catyi ra ta sa naha, cuhva cua zavaha ra sihin ñiyiví hebreo vatyi ña tandihí ñiyiví hebreo ta cuu ñu ñiyiví ra Ndyoo sa ndisa.

⁷ Ña tandihí ñiyiví ra Abraham ta cuu ñu ñiyiví sii ra Ndyoo vatyi catyi Tuhun ra Ndyoo nu cahan ra sihin ra Abraham ta catyi ra: "Maa ñi sa cuenda ra Isaac ta cua coo ñiyiví suun." (Tacuan i catyi ra Ndyoo sihin ra Abraham yoo cuu sa cua cuu ñiyiví sii ra sa ndisa cuii.)

⁸ Cuñi si catyi si vatyi tandihí cuii ñiyiví i zacacu zihí sii cuhva iyo ñuu ñiyiví ya, yiví ñiyiví ra Ndyoo cuu sii ñu. Zoco tandihí cuii ñiyiví sa cua caci cuhva cuñi ra Ndyoo, yucuan ñu cuu zehe ra sa ndisa cuii.

⁹ Ta ihya cuu cuhva i saha ra Ndyoo tuhun ra sii ra Abraham: "Cua quisi nu ndyaa ndo cuhva i catyi, ta cua coo zehe ña Sara", catyi ra. (Ihya cuu cuhva i cacu ra Isaac, cuhva i catyi maa ra Ndyoo.)

¹⁰ Ta ña tacuan ñi, vatyi ña Rebeca tindaha ña sihin ra Isaac yí ña, zehe ña Sara. Maa ra cuu minoo ñiyiví sahnu sii yo. Ta sicoor zehe ñu. (Tiníhi ra i cacu ra.)

¹¹⁻¹² Zoco cuee ca sa cacu ra, ñá zavaha ra sa vaha a sa ña vaha, ta sa i catyi ra Ndyoo sihin ña Rebeca: "Ra cua cacu sa xihna ñi cua cuu ra muzu sii ra luhlu ca." Tacuan i zañaha ra Ndyoo vatyi casi ra sii ñiyiví sa cuñi maa ra ta yiví sa cuenda cuhva zavaha ñu (vatyi i cuñi ca ra Ndyoo sii ra luhlu ca cuee ca sa cacu ra).

¹³ Tañi i catyi ra Ndyoo: "I cuñi que sii ra Jacob, zoco ñá cuñi sii ra Esau."

¹⁴ Tacuan i zavaha ra Ndyoo, zoco ma cuu catyi yo vatyi ña vaha cuhva zavaha ra.

¹⁵ I catyi ra Ndyoo sihin ra Moisés: "Cua cundahvi iñi sii ñiyiví,

zoco zuun ñi mi cua catyi yoo sii cua cundahvi iñi.” Catyi ra.

¹⁶ Ta tacuan cuu cuhva sito yo vatyi ma cundahvi iñi ra Ndyoo sii ñiyivi sa cuhva cuñi ñi maa ñu ta nducu xaan ñu cuhva. Zoco cua cuu si cuhva cuñi maa ra Ndyoo vatyi maa ra cuu ra cundahvi iñi yoo sii cuñi maa ra.

¹⁷ Catyi Tuhun Ndyoo cuhva i cahan ra sihin ra Faraón rey ñuu Egipto ta sa naха. (Vatyi ñihi xaan iñi rey cuan), ta i catyi ra Ndyoo sihin ra: “I sehi sa cundyaca ñohon ta cua zañehi vatyi iyo xaan cuhva sii. Ta nacahnu ñuu ñiyivi cua zacahnu ñiyivi sii.” Catyi ra.

¹⁸ Tacuan iyo maa ra Ndyoo. Cundahvi iñi ra sii yoo ra cuñi ra cundahvi iñi ra. Ta saha ra sa nduñihi iñi inga ñiyivi cuhva cuñi maa ra.

¹⁹ Ta yucuan cuenda cua catyi ndo sihin: “¿Ta ñaa cuenda tyaa ra Ndyoo cuatyi sata ñiyivi? ¿Ta yoo cuu sa ña zavaha cuhva cuñi ra?”

²⁰ Zoco ña vaha cuhva sica iñun vatyi ¿yoo ra cuun ta cohon nu cahan ra Ndyoo? Vatyi minoo quiyi cuan, ña catyi si sihin ñiyivi i zavaha sii si: “Ña vaha cuhva i zavohon sii. ¿Ñaa cuenda i zavohon sii tyehen?”

²¹ Tucuñum minoo ñiyivi zatyiño sihin ndyahyu ta zavaha ñu ndaha tysiño sa cua cutyiño ñu sisi vehe, ta cuu zavaha ñu ñaa sa cuñi maa ñu sihin zuun ñi maa ndyahyu cuan tu cuu si minoo ndaha tysiño vaha ca a cuu si minoo sa ndahvi ñi caa.

²² I cuñi ra Ndyoo zañaha ra sii ñiyivi cuhva tahan si zandoho ra sii ñu tatu zavaha ñu sa ña vaha. Ta cuñi tucu ra zañaha ra vatyi cuaha xaan cuhva iyo sii ra. Yucuan cuenda zandyee xaan ra iñi ra sihin ñiyivi ña vaha. Maa ñu cuu ñiyivi tahan si ndoho. Ta cuéé ca ta cuu zanaa ra sii ñu.

²³ Ta inga tucu cuhva. I cuñi ra zañaha ra cuhva vaha xaan sa zavaha ra sihin inga ñiyivi, ñu i

saha maa ra tumañi iñi sii. Maa ñu cuu ñu i casi ra vatyi cua ñihi ñu tandihí cuii sa vaha xaan ta cua cundito ñu sihin ra.

²⁴ Ta zuun ñi maa yo cuu ñiyivi cuan. Iyo yo cuu yo ñiyivi hebreo. Ta iyo yo yivi. Zoco i casi ra Ndyoo sii tandihí yo.

²⁵ Tañi i catyi maa ra Ndyoo nuu tutu i tyaa ra Oseas ta sa naха: Iyo ñiyivi sa yivi ñiyivi mi, zoco cua zandui ñiyivi sii sii ñu.

Ñá cuñi sii ñu, zoco vityi cua cuñi sii ñu.

²⁶ Ta zuun ñi nu i catyi sihin ñu: “Yivi ñiyivi sii mi cuu sii ndo”, zuun ñi yucuan cua nduu ñu ñiyivi sii mi, ra Ndyoo ndito.

²⁷ Ta i catyi ra Isaías sa cuenda ñiyivi hebreo: “Vazu cuaha xaan ñiyivi hebreo tañi ñiyiti yuhu tyañuhu, zoco zuhva cuii ñi ñu cua cacu.

²⁸ Vatyi yatyi xaan ta cua zavaha ra Ndyoo tandihí cuii cuhva catyi ra ihyia ñuu ñiyivi.”

²⁹ Tañi i catyi tucu maa ra Isaías:
Tatu ma zacacu ra Ndyoo sii uu a uñi tahan yo, cunaa tandihí yo
Tañi i naa ñiyivi ñuu Sodoma ta ñuu Gomorra ta sa naха.

Sica iñi ñiyivi hebreo vatyi cua caciù ñu vatyi zavaha ñu sa vaha

³⁰ ¿Ta ñaa cua catyi yo vityi? Ñiyivi sa yivi ñiyivi hebreo cuu ñá ñanducu maa ñu cuhva coo vaha ñu ityi nuu ra Ndyoo. Zoco vityi ñañihi ñu cuhva cuan sihin sa sino ñi iñi ñu.

³¹ Ta ñiyivi hebreo i zavaha xaan ñu cuhva sa sica iñi maa ñu vatyi cua nduvaha ñu ityi nuu ra Ndyoo. Zoco ñá cuu. Ñá cuu zavaha ñu tandihí cuii cuhva vaha tañi catyi tuhun i saha ra Ndyoo sii ra Moisés.

³² ¿Ta ñaa cuenda ñá ñihi ñu cuhva catyi ra Ndyoo sihin ñu vatyi ñahñi ca cuatyi ñu? Ñá ñihi ñu cuhva cuan vatyi ñá sino iñi ñu

vatyi cua càcù ñu maa ñi sihin tumañi iñi sa saha maa ra Ndyoo. Sica iñi ñu vatyi cua càcù ñu sa cuenda sa vaha i zavaha ñu. Ta i cuu si tañi minoo cuhva tatu catyih i saha ñiyiví sihin minoo yuu.

³³Tañi catyi si nuu tutu ra Ndyoo: Cua caqui sii minoo ra tañi minoo yuu nu iyo ñiyiví hebreo. Ta cua catyihi saha ñu sii ra. Zoco tatu sino iñi ñu sii ra, cua quita vaha ñu.

10

¹Ndoho yañi xaa, cahan xein sihin ra Ndyoo sa cuenda ñiyiví hebreo, ta sihin tandihí cuii añime cuñi xein sa cua cacu ñu.

²Sehi sa ndaa cuenda ñu vatyi cuñi xaan ñu zacahnu ñu sii ra Ndyoo, zoco ña ñihi ñu cuhva yozo caa zavaha ñu sii si sa ndisa.

³Vatyi ña sito ñu cuhva zanduvaha ra Ndyoo sii ñu cuhva cuñi maa ra, ta i nducu ñu inga cuhva sa cuñi maa ñu, ta ña tyaa ñu yahvi cuhva i saha maa ra Ndyoo.

⁴Ta sa naha cuñi ñu nduvaha ñu ityi nuu ra Ndyoo sihin sa tyaa ñu yahvi tuhun i saha ra sii ra Moisés. Zoco vityi sa i quisi ra Cristo ta zandihí ra cuhva cuan. Vityi sa sino ñi iñi yo sii ra ta nduvaha yo ityi nuu maa ra Ndyoo ta natíin cuenda ra sii yo.

⁵Ta nu i tyaa ra Moisés i catyi ra vatyi tatu zavaha minoo ra tandihí cuii sa vaha cuhva catyi tuhun i saha ra Ndyoo sii ra, tacuan ta cua coo ra minoo cuhva vaha xaan ta cua cundito ra tandihí cuii tyiemvu.

⁶Zoco cuhva nduvaha yo sihin sa sino iñi yo, yiví minoo cuhva sa ñihi xaan nanducu yo cuu si vatyi catyi si: "Ma catyi ndo sihin añima ndo: ¿Yoo cua cuhun ndya gloria ta cua zanoo ra sii ra Cristo?

⁷Ta ma catyi ndo: ¿Yoo cua noo sisi ñuhu vatyi cua zanandoto ra sii ra Cristo sisi sa i sihi ra?"

⁸Vatyi ihyia cuu cuhva catyi si: "Yatyi xaan iyo tuhun vaha ra Ndyoo sii ndo. Yuhu ndo ta sisi añima ndo iyo si." Ta zuun ñi tuhun cuan cuu tuhun sa zacoto maa ndi. Tuhun sa cuenda sa sino iñi yo sii ra Cristo cuu si.

⁹Ta tatu catyun sihin ñiyiví vatyi ra Jesúsu cuu ra ndyaca ñaha suun ta sino ndisa iñun sihin añimon vatyi i zanandoto ra Ndyoo sii ra sisi sa i sihi ra, cua cacun.

¹⁰Vatyi sihin añima yo sino iñi yo (sa i sihi ra Jesúsu ta i nandoto ra vatyi cua zacacu ra sii yo), ta tacuan ta nduvaha añima yo. Ta sihin yuhu yo saha yo sa ndaa cuhva sino iñi yo. Tacuan ta cua cacu yo.

¹¹Vatyi catyi Tuhun ra Ndyoo: "Tandihí ñiyiví sa sino iñi sii ra, cua ñihi ñu sa vaha xaan sa cua cuhva ra."

¹²Vatyi ra Ndyoo ña ziñ ndyehe ra sii minoo ñiyiví ta sii inga ñu vazu tata hebreo cuu yo a griego a ñaa ñi maa tata cuu yo vatyi minoo tuhun ñi maa ra ndyaca ñaha sii tandihí cuii yo. Ta saha xaan maa ra tumañi iñi sii tandihí cuii yo sa sica sii ra.

¹³Tañi catyi Tuhun ra Ndyoo vatyi tandihí ñiyiví sa cua caca sii ra Jesúsu, ra ndyaca ñaha sii yo, cua cacu ñu.

¹⁴¿Ta yozo caa cuu caca ñu sii ra tatu ña sino iñi ñu sii ra? ¿Ta yozo caa cuu sino iñi ñu sii ra tatu tañaha ca coto ñu vatyi i quisi zacacu ra sii yo? Ta ma cuu coto ñu tatu yoñi sa nacatyi sihin ñu.

¹⁵Ta ma cuu nacatyi ñiyiví Tuhun ra Ndyoo tatu yiví maa ra tasi sii ñu. Ta catyi Tuhun ra Ndyoo: "Vaha xaan tatu quisi ñiyiví nacatyi tuhun vaha cuhva cacu yo", catyi si.

¹⁶Zoco ña tandihí ñiyiví sa siñi tuhun cuan ta tyaa ñu yahvi sii si vatyi iyo ñu tañi cuhva catyi ra Isaías: "Tata, yoñi sa sino iñi tuhun i zacoto ndi", catyi ra.

¹⁷ Xihna ca siñi yo tuhun vaha sa cuenda ra Cristo, ta ziqui sino iñi yo sii si.

¹⁸ Ta catyi vatyi sa ndisa sa siñi ñiyivi hebreo tuhun vaha vatyi catyi Tuhun ra Ndyoo:

Sa i zacoto ñiyivi Tuhun moo nacahnu cuii ñuu ñiyivi, catyi Tuhun ra Ndyoo.

¹⁹ Ta cua catyi tuqui inga cuhva: ¿Atu ñá sito ñiyivi hebreo vatyi cua zacacu tucu ra Ndyoo sii inga ca ñiyivi? Sa i sito ñuu vatyi i cahan ra Moisés sa cuenda ra Ndyoo ta sa na, ta i catyi ra:

Cua zacuxein sii ndo sihin ñiyivi sa ñahñi sa siñi tuñi sa cuaha, Vatyi ñuu cuan cua nanduu ñuu ñiyivi mi.

Ta maa ndo cua cuxaan ndo.

²⁰ Ta ñá yuhu ra Isaías, ta i cahan ra sa cuenda ra Ndyoo ta catyi ra: Ñiyivi sa ñá nanducu sii, yucuan ñuu i nañihi sii.

I zañehi cuhva iye sii ñuu vazu ñá nducu tuhun ñuu.

²¹ Zoco sa cuenda ñiyivi hebreo catyi ra Ndyoo: “Ndyiyaca cua i cane sii ñiyivi sii, vatyi quisi ñuu, zoco ñá tyaa ñuu yahvi. Ñihi xaan iñi ñuu.”

11

Iyo zuhva ñiyivi hebreo sa nañihi ñuu cuhva cacu ñuu

¹ Ña catyi vatyi ndaha i tyaa siyo ra Ndyoo sii ñiyivi hebreo. Ña tacuan, yañi xaa. Yuhvi tucu ra hebreo cui, ñiyivi ra Abraham ta ñiyivi ra Benjamín.

² I casi ra Ndyoo sii ñiyivi ra ta sa na, ta ñá tyaa siyo ra sii ñuu ndaha ñi. ¿Atu ña sito ndo nu cahan Tuhun ra Ndyoo sa cuenda ra Elías? nu i cuxaan ra ta cahan xaan ra sii ñiyivi hebreo ta i catyi ra:

³ “Tata, i sahñi ñiyivi sii ñuu cahan tuhun moo, ta i sani ñuu altar nu i zacahnu ñuu suun. Yuhvi ñi ca zacahnu suun, ta cuñi cahñi ndihí ñuu sii”, catyi ra.

⁴ Ta i nacahan ra Ndyoo ta catyi ra: “Iyo usa mil ca ñiyivi sa i naquihin vehi. Tañaha ca cua cuiñi siti ñuu nuu ndyoo sa nañi Baal, ta ña zacahnu ñuu sii ndyoo cuan”, catyi ra Ndyoo.

⁵ Ta zuun ñii cuhva cuan cuu si ndya cuhva ndya vityi vatyi iyo zuhva ca ñiyivi hebreo sa zacahnu sii ra Ndyoo sa ndisa cua. I casi ra sii ñuu, ta saha maa ra tumañi iñi sii ñuu.

⁶ Saha maa ra Ndyoo tumañi iñi ta yivi sa cuenda sa vaha sa zavaha ñuu vatyi tatu saha ra sa vaha sa cuenda sa zavaha ñuu, yivi ca tumañi iñi cuu si.

⁷ Ihya cuu cuhva iyo si. Nanducu xaan ñiyivi hebreo cuhva nduvaha ñuu sihin ra Ndyoo, ta ña nañihi ñuu cuhva cuan. Zoco ñiyivi i casi ra Ndyoo, yucuan cuu ñuu sa i nañihi cuhva cuan. Ta tandihí inga ñiyivi cuan, i zanduñihi ra Ndyoo iñi ñuu.

⁸ Tañi catyi si nuu tutu ra Ndyoo: “Saha ra Ndyoo minoo sa siñi tuñi sii ñuu sa ma cutuñi iñi ñuu. Ndyehe ñuu, zoco ña cutuñi iñi ñuu sa ndyehe ñuu. Siñi ñuu, zoco ndya vityi ta ña cutuñi iñi ñuu sa siñi ñuu.”

⁹ Ta i cahan tucu ra David ziqui cuhva cuan, ta catyi ra:

Cua cuzii iñi ñuu sihin sa vaha sa sasi ñuu ta tandihí ndaha tyiño vaha ñuu.

Zoco yucuan cuu sa cua zandoyo ñuhu sii ñuu.

Ta sa cuenda cuhva cuan ta cua ndoho ñuu.

¹⁰ Tañi cua nducuaa ñuu ta ma ndyehe ñuu vatyi ma coto ñuu sa ndisa.

Ta tandihí cuii quivi cua ndyehe ñuu tundoho.

Cuhva cacu ñiyivi sa yivi ñiyivi hebreo cuu

¹¹ ¿Atu i catyihi saha ñiyivi vatyi ndaha nduva cua ñuu? Yivi. Zoco i zavaha ñuu sa ña vaha (sa ñá sino iñi ñuu sii ra i zaquisi ra Ndyoo), ta tacuan ta i saha maa ra Ndyoo sa cacu añima inga ñiyivi sa yivi ñiyivi

hebreo cuu. Ta tacuan ta cua cuxaan ñiyivi hebreo vatyi cua sino iñi inga ñiyivi. Ta sihin cuhva cuan ta cua cuñi tucu ñiyivi hebreo sa cacu ñu.

12 Ñá tiin cuenda ñiyivi hebreo cuhva i saha maa ra Ndyoo, zoco cuhva cuan i quita vaha si sa cuenda inga ñiyivi vatyi cuu sino iñi ñu. Ta ndya vityi zuhva cuii ñi ñiyivi hebreo cua cacu vatyi i tyaa siyo ñu cuhva i saha maa ra Ndyoo, ta i saha ra sii si sii inga ñiyivi. Ta cuaha xaan ñu i sino iñi. Zoco quivi cua quihvi tucu ñiyivi hebreo cuenda ra Ndyoo sa ndisa, yucuan quivi vaha xaan ta tyaqui xaan cua cuu.

13 Ta ndoho sa yivi ñiyivi hebreo cuu, sihin maa ndo quehin. Yuhvi cui minoo ra i tava ra Jesúz tyiño sa cuhin nu iyo ñiyivi sa yivi ñiyivi hebreo cuu. Ta site vatyi ñiñi xaan cuu tyiño i saha maa ra Ndyoo sii.

14 Ta zacote Tuhun Ndyoo sii ndo vatyi cuñi vatyi cua ndyehe ñiyivi hebreo cuhva sino iñi maa ndo ta cua cuñi tucu maa ñu zavaha ñu cuhva cuan. Ta tacuan ta cua cacu ñu.

15 Sa cuenda sa i tyaa siyo ra Ndyoo sii ñiyivi hebreo ta i tiin cuenda ra sii inga ñiyivi ndya vaha ñi. Ta quivi cua natii cuenda tucu ra sii ñiyivi hebreo ta cua cuu si tañi cua nandoto tucu ñu sisi sa i sihi ñu.

16 Tatu siin yusa sa quita nuu sa cuaha cuan ta cuenda ra Ndyoo cuu si, cuenda ra Ndyoo cua cuu tandihí ca si sa cuaha ca cuan. A tatu minoo yoho yutu cuan cuu cuenda ra Ndyoo, cuenda ra cua cuu tucu tandihí yutu cuan.

17 Zoco tatu i tahnu zuhva zoco yutu olivos, ta maa ndo i ndihvi yucuan, vazu zoco yutu olivos ndya vaha ñi cuu ndo sa iyo sisi cuhu, zoco cua ñihi tucu ndo tundyee iñi sihin sa vaha sa iyo sii yoho yutu olivos vaha cuan.

18 Ma zacahnu ndo sii ndo ta catyi ndo vatyi vaha xaan ca maa

ndo ta ziqui zoco tu sa i quita. Nacohon iñi ndo vatyi yoho yutu cuan cuu sa tyindyee sii tu ta ma nduva tu, ta yivi ndoho sa cuu zoco tu.

19 Cua catyi ndo: "I tahnu zuhva zoco tu vatyi tacuan ta cuu ndihvi nduhvi", catyi ndo.

20 Ndisa vatyi i tahnu zuhva zoco tu cuan vatyi ña sino iñi ñiyivi cuan tuhun sa cuenda maa ra Jesúz. Ta maa ndo i ndihvi ndo vatyi i sino iñi ndo. Ma zacahnu ndo sii ndo. Vaha ca zacuenda ndo sii ndo coto tava ra Ndyoo sii ndo.

21 Vatyi ñá cundahvi iñi maa ra Ndyoo sii zoco yutu sa i sindyaa nu yutu cuan. Tacuan tucu maa ndo, zacuenda ndo sii ndo coto ma cundahvi tucu iñi ra sii ndo.

22 Coto ndo vatyi vaha xaan añima maa ra Ndyoo ta xaan xaan tucu ra, nduu cuhva. Sii ñiyivi ña tyaa yahvi sii ra, cuxaan ra. Zoco sihin ndoho, vaha xaan ra tatu ndoo ndo sihin ra. Zoco tatu ma ndoo ndo cua tyaa siyo tucu ra sii ndo.

23 Ta ñiyivi hebreo tatu nasino iñi ñu, cua nanduu tucu ñu zoco yutu vaha cuan vatyi iyo cuhva sii maa ra Ndyoo, ta cuu zananduu tucu ra sii ñu.

24 Vatyi tatu i sahndya ra Ndyoo sii ndo sii minoo yutu olivos ndya vaha ñi sa iyo sisi cuhu ta tyihi ra sii ndo nuu minoo yutu olivos vaha, ñiñi xaan ca cuñi si sa nandihvi zuun ñi zoco vaha maa tu.

Nu ndihí tuhun cua cacu ñiyivi hebreo

25 Ta ndoho yañi xaa, ña cuñi sa ma cutuñi iñi ndo tuhun xehe ya coto caca iñi ndo vatyi ñiñi xaan ca maa ndo. Cuñi sa coto ndo vatyi i nduñihi iñi ñiyivi hebreo zuhva quivi vatyi tacuan ta cuu sino iñi tandihí inga ñiyivi sa cuñi maa ra Ndyoo.

26 Ta ziqui cua cacu tandihí ñiyivi hebreo tañi catyi si nuu tutu ra Ndyoo:

Minoo ra sa cua zacacu cua quisi sa cuenda ñiyiví hebreo, ta minoo ra hebreo cua cuu tucu ra.

Cua tyaa siyo ra cuatyí sa iyo añima ñiyiví ra Jacob.

²⁷ Ta ihya cuu tuhin sa sehi sii ñu vatyí ndisa cua tyaa siye catyí sa iyo añima ñu, catyí si.

²⁸ Cuxaan ñiyiví hebreo sihin ra Ndyoo sa cuenda tuhun vaha cuenda ra Cristo. Ta tacuan ta cuu sino iñi maa ndo. Zoco maa ñu cuan cuu ñiu i casí ra Ndyoo ndya ta sa naha, ta cuñi xaan ra sii ñu vatyí i sino iñi ñiyiví sahnú sii ñu sii ra.

²⁹ Ta ma cuu zama ra Ndyoo cuhva tatu sa i casí ra sii ñiyiví ta cuhva saha maa ra sa vaha sii ñu.

³⁰ Ñá tyaa maa ndo yahvi sii ra Ndyoo ta sa naha, zoco vityí cundahvi iñi ra sii ndo vatyí ñá i tyaa ñiyiví hebreo yahvi sii ra.

³¹ Ta tacuan tucu, ña tyaa ñiyiví hebreo yahvi sii ra ndya vityí. Ta sa cuenda sa vatyí cundahvi iñi ra Ndyoo sii maa ndo ta cua cundahvi tucu iñi ra sii ñu ityi nuu ca.

³² Vatyí saha maa ra Ndyoo sa ma tyaa tandihí cuii ñiyiví yahvi sii ra vatyí tacuan ta cuu cundahvi iñi ra sii tandihí cuii yo.

³³ Cuaha xaan cuaha xaan sa siñi tuñi maa ra Ndyoo, ta sito ra tandihí cuii. Ma cuu cutuñi iñi maa yo cuhva sica iñi ra ta cuhva zavaha ra. Maa ra cuu ra zacuu tandihí.

³⁴ Catyi Tuhun ra Ndyoo: “Yoñi sa sito cuhva sica iñi maa ra ndyaca ñaha sii yo, ta yoñi sa cuu cuhva sa siñi tuñi vaha sii maa ra.

³⁵ Yoñi sa cuu cuhva sa vaha sii ra Ndyoo ta ziñqui tyiyahvi ra Ndyoo sii ra.”

³⁶ Vatyí ndya nu ndyaa maa ra i quita tandihí sa iyo. Maa ra i zavaha sii si. Ta zavaha ra vatyí cua cacu tandihí cuii tyiño sihin minoo cuhva sa cua zacahnu si sii maa ra. Nazacahnu yo sii ra

tandihí cuii tyiemvu. Ta nacuu si tacuan.

12

Cuhva vaha cua coo yo vityi sa sino iñi yo

¹ Yucuan cuenda zañiñi sii ndo, ndoho yañi xaa, vatyí nacuhva ndo sii ndo sii ra Ndyoo vatyí cundahvi iñi ra sii ndo. Nacuhva ndo sii ndo sii ra ta nduvaha ndo cuhva cuñi ra vatyí yucuan cuu cuhva cuñi si sa zacahnu ndo sii ra.

² Ta ma coo ca ndo cuhva iyo ñiyiví ñuu ñiyiví ya. Zama ndo cuhva sica iñi ndo. Ta tacuan ta cua coto ndo cuhva cuñi maa ra Ndyoo sihin ndo. Cua coto tucu ndo vatyí cuhva tahan iñi maa ra Ndyoo, maa ñi maa sa vaha cuu, ta ndoo xaan si, ta ñahñi cumañi si.

³ I casí ra Ndyoo sii, ta i saha ra tyiño sii. Yucuan cuenda catyí sihin tandihí ndo vatyí ma caca iñi ndo vatyí sito xaan ndo. Zoco caca iñi ndo minoo cuhya vaha sihin minoo sa siñi tuñi vaha cuhva saha ra Ndyoo sa zatyiño ndo tyiño ra. Sii sa minoo minoo ndo saha ra sa ziñi ziñi cuhva zatyiño ndo tyiño ra. Iyo ndo cuu zavaha ndo tyiño ra minoo cuhva. Ta iyo ndo zavaha ndo sii si inga cuhva.

⁴ Tañi minoo coño ñuhu yo, cuaha xaan nu ndyaa tahan si, zoco ziñi ziñi cuhva zatyiño si. Ta ña inuu ñi tyiño zavaha sa minoo minoo si vazu minoo ñi coño ñuhu cuu si.

⁵ Ta tacuan tucu maa yo, cuaha ñiyiví cuu yo, zoco sa tandihí yo ta ñiñi ñi cuu yo sihin ra Cristo. Ta sa ndu-iñi yo sihin minoo ta inga.

⁶ Saha maa ra Ndyoo ndatu sii sa minoo minoo yo sa zatyiño yo tyiño ra ziñi ziñi cuhva. Yucuan cuenda nazatyiño yo sihin cuhva sa saha maa ra sii yo. Tatu saha maa ra Ndyoo cuhva sii minoo yo ta cuu cahan yo tuhun saha ra Ndyoo sii yo, nacahan yo sihin sa nii iñi yo. Yucuan cuu sa cuu profecía.

⁷ Ta tatu inga yo cuu tyindyee yo sii inga hermano, natyindyee vaha

yo. A ra zacuaha, nazacuaha vaha ra.

⁸ A ra cuu cuhva minoo tuhun vaha sii inga ñiyivi, nacuhva vaha ra tuhun sii ñu. A ra saha xuhun, nacuhva ra cuaha. A ra ndyaca ñaha sii inga hermano, nacundyaca ñaha vaha ra. Ta ra cundahvi iñi sii inga ñiyivi, natyindyee ra sii ñu sihin sa zii cuñi ra.

Cuhva cuñi si zavaha yo tatu cuenda ra Cristo cuu yo

⁹ Cuhva cuñi ndo sii inga ñiyivi, nacuu si minoo sa ndisa cuii, ta ma zandavi ñaha ndo. Cuñi si vatyi zaña ndo tandihí cuii sa ña vaha, ta zavaha xaan ndo sa vaha.

¹⁰ Cuñi ndo sii minoo ndo ta sii inga ndo tañi yañi ndo. Ta tyaa ndo yahvi tandihí tuhun sa cahan tandihí hermano.

¹¹ Ma cuzusa ndo. Zatyino xaan ndo tyiño ra Ndyoo.

¹² Cuzii iñi ndo vatyi sito ndo vatyi cua cundyaa ndo sihin ra Ndyoo ityi nuu ca. Cundyee iñi ndo tatu ndyehe ndo tundoho, ta cahan ndo sihin ra Ndyoo tandihí cuii cuhva.

¹³ Tyindyeo ndo sii inga ra yañi yo ñaa sa cumañi sii ra, ta tiin cuenda vaha ndo sii ñiyivi saa vehe ndo.

¹⁴ Caca tahvi ndo sii Ndyoo sa cuenda ñiyivi sahñi tahan sihin ndo. Cahan vaha ndo sihin ñu, ta ma cahan ndo ndya vaha ñi sii ñu.

¹⁵ Cuzii iñi ndo sihin ñiyivi zii cuñi, ta vacu ndo sihin ñiyivi cuihyia iñi vatyi tacuan ta cua ndu-iin ndo.

¹⁶ Ta nacoo sa taxi ñi sihin minoo ndo ta sihin inga ndo. Ma zacahnu ndo sii ndo, ta ma caca iñi ndo vatyi ñiñi xaan ndo. Coo vaha ndo sihin ñiyivi ndahvi vazu ñahní sa iyo sii ra. Ta ma caca iñi ndo vatyi sito xaan ndo.

¹⁷ Tatu zavaha ñiyivi sa ña vaha sihin ndo, ma zavaha tucu maa ndo sa ña vaha sihin ñu. Zavaha ndo tandihí sa cuu sa vaha sa ndisa,

ta cuhva cuan yoñi cuu tyaa cuatyi sata ndo.

¹⁸ Nducu ndo cuhva coo sa taxi ñi sii ndo sihin tandihí cuii ñiyivi tatu cuu.

¹⁹ Cuñi xein sii ndo, ndoho yañi xaa. Tatu zavaha ñiyivi sa ña vaha sihin ndo ma zavaha tucu ndo sa ña vaha sihin ñu. Nacuxaan maa ra Ndyoo sihin ñu tañi catyi si nuu tutu ra: "Yuhvi cui ra cua tasi tuñi sii ñu. Yuhvi cua tyiyahvi", catyi ra Ndyoo.

²⁰ Zoco tatu sizoco minoo ra cuxaan sii ndo, cuhva ndo sa casi ra. Tatu ityi ra, cuhva ndo ndutya coho ra vatyi tacuan ta cua cucahan nuu ra ta cua ndundahvi cuñi ra vatyi zavaha ra sa ña vaha sihin ndo.

²¹ Ma zavaha tucu maa ndo sa ña vaha vatyi zavaha ñiyivi sa ña vaha sihin ndo coto cundyaca ñaha sa ña vaha cuan sii ndo. Maa ndo zavaha ndo sa vaha, ta cua zahacanaa ndo sii sa ña vaha cuan.

13

¹ Natyaa tandihí ñiyivi yahvi sii ra cu tyiño vatyi maa ra Ndyoo cuu ra saha tyiño sii ra, ta yucuan cuenda ndyizo ra tyiño.

² Tatu ma tyaa minoo ñiyivi yahvi sii ra cu tyiño, ña tyaa ra yahvi sii Ndyoo. Ta cua tasi tuñi ra Ndyoo ta ra cu tyiño sii ra cuan.

³ Ña zayuhu ra cu tyiño sii ñiyivi zavaha sa vaha. Zayuhu ra sii ñiyivi zavaha sa ña vaha. Tatu yuhu ndo sii ra cu tyiño, cuñi si sa zavaha ndo sa vaha. Ta cua catyi ra vatyi vaha ñiyivi cuu ndo.

⁴ Zatyino ra cu tyiño sa cuenda ra Ndyoo, ta tacuan ta cuu coo vaha ndo. Zoco tatu cua zavaha ndo sa ña vaha cua yuhu ndo vatyi ndisa cuii cua tasi tuñi ra sii ndo. Zatyino ra sa cuenda ra Ndyoo, ta yucuan cuenda cua tasi tuñi ra sii ñiyivi zavaha sa ña vaha.

⁵ Yucuan cuenda cuñi si sa tyaa ndo yahvi sii ra sa xihna ñi vatyi yuhu ndo sii ra Ndyoo ta sa cu uu

vatyi cuhva cuan catyi sa siñi tuñi vaha sii ndo.

⁶ Tyiyahvi tucu ndo xuhun tatu catyi ra, vatyi zatyiño ra cu tyiño sa cuenda ra Ndyoo. Yucuan cuu tyiño ra.

⁷ Tyiyahvi ndo sii tandihí ra, tandihí sa tahan si sii ra. Tyiyahvi ndo xuhun sa cuenda zicuela. Tyiyahvi ndo xuhun ñihu sii ra zatyiayhi sii ndo. Tyaa ndo yahvi sii ra tahan si tyaa ndo yahvi. Ta zacahnu ndo sii ra sa tahan si zacahnu ndo.

⁸ Ma cutavi ndo sii numinoo ñiyivi, zoco cuñi ndo sii minoo ndo ta sii inga ndo. Yoo ra cuñi sii inga ñiyivi sa ndisa cuii, sa zavaha ra tandihí sa catyi tuhun i saha ra Ndyoo sii ra Moisés.

⁹ Vatyi ihya cuu cuhva catyi Tuhun Ndyoo: "Ma cuzu ndo sihin minoo ñaha tatu yivi ñazihí ndo cuu. Ma cahñi ndo ñiyivi. Ma zuhu ndo. Ma ndiyivo ifi ndo sa sii inga ñiyivi." Tatu tyaa ndo yahvi sa ndisa cuii sii tuhun sa catyi vatyi cuñi ndo sii inga ñiyivi inuu ñi tañi cuñi ndo sii maa ndo, tatu ndisa cuii tyaa ndo yahvi sii si cuan, sa tyaa ndo yahvi sii tandihí cuii tuhun i saha ra Ndyoo.

¹⁰ Tatu cuñun sii inga ñiyivi ñahñi sa ndya vaha ñi cua zavohon sihin ñu. Sihin sa cuñi yo sii ñu sa ndisa cuii ta sa zavaha yo tandihí sa catyi tuhun i saha ra Ndyoo.

¹¹ Ta inga tucu tuhun catyi sihin ndo vatyi ma naa iñi ndo ñaa cuhva cuu si vityi. Sa tahan si cuhva ndoyo ndo vatyi sa cuyatyi xaan ca quivi cua cacu yo vityi ta ziqui quivi i quisaha sino iñi yo.

¹² Sa cuñi ndihí quivi zavaha ñiyivi sa ña vaha, ta sa cua saa quivi cuzii iñi yo sihin ra Ndyoo. Nazaña yo sa ña vaha sa zavaha yo, ta nazavaha yo tandihí sa vaha tañi zavaha ñiyivi nu ndisi.

¹³ Nazavaha yo sa vaha sa ndisa tañi zavaha ñiyivi ora. Ma zacahnu

xaan yo vico ta coho yo ndixi. Ma zavaha yo sa quiñi sihin yoo ñi maa ñaha. Ta ma nducu yo tizihí, ta ma ndiyivo iñi yo sa sii inga ñiyivi.

¹⁴ Zavaha ndo cuhva i zavaha ra Jesucristo, ra ndiyaca ñaha sii yo. Ta ma nducu ndo cuhva zavaha ndo ñaa ñi sa ndisi xiñi maa ndo, tandihí sa ña vaha.

14

Ma cahan cuehe ndo sii minoo hermano

¹ Tiñ cuenda vaha ndo sii tandihí hermano vazu iyo ra ta sino vaha ca iñi ra. Zoco ma natuhun xaan ndo sihin ra sa cuenda cuhva sica iñi ra tatu yivi sa ñiñi xaan cuu si.

² Vatyi iyo ra nii xaan iñi ra, ta catyi ra vatyi cuu casi ra tandihí. Zoco inga ra, tañaha ca sino vaha iñi ra, ta sasi ra maa maa yulu ñi.

³ Ra sasi tandihí, ña vaha cua catyi ra vatyi ñahñi maa sa sito inga ra sa ma casi cuan. Ta ra sa ma casi cuan, ña vaha cua catyi maa ra vatyi ña vaha ra sa tuhva sasi tandihí vatyi zuun ñi maa ra Ndyoo i tiñ cuenda sii ra cuan.

⁴ Ñahñi cuhva iyo suun sa catyun vatyi ña vaha cuhva zavaha inga ra. Maa ra Ndyoo cuu ra ndiyaca ñaha sii ra cuan, ta cua catyi maa ra tatu vaha a ña vaha sa zavaha muzu ra. Ta cua tyindyee ra Ndyoo sii ra, ta cua cuu zavaha ra sa vaha.

⁵ Iyo yo sica iñi yo vatyi ñiñi ca minoo quivi ta ziqui inga. Ta inga yo sica iñi yo vatyi inuu ñi cuu tandihí quivi. Nacaca iñi minoo minoo yo cuhva cuñi yo, ta ma ndu-uu iñi yo.

⁶ Ra zacahnu minoo quivi, zacahnu ra sii si sa cuenda ra Ndyoo. Ta ra tuhva sasi tandihí, zavaha ra tacuan sa cuenda ra Ndyoo vatyi saha ra tyahvi ndyoo sii ra. Ta ra sa ma casi tandihí, sa cuenda ra Ndyoo ta ma casi ra vatyi sica iñi ra vatyi ña vaha, ta saha ra tyahvi ndyoo sii ra Ndyoo.

⁷ Yoñi yo ta ndito yo vatyi cuñi yo. Ta yoñi yo cuu quivi cuñi maa yo.

8 Tatu ndito yo, ndito yo sa cuenda maa ra Jesús. A tatu cuu yo, cua cuu yo vatyi maa ra catyi, vatyi maa ra ndyaca ñaha sii yo. Vazu ndito yo a vazu cuu yo, zoco cuenda ra Jesús iyo yo

9 vatyi yucuan cuenda i sihi ra Cristo, ta i nandoto tucu ra vatyi cua cuu ra ra ndyaca ñaha sii ñiyivi sa sihi ta sii ñiyivi ndito.

10 Ta yoho ¿ñaa cuenda catyun vatyi ña vaha cuhva zavaha inga hermano? Ña vaha cua catyi ndo vatyi ña vaha ra vatyi maa ra Ndyoo cuu ra cua tasi tuñi sii sa minoo minoo yo.

11 Vatyi catyi Tuhun ra Ndyoo:
Sa ndisa cuii cuu si vatyi ndite.

Ta zuun ñi sa ndisa cuu si vatyi cua
cuiñi siti tandihí cuii ñiyivi
nui.

Ta cua zacahnu tandihí ñu sii sihin
yuhu ñu.

12 Tacuan ta tandihí yo cua catyi
yo sihin ra tandihí sa i zavaha yo.

*Ma zandoyo ñuhu ndo sii inga
hermano*

13 Yucuan cuenda ma catyi ca yo
vatyi ña vaha sa zavaha inga her-
mano ñaa ñi maa cuhva sa ndyico
ra. Zoco nananducu yo cuhva ta
ñahñi cua zavaha maa yo sa cua
zandoyo ñuhu si sii minoo yañi yo.

14 Jyo minoo cuhva i zañaha ra
Jesús sii, ta yucuan cuenda site
vatyi ñahñi sa ma cuu casi yo. Zoco
tatu iyo minoo hermano ta sica iñi
ra vatyi iyo minoo sa ma cuu casi
yo tatu tyaa yo yahvi sii ra Ndyoo,
sa cuenda maa ra cuan ta ña vaha
tatu casi ra.

15 Vatyi tatu sa cuenda sa tuhva
yo sasi ta zatívi yo sii minoo her-
mano, ña iyo ca yo cuhva cuñi ra
Ndyoo cuhva cuan. Ta ña cuñi yo
sii yañi yo tatu zavaha yo minoo
cuhva ta sica iñi ra vatyi ña vaha si
ta cuu zatívi si sii ra.

16 Vazu yivi cuatyi cuu minoo
cuhva sa zavaha yo, zoco tatu ca-
han ñiyivi sa cuenda si, vaha ca ma
zavaha yo sii si.

17 Vatyi tatu ndyaca ñaha ra
Ndyoo sii yo, ña ñiñi xaan ñaa sa
casi yo a ma casi yo a sa coho yo a
sa ma coho yo. Zoco ñiñi xaan cuu
yo ñiyivi vaha xaan ta coo sa taxi
sii yo sihin ra Ndyoo ta sihin ñiyivi
ta coo sa zii sii yo sa cuenda Tatyi li
sa iyo sihin yo.

18 Tatu tacuan iyo yo ta zatyino
yo sa cuenda ra Cristo, zii cua cuñi
ra Ndyoo ndyehe ra sii yo ta zii cua
cuñi tucu ñiyivi.

19 Yucuan cuenda nanducu yo
cuhva coo sa taxi sii yo sihin ñiyivi
tandihi saha, ta natyindyee yo sii
tahan yo, ta ziqui cua cuu ca zacuu
tandihi yo cuhva cuñi ra Ndyoo.

20 Ma zativi ndo tysiño ra Ndyoo
sa cuenda sa sasi ndo. Ndisa vatyi
ñahñi sa ica, ta cuu casi yo tandihí,
zoco ña vaha tatu casi yo tatu cua
zandoyo ñuhu si sii minoo her-
mano.

21 Vaha ca sa ma casi yo coño ta
ma coho yo ndixi ta ma zavaha yo
ñaa ca sa cuu si tatu zandoyo ñuhu
si sii minoo yañi yo ta ma sino vaha
ca iñi ra.

22 Tatu sica iñun vatyi cuu ca-
sun tandihí, vaha. Zoco ma cohon
tuhun cuan sihin inga hermano sa
sica iñi inga cuhva. Cohon maa ñi
sihin ra Ndyoo sa cuenda si. Zii
xaan cua cuñi yo tatu sito yo vatyi
ñahñi sa ña vaha zavaha yo.

23 Zoco tatu ndu-uu iñi yo ta ña
sito yo tatu vaha a ña vaha tatu casi
yo, zativi si sii yo sa tacuan vatyi ña
niñi yo ta sasi yo. Ta ñaa ñi maa sa
zavaha yo ta ña sito yo tatu vaha a
ñ a vaha si, cuatyi cuu si.

15

*Nazavaha yo ñaa sa cua tahan iñi
inga hermano*

¹ Maa yo sa sino vaha iñi, cuñi si sa cundyee iñi yo sihin inga hermano tatu tañaha ca sino yaha iñi ra. Ta ma zavaha yo maa ñi cuhva cuñi maa yo.

² Nanducu yo cuhva zavaha yo sa cua tahan iñi inga hermano, ñaa sa cua tyindyee sii ra ta cuu ra ñiyivi vaha ta sino vaha iñi ra sii ra Ndyoo.

³ Vatyi ndya ra Cristo, ta ñá zavaha ra sa cuñi maa ra. I zavaha ra cuhva cuñi ra Ndyoo. Ta i ndyehe xaan ra tundoho tañi catyi si nuu tutu ra Ndyoo: "Cahan ñiyivi ndya vaha ñi suun, ta tañi sii mi cahan ñu cuu si", catyi si.

⁴ Ta tandihí sa i tyaa ra tyaa Tuhun Ndyoo ta sa naha, i scundyaa si vatyi cua zacuaha si sii yo ta cua sino xaan iñi yo ta coo tundyee iñi sii yo. Ta zii cua cuñi yo vatyi cua cahvi yo sii si ta coto yo vatyi cua cuhva ra Ndyoo sa vaha sii yo sa ndisa.

⁵ Saha maa ra Ndyoo tundyee iñi sii yo ta minoo cuhva sa ma nducuihya xaan iñi yo. Sino iñi tandihíndo vatyi ra Jesús cuu ra ndyaca ñaha sii ndo, yucuan cuenda nacuhva maa ra Ndyoo cuhva sii ndo sa coo sa taxi sihin minoo ndo ta inga ndo, ta cua ndu-iñi ndo sa ndisa cuii.

⁶ Vatyi tacuan ta iñi ñi cuhva cua caca iñi ndo, ta iñi ñi tañi minoo ñi nduzu cua zacahnu ndo sii ra Ndyoo Zutu ra Cristo Jesús, ra ndyaca ñaha sii yo.

Cua cuiñi ñiyivi sa yivi ñiyivi hebreo cuu Tuhun Ndyoo

⁷ Tiñi cuenda vaha ndo sii minoo ndo ta sii inga ndo tañi i tiñi cuenda ra Cristo sii ndo vatyi cuhva cuan zacahnu si sii ra Ndyoo.

⁸ Ta catyi sihin ndo vatyi ra Cristo cuu ra tyindyee sii ñiyivi hebreo, ta cuhva cuan zañaha ra vatyi ndisa cuii maa ra Ndyoo vatyi ra Cristo cuu ra i catyi ra Ndyoo sihin ñiyivi sahnu sii yo vatyi cua quisi ra.

⁹ (Ta i quisi tyindyee tucu ra Cristo sii ñiyivi sa yivi ñiyivi hebreo cuu), ta tacuan ta cuu zacahnu tucu ñu cuan sii ra Ndyoo vatyi i cundahvi iñi ra sii ñu tañi catyi si nuu tutu ra: Yucuan cuenda cua zacahni suun nu iyo inga ñiyivi.

Cua cate yaa, ta zacahni zivun. Catyi si.

¹⁰ Ta inga tucu saha catyi ra: Cuzii iñi ndo, ndoho sa yivi ñiyivi hebreo cuu. Cuzii iñi ndo iñi ñi sihin ñiyivi ra Ndyoo.

¹¹ Ta iyo inga nu catyi si tyehen: Zacahnu ndo sii ra ndyaca ñaha sii yo, ndoho sa yivi ñiyivi hebreo cuu.

Ta nazacahnu tandihí ñiyivi sii ra.

¹² Ta iyo tucu nu cahan ra Isaías ta catyi ra:

Cua cacu minoo ñiyivi ra Isaí. Cua quisi ra vatyi cua cundyaca ñaha ra sii ñiyivi sa yivi ñiyivi hebreo cuu.

Ta sa cuenda maa ra ta cua coo cuhva cacu ñu.

¹³ Tyindyee maa ra Ndyoo sii yo, ta sito yo vatyi sa ndisa cua cuhva ra sa vaha sii yo. Sihin cuhva saha maa Tatyi Ii sii ndo ta cua sino xaan iñi ndo sii ra. Ta vityi sa cuenda sa sino iñi ndo sii ra ta zii xaan cua cuñi ndo, ta cua coo sa taxi sii ndo sihin ra.

¹⁴ Ta sito vehi sa cuenda maa ndo hermanos vatyi vaha xaan ndo, ta sito ndo cuaha xaan, ta cuu cuhva ndo minoo sa siñi tuñi vaha sii minoo ndo ta sii inga ndo.

¹⁵ Zoco vazu sa site cuhva cuan zoco zuun ñi i tyei zuhva tuhun ya, ta ñihi xaan i quehin sihin ndo, ta zanacohin iñi ndo inga saha zuun ñi cuhva sa i nacatyi sihin ndo. Vatyi maa ra Ndyoo i saha tysiño sii, sa zatyiñe tysiño maa ra.

¹⁶ Ta i ndui minoo ra zatyiñe sa cuenda ra Jesucristo nu iyo ñiyivi sa yivi ñiyivi hebreo cuu. Nacatyi xein Tuhun ra Ndyoo vatyi zacahnu si sii ra cuhva cuan. Ta cua

sino iñi ñu cuan, ta cua cuu cuhve sii ñu sii ra Ndyoo. Ta cua tiin cuenda ra sii ñu vatyi sa zanduvalha Tatyi Ii sii ñu.

¹⁷ Tyindyee xaan ra Cristo Jesús sii, ta yucuan cuenda cuu catyi vatyi vaha xaan cuu tyiño i zavehi sa cuenda ra Ndyoo.

¹⁸ Ma cuu catyi inga cuhva vatyi maa ra Cristo i sityiño sii, ta sa cuenda maa ra ta ñihí cuhva ta i sino iñi ñiyiví sa yíví ñiyiví hebreo cuu. I siñi ñu tuhun quehin, ta i ndyehe ñu cuhva zavehi

¹⁹ vatyi i zavehi sa ndyityi ta cuaha xaan cuhva sihin tundyee iñi sa saha maa Tatyi Ii maa ra. Ta ndya cuhva ndya ñuu Jerusalén ta ndya ñuu Ilírico i zacoto vehi tandihí Tuhun Vaha sa cuenda ra Cristo.

²⁰ Ta i nducu xein cuhva zacote Tuhun Vaha nu ña sito ñiyiví sii ra Cristo vatyi ña cuñi zatyiñe nu i quisaha inga ra sa xihna ñi.

²¹ Vatyi catyi si nuu tutu ra Ndyoo:

Cua coto ñiyiví, ñu tañaha ca coto, sa cuenda ra.
Ta ñiyiví tañaha ca cuiñi, cua cutuñi iñi ñu,
catyi si.

Cuñi ra Pablo cuhun ra ñuu Roma

²² Yucuan cuenda ñá cuu quisi nu yucu ndo.

²³ Zoco vityi sa ndihí zatyiñe ityi ya, ta cuñi xein quisi ndyehi sii ndo. Sa cuaha cuiya cuñi quisi nu yucu ndo.

²⁴ Yucuan cuenda sica iñi vatyi cua ndyehi sii ndo quívi cua cuhín ñuu España. Cua ndoi sihin ndo zuhva quívi, ta ziquí cua cuu tyindyee ndo sii zuhva, ta cua cuu cuhín ityi nuu ca.

²⁵ Zoco vityi cuahan xihne ñuu Jerusalén vatyi cua tyindyee sii ñiyiví sino iñi Tuhun Ndyoo yucúan.

²⁶ Vatyi i saha maa ñiyiví ñuu Macedonia ta ñuu Acaya xuhun sa

tyindyee sii ñu ndahvi sino iñi sii ra Jesús ñuu Jerusalén.

²⁷ Vaha xaan sa cuñi ñu tyindyee ñu, ta cuhva cuan cuñi si, vatyi sa xihna ñi i tyindyee ñiyiví hebreo sii ñu cuan sihin sa zacoto maa ra Ndyoo sii ñu, ta i sito ñu yozo caa iyo ra Ndyoo.

²⁸ Yucuan cuenda xihna ca cundyaque xuhun sa tyindyee ñiyiví sii ñu ñuu Jerusalén. Ta ziquí cua yehi nu yucu ndo ityi cuhin ñuu España.

²⁹ Ta sa site vatyi cua cuhva xaan ra Cristo sa yaha sii ta sii maa ndo quívi cua sei nu yucu ndo.

³⁰ Cuñi xaan ndo sii ra Jesucristo, ndoho yañi xaa. Ta saha xaan Tatyi Ii cuhva sii ndo sa cuñi ndo sii inga ñiyiví sino iñi. Yucuan cuenda vityi zañiñi sii ndo vatyi cahan xaan ndo sihin ra Ndyoo sa cuenda mi.

³¹ Caca ndo sii ra vatyi cua zacacu ra sii, sii ñiyiví ña tyaa yahvi sii ra ityi Judea. Ta caca ndo sii ra vatyi cua cuzí iñi ñiyiví ñuu Jerusalén sihin sa cua cuhve sii ñu.

³² Ta caca ndo sii ra Ndyoo vatyi cua cuu quisi sihin sa zíi cuñi nu ndyaa ndo tatu tacuan cuñi maa ra Ndyoo. Ta caca ndo sii ra vatyi cua cuu quitati zuhva nu ndyaa ndo ta cua coo ca tundyee iñi sii sa cuenda Tuhun Ndyoo ta sa cuenda coño ñuhi.

³³ Ta vityi, Ndyoo cua ndoo xaan sihin ndo. Ta nacuhva xaan ra sa coo sa taxi sii ndo sihin ra ta sa coo vaha ndo tandihí cuhva. Ta nacuu si tacuan.

16

Zacuhun ra Pablo minoo nacumi sii amigo ra

¹ Zacote sii ndo sa cuenda ña hermana Febe ya. Tyindyee xaan ña sii ñiyiví sino iñi Tuhun Ndyoo ñuu Cencrea.

² Ta catyi sihin ndo vatyi tiin cuenda vaha ndo sii ña vatyi iñi ñi cuu ña sihin ndo sa cuenda ra Cristo, ra ndyaca ñaha sii yo.

Tiin cuenda vaha ndo sii ña minoo cuhva vaha tañi tahan si zavaha ñiyivi ra Ndyoo. Ta tyindyee ndo sii ña ñaa sa cumañi sii ña vaty i tyindyee maa ña sii cuaha xaan ñiyivi. Ta sii tucu mi i tyindyee ña, ndih ca.

³ Cuhva ndo minoo nacumi sii ña Priscila ta ra Aquila. Ìn ñi zatyiño ñu tyiño ra Cristo sihin.

⁴ Sa yaty cuu ñu minoo saha nu i zacacu ñu sii. Saha xein tyahvi ndyoo sii fiu, ta tacuan tucu zavaha tandih ñiyivi sino iñi. Ñiyivi sa yivi ñiyivi hebreo cuu, saha xaan ñu tyahvi ndyoo sii ñu.

⁵ Sa cuenda mi cuhva tucu ndo minoo nacumi sii ñiyivi sino iñi tuhun vaha, ñu titahan vehe ña Priscila. Ta sii ra sa nañi Epeneto. Ñoho xaan iñi sii ra. Maa ra cuu ra sino iñi sii ra Cristo sa xihna ñi ityi Asia.

⁶ Cuhva ndo minoo nacumi sii ña María. I zatyiño xaan ña sa cuenda ndo.

⁷ Cuhva ndo minoo nacumi sii ra Andrónico ta ra Junias. Ìn ñi ñuu ra sihin ñuu mi. Ta i siñoho tucu ra vehe caa sihin. Ta xihna ca nduu tahan maa ra i sino iñi ta ziqui mi. I zacuhun ra Jesucristo sii nduu tahan ra sihin tyiño ra. Ta tyaa xaan ñiyivi yahvi sii ra.

⁸ Cuhva ndo minoo nacumi sii ra Amplias. Ñoho xaan iñi sii ra sa cuenda ra Cristo.

⁹ Cuhva ndo minoo nacumi sii ra Estaquis. Ñoho xaan iñi sii ra. Ta tacuan tucu ra Urbano. I zatyiño xaan ra sihin ndi sa cuenda ra Cristo.

¹⁰ Cuhva ndo minoo nacumi sii ra Apeles. Sino xaan iñi ra sii ra Cristo vazu ndyehe ra tundoho. Cuhva ndo minoo nacumi sii ñiyivi ra Aristóbulo.

¹¹ Cuhva ndo minoo nacumi sii ra Herodión. Ìn ñi ñuu ndi. Cuhva ndo minoo nacumi sii ñiyivi sino iñi vehe ra Narciso.

¹² Cuhva ndo minoo nacumi sii ña Trifena ta ña Trifosa. Zatyiño ñu tyiño ra Cristo, ra ndyaca ñaha sii

yo. Ta cuhva ndo minoo nacumi sii ña Pérsida, ña cuhva yo. Ñihi xaan i zatyiño ña tyiño ra Ndyoo.

¹³ Cuhva ndo minoo nacumi sii ra Rufo ta sii zih ra. Vaha xaan sino iñi ra sii ra Jesús. Ta zih ra cuu tañi zih mi.

¹⁴ Cuhva ndo minoo nacumi sii ra Asíncreto, ra Flegonte, ra Hermas, ra Patrobas, ra Hermes, ta inga ra yañi yo sa yucu sihin ra.

¹⁵ Cuhva ndo minoo nacumi sii ra Filólogo ta sii ña Julia ta sii ra Nero sihin cuhva ra ta sii ra Olimpas ta sii tandih inga ñiyivi sino iñi sa yucu sihin ñu.

¹⁶ Cuhva xaan ndo ndyoo nacumi sii minoo ndo ta sii inga ndo. Tandih ñiyivi cuenda ra Cristo zaquisi ñu minoo nacumi sii ndo.

¹⁷ Vityi zañiñi sii ndo yañi xaa vatyi zaha vaha ndo cuenda yoo cuu ñiyivi zacahñi tahan sii ñiyivi sino iñi. Zatyiño ñu cuhva sino iñi ñiyivi sihin minoo cuhva ña tuhva maa ndo zavaha. Ma cutahan ndo sihin ñu zavaha tacuan, ta ma zavaha ndo cuhva catyi ñu

¹⁸ vatyi ñu zavaha tacuan, ña zatyiño ñu tyiño ra Cristo ra ndyaca ñaha sii yo. Zatyiño ñu cuhva cuñi maa ñu. Vaha xaan ta vii xaan cahan ñu, ta zandavi ñaha ñu sii ñiyivi ña sito vaha.

¹⁹ Sito tandih ñiyivi vatyi tyaa xaan ndo yahvi Tuhun Ndyoo. Yu cuan cuenda zií xaan cuñi sihin ndo, zoco cuñi sa cua zacuenda vaha ndo sii ndo ta zavaha ndo maa ñi sa vaha. Ta ma cutuhva ndo zavaha ndo sa ña vaha.

²⁰ Ra Ndyoo cuu ra saha sa coo sa taxi sii ndo, ta ña naha ca ta cua zandih ra sa ña vaha nu yucu ndo. Cua cuhva ra sa cuañi ndo ziqui cuihna. Ta vityi nacoo xaan sa vaha sa saha maa ra Jesucristo sii ndo. Maa ra ndyaca ñaha sii yo.

²¹ Zaquisi ra Timoteo minoo nacumi sii ndo. Zatyiño ra sihin. Ta ra Lucio ta ra Jasón ta ra Sosipater zaquisi tucu ra minoo nacumi sii

ndo. ñin ñi ñuu tandihí ra sihin ñuu mi.

²² Yuhvi ra Tercio tyei carta ya, ta zaquisi minoo nacumi sii ndo sa cuenda ra ndyaca ñaha sii yo.

²³ Zaquisi maa ra Gayo minoo nacumi sii ndo. Saha noo ra vehe ra sii, ta ndu-ñin tucu tandihí ñu sino iñi ihya. Zaquisi ra Erasto minoo nacumi sii ndo sihin ra Cuarto yañi yo. Ra Erasto cuu ra cumi xuhun ñuu ya.

²⁴ Cuñi vatyi cua cuhva xaan ra Jesucristo, ra ndyaca ñaha sii yo, sa vaha sii tandihí ndo. Ta nacuu si tacuan.

Zacahnu ra sii ra Ndyoo nu ndihí tyaa ra carta ya

²⁵ Zacahnu ndo sii ra Ndyoo vatyi maa ra cuu ra cua cuhva tundyee iñi sii ndo, ta ma ndoyo ñuhu ndo sihin tuhun vaha sa i zacote sii ndo sa cuenda ra Jesucristo. Ta i zacoto ra Ndyoo sii ndo tuhun vaha cuhva iyo ra. Ta sa naha ñá sito ñiyivi tuhun sa cuenda ra Cristo, zoco vityi sito ñu.

²⁶ Vityi sito ñu tuhun sa cuenda ra Cristo. Saha ra Ndyoo tysiño sa cua coto tandihí ñiyivi ñuu ñiyivi, ta cua cutufí iñi ñu sa i tyaa ra profeta ta sa naha. Maa ra Ndyoo tava tysiño ya, ta ndito ra tandihí cuii tyiemu. Ta vityi sa cuenda sa sito ñiyivi, ta cuu sino iñi tandihí ñu, ta cuu tyaa ñu yahvi sii ra.

²⁷ Maa ñi maa ra cuu Ndyoo. Maa ñi maa ra cuu ra iyo sa siñi tuñi sa ndisa. Nazacahnu yo sii ra sa cuenda sa i zavaha ra Jesucristo. Nazacahnu yo sii ra tandihí cuii tyiemu. Ta nacuu si tacuan.

Sa Xihna Ñi Carta I Tyaa Ra San Pablo Sii Ñiyiví Sino Iñi Sii ra Ndyoo Ñuu Corinto

*Tyaa ra Pablo minoo carta sii
ñiyiví sino iñi sii ra Ndyoo ñuu Corinto*

¹ Yuhvi ra Pablo i casi ra Ndyoo sii vatyi cui minoo ra cua zatyioño tyiño ra Jesucristo. Ta vityi tyei carta ya sihin ra Sóstenes hermano yo.

² Ta zacuhun ndi sii si sii maa ndo ra cuu vehe ñuhu ra Ndyoo ñuu Corinto. Ñiyiví ra Ndyoo cuu sii ndo vityi vatyi sa ndu-iin ndo sihin ra Cristo Jesús. I casi ra Ndyoo sii ndo vatyi cuu ndo ñiyiví vaha xaan tañi tandihí ñiyiví sa zacahnu sii ra Jesucristo nacahnu ñuu ñiyiví. Ndyaca ñaha ra sii tandihí yo sa cuu cuenda ra.

³ Sique sii ra Ndyoo Zutu yo ta sii ra Jesucristo ra ndyaca ñaha sii yo vatyi nacuhva xaan ra tumañi iñi sii ndo ta sa coo sa taxi añima ndo.

*Cuhva i saha xaan ra Ndyoo sa
vaha sii ñiyiví ra ñuu Corinto*

⁴ Tandihí cuhva saha xein tyahvi ndyoo sii ra Ndyoo sa cuenda tandihí ndo vatyi i saha xaan maa ra tumañi iñi sii ndo sa cuenda ra Cristo Jesús.

⁵ Ta vityi i saha xaan ra cuhva sii ndo, ta cuu cahan ndo Tuhun ra, ta iyo xaan sa siñi tuñi sii ndo.

⁶ Tandihí sa i catyi ndi sihin ndo sa cuenda ra Cristo, ta i cuu si cuhva cuan sa cuenda maa ndo.

⁷ Ta yucuan cuenda ñahñi sa cumañi sii ndo. Saha xaan maa ra Ndyoo tandihí cuii ndatu sii ndo nii ñi sa ndatu ndo quivi cua quisí tucu ra Jesucristo, ra ndyaca ñaha sii yo.

⁸ Ta cua tyindyeer a sii ndo sihin tandihí cuii cuhva, ta ma ndoyo

ñuhu ndo, ta yoñi cua cuu tyaa cua atyi sata ndo quivi cua quisí ra Jesucristo.

⁹ Zavaha ra Ndyoo cuhva catyi ra tandihí saha. Ta maa ra cuu ra i casi sii ndo vatyi cu-iin ndo sihin ra Jesucristo zehe ra. Maa ra cuu ra ndyaca ñaha sii yo.

Ña vaha sa coo ziin ziin itiyiyo

¹⁰ Ta vityi sihin ziví ra Jesucristo, ra ndyaca ñaha sii yo, sica xein sii ndo hermano vatyi iin ñi cuu ndo, ta ma coo ziin ndo. Iin fi cuhva caca iñi ndo. Iin fi cuhva nacoo sa siñi tuñi sii ndo.

¹¹ Tacuan catyi sihin ndo hermano vatyi sa i nacatyi ñiyiví ra Cloé sihin vatyi iyo tizihí nu yucu ndo

¹² vatyi ziin ziin cahan ndo. Iyo ndo catyi ndo: "Yuhvi ndyique sii ra Pablo", catyi ndo. Ta inga ndo catyi ndo: "Ta yuhvi ndyique sii ra Apolos." Ta iyo ndo catyi ndo: "Ndyique sii ra Pedro." Ta inga tucu ndo catyi ndo vatyi ndyico ndisa cuii ndo sii ra Cristo.

¹³ Ña vaha sa cahan ndo tacuan vatyi ma cuu sa coo ziin yo vatyi iin ñi coño ñuhu ra Cristo cuu yo tatu sino iñi yo sii ra. ¿Atu yuhvi ra Pablo i sihi nu cruz sa cuenda ndo? ¿Atu i sicoo ndutya ndo sihin ziví mi? Yiví.

¹⁴ Sehi tyahvi ndyoo sii ra Ndyoo vatyi ñá zacoo ndutye sii numinoo ndo, maa ñi ra Crispo sihin ra Gayo ta yoñi inga ra

¹⁵ coto catyi ndo vatyi i zacoo ndutye sii ndo sihin ziví mi ta cundyico ndo sii.

¹⁶ Aan, ndisa i zacoo ndutye sii ñiyiví ra Estéfanos, zoco sica iñi vatyi yoñi ca inga ra i zacoo ndutye.

¹⁷ Vatyi ñá zaquisí ra Cristo sii mi sa zacoo ndutye sii ñiyiví. I tava ra tyiño sii, vatyi nacatyi tuhun ra, cuhva zacacu ra sii yo. Zoco ña quehin sihin sa siñi tuñi sa iyo ñuu ñiyiví ya coto caca iñi ñiyiví vatyi tyaqui xaan cuhva quehin, ta ma nacañi vaha iñi ñu cuhva catyi si

sa cuenda cuhva i sihi ra Cristo nu cruz sa cuenda cuatyi yo.

Sito yo vatyi vaha ca sa siñi tuñi sa iyo sii maa ra Ndyoo ta ziquí sa siñi tuñi sa iyo sii ñiyiví ñuu ñiyiví

18 Ñiyiví cua cunaa, sica iñi ñu vatyi sa tondo ñi cuu cuhva i sihi ra Jesúz nu cruz sa cuenda cuatyi yo. Zoco sa cuenda maa yo, ra i zacacu ra Ndyoo, ta tundyee iñi cuu si vatyi sihin sa sino iñi yo sii si ta cacu yo.

19 Vatyi catyi Tuhun Ndyoo:
Sica iñi ñiyiví sa sito xaan, vatyi cuu ñihi ñu cuhva ta cacu ñu.
Zoco cua zanei tandihí cuhva cuan,
ta ma ñihi ñu cuhva cacu ñu
sihin sa siñi tuñi maa ñu.
Tacuan catyi Tuhun Ndyoo.

20 Ñahñi maa tyindye si sa cuu yo ra sito xaan a ra maestro a ra sito natuhun ziquí tyiño sa iyo ñuu ñiyiví. Tandihí sa sito xaan ñiyiví ñuu ñiyiví ya, ñahñi cuu si ityi nuu ra Ndyoo.

21 Casi xaan iñi ra Ndyoo, ta ña saha ra sa coto ñiyiví sii ra sihin sa siñi tuñi ñu. Zoco i zavaha ra inga cuhva, ta cuu coto ñiyiví sii ra ta cacu ñu tatu cuñi ñu Tuhun ra ta sino iñi ñu sii si. Ta iyo ñiyiví sica iñi ñu vatyi sa tondo ñi cuu Tuhun Ndyoo.

22 Vatyi cuñi ñiyiví hebreo ndyehe ñu sa ndyityi. Ta ñu griego nanducu xaan ñu sa siñi tuñi, cuhva sica iñi ñu.

23 Zoco maa yo nacatyi yo sihin ñiyiví cuhva i sihi ra Cristo nuu cruz. Cuxaan ñiyiví hebreo sihin cuhva cuan, ta sica iñi inga ñiyiví vatyi minoo sa tondo ñi cuu si.

24 Zoco sa cuenda ñiyiví i casi ra Ndyoo, vazu ñiyiví hebreo a ñiyivi griego cuu ñu, zoco sito tandihí ñu vatyi sa cuenda ra Cristo ta cuu zacacu ra Ndyoo sii yo. Ta yucuan cuu cuhva zañaha maa ra Ndyoo vatyi casi xaan ca iñi maa ra.

25 Sica iñi ñiyiví vatyi i zavaha maa ra Ndyoo minoo sa tondo,

zoco vaha xaan ca cuhva i zavaha maa ra Ndyoo ta ziquí sa zavaha ñiyiví. Ta iyo xaan ca tundyee iñi sii maa ra Ndyoo ta ziquí sii ñiyiví.

26 Ndohermanos, zaha vaha ndo cuenda cuhva i casi maa ra Ndyoo sii yo vatyi ña cuaha yo cuu ra casi xaan iñi sihin sa siñi tuñi sa iyo ñuu ñiyiví ya. Ña cuaha yo cuu ra ñiñi ta ra cuca ñuu ñiyiví ya.

27 Zoco i casi ra Ndyoo sii yo ta cua catyi inga ñiyiví vatyi tondo xaan iyo yo. Vatyi cua cuu si ticanhan nuu sii ñiyiví sa sica iñi vatyi casi xaan iñi ñu. Ta i casi ra sii yo, ra ña ñiñi ta ña cuca, vatyi cua zaha yo ticanhan nuu sii ñiyiví iyo xaan cuhva sii ihya ñuu ñiyiví.

28 Ta i casi ra sii ñiyiví ndyihí, ñiyiví sa ñahñi maa sa sito, ñiyiví sa ña cuu ndyehe ñiyiví sii. Tacuan i zavaha ra vatyi cua cutyiño ra sii yo, ta cua quindyaar a sa tuhva inga ñiyiví, ñu cuu ñiyiví ñiñi vityi.

29 Tacuan i zavaha ra Ndyoo, ta yoñi cua catyi vatyi ra cahnu xaan cuu ra ityi nuu ra Ndyoo.

30 Zoco zuun ñi maa ra Ndyoo cuu ra sa zandu-jiin sii maa ndo sihin ra Cristo Jesúz. I saha maa ra Ndyoo vatyi cuu ra Jesúz sa siñi tuñi vaha sii yo. Sihi ra Jesúz, ta tyiyahvi ra sa cuenda tandihí cuatyi yo. Sa cuenda ra Cristo, ta ñahñi ca cuatyi yo ityi nuu ra Ndyoo. I zanduvaha ra cuhva iyo yo.

31 Tacuan i zavaha ra Ndyoo, ta i cuu si cuhva catyi Tuhun Ndyoo: "Tatu iyo minoo ra cuñi ra catyi ra vatyi vaha xaan ra, ma cuu. ñin ñi sii maa ra Ndyoo zacahnu yo vatyi i zavaha maa ra tandihí."

2

Cuhva nacatyi ra Pablo cuhva i sihi ra Jesúz nuu cruz

1 Hermanos, quivi sa seinu yucu ndo ta nacatyi Tuhun Ndyoo sihin ndo. Ñá cahan xein tuhun nahnu, ta ña quehin sihin cuhva iyo sa siñi tuñi ihya ñuu ñiyiví.

² Ñá quehin inga cuhva nu yucundo, maa ñi cuhva i sihi ra Cristo nuu cruz sa cuenda cuatyi maa yo vatyi maa ñi cuhva cuan cuu sa cuñi quehin sihin ndo.

³ Ta quivi i sei nu yucu ndo, i yuhu xein quehin sihin ndo ndya cuhva nehi.

⁴ Ta ndoo xaan i nacatyi Tuhun Ndyoo sihin ndo. Ñá nazaque cuaha tuhun nahnu a tuhun tañi sa sito rä tuhva xaan cahan. Ñahñi. Zoco i ndyehe ndo vatyi i quehin sihin tundyee iñi sa iyo sii Tatyi Ii maa ra Ndyoo, ta sicoo xaan cuhva sihin tuhun quehin.

⁵ Tacuan i quehin vatyi cuñi sa cuá sino iñi ndo sa cuenda cuhva sa iyo sii maa ra Ndyoo ta yivi sa vatyi tyaqui xaan quehin a vatyi i quehin sihin sa siñi tuñi sa iyo ñuu ñiyivi ya.

Sihin Tatyi Ii maa ra Ndyoo ta zañaha ra Ndyoo sii ra sii yo

⁶ Zoco cahan ndi sihin minoo cuhva vaha xaan sihin ñiyivi sa naha sino iñi. Zoco sa siñi tuñi sa cuenda maa ra Ndyoo cuu si ta yivi sa siñi tuñi sa iyo cuenda ñuu ñiyivi ya a sa cuenda sa iyo sii ra ndyaca ñaha ñuu ñiyivi ya vatyi cuee ca ta cuu naa tyiño sii tandihí ra.

⁷ Zoco cahan ndi sihin sa siñi tuñi sa saha maa ra Ndyoo. Nacatyi ndi cuhva i tyaa ra Ndyoo cuhva cumañi ca sino ñuu ñiyivi vatyi cua zanduu ra sii yo tañi maa ra. Xehe xaan i cuu tuhun ya ta sa naha, zoco vityi cuu coto yo sii si.

⁸ Yoñi numinoo ra ndyaca ñaha ñuu ñiyivi ya ta i cutuñi iñi ra tuhun ya vatyi tatu cutuñi iñi ra, ma cahñi ra sii ra ndyaca ñaha sii yo nuu cruz. Ta ra cahnu ca cuu ra ndyaca ñaha sii yo.

⁹ Catyi Tuhun Ndyoo:

Yoñi maa sa ndyehe a sa siñi a sa cutuñi iñi tandihí sa vaha xaan sa zanduvaha ra Ndyoo sa cuenda ñiyivi cuñi xaan sii ra. Catyi si.

¹⁰ Zoco vityi sa cuenda Tatyi Ii maa ra Ndyoo ta saha ra Ndyoo sa coto yo vatyi zañaha Tatyi Ii maa ra tandihí cuii sii yo ndya cuhva ndya sa xehe xaan ca ta tuhun sa tuhva xaan maa ra Ndyoo tyixehe.

¹¹ Ma cuu coto numinoo yo ñaa sa sica iñi inga yo. Zoco sito maa yo ñaa sa sica iñi yo. Ta zuun ñi cuhva cuan, sito Tatyi Ii maa ra Ndyoo tandihí sa sica iñi maa ra Ndyoo.

¹² Ta saha maa ra Ndyoo Tatyi Ii ra sii yo vatyi cua zacoto ra sii yo tandihí sa yaha xaan sa saha maa ra Ndyoo sii yo.

¹³ Ta nacatyi ndi cuhva zacuaha Tatyi Ii sii ndi ta yivi sihin sa siñi tuñi sa iyo ñuu ñiyivi ya. Nacatyi ndi tuhun sa saha maa ra Ndyoo sihin maa ndo sa iyo Tatyi Ndyoo sii.

¹⁴ Zoco ñiyivi ta ñihi ca Tatyi Ii ra Ndyoo, ña cuñi ñu cuiñi ñu cuhva nacatyi Tatyi Ndyoo. Tañi sa tondo cuu si cuñi ñu vatyi ña cutuñi iñi ñu sii si. Maa ñi ñiyivi sa iyo Tatyi Ndyoo sii, ta cuu cutuñi iñi ñu.

¹⁵ Zoco ra sa iyo Tatyi Ii ra Ndyoo, cutuñi iñi ra tandihí. Zoco ñiyivi ndya vaha ñi ña cutuñi iñi ñu cuhva iyo maa ra cuan.

¹⁶ Catyi Tuhun Ndyoo: "Yoñi cuu cutuñi iñi ñaa sa sica iñi ra Ndyoo. Yoñi cuu zacuaha sii maa ra", catyi si. Zoco sica iñi maa yo cuhva sica iñi ra Cristo.

3

Cuhva cuñi si sa zatyiño yo tyiño ra Ndyoo

¹ Zoco hermanos i quehin sihin ndo quivi cuan tañi sa lee cuu ndo vatyi tañi sa nacaa cacu ndo cuhva saa ya cuu si, ta tacuan iyo ndo ndya vityi. Vatyi cumañi nduvaha cuhva iyo ndo sa ndisa cuii. Ta ñá cuu quehin sihin ndo quivi cuan tañi ñiyivi sa zatyiño Tatyi Ii maa ra Ndyoo añima.

² Tañi sa tuhva yo cuhva zicui sii sa ndyahi tatu ta cuu ca casi

si. Tacuan i quehin sihin maa ndo sihin tuhun ña yii ñi. Tañi sa lee cuu ndo cuu si vatyi ta cuu ca casi vaha ndo. Siin xaan cuhva sino iñi ndo, ta tacuu ca cutuñi iñi ndo sa siñi tuñi sii maa ra Ndyoo.

³ Maa ñi ñiyivi ta sino vaha ca iñi cuu ndo ndya vityi, ta cuñi ndo cuu sii ndo tañi cuu sii inga ñiyivi, ta sahñi tahan ndo sihin minoo ndo ta sihin inga ndo. Zavaha ndo cuhva zavaha ñiyivi sa cuu cuenda ñuu ñiyivi ya, ta ña zavaha ndo tañi ñiyivi cuenda ra Ndyoo.

⁴ Yucuan cuenda iyo ndo catyi ndo: "Yuhvi ndyique sii ra Pablo." Ta inga ndo catyi ndo: "Yuhvi ndyique sii ra Apolos." Catyi indo. Ta sihin cuhva cuan zañaha ndo vatyi ta cuahnu ca ndo sihin Tuhun Ndyoo.

⁵ Zoco ¿yoo ra cuu yuhvi? ta ¿yoo ra cuu ra Apolos ta sahñi tahan ndo sa cuenda ndi? Maa ñi ra zacoto Tuhun Ndyoo sii ndo cuu nduhvi, ta i sino iñi ndo. Tahan tahan ndi i zavaha ndi cuhva i catyi maa ra Ndyoo sihin ndi.

⁶ Yuhvi i tasi siti sa cuu Tuhun Ndyoo. Ta ra Apolos i quisi cozo. Ta i zacuahnu maa ra Ndyoo tyiño cuan.

⁷ Yucuan cuenda ñahñi cuu ra tasi ta ra tyozo, zoco maa ra Ndyoo cuu ra ñiñi ca vatyi maa ra zacuahnu tyiño cuan.

⁸ Ìn ñi cuu si tatu tasi yo a tyozo yo, ta tahan tahan yo cua cuhva maa ra Ndyoo sa vaha sii yo cuhva tahan si sa cuenda tyiño yo.

⁹ Ìn ñi i zatyiño maa ndi sihin ra Ndyoo. Ta maa ndo cuu tañi minoo ñuhu nu zatyiño maa ra Ndyoo. A tañi minoo vehe zandaa ra cuu ndo.

¹⁰ I catyi maa ra Ndyoo vatyi yuhvi cua cui tañi minoo ra sa sito xaan zandaa vehe. Sa i saqui cimiento si, ta inga ra zandaa vehe nuu cimiento. Zoco ra cua zandaa vehe nuu cimiento cuan, cuñi si sa zacuenda ra cuhva zatyiño ra.

¹¹ Ta yoñi ra cuu caqui inga cimiento ta ziqui cimiento sa sa ndyaa vatyi ra Jesucristo cuu cimiento vehe cuan.

¹² Zoco cuu zandaa maa yo minoo vehe nuu cimiento cuan. Cuu cutyiño yo xuhun cuaan a xuhun cuisi a yuu tyaqui. A cuu cutyiño yo yutu a itya a mihin.

¹³ Ta quivi quisi ra Cristo cua ndyehe ra tyiño zacuu minoo minoo yo. Cua zaquisi ra ñuhu, ta cua ndyehe ra tatu vaha tyiño yo a ña vaha si.

¹⁴ Tatu ma cayu tyiño yo sa zandaa yo nuu cimiento cuan, cua cuhva ra Ndyoo sa vaha sii yo.

¹⁵ Zoco tatu cayu tyiño i zacuu minoo yo, cua ndoyo ñuhu si, ta cunaa si, zoco ra cuan, cacu ra. Sa yatyi cuii ca sa ma cacu ra tañi minoo ra quita si vehe sa cayu.

¹⁶ ¿Atu ña sito ndo vatyi sa tandihí maa ndo cuu vehe ñuhu ra Ndyoo ta ndyaa Tatyi Li ra Ndyoo sihin ndo?

¹⁷ Tatu zativi minoo ra vehe ñuhu ra Ndyoo, cua zanaa ra Ndyoo sii ra cuan vatyi ii xaan vehe ñuhu ra Ndyoo, ta maa ndo cuu vehe ñuhu ra.

¹⁸ Numinoo ndo ta ma zandavi ñaha ndo sii ndo. Tatu çaca iñi ndo vatyi sito xaan ndo sihin sa siñi tuñi sa iyo ñuu ñiyivi ya, vaha ca zanduu ndo sii ndo tañi minoo ra sa ñahñi maa sito, ta cua cuhva ca maa ra Ndyoo sa siñi tuñi maa ra sii ndo.

¹⁹ Vatyi sa siñi tuñi sa iyo ñuu ñiyivi ya, ñahñi maa cuu si ityi nuu ra Ndyoo. Sa tondo ñi cuu si sa cuenda maa ra. Vatyi catyi Tuhun Ndyoo: "Sihin sa siñi tuñi sa iyo sii ñiyivi, ta cua zanduva ra Ndyoo sii ñu."

²⁰ Ta inga tucu cuhva catyi Tuhun Ndyoo: "Sito ra Ndyoo cuhva sica iñi minoo ra casi xaan iñi vatyi ñahñi vale si."

²¹ Yucuan cuenda yoñi ndo tyaa xaan ndo yahvi sii numinoo ñiyivi

vatyi sa saha maa ra Ndyoo tandih i cuii sa cuñi si sii ndo.

²²Saha maa ra Ndyoo sii yuhvi ra Pablo sii ndo, ta saha ra sii ra Apolos ta ra Pedro tucu vatyi tyindyeen di sii ndo. Ta tandih i cuii sa iyo ñuu ñiyivi saha ra sii ndo. Ta vazu ndito ndo a sa sihi ndo, zoco ndyaa ra sihin ndo. Ta tandih i sa iyo vityi ta sa cua coo ityi nuu ca, tandih i cuii ñaa sa cuu si, ta cuu si cuenda maa ndo vatyi tyindyeen si sii ndo.

²³Ta maa ndo cuu sii ra Cristo, ta ra Cristo cuu sii ra Ndyoo.

4

Tyiño i zavaha ra apóstol

¹Cuñi si sa nacoto ndo sii ndi tañi ra zatyiño sa cuenda ra Cristo. Tyiño maa ndi cuu sa zacuaha ndi sii ñiyivi tuhun xehe ca sii maa ra Ndyoo.

²Ta sa cuenda maa ndi, ra cuu muzu ra Ndyoo, cuñi si vatyi tandih i saha tyaa ndi yahvi tandih i sa nacatyi ra Ndyoo sihin ndi.

³Ta ña sica iñi atu catyi ndo vatyi vehi a ña vehi a tatu catyi inga ñiyivi. Ñahñi sa cuu. Ta nu mi ta ma cuu catyi tatu zavehi sa vaha a sa ña vaha.

⁴Catyi sa siñi tuñi vehi sihin, vatyi ñahñi ca cuatyi. Zoco numaa tacuan ta ña cuñi si catyi si vatyi ñahñi maa cuatyi caña ñi. Maa ra Ndyoo cuu ra cua tyicuhva sii.

⁵Yucuan cuenda ma catyi ndo tatu vaha a ña vaha sa zavaha ñiyivi vatyi ta saa ca quivi. Quivi cua quasi ra Cristo ta cua zandundisi ra nu ñaa. Ta cua zatuu ra sa xehe sa iyo añima yo. Ta ziqui cua tyiyahvi ra Ndyoo sii minoo minoo yo cuhva tahan si sii yo.

⁶Ndoho hermanos quehin cuhva ya vatyi cua tyindyeen si sii maa ndo. Natyicuhva maa ra Ndyoo sii mi ta sii ra Apolos, ta ma zacahnu maa ndo cuaha ca sii minoo ndi a sii inga ndi. Ña tacuan catyi Tuhun Ndyoo.

⁷Yoñi minoo ndo sa ñiñi ca ta ziqui inga ndo. Tandih i sa cuu sii ndo, maa ra Ndyoo i saha. Yucuan cuenda ma zacahnu ndo sii ndo.

⁸Zoco sica iñi maa ndo vatyi sito ndo tandih i cuii sa iyo sa cuenda maa ra Ndyoo ta ñahñi sa cumañi sii ndo. Sa ndyaca ñaha ndo tañi sa rey cuu ndo, ta cuu tyaa siyo ndo sii maa ndi. Vaha xaan tatu sa ndisa vatyi rey cuu ndo, ta tacuan ta cua cuu cundyaca ñaha ndi sihin ndo.

⁹Ta sica iñi vatyi maa ndi, ra apóstol, i zanduluhlu xaan ca ra Ndyoo sii ndi. Ndyehe xaan ndi tundoho tañi minoo ra sa ñoho vehe caa, ta cuñi cuu ra. Tañi sa sindyaca zandaru sii ndi ityi cahnu ta ndyeha ñiyivi ta ángel sii ndi. Ta saha xaan si ticahan nuu sii ndi cuu si.

¹⁰Sa cuenda ra Cristo ta sica iñi ñiyivi vatyi tondo xaan maa ndi, zoco maa ndo sito xaan ndo cuñi ndo sa cuenda ra Cristo. Tañi sa ñahñi sa cuu zacuu maa ndi, zoco maa ndo cuu xaan sii ndo, cuñi ndo. Sacu ndyaa ñiyivi sii maa ndi, zoco sii ndoho zacahnu ñu.

¹¹Ndyahva ndya vityi ta ndyeha xaan ndi tundoho. Sizoco ndi. Ityi ndi. Ñahñi ca zahma ndi. Ñahñi vehe ndi. Ta tuhva ñiyivi cañi sii ndi.

¹²Sitatu xaan ndi vatyi ñihi xaan zatyiño ndi. Quiñi cahan ñiyivi sihin ndi, zoco vaha cahan ndi sihin ñu. Zavaha ñu sa ña vaha sihin ndi, zoco zandyee ndi iñi ndi.

¹³Cahan ñu sii ndi. Zoco vii ñi cahan ndi sihin ñu. Zaha ñu tuhun tañi mihin cuu ndi tañi sa ñahñi yahvi ndyaa ndi ndya cuhva ndya vityi.

¹⁴Ña tyei cuhva ya sii ndo sa cua cucahan nuu ndo. Zoco tañi sa sehi tyiño sii zehe ndyahi, ra cuñi xein.

¹⁵Vazu usi mil maestro zacuaha sii ndo sa cuenda ra Cristo, zoco ña cuaha zutu ndo. Mi cuu tañi zutu ndo sa cuenda ra Jesucristo vatyi xihna ca mi i nacatyi sihin ndo yozo caa cuu cacu añaima ndo.

¹⁶ Yucuan cuenda zañiñi sii ndo vatyi zavaha ndo tandihí cuhva zavehi.

¹⁷ Ta yucuan cuenda tasi sii ra Timoteo nu yucu ndo. Cuñi xein sii ra tañi minoo zehi. Vaha xaan ndyico ra sii ra ndyaca ñaha sii yo. Cua zanacohon ra iñi ndo cuhva iye sa cuenda ra Cristo ta cuhva zacuehi tahan tahan vehe ñuhu.

¹⁸ Iyo ndo zacahnu xaan ndo sii ndo. Sica iñi ndo vatyi ma cuhun que nu yucu ndo.

¹⁹ Zoco tatu cuhva cuñi maa ra Ndyoo cuu, ña naha ca ta cua cuhin nu yucu ndo. Ta cua ndyehi sii ndoho sa zacahnu sii ndo tatu ndyizo ndo tundyee iñi maa ra Ndyoo a tuhun cahan ñi ndo.

²⁰ Vatyi tatu ndisa vatyi ndyaca ñaha ra Ndyoo sii ndo, yiví sa cahan ñi maa ndo cuu si, zoco cua cuu zatyíñi ndo sihin tundyee iñi maa ra Ndyoo.

²¹ ¿Yozo caa cuñi maa ndo? ¿Atu cuñi ndo sa quisí quehin sii ndo? ¿A cuñi ndo sa quisí zañehi sii ndo cuhva cuñi xein sii ndo ta vii ñi cua quehin sihin ndo?

5

Tatu ña cuñi minoo hermano zandoo ra cuatyí ra, cuñi si sa tava yo sii ra

¹ Catyi ñiyiví sihin vatyi iyo minoo ra nu yucu ndo ndyaa ra sihin zihí ndahvi ra. Cahnu xaan cahnu xaan cuatyí cuan. Ndyo cuhva ndya ñiyiví ta coto ca Tuhun Ndyoo ta ña tuhva ñu zavaha sii si.

² Sica iñi ndo vatyi vaha xaan ndo, ta ña nducuihya iñi ndo sa cuenda cuatyí cuan tañi tahan si. Ta ña tava ndo sii ra zavaha cuhva quiñi xaan cuan.

³ Ndisa yoñi ndyaa sihin ndo sihin coño ñuhi, zoco tañi sa ndyei sihin ndo cuu si vatyi ñoho xaan iñi sii ndo. Ta sihin ziví ra Jesús, ra ndyaca ñaha sii yo, sa cundaa iñi cuhva cuñi si zavaha ndo sihin ra zavaha cuatyí cuan.

⁴ Cuñi si sa titahan ndo. Ta zaha ndo tuhun vatyi ndyei sihin ndo. Ta cua coo xaan tundyee iñi ra Jesús sihin ndo.

⁵ Ta ziquí cuhva cuenda ndo sii ra cuan sii cuihna vatyi cua cuu zativí ra sii coño ñuhu ra, ta cua cuu cacu añima ra quíví cua tasi tuñi ra Ndyoo sii ñiyiví.

⁶ Ña vaha sa catyi ndo vatyi vaha xaan ndo vatyi saha ndo sa coo cuatyí cuan nu yucu ndo. ¿Atu ña sito ndo tuhun sa catyi si vatyi cua ndaa pan tatu tyihi yo zuhva ñi yusa iya? (Ta tañi yusa iya cuu ra cuan. Ta coto cua nduu tandihí ndo tañi maa ra.)

⁷ Tava ndo yusa iya ña vaha cuan coto zativí si sii tandihí ndo. Tacuan ta cua cuu ndo tañi pan ña ndaa vatyi ñahñi yusa iya ña vaha cuan cua quihví ticuí ndo. Ta zuun ñi maa ra Cristo cuu ra i sihi nu cruz sa cuenda yo. Ta sa naha i sahñi ñiyiví mvee ticatyí ta ndasi cuatyí ñu sihin niñi ti. Ta zuun ñi cuhva cuan i sati niñi ra Cristo nu sihi ra, ta sihin niñi cuan zandasí ra Ndyoo cuatyí yo ta zacacu ra sii yo.

⁸ Yucuan cuenda nacuu yo ñiyiví vaha sa ndisa. Ma zavaha ca yo sa quiñi ta sa ña vaha. Zoco nazavaha yo sa vaha sa ndisa cuii ta sa ndoo.

⁹ Nu inga carta i tasi sii ndo i catyi sihin ndo vatyi ma coo ndo sihin ñiyiví iyo cuatyí.

¹⁰ Zoco ñá quehin tuhun cuan sa cuenda ñiyiví ta sino ca iñi Tuhun Ndyoo. Iyo ra zavaha ra sa quiñi sihin sa ziñi ziñi ñaha. Iyo ra cuñi xaan ra sa coo xaan sa sii ra. Iyo ra zahu ra ta zandavi ñaha ra. Zoco ma cuu cuiñi siyo ndo sii tandihí ñiyiví sa iyo tacuan vatyi ndyaa ndo ñuu ñiyiví sihin ñu.

¹¹ Zoco quehin tuhun cuenda ra cuu hermano. Ma cutahan ndo sihin ra tatu zavaha ra sa quiñi sihin sa ziñi ziñi ñaha, a tatu cuñi xaan ra sa coo xaan sa sii ra, a tatu zacahnu ra sii inga ndyoo, a tatu quiñi cahan ra ta sahñi tahan ra

sihin ñiyiví a tatu ra siñi cuu ra a ra zuhu. Ta ma casi ndo xita sihin numinoo ra zavaha minoo cuhva cuan tatu catyi ra vatyi hermano cuu ra.

¹²⁻¹³ Vatyi maa yo ña tahan si tyaa yo cuatyí sata ñiyiví ityi sata. Cua tasi tuñi maa ra Ndyoo sii maa ñu. Zoco cuñi si sa coto vaha ndo sii ñiyiví ndyico sii ra Ndyoo nu yucu ndo. Yucuan cuenda tava ndo sii ra iyo cuatyí cuan nu yucu ndo, ra sa quehin tuhun.

6

Ma tyaa yo cuatyí sata ra hermano nuu ra cu tyiño

¹ ¿Ñaa cuenda tuhva maa ndo tyaa cuatyí sata inga hermano nuu ra cu tyiño, ra ña sino iñi Tuhun Ndyoo? ¿Ñaa cuenda ma zandaa ndo tyiño cuan nuu tandihí hermano?

² ¿Atu ña sito ndo vatyi ityi nuu ca cua tyicuhva maa yo sii ñiyiví ñuu ñiyiví? Tatu cua cuu tyicuhva ndo ñuu ñiyiví, ¿Ñaa cuenda sica iñi ndo vatyi ma cuu tyicuhva ndo tyiño ndyihí vityí?

³ Ityi nuu ca cua tyicuhva maa yo sii ángel. Yucuan cuenda cuu tucu tyicuhva ndo tyiño ña ñahñi xaan tañi sa iyo vityí.

⁴ Tatu iyo cuatyí nu yucu ndo ñaa cuenda saha ndo sa zandaa inga ñiyiví tyiño? Ñahñi ra cuu ra cuan sa cuenda maa ndo.

⁵ Quehin cuhva ya sihin ndo vatyi cuñi sa cua cucahan nuu ndo. Zaha ndo tuhun vatyi yoñi sa iyo sa siñi tuñi vaha nu yucu ndo vatyi ña saha ndo sa zandaa ra cuan tyiño.

⁶ Zoco sahan ndo nuu ra cu tyiño ta tyaa ndo cuatyí sata hermano ndo nuu ra ña sino iñi.

⁷ Iyo cuatyí nu yucu ndo vatyi sahan ndo nuu ra cu tyiño sihin hermano ndo. Vaha ca zandyee ndo iñi ndo sihin ñaa sa zavaha ñiyiví sihin ndo vazu zuhu ñu ndaha tyiño ndo.

⁸ Zoco maa ndo cuu ra zavaha sa ña vaha. Ndyo sa sii hermano ndo ta zuhu ndo.

⁹ ¿Atu ña sito ndo vatyi ma cuu quihví ñiyiví ña vaha nu ndyaca ñaha ra Ndyoo? Ma zandavi ñaha ndo sii ndo. Ma cuu quihví ra sa ndyaa sihin minoo ñaha ta ña tindaha ra, a ñiyiví zacahnu sii inga ndyoo, a ra ndyaa sihin inga ñaha sa yiví ñazihí ra a ra ndyaa sihin inga ra.

¹⁰ Ta ma cuu quihví ra zuhu a ñiyiví cuñi xaan sa coo sa sii ñu, a ra siñi, a ñiyiví quiñi cahan sihin inga ñiyiví. Ma cuu cuhun tandihí ñiyiví sa tacuan caa nu ndyaca ñaha ra Ndyoo.

¹¹ Ta tacuan i cuu zuhva maa ndo. Zoco i nacatya ra Ndyoo añima ndo. Sihin Tatyi li maa ra Ndyoo i zanduvaha ra cuhva iyo ndo. Sa cuenda sa i zavaha ra Jesucristo, ra ndyaca ñaha sii yo, ta ñahñi ca cuatyí ndo ityi nuu maa ra Ndyoo.

Coño ñuhu maa yo cuu vehe ñuhu ra Ndyoo

¹² Cuu zacui ñaa sa cuñi, zoco ma tyindyee tandihí si sii. Saha ra Ndyoo sa zacui sii si, zoco ma cuhve sa cundyaca ñaha si sii.

¹³ Iyo sa casi yo sa cuenda sisi yo, ta sisi yo iyo sa cuenda sa casi yo. Zoco ityi nuu ca cua naa tandihí cuhva cuan cua zacuu ra Ndyoo. Zoco ña iyo coño ñuhu yo sa vatyi zavaha yo sa quiñi sihin sa zíin zíin ñaha. Coño ñuhu yo cuu sii maa ra Ndyoo. Ta cuñi maa ra cundyaca ñaha ra coño ñuhu yo sihin Tatyi li ra.

¹⁴ I zanandoto ra Ndyoo sii ra Jesús, ta zuun ñi cuhva cuan cua zanandoto ra sii coño ñuhu yo sihin tundyee iñi maa ra.

¹⁵ ¿Atu ña sito ndo vatyi cuu ndo zuhva coño ñuhu ra Cristo? ¿Atu vaha tatu zandu-iñi ndo coño ñuhu ra Cristo sihin minoo ñaha zana? ¡Numinoo saha!

16 ¿Atu ña sito ndo vatyi tatu zandu-iin minoo ra sii coño ñuhu ra sihin minoo ñaha zana sa nduu ñu tañi minoo ni ñiyivi? Catyi maa ra Ndyoo sisi Tuhun ra vatyi ndyehe ra sii ñu tañi minoo ni ñiyivi.

17 Zoco ra sa ndu-iin sihin ra Cristo, sa ndu-iin añima ra sihin ra Cristo vatyi zuun ni Tatyi Ii iyo sii nduu tahan ra.

18 Zandoo ndo sii cuatyi sa cuñi ndo sii minoo ñaha sa yivi ñazihí ndo cuu. Iyo inga cuatyi sa ma zatívi xaan sii ndo. Zoco ñiyivi zavaha cuatyi ya, zuun ñi sii maa ñu zatívi ñu.

19 ¿Atu ña sito ndo vatyi coño ñuhu maa yo cuu vehe Tatyi Ii? Saha maa ra Ndyoo sii ra sii yo, ta iyo ra sisi añima yo. Ta yivi ca cuenda maa yo cuu yo.

20 Yahyi xaan i zata maa ra Ndyoo sii yo. Yucuan cuenda zacahnu xaan ndo sii ra Ndyoo sihin coño ñuhu ndo.

7

Cuhva cuñi si coo ñiyivi sa yaha tindaha

1 Ta vityi cua nacatyi sihin ndo sa cuenda cuhva i ndrucu tuhun ndo sii, nuu carta i zaquisi ndo. Sa xihna ñi, sa ndisa cuu si vatyi vaha ca tatu ma tindaha ñiyivi.

2 Zoco coto coo cuatyi ndo natindaha tahan tahan ndo sihin minoo ñaha ta tahan tahan ñaha sihin minoo rayii.

3 Nazavaha rayii cuhva tahan si sihin ñazihí ra. Ta tacuan tucu ñaha, nazavaha ña cuhva tahan si sihin yii ña.

4 Ma cuu zavaha ñaha cuan ñaa sa cuñi maa ña sihin coño ñuhu ña vatyi tahan tucu si sii yii ña catyi ra yozo caa cua zavaha ña. Ta tacuan tucu rayii, sii ñaha ra cuu tucu coño ñuhu ra.

5 Ma catyi ndo vatyi ma cuu cuzu ndo sihin ñaha ndo a sihin yii ndo. Zoco tatu cuñi ndo, cuu zaña ndo sii si zuhva quivi tatu nduu tahan ndo cuñi cuhva cuan. Ta cuu coo

ndyitya ndo ta cahan ndo sihin ra Ndyoo. Ta ziquí ndu-iin tucu ndo coto zandavi ñaha cuihna sii ndo ta coo cuatyi ndo vatyi ma cuu cundyaca ñaha ndo sii ndo.

6 Quehin cuhva ya vatyi sehi sa tindaha ndo, zoco yivi sa zañiñi sii ndo.

7 Vatyi vaha xaan tatu cuu coo tandihí ndo tañi mi. Zoco ziin ziin cuhva saha ra Ndyoo sii sa minoo minoo yo.

8 Catyi sihin ñu yoco ta sihin ñundahvi vatyi vaha tatu ndoo ñu tacuan ñi tañi mi.

9 Zoco tatu ma cuu cundyee iñi ñu sa ma tindaha ñu, vaha ca natindaha ñu.

10 Ta sihin ñiyivi sa yaha tindaha, catyi minoo cuhva sa cuenda ra ndyaca ñaha sii yo vatyi ma zandoo ñuzihí sii yii ñu.

11 Ta tatu zandoo minoo ña sii yii ña, ma cuu tindaha tucu ña sihin inga ra. Zoco cuu nacoo vaha ña sihin yii ña. Ta ma cuu sa sino tutu ta zandoo minoo ra sii ñazihí ra.

12 Ta vityi cua quehin ziquí inga zuhva ca cuhva, ta ña site tatu catyi maa ra Ndyoo cuhva ya a maa ñi mi, zoco tyehen catyi. Tatu iyo minoo hermano ta ña sino iñi ñazihí ra, zoco cuñi ña cundyaa ña sihin ra, ma cuu sa sino tutu ta zandoo ra sii ña.

13 A tatu iyo minoo hermana ta ña sino iñi yii ña, zoco cuñi ra cundyaa ra sihin ña. Ma cuu natani tutu ñu ta zandoo ña sii ra.

14 Vatyi sa cuenda sa sino iñi ñazihí ra ta tyindyee tucu ra Ndyoo sii maa ra. Ta zuun ñi cuhva tyindyee ra Ndyoo sii minoo ñaha ña sino iñi tatu sino iñi yii ña. Ta sihin cuhva cuan ta nduu zehe ñu tañi zehe ñiyivi sino iñi ta yivi tañi zehe ñiyivi ña sino iñi.

15 Zoco tatu zandoo, ra ña sino iñi sii ñaha ra a ñaha ña sino iñi sii yii ña, nacuhun ñu. Ta sihin cuhva cuan sa i ndasi ra hermano a ña hermana. Cuñi maa ra Ndyoo sa coo sa taxi.

¹⁶ Vatyi ña siton hermana tatu cua cuu zasinon iñi yíun. Ta ña siton hermano tatu cua cuu zasinon iñi ñazihun.

¹⁷ Ta tyehen catyi sihin ndo: Coo ndo cuhva catyi ra Ndyoo sihin ndo. Ta ndoo ndo vaha sihin cuhva iyo ndo quívi i cana ra Ndyoo sii ndo. Ta tacuan catyi sihin tandíhi ñiyivi sino iñi ziin ziin vehe ñuhu.

¹⁸ Tatu i casi ra Ndyoo sii minoo ndo ta sa yaha tahndya ñii xiñi xuu ndo. Ma caca xaan iñi ndo sa cuenda si. A tatu iyo ndo tañaha ca coo costumbre cuan sii ndo, ña cuñi si sa coo si vityi.

¹⁹ Ña ñiñi tatu zavaha yo costumbre cuan a ma zavaha yo sii si. Sa ñiñi cuu sa tyaa yo yahvi tuhun cahan maa ra Ndyoo.

²⁰ Ndoo ndo vaha tañi iyo ndo quívi i cana ra Ndyoo sii ndo.

²¹ Tatu iyo patrón quívi i cana ra Ndyoo suun, ma caca iñun. Zoco tatu cuu ndasun, nducun cuhva.

²² Vatyi quívi i cana ra Ndyoo sii minoo ra iyo patrón, ndisa iyo patrón ra, zoco ña ndyaca ñaha ca cuatyri sii ra. Zoco ra sa yoñi patrón quívi i cana ra Ndyoo sii ra, nduu ra tañi ra iyo patrón vatyi nduu ra muzu ra Ndyoo.

²³ Yahvi xaan i zata ra Ndyoo sii ndo. Ma cuhva ndo sa cundyaca ñaha sa ña vaha sii ndo. (Cuhva ndo sii ndo sii ra Ndyoo nacundyaca ñaha ra sii ndo, ta zatyiño ndo tyiño ra.)

²⁴ Catyi sihin ndo hermano vatyi ndoo ndo vaha cuhva iyo ndo quívi i cana ra Ndyoo sii ndo, ñaa ñi maa tyiño.

²⁵ Ta catyi sihin ñu yoco, ñahñi tuhun i saha ra Ndyoo sii sa cuenda ndo, zoco catyi sihin ndo cuhva sica iñi, ta cuu tiin cuenda ndo tuhin vatyi sito ndo vatyi i saha maa ra Ndyoo tumañi iñi sii, ta tuhve cahan maa ñi sa vaha sa saha maa ra sii.

²⁶ Ta sica iñi vatyi vaha ca ma tindaha ñu yoco sa vityi vatyi ndyehe

xaan maa yo, ra sino iñi, tundoho sisi quívi ya.

²⁷ Zoco tatu sa iyo ñazihun, ma nducu ndo cuhva natani tutu ndo. Zoco tatu ta coo ca ñazihun, ma cuñun sa coo.

²⁸ Zoco tatu tindohon, yívi cuatyri cuu si. Ta tatu tindaha ñu yoco, yívi cuatyri cuu si. Zoco tatu tindaha ndo cua coo xaan tizihi ta tundoho sii ndo ihyia ñuu ñiyivi. Ta yucuan cuenda catyi sihin ndo vatyi vaha ca sa ma tindaha ndo vatyi ña cuñi sa ndyehe xaan ndo tundoho ta tizihi cuan.

²⁹ Ta tyehen catyi sihin ndo hermanos vatyi ña cuaha ca quívi ndyaa. Cuñi si vatyi ra iyo ñazihun ma quihi xaan iñi ra sii ña vatyi cuñi si sa caca iñi ra sa cuenda tyiño ra Ndyoo tandíhi saha.

³⁰ Ta tatu cuihya xaan cuñi ndo zoco ma tyaa xaan ndo yahvi sii si. Ta tatu ziñi cuñi ndo ma tyaa xaan ndo yahvi sii si. A tatu cuca ndo ma tyaa xaan ndo yahvi sii si, zatyiño xaan ndo tyiño ra Ndyoo.

³¹ Ta ra sa iyo ndaha tyiño vityi, nacutyiño ra sii si sa cuenda tyiño ra Ndyoo vatyi ñuu ñiyivi sa ndyehe yo vityi sa cuñi naa si.

³² Cuñi sa ma caca xaan iñi ndo sa cuenda sa iyo ñuu ñiyivi ya. Caca iñi ndo maa ñi sa cuenda tyiño ra Ndyoo. Minoo ra sa ta coo ca ñazihun, sica iñi ra sa cuenda tyiño ra Ndyoo, ta cuu zatyiño ra tyiño ra Ndyoo.

³³ Zoco ra sa iyo ñazihun, sica iñi ra cuhva coo vaha ra ihyia ñuu ñiyivi ta cuhva cua cuziñi iñi ñazihun ra.

³⁴ Ta ziñi ziñi cuhva iyo sii ñuzihun sa iyo yiñi ta ñu yoñi. Ñaha sa tañaha ca coo yiñi, sica iñi ña sa cuenda tyiño maa ra Ndyoo. Sii ra Ndyoo cuu coño ñuhu ñia ta sa siñi tuñi sii ña. Zoco ñaha sa iyo yiñi, sica iñi ña cuhva coo sa vaha sii ña ihyia ñuu ñiyivi ta cuhva cua cuziñi iñi yiñi ña.

³⁵ Nacatyi cuhva ya sihin ndo vatyi cuñi tyindyei sii ndo. Ña cuñi catyi vatyi ma cuu tindaha ndo.

Zoco cuñi sa cua coo ndo minoo cuhva vaha ta minoo cuhva ma zayanga si sii ndo ta cua cuu zacahnu ndisa cuii ndo sii maa ra Ndyoo.

³⁶ Zoco tatu iyo ndo sica iñi ndo vatyi vaha natindaha zehe ndo vatyi cua yaha quivi ñu, vaha cuhva cuan. Natindaha ñu tatu cuñi ndo. Yivi cuatyi cuu si.

³⁷ Zoco tatu iyo inga ndo sa nacañi vaha iñi ndo ta cuñi ndo sa ma tindaha zehe ndo. Vaha sa ma tindaha ñu.

³⁸ Vaha zavaha ra saha tindaha zehe, zoco vaha ca zavaha ra sa ña saha.

³⁹ Catyi ley maa ra Ndyoo vatyi nii ñi sa ndito minoo ra, iin ñi cuu ra sihin ñazihí ra. Zoco tatu sa sihi ra, cuu tindaha ña sihin yoo ra cuñi ña tatu sino iñi ra sii ra Cristo.

⁴⁰ Zoco sica iñi vatyi zii ca cua cuñi ña tatu ma tindaha tucu ña. Ta sica iñi vatyi sehi tuhun ya sa cuenda Tatyi li ra Ndyoo.

8

Ma zanduva yo sii hermano yo

¹ Ta vityi cua quehin sa cuenda ndyayu sa saha maa ñiyivi sii inga ndyoo. Sica iñi tahan tahan yo vatyi sito yo ñaa sa cuu sa ndoo sa cuenda cuhva ya. Zacahnu yo sii yo vatyi iyo xaan sa siñi tuñi sii yo cuñi yo. Zoco minoo cuhva vaha ca cuu sa cuñi yo sii tahan yo.

² Ta tatu iyo yo sica iñi yo vatyi sito xaan yo, cuñi si catyi si vatyi tañaha ca coto yo cuhva cuñi si coto yo.

³ Zoco yoo ra cuñi xaan sii ra Ndyoo, sito ra Ndyoo sii ra cuan.

⁴ Ta vityi sa cuenda sa casi yo ndyayu sa saha maa ñiyivi sii inga ndyoo, sito maa yo vatyi inga ndyoo cuan ña vale si vatyi minoo tuhun ñi ra Ndyoo iyo sa ndisa.

⁵ Ityi ziqui ta nu ñuhu iyo cuaha sa catyi ñiyivi vatyi ndyoo cuu si.

⁶ Zoco sa cuenda maa yo, iyo minoo tuhun ñi ra cuu Ndyoo Zutu yo. Ta i zavaha maa ra tandihí sa iyo.

Ta sa cuenda maa ra iyo yo. Ta iyo minoo tuhun ñi ra ndyaca ñaha sii yo, ra Jesucristo. Ta sa cuenda maa ra ta iyo tandihí sa iyo; ndya maa yo ta sa cuenda maa ra i sino yo.

⁷ Zoco ña sito tandihí ñiyivi cuhva ya vatyi iyo ñiyivi i zacahnu inga ndyoo cumañi ca coto ñu sii ra cuu Ndyoo sa ndisa, ta ndya cuhva ndya vityi sica iñi ñu vatyi ndito inga ndyoo cuan. Ta tatu cua casi ñu ndyayu cuan, sica iñi ñu vatyi cuatyi cuu si nuu ra Ndyoo.

⁸ Zoco Ndyoo ñahñi cuenda ra tatu casi yo sii si a ma casi yo. Yivi cuatyi cuu tatu casi yo, ta yivi cuatyi cuu tatu ma casi yo.

⁹ Zoco zacuenda ndo sii ndo coto zatívi ndo sii minoo hermano, ra tañaha ca sino vaha iñi, sihin minoo cuhva sa cua zavaha ndo.

¹⁰ Tatu ndyehe minoo ra sii yoho vatyi sasun ndyayu sa saha maa ñiyivi sii inga ndyoo. Cua casi tucu ra cuan vazu sica iñi ra vatyi ña vaha.

¹¹ Ta sa cuenda sa sito xoon ta sasun ta cua zatívun sii minoo hermano. Ta sa cuenda tucu ra cuan i sihi ra Cristo vatyi ma cunaa ra.

¹² Tatu tacuan zavaha yo ta zatívi yo sii minoo hermano ta sino vaha ca iñi, cuatyi cuu si ityi nuu ra Cristo.

¹³ Yucuan cuenda catyi, tatu sa cuenda sa casi mi coño cuan ta zatívi si sii minoo hermano. Ma casi que sii si caña ñi coto zatívi sii ra ta coo cuatyi ra.

9

Tyiño tahan si zavaha minoo ra apóstol

¹ Yuhvi cui minoo ra apóstol. Ta ndisa vatyi yoñi ñiyivi ndyaca ñaha sii. I ndyehi sii ra Jesucristo, ra ndyaca ñaha sii yo. Ta maa ndo cuu tyiño mi vatyi sa cuenda mi i sino iñi ndo sii ra ndyaca ñaha sii yo.

² Vazu sica iñi inga ñiyivi vatyi yivi minoo apóstol cui, zoco sito vaha maa ndo vatyi zuun ra cui.

I sino iñi ndo Tuhun Ndyoo vatyi maa ra Jesús i tava tyiño sii, sa zacote sii ndo.

³ Vityi cua nacatyi minoo cuhva sihin ñiyivi sa cuñi tyaa cuatyi sate.

⁴ Iyo cuhva sii, ta cuu quihin tandihí sa saha maa ñiyivi sa casi ta sa cohi.

⁵ Ta tatu coo ñazihi, ñaha sino iñi, cuu caca noo ña sihin, tyiño ra Ndyoo. Tacuan zavaha inga ra apóstol, ta yañi ra Jesús, ta ra Pedro tucu.

⁶ Yuhvi ta ra Bernabé i zandoo ndi tyiño ndi vatyi cua cahan ndi Tuhun Ndyoo. Ta ña cuñi ndo tyindyeenndo sii ndi. ¿Ñaa cuenda sa ña cuñi ndo tyindyeenndo sii maa ndi, ta tyindyeenndo sii tandihí inga ra cahan Tuhun Ndyoo?

⁷ Tyiyahvi ra ndyaca ñaha sii ra cu zandaru. Ta ra tasi yoho uva, sasi ra yucu vixi si. Ta ra zacuenda quiñi, cuu coho ra zicui ti.

⁸⁻⁹ Ta ma caca iñi ndo vatyi maa ñi cuhva sa sica ñi iñi mi cuu sa nacatyi ihya. Ña tacuan vatyi nu ley ra Ndyoo i tyaa ra Moisés catyi si tyehen: “Ma cuhñi ndo yuhu zindiqui nu zatyiño ti nu sañi ti siti yutu ta quita zoo si. Nacasi ti zuhva.” Ña iñi ñi sa cuenda quiñi cahan ra Ndyoo tuhun cuan.

¹⁰ Cañan ra sii si sa cuenda maa yo vatyi ra tahvi ñuhu ta ra naquihin ndaha tyiño, nduu tahan ra cuñi ra quihin ra zuhva zuhva sa vaha sa cuenda tyiño ra.

¹¹ I tasi maa ndi Tuhun Ndyoo nu yucu ndo. Ta yivi sa cuaha cuu si tatu quihin ndi zuhva zuhva sa vaha sii ndo (tatu tyindyeenndo sii ndi zuhva sihin ndaha tyiño).

¹² Tatu tyindyeenndo sii inga ra nacatyi Tuhun Ndyoo sihin ndo, ñihi ca cua tyindyeenndo sii nduhvi. Zoco ña cahan ndi. Zandyee ndi iñi ndi sihin tandihí cuij cuhva coto ma cuñi ndo Tuhun Ndyoo.

¹³ Sito tandihí ndo vatyi ra zatyiño vehe ñuhu hebreo sasi ra

sa iyo yucuan. Zatyiño ra nu saha maa ñiyivi quiñi sii ra Ndyoo, ta cuu quihin ra coño ti.

¹⁴ Ta zuun ñi cuhva cuan cuñi ra Ndyoo vatyi ñiyivi nacatyi Tuhun Vaha ra, cuñi si sa tyindyeen ñiyivi sino iñi cuan sii ra.

¹⁵ Zoco yuhvi tañaha ca cua caque tundyee iñi sii maa ndo. Ta ña tyei cuhva ya vityi vatyi cuñi sa cua tyindyeenndo sii. Ña tahan iñi sa tyiyahvi ñiyivi sii ta nacatyi Tuhun Ndyoo. Vaha ca nacui zoco.

¹⁶ Ta vazu nacatyi xein Tuhun Vaha ra, zoco ma cuu catyi vatyi vaha xein vatyi maa ra Ndyoo zañiñi sii. Ta ndahvi vii ra ndahvi tatu ma zavehi cuhva catyi ra.

¹⁷ Tatu zatyiñe tyiño ya vatyi cuñi, cua tyiyahvi ra Ndyoo sii. Zoco vazu ña cuñi zatyiñe sii si, zoco tyiño sa i saha maa ra Ndyoo sii cuu si.

¹⁸ Ta yahvi sa ñihi cuu sa zii xaan cuñi vatyi cuu nacatyi Tuhun Ndyoo ta ma zatyiayahvi sii ñiyivi. Ña sique sa tahan si sii sa cuenda tyiñe.

¹⁹ Ta yivi minoo muzu cui, zoco minoo muzu zandui sii, sii tandihí cuij ñiyivi vatyi tacuan ta cuu zasine iñi ñu tuhun ra Cristo.

²⁰ Tatu cuhin nu ndyaa ñiyivi hebreo, ndui tañi maa ñu vatyi cuñi sa cua sino iñi ñu sii ra Cristo. A tatu ndyei sihin ñiyivi tyaa xaan yahvi tandihí ley sahnu, tyei yahvi sii si vatyi cuñi sa cua sino iñi ñu sii ra Cristo. Zoco ña ndyaca ñaha ley cuan sii, sa ndisa cuij.

²¹ Ta tatu cuñi tyindyei sii ñiyivi tañaha ca sino iñi, ndui tañi maa ñu, zoco ña zavehi sa ña vaha tañi maa ñu vatyi tyei yahvi sii ra Cristo.

²² Tatu ndyei sihin ñiyivi tañaha ca sino vaha iñi, ndui tañi maa ñu vatyi tacuan ta cuu cahan que Tuhun Ndyoo sihin ñu, ta cua sino ca iñi ñu. Ndui tañi cuhva iyo sa ziiñ ziiñ ñiyivi vatyi tacuan ta cua tyizoho ñu sa quehin, ta iyo ñu cua cacu ñu.

23 Tacuan zavehi sa cuenda Tuhun Vaha ra Ndyoo vatyi cuñi sa cua tyindye si sii tandih iñiyivi, ta cua zacacu si sii yo.

24 Sito ndo vatyi nu iyo minoo carrera, sino tandih i ra sino, zoco minoo tuhun ñi ra zahacanaa. Yaty i cono ndo tacuhva cuu zahacanaa ndo.

25 Ta yoo ra cuñi zahacanaa, zandoo ra tandih i sa cuu zatívi sii ra. Cumi vaha xaan ra sii ra. Tacuan zavaha ra vatyi cuñi ra zahacanaa ra minoo corona ndaha yutu ñi sa cua tivi. Zoco maa yo nducu yo cuhva zahacanaa yo minoo sa ma ndih i.

26 Yucuan cuenda sino mi, zoco yivi tañi sa ña site ndyamaa cuehin. Ta sahñi tehin tañi minoo ra cuñi zahacanaa.

27 Ta zandyehi tundoho sii coño ñuhi ta cundyaca ñehi sii si coto sa yaha zacuehi sii inga ñiyivi ta zi qui zuun ñi mi cua nandoi ityi sata.

10

Ma zacahnu yo sii inga ndyoo

1 Cuñi sa cua coto ndo, hermanos, tandih i sa i tahan zutu sahnu yo ityi cuahan ra nu cu si desierto ta sa na ha. I tasi ra Ndyoo minoo vico sa cuahan ityi nuu tandih i ra, ta zañaha si ityi sii ra. Ta i yaha tandih iñu sisi tyañuhu.

2 Ta tacuan i sicoo ndutya tandih iñu sisi vico cuan ta sisi tyañuhu vatyi cua cundyico ñu sii ra Moisés.

3 Ta i sasi tandih iñu ndyayu i saha maa ra Ndyoo sii ñu.

4 Ta i sihi tandih iñu ndutya i saha maa ra Ndyoo sii ñu. Ta ndutya i sihi ñu i tava ra Ndyoo sisi minoo yuu vatyi coho ñu. Ta yuu cuan cuu tañi maa ra Cristo.

5 Zoco vazu i ndyehe tandih iñu sa ndyityi i zavaha maa ra Ndyoo ityi, zoco cuaha xaan ñu ñá zavaha ñu cuhva cuñi ra Ndyoo, ta ñá tahan iñi ra, ta i zanaa ra sii ñu.

6 Ta tandih i cuhva cuan zañaha si minoo cuhva sii maa yo vatyi ma

cuñi yo sii sa ña vaha tañi i cuñi maa ñu.

7 Ta ma zacahnu yo sii inga ndyoo tañi i zavaha zuhva maa ñu. Catyi Tuhun Ndyoo: "I sasi ñiyivi, ta i sihi ñu, ta zi qui i nduvita ñu vatyi cua cata saha ñu" (vatyi zacahnu ñu sii zindiqui xuhun cuaan).

8 Ta ma cuzu yo sihin numinoo ñaha tatu ma tindaha xihna yo. Minoo quivi i sihi oco uñi mil ñu vatyi i zavaha ñu cuaty i cuan.

9 Ta ma coto ihñi yo sii ra ndyaca ñaha sii yo tañi i zavaha zuhva maa ñu, ta i sahñi coo sii ñu.

10 Ta ma cahan ndo sii ra Ndyoo tañi i zavaha zuhva maa ñu, ta i tasi ra Ndyoo sii minoo ángel sa cua cañi sii ñu, ta i sihi ñu.

11 Tandih i cuhva ya i tahan zutu sahnu yo ta sa na ha, ta i sicundaya si nuu tutu Ndyoo vatyi coto yo. Ta zañaha si sii yo vatyi ma zavaha yo cuhva cuan. Ta maa yo cuu yo ndito nu sa cuñi ndih i tyiemvu.

12 Yucuan cuenda tatu sica iñun vatyi nii xaan iñun sii ra Ndyoo, zoco coto vohon suun coto zavohon cuaty i.

13 Tandih i cuii cuaty i sa cuñun zavohon ta iyo tucu inga ñiyivi cuñi zavaha cuhva cuan. Zoco cuu cunii iñi yo sii ra Ndyoo vatyi ma cuhva maa ra sa cuñi xaan con zavohon sa ña vaha. Cua zañaha ra minoo ityi suun, ta cua cuu conon sii sa cuñi zatívi suun. Ta cua cundyee iñun ta ma zavohon sii si.

14 Yucuan cuenda, ndoho hermanos, zandoo ndo sa zacahnu ndo sii inga ndyoo.

15 Quehin sihin ndo tañi sa ñiyivi siñi tuñi xaan cuu ndo. Tyizoho vaha ndo sa catyi tatu ndisa a ña ndisa cuu si.

16 Quivi sa nacohon iñi yo vatyi i sihi ra Cristo nuu cruz sa cuenda maa yo, sihi yo vino ta sasi yo pan. Sa sihi yo vino cuan iñi fi, cuñi si catyi si vatyi tyindye niñi ra Cristo sii tandih i yo. Ta pan cuan cuñi si

catyi si vatyi tyindyee coño ñuhu ra Cristo sii tandihí yo.

¹⁷ Vazu cuaha yo cuu yo, zoco minoo ñi pan sasi yo, ta yucuan cuenda minoo ñi coño ñuhu cuu yo.

¹⁸ Ndyehe ndo cuhva iyo ñiyivi hebreo, saha ñu sa saha maa ñu sii ra Ndyoo, ta sasi ñu zuhva si. Ta sihin cuhva cuan ndu-iin ñu.

¹⁹ Ña catyi sihin ndo vatyi ndisa iyo cuhva sii inga ndyoo. Ñahñi. Ta ñahñi tucu cuhva iyo sii coño sa saha maa ñiyivi sii inga ndyoo.

²⁰ Zoco tyehen catyi vatyi ñiyivi sa ña sito sii ra Ndyoo, saha ñu sa saha maa ñu sii cuihna ta yivi sii ra Ndyoo. Ta ña cuñi sa ndu-iin ndo sihin cuihna.

²¹ Ma cuu coho ndo vino cuenda ra Cristo ta vino cuenda cuihna. Ta ma cuu casi ndo nu ndyaa mesa ra Ndyoo ta nu ndyaa mesa sii cuihna.

²² ¿Atu cuñi yo sa cuxaan ra Ndyoo sihin yo? ¿Atu iyo ca tundyee iñi sii maa yo ta ziqui ca ra Ndyoo?

Cuu zavahayo ñaa sa cuñi yo tatu ma zativi si sii inga hermano

²³ Cuu zacuu yo ñaa sa cuñi maa yo, zoco ma tyindyee tandihí si sii yo. Ndisa, saha maa ra Ndyoo sa zavaha yo ñaa sa cuñi yo, zoco ma tyindyee tandihí si sii yo ta ndundyee ca yo sihin Tuhun Ndyoo.

²⁴ Cuñi si sa nducu yo cuhva coo sa vaha sii inga ñiyivi ta yivi sii sa maa ñi maa yo.

²⁵ Casun ñaa ñi maa sa xico ñiyivi nuyahvi, ta ma nducu tuhun tatu sa saha maa ñiyivi sii si sii inga ndyoo coto caca iñi ndo tatu vaha a ña vaha tatu casi ndo.

²⁶ Vatyi tandihí sa iyo ñuu ñiyivi cuu cuenda ra ndyaca ñaha sii yo.

²⁷ Ta tatu cua cana minoo ñiyivi ña sino iñi sii ndo vatyi casi ndo vehe ñu ta cuñi ndo cuhun ndo, cuu cuhun ndo ta casi ndo ñaa sa saha maa ñu sii ndo. Ta ma nducu tuhun

ndo tatu sa cuenda inga ndyoo cuu si.

²⁸ Zoco tatu catyi ñu sihin ndo: "Coño sa saha maa ñiyivi sii inga ndyoo cuu ya", catyi ñu. Ma casi ndo sii si coto zativi ndo sii ñu nacatyi sihin ndo ta caca iñi ñu vatyi zavaha ndo cuatyi.

²⁹ Zativi si sii inga ñiyivi ta yivi sii maa ndo. Ta iyo ndo cua catyi ndo: "Ñaa cuenda cua zaña ndi sa vaha, tatu sa sica iñi ñiyivi ñi cuu si?"

³⁰ Saha ndi tyahvi ndyoo sii Ndyoo sa cuenda sa cua casi ndi, ta ñaa cuenda cua cahan ñiyivi sii ndi tatu casi ndi sii si?" cua catyi ndo.

³¹ Ta cua catyi sihin ndo vatyi ñaa ñi maa sa casi ndo a ñaa ñi maa sa coho ndo, zavaha ndo sii si minoo cuhva sa cua tahan iñi ra Ndyoo ta cua zacahnu si sii ra.

³² Ma zativi ndo sii ñiyivi hebreo a sii inga ñiyivi a sii ñiyivi sino iñi Tuhun Ndyoo.

³³ Zavaha ndo cuhva zavehi vatyi zavehi cuhva tahan iñi ñiyivi, ta ma caca iñi ñu vatyi iyo cuatyi. Ta ña nduqui sa vaha sa cuenda ñi mi. Nduqui sa vaha sa cuenda cuaha xaan ñiyivi vatyi tacuan ta cua sino iñi ñu ta cua cacu ñu.

11

¹ Cundyico ndo sii mi tañi ndyique sii ra Cristo.

Cuhva cuñi si zavaha ñuzihí nu iyo culto

² Ta vityi, zii xaan cuñi, hermanos, vatyi nacohon iñi ndo sii mi tandihí cuhva ta tyaa ndo yahvi cuhya sa zacuehi sii ndo.

³ Zoco cuñi sa cua coto ndo vatyi ra Cristo cuu xiñi sii tandihí rayii vatyi ndyaca ñaha ra sii ra. Ta rayii cuu xiñi sii ñazihí ra. Ta ra Ndyoo cuu xiñi ra Cristo.

⁴ Tatú zahvi minoo ra zahma xiñi ra ta cahan ra sihin ra Ndyoo sisi vehe ñuhu a cuhva sa cahan ra tuhun saha ra Ndyoo sii ra, saha ra ticahan nuu sii ra Cristo cuhva cuan.

5 Zoco tatu ma zahvi ñuzihí zahma xiñi ñu cuhva cahan ñu sihin ra Ndyoo a cuhva cahan ñu tuhun i saha ra Ndyoo sii ñu, cuu si tañi sa zatya xiñi ñu. Ta saha ñu ticahan nuu sii yíi ñu vatyi tatu ma zahvi ñu zahma xiñi ñu cuñi si catyi si vatyi ña ndyaca ñaha yíi ñu sii ñu.

6 Tatu ña cuñi ñuzihí sa cuzahvi xiñi ñu, nazatya xiñi ñu. Zoco tatu saha si ticahan nuu sii ñuzihí sa zatya xiñi ñu, nazahvi ñu zahma xiñi ñu.

7 Ña vaha sa zahvi rayíi zahma xiñi ra vatyi tañi caa maa ra Ndyoo caa ra. Ta ndyaca ñaha ra sii ñazihí ra tañi ndyaca ñaha ra Ndyoo sii maa ra.

8 Quivi i zavaha ra Ndyoo sii rayíi, ñá zavaha ra sii ra sihin yiqui naha ñaha. Zoco i zavaha ra sii ñaha sihin yiqui naha rayíi.

9 Xihna ca i zavaha ra Ndyoo sii rayíi. Ta sa cuenda rayíi i zavaha ra sii ñaha.

10 Yucuan cuenda cuñi si sa zahvi ñuzihí zahma xiñi ñu. Zañaha si vatyi ndyaca ñaha yíi ñu sii ñu. Ta tacuan ta zii cua cuñi ángel sa ndyehe si cuhva cuan.

11 Zoco sa cuenda maa yo, ra sino iñi, ta siñi ñuhu rayíi sii ñu zihí, ta siñi ñuhu ñu zihí sii rayíi. Ta cuñi si nduu tahan ñu sa cuenda tysiño ra Ndyoo.

12 Yiqui naha rayíi i sino minoo ñu zihí sa xihna ñi, ta vityi zacacu ñu zihí sii tandihí rayíi. Ta maa ra Ndyoo zavaha tandihí sa iyo.

13 Ta vityi catyi maa ndo tatu vaha a ña vaha tatu ma zahvi ñuzihí zahma xiñi ñu ta cahan ñu sihin ra Ndyoo.

14 Sito ndo vatyi saha si ticahan nuu sii rayíi tatu nañi xaan xiñi ra.

15 Zoco tatu nañi xaan xiñi ñu zihí, zii xaan cuñi ñu sihin si vatyi saha ra Ndyoo sa cunañi ixi xiñi ñu vatyi zahvi si xiñi ñu.

16 Ta tatu iyo minoo ra cuñi cahñí tahan saha tuhun ya, cuñi si sa coto ndo vatyi ñahñi inga ca costumbre

yo sii maa ndi a sii vehe ñuhu ra Ndyoo.

Nacatyi ra Pablo vatyi ña vaha cuhva zavaha ñu Santa Cena

17 Ta vityi iyo inga cuhva cuñi nacatyi sihin ndo. Ta ña zii cuñi sihin ndo cuhva ya vatyi titahan ndo, zoco ña tyindyee si sii ndo. Zativi si sii ndo.

18 Nacatyi ñiyiví sihin, vatyi cuhva titahan ndo sa zavaha ndo culto ta ña iin ñi cuhva sica iñi ndo. Ta sino iñi zuhva sa cahan ñiyiví sii ndo.

19 Cuñi ndo sa coo ziiñ ndo, ta tacuan ta cua coto ñiyiví yoo ndo sino iñi sa ndisa cuii, cuñi ndo.

20 Ta cuhva sa titahan ndo, yivi Santa Cena cuu sa sasi ndo sa ndisa

21 vatyi minoo minoo ndo cuxiñi ndo cuhva cuñi maa ndo. Iyo ndo numi ndo ta sasi ndo cuaha, ta inga ra ña ñihí ra ta sizoco ra. Ta iyo tucu ndo siñi ndo.

22 ¿Atu ñahñi vehe ndo nu cuu casi ndo ta coho ndo? Zanduquiñi caa ndo sii vehe ñuhu ra Ndyoo, ta saha ndo ticahan nuu sii ra hermano ndahví, ra ñahñi sa cuaha casi. ¿Yozo caa cua catyi sihin ndo vityi sa cuenda cuhva ya? ¿Atu catyi vatyi vaha zavaha ndo? Ma catyi.

Cuenda sa vatyi iyo Santa Cena

23 Saha maa ra Jesús cuhva ya sii mi tañi sa nacatyi sihin ndo vatyi zuun ñi sa cuaa sa saha cuenda ra Judas sii ra Jesús, sa xihna ñi i quihin ra Jesús pan.

24 Ta sa yaha saha ra tyahvi ndyoo sii ra Ndyoo, ta i tahvi ra sii si, ta zasa ra sii ra apóstol, ta catyi ra: “Casi ndo. Ihya cuu tañi coño ñuhí. Cua tahvi si sa cuenda maa ndo. Zavaha ndo cuhva ya vatyi cua nacohon iñi ndo sii.” Catyi ra.

25 Ta sa yaha sasi tandihí ra pan, ta i tiñ ra Jesús tasa ta catyi ra: “Sihiñ ihya zandaa ra Ndyoo minoo tysiño saa sihin ndo. Ihya ñoho vino ta cuu si tañi niñi. Tandihí saha sa cua coho ndo sii si, coho ndo sii si

vatyi nacohon iñi ndo sii." I catyi ra Jesús quivi cuan.

²⁶ Ta tandihí saha titahan ndo ta casi ndo pan ta coho ndo vino cuhva ya, zañaha ndo sii ñiyivi cuhva i sihi ra Jesús ndya quivi cua quisí tucu ra.

Cuhva cuñi si zavaha yo Santa Cena

²⁷ Tatú casi yo pan ya ta coho yo vino ra Cristo sihin minoo cuhva ña tahan iñi ra Ndyoo, cua coo cuatyí yo vatyi ña tyaa yo yahvi sii coño ñuhu ta niñi ra ndyaca ñaha sii yo.

²⁸ Cuñi si sa ndyehe vaha yo sii yo tatu iyo vaha yo sihin ra Ndyoo, ta ziquí casi yo pan cuan ta coho yo vino cuan.

²⁹ Vatyi tatu casi yo ta coho yo ta ña zaha yo cuenda vatyi coño ñuhu ra Cristo cuu si, zavaha yo minoo cuhva sa cua tasi tuñi ra Ndyoo sii yo.

³⁰ Ta zuun ñi yucuan cuenda cuaha xaan ndo cuhu ndo ta vita iyo ndo, ta iyo ñiu tahan ndo sa yaha sihi ñu.

³¹ Zoco tatu ndyehe vaha yo sii yo, ma tahan yo tacuan.

³² Zoco tatu tacuan zavaha ra Ndyoo sihin maa yo, cañi ra sii yo vityi sa vatyi ma cunaa yo sihin inga ñiyivi ñuu ñiyivi.

³³ Ta yucuan cuenda, ndoho hermanos, tatu titahan ndo sa cuenda Santa Cena, cuatu noo ndo sii inga ndo ta iñi ñi casi ndo ta coho ndo.

³⁴ Zoco tatu iyo ndo sizoco ndo, casi xihna ndo ndya vehe ndo coto zavaha ndo minoo cuhva sa ma tahan iñi ra Ndyoo ta cua tasi tuñi ra sii ndo. Ta inga tucu tyiño sa cumañi ndundoo cua zandundoi quivi cua cuhin nu yucu ndo.

12

Ndatu sa saha Tatyi Ii sii minoo minoo yo

¹ Hermanos, cuñi sa cua coto ndo tandihí sa vaha sa saha maa Tatyi Ii ra Ndyoo sii sa minoo minoo yo.

² Sito ndo vatyi quivi sa ña sito ndo sii ra Ndyoo, i saha ndo sii ndo sa cundyaca ñaha inga ndyoo sa ña cuu cahan.

³ Yucuan cuenda cuñi sa coto maa ndo vatyi tatu cahan minoo ra sihin cuhva saha Tatyi Ii sii ra, ma cuu cahan ra ndya vaha ñi sii ra Jesús. Ta ma cuu catyi ra vatyi ndyaca ñaha ra Jesús sii ra tatu ña tyindye Tatyi Ii sii ra.

⁴ Ziin ziin ndatu saha maa ra Ndyoo sii minoo minoo yo. Zoco zuun ñi maa Tatyi Ii cuu ra saha sii si.

⁵ Ta ziin ziin cuhva zatyiño yo tyiño ra Ndyoo, zoco minoo ñi ra ndyaca ñaha sii yo.

⁶ Ziin tyiño saha ra sii sa minoo minoo yo, zoco minoo ñi ra Ndyoo cuu ra sityiño sii tandihí yo.

⁷ Saha maa ra Tatyi Ii ra sii minoo minoo yo sihin minoo cuhva sa cuu tyindye si sii tandihí yo.

⁸ Vatyi sii minoo yo saha xaan ra sa siñi tuñi sa cuenda Tatyi Ii. Ta sii inga ra saha Tatyi Ii ndatu sa cuu nacoto ra minoo sa zacoto ra Ndyoo sii ra.

⁹ Ta sii inga ra saha ra sa cunii xaan iñi ra. Ta inga ra cuu zanduvalha ra sii ñiyivi cuhu sihin Tatyi Ii.

¹⁰ Inga ra cuu zavaha ra sa ndyiyti. Ta inga ra cuu xaan nacatyí ra Tuhun Ndyoo. Inga ra cuu nacoto ra tatu cahan Tatyi Ii a tatyi ña vaha; inga ra cuu cahan ra zahan sa ñia tuhva ra cahan; ta inga ra cuu nacatyí ra ñaa sa cahan ra cahan cuhva cuan.

¹¹ Ta tandihí cuhva ya zavaha sa minoo tuhun ñi Tatyi Ii; ziin ziin cuhva saha maa ra sii sa minoo minoo yo cuhva cuñi maa ra.

Tandihí yo cuu yo minoo ñi coño ñuhu ra Cristo

¹² Ra Cristo cuu tañi minoo coño ñuhu. Ta minoo coño ñuhu iyo sa ziin ziin cuhva sii si. Iyo xiñi si, iyo saha si, iyo ndaha si. Zoco sa tandihí si cuan minoo ñi coño ñuhu cuu si.

13 Ta tacuan cuu maa yo vatyi minoo ñi Tatyi Ii i zacoo ndutya sii tandihí yo, ta minoo ñi coño ñuhu cuu tandihí yo sa sino iñi vazu cuu yo ñiyiví hebreo a griego a vazu iyo patrón yo a vazu yoñi. I ñihí tandihí yo sa minoo ñi Tatyi Ii

14 vatyi sa minoo coño ñuhu, iyo cuaha cuhva sii si, yíví sa minoo ñi.

15 Tatu catyi saha cuan: “Yíví ndaha cui, ta yucuan cuenda yíví sa cuenda coño ñuhu cui.” ¿Atu ndisa sa cahan si?

16 A tatu catyi zoho cuan: “Yíví siti nuu cui, ta yucuan cuenda yíví sa cuenda coño ñuhu cui.” ¿Atu ndisa?

17 Tatu tandihí coño ñuhu cuan cuu siti nuu, ¿yozo caa cua cuiñi si? A tatu tandihí coño ñuhu cuu zoho, ¿yozo caa cua ñihí si xico?

18 Zoco i zavaha ra Ndyoo ziin cuhva sihin minoo coño ñuhu cuhva cuñi maa ra.

19 Tatu iin ñi cuhva caa tandihí si, yíví minoo coño ñuhu cuu si, ta ña tyaqui cua cuu si.

20 Zoco sa cuenda sa cuaha cuhva iyo sii si, ta minoo ñi coño ñuhu cuu si.

21 Ma cuu catyi siti nuu cuan sihin ndaha cuan: “Ña siñi ñuhun sii, cuahan.” Ta ma cuu catyi xiñi cuan sihin saha cuan: “Ña siñi ñuhun sii.”

22 Ña tacuan, vatyi zuhva coño ñuhu caa si tañi sa ña ñiñi si, yucuan cuu sa ñiñi xaan ca.

23 Ta zuhva coño ñuhu sa sicá iñi yo vatyi ma tyaa yo yahvi sii si, yucuan cuu sa ñihí ca zacuenda yo. Ta sii sa quiñi ca caa, zandutyaqui ca yo sii si.

24 Ta sihin sa tyaqui ca caa, ñahñí zavaha yo. Ta i zandu-iin ra Ndyoo sii coño ñuhu ra sihin minoo cuhva zacahnu ca si sii ra hermano ña tuhva ñiyiví tyaa yahvi. Ta maa yo cuu coño ñuhu ra.

25 Ta tacuan i zavaha ra vatyi ma cuziñi ziin coño ñuhu ra, zoco cua zacuenda tahan si sii tahan si.

26 Tatu zuhva coño ñuhu ra Cristo ndyehe si tundoho, ndyehe tandihí

si tundoho. Ta tatu iyo zuhva si zacahnu ñiyiví, tandihí si cua cuziñi iñi.

27 Ta maa yo cuu coño ñuhu ra Cristo. Minoo minoo yo cuu yo zuhva zuhva coño ñuhu ra.

28 Ta i tyihi ra Ndyoo sii minoo minoo yo sisi vehe ñuhu ra vatyi cuu tyindyeo yo sii inga yo. Ra ñiñi ca cuu ra tava ra Jesúz tyiño sa cuu ra apóstol. Sa cu uu cuu ra cahan tuhun saha ra Ndyoo sii ra; profeta cuu ra. Sa cu uñi cuu ra zacuaha. Ta ziqui iyo ra zavaha sa ndityi, ta ra zanduvaha sii ñiyiví cuhu, ta ra cuu tyindyeo sii inga hermano, ta ra cuu cundyaca ñaha sii inga hermano, ta ra cuu cahan inga zahan sa ña tuhva ra cahan.

29 Ña tandihí yo cuu yo apóstol a ra cahan tuhun saha ra Ndyoo sii ra, a ra zacuaha, a ra zavaha sa ndityi.

30 Ña tandihí yo cuu zanduvaha yo sii ñiyiví cuhu a cahan yo lengua a nacatyí yo ñaa sa cahan ñiyiví cahan lengua.

31 Zoco nacuñi yo sa vaha ca. Ta cua zañehi sii ndo minoo ityi vaha xaan ca.

13

Cuhva cuñi si sa cuñi xaan yo sii ñiyiví

1 Vazu cuu quehin zahan sa cahan ñiyiví ta sa cahan ángel, zoco tatu ña cuñi sii ñiyiví, minoo nduzu ñi cui tañi nañi minoo tamvu a nañi minoo caa.

2 Ta vazu cuu xaan quehin tuhun saha ra Ndyoo sii, ta cutuñi iñi tandihí sa xehe ta tandihí sa siñi tuñi sii maa ra Ndyoo, ta tatu iñi xaan cuu iñi ndya cuhva ndya cuu zacuiñi siye yucu zoco ña cuñi sii ñiyiví, ñahñí maa ra cui.

3 A tatu sehi tandihí cuii ndaha tyiñe sii ñiyiví ndahvi ta cuhve sa cayu coño ñuhu zoco ña cuñi sii ñiyiví, ñahñí maa cua tyindyeo sii sii.

4 Tatu cuñi xaan yo sii ñiyiví, zandyee xaan yo iñi yo sihin ñu ta

zavaha xaan yo sa vaha sihin ñu. Ma cuxaan yo tatu iyo sa vaha sii ñu. Ma zacahnu yo sii yo ta catyi yo vatyi vaha xaan maa yo.

⁵ Tatu cuñi xaan yo sii ñiyivi, ma cuhva yo ticahan nuu sii ñu. Cua nanducu yo sa vaha sii ñu ta yivi sa cuenda ñi maa yo. Ma yatyi xaan cuxaan yo. Ta ma ndoo sa cuxaan yo afima yo.

⁶ Tatu cuñi xaan yo sii ñiyivi, ma cuzii iñi yo tatu zavaha ñu sa ña vaha, zoco cua cuzii iñi yo sihin sa vaha ta sa ndoo.

⁷ Tatu cuñi xaan yo sii ñiyivi, zandyee yo iñi yo sihin tundoho sa saha ñu sii yo; sino iñi yo vatyi cua zavaha ñu sa vaha; nii cuu iñi yo sii ñu. Ta cua zandyee yo iñi yo ñaa ndihí cuii ca tundoho.

⁸ Cuhva sa cuñi xaan yo sii ñiyivi ma naa si. Cua coo quivi ma cahan ca yo tuhun saha ra Ndyoo sii yo. Ma cahan ca yo lengua. Ma nacoto ca yo minoo sa zacoto ra Ndyoo sii yo.

⁹ Vatyi vityi zuhva ñi sito yo, ta zuhva ñi cuu nacatyi yo Tuhun Ndyoo.

¹⁰ Zoco quivi cua quisi ra Cristo ta cua naa tandihí inga cuhva cuan vatyi cua coto yo vatyi zuhva cuii ñi cuu sa sito yo vityi.

¹¹ Quivi i culuhli i quehin tañi cahan minoo ra luhlu, ta tacuan i cuu sa siñi tuñi, ta tacuan ñi i cutuñi iñi. Zoco quivi i sahni, i zandoi cuhva zacuu sa ndyihí.

¹² Ta zuun ñi cuhva cuan vityi, cuu yo tañi sa ndyihí sa cuenda ra Ndyoo. Cuu si tañi ndyehe yo zuhva ñi sihin minoo ino ta ña casi xaan ndyehe yo. Zoco quivi cua quisi ra Cristo, ta cua ndyehe vaha yo sii ra ityi nuu ra. Zuhva ñi sito yo vityi, zoco quivi cuan cua coto yo tandihí tañi sito ra Ndyoo sii maa yo vityi.

¹³ Ta vityi nii iñi yo sii ra Ndyoo. Ta iyo minoo sa ndatu yo. Quivi cua quisi ra Cristo cuu sa ndatu yo. Ta

cuñi xaan yo sii ñiyivi. Ta sa ñiñi ca sisi sa uñi tahan ya cuu sa cuñi xaan yo sii ñiyivi.

14

Cuhva cahan yo inga zahan sa ña tuhva yo cahan

¹ Nducu ndo cuhva cuñi xaan ndo sii ñiyivi. Ta cuñi xaan ndo sa cua cuhva ra Ndyoo sa ziñn ziñn ndatu sa saha maa Tatyi Ii sii ndo. Ta sa ñiñi ca cuu sa cahan yo tuhun saha ra Ndyoo sii yo. Sa zaha yo profetizar cuu cuhva cuan.

² Vatyi tatu cahan ndo lengua, cahan ndo sihin ra Ndyoo, ña cahan ndo sihin ñiyivi vatyi yoñi cutuñi iñi sa cahan ndo. Cahan ndo sa xehe sihin maa ra Ndyoo.

³ Zoco tatu cahan yo tuhun saha ra Ndyoo sii yo, cua cutuñi iñi ñiyivi. Cua zandundyee ca ra Ndyoo iñi ñu, ta cua cuhva ca ra tundyee iñi sii ñu tatu cuihya cuñi ñu.

⁴ Tatu cahan yo lengua ndundyee iñi maa yo, zoco tatu cahan yo tuhun saha ra Ndyoo sii yo zandundyee yo iñi tandihí ñiyivi tyizoho.

⁵ Cuñi vatyi cahan tandihí ndo lengua, zoco sa ñiñi ca cuñi sa zaha ndo profetizar vatyi tyindye ca ra cahan cuhva cuan ta ziñi ra cahan lengua. Zoco tatu cuu nacatyi ra cahan lengua ñaa tuhun i cahan ra a tatu cuu nacatyi inga ndo, cua tyindye si sii tandihí ndo.

⁶ Ta quivi sei nu yulu ndo, hermanos, tatu maa lengua ñi quehin ma tyindye si sii ndo vatyi ma cutuñi iñi ndo. Zoco tatu quehin sihin tuhun sa cutuñi iñi ndo ta nacatyi tuhun sa saha ra Ndyoo sii a ñaa minoo cuhva sa catyi Tuhun ra ta zanducasi sii si, tyindye si sii tandihí ndo.

⁷ Tañi ra zavacu guitarra a ra tivi cutu, tatu ma ñihi ra cuhva tivi ra a ma ñihi ra cuhva zavacu ra, ma nacoto yo ñaa yaa cuu si.

8 Ta nu iyo cuatyí tatu ma tívi vaha ra tívi trompeta, ma coto zandaru yozo caa nu cundyaa listo ra.

9 Ta tacuan tucu maa yo, tatu ma cahan yo tuhun sa cuu cutuñi iñi ñiyiví, ma coto ñu ñaa sa catyi yo. Tañi sa ndyayu ñi yuhu yo cuu si.

10 Iyo cuaha xaan nuu zahan ñuu ñiyiví ya, ta tandihí cuii si iyo cuhva cuñi si catyi si.

11 Zoco tatu ña cutuñi iñi yo zahan sa cahan minoo ñiyiví, ma cuu natuhun yo sihin ra, ta ma cuu natuhun ra sihin yo.

12 Site vatyi cuñi tandihí ndo ñihi ndo ndatu sa saha Tatyí Ii sii ndo; yucuan cuenda catyi sihin ndo vatyi ñihi xaan cuñi ndo cuhva vaha ca vatyi tacuan ta cua cuu tyindyee ndo sii tandihí hermano.

13 Ta ndoho sa cahan lengua, caca ndo sii ra Ndyoo vatyi cuhva ra cuhva sa cuu nacatyí ndo ñaa sa cahan ndo.

14 Vatyí tatu cahan yo lengua, cahan añima yo, zoco ña tyindyee sa siñi tuñi sii yo.

15 Cuñi si sa cahan yo sihin ra Ndyoo sihin añima yo ta sihin sa siñi tuñi tucu yo. Cuu cata yo sihin añima yo (sihin lengua) ta sihin sa siñi tuñi tucu yo (sihin tuhun sa cutuñi iñi yo).

16 Vatyí tatu maa ñi sihin lengua zacahnun sii ra Ndyoo ta ndyaa inga ra ña sito ñaa sa cuu si, ma cuu zacahnú ra Ndyoo suhun vatyi ña cutuñi iñi ra sa cohon.

17 Vazu vaha xaan nacuhvon tyahvi ndyoo sii ra Ndyoo, zoco ñähñi maa tyindyee si sii inga ra cuan.

18 Sehi tyahvi ndyoo sii ra Ndyoo vatyi cuaha ca quehin lengua ta ziqui tandihí ndo.

19 Zoco nu iyo culto vaha ca cuñi vazu ohon tahan ñi tuhun sa cuu cutuñi iñi ñiyiví quehin ta zacuehi sii ñu ta ziqui ca sa quehin usi mil tuhun sihin lengua sa ma cutuñi iñi ñu.

20 Hermanos, ma cuu ndo tañi sa ndyihí sihin cuhva iyo sa siñi tuñi sii ndo. Caca iñi ndo cuhva sica iñi ra sahnu, zoco tañi sa ña tuhva ra ndyihí zavaha sa quiñi, cuhva cuan cuu tucu maa ndo.

21 Catyi ra Ndyoo nuu libro sa cuu ley maa ra: "Cua quehin sihin ñiyiví ya sihin inga zahan, ta cua cutyíñe ñiyiví inga ñuu, zoco numaa tacuan ta ma tyaa ñu yahvi sa quehin." Catyi ra.

22 Yucuan cuenda, sa cahan yo lengua cuu minoo zeña zañaha ra Ndyoo sii ñiyiví sa ña sino iñi sii ra. Zoco sa cahan yo tuhun i saha ra Ndyoo sii yo cuu sa cuenda ñiyiví sa sino iñi ta yiví sa cuenda ñiyiví ña sino iñi.

23 Tatu titahan tandihí ndo ta cahan tandihí ndo lengua, ta tatu quisi ñiyiví ña sito ñaa sa cuu si a ñiyiví ña sino iñi sii ra Ndyoo, cua catyi ñu vatyi zana xiñi ndo.

24 Zoco tatu tandihí ndo cahan ndo tuhun i saha ra Ndyoo sii ndo ta quihví ñiyiví ña sino iñi a ña sito, cua nacoto ñu vatyi iyo cuatyí ñu vatyi cutuñi iñi ñu sa cahan ndo.

25 Cua coto ñu vatyi sito ra Ndyoo sa xehe sa iyo añima ñu. Ta cua cuiñi siti ñu, ta cua zacahnú ñu sii ra Ndyoo ta catyi ñu vatyi ndisa cuii ndyaa xaan ra Ndyoo sihin ndo.

Cuhva zavaha yo culto sihin minoo cuhva tyaqui ta vaha

26 Ihya cuu cuhva cuñi si, hermanos; tatu cua titahan ndo, tahan tahan ndo quisi ndo sihin minoo coro sa cuñi ndo cata ndo a minoo cuhva sa cua zacuaha ndo a minoo cuhva sa zacuaha ra Ndyoo sii ndo, ta nacatyí ndo sii si. A cuu cahan ndo lengua a cuu nacatyí ndo ñaa sa catyi ra cahan lengua. Tahan tahan ndo zavaha ndo cuhva sa cua tyindyee sii tandihí ndo.

27 Tatu iyo ndo cuñi ndo cahan ndo lengua, nacahan a uu a uñi tahan ñi ndo minoo minoo ndo. Ta nacatyí minoo ra ñaa sa catyi ndo.

²⁸ Zoco tatu yoñi nacoto, vaha ca ma cahan ndo lengua nu iyo culto. Cuee ñi cahan ndo maa ñi maa ndo sihin ra Ndyoo.

²⁹ Ta tatu iyo ndo cuñi ndo cahan ndo tuhun i saha ra Ndyoo sii ndo, cuu cahan a uu a uñi tahan ndo minoo minoo ndo. Tyizoho inga ndo ta ndyehe ndo tatu vaha a ña vaha sa cahan ra cahan.

³⁰ Ta tatu zacoto ra Ndyoo ñaa minoo cuhva sii minoo ra tyizoho, cuñi si vatyi nacutaxi ra cahan cuan ta nacahan inga ra.

³¹ Ta tacuan tandihí ndo sa ñihi ndo tuhun i saha ra Ndyoo sii ndo, cuu cahan ndo sii si minoo minoo ndo, ta cua cutuhva tandihí ndo cuaha ca, ta cua ñihi ca ndo tundyee ñihi sihin Tuhun Ndyoo.

³² Tatu saha maa ra Ndyoo minoo tuhun sii ndo sa cua cahan ndo, cuu cuatu noo ndo.

³³ Vatyi ñia cuñi ra Ndyoo sa cootizihi ta sa cuvaa. Cuñi ra sa coo sa vii tañi iyo tandihí inga vehe ñuhu nu titahan ra hermano.

³⁴ Nacutaxi ñu zihí nu iyo culto. Ma cuu cahan ñu vatyi catyi ley maa ra Ndyoo vatyi nacundyaca ñaha rayii.

³⁵ Ta tatu iyo sa cuñi ñu coto ñu, nandaca tuhun ñu sii yii ñu ndya vehe ñu vatyi ña tyaqui cuu si tatu cahan ñu nu iyo culto.

³⁶ Tatu sica iñi ndo inga cuhva, cuñi si sa nacohon iñi ndo vatyi ñá quisaha Tuhun Ndyoo sihin maa ndo. Ta ña vasi si sa cuenda sa maa ñi maa ndo.

³⁷ Tatu iyo ndo sica iñi ndo vatyi cuu cahan ndo tuhun saha ra Ndyoo sii ndo a tatu iyo ndo sica iñi ndo vatyi saha ra Ndyoo Tatyi li ra sii ndo, cua nacoto ndo vatyi cuhva tyei ihya cuu tysiño i tava ra ndyaca ñaha sii yo.

³⁸ Zoco tatu iyo ndo ña cuñi ndo coto ndo ñaa sa cuu sa ndisa, nandoo ndo tacuan ñi.

³⁹ Tacuan catyi sihin ndo hermanos, cuñi xaan ndo sa cahan ndo tuhun saha ra Ndyoo sii ndo,

ta ma catyi ndo vatyi ma cuu cahan ñiyivi lengua.

⁴⁰ Vii ñi zavaha ndo tandihí ta ña vaa xaan.

15

Cuhva i nandoto ra Cristo

¹ Vityi, yañi xaa, cuñi sa cua nacohon iñi ndo tuhun sa cuenda cuhva cacu yo, tuhun sa i zacote sii ndo. Sa i tiñ cuenda ndo sii si, ta sino iñi ndo sii si ndya vityi.

² Ta zuun ñi si cuu sa zacacu sii ndo tatu ma naa iñi ndo tuhun sa zacote sii ndo, ta tatu ndisa cuii i sino iñi ndo sii si.

³ Sa xihna ñi sa i zacote sii ndo cuu cuhva i sihi ra Cristo sa cuenda cuatyi maa yo tañi catyi Tuhun Ndyoo. Ihya cuu sa i cutuhva mi sa xihna ñi.

⁴ Ta i tyihi ñiyivi sii ra sisi ñaña, ta sa cu uñi quivi i nandoto ra tañi catyi si nu tutu ra Ndyoo cuhva cua tahan ra.

⁵ Ta i ndyehe ra Pedro sii ra ta ziqui ca tandihí usi uu tahan ra i tava ra tysiño.

⁶ Yaha cuan ta i ndyehe ohon ziendu ra hermano sii ra iñi ñi cuhva. Ta cuaha xaan ra cuan ndito ra ndya vityi, zoco iyo ra sa sihi ra.

⁷ Cuee ca i ndyehe ra Jacobo sii ra, ta ziqui ca tandihí ra i tava ra Jesús tysiño.

⁸ Ta sa yaha tandihí cuan ta ziqui i ndyehe tucu mi sii ra. Tañi minoo ra cuee xaan i cacu cui.

⁹ Vatyi ñiñi ca tandihí inga ra i tava ra tysiño ta ziqui ca mi. Yivi ra vaha cui tañi inga ra i tava ra tysiño vatyi i zavaha xein sa ña vaha sihin ñiyivi ñoho cuenda ra Ndyoo quivi ta sino ca iñi.

¹⁰ Zoco cahnu xaan cuu cuhva cundahvi iñi ra Ndyoo sii. Zaha xaan ra tumañi iñi sii, ta i tava ra tysiño sii. Ta yivi sa caha ñi i tava ra tysiño sii vatyi i zatyine ñihi ca ta ziqui tandihí inga ra i tava ra tysiño. Zoco yivi mi zatyine sa ndisa vatyi maa ra Ndyoo ndyaa sihin, ta maa ra zacuu tysiño cuan.

11 Ta zuun ñi si cuu si a mi a inga ra vatyi sa ñiñi ca cuu sa i zacoto ndi Tuhun Ndyoo sii ndo, ta i sino ñiñi ndo sii si.

Ndisa vatyi cua nandoto ñiyiví i sihi

12 Nacatyi ndi sihin ndo vatyi i nandoto ra Cristo sa yaha i sihi ra. ¿Ta ñaa cuenda iyo ndo catyi ndo vatyi ma nandoto ñiyiví tatu sa yaha i sihi ñu?

13 Zoco tatu sica iñi ndo vatyi ma nandoto ñiyiví, vaziquí ndya ra Cristo ta ñá nandoto ra.

14 Ta tatu ñá nandoto ra Cristo, sa caha ñi cuu sa nacatyi ndi Tuhun Ndyoo, ta sa caha ñi sino iñi ndo.

15 Tatu ñá ndisa vatyi i zanandoto ra Ndyoo sii ra Cristo, ra vatyia cuu maa ndi vatyi catyi ndi vatyi i zanandoto ra Ndyoo sii ra. Ta ñá zanandoto ra sii ra tatu ma nandoto ñiyiví i sihi, (tañi catyi maa ndo).

16 Vatyi tatu ma nandoto ñiyiví i sihi, ñá nandoto ra Cristo.

17 Ta tatu ñá nandoto ra Cristo, sa caha ñi sino iñi ndo sa i zandasí ra cuatyi ndo. Ndoo ca cuatyi ndo sata ndo tatu ñá nandoto ra.

18 Ta tatu tacuan cuu si, ndya cuhva ndya ra sino iñi sii ra Cristo, ra sa sihi, cunaar ra.

19 Tatu cuhva sino iñi yo sii ra Cristo tyindyee si sii yo maa ñi ihya ñuu ñiyiví, ndahvi ñi cuu yo. Yoñi ca inga ñiyiví ndyehe ca tundoho ta ziquí maa yo.

20 Zoco sa ndisa cuu si vatyi i nandoto ra Cristo. Sa xihna ñi maa ra i nandoto nu yucu ñiyiví i sihi, ta yucuan cuenda cua nandoto tucu maa yo.

21 Sa cuenda minoo rayii, ta i quisaha cuhva sihi ñiyiví. Ta sa cuenda inga rayii, ta i quisaha coo cuhva sa nandoto ñiyiví.

22 Sa cuenda ra Adán ta sihi tandihí ñiyiví. Ta sa cuenda ra Cristo ta cua nandoto tandihí yo sa cuu cuenda ra.

23 Zoco cua nandoto yo quivi tahan si sii yo. Xihna ca ra Cristo i sihi ta i nandoto ra, ta cuee ca, quivi quisi tucu ra, cua nandoto ñiyiví sa cuu cuenda ra.

24 Yucuan cuu nu cua ndihí tuhun. Xihna ca cua zanaa ra Cristo cuhva sii tandihí ra ndyaca ñaha ta ra cu tyiño ta tandihí ra xaan iñi sii ra. Ta cua nacuhva cuenda ra tandihí si, ta cua cundyaca ñaha ra Ndyoo Zutu yo sii si.

25 Vatyi tahan si sii ra Cristo cundyaca ñaha ra ndya cua zandihí ra cuhva sii tandihí ra xaan iñi sii ra.

26 Ta minoo sa xaan iñi sii ra Cristo cuu cuhva sa sihi ñiyiví. Ta nu ndihí tuhun, cua zanaa ndihí ra cuhva cuan

27 vatyi i saha ra Ndyoo sa cundyaca ñaha ra Cristo tandihí. Zoco nu catyi Tuhun Ndyoo vatyi cua cundyaca ñaha ra tandihí, ña cuñi si catyi si vatyi cua cundyaca ñaha ra sii ra Ndyoo vatyi maa ra Ndyoo cuu ra saha sa cundyaca ñaha ra Cristo tandihí.

28 Zoco tatu sa ndyaca ñaha ra Cristo, zehe ra Ndyoo, tandihí ta ziquí cua cuhva cuenda ra tandihí si sii Zutu ra sa cundyaca ñaha maa ra, ta zuun ñi maa ra cua cuhva ra sii ra cundyaca ñaha Zutu ra. Ta ra Ndyoo cua cuu ra Ndyoo sii tandihí sa iyo.

29 Ta inga tucu cuhva; iyo ndo sicoo ndutyá ndo sa cuenda ñiyiví i sihi. Zoco sica iñi ndo vatyi ma nandoto ñiyiví i sihi, ta sa caha ñi sa coo ndutyá ndo sa cuenda ñu tatu ma nandoto ñu.

30 Ta tatu ma nandoto yo cuñi ndo, ¿ñaa cuenda sino iñi yo Tuhun Ndyoo? Ta tatu ma nandoto yo cuñi ndo, sa caha ñi cuu sa sino iñi yo Tuhun Ndyoo ta saha yo cuhva sii ñiyiví sa cahñi ñu sii yo ndya vaha ñi cuhva.

31 Ndisa vatyi tandihí quivi cuñi cahñi ñiyiví sii. Ndisa xaan cuhva cuan tañi sa ndisa tucu vatyi zii

xaan cuñi sihin maa ndo sihin
cuhva sino xaan iñi ndo sii ra Cristo
Jesús, ra ndyaca ñaha sii yo.

³² Ta quiví sahñi tehin sihin ñiyivi
tañi quiti xaan cuu ñu ñuu Efeso
¿yozo caa cua tyindye si cuan sii,
tatu ma nandoto ñiyivi i sihi? Ta
tatu sa ndisa vatyi ma nandoto
ñiyivi, nacasi yo ta nacoho yo ta
nacuzii iñi yo ñuu ñiyivi ya vatyi
ityaan a iza cua cuu yo, ta cua ndihí
si yucuan ñi.

³³ Ma cuhva ndo sa zandavi ñaha
ñiyivi sii ndo. Ndisa minoo cuhva
catyi si: “Tatu cu-iñi ndo sihin
ñiyivi ña vaha, cua zativi ñu sii
ndo.”

³⁴ Zaha cuenda ndo ñaa sa cuu sa
vaha, ta ma zavaha ca ndo cuatyi
vatyi ndya vityi iyo ndo tañaha ca
coto ndo sii ra Ndyoo. Catyi cuhva
ya vatyi cuñi sa cucahan nuu ndo.

Cuhva cua nandoto ñiyivi i sihi

³⁵ Ta iyo ndo cua catyi ndo: ¿Yozo
caa cua nandoto tucu ñiyivi i sihi?
¿Yozo caa cua nduu coño ñuhu ñu?

³⁶ Ma tondo xaan cuu ndo. Ñaa ñi
maa sa tasi yo, ma caña si tatu ma
tyahyu xihna coño si.

³⁷ Vatyi ña tuhva yo tasi tuñama,
tasi yo nuñi. Ta tatu cuñi yo sa caña
yoho ndutyi, cua tasi yo ndutyi.
Maa siti ñi cuu sa tasi yo.

³⁸ Ta cua caña si cuhva cuñi ra
Ndyoo vatyi ziñi ziñi cuhva caña sa
ziñi ziñi siti.

³⁹ Ña inuu ñi caa tandihí coño
ñuhu. Ziñi caa coño ñuhu ñiyivi, ta
ziñi caa coño quiti. Ta tucu caa coño
zaa ta coño tyiyaca.

⁴⁰ Ta tucu caa sa iyo ityi ziñqui
sihin sa iyo nu ñuhu. Tyaqui xaan
sa iyo ityi ziñqui, ta tyaqui tucu sa
iyo nu ñuhu, zoco tucu caa si.

⁴¹ Ziñi caa sa ndisi ñicandyi ta sa
ndisi yoo, ta ziñi tucu caa tiñoo. Ta
ña inuu ñi caa tandihí tiñoo.

⁴² Ta zuun ñi cuhva cuan cua cuu
quiví nandoto yo vatyi cua ndu-zíñi
yo. Sa tyihi ñiyivi sisí ñuhu cuu coño
ñuhu yo sa cua tyahyu, zoco sa cua

nandoto cuu minoo sa ma tyahyu
ta ma tivi.

⁴³ Coño ñuhu yo sa iyo vityi, yivi
sa vaha xaan cuu si vatyi cua
tyahyu si tatu quihvi si sisí ñuhu,
zoco cuhva sa cua nandoto yo,
yaha xaan tyaqui cua nduu yo.
Ñahñi ca sa cuu zacuu coño ñuhu
yo quiví quihvi si ñaña, zoco cua
nandoto si sihin cuaha xaan cuhva.

⁴⁴ Coño ñuhu yo sa cuu cuenda
ñuu ñiyivi ya, cua quihvi si sisí ñaña,
zoco quiví cua nandoto si, yivi ca
cuenda ñuu ñiyivi ya cua cuu si. Iyo
coño ñuhu yo sa cuu cuenda ñuu
ñiyivi ya, ta cua coo tucu inga si sa
yivi cuenda ñuu ñiyivi ya zoco sa
cuenda andivi. Ta yucuan cuu sa
ma tivi.

⁴⁵ Catyi Tuhun Ndyoo: “Rayii sa
sicoo sa xihna ñi, ra Adán, i sicoo
coño ñuhu ra ta ndito añima ra”,
zoco vaha ca ra Cristo vatyi saha
maa ra cuhva sii ñiyivi sa nandoto
ñu.

⁴⁶ Sa xihna ñi iyo coño ñuhu yo.
Sa cuenda ñuu ñiyivi ya cuu si. Cuee
ca cua cuhva ra Ndyoo inga coño
ñuhu sii yo sa cuu cuenda andivi.

⁴⁷ Tacuan cuu si vatyi sa xihna
ñi rayii i zavaha ra Ndyoo, ñuhu i
cuu ra. Zoco sa cuu uu i quisi inga
ra ndya andivi. Ta maa ra cuu ra
ndyaca ñaha sii yo.

⁴⁸ Coño ñuhu maa yo cuu sa sino
sihin ndyahyu tañi coño ñuhu ra
Adán, ta tatu sino iñi yo sii ra Cristo
cuee ca cua cuhva maa ra minoo
coño ñuhu saa sii yo sa cua cundito
andivi, ta cua cuu yo tañi maa ra.

⁴⁹ Vityi caa yo tañi caa rayii i sino
sihin ndyahyu, ta cuee ca cua nduu
yo tañi caa ra Cristo.

⁵⁰ Cuñi catyi sihin ndo her-
manos, vatyi ma cuu quihvi coño
ñuhu yo nu ndyaca ñaha ra Ndyoo.
Ma cuu quihvi minoo sa cua tivi nu
ñahñi sa tivi iyo.

⁵¹ Vityi cua nacatyi minoo tuhun
xehe sihin ndo. Ña tandihí cuii
yo cua cuu, zoco cua nazama ra
Ndyoo sii tandihí yo.

52 Natahan si quivi, yatyi xaan cua nacasi tahan tyiño; tañi tyehen ñi, tañi minoo tuhun zatahan nuu ñi cua cuu si. Sa xihna ñi cua coo nduzu cutu, ta ziqui cua nandoto ñiyivi i sihi. Cua zama ra Ndyoo cuhva iyo ñu, ta ma cuu ca ñu. Ta maa yo tatu ndito ca yo, cua zama tucu ra Ndyoo cuhva iyo yo.

53 Vityi cuu tivi coño ñuhu yo, zoco cua zama ra Ndyoo sii yo minoo cuhva sa ma tivi ca yo.

54 Vityi iyo coño ñuhu yo minoo cuhva sa cuu cuu si, zoco quivi cua nazama ra Ndyoo sii si, ta ma cuu ca si. Tacuan ta cua tahan si cuhva catyi si sisi Tuhun Ndyoo nu catyi si: "Zahacanaa ra Ndyoo sii tuhun sihi ñiyivi."

55 Ta catyi tucu Tuhun Ndyoo: "Cua zacaqui sii ndo sisi sa i sihi ndo, ta ma cuu cuui ndo. Ta ma zahacanaa ca tuhun sihi sii ñiyivi."

56 Sa saha cuhva sii tuhun sihi cuu cuatyi yo. Ta catyi ley sahnu ñaa sa cuu cuatyi yo.

57 Zoco tyahvi ndyoo sii ra Ndyoo vatyi saha ra cuhva sii maa yo, ta cuu zahacanaa yo sa cuenda ra Jesucristo, ra ndyaca ñaha sii yo.

58 Yucuan cuenda, ndoho hermanos, ra sa ñoho xaan iñi, iñi xaan cuu ndo sihin Tuhun Ndyoo. Coto ñáha cuiñi siyo ndo. Ñihi xaan zatyiño ndo tyiño ra ndyaca ñaha sii yo vatyi sa sito ndo vatyi yivi sa caha ñi zatyiño ndo tyiño ra. (Vatyi cua coo quivi cua nandoto yo, ta cua cundyaa yo minoo nu tyaqui xaan sihin ra.)

16

Cuhva cuñi si tyindyee yo sii inga hermano sihin xuhun

1 Vityi cua nacatyi sihin ndo cuhva cuñi si tyindyee ndo sii ñiyivi cuenda ra Ndyoo sihin xuhun. Zavaha ndo cuhva i nacatyi sihin sa ziñi ziiñi ityi ra hermano nu cu si Galacia.

2 Ma cuatu ndo ndya sa sei yucuan ta ziqui zatahan ndo xuhun. Tahan tahan tumingu tava ziñi ndo sa minoo minoo ndo ñaa sa cua cuhva ndo. Tatu cuaha ca zahacanaa ndo, cuaha ca cuhva ndo.

3 Ta tatu sa sei yucuan, cua tasi yoo ra cuñi ndo ndya ñuu Jerusalén vatyi cundyaca ra xuhun cua cuhva ndo sihin carta ndo ndya nu yucu ra hermano yucuan.

4 Ta tatu iyo tyiño sa cuhin yucuan, cua cuhun ra sihin.

Nacatyi ra Pablo ndyamaa cua cahan ra Tuhun Ndyoo

5 Sa cuñi quisi nu yucu ndo, zoco xihna ca cua cuhin nu cu si Macedonia, ta yaha cuan ta cua sei nu yucu ndo.

6 Ta tatu cuu, cua ndoi sihin maa ndo ndya yaha tyiemvu sa visi xaan. Ta cua tyindyee ndo sii, ta cua cuu ca cuhin ityi nuu ca ndya inga ñuu.

7 Ña cuñi sa iñi yaha ñi nu yucu ndo. Cuñi ndoi naha tatu cuhva maa ra Ndyoo.

8 Zoco cua ndoi ihyia ñuu Efeso ndya sa yaha vico Pentecostés.

9 Cua ndoi vazu sahñi tahan xaan ñiyivi sihin, saha Tuhun Ndyoo ñuu ya vatyi iyo xaan cuhva sa cuu nacatyi Tuhun Ndyoo ihyia.

10 Tatu saa ra Timoteo nu yucu ndo, cuu ndo ñiyivi vaha sihin ra ta tyindyee ndo sii ra ñaa sa cumañi sii ra vatyi zatyiño tucu maa ra tyiño ra Ndyoo tañi mi.

11 Tyaa tandihí ndo yahvi sii ra, ta tasi ndo sii ra ihyia sihin sa vaha quivi cua quisi ra nu ndyei vatyi ndati sii ra sihin inga ra hermano.

12 Ta ra hermano Apolos, i zañiñi sii ra sa cuhun ra nu yucu ndo iñi ñi sihin inga ra hermano, zoco ña cuñi maa ra cuhun vityi. Zoco cua cuhun ra quivi nacuyatyi ra.

Saha maa ra Pablo minoo nacumi sii tandihí ñu sino iñi ñuu Corinto

¹³ Coto ñáha cuzu ndo; coto ñáha zaña ndo cuhva sino iñi ndo. Zandyee xaan ndo iñi ndo, ta ma cuu ndo tañi sa ndyihi.

¹⁴ Ñaa fi maa sa zavaha ndo, zavaha ndo sii si sihin minoo cuhva zañaha si vatyi cuñi ndisa cuii ndo sii inga ñiyivi.

¹⁵ Sito ndo sii ñiyivi ra Estéfanas vatyi xihna ca maa ñu i sino iñi Tuhun Ndyoo nu cu si Acaya, ta vityi zatyinõ xaan ñu sa tyindyee ñu sii inga ñiyivi sino iñi.

¹⁶ Ta zañiñi sii ndo, hermanos, vatyi tyaa ndo yahvi sii ñiyivi tañi maa ñu ta sii tandihí inga ñiyivi tyindyee sihin tyinõ ra Ndyoo.

¹⁷ Zii xaan cuñi vatyi i quisi ra Estéfanas, ra Fortunato ta ra Acaico vatyi cuu tyindyee ra sii ndi sa cuenda maa ndo vatyi ñá cuu quisi ndo.

¹⁸ Saha xaan ra tundyee iñi sii, tañi saha ra sii maa ndo. Cuñi si sa tyaa xaan ndo yahvi sii ñiyivi tañi maa ra.

¹⁹ Tasi tandihí ra hermano ityi Asia minoo nacumi sii ndo. Tacuan tucu ra Aquila ta ña Priscila sihin tandihí ñu sino iñi, ñu titahan vehe ñu, zaquisi ñu minoo nacumi sii maa ndo sa cuenda ra Jesús.

²⁰ Tandihí cuii ra hermano tasi ra minoo nacumi sii maa ndo. Cuhya ndo minoo nacumi sii minoo ndo ta sii inga ndo.

²¹ Ta ihya tyei yuhvi ra Pablo minoo nacumi sii ndo. Sihin ndaha mi tyei ihya.

²² Tatu iyo ra ña cuñi sii ra Jesucristo, ra ndyaca ñaha sii yo, nacuhun ra cuan andyaya. Ta catyi mi: ¡Quisi tucun Jesús, quisi tucun!

²³ Ta cuñi sa cua cuhva xaan ra Jesucristo sa vaha sii ndo.

²⁴ Ta catyi sihin ndo vatyi cuñi xein sii ndo sa cuenda ra Cristo Jesús. Ta nacuu si tacuan.

Sa Cu Uu Carta I Tasi Ra San Pablo Sii Ñiyiví Sino Iñi Sii Ra Ndyoo Nuu Corinto

*Sa cu uu carta i tasi ra Pablo
ndya ñuu Corinto*

¹ Yuhvi ra Pablo i casi ra Ndyoo sii vatyi cui minoo apóstol ra Jesucristo. Ta tyei carta ya sihin ra Timoteo yañi yo, ta cua tasi ndi sii si sii maa ndo, ra cu vehe ñuhu ra Ndyoo ñuu Corinto, ta sii tandihí ñiyiví sa cuu cuenda ra Ndyoo nacahnu Acaya.

² Nacuhva xaan ra Ndyoo tumañi iñi sii tandihí ndo, ta nacuhva ra sa coo sa taxi añima ndo, ta tacuan tucu nazavaha ra Jesucristo, ra ndyaca ñaha sii yo.

*Cuhva i ndyehe xaan ra Pablo
tundoho*

³ Zacahnu xaan ndi sii ra Ndyoo, Zutu ra ndyaca ñaha sii yo, ra Jesucristo. Cundahvi xaan iñi ra Ndyoo sii ndi tañi minoo zutu sa ndyihi, ta saha xaan ra tundyee iñi sii ndi nu ndyehe ndi tundoho.

⁴ Nu ndyehe ndi tundoho saha xaan ra tundyee iñi sii ndi vatyi sihin cuhva cuan ta cuu cuhva maa ndi tundyee iñi sii inga ñiyiví ndyehe tundoho zuun ñi cuhva sa saha maa ra tundyee iñi sii maa ndi.

⁵ Ndyehe xaan ndi tundoho sa cuenda ra Cristo. Ta zuun ñi sa cuenda ra Cristo ta saha xaan ra Ndyoo tundyee iñi sii ndi.

⁶ Ndyehe xaan ndi tundoho vatyi i zacoto ndi sii maa ndo cuhva saha ra Ndyoo tundyee iñi sii yo ta cuhva zacacu ra sii yo. Ta sisi tundoho sa ndyehe ndi, ta saha ra Ndyoo tundyee iñi sii ndi, ta tyindye tucu si sii maa ndo vatyi saha tucu si tundyee iñi sii maa ndo vatyi ndyehe ndo cuhva saha

xaan ra Ndyoo tundyee iñi sii ndi. Ta zuun ñi tundoho sa ndyehe ndi ta ndyehe tucu maa ndo, ta cuu cundyee iñi ndo sii si.

⁷ Nii xaan iñi ndi sa cuenda ndo vatyi sito ndi vatyi tañi ndyehe ndo tundoho ta tacuan tucu cua cuhva ra Ndyoo tundyee iñi sii ndo.

⁸ Ta ndoho hermanos, cuñi ndi sa cua coto ndo vatyi i ndyehe xaan maa ndi tundoho nu cu si Asia. Yaha xaan cahnu tundoho i cuu sii ndi ndya cuhva i sica iñi ndi vatyi ma cundyee ca iñi ndi. Ta i yuhu ndi coto cuu ndi sihin tundoho cuan.

⁹ I sica iñi ndi vatyi cua cahñi ñiyiví sii ndi ta ma cuu zacacu ndi sii ndi. Ta sihin cuhva cuan ta i sino ca iñi ndi sii ra Ndyoo vatyi cuu zacacu maa ra sii ndi ta cuu tucu zanandoto ra sii ñiyiví i sihi.

¹⁰ Ta ndisa i zacacu ra sii ndi, ta ñá sihi ndi sihin minoo cuhva sa quiñi xaan nu cuñi cahñi ñiyiví sii ndi. Ta nii xaan iñi ndi sii ra Ndyoo vatyi cua zacacu tucu ra sii ndi inga saha

¹¹ tatu tyindye maa ndo sii ndi sihin sa cahan ndo sihin ra sa cuenda ndi. Ta tatu cua caca tandihí ndo sii ra, cuee ca ta tandihí ndo cua nacuhva xaan ndo tyahvi ndyoo sii ra sa cuenda sa vaha cua zavaha ra sihin ndi.

*Nacatyi ra Pablo ñaa cuenda ñá
saa ra yatyi ca ñuu Corinto*

¹² Zii xaan cuñi ndi vatyi catyi sa siñi tuñi vaha sii ndi vatyi vaha xaan cuu cuhva i zavaha ndi ta ndoo xaan, ta yoñi sii zandavi ñaha ndi ihya ñuu ñiyiví. Ta sihin maa ndo cuaha ca sa vaha i zavaha ndi ndihici. Ityindye ra Ndyoo sii ndi sihin cuhva ya, ta ñá zavaha ndi sii si sihin sa siñi tuñi ñi maa ndi.

¹³ Ta sa tyaa ndi carta sii ndo, ñahñi sa xehe cahan si. Maa ñi sa casi cahan si, cuhva cuu cutuñi iñi ndo. Ta cuñi sa cua cutuñi vaha iñi ndo tandihí si

¹⁴ tañi sa cutuñi iñi ndo zuhva. Ta quiví cua quisí ra Jesús ra ndyaca ñaha sii yo ta zii xaan cua cuñi ndo

sihin maa ndi, ta zii xaan cua cuñi tucu ndi sihin ndo.

¹⁵ Ta sa cuenda cuhva cuan, cuñi cuhin inga saha nu yulu ndo vatyi cuñi tyindyei sii ndo uu saha.

¹⁶ I sica iñi vatyi cua yehi nu yulu ndo ityi cuhin ñuu Macedonia. Ta sa yaha cuhin Macedonia ta cua cuhin inga saha nu yulu ndo sica iñi, ta cua tyindyei ndo sii, ta cua cuhin nu cu si Judea.

¹⁷ ¿Atu sica iñi ndo vatyi ñá ndise sa cua cuhin nu yulu ndo? ¿Atu sica iñi ndo vatyi ñá nacañi vaha iñi ta quehin? Ña tacuan iye vatyi ña caa que tañi caa ñiyivi ñuu ñiyivi ya. Catyi ñu vatyi cua zavaha ñu minoo cuhva, ta ña zavaha ñu sii si.

¹⁸ Zoco sito vaha ra Ndyoo vatyi quehin sa ndisa, ta ña zandavi ñehi.

¹⁹ Vatyi ña tacuan iyo ra Jesús Zehe ra Ndyoo. Ña zandavi ñaha ra. Tatu catyi ra minoo cuhva, sa ndisa cuii cuu si. Ta mi sihin ra Silvano ta ra Timoteo i zacoto ndi tuhun ra Jesús sii ndo.

²⁰ Sa cuenda ra Cristo ta ñii yo tandihí sa catyi ra Ndyoo ta sa na ha vatyi cua cuhva ra sii yo. Ta cuhva zacahnu yo sii ra Ndyoo ta cahan yo sihin ra, catyi yo: "Nacuu si tacuan" vatyi sito yo vatyi cua cuhva ra sa vaha sii yo sa cuenda ra Cristo.

²¹ Maa ra Ndyoo tyindyei sii yo, ta ma ndoyo ñuhu yo. Ta zandu-iin ra sii yo sihin ra Cristo. Ta saha ra Tatyi Ii ra sii yo.

²² Cuu si tañi i tyaa ra tuñi ra sii yo vatyi saha ra Tatyi Ii ra sii yo vatyi coo si añima yo vatyi cuee ca cua cuhva ra cuaha xaan ca sa vaha sii yo.

²³ Ta sito vaha ra Ndyoo vatyi ñá se hin ñuu ndo quivi sa i sica iñi cuhin vatyi cundahvi iñi sii maa ndo coto cuxein sihin ndo. Ta sito maa ra Ndyoo tandihí sa iyo añime.

²⁴ Ta ña ñiñi nacatyi que sihin ndo yozo caa cundyico ndo sii ra Ndyoo vatyi sa sino vaha iñi ndo. Zoco cuñi tyindyei sii ndo ta cua

coo ca sa zii sa saha ra Ndyoo añima ndo.

2

¹ Yucuan cuenda ñá cuñi cuhin inga saha nu yulu ndo sihin tucuihyia iñi.

² Vatyi tatu sihin cuhva cua quehin sihin ndo ta zanducuihye iñi ndo, yoñi cua zanduzii iñi mi vatyi ma cuu zanduzii ndo iñi tatu sa zanducuihye iñi ndo.

³ Yucuan cuenda i tasi carta cuan sii ndo vatyi cua zandundoo ndo tyiño cuee ca sa quasi nu yulu ndo coto nducuihye iñi zacuu ndo sihin cuhva iyo ndo. Tahan si sii ndo sa zanduzii ndo iñi. Ta niñ cuu iñi vatyi tatu zii cuñi mi, zii cua cuñi tucu maa ndo.

⁴ Yucuan cuenda i tyei carta cuan vazu yaha xaan cuihyia i cuñi quivi i tyei sii si ndya cuhva saqui. Zoco ñá cuñi zanducuihye iñi ndo sihin carta cuan. I cuñi sa cua coto ndo vatyi cuñi xein sii ndo.

Cuñi si sa zanaa yo iñi yo cuatyi ñiyivi

⁵ Sa cuihyia iñi saha minoo ra cuan, yivi sii maa ñi mi saha ra sii si. Sii tucu maa ndo saha ra zuhva. Zuhva catyi vatyi ña cuñi cañi ñihi si ra.

⁶ Ta cuhva sa tasi tuñi tandihí ndo sii ra, sa vaha ñi vityi.

⁷ Ta vityi cuñi si vatyi zanaa ndo iñi ndo cuatyi i zavaha ra quivi cuan ta cuhva ndo tundyee iñi sii ra coto yaha xaan nducuihyia iñi ra.

⁸ Yucuan cuenda zañiñi sii ndo vatyi zacoto ndo sii ra vatyi cuñi ca ndo sii ra.

⁹ I tyei carta cuan sii ndo quivi cuan vatyi cuñi cote tatu cua tyaa ndo yahvi tandihí sa catyi sihin ndo.

¹⁰ Ta vityi yoo ra zaha ndo tucanhnu iñi, zaha tucu mi tucanhnu iñi sii ra. Ta yoo ra zehi tucanhnu iñi, zavehi sii si ndya nuu ra Cristo sa cuenda maa ndo.

¹¹ Ta sito yo vatyi tatu ma zaha yo tucanhnu iñi sii ñiyivi, cua tyihi

cuihna minoo cuhva ña vaha añima yo vatyi sa sito yo cuhva tuhva maa ra zavaha.

Ñá ndoo ra Pablo ñuu Troas

¹² Quiví i sei ñuu Troas cua zacote Tuhun Vaha sa cuenda ra Cristo, ta i nuñia xaan ra ndyaca ñaha sii yo ityi, ta i cuu zacoto xein Tuhun ra.

¹³ Zoco ña zii i cuñi vatyi ñá nañihí sii ra Tito, yañi yo. Yucuan cuenda i zandoi sii ñu ñuu cuan, ta sehin ndya Macedonia.

Zacoto ra Pablo Tuhun Ndyoo sihin tandihí cuii añima ra

¹⁴ Ta vityi sehi tyahvi ndyoo sii ra Ndyoo vatyi zahacanaa yo tandihí saha sa cuenda ra Cristo, ta sihin tyiño maa ndi zacoto ra Ndyoo tuhun ra nacahnu cuii. Ta tañi minoo sa vixi xaan sahan cuu tuhun ra.

¹⁵ Vatyi tuhun sa nacatyi ndi cuu tañi minoo sa vixi xaan sahan sa saha maa ra Cristo sii ra Ndyoo. Ta ñihi tandihí ñiyiví xico cuan, ñu cua cacu ta ñu cunaa.

¹⁶ Ñiyiví sa ma cacu, sica iñi ñu vatyi minoo xico quiñi xaan sahan cuu si tañi minoo xico sa cua cahñi sii ñu vatyi nacatyi tuhun cuan cuhva cunaa ñu. Zoco ñiyiví cua cacu, minoo xico tyaqui xaan sahan cuu si cuñi ñu cuhva cahan ndi. Ta ma cuu zavaha ndya vaha ñi ñiyiví tyiño ya.

¹⁷ Ta maa ndi ña iyo ndi tañi iyo cuaha xaan ra. Vatyi nazaca ra tuhun ña ñiñi sihin Tuhun Ndyoo vatyi iyo sa cuñi ra ñihi ra sihin cuhva cuan. Zoco ndoo xaan zacuaha maa ndi cuhva i tava ra Ndyoo tyiño sii ndi. ñin ñi cuu ndi sihin ra Cristo, ta sito ndi vatyi ndyehe ra Ndyoo tandihí sa zavaha ndi.

3

Cuhva saa iyo sa cuenda ra Cristo

¹ Ta sa cahan ndi tuhun cuan ¿atü sica iñi ndo vatyi zacahnu ndi sii ndi? Ña zacahnu ndi sii ndi. ¿A atu

sica iñi ndo vatyi cuize carta tañi ndyizo inga ra ta catyi si sihin ndo vatyi vaha ñiyiví cui a cuize carta sa tyaa maa ndo ta catyi si sihin inga ñiyiví vatyi vaha ñiyiví cui?

² Zoco maa ndo cuu carta ndi. (Sa cuenda tyiño i zavaha ndi nu yucu ndo.) Ta carta ya iyo si añima ndi. Ta cuu coto tandihí ñiyiví sii si ta cahvi ñu sii si.

³ Ta maa ndo cuu tañi minoo carta i zaquisi ra Cristo, ta i tyaa maa ndi sii si. Ta carta ya yoñi tyaa sii si sihin minoo lapicero a nu minoo yuu, zoco Tatyi li maa ra Ndyoo ndito i tyaa si sisí añima ndo.

⁴ Ta tyehen cuhva quehin vatyi site vatyi cua cuhva ra Ndyoo sa quita vaha tyiño zavehi. Vatyi tyindyee ra Cristo sii.

⁵ Ta ña quehin cuhva ya vatyi cuu zacuu sa maa ñi mi. Ña tacuan, vatyi tandihí sa zavehi, ra Ndyoo saha cuhva cuan sii.

⁶ I saha ra cuhva sii, ta cuu nacatyi sihin ñiyiví sa cuenda tuhun saa i saha ra Ndyoo. Zacacu tuhun saa ya sii yo, ta saha si minoo cuhva saa, cundito yo vatyi iyo Tatyi Li maa ra Ndyoo sihin yo. Ta ley sahnu sa saha ra Ndyoo sii ra Moisés, ma cuu zacacu si sii yo. Zañaha si ñaa sa cuu cuatyi yo. Ta sa cuenda cuatyi yo, ta cuu si tañi sa sihi añima yo vatyi ma cuu tyaa yo yahvi sii tandihí cuii ley sahnu cuan.

⁷ Ta ley sahnu sa i tyaa ra Ndyoo sata minoo yuu, vaha xaan i cuu si ndya cuhva ndya ñá cuu ndyehe ñiyiví nuu ra Moisés quivi i ñihi ra sii si vatyi ndisi xaan i nduu nuu ra. Ta i naa sa ndisi cuan cuee cuee ñi.

⁸ Ta vityi iyo tuhun saa sa saha ra Ndyoo, ta vaha xaan ca si ta ziqui tuhun sahnu cuan.

⁹ Vatyi tatu vaha xaan cuu tuhun sahnu cuan ta saha si sa cuu yo ¿ta ñiacu ma cuvaha xaan ca tuhun saa ya vatyi zanduvaha si sii yo ityi nuu ra Ndyoo?

¹⁰ Ta ley sahnu sa vaha xaan cuan, ña vale ca si ityi nuu tuhun saa ya vatyi vaha xaan ca cuu tuhun saa ya.

¹¹ Ta tatu tuhun sahnu sa cua naa ta vaha xaan i cuu si ta tyaqui xaan i cuu si, vaha xaan ca cuu tuhun saa ya vatyi ma naa si ndaha ñi.

¹² Ta sito ndi vatyi ma naa tuhun saa ya, ta yucuan cuenda nii xaan cuñi ndi ta nacatyi ndi Tuhun Ndyoo.

¹³ Ña zavaha ndi cuhva i zavaha ra Moisés. I tyazi ra zahma nuu ra vatyi ma ndyehe ñiyivi hebreo cuhva cua naa sa ndisa xaan nuu ra cuee cuee ñi. Vatyi ña cuu ndoo sa ndisi cuan nuu ra.

¹⁴ Ta ña iin ñi nuu ra Moisés i tyazi sa tyazi, zoco ndya sa siñi tuñi sii ñiyivi cuan ta i tyazi tucu si. Ta ndya cuhva ndya vityi ta ña cutuñi vaha iñi ñu tatu cahvi ñu tuhun sahnu cuan vatyi maa ñi sa sino iñi yo sii ra Cristo cuu sa tyaa siyo sa tyazi sa siñi tuñi yo.

¹⁵ Ta ndya cuhva ndya vityi tatu cahvi ñiyivi hebreo tuhun i tyaa ra Moisés, ña cutuñi ndisa cuii iñi ñu sa cahvi ñu.

¹⁶ Zoco tatu sino ndisa iñi ñu sii ra ndyaca ñaha sii yo, cua tyaa siyo ra sa tyazi sa siñi tuñi sii ñu.

¹⁷ Ta maa ra ndyaca ñaha sii yo cuu ra Tatyi II. Ta tatu iyo Tatyi II ra ndyaca ñaha sii yo añima yo, ña ndyaca ñaha ca ley sahnu cuan a cuatyi yo sii yo.

¹⁸ Ñahñi sa tyazi nuu yo. Ndyehe yo cuhva vaha xaan iyo ra ndyaca ñaha sii yo tañi sa ndyehe yo minoo nu ino. Ta cuhva sa ndyehe yo iyo maa ra, tacuan nduu tucu maa yo cuee cuee ñi. Tatyi II ra Ndyoo zama si cuhva iyo yo ta nduvaha ca yo ta nduvaha ca yo, ta cuahan nduu yo tañi iyo ra Cristo.

4

¹ Saha ra Ndyoo tysiño ya sii ndi, ta cundahví iñi ra sii ndi, ta tyindyeer ra sii ndi. Ta yucuan

cuenda ña nducuihya iñi ndi ta ña zandihí ndi tuhun.

² Ta ña zavaha ndi sa xehe, sa saha ticahan nuu. Ña zandavi ñaha ndi. Maa ñi Tuhun Ndyoo zacuaha ndi, ta ña nazaca ndi inga tuhun sihin si. Maa ñi sa ndisa cahan ndi. Ta sihin cuhva cuan ta sito ñiyivi sihin sa siñi tuñi vaha ñu vatyi vaha ñiyivi cuu ndi, ta ndyehe ra Ndyoo cuhya zavaha ndi.

³ Ña tyixehe ndi Tuhun Ndyoo. Zoco xehe xaan si sa cuenda ñiyivi cuu cunaa.

⁴ Ra ndyaca ñaha ñuu ñiyivi ya zatívi ra sa siñi tuñi sii ñiyivi ña sino iñi coto cutuñi iñi ñu tuhun vaha xaan sa cuenda ra Cristo, cuhva zacacu ra sii yo. Ta ra Cristo cuu ra Ndyoo, ta iin ñi caa maa ra tañi ra Ndyoo Zutu ra.

⁵ Ta cuhva nacatyi ndi Tuhun Ndyoo sihin ñiyivi, ña cahan ndi tuhun maa ndi, cahan ndi tuhun ra Jesucristo, ra ndyaca ñaha sii yo. Ta catyi ndi vatyi maa ndi cuu muzu ndo vatyi cuñi ndi sii ra Cristo.

⁶ Maa ra Ndyoo cuu ra catyi vatyi cuu coo sa ndisi quiví zavaha ra sa ndisi, ta zuun ñi maa ra zandundisi añima yo. Ta tacuan ta sihin sa sito yo sii ra Cristo ta sa sito yo cuhva sa vaha xaan ta tyaqui xaan iyo maa ra Ndyoo.

Sihin sa sino ñi iñi yo sii ra Ndyoo ta cuu coo yo minoo cuhva saa

⁷ Coño ñuhu yo cuu tañi quiyí ñi vatyi ñahfíi ra cuu maa yo. Ta tacuan ta cuu ndyehe ñiyivi vatyi tandihí cuhva sa vaha xaan sa cuu sii ndi, cuenda ra Ndyoo cuu si ta yivi sa cuenda maa ndi.

⁸ Yucuan cuenda vazu iyo tizihi nacahnu nu cuahan ndi, zoco ña zandihí ndi tuhun. Ta vazu ña cutuñi iñi ndi tandihí sa tahan ndi, zoco sito ndi vatyi cua quita vaha ndi.

⁹ Cuñi cahñi ñiyivi sii ndi, zoco ña maa tuhun ñi ndi vatyi ndyaa ra Ndyoo sihin ndi. Cañi ñu sii ndi, zoco ña sihi ndi.

10 Tandihí nu cuahan ndi ndatu ndi sa cua cuu ndi sa cuenda ra Jesúsi vatyi tacuan ta cua ndyehe ñiyivi vatyi ndito ndi minoo cuhva saa, cuhva saha ra Jesúsi sii ndi.

11 Tandihí quivi sa yatyí cuii cuu ndi sa cuenda ra Cristo vatyi cuhva cuan ta cua ndyehe ñiyivi vatyi iyo ra Cristo añima ndi ta saha ra minoo cuhva saa coo ndi.

12 Ndatu ndi sa cua cahñi ñiyivi sii ndi vatyi nacatyí ndi Tuhun Ndyoo. Ndyehe xaan ndi tundoho sa cuenda si, zoco sa cuenda sa nacatyí ndi Tuhun Ndyoo siin ndo ta ñihu ndo cuhva coo ndo minoo cuhva saa.

13 Sino iñi ndi tañi i sino iñi ra rey David quivi i catyi ra: "Sino iñi, ta yucuan cuenda nacatyí sihin ñiyivi." Catyi ra. Ta tacuan tucu maa ndi, sino tucu iñi ndi, ta yucuan cuenda nacatyí ndi.

14 Vatyí sito ndi vatyi cuhva i zanandoto ra Ndyoo sii ra Jesúsi sisi sa i sihi ra ta cua zanandoto tucu ra sii maa ndi vatyi sa ndu-hin ndi sihin ra Jesúsi, ta cua cundyaca ra sii ndi sihin maa ndo ityi nuu maa ra.

15 Tandihí tundoho sa ndyehe ndi cuu cuenda maa ndo vatyi tyindyee si sii ndo. Ta tatu cuaha ndo cua ñihí ndo sa vaha sa saha maa ra Ndyoo sii ndo, cuaha ndo cua nacuhva xaan ndo tyahvi ndyoo sii ra, ta cua zacahnu ndo sii ra.

16 Yucuan cuenda ña ndu-uu iñi ndi tyiño ya. Ta vazu sa cuñi cuu coño ñuhu ndi, zoco ndundyee ca iñi ndi tahan tahan quivi.

17 Ta sito ndi vatyi tundoho sa ndyehe yo ñuu ñiyivi ya yivi sa ñiñi xaan cuu si, ta yatyí cua yaha si. Zoco sa cuenda maa si ta cua ñihí ndi cuaha xaan sa vaha tandihí cuii tyiemvu nu ndyaa ra Ndyoo.

18 Yucuan cuenda ña tyaa ndi yahvi sa ndyehe yo vityi. Tyaa ca ndi yahvi sii sa ña cuu ndyehe yo vatyi yucuan cuu sa cua coo

tandihí cuii tyiemvu. Ta sa cuu ndyehe yo vityi, cunaa tandihí si.

5

1 Sito ndi vatyi tatu cua cuu ndi cua tyahyu coño ñuhu ndi vatyi tañi minoo vehe sa cuu cuenda ñuu ñiyivi ñi cuu coño ñuhu yo. Zoco iyo vehe ndi ityi ziqui sa yivi ñiyivi i zavaha. Maa ra Ndyoo i zavaha sii si, ta cua coo si tandihí cuii tyiemvu.

2 Ndisa vatyi nii ñi sa ndyaa ndi ñuu ñiyivi ya nducuihya xaan iñi ndi vatyi cuñi xaan ndi coo ndi sisi sa cua cuhva ra Ndyoo andivi.

3 Sisi sa cua cuhva ra Ndyoo cua coo añima ndi, ta ma coo si tacuan ñi.

4 Nii ñi sa iyo ndi sisi coño ñuhu ndi sa cuu cuenda ñuu ñiyivi ya, nducuihya iñi ndi vatyi zayanga si sii ndi. Ña cuñi ndi sa ma coo coño ñuhu ndi, zoco cuñi ndi coo ndi cuhva saa sa cua cuhva ra Ndyoo sii ndi. Cuñi ndi sa cunaa coño ñuhu sa cuu cuenda ñuu ñiyivi ya ta cua coo ndi minoo cuhva saa sa ma ndihí.

5 Ta maa ra Ndyoo cuu ra catyi vatyi tacuan cua cuu si, ta i saha ra Tatyi Ii ra sii yo. Ta cuhva cuan zañaha si vatyi cua ñihí yo tandihí cuii sa cua cuhva ra.

6 Ta yucuan cuenda ña yuhu ndi sa cuu ndi. Ta sito ndi vatyi nii ñi sa iyo ndi ihyá ñuu ñiyivi ya sisi coño ñuhu ndi, ña iyo ndi gloria sihin ra Ndyoo.

7 Sito ndi vatyi ndisa cuu cuhva ya vatyi sino iñi ndi sii ra Ndyoo ta yivi sa cuenda minoo sa ndyehe ndi.

8 Ta nii xaan iñi ndi, ta sica iñi ndi vatyi vaha ca tatu zandoo ndi coño ñuhu ya ta cuhun ndi nu ndyaa ra ndyaca ñaha sii yo.

9 Yucuan cuenda ñihí xaan ndrucu ndi cuhva zavaha ndi cuhva tañan iñi ra a cuu si sa ñoho ca ndi sisi coño ñuhu ndi ihyá ñuu ñiyivi a cuu si sa cuahan ndi nu ndyaa ra.

¹⁰ Vatyi sa minoo minoo yo cu a yaha yo ityi nuu ra Cristo, ta cua zandaa ra tysiño cuenda yo, ta cua ñihi yo sa tahan si sii yo sa cuenda cuhva i zavaha yo sa vaha a sa ña vaha quivi i sicoo yo sisi coño ñuhu yo ñuu ñiyivi ya.

Zacoto ra Pablo cuhva nduvaha yo ityi nuu ra Ndyoo

¹¹ Sito ndi vatyi cua tasi tuñi ra Ndyoo sii ndi tatu ma zavaha ndi cuhva catyi ra. Yucuan cuenda nducu xaan ndi cuhva cahan ndi sihin ñiyivi vatyi nacuhva cuenda ñu sii ñu sii ra Ndyoo. Sito vaha ra Ndyoo cuhva iyo ndi, ta sito tucu maa ndo sihin añima ndo, cuñi.

¹² Ña cuñi ndi zacahnu ndi sii ndi sihin sa cahan ndi ihya, zoco cuñi ndi sa nacohon iñi ndo vatyi tuhun ndisa i zacoto ndi sii ndo. Tacuan ta cua tahan ca iñi ndo sii ndi. Ta cua ñihi ndo cuhva cahan ndo sihin ra zacahnu sii. Catyi ra cuan vatyi vaha ra, zoco ñahní sa vaha iyo añima ra.

¹³ Tatu ra loco cuu ndi (vatyi cahan ndi sa vaha sa cuenda maa ndi), zoco zavaha ndi cuhva ya vatyi cuñi ndi zacahnu ndi sii ra Ndyoo. Ta tatu iyo sa vaha sii sa siñi tuñi ndi, tacuan iyo ndi vatyi cuñi ndi tyindye ndi sii maa ndo.

¹⁴ Zañiñi ndi ta zacoto ndi Tuhun Ndyoo sii ñiyivi vatyi sito ndi cuhva cuñi xaan ra Cristo sii tandihí ñiyivi. Sihi ra Cristo sa cuenda cuatyi tandihí ñiyivi, ta yucuan cuenda sito yo vatyi cuu si tañi sa sihi yo sihin ra Cristo, ta cuu zaña yo sa zavaha yo sa ña vaha.

¹⁵ I sihi ra sa cuenda tandihí yo, ta yucuan cuenda ma cuu ca coo yo cuhva cuñi maa yo. Cua zavaha yo cuhva cuñi maa ra i sihi ta nandoto ra sa cuenda yo.

¹⁶ Ta vityi ma cuu catyi yo tatu vaha a ña vaha sa zavaha ñiyivi cuhva caa ñu ihya ñuu ñiyivi. Ndyo sii ra Cristo ta i quehin cuhva cuan vatyi sica iñi vatyi cuu ra minoo

ñiyivi tañi maa yo, zoco vityi ma cuu ca caca iñi cuhva cuan.

¹⁷ Vatyi quivi saha cuenda yo sii yo sii ra Cristo, i zama ra tandihí cuhva iyo yo. Tandihí cuhva i sica iñi yo ityi sata sa i nazama si vatyi i saha ra inga sa siñi tuñi saa sii yo.

¹⁸ Ta tandihí cuhva ya, maa ñi ra Ndyoo i zavaha sii si vatyi cuñi ra sa cua zanduvaha ra sii yo sihin ra sihin cuhva i zavaha ra Cristo. Ta i saha ra tysiño sii maa ndi vatyi nacatyi ndi sihin ñiyivi cuhva cuu nduvaha ñu sihin ra.

¹⁹ Sihi cuhva i zavaha ra Cristo, ta i zanduvaha ra Ndyoo sii tandihí ñiyivi ñuu ñiyivi sihin ra. Ña tyaa ca ra cuatyi i zavaha ñu sata ñu. Ta saha ra tysiño sii maa ndi sa zacoto ndi sii ñiyivi vatyi cuñi ra sa nduvaha ñu sihin ra.

²⁰ Maa ndi cuu ra sica sihin tysiño ra Cristo. Cuu si tañi sa maa ra Ndyoo zañiñi sii ndo sihin tuhun cahan ndi vatyi sihin tysiño maa ra sica ndi. Yucuan cuenda zañiñi ndi sii ndo vatyi nanduvaha ndo sihin ra Ndyoo vatyi yucuan cuu sa cuñi ra Cristo.

²¹ Ñahñi numinoo cuatyii zavaha ra Cristo, zoco sa cuenda maa yo i ndyehe ra Ndyoo sii ra tañi minoo ra iyo cuatyi. Ta cuhva vaha xaan iyo ra Cristo, i saha ra Ndyoo sii maa yo, ta nduu yo ñiyivi vaha ityi nuu ra Ndyoo.

6

¹ Zatyiñi ndi iñi sihin ra Cristo, ta yucuan cuenda zañiñi ndi sii ndo vatyi ma coo ndo tañi ra ña sito sii ra Ndyoo. Cutyioñi ndo tandihí sa vaha sa saha ra Ndyoo sii minoo minoo ndo.

² Vatyi tyehen catyi ra Ndyoo nuu tutu ra: “Siñi sa cahan ndo quivi i zacaqui sii ñiyivi, ta i tyindyei sii ndo”, catyi ra. Ta vityi cuu tyiemvu vaha, tyiemvu zacacu ra Ndyoo sii ñiyivi.

³ Nducu xaan ndi cuhva cuu ndi ñiyivi vaha xaan coto ma tahan iñi

ñiyiví cuhva zavaha ndi ta catyi ñu
vatyi ña vaha Tuhun Ndyoo ta ma
sino iñi ñu.

⁴Cuñi ndi sa cua ndyehe ñu vatyi
muzu maa ra Ndyoo cuu sii ndi
sa ndisa cuii sihin cuhva zandyee
xaan ndi iñi ndi ndyehe ndi tun-
doho, ta tandihí sa yií xaan. Ta
sihin cuhva cundyee xaan iñi ndi.

⁵Vazu cañi ñiyiví sii ndi ta tyihi
ñu sii ndi vehe caa ta cuvaa xaan
ñu, zoco zandyee ndi iñi ndi. Nihi
xaan zatyíño ndi. Iyo saha ndya
cuhva ña quixi ndi, ta ña fihi ndi sa
casi ndi.

⁶Zandyee ndi iñi ndi sihin
tandihí cuhva ya vatyi muzu maa
ra Ndyoo cuu sii ndi sa ndisa cuii.
Yucuan cuenda zavaha ndi sa vaha
xaan. Sito xaan ndi Tuhun Vaha
ra Ndyoo, ta cundyee xaan iñi ndi
sihin ñiyiví. Zavaha xaan ndi sa
vaha sihin ñu. Situ cuii Tatyi Ii
añima ndi, ta cuñi ndi sii ñiyiví sa
ndisa cuii.

⁷Maa ñi sa ndisa cahan ndi. Iyo
xaan tundyee iñi maa ra Ndyoo
sihin ndi, ta sityíño ndi tandihí sa
vaha sa saha maa ra sii ndi, ta sihin
cuhva cuan zatívi ndi tyíño cuihna.

⁸Iyo quiví tahan iñi ñiyiví sii ndi,
ta iyo quiví ña cuu ndyehe ñu sii
ndi. Iyo quiví cahan ñu sa vaha
sii ndi, ta iyo quiví cahan ñu ndya
vaha ñi. Catyi ñu vatyi zandavi
ñaha ndi sii ñiyiví, zoco maa ñi sa
ndisa cahan ndi.

⁹Iyo ñiyiví ña tyaa ñu yahvi sii
ndi, ta iyo ñiyiví tyaa xaan ñu yahvi
sii ndi. Iyo saha sa yatyí cuu ndi,
zoco ñá sihi ndi. Iyo saha saha ra
Ndyoo sa ndoho ndi, zoco ñá sihi
ndi.

¹⁰Iyo quiví cuihya xaan cuñi ndi,
zoco zii xaan cuñi ndi sihin cuhva
zavaha ra Ndyoo. Ndahvi xaan
ndi, zoco saha xaan ndi sa vaha ra
Ndyoo sii ñiyiví. Vazu ñahñi maa sa
iyo sii ndi, zoco iyo tandihí sa vaha
ra Ndyoo sii ndi.

¹¹Ndoho hermanos ñuu Corinto,
casi xaan cahan ndi sihin ndo ta ña
tyixehe ndi. Cuñi xaan ndi sii ndo.

¹²Ñahñi cuhva sa ña cuñi ndi sii
ndo, zoco maa ndo ña cuñi ndo sii
ndi sa ndisa.

¹³Ta vityi quehin sihin ndo tañi
sa zehi sii ndo sa ndisa cuii. Zan-
duvita ndo añima ndo. Cuñi ndo sii
ndi.

*Maa yo cuu vehe ñuhu ra Ndyoo
ndito*

¹⁴Ma cuu ndo ra cu tahan si-
hin ñiyiví ña sino iñi vatyi ma cuu
cu-iin añima ndo sihin añima maa
ñu. Ma cuu cu-iin sa vaha sihin
sa ña vaha. Sa iyo ñúhu sihin maa
ndo, ta maa ñu sica noo ca ñu nu
ñaa.

¹⁵Ma cuu cu-iin ra Cristo sihin
cuihna a ñiyiví sino iñi sihin ñiyiví
ña sino iñi.

¹⁶Ma cuu zacahnu yo sii ra
Ndyoo ta sii zandu. Maa yo cuu
vehe ñuhu ra Ndyoo ndito tañi i
catyi maa ra:

Cua cundyei sihin ñu ta caca noi
sihin ñu;
ra Ndyoo sii maa ñu cua cui, ta maa
ñu cua cuu ñiyiví sii.

¹⁷Yucuan cuenda i catyi tucu ra:
Quita ndo ticiú ñiyiví ña sino iñi, ta
ma cutahan ca ndo sihin ñu;
ma zavaha ca ndo sa ña vaha;
tacuan ta cua tñin cuende sii
ndo.

¹⁸Zutu ndo cua cuu sii, ta zehi cua
cuu sii ndo,
catyi ra Ndyoo ra iyo tandihí cuii
cuhva sii.

7

¹Ihya cuu cuhva saha ra Ndyoo
tuhun ra sii yo, hermanos. Yucuan
cuenda cuñi si sa nducu yo cuhva
cuu yo ñiyiví vaha xaan ityi nuu ra
Ndyoo. Ma zavaha yo sa quiñi, ta
ma caca iñi yo sa ña vaha coto cañi
ra sii yo.

*Sa i zama ra hermano ñuu Cor-
into cuhva iyo ra*

²Sica ndi sii ndo vatyi tñin cuenda
vaha ndo sii ndi vatyi ñahñi sa ña
vaha i zavaha ndi sihin numinoo

ndo. Yoñi ndo zativi ndi sa siñi tuñi, ta yoñi sii zandavi ñaha ndi.

³ Na quehin cuhva ya sihin ndo sa cuñi tyei cuatyi sata ndo. Zoco catyi sihin ndo inga saha zuun ñi cuhva sa i catyi sihin ndo vatyi cuñi xein sii ndo. Noho xaan iñi sii ndo. fin ñi ra cuu yo a ndito yo a sa sihi yo.

⁴ Nii xaan iñi sihin ndo, ta zii xaan cuñi sihin cuhva iyo ndo. Yu-cuan cuenda vazu ndyehe xaan ndi tundoho ihya, zoco cuhva iyo ndo tyindyee si sii, ta zii xaan cuñi.

⁵ Ndyo quivi i saa ndi Macedonia ya ta ña quitatu ndi. Ndyehe xaan ndi tundoho, ta iyo xaan tizihi. Sahñi tahan xaan ñiyivi sihin ndi, ta yuhu xaan añima ndi.

⁶ Zoco saha ra Ndyoo tundyee iñi sii yo tatu nducuihya xaan iñi yo, ta i zandundyee ra añima ndi quivi i saa ra Tito.

⁷ Ta ña maa ñi sa cuenda sa saa maa ra, sa cuenda sa i saha xaan maa ndo tundyee iñi sii ra ta tyindyee tucu si sii maa ndi. I catyi ra sihin ndi cuhva cuñi xaan ndo ndyehe ndo sii ndi, cuhva nducuihya xaan iñi ndo sa cuenda sa ña vaha i zavaha ndo ta cuhva i tyaa xaan ndo yahvi tuhun sa tasi sii ndo. Ta sihin tandihí cuhva ya i nduzii xaan ca cuñi.

⁸ Ta vityi ña cuihya ca cuñi sa cuenda carta sa i tasi sii ndo. Ndisa i nducuihya iñi ndo i zacuu carta cuan, zoco zuhva ñi quivi.

⁹ Ta vityi zii xaan cuñi, zoco yivi sa cuenda sa nducuihya iñi ndo, sa cuenda sa i zama ndo cuhva iyo ndo. I nducuihya iñi ndo minoo cuhva tahan iñi ra Ndyoo. I zavaha ndi minoo sa vaha sihin ndo sa zanducuihya ndi iñi ndo.

¹⁰ Vatyi tatu nducuihya iñi yo cuhva tahan iñi ra Ndyoo, zama yo cuhva iyo yo, ta cua cacu yo. Ta ña tahan si sa ma cuñi yo nducuihya iñi yo cuhva cuan. Zoco tucuihya iñi sa iyo sii ñiyivi ña sito sii ra

Ndyoo, ma tyindyee si sii ñu sa ma cuhun ñu andyaya.

¹¹ Zaha ndo cuenda cuhva i tyindyee si sii ndo vatyi i nducuihya iñi ndo cuhva tahan iñi ra Ndyoo. I quisaha cuñi xaan ndo zavaha ndo sa vaha. I zavaha ndo cuhva cuñi si sihin ra sicoo cuatyi cuan. I tasi tuñi ndo sii ra, ta cuñi xaan ndo sa ma coo ca cuatyi nu yucu ndo. I cuxaan ndo sa cuenda sa sicoo cuatyi nu yucu ndo, ta i yuhu ndo sii ra Ndyoo. Ta sa vaha cuan ta ziqui i cuñi xaan ndo ndyehe ndo sii. Zañaha ndo vatyi ñahñi ca cuatyi ndo iyo sa cuenda tuhun cuan.

¹² I tyei carta cuan vatyi cuñi sa cua nacoto maa ndo cuhva cuñi xaan ndo sii ndi sa ndisa cuii ta yivi sa sica xaan iñi sa cuenda ra zavaha cuatyi cuan ta nu sa cuenda zutu ra, vazu i zavaha ra sa ña vaha cuan sihin ra.

¹³ Ta yucuan cuenda i saha xaan ndo tundyee iñi sii, sihin cuhva i zavaha ndo sa vaha, ta zii xaan ca cuñi sa cuenda cuhva i zavaha ndo sihin ra Tito. I tiñ cuenda vaha ndo sii ra, ta zanduzii ndo iñi ra.

¹⁴ I catyi sihin ra Tito cuee ca sa cuhun ra nu yucu ndo vatyi sino xaan iñi ndo, ta ña zaha ndo ticanhan nuu sii, cuhva cuan. Tandihí sa i quehin sihin maa ndo, maa ñi sa ndisa cuu si. Ta sa vaha i nacatyi sihin ra sa cuenda ndo, i quita si cuhva cuan, maa ñi sa ndisa cuii, ta ña zacuu ndo sii, tañi minoo ra vatyá.

¹⁵ Ta cuñi xaan ca ra Tito sii ndo vityi vatyi nacohon iñi ra cuhva i tiñ cuenda vaha xaan ndo sii ra ta i tyaa xaan ndo yahvi sii ra. Ta i yuhu xaan ndo coto ma zavaha ndo tandihí sa cuñi si.

¹⁶ Nii xaan iñi sihin ndo tandihí cuii cuhva, ta yucuan cuenda zii xaan cuñi vityi.

8

Natyindyee vaha yo sii ñiyivi sihin xuhun

¹ Ta vityi cuñi ndi nacatyi ndi sihin ndo hermanos cuhva i saha xaan ra Ndyoo tundyee iñi sii ñiyiví sino iñi ñuu Macedonia.

² Vazu ndyehe xaan ñu tundoho, zoco zii xaan cuñi ñu sihin ra Ndyoo. Ta vazu ndahvi xaan ñu, zoco i saha xaan maa ñu sa sii ñu sii ñiyiví tañi ñiyiví cuca.

³ Sehi sa ndaa cuenda ñu vatyi saha maa ñu sa sii ñu vatyi cuñi ñu. Ta iyo saha yaha ca saha ñu.

⁴ I zañiñi ñu sii ndi cuaha xaan saha vatyi quihin ndi sa saha maa ñu ta cuhva ndi sii si sii inga hermano.

⁵ I zavaha ñu cuaha ca ta ziqui cuhva sica iñi ndi vatyi sa xihna ñi i saha maa ñu sii ñu sii ra ndyaca ñaha sii yo ta ziqui i cuñi ñu sa cua cutyiño ra Ndyoo sii maa ndi sa zacuaha ndi sii ñu.

⁶ I ndyehe ndi cuhva zavaha ñu ñuu Macedonia, ta ziqui i catyi sihin ra Tito vatyi maa ra cuu ra i quisaha sihin tyiño ya sihin maa ndo, ta yucuan cuenda i catyi sihin ra nacuhva ca ra cuhva sii ndo sa cuhva ca ndo xuhun.

⁷ Sito xaan maa ndo cuaha xaan cuhva. Niñxaan ifii ndo. Vaha xaan zacuaha ndo Tuhun Ndyoo. Sito xaan ndo sihin sa siñi tuñi sa saha ra Ndyoo. Ta vaha xaan ndyico ndo sii ra. Cuñi xaan ndo sii ndi. Ta vityi cuñi tucu si sa tyindyee vaha ndo sii ra hermano ndahvi.

⁸ Zoco ña zañiñi sii ndo. Zoco cuñi inga ñiyiví sa tyindyee ndo sii ñu. Ta sihin cuhva ya cua zañaha ndo vatyi cuñi ndo sii ñiyiví sa ndisa cuii.

⁹ Sa sito ndo cuhva cuñi xaan ra Jesucristo sii yo. Cuca xaan maa ra, zoco sa cuenda maa yo i zandundahvi xaan ra sii ra sa quisira ihyia ñuu ñiyiví. Ta vityi zanducuca ra sii yo vatyi sa cuenda sa i sihi ra nuu cruz, ta cua ñihi maa yo sa vaha sa saha ra Ndyoo sii yo.

¹⁰ Vityi sehi minoo sa siñi tuñi vaha sii ndo vatyi tañi sa quisaha saha xaan ndo xuhun cuyava,

¹¹ vityi zavaha ca ndo sii si tañi zavaha ndo quivi cuan. Cuhva ndo ñaa sa cuu cuhva ndo.

¹² Tatu ndisa cuii cuñi ndo cuhva ndo, ña ñiñi xaan yozo cuhva ndo. Cua quihin ra Ndyoo ñaa sa cuu cuhva ndo. Ta ña cuñi ra sa cuhva yo minoo cuhva sa ña cuu sii yo.

¹³ Ña cuñi sa ndyehe xaan maa ndo tundoho vatyi saha xaan ndo xuhun ndo sii inga ñiyiví ta ñahñi tundoho cua ndyehe maa ñu. Ña tacuan cuñi si.

¹⁴ Zoco vityi iyo cuaha xuhun ndo, ta cuu tyindyee ndo sii ñiyiví ndahvi ca. Ta cuee ca inga saha cua cuu tyindyee maa ñu sii ndo tatu siñi ñuhu si sii ndo. Tacuan ta cua cuu ndo inuu ñi.

¹⁵ Tañi catyi si nuu tutu ra Ndyoo: “Ra i ñihi cuaha ca, ñá ndoo si sii ra. Ta ra i ñihi zuhva ñi, ñá cumañi si sii ra.” Catyi si.

Cua cuhun ra Tito sihin ra hermano ndya ñuu Corinto

¹⁶ Tyahvi ndyoo sii ra Ndyoo vatyi inuu ñi cuñi ra Tito sii maa ndo tañi cuñi mi sii ndo.

¹⁷ I quihin ra tyiño sehi sii ra sa cuhun ra cundyeha ra sii ndo vatyi sa sica iñi ra zavaha ra cuhva cuan. Ta yucuan cuenda cua quisira ndyehe ra sii ndo vatyi cuñi ra.

¹⁸ Tasi ndi inga ra hermano sihin ra. Tandihi ñiyiví sino iñi, cahan xaan nu sa vaha sa cuenda ra ya. Ta cuu xaan nacatyira Tuhun Vaha ra Ndyoo.

¹⁹ Ta ña tacuan ñi vatyi i casi tandihir ra hermano sii ra sa caca noo ra sihin ta tyindyee ra sii, sa naquihin xuhun sa cuenda ñiyiví ndahvi. Zavaha ndi cuhva ya vatyi zacahnu si sii ra ndyaca ñaha sii yo ta zañaha si vatyi cuñi ndisa cuii ndi sii ñiyiví.

²⁰ Tyehen zavaha ndi tyiño ya coto tyaa ñiyiví cuatyri sata ndi sa cuenda cuhva zacasi tahan ndi sa cuaha xaan xuhun ya.

²¹ Cuñi ndi zavaha ndi sii si minoo cuhva ndoo xaan ityi nuu ra Ndyoo ta cuhva cuñi ñiyivi.

²² Ta sihin ra Tito tasi tucu ndi minoo ca ra hermano yo vatyi ndyehe ndi vatyi cuñi xaan ra zatyño ra tyiño ra Ndyoo. Sa nacatyi sihin ra cuhva cuñi xaan ndo tyindyee ndo sihin xuhun, ta vityi cuñi xaan ra cuhun ra nu yucu ndo.

²³ Sa sito ndo vatyi ra Tito cuu ra tehin ta ra tyindyee sii, sihin tyiño ra Ndyoo nu yucu ndo. Tacuan nacatyi ndo tatu yoo ra ndaca tuhun sii ndo. A tatu ndaca tuhun ñiyivi sa cuenda inga ra hermano sa vasi sihin ra, catyi ndo vatyi ra hermano ityi ya tasi sii ra, ta sino xaan iñi nduu tahan ra sii ra Cristo.

²⁴ Yucuan cuenda ityi nuu tandihí hermano tyindyee ndo sii ra ya, ta zañaha ndo vatyi cuñi xaan ndo sii ra sa cuenda mi. Tacuan ta cua coto ra ñaa cuenda cahán xaan ndi tuhun ndo ta catyi ndi vatyi vaha xaan ñiyivi cuu ndo.

9

Cuhva cua tyindyee ra hermano sii ñiyivi ndahvi sihin xuhun

¹ Sa cuenda tuhun sa cuhva ndo xuhun sii ra hermano ndahvi, ña cuñi si sa tyei ihya

² vatyi sa site ñaa sa iyo añima ndo. Yucuan cuenda ziíxaan cuñi, ta nacatyi xein sa cuenda ndo sihin ra hermano ihya nu cu si Macedonia. Nacatyi vatyi ndoho nu cu si Acaya sa ndyaa listo ndo ndya cuyava sihin xuhun sa cua cuhva ndo. Ta cuhva iyo maa ndo zañaha si minoo cuhva vaha, ta yucuan cuenda iyo cuaha xaan ca inga ra cuñi tyindyee.

³ Zoco nu ndihí tuhun, tasi sii ra hermano nu yucu ndo vatyi cua zanumi ndo ta zatitahan ndo xuhun cuan tañi sa catyi cua zavaha ndo vatyi coto catyi ra hermano ñuu Macedonia vatyi ña

ndisa cuu tuhun quehin sa cuenda ndo.

⁴ Tatu ndyehe ra hermano Macedonia vatyi ña ndyaa listo ndo quivi cuhun ra sihin mi nu yucu ndo, cua cucahan nui tatu ña sa ndyaa listo xuhun ndo vatyi sa cahan xein sa vaha sa cuenda ndo. Ta cua cucahan tucu nuu maa ndo.

⁵ Yucuan cuenda sica iñi vatyi vaha ca tatu cuhun xihna ra hermano ya nu yucu ndo, ta tyindyee ra sii ndo sa zatitahan ndo xuhun cuan, yozo cuñi maa ndo cuhva ndo. Ta ziqui cua cundyaa listo si tañi minoo sa cundaa iñi ndo ta cuhva ndo ta yivi tañi minoo sa zañiñi ndi sii ndo ta cuhva ndo.

⁶ Zoco nacohon iñi ndo minoo tuhun ya; ra sa zuhva ñi tasi, zuhva ñi cua naquihin ra. Ta ra tasi cuaha, cuaha ca cua naquihin ra.

⁷ Cuhva minoo minoo ndo yozo sa cundaa iñi ndo, yivi sa zañiñi minoo ñiyivi sii ndo ta yivi sihin sa cuihyá iñi. Vatyi cuñi xaan ra Ndyoo sii ñiyivi, ñu saha maa xuhun ta cuzii iñi ñu.

⁸ Ta cuu cuhva ra Ndyoo cuaha ca sii ndo. Cua cuhva ra tandihí nuu sa vaha sii ndo. Ta tacuan ta cua coo tandihí sa siñi ñuhu sii ndo, ta cua cuu tyindyee ndo cuaha xaan cuhva sii inga ñiyivi.

⁹ Tyehen catyi Tuhun ra Ndyoo: Minoo ra vaha, saha maa ra sa sii ra sii ñiyivi ndahvi.
Ma naa iñi ra Ndyoo cuhva vaha zavaha ra.

¹⁰ Maa ra Ndyoo cuu ra saha siti sa cua tasi yo. Ta cua cuhva tucu maa ra sa cua casi yo. Cua zanducuaha ca ra siti sa tasi maa ndo, ta cua cuhva ca ra cuhva sii ndo sa zavaha ndo sa vaha sihin sa saha maa ra.

¹¹ Cua coo tandihí nuu sa vaha sii ndo, sa cua cuu cuhva maa ndo ta tyindyee ndo sii inga ñiyivi. Ta quivi cua cundyaca ndi xuhun ndo nu yucu ra hermano ndahvi, cua nacuhva xaan ra tyahvi ndyoo sii ra Ndyoo.

¹² Iyo uu nuu sa vaha sa cua coo sa cuenda xuhun sa cua cuhva maa ndo. Sa xihna ñi tyindyee si sii ñiyivi sa siñi ñuhu. Ta sa cu uu cuu sa cua nacuhva xaan ñu tyahvi ndyoo sii ra Ndyoo.

¹³ Cua zacahnu xaan ñu sii ra Ndyoo vatyi tyindyee ndo sii ñu ndyehe ñu vatyi sa ndisa tyaa ndo yahvi tuhun ra Cristo. Ta cua zacahnu ñu sii ra vatyi tyindyee xaan ndo sii ñu ta sii tandihi ñiyivi.

¹⁴ Ta cua caca ñu tumañi iñi sii ra Ndyoo sa cuenda maa ndo, ta cua cuñi xaan ñu sii ndo sa cuenda cuhva vaha xaan sityiño ra Ndyoo sii ndo.

¹⁵ Tyahvi ndyoo sii ra Ndyoo sa cuenda sa saha maa ra. Saha ra sii zehe ra. Vaha xaan sa saha maa ra ndya cuhva ña ñihi ca ndi tuhun cahan ndi sa cuenda si.

10

*Iyo cuhva sii ra Pablo sa cahan
ra sihin ra hermano vatyi minoo ra
cuu apóstol cuu ra*

¹⁻² Yuhvi ra Pablo sique minoo tumañi iñi sii ndo sihin sa vii, tañi sa vii sa iyo sii ra Cristo. Vatyi iyo ndo catyi ndo vatyi tatu zacote ñiaa tysiño sii ndo sihin carta, xaan xaan quehin, catyi ndo. Ta tatu ndyei sihin ndo vii xaan quehin, catyi ndo. Zoco sique tumañi iñi sii ndo vityi vatyi ña cuñi cuxein sihin ndo tatu cuhin nu yucu ndo. Zoco site vatyi cua cuxein sihin zuhva ndo quivi cuhin nu yucu ndo vatyi iyo ndo catyi ndo vatyi zavehi cuhva zavaha ñiyivi ña sito sii ra Ndyoo.

³ Ndisa vatyi ñiyivi cuu ndi, zoco ña sahñi tahan ndi tañi sahñi tahan ñiyivi ñuu ñiyivi. Sahñi tahan ndi sihin sa ña vaha sihin tundyee iñi sa saha ra Ndyoo.

⁴ Ta ndaha tysiño sa sityiño ndi nu sahñi tahan ndi, ndaha tysiño sa saha maa ra Ndyoo cuu si. Ta iyo xaan tundyee iñi sii si, ta cuu zativi si tysiño cuihna.

⁵ Cuu zahacanaa ndi ziqui tandihi sa ña vaha sa cahan ñiyivi sii ra Ndyoo ta ziqui tandihi inga sa ña vaha sa ña saha tyaa ñiyivi yahvi sii Tuhun Ndyoo. Ta tandihi cuhva sica iñi ñiyivi ñuu ñiyivi ya, saha cuenda ndi sii ra Cristo sa cundyaca ñaha ra sii si, ta tandihi si cua tyaa si yahvi sii ra.

⁶ Cua ndyehe ndi tatu sa tyaa vaha tandihi ndo yahvi sii ra Cristo, ta ziqui cua tasi tuñi ndi sii yoo ra ña tyaa yahvi.

⁷ Zoco maa ndo zaha xaan ndo cuenda cuhva caa ñiyivi tatu vaha ñu a ña vaha ñu, ta ña sito ndo ñiaa sa iyo añima ñu. Tatu iyo ndo sito ndo vatyi cuenda ra Cristo cuu ndo, cua coto tucu ndo vatyi cuenda ra Cristo cuu tucu maa ndi.

⁸ Ta ña cahan nui vazu cuaha quehin sa cuenda cuhva saha ra Ndyoo sii, vatyi ndisa i saha ra tysiño sii, sa tyindyei sii ndo ta yivi sa zativi sii ndo.

⁹ Ña cuñi sa caca iñi ndo vatyi cuñi zayuhi sii ndo sihin carta ñi.

¹⁰ Vatyi catyi ndo: Xaan xaan cahan carta ra. Ñihi xaan cahan si. Zoco mazu xaan ra tatu sa ndyaa ra, ta ña cuu vaha cahan ra, ndihi ca. Catyi ndo.

¹¹ Zoco tatu tacuan catyi ndo, cuñi si sa coto ndo vatyi tañi cuhva tyei nuu carta ta zuun ñi cuhva cuan cua quehin quivi cua sei nu yucu ndo.

¹² Ña zaha maa ndi tuhun sa vaha xaan ndi tañi iyo inga ra nacatyi sihin ndo vatyi vaha xaan ra. Ndyehe ra cuhva iyo ra tahan ra, ta ndyehe ra sii maa ra, ta sica iñi ra vatyi vaha xaan ra. Zoco ñahñi sa siñi tuñi vaha iyo sii ra cuhva cuan.

¹³ Zoco ma zacahnu maa ndi sii ndi minoo cuhva ña tahan si. Maa ra Ndyoo cuu ra i catyi ndyamaa cua zatyiño ndi, ta i saa ndi nu ndyaa maa ndo.

¹⁴ Tatu yivi maa ndi zacoto Tuhun Ndyoo sii ndo sa xihna ñi,

ma tahan si sii ndi vityi sa zaha ndi cuenda sii ndo. Zoco tahan si sii ndi vatyi xihna ca maa ndi i saa nu ndyaa ndo sihin tuhun ra Cristo.

¹⁵ Ña catyi ndi vatyi tyiño inga ra cuu tyiño maa ndi. Zoco cuñi ndi vatyi nduvaha ca cuhva sino iñi ndo, ta ziqui cua nducahnu ca tyiño maa ndi nu tahan si zatyiño ndi.

¹⁶ Ta ziqui cua zacoto ca ndi tuhun ra Cristo ñuu sica ca ityi nuu ca nu yucu ndo, nu ta coto ca ñu Tuhun Ndyoo. Ña cuñi ndi zatyiño ndi nu sa quisaha inga ra sa xihna ñi. Ña cuñi ndi zacahnu ndi sii ndi ta catyi ndi vatyi tyiño inga ra cuu tyiño maa ndi.

¹⁷ Tatu iyo ra cuñi ra zacahnu ra sii ra, vaha ca nacatyi ra cuhva i zavaha ra Ndyoo ta zacahnu ra sii ra Ndyoo.

¹⁸ Vatyi ña quita vaha minoo ra catyi vatyi vaha xaan ra. Quita vaha ra sa ndisa tatu catyi ra Ndyoo vatyi vaha ra.

11

Zacuenda ndo sii ndo sihin ra zandavi ñaha

¹ Zandyee ndo iñi ndo zuhva ca vatyi cua quehin zuhva ca sa tondo. Zandyee ndo iñi ndo nanacatyi ñaa sa iyo añime.

² Vatyi ñoho xaan iñi sii maa ndo sihin minoo cuhva i saha ra Ndyoo sii, vatyi mi i tyihi sii ndo ityi ra Cristo, ta cuñi vatyi iin ñi sii maa ra cuan cua cuñi xaan ndo tañi cuñi xaan minoo ñaha yoco sii ra cuu tandaha sihin ña.

³ Zoco sica xaan iñi sa cuenda ndo coto tahan si sii ndo tañi i tahan si sii cu Eva vatyi i zandavi ñaha cuihna sii ña. Ta yucuan cuenda sica xaan iñi sa cuenda ndo coto caca iñi ndo inga cuhva sa cuenda ra Cristo ta coto zandoo ndo cuhva sa zacahnu ndo iin ñi sii maa ra.

⁴ Vatyi maa ndo tuhva ndo tyizoho sa cahan inga ra, tuhun inga

Jesús, ra ña tuhva ndi cahan tuhun. Ta ra yucuan cahan sa cuenda inga tatyi, sa yivi Tatyi Ii sa ñihi maa ndo. A tatu catyi ra cuan, inga cuhva cua cacu ndo, vaha xaan tyizoho ndo sa cahan ra.

⁵ Ta ña sica iñi vatyi vaha ca numinoo ca ra zatyiño tyiño ra Ndyoo ta ziqui mi vazu sica iñi ra cuan vatyi vaha xaan ca ra.

⁶ Vazu ña cuu vaha quehin, zoco sito xein Tuhun Ndyoo. Ta sa cuaha xaan saha zañaha ndi sii ndo cuhva sa cuu zavaha ndi.

⁷ ¿Atu sica iñi ndo vatyi i zavehi sa ña vaha vatyi ñá quihin xuhun ndo quiví i zacote tuhun ra Cristo sii ndo? I zanduluuhli sii, vatyi cuñi sa cuu sino iñi ndo.

⁸ I tyindyeer ra hermano inga ñuu sii, sihin xuhun. I quihin xuhun ra sita sasi nii ñi sa tyindyei sii maa ndo sihin Tuhun Ndyoo.

⁹ Ta quiví sa siñi ñuhu xuhun sii, zoco ñá sique xuhun sii maa ndo vatyi i quisi ra hermano ndya Macedonia ta saha maa ra sa siñi ñuhu sii. Ta nu ñá yozo ziqui numinoo ndo sii. Ta nu ma cozo ziqui ndo sii ityi nuu ca.

¹⁰ Vatyi tañi sa site vatyi maa ñi tuhun ndisa ra Cristo quehin, ta tacuan tucu site vatyi ma cuhve sa quindya ndoho, ra nu cu si Acaya, sa zii cuñi vatyi ñá sique xuhun sii ndo ta ma caque xuhun sii ndo ityi nuu ca.

¹¹ ¿Ta ñaa cuenda zavehi cuhva ya? ¿Atu zavehi sii si vatyi ña cuñi sii ndo? Sito vaha ra Ndyoo vatyi cuñi xein sii ndo.

¹² Ta cua zavaha que cuhva ya vatyi cuñi zañehi vatyi ña ndisa inga ra sa catyi vatyi inuu ñi zatyiño ra tañi mi. Zoco ña ndisa ra cuan vatyi sica ra xuhun.

¹³ Catyi ra cuan vatyi apóstol cuu ra, zoco ña ndisa. Zandavi ñaha ra.

¹⁴ Ta ña iyo cuñi sihin cuhva cuan vatyi ndya cuihna ta cuu zanduu ra sii ra tañi cuhva caa minoo ángel

sa ndisi xaan sihin sa ndisi maa ra Ndyoo.

¹⁵ Ta ñiyiví cuu tucu zandavi ñaha ñu tatu cuñi ñu. Yucuan cuenda ra ndyico sii ra ña vaha, zaha ra tuhun vatyi ra zavaha sa vaha cuu ra. Zoco cua coo quivi cua tasi tuñi ra Ndyoo sii ra sihin cuhva tahan si sii ra.

Cuhva i ndyehe ra Pablo tundoho vatyi minoo apóstol cuu ra

¹⁶ Catyi inga saha vatyi ma caca iñi ndo vatyi minoo ra loco cui vatyi quehin cuhva ya. Zoco tatu tacuan sica iñi ndo, naquehin sihin ndo tañi sa ra loco cui. Ta cua zacahni sii zuhva.

¹⁷ Yíví ra ndyaca ñaha sii yo cuu ra catyi sihin vatyi quehin cuhva ya, zoco quehin tañi minoo ra loco vatyi zacahni sii.

¹⁸ Iyo cuaha xaan ra zacahnu sii ra vatyi vaha xaan ra cuñi maa ra ityi nuu ñiyiví ñi. Ta yucuan cuenda cua zacahnu tucu mi sii.

¹⁹ Vatyi zih xaan cuñi ndo tyizoho ndo sa cahan inga ra loco cuan, ta sito xaan maa ndo cuñi ndo.

²⁰ Cundyee iñi ndo tatu catyi inga ra cuan sihin ndo vatyi cua zatyinó ndo tyiñó ra. Zuhu ra sa sii ndo, ta ña tuu iñi ndo. Cuñi ra cundyaca ñaha ra sii ndo. Ña cuu ndyehe ra sii ndo, ndya cuhva catira nuu ndo, ta cundyee iñi ndo sihin tandihí sa zavaha ra sihin ndo.

²¹ ¿Atu sicoo cuatyí mi vatyi ñá caña iñi zavehi cuhva cuan sihin ndo, cuñi ndo? Ña yuhu maa ra cuan zacahnu ra sii ra, ta vityi ña yuhu tucu mi. Ta cua quehin tañi minoo ra loco.

²² Catyi ra cuan vatyi ra hebreo cuu ra. Ra hebreo cuu tucu yuhvi. Ta ra ñuu Israel cuu ra cuan. Ta zuun tucu ra cuu ii. Ñiyiví sii ra Abraham cuu ra, ta zuun tucu cuu ii.

²³ Catyi ra cuan vatyi muzu ra Cristo cuu ra. Ta vityi cua quehin tañi minoo ra loco vatyi cuñi catyi sihin ndo vatyi ñihi ca cui muzu ra

Cristo vatyi cuaha xaan ca zatyiné tyiñó ra Cristo ta ziqui inga ra cuan. Cuaha ca saha i tyihi ñiyiví sii, vehe caa. Cuaha xaan saha i cañi ñu sii. Ta cuaha xaan saha i cuñi cahñi ñu sii.

²⁴ Ohon tahan saha i cañi ñiyiví hebreo sii sihin cuarta. Oco sahun cumi saha tahan tahan saha.

²⁵ Uñi saha i cañi ñiyiví sii sihin yutu, ta minoo saha i cañi ñu sii sihin yuu. Uñi tahan saha i ndyee barco sa ñohi, ta minoo ñiyaca ta minoo ndiyacya i ndoi sisi tyañuhu.

²⁶ Cuaha xaan, cuaha xaan sica noi. Iyo saha sa yatyi tyañi yuu. Zayuhu ra zuhu sii. Quiñi xaan zavaha ra hebreo ra tehin sihin. Quiñi xaan zavaha ñiyiví inga tata sihin. Cuaha xaan sa ica i cuu sii, ñuu nahnu, sisi cuhu, nu tyañuhu ta nu iyo ñiyiví catyi vatyi sino iñi ñu, zoco ña ndisa ñu.

²⁷ Ñihi xaan zatyiné ta ndyehi tundoho ta cundihixaan iñi. Cuaha saha ñá quixi. I sizoque, ta ityi nduty. Cuaha saha ñá ñihi sa casi. Visi xaan i cui, ta ña cuaha zahme.

²⁸ I ndyehi tandihí cuhva cuan ta inga tucu cuhva vatyi tandihí quivi sica xaan iñi tatu iyo vaha tandihí ñiyiví sino iñi.

²⁹ Tatu iyo minoo ndo nduvita cuhva sino iñi ndo, cuñi xein tyindyei sii ra tañi sa iñi ñi cui sihin ra. Tatu iyo minoo ra zandoyo ñuhu sii hermano ta ña sino vaha ca iñi ra, cuxein.

³⁰ Tatu cuñi si vatyi zacahni sii sa zuun ñi mi (ta tacuan ta cua coto ndo vatyi muzu maa ra Ndyoo cui sa ndisa cui; cua zavehi sii si) zoco cua nacatyí maa ñi cuhva zañaha si vatyi ñahñi tundyee iñi iyo sii mi sa maa tuhun ñi.

³¹ Maa ra Ndyoo, Zutu ra Jesucristo ra ndyaca ñaha sii yo, cuu ra cuñi si zacahnu yo tandihí cuii tyiemvu. Ta sito maa ra vatyi quehin sa ndisa ta ña vatye.

³² Quivi sa sehin ñuu Damasco, ra cu gobierno cuenda ra rey Aretas i sicumi ra yuvehe cahnu ñuu cuan

sihin zandaru vatyi cuñi ra tiñ ra sii.

³³ Zoco i zanoo ñiyiví sii sisi minoo tyica cahnu nu ndyaa minoo ventana nuzama cuan, ta cuhva cuan i quite ta i sino xehi sii ra cuan.

12

Sa zañaha ra Ndyoo sii ra Pablo

¹ Site vatyi ñahñi cua ñihí sihin cuhva sa zacahni sii, zoco cua nacatyi cuhva i zañaha ra ndyaca ñaha sii yo sii.

² Site minoo ra sino iñi sii ra Cristo. (Ihya cahan ra Pablo zuun ñi sa cuenda maa ra.) Sa yaha usi cumi cuiya vityi ndya quiví i sindyaca ra Ndyoo sii ra ndya sa cu uñi yutyi andiví. Ña site tatu sahan coño ñuhu ra a ña sahan. Yuhvi ña site. Maa ñi ra Ndyoo sito.

³⁻⁴ Zoco site vatyi sahan ra cuan nu ñoho ñiyiví vaha, ñu sa sihi. Ña site tatu sahan coño ñuhu ra sa quehin tuhun ya a ña sahan si. Maa ñi ra Ndyoo sito. Ta i sahan ra cuan nu i siñi ra tuhun xehe. Xehe xaan tuhun cuan, ta yoñi rayíi cuu nacatyi sii si.

⁵ Tahan si sii, sa zacahni sii, sa cuenda cuhva i zañaha ra Ndyoo sii minoo ra cuan (vatyi zuun ñi ra cuan cui), zoco ma catyi vatyi ra vaha xaan cui sa cuenda cuhva cuan. Cua catyi vatyi ra vaha cui maa ñi sa cuenda sa ñahñi tundyee iñi iyo sii sa maa ñi mi.

⁶ Zoco tatu cuñi zacahni sii, yiví ra loco cui vatyi maa ñi sa ndisa cuu sa quehin. Zoco ma catyi vatyi ra vaha cui coto yaha xaan zacahnu ñiyiví sii, minoo cuhva ña tahan si. Cuñi sa ndyehe ndo cuhva iye ta cuhva zacuehi ta ziqui cua coto ndo tatu vehi a ña vehi.

⁷ Ta coto caca iñi vatyi vaha xein sa cuenda sa cuaha xaan cuhva i zañaha ra Ndyoo sii, i saha tucu ra sa cañi cuihna sii coño ñuhu. Cahnu xaan tundoho i tasi cuihna sii, coto caca iñi vatyi vaha xein.

⁸ Uñi tahan saha i sique sii ra ndyaca ñaha sii yo natyaa siyo ra tundoho ya sii.

⁹ Ta tyehen i catyi maa ra Ndyoo sihin: "Cuaha xaan sa vaha sehi suun, ta ñahñi ca sa siñi ñuhu suun. Ta ma nduyohon. Ta tatu ñahñi tundyee iñi iyo suun, zoco ndyehe ca ñiyiví tundyee iñi mi sa iyo suhun", catyi ra. Ta yucuan cuenda zii xaan cuñi vatyi ñahñi tundyee iñi iyo sii. Ta tacuan ta cua coo xaan tundyee iñi ra Cristo sihin.

¹⁰ Yucuan cuenda zii xaan cuñi tatu vita xein, tatu cuxaan ñiyiví sihin, tatu iyo sa siñi ñuhu sii, tatu cuñi cahñi ñiyiví sii, ta tatu ndyehe xein tundoho sa cuenda ra Cristo vatyi tatu ñahñi tundyee iñi iyo sii sa maa ñi mi, ñihí que tundyee iñi ra Ndyoo.

Sica xaan iñi ra Pablo sa cuenda ñiyiví sino iñi sii ra Ndyoo ñuu Corinto

¹¹ Tañi minoo ra loco cui tatu zacahni sii, zoco maa ndo zañiñi sii, sa zavehi sii si vatyi ña tyaa ndo yahvi sii. Maa ndo tahan si sa cahan vaha sa cuenda mi, zoco ña cuñi ndo. Ndyico ndo sii ra catyi vatyi vaha xaan zatyño ra tyiño ra Jesús, ta ñahñi cuhva sa luhlu que ta ziqui maa ra vazu ñahñi ra cui.

¹² I ndyehe ndo cuhva i zatyine tyiño ra Ndyoo nu yulu ndo. I zandyee xein iñi cuhva ndyehe tundoho, ta i zavaha xein zeña ta sa ndyityi ta tyiño sihin tundyee iñi ra Ndyoo.

¹³ ¿Atu vaha ca ñiyiví i cui sihin ra hermano inga ñuu ta ziqui sihin maa ndo? Ña tacuan. Inuu ñi cui sihin tandihí ndo. Minoo ñi cuhva sa ña zavehi sihin maa ndo cuu sa ña yozo ziqui ndo sii. Zaha ndo tucanhnu iñi sii, tatu zavehi sa ña vaha cuhva cuan.

¹⁴ Ta vityi sa ndyaa listi sa cu uñi saha sa cua quasi ndyehe sii ndo. Ta ma cozo ziqui ndo sii, vatyi ña cuñi ndaha tyiño ndo. Cuñi sii maa ndo. Minoo ra cu zutu sa ndyihi,

tyindyee ra sii zehe ra ta yivi zehe
ra tyindyee sii ra.

15 Ta yuhvi zii xaan cua cuñi
cuhve sa sii, sa cuenda maa ndo.
Ta cuhva ndya mi, ta cua zandihi
tundyee iñi sii, sa cuenda maa ndo.
Zoco zehi cuenda vatyi tatu cuaha
ca cuñi sii ndo, siin xaan cuñi ndo
sii.

16 Ta vazu sito vaha ndo vatyi
ñá yozo ziqui ndo sii, zoco iyo ndo
catyi ndo vatyi i zandavi ñehi sii
ndo minoo cuhva ñá tuu iñi ndo ta
i quihin sa sii ndo. Catyi ndo.

17 ¿Atu i zandavi ñehi sii ndo sihin
minoo ra i tasi nu yucu ndo quiví
cuan?

18 Quiví i tasi sii ra Tito sihin inga
ra hermano cuan, ¿atu i zandavi
ñaha ra Tito cuan sii ndo ta quihin
ra sa sii ndo? Ña tuhva ndi zandavi
ñaha sii ndo. Ñin ñi cuhva zavaha
nduu tahan ndi.

19 ¿Atu sica iñi ndo vatyi nduqui
cuhva zacaqui sii, ityi nuu ndo sihin
tuhun ya? Zoco ña tacuan.
Sito ra Ndyoo cuhva cahan ndi. Ta
cahan ndi sa cuenda ra Cristo. Ta
tandihi sa zavaha ndi, zavaha ndi
sii si vatyi cuñi ndi tyindyee ndi sii
ndo. Cuñi xaan ndi sii ndo, ta cuñi
ndi sa cua coto vaha ca ndo sii ra
Ndyoo.

20 Yuhi coto cua sei yucuan ta
nañihi sii ndo minoo cuhva sa ma
tahan iñi. Ta ziqui ma tahan iñi
maa ndo cuhva cua zavehi tatu
nañihi sii ndo sahñi tahan ndo, tatu
ndiyio iñi ndo sa sii tahan ndo,
a tatu tuhva ndo cuxaan, a tatu
ñá sica maa iñi ndo sa cuenda ra
tahan ndo, a tatu cahan ndo ndya
vaha fi sii ra tahan ndo, a tatu tyaa
xaan ndo cuatyi sata ra tahan ndo,
a tatu zacahnu ndo sii ndo a tatu
iyo tizihi nu yucu ndo. Tatu zavaha
ndo cuhva cuan, ma tahan iñi ndo
cuhva cua zavehi sihin ndo.

21 Ta yuhi coto cuhva ra Ndyoo
sa coo sa cahan nuu sii, sa cuenda
ndo quiví sei nu yucu ndo. Ta cua
nducuihya xaan iñi vatyi ndoho sa
zavaha cuatyi, tañaha ca ndu-uu iñi

ndo cuatyi ndo. Zavaha ca ndo
sa quiñi. Quixi ndo sihin ñaha sa
yivi ñazahi ndo cuu, ta zavaha ndo
tandihi inga nuu sa ña vaha.

13

*Zaha ndo cuenda tatu ndyico
vaha ndo sii ra Cristo a ña ndyico
ndo*

1 Sa cuñi cuu si sa cu uñi saha
quisi ndyehi sii ndo. Tatu iyo
uu a uñi tahan sa ndaa, cua cunda
tyiño sa cuenda minoo minoo
ndoho ra zavaha sa ña vaha.

2 Quiví i sindyei sihin ndo sa cu
uu saha cuan, i catyi sihin ndoho ra
zavaha cuatyi vatyi nazandoo ndo
cuatyi ndo. Ta vityi nacatyi tuqui
zuun ñi cuhva cuan sihin ndoho
ra ñá zaña cuatyi ndya quiví cuan.
Ta sihin tandihi inga ndo nacatyi
tuqui inga saha vatyi ma cundahvi
iñi sii ndo quiví cua sei nu yucu
ndo.

3 Ta ziqui cua coto ndo cuhva
sa cuñi xaan ndo coto ndo: tatu
quehin tuhun ra Cristo a yivi. Ta
ñá vita iyo ra Cristo sihin maa ndo,
zoco iyo xaan tundyee iñi maa ra
sisi añima ndo.

4 Ndisa, i cuu si tañi vita xaan ra
quiví i sihi ra nu cruz, zoco vityi
ndito ra sihin tundyee iñi maa ra
Ndyoo. Ta tacuan tucu maa ndi,
vita iyo ndi sihin ra sa catyi coño
ñuhu ndi; zoco iyo tundyee iñi ra
Ndyoo sii ndi sa cuenda cuhva cua
zavaha ndi sihin maa ndo vatyi iñi
ñi cuu ndi sihin ra.

5 Ndyehi vaha ndo sii ndo tatu
sino iñi ndo sa ndisa cuii. Nacoto
ndo vatyi iyo ra Cristo añima ndo
tatu sino ndisa cuii iñi ndo sii ra.
Zoco tatu ña sino iñi ndo sa ndisa,
yoñi ra ndyaa sihin ndo.

6 Ta cuñi sa cua nacoto ndo sa
ndisa cuii vatyi iyo ra Cristo sihin
mi.

7 Ta vityi sique sii ra Ndyoo vatyi
ma zavaha ndo cuatyi. Ña cuñi sa
cua cahan vaha ñiyiví sa cuenda
maa ndi cuhva cuan. Cuñi sa cua
zavaha ndo sa ndoo vazu cahan

vaha ñiyiví sa cuenda ndi a vazu
cahan ñu ndya vaha ñi sii ndi.

⁸ Vatyi ma cuu tyixehe maa ndi
sii sa ndisa, sino ca cuñi si sa zañaha
ndi sii ñiyiví ñaa sa cuu sa ndisa.

⁹ Yucuan cuenda zii xaan cuñi
ndi tatu ñahñi tundyee iñi sa zuun
ñi sii maa ndi iyo sii ndi ta tatu
ndyee iñi maa ndo sihin tundyee
iñi maa ra Ndyoo. Ta ihya cuu
minoo cuhva sa ñihí xaan cuñi ndi
vatyi nanduu ndo ñiyiví vaha xaan
sa ndisa cuii.

¹⁰ Tasi carta ya sii ndo cuee ca
sa cuhin nu yulu ndo vatyi cua
zanduvaha ndo sii ndo. Ta ña cuñi
ca si sa cuxein sihin ndo quiví cua
sei yucuan. Cuñi cutyiñe tundyee
iñi sa saha ra Ndyoo sii, ta zan-
dunderve que iñi ndo, ta yiví sa
zativí ndihí sii ndo.

¹¹ Ta vityi sa cuñi ndihí carte
hermanos. Ihya ñi ca tuhun que-
hin: cuzii iñi ndo, zanduvaha ndo
cuhva iyo ndo, tyaa ndo yahvi sa
quehin, iin ñi cuhva caca iñi ndo,
ta nacoo sa taxi sii ndo sihin minoo
ndo ta sihin inga ndo. Ta cua coo
ra Ndyoo sihin ndo. Maa ra saha
sa coo sa taxi sii yo sihin ra ta cuñi
xaan ra sii yo.

¹² Cuhva ndo minoo ndyoo nacu-
cumí sii minoo ndo ta sii inga ndo.

¹³ Tandihí cuii ñiyiví sino iñi ihya
tasi ñu minoo nacumi sii maa ndo.

¹⁴ Nacoo xaan tumañi iñi sa saha
ra Jesucristo sihin ndo, ta nan-
doo vaha xaan ndo sihin cuhva
cuñi xaan ra Ndyoo sii ndo. Ta
nandu-iin tandihí ndo sihin Tatyi
li. Nacuu si tacuan, ta nacuu si sa
ndisa.

Minoo Carta I Tasi Ra San Pablo Sii Ñiyiví Sino Iñi Sii Ra Ndyoo Nuu Galacia

*Tyaa ra Pablo minoo carta sii
ñiyiví sino iñi sii ra Ndyoo ñuu Galacia*

¹ Yuhvi ra Pablo, minoo ra apóstol ra i casi ra Jesucristo cui. Yiví ñiyiví i saha tysiño ya sii, ta yiví ñiyiví i tasi sii, sino ca ra Jesucristo ta ra Ndyoo Zutu yo, ra i zanandoto sii ra Jesús sisi sa i sihi ra.

² Yuhvi ta tandihí ra hermano ndyaa ihyá sihin, tyaa ndi carta ya sii ñiyiví sino iñi ñuu Galacia.

³ Nacuhva xaan ra Ndyoo Zutu yo tumañi iñi sii ndo ta sa coo sa taxi añima ndo, ta tacuan tucu nacuhva ra Jesucristo, ra ndyaca ñaha sii yo.

⁴ I saha maa ra Jesús sa cuu ra sa cuenda cuatyí maa yo vatyi tacuan ta cua zacacu ra sii yo sii sa quiñi iyo ñuu ñiyiví ya vatyi yucuan cuu sa cuñi ra Ndyoo Zutu yo.

⁵ Yucuan cuenda ñnazakahnu yo sii ra Ndyoo tandihí cuii tyiemvu! Amén.

Ñahñi inga ca cuhva cuu cacu añimayo

⁶ Iyo xaan cuñi vatyi yatyí xaan cuñi zanandoo ndo sii ra Ndyoo. I cana ra sii ndo sihin cuhva cuñi xaan ra Cristo sii ndo, zoco vityí tyaa ndo yahvi sii inga tuhun ta ndyico ndo inga cuhva cua cacu ndo cuñi ndo.

⁷ Zoco ñahñi inga ca cuhva cua cacu yo sa ndisa. Iyo zuhva ra cuñi nazaca ra sa siñi tuñi sii ndo, ta cuñi ra zatíví ra Tuhun Vaha sa cuenda ra Cristo.

⁸ Zoco yazu maa ndi a minoo ángel quisi ndya andíví ta zacuaha ndi inga Tuhun Vaha sii ndo sa cuenda ra Cristo ta ziquí tuhun sa

yaha zacoto ndi sii ndo, tatu yoo ra zacuaha inga cuhva cuan, nacuxaan xaan maa ra Ndyoo sihin ra.

⁹ Ta tañi sa catyi, cua catyi tuqui inga saha. Tatu yoo ra zacuaha inga Tuhun Vaha sii ndo ta ziquí tuhun sa yaha tiín cuenda ndo, nacuxaan xaan maa ra Ndyoo sihin ra cuan.

¹⁰ Ta sihin cuhva ya, cuu ndyehe ndo vatyi ña nduqui cuhva caca iñi ñiyiví vatyi vaha xein. Nduqui cuhva cui minoo ñiyiví vaha ityi nuu ra Ndyoo vatyi tatu nducu que cuhva cuzí iñi ñiyiví sihin, yiví muzu vaha ra Cristo cui.

Cuhva i nduu ra Pablo minoo apóstol

¹¹ Ta zacote sii ndo hermanos vatyi tuhun vaha sa i zacote sii ndo, yiví tuhun sa quisi xiñi ñiyiví ñi cuu si.

¹² Yiví tuhun ñiyiví i tiín cuende, ta yiví ñiyiví i zacuaha sii. Maa ra Jesucristo i zacoto sii.

¹³ Sa sito ndo cuhva i cui quivi tañaha ca sino iñi ta sindyique cuhva sino iñi ñiyiví hebreo. Sito ndo cuhva i zayanga xein sii ñiyiví i casi ra Ndyoo ta cuhva i cuñi sa ndaha zacunei cuhva yucu ñu.

¹⁴ Quivi i sindyique ley hebreo ta minoo ra cu nuu i cui sii inga ra sa iñi ñi cuiya ndi vatyi i cuñi xein zavehi tandihí costumbre sa i zavaha ñiyiví sahnu sii ndi.

¹⁵ Zoco cumañi ca càquì, ta sa cundaa iñi ra Ndyoo vatyi cua casi ra sii. Ta sa saa si quivi i catyi ra ta ziquí i cana ra sii, vatyi cuñi xaan ra sii. Ta catyi ra vatyi cua zatyiñe tysiño ra.

¹⁶ Ta i zacoto ra sii, sa cuenda Zehe ra vatyi cua quehin tuhun ra nu ndyaa ñiyiví sa yiví ñiyiví hebreo cuu. Ta quivi i tehin cuhva cuan yoñi sii i nducu tuhin tatu vaha.

¹⁷ Ta ñá sehin ñuu Jerusalén nu ndyaa inga ra apóstol i casi ra Jesús cuee ca ta ziquí mi. Zoco i sehin

nu cu si Arabia, ta ziqui i sinanuhin ndya ñuu Damasco.

¹⁸ I yaha uñi cuiya ta ziqui i sehin ñuu Jerusalén vatyi cuñi quehin sihin ra Pedro. Ta i ndoi sahun quivi sihin ra.

¹⁹ Zoco yoñi inga ra apóstol i ndyehi, maa ñi ca ra Jacobo yañi ra Jesús.

²⁰ Sito vaha ra Ndyoo vatyi cuhva teyi ihya maa ñi sa ndisa cuu si.

²¹ Ta sa yaha sehin ñuu Jerusalén ta ziqui i sehin nu cu si Siria ta nu cu si Cilicia.

²² Ta ñiyivi sino iñi sii ra Cristo nu cu si Judea, ta coto ca ñu sii, quivi cuan.

²³ Zoco i siñi ñu sa cahan ñiyivi sa cuende ta catyi ñu: “Ra i zayanga xaan sii yo quivi cuan, vityi sino iñi ra ta nacatyi ra tuhun ra Cristo. Ta quivi cuan i cuñi ra zanaa ra sii si.” Catyi ñu.

²⁴ Ta i zacahnu xaan ñu sii ra Ndyoo sa cuenda mi.

2

Inga ra apóstol, ndoo ra vaha sihin cuhva zacuaha ra Pablo

¹ I yaha usi cumi cuiya, ta ziqui i sehin ñuu Jerusalén inga saha sihin ra Bernabé. Ta i sahan tucu ra Tito sihin ndi.

² I sehin vatyi maa ra Ndyoo i zañaha sii, vatyi cuñi si sa cuhin. Ta i nacatyi sihin ra yucuan, cuhva zacuehi tuhun sa cuenda ra Cristo sii ñiyivi sa yivi ñiyivi hebreo cuu. Maa ñi sihin ra cu nuu sii ra hermano yucuan i quehin vatyi cuñi cote yozo caa sica iñi ra coto ma tahan iñi ra cuhva zacuehi ta catyi ra vatyi sa caha ñi cuu tyiño zacui.

³ Ta i ndoo ra vaha sihin cuhva zacuehi. Ta ñá zañiñi ra sii ra Tito sa zavaha ra costumbre circuncisión cuan, ta yivi ñiyivi hebreo cuu ra Tito.

⁴ Ndisa vatyi i quihvi xehe zuhva ra catyi vatyi hermano cuu ra, zoco ña ndisa ra. I cuñi maa ra cahan cuehe ra sa cuenda cuhva iyo yo. Sa cuenda ra Cristo, ta ñahñi ca sa

ndyaca ñaha sii yo, zoco cuñi ra cuan vatyi tyaa yo yahvi sii tandihi costumbre sahnu.

⁵ Zoco ñá saha maa ndi sa cundyaca ñaha ra cuan sii ndi nu siin vatyi ña cuñi ndi sa zandoo maa ndo tuhun ndisa sa cuenda ra Cristo. (Vatyi yivi ñiyivi hebreo cuu ndo, ta ña cuñi ndi sa caca iñi ndo vatyi cuñi ca si sa tyaa yo yahvi sii ley sahnu ta cacu yo.)

⁶ Ta ra hermano, ra ndyaca ñaha sii ñiyivi sino iñi ñuu Jerusalén, ñahñi inga sa siñi tuñi vaha i saha ra sii, quivi cuan. Catyi ra ñiñi ca sii ra, zoco ña ñiñi ra sa cuenda mi vatyi ña ndyehe ra Ndyoo tatu sica iñi ñiyivi vatyi ra ñiñi cuu yo. Ndyehe maa ra ñaa sa iyo añima yo.

⁷ Ñahñi inga ca tuhun i saha ra cuan sii. I nacoto ra vatyi maa ra Ndyoo i tasi sii, sa quehin tuhun ra Cristo sihin ñiyivi sa yivi ñiyivi hebreo cuu tañi i tasi ra sii ra Pedro sa cahan ra sihin ñiyivi hebreo.

⁸ Vatyi zuun ñi ra Ndyoo cuu ra i tasi sii ra Pedro sa cuu ra minoo apóstol nu ndyaa ñiyivi hebreo tañi yuhvi cui sa cuenda ñiyivi sa yivi ñiyivi hebreo cuu.

⁹ Yucuan cuenda i nacoto ra Jacobo, ta ra Pedro, ta ra Juan, ra cu nuu cuu tandihi ra yucuan, ta i nacoto ra vatyi maa ra Ndyoo cuu ra i saha sa vaha sii, sa quehin tuhun ra Cristo sihin ñiyivi. Ta ziqui i natüñi ndaha tahan ra sihin mi ta sihin ra Bernabé vatyi ndoo ra vaha vatyi cua zatyiño ndi sihin ñiyivi sa yivi ñiyivi hebreo cuu, ta cua zatyiño maa ra sihin ñiyivi hebreo.

¹⁰ Minoo ñi cuhva i catyi ra sihin ndi sa nacohon iñi ndi ta tyindyeer ndi sii ñiyivi ndahvi, ta yucuan cuu sa tuhva xein zavaha.

Cuxaan ra Pablo zuhva sihin ra Pedro

¹¹ Ta quivi i saa ra Pedro ñuu Antioquía i catyi sihin ra vatyi ña vaha cuhva zavaha ra.

¹² Vatyi sa xihna ñi i zavaha ra sa vaha ta sasi ra sihin ñiyiví sa yivi ñiyiví hebreo cuu. Tacuan i zavaha ra ndya i saa zuhva ra hebreo, ra i tasi ra Jacobo, ta ziquí ñá cuñi ca ra Pedro casi sihin ñiyiví sa yivi ñiyiví hebreo cuu vatyi yuhu ra sii ra i saa cuan vatyi sica iñi ra cuan vatyi ñiñi xaan costumbre circuncisión.

¹³ Ta i cu-iñi inga ra hebreo sihin ra Pedro ta nduu tucu ra ra vatyta, ta ndya cuhva i ndu-iñi tucu ra Bernabé sihin ra.

¹⁴ Ta i ndyehi vatyi ña vaha cuhva zavaha ra. Ña sasi tahan si sihin cuhva catyi tuhun ra Cristo. Yucuan cuenda i catyi sihin ra Pedro ityi nuu tandíhi ra yucu yucuan: “Yoho, minoo ra hebreo cuun, zoco zavohon cuhva zavaha ñiyiví sa yivi ñiyiví hebreo cuu. Ta ña zavaha con tandíhi costumbre hebreo. ¿Ta ñaa cuenda cuñun zañiñun sii ñiyiví sa yivi ñiyiví hebreo cuu sa cua zavaha ñu costumbre maa yo ra hebreo?” I catyi.

Inuu ñi cuhva cua cacu ñiyiví hebreo ta ñiyiví sa yivi ñiyiví hebreo cuu, sihin sa sino ñi iñi yo

¹⁵ Maa yo sa cuu yo ñiyiví hebreo, ña yaha xaan zavaha yo cuatyti sa nuu inga ñiyiví sa yivi ñiyiví hebreo cuu.

¹⁶ Zoco sito yo vatyi ma catyi ra Ndyoo sihin numinoo ra vatyi ñahñi cuatyti ra sa cuenda sa tyaa ra yahvi sii ley i saha ra Ndyoo sii ra Moisés. Nduvaha yo ityi nuu ra Ndyoo sihin sa sino iñi yo sii ra Cristo Jesús. Yucuan cuenda sino iñi yo sii ra. Ta tacuan ta catyi ra Ndyoo vatyi ñahñi ca cuatyti yo ta yivi sa cuenda sa tyaa yo yahvi sii ley sahnu vatyi yoñi sihin cua catyi ra Ndyoo vatyi ñahñi ca cuatyti ra sa tyaa ra yahvi sii ley sahnu cuan, ta sii ra Cristo ña sino iñi ra.

¹⁷ Vityi sino iñi yo sii ra Cristo ta sica iñi yo vatyi sihin sa yucuan ñi ta cua catyi ra Ndyoo vatyi ñahñi ca cuatyti yo. Zoco tatu cuee ca ta cua nacoto yo vatyi ña ndisa cuu

tuhun ra Cristo ta ma cacu yo tatu ma zavaha yo tandíhi sa catyi ley sahnu. ¿Atu cuñi si sa catyi yo vatyi sa sino iñi yo sii ra Cristo cuu sa i zativi sii yo vatyi i zandoo yo ley sahnu sa cuenda sa sino iñi yo sii ra? ¡Numinoo saha ma catyi yo tacuan vatyi ña ndisa!

¹⁸ Zoco cua coo cuatyti yo tatu nanducu tucu yo cuhva sa natyaa tucu yo yahvi sii ley sahnu sa i zanandoo yo.

¹⁹ Inducu yo cuhva tyaa yo yahvi sii si quiví cuan. Ta ziquí i nacoto yo vatyi ma cuu cacu yo cuhva cuan, ta i zandoo yo sii si vatyi cuñi yo nduvaha yo ityi nuu ra Ndyoo sihin cuhva saha maa ra.

²⁰ Tañi sa sihi yo nu cruz sihin ra Cristo cuu si, zoco ndito yo. Zoco yiví ca maa yo ndito, ra Cristo cuu ra iyo añima yo. Ta cuhva iyo yo vityi ñuu ñiyiví ya, iyo yo tacuan vatyi sino iñi yo sii Zehe ra Ndyoo. Maa ra cuñi xaan sii yo, ta saha ra sa cuu ra sa cuenda yo.

²¹ Yuhvi ña cuñi tyaa siye cuhva cuñi xaan ra Ndyoo sii yo vatyi tatu cuu nduu yo ñiyiví vaha ityi nuu ra Ndyoo sihin sa tyaa yo yahvi sii ley sahnu, sa caha ñi cuu sa i sihi ra Cristo.

3

Sihin sa sino iñi yo sii ra Cristo ta ñihiyo Tatyi Ii

¹ Tondo xaan iyo ndo ndoho hermanos ñuu Galacia. ¿Yoo ra i zativi sii ndo ta vityi ña cuñi ca ndo tyaa ndo yahvi sii sa ndisa? Casi xaan i nacatyi ndi sihin ndo sa cuenda ra Jesucristo. Ta i cutuñi vaha iñi ndo ñaa cuenda i sihi ra nu cruz.

² Iyo minoo ñi tuhun cuñi nducu tuhun sii ndo: ¿Atu i ñihi ndo Tatyi Ii ra Ndyoo vatyi i tyaa ndo yahvi sa catyi ley ra Moisés a sa sino iñi ndo tuhun sa cuenda ra Cristo?

³ ¿Ñaa cuenda i ndutondo xaan ndo? Quiví i quisaha sino iñi ndo, vaha xaan i tyaa ndo yahvi sii ra

Ndyoo sihin cuhva i tyindyee Tatyi Ii sii ndo. Zoco vityi cuñi ndo zatyño ndo tysiño ra Ndyoo sihin tundyee iñi maa ndo.

⁴ ¿Atu sa caha ñi i ndyehe ndo cuhva i zacuu Tatyi Ii sihin ndo? Yívi sa caha ñi cuu si cuñi.

⁵ Saha ra Ndyoo Tatyi Ii ra sii ndo, ta zavaha ra sa ndyityi nu yucu ndo. Ta zavaha ra sii si vatyi sino iñi ndo sii ra Cristo, ta yívi sa cuenda sa zavaha ndo cuhva catyi ley ra Moisés.

⁶ Ta ra Abraham tucu, i sino iñi ra sii ra Ndyoo. Yucuan cuenda i catyi ra Ndyoo vatyi ñahñi ca cuatyi ra iyo.

⁷ Yucuan cuenda cuñi si sa coto ndo vatyi ñiyiví sino iñi sa ndisa cuii cuu ñiyiví sii ra Abraham.

⁸ Ta sa naha i sicundyaa Tuhun Ndyoo nuu tutu. Ta catyi si vatyi ityi nuu ca cua zanduvaha ra Ndyoo sii ñiyiví sa yívi ñiyiví hebreo cuu sihin ra vatyi cua sino iñi ñu. Ta yucuan cuenda i catyi ra Ndyoo sihin ra Abraham ta sa naha: “Sa cuenda moo ta cua cuhve sa vaha sii tandihí ñiyiví ñuu ñiyiví.”

⁹ Yucuan cuenda, ñiyiví sino iñi tañi sino iñi ra Abraham, saha ra Ndyoo sa vaha sii ñu tañi i saha ra sa vaha sii ra Abraham vatyi i sino iñi ra.

¹⁰ Ta ñiyiví sica iñi vatyi cua cacu ñu tatu zavaha ñu zuhva sa catyi ley sahnu, cua tasi tuñi ra Ndyoo sii ñu vatyi catyi Tuhun Ndyoo vatyi cua tasi tuñi ra Ndyoo sii tandihí ñiyiví sa ma zavaha tandihí cuii sa catyi ley cuan.

¹¹ Ma catyi ra Ndyoo sihin numinoo ñiyiví vatyi ñahñi cuatyi ñu ityi nuu ra vatyi tyaa ñu yahvi sii ley sahnu vatyi catyi Tuhun Ndyoo: “Nduvaha ñiyiví ityi nuu ra Ndyoo sihin sa sino iñi ñu sii ra. Ta cua cundito ñu tandihí cuii tyiemvu.”

¹² Ta ley ra Moisés, ña iñi cuu si sihin sa sino iñi yo vatyi catyi si: “Ra zavaha tandihí cuii tuhun ya, cua cundito ra tandihí cuii

tyiemvu.” (Zoco ma cuu zavaha yo sii tandihí cuii si.)

¹³ I tava ra Cristo sii yo sisi cuhva i zativí ley cuan sii yo vatyi sa i tivi maa ra sa cuenda yo tañi catyi Tuhun Ndyoo: “Yoo ra cua cuu nu cruz, yívi ra vaha cuu ra ityi nuu ra Ndyoo.” Ta yívi ra vaha i cuu ra Jesús ityi nuu ra Ndyoo cuhva sa sindyaa ra nuu cruz vatyi ndyizo ra cuatyi maa yo.

¹⁴ Sa cuenda ra Cristo ta saha ra Ndyoo sa vaha sii ñiyiví sa yívi ñiyiví hebreo cuu tañi i saha ra sa vaha sii ra Abraham. Vatyi sihin sa sino iñi yo sii ra Ndyoo ta ñihi yo Tatyi Ii sa catyi ra Ndyoo sa cua cuhva ra sii yo.

Zañaha ley sahnu sii yo vatyi iyo cuatyi yo, zoco ma zacacu si sii yo

¹⁵ Vityi, hermanos, cua quehin zuhva ziqui cuhva iyo si ihya ñuu ñiyiví. Tatu catyi minoo ra vatyi cua cuhva ra minoo sa cua cuhva ra sii inga ra ta tatu sa tyaa ra zívi ra, yoñi cuu zama sii si ta yoñi cuu tyizo zuhva ca ziqui si.

¹⁶ Ta i catyi maa ra Ndyoo vatyi cua cuhva ra sa cua cuhva ra sii ra Abraham ta sii minoo zehe ra. Ña catyi si nu tutu ra Ndyoo vatyi cua cuhva ra sii si sii cuaha ñiyiví zoco sii minoo ñi ra. Ta ra yucuan cuu ra Cristo.

¹⁷ Ta ihya cuu sa catyi: I cahan ra Ndyoo cuhva i cahan ra sihin ra Abraham, ta casi xaan i catyi ra sii si. I yaha cumi ziendu oco usi cuiya ta ziqui i saa ley ra Moisés. Zoco ma cuu zanaa ley cuan cuhva i catyi ra Ndyoo sihin ra Abraham. Ma cuu zandihí si sii si.

¹⁸ Tatu cuu ñihi yo sa tahan si sii yo sihin sa tyaa yo yahvi sii ley sahnu, sa caha ñi cuu cuhva i catyi ra Ndyoo vatyi cua cuhva ra sii yo. Zoco sito yo vatyi i ñihi ra Abraham sa tahan si sii ra sa cuenda cuhva i cahan ra Ndyoo sihin ra.

¹⁹ ¿Ta yozo caa tyindyee ley ra Moisés? I saha ra Ndyoo ley cuan

vatyi cua zacuaha si sii yo vatyi iyo cuatyí yo. Ta i ndoo si ndya cuhva ndya quivi i quisi ra Cristo, ra cu ñiyivi sii ra Abraham, vatyi i catyi ra Ndyoo sihin Abraham vatyi cua cuhva ra sa vaha sii ra cua quisi. Ta i saha ángel ley sii ra Moisés, ta ra Moisés saha sii si sii ñiyivi.

²⁰ Zoco ra Ndyoo cuu ra i cahan sihin ra Abraham quivi cuan, ta ña nanducu ra Ndyoo yoo ca ra cua cahan sihin ra Abraham.

Cuenda sa iyo ley ra Ndyoo

²¹ ¿Atu cuñi si catyi si vatyi cuxaan ley ra Moisés sii tuhun sa saha ra Ndyoo sii yo? Ña tacuan. Zoco ma cuu nduvaha yo ityi nuu ra Ndyoo sihin sa tyaa yo yahvi sii ley sahnu cuan. Tatu sa vatyi cuu coo yo cuhva saa sihin sa tyaa yo yahvi sii zuhva ley cuan, vaha maa tacuan ñi. Zoco ña tacuan cuu si.

²² Catyi tutu ra Ndyoo vatyi iyo cuatyí sii tandihí cuii ñiyivi. Ta tacuan ta cuu ñihi yo sa catyi ra Ndyoo sa cua cuhva ra vatyi cua cacu yo sa cuenda ra Jesucristo. Ta cua ñihi yo sii si sihin sa sino iñi yo.

²³ Quivi cumañi ca coo tuhun sa sino iñi yo sii ra Cristo, i tyazi ley cuan sii yo tañi sa ñoho yo vehe cua vatyi i ndatu yo quivi cua zañaha ra Ndyoo sii yo cuhva cua sino iñi yo sii ra, ta cua zacacu ra sii yo.

²⁴ Ley cuan i cuu si tañi minoo sa zacuenda sii yo ndya sa quisi ra Cristo, ta ziqui cuu nduvaha yo ityi nuu ra Ndyoo sihin sa sino iñi yo.

²⁵ Ta vityi sa saa quivi sino iñi yo sii ra Cristo ta ña siñi ñuhu ca ley cuan sa zacuenda si sii yo.

²⁶ Vatyi tandihí yo cuu zehe ra Ndyoo vatyi sino iñi yo sii ra Cristo Jesús.

²⁷ Tandihí yo, yo sa sicoo ndutya, sa cuenda ra Cristo cuu yo. Ta sa ndu-iin yo sihin ra, ta nduu yo tañi maa ra.

²⁸ Vityi ña ñiñi ca tatu cuu yo ñiyivi hebreo a ñiyivi inga tata a

tatu cuu yo muzu ñiyivi a yivi a tatu cuu yo rayii a ñuzihi. Vatyi tandihí yo sa ndu-iin yo sa cuenda ra Cristo Jesús.

²⁹ Ta tatu ñiyivi ra Cristo cuu yo, ñiyivi sii ra Abraham cuu yo sa ndisa cuii. Ta cua ñihi yo sa catyi ra Ndyoo sihin ra Abraham vatyi cua cuhva ra sii yo.

4

¹ Vityi cua quehin ziqui minoo cuhva. Minoo ra luhlu tatu sihi zutu ra ta zandoo ra tandihí ndaha tyiño ra sa cuenda zehe ra, ma cuu cutyí ñaha ra luhlu cuan sii si ndya cuahnu ra. Nií ñi sa luhlu ra, ta cuu ra tañi minoo muzu vehe zutu ra vazu tandihí ndaha tyiño zutu ra cuu sii maa ra.

² Cuñi si coo minoo ra zacuenda sii ra ta ra cundyaca ñaha sa sii ra ndya cuhva ndya cua tahan si cuiya i catyi zutu ra, ta ziqui cuu naquihin ra ndaha tyiño zutu ra.

³ Ta zuun ñi cuhva cuan iyo tucu si sa cuenda maa yo. Quivi cumañi ca sino iñi yo sii ra Cristo, i sindyaca ñaha ley sahnu sii yo; i tyaa yo yahvi sii costumbre sahnu i zacuu si.

⁴ Ta tahan si quivi i tasi ra Ndyoo sii Zehe ra. I zacacu minoo ñaha sii ra, ta minoo ñiyivi hebreo i cuu ra, ta i tyaa ra yahvi sii ley sahnu.

⁵ I tasi ra Ndyoo sii ra vatyi cua zacacu ra sii ñiyivi tyaa yahvi sii ley sahnu vatyi tacuan ta cuu nduu ñu zehe ra Ndyoo.

⁶ Ta sa cuenda sa nduu yo zehe ra Ndyoo ta tasi ra Ndyoo Tatyi Ii ra Cristo sisi añima yo. Ta yucuan cuenda catyi yo: “Ndyoo Zuti.”

⁷ Yucuan cuenda zehe ra Ndyoo cuu sii yo, ta yivi ca muzu cuu yo sii ley. Ta sa cuenda sa cuu yo zehe ra Ndyoo tacua cuhva ra tandihí sii yo sa cuenda ra Cristo.

Sica xaan iñi ra Pablo sa cuenda ñiyivi sino iñi

⁸ Quivi cumañi ca coto ndo sii ra Ndyoo, muzu i cuu ndo sii inga ndyoo sa yivi ndyoo cuu sa ndisa.

⁹ Zoco vityi sito ndo sii ra Ndyoo, a catyi vatyi maa ra sito sii ndo. ¿Ta ñaa cuenda cuñi ndo nduu ndo muzu inga saha ta nandyico ndo sii cuhva sahnu cuan (sii costumbre sahnu cuan)?

¹⁰ Zacahnu ca ndo vico, quivi nduyutya yoo ta vico tahan cuiya.

¹¹ Sica xaan iñi vazu sa caha ñi i zatyine sihin ndo.

¹² Ndoho hermanos, sica xein tamañi iñi sii ndo vatyi nduu ndo tañi mi vatyi ña ndyaca ñaha ca ley cuan sii. Sa ndui tañi i cuu maa ndo vatyi ña tyaa ndo yahvi ley ra Moisés quivi ta cumañi ca sino iñi ndo. Zoco ña tyei cuatyi sata ndo vatyi i zavaha ndo sa ña vaha sihin mi vatyi ñahñi.

¹³ Sito ndo vatyi quivi i zacote Tuhun Ndyoo sii ndo sa xihna ñi, i cuhu xein.

¹⁴ Ta cuehe cuan tañi minoo prueba i cuu si sii, zoco ña catyi ndo sa ma tyizoho ndo sa quehin, ta ña sino sihin ndo sii. I tiñ cuenda ndo sii, tañi minoo ángel ra Ndyoo cui a tañi ra Cristo Jesús.

¹⁵ ¿Ndyamaa cuahan sa zii xaan cuñi ndo quivi cuan? vatyi sehi sa ndaa sa cuenda ndo vatyi tatu cuu, cua taya ndo siti nuu ndo ta cuhva ndo sii si sii, quivi cuan.

¹⁶ Ta vityi ¿atü sica iñi ndo vatyi ndui ra xaan iñi sii ndo vatyi quehin sa ndisa sihin ndo?

¹⁷ Ta ñiyivi zacuaha inga cuhva cuan, vaha xaan zavaha ñu sihin ndo cuñi ndo, zoco yivi sa vaha cuu si sa ndisa. Cuñi ñu zacuziñ ñu sii ndo vatyi tacuan ta cua cundyico ndo sii maa ñu.

¹⁸ Ndisa vatyi vaha tatu zavaha ñu sa vaha sihin ndo. Tatu sa vaha cuu sa nanducu ñu sa ndisa, nazavaha ñu sii si tañi quivi sa ndyei sihin ndo.

¹⁹ Zehe ndiyih, ndyehi tundoho inga saha sa cuenda ndo tañi tundoho ndyehi minoo ñaha tatu sa

cuñi cacu zehe ña. Ta cua ndyehi tundoho ndya cua ndundayee iñi ndo sa ndisa sihin tundayee iñi ra Cristo.

²⁰ Vaha xaan tatu cuu quisi nu yucu ndo vityi; cuñi quehin sihin maa ndo. Ña ñili que cuhva zacui sihin ndo.

Minoo cuhva cuenda ña Agar ta ña Sara

²¹ Ndoho, ra cuñi sa cundyaca ñaha ley ra Moisés sii ndo, nacatyi ndo sihin: ¿Atu cutuñi iñi ndo cuhva catyi ley cuan?

²² Catyi Tuhun Ndyoo vatyi i sicoo uu tahan zehe ra Abraham. Minoo ra i cuu zehe ra sihin ñaha i cuu muzu ñazihí ra. Ta imga ra i cuu zehe ra sihin ñazihí ra. Ta yivi muzu i cuu ñazihí ra Abraham.

²³ Agar i sinañi muzu cuan, ta i cacu zehe ña tañi cacu zehe tandihí ñiyivi. Zoco zehe maha Sara, ñazihí ra Abraham, i cacu ra vatyi i catyi ra Ndyoo sihin ra Abraham vatyi cua coo minoo zehe ñazihí ra.

²⁴ Ta sa nduu tahan ñaha cuan cuu tañi uu tahan tysiño zandaa ra Ndyoo. Minoo si i saha ra nu yucu Sinaí. Yucuan i saha ra ley sii ra Moisés. Ta ñiyivi sa cuu cuenda ley cuan cuu tañi ña Agar vatyi minoo muzu ñi i cuu ña sihin zehe ña.

²⁵ Tañi ña Agar ta tañi yucu Sinaí ta tacuan iyo ñuu Jerusalén vityi vatyi ndyaca ñaha ley sahnu sii ñiyivi ñuu cuan. Cuu ñu tañi muzu sii ley cuan.

²⁶ Zoco andivi iyo inga ñuu Jerusalén. Minoo ñuu sa ñahñi sa ndyaca ñaha sii cuu si. Ta ñahñi tucu sa ndyaca ñaha sii maa yo vatyi cuenda ñuu sa iyo andivi cuu yo.

²⁷ Ta catyi Tuhun Ndyoo: Cuzii xaan iñun ñaha sa ñá sicoo zehe; yoñi zehun, ta i zandoo yiu suun.

Zii xaan cuñun ndya cuhva cua vacu soon sihin sa zii cuñun, yoho ñaha sa yoñi zehe.

Vatyi cuaha ca zehe ñaha sa zandoo
yii sii cua coo ta ziqui ñaha sa
iyo yii.

²⁸ Ta maa yo hermanos, cuu yo
tañi ra Isaac zehe ra Abraham vatyi
i cacu ra cuhva i catyi maa ra
Ndyoo.

²⁹ Zoco ra i cacu cuenda ñaha sa
cuu muzu cuan i cuu ra ra xaan iñi
sii ra i cacu cuhva catyi ra Ndyoo,
ta tacuan cuu si ndya cuhva ndya
vityi. Ñiyivi sa cuñi zavaha cuhva
catyi ley, xaan iñi ñu sii maa yo
ñiyivi zacacu ra Ndyoo sa cuenda
Tatyi li ra.

³⁰ Ta ¿ñaa catyi Tuhun Ndyoo?
Catyi si: "Tava ndyizo ndo sii ñaha
sa cuu muzu sihin zehe ña. Vatyi
zehe muzu cuan ma cuu ñihi ra sa
sii zutu ra tañi cua ñihi zehe ñaha sa
cuu ñazihí ra sa ndisa."

³¹ Yucuan cuenda, hermanos,
yivi zehe ñaha cu muzu cuu maa
yo. Maa yo cuu tañi zehe ñazihí ra
Abraham vatyi yivi muzu cuu yo.
(Tin cuenda ra Ndyoo sii yo vatyi
sino iñi yo ta yivi sa cuenda sa tyaa
yo yahvi sii ley sahnu.)

5

*Indasi ra Cristo sii ndo; coo ndo
cuhva cuan*

¹ Indasi ra Cristo sii yo vatyi cua
coo yo libre. Coo ndo cuhva cuan,
ta ma nduu ndo muzu sii ley sahnu
cuau inga saha a sii costumbre sa
zavaha ñiyivi.

² Ndyehe ndo, yuhvi ra Pablo
catyi sihin ndo vatyi tatu zavaha
ndo costumbre circuncisión cuan
ta sica iñi ndo vatyi cua zacacu si
sii ndo, ma cuu tyindye ra Cristo
sii ndo.

³ Cuñi catyi inga saha sihin
tandihí ra cuñi cacu sihin costum-
bre circuncisión cuan vatyi tatu
tacuan cuñi ra, cuñi si sa zavaha ra
tandihí cuii sa catyi ley ra Moisés.

⁴ Tandihí ndoho ra sica iñi vatyi
cua catyi ra Ndyoo vatyi ñahñi cu-
atyi ndo vatyi zavaha ndo cuhva
catyi ley sahnu cuan, cuu si tañi i

zandoo ndo sii ra Cristo. Sa zaña
ndo sa vaha sa saha ra Ndyoo sii
ndo.

⁵ Vatyi maa yo sa iyo tundyee iñi
sa saha Tatyi li sii yo, ndatu yo sa
cua zanduvaha ra Ndyoo sii yo ityi
nuu maa ra sa cuenda sa sino iñi
yo.

⁶ Vatyi tatu sa ndu-ñin yo sihin
ra Cristo Jesú, ña tyindye si tatu
zavaha yo costumbre circuncisión
cuau a tatu ma zavaha yo sii si. Sa
tyindye cuu sa sino iñi yo sii ra
Cristo, ta zañaha yo tatu sino iñi
yo tatu zavaha yo sa vaha sihin
tandihí ñiyivi.

⁷ Vaha xaan i zavaha ndo quivi
cuau. ¿Yoo sa zativi sii ndo? ta vityi
ñia tyaa ca ndo yahvi sii sa ndisa.

⁸ Yivi cuenda ra Ndyoo, ra i cana
sii ndo, cuu cuhva cuan.

⁹ Tañi cua ndaa pan sihin zuhva
ñi yusa iya, tacuan cuu cuhva cuu
zativi minoo ñi ñiyivi sii cuaha
xaan ñiyivi.

¹⁰ Cua tasi tuñi ra Ndyoo sii ra
zativi sii ndo vazu yoo ca ra cuu ra.
Zoco sito vehi vatyi cua tyindye
ra ndyaca ñaha sii yo sii ndo ta ma
caca iñi ndo inga cuhva ta ziqui
cuhva i zacuehi sii ndo.

¹¹ Ta sa cuenda mi, hermanos,
tatu cua catyi vatyi vaha zavaha
ca yo costumbre circuncisión cuan,
ma cuxaan xaan ñiyivi hebreo si-
hin. Zoco cuxaan ñu vatyi catyi
vatyi sihi ra Cristo nuu cruz sa
cuenda cuatyi yo.

¹² Ta sa cuenda ra zativi sii maa
ndo jvaha xaan tatu ndaha zaña ra
sii ndo ta cuhun ra!

¹³ Vatyi i casi ra Ndyoo sii maa
ndo, hermanos, vatyi ñahñi ca sa
cua cundyaca ñaha sii ndo, zoco
yivi sa cuenda sa cua zavaha ndo
ñaa sa cuñi maa ndo. Cuñi si sa
tyindye ndo sii ñiyivi vatyi cuñi
ndo sii ñu.

¹⁴ Iyo minoo tuhun sisi Tuhun
ra Ndyoo ta catyi si: "Cuñi ndo
sii ñiyivi tañi cuñi ndo sii maa
ndo." Ta tatu cuñi ndisa cuii yo sii

ñiyivi, sihin minoo ñi cuhva cuan ta zavaha yo tandihí sa catyi ley ra Ndyoo.

¹⁵ Zoco tatu xaan cuñi ndo ndyehe ndo sii minoo tahan ndo, ta tatu cahan cuehe ndo sii tahan ndo, coto vaha ndo sii ndo coto ndaha zatíví ndo sii minoo ndo ta sii inga ndo.

Cuhva ña vaha sa cuñi yo zavaha yo, ta cuhva zavaha yo tatu zavaha yo cuhva cuñi Tatyi Ii

¹⁶ Ihya cuu sa cuñi catyi sihin ndo: Zavaha ndo cuhva cuñi Tatyi Ii ra Ndyoo, ta tacuan ta ma zavaha ndo sa ña vaha sa cuñi maa ndo zavaha ndo.

¹⁷ Vatyi iyo minoo cuhva sa cuñi Tatyi Ii zavaha yo, ta maa yo cuñi yo zavaha yo inga cuhva. Ta ña cuñi yo zavaha yo cuhva cuñi Tatyi Ii. Cuhva cuñi Tatyi Ii, ña sasi tahan si sihin cuhva cuñi maa yo. Ta yucuan cuenda ma cuu zavaha yo cuhva cuñi maa yo.

¹⁸ Zoco tatu zavaha yo cuhva cuñi Tatyi Ii, ña ndyaca ñaha ca ley cuan sii yo.

¹⁹ Ña yíi ndyehe yo ñaa sa zavaha ñiyivi tatu zavaha ñu cuhva cuñi maa ñu. Quixi rayíi sihin inga ñaha sa yivi ñazihí ra cuu a ña tindaha ñu. Ta tacuan tucu zavaha ñuzihí sihin rayíi, ta cuaha xaan sa quiñi zavaha ñiyivi sihin coño ñuhu ñu.

²⁰ Zacahnu ñu sii zandu. Zatazi ñu. Cuxaan ñu ndyehe ñu sii inga ñiyivi. Sahñi tahan ñu. Cuñi xaan ñu sa sii inga ñiyivi. Yatyi xaan cuxaqan ñu. Maa ñi sa cuenda maa ñu sica iñi ñu. Sahñi tahan ñu ta ziqui zavaha ñu ziin ziin ityí.

²¹ Cuñi xaan ñu ndaha tyiño inga ñiyivi. Sahñi ñu ñiyivi. Siñi ñu. Zacahnu xaan ñu vico. Ta inga cuhva tañi cuhva ya zavaha ñu. Ta nacatyi sihin ndo tañi sa catyi sihin ndo quiví cuan vatyi ñiyivi zavaha cuhva ya ma cuu cuhun ñu nu ndyaca ñaha ra Ndyoo.

²² Zoco tatu zatyíño xaan Tatyi Ii sihin yo, ihya cuu cuhva cua coo yo. Cua cuñi xaan yo sii inga ñiyivi; cuu cuzihí xaan iñi yo; cuu coo sa taxi añima yo. Cua coo xaan tundyee iñi sii yo sihin ñiyivi. Vií xaan cua coo yo, ta cuu yo ñiyivi vaha xaan. Ta cua zavaha yo sa vaha sihin ñiyivi, ta ma zaña yo sa zavaha yo sa vaha.

²³ Ta inga cuhva saha Tatyi Ii sii yo cuu sa mazu xaan iñi yo ta sa cuu cundyaca ñaha yo sii yo. Tatu zavaha yo tandihí cuhva ya ma cuu catyi ley sahnu vatyi iyo cuatyí yo.

²⁴ Ta maa yo sa cuu cuenda ra Cristo Jesú, sa zaña yo sa zavaha yo sa ña vaha, ta ña zavaha ca yo cuhva cuñi maa yo.

²⁵ Ta tañi sa nduu yo ñiyivi saa sa cuenda Tatyi Ii ra Ndyoo, tacuan cuñi si sa tyaa yo yahvi sa zacuaha ra sii yo cuhva cua zavaha yo.

²⁶ Ta ma nducu yo cuhva sa zacahnu ñiyivi sii yo. Ta ma zacahñi tahan yo sii fiyivi, ta ma cuñi yo sa sii inga ñiyivi.

6

Tahan si sii yo sa tyindyee yo sii ra tahan yo

¹ Hermanos, tatu ndyehe ndo vatyi zavaha minoo ra tahan ndo minoo cuatyí, cuñi si sa tyindyee ndo sii ra ta nazandoo ra sii si, ndoho ra tyaa xaan yahvi sii ra Ndyoo. Zoco vii ñi cahan ndo sihin ra ta coto vaha ndo sii ndo coto nducu coto ihñi tucu cuihna sii maa ndo.

² Ta tahan si sa cuizo yo zuhva sa vee sa ndyizo inga ra. Tatu tacuan zavaha yo, cuñi si catyi si vatyi tyaa vaha yo yahvi sii ra Cristo.

³ Ta tatu iyo yo sica iñi yo vatyí ra ñiñi xaan cuu yo ta ña ndisa, zuun ñi sii maa yo zandavi ñaha yo cuhva cuan.

⁴ Nandyehe xihna yo sii tyiño maa yo, ta cua coto yo tatu zavaha yo sa vaha, ta zíi cua cuñi yo. Ta ma

ndyehe xaan yo ñaa sa zavaha inga ra.

⁵ Vatyi tahan si sii minoo minoo yo cundyee iñi yo ñaa sa tahan yo ñuu ñiyiví ya.

⁶ Ta cuñi si sa tyindyeo ndo sii ra zacuaha Tuhun Ndyoo sii ndo, ñaa sa siñi ñuhu sii ra.

⁷ Ta ma zandavi ñaha ndo sii ndo. Yoñi sa cuu zandavi ñaha sii ra Ndyoo. Tandihí sa cua tasi minoo ra, yucuan cuu sa cua naquihin ra. (Tatu zavaha ndo sa vaha cua nañihí ndo sa vaha, ta tatu zavaha ndo sa ña vaha cua nañihí ndo sa ña vaha.)

⁸ Tatú zavaha ndo sa ña vaha cuhva cuñi maa ndo, cua zatíví si cuan sii ndo. Zoco tatu zavaha ndo cuhva cuñi Tatyí Ií, cua cuhva Tatyí Ií sa cundito ndo tandihí cuii tyiemu.

⁹ Ma cuhva yo sa cundihi iñi yo ta zaña yo sa zavaha yo sa vaha vatyí tatu ma zaña yo sa zavaha yo sa vaha, cua coo quíví cua ñihi yo sa vaha sa cuenda si.

¹⁰ Yucuan cuenda tandihí saha tatu saha si cuhva, nazavaha yo sa vaha sihin tandihí ñiyiví, ta ñihi ca nazavaha yo sii si sihin ñiyiví sino iñi.

Nu sa cuñi ndihí carta ra Pablo

¹¹ Ndyehe ndo vatyí nahnu xaan letra tyei ihya sihin ndaha mi.

¹² Ra sa cuñi zañiñi sii ndo sa zavaha ndo costumbre circuncisión cuan, zavaha ra cuhva cuan vatyí cuñi ra sa coo vaha ra sihin ñiyivi. Ña cuñi ra ndyehe ra tundoho sa cuenda sa sino iñi ra vatyí sa sihi ra Cristo sa cuenda maa yo ta yucuan cuu cuhva cua cacu yo. Ñahñi ca inga cuhva.

¹³ Zoco nu maa ra sa zavaha costumbre cuan ta ña tyaa ra yahvi sii tandihí ley sahnu. Zoco cuñi ra sa zavaha maa ndo costumbre cuan vatyí tacuan ta cua caca iñi ra vatyí ra ñiñi xaan cuu ra vatyí ndyico ndo cuhva catyi ra.

¹⁴ Ta mi, ña cuñi zacahni sii, nu siin. Zoco zíi xaan cuñi vatyí i

sihi ra Jesucristo nu cruz sa cuenda mi. Maa ra ndyaca ñaha sii yo. Sa cuenda sa sihi maa ra, ta ña cuñi que sa iyo ñuu ñiyiví ya, ta ña ndyaca ñaha ca si sii.

¹⁵ Vatyí tatu ndyico yo sii ra Cristo Jesús, ña ñiñi ca sa zavaha yo costumbre circuncisión a sa ma zavaha yo sii si. Sa ñiñi ca cuu sa nduu yo ñiyiví saa.

¹⁶ Ta nacuhva ra Ndyoo sa coo sa taxi añima tandihí ndoho sa iyo cuhva ya. Ta nacundahvi iñi ra sii tandihí ndo sa cuu ñiyiví ra sa ndisa cuii.

¹⁷ Ityi nuu ca ña cuñi sa cuhva ca ndo tizihí sii, saha tuhun ya vatyí tandihí pehla sa iyo coño ñuhí zañaha si vatyí minoo muzu ra Jesús cui sa ndisa.

¹⁸ Hermanos, nanazoco xaan ra Jesucristo, ra ndyaca ñaha sii yo, sii ndo. Ta nacuu si sa ndisa.

Minoo Carta I Tasi Ra San Pablo Sii Ñiyiví Sino Iñi Sii Ra Ndyoo Ñuu Efeso

*Tyaa ra Pablo minoo carta sii
ñiyiví sino iñi sii ra Ndyoo ñuu Efeso*

¹ Yuhvi ra Pablo, minoo apóstol cui, cuhva cuñi ra Ndyoo. Tyei carta ya sii maa ndo sa sino iñi ñuu Efeso vatyi sino xaan iñi ndo sii ra Cristo Jesú.

² Nacuhva xaan ra Ndyoo Zutu yo ta ra Jesucristo ra ndyaca ñaha sii yo tumañi iñi sii ndo ta nacuhva ra sa coo sa taxi añima ndo.

*Saha xaan ra Ndyoo sa vaha sii
yo*

³ Nazacahnu yo sii ra Ndyoo, Zutu ra Jesucristo, ra ndyaca ñaha sii yo. Tyindyee xaan ra sii yo, ta saha xaan ra sa vaha sii yo vatyi iñin ñi cuu yo sihin ra Cristo. Saha xaan ra sa vaha sa iyo andiví sii yo.

⁴ I casi ra sii yo sa cu-iiñ yo sihin ra Cristo ndya quíví cumañi ca zavaha ra ñuu ñiyiví vatyi cuñi ra sa cuu yo ñiyiví vaha xaan ta ñiyiví ñahñi cuatyi ityi nuu ra vatyi cuñi xaan ra sii yo.

⁵ Ta sa naha i tyaa ra cuhva sa zanduu ra zehe ra sii yo sa cuenda ra Jesucristo vatyi yucuan cuu sa cuñi ra zavaha ra.

⁶ Ta yucuan cuenda zacahnu yo sii ra vatyi vaha xaan sa zavaha ra. Saha xaan ra tumañi iñi sii yo vatyi zandu-iiñ ra sii yo sihin Zehe ra, ta cuñi xaan ra sii Zehe ra.

⁷ Cuñi xaan ra Ndyoo sii yo, ta yucuan cuenda i tyiyahvi ra sa cuenda cuatyi yo sihin niñi ra Cristo ta i zandasí ra cuatyi yo.

⁸ Saha xaan ra tumañi iñi sii yo vatyi i saha ra sa siñi tuñi maa ra sii yo.

⁹ Ta i zacoto ra sii yo minoo cuhva xehe sa cuñi maa ra, minoo cuhva sa i sica iñi ra sa cua zavaha ra.

¹⁰ Vatyi natahan si quíví ta cua zandu-iiñ ra tandihí, ta cua cundyaca ñaha ra Cristo tandihí, sa iyo ityi ziquí ta sa iyo nu ñuhu.

¹¹ Sa cuenda sa i zavaha ra Cristo, ta i casi ra Ndyoo sii yo vatyi cua cuhva ra sa vaha sii yo. I cuñi maa ra Ndyoo zavaha ra tandihí cuhva ya. Zavaha maa ra ñaa sa cuñi maa ra.

¹² Ta tacuan i zavaha ra vatyi maa ndi sa sino iñi sii ra Cristo sa xihna ñi, cua zacahnu xaan ndi sii ra Ndyoo vatyi vaha xaan ra.

¹³ Ta i sino tucu iñi maa ndo sii ra Cristo sa i siñi ndo tuhun ndisa, cuhva cacu yo. Ta sa yaha sino iñi ndo sii ra, ta ziquí cuu si tañi i tyaa ra Ndyoo tuñi ra sii ndo vatyi i saha ra Tatyi II ra sa coo ra añima ndo tañi sa i catyi ra, ta sii maa ra cuu sii ndo.

¹⁴ Tatyi II cuan cuu sa saha ra Ndyoo sii yo sa xihna ca. Ta cuhva cuan zañaha si vatyi cua ñihí yo tandihí sa cua cuhva ra Ndyoo sii yo quíví cua ndihí zacacu ra sii yo. Ta zavaha ra tandihí cuhva ya vatyi cua zacahnu yo sii ra vatyi vaha xaan ra.

*Sica ra Pablo sii ra Ndyoo vatyi
cua cuhva ra cuaha xaan sa siñi tuñi
sii ñiyiví sino iñi*

¹⁵ Yucuan cuenda ndya quíví i site cuhva sino xaan iñi ndo sii ra Jesú, ra ndyaca ñaha sii yo, ta cuhva cuñi xaan ndo sii tandihí ñiyiví sino iñi.

¹⁶ Ndyá quíví i site cuhva cuan ta ñá zañe sa quehin sihin ra Ndyoo sa cuenda ndo. Ta nacuhva xein tyahvi ndyoo sii ra Ndyoo sa cuenda ndo.

¹⁷ Sique sii ra Ndyoo ra Jesucristo, ra ndyaca ñaha sii yo. Ta zuun ñi maa ra Ndyoo cuu Zutu maa yo. Nazacahnu xaan yo sii ra. Sii maa ra sique vatyi nacuhva ra sa siñi tuñi sa saha Tatyi II sii ndo

vatyi tacuan ta cua cutuñi ca iñi
ndo, ta cua coto vaha ca ndo sii ra.

¹⁸ Tacuan ta ziqui cua cutuñi ca
iñi ndo, ta cua coto ca ndo ñaa sa
cua ñihí ndo vatyi maa ndo cuu
ñiyivi i casi ra Ndyoo. Ta cua coto
ndo vatyi vaha xaan ta tyaqui xaan
cuu sa cua cuhva ra Ndyoo sii ñiyivi
sii ra.

¹⁹⁻²⁰ Ta sique sii ra Ndyoo vatyi
cua cuhva ra sa coto ndo cuhva
tyindyee ra sii maa yo sa sino iñi
sii ra vatyi cahnu xaan ca cuu
tundyee iñi sii maa ra. Tundyee
iñi maa ra sa tyindyee sii yo cuu sa
zuun ñi tundyee iñi sa zanandoto
sii ra Cristo sisi sa i sihi ra, ta i saha
ra Ndyoo sa cundyaa ra Cristo siyo
cuaha ra andivi.

²¹ Ta yucuan cuu nu i zanduc
ahnu xaan ra Ndyoo sii ra Cristo.
Cahnu ca ra ta ziqui tandihí inga
ra ndyaca ñaha ñuu ñiyivi a andivi.
Vazu rey cuu ra cuan a ra ndy
aca ñaha cahnu xaan a vazu ángel
andivi, zoco cahnu ca ra Cristo vityi
ta ityi nuu ca.

²² Ta saha ra Ndyoo sa cundyaca
ñaha ra Cristo sii tandihí. Ra cu nuu
cuu ra sii ñiyivi sa cuu cuenda ra.
Cuu ra tañi xiñi ñu.

²³ Ta ñiyivi sa cuu cuenda ra cuu
tañi coño ñuhu ra. Zacutu cuiii ra
añima yo, ta zacutu cuiii ra tandihí
cuiii sa iyo.

2

*Zacacu ra Ndyoo sii yo vatyi cuñi
xaan ra sii yo*

¹ Quiivi ta sino ca iñi ndo Tuhun
Ndyoo cuu si tañi sa sihi añima ndo
vatyi i zavaha ndo cuatyí ta tandihí
cuhva sa ña tahan iñi ra Ndyoo.
Zoco i saha ra Ndyoo minoo cuhva
saa coo ndo vatyi i ndu-iin ndo si
hin ra Cristo.

² Ityi sata i zavaha ndo cuatyí
tañi zavaha inga ñiyivi ñuu ñiyivi. I
zavaha ndo cuhva cuñi ra ndyaca
ñaha sii cuihna. Maa ra cuu ra
ndyaca ñaha sii ñiyivi ña tyaa yahvi
sii ra Ndyoo.

³ Ta tacuan i cuu tandihí yo quivi
sa ñá sito yo sii ra Ndyoo. Izavaha
yo cuhva ña vaha sa cuñi coño ñuhu
yo ta sa cuñi sa siñi tuñi yo tañi
zavaha tandihí inga ñiyivi. Inuu ñi
i cuu yo tañi inga ñiyivi, ta yucuan
cuenda i tahan si sii yo sa cuxaan
xaan ra Ndyoo sihin yo.

⁴ Zoco i cundahvi xaan iñi ra
Ndyoo sii yo vatyi cuñi xaan ra sii
yo.

⁵ Ta vazu i sicoo yo tañi sa i sihi
yo quivi cuan sa cuenda cuatyí yo,
zoco i zanandoto ra sii maa yo iin ñi
sihin ra Cristo. Zacacu ra Ndyoo sii
yo maa ñi sa cuenda tumañi iñi sa
zavaha ra sii yo.

⁶ Tañi sa zanandoto ra Ndyoo sii
yo sihin ra Cristo cuu si, ta saha
ra sa cundyaa yo andivi sihin ra.
(Tañaha ca cua saa yo yucuan, zoco
tañi sa saa yo yucuan cuu si vatyi
ma cuu ca cundyaca ñaha cuatyí sii
yo.)

⁷ Tacuan zavaha ra Ndyoo vatyi
ityi nuu ca cua zañaha ra sii tandihí
ñiyivi vatyi cahnu xaan cuu tumañi
iñi i zavaha ra sii yo sa cuenda ra
Cristo Jesús. Ta i zavaha xaan ra sa
vaha sihin yo.

⁸ Vatyí sa cuenda tumañi iñi sa
zavaha ra Ndyoo ta cacu yo sihin sa
sino ñi iñi yo sii ra. Ta sa zacacu ra
Ndyoo sii yo, yivi minoo sa zavaha
maa yo cuu si. Minoo sa saha maa
ra Ndyoo sii yo cuu si.

⁹ Ma cuu zavaha yo sa vaha ta
ñihí yo sii si coto caca iñi yo vatyi
vaha xaan maa yo.

¹⁰ Vatyí maa ra Ndyoo i zandu
vaha sii yo. Zandu-iin ra sii yo sihin
ra Cristo Jesús vatyi tacuan ta cua
zavaha xaan yo sa vaha cuhva i
tyaa ra Ndyoo ta sa naha.

*Vazu ñiyivi hebreo cuu yo a vazu
ñiyivi inga tata, zoco tandihí yo cuu
yo ñiyivi ra Ndyoo sa cuenda ra
Cristo*

¹¹ Yucuan cuenda nacohon iñi
ndo cuhva i sicoo ndo ityi sata. Yivi
ñiyivi hebreo cuu maa ndo. Ta

catyi ñiyivi hebreo vatyi ña vale ndo vatyi ña zavaha ndo costumbre circuncisión tañi zavaha maa ñu. Ta sica iñi ñu vatyi vaha ca maa ñu ityi nuu ra Ndyoo vatyi zavaha ñu costumbre cuan.

¹² Ityi sata ñá sicoo ra Cristo añima ndo. Ña iñi ñi i cuu ndo sihin ñiyivi hebreo. Ta ñá sito ndo tyiño i zandaa ra Ndyoo sihin ra Abraham, cuhva i catyi ra vatyi cuu zanduvaha ra sii yo sihin ra. Ñá sito ndo sii ra Ndyoo quívi cuan, ta ñahñi sa vaha cua ñihí ndo.

¹³ Quívi cuan sica xaan i sindyaa ndo nuu ra Ndyoo. Zoco vityi sa ndu-iñi ndo sihin ra Cristo Jesús. I sati niñi ra sa cuenda maa ndo, ta yucuan cuenda nañaa ndo sii ra Ndyoo.

¹⁴ Zanduvaha ra Cristo sii yo sihin ra Ndyoo. Zandu-iñi ra sii nduu tahan yo. Zandu-iñi ra sii nduhvi ra hebreo sihin maa ndo sa yívi ñiyivi hebreo cuu. Zanduvaha ra cuhva iyo yo sihin minoo yo ta sihin inga yo. I cuu si tañi sa zanduva ra minoo nuzama sa sindyaa mahñu nu yucu yo.

¹⁵ Maa ra Cristo i zandihí cuhva sicoo sihin ley sahnu quívi i saha ra coño ñuhu ra ta sihi ra nu cruz. Ley sahnu cuan i zanduziñi si sii yo vatyi i zavaha maa ndi costumbre sa catyi ley cuan, ta ñá zavaha maa ndo sii si. Zoco i zandu-iñi ra Cristo sii yo quívi i saha ra minoo cuhva saa coo yo, ta zanduvaha ra sii minoo yo sihin inga yo.

¹⁶ I sihi ra nuu cruz sa cuenda cattyi yo, ta i zanduvaha ra sii zandihí yo sihin ra Ndyoo. Ta i zandu-iñi ra sii yo sa ndisa.

¹⁷ I quisí ra Cristo, ta i nacatyi ra sihin yo cuhva cua coo vaha yo sihin ra Ndyoo ta sihin minoo yo ta sihin inga yo. I nacatyi ra cuhva cuan sihin maa ndo, ra sica xaan i sindyaa nuu ra Ndyoo ta sihin maa ndi ra hebreo, ra sa sito zuhva Tuhun Ndyoo.

¹⁸ I sihi ra Cristo sa cuenda yo, ta yucuan cuenda cuu tuhva tandihi yo sii ra Ndyoo Zuto yo vatyi iñi ñi Tatyi Li cuu sa iyo añima yo vazu ñiyivi hebreo cuu yo a vazu yívi ñiyivi hebreo cuu yo.

¹⁹ Yucuan cuenda yívi ca ñiyivi inga tata cuu ndo a ñiyivi inga ñuu. Sa nduu ndo ñiyivi sa cuenda ñuu ra Ndyoo iñi ñi sihin tandihi ñiyivi sa cuu cuenda ra. Sa nduu ndo ñiyivi ra.

²⁰ Ta tañi minoo vehe cuu tucu ndo. Ra apóstol sihin ra profeta, tañi cimiento si cuu ra. Ta zuun ñi ra Cristo Jesúus cuu minoo yuu sa ñiñi ca nu cuu siquí vehe.

²¹ Ta ziquí ra Cristo cuahan ndaa vehe minoo cuhva vaha xaan, ta cuu si minoo vehe ñuhu sa cuenda ra ndyaca ñaha sii yo.

²² Ta maa ndo cuu tucu zuhva vehe ñuhu cuan. Iñi ñi cuu ndo sihin ra Ndyoo ta sihin minoo ndo ta sihin inga ndo, ta tacuan nduu yo minoo vehe nu iyo ra Ndyoo vatyi iyo Tatyi Li ra añima sa minoo minoo yo.

3

Saha ra Ndyoo tyiño sii ra Pablo sa nacatyi ra Tuhun ra sihin ñiyivi sa yívi ñiyivi hebreo cuu

¹ Yuhví ra Pablo ñohi vehe caa sa cuenda maa ndo vatyi zacote tuhun ra Cristo sii ndoho sa yívi ñiyivi hebreo cuu.

² Sica iñi vatyi sa sito ndo vatyi cahnu xaan cuu tumañi iñi i saha ra Ndyoo sii, vatyi cuu tyindyei sii maa ndo.

³ Sa nacatyi sihin ndo zuhva sa cuenda cuhva i zañaha ra Ndyoo minoo sa xehe sii, sa cuenda maa ndo.

⁴ Ta tatu cua cahvi ndo carta i tasi sii ndo cua coto ndo cuhva i saha ra Ndyoo sa cutuñi iñi tuhun ra Cristo sa ña sito ñiyivi.

⁵ Ta sa naha ñá zacoto ra Ndyoo tuhun cuan sii ñiyivi tañi zacoto ra vityi sii ra apóstol ta sii ra profeta.

Vityi zacoto ra Ndyoo sii ndi sihin Tatyi Ii ra.

⁶ Ta tuhun xehe cuan cuu sa catyi vatyi maa ndo sa yiví ñiyiví hebreo cuu, cua ñihi ndo sa vaha sa saha ra Ndyoo iin ñi sihin nduhvi ra hebreo vatyi iin ñi coño ñuhu ra Cristo cuu tandihí yo. Ta cua ñihi yo sa sa catyi ra Ndyoo, vatyi cua cuhva ra sii si sii yo sa cuenda ra Cristo Jesús.

⁷ Tumañi iñi sa i saha ra Ndyoo sii, cuu sa i saha ra tundyee iñi sii, sa zacote tuhun vaha ya sii ñiyiví.

⁸ Sica iñi vatyi luhlu que ta ziqui tandihí inga ñiyiví sa cuu cuenda ra Ndyoo. Zoco i saha ra Ndyoo tumañi iñi ya sii, sa zacote tuhun ra Cristo sii ñiyiví sa yiví ñiyiví hebreo cuu, cuhva vaha xaan sa cua ñihi ñu sa cuenda ra Cristo.

⁹ Ta saha ra Ndyoo tyiño sii, sa zacote sii tandihí ñiyiví minoo cuhva sa sa sito ra Ndyoo cua zavaha ra cumañi ca sino ñuu ñiyiví. Ta sa naha ñá saha ra Ndyoo sa coto ñiyiví tuhun ya.

¹⁰ Vatyi tacuan ta tandihí sa ndyaca ñaha andiví cua ndyehe si cuhva vaha xaan sa zavaha ra Ndyoo sihin maa yo, ñiyiví sa cuu cuenda ra. Ta cua coto si vatyi cuaha xaan sa siñi tuñi iyo sii maa ra Ndyoo.

¹¹ Ta sa cuenda maa yo zavaha ra Cristo Jesús, ra ndyaca ñaha sii yo, cuhva sa cuñi ra Ndyoo ta sa naha.

¹² Ta sa cuenda ra Cristo iyo cuhva sii yo sa tuhva yo sii ra Ndyoo. Sino iñi yo sii ra Cristo, ta yucuan cuenda ña yuhu yo sii ra Ndyoo.

¹³ Yucuan cuenda sique sii ndo vatyi ma nducuihya iñi ndo sa cuenda tundoho sa ndyehi vityi sa cuenda maa ndo vatyi cua tyindye si sii ndo.

Sica ra Pablo sii ra Ndyoo vatyi nanacoto ca ñu sii ra Cristo

¹⁴ Nacohon iñi sa vaha xaan sa saha ra Ndyoo Zutu yo sii yo, ta yucuan cuenda iñi siti nuu ra.

¹⁵ Maa ra cuu Zutu tandihí ñiyiví, ñu sa cuahan andiví ta ñu yucu nu ñuhu.

¹⁶ Ta sique sii ra vatyi nazandundyee xaan ra añima ndo sihin Tatyi Ii ra sa iyo añima ndo. Vatyi vaha xaan cuu sa saha maa ra.

¹⁷ Ta nacoo ra Cristo añima ndo vatyi sino iñi ndo sii ra. Ta tacuan ta cua cuñi xaan ndo sii tandihí ñiyiví vatyi nañaa ndo sii ra Ndyoo.

¹⁸ Ta ziqui cua coo cuhva sii ndo, ta cua cutuñi vaha iñi ndo sihin tandihí inga ñiyiví sino iñi vatyi cuñi xaan ra Cristo sii yo. Cuñi xaan ra sii yo ndya cuhva ña ñihi ca yo cuhva nacatyi yo cuhva cuñi xaan ra sii yo.

¹⁹ Ta sique sii ra Ndyoo vatyi cua coto ndo cuhva cuñi xaan ra sii yo vatyi yaha xaan cuñi ra sii yo, ndya cuhva ndya ma cuu coto yo cuhva sa cahnu xaan cuñi ra sii yo. Ta tacuan ta ñahñi sa cua cumañi sii ndo vatyi ndyaa ra Ndyoo sihin ndo. Ta yucuan cuenda ñahñi sa cua cumañi sii ndo.

²⁰ Ta vityi nazacahnu yo sii ra Ndyoo vatyi cahnu xaan ca cuu tundyee iñi maa ra, ta cuu zavaha ra cuaha xaan ca ta ziqui sa sica yo sii ra ta cuaha ca ta ziqui sa sica iñi yo vatyi zavaha ra sii si zuun ñi sihin tundyee iñi maa ra sa saha ra sii yo.

²¹ Nazacahnu maa yo, ra sino iñi, sii ra tandihí cuii tyiemvu sa cuenda sa zavaha ra Cristo Jesús. Nazacahnu yo sii ra vityi ta tandihí cuii tyiemvu. Ta nacuu si tacuan, ta nacuu si sa ndisa.

4

Cuhva ndu-iinyo sa cuenda Tatyi Ii

¹ Yucuan cuenda yuhvi ra ñoho vehe caa ya zañiñi sii ndo vatyi zavaha ndo sa vaha xaan cuhva tahan si zavaha ñiyiví i casi ra Ndyoo vatyi i casi ra sii ndo sa cuu ndo ñiyiví ra.

² Tahan si sii yo sa zanduluhlu yo sii yo ta vii xaan coo yo sihin ñiyivi, ta nacoo xaan tundyee iñi sii yo sihin ñu. Nacuñi xaan yo sii ra tahan yo, ta nacundyee iñi yo ñaa sa zavaha ra.

³ Nanducu yo cuhva cu-iin yo sa ndisa cuyi sihin ra tahan yo vatyi cua tyindyee Tatyi Ii ra Ndyoo sii yo sa coo sa taxi sii yo sihin ra tahan yo.

⁴ Vatyi iyo minoo ñi coño ñuhu ra Cristo sa cuu maa yo ra sino iñi sii ra, ta iyo minoo ñi Tatyi Ii ta minoo ñi sa vaha cua ñihí tandihí yo ityi nuu ca vatyi i casi ra sii yo.

⁵ Iyo minoo ñi ra ndyaca ñaha sii yo. ñin ñi sii maa ra sino iñi yo. Ta iñi ñi cuenda maa ra coo ndutya yo.

⁶ Iyo minoo ñi ra cuu Ndyoo, ta maa ra cuu Zutu tandihí yo. Ndyaca ñaha ra sii tandihí sa iyo. Iyo ra sisi añima tandihí yo, ta sityiñi ra sii tandihí yo ñaa cuhva cuñi maa ra.

⁷ Ta sii sa minoo minoo yo saha ra Cristo ndatu cuhva cuñi maa ra.

⁸ Yucuan cuenda catyi Tuhun Ndyoo:

I zahacanaa ra sii ra xaan iñi sii ra, ta ziqui i nandaa ra ndya andiví,
ta i saha ra ndatu sii ñiyivi.

⁹ ¿Ta ñaa cuñi si catyi si sa catyi si vatyi i nandaa ra? Cuñi si catyi si vatyi i noo xihna ra ndya ñuu ñiyivi.

¹⁰ Ta ra i noo cuan, zuun ñi ra cuu ra i ndaa ndya andiví nu zucu ca. Ta tacuan zavaha ra ta zacutu ra ñuu ñiyivi ya sa maa ñi maa ra vatyi vazu ndyaca maa, iyo ra.

¹¹ Ta i saha ra ndatu sii sa minoo minoo yo. Iyo yo cuu yo apóstol. Iyo yo cuu yo ra nacatyi tuhun saha ra Ndyoo sii yo. Iyo yo cuu xaan nacatyi yo cuhva zacacu ra Ndyoo sii ñiyivi. Iyo yo cuu yo ra zacuenda sii ñiyivi sino iñi, ta inga yo zacuaha yo Tuhun Ndyoo sii ñu.

¹² Saha ra Ndyoo cuhva cuan sii ñiyivi vatyi tacuan ta ñahñi cua cumañi sii yo, ra cuu ñiyivi ra.

Tacuan ta cuu zatyiñi yo tysiñi ra, ta cuu ndundyee yo sihin Tuhun Ndyoo

¹³ ndya cua ndu-iin yo sa ndisa cuii cuhva sino iñi yo ta cuhva coto vaha yo sii Zehe ra Ndyoo. Ta tacuan ta cua nduu yo ñiyivi vaha xaan, ta cua ñihí yo tandihí sa saha ra Cristo sii yo, ta cua nduu yo tañi maara.

¹⁴ Ta ziqui ma cuu ca yo tañi sa ndyihi. Vatyi sa ndyihi, yatyi xaan sino iñi si sii sa zin zin tuhun. Zoco ma cuu yo cuhva cuan coto ñihí ñiyivi cuhva zandavi ñaha ñu sii yo.

¹⁵ Zoco ihyia cuu sa cua zavaha yo; cua cuñi xaan yo sii ñiyivi, ta cua cahan yo sa ndisa sihin ñu, ta cua cuahnu yo sa ndisa cuii ta nduu yo tañi ra Cristo, ra ndyaca ñaha sii yo.

¹⁶ Ta tañi iin ñi cuu coño ñuhu yo, tacuan tucu tandihí maa yo. Sa cuenda ra Cristo ta iin ñi cuu yo sihin ra tahan yo. Ta tañi ndyaca ñaha xiñi yo sii tandihí coño ñuhu yo, tacuan ndyaca ñaha ra Cristo sii yo, ta ñihí yo tundyee iñi sii ra. Ta tacuan tyindyee yo sii ra tahan yo vatyi cuñi xaan yo sii ra, ta cua ndundyee ca tandihí yo.

Saha ra Cristo minoo cuhva saa coo yo

¹⁷ Cuhva sa cua nacatyi sihin ndo vityi cuu si minoo cuhva nacatyi ra ndyaca ñaha sii yo vatyi ma cuu ca ndo tañi ñiyivi ña sito sii ra Ndyoo vatyi zavaha ñu ñaa sa tondo ñi sica iñi ñu.

¹⁸ Ña vaha ca sa siñi tuñi sii ñu. Ña ñihí ñu cuhva vaha, cuhva saha ra Ndyoo coo yo. Ta tondo xaan iyo ñu vatyi ña zavaha ñu cuhva cuñi maa ra, ta ñihí xaan iñi ñu.

¹⁹ Ña cucahan ca nuu ñu tatu zavaha ñu sa ña vaha. Saha ñu sii ñu sa zavaha ñu tandihí nuu sa ña vaha. Cuñi xaan ñu zavaha ñu tandihí nuu sa quiñi.

²⁰ Zoco ña tacuan i cutuhva maa yo. Ña tacuan iyo ra Cristo.

21 *Tatu sa ndisa vatyi i siñi ndo sa cahan ra ta cutuhva ndo sa zacuaha ra sa cuenda maa ra,*

22 *sa zandoo ndo cuhva i zavaha ndo ityi sata. Minoo cuhva quiñi xaan i sicoo yo vatyi cuhva ña vaha sa cuñi yo zavaha yo i zandavi ñaha xaan si sii yo.*

23 *Cuhva ndo sii ndo sii ra Ndyoo, ta nazama ra cuhva sica iñi ndo.*

24 *Ta cuu ndo ñiyivi saa, vatyi tacuan i zanduvaha ra Ndyoo sii yo sa cuu yo ñiyivi ndoo xaan ta vaha xaan sa ndisa cuii.*

25 *Yucuan cuenda ma cuvatya yo. Nacahan tandihí yo sa ndisa sihin ra tahan yo vatyi iñi cuu yo.*

26 *Tatu cuxaan ndo zoco ma zavaha ndo sa ña vaha, ta ma cuxaan ndo ndiyiyaca.*

27 *Ta ma cuhva ndo cuhva sii cuihna.*

28 *Ra sa tuhva zuhu, ma zuhu ca ra. Nazatyíño ra sihin ndaha ra minoo cuhva vaha, ta cua cuu tyindyee ra sii ñiyivi cumañi si.*

29 *Ma cahan ndo sa quiñi sihin yuhu ndo. Cahan ndo sa vaha sa cua tyindyee ta sa cua zandundyee ca sii ñiyivi tyizoho.*

30 *Ta ma zanducuihya ndo iñi Tatyí Ii ra Ndyoo vatyi i saha ra Ndyoo Tatyí Ii ra sii yo tañi sa tyaa ra tuñi ra sii yo ndya quiví cua zandihi ra cuhva zacacu ra sii yo.*

31 *Ma cuu ndo ñiyivi tixi iñi, ta ma cuxaan ndo, ta ma xaan xaan cuñi ndo, ta ma cahan ndo sa quiñi, ta ma cahan cuehe ndo sii ñiyivi. Ta ma cuñi ndo zavaha ndo sa ña vaha sihin ñu.*

32 *Zoco vii xaan coo ndo sihin minoo ndo ta sihin inga ndo. Cundahvi iñi ndo ta zaha ndo tucahnú iñi sii minoo ndo ta sii inga ndo tañi i zaha ra Ndyoo tucahnú iñi sii maa yo sa cuenda ra Cristo.*

5

Cuhva cuñi si coo zeha ra Ndyoo

1 *Yucuan cuenda nanducu yo cuhva cuu yo tañi maa ra Ndyoo.*

Zehe ra cuu sii yo, ta cuñi xaan ra sii yo.

2 *Ta cuñi xaan ndo sii ñiyivi tañi cuñi xaan ra Cristo sii yo ta saha ra sa cuu ra sa cuenda maa yo. Tañi sahñi ñiyivi mvee ticatyi ta saha ñu sii ti sii ra Ndyoo ta sa naha, tacuan i saha ra Cristo sii ra sa cuenda maa yo. Ta zii xaan i cuñi ra Ndyoo sihin cuhva i zavaha ra.*

3 *Ta vityi sa nduu ndo ñiyivi sa cuenda ra Ndyoo, ña tahan si sa cuzu ndo sihin minoo ñaha tatu ma tindaha xihna ndo, ta ñaa inga sa quiñi sa zavaha ñiyivi sihin coño ñuhu ñu.*

4 *Ta ma cahan ndo sa quiñi ta nu sa tondo, cuhva ña tahan si cahan ndo. Zoco cuhva ndo tyahvi ndyoo sii ra Ndyoo.*

5 *Vatyi sito ndo vatyi tandihí ñiyivi zavaha sa quiñi, ma cuu quihví ñu nu ndyaca ñaha ra Ndyoo. Ra quixi sihin inga ñaha sa yivi ñazihí ra cuu a ñaha sa zavaha tacuan sihin rayii a ra cuñi xaan sa coo ndaha tyiño, ma cuu cuhun ra nu ndyaca ñaha ra Ndyoo vatyi tatu cuñi xaan ñiyivi sa coo ndaha tyiño ñu, ña zacahnu ñu sii ra Ndyoo cuhva cuan.*

6 *Ma cuhva ndo sa zandavi ñaha ñiyivi sii ndo sihin tuhun ña ñiñi vatyi sa cuenda tandihí cuhva ña vaha ya cua cuxaan ra Ndyoo, ta cua tasi tuñi ra sii ñiyivi ña tyaa yahvi sii ra.*

7 *Yucuan cuenda ma cutahan ndo sihin ñiyivi zavaha tacuan*

8 *vatyi i sicoo maa ndo nu ñaa quiví cuan. Zoco vityi sa ndu-iñi ndo sihin ra ndyaca ñaha sii yo, ta iyo ndo nu ndisi. Zavaha ndo cuhva zavaha ñiyivi sa cuu cuenda ñuhu.*

9 *Vatyi cuhva vaha sa saha Tatyí Ii sii yo cuu sa cua zavaha yo sa vaha ta sa ndoo ta sa ndisa.*

10 *Nducu ndo cuhva coto ndo ñaa sa tahan iñi ra ndyaca ñaha sii yo.*

11 *Ta ma cu-iñi ndo sihin ñiyivi zavaha sa ña vaha tañi zavaha*

ñiyivi nu ñaa. Ta zacoto ndo sii ñu vatyi zavaha ñu sa ña vaha.

¹² Vatyi saha si ticahan nuu vazu tuhun cahan ñi yo, sa cuenda cuhva zavaha ñu nu xehe.

¹³ Zoco quivi cua naquita sa xehe cuan nu ndisi ta casi xaan cua cu-naha si vatyi zandundisi ñuhu maa ra Ndyoo sii tandih i si.

¹⁴ Yucuan cuenda iyo nu catyi si tyehen:
Ndoyo ndoho ra quixi xaan.
Nduvita ndo nu yucu ñiyivi i sihi
 vatyi cua cuhva ra Cristo
 ñuhu ityi cuhun ndo.

Catyi si.

¹⁵ Yucuan cuenda zacuenda ndo cuhva zavaha ndo. Ma zavaha ndo cuhva zavaha ñiyivi ña sito. Zavaha ndo cuhva zavaha ñiyivi sito.

¹⁶ Cutyiño vaha ndo minoo minoo quivi yozo caa zatyiño ndo tyiño ra Ndyoo vatyi quiñi xaan cuu tyiemvu ya vityi.

¹⁷ Yucuan cuenda ma cuu ndo ñiyivi tondo; tyituñi iñi ndo ñaa sa cuñi ra ndyaca ñaha sii yo sihin ndo.

¹⁸ Ma coho ndo ndixi, ta ma cuu ndo ra siñi vatyi yucuan cua zatiñi sii ndo. Zoco cuhva ndo sa cutu cuii Tatyi Ii añaima ndo.

¹⁹ Cahan ndo maa ñi sa vaha sihin minoo ndo ta sihin inga ndo. Cata ndo salmos, ta coro ta yaa sa saha Tatyi Ii sii ndo. Cata ndo ta zacahnu ndo sii ra Ndyoo sihin tandih i cuii añaima ndo.

²⁰ Ta tandih i saha vazu ñaa sa tahan ndo, zoco nacuhva ndo tyahvi ndyoo sii ra Ndyoo Zutu yo sihin ziví ra Jesucristo, ra ndyaca ñaha sii yo.

Cuhva cuñi si coo yo sihin ñiyivi sii yo

²¹ Tyaa ndo yahvi sii minoo ndo ta sii inga ndo vatyi cuhva cuan tyaa ndo yahvi sii ra Ndyoo.

²² Ndoho ñuzih i, tyaa ndo yahvi sii yí ndo tañi tyaa ndo yahvi sii ra ndyaca ñaha sii yo, ra Cristo.

²³ Vatyi ndyaca ñaha rayii sii ñazih i ra tañi ndyaca ñaha ra Cristo sii ñiyivi sino iñi sii ra. Ta zacacu ra sii maa yo sa cuu coño ñuhu ra.

²⁴ Yucuan cuenda tañi maa yo sa sino iñi sii ra Cristo tyaa yo yahvi sii ra, zuun ñi cuhva cuan natyaa ñuzih i yahvi sii yí ñu tandih i cuii cuhva.

²⁵ Ta ndoho rayii, cuñi xaan ndo sii ñazih i ndo tañi cuñi xaan ra Cristo sii ñiyivi sino iñi ta saha ra sa cuu ra sa cuenda maa yo.

²⁶ Tacuan i zavaha ra vatyi cua zanduu ra ñiyivi vaha sii yo. Ta zandundii ra sii yo sihin sa sicoo ndutya yo ta sihin sa cuiñi yo Tuhun Ndyoo.

²⁷ Cuñi ra Cristo cuhva ra sii yo sii ra Ndyoo tañi minoo sa vaha xaan ta ndii xaan, ñahñi sa quiñi caa a sa ña vaha zoco minoo sa vaha xaan sa ndisa cuii ta sa ndoo xaan.

²⁸ Tacuan i zavaha ra Cristo vatyi cuñi xaan ra sii yo; yucuan cuenda cuñi si sa cuñi xaan rayii sii ñazih i ra tañi cuñi ra sii coño ñuhu maa ra. Tatu cuñi xaan rayii sii ñazih i ra, cuñi xaan ra sii maa ra cuhva cuan.

²⁹ Vatyi yoñi numinoo ra sa ña cuñi sii coño ñuhu maa ra, zoco zacuenda xaan ra sii si tañi zacuenda ra Cristo sii ñiyivi sino iñi sii ra.

³⁰ Ta maa yo cuu zuhva coño ñuhu ra Cristo, coño ra ta yiqui ra.

³¹ Catyi Tuhun Ndyoo: “Nazando rayii sii zutu ra ta sii zih i ra, ta nandu-iñi ra sihin ñazih i ra. Ta sa nduu tahan ñu cua nduu ñu minoo ñi coño ñuhu.”

³² Ihya cuu minoo tuhun xehe sa cahnu xaan. Ta catyi mi vatyi cuñi si catyi si vatyi ndu-iñi ra Cristo sihin ñiyivi ra.

³³ Ta inga tucu cuhva catyi si vatyi cuñi si sa cuñi xaan ndo sii ñazih i ndo tañi cuñi ndo sii maa ndo, ta natyaa xaan ñuzih i yahvi sii yí ñu.

6

¹ Ndoho sa ndyih i tyaa ndo yahvi sii zutu ndo ta sii zih i ndo. Tahan si

sa tyaa ndo yahvi sii ñuu vatyi sino iñi ndo sii ra Cristo.

²⁻³ Iyo minoo ley maa ra Ndyoo catyi si: "Tyaa ndo yahvi sii zutu ndo ta sii zíhi ndo." Catyi si. Ihya cuu sa xihna ñi ley i catyi si ñaa sa cua cuhva ra Ndyoo sii yo tatu zavaha yo sii si vatyi catyi si vatyi zíi xaan cua cuñi yo tatu zavaha yo sii si, ta cuaha cuiya cua condito yo ñuu ñiyiví ya.

⁴ Ta ndoho ra cu zutu sa ndyihi, ma zacuxaan ndo sii zehé ndo. Zaculaa ndo sii si tañi cuñi ra Ndyoo, ta cañiindo sii si tatu cuñi si, zoco ñia yaha xaan.

⁵ Ndoho ra cu muzu, tyaa ndo yahvi sii patrón ndo ihya ñuu ñiyiví. Nducu xaan ndo cuhva zavaha ndo cuhva cuñi ra, tañi cuhva tyaa ndo yahvi sii ra Cristo. Ta ma zandavi ñaha ndo sii ra.

⁶ Zatyño vaha ndo, yiví cuhva sa ndyehe ñi patrón ndo, zoco vazu ña ndyehe ra, zatyño ndo. Ta yiví sa vatyi catyi ra vatyi ñiyiví vaha cuu ndo, zoco zatyño vaha ndo tandihi tyiemvu tañi zatyño ndo tyiño ra Cristo, ta zatyño ndo sihin tandihi cuii añima ndo.

⁷ Zatyño ndo minoo sa ndisa tañi zatyño ndo cuenda ra Cristo ta yiví sa cuenda ñiyiví.

⁸ Vatyi sito yo vatyi ñaa sa vaha zavaha yo vazu muzu cuu yo a vazu yiví zoco cua tyiyahvi ra Cristo sii yo sa cuenda sa vaha zavaha yo.

⁹ Ta ndoho ra cu ra ndyaca ñaha sii muzun, cuu ndo ñiyiví vaha sihin muzu ndo. Ta ma zayuhu xaan ndo sii ra vatyi sito ndo vatyi iyo ra ndyaca ñaha sii ndo andivi, ta iin ñi ndyehe ra sii tandihi yo.

Tundyee iñi sa saha ra Ndyoo sii ñiyiví sino iñi

¹⁰ Ta inga tucu tuhun, nacoo xaan tundyee iñi sii ndo vatyi iin ñi cuu ndo sihin ra ndyaca ñaha sii yo, ta cuaha xaan cuaha xaan tundyee iñi iyo sii maa ra.

¹¹ Ta tañi zacuenda minoo zandaru sii ra sihin ndaha tyiño ra, tacuan zacuenda ndo sii ndo sihin tandihi sa saha ra Ndyoo sii ndo vatyi tacuan ta cuu zahacanaa ndo sii cuihna vatyi cuñi xaan ra zandavi ñaha ra sii yo.

¹² Ta yiví sihin ñiyiví sa iyo coño ñuhu sahñi tahan yo, sihin tatyi cuihna sa ña cuu ndyehe yo. Iyo ra ndyaca ñaha nahnu sii sa ña vaha ñuu ñiyiví ya ta cuaha xaan inga tatyi ña vaha.

¹³ Yucuan cuenda tiin cuenda vaha ndo sii tandihi sa saha ra Ndyoo vatyi tacuan ta cuu zahacanaa ndo sii cuihna quiví sahñi tahan ra sihin ndo, ta ma ndoyo ñuhu ndo.

¹⁴ Tañi nandyaa minoo zandaru sihin minoo sinchu sisi ra, tacuan cuiñi ndyaa ndo sihin sa ndisa. Ta maa ñi sa vaha zavaha ndo. Ta tacuan ta cua zacacu ra Ndyoo sii ndo tañi zacacu minoo zandaru sii ra sihin minoo caa ñoho yiquí ndyica ra.

¹⁵ Ta tañi ñoho zapato saha ra zandaru ta ndyaa listo ra sa cuhun ra nu iyo cuatyí, tacuan cundyaa listo ndo sihin Tuhun Ndyoo ta zacoto ndo sii ñiyiví vatyi cuu nduvaha ñu sihin ra Ndyoo, ta ma cuxaan ca ra sihin ñu.

¹⁶ Ta tañi zacuenda zandaru sii ra sihin minoo caa ta ma nañi nduva sii ra, tacuan cuñi si sa cuníi xaan iñi yo sii ra Ndyoo. Ta cuhva cuan cuu ndahva yo nduva sa cayu sihin ñuhu sa cañi cuihna sii yo.

¹⁷ Ta tañi zacuenda zandaru sii xiñi ra sihin minoo caa sa ñoho xiñi ra, tacuan nacuhva ndo sii ndo sii ra Ndyoo nazacacu ra sii ndo. Ta cutyño ndo Tuhun Ndyoo vatyi mitiyi sa sityño Tatyi li cuu si.

¹⁸ Ta cahan ndo sihin ra Ndyoo tandihi cuii cuhva sihin cuhva saha Tatyi li sii ndo. Ta caca ndo sa tyindyee ra sii ndo. Listo vaha cuu ndo, ta ma zandoo ndo sa cahan ndo sihin ra Ndyoo sa cuenda tandihi ñiyiví sino iñi.

¹⁹ Ta cahan ndo sihin ra Ndyoo sa cuenda mi vatyi tacuan ta cua ñihi que cuhva quehin ta ma yuhi zacote Tuhun Vaha sa cuenda ra Cristo sii ñiyivi. Xehe xaan i cuu tuhun ya, zoco vityi sito yo sii si.

²⁰ Ta sa cuenda sa zacote tuhun ra Cristo, ta ñohi vehe caa, zoco caca ndo sii ra Ndyoo vatyi ma yuhi ta zacoto que tuhun ra tañi tahan si zacote.

Tasi ra Pablo sii ra Tíquico nu yucu ra hermano ñuu Efeso

²¹ Ta cua nacatyi ra hermano Tíquico sihin ndo tandihí sa tehin ta ñaa sa zavehi. Ña zaña ra sa zatyíño xaan ra tyíño ra ndyaca ñaha sii yo, ta cuñi xaan ndi sii ra.

²² Tasi sii ra nu yucu ndo vatyi cua zacoto ra sii ndo yozo caa iyo maa ndi, ta cuhva cuan cua cuhva ra tundyee iñi sii ndo.

²³ Ta nacuhva ra Ndyoo Zutu yo sihin ra Jesucristo ra ndyaca ñaha sii yo sa coo sa taxi añima tandihí ndoho sa cuu yañi yo. Ta nacuhva ra sa cuníi xaan iñi ndo. Ta tacuan ta cua cuñi xaan ndo sii maa ra ta sii ñiyivi.

²⁴ Ta nanazoco xaan ra sii tandihí ñiyivi cuñi xaan sa ndisa cuii sii ra Jesucristo, ra ndyaca ñaha sii yo.

Minoo Carta I Tasi Ra San Pablo Sii Niyiví Sino Iñi Sii Ra Ndyoo Nuu Filipos

Noho ra Pablo vehe caa ta tyaa ra minoo carta sii niyiví sino iñi sii ra Ndyoo Nuu Filipos

¹ Yuhvi ra Pablo sihin ra Timoteo, muzu maa ra Jesucristo cuu sii ndi. Ta tyaa ndi carta ya sii tandihí ndoho ra sino iñi sii ra Cristo Jesús ñuu Filipos sihin ra ndyaca ñaha sii ndo ta ra tyindyee sihin tyiño ra Ndyoo nu yucu ndo.

² Nacuhva xaan ra Ndyoo Zutu yo tumañi iñi sii ndo ta sa coo sa taxi añima ndo. Ta tacuan nazavaha tucu ra Jesucristo ra ndyaca ñaha sii yo.

Cahan ra Pablo sihin ra Ndyoo sa cuenda niyiví sino iñi

³ Tahan tahan saha nacohon iñi sii ndo ta nacuhve tyahvi ndyoo sii ra Ndyoo sa cuenda ndo.

⁴ Ta tandihí saha sa quehin sihin ra Ndyoo sa cuenda ndo, ziixaan cuñi

⁵ vatyi ndya quívi xihna ñi sa i siñi ndo tuhun sa cuenda ra Cristo ta ndya vityi ña zaña ndo sa tyindyee ndo sii, ta zacoto yo Tuhun Vaha ra Ndyoo.

⁶ Sito vehi vatyi tañi i quisaha ra Ndyoo zavaha ra minoo tyiño vaha xaan añima ndo, tacuan cua zavaha ca ra sii si ndya quívi cua quisi tucu ra Cristo Jesús.

⁷ Tahan si sa caca iñi cuhva ya sa cuenda maa ndo vatyi ñoho xaan iñi sii ndo. Ta iin ñi cuhva tyindyee ra Ndyoo sii yo sihin tundyee iñi sii maa ra. Vazu ñohi vehe caa a vazu cuhin nuu ra cu tyiño, zoco saha ra Ndyoo tundyee iñi sii, ta quehin tuhun ra sihin ra ñoho vehe caa ta sihin ra cu tyiño. Ta sito ra vatyi sa ndisa cuu Tuhun Ndyoo.

⁸ Sito vaha ra Ndyoo vatyi cuñi xein sii tandihí ndo tañi cuñi xaan ra Cristo Jesús sii ndo.

⁹ Ta sique sii ra Ndyoo vatyi cua cuñi xaan ca ndo sii tandihí niyiví, ta cua coo ca sa siñi tuñi ra Ndyoo sihin ndo, ta cua cutuñi ca iñi ndo ñaa sa cuu sa ndisa.

¹⁰ Vatyi tacuan ta cua cuu casi ndo sa vaha xaan cuhva cuñi ra Ndyoo, ta vaha xaan cua cuu cuhva iyo ndo, ta ñahñi cuatyi ndo cua coo ndya cuhva ndya quívi cua quisi ra Cristo.

¹¹ Ta tandihí saha cua zavaha ndo sa vaha ta sa ndoo, cuhva zavaha ra Cristo. Ta cua zacahnu niyiví sii ra Ndyoo, ta cua catyi ñu vatyi vaha xaan ra sa cuenda cuhva zavaha ra sihin maa ndo.

Maa ñi tyiño ra Ndyoo zavaha ra Pablo vatyi iyo ra Cristo añima ra

¹² Ta cuñi sa cua coto ndo hermanos vatyi tandihí sa tehin, tyindyee si sii, ta ñihí cuhva quehin Tuhun Ndyoo sihin niyiví.

¹³ Vatyi tandihí ra zandaru ta inga niyiví ihya, sito ñu vatyi ñohi vehe caa vatyi sino ifi sii ra Cristo.

¹⁴ Ta tyindyee si sii cuaha xaan hermano yo sa ñohi vehe caa. Ta vityi ñia yuhu ca ra vatyi sito ra vatyi tyindyee ra Ndyoo sii, ta nduñihu ca cuhva nacatyi ra Tuhun Ndyoo sihin niyiví.

¹⁵ Ndisa iyo ra nacatyi tuhun sa cuenda ra Cristo vatyi cuñi ra nducuhnu ca ra, ta cuñi ra sa zacahnu niyiví sii ra. Zoco iyo ra nacatyi Tuhun Ndyoo sihin tandihí cuii añima ra vatyi cuñi ra tyindyee ra sii.

¹⁶⁻¹⁷ Nacatyi ra Tuhun Ndyoo vatyi cuñi xaan ra sii, vatyi sito ra vatyi i quisi ndyaca ra ndyaca ñaha sii yo sii, ihya vatyi cuñi ra cutyíño ra sii, sa zacote sii niyiví vatyi sa ndisa cuu Tuhun Vaha ra. Zoco inga ra cuan, nacatyi ra tuhun ra Cristo vatyi iyo minoo sa cuñi ra ñihí ra sihin si. Ta ña vaha añima ra cuhva zavaha ra sii si vatyi cuñi ra

cuuhva ra tizih*i* sii, nii ñi sa ñohi vehe caa ya.

¹⁸ Zoco ñahñi sa cuu sa cuenda mi vazu zavaha ra sii si sihin minoo añima vaha a sihin minoo añima ña vaha vatyi tuhun maa ra Cristo cuu sa zacoto ra, ta yucuan cuenda zii xaan cuñi.

¹⁹ Ta zii xaan ca cua cuñi vatyi site vatyi tandih*i* sa cuu sii, ta cua tyindyee si sii, vatyi cahan ndo sihin ra Ndyoo sa cuende ta tyindyee Tatyi Ii ra Jesucristo sii.

²⁰ Ta sito vehi vatyi cua tyindyee ra Ndyoo sii, ta ma cucahan nui, ta ma cuyuhi. Ta tacuan ta cua quehin tuhun ra Cristo sihin tandih*i* cuii añime. Ta tacuan ta cua coto ñiyivi vatyi cahnu xaan cuu ra Cristo. Ta ña sica xaan iñi a condito que a cui, zoco cuñi sa cua ndyehe ñiyivi cuhva iye ta coto ñu vatyi cahnu xaan cuu ra Cristo.

²¹ Vatyi tatu condito que ñuu ñiyivi ya cua zatyiñe maa ñi tyiño ra Cristo, ta tatu cui cuaha xaan sa vaha cua ñihi.

²² Ta tatu condito que, vaha, vatyi cua zatyiño que sa cuenda ra Cristo. Ta yucuan cuenda ña site tatu vaha ca condite a cui

²³ vatyi iyo uu cuhva, ta ña site ndya sa cuu sa vaha ca vatyi vaha xaan tatu cuu cuhin nu ndyaa ra Cristo.

²⁴ Zoco sa cuenda maa ndo ta cuñi si sa ndoi ñuu ñiyivi vatyi cuu tyindyei sii ndo.

²⁵ Ta yucuan cuenda site vatyi cua ndoi ñuu ñiyivi vatyi cuñi si sa tyindyee que sii ndo, ta cua sino ca iñi ndo, ta zii ca cua cuñi ndo.

²⁶ Ta cua coo quivi cua quasi ndyehi sii ndo, ta zii xaan ca cua cuñi yo sa cuenda ra Cristo Jesús.

²⁷ Cuñi si sa coo ndo tañi iyo ñiyivi sino iñi Tuhun Vaha sa cuenda ra Cristo. Ta ziqui tatu quasi ndyehe que sii ndo a ma quasi que zoco cua saa tyiño nu ndyei vatyi sino xaan iñi ndo ta iñi xaan cuu ndo ta nacatyi xaan ndo Tuhun Ndyoo.

²⁸ Ta ma yuhu ndo vazu ñaa sa cua zavaha ra xaan iñi sii ndo sihin ndo vatyi tatu ma yuhu ndo sii ra, zañaha casi si sii ra vatyi cua naa ra, ta zañaha si vatyi cua zacacu ndisa cuii ra Ndyoo sii maa ndo.

²⁹ Vatyi sa cuenda ra Cristo ta ñihi maa ndo sa vaha, zoco ña iñi ñi sa sino iñi ndo sii ra cuu si, zoco cua ndyehe tucu ndo tundoho sa cuenda ra.

³⁰ ñin ñi cuhva sahñi tahan yo sa cuenda ra Cristo. Sa tuhva ndo ndyehe cuhva sahñi tehin, ta vityi siñi tucu ndo vatyi ña zañe sa zatyiño xein tyiño ra Ndyoo.

2

Cuca xaan ra Cristo, zoco i quasi ra ñuu ñiyivi, ta i sihi ra tañi minoo ra ndahvi

¹ Ndisa zanduzii ra Cristo iñi yo. Ta ndisa vatyi cuñi xaan yo sii tahan yo ta tyindyee yo sii tahan yo. Ta ndisa tucu vatyi iñi ñi cuu yo vatyi iyo Tatyi Ii sihin yo. Ta ndisa vatyi cundahvi iñi yo sii tahan yo.

² Tatu sa ndisa cuii cuu tandih*i* cuhva cuan, iñi ñi cuu ndo sa ndisa. Ta sihin cuhva cuan zanduzii ndo iñi. Cuñi xaan ndo sii ra tahan ndo, tañi cuñi xaan ra Cristo sii ndo. ñin ñi cuhva caca iñi ndo, ta iñi ñi cuhva zavaha ndo.

³ Ma zavaha ndo maa ñi sa cua tyindyee sii maa ndo. Zavaha ndo sa cua tyindyee tucu sii inga ñiyivi. Ma nducu ndo cuhva nduu ndo tañi ra ñiñi. Ma caca iñun vatyi vaha xoon. Zanduluhlun suun, ta caca iñun vatyi vaha ca inga ra.

⁴ Tahan tahan ndo caca iñi ndo sa cuenda sa cua tyindyee sii inga ñiyivi ta yivi sii sa maa ñi maa ndo.

⁵ Caca iñi ndo cuhva i sica iñi ra Cristo Jesús

⁶ vatyi vazu Ndyoo cuu ra, zoco ñá zacahnu ra sii ra. Ta ñá cuñi ra sa zacahnu ñiyivi sii ra tañi zacahnu ñu sii ra Ndyoo Zutu ra.

⁷ Izandoo ra tandih*i* cuii sa iyo sii ra andivi ta sa cuca ra, ta i nduu ra

minoo ñiyivi. Ta i cuu ra tañi minoo muzu.

⁸ I nduu ra minoo ñiyivi ndahvi ñi, ta i zanduluhlu xaan ra sii ra ndya cuhva ndya i tyaa ra yahvi sii ra Ndyoo ta saha ra sa cahñi ñiyivi sii ra. I sihi ra nu cruz tañi minoo ra iyo cuaty.

⁹ Yucuan cuenda zanducahnú xaan ra Ndyoo sii ra, ta saha ra minoo ziví sii ra sa cahnu ca ta ziqui tandihí inga ziví.

¹⁰ Tacuan i zavaha ra Ndyoo vatyi cuñi ra vatyi cua cuiñi siti tandihí yo ta zacahnu yo sii ra Jesús tatu cuiñi yo ziví ra. Cuñi ra Ndyoo vatyi cua cuiñi siti tandihí sa iyo andiví, ta nu ñuhu ta xu ñuhu ta zacahnu tandihí cuii si sii ra Jesús.

¹¹ Ta cuñi ra Ndyoo vatyi cua catyi tandihí cuii sa iyo vatyi ra Jesucristo cuu ra ndyaca ñaha. Cuhva cuan cua zacahnu xaan si sii ra Ndyoo Zutu yo.

Ñiyivi sa sino iñi sii ra Ndyoo cuu ñu tañi ñúhu ñuu ñiyivi ya

¹² Cuñi xein sii ndo hermanos. I tyaa xaan ndo yahvi sii mi quiví i sindyei sihin ndo. Yucuan cuenda tyaa tucu ndo yahvi sii, vityi sa yoñi ndyaa sihin ndo. Ñihi xaan nducu ndo cuhva zavaha ndo maa ñi sa cuñi ra Ndyoo vatyi maa ra zacacu sii ndo, ta yuhu ndo coto zavaha ndo minoo cuhva sa ma tahan iñi ra

¹³ vatyi maa ra Ndyoo cuu ra iyo añima ndo. Ta tyindyee ra sii ndo vatyi cua cuñi ndo zavaha ndo sa cuñi maa ra, ta cua zavaha ndo sii si.

¹⁴ Ta vazu ñaa sa cua zavaha ndo, zavaha ndo sii si sihin minoo cuhva sa ma coo tizihí ta ma cahñi tahan ndo,

¹⁵ ta yoñi cuu tyaa cuaty i sata ndo. Coo ndo minoo cuhva vaha xaan tañi sa zehe ra Ndyoo cuu sii ndo nu yucu ñiyivi iyo xaan cuaty ñuu ñiyivi ya. Cuu ndo tañi ñúhu sa zandundisi sa ñaa ñuu ñiyivi ya.

¹⁶ Nacatyi xaan ndo Tuhun Ndyoo sihin ñiyivi, cuhva cuu cacu ñu. Ta zii xaan cua cuñi quiví quisí ra Cristo sa cuenda maa ndo vatyi cua cote vatyi yivi sa caha ñi i zatiñe nu yucu ndo.

¹⁷ Ta vazu cahñi ñiyivi sii, sa cuenda Tuhun Ndyoo, zoco cua cuu si minoo sa cua cuhve sii ra Ndyoo sihin sa sino iñi maa ndo sii ra. Ta zii xaan cua cuñi ñin ñi sihin maa ndo.

¹⁸ Ta cuzii xaan tucu iñi maa ndo sihin mi.

Tasi ra Pablo sii ra Timoteo ta ra Epafroditu ndya ñuu Filipos

¹⁹ Tatu cuñi ra ndyaca ñaha sii yo, ra Jesús, sa yatyí cua tasi sii ra Timoteo nu yucu ndo. Cuñi sa cua ndyehe ra yozo caa iyo ndo ta quisi nacatyi ra sihin. Tacuan ta zii xaan cua cuñi.

²⁰ Vatyí maa ñi maa ra Timoteo sica iñi tañi sica iñi mi, yoñi inga ra. Sica iñi ra sa ndisa cuii yozo caa iyo maa ndo.

²¹ Tandihí inga ra, sica iñi ra sa cuenda tyiño maa ra. Ña nducu ra cuhva zavaha ra cuhva cuñi ra Cristo Jesús.

²² Ta sito ndo vatyi vaha xaan ra Timoteo. Cuu ra tañi minoo zehi sa cuenda cuhva tyindyee ra ta nacatyi ndi Tuhun Ndyoo.

²³ Sa cuñi tasi sii ra nu yucu ndo, zoco cua ndyehe xihne yozo caa cundaa tyiñe ihyá.

²⁴ Zoco ñii xaan iñi sii ra ndyaca ñaha sii yo vatyi ña naha xaan ca ta cua cuu cuhin nu yucu ndo.

²⁵ Ta sica iñi vatyi cuñi tucu si sa natasi sii ra hermano Epafroditu nu yucu ndo. Maa ndo i tasi sii ra ihyá sa tyindyee ra sii, sihin tyiño ya. Ta ñin ñi i sahñi tahan ndi sihin cuihna sa cuenda Tuhun Ndyoo.

²⁶ Cuñi xaan ra Epafroditu cunuhu ra nu yucu ndo. Ta sica xaan iñi ra vatyi sa sito maa ndo vatyi i cuhu xaan ra ihyá.

²⁷ Ta ndisa i cuhu xaan ra ndya cuhva sa yatyí cuii cuu ra, zoco i

cundahvi xaan iñi ra Ndyoo sii ra. Ta ña iin fi sii maa ra, i cundahvi tucu iñi ra Ndyoo sii, ta ña saha ra sa cuu ra coto nducuihya xaan ca iñi ta ziquí vityi.

²⁸ Yucuan cuenda cuñi sa cu-nanuhu ra vatyi cua ndyehe ndo sii ra inga saha, ta zii cua cuñi ndo. Ta tacuan ta ma caca ca iñi vatyi cua ndyehe ndo vatyi iyo vaha ra.

²⁹ Tiin cuenda vaha ndo sii ra sa cuenda ra ndyaca ñaha sii yo ta sihin sa zii cuñi ndo. Tyaa xaan ndo yahvi sii ra ta sii inga ñiyivi tañi maa ra

³⁰ vatyi sa yatyi cuii cuu ra sa cuenda tyiño ra Cristo. Ñá sica iñi ra vazu cua cuu ra. Ta i tyindyeer a sii, sa cuenda maa ndo vatyi ñá cuu quisi tyindyeer maa ndo sii.

3

Cuhva ndundooy o ityi nuu ra Ndyoo sa ndisa

¹ Ta vityi ndoho hermanos cuzii xaan iñi ndo sa cuenda ra ndyaca ñaha sii yo. Ña yii cuu si cuenda mi vazu cuaha saha tyei sa zuun ñi cuhva sa sa tyei sii ndo vatyi tyindyeer si sii maa ndo.

² Zacuenda vaha xaan ndo sii ndo sihin ra quiñi iyo. Zavaha ra cuhva cuñi cuhnra. Catyi ra vatyi cua cacu añima ñiyivi tatu zavaha ñu costumbre circuncisión.

³ Zoco sito yo vatyi ña tacuan cua cacu yo. Quiví i saha cuenda yo sii yo sii ra Ndyoo cuu si tañi i tyaa maa ra tuñi ra sii yo vatyi i zandasi ra cuatyi yo. Ta zacahnu maa yo sii ra sihin cuhva saha Tatyi Ii ra sii yo. Ta zii xaan cuñi yo vatyi cuenda ra Jesucristo cuu sii yo. Ta ña sica iñi yo vatyi cua cacu yo sa cuenda costumbre sa zavaha yo.

⁴ Yoñi yo cua cacu sihin cuhva zavaha ñi maa yo. Tatu ndisa vatyi cuu cacu yo sihin sa zavaha yo, vatyi ca cua cacu mi ta ziquí tandihinga ra

⁵ vatyi uña quiví ñi mi, ta i zavaha ñu costumbre circuncisión cuan sihin. Ra hebreo cui, tata ra Benjamín. Yiví inga tata cui, maa ñi tata hebreo. Ta minoo ra fariseo i cui, ta i site ta i tyei yahvi sii tandihí cuii ley sahnu.

⁶ I tyaa xein yahvi sii ley sahnu cuan, ta yucuan cuenda i zayanga xein sii ñiyivi sa cuu cuenda ra Cristo. Ta i zavehi tandihí cuii sa catyi ley sahnu cuan, ta yucuan cuenda yoñi cuu tyaa cuatyi sate sa cuenda si.

⁷ Zoco tandihí sa i sica iñi quiví cuan vatyi ñiñi si, ñia vale ca si vatyi maa ra Cristo cuu ra zacacu sii.

⁸ Ta site vatyi tandihí sa i zavehi, ña vale si, ta ña tyaa que yahvi sii si vatyi ñiñi xaan ca sa coto yo sii ra Cristo Jesús, ra ndyaca ñaha sii yo. Yucuan cuu sa vale xaan ca. Ta tyaa siye tandihí inga cuhva sa i zavehi, ta cuu si tañi mihin sa cuenda mi vatyi cuñi xaan que sa cote sii ra Cristo.

⁹ Cuñi xaan que ndu-iin sihin ra. Ñá ndundooy o ityi nuu ra Ndyoo sihin sa tyei yahvi sii ley sahnu, zoco sa cuenda sa sino iñi sii ra Cristo ta catyi ra Ndyoo vatyi vehi.

¹⁰ Ta vityi cuñi xein cote sii ra Cristo. Cuñi cote yozo caa iyo tundyee iñi sii maa ra vatyi i nandoto ra sisi sa i sihi ra. Ta cuñi ndyehi tundoho iin ñi sihin maa ra ta sa cuenda ra. Ta cuñi sa cuu tandihí cuii cuhva ña vaha sa cuñi zavehi

¹¹ vatyi cuñi cui minoo ra cua nandoto sa cuenda ra Cristo quiví cua cui.

Cua cuhun yo ityi nuu ca sihin ra Ndyoo

¹² Ñá catyi sihin ndo vatyi ñahñi ca sa cumañi sii, ta sa ndui minoo ra vaha xaan vityi. Ña tacuan. Zoco cuahan que ityi nuu ca. Cuñi sa ñihi sa saha ra Cristo Jesús sii, vatyi maa ra cuu ra i casi sii, ta i ndui ñiyivi ra.

¹³ Hermanos, ña sica iñi vatyi sa ndui minoo ra vaha xaan tañi ra

Cristo. Zoco ihya cuu sa zavehi, zanei iñi sii tandihí sa i yaha, ta zañihí ta cuehin ityi nuu ca.

¹⁴ Cuñi ñihi tandihí sa cua cuhva ra Ndyoo sii, andiví sa cuenda ra Cristo Jesú. Yucuan cuenda zañihí ta cuehin ityi nuu ca. Cuahan ca sino ifíi tahan tahan quiví.

¹⁵ Yucuan cuenda tandihí yo sa sino xaan iñi, nacaca iñi yo cuhva ya. Ta tatu iyo minoo ndo ña sica iñi ndo cuhva ya, cua cuhva ra Ndyoo sa cutuñi iñi ndo.

¹⁶ Zoco ihya cuu sa cuñi si; cuñi si sa caca iñi yo ta zavaha yo tandihí sa vaha sa i cutuhva yo.

¹⁷ Hermanos, cundyico ndo sii. Ta zaha ndo cuenda yoo inga ra zavaha cuhva zavehi.

¹⁸ Sa cuaha xaan saha catyi sihin ndo, ta vityi cuihya xaan cuñi ta saqui ta nacatyi sihin ndo inga saha vatyi iyo cuaha xaan ra zacuaha ra vatyi ña ñiñi cuu sa i sihi ra Cristo.

¹⁹ Ta quiví cua quisi ra Cristo cua cuhun ra cuan andyaya. Ña zacahnu ra sii ra Ndyoo. Zacahnu ra sii ñaa ndihí cuii ca sa cuñi maa ra zavaha ra. Zavaha ra sa quiñi, ta ña cahan nuu ra sihin si. Sino ca zacahnu ra sii ra sa cuenda sa quiñi zavaha ra. Ta sica iñi ra iin ñi sa cuenda sa iyo ñuu ñiyivi ya.

²⁰ Zoco andiví cuu ñuu maa yo, ta ndatu yo quiví cua quisi tucu ra Jesucristo, ra ndyaca ñaha sii yo. Maa ra cua zacacu sii yo.

²¹ Ta cua zama ra coño ñuhu sa iyo sii yo ihya ñuu ñiyivi. Ta cua zanduvaha ra inga coño ñuhu yo tañi coño ñuhu maa ra. Sihin tundyee iñi maa ra cua zama ra sii yo. Ta sihin sa zuun ñi tundyee iñi cuan ndyaca ñaha ra sii tandihí cuii sa iyo.

4

Tandihí tyiemvu nacuzíi iñi yo sihin ra Ndyoo

¹ Cuñi xein sii ndo, hermanos. Ñoho xaan iñi sii ndo. Zíi xaan cuñi sihin ndo vatyi yivi sa caha ñi i nacatyi Tuhun Ndyoo sihin ndo. Coto ñáha ndoyo ñuhu ndo sihin Tuhun Ndyoo.

² Ta vityi sica xein tumañi iñi sii ña Evodia ta sii ña Síntique vatyi nacoo sa vaha sihin minoo ña ta sihin inga ña vatyi yucuan cuu sa cuñi ra ndyaca ñaha sii yo.

³ Ta yoho ra tehin, ra vaha xaan, sique suun vatyi tyindyeun sii ñu sa nacoo sa vaha sihin ñu vatyi i tyindyeen nduu tahan ñu sii, sa zacote Tuhun Ndyoo sihin ra Clemente ta inga zuhva ca ra. Ta ndyaa ziví ñu nu libro ra Ndyoo andiví.

⁴ Cuzíi iñi ndo sihin ra ndyaca ñaha sii yo tandihí cuii tyiemvu. Ta catyi sihin ndo inga saha, cuzíi iñi ndo sihin ra ndyaca ñaha sii yo.

⁵ Ta nandyehe tandihí ñiyivi vatyi ñiyivi vaha cuu ndo sa ndisa. Ta nacohon iñi ndo vatyi sa cuñi quisi ra Cristo.

⁶ Ma caca xaan iñi ndo, zoco tandihí tyiemvu cahan ndo sihin ra Ndyoo, ta caca ndo tandihí sa siñi ñuhu sii ndo sii ra. Ta ziquí nacuhva ndo tyahvi ndyoo sii ra sa cuenda sa cuahva ra.

⁷ Ta cua cuhva ra Ndyoo sa coo sa taxi añima ndo. Cahnu xaan cuu sa taxi sa saha maa ra. Yoñi cuu cutuñi iñi cuhva sa cahnu xaan si. Cua coo sa taxi añima ndo ta sihin sa siñi tuñi sii ndo vatyi iin ñi cuu ndo sihin ra Cristo Jesú.

Nacaca iñi yo maa ñi sa vaha

⁸ Hermanos, caca iñi ndo maa ñi sa ndisa ta sa ndoo ta sa ndíi. Caca iñi ndo sii sa ña quiñi, sii sa tyaqui ta sa vaha. Caca iñi ndo sii sa tahan iñi ra Ndyoo ta sa cuenda cuhva vaha zavaha ñiyivi.

⁹ Zavaha ndo cuhva i zacuehi sii ndo, tandihí sa i nacatyi sihin ndo ta cuhva i ndyehe ndo i zavehi. Ta cua ndoo xaan ra Ndyoo sihin ndo.

Ta cua cuhva xaan ra sa coo sa taxi
añima ndo.

*I tyindyee ñiyivi ñuu Filipos sii ra
Pablo*

¹⁰ Zii xaan cuñi, ta zacahni sii ra Ndyoo vatyi i tyindyee ndo sii, inga saha sihin xuhun. Ta site vatyi cuñi ndo tyindyee ndo sii, tandihí saha, zoco ña cuu.

¹¹ Ña catyi cuhva ya vatyi iyo sa siñi ñuhu sii, vatyi sa cutuhve ndoi vaha sihin sa iyo sii, vazu iyo cuaha a vazu ñahñi.

¹² Ndoi vaha tatu iyo cuaha xaan sa sii, a vazu ñahñi. Cundyee iñi vazu sizoque, ta vaha tucu cuñi tatu iyo sa casi. Site cuzoque, ta site casi vehi.

¹³ Tundyee iñi maa ra Cristo zandundyee xaan si iñi, ta cuu zavehi ñaa sa cuñi maa ra.

¹⁴ Zoco vaha cuhva zacuu ndo vatyi i tyindyee xaan ndo sii, sihin tundoho sa ndyehi vityi.

¹⁵ Sito ndo vatyi quivi i quisaha nacatyi Tuhun Ndyoo i quite nu cu si Macedonia, ta yoñi inga ñiyivi i tyindyee sii. Maa ñi maa ndoho ra ñuu Filipos i saha xuhun sii, vatyi i tyindyei sii ndo sihin Tuhun Ndyoo.

¹⁶ Ta quivi i sindyei ñuu Tesalónica, i tyindyee ndo sii, sihin xuhun uu saha a uñi saha.

¹⁷ Ta ña catyi cuhva ya vatyi cuñi xuhun ndo, zoco cuñi sa cua coo ca sa vaha sii maa ndo ityi nuu ra Ndyoo.

¹⁸ Ta vityi ñahñi sa siñi ñuhu sii. Ndyaa cuaha ca sa i zaquisi ndo sihin ra Epaafrodit. Ta sa tasi ndo cuan cuu tañi minoo xico azi, saa nu ndyaa ra Ndyoo. Tahan xaan iñi ra cuhva cuan.

¹⁹ Ta cua cuhva ra Ndyoo tandihí sa siñi ñuhu sii maa ndo. Iyo xaan sa cuca ra ndya gloria, ta cua cuhva ra sa siñi ñuhu sii ndo sa cuenda ra Cristo Jesús.

²⁰ Nazacahnu yo sii ra Ndyoo Zutu yo tandihí cuii tyiemvu. Ta nacuu si sa ndisa.

Nu ndihí cahan ra Pablo
²¹ Tasi minoo nacumi sii tahan tahan ndo, ra sino iñi sii ra Cristo Jesús. Ra ndyaa sihin mi tasi tucu ra minoo nacumi sii ndo.

²² Ta tandihí ñu sino iñi ihya tasi ñu minoo nacumi sii maa ndo, ta cuaha ca ñu yucu vehe ra ndyaca ñaha, ra César.

²³ Ta tumañi iñi sa saha ra Jesucristo, nacoo xaan si sihin tandihí ndo. Ta nacuu si tacuan.

Minoo Carta I Tasi Ra San Pablo Sii Ñiyiví Sino Iñi Sii Ra Ndyoo Nuu Colosas

*Tyaa ra Pablo minoo carta sii
ñiyiví sino iñi sii ra Ndyoo ñuu
Colosas*

¹ Yuhvi ra Pablo, minoo ra apóstol cui cuenda ra Jesucristo, cuhva cuñi ra Ndyoo. Sihin ra Timoteo yañi yo

² tyaa ndi carta ya sii ndoho ra sino vaha iñi sii ra Cristo ñuu Colosas. Nacuhva xaan ra Ndyoo Zutu yo tumañi iñi sii ndo, ta nacuhva ra sa coo sa taxi añima ndo.

*Cahan ra Pablo sihin ra Ndyoo
sa cuenda ñu sino iñi*

³ Tandihi saha sa cahan ndi sihin ra Ndyoo Zutu ra Jesucristo sa cuenda ndo, nacuhva ndi tyahvi ndyoo sii ra

⁴ vatyi ñihí ndi tuhun vatyi sino xaan iñi ndo sii ra Cristo Jesús, ta cuñi xaan ndo sii tandihi ñiyiví sino iñi.

⁵ Tacuan iyo ndo vatyi sito vaha ndo vatyi cua coo ndo sihin ra Ndyoo andivi. Ta i ñihí ndo tuhun cuan quivi i siñi ndo tuhun ndisa, cuhva cua cacu añima yo.

⁶⁻⁷ Ra Epafras yañi yo i zacoto tuhun cuan sii ndo. Hin ñi zatiyño ra tyiño ra Ndyoo sihin mi. Cuu ra minoo muzu vaha ra Jesucristo sa cuenda maa ndo. Ta tacuan ta i saa tuhun cuan nu ndyaa ndo. Ta nacahnu ñuu ñiyiví sitya si. Ta cuaha ñiyiví saha ñu sii ñu sii ra Ndyoo tañi i zavaha maa ndo quivi i sito ndo sa ndisa cuii vatyi cuñi xaan ra Ndyoo sii yo.

⁸ I zacoto ra Epafras sii ndi sa cuenda maa ndo vatyi cuñi xaan ndo sii ñiyiví sino iñi vatyi iyo Tatyi li ra Ndyoo añima ndo.

⁹ Yucuan cuenda ndya quivi i sito ndi tuhun cuan, ta ñá zaña ndi sa cahan ndi sihin ra Ndyoo sa cuenda ndo. Cuñi xaan ndi sa cua coto ndo tandihi cuii sa cuñi ra Ndyoo sa zavaha ndo. Ta cuñi ndi sa cua cuhva maa ra sa siñi tuñi maa ra sii ndo, ta cua cutuñi vaha iñi ndo sihin cuhva saha Tatyi li ra sii ndo.

¹⁰ Vatyi tacuan ta cua cuu zavaha ndo tandihi sa tahan iñi ra Ndyoo cuhva tahan si zavaha ndo. Ta cua zavaha xaan ndo tandihi nuu sa vaha. Ta cua coto ndo sii ra Ndyoo vaha ca tahan tahan quivi.

¹¹ Ta sica ndi sii ra Ndyoo vatyi cua zandundyee xaan ra sii ndo sihin tundyee iñi sii maa ra. Ta tacuan ta cua cundyee xaan iñi ndo ndyehe ndo tundoho, ta zii xaan cua cuñi ndo.

¹² Ta cua nacuhva ndo tyahvi ndyoo sii ra Ndyoo Zutu yo. Maa ra i zanduu ñiyiví vaha sii yo, ta cua ñihí yo sa vaha sa cua cuhva ra nu ndisi xaan sii ñiyiví sino iñi sii ra.

¹³ I zacacu ra Ndyoo sii yo cuhva ndyaca ñaha sa ñaa sii yo. Ta saha ra sii yo sii zehe ra sa cundyaca ñaha ra, ta cuñi xaan ra sii Zehe ra.

¹⁴ I zata ra Ndyoo sii yo sihin niñi ra Cristo, ta i zandasi ra cuatyi yo.

*Vityi iyo sa vaha sii yo sihin
ra Ndyoo vatyi i sihi ra Cristo sa
cuenda maa yo*

¹⁵ Ña ndyehe yo sii ra Ndyoo. Zoco i nduu ra minoo ñiyiví, ta cuhva cuan cuu coto yo sii ra. Ta yucuan ra cuu ra Cristo, Zehe ra Ndyoo. Cumañi ca sino ñuu ñiyiví ta sa iyo ra Cristo.

¹⁶ Ta i saha ra Ndyoo sa zavaha ra Cristo tandihi sa iyo andivi ta nu ñihu. Sa cuu ndyehe yo ta sa ña cuu ndyehe yo i zavaha ra. I zavaha ra ángel andivi. Ta i zavaha ra cuihna ta tatyi cuihna. Ta tandihi sa ndyaca ñaha nu ñihu i zavaha ra, ta sa cuenda maa ra i sino si. Ta sityiño ra sii si yozo cuhva cuñi maa ra.

¹⁷ Cumañi ca coo tandihí si, ta sa iyo maa ra. Ta sa cuenda maa ra ta tañaha ca naa sa zavaha ra.

¹⁸ Ta maa ra cuu xiñi sii tandihí yo sa sino iñi sii ra, ta cuu yo tañi coño ñuhu ra. Xihna ca maa ra i nandoto sisi sa i sihi ra. Ta yucuan cuenda ra cu nuu cuu ra sii tandihí cuii sa iyo.

¹⁹ Vatyi cuñi maa ra Ndyoo vatyi coo tandihí tundyee iñi maa ra sihin ra Cristo ta cundyaca ñaha ra sii tandihí.

²⁰ Ta i cuñi ra Ndyoo vatyi tandihí sa iyo, coo vaha si sihin ra. Yucuan cuenda i sihi ra Cristo, ta sihin niñi ra i zanduvaha ra Ndyoo sii tandihí sa iyo ta ndya cuhva ndya maa yo sihin maa ra. Sa iyo nu ñuhu ta sa iyo andivi i zanduvaha ra Ndyoo sii si sihin ra.

²¹ Ta i zanduvaha ra sii maa ndo sihin ra vazu ñiyivi xaan iñi sii ra Ndyoo i cuu ndo sa cuenda sa ña vaha i zavaha ndo.

²² Zoco i cundahvi iñi ra Ndyoo sii ndo, ta yucuan cuenda i tasi ra sii Zehe ra sa cuu ra nuu cruz. Ta i ndyehe ra tundoho sihin coño ñuhu ra, ta i sihi ra vatyi tacuan ta cua cuhva ra sii ndo sii ra Ndyoo. Ta sa nduu ndo ñiyivi vaha ta ñahñi ca cuatyi ndo

²³ tatu ma ndoyo ñuhu ndo sihin cuhva sino iñi ndo, ta tatu ma zandoo ndo cuhva sa ñii iñi ndo sii Tuhun Vaha sa i siñi ndo. Sa sito tandihí ñiyivi ñuu ñiyivi tuhun cuan. Ta zuun ñi yuhvi ra Pablo cuu minoo ra zacoto sii si.

Ndyizo ra Pablo tyiño sa zacoto ra tuhun sa cuenda ra Cristo tahan tahan ñuu nu iyo ñiyivi sino iñi

²⁴ Ta vityi zii xaan cuñi vatyi ndyehei tundoho sa cuenda maa ndo. Tañi sa ndyehe ca ra Cristo tundoho cuu si vatyi ndyehei tundoho sihin coño ñuhu sa cuenda maa ra. Ta zandihí tyiño i zavaha ra sa cuenda maa yo sa cuu coño ñuhu ra.

²⁵ Ta yuhvi cui minoo ra zacoto tuhun ra Cristo vatyi yucuan cuu

tyiño i saha ra Ndyoo sii, sa cuenda maa ndo. Cuñi ra sa cua zacote tandihí tuhun ra nacahnu cuii.

²⁶ Zacote tuhun sa sicoo xehe ndya ta tyiemvu, zoco vityi zañaha ra Ndyoo sii si sii ñiyivi sino iñi sii ra.

²⁷ Ta tañi maa ndo sa yivi ñiyivi hebreo cuu, cuñi ra Ndyoo sa coto ndo tuhun sa sicoo xehe cuan vatyi yaha xaan vaha si. Ta tuhun xehe sa sito ndo vityi cuu sa iyo ra Cristo añima yo. Ta sa cuenda maa ra cua cuhun yo andivi nu ndyaa ra Ndyoo.

²⁸ Ta tuhun sa cuenda ra Cristo cuu sa zacoto ndi sii tandihí ñiyivi. Zayuhu ndi sii ñu, ta zacuahua ndi sii ñu vatyi cua cutuñi vaha iñi ñu ta cua cuahnu vaha tandihí ñu sihin cuhva sino iñi ñu vatyi iñi ñi cuu ñu sihin ra Cristo.

²⁹ Yucuan cuenda zatyiño xein sihin tundyee iñi ra Cristo sa saha xaan ra sii.

2

¹ Cuñi sa cua coto ndo vatyi sica xaan iñi sa cuenda ndo, ta cahan xein sihin ra Ndyoo sa cuenda maa ndo, ta ñiyivi ñuu Laodicea, ta tandihí inga ñiyivi ta ndyehe ca sii.

² Sique sii ra Ndyoo vatyi nandundyee ca iñi tandihí ndo, ta iñi xaan cuu ndo, ta cuñi xaan ndo sii tahan ndo vatyi sihin cuhva cuan ta cua cutuñi vaha ca iñi ndo yozo caa coto vaha ca ndo sii ra Cristo vatyi maa ra cuu tuhun xehe sa zacoto ra Ndyoo sii yo vityi.

³ Maa ra Cristo saha tandihí sa cuu sa vaha. Ta tandihí sa siñi tuñi vaha sii yo, maa ra saha. Tatu sito yo sii ra Cristo, sito yo sii ra Ndyoo.

⁴ Ta nacatyi cuhva ya sihin ndo coto zandavi ñaha ñiyivi sii ndo sihin tuhun tyaqui

⁵ vatyi vazu yoñi ndyaa sihin ndo zoco ñoho xaan iñi sii ndo. Zii xaan cuñi sa cuenda ndo vatyi vaha xaan cuhva yucu ndo. Ta vaha xaan ndyico ndo sii ra Cristo.

⁶ Yucuan cuenda tañi cuhva i sino iñi ndo sii ra Cristo Jesúz quiví cuan, zuun ñi cuhva cuan cuhun ndo ityi nuu sihin ra.

⁷ Quihi ñaa ndo sii ra ñihí ca. Nacohon iñi ndo vatyi maa ra saha cuhva saa coo ndo. Nacuní ca iñi ndo sii ra tañi i cutuhva ndo. Ta ndita cuii ñi nacuhva ndo tyahvi ndyoo sii ra Ndyoo.

Cuhva saa sa saha ra Cristo coo yo

⁸ Zazuenda vaha ndo sii ndo, ta ma cuhva ndo sa zandavi ñaha ñiyívi sii ndo sihin tuhun ña ndisa, cuhva sa sica ñi iñi maa ñu. Ña sino iñi ñu sii ra Cristo. Maa costumbre ñi ndyico ñu.

⁹ Yívi sa ndisa cuu cuhva zacuahua ñu vatyi tandíhi sa ndisa ta tandíhi tundayee iñi ra Ndyoo iyo si sihin ra Cristo vatyi Ndyoo cuu ra.

¹⁰ Ta sa ndu-iin ndo sihin ra Cristo, ta yucuan cuenda sa situ cuii añima ndo sihin Tuhun Ndyoo. Ndyaca ñaha ra Cristo sii tandíhi inga ra ndyaca ñaha, tandíhi ángel, ta sii cuihna ndíhi ca.

¹¹ Quiví i nañihi ndo sii ra Cristo, i quihví ra añima ndo, ta i tyaa siyo maa ra sii tandíhi sa ña vaha sa tuhva ndo zavaha. Ñá zavaha ndo costumbre circuncisión tañi ñiyívi hebreo. Sica iñi ñu vatyi sihin sa yucuan ñi ta nduu ñu ñiyívi ra Ndyoo. Zoco i nduu maa ndo ñiyívi ra Ndyoo vatyi i zanduvaha ra añima ndo.

¹² I sihi ra Cristo, ta i tyihi ñu sii ra sisi ñaña, ta ziquí i zanandoto ra Ndyoo sii ra. Ta quíví i sicoo ndutya maa ndo sihin ndutya, cuu si tañi sa sihi ndo sihin ra Cristo. Ta ziquí i zanandoto ra Ndyoo sii ndo. Ta vityi iyo ndo minoo cuhva saa.

¹³ Quiví tañaha ca coto ndo sii ra Ndyoo i cuu ndo tañi ñiyívi i sihi, sa cuenda cuatyi ndo, ta sa cuenda sa ñá sito ndo ley ra Ndyoo. Zoco i zandasí ra Ndyoo cuatyi ndo quiví i sino iñi ndo sii ra Cristo, ta i saha

ra minoo cuhva saa coo ndo iin ñi sihin ra Cristo.

¹⁴ I zañaha ley sahnu cuan cuatyi yo. I catyi si vatyi tahan si cuhun yo andyaya vatyi ñá tyaa yo yahvi sii si. Zoco i zanaa ra Ndyoo cuhva iyo sii ley cuan quiví i sihi ra Cristo nu cruz.

¹⁵ Ta quiví i sihi ra nu cruz i zañacanaa ra sii cuihna ta sii tandíhi tatyi cuihna sa ndyaca ñaha ñuu ñiyívi ya. Ta ityi nuu tandíhi ángel i zañaha ra vatyi cahnu ca maa ra ta ziquí cuihna.

Nacuñi xaan yo sa vaha sa saha ra Ndyoo

¹⁶ Ña tahan si sa tyaa ñiyívi cuatyi sata ndo sa cuenda sa casi ndo a sa coho ndo a sa cuenda sa ña zavaha ca ndo vico zandu a vico luna saa a tatu ña tyaa xaan ndo yahvi sii quiví quitatu ñiyívi. (Quiví cumañi ca quisi ra Cristo i zavaha ñiyívi cuhva cuan vatyi tacuan cua cacu ñu cuñi ñu.)

¹⁷ Zoco vityi sito yo vatyi ma cacu yo sihin cuhva cuan vatyi yívi sa ñiñi cuu si sa ndisa vatyi ra Cristo cuu ra cua zacacu sa ndisa cuii sii yo.

¹⁸ Ma cuhva ndo sa catyi ñiyívi sihin ndo vatyi ma cacu ndo vatyi ña zacahnu ndo sii ángel ta ña tuhva ndo cahñi zoco sii ndo. Catyi ñiyívi cuan vatyi sito xaan ñu, zoco ña cahan ñu sa ndisa. Sica iñi ñu vatyi ñiñi xaan ca maa ñu vatyi i zañaha ra Ndyoo cuaha xaan ñimahna sii ñu.

¹⁹ Zoco ña ndyico ñu sii ra Cristo, ta yucuan cuenda zavaha ñu cuhva cuan. Zoco maa yo ndyico yo sii ra Cristo. Coño ñuhu ra cuu yo, ta maa ra cuu xiñi yo. Ta zacuahnu ra sii coño ñuhu ra sihin sa vaha sa saha ra sii yo. Ta zandu-iin ra sii yo. Ta zandundyee ra sii yo sihin tundayee iñi maa ra cuhva cuñi ra Ndyoo.

²⁰ Tañi sa sihi ndo sihin ra Cristo cuu si, ta ñia iyo ca ndo sa cuenda cuhva iyo si ñuu ñiyívi ya. ¿Ta ñaa cuenda iyo ca ndo tañi ñiyívi ña sito

sii ra Ndyoo? ¿Ta ñaa cuenda tyaa ndo yahvi sa catyi ñiyivi zavaha cuhva cuan?

²¹ Vatyi tyehen catyi ñu: "Ma cuetyño ndo sa ihya, ta ma casi ndo sa yucuan, coto ma cacu ndo." Catyi ñu.

²² Zoco ña ndisa sa cahan ñu vatyi maa ñi cuhva sa sica iñi maa ñu cuu si. Sa casi yo cuu sa cuenda zuhva ñi quivi, ta ma zativi si sii yo ityi nuu ra Ndyoo.

²³ Ndisa vatyi cuhva zacuaha ñiyivi cuan, vaha xaan caa si tañi minoo sa siñi tuñi vaha xaan vatyi zandyee xaan yo iñi yo ta zavaha yo sii si, ta zanduluhlu yo sii yo zacuu si, ta ña tyaa ca yo yahvi sii cuhva cuñi coño ñuhu yo zacuu si. Zoco nusin ta ma tyindyee si sa ndisa cuii sii yo ta cuu zama yo cuhva ña vaha sa iyo sii yo.

3

¹ Saha ra Ndyoo minoo cuhva saa coo yo vatyi i nandoto ra Cristo. Ta vityi ndyaa ra siyo cuaha ra Ndyoo andivi. Yucuan cuenda nducu ndo sa vaha sa saha ra Ndyoo sii ndo ndya andivi.

² Nduku xihna ndo sa vaha sa saha ra Ndyoo sii yo andivi. Ta ma caca xaan iñi ndo sa cuenda sa iyo ñuu ñiyivi ya.

³ Vatyi tañi sa i sihi ndo cuu si sa cuenda sa ña vaha i sicoo ndo ityi sata. Ta vityi iyo ndo iñi ñi sihin ra Ndyoo minoo cuhva saa sa saha ra Cristo sii ndo.

⁴ Maa ra Cristo cuu ra saha cuhva saa ya coo yo. Ta quivi cua quisi ra, cua ndyehe ñiyivi vatyi maa ra cuu ra cahnu ca. Ta cua cundyaca ñaha tucu maa yo sihin ra.

Cuhva i sicoo yo ityi sata, ta cuhva cuñi si coo yo vityi

⁵ Yucuan cuenda cuñi si sa zandihí yo tuhun sa zavaha yo sa ña vaha sihin coño ñuhu yo tañi zavaha ñiyivi ñuu ñiyivi ya. Ma cuzu ndo sihin minoo ñaha tatu ma tindaha xihna ndo. Ma caca iñi ndo

tuhun quiñi, ta ma cuñi ndo zavaha ndo sii si. Ma cuñi xaan ndo zavaha ndo sa ña vaha a sa quiñi cuhva ña tahan si zavaha ndo, ta ma cuñi xaan ndo xuhun vatyi yucuan cuu tañi sa zacahnu ndo sii inga ndyoo.

⁶ Sa cuenda tandihí cuhva ya, cua cuxaan xaan ra Ndyoo sihin ñiyivi ña tyaa yahvi sii ra, ta cua tasi tuñi ra sii ñu.

⁷ Ta quivi cumañi ca coto yo sii ra Ndyoo, i zavaha yo cuhva ña vaha cuan.

⁸ Zoco vityi ma zavaha ca yo sii si. Ma cuxaan xaan yo. Ma quiñi xaan cahan yo sihin ñiyivi. Ma cahan cuehe yo sii ñiyivi a cahan yo ndya vaha ñi.

⁹ Ma cahan ndo cuendu sihin ra tahan ndo vatyi vityi sa nduu yo ñiyivi saa, ta ña zavaha ca yo sa i zavaha yo ityi sata.

¹⁰ Vityi iyo yo minoo cuhva saa. Yucuan cuenda cuñi si nducu yo cuhva coo yo cuhva cuñi ra Cristo. Ta sihin cuhva cuan cua coto vaha ca yo sii ra, ra i saha cuhva saa ya coo yo.

¹¹ Ta vityi ña ñiñi ca tatu ñiyivi hebreo cuu yo a yivi a tatu zavaha yo costumbre circuncisión a ña zavaha yo. Ña ñiñi vazu ñiyivi inga ñuu cuu yo a vazu ña casi xaan iñi yo a vazu muzu cuu yo a vazu patrón cuu yo. Ña ñiñi tandihí si cuan. Sa ñiñi ca cuu sa iñi ñi cuu yo sihin ra Cristo vatyi maa ra cuu ra saha cuhva saa coo yo, ta ma ndihí si.

¹² Cuñi xaan ra Ndyoo sii ndo. I casi ra sii ndo ta zanduu ra ñiyivi vaha xaan sii ndo ityi nuu ra. Yucuan cuenda cundahvi iñi ndo sii inga ñiyivi, ta cuu ndo ñiyivi vaha sihin ñu. Zanduluhlu ndo sii ndo. Vii xaan coo ndo, ta ndyee xaan cuu iñi ndo sihin ñiyivi.

¹³ Ndyee xaan cuu iñi ndo sihin minoo ndo ta sihin inga ndo, ta zaha ndo tucahnu iñi sii inga ndo

tatu iyo tizíhi. I zaha ra Cristo tucahnú iñi sii maa ndo. Tacuan tucu zavaha ndo sihin tahan ndo.

¹⁴ Ta sa ñíñi xaan ca cuu sa cuñi xaan ndo sii ñiyiví. Yucuan cuu sa zandu-iin sii yo.

¹⁵ Ta sa taxi sa saha ra Cristo, nacundyaca ñaha si sii añima ndo vatyi yucuan cuenda i cana ra Ndyoo sii ndo ta zandu-iin ra sii ndo. Ta nacuhva xaan ndo tyahvi ndyoo sii ra Ndyoo tandihí tiemvu.

¹⁶ Ta nacutu cuii tuhun ra Cristo añima ndo. Zazuaha ndo ta cuhva ndo sa siñi tuñi vaha sii ra tahan ndo sihin sa siñi tuñi sa saha maa ra Ndyoo. Ta zacahnu ndo sii ra Ndyoo sihin sa cata ndo salmo a yaa Ndyoo a yaa sa saha Tatyi Li sii ndo. Cata ndo sihin tandihí añima ndo. Ta nacuhva xaan ndo tyahvi ndyoo sii ra.

¹⁷ Ta ñaa sa zavaha ndo, ta ñaa sa cahan ndo, zoco zavaha ndo sii si tañi minoo tyiño ra Jesús, ra ndyaca ñaha sii yo. Ta nacuhva xaan ndo tyahvi ndyoo sii ra Ndyoo Zutu yo sa cuenda cuhva tyindyee ra Jesús sii ndo.

Cuhva tahan si zavaha yo vatyi sino iñi yo sii ra Cristo

¹⁸ Ndoho sa iyo yií, tyaa ndo yahvi sii yií ndo vatyi yucuan cuu sa tahan si zavaha ñiyiví sino iñi sii ra ndyaca ñaha sii yo.

¹⁹ Ta ndoho rayíi, cuñi xaan ndo sii ñazihí ndo. Ta ma cuxaan ndo sihin ñu.

²⁰ Ndoho sa ndyihi, tyaa ndo yahvi sii zutu ndo ta sii zihí ndo tandihí cuii cuhva vatyi yucuan cuu sa tahan xaan iñi ra ndyaca ñaha sii yo.

²¹ Ndoho ra cuu zutu sa ndyihi, ma xaan xaan cahan ndo sihin zehe ndo coto nducuihya iñi si.

²² Ta ndoho ra cu muzu, tyaa ndo yahvi sii patrón ndo tandihí sa catyi ra. Ma zavaha ndo sii ndo cuhva sa ndyehe ñi ra vatyi cuñi ndo sa cua cuzíi iñi ra sihin ndo, zoco zavaha ndo sii si sihin

tandihí añima ndo vazu ña ndyehe patrón ndo. Tacuan zavaha ndo vatyi yuhu ndo sii ra Ndyoo.

²³ Ta ñaa sa zavaha ndo, zavaha ndo sii si sihin tandihí cuii añima ndo vatyi zavaha ndo sii si sa cuenda ra Ndyoo ta ña iin ñi sa cuenda ñiyiví.

²⁴ Vatyi sito ndo vatyi cua cuhva maa ra ndyaca ñaha sii yo sa vaha sa tahan si sii ndo vatyi zatyiño ndo tysiño ra.

²⁵ Zoco tatu zavaha yo sa ña vaha, cua ñihi yo minoo sa ma tahan iñi yo vatyi Ndyoo ña ziin ziin ndyehe ra sii yo. Minoo cuhva ndoo xaan cua zandaa ra tysiño cuenda yo sa cuenda cuhva i zavaha yo, a sa vaha a sa ña vaha.

4

¹ Ndoho ra ndyaca ñaha sii muzu ndo, ndoo xaan coo ndo ta minoo cuhva vaha sihin ñu. Nacohon iñi ndo vatyi iyo tucu ra ndyaca ñaha sii maa ndo andivi.

² Cahan ndo sihin ra Ndyoo tandihí cuii cuhva, ta ma cuzu ndo. Ta nacuhva ndo tyahvi ndyoo sii ra Ndyoo.

³ Cahan ndo sihin ra Ndyoo sa cuenda maa ndi vatyi cua cuhva ra Ndyoo cuhva sii ndi sa cahan ndi sihin ñiyiví tuhun xehe sa cuenda ra Cristo. Yucuan cuenda ñohi vehe caa.

⁴ Caca ndo sii ra Ndyoo vatyi casi xaan cua zacote Tuhun ra sii ñu tañi tahan si.

⁵ Casi coo ndo sihin ñiyiví ña sito sii ra Ndyoo, vatyi tacuan ta cuu cahan ndo Tuhun Ndyoo sihin ñu.

⁶ Ta maa ñi tuhun vaha cahan ndo ta sihin sa siñi tuñi vaha vatyi tacuan ta cua ñihi ndo minoo cuhva vaha cahan ndo sihin minoo minoo ñiyiví tatu ndaca tuhun ñu sii ndo sa cuenda Tuhun Ndyoo.

Nu sa cuñi ndihí cahan ra Pablo

⁷ Ra Tíquico, ra hermano yo, cua nacatyi sihin ndo yozo caa iye. Ñihi xaan zatyiño ra tysiño ra Jesús sihin.

⁸ Tasi sii ra nu yucu ndo vatyi cuá zacoto ra sii ndo tandihí yozo caa iyo ndi, ta cuá cuhva ra tundyee iñi sii ndo.

⁹ Cuahan tucu ra Onésimo hermano yo sihin ra. ñin ñi ñuu ra sihin ñuu maa ndo. Vaha xaan ñiyivi cuu ra, ta cuñi xaan yo sii ra. Cua zacoto ra sii ndo tandihí sa tehin nu ndyei ihyá.

¹⁰ Tasi ra Aristarco minoo nacumi sii ndo. Noho ra vehe caa sihin ihyá. Ta ra Marcos tucu, yañi tahan ra Bernabé, tasi ra minoo nacumi sii ndo. Sa tasi tyiño nu yucu ndo sa cuenda ra Marcos vatyi tatu saa ra nu yucu ndo tñin cuenda vaha ndo sii ra.

¹¹ Ta tasi tucu ra Jesús minoo nacumi sii ndo. Justo nañi tucu ra. Maa ñi ra Aristarco sihin ra Marcos ta ra Justo cuu ra ra hebreo ra zatyiño sihin mi sa cuenda tyiño maa ra Ndyoo, ta saha xaan ra tundyee iñi sii.

¹² Tasi tucu ra Epafras, ra ñuu ndo, minoo nacumi sii ndo. Muzu maa ra Jesús cuu sii ra. Cahan xaan ra sihin ra Ndyoo sa cuenda ndo vatyi cuñi ra sa cua ndundyee xaan ca iñi ndo sihin Tuhun Ndyoo ta cua coto ndo, ta cua zavaha ndo tandihí cuii sa cuñi ra Ndyoo.

¹³ Ta sehi sa ndaa sa cuenda ra vatyi cahan xaan ra sihin ra Ndyoo cuenda maa ndo ta cuenda ñiyivi ñuu Laodicea ta ñiyivi ñuu Hierápolis.

¹⁴ Ra Demas ta ra Lucas tasi ra minoo nacumi sii ndo. Ra Lucas cuu ra médico, ra sa cuñi xaan ndi.

¹⁵ Cuhva ndo minoo nacumi sii ra hermano yo ñuu Laodicea ta sii ña Ninfas ta sii ra hermano titahan vehe ña.

¹⁶ Tatu sa yaha cahvi ndo carta ya tasi ndo sii si nu yucu ra hermano ñuu Laodicea, ta cahvi tucu maa ndo carta sa cua tasi sii maa ra.

¹⁷ Ta catyi ndo sihin ra Arquipo nazatyiño vaha ra tyiño i saha ra ndyaca ñaha sii yo sii ra.

¹⁸ Yuhvi ra Pablo sihin ndehi tyei minoo nacumi sii ndo. Ma naa iñi ndo vatyi ñohi vehe caa. Ta ra Ndyoo nanazoco xaan ra sii ndo. Amén.

Carta Sa Xihna Ñi I Tyaa Ra San Pablo Sii Ñiyiví Ñuu Tesalónica

Ra Pablo ta ra tahan ra tyaa ra minoo carta sii ñiyiví sino iñi sii ra Jesús ñuu Tesalónica

¹ Yuhvi ra Pablo sihin ra Silvano ta ra Timoteo tyaa ndi minoo carta ya sii ñiyiví sino iñi sii ra Jesús ñuu Tesalónica. Sa i ndu-iñi ndo sihin ra Ndyoo Zutu yo ta sihin maa ra Jesús, ra ndyaca ñaha sii yo. Naquihin vaha ndo tandihí sa vaha sa saha ra Ndyoo Zutu yo sii ndo ta tacuan tucu saha ra Jesús, ra ndyaca ñaha sii yo. Ta nacoo sa taxi añima ndo sa cuenda maa ra cuan.

Cuhva sino xaan iñi ñiyiví ñuu Tesalónica

² Saha xaan ndi tyahvi ndyoo sii ra Ndyoo sa cuenda tandihí ndo, ta cahan xaan ndi sihin ra sa cuenda ndo.

³ Ta cuhva cahan ndi sihin ra Ndyoo Zutu yo, ta ña naa iñi ndi cuhva iyo ndo vatyi vaha xaan sino iñi ndo ta zatyíñi ndo tyíñi ra. Cuñi xaan ndo sii ra Ndyoo, ta yucuan cuenda zatyíñi ndo tyíñi ra. Ta sino xaan iñi ndo vatyi cua quisi ra Jesús inga saha.

⁴ Ndoho yañi xaa, ra Ndyoo cuñi xaan ra sii ndo, ta sito ndi vatyi maa ra i casi sii ndo.

⁵ Quiví i nacatyi xaan ndi Tuhun Ndyoo sihin ndo cuhva cacu yo, yiví tuhun cahan ñi maa ndi cuu si, zoco i tyindyee xaan Tatyi li sihin cuaha xaan cuhva. Ta i sito vaha maa ndi cuhva cahan ndi vatyi zatyíñi xaan ra Tatyi li. Ta sito tucu maa ndo yozo caa i cuu maa ndi quiví i sindyaa ndi sihin ndo vatyi cuñi xaan ndi tyindyee ndi sii ndo.

⁶ Ta i quisaha zavaha ndo cuhva zañaha ndi ta cuhva zañaha ra Jesús, ra ndyaca ñaha sii yo, vatyi i tiñ cuenda ndo Tuhun Ndyoo

vazu ndyehe xaan ndo tundoho sa cuenda si. Ta zii xaan i cuñi ndo vatyi saha xaan Tatyi li sa zii sii ndo.

⁷ Ta sihin cuhva ya ta i zañaha ndo minoo cuhva vaha sii tandihí ñiyiví sino iñi nu cu si Macedonia ta nu cu si Acaya.

⁸ I zacoto ndo Tuhun Ndyoo sii ñiyiví nu cu si Macedonia ta Acaya, zoco yiví yucuan ñi, nacahnu cuii ta sa sito ñiyiví vityi vatyi sino xaan iñi ndo sii ra Ndyoo. Ta ña cuñi ca si sa nacatyi ndi sihin ñu.

⁹ Zuun ñi maa ñu ta nacatyi ñu yozo caa i cuu quiví sa ndyaa ndi sihin ndo. Nacatyi ñu vatyi vaha xaan i sino iñi ndo sa cahan ndi, ta i zaña ndo sa zacahnu ndo sii ndyoo yutu ta ndyoo caa ta sino iñi ndo sii ra Ndyoo ndito, ra cu Ndyoo sa ndisa. Ta vityi tyaa ndo yahvi sii ra ta zatyíñi ndo tyíñi ra.

¹⁰ Ta nacatyi ñu vatyi ndatu ndo quiví sa cua quisi ra Jesús zehe Ndyoo inga saha ndya gloria. Maa ra cuu ra i zanandoto ra Ndyoo. Maa ra Jesús cua zacacu sii yo, ta ma tasi tuñi ra Ndyoo sii yo quiví cua tasi tuñi ra sii ñiyiví.

2

Tyiño i zavaha ra Pablo ñuu Tesalónica

¹ Ta zuun ñi maa ndo sito ndo, ndoho yañi xaa, vatyi quiví i sindyaa ndi sihin ndo, vaha xaan i cuu.

² Vatyi vazu i ndyehe xaan ndi tundoho ta i cañi xaan ñiyiví sii ndi ñuu Filipos, tañi sa sa sito maa ndo, zoco i tyindyee xaan ra Ndyoo sii ndi, ta ñá yuhu ndi, ta i nacatyi ndi Tuhun Ndyoo sihin ndo vazu i sahñi tahan xaan ñiyiví sihin ndi ñuu ndo.

³ Ta tuhun i nacatyi ndi sihin ndo, ñahñi tuhun ña vaha i nazaca ndi sihin si ta ñahñi tuhun ña ndoo. Ta ñá zandavi ñaha ndi sii ndo.

⁴ Ña tacuan, zoco cuhva i saha maa ra Ndyoo tyíñi sii ndi sa

nacatyi ndi Tuhun ra cuhva cacu ñiyivi, ta tacuan nacatyi ndi. Ña nducu xaan ndi cuhva sa cua cuzii iñi ñiyivi sihin ndi. Cuñi ndi sa cua cuzii iñi maa ra Ndyoo sihin cuhva zavaha ndi vatyi maa ra ndyehe ñaa sa iyo añima yo.

⁵ Ta tañi sa sito maa ndo vatyi numinoo saha ta ña cahan ndi tuhun tyaqui vatyi cuñi ndi zandavi ñaha ndi a vatyi cuñi ndi ñihis ndi xuhun. Ta sito vaha maa ra Ndyoo vatyi sa ndisa quehin.

⁶ Ta ña nducu ndi sa zacahnu ñiyivi sii ndi, a maa ndo a inga ñiyivi. Cuu cundyaca ñaha ndi sii ndo tatu cuñi ndi vatyi maa ra Cristo i tava tyiño sii ndi sa zatyiño ndi tyiño ra. Zoco ña cuñi ndi sa cundyaca ñaha ndi sii ndo.

⁷ Vii xaan i cahan ndi sihin ndo, ta vaha xaan i zavaha ndi tañi zavaha minoo ñuzihi sihin zehe ndyihi ñu vatyi cuñi xaan ñu sii si.

⁸ Ta maa ndi cuñi xaan ndi sii ndo ta yivi Tuhun Ndyoo ñi saha ndi sii ndo. Vazu cuu ndi sa catyi ndo tatu sa vatyi cuu sa tacuan vatyi cuñi xaan ndi sii ndo.

⁹ Vatyi nacohon iñi ndo, ndoho yañi xaa, cuhva i zatyiño xaan ndi. Ñihis xaan i zatyiño ndi tandihí quivi ta sa cuaa vatyi ñá cuñi ndi sa cozo ziqui ndo sii ndi niñi ñi sa i nacatyi ndi Tuhun Vaha ra Ndyoo sihin ndo.

¹⁰ Maa ndo cuu sa ndaa ta maa ra Ndyoo vatyi quivi i sicoo ndi sihin ndoho sa sino iñi ta minoo cuhva vaha xaan i sicoo ndi sihin ndo. Ndoo xaan i zavaha ndi, maa maa ñi cuhva cuñi ra Ndyoo. Ta ñá saha ndi cuhva sii ñiyivi ta cuu tyaa ñu cuatyi sata ndi.

¹¹ Ta sito ndo cuhva i saha xaan ndi tuhun vaha sii ndo ta tundayee iñi ta i cahan ndi sihin ndo tañi cahan minoo zutu sa ndyihi sihin si.

¹² Ta i catyi ndi sihin ndo vatyi coo ndo minoo cuhva vaha xaan tañi ñiyivi sito sii ra Ndyoo. Maa ra i casi sii ndo vatyi coo ndo sihin ra

nu ndyaca ñaha ra, nu iyo tandihí cuii cuhva sii ra.

¹³ Ta yucuan cuenda ña zaña ndi sa saha xaan ndi tyahvi ndyoo sii ra Ndyoo vatyi quivi i siñi ndo Tuhun Ndyoo sa nacatyi ndi sihin ndo ta i sino iñi ndo sii si tañi sa Tuhun Ndyoo cuu si ta yivi tañi tuhun cahan ñiyivi. Ta ndisa vatyi zatyiño xaan si sihin maa ndo sa sino iñi ta zama si cuhva iyo ndo.

¹⁴ Ta vityi tahan si sii ndo, yañi xaa, cuhva tahan si sa xihna ñi sii ñiyivi sino iñi sii ra Ndyoo nu cu si Judea. Vatyi tañi zandyehe xaan ñiyivi hebreo tundoho sii ñu, ta tacuan tucu tahan ndo zacuu ñiyivi ñuu ndo.

¹⁵ Ta ñiyivi hebreo cuan cuu ñu i sahñi sii ra Jesú, ra ndyaca ñaha sii yo. Ta zuun ñi ñiyivi ñuu ñu, ñu i nacatyi cuhva catyi ra Ndyoo sihin ñu, ta i sahñi ñu sii ñu. Zandyehe xaan ñu tundoho sii maa ndi. Ña zavaha ñu cuhva cuñi ra Ndyoo ta sahñi tahan xaan ñu sihin tandihí ñiyivi.

¹⁶ Ña saha ñu sa cahan ndi Tuhun Ndyoo sihin ñiyivi sa yivi ñiyivi hebreo cuu ta cacu ñu. Ta sa catyi sa zavaha ñu hebreo cuhva ya, ta cuaha xaan nduu cuatyi ñu. Zoco vityi cahnu xaan tundoho cua ziqui ra Ndyoo ziqui ñu tandihí cuii tyiemvu.

Cuñi ra Pablo cuhun ra inga saha ndya Tesalónica

¹⁷ Yañi xaa, sa naha xaan sa ña ndyehe ca ndi sii ndo. Ta ña naa iñi ndi sii ndo. Ñoho xaan iñi ndi sii ndo. Ta i nducu xaan ndi cuhva cuhun ndi cua ndyehe ndi sii ndo.

¹⁸ Yucuan cuenda zuun ñi yuhvi ra Pablo i cuñi quisi minoo saha ta inga saha tucu, zoco ñá saha cuihna sa quisi.

¹⁹ ¿Ta ñaa cuenda sica iñi ndi vatyi cua ñihis ndi sa vaha nuu ra Ndyoo? ¿Ta ñaa cuenda zii xaan cuñi ndi ta vaha xaan cuñi ndi? Catyi vatyi sa cuenda maa ndo

vatyi quiví cua quisi tucu ra Jesús ta vaha xaan cua cuu si sihin maa ndi sa cuenda maa ndo.

²⁰ Vatyi sa cuenda maa ndo ta ndyehe ñiyiví vatyi vaha cuu tyiño ndi, ta zii xaan cuñi ndi sa cuenda ndo.

3

¹ Ta yucuan cuenda quiví ñá cuu ca cundyee iñi ndi (sa ma coto ndi yozo caa iyo ndo) i sica iñi ndi vatyi cua ndoo maa ñi mi ñuu Atenas.

² Ta i zacuhun ndi sii ra yañi yo, ra Timoteo, vatyi cua ndyehe ra sii ndo. Minoo muzu ra Ndyoo cuu sii ra. Zatyiño xaan ra sihin ndi sa nacatyi xaan ndi tuhun sa cuenda ra Cristo cuhva cacu ñiyiví. Ta cuu tyindyee ra sii ndo sihin Tuhun Ndyoo ta cua sino ca iñi ndo, ta cua zandundyee ca ra iñi ndo.

³ Vatyi tacuan ta yoñi numinoo ndo ta cua yuhu xaan ndo sa catyi tundoho sa ndyehe ndo vityi. Zuun ñi maa ndo ta sa sito ndo vatyi tahan si ndyehe yo tundoho.

⁴ Vatyi quiví i sindyaa ndi sihin ndo ta i nacatyi ndi sihin ndo vatyi cua ndyehe yo tundoho. Ta cuhva cuan i cuu si, tañi sa sito ndo.

⁵ Ta yucuan cuenda, quiví ñá cundyee ca iñi vatyi cuñi xein cote tatu sino ca iñi ndo, ta i zacuhin sii ra Timoteo vatyi cua ndyehe ra yozo caa iyo ndo sihin cuhva sino iñi ndo. Vazu sa zandavi ñaha cuihna sii ndo ta tyiño i zavaha ndi nu yucu ndo cua naa tandihí si.

⁶ Zoco vityi sa nasaa ra Timoteo sa i sahan ra nu yucu ndo, ta nacatyi ra sihin ndi vatyi vaha xaan sino iñi ndo ta cuñi ndo sii minoo ndo ta sii inga ndo. Ta catyi ra vatyi nacohon xaan iñi ndo sii ndi ta cuñi xaan ndo ndyehe ndo sii ndi tañi maa ndi cuñi xaan ndi ndyehe ndi sii ndo.

⁷ Yucuan cuenda, yañi xaa, vaha xaan cuñi ndi sa ñihi ndi tuhun cuan. Vazu cahnu xaan tundoho ndyehe ndi vityi zoco zii xaan cuñi ndi vatyi sino vaha iñi ndo.

⁸ Ta iyo vaha maa ndi vityi sa ndisa vatyi ñá ndoyo ñuhu maa ndo.

⁹ Saha ndi uu xico tyahvi ndyoo sii ra Ndyoo sa cuenda ndo, ta zii xaan cuñi ndi nuu maa ra sa cuenda ndo.

¹⁰ Ora ta sa cuaa sica xaan ndi sii ra vatyi cuhva ra sa ndyehe ndi sii ndo, ta cua cuu tyindyee ca ndi sii ndo cuhva sino ca iñi ndo, ta ma cumañi sa sino iñi ndo.

¹¹ Ta vityi natyindyee zuun ñi maa ra Ndyoo Zutu yo ta ra Jesucristo ra ndyaca ñaha sii yo ta cua cuu cuhun ndi nu yucu ndo.

¹² Ta natyindyee ra Jesús sii ndo, ta cua cuñi ca ndo sii minoo ndo ta sii inga ndo, ta tacuan cua cuñi ndo sii tandihí ñiyiví tañi cuñi maa ndi sii ndo.

¹³ Ta tacuan ta cua zanduvaha ra añima ndo, ta ñahñi ca cuatyí ndo cua coo nuu ra Ndyoo Zutu yo quiví cua quisi tucu ra Jesús sihin tandihí ñiyiví sino iñi sii ra. Maa ra cuu ra ndyaca ñaha sii yo.

4

Cuhva cuñi ra Ndyoo sa zavaha yo

¹ Ta vityi, yañi xaa, zañiñi xaan ndi sii ndo ta saha xaan ndi tuhun vaha sii ndo sihin cuhva sa saha ra ndyaca ñaha, ra Jesús, sii ndi. Vatyi tañi sa zacuaha ndi sii ndo cuhva coo ndo cuhva cuñi ra Ndyoo, ta tacuan cua zavaha xaan ndo sii si; zoco zavaha ndo sii si cuaha ca.

² Vatyi sito ndo cuhva sa saha ndi tyiño sii ndo tañi sa saha ra Jesús, ra ndyaca ñaha sii yo, tyiño sii maa ndi.

³ Vatyi cuñi ra Ndyoo vatyi cuhva ndo sii ndo sii maa ra sa ndisa. Ta numinoo ndo ta ma coo ndo sihin minoo ñaha tatu ma tindaha xihna ndo sihin ña.

⁴ Nacoo minoo ñi ñuzihí sii sa minoo minoo ndo. Ta ñin ñi sii maa ñu cuñi ndo.

⁵ Ta ma coo ndo tañi ñiyiví sa ña sito sii ra Ndyoo vatyi maa maa ñi

sa ña vaha zavaha ñu sihin cuhva cuan.

⁶ Ta numinoo ndo ta ma zandavi ñaha ndo sii inga yañi yo ta coo xehe ndo sihin ñazihí ra vatyi ñihi xaan cua tasi tuñi ra Ndyoo sii ndo tatu zavaha ndo cuhva cuan tañi sa nacatyi ndi sihin ndo.

⁷ Vatyi ñá casi ra Ndyoo sii yo sa cua zavaha yo sa ña vaha. I casi ra sii yo vatyi zavaha yo sa vaha cuhva cuñi ra.

⁸ Yucuan cuenda yoo ra sa ña tyaa yahvi tuhun quehin ihyia, sii maa ra Ndyoo ña tyaa ra yahvi ta yivi sii minoo ñiyivi. Vatyi saha maa ra Ndyoo Tatyi li ra sii yo vatyi cua zavaha yo cuhva cuñi ra.

⁹ Zoco sa cuenda tuhun sa cuñi yo sii minoo yo ta sii inga yo, ña cuñi si sa tyei vatyi zuun ñi maa ra Ndyoo zacuaha ra sii ndo cuhva cuñi ndo sii tandihí inga yañi yo.

¹⁰ Ta ndisa vatyi sa cuñi ndo sii tandihí yañi yo nacahnu Macedonia, zoco zañiñi ndi sii ndo, yañi xaa, vatyi cuñi ca ndo sii ra ñihi ca.

¹¹ Ta nducu ndo cuhva coo taxi ndo, ta caca iñi ndo iñi ñi tyiño maa ndo. Ta ma cuñi xaan ndo coto ndo tyiño inga ñiyivi. Ta zatyiño ndo sihin ndaha ndo tañi sa saha ndi tyiño sii ndo.

¹² Vatyi tacuan ta cua tyaa ñiyivi ña sito Tuhun Ndyoo yahvi sii ndo, ta ñahñi cua cumañi sii ndo ta cuhva cundito ndo.

Quivi cua quisi tucu ra Jesús

¹³ Yañi xaa, ña cuñi sa ma coto ndo ñaa sa cua tahan ñiyivi sa sihi, coto nducuihya xaan iñi ndo tañi inga ñiyivi sa ña sino iñi.

¹⁴ Sino iñi yo vatyi i sihi ra Jesús ta i nandoto tucu ra. Ta zuun ñi cuhva cuan cua tahan ñiyivi sa sino iñi sii ra Jesús ta sihi ñu vatyi cua zanandoto ra Ndyoo sii ñu.

¹⁵ Yucuan cuenda catyi ndi sihin ndo tañi minoo sa zañaha ra Ndyoo vatyi maa yo tatu ndito yo ndya quivi cua quisi ra Jesús, yivi maa yo

cuhun sa xihna ñi. Xihna ca ñiyivi i sihi.

¹⁶ Vatyi zuun ñi maa ra Jesús cua quisi ra ndya gloria, ta ñihi xaan cua cana saa ra, ta cua cana saa ra arcángel, ta cua tivi ra cutu ra Ndyoo. Ta ziqui sa xihna ñi cua nandoto ñiyivi sa i sihi, ñu i sino iñi sii ra Cristo.

¹⁷ Ta ziqui maa yo sa nandoo ta ndito yo, cua cuhun yo iñi ñi sihin ñiyivi cuan sisi vico. Ta ityi ziqui cua ñihi tahan yo sihin ra Jesús, ra ndyaca ñaha sii yo. Tacuan ta cua coo yo sihin ra Jesús tandihí cuii tyiemvu.

¹⁸ Yucuan cuenda tyindyeo ndo sii minoo ndo ta sii inga ndo sihin tuhun ya.

5

¹ Zoco quivi cua tahan si cuan, a cuiya, ña cuñi si sa tyei ihyia, yañi xaa.

² Vatyi zuun ñi maa ndo sa sito vaha xaan ndo vatyi quivi cua quisi tucu ra Jesús, cua cuu si minoo quivi zana ñi iñi yo. Tañi nu cua quisi minoo ra zuhu sa sa cuua.

³ Cua catyi ñiyivi: “Vaha xaan vityi. Iyo taxi, ta ñahñi cuatyi iyo”, cua catyi ñu. Ta ziqui yatyi xaan cua quisi minoo tundoho cahnu xaan ziqui ñiyivi tañi tundoho sa cacu zehe ñiyivi ta uhu xaan si. Tacuan tucu ma cuu ca quita ñiyivi sisi tundoho vatyi sa saa cuhva tahan si.

⁴ Zoco ndoho, yañi xaa, ña yucu ca ndo nu ñaa sa vatyi cua saa quivi sa cua quisi tucu ra Jesús ta cua yuhu xaan ndo tañi zayuhu minoo ra zuhu sii ñiyivi vehe ñu.

⁵ Tandihí cuii ndo ta cuu ndo cuenda nu ndisi ta cuenda ora. Ña iyo ca yo cuenda sa cuua ta cuenda nu ñaa.

⁶ Yucuan cuenda ma cuzu yo tañi zavaha inga ñiyivi. Cutyacu yo ta coo vaha sa siñi tuñi sii yo.

⁷ Vatyi ñiyivi quixi, quixi ñu sa cuua. Ta ñu siñi, siñi ñu sa cuua.

⁸Zoco maa yo cuu yo cuenda ora, ta cuñi si vatyi coo vaha sa siñi tuñi xiñi yo. Cuñi si vatyi zacuenda yo sii yo sihin sa nii iñi yo ta sihin cuhva cuñi yo sii inga ñiyiví tañi minoo zandaru zacacu ra sii ra sihin minoo caa sa cundyaa yíqui ndyica ra. Ta cuñi si vatyi sino iñi yo vatyi cua cacu yo tañi zacacu zandaru sii ra sihin minoo caa sa ñoho xiñi ra.

⁹Vatyi ñá casi ra Ndyoo sii yo vatyi cañi ra sii yo. I casi ra sii yo vatyi cacu yo sa cuenda ra Jesucristo, ra ndyaca ñaha sii yo.

¹⁰I sihi ra Jesús sa cuenda maa yo vatyi cundito yo iñi ñi sihin ra a cuu si sa ndito ca yo a cuu si sa yaha sihi yo.

¹¹Yucuan cuenda tyindyee ndo sii tahan ndo sihin tuhun ya ta sihin cuhva sa sino iñi ndo tañi sa zavaha ndo vityo.

Saha ra Pablo minoo tuhun vaha sii yañi yo

¹²Yañi xaa, zañifí ndi sii ndo vatyi tyaa ndo yahvi sii ra zatyíño cuenda Tuhun Ndyoo nu iyo ndo vatyi ndyizo ra tyiño ta saha ra tuhun vaha sii ndo sa cuenda ra Jesús.

¹³Cuñi si sa tyaa ndo yahvi sii ra ñihí xaan, ta cuñi ndo sii ra sa cuenda tyiño sa zavaha ra sihin ndo. Ta coo vaha ndo sihin tandihí inga yañi ndo nu iyo ndo. Ñahñi tizihí coo ndo.

¹⁴Ta vityi saha ndi tyiño sii ndo, yañi xaa, vatyi cuhva ndo tyiño sii ra yañi yo tatu ña cuñi ra zatyíño. Tyindyee ndo sii ñu tatu yuhu xaan ñu, a tatu nducuihya xaan iñi ñu. Tyindyee ndo sii yañi yo sa cumañi ca sino vaha iñi. Ta vita cuu iñi ndo sihin tandihí ñiyiví.

¹⁵Zacuenda ndo sii ndo, ta ma zavaha ndo sa ña vaha sihin ñiyiví zavaha sa ña vaha sihin ndo. Tandihí cuii tyiemvu zavaha ndo sa vaha sihin yañi yo ta sihin tandihí ñiyiví.

¹⁶Nacoo sa zii iñi ndo tandihí cuii cuhva.

¹⁷Cahan ndo sihin ra Ndyoo tañi tañi.

¹⁸Tandihí ñaa sa tahan ndo, zoco cuhva ndo tyahvi ndyoo sii ra Ndyoo vatyi tacuan cuñi ra Ndyoo sihin ndo sa sino iñi sii ra Cristo Jesús.

¹⁹Ñáha ndahva ndo Tatyi II ra Ndyoo.

²⁰Ñáha ma tyaa ndo yahvi sa cahan minoo ra cahan tuhun sa saha ra Ndyoo sii ra.

²¹Ndyehe vaha xihna ndo tandihí tatu vaha si ta ziqui tiñ cuenda vaha ndo sii si.

²²Ma zavaha ndo ñaa ndihí ca sa ña vaha.

²³Ta maa ra Ndyoo cuu ra saha sa coo taxi añima yo, ta sique sii ra nazanduvaha ra añima ndo vatyi iñi ñi sii maa ra cua tyaa ndo yahvi. Ta nazacuenda ra añima ndo ta coño ñuhu ndo ta ma coo ca cuatyi ndo ndya quívi cua quasi tucu ra ndyaca ñaha sii yo, ra Jesucristo.

²⁴Maa ra i casi sii ndo, ta cuu cunii iñi yo sii ra vatyi cua zavaha ra tandihí cuii cuhva ya.

Saha ra Pablo minoo sa nacumi sii yañi yo nu ndihí i cahan ra

²⁵Yañi xaa, caca tahvi ndo sii ra Ndyoo sa cuenda ndi.

²⁶Cuhva ndo minoo nacumi sii tandihí cuii yañi yo.

²⁷Sehi tyiño sii ndo sihin cuhva saha ra ndyaca ñaha sii yo sii, vatyi cahvi ndo tutu ya nuu tandihí cuii ñiyiví sino iñi.

²⁸Maa ra ndyaca ñaha sii yo, ra Jesucristo, cua cuhva xaan ra tumañi iñi sii ndo. Ta nacuu si tacuan.

Sa Cu Uu Carta I Tyaa Ra San Pablo Sii Ñiyiví Ñuu Tesalónica

*Tyaa ra Pablo ta ra tahan ra mi-
noo carta sii ñiyiví sino iñi Tuhun
Ndyoo ñuu Tesalónica*

¹ Yuhvi ra Pablo ta ra Silvano ta ra Timoteo tyaa ndi carta ya sii ñiyiví sino iñi Tuhun Ndyoo ñuu Tesalónica. Sa ndu-iin ndo sihin ra Ndyoo Zutu yo ta sihin ra Jesucristo, ra ndyaca ñaha sii yo.

² Quihin cuenda ndo tandihí sa vaha saha ra Ndyoo sii ndo, ta natyindyee ra sii ndo vatyi coo sa taxi añima ndo. Ta tacuan tucu nazavaha ra Jesucristo, ra ndyaca ñaha sii yo, sihin ndo.

*Cua tasi tuñi ra Ndyoo sii ñiyiví
yo cuatyi quivi cua quisi tucu ra
Cristo*

³ Ndoho yañi xaa, cuñi si sa cuhva xaan ndi tyahvi ndyoo sii ra Ndyoo sa cuenda ndo vatyi sino xaan iñi ndo ta cuahan nduvaha ca cuhva sa siño iñi ndo ta cuhva cuñi xaan ndo sii minoo ndo ta inga ndo.

⁴ Ndyo cuhva cahan ndi tuhun ndo nuu inga ñiyiví sino iñi sii ra Ndyoo inga ñuu vatyi sino xaan iñi ndo ta cundyee xaan iñi ndo ndyehe ndo sa quiñi zavaha ñiyiví sihin ndo ta tundoño cahnu xaan sa cuenda Tuhun Ndyoo.

⁵ Ta ihya cuhva zañaha si vatyi ndoo xaan cuu cuhva ndyaca ñaha ra Ndyoo vatyi sa cuenda tundoho sa tahan ndo ta cua zanduvaha ra cuhva iyo ndo, ta cua cuu quiñi ndo nu ndyaca ñaha ra.

⁶ Ta ndoo xaan cuu cuhva zavaha maa ra Ndyoo vatyi cua zandyeha ra tundoño sii ñiyiví zandyeha tundoño sii maa ndo.

⁷ Ta maa ndo, ra ndyehe tundoño vityi, cuee ca ta cua cuhva ra minoo nu cua quitatu ndo sihin maa

ndi. Ta tacuan cua cuu si quivi cua quisi tucu ra Jesú, ra ndyaca ñaha, ndya gloria sihin ángel ra.

⁸ Cua cayu ñúhu nu vasi ra, ta cua tasi tuñi ra sii ñiyiví sa ña sito sii ra Ndyoo ta ña tyaa ñu yahvi Tuhun Vaha sa cuenda ra ndyaca ñaha, ra Jesucristo, cuhva cacu yo.

⁹ Ñiyiví cuan cua ndoho tandihí cuii tyiemvu, ta sica xaan cua nandoo ñu, ta ma cuu cundyaa ñu sihin ra Ndyoo. Ta ma ndyehe ñu cuhva iyo ra Ndyoo vatyi tyaqui xaan ra, ta ma ndyehe ñu cuhva ndyaca ñaha ra.

¹⁰ Quiví cuan cua quisi ra ta cua zacahnu ñiyiví ra sii ra, ta iyo xaan cua cuñi ñiyiví sino iñi sii ra sihin cuhva iyo ra. Tañi maa ndo, vatyi vityi sino iñi ndo sa ndaa sa saha maa ndi sii ndo.

¹¹ Yuçuan cuenda cahan xaan ndi sihin ra Ndyoo sa cuenda ndo, ta sica ndi sii ra vatyi nazanduvaha ra añima ndo ta cua cuu ndo cuhva cuñi maa ra. Ta sica ndi sii ra vatyi tyindyeer a sii ndo sihin tundyee iñi sii maa ra ta cua cacu vaha ñaa tyiño cuñi ndo zavaha ndo sa cuenda ra sihin sa niñi iñi ndo.

¹² Tacuan ta cua nducanhnu ca zivi ra ndyaca ñaha sii yo, ra Jesucristo, sa catyi sa vaha iyo ndo. Ta zuun ñi maa ra cua zacahnu sii ndo vatyi vaha xaan añima ra sihin ra Ndyoo Zutu yo.

2

Ra ña vaha

¹ Ta vityi, yañi xaa, sa catyi vatyi quiví cua quisi tucu ra ndyaca ñaha sii yo, ra Jesucristo, ta cua ndu-iin yo sihin ra, sa cuenda cuan zañiñi ndi sii ndo

² vatyi ma zama ndo cuhva sica iñi ndo. Ta ma cuhva ndo sa zayuhu ñiyiví sii ndo tatu catyi ñu vatyi sa yaha quisi ra Cristo, vazu catyi ñu vatyi cahan ñu cuenda ra Ndyoo a tatu cahan xaan ñu ziqui tuhun cuan, a tatu catyi ñu vatyi

maa ndi tasi carta vatyi sa i quisi
tucu ra Jesús, zoco ña ndisa.

³ Ma cuhva ndo sa zandavi ñaha
ñiyivi sii ndo nu zuhva. Vatyi
ma saa quivi sa cua quisi tucu ra
Jesús tatu tañaha ca cua coo minoo
tyiemvu sa cua cuxaan xaan ñiyivi
sihin ra Ndyoo. Ta ziqui cua quisi
ra iyo xaan cuatyi, ra sa cua naa
cuee ca.

⁴ Maa ra cuan cua nduvita, ta
cua zativi ra tandihí ñaa sa cuu si
sa cuenda ra Ndyoo. Cua zativi
ra tandihí ñaa sa zacahnu ñiyivi.
Ta cua quihvi ra sisi vehe ñuhu ra
Ndyoo, ta cua cundyaa ra ta catyi
ra vatyi zuun ñi maa ra cuu Ndyoo.

⁵ ¿Atu ña nacohon iñi ndo vatyi
quivi i sindyei sihin ndo, ta i
nacatyi sihin ndo tandihí cuii
tuhun ya?

⁶ Ta vityi sa sito ndo ñaa sa cuu sa
ña saha sa quisi ra cumañi ca tahan
si quivi ra.

⁷ Vityi xehe ñi cuahan tyiño ña
vaha cuan, zoco iyo minoo ra sa ña
saha sa cucahnu si ndya cua cuiñi
siyo xihna ra.

⁸ Ta tatu sa siñi siyo ra, tacuan ta
ziqui cua coto ñiyivi yoo ra cuu ra
ña vaha cuan. Ta maa ra Jesús, ra
ndyaca ñaha sii yo, cua cahñi sii ra.
Cua tivi ra Jesús tatyi ra sihin yuhu
ra, ta cua cahñi ra sii ra. Cua zanaa
ra sii ra sihin sa ndisi xaan ra quivi
cua quisi ra.

⁹ Ra ña vaha cuan cua quisi sa
cuenda cuihna, ta tandihí cuhva
iyo sii cuihna cua coo tucu sii maa
ra. Cuaha xaan zeña cua zavaha ra,
ta sihin sa ndityi cua zandavi ñaha
ra sii ñiyivi.

¹⁰ Cua cutyiño ra tandihí cuii
cuhva ña vaha. Ta sihin si cua
zandavi ñaha ra sii ñiyivi, ñu cua
cuahun nu xaan. Maa ñu cuu ñu ña
cuiñi sino iñi sii sa ndisa ta cacu ñu.

¹¹ Ta yucuan cuenda cua cuhva
ra Ndyoo vatyi zandavi ñaha sa ña
vaha sii ñu, ta cua sino iñi ñu sii sa
ña ndisa

¹² vatyi tacuan ta cua ndoho
xaan tandihí ñiyivi sa ña sino iñi
sii sa ndisa, ñiyivi tahan xaan iñi
zavaha ñu sa ña vaha.

*Sa cuenda ñiyivi i casi ra Ndyoo
vatyi cazu ñu*

¹³ Zoco cuñi si sa cuhva xaan ndi
tyahvi ndyoo sii ra Ndyoo tandihí
cuii tyiemvu sa cuenda maa ndo,
yañi xaa, vatyi cuñi xaan ra sii ndo,
ta i casi ra sii ndo ndya quivi xihna
ñi vatyi cua cacu ndo. Cua cacu
ndo cuenda Tatyi Ii, ra zanduvaha
cuhva iyo ndo, ta cuenda sa ndisa
sa sino iñi ndo.

¹⁴ Sihin tuhun cahan maa ndi si-
hin ndo ta i zacoto ra Ndyoo sii ndo
vatyi sa i casi ra sii ndo ta saha ra
cuhva cua cacu ndo ta cuhun ndo
gloria ta ñihi ndo sa vaha nu ndyaa
ra Jesucristo, ra ndyaca ñaha sii yo.

¹⁵ Yucuan cuenda, yañi xaa, ma
zama ndo cuhva sino iñi ndo. Ma
naa iñi ndo cuhva zacuaha ndi sii
ndo quivi i sindyei ndi sihin ndo a
cuhva i tyaa ndi nuu carta sa tasi
ndi sii ndo nu yucu ndo.

¹⁶ Ta zuun ñi maa ra ndyaca ñaha
sii yo, ra Jesucristo, sihin maa ra
Ndyoo Zutu yo cuñi xaan ra sii yo,
ta tyindyee ra sii yo tandihí cuii
tyiemvu, ta saha maa ra sa coo
xaan sa vaha sii yo.

¹⁷ Ta vityi nacuhva ra sa ziñi añima
ndo, ta natyindyee ra sii ndo, ta
cua cuu cahan ndo ta zavaha ndo
tandihí tyiño vaha cuhva cuñi maa
ra.

3

*Cahan ndo sihin ra Ndyoo sa
cuenda ndi*

¹ Ta minoo ñi ca tuhun catyi sihin
ndo, yañi xaa, cahan ndo sihin ra
Ndyoo sa cuenda ndi vatyi tacuan
ta yatyi xaan cua saa Tuhun Ndyoo
nacahnu cuii ñi, ta cua tiñi cuenda
ñiyivi sii si minoo cuhva vaha tañi i
tiñi cuenda maa ndo sii si.

² Ta caca ndo sii ra Ndyoo vatyi
zacacu ra sii ndi sihin ñiyivi ña

vaha ta ñiyivi quiñi iyo vatyi ña tandihí ñiyivi sino iñi sii ra.

³ Zoco maa ra ndyaca ñaha sii yo, ndoo xaan ra. Maa ra cua zauquihin ityi vaha ra sii ndo, ta cua zacuenda ra sii ndo sii ra ña vaha.

⁴ Ta sino iñi sii ra ndyaca ñaha sii yo vatyi maa ndo sa zacuu ndo tandihí, ta ma zandoo ndo cuhva catyi ndi sihin ndo.

⁵ Ta cuñi sa cua tyindyee ra ndyaca ñaha sii yo sii ndo, ta cua cutuñi ca iñi ndo cuhva cuñi ra Ndyoo sihin ndo, ta cua cuñi ca ndo sii ra. Ta cua tyindyee ra sii ndo, ta cua zandyee ndo iñi ndo cuhva ndyehe ndo tundoho tañi zandyee maa ra Cristo iñi ra nu i ndyehe ra tun-doho.

Cuñi si sa zatyiño yo

⁶ Ta vityi, yañi xaa, tava ndi tysiño sii ndo sihin zivi maa ra ndyaca ñaha, ra Jesucristo, vatyi tava ndo yoo ñi maa yañi yo ra ña cuñi zatyiño, ra ña cuñi zavaha cuhva i zañaha ndi sii ndo.

⁷ Vatyi maa ndo sa sito ndo cuhva cuñi si coo ndo ta cua cundyico ndo cuhva i zañaha ndi sii ndo. Vatyi quiví sa sindyaa ndi sihin ndo, ñahñi cuhva sa ñá zatyiño ndi.

⁸ Ta ñá sasi caha ñi ndi vehe ñiyivi. Ña tacuan vatyi i zatyiño ndi. Ña cuñi ndi sa cozo ziqui numinoo ndo sii ndi, ta yucuan cuenda i zatyiño ndi ora ta sa cuaa.

⁹ Vazu iyo cuhva sii ndi sa caca ndi sii ndo ñaa sa cuñi ndi, zoco i zatyiño ndi vatyi cuñi ndi zañaha ndi minoo cuhva vaha cundyico ndo.

¹⁰ Vatyi quiví sindyaa ndi sihin ndo i saha ndi tysiño ya sii ndo vatyi tatu iyo ra ña cuñi zatyiño, ma casi ra.

¹¹ Vatyi ñihi ndi tuhun vatyi iyo zuhva ndo ña cuñi ndo zatyiño. Yucu ñi maa ndo, ta ñahñi maa tysiño zavaha ndo caña ñi.

¹² Ta sii ñiyivi zavaha cuhva cuan, saha ndi tysiño ta zañiñi

ndi sii ñu sihin cuhva saha ra Jesucristo, ra ndyaca ñaha sii yo, vatyi nazatyiño vaha ñu cuan ta ñihi ñu sa casi ñu.

¹³ Ta maa ndo, yañi xaa, ma zaña ndo sa zavaha ndo sa vaha.

¹⁴ Ta tatu iyo minoo ñiyivi sa ma tyaa yahvi tuhun cahan ndi nu carta ya, ndyehe vaha ndo ñaa ra cuu ra ta ma tyisaha ca ndo sii ra. Tacuan ta cua cucahan nuu ra.

¹⁵ Zoco ma cuxaan ndo sihin ra. Zacoto vaha ndo sii ra ñaa sa cuu cuatyi ra vatyi zuun ñi yañi yo sii ra.

Sica ra Pablo sii ra Ndyoo vatyi tyindyee ra sii ñiyivi cuan

¹⁶ Ta natyindyee sa zuun ñi maa ra ndyaca ñaha sii yo sii ndo tandihí tyiemvu ta tandihí cuhva vatyi coo sa taxi añima ndo tañi sa iyo añima maa ra. Ta nacundayaa ra sihin tandihí cuui ndo.

¹⁷ Yuhvi ra Pablo tyei minoo nacumi sii maa ndo. Sihin zuun ñi ndehi tyei tuhun ya. Tyehen caa firme. Ihya cuu cuhva tyei.

¹⁸ Ta natyindyee xaan ra ndyaca ñaha, ra Jesucristo, sii tandihí cuui ndo. Ndihí si vityi.

Sa Xihna Ni Carta I Tyaa Ra San Pablo Sii Ra Timoteo

*Tyaa ra Pablo minoo carta sii ra
Timoteo*

¹ Yuhvi ra Pablo minoo apóstol ra Jesucristo cui, cuhva i saha maa ra Ndyoo tysiño sii. Maa ra Ndyoo cuu ra zacacu sii yo. Ta maa ra Jesucristo cuu ra ndyaca ñaha sii yo. Sii maa ra ndatu yo.

² Tyei tutu ya suun Timoteo. Ndisa cuii vatyi zehe mi cuu suun sa catyi Tuhun Ndyoo. Nacuhva ra Ndyoo Zutu yo sihin ra ndyaca ñaha, ra Jesucristo, cuaha xaan sa vaha suun; nacundahvi iñi ra suun, ta nacuhva ra sa coo sa taxi añimon.

*Zacuenda ndo sii ndo sihin ñiyivi
zacuaha sa ña ndisa*

³ Zuun ñi cuhva catyi suhun vi-tyi tañi sa catyi quivi i quite ñuu cuan sa cua cuhin ndya nu cu si Macedonia, ndoon ñuu Efeso vatyi cua nacatyun sihin ñiyivi vatyi ma zacuaha ñu sa ña ndisa.

⁴ Ta ma tyizoho ñu tuhun ca-han ñiyivi sahnu a cuhva tyaa xaan ñiyivi yahvi tatu cuñi ñu coto ñu yoo cuu tandihí ñiyivi sahnu sii ñu. Ihyu tuhun zacahñi tahan si sii ñiyivi, ta ñahñi tyindyee si sa zacuu yo tysiño sa saha ra Ndyoo sii yo vatyi sihin sa sino ñi iñi yo ta cacu añima yo.

⁵ Ta sisi tandihí tuhun i saha ra Ndyoo sii yo sa ñiñi ca cuu sa cuñi yo sii ñiyivi sihin sa ndii vaha añima yo ta sihin minoo sa siñi tuñi vaha. Ta cuñi si vatyi sino vaha iñi yo Tuhun Ndyoo, ta tacuan ta cua cuñi vaha yo sii ñu.

⁶ Iyo zuhva ñiyivi sa i zaña ñu tuhun ya. Nazaca ñu inga tuhun sihin si, ta natuhun xaan ñu tuhun ña ñiñi.

⁷ Cuñi ñu cuu ñu maestro cuenda ley sahnu, zoco nu maa ñu ta ña

cutuñi iñi ñu sa nacatyi ñu. Ta zuun ñi maa ñu ta ña cutuñi iñi ñu sa zacuaha ñu.

⁸ Sito yo vatyi vaha xaan cuu ley maa ra Ndyoo, zoco cuñi si sa cu-tyiño yo sii si minoo cuhva vaha, cuhva catyi si.

⁹ Cuñi si coto yo vatyi ñahñi ley Ndyoo sa cua cuxaan sii yo tatu zavaha yo sa vaha. Iyo si vatyi tasi tuñi si sii ñiyivi ña vaha, sa cuenda ñiyivi ña tyaa yahvi sii ra Ndyoo ta ña cuñi ñu sii ra. Iyo si sa cuenda ñiyivi iyo cuatyi, ñiyivi sa cahan ndya vaha ñi, cuenda ñiyivi sahñi sii zutu ñu a sii zihí ñu a sii inga ñiyivi.

¹⁰ Iyo ley ra Ndyoo sa cuenda ra iyo sihin inga ñaha sa yivi ñazihí ra cuu a ra iyo sihin inga ra ta sa cuenda ra zuhu ñiyivi, ra vatya, ra catyi “sito vaha Ndyoo” ta ña ndisa ra. Sa cuenda tandihí cuhva cuan iyo ley maa ra Ndyoo a ñaa inga cuhva zavaha ñiyivi ta ña vaha si.

¹¹ Ta tandihí tuhun sa quehin sihin ndo ihyu, sasi tahan si si-hin tuhun vaha xaan sa cuenda ra Cristo, cuhva cacu yo. Maa ra Ndyoo saha tysiño sii, sa nacatyi sii si, ta cahnu xaan cuu maa ra.

*Saha ra tyahvi ndyoo sii ra
Ndyoo vatyi cundahvi iñi ra Ndyoo
sii ra*

¹² Sehi tyahvi ndyoo sii ra Jesucristo ra ndyaca ñaha sii yo vatyi sito maa ra vatyi cuu zavehi tysiño ra, ta saha ra tysiño ya sii, ta saha ra tundyee iñi sii, ta cuu zavehi sii si.

¹³ Tacuan i zavaha ra vazu nu quisí quivi i cui minoo ra cahan xaan ndya vaha ñi sii ra. I zayuhu xein sii ñiyivi sino iñi sii ra, ta i quehin ndya vaha ñi sii ñu. Zoco i cundahvi iñi ra Ndyoo sii vatyi quivi i zavehi cuhva cuan tañaha ca sino iñi sii ra, ta ña site vatyi yivi cuhva vaha cuu cuhva zavehi.

¹⁴ Ta i tyindyee xaan ra ndyaca ñaha sii yo sii, ta yucuan cuenda sino xaan iñi sii ra, ta cuñi xein sii

inga ñiyivi tañi cuñi maa ra Jesucristo sii ñuu.

¹⁵ Cuñi si vatyi tandihí cuyi yo cua sino iñi yo vatyi i quisi ra Cristo Jesús ñuu ñiyivi vatyi cua zacacu ra sii ñiyivi iyo cuatyi tañi mi. Cuaha ca cuatyi i zavehi ta ziqui inga ñiyivi iyo cuatyi.

¹⁶ Ta yucuan cuenda i cundahvi iñi ra Ndyoo sii, vatyi cua cuu si sa xihna ñi nu zañaha ra Jesucristo vatyi ndyee xaan iñi ra sihin ñiyivi iyo cuatyi. Zañaha si cuhva sii ñu ta cua sino iñi ñu sii maa ra, ta tacuan ta ma cuu ca ñu.

¹⁷ Ta yucuan cuenda zacahnu xaan yo sii ra Ndyoo ta saha xaan yo tyahvi ndyoo sii ra tandihí cuyi tylemvu vatyi ra ndyaca ñaha cuu ra tandihí cuyi tylemvu, ta ma cuu ra ndaha cuyi ñi. Ma cuu ndyehe yo sii ra vityi. Minoo ñi ra cuu Ndyoo, ta casi xaan iñi ra. Ta tacuan cuu si.

¹⁸ Yoho Timoteo zehi, sa nacohon iñun cuhva i catyi ra yañi yo suhun quivi i cahan ra cuenda maa ra Ndyoo. Yucuan cuenda catyi suhun inga saha vatyi zatiyño vohon tyiño maa ra Ndyoo.

¹⁹ Ma zañon cuhva sa sino xaan iñun. Ta tandihí sa zavohon, zavohon sii si sihin minoo sa siñi tuñi vaha. Vatyi iyo zuhva ñiyivi ña tyaa ñu yahvi sa catyi sa siñi tuñi vaha ñu, ta naa iñi ñu sii Ndyoo.

²⁰ Tacuan iyo ra Himeneo ta ra Alejandro. Yucuan cuenda i nacuhve sii ra sii cuhna zuhva quivi vatyi ndoho ra ta cutuhva ra ta ma cahan ra ndya vaha ñi sii ra Ndyoo.

2

Cuhva tahan si cahan yo sihin ra Ndyoo

¹ Sa xihna ñi sehi tyiño vatyi cahan ndo sihin ra Ndyoo sa cuenda tandihí ñiyivi. Caca ndo tumañi iñi sii ra, ta nacuhva ndo tyahvi ndyoo sii ra cuenda tandihí cuyi ñu.

² Caca ndo sii ra sa cuenda ra ndyaca ñaha ta tandihí cuyi ra cu

tyiño. Caca ndo vatyi coo xaan sa vaha sii yo ta ma coo cuatyi ñuu ñiyivi. Tacuan ta cua cuu tyaa yo yahvi sii ra Ndyoo tandihí cuyi cuhva ta zavaha yo tandihí cuyi sa vaha.

³ Vatyi ihya cuu cuhva vaha sa tahan iñi maa ra Ndyoo, ta maa ra cuu ra zacacu sii yo.

⁴ Cuñi maa ra vatyi cacu tandihí cuyi ñiyivi ta coto ñu ñaa sa cuu sa ndisa.

⁵ Vatyi minoo ñi ra Ndyoo iyo, ta minoo ñi ra cua cahan sa cuenda yo nuu ra Ndyoo Zutu yo, ra Jesucristo. Ta ñiyivi cuu tucu maa ra tañi maa yo.

⁶ I saha maa ra Jesús sa cuu ra, ta cuhva cuan i tyiyahvi ra vatyi cuu cacu tandihí ñiyivi. Ta i quita tuhun cuan nu tahan si coto ñiyivi.

⁷ Ta sa cuenda ya i saha ra Ndyoo tyiño sii, vatyi zacote sii ñiyivi tuhun ra ta cui minoo ra apóstol ta zacuehi sa ndisa sii ñiyivi sa yivi ñiyivi hebreo cuu. Cua zacuehi sii ñu cuhva sino iñi ñu. Tañi minoo ra sino vaha iñi sii ra Cristo quehin sa ndisa. Ña quehin cuendu.

⁸ Yucuan cuenda cuñi vatyi nacahnu cuyi ñi nacahan rayii sihin ra Ndyoo. Nazandaa ra ndaha ra. Ta ndii vaha coo afima ra. Ta ma cuxaan ra a cahñi tahan ra.

⁹ Ta tacuan tucu ñuzihi. Ta ma ndihvi ñu zahma cuiti xaan zoco minoo cuhva vaha ta sa ña yahvi xaan. Ta ma zandutyaqui xaan ñu sii ñu sihin cuaha xaan cuhva zavaha ñu sihin ixi xiñi ñu a sihin xuhun cuaan a perla a zahma yahvi xaan.

¹⁰ Zoco nazavaha ñu tandihí nuu sa vaha tañi tahan si zavaha minoo ñiyivi tatu sito ñu sii ra Ndyoo sa ndisa.

¹¹ Cuñi si vatyi taxi ñi tyizoho ñuzihi Tuhun Ndyoo nu zacuaha ñiyivi sii si ta tyaa ñu yahvi tandihí sa siñi ñu.

¹² Ña sehi sa zacuaha ñuzihi Tuhun Ndyoo (nuu cuaha ñiyivi) a

sa cundyaca ñaha ñu sii rayii vatyi cuñi si sa coo taxi ñu.

¹³ Vatyi sa xihna ñi i zavaha ra Ndyoo sii ra Adán ta ziquí cu Eva.

¹⁴ Ta yivi sii ra Adán i zandavi ñaha cuihna. Sii ñaha cuan i zandavi ñaha ra, ta tacuan i quisaha sicoo cuaty.

¹⁵ Zoco cua cacu añima ñuzihi tatu zavaha ñu tandihi cuhva zavaha ñiyivi cuu zih sa ndylihi ta tatu sino vaha iñi ñu ta cuñi ñu sii ra Ndyoo sa ndisa ta zavaha ñu tandihi cuui cuhva vaha ta coo minoo sa siñi tuñi vaha sii ñu.

3

Cuhva cuñi si coo minoo ra tatu ndyizo ra tyiño ra Ndyoo

¹ Ndisa cuui tuhun ya vatyi tatu cuñi minoo ra cuizo ra tyiño nu iyo ñiyivi sino iñi Tuhun Ndyoo, vaha xaan cuu tyiño ya tatu cuñi ra cuizo ra sii si.

² Yucuan cuenda, tatu cuñi ra cuizo ra tyiño sa cundyaca ñaha ra sii ñiyivi sino iñi, cuñi si vatyi coo ra minoo cuhva vaha xaan ta yoñi cuu tyaa cuaty sata ra. Cuñi si vatyi minoo ñi ñazih ra coo, ta ma coo uu tahan. Cuñi si vatyi ñihi zatyiño ra sa ndisa ta coo vaha xaan sa siñi tuñi ra ta cuu ra minoo ra tyaa ñiyivi yahvi sii. Cuñi si vatyi cuhva ra xita casi ñiyivi saa vehe ra. Cuñi si vatyi zacuaha vaha ra sii ñiyivi.

³ Ma cuu ra ra siñi a ra nanducu tizihi. Ta ma cuñi ra zahacanaa ra xuhun sihin minoo cuhva ña vaha. Cuñi si vatyi coo xaan tundyee iñi sii ra sihin ñiyivi, ta ma cahñi tahan ra sihin ñu, ta ma cuu caca xaan iñi ra tuhun xuhun.

⁴ Cuñi si cuu ra minoo ra cundyaca ñaha vaha vehe ra, ta nacoto zehe ra tyaa si yahvi tandihi saha.

⁵ Vatyi tatu ña sito minoo ra cundyaca ñaha ra vehe ra ¿yozo caa cuu cundyaca ñaha ra sii ñiyivi sino iñi? Ma cuu.

⁶ Ra sa cuñi cuizo tyiño cuan, ma cuu cuu minoo ra saa, coto zacahnu xaan ra sii ra, ta cua tasi tuñi ra Ndyoo sii ra tañi i tasi tuñi ra sii cuihna.

⁷ Ta ra sa cua cuizo tyiño, cuñi si minoo ra vaha ñiyivi cuu nuu ñiyivi ña sino iñi coto quisaha tyaa ñu cuaty sata ra ta canacava tucu ra inga saha sisi xayu cuihna.

Cuhva cuñi si coo minoo ra tyindyeo sii ñiyivi sino iñi

⁸ Ta tacuan tucu sihin ra cuñi tyindyeo sii ñiyivi sino iñi, cuñi si vatyi cuu ra minoo ra vaha xaan. Ta cuu ra minoo ra ndoo xaan cahan ta zavaha ra cuhva catyi ra. Ma cuu coho xaan ra ndixi a cuñi ra zahacanaa ra xuhun sihin minoo cuhva ña vaha.

⁹ Cuñi si vatyi quihin vaha xaan ra tuhun ndisa, cuhva sino iñi yo. Ta minoo ñi cuhva ndoo vaha coo sa siñi tuñi xiñi ra.

¹⁰ Cua ndyehe xihna ñiyivi tatu tacuan iyo ra, ta tatu ña quiñi iyo ra, tacuan ta cuu cuizo tyiño ra.

¹¹ Ta tacuan tucu ñazih ra, cuñi si vatyi cuu ñu ñiyivi vaha xaan. Ta ma cahan ñu ndya vaha ñi sii ñiyivi. Cuñi si vatyi coo taxi xaan ñu ta zavaha ñu sa vaha tandihi cuui tyiemvu.

¹² Ta ra ndyizo tyiño ya, nacoo minoo ñi ñazih ra. Ta cuñi si vatyi cundyaca ñaha vaha ra sii zehe ra ta tacuan tucu tandihi tyiño vehe ra.

¹³ Vatyi ra ndyizo tyiño ya tatu zatyiño vaha ra cua ñihi ñiyivi cuhva tyaa xaan ñu yahvi sii ra. Ta ma yuhu ca ra cahan ra sihin ñiyivi cuhva sino iñi ra sii ra Cristo Jesús.

Minoo tuhun sa tyindyeo xaan sii yo ta cuu cundyico yo Tuhun Ndyoo

¹⁴ Zacote zuhva tuhun ya suun, ta cuñi cuhin cundyehi suun,

¹⁵ zoco tatu nducuei sa siton yozo caa cuñi si zavohon. Vatyi maa yo cuu vehe ñuhu ra Ndyoo ndito. Ta cuñi si vatyi ñihi xaan sino iñi yo

sii sa ndisa ta zacuaha yo sii si sii
ñiyivi.

¹⁶ Ndisa cuii vatyi iyo minoo sa
vaha xaan sa sino iñi yo:
I quisi ra Ndyoo ñuu ñiyivi, ta caa ra
cuhva caa maa yo.
I catyi Tatyi li vatyi ñahñi cuatyi ra.
Indyehe ángel sii ra.
Nacahnu ñuu ñiyivi i nacatyi ñiyivi
cuhva i zavaha ra.
Ta sino iñi ñiyivi nacahnu ñuu
ñiyivi.
Ta ziqui cuahan ra ndya gloria
nu zacahnu ñu sii ra tandih
tyiemvu.

4

*Ñiyivi sa cua zaña cuhva sino iñi
ñu*

¹ Ta casi xaan catyi Tatyi li vatyi
nu sa cuñi ndih i tyiemvu cua coo
ñiyivi sa cua zaña cuhva sa sino iñi
ñu. Cua sino iñi ñu sii tatyi ña vaha
sa zandavi ñaha. Ta cua cundyico
ñu tuhun zacuaha cuihna.

² Ma cuçahan nuu ñu cahan ñu
sa vaty. Ñahñi ca sa siñi tuñi vaha
xiñi ñu. Zavaha xaan ñu sa ña vaha
ndya cuhva ña tuu ca iñi ñu vatyi ña
vaha si.

³ Ihya ñiyivi catyi vatyi cuatyi
cuu si tatu tindaha ñiyivi, ta cuatyi
cuu si sa casi yo zuhva nuu ndyayu,
catyi tucu ñu. Zoco maa ra Ndyoo i
zavaha tandih, ta ñiyivi sa sino iñi
ta sito ñu sa ndisa, cuu casi ñu ñaa ñi
maa ndyayu ta nacuhva ñu tyahvi
ndyoo sii ra Ndyoo.

⁴ I zavaha ra Ndyoo tandih nuu
quiti, ta vaha ti. Ta ña vaha sa ma
casi yo sii ti tatu sa nacuhva yo
tyahvi ndyoo sii ra Ndyoo ta casi
yo.

⁵ Vatyi ndu-ii si sa cuenda Tuhun
Ndyoo ta sa cuenda sa nacuhva yo
tyahvi ndyoo sii ra.

*Cuhva iyo minoo muzu vaha ra
Jesucristo*

⁶ Tatu nacatyi moo tuhun ya si
hin ra yañi yo, minoo ra zatyiñon
vaha sa cuenda ra Jesucristo cua

cuun. Vaha xaan cuq cuu cuhva
sino iñun ta cuhva ndyicon.

⁷ Zoco ñáha tyoon yahvi cuendu
sa nacatyi ñiyivi ñuu ñiyivi ya, cos
tumbre sa zacuaha ñiyivi sahnu.
Nducun cuhva zavohon cuhva
cuñi ra Ndyoo tandih i tyiemvu.

⁸ Tyindyee si zuhva sii coño ñuhu
yo sa cuziqui yo, zoco sa zavaha
yo cuhva cuñi ra Ndyoo, yucuan
tyindyee sii yo tandih i cuui cuhva.
Vatyi tyindyee si sii yo ihya ñuu
ñiyivi, ta cua tyindyee tucu si sii yo
nu cua cundito yo sihin ra.

⁹ Ndisa cuii cuu cuhva ya, ta cuñi
si sa sino iñi tandih i ñiyivi.

¹⁰ Ta sa catyi ya zatyiñon ndi ta
ndyehe ndi tundoho vatyi ndatu
ndi sii ra Ndyoo ndito. Tyindyee ra
sii tandih i ñiyivi ta ñihi ca sii ñiyivi
sino iñi vatyi cua zacacu ra sii yo.

¹¹ Ihya tuhun zacuohon, ta
zañifun sii ñiyivi vatyi cutuhva ñu.

¹² Ndisa minoo ra yoco cuun,
zoco zañohon minoo cuhva vaha
sii ñiyivi sino iñi sihin cuhva za
vohon, sihin tuhun cohon, sihin
cuhva cuñun sii ñiyivi, sihin cuhva
sino iñun ta sihin cuhva sa ñahñi
maa sa ña vaha zavohon.

¹³ Niñi sa cumañi sei nu yucu
ndo, nducun cuhva cahvun Tuhun
Ndyoo nuu ñiyivi. Zacuohon sii ñu,
ta nacatyun sihin ñu yozo caa cua
cua ñu ñiyivi vaha.

¹⁴ Ra ndyizo tysiñon cuenda tandih
ra yañi yo i tyizo ra ndaha ra xiñun
quivi cuan, ta i saha ra Ndyoo
minoo cuhva suun vatyi zatyiñon
tysiñon ra. Coto ñáha naa iñun cuhva
cuan, ta zatyiñon tysiñon ra Ndyoo
cuhva i catyi ra cuan.

¹⁵ Tyaa xoon yahvi sii tandih
tuhun ya vatyi cua ndyehe tandih
ñiyivi vatyi vaha xaan i cutuhvon.

¹⁶ Zacuendon suun sihin cuhva
ndyicuun ta cuhva zacuohon, ta
ñáha zañon sa vaha. Tatu tacuan
zavohon, cua cacun, ta cua cacu
ñiyivi tyizoho sa cohon.

5

*Ihya cuu cuhva zavohon sihin
ñiyivi sino iñi Tuhun Ndyoo*

¹ Ma cuxoon ta cohon sihin minoo hermano sahnu. Cuñi si vatyi cuhvpon tuhun sii ra tañi sa zutun sii ra. Ta cahan vohon sihin ra yoco tañi sa yañun sii ra.

² Cahan vohon sihin ñuzih sahnu tañi sa zihun sii ñu. Ta sihin ñu yoco tañi sa cuhvpon sii ñu. Ta ma zavohon sa ña vaha sihin ñu.

³ Tyindyeun sii ñu ndahvi sa sihiyii tatu ndisa vatyi cumañi si sii ñu.

⁴ Zoco tatu iyo zehe minoo ña ndahvi a zehe ñañi ña, cuñi si sa cutuhva xihna maa ra sa tyindyeer a sii ña. Nanacohon iñi zehe ña cuhva i tyindyeer xaan zutu ra ta zihí ra sii ra ta luhlu ra. Ta yucuan cuenda cuñi si vatyi natyindyee ñiyivi sii zutu ñu a sii zihí ñu. Vatyi ihya cuu sa vaha, ta tacuan ta zihí cuña cuñi ra Ndyoo.

⁵ Iyo ñuzih sa ndoo ndahvi sa ndisa cuii sa maa ñi maa ñu. Yucuan cuu ñu ndatu sa vaha iñi ñi sii maa ra Ndyoo, ta ña zaña ñu sa cahan ñu sihin ra ora ta sa cuaa.

⁶ Zoco ñu ndahvi sa cuzii iñi cuhva cuñi maa ñu, tañi sa sihi ñu nuu Tuhun Ndyoo cuu si nii ñi sa ndito ñu.

⁷ Tacuan cuhvpon tyiño sii tandihí yañi yo ta cuhva yo vatyi coto ñu ta zavaha ñu sa vaha.

⁸ Zoco tatu iyo ra yañi yo ña tyindyeer a sii ñiyivi sii ra, ta nu ñiyivi vehe ra ta ña saha ra sa casi ñu, minoo ra ña sino ca iñi cuu ra. Cahnu ca ra ña vaha nduu ra ta ziqui ñiyivi ta sino ca iñi.

⁹ Nacoo minoo tutu sihin ziví ñu ndahvi sa yaha uñi xico cuiya, ñu i sicoo minoo ñi yii.

¹⁰ Cuñi si sa coto ñiyivi sii ña saha sa catyi sa vaha sa zavaha ña, tatu zacuahnu vaha ña sii zehe ña ta tyaa nuu vaha ña sii ñiyivi saa vehe ña. Tatu saha vaha ña sa casi yañi yo, ra saa vehe ña. Tatu tyindyeer ña sii ñiyivi ndyehe tundoho, ta tatu zavaha ña tandihí nuu sa vaha.

¹¹ Zoco ma tyihi ndo ziví ñu ndahvi ñu tañaha ca cusahnu vaha vatyi cua cuñi ñu tindaha ñu inga saha, ta cua zaña ñu tyiño zavaha ñu sa cuenda ra Cristo.

¹² Ta cua coo cuatyi ñu vatyi zaña ñu cuhva i catyi ñu sa cua zavaha ñu.

¹³ Ta inga tucu cuhva, tatu tañaha ca cusahnu vaha ñu ndahvi, cua nduzusa ñu ta cua caca noo ñu tahan tahan vehe. Ta ña tacuan ñi, zoco cua quisaha cahan ñu cuendu. Cua natuhun xaan ñu ziqui tyiño inga ñiyivi ta ziqui tuhun ña tahan si cahan ñu.

¹⁴ Yucuan cuenda cuñi vatyi ñu ndahvi ña sahnu xaan, natindaha tucu ñu. Nacoo zehe ñu. Nazacuenda ñu vehe ñu, ta ma cuhva ñu cuhva cahan xaan ñiyivi xaan iñi sii yo.

¹⁵ Vatyi iyo ñu ndahvi sa quita ñu ityi ra Ndyoo, ta nanduu nandyico ñu sii cuihna.

¹⁶ Tatu iyo ra yañi yo a cuhva yo ta iyo ñiyivi ndahvi tahan ñu, natyindyee maa ñu sii ñu, ta ma cuhva ñu sa ñihi xaan tyindyeer inga yañi yo. Ta ziqui cuu tyindyeer tandihí yañi yo sii ñiyivi sa yoñi ca ñiyivi sii, iyo sa ndisa.

¹⁷ Ta ra sahnu zatyiño tyiño ra Ndyoo, ra ndyaca ñaha vaha sii tandihí ra yañi yo, cuñi si vatyi tyaa xaan yo yahvi sii ra, ta ñihi ca tatu nacatyi ra ta zacuahra Tuhun Ndyoo.

¹⁸ Vatyi catyi Tuhun Ndyoo: “Ma cuhní ndo yuhu zindiqui nu sañi ti siti yutu sa quita zoo si.” Ta tacuan tucu: “Ra zatyiño tyiño ra Ndyoo cuñi si vatyi coo yahvi ra vatyi yucuan cundito ra.”

¹⁹ Tatu yoñi uu a uñi tahan sa ndaa ma tyizohon tatu tyaa ñiyivi cuatyi sata minoo ra sahnu zatyiño tyiño ra Ndyoo.

²⁰ Zoco ñiyivi sa ña zaña cuatyi, ñihi cohon sihin ñu nu yucu tandihí yañi yo vatyi tacuan ta cua cuyuhu

tandihi ñu ta ma zavaha ñu sa ña vaha.

²¹ Sehi tyiño ya suun ityi nuu ra Ndyoo ta nuu ra ndyaca ñaha sii yo, ra Jesucristo, sihin tandihí ángel ra, ta catyi suhun vatyi zavohon tandihí cuhva ya inuu ñi sihin tandihí ra yañi yo. Ta tatu cuñi con sii minoo ra, zoco ma cuhvón sa zavaha ra sa ña vaha.

²² Ma numi xaan cuhvón tyiño sii minoo ra sa cuu ra ra cuizo tyiño nu iyo ra yañi yo coto coo cuatyún tatu zavaha ra sa ña vaha. Ta ñahñi maa sa ña vaha zavohon caña ñi.

²³ Tuhva xoon cuhu sihin sisun, yucuan cuenda ma cohon maa ndutya ñi. Coho tucun zuhva vino.

²⁴ Iyo ñiyiví casi xaan naha cuatyí ñu vazu cumañi ca cuhun ñu nu cua ndoho ñu. Ta iyo tucu inga ñiyiví ña sito yo ñaa sa cuu cuatyí ñu ndya cuee ca ta cua quituu si.

²⁵ Ta zuun ñi cuhva cuan, casi xaan naha si tatu zavaha ñiyiví sa vaha. Ta vazu iyo si sa ña ndyehe yo, zoco ma cuu coo xehe si tandihí tyiemvu.

6

¹ Ra cuu muzu, cuñi si sa tyaa xaan ra yahvi sii patrón ra. Tacuan ta ma cahan ñiyiví ndya vaha ñi sii ra Ndyoo ta sii Tuhun ra.

² Ta tatu sino iñi patrón ra Tuhun Ndyoo, ña cuñi si sa ma tyaa ra yahvi sii ra vatyí yañi yo cuu sii ra. Ña tacuan. Ñihi ca cuñi si tyindíee ra sii ra sihin sa vaha ca vatyí zuun ñi ra sino iñi cuu ra. Ta nacuñi ra sii patrón ra vatyí yañi yo cuu sii ra. Nacatyún tuhun ya, ta zañiñun sii ñiyiví vatyí zavaha ñu sii si.

Tuhun sa saha sa cuzí iñi yo

³ Tatú iyo minoo ra zacuaha minoo cuhva ña ndisa ta ña sasi tahan si sihin cuhva cahan ra Jesucristo, ra ndyaca ñaha sii yo, ta sihin cuhva zacuaha maa yo,

⁴ zacahnu xaan ra cuan zuun ñi sii maa ra, ta ñahñi maa sa sito ra. Zoco tahan xaan iñi ra natuhun

xaan ra, ta sahñi tahan xaan ra ziquí minoo tuhun ta inga tuhun. Ta sa cuenda cuhva ya vasi sa cuñi xaan ñiyiví cundyaca ñaha ñu sii yañi yo. Ta nduu si tizihí, ta cahan ñiyiví ndya vaha ñi, ta ña cutuñi iñi ñiyiví yoo cuu yañi yo cahan sa ndoo.

⁵ Ta ña ndihí tuhun sahñi tahan ñu vatyí ñahñi sa vaha iyo xiñi ñu. Ta ña sito ñu ñaa sa cuu sa ndisa. Sica iñi ñu vatyí minoo cuhva vaha xaan cuu sa zahacanaa yo xuhun sihin Tuhun Ndyoo.

⁶ Ndisa vatyí sa ñihí yo minoo sa vaha xaan tatu zavaha yo tandihí sa catyi ra Ndyoo ta tatu ñahñi ca sa ndiyivo iñi yo.

⁷ Ñahñi sa ndaha yo sa saa yo ñuu ñiyiví ya, ta nu siin ta ma cuu cuizo yo cuhun yo.

⁸ Zoco tatu iyo sa casi yo ta zahma yo, sihin ñi si cuan nandoo yo vaha.

⁹ Ta ñiyiví sa cuñi xaan sa cu-cuca ñu, nducu coto cuihna sii ñu ta canacava ñu sisi cuatyí. Vatyí cuaha xaan sa cuñi ñu, ta ña ñiñi, ta zatívi si sii ñu. Ta cua ndoyo ñuhu ñu sa cuenda ndaha tyiño ñu ta cua naa ñu.

¹⁰ Vatyí tatu cuñi xaan yo xuhun, cuaha xaan sa ña vaha ndyicuu yo. Ta iyo ñiyiví quisaha ndiyivo iñi ñu xuhun, ta zandoo ñu sa sino iñi ñu Tuhun Ndyoo, ta cuaha xaan tundoho ndyehe ñu.

Cuhva zatyíño yo tatu sino iñi yo sii ra Ndyoo

¹¹ Zoco yoho Timoteo, sii ra Ndyoo cuu suun. Zandoon tandihí cuii sa ña vaha. Cuñi si vatyí cundyicon minoo cuhva vaha xaan, cuhva cuñi maa ra Ndyoo. Ta sino xaan iñun. Cuñi xoon sii inga ra yañi yo ta cundyee xaan iñun. Ta vii ñi cohon sihin ra.

¹² Ñihi zatyíñon tyiño ra Ndyoo. Ta ma zañion cuhva cundito añimon tandihí tyiemvu vatyí yucuan cuenda i casi ra Ndyoo suun vatyí

cunditon sihin ra. Sa i zavohon minoo cuhva vaha xaan vatyi i nacatyun cuhva sino iñun nuu cuaha xaan ñiyivi.

¹³ Ta vityi ndyehe ra Ndyoo. Maa ra saha sa cundito tandih i sa ndito. Ta ndyehe tucu ra Jesucristo cuhva sehi tyiño ya suun. Ta maa ra, vaha xaan i zavaha ra, ta i saha ra sa ndaa nuu ra Poncio Pilato.

¹⁴ Ta catyi suhun vatyi tyoon yahvi tuhun ya, ta ma zamon numinoo cuhva sihin si ndya quivi quasi tucu ra Jesucristo, ra ndyaca ñaha sii yo. Tacuan ta ma ñihii ñiyivi cuhva catyi ñu vatyi ña vaha tuhun cahan maa ra Ndyoo.

¹⁵ Tatu tahan si quivi, cua zandyeha tucu ra Ndyoo sii ñiyivi sii ra Jesùs inga saha. Ta minoo ñi ra Ndyoo cuu ra ndyaca ñaha. Cahnu xaan ra, ta cuu xaan sa zacuu ra. Rey cuu ra sii tandih i inga rey ta ra ndyaca ñaha sii tandih i inga ra ndyaca ñaha.

¹⁶ Maa ñi maa ra Ndyoo cuu ra ña sihi. Iyo ra nu ndisi xaan, nu yoñi sa cuu tuhva. Ta yoñi ca ndyehe sii ra, ta ma cuu ndyehe yo sii ra vityi. Nazacahnu ñiyivi sii ra, ta nacundyaca ñaha ra tandih i cuii tyiemvu. Ta tacuan cuu si.

¹⁷ Cuhvon tyiño sii ñiyivi cuca xaan ihya ñuu ñiyivi vatyi ma zacahnu xaan ñu sii ñu ta ma nii xaan cuu iñi ñu sihin xuhun ñu coto coo quivi ta ndih i si. Vaha ca cua sino iñi ñu iñi ñi sii ra Ndyoo ndito vatyi maa ra cuu ra saha tandih i. Ta sihin sa saha maa ra, ta cua cuzii iñi yo.

¹⁸ Ta catyun sihin ñiyivi cuca vatyi nazavaha ñu maa ñi sa vaha. Nanducuca ñu ityi nuu ra Ndyoo sihin cuhva zavaha ñu sa vaha. Nando ñu vaha cuhva ñu sa sii ñu sii inga ñiyivi, ta nazasa ñu sii si.

¹⁹ Tacuan ta cua coo sa cuca ñu ndya gloria, ta ma cunaa si. Ta cua cundito ñu sihin ra Ndyoo.

Saha ra minoo ca tyiño sii ra Timoteo

²⁰ Yoho Timoteo, zacuenda vohon tyiño sa i saha ra Ndyoo suun. Ma tyizohon sa cahan ñiyivi ndya vaha ñi ta tuhun cahan ñiyivi ña sito. Cahan xaan ñu sa ña vaha ta sa ña ndisa, ta catyi ñu vatyi sito xaan ñu.

²¹ Vatyi iyo ñiyivi sa i quita ñu ityi vaha. Ta ña sino vaha ca iñi ñu Tuhun Ndyoo. Ña sino vaha ca iñi ñu cuhva iyo si sa ndisa. Natyindyee xaan maa ra Ndyoo suun. Ndih i si vityi.

Sa Cu Uu Carta I Tyaa Ra San Pablo Sii Ra Timoteo

*Sa cu uu carta i tyaa ra Pablo sii
ra Timoteo*

¹ Yuhvi ra Pablo cui minoo apóstol ra Jesucristo, cuhva cuñi maa ra Ndyoo. Vasi nacatyi sihin ñiyivi cuhva cacu ñu tatu ndu-iin ñu sihin ra Jesucristo.

² Tyei carta ya suun, Timoteo. Cuñi xein suun; tañi minoo zehi cuu suun. Cuñi sa cua cuhva xaan ra Ndyoo Zutu yo sa vaha suun. Ta cua cundahvi iñi ra suun. Ta cua cuhva ra sa coq sa taxi añimon. Ta tacuan cua zavaha tucu ra Jesucristo, ra ndyaca ñaha sii yo, suhun.

*Nanacatyi maa ra Timoteo vatyi
cuenda ra Cristo cuu sii ra*

³ Ora ta sa cuaa sehi tyahvi ndyoo sii ra Ndyoo cuhva quehin sihin ra cuendon. Zavehi tyiño maa ra sihin minoo sa siñi tuñi vaha tañi i zavaha tandihí ñiyivi sahnu sii.

⁴ Nacohon iñi cuhva i sacun (quivi i quite yucuan). Ta cuñi xein ndyehi suun inga saha. Ta tacuan ta ziqui zii xaan cua cuñi.

⁵ Nacohon iñi cuhva sino xaan iñun. Maha Loida siton sihin maha Eunice zihun, yucuan ñu i sino iñi sa xihna ñi ta ziqui moo. Ta sito vehi vatyi tacuan tucu sino iñi moo.

⁶ Yucuan cuenda zanacohin iñun vatyi zatyiño vohon tyiño ra Ndyoo tañi i saha maa ra Ndyoo cuhva suun quivi i tyize ndehi xiñun.

⁷ Vatyi ña cuñi maa ra Ndyoo sa cuyuhu xaan yo. Saha ra Tatyi li ra vatyi cua cuu zatyiño yo tyiño ra. Ta cua cuñi xaan yo sii inga ñiyivi, ta cua coo sa siñi tuñi vaha xiñi yo.

⁸ Yucuan cuenda ma cucahan nuun nu sohon sa ndaa sa cuenda ra ndyaca ñaha sii yo. Ta ma cucahan nuun sa cuenda mi vatyi ñohi

vehe caa sa cuenda maa ra. Zoco ndoon vaha sa ndyehun tundoho sihin mi sa cuenda Tuhun Ndyoo. Zandyeun iñun vatyi cua tyindyee ra Ndyoo suun.

⁹ Zacacu ra Ndyoo sii yo, ta casi ra sii yo vatyi cu-ii yo tañi maa ra. Ña casi ra sii yo sa cuenda minoo sa vaha i zavaha yo. I casi ra sii yo vatyi tacuan cuñi maa ra. I tahan si sii yo sa cuu yo sa cuenda cuatyi yo. Ta i zavaha maa ra Ndyoo minoo sa vaha xaan sa cuenda maa yo vatyi i zaquisi ra sii ra Cristo, ta i sihi ra sa cuenda maa yo. Cumañi ca sino ñuu ñiyivi, ta sa sito maa ra Ndyoo vatyi cua zavaha ra cuhva cuan.

¹⁰ Ta zañaha ra cuhva cuñi ra sii yo vatyi i zaquisi ra sii ra Jesucristo vatyi zacacu ra sii yo. I zanaa ra tyiño sa cuu yo, ta sihin Tuhun Ndyoo nu cacu yo i zañaha ra sii yo minoo nu ma cuu ca yo.

¹¹ I saha ra Ndyoo tyiño sii, vatyi nacatyi tuhun ra cuhva cacu ñiyivi. Ta i tava ra tyiño sii, vatyi zacuehi sii ñiyivi sa yivi ñiyivi hebreo cuu.

¹² Ta yucuan cuenda tehin tundoho sa ndyehi vityi. Zoco ña cucahan nui vatyi site yoo ra cuu ra sa sino iñi, ta sito vehi vatyi ra cuan, cuu zacuenda ra tandihí sa saha cuende sii ra ndya quivi cua quisira.

¹³ Cundyico vohon cuhva vaha xaan sa zacuehi suun. Sino xaan iñun ta cuñun sii inga ñiyivi vatyi cuenda ra Cristo Jesús cuu suun.

¹⁴ Sihin tundyee iñi sa saha maa Tatyi li suun, zacuendon tandihí tyiño i saha ra Ndyoo suun.

¹⁵ Tañi sa siton, tandihí ñiyivi nu cu si Asia sa i zandoo ñu sii, tañi maa ra Figelo ta ra Hermógenes.

¹⁶ Nacundahvi iñi maa ra ndyaca ñaha sii yo sii ñiyivi ra Onesíforo ta natyindyee ra cuan sii ñu vatyi i tyindyee xaan ra Onesíforo sii. Ta ña cucahan nuu ra vatyi ñohi vehe caa.

¹⁷ Nu ndihí tuhun, quivi i sindyaa ra ñuu Roma ñá zaña ra sa nanducu

ra sii, ndya cuhva ndya i nañih i ra sii.

¹⁸ Nacuhva ra ndyaca ñaha sii yo tumañi iñi sii ra quiví cua tyicuhva ra sii ñiyivi. Sa sito vohon cuhva i tyindyee xaan ra Onesíforo sii, ndya ñuu Efeso.

2

Minoo zandaru vaha sa cuenda ra Jesucristo

¹ Zehe luhli, cundyee iñun sihin tundayee iñi sa saha ra Cristo Jesús suun.

² Tandih i tuhun sa i siñun catyi suhun nuu cuaha xaan ñiyivi, yucuan tuhun nacatyun sihin inga ra vaha, ra sa siton vatyi sino vaha iñi ra ta cuu zacuaha ra sii inga ñiyivi.

³ Ta nacundyee iñun ndyehun tundoho tañi minoo zandaru vaha ra Jesucristo.

⁴ Yoñi minoo zandaru nu sahñi tahan ra ta cuu nazaca ra tyiño maa ra sihin si vatyi coto ma tahan iñi ra i casi sii ra sa cuu ra zandaru.

⁵ Ta inga tucu cuhva, minoo ra siziquí tatu ma cuziquí vaha ra cuhva tahan si, ñahñi cua zahacanaa ra.

⁶ Ta ra zatiño sisi cuhu, xihna ca sii maa ra tahan si naquihin ra tyiño i zacuu ra.

⁷ Nacañi vaha iñun sa catyi suhun ihya, ta cua cuhva ra ndyaca ñaha sii yo vatyi cutuñi iñun tandih i si.

⁸ Nacohon iñun cuhva i nandoto ra Jesús sa i sihi ra. Ta maa ra cuu ñiyivi ra rey David. Ihya cuu Tuhun Ndyoo cuhva cacu yo tañi sa nacaty sihin ñiyivi.

⁹ Ta sa cuenda Tuhun Ndyoo ta ndyehi tundoho ndya cuhva nuhñi tañi minoo ra iyo cuaty. Zoco Tuhun Ndyoo ña nuhñi si.

¹⁰ Yucuan cuenda cundyee iñi ndyehi tandih nuu tundoho sa cuenda ñiyivi i casi ra Ndyoo vatyi tacuan ta cua cuu cacu ñu. Sa cuenda ra Cristo Jesús, ta cua ñihi

ñu sa cacu ñu tandih cuii tyeimvu. Ta vaha xaan cua cuu si.

¹¹ Ndisa cuii cuu si nu catyi si: "Tatu cuu yo sa cuenda ra cuan, cua cundito yo sihin ra.

¹² Tat u ndyehe yo tundoho, cua cundyaca ñaha yo sihin ra. Tat u catyi yo vatyi ña sito yo sii ra, cua catyi tucu maa ra vatyi ña sito ra sii yo.

¹³ Tat u ña nii iñi yo ta zatiño yo tyiño ra, zoco maa ra cua zacuu cuhva sa catyi ra tandih saha vatyi tacuan iyo ra." (Ta cua tyindyee ra sii yo.)

Tatu zatiño vaha ra Timoteo cua quita vaha ra

¹⁴ Zanacohon iñi ñiyivi, ta cuhvon tyiño sii ñu sa cuenda ra ndyaca ñaha sii yo vatyi ma natuhun xaan ñu cuenda ñaa minoo tuhun sisi Tuhun Ndyoo vatyi ñahñi maa tyindyee si sa tacuan. Cua zatívi si sii ñiyivi tyizoho.

¹⁵ Ñihi xaan nducun cuhva zavohon tandih sa cuñi ra Ndyoo tañi minoo ra zatiño vaha ta quita vaha ra. Tacuan ta ma cucahan nuun ity i nuu maa ra Ndyoo vatyi i zatiño vohon sihin Tuhun ra.

¹⁶ Ma cuhun nu natuhun xaan ñiyivi sa cuenda ñaa sa iyo ñuu ñiyivi ya, tuhun ña ñiñi. Vatyi ñiyivi cahan tacuan, tahan saha sa cahan ñu ta cua quiñvi cuaha ca tuhun ña vaha sa ña tahan iñi ra Ndyoo.

¹⁷ Ta ihya tuhun cua zatívi si sii ñiyivi tañi sa tyahyu ñu sihin minoo cuehe. Ta tacuan iyo ra Himeneo ta ra Fileto.

¹⁸ Vatyi sa i quita ra ityi vaha, ta catyi ra vatyi sa yaha nandoto ñiyivi i sihi. Ta iyo ñiyivi sa zatívi ra cuhva sino iñi ñu.

¹⁹ Zoco i cahan ra Ndyoo minoo cuhva, ta ma cuu nazama ca si. Ihya cuu cuhva catyi si: "Nacoto maa ra ndyaca ñaha sii yo yoo cuu ñiyivi ra." Ta catyi tucu si: "Tandih ñiyivi sa catyi vatyi

cuenda ra Cristo cuu ñu, nazandoo ñu sa zavaha ñu sa ña vaha."

²⁰ Sisi minoo vehe cahnu, iyo ndaha tyiño xuhun cuaan ta xuhun cui. Ta iyo tucu ndaha tyiño vitu ta ndyahyu. Iyo si cutyiño ñu maa ñi nu tyaqui, ta iyo si sa cuenda nu ña ñiñi.

²¹ Ta tacuan tucu maa yo, tatu zaña ndisa cuii yo tandihí sa ña vaha, tacuan ta ziqui cua cuu yo minoo ñiyivi vaha xaan. Cua zandundíi ra Jesucristo añima yo, ta ziqui cua cuu cutyiño ra sii yo sa cuenda tandihí tyiño vaha.

²² Zazuenda xoon suun, ta ma zavohon tandihí sa ña vaha tañi zavaha ra yoco. Cundyicon minoo cuhva vaha xaan. Sino xaan iñun. Cuñun sii inga ñiyivi. Ta coo taxun sihin tandihí inga ra yañi yo, ra vaha añima, ra tuhva caca tahvi sii ra ndyaca ñaha sii yo.

²³ Ma tyizohon nu natuhun xaan ñiyivi tuhun ña ñiñi ta sa ña ndisa. Sa siton vatyi sihin tuhun cuan ta quisaha cahñi tahan ñiyivi.

²⁴ Ta minoo muzu cuenda ra ndyaca ñaha sii yo, cuñi si sa ma nanducu ra tizihi. Inga cuhva cuñi si vatyi vii ñi cahan ra sihin tandihí ñiyivi. Cuñi si vatyi cua cuu zacuaha ra sii ñiyivi ta coo xaan tundyee iñi sii ra sihin ñu.

²⁵ Ta ma caca iñi ra vatyi sito xaan ra, zoco vii ñi nazacuaha ra sii ñiyivi ña tyaa yahvi. Vazu cua tyindyee ra Ndyoo sii ñu, ta cua zama ñu cuhva iyo ñu, ta cua coto ñu ñaa sa cuu sa ndisa.

²⁶ Tacuan ta ziqui cua quita ñu sisi xayu cuihna nu i tiñi ra sii ñu cuhva cuñi ra.

3

Cuhva cua nduu ñiyivi nu sa cuñi ndihí tyiemvu

¹ Cuñi si sa coton vatyi ityi nuu ca cua coo quiví yíi xaan.

² Vatyi cua cuñi xaan ñiyivi sii maa ñu, ta ma cuñi ñu sii inga ñiyivi. Cua ndyiyio xaan iñi ñu

xuhun. Cua zacahnu xaan ñu sii maa ñu. Cua cahan ñu ndya vaha ñi sii ra Ndyoo. Ma tyaa ñu yahvi sii zutu ñu tå sii zihí ñu. Ma nacuhva ñu tyahvi ndyoo sii ra Ndyoo a sii ñiyivi. Cuaha xaan cuatyí ñu cua coo.

³ Ma cuñi ñu nu sii ñiyivi sii ñu. Ta nu tucahnu iñi, ma coo sii ñu sihin ñiyivi. Cua cahan xaan ñu cuendu ziqui ñiyivi. Nu maa ñu ta ma cundyee iñi ñu cundyaca ñaha ñu sii ñu sa catyi cuatyí ñu. Quiñi xaan cua nanduu ñu. Ta cua cuxaan xaan ñu sii tandihí sa vaha.

⁴ Cua xico tuhun ñu sii amigo ñu. Ñihi xaan iñi ñu. Sica iñi ñu vatyi sito xaan ñu. Nanducu xaan ñu ñaa sa cuñi maa ñu, ta ma nanducu ca ñu sii ra Ndyoo.

⁵ Cua cundyico ñu minoo cuhva tañi sa sino iñi ñu sii ra Ndyoo, zoco ña ndisa. Ña sino iñi ñu vatyi iyo xaan cuhva sii ra Ndyoo. Ñahñi cuenda cua cu-iun sihin ñiyivi sa tacuan caa.

⁶ Vatyi nu iyo ñiyivi sa tacuan, iyo ra quihví vehe ñiyivi. Zandavi ñaha ra sii ñuzihí sa ñahñi sa siñi tuñi xiñi, ñiyivi sa iyo xaan cuatyí. Zavaha ñu ñaa ñi maa sa catyi inga ñiyivi sihin ñu.

⁷ Ihya ñiyivi cuñi ñu coto ñu tandihí cuii nuu cuhva. Cutuhva xaan ñu, zoco ña cuu coto ñu ñaa sa cuu sa ndisa.

⁸ Tañi maa ra tazi, ra Janes ta ra Jambres, i sahñi tahan ra sihin ra Moisés. Ta tacuan tucu ñiyivi sa quehin tuhun ya, sahñi tahan ñu sihin sa ndisa. Yaha xaan ña vaha sa siñi tuñi xiñi ñu. Sa zama ñu cuhva iyo ñu, ta ña sino ca iñi ñu sii sa ndisa.

⁹ Zoco ma cucahnu ca ñu sihin cuhva ña vaha cuan vatyi yatyi xaan ta cua coto tandihí ñiyivi vatyi ñahñi sa siñi tuñi xiñi ñu. Tañi i tahan sa uu tahan ra sahñi tahan sihin ra Moisés.

Nu ndihí saha ra Pablo tyiño sii ra Timoteo

¹⁰ Zoco sito vohon cuhva i zacuehi suun ta cuhva iye. Siton ñaa

sa cuñi ta cuhva sino iñi. Siton cuhva cundyee xaan iñi sihin ñiyivi ta cuhva cuñi xein sii ñu ta cuhva ña zañe Tuhun Ndyoo vazu ndyehe xein tundoho.

¹¹ Sa cuenda Tuhun Ndyoo ta ndyehe xein tundoho, ta quiñi xaan zavaha ñiyivi sihin. Siton tandihí tundoho sa i tehin ñuu Antioquia, ta ñuu Iconio ta ñuu Listra sa catyi Tuhun Ndyoo. Zoco maa ra Ndyoo i zacacu sii, sisi tandihí si cuan.

¹² Ndisa vatyi tandihí yo sa cuñi cundito cuhva cuñi ra Cristo Jesús, cua ndyehe xaan yo tundoho cua zacuu ñiyivi sii yo sa cuenda ra.

¹³ Zoco ñiyivi ña vaha ta ñiyivi zandavi ñaha, yaha xaan ca cua nduquiñi iyo ñu. Zandavi ñaha ñu, ta cua zandavi ñaha tucu ñiyivi sii ñu.

¹⁴ Zoco cundyico moo cuhva vaha sa i cutuhvon. Siton yoo sa zacuaha suun, ta sito vohon vatyi sa ndisa cuu si.

¹⁵ Ndyo luhlun ta sa siton tutu ra Ndyoo, ta yucuan cuu sa zacuaha suun. Ta saha si coo sa siñi tuñi vaha suun. Ta cua cacun vatyi sino iñun sii ra Cristo Jesús.

¹⁶ Tandihí cuii tutu Tuhun Ndyoo cuu tuhun sa i cahan maa ra Ndyoo. Ta vaha xaan sa zacuaha yo sii si sii ñiyivi. Zañaha si sii yo tatu iyo sa ña vaha sii yo. Zaquihin si ityi vaha sii yo. Ta zañaha si cuhva cundito yo minoo cuhva vaha.

¹⁷ Tacuan iyo si sa vatyi ra sito sii ra Ndyoo ta ñahñi cua cumañi sii ra. Cua cuu zavaha ra tandihí cuii nuu sa vaha.

4

¹ Cua quisi ra Jesucristo tañi minoo ra ndyaca ñaha, ta cua tyicuhva ra sii ñiyivi ndito ta ñiyivi i sihi. Sito maa ra cuan, ta sito maa ra Ndyoo vatyi ñihi xaan sehi tyiño suun

² vatyi nacatyun Tuhun Ndyoo tandihí tyiemvu vazu cuñi ñiyivi tyizoho ñu a vazu ña cuñi ñu. Ñihi

xaan cuhvon tyiño sii ñu tatu ña vaha ndyicuu ñu ta zayuhun sii ñu. Cuhva vohon tuhun sii ñu. Nacoo xaan tundyee iñi suun sihin ñu ta zacuaha vohon sii ñu.

³ Vatyi cua saa quivi sa ma cuñi ca ñiyivi tyizoho ñu ñaa sa catyi Tuhun Ndyoo sa ndisa. Cuaha xaan cua nduu maestro sa cua zacuaha sii ñu cuhva cuñi maa ñu tyizoho ñu.

⁴ Cua zama ñu cuhva iyo ñu. Ma tyizoho ca ñu sa ndisa. Ta cua sino iñi ñu tandihí cuii nuu cuendu.

⁵ Zoco yoho nacoo sa siñi tuñi vaha xiñun. Cundyee iñun tundoho. Nacatyi vohon Tuhun Ndyoo cuhva cacu ñiyivi. Zatyiño vohon tyiño ra Ndyoo cuhva cuñi si.

⁶ Vatyi sa yatyí cua cui sa cuenda Tuhun Ndyoo. Sa cua saa quivi cua quite ihyá ñuu ñiyivi, ta cua cuhin nu ndyaa ra Ndyoo.

⁷ I zatyiño vaha xein tyiño ra Ndyoo cuhva ndya zahacanei ta ndehi sihin tyiño cuan. Ñá zandoi cuhva sino iñi.

⁸ Ta vityi sa ndati minoo sa vaha sa cua cuhva ra Ndyoo sii, vatyi vaha xaan cuhva i sindite ihyá ñuu ñiyivi. Ta vaha xaan ndyaca ñaha maa ra ndyaca ñaha sii yo. Ta maa ra cua cuhva sii si quivi cuan. Ta yivi sii sa maa ñi mi cua cuhva ra, zoco cua cuhva tucu maa ra sii tandihí ñiyivi ndatu sii ra.

Minoo ca tuhun cahan ra Pablo sa cuenda maa ra Timoteo

⁹ Zanumun ta quisi ndyehun sii.

¹⁰ Vatyi i zandoo ra Demas sii, vatyi cuñi ca ra ñuu ñiyivi ya. Cuanhan ra ndya ñuu Tesalónica. Cuanhan ra Crescente ndya nu cu si Galacia. Ta ra Tito ndya nu cu si Dalmacia.

¹¹ Maa ñi maa ra Lucas i ndoo sihin ihyá. Naquisi ra Marcos suhun vatyi cuu tyindyee ra sii.

¹² I zacuhin sii ra Tíquico ndya ñuu Efeso.

¹³ Quivi quisun, cundohon minoo zahma coque sa zandoi ñuu Troas vehe ra Carpo. Ta tacuan

tucu libro mi, ta ñiñi ca cuu si sa ma naa iñun tuti quisi ndyacon.

¹⁴ Ra cañi caa, ra nañi Alejandro, cuaha xaan sa ña vaha i zavaha ra sihin. Zoco maa ra ndyaca ñaha sii yo cua tasi tuñi sii ra cuhva i zayaha ra sihin.

¹⁵ Zazuendon suun sihin ra vatyi sahñi tahan xaan ra sihin Tuhun Ndyoo sa zacuaha ndi.

¹⁶ Sa xihna ñi nu sehi sa ndaa nuu ra cu tyiño, yoñi numinoo ra i tyindyee sii. Tandihí cuii ra i zandoo ra sii. Nazandasi ra Ndyoo cuatyi cuan ziqui ra cuan.

¹⁷ Zoco i tyindyee maa ra ndyaca ñaha sii yo, ra Jesús, sii. Saha ra tundyee iñi sii, ta i cuu nacatyi Tuhun Ndyoo cuhva cacu yo. Ta i siñi tandihí ñiyivi sa yivi ñiyivi hebreo cuu. Ta ñá saha maa ra Ndyoo sa vatyi cahñi ñiyivi sii.

¹⁸ Ta cua zacacu ra sii, sii tandihí cuii sa ña vaha. Ta cua naquihin vaha ra sii, cua cuhin sihin ra nu ndyaca ñaha ra andivi. Cahnu xaan ca cuu maa ra tandihí cuii tyiemvu. Ta tacuan cuu si.

*Nu sa cuñi ndihí cahan ra i saha
ra minoo nacumi sii ñiyivi*

¹⁹ Nacumi sii ndo, yoho maha Prisca ta yoho ra Aquila. Ta tacuan tucu ñiyivi ra Onesíforo.

²⁰ I ndoo ra Erasto ñuu Corinto. Zoco i zandoi sii ra Trófimo ñuu Mileto vatyi cuhu ra.

²¹ Zañiñun ta quisun cuee ca sa nduvisi xaan. Maa ra Eubulo, ta ra Pudente, ta ra Lino, ta ña Claudia ta tandihí inga yañi yo ta cuhva yo zaquisi ñu minoo nacumi suun.

²² Ta nacundayaa maa ra ndyaca ñaha sii yo, ra Jesucristo, suhun. Ta natyindyee xaan ra sii tandihí ndo. Ndihí si vityi.

Minoo Carta I Tyaa Ra San Pablo Sii Ra Tito

*Tyaa ra Pablo minoo carta sii ra
Tito*

¹ Yuhvi ra Pablo minoo muzu ra Ndyoo cui ta minoo apóstol ra Jesucristo cui vatyi cua tyindyei sii ñiyivi i casi ra Ndyoo ta cua sino iñi ñu. Cua nacoto ñu sa ndisa, ta cua sino ca iñi ñu. I casi ra Ndyoo sii ñu vatyi coto ñu cuhva zacahnu vaha ñu sii ra.

² Ta cua coto ñu yozo caa cua ñihi ñu sa cundito ñu sihin ra Ndyoo. Na tuhva maa ra Ndyoo sa cuvatya ra, ta sa i catyi ra cuee ca sa zavaha ra ñuu ñiyivi vatyi cua cuhva ra sa cundito ñiyivi sino iñi sii ra tandihí tyiemvu.

³ Ta vityi sa saa quivi sa saha ra Ndyoo sa nacoto yo Tuhun ra. Ta i saha ra tyiño sii, sa nacatyi Tuhun ra vatyi maa ra zacacu sii yo, ta i tava ra tyiño sii.

⁴ Tyei carta ya suun Tito vatyi zehi sa ndisa cuiti cuu suun vatyi iin ñi cuhva sino iñi yo. Cuñi sa cua tyindye ca ra Ndyoo suun. Nacuhva ra tumañi iñi suun ta sa coo sa taxi añimon. Ta tacuan tucu nacuhva ra ndyaca ñaha sii yo, ra Jesucristo. Maa ra zacacu sii yo.

*Tyiño sa cua zavaha ra Tito nu cu
si Creta*

⁵ I zandoi suun nu cu si Creta vatyi zandundoon tyiño ra Ndyoo nu cumañi cundoo si. Tahan tahan ñuu nu iyo ra sino iñi Tuhun Ndyoo cua tyaa tyiñon sii ra cua cuu anciano tañi sa catyi suhun.

⁶ Ra sa cua cuizo tyiño cuan, cuñi si vatyi cuu ra minoo ñiyivi vaha xaan tacuhva yoñi cuu tyaa cuatyi sata ra. Cuñi si vatyi coo minoo ñi ñazihí ra, ta ma cuu coo uu a uñi tahan ñaha ra. Ta zehe ra cuñi si sa sino iñi tandihí ñu tacuhva ma tyaa

ñiyivi cuatyi sata ñu sa zavaha ñu sa ña vaha a sa ña tyaa ñu yahvi sii zutu ñu.

⁷ Vatyi ra ndyizo tyiño cahnu sa cuenda Tuhun Ndyoo, zacuenda ra tyiño ra Ndyoo. Yucuan cuenda cuñi si vatyi cuu ra minoo fiyivi vaha xaan, ta yoñi cuu tyaa cuatyi sata ra. Ña vaha tatu zavaha ra maa ñi cuhva cuñi maa ra a tatu yatyi xaan cuxaan ra. Ta ma cuu sa cuu ra minoo ra siñi a ra nanducu tizhi a ra zandavi ñaha ta ñihi ra xuhun.

⁸ Cuñi si sa ndyehe vaha ra sii ñiyivi saa vehe ra ta cuhva ra sa casi ñu. Cuñi si vatyi cuu ra minoo ra zavaha sa vaha, cuu ra minoo ra iyo sa siñi tuñi xiñi, minoo ra ndoo xaan, ra zacahnu sii ra Ndyoo sa ndisa cuiti. Ta ma cuñi ra zavaha ra ñaa ndihí sa ña vaha.

⁹ Cuñi si vatyi sino vaha iñi ra maa ñi sa ndisa, Tuhun Ndyoo, sa i cutuhva ra, vatyi sihin cuhva cuan ta cua cuu cuhva ra tundyee iñi sii ñiyivi sihin minoo tuhun vaha. Ta cua cuu zama ra sa siñi tuñi xiñi ñiyivi cahan sa ña vaha ziqui Tuhun Ndyoo.

¹⁰ Vatyi iyo cuaha xaan ñiyivi ña tyaa yahvi, ta cuaha ca ra cuu ra yañi yo, ra hebreo. Ñahñi sa ñiñi cahan ra, ta zandavi ñaha xaan ra sii ñiyivi.

¹¹ Cuñi si sa nacazi yo yuhu ra vatyi zativi ra sa siñi tuñi xiñi cuaha xaan ñiyivi. Sa catyi xuhun ta zacuaha ra sii ñiyivi tuhun sa ña tahan si zacuaha ra.

¹² Minoo ra sa siñi tuñi vaha nu cu si Creta i cahan ra sii ñiyivi ñuu ra, ta catyi ra: "Vatya xaan ra ñuu Creta. Tañi quiti iyo sisi cuhu cuu ra. Yaha xaan cuaha sasi ra, ta susa xaan ra." Tacuan catyi ra cuan.

¹³ Ta ndisa cuiti sa cahan ra. Yucuan cuenda cuuxoon sihin ra zavaha cuhva ña vaha cuan, nanazama ra cuhva iyo ra ta nasino vaha iñi ra.

¹⁴ Tacuan ta ma tyizoho ra cuendo sa cahan ra hebreo, ra ña

sino iñi, ta tuhun cahan ñiyivi sa zama inga cuhva ta ña sino ca iñi ñu sii sa ndisa.

¹⁵ Sa cuenda ñiyivi vaha sa siñi tuñi, tandihí ta vaha si. Zoco ra ña sino iñi, ñahñi maa sa ndoo iyo sii ra vatyi ndya cuhva sica iñi ra ta ndya sa siñi tuñi xiñi ra, quiñi iyo si.

¹⁶ Catyi ra vatyi sito ra sii ra Ndyoo, zoco sihin sa ndyicuu ra ta ndyehe yo vatyi ña ndisa. Ña cundyee ca iñi maa ra Ndyoo ndyehe ra sii ra cuan. Cuaha xaan sa ña vaha ndyicuu ra, ta numinoo cuhva vaha ña tyaa ra yahvi. Ta ña zavaha ra numinoo cuhva vaha.

2

Minoo cuhva vaha

¹ Tuhun zacuaha moo, nacuu si maa ñi maa sa vaha. (Nacasi tahan sa cohan sihin sa cahan Tuhun Ndyoo.)

² Nacatyun sihin ra sahnu vatyi nacuu ra minoo ra vaha. Nacoo ra minoo cuhva sa cuu tyaa tandihí ñiyivi yahvi sii ra. Nanacañi vaha iñi ra tandihí saha. Nasino vaha xaan iñi ra Tuhun Ndyoo. Nacuñi ra sii ñiyivi sa ndisa cuii, ta na-cundyee xaan iñi ra tatu ndyehe ra tundoho sa cuenda Tuhun Ndyoo.

³ Ta tacuan tucu ñu sahnu. Catyun sihin ñu vatyi nacuu ñu ñiyivi vaha xaan tañi tahan si coo ñiyivi sito sii ra Ndyoo. Ta yoñi maa sii ziqui cahan ñu. Ma coho xaan ñu ndixi. Nazañaha ñu minoo cuhva vaha

⁴ sii ñu nacaa tindaha vatyi tacuan ta cua cuñi ñu sii yí ñu ta sii zehe ñu.

⁵ Nazañaha ñu sii ñu vatyi coo sa siñi tuñi vaha xiñi ñu, ta minoo ñi cuhva vaha cua cuñi ñu sii yí ñu. Ta nazacuenda vaha xaan ñu vehe ñu ta cuu ñu ñiyivi vaha ta tyaa ñu yahvi sii maa yí ñu. Vatyi tatu zavaha ñu tandihí cuhva ya, yoñi cua cahan ndya vaha ñi sii Tuhun Ndyoo.

⁶ Zañiñi tucun sii ra yoco nacoo vaha sa siñi tuñi xiñi ra.

⁷ Ta zuun ñi moo, zañohon maa ñi sa vaha sii ra sihin cuhva iyon. Za-cuohon maa ñi sa ndisa cuii. Cuñi si sa cuun minoo ñiyivi vaha.

⁸ Maa ñi tuhun vaha cohon, ta yoñi cua cuu tyaa cuatyí saton cuhva cohon. Ta cua cucahan nuu ra sica iñi inga cuhva vatyi ma ñihi ra cuhva cahan ra ndya vaha ñi sii yo.

⁹ Cuhvon tysiño sii ra yañi yo, ra cuu muzu ñiyivi, vatyi natyaa ra yahvi sii patrón ra. Nazavaha ra tandihí sa catyi patrón ra, ta ma nacahan ra sa cahan patrón ra.

¹⁰ Ma zahu ra sa sii patrón ra. Tandihí cuii cuhva nazavaha ra sa vaha. Ta cua coto patrón ra vatyi sino iñi ra Tuhun Ndyoo sa ndisa, ta cua coto ñu vatyi vaha xaan cuu Tuhun Ndyoo, tuhun sii ra zacacu sii yo.

¹¹ Vatyi sa zañaha ra Ndyoo vatyi saha xaan ra tumañi iñi sii tandihí cuii ñiyivi ta cuñi ra zacacu ra sii yo.

¹² Ta cuhva iyo ra Ndyoo, zañaha si sii yo vatyi nazaña yo cuhva ña vaha sa zavaha ñiyivi ña sito sii ra ta sa ña vaha sa cuñi coño ñuhu yo ihya ñuu ñiyivi ya. Natyaa yo yahvi sii ra Ndyoo. Nazavaha yo tandihí sa vaha ta sa catyi sa siñi tuñi vaha sii yo. Ta nazacahnú yo sii maa ra Ndyoo sa ndisa cuii nii ñi sa ndito yo ñuu ñiyivi ya.

¹³ Vatyi ndatu maa yo minoo quivi vaha xaan, quivi cua quisí tucu ra Jesucristo. Maa ra cuu Ndyoo yo ta ra zacacu sii yo. Cua quisí ra sihin cuaha xaan tundyee iñi sii ra ta ndisi xaan ra.

¹⁴ Saha maa ra sii ra sa cuu ra sa cuenda cuatyí maa yo vatyi cua zacacu ra sii yo sii ityi ña vaha, ta cua zandasi ra tandihí cuii cuatyí yo. Cuñi ra vatyi sii maa ra cua cuu sii yo ta cua cuñi xaan yo zavaha yo sa vaha.

¹⁵ Tandihí cuii cuhva ya nacatyun sihin ñiyivi. Zañiñun sii

ñu nazavaha ñu sa vaha. Catyi casun sihin ñu ñaa sa cuu cuatyi ñu tatu ma tyaa ñu yahvi vatyi tacuan i saha ra Ndyoo tysiño suun. Ma cuhvpon sa cahan ñiyivi ndya vaha ñi suun vatyi zavohon sa vaha.

3

Cuhva cuñi si zavaha yo tatu sino iñi yo Tuhun Ndyoo

¹ Zanacohon iñi ñiyivi vatyi natyaa ñu yahvi sii ra ndyaca ñaha ta sii ra ndyizo tysiño ñuu ñiyivi ya. Nazavaha ñu sa catyi ra cuan, ñaa ndihí ca tysiño vaha.

² Ta ma cahan ñu ndya vaha ñi sii numinoo ñiyivi. Ta ma nanducu ñu tizihi. Nazañaña ñu vatyi vaha añima ñu sihin cuhva iyo ñu sihin inga ñiyivi. Vii ñi cuñi si coo ñu sihin tandihí inga ñiyivi.

³ Vatyi ndya maa yo ta i cuu yo ñiyivi tondo xiñi. Ñiyivi sa ñá tyaa yahvi sii ra Ndyoo i cuu yo. I zandavi ñaha cuihna sii yo, ta i tyaa xaan yo yahvi sii sa cuñi coño ñuhu yo ta zavaha yo sa catyi si. Cuaha xaan sa ña vaha i zavaha maa yo, ta ndiyio xaan iñi yo ndaha tysiño inga ñiyivi. Ña cuu ndyehe ñiyivi sii yo, ta ña cuu ndyehe yo sii ñu.

⁴ Zoco i zañaha maa ra Ndyoo cuhva cuñi xaan ra sii ñiyivi ta cuhva vaha xaan iyo ra. Maa ra i zacacu sii yo.

⁵ I zacacu ra sii yo, zoco yivi sa cuenda sa vatyi vaha xaan i zavaha yo. I zacacu ra sii yo vatyi cundahvi iñi ra sii yo. I zandasi ra cuatyi yo, ta i nacacu saa yo. Ta i saha ra Tatyi Ii ra. Tacuan cuu cuhva ñihi yo sa cacu añima yo, ta ndito yo minoo cuhva saa ihya ñuu ñiyivi ya.

⁶ Vaha xaan saha maa ra Ndyoo Tatyi Ii ra sii yo sa cuenda ra Jesucristo, ra zacacu sii yo.

⁷ Ta sihin tumañi iñi sa saha maa ra Ndyoo sii yo, ta catyi ra vatyi ñahñi ca cuatyi yo, ta ñihi yo cuhva

cundito yo tandihí tysiemu, cuhva sa ndatu xaan yo.

⁸ Tandihi tuhun ya, ndisa xaan si. Cahan tañi minoo ra sito vaha, ta nacatyun tandihí tuhun ya sihin ñiyivi. Tacuan zavohon ta ziqui ñiyivi sa sino iñi sii ra Ndyoo cua nacañi iñi ñu minoo cuhva vaha, ta cua zavaha ñu tandihí sa vaha. Vaha xaan cuu tuhun ya, ta cua tyindyeo xaan si sii tandihí ñiyivi tatu zavaha ñu sii si.

⁹ Zoco ma tyizohon nu natuhun xaan ñiyivi tuhun ña ñiñi xaan tañi yoo sa cuu ñiyivi sahnu sii yo a ñaa ndihí sa catyi ley ra Moisés a ñaa inga tuhun natuhun xaan ñiyivi ta sahñi tahan ñu sa cuenda si. Ta yivi sa ñiñi cuu si. Ta ma cuu tyindyeo si sii yo.

¹⁰ Tatu iyo minoo ra ta natuhun xaan ra ta zacahñi tahan ra sii ra yañi yo. Cana sii ra ta cahan vohon sihin ra minoo saha ta inga tucu saha. Ta tatu ña cuñi ra tyizoho, ma tyisaha con sii ra.

¹¹ Siton vatyi ña vaha añima ra tatu tacuan zavaha ra. Ta sihin cuhva zavaha ra ta zuun ñi maa ra cua cuu ña vaha iñi vatyi ña vaha zavaha ra.

Minoo ca tuhun cahan ra Pablo sihin ra Tito sa cuenda ñi maa ra Tito

¹² Quiví cua tasi sii ra Artemas a sii ra Tíquico nu ndyoon, zanumun ta cuhun ndya ñuu Nicópolis cua ñihi tahan yo vatyi sa cunda iñi sa cuhin yucuan tysiemu sa cua nduvisi ihyá.

¹³ Tyindyeun sihin tandihí cuhva sa cuu suun sii ra Zenas, ra cuu yuhu ñiyivi tañi minoo abogado, ta sii ra Apolos. Tacuan ta cua cuu cuhun ra ityi nuu, ta ñahñi cua cumañi sii ra.

¹⁴ Zacuohon sii ñiyivi sino iñi Tuhun Ndyoo vatyi nazavaha ñu sa vaha sihin tandihí ñiyivi tandihí saha. Nacuhva ñu sa siñi ñuhu sii ñiyivi tatu cumañi si sii ñu sa ndisa. Ña vaha sa cuyucu ñi maa ñiyivi

sa sino iñi ta ma zatyiñó ñu a ma
tyindyee ñu sii inga ñiyiví.

Nu ndihí cahan ra Pablo

15 Tandihí ñiyiví sa ndyaa sihin
ihya tasi ñu minoo nacumi sii moo
Tito. Tacuan tucu tasi ndi minoo
nacumi sii tandihí ñiyiví cuñi sii ndi
sa cuenda Tuhun Ndyoo. Ta maa ra
Ndyoo cua tyindyee sii tandihí ndo.
Ndihí si vityí.

Filemón

Tyaa ra Pablo minoo carta sii ra Filemón

¹ Yuhvi ra Pablo ñohi vehe caa sa cuenda ra Jesucristo. Sihin ra Timoteo yañi yo tyaa ndi carta ya suun yoho Filemón. Cuñi xaan ndi suun vatyi iin ñi zatyiño yo sa cuenda Tuhun Ndyoo.

² Ta tyaa tucu ndi carta ya sii ña Apia, hermana yo, ta sii ra Arquipo vatyi zatyiño xaan tucu maa ra tyiño ra Ndyoo, ta tyaa tucu ndi sii tandihí inga hermano, ra titahan vehe moo.

³ Cuñi xaan ndi sa cua cuhva xaan ra Ndyoo tandihí cuii sa vaha sii ndo ta sa coo sa taxi ñi sii ndo sihin ra, cuhva saha ra Ndyoo Zutu yo ta ra Jesucristo sii yo. Ra Jesucristo cuu ra ndyaca ñaha sii yo.

Cuhva cuñi xaan ra Filemón sii tandihí ñiyivi ta cuhva sino xaan iñi ra sii ra Jesús

⁴ Saha xein tyahvi ndyoo sii ra Ndyoo cuhva quehin sihin ra cuendon,

⁵ vatyi i catyi ñiyivi sihin, cuhva sino xaan iñun sii ra Jesucristo ta cuhva cuñi xoon sii tandihí ñiyivi sa sino iñi sii ra Ndyoo.

⁶ Ta sique sii ra Ndyoo sa cuenda ñiyivi sa sino iñi sa cuenda cuhva sino iñi moo. Sique sii ra vatyi nacutuñi ca iñi ñu tandihí cuii sa vaha xaan sa iyo sii yo sa cuenda maa ra Jesucristo.

⁷ Ta ziñi xaan cuñi ta tyindyeer xaan si sii, yoho hermano, vatyi site cuhva cuñi xoon sii ñiyivi vatyi sa cuenda moo hermano ta ñihi tandihí inga hermano cuaha xaan tundyeer iñi.

Sica ra Pablo minoo tumañi iñi sii ra Filemón sa cuenda ra Onésimo

⁸ Yucuan cuenda vazu iyo xaan cuhva sii, sa saha ra Cristo sii, ta cuu catyi suhun ñaa sa cua zavohon,

⁹ zoco vaha cuñi sa caque tumañi iñi suun vatyi cuñi suun, ta cuñi tucu yoho sii. Ta tañi sa sito moo, yuhvi ra Pablo cui minoo ra sahnu, ta vityi ñohi vehe caa sa cuenda maa ra Jesucristo.

¹⁰ Sica xein tumañi iñi suun sa cuenda ra Onésimo. I nduu ra tañi zehi sa cuenda Tuhun Ndyoo nii ñi sa ñohi vehe caa ya.

¹¹ Ta quiví cuan, ñahñi maa i tyindyeer ra suun, zoco vityi tyindyeer xaan ra sii, ta cua tyindyeer tucu ra suun.

¹² Cua natasi sii ra nu ndyoon. Natiñi cuendon sii ra minoo cuhva vaha xaan vatyi cuñi xein sii ra.

¹³ Cuñi sa vatyi ndoo ra ihya sihin vatyi tyindyeer ra sii sa cuenda moo nii ñi sa ñohi vehe caa sa cuenda Tuhun Ndyoo.

¹⁴ Zoco ña cuñi zavehi sa tacuan tatu ma catyi moo vatyi ña cuñi zañiñi suun ta cua zavohon minoo tumañi iñi sii. Sica iñi sa cua zavohon sii si vatyi ñiyivi vaha cuun ta yivi sa vatyi zañiñi suun.

¹⁵ Vaziqui i zandoo ra Onésimo suun zuhva quiví ta vityi cua cuu natin cuendon sii ra tandihí cuii tyiemvu.

¹⁶ Ta ña maa ñi muzun cuu sii ra vityi, zoco minoo cuhva vaha ca vatyi cuu tucu ra minoo hermano, ra sa cuñi xaan yo. Cuñi xein sii ra, ta cuñi si sa cuñi xaan ca moo sii ra ñihi ca. Ta yivi tañi ñiyivi ndya vaha ñi, zoco cuñun sii ra tañi minoo hermano yo sa cuenda ra ndyaca ñaha sii yo.

¹⁷ Yucuan cuenda tatu cuñun sii mi tañi sa ra tohon, tñun cuendon sii ra tañi sa yuhvi cuu ra.

¹⁸ Ta tatu iyo sa ña vaha i zavaha ra suhun a tatu tavi ra suun, tyoon sii si sa cuenda mi.

¹⁹ Yuhvi ra Pablo tyei zuun ñi sihin letra mi ihya vatyi yuhvi cua tyiyahvi. Ta cuu catyi suhun vatyi yoho tavun sii, sa cuenda cuhva cacu añimon, zoco ma catyi.

²⁰ Tacuan cuu si hermano, ta cuñi vatyi zavohon minoo tumañi iñi sii, sa cuenda ra ndyaca ñaha sii yo. Zanduziun añime sa cuenda ra.

²¹ Ta tyei carta ya suun vatyi nii xaan iñi suun vatyi cua tyoon yahvi sa quehin. Ta sa site vatyi cua zavohon cuaha ca.

²² Ta zanduvaha tucun minoo nu cua cundyei vatyi sica iñi vatyi cua cuhva maa ra Ndyoo sa sica ndo sii ra ta cua cuu quisi ndyehi sii ndo.

Tasi inga ra hermano minoo nacumi sii ra Filemón, ta ziqui ndihí cahan ra Pablo

²³ Iyo minoo ra ñoho vehe caa iin ñi sihin mi sa cuenda ra Cristo Jesús. Epafras nañi ra, ta tasi ra minoo nacumi suun.

²⁴ Ta inga ra tyindyee sii, sa cuenda tyiño maa ra Ndyoo, Marcos nañi ra, ta ra Aristarco, ra Demas, ta ra Lucas. Tasi tucu tandihí ra minoo nacumi suun.

²⁵ Cuñi xein sa cua cuhva xaan ra Jesucristo sa vaha sii ndo. Maa ra ndyaca ñaha sii yo. Ta nacuu si tacuan.

Minoo Carta I Tyaar Ra San Pablo Sii Ñiyiví Hebreo Sa Sino Íñi Tuhun Ndyoo

*I cahan ra Cristo zehe ra Ndyoo
sihin yo sa cuenda zutu ra*

¹ Ta sa naha i cahan ra Ndyoo cuaha xaan saha ta cuaha xaan cuhva sihin ñiyiví sa cuu profeta, ta i nacatyi ra cuan sihin ñiyiví sahnú sii yo tandihí sa i catyi ra Ndyoo.

² Zoco vityi nu sa cuñi ndihí tyiemvu i tasi ra Ndyoo sii Zehe ra, ta i cahan ra sihin yo sa cuenda ra Ndyoo Zutu ra. Ta i saha cuenda ra Ndyoo tandihí cuii sa iyo sii ra sii Zehe ra. Ta sihin Zehe ra i zavaha ra Ndyoo ñuu ñiyiví.

³ Ta ndisi xaan Zehe ra Ndyoo sihin sa ndisi sa iyo sii Zutu ra. Ta tandihí cuii sa zavaha Zehe ra Ndyoo, zañaha si vatyi Ndyoo cuu ra. Ndyaca ñaha ra tandihí cuii sa iyo sihin tuhun cahan ra. Maa ra cuu ra i sihi vatyi cua zandasi ra cuatyi yo, ta i zanaa ra sii si. Ta ziñqui i nandoto ra, ta i sicundyaa ra siyo cuaha ra Ndyoo Zutu ra, ra ndyaca ñaha andiví. Ta ndyaca ñaha ra sihin ra.

Cahnu ca Zehe ra Ndyoo ta ziñqui ángel

⁴ Cahnu xaan ca i nduu Zehe ra Ndyoo ta ziñqui ángel, ta sito yo vatyi cahnu ca ra vatyi Zehe Ndyoo cuu sii ra. I saha ra Ndyoo ziví cuan sii ra, ta ñifí ca si ta ziñqui ziví ángel.

⁵ Numinoo saha ta ñá catyi ra Ndyoo sihin numinoo ángel:
Yoho cuu Zehi,

Vityi zañehi vatyi Zehi cuu suun.
Zoco i catyi ra Ndyoo sa cuenda ra Jesús:

Yuhví cua cuu zutu ra,
Ta maa ra cua cuu zehi.

⁶ Ta quiví i cacu Zehe ra, ra cahnu ca, ñuu ñiyiví ya, i catyi ra Ndyoo:

Nazacahnu tandihí cuii ángel
Ndyoo sii ra.

⁷ Catyi ra Ndyoo sa cuenda ángel
vatyi:

Tañi tatyí cuu ra, ta tañi ñúhu cuu
rá.

⁸ Zoco sa cuenda Zehe ra catyi ra
Ndyoo:

Ndyoo cuun, ta cua cundyaca
ñohon tandihí cuii tyiemvu.

Ndoo xaan cua cundyaca ñohon.

⁹ Cuñi xoon sa zavaha ñiyiví sa
ndoo, ta cuxaan xoon sihin
sa ñá vaha.

Yucuan cuenda saha ra Ndyoo sa
zii xaan ca cuñun ta ziñqui
tandihí inga ñiyiví.

¹⁰ Ta inga saha i catyi tucu ra
Ndyoo sihin ra:

Ra ndyaca ñaha cuun, ta nu i
quisaha si i zavohon ñuu
ñiyiví,

Ta i zavohon andiví sihin ndohon.

¹¹ Cunaa si cuan, zoco cua ndoo
moo.

Cua ndusahnu ñuu ñiyiví ta
andiví tañi ndusahnu minoo
zahma.

¹² Ta cua natuun sii si tañi minoo
zahma ñí cuu si, ta cua
nazama si tañi nazama
ñiyiví sii zahma ñu.

Zoco yoho ma zamon, ta ma cuu
moo ndaha ñi.

¹³ Zoco numinoo saha ñá catyi ra
Ndyoo sihin minoo ángel:

Cundyoon siyo cuehi ndya cua
zahacanei sii tandihí ra
xaan ñí suun ta ziñqui cua
cuhve sa cundyaca ñohon sii
tandihí ra.

¹⁴ Ña tacuan catyi ra Ndyoo sihin
ángel vatyi muzu ñí cuu ra cuan.
Tasi ra Ndyoo sii ra sa cua tyindyee
ra ta zacuenda ra sii ñiyiví cua za-
cacu ra Ndyoo.

2

*Cahnu xaan cuu cuhva zavaha
ra Ndyoo sa cua zacacu ra sii ñiyiví*

¹ Yucuan cuenda cuñi si sa sino
xaan ñí yo sii sa ndisa sa siñi yo,
coto zandoo yo sii si.

² I sityiño ra Ndyoo ángel, ta i nacatyi ra ley ra Ndyoo sihin ra Moisés. Sihin ley cuan i sindyaca ñaha maa ra Ndyoo quívi cuan, ta ñu ñá tyaa yahvi i ndoho ñu tandihí saha tañi tahan si.

³ Ta maa tucu yo, ma cuu cacu yo tatu ma tyaa yo yahvi cuhva i cahan ra Jesucristo ra ndyaca ñaha sii yo, cuhva cua zacacu ra sii yo. Cahnu xaan cuu cuhva i zavaha ra. Ta ra i siñi sa cahan ra Jesús i nacatyi ra sihin yo cuhva i catyi ra.

⁴ Ta i zañaha casi ra Ndyoo vatyi sa ndisa cuu tuhun cuan vatyi i zavaha ra zeña ta cuaha nuu sa ndyityi, ta i saha ra cuaha cuhva sa cuu zavaha ñiyivi sihin cuhva sa saha Tatyi li ra, cuhva cuñi maa ra Ndyoo.

Ra Jesús cuu ra cua cuhva sa cacu ñiyivi

⁵ Ña saha ra Ndyoo sa cua cundyaca ñaha ángel sii ñuu ñiyivi sa cua coo ityi nuu ca, ñuu ñiyivi sa cahan maa yo tuhun.

⁶ Zoco iyo nu catyi Tuhun Ndyoo tyehen cuhva cahan minoo ra profeta sihin ra Ndyoo sa cuenda ra Cristo:

¿Ñaa ra cuu minoo rayii ta nacohon
xaan iñun sii ra,
Ta ñaa cuenda zacahnu xoon sii ra
cu zehe ñiyivi?

⁷ Zuhva ni quívi, quívi ndyaa ra ñuu
ñiyivi cua zanduluhlhu xoon
sii ra ta ziquí ángel,

Ta cuee ca cua zanducahnú xoon
sii ra,

Cua cuhva xoon cuhva sii ra, ta
tyaa xoon yahvi sii ra;

⁸ Ta sohon sa cundyaca ñaha ra
tandihí cuii sa iyo.

Quívi i saha ra Ndyoo sa cundyaca ñaha ra sii tandihí, ñahñi sa cua cumañi sa ma cuu cundyaca ñaha ra. Zoco tañaha ca cua ndyehe yo sa cundyaca ñaha ra sii tandihí cuii.

⁹ Zoco ndyehe yo sii ra Jesús, ra i quisí ndya gloria. Luhlu ca i nduu ra ta ziquí ángel zuhva ñi quívi. Ta

vityi zacahnu xaan ra Ndyoo sii ra ta saha xaan ra cuhva sii ra vatyi i sihi ra sa cuenda maa yo. Vaha xaan cuu maa ra Ndyoo, ta yucuan cuenda i sihi ra Jesús sa cuenda tandihí ñiyivi ñuu ñiyivi.

¹⁰ Maa ra Ndyoo i zavaha tandihí, ta sa cuenda maa ra i sino si. Vaha cuu si sa saha ra sa ndyehe ra Jesús tundoho vatyi cuhva cuan cua cuu ra Jesús sa cuenda tandihí ñiyivi ñuu ñiyivi. Sihin cuhva i zavaha ra Jesús ta i zacacu ra sii cuaha xaan ñiyivi, ta cuu nduu ñu ñiyivi ra Ndyoo ta cuhun ñu gloria. Ta sihin tundoho sa i ndyehe ra Jesús ta i nduu ra ra cua cuhva sa cua cacu ñiyivi. Cuhva cuan i zavaha ra tandihí sa cuñi maa ra Ndyoo.

¹¹ Ñiyivi sa sa nduvaha sihin ra Ndyoo ta ra i zanduvaha sii ñu, ñiñi ñi Zutu ñu. Yucuan cuenda ña cahan nuu ra zanduvaha sii ñu sa catyi ra vatyi tahan ra cuu sii ñu.

¹² Tyehen catyi ra:
Ndyoo Zuti, cua quehin tuhun nuu
yañi,
Cua zacahni suun nu yucu ñiyivi
sino iñi suun.

¹³ Ta inga saha i catyi ra:
Niñi xaan cua cuu iñi sii Zuti.
Ta inga tucu saha i catyi ra:
Ica vii ya sihin zehi, ñiyivi i saha ra
Ndyoo sii.

¹⁴ Zehe ra Cristo, coño ñuhu ta niñi cuu ñiu. Yucuan cuenda i nduu tucu ra Jesús minoo ñiyivi sa iyo coño ñuhu ta niñi. Vatyi tatu cua nduu ra minoo ñiyivi cua cuu cuu ra, ta sihin cuhva cuan zanaa ra cuhva iyo sii cuihna. Vatyi maa ra cuihna cuu ra i quisaha sihin tuhun sa sihi ñiyivi.

¹⁵ Zoco sihin cuhva sa sihi ra Jesús ta i zanaa ra cuhva sa sahñi cuii cuihna sii ñiyivi, ta zacacu ra Jesús sii ñiyivi sihin tuhun sa yuhu xaan ñu coto cuu ñu. Tañi sa nuhñi ñiyivi tandihí quívi i cuu si vatyi i yuhu xaan ñu sa cuu ñu.

¹⁶ Ndisa cuii vatyi ñá quisí tyindyeer ra Jesús sii ángel. Zoco

quisi tyindyee ra sii tandihí zehéra Abraham.

¹⁷ Yucuan cuenda i nduu ra ñiyivi sa ndisa tañi tandihí maa yo, ra cu yañi ra. Ta sa cuenda cuan cundahvi xaan iñi ra sii yo. Zavaha ra tandihí sa catyi ra Ndyoo, ta cuu ra zutu ya cahnu sa cuenda yo ityi nuu ra Ndyoo. Ta i tyiyahvi ra sa cuenda cuatyi ñiyivi.

¹⁸ Maa ra i ndyehe xaan tundoho cuhva i ndducu coto ihñi cuihna sii ra, zoco ñiahñi sa ña vaha i zavaha ra. Ta yucuan cuenda cuu xaan tyindyee ra sii ñiyivi quiví ndducu coto ihñi cuihna sii ñu.

3

Ra Jesúś, cahnu ca ra ta ziquí ra Moisés

¹ Yucuan cuenda, ndoho hermanos, i casi ra Ndyoo sii ndo vatyi cua zanduvahá ra sii ndo. I casi ra sii ndo vatyi cuhun ndo gloria. Vityi cuñi sa cua nacañi iñi ndo sa cuenda ra Jesúś. Maa ra cuu ra i tasi ra Ndyoo sihin tyiño ra. Ta ra cu zutu ya cahnu cuu ra sa cuenda maa yo, ta sino xaan iñi yo sii ra.

² I tava ra Ndyoo tyiño sii ra Jesúś sa cuu ra zutu ya cahnu sa cuenda yo, ta i zavaha ra tandihí sa cuñi maa ra Ndyoo. Tañi ra Moisés i zavaha ra tandihí sa cuñi ra Ndyoo nu i siyucu ñiyivi hebreo quiví cuan. Ta ñiyivi hebreo i cuu ñiyivi sii maa ra Ndyoo.

³ Ta cahnu ca ra cuu ra Jesúś ta ziquí ra Moisés vatyi ñiñi ca cuu ra zandaa minoo vehe ta ziquí maa si.

⁴ Tahan tahan vehe sa iyo, iyo ra zandaa sii si, zoco ra i zavaha tandihí cuu maa ra Ndyoo.

⁵ Vaha xaan sa i zavaha ra Moisés sihin ñiyivi ra Ndyoo quiví cuan, zoco minoo muzu ra Ndyoo ñi i cuu maa ra ta minoo ra saha sa ndaa ñi i cuu ra. I nacatyi ra sihin ñiyivi tandihí sa i catyi ra Ndyoo sihin ra.

⁶ Zoco ra Cristo cuu ra zehéra Ndyoo, ta i zavaha ra tandihí sa i catyi ra Ndyoo. Ndyaca ñaha

ra sii tandihí ñiyivi sa sino iñi sii ra Ndyoo. Ta maa yo cuu vehe ra Ndyoo tatu ma yuhu yo cahan yo tuhun ra ndya cuhva ndya cua quisi tucu ra Jesúś. Ta tatu zii xaan cuñi yo nii ñi sa ndatu yo sii ra.

Cua quitatu ñiyivi sa sino ndisa cuii iñi sii ra Ndyoo

⁷ Yucuan cuenda catyi Tatyi li ra Ndyoo:

Vityi tatu siñi ndo sa cahan ra Ndyoo,

⁸ Ma zandundava xaan ndo iñi ndo, Tañi i zavaha ñiyivi hebreo quiví i ndducu coto ihñi ñu sii ta i zacuxaan xaan ñu sii ñu i sica noo ñu minoo nu ityi xaan.

⁹ Yucuan i ndducu coto ihñi xaan ñu sii vazu i ndyehe ñu cuhva i zavehi uu xico cuiya.

¹⁰ Yucuan cuenda i cuxein sihin ñiyivi cuan,

Ta i catyi: “Tandihí saha zandoo ñu ityi vaha ta sica noo ñu minoo ityi ña vaha, ta zandavi ñaha si sii ñu, Ta ña cuñi ñu coto ñu cuhva cuñi sa cua zavaha ñu.”

¹¹ Ta i cuxaan xein, ta i catyi: “Sa ndisa cuii vatyi ma cuhva mi sa cua saa ñu nu i zanduvehi nu cua quitatu ñu.”

¹² Tacuan i catyi ra Ndyoo. Yucuan cuenda coto vaha ndo sii ndo hermano coto ñaha ma sino ndisa cuii iñi ndo sa cahan ra Ndyoo, ta cua zaña ndo sii ra Ndyoo ndito ta cuhun ndo inga ityi.

¹³ Cuhva ndo tundyee iñi sii minoo ndo ta sii inga ndo tandihí quiví nii ñi sa cuu ca, ta cuhva cuan, yoñi ndo cua zandavi ñaha cuatyi sii. Vatyi tatu zandavi ñaha cuatyi sii ndo cua zanduñihi ndo iñi ndo ta ma tyaa ca ndo yahví sii ra Ndyoo.

¹⁴ Tatu nii xaan cuu iñi yo sii ra Ndyoo ndya cuhva ndya cua ndihí ñuu ñiyivi, iñi ñi cua ñihi yo sa vaha sihin ra Cristo.

¹⁵ Ta ma naa iñi ndo vatyi vityi cuu nu catyi ra Ndyoo:

Vityi tatu cuiñi ndo sa cahan ra Ndyoo,
Ma zanduñih indo iñi ndo tañi i zavaha ñiyivi hebreo quivi i zacuxaan ñu sii.
Catyi ra Ndyoo.

¹⁶ ¿Ta yoo cuu ñiyivi i siñi sa cahan ra Ndyoo ta i zacuxaan ñu sii ra? Ñiyivi cuan cuu ñu cuahan sihin ra Moisés. Ta cuahan ra ityi nuu, ta i tava ra sii ñu ñuu Egipto quivi cuan.

¹⁷ ¿Ta yoo sihi i cuuxaan ra Ndyoo uu xico cuiya? Zuun ñi sihin ñiyivi cuan i cuuxaan ra vaty i zavaha ñu cuaty, ta yucuan cuenda i sihi ñu sisi cuhu ityi cuahan ñu.

¹⁸ ¿Ta yoo sii saha ra Ndyoo tuhun ra vaty ma cuhva ra sa cua saa ñu nu cua quitatu ñu? I saha ra tuhun cuan sii ñiyivi ñá tyaa yahvi sii ra.

¹⁹ Ta cuhva cuan ndyehe yo vaty ñá cuu quihvi ñu vaty ñá sino ca iñi ñu sa catyi ra Ndyoo.

4

¹ Vityi iyo ca tuhun i saha ra Ndyoo sa cuenda sa quihvi ñiyivi ra nu cua quitatu ñu. Yucuan cuenda cuñi si sa cuyuhu yo coto coo zuhva maa ndo sa cua catyi ra Ndyoo vaty ma cuu quihvi ndo.

² Ndisa vaty sa ñihi maa yo Tuhun Vaha ra Ndyoo tañi i ñihi ñiyivi sahnu hebreo sii si. (Tuhun cuan cuu nu i catyi ra Ndyoo vaty cua cuhva ra minoo nu cua quitatu yo), zoco ñá tyindye si sii maa ñu vaty ñá sino ndisa cuui iñi sii si.

³ Ta maa ñi maa yo sa sino iñi, cuu quihvi yo nu cua quitatu yo tañi sa catyi maa ra Ndyoo:

Sa cuxein ta sehi tuhin vaty ñiyivi ñá sino iñi sii,

Ma cuu quihvi ñu nu cua quitatu ñu.

Catyi ra Ndyoo. Tacuan i catyi ra vazu sa ndyaa listo si ndya quivi i ndihi zavaha ra ñuu ñiyivi.

⁴ Vatyi iyo nu i catyi ra tyehen sa cuenda quivi cu usa cuan: "I quitatu ra Ndyoo quivi cu usa cuan, ta ñá zatyiño ca ra quivi cuan."

⁵ Ta iyo tucu nu catyi si tyehen: "Ndaha cuii ñi ma cuu quihvi ñu nu cua quitatu ñu sihin." Catyi ra Ndyoo.

⁶ Iyo ca ñiyivi cua quihvi vaty i ñiyivi i ñihi tuhun cuan sa xihna ñi, ñá cuu quihvi ñu vaty ñá tyaa ñu yahvi sii ra Ndyoo.

⁷ Yucuan cuenda i saha tucu ra Ndyoo inga saha sa cua cuu quihvi ñiyivi. I cahan ra Ndyoo sihin ra David, ta i nacaty i ra David tyehen, cuhva i catyi tucu ra Ndyoo inga saha zuun ñi cuhva tañi i catyi ra sihin ñiyivi hebreo ta sa naha: Vityi tatu cuiñi ndo sa quehin, Ma zañihi ndo iñi ndo.

⁸ Tatu sa i sindyaca ra Josué sii ñiyivi nu cua quitatu ñu sa ndisa cuii, ma cahan ca ra Ndyoo inga saha sa cuenda inga quivi nu cua cuu quihvi ñiyivi nu cua quitatu ñu.

⁹ Zoco i cahan ra cuhva cuan vaty cumañi ca quihvi ñiyivi ra Ndyoo nu cua quitatu ñu sa ndisa cuii.

¹⁰ Tatu sa quihvi minoo ra nu saha ra Ndyoo nu cua quitatu ra, sa zandoo ra cuan tyiño ra ta quitatu ra tañi i quitatu ra Ndyoo quivi sa ndihi zavaha ra ñuu ñiyivi.

¹¹ Yucuan cuenda nanducu xaan yo cuhva quihvi yo nu cua quitatu yo yucuan; natyaa yo yahvi sii ra Ndyoo coto cuu yo tañi i cuu ñiyivi hebreo ta sa naha ta ma cuñihi yo saa yo.

¹² Vaty tandihi cuii tuhun cahan ra Ndyoo, ndito si, ta iyo xaan cuhva sihin si. Ñihi xaan si tañi minoo espada ta cuñihi si saa si ndya añima yo ta ndya sa siñi tuñi sii yo. Ta zañaha casi Tuhun Ndyoo sii yo ñaa sa sica iñi yo sihin añima yo tatu vaha si a ñia vaha si.

¹³ Ñahñi maa sa cuu cuxehe nuu maa ra Ndyoo. Sito maa ra tandihi

cuii sa zavaha tandih iñiyivi nacahnu ñuu ñiyivi. Ta cua nacuhva cuenda yo sii ra tandih cuii sa zavaha yo.

Ra Jesúsu cuu ra cu zutu ya cahnu

¹⁴ Ra Jesúsu, zehe ra Ndyoo cuu sii ra, ta maa ra cuu zutu ya cahnu sa cuenda yo ityi nuu ra Ndyoo ndya gloria. Yucuan cuenda natiiñ cuenda vaha yo cuhva sa sino xaan iñi yo sii ra.

¹⁵ Vatyi ra cu zutu ya cahnu sa cuenda maa yo, cutuñi iñi ra ñaa cuenda cuñi yo zavaha yo cuatyi vatyi iñnducu coto ihñi cuhnra sii ra tandih cuii cuhva tañi iñnducu coto ihñi ra sii maa yo, zoco ñá zavaha ra Jesúsu numinoo cuatyi.

¹⁶ Yucuan cuenda ña vaha sa yuhu yo. Nacaca xaan yo sii ra Ndyoo vatyi tyindyee ra sii yo. Ta cua tyindyee ra sii yo vatyi cua cundahvi iñi ra sii yo, ta cua zaha ra tumañi iñi sii yo ta tyindyee ra sii yo tatu iyo sa siñi ñuhu sii yo.

5

¹ Tandih ra cu zutu ya cahnu sa cuenda ñiyivi hebreo, ñiyivi cuu maa ra. I casi ra Ndyoo sii ra vatyi cua cahan ra sa cuenda tandih ñiyivi ityi nuu ra Ndyoo. Sahñi ra quiti ta saha tucu ra inga sa saha maa ñiyivi sa cuenda cuatyi ñu.

² Iyo saha i zavaha tucu maa ra sa ña vaha. Yucuan cuenda cutuñi iñi maa ra cuhva iyo ñiyivi, ta vii xaan i sicoo ra sihin ñiyivi tondo ta sihin ñu i zaña ityi vaha tatu i ndu-uu iñi ñu cuatyi ñu.

³ Ta sa cuenda cuatyi ñiyivi ta cuatyi tucu maa ra, ñiñi xaan cuñi si sa cua cahñi ra quiti.

⁴ Zoco yivi maa ra i catyi vatyi cua quihin ra tyiñi sa cuu ra ra cu zutu. Maa ra Ndyoo i casi sii ra, zuun ñi cuhva tañi i casi ra sii ra Aarón.

⁵ Ta zuun ñi cuhva cuan, ñá zanduñiñi ra Cristo sii ra, ta yivi maa ra catyi vatyi cua nduu ra minoo ra cu zutu ya cahnu. Ña tacuan. Maa ra

Ndyoo cuu ra i casi sii ra Cristo. I catyi ra Ndyoo sihin ra:
Yoho cuu zehi;
Vityi zanducahnu mi suun.

⁶ Ta inga saha i catyi ra Ndyoo sihin ra tyehen:
Minoo ra cu zutu cua cuun tandih cuii tyiemvu.
Cua cuun tañi ra Melquisedec.

⁷ Quiivi i cuu ra Jesúsu minoo ñiyivi ihyá ñuu ñiyivi, i cahan xaan ra sihin ra Ndyoo, ta ñihi xaan i sacu ra ta i sica xaan ra tumañi iñi sii ra vatyi cuu zacacu ra Ndyoo sii ra ta ma cuu ra. Ta i siñi ra Ndyoo sa cahan ra vatyi cua zavaha ra tandih iñi vatyi ra Ndyoo.

⁸ Ta vazu zehe ra Ndyoo cuu sii ra Jesúsu, zoco sihin cuhva i ndyehe ra tundoho ta i cutuhva ra tyaa ra yahvi sii ra Ndyoo.

⁹ Ta sa yaha cutuhva ra tandih iñi cuñi ra Ndyoo sa coto ra, ta ziqui i ñihi ra cuhva saha ra sa cundito ñiyivi tandih cuii tyiemvu, tandih iñiyivi tyaa yahvi sii ra

¹⁰ vatyi i casi ra Ndyoo sii ra sa cuu ra minoo ra cu zutu ya cahnu zuun ñi cuhva tañi i cuu ra Melquisedec.

Ica xaan zandoo yo Tuhun Ndyoo tatu sa sino iñi yó

¹¹ Iyo cuaha xaan sa cuñi catyi sa cuenda ra Cristo, zoco yii xaan cua zacutuñi vehi iñi ndo vatyi zoho xaan ndo.

¹² Vityi sa naha sino iñi ndo, ta tahan si cuu ndo maestro sii inga ñiyivi. Zoco sii maa ndo siñi ñuhu ca sa zañaha ñiyivi sii ndo inga saha zuhva zuhva ñaa sa catyi Tuhun Ndyoo. Cuu ndo tañi sa lee. Ndyo vityi sihi ca ndo zicui, ta ña cuu casi vaha ndo xita. Quehin ziqui minoo cuhva, cuhva iyo ndo sihin Tuhun Ndyoo.

¹³ Tatú sihi ca ndo zicui cuñi si catyi si vatyi ña cutuñi vaha iñi ndo Tuhun Ndyoo, ta cuu ndo tañi sa lee.

¹⁴ Ta ña cuu casi vaha ndo xita ta cuu ndo tañi ñiyiví sahnu sa cuenda Tuhun Ndyoo tatu ma quisaha nacoto xihna ndo ñaa sa cuu sa vaha ta ñaa sa cuu sa ña vaha ta zavaha ndo maa ñi sa vaha.

6

¹ Yucuan cuenda, nazandoo yo cuhva i cuu yo ta nu quisaha sino iñi yo sii ra Cristo, ta nacuahnu yo sa ndisa cuiti sihin Tuhun Ndyoo. Ma nacani tucu ndo inga saha Tuhun Ndyoo afima ndo ta ziqui naquisaha ndaca tucu ndo tucuhnu iñi sii ra Ndyoo ta quisaha sino tucu iñi ndo uu a uñi tahan saha.

² Ma zacuaha xaan ca yo ziqui cuhva yozo caa cua coo ndutya ñiyiví ta yozo caa ñihi ñiyiví Tatyi li. Ta ma zacuaha xaan ca yo sa cuenda yozo caa cua nandoto ñiyiví ta cuhva cua tasi tuñi ra Ndyoo sii ñu.

³ Tatu cua cuhva ra Ndyoo, vityi cua yaha yo ityi nuu ca ta cahan yo inga ca tuhun.

⁴⁻⁶ Ñiyiví sa sito Tuhun Ndyoo sa ndisa ta ñihi ñu sa vaha sa saha ra Cristo sii ñu ta tiñi cuenda ñu sii Tatyi li, ta tatu sa sito ñu vatyi vaha xaan cuu Tuhun Ndyoo ta tuu iñi ñu vatyi saha xaan ra Cristo cuhva sii ñiyiví sino iñi sii ra. Tatu sa sito ñu tandihí cuhva cuan ta zandoo ñu sii ra Cristo ta catyi ñu vatyi ña vaha ra ta ña sino ca iñi ñu, ma cuu ca zasino yo iñi ñiyiví sa caa tacuan. Ma zama tucu ñu cuhva iyo ñu inga saha. Inuu ñi nduu ñu sihin ñiyiví i sahñi sii ra Cristo nuu cruz vatyi sihin cuhva zavaha ñu ta sihin cuhva sa quiñi cahan ñu saha xaan ñu ticahan nuu sii maa ra Cristo vatyi cahan xaan ñiyiví sii ra sa cuenda cuhva zavaha ñu.

⁷ Tañi cuhva sii minoo ñuhu. Tatu coon vaha zavi nuu si ta sahnu vaha itu a ñaa sa tasi ñiyiví yucuan, tyindye ñuhu cuan sii ñu, ta ñihi ñuhu cuan sa vaha sii ra Ndyoo.

⁸ Zoco tatu saha si maa ñi iñu ta yucu sa ñahñi yahvi ndyaa, ñahñi yahvi ndyaa tucu ñuhu cuan. Cua catyi ñiyiví vatyi ña vaha si, ta cua cayu si.

*Niixaancuu iñiyo vatyis asito yo
vatyi cua ñihi yo sa vaha xaan cuee
ca*

⁹ Ndoho hermanos, cuñi xein sii ndo, ta vazu quehin sa tacuan, zoco site vatyi iyo vaha maa ndo sihin Tuhun Ndyoo, ta ña iyo ndo tañi ñuhu ña vaha cuan. Site vatyi zavaha maa ndo sa vaha tañi zavaha ñiyiví cua cacu.

¹⁰ Vatyi ndoo xaan cuu maa ra Ndyoo, ta ma naa iñi ra cuhva i zatyiño ndo tysiño ra ta cuhva cuñi xaan ndo sii ñiyiví ta tyindye ndo sii inga ñiyiví sino iñi sii ra vatyi cuñi xaan ndo sii maa ra. Ta tacuan zavaha ndo ndya cuhva ndya vityi.

¹¹ Ta cuñi xein sa cua sino vaha iñi tahan tahan ndo sii ra Cristo ndya cua cuhva ra Ndyoo sa cundito ndo tandihí cuiti tysiemu.

¹² Ta cuhva cuan ma cuzusa ndo, zoco cua zavaha ndo cuhva zavaha ñiyiví sino xaan iñi sii ra Ndyoo. Vatyi maa ñu zandyee xaan ñu iñi ñu ndyehe ñu tundoho, ta ma zaña ñu sa sino iñi ñu vatyi sihin cuhva cuan cua ñihi ñu sa vaha sa catyi ra Ndyoo sa cua cuhva ra sii ñu.

¹³ Quivi i catyi ra Ndyoo sihin ra Abraham vatyi ndisa cuiti cua cuhya maa ra minoo sa cua cuhva ra sii ra Abraham, ñá ñihi ra Ndyoo ziví inga ra cahnu ca cua cahan ra ta cua coto ra Abraham vatyi ndisa cuiti sa cahan ra. Yucuan cuenda i cahan ra Ndyoo zuun ñi sihin ziví maa ra vatyi ñahñi inga ca ziví cahnu ca tañi ziví maa ra Ndyoo.

¹⁴ Tyehen i catyi ra Ndyoo sihin ra Abraham: “Ndisa cuiti cua tyindyei suun, ta cua zanducuahua xein suun.” Catyi ra.

¹⁵ Ta ra Abraham i zandyee ra iñi ra ta i ndatu ra quivi cua cuhva ra Ndyoo sa cua catyi ra. Ta ndisa i ñihi ra Abraham sii si.

¹⁶ Cuhva iyo ñiyiví ñuu ñiyiví, tatu saha minoo ra tuhun ra sii ñu sa cuenda minoo tyiño sa cua zavaha ra, saha tucu ra cuan ziví inga ra cahnu ca ta ziví tucu maa ra vatyi tatu ma zavaha ra cuhva catyi ra, cua taşı tuñi ra cahnu cuan sii ra. Ta sihin cuhva cuan ta ndoo ñiyiví vaha vatyi sito ñu vatyi cua zavaha ra cuhva sa sa catyi ra.

¹⁷ Ta zuun ñi cuhva cuan i zavaha ra Ndyoo. I cuñi ra zañaha ra sii ñiyiví vatyi ndisa cuii ra sa cahan ra ta ña zama ra inga cuhva, yucuan cuenda i cahan ra zuun ñi sihin ziví maa ra.

¹⁸ Tacuan i zavaha ra. I saha ra tuhun ra ta i saha ra ziví ra, ta ñuu tahan si cuan ma cuu zama si vatyi ma cuu cuvatya ra Ndyoo. Ta yucuan cuenda maa yo, ra sa quihví nu cua zacacu ra Ndyoo sii yo, cuu cuní xaan iñi yo ta cuu tiún cuenda vaha xaan yo cuhva i catyi ra Ndyoo vatyi cua cuhva ra sii si sii yo.

¹⁹ Tañi minoo barco, iyo minoo caa vee xaan sa zanoo ñiyiví sisi ndutya ityi zuhma barco ta ma cuu cuhun barco cuan ndya vaha ñi. Ta tacuan tucu maa yo. Ma caca xaan iñi yo tatu cacu yo a ma cacu yo vatyi tuhun i saha maa ra Ndyoo sii yo, ndoo si sihin yo tandihí cuii tylemvu. Ta vityi sa cuenda sa nñi iñi yo sii sa catyi maa ra Ndyoo sihin yo ta cuu si tañi sa sá saa yo gloria

²⁰ vatyi sa cuahan maa ra Jesús ndya indyacuan. Sa cuahan maa ra ityi nuu ca sa cuenda maa yo. Ta yucuan i ñihi ra minoo tyiño sa ma ndihí sa cuu ra ra cu zutu ya cahnu zuun ñi cuhva tañi i cuu ra Melquisedec.

7

Zutu ya cahnu cuu ra Jesús zuun ñi cuhva tañi i cuu ra Melquisedec

¹ Ra Melquisedec i cuu ra rey ñuu Salem, ta i cuu ra ra cu zutu cuenda ra Ndyoo cahnu. Ta minoo saha i

tahan ra sii ra Abraham sa nasaa ra ta sa yaha sahñi ra sii ohon tahan rey. Ta i zoco ñaha ra Melquisedec sii ra Abraham.

² Ta tandihí ndaha tyiño ta xuhun i nama ra Abraham sii rey ra i sahñi ra, i saha maa ra minoo sa tahan tahan usi tahan si sii ra Melquisedec. Ziví maa ra Melquisedec cuñi si catyi si “rey ra ndoo xaan”. Ta rey i cuu ra ñuu Salem. Ta sa yucuan cuñi si catyi si minoo nu cua cuyucu ñiyiví sihin sa taxi ñi.

³ Ñahñi nu catyi si yoo ra cuu zutu ra Melquisedec a yoo ña cuu zihí ra a yoo cuu inga ñiyiví sii ra. Ta ñahñi nu catyi si ama i cacu ra a ama i sihi ra. Cuu ra minoo ra cu zutu tandihí cuii tylemvu tañi ra cu Zehe ra Ndyoo.

⁴ Zaha ndo cuenda vatyi minoo ra ñiñi xaan cuu ra vatyi ra Abraham i cuu ra zutu sii tandihí ñiyiví sa sino iñi sii ra Ndyoo, ta i saha xaan ra sa vaha sa i nama ra sii ra Melquisedec.

⁵ Catyi ley ra Ndyoo vatyi tandihí zehe ra Leví, ra cuu ra cu zutu, cuu quihin ra xuhun ñiyiví. Cuu quihin ra minoo sa tahan tahan usi tahan xuhun ñu. Cuu quihin ra xuhun cuan sii ra tahan ra.

⁶ Zoco yiví ra tahan ra Abraham i cuu sii ra Melquisedec, zoco zuun ñi i quihin ra Melquisedec xuhun ra Abraham ta i zoco ñaha ra sii ra Abraham. Ta sii ra Abraham, i saha xaan ra Ndyoo tuhun ra.

⁷ Sito tandihí ñiyiví vatyi ra cahnu ca cuu ra zoco ñaha sii inga ra.

⁸ Ra cu zutu, ñiyiví sii ra Leví, quihin ra xuhun ñiyiví, ta cuee ca ta cua cuu ra, zoco cahan Tuhun Ndyoo sa cuenda ra Melquisedec tañi sa ndito ca ra.

⁹ Ta ra Leví ta zehe ra, cuu ra tuhva quihin xuhun ñiyiví sa cuenda tyiño ra sa cuu ra ra cu zutu, zoco cuu catyi yo vatyi i tyiyahvi ra Leví xuhun sii ra Melquisedec quiví i tyiyahvi maa

ra Abraham vatyi ñiyivi sahnu ra Leví i cuu sii ra Abraham.

¹⁰ Vatyi cua cuu ra Leví tata ra Abraham quivi i tahan ra Melquisedec sii ra Abraham.

¹¹ Saha ra Ndyoo ley ra sii ra Moisés zeha ra Leví. Ta catyi ley cuan vatyi tata ra Leví cua cuu ra cu zetu. Tatu sa vatyi cuu nduvaha ñiyivi sihin ra Ndyoo sihin cuhva i zavaha zeha ra Leví, ra cuu ra cu zetu, ña siñi ñuhu sa tasi ra Ndyoo sii inga ra cu zetu tañi ra Melquisedec (ta ra Cristo cuu ra i tasi ra Ndyoo). Tatu ñá siñi ñuhu ra Cristo, cua tasi tucu ra Ndyoo sii inga ra cu zetu, ra cu zeha ra Leví, zoco ñá zavaha ra tacuan.

¹² Ta quivi i tasi ra Ndyoo sii inga nuu ra cu zetu, yucuan ta i nazama ley ra.

¹³ Ta ra sa cahan yo tuhun ihyá (ra Cristo cuu ra) ta yivi zehe ra Leví cuu sii ra. Ta ñiyivi sii ra ña tahan si sii ñu cahñi ñu quiti ta cuhva ñu sii ti sii ra Ndyoo nu altar.

¹⁴ Ra Judá i cuu ñiyivi sahnu sii ra Jesúz, ta ñá catyi ra Moisés vatyi cua coo ra cu zetu sii ñiyivi sii ra Judá.

¹⁵ Zoco ndisi xaan ndyehe yo vatyi i zama ra Ndyoo cuhva tuhva ñiyivi sii ra vatyi i quisi ra Cristo ta cuu ra ra cu zetu ya cahnu zuun ñi cuhva i cuu ra Melquisedec.

¹⁶ Yivi tata ra Leví i cuu sii ra Cristo. Ta yucuan cuenda ña tahan si sa cuu rä ra cu zetu. Zoco cuu ra zetu vatyi iyo xaan cuhva sii ra ta vatyi ma cuu cuu ra.

¹⁷ Ta tacuan i catyi minoo ra tyaa Tuhun Ndyoo nu i tyaa ra tyehen: Yoho cua cuu minoo ra cu zetu tandihí cuii tyiemvu

Zuun ñi cuhya tañi i cuu maa ra Melquisedec.

¹⁸ I tyaa siyo ra Ndyoo sii ley sahnu cuan vatyi ñá cuu tyindyee si sii ñiyivi

¹⁹ vatyi ñá zanduvaha si sii ñiyivi sihin ra Ndyoo. Zoco vityi iyo inga

cuhva vaha ca, ta sa cuenda maa si cuu tuhva yo sii ra Ndyoo (vatyi zanduvaha ra Cristo sii yo sihin ra Ndyoo).

²⁰ I saha ra Ndyoo zivi ra quivi i catyi ra vatyi ma naa cuhva sa cuu ra Cristo minoo ra cu zetu tandihí cuii tyiemvu.

²¹ Ñá cahan ra Ndyoo cuhva cuan sa cuenda inga ra cu zetu, zoco ñihi xaan i cahan ra Ndyoo ta i saha ra zivi ra quivi i saha ra tyiño sii ra Cristo, ta i catyi ra:

Sa cahan ra Ndyoo, ta ma zama ra inga cuhva:

“Yoho cua cuu minoo ra cu zetu tandihí cuii tyiemvu
Tañi ra Melquisedec.”

²² Sa cuenda ra Cristo, vaha xaan ca tyiño saa ya ta ziqui tyiño sahnu.

²³ Cuhva i sicoo tyiño sahnu cuan, cuaha xaan ra cu zetu i sicoo vatyi tuhva ra cuan sihi ta ziqui ñá cuu ca zavaha ra tyiño cuan.

²⁴ Zoco ra Cristo cuu ra cu zetu tandihí cuii tyiemvu vatyi ma cuu ca ra cuan.

²⁵ Yucuan cuenda cuu zacacu ndisa cuii ra sii tandihí ñiyivi natuhva sii ra Ndyoo sa cuenda maa ra vatyi ndito ra tandihí cuii tyiemvu, ta cuu cahan ra sihin ra Ndyoo sa cuenda yo.

²⁶ Maa ra cuu ra cu zetu sa siñi ñuhu sii yo vatyi ii xaan ra; yoñi cuu tyaa cuatyi sata ra. Numinoo saha ta ñá zavaha ra sa ña vaha. Vazu ñiyivi cuu ra tañi maa yo, zoco ñahñi cuatyi ra, ta iiñ ñi ndyaa ra sihin ra Ndyoo gloria.

²⁷ Ñá zavaha ra tañi i zavaha ra cu zetu ta sa naha vatyi ña cuñi si sa cahñi ra quiti tandihí quivi sa cuenda cuatyi maa ra ta sa cuenda cuatyi ñiyivi vatyi sa yaha zavaha ra cuhva cuan quivi i saha ra sii maa ra ta i sihi ra sa cuenda maa yo.

²⁸ Cuhva i sicoo ley sahnu, ndya maa ra cu zetu ta i sicoo cuatyi ra, zoco cuee ca i saha ra Ndyoo zivi ra ta i tyaa tyiño ra sii zeha ra sa cuu

ra ra cu zutu, ta ñahñi cuatyi ra iyo tandihí cuii tyiemvu.

8

Cahan ra Jesúsi sihin ra Ndyoo sa cuenda yo

¹ Ihya cuu minoo sa ñiñi sa i catyi ndi sihin ndo. Iyo minoo zutu ya cahnu sa cuenda maa yo. Vaha ca ra ta ziquí ra cu zutu i zatyiño tyiño ra Ndyoo cuhva sahnu. Ndyaa ra gloria siyo cuaha ra Ndyoo nu ndyaca ñaha ra Ndyoo tandihí.

² Yucuan zatyiño ra Cristo nu ii, nu cu si vehe ñuhu ra Ndyoo sa ndisa vityi. Maa ra Ndyoo i zavaha sii si ta yiví ñiyivi.

³ Tahan tahan ra cu zutu ya cahnu cuñi si sa cua coo sa cua cuhva ra sii ra Ndyoo. Yucuan cuenda cuñi si sa coo tucu sa cua cuhva ra Cristo sii ra Ndyoo.

⁴ Tatu sa vatyi ndyaa ra Cristo ñuu ñiyivi vityi, ma cuu ra minoo zutu ya cahnu ihya ñuu ñiyivi vatyi sa iyo ra saha sa saha ra sii ra Ndyoo cuhva catyi ley sahnu.

⁵ Ra yucuan zavaha ra minoo cuhva ñi, ta zacahnu ra sii ra Ndyoo sisi minoo vehe sa caa tañi caa sa iyo sisi gloria. Vatyi quivi sa cuñi zandaa ra Moisés sii si i catyi ra Ndyoo sihin ra vatyi nazacuenda vaha ra ta zavaha ra sii si tañi cuhva i zañaha ra Ndyoo sii ra xiñi yucu Sinaí.

⁶ Zoco ra Cristo, i ñihí ra minoo tyiño vaha xaan ca ta ziquí tyiño i zavaha ra cu zutu ta sa naha. Sa cuenda tyiño saa i zandaa ra Ndyoo sihin ñiyivi sino iñi sii ra Cristo ta vityi cahan ra Cristo sa cuenda yo sihin ra Ndyoo. Vaha ca tyiño saa ya ta ziquí tyiño sahnu cuan vatyi vaha ca cuhva i cahan ra Ndyoo quivi i zandaa ra sii si.

⁷ Ñá zatyiño vaha tyiño sahnu cuan vatyi tatu sa vatyi i zatyiño vaha si ma cuñi si sa coo inga sa saa.

⁸ Zoco zuun ñi maa ra Ndyoo catyi vatyi cuñi si sa zama tyiño sahnu cuan vatyi i catyi ra:

Cua coo quivi sa cua zandei inga tyiño sihin ñiyivi hebreo, ñu ndyaa nu cu si Israel ta ñu ndyaa nu cu si Judá.

⁹ Ma cuu si tañi tyiño i zandei sihin ñiyivi sahnu sii ñu quivi i tave sii ñu ñuu Egipto;

Vatyi maa ñu, ña tyaa ñu yahvi tyiño i zandei sihin ñu, Ta yucuan cuenda i zandoo ihne sii ñu.

Catyi ra Ndyoo.

¹⁰ Zoco ihya cuu tyiño saa sa cua zandei sihin ñiyivi hebreo cueee ca, catyi ra Ndyoo.

Cua tyei ley sisi sa siñi tuñi xiñi ñu ta sisi añima ñu;

Ta yuhvi cua cuu Ndyoo sii ñu, Ta maa ñu cua cuu ñiyivi sii.

¹¹ Ta ma cuñi ca si sa zacuaha ñu sii ñiyivi yucu vatyi sihin ñu a sii ra tahan ñu.

Ma cuñi si sa catyi ñu: "Nacoto ndo sii ra Ndyoo";

Vatyi tandihí cuii ñu cua coto sii mi, ndya ra sahnu ca ta ndya ra ndyihí.

¹² Vatyi cua cundahvi iñi sii ñu sa cuenda sa ña vaha sa i zavaha ñu,

Ta ma nacohon ca iñi cuatyi ñu.

¹³ Quivi i cahan ra Ndyoo cuhva ya sa cuenda minoo tyiño saa, cuñi si catyi si vatyi sa zandihí ra cuhva sa cuenda tyiño sahnu. Ta sa cua naa si.

9

Vehe ñuhu sa iyo ñuu ñiyivi ta vehe ñuhu sa iyo andivi

¹ Sa xihna ñi tyiño i zandaa ra Ndyoo sihin ñiyivi, saha ra cuhva sii ñu yozo caa cua zacahnu ñu sii ra. Ta i sicoo minoo vehe ñuhu ihya ñui ñiyivi nu i zacahnu ñu sii ra.

²⁻³ I zavaha ñiyivi tañi minoo vehe zahma. Ta sisi si i sicoo uu tahan cuarto vatyi tyazi zava ñu

sihin zahma. Sa xihna ñi cuarto cuan nañi si Nu Li, ta sisi si i siyucu minoo candelero ta minoo mesa nu siyozo pan ii. Ta cuarto sa cu uu cuan, nañi si Nu Li Xaan Ca.

⁴ Sisi sa cu uu cuarto cuan i siyucu minoo altar xuhun cuaan nu i sahmi ra cu zutu ya cahnu cutu ta minoo caja iñi xuhun cuaan sa ñoho yuu nu ndyaa sa usi tahan nduzu ñuhu ta tutatu ra Aarón ta minoo quiyi xuhun cuaan sa ñoho zuhva maná.

⁵ Xiñi caja cuan nandyaa uu tahan ángel xuhun cuaan. Nañi si querubines. Ta ndyaa sa ndisi xaan sii maa ra Ndyoo nuu si. Ta zacaa nduu tahan ángel cuan ndisi si nuu caja cuan nu nañi si Nu Zaha Ra Ndyoo Tucahnu Iñi Sii Niyivi. Ma cuu nacatyi casi tandihí ca si sihin ndo vityi.

⁶ Ta tatu sa ndyaa listo tandihí ndaha tyiño cuu quihví ra cu zutu sisi cuarto sa xihna ñi cuan ñaa ñi cuhva cuñi ra sa cuenda sa zavaha ra tyiño ra.

⁷ Zoco minoo tuhun ñi ra cu zutu ya cahnu cuu quihví sisi cuarto cu uu cuan. Cuu quihví ra minoo tuhun ñi saha sa minoo cuiya. Ta ñaa ra niñi quíti sa cua quíti ra nu nañi si Nu Zaha ra Ndyoo Tucahnu Iñi Sii Niyivi. Tacuan i zavaha ra sa cuenda cuatyi maa ra ta sa cuenda cuatyi tandihí ñiyivi.

⁸ Ta sihin tandihí cuhva cuan zañaha Tatyi Li sii yo vatyi quívi cuan ñá cuu quihví ndya vaha ñi ñiyivi nu ndyaa ra Ndyoo vatyi ndyaa inga vehe ñuhu cuan, ta maa ñi ra cu zutu cuu quihví yucuan.

⁹ Ta cuhva cuan zañaha si minoo cuhva ñiñi xaan sii maa yo vatyi sihin cuhva sahnu cuan i saha maa ra cu zutu sa saha maa ñiyivi sii ra Ndyoo, zoco ñá zanduvaha si sii ñu sa ndisa cui.

¹⁰ Vatyi cuhva sahnu cuan i cahan si maa ñi sa cuenda ñaa sa cuu casi ñiyivi ta ñaa sa cuu coho ñu ta yozo caa cua cuan ndundiñ ñu, ta saha si cuaha nuu ley sa cua tyaÑ ñu

yahvi. Tandihí ihyá zañaha si sii ñiyivi vatyi iyo cuatyi ñu ityi nuu ra Ndyoo. Cuhva sahnu cuan cuu sa cuñi ra Ndyoo sa cua zavaha ñiyivi ndya cua cuhva ra minoo cuhva saa sa vaha xaan ca.

¹¹ I quisí ra Cristo vatyi cua cuu ra ra cu zutu ya cahnu sa cuenda minoo cuhva vaha ca, ta i quihví ra sisi vehe ii sa ii xaan ca vatyi ndyaa si gloria. Yivi ñiyivi i zavaha sii si, ta ña ndyaa si ñuu ñiyivi ya.

¹² Ta ñá quihví ra Cristo yucuan sihin niñi mvee ta sihin niñi minoo zindiquí luhlu. I quihví ra nu ii xaan ca sisi gloria nu ndyaa ra Ndyoo vatyi sa sati ra niñi maa ra, ta sihin cuhva cuan i ñihi ra cuhva zandasi ra cuatyi tandihí yo tandihí cuii tyiemvu.

¹³ Ta tatu sihin cuhva sahnu sa sati niñi mvee ta niñi zindiquí ta sa sahmi ñiyivi sii zindiquí ta cuu nduvaha ñiyivi zuhva sihin ra Ndyoo,

¹⁴ vaha xaan ca cuu si vityi sihin niñi ra Cristo vatyi ñahñi cuatyi maa ra, ta i saha ra sii ra sii ra Ndyoo vatyi cua cuu ra sa cuenda cuatyi maa yo. I tyindyee Tatyi Li sii ra, ta i cuu zavaha ra cuhva cuan. Zanduvaha si sii yo sa ndisa cuii, ta vityi ma caca xaan ca iñi yo yozo caa cua cuu ndasi cuatyi yo. Vityi tyaÑ yo yahvi sa ndisa cuii sii ra Ndyoo ndito.

¹⁵ Ra Cristo cuu ra cahan saha ñiyivi ityi nuu ra Ndyoo sa cuenda tyiño saa i zandaa ra Ndyoo. Tacuan zavaha ra vatyi tacuan ta ñiyivi i casi ra Ndyoo cua cuu ñihi ñu sa ndasi cuatyi ñu tandihí cuii tyiemvu vatyi yucuan cuu sa catyi ra Ndyoo sa cua cuhva ra sii ñu. Cua ñihi ñu sii si vatyi i sihi ra Cristo, ta yucuan cuenda ma tyiyahvi ca maa ñu sa cuenda cuatyi i zavaha ñu quívi i sindyaa ñu sihin tyiño sahnu i zandaa ra Ndyoo, quívi tañaha ca zandaa ra tyiño saa.

16 *Tatu sa sihi minoo ñiyivi ta i zandoo ra minoo tutu ta catyi si ñaa ndaha tysiño ra cua ñihi minoo minoo ñiyivi sii ra, yoñi cua ñihi ndaha tysiño cuan tatu ma cuu zañaha ñu vatyi i sihi ndisa cuii sitoho si.*

17 *Zoco tatu i sihi ndisa cuii ra, tacuan ta ziqui cuu cutyiño ñu tutu i tyaa ra sa cuenda ndaha tysiño ra, ta cacu ndisa cuii tysiño i zandaa ra sa cuenda si.*

18 *Yucuan cuenda ndya sa xihna ñi tysiño i zandaa ra Ndyoo ta i sati niñi quiti sa cuenda si vatyi cuñi si sa coo minoo sa cuu ta cua coto ñiyivi vatyi cua zavaha ra Ndyoo cuhva catyi ra.*

19 *Vatyi sa yaha nacatyi ra Moisés tandihí usi tahan ley maa ra Ndyoo sihin tandihí ñiyivi, ta ziqui i quihiñ ra niñi zindiqui lee ta niñi mvee, ta i tyihi ra ndutya, ta i zatyi ra zuhva zoco yutu sa nañi hisopo sa nuhñi sihin yuhva cuaha, ta i quiti ra sii si nuu tutu nu ndyaa ley cuan, ta i zatyi ra sii si ta sii tandihí ñiyivi sihin niñi ta ndutya cuan.*

20 *Ta i catyi ra Moisés: “Ihya cuu niñi sa cuenda tysiño zandaa ra Ndyoo sihin ndo. Ihya cuu cuhva catyi ra cua zavaha ndo.” Tacuan i catyi ra Moisés.*

21 *Ta zuun ñi cuhva cuan i quiti ra niñi sisi vehe ñuhu cuan ta nuu tandihí ndaha tysiño sa sityiño ñiyivi sa cuenda sa zacahnu ñu sii ra Ndyoo quiví cuan.*

22 *Cuhva catyi ley sahnu cuan cuñi si catyi si sa sa yatyi tandihí nduvaha ityi nuu ra Ndyoo sihin sa quiti ñiyivi niñi nuu si. Ta tatu ñahñi niñi cua cati, ma cuu ndasi cuatyi ñiyivi.*

I zandihí ra Cristo cuhva iyo sii cuatyi quiví i saha ra sa cuu ra

23 *Ta ndaha tysiño sa iyo ñuu ñiyivi ya, minoo cuhva ñi cuu si sii sa iyo sisi gloria. Ta zuun ñi cuhva sa nduvaha si ityi nuu ra Ndyoo, ta tacuan tucu cuñi si sa ndu-ii sa iyo*

sisi gloria, zoco sihin minoo cuhva vaha xaan ca.

24 *Vatyi ra Cristo ñá quihví ra sisi minoo vehe i zavaha ñiyivi sa caa cuhva caa vehe sa cuu vehe ra Ndyoo sa ndisa. I quihví maa ra sisi gloria, ta cahan ra sihin ra Ndyoo sa cuenda maa yo.*

25 *Ña cuñi si sa cuu ra Cristo cuaha saha tañi zavaha ra cu zutu ya cahnu hebreo ihyá ñuu ñiyivi nu quihví ra vehe ii sihin niñi quiti tahan tahan cuiya.*

26 *Vatyi tatu tacuan cuñi si sa cuenda ra Cristo, cua ndyehe ra tundoho cuaha saha ndya ta sino ñuu ñiyivi ta ndya vityi. Zoco ña tacuan cuu si. I quisí ra Cristo minoo saha ñi, ta i quisí ra vatyi cua zandihí ra cuhva iyo sii cuatyi. Ta i zandihí ra cuhva iyo sii si quiví i saha ra sa cuu ra.*

27 *Ta ñuu ñiyivi ya, minoo saha ñi cua cuu yo, ta ziqui cua tyicuhva ra Ndyoo sii yo.*

28 *Ta zuun ñi cuhva cuan i cuu si sihin ra Cristo. I sihi ra minoo saha ñi sa cuenda cuatyi cuaha ñiyivi. Ta cua quisí ra inga saha zoco yivi ca sa cuenda sa cua cuu ra sa cuenda cuatyi yo. Inga saha cua quisí ra vatyi cua zacacu ra sii ñiyivi sa ndatu xaan sii ra.*

10

¹ *Ley sahnu cuan, i cuu si tañi minoo xiñahnú ñi sii sa vaha sa cua coo cuee ca, zoco yivi sa vaha cuan cuu ley sahnu cuan sa ndisa vatyi sa cuenda cuhva sahnu cuan ta tahan tahan cuiya ta saha maa ñiyivi sa saha ñu sii ra Ndyoo, zoco ñá cuu zanduvaha si sii ñu sihin ra Ndyoo sa ndisa cui.*

² *Tatu sa vatyi i nduvaha ñu sihin ra Ndyoo sa ndisa sihin cuhva cuan, minoo tuhun ñi saha cua zavaha ñu sii si ta sa ndasi ñi cuatyi ñu ta ma caca ca iñi ñu sa iyo ca cuatyi ñu.*

³ *Zoco i saha ñu sa saha ñu sii ra Ndyoo tahan tahan cuiya, ta i nacohon iñi ñu cuatyi ñu cuhva cuan.*

⁴ Vatyi niñi zindiqui ta niñi mvee, ma cuu zandasi si cuatyi yo.

⁵ Yucuan cuenda quivi i quis ra Cristo ñuu ñiyivi i catyi maa ra sihin ra Ndyoo Zutu ra:

Ña cuzii iñun sihin sa sahñi ñiyivi quiti ta saha ñu suun a ñaa inga sa cua cuhva ñu suun.

Yucuan cuenda i zavohon coño ñuhu vatyi cua cuuhva sii si suun.

⁶ Ñá tahan iñun ñaa sa cua cahmi ñiyivi a ñaa sa cua cuhva ñu sa cuenda cuatyi ñu.

⁷ Ta ziquí i catyi mi: “Ndyehe Ndyoo Zuti sa vasi zavehi cuhva cuñun

Tañi catyi si nuu tutu moo.”

⁸ Tacuan i catyi ra Cristo, ta nu i catyi ra: “Ña cuñun ta ña tahan iñun ñaa sa saha maa ñiyivi ta sa sahmi ñu sa cuenda cuatyi ñu cuhva catyi ley sahnu”,

⁹ ta ziquí i catyi tucu ra: “Ndyehe, vasi zavehi cuhva cuñun.” Ta sihin cuhva cuan ta zandihí ra Cristo cuhva sahnu ta quisaha tucu ra inga cuhva saa.

¹⁰ Ta sihin cuhva saa ya, ndasi cuatyi yo, ta nduvaha yo sihin ra Ndyoo tandihí cuii tyiemvu vatyi sihi ra Cristo sa cuenda yo.

¹¹ Sihin cuhva sahnu cuan nandyaa ra cu zutu ityi nuu altar tandihí quivi, ta tandihí quivi saha xaan ra sa saha ra sii ra Ndyoo, zoco ñá cuu zandasi si cuan cuatyi ñiyivi numinoo saha.

¹² Zoco i saha maa ra Cristo zuun ñi sii maa ra sii ra Ndyoo sa cuenda cuatyi yo minoo tuhun ñi saha, ta ziquí i sicundyaa ra siyo cuaha ra Ndyoo.

¹³ Ndatu ra quivi sa cua tyihi ra Ndyoo sii tandihí ra xaan iñi sii ra sihi saha ra.

¹⁴ Vatyi sihin sa minoo tuhun ñi saha i sihi ra Cristo ta ndisa cuii i zanduvaha ra ityi nuu ra Ndyoo sii tandihí ñiyivi cua sino iñi sii ra.

¹⁵ Ta saha tucu Tatyi Ii sa ndaa sa cuenda si vatyi catyi ra:

¹⁶ Ihya cuu tyiño cua zandei sihin ñiyivi hebreo

Vazu ñá zavaha ñu cuhva catyi inga tyiño i zandei sihin ñu sa xihna ñi.

Cua tyei lei sisi añima ñu, Ta cua tyei sii si sisi sa siñi tuñi xiñi ñu.

(Tacuan ta cua zavaha ñu sii si.)

¹⁷ Ta ziquí i catyi tucu ra Ndyoo: Ta ma nacohon ca iñi cuatyi ñu ta cuhva ñá tyaa ñu yahvi sii.

¹⁸ Ta tatu sa zandasi ra Ndyoo cuatyi ñiyivi, ña cuñi ca si sa cahñi ñiyivi quiti a sa cuhva ñu inga sa cua cuhva ñu sii ra Ndyoo sa cuenda cuatyi ñu.

Cuñi si sa natuhva yo sii ra Ndyoo

¹⁹ Yucuan cuenda, ndoho hermanos, cuu quihvi maa yo nu ii xaan ca nu ndyaa ra Ndyoo vatyi i sati ra Jesús niñi ra.

²⁰ Ihya cuu cuhva saa i nuña ra Cristo sa cuenda maa yo vatyi i saha ra sa cuu ra. Ta cuhva cuan i ndata minoo zahma sa ndita caa nuu ra Ndyoo, ta vityi cuu quihvi yo nu ndyaa ra Ndyoo, ta cua cundito yo tandihí cuii tyiemvu.

²¹ Vityi ra cu zutu ya cahnu sa cuenda maa yo ndyaca ñaha ra tandihí vehe ra Ndyoo.

²² Yucuan cuenda natuhva yo sii maa ra Ndyoo. Ta ma ndu-uu iñi yo. Niíxaan cuu iñi yo vatyi cua tiñ cuenda ra sii yo vatyi sa nacatya niñi ra Cristo añima yo, ta ma caca xaan ca iñi yo sa cuenda cuatyi yo vatyi ñahñi ca si, ta sa sicoo ndutyu yo.

²³ Ta vityi ma ndu-uu iñi yo, ta ma caca xaan iñi yo tatu cua zacacu ra Ndyoo sii yo a ma zacacu ra vatyi sa i catyi ra vatyi cua zacacu ra sii yo, ta niíxaan cuñi si cuu iñi yo sii yo.

²⁴ Ta nanducu yo cuhva tyindyeetahan yo sii tahan yo, ta cuhva cuan cua cuñi xaan ca yo sii tandihí

hermano, ta cua zavaha xaan ca yo sa vaha.

²⁵ Iyo ñiyivi ña sahan ca ñu culto, zoco maa yo ma zandoo yo sa tathan yo. Ta nacuhva yo tundyee iñi sii minoo yo ta sii inga yo, ta ñihi ca cuñi si vityi vatyi ndyehe ndo vatyi sa cuñi saa quivi cua tyicuhva ra Ndyoo sii ñiyivi.

²⁶ Ta vityi sa sito yo ñaa sa cuu sa ndisa, ta tatu catyi yo vatyi ña sino ca iñi yo, ma cuu ca zandasi ra Ndyoo cuatyi yo tatu tacuan zavaha yo.

²⁷ Ma cuu caca iñi yo vatyi cua ñihi yo sa vaha, tatu tacuan zavaha yo. Cua cuxaan xaan ra Ndyoo sihin yo quivi cua tasi tuñi ra sii ñiyivi. Ñin ñi cua cayu yo sihin ñiyivi xaan iñi sii ra Ndyoo.

²⁸ Ta sa naha tatu ñá tyaa minoo ñiyivi yahvi sii ley i saha ra Ndyoo sii ra Moisés, ta tatu i saha uu a uñi tahan ñiyivi sa ndaa sa cuenda cuatyi ra, ñá cundahvi iñi ñiyivi sii ra. I sahñi ñu sii ra.

²⁹ ¿Atu ña sito ndo vatyi ñihi xaan ca tahan si ndoho ñiyivi ña sino iñi sii Zehe ra Ndyoo? Ña tyaa ñu yahvi sii niñi ra Cristo sa sati ra quivi i zandaa ra Ndyoo tyiño saa sihin yo. Ta zacuxaan ñu sii Tatyi Ii cuhva cuan. Ta saha ra Ndyoo Tatyi Ii ra sii yo vatyi tundyee ra sii yo.

³⁰ Ta sito maa yo sii ra i catyi: "Yuhvi cuu ra cua cañi sii ñiyivi. Cua tasi tuñi sii ñu sa cuenda sa ña vaha sa i zavaha ñu." Ta iyo tucu inga nu catyi si tyehen: "Cua tyicuhva ra ndyaca ñaha sii yo sii ñiyivi sii ra." Catyi si.

³¹ Minoo sa zayuhu xaan sii yo cua cuu si tatu tahan si sii yo sa cañi ra Ndyoo sii yo.

³² Zoco nacohon iñi ndo cuhva i cuu si sihin ndo quivi nacaa quisaha sino iñi ndo sii ra Cristo. I ndoo ndo sihin ra Cristo vazu yii xaan i cuu si, ta i ndyehe xaan ndo tundoho sa cuenda ra.

³³ Iyo saha i zacucahan xaan ñiyivi nuu ndo ityi nuu cuaha xaan ñiyivi. Quiñi xaan i cahan ñu sii ndo, ta i zandyeha xaan ñu tundoho sii ndo. Ta iyo saha i ndyehe ndo tundoho vatyi i zandyeha ñiyivi tundoho sii inga ra tahan ndo.

³⁴ Vatyi i cundahvi iñi ndo sii ra ñoho vehe caa. Ta zii xaan i cuñi ndo vazu i nama ñiyivi ndaha tyiño ndo vatyi sito ndo vatyi cua ñihi ndo ndaha tyiño vaha ca sa ma tivi ta ma cunaa.

³⁵ Yucuan cuenda ma zaña ndo sa sino iñi ndo sii ra Cristo vityi vatyi cuee ca cua ñihi xaan ndo sa vaha sa cuenda si.

³⁶ Cuñi si sa zandyeha xaan ndo iñi ndo, ta cua cuu zavaha ndo cuhva cuñi ra Ndyoo, ta ziquí cua ñihi ndo sa sa catyi ra Ndyoo vatyi cua cuhva ra sii ndo.

³⁷ Vatyi catyi Tuhun Ndyoo: "Ña cucuee xaan ca ra. Sa cuñi quisi ra cua quisi.

³⁸ Ta ra sa nduvaha ityi nuu ra Ndyoo vatyi sino iñi ra sii ra, cuñi si sa nii xaan cuu iñi ra sii ra tandihí saha vatyi tatu quisaha nayuhu ra ta ndu-uu iñi ra, ma cuzii ca iñi maa ra Ndyoo sihin ra." Tacuan catyi ra Ndyoo.

³⁹ Zoco maa yo, yivi ñiyivi cu-nanuhu sata cuu yo. Maa ñu cuu ñiyivi cunaa. Zoco maa yo cuu ñiyivi sa ña zandoo sa sino iñi yo, ta cua cacu añima yo.

11

Cuhva cuñi si sa cunii iñi yo sii ra Ndyoo

¹ Tatu nii cuu iñi yo sii ra Ndyoo sa ndisa cuii, sito vaha yo vatyi tatu iyo minoo sa sa catyi ra Ndyoo sa cua cuhva ra sii yo ta vazu ña ndyehe yo sii si vityi, zoco cuee ca cua ñihi yo sii si.

² Ñiyivi i sino xaan iñi sii ra Ndyoo ta sa naha nii xaan i cuu iñi ñu sii ra, ta yucuan cuenda i catyi ra Ndyoo vatyi vaha ñu.

³ Sihin sa nii iñi yo ta sito yo vaty i cahan ra Ndyoo ta i sino ñuu ñiyivi. Cuu ndyehe yo sii si, zoco i sino si sihin sa ña cuu ndyehe yo.

⁴ Nii xaan i cuu iñi ra Abel, ta yucuan cuenda vaha ca sa i saha maa ra sii ra Ndyoo ta ziqui sa i saha ra Caín. I quihin ra Ndyoo sii sa i saha ra Abel, ta sihin cuhva cuan i zañaha ra vaty i ndoo xaan i cuu ra Abel. Ta vazu sa naha sihi ra Abel, zoco siñi ca yo tuhun ra vazu ndya vityi cuhva i sino xaan iñi ra sii ra Ndyoo.

⁵ I sino xaan iñi ra Enoc sii ra Ndyoo, ta yucuan cuenda ñá sihi ra. Cuahan ra sihin ra Ndyoo ñi vaty i zii xaan i cuñi ra Ndyoo sihin ra.

⁶ Tatú ña nii cuu iñi yo sii ra Ndyoo, ña zii cua cuñi ra sihin yo vaty i yoo ra cuñi tuhva sii ra Ndyoo, cuñi si vaty i cua sino iñi ra vaty i iyo ra Ndyoo, ta cuñi si vaty i cua sino iñi ra vaty i saha ra Ndyoo sa vaha sii ñiyivi nanducu sii ra.

⁷ Nii i cuu iñi ra Noé sii ra Ndyoo. I cahan ra Ndyoo sihin ra sa cuenda minoo sa cua coo ityi nuu ca, ta vazu tañaha ca ndyehe ra Noé minoo sa tacuan, zoco i tyaa ra yahvi sa cahan ra Ndyoo ta i zavaha ra minoo barco, ta cuhva cuan i zacacu ra sii ñiyivi sii ra. Sihin cuhva i sino iñi ra Noé sii ra Ndyoo ta i zañaha si vaty i ñá sino iñi tandih i inga ñiyivi. Ta sa cuenda sa sino iñi ra Noé ta i ndyehe ra Ndyoo sii ra tañi sa ñahñi cuaty i ra.

⁸ Nii iñi ra Abraham sii ra Ndyoo, ta i cana ra Ndyoo sii ra vaty i cua quita ra ñuu ra ta cuhun ra inga ñuu sa cua cuhva ra Ndyoo sii ra. Ta vazu ñá sito ra Abraham ndyamaa cua cuhun ra, zoco i tyaa ra yahvi ta cuahan ra.

⁹ Ta quivi i saa ra inga ñuu cuan, nii xaan i cuu iñi ra sii ra Ndyoo ta ñá zandaa ra minoo vehe vaha vaty i sa sito ra vaty i yivi ñuu maa ra cua cuu si ta yivi yucuan cua ndoo

ra. Ta tacuan tucu i zavaha ra Isaac ta ra Jacob.

¹⁰ Tacuan i zavaha ra Abraham vaty i ndatu ra sa cua cundyaca ra Ndyoo sii ra ndya inga ñuu vaha ca, ñuu i zavaha maa ra Ndyoo.

¹¹ Nii xaan cuu iñi maa ña Sara sii ra Ndyoo, ta i sicoo zehe ña vazu sa sahnu xaan ña, ta yivi ca ñaha coo zehe cuu ña. Zoco i ñihi ña zehe vaty i sica iñi ña vaty i cua zavaha ra Ndyoo cuhva catyi ra.

¹² Ta yucuan cuenda i sicoo xaan ñiyivi sii ra Abraham. Vazu sa sahnu xaan ra ta ma cuu ca coo zehe ñu, zoco i sicoo minoo, ta i sicoo cuaha xaan ñiyivi sii ra tañi iyo cuaha xaan tiñoo andivi a tañi ñiyiti sa iyo yuhu tyañuhu.

¹³ Tandihi ñiyivi sa quehin tuhun ihyá, nii xaan i cuu iñi ñu sii ra Ndyoo, zoco i sihi ñu ta ñá ñihi ñu tandih i sa catyi ra Ndyoo vaty i cua cuhva ra, zoco i sito ñu vaty i cua quisi si cuee ca ta zii xaan i cuñi ñu, ta i catyi ñu vaty i yivi ñuu ñu cuu ñuu ñiyivi ya sa ndisa.

¹⁴ Ta ñiyivi cahan cuhva cuan, zacoto ñu vaty i cuñi xaan ñu cuhun ñu sica ca (ndya gloria nu cu ñuu ñu sa ndisa cui).

¹⁵ Vaty i tatu sa vaty i iñohu xaan iñi ñu ñuu ñu nu i quita ñu, cuu cunganuhu ñu tatu cuñi ñu.

¹⁶ Zoco ñá cuñi ñu cunuhu ñu ndya ñuu ñu vaty i cuñi ñu cuhun ñu inga ñuu vaha ca sa cuu gloria. Yucuan cuenda ña cahan nuu ra Ndyoo catyi ra vaty i Ndyoo cuenda ñu cuu sii ra, ta i zavaha ra minoo ñuu ndya andivi nu cua cuhun ñu.

¹⁷ Quivi i ndedu coto ihñi ra Ndyoo sii ra Abraham nii xaan i cuu iñi ra Abraham vazu i catyi ra Ndyoo vaty i cahñi ra sii ra Isaac zehe ra. Ta ra Isaac i cuu minoo tuhun ñi zehe ra Abraham. Zoco i tyaa xaan ra Abraham yahvi sii ra Ndyoo vaty i sino xaan iñi ra tuhun i saha ra Ndyoo sii ra.

¹⁸ Vaty i sa i catyi ra Ndyoo sihin ra Abraham: “Sa cuenda ra Isaac ta cua coo cuaha xaan ñiyivi suun.”

¹⁹ I sino iñi ra Abraham vatyi cuu zanandoto ra Ndyoo sii ñiyivi vazu sa sihi ñu. Ta cuu catyi yo vatyi i nandoto ra Isaac vatyi sa ndyaa sa cua cuu ra, ta ziqui i nacuhva ra Ndyoo sii ra sii zutu ra, ta ñá sihi ra.

²⁰ Sa cuenda sa vatyi i sino iñi ra Isaac vatyi zavaha ra Ndyoo cuhva catyi ra, ta i sica ra sii ra Ndyoo vatyi cua cuhva xaan ra sa vaha ityi nuu ca sii ra Jacob ta ra Esaú zehe ra.

²¹ Sa cuenda sa vatyi i sino iñi ra Jacob vatyi zavaha ra Ndyoo cuhva catyi ra, ta i sica xaan ra sa vaha sii ra Ndyoo sa cuenda tahan tahan zehe ra José. Quivi sa cuñi cuu ra Jacob ta si-iñi ndyaa ra sihin tutatu ra, ta i zacahnu ra sii ra Ndyoo, ta i sica ra sa vaha cuan sii ra.

²² Sa cuenda sa vatyi i sino iñi ra José vatyi zavaha ra Ndyoo cuhva catyi ra, ta quivi sa cuñi cuu ra i cahan ra sa cuenda yiqui ra. Ta catyi ra vatyi cuñi ra vatyi naquihin ñiyivi yiqui ra cuhun sihin ñu quivi cu quita ñu ñuu Egipto.

²³ Nii xaan i cuu iñi zutu ta zihí ra Moisés sii ra Ndyoo, ta yucuan cuenda ñá saha ñu sa cuu ra. Quivi i cacu ra ta i ndyehe ñu vatyi ndasa xaan ra, ta i tyixehe ñu sii ra uñi tahan yoo vatyi ñá yuhu ñu sii ley i cahan rey ñuu cuan nu i catyi ra vatyi cua cuu tandihí rayii ndyihi zehe ñiyivi.

²⁴ Ta ra Moisés tucu niixaan i cuu iñi ra sii ra Ndyoo, ta quivi i sahnu ra, ñá cuñi ra cuu ra zehe ñañi ra rey Faraón.

²⁵ Tahan ca iñi maa ra sa cua ndyehe ra tundoho sihin ñiyivi sino iñi sii ra Ndyoo, ta ma cuzii iñi ra zuhva quivi zavaha ra cuatyi tañi zavaha ñiyivi ñuu Egipto.

²⁶ I sica iñi ra vatyi vaha ca cua ndyehe ra tundoho sa cuenda ra Cristo, ra cua quasi cuee ca. Vaha xaan ca cuhva cuan ta ziqui tandihí xuhun cuaan ñuu Egipto cuñi ra Moisés vatyi ndatu ra sa cua cuhva

ra Ndyoo minoo sa vaha xaan ca sii ra cuee ca.

²⁷ Nii xaan i cuu iñi ra sii ra Ndyoo, ta yucuan cuenda i quita ra ñuu Egipto, ta ñá yuhu ra vazu i cuxaan xaan ra rey sihin ra. I zandyee xaan ra iñi ra vatyi sito ra vatyi cuahan ra Ndyoo sihin ra.

²⁸ Nii i cuu iñi ra sii ra Ndyoo, ta i zavaha ra cuhva catyi ra sa cuenda sa cua cuu minoo mvee ticiayi lee tahan tahan vehe ta cua cahyi ñiyivi niñi ti yutu yuvehe ñu. Tacuan i zavaha ra vatyi ma cahñi ángel ra Ndyoo sii ra cu zehe nuu ñiyivi hebreo.

²⁹ Ta nii i cuu iñi tandihí ñiyivi hebreo sii ra Ndyoo. Yucuan cuenda i yaha ñu Tyañuhu Cuaha cuan tañi sa sica ñu nu ñuhu ityi. Zoco ñiyivi ñuu Egipto cuan, ñá cuu yaha ñu. I sihi ñu sisi tyañuhu cuan.

³⁰ Zuñ ñi sa cuenda sa nii cuu iñi ñu hebreo, ta i nduva nuzama siconduu ñuu Jericó vatyi i siconduu tandihí ñu yuñuu Jericó usa tahan quivi tañi i catyi ra Ndyoo.

³¹ Sa cuenda sa nii cuu iñi ña Rehab sii ra Ndyoo ta ñá sihi ña sihin ñiyivi ñá tyaa yahvi sii ra Ndyoo ñuu ña. Vazu minoo ñaha zii iñi i cuu ña, zoco ñá sihi ña vatyi i tiñ cuenda vaha ña sii ra hebreo, ra i sindyehe tatu cuu quindaya ra ñuu ñia.

³² ¿Ta ñaa ca sa cuñi si sa catyi vity? Ma cuyatyi ca quehin sa cuenda tandihí cuii ñiyivi i cunii xaan iñi sii ra Ndyoo, tañi ra Gedeón, ra Barac, ra Sansón, ra Jefté, ra rey David, ra Samuel ta tandihí inga ra profeta.

³³ Sa cuenda sa nii xaan cuu iñi ñu sii ra Ndyoo ta i zahacanaa ñu sii inga rey. I zavaha xaan ñu sa ndoo. I ñihi ñu sa sa catyi ra Ndyoo vatyi cua cuhva ra sii ñu. I tyazi ñu yuhu ndicaha.

³⁴ I ndahva ñu ñuhu sa ñihi xaan cayu. I cacu ñu quivi i cuñi ñiyivi cahñi ñu sii ñu sihin espada. Vazu ña ñihi ñu, zoco i zandundyee ra Ndyoo sii ñu. I cuu zahacanaa xaan

ñu nu sahñi tahan ñu, ta i sino sihin ñu cuaha xaan ityi zandaru inga ñuu.

³⁵ Ta iyo ñuzihí nii xaan i cuu iñi ñu ta i nandoto ñiyiví sii ñu sa yaha i sihi ñu. Zoco inga ñiyiví, nii xaan i cuu iñi ñu sii ra Ndyoo, zoco i ndyehe xaan ñu tundoho ta i sihi ñu vatyi ñá zandoo ñu sii ra Ndyoo vazu sihi ñu sa catyi ra. Sito ñu vatyi tatu ma zandoo ñu sa sino iñi ñu cua nandoto ñu minoo cuhva vaha xaan ca.

³⁶ Inga ñiyiví tahan xaan ñu tundoho vatyi sacu ndyaa xaan ñiyiví sii ñu, ta i cañi ñu sii ñu, ta cuhva ndya sihñi ñu sii ñu sihin cadena ta tyihi ñu sii ñu vehe caa.

³⁷ I cañi ñiyiví sihin yuu sii inga ñiyiví sino iñi sii ra Ndyoo, ta sii inga ñu i sahndya zava ñu. Inducu coto ihñi xaan ñu sii ñu. I sahñi ñu sii ñu sihin espada. Inga ñiyiví, ñahñi zahma ñu sicoo. I ndihví ñu ñii mvee ticatyi ta ñii mvee. Nda hví xaan ñu. Ndyehe xaan ñu tundoho. Ta quiñi xaan i zavaha ñiyiví sihin ñu.

³⁸ Vaha xaan vaha xaan maa ñu sino iñi cuan, ta yaha xaan quiñi i zavaha ñiyiví ñuu ñiyiví sihin ñu. I sica noo ñu nu yoñi ñiyiví iyo ta yucu. Ta i quihví xehe ñu yavi yuu ta yavi ñuhu.

³⁹ Tandihi ñu cuan, nii xaan i cuu iñi ñu sii ra Ndyoo, ta vaha i cahan ra Ndyoo sa cuenda ñu, zoco ñá ñihi ñu sa sa catyi ra Ndyoo vatyi cua cuhva ra sii ñu.

⁴⁰ Vatyi cuñi ra Ndyoo sa cua cutatu ñu ta ñihi ñu sa vaha ca iñi ñi sihin maa yo. ñin ñi sihin maa yo cua nduvaha xaan ñu ityi nuu ra.

12

Nanacohon iñi yo sii ra Jesús tandihí saha

¹ Cuaha xaan ñiyiví sa nii xaan i cuu iñi sii ra Ndyoo ta sihi ñu ta ndyehe ñu sii maa yo vityi. Yucuan cuenda nazandoo yo sii tandihí sa zayanga sii yo, ta cua cuu cundyico

yo sii ra Cristo. Ta nazandoo yo cuatyi yo vatyi cuu si tañi minoo xayu saha yo. Ta nazandyee xaan yo iñi yo ta zañihí yo cuhun yo ityi nuu sihin Tuhun Ndyoo.

² Nanacohon iñi yo sii ra Jesús tandihí saha. Maa ra cuu ra zañaha sii yo cuhva cuñi si sa cunii xaan iñi yo sii ra Ndyoo. I sito ra vatyi zii xaan cua cuñi ra cuee ca, ta yucuan cuenda i saha ra sa cahñi ñiyiví sii ra. Ñá tyaa ra yahvi sii ticahan nuu sa cuu ra. Ta vityi ndyaa ra siyo cuaha ra Ndyoo.

³ Tatu cuñi ndo sa ma cundihi iñi ndo ta ma ndu-uu iñi ndo sa zatyino ndo tysiño ra Ndyoo, zaha ndo cuenda cuhva i zandyee xaan ra Jesús iñi ra sihin cuhva i zavaha xaan ñiyiví sa ña vaha sihin ra.

⁴ Vatyi maa ndo tañaha ca cundyee iñi ndo sa zavaha ndo sa vaha cuhva ndya cati niñi ndo saha sa ñá zavaha ndo sa ña vaha.

⁵ Ta ¿atu sa i naa iñi ndo cuhva vaha cahan Tuhun Ndyoo sihin ndo tañi sa zehe ra Ndyoo cuu sii ndo? Ta catyi si tyehen:

Zehe luhli, tyoon yahvi tatu zandoho ra Ndyoo suun,
Ta zandyeeun iñun tatu cañi ra suun;

⁶ Vatyi tatu cuñi xaan ra Ndyoo sii minoo ra, zandoho ra sii ra, Ta ñihi xaan cañi ra sii tandihí ñiyiví tiñ cuenda ra.

⁷ Cañi ra Ndyoo sii ndo vatyi cuñi ra sa cua cutuhva vaha ndo. Tacuan zavaha ra vatyi zehe ra cuu sii ndo. Yoñi zehe ñiyiví sa ma ndoho si zacuu zutu si.

⁸ Tuhva ra Ndyoo cañi zuhva sii tandihí yo sa cuu zehe ra. Tatú ma cañi ra sii ndo, cuñi si catyi si vatyi yiví zehe ra cuu sii ndo sa ndisa.

⁹ Ta inga tucu cuhva, tyaa yo yahvi sii zutu yo, ra ñuu ñiyiví ya, tatu zandoho ra sii yo. ¿Atu ña ñiñi xaan ca sa tyaa yo yahvi sii ra Ndyoo ta cundito yo tandihí cuii tyiemvu?

10 Vatyi zutu yo sa iyo ñuu ñiyiví ya, i cañi ra sii yo zuhva quivi cuhva cuñi maa ra. Zoco ra Ndyoo Zutu yo, cañi ra sii yo minoo cuhva sa cua tyindye sii yo. Ta cuhva cuan, cua nduu yo ñiyiví vaha xaan tañi maa ra.

11 Quivi sa ndoho yo, ña zii cuñi yo. Nducuihya iñi yo zacuu si. Zoco cuee ca ta nduu yo ñiyiví vaha sa ndisa cuii ta zii cuñi yo tatu cutuhva yo sa zañaha ra Ndyoo sii yo quivi cañi ra sii yo.

Ica xaan tatu ma tyaa yo yahvi sa cahan ra Ndyoo

12 Yucuan cuenda zandyee ndo iñi ndo, ta ma caca iñi ndo vatyi ma cuu ca cundyico ndo ityi ra Cristo.

13 Caca tandihí ndo ityi vaha. Tacuan ta yoñi ndo cua ndoyo ñuhu vazu ta sino vaha ca iñi ndo. Cua ndundyee xaan ca iñi ndo sihin Tuhun Ndyoo.

14 Nducu ndo cuhva coo sa taxi sii ndo sihin tandihí ñiyiví. Ta ndrucu ndo cuhva cuu ndo niyiví vaha xaan tañi tahan si cuu ñiyiví ra Ndyoo. Vatyi tatu ña tacuan iyo ndo, ma ndyehe ndo sii ra Ndyoo.

15 Zaha vaha ndo cuenda sii minoo ndo ta sii inga ndo coto coo minoo ndoho ma sino ca iñi sii ra Cristo, ta ma ñihi ca ra cuan sa cua cuhva ra Ndyoo sii ndo. Ta coto quita minoo ra sa tacuan ta cua zañaha ra minoo cuhva ña vaha nu yucu ndo ta ma sino ca iñi ndo, ta cuaha xaan ndo cua tivi.

16 Ta coto ñáha cuzu ndo sihin minoo ñáha tatu yivi ñazihí ndo cuu, ta coto ñáha zavaha ndo minoo sa ña vaha ta cua zañaha si vatyi ña sino iñi ndo sii ra Ndyoo sa ndisa cuii. Tañi ra Esaú ta sa naha, i cuñi ra sa cuzama ra, ta yucuan cuenda i xico ra tandihí ndaha tyiño sa cua tahan si sii ra sii yañi ra, ta ña ñihi ra sii si.

17 Sa sito ndo vatyi cuee ca i cuñi ra nañihi ra sa vaha cuan, zoco ña cuu ca. Ñá cuu ca ndu-uu iñi ra cuatyi ra vazu i sacu xaan ra.

18 Ta maa ndo, ma tahan ca si sii ndo tañi i tahan si sii ñiyiví hebreo vatyi ña vasi ndo nu ndyaa minoo sa cuu ndyehe ndo. Ma ndyehe ca ndo sa cayu xaan ñuhu ta cuaha xaan inga sa iyo tañi sa ñaa ta tyiyatyi. (Tacuan i tahan ñiyiví hebreo quivi i saha ra Ndyoo ley ra sii ñu.)

19 Ñá siñi maa ndo nduzu cutu ta nduzu ra Ndyoo tañi quivi i cahan ra sihin ñu hebreo ndya cuhva sica ñu tumañi iñi sa ma cahan ca ra.

20 Ñá cuu cundyee iñi ñu tyiño i tava ra Ndyoo vatyi i catyi ra vatyi tatu vazu minoo quiti cua tiin sii yucu Sinaí cuan, cuñi si sa cahñi ñiyiví sii ti.

21 Iyo xaan i cuu tandihí cuhva cuan ndya cuhva ndya i catyi ra Moisés: “Yuhu xein ndya cuhva nihi.” I catyi ra quivi cuan.

22 Zoco maa ndo cuahan ndo ndya inga yucu sa nañi Sión. Yucuan cuu ñuu maa ra Ndyoo ndito. Ñuu Jerusalén sa ndyaa andiví cuu si. Nu iyo cuaha xaan cuaha xaan ángel sa zii xaan cuñi.

23 Ta nu yucu tandihí ñiyiví sino iñi, ñu sa ndyaa zivi andiví. Ta nu ndyaa ra Ndyoo, ra cua tyicuhva sii tandihí ñiyiví, ta nu yucu añima ñiyiví vaha, ta sa nduu ñu ñiyiví ñahñi ca cuatyi.

24 Ta nu ndyaa ra Jesú, ra sa cahan saha ñiyiví sa cuenda tyiño saa i zandaa ra Ndyoo sihin ñiyiví. I sati niñi ra Jesú vatyi cua ndasi cuatyi ñiyiví, ta ña sica si sa cuu ñu tañi i zavaha niñi ra Abel.

25 Yucuan cuenda coto vaha ndo sii ndo ta tyaa ndo yahvi sii ra cahan sihin ndo vatyi tatu ñá cacu ñiyiví hebreo sa ñá tyaa ñu yahvi sii ra Moisés, vihi cuii ca maa yo tatu ma tyaa yo yahvi sii ra cahan ndya andiví.

26 Quivi i cahan ra ndya Yucu Sinaí i zacanda nduzu ra sii ñuhu. Ta vityi catyi ra: “Inga saha cua zacande ñuhu ñuu ñiyiví ta andiví tucu.”

²⁷ Ta sa cahan ra cuhva cuan cuñi si catyi si vatyi quivi cua zacanda ra sii si ta cua zanaa ra sii tandihí sa cuu naa, ta cua nandoo maa ñi sa ma cuu cunaa. Nu ndyaca ñaha ra Ndyoo cuu sa ma cuu cunaa,

²⁸ ta yucuan cua cundyaa maa yo. Yucuan cuenda nazacahnu xaan yo sii ra Ndyoo cuhva cuñi maa ra. Ta nayuhu xaan yo sii ra.

²⁹ Vatyi ra cu Ndyoo maa yo ñúhu cuu ra, ta cua zanaa ra sii tandihí sa ña vaha.

13

Cuhva cuñi si zavaha yo ta cua tahan iñi ra Ndyoo

¹ Ma zandoo ndo sa cuñi xaan ndo sii tandihí hermano.

² Cuhva ndo sa casi ñiyivi saa vehe ndo vazu ña sito vaha ndo sii ñu vatyi iyo saha i zacasi ñiyivi sii ángel cuhva cuan, ta ña sito ñu tatu ángel cuu ra.

³ Ma naa iñi ndo sii ra ñoho vehe caa. Cundahvi iñi ndo sii ra tañi sa maa ndo ñoho vehe caa. Ta cundahvi iñi ndo sii ra zavaha xaan ñiyivi sa ña vaha sihin vatyi sa tuu iñi ndo yozo caa iyo tundoho cuan vatyi ñiyivi cuu tucu maa ndo.

⁴ Tatu sa tindaha ndo, tyaa ndo yahvi sii si, ta ma zavaha ndo sa quiñi sihin inga ñaha a sihin inga rayii. Cua tasi tuñi xaan ra Ndyoo sii ñiyivi zavaha sa quiñi tañi ra quixi sihin inga ñaha sa yivi ñazihí ra cuu.

⁵ Ma cuu ndo ñiyivi sa cuñi xaan xuhun. Ndoo ndo vaha sihin sa iyo sii ndo vatyi sa i catyi maa ra Ndyoo: "Ma zandoi sii ndo, ta ma zañe sii ndo."

⁶ Yucuan cuenda nii xaan cuu iñi yo ta catyi yo:

Ra Ndyoo cuu ra tyindyee sii;
Ma yuhi ñaa sa cua zavaha ñiyivi sii.

⁷ Nacohon iñi ndo sii ra i zacuaha Tuhun Ndyoo sii ndo. Nacañi iñi ndo sa cuenda cuhva i quita vaha maa ra, ta nii xaan cuu iñi ndo tañi sa nii iñi maa ra.

⁸ Ña záma ra Jesucristo. Zuun ra cuu ra icu, ta zuun ra cuu ra vityi ta tandihí cuii tyiemvu.

⁹ Ma zandoo ndo ityi vaha, ta ma sino iñi ndo ñaa tuhun saa a ñaa sa ziñ cua zacuaha ñiyivi. Saha maa ra Ndyoo tumañi iñi sii yo, ta tacuan ta cua ndundayee iñi yo sihin Tuhun Ndyoo ta yivi sa caca xaan iñi yo sa cuenda ñaa sa ma cuu casi yo vatyi ña tacuan ta nduu yo ñiyivi vaha ityi nuu ra Ndyoo. Ñahñi tyindyee cuhva cuan sii ñiyivi tyaa xaan yahvi sii si.

¹⁰ Iyo minoo altar sa cuenda maa yo. Cruz nu i sihi ra Cristo cuu si. Ta ma cuu tyindyee si sii ñiyivi nducu cuhva cacu ñu sihin sa tyaa xaan ñu yahvi sii cuhva sahnu cuan tañi zavaha ñiyivi hebreo sa ña sino iñi sii ra Cristo.

¹¹ Sihin cuhva sahnu cuan, i sahñi ra cu zutu ya cahnu quiñi sa cuenda cuatyi ñiyivi. I sindyaca ra niñi ti sisi vehe ñuhu nu ii, ta i sahmi ra sii ti ndya zava yuñuu.

¹² Yucuan cuenda i ndyehe tucu ra Jesús tundoho ndya zava yuñuu vatyi cua zanduvaha ra sii ñiyivi sihin niñi maa ra.

¹³ Yucuan cuenda nacuhun maa yo ndya zava yuñuu sihin ra Cristo. (Cuñi si catyi si vatyi ma cundyico ca yo costumbre sahnu tañi zavaha inga ñiyivi. Cua cundyico yo sii ra Cristo ta ziñ ñiyivi cuu yo.) Natyaa siyo yo sii yo sii costumbre sahnu vazu ndyehe yo tundoho sa cuenda si.

¹⁴ Vatyi ñuu ñiyivi ya; yivi ñuu maa yo cuu si; nanducu maa yo sii minoo ñuu sa cua coo cuee ca.

¹⁵ Nanducu yo sa cua tyindyee ra Jesús sii yo, ta ziñi cua nacuhva yo tyahvi ndyoo sii ra Ndyoo tandihí cuii cuhva. Cua catyi yo sihin ñiyivi vatyi sito yo sii ra.

¹⁶ Ma zaña ndo sa zavaha ndo sa vaha ta sa zasa ndo sa sii ndo sii ñiyivi ndahvi vatyi ziñ xaan cuñi ra Ndyoo tatu zacahnu yo sii ra cuhva cuan.

17 Tyaa ndo yahvi sii ra cu nuu sii ndo sa cuenda Tuhun Ndyoo. Zavaha ndo cuhva catyi ra vatyi zacuenda ra sii ndo ta ma ndoyo ñuhu ndo. Cua nacuhva ra cuenda sii ra Ndyoo sa cuenda tysiño ra. Tatu zavaha maa ndo sa vaha, zii cua cuñi ra quivi cua cuhva cuenda ra, zoco tatu ma zavaha ndo sa vaha, ña zii cua cuñi ra, ta cua ndoho ndo.

18 Cahan ndo sihin ra Ndyoo sa cuenda ndi vatyi sito vaha ndi vatyi zavaha ndi sa vaha, ta cuñi xaan ndi zavaha ca ndi sii si.

19 Ta zañiñi sii ndo vatyi caca ca ndo sii ra Ndyoo sa cuende vatyi tacuan ta cua cuu quite ihya ta quisi nanuhi nu yucu ndo yatyi ca.

20 Maa ra Ndyoo cuu ra saha sa coo sa taxi añima yo. I zanandoto ra sii ra Jesucristo, ra ndyaca ñaha sii yo. Ra Jesús cuu ra zacuenda xaan sii yo tañi zacuenda minoo ra cu pastor sii mvee ticatyi zono ra. Sa cuenda sa i sati niñi ra Jesús quivi i zandaa ra Ndyoo tysiño saa sihin yo ta i nduu ra pastor cuenda yo.

21 Natyindyee maa ra Ndyoo sii ndo sihin tundyee iñi maa ra sa cuenda ra Jesucristo, ta cua cuu zavaha ndo tandihí cuhva cuñi maa ra. Ta nazacahnu yo sii ra Jesucristo tandihí cuii tyiemu. Ta nacuu si tacuan, ta nacuu si sa ndisa.

22 Zoco sa ndyoo ñi ndoho hermanos tyizoho vaha ndo sa catyi ihya vatyi ña cuaha xaan tyei.

23 Cuñi sa cua coto ndo vatyi sa quita ra hermano Timoteo vehe caa vityi. Tatu saa ra ihya yatyi, cua cuhin sihin ra nu yucu ndo.

24 Cuhva ndo minoo nacumi sii tandihí ra hermano ta sii ra hermano ra cu nuu sii ndo. Ra hermano nu cu si Italia tasi ra minoo nacumi sii ndo.

25 Nacuhva xaan ra Ndyoo tumañi iñi sii tandihí ndo.

Minoo Carta I Tyaa Ra Santiago

*Tyaa ra Santiago carta ya sii
ñiyivi hebreo ñu i sitya cuatyi*

¹ Yuhvi ra Santiago cui minoo muzu sii ra Ndyoo ta sii ra Jesucristo, ra ndyaca ñaha sii yo. Tasi carta ya sii tandihí ndoho ñiyivi hebreo. Vityi sino iñi ndo sii ra Jesucristo, ta yucu ndo ityi cuan ityi ya. Tasi minoo nacumi sii tandihí ndo.

Sa siñi tuñi sa saha ra Ndyoo

² Zii xaan cuñi ndo hermanos tatu ndyehe xaan ndo tundoho

³ vatyi sa sito ndo vatyi tatu saha ra Ndyoo prueba sii ndo, cuñi ra coto ra tatu sino ndisa cuii iñi ndo sii ra. Ta sihin cuhva cuan, ta cua ndundyee xaan ca iñi ndo sihin Tuhun Ndyoo.

⁴ Ta nandundyee xaan iñi ndo minoo sa ndisa cuii ta ñahñi ca cua cumañi sii ndo. Cua cuu ndo ñiyivi vaha sa ndisa cuii, ta yoñi cua cuu tyaa cuatyi sata ndo.

⁵ Tatu iyo ndo ña sito ndo ñaa sa cuñi ra Ndyoo cua zavaha ndo, ndducu tuhun ndo sii ra. Cua catyi casi ra sihin ndo, ta ma cahan ra sii ndo.

⁶ Zoco niñ cuu iñi ndo ta ndrucu tuhun ndo vatyi tatu ña niñ cuu iñi ndo cuu ndo tañi tyañuhu. Ndaa noo ñi maa si cuhva tyindaha tatyi sii si.

⁷⁻⁸ Minoo ra ña niñ vaha iñi sii ra Ndyoo, uu sica iñi ra tandihí saha, ta ma cuu caca iñi ra vatyi cua cuhva ra Ndyoo sa sica ra sii ra.

⁹ Ra hermano ra ndahvi, nacuzii xaan cuñi ra vatyi zanducahnu xaan ra Cristo sii ra.

¹⁰ Ta ra hermano ra cuca, nacuzii xaan cuñi ra vazu cua nduluhlu ra vatyi tañi minoo ita ñi sa iyo sisu cuhu cuu ra. Cua cuu ra, zoco cua cuhun ra gloria.

¹¹ Caña ñicandyi, ta ndu-ihñi xaan, ta xii cuhu ta coyo ita si. Ña tyaqui ca caa si. Zuun ñi cuhva cuan cua tahan si sii ra cuca, vazu zatyiño xaan ra.

*Cundyee iñi ndo tatu ndrucu coto
ihñi cuihna sii ndo*

¹² Zii xaan cua cuu sii minoo ra tatu cundyee iñi ra ta ma ndoyo ñuhu ra tatu ndrucu coto ihñi cuihna sii ra. Vatyi tatu quita vaha ra sa ndyehe ra tundoho cuan, cua cuhva ra Ndyoo minoo corona sii ra sa cua cundito ra tandihí cuii tyiemvu. Sa catyi ra Ndyoo vatyi cua cuhva ra sii si sii ñiyivi cuñi xaan sii ra.

¹³ Tatu vasi minoo prueba ziqui ndo ta cuñi ndo zavaha ndo cuatyi, ma catyi ndo: "Maa ra Ndyoo ndrucu coto ihñi sii." Vatyi ña cuñi ra Ndyoo sa zavaha ndo sa ña vaha, vatyi maa ra ña cuñi ra zavaha ra sa ña vaha numinoo saha, ta yucuan cuenda ña cuñi ra sa zavaha ñiyivi sa ña vaha.

¹⁴ Minoo minoo yo iyo cuatyi añima yo, ta yucuan cuenda cuñi xaan yo zavaha yo sa ña vaha.

¹⁵ Xihna ca cuñi xaan yo zavaha yo sa ña vaha, ta ziqui cacu cuatyi. Ta tatu sa yaha zavaha yo cuatyi, ta ziqui ndrucuaha xaan ca sa ña vaha zavaha yo. Ta nu ndihí tuhun cua cahñi cuii si añima yo.

¹⁶ Ndoho hermanos cuñi xein sii ndo. Ma zandavi ñahñi ndo sii ndo ta caca iñi ndo inga cuhva.

¹⁷ Tandihí sa vaha ta sa ndoo sa cuenda ra Ndyoo cuu si. Maa ra cuu ra i zavaha ñúhu. Ña zama ra cuhva iyo ra, ta ñahñi sa ñaa iyo sii ra. (Sa ñaa cuan cuu sa ña saha coto ñiyivi sa vaha.)

¹⁸ Sa cuenda sa cuñi maa ra, ta i saha ra minoo cuhva saa coo yo sihin Tuhun Vaha ra. Tacuan i zavaha ra vatyi maa yo cua cuu sa vaha xaan ca sii tandihí sa i zavaha ra.

*Cuhva zavaha yo cuhva cuñi ra
Ndyoo sa ndisa cuii*

¹⁹ Coto ndo cuhva ya, ndoho hermanos. Tandihí cuii maa yo cuñi si sa tyizoho vaha yo. Ma yatyi xaan cahan yo, ta ma yatyi xaan cuxaan yo.

²⁰ Vatyi tatu cuxaan yo, ña zavaha yo cuhva cuñi ra Ndyoo sihin cuhva cuan.

²¹ Yucuan cuenda zaña ndo sii tandihí sa quiñi ta sa ña vaha, ta vii ñi tiin cuenda vaha ndo sii Tuhun Ndyoo sa iyo añima ndo vatyi cua zacacu si cuan sii ndo.

²² Zoco zavaha ndisa cuii ndo cuhva catyi Tuhun Ndyoo ta yiví sa tyizoho ñi maa ndo sii si vatyi tatu cuenda tyizoho ñi maa ndo, zuun ñi sii maa ndo zandavi ñaha ndo.

²³ Tatu cuenda tyizoho ñi maa minoo ra cuhva catyi Tuhun Ndyoo ta ña zavaha ra sa catyi si, cuu ra tañi minoo ra ndyehe sii sihin ino.

²⁴ Ndyehe ra sii ra ta ziquí cuahan ra, ta yatyi xaan naa iñi ra cuhva caa ra.

²⁵ Zoco tatu ndyehe minoo ra cuhva catyi Tuhun maa ra Ndyoo, nacatyi si sihin ra tandihí sa cuñi ra Ndyoo sa coto ra, ta yucuan cuu ley ra Ndyoo sa ndasi sii yo. Tatu zavaha ra cuhva catyi si ta ma naa ñi iñi ra sii si, cua tyindyeer ra Ndyoo sii ra sihin tandihí sa zavaha ra.

²⁶ Zoco tatu sica iñi minoo ra vatyi zavaha ra cuhva cuñi ra Ndyoo ta ña zacuenda ra yuhu ra, zuun ñi sii maa ra zandavi ñaha ra, ta sa caha ñi catyi ra vatyi sino iñi ra sii ra Ndyoo.

²⁷ Cuhva zavaha yo cuhva cuñi ra Ndyoo sa ndisa cuii ta cuhva zacahnu yo sii ra cuhva cuñi maa ra sa ndisa, cuu sa tyindyeer yo sii ñu ndahvi, ñu i sihi yíi, ta sii sa ndiyihí ndahvi sihin tundoho sa ndyehe ñu ta ma zavaha yo cuhva zavaha ñiyiví ña sito sii ra Ndyoo.

2

Ña vaha tatu tyaa ca yo yahvi sii ra hermano cuca ta ziquí sii ra hermano ndahvi

¹ Hermanos, tatu sino ndisa cuii iñi ndo sii ra Jesucristo ra ndyaca ñaha sii yo, ma tyaa xaan ca ndo yahvi sii minoo hermano ta ziquí sii inga.

² Vatyi vasi ra hermano nu yucu ndo ta ñoho ra zahma vaha xaan, ta ñoho xehe xuhun cuaan nu ndaha ra. Ta vasi tucu inga hermano, ndahvi ñi caa vasi ra.

³ Ta tyaa ca ndo yahvi sii ra ñoho zahma vaha ta catyi ndo: “Ihya cundyoon nu tyayu vaha.” Ta sihin ra ndahvi catyi ndo: “Yucuan cuiñi ndyoon a cundyoon nu ñuhu ñi ña.”

⁴ Cuhva cuan zaziñiñ ndo sii ra tahan ndo. Ta nduu ndo ñiyiví sica iñi minoo cuhva ña vaha vatyi tyaa ca ndo yahvi sii ra cuca.

⁵ Cuñi xein sii ndo hermanos. Tyizoho vaha ndo sa quehin. I casi ra Ndyoo sii ñiyiví ndahvi vatyi cua sino xaan iñi ñu sii ra, ta cua ñihi ñu sa saha maa ra ta cuhun ñu nu ndyaca ñaha ra tañi sa i catyi ra. Cua tiin cuenda ra sii ñiyiví cuñi xaan sii ra nu ndyaca ñaha ra.

⁶ Zoco maa ndo ña tyaa ndo yahvi sii ra ndahvi. ¿Atu yiví ra cuca cuu ra zavaha xaan sa ña vaha sihin ndo ta sindyaca sii ndo nuu ra juez?

⁷ ¿Atu yiví ra cuca cuu ra quiñi xaan cahan sii ra Jesucristo? Ta maa ndo cuu ra sino iñi sii ra Jesús.

⁸ Zavaha ndo sa vaha tatu tyaa ndo yahvi sa ndisa cuii sii ley maa ra Ndyoo sa zacuaha ra Jesús. Sa ñiñi xaan ca cuu nu catyi si tyehen: “Cuñi xoon sii inga ñiyiví tañi cuñun sii moo.”

⁹ Zoco tatu tyaa ca ndo yahvi sii minoo ñiyiví ta ziquí sii inga, zavaha ndo cuatyí, ta catyi ley ra Ndyoo vatyí ra iyo cuatyí cuu ndo.

¹⁰ Tatu catyi yo vatyí tyaa yo yahvi sii ley ra Ndyoo, ta ña tyaa

yo yahvi sii minoo si, ndoo cuaty i
ziquí yo sa cuenda tandih i si.

¹¹ Maa ra Ndyoo i catyi: "Ma
cuzu ndo sihin minoo ñaha tatu yívi
ñazih i ndo cuu." Ta i catyi tucu
ra: "Ma cahñi ndo ñiyiv i." Vazu
ñá zavohon cuaty i sa xihna ñi, zoco
tatu cahñun ñiyiv i, zuun ñi ña tyoon
yahvi ley ra Ndyoo, ta iyo cuatyun
ityi nuu maa ra.

¹² Cua tyicuhva ra Ndyoo sii ndo
cuhva catyi tyiño saa i zandaa ra.
Yucuan cuenda zacuenda ndo sii
ndo sihin cuhva cahan ndo ta sihin
cuhva zavaha ndo.

¹³ Vatyi ma cundahvi iñi ra
Ndyoo sii ndo quivi tyicuhva ra
sii ndo tatu ña cundahvi iñi ndo
sii ñiyiv i. Zoco tatu cundahvi iñi
ndo sii ñiyiv i, cua cundahvi tucu
iñi maa ra Ndyoo sii ndo.

*Tatu nii cuu iñi yo sii ra Ndyoo sa
ndisa, cua zatyiño yo tyiño ra*

¹⁴ Hermanos, ¿yozo caa cua
tyindyee si sii minoo ra tatu catyi
ra vatyi nii xaan cuu iñi ra zoco
ñahñi tyiño ra Ndyoo zavaha ra?
Sihin sa nii ñi iñi ra cuan ¿atu cuu
cacu ra?

¹⁵ Tatu iyo minoo hermano a mi-
noo hermano ta ñahñi zahma ñu
iyo ta sizoco ñu

¹⁶ ta minoo ndo catyi ndo sihin
ñu: "Natyindyee ra Ndyoo suun.
Vaha xaan tatu coo zahmon ta sa
casun." Tatu tacuan cohon ta ña
sohon sa siñi ñuhu sii ñu ¿yozo caa
tyindyee si?

¹⁷ Zuun ñi cuhva cuan, vazu nii
xaan iñi ndo catyi ndo, zoco tatu
ñahñi maa sa zavaha ndo, ña nii iñi
ndo sa ndisa cuii tatu tacuan caa
iyo ndo.

¹⁸ Iyo ndo cua catyi ndo: "Tatu nii
iñi yo sii ra Ndyoo, sa vaha tacuan
ñi." Zoco yuhvi catyi vatyi ñiñi
xaan sa zavaha yo sa vaha vatyi
tatu ma zavaha yo sa vaha yoñi cua
coto tatu nii iñi yo sii ra Ndyoo a ña
nii iñi yo. Yuhvi zavehi sa vaha, ta
cuhva cuan cuu ndyehe ñiyiv i vatyi
nii xaan iñi.

¹⁹ Iyo ndo catyi ndo vatyi sino
iñi ndo vatyi iyo minoo ñi Ndyoo.
Vaha catyun sa sino iñun sa iyo mi-
noo Ndyoo, zoco cuhva cuan sino
tucu iñi tandih i cuihna, ta yuhu
xaan si ndya cuhva nihi si.

²⁰ Ñahñi sa siñi tuñi vaha iyo
sii ndo. ¿Ama cua cutuhva ndo
vatyi ñahñi maa cuu si sa catyi yo
vatyi sino iñi yo tatu ma zavaha yo
cuhva cuñi ra Ndyoo?

²¹ Nduvaha ra Abraham ñiyiv i
sahnu sii yo ityi nuu ra Ndyoo sa
cuenda cuhva i zavaha ra quivi cua
cuhva ra sii ra Isaac zehe ra sii
ra Ndyoo ta cua cahñi ra sii ra. I
saha ra Abraham sii ra Isaac sii ra
Ndyoo vazu ndaha cuu ra cuñi ra.

²² Niñi xaan i cuu iñi ra Abraham
sii ra Ndyoo, ta yucuan cuenda i
zavaha ra cuhva i catyi ra. Ta sa
cuenda cuhva i zavaha ra ta nii ca
i nduu iñi ra.

²³ Ta i cuu si cuhva catyi Tuhun
Ndyoo: "I sino xaan iñi ra Abra-
ham sii ra Ndyoo, ta i ndyehe ra
Ndyoo sii ra tañi sa ñahñi cuaty i
ra." Ta i catyi ra Ndyoo vatyi amigo
ra cuu sii ra Abraham.

²⁴ Cuhva cuan cuu ndyehe ndo
vatyi nduvaha yo ityi nuu ra Ndyoo
sa cuenda cuhva zavaha yo, ta yívi
sa cuenda sa sino ñi iñi yo sii ra.

²⁵ Ta zuun ñi cuhva cuan i cuu si
sihin ña Rahab minoo ñaha zii iñi. I
catyi ra Ndyoo vatyi ñahñi ca cuaty i
ña vatyi i zavaha ña minoo sa vaha
quivi i tiñi cuenda vaha ña sii ra i
tasi ra Josué. I tyixehe ña sii ra, ta
ziquí i natasi ña sii ra inga ityi vatyi
ma cahñi ñiyiv i ña vaha sii ra.

²⁶ Tañi sa quita añima yo tatu sa
sihi coño ñuhu yo, zuun ñi tacuan
tucu cuu si tatu catyi yo vatyi sino
iñi yo sii ra Ndyoo ta ñahñi sa
zavaha yo sa cuenda ra. Ñahñi
yahvi ndyaa tuhun cahan yo sa
sino iñi yo. Ña sino ndisa cuii iñi yo.

3

*Cuhva cuñi si zacuenda yo yuhu
yo*

¹ Ma cuaha xaan ndoho cuñindo cuu ndo ra zacuaha sii inga ndo vatyi sa sito ndo vatyi nduhvi ra zacuaha, ñihi ca cua tycuhva ra Ndyoo sii ndi quiñi cua tasi tuñi ra sii ñiyivi tatu ña vaha zacuaha ndi.

² Ta tandihí cuii yo iyo saha zavaha yo sa ña vaha a zama yuhu yo. Tatu iyo minoo ra cuu zacuenda ra yuhu ra, ñahñi maa cuyati ra iyo. Cuu cundyaca ñaha ra sii ra sa ndisa cuii.

³ Cuu cundyaca ñaha yo sii minoo caballo cahnu tatu tyihi yo minoo freno yuhu ti.

⁴ Nahnu xaan barco, zoco vazu ñihi xaan caa tatyí cuu zacuhun ra zacaca sii tu ndya ityi cuñi maa ra sihin minoo caa luhlu sa ndyaa xiñi tu.

⁵ Ta zuun ñi cuhva cuan, luhlu xaan yaa yo, zoco cuaha xaan sa ña vaha cuu zavaha si. Tañi minoo ñúhu luhlu tatu sa natiñi si cua cahmi si candii cuhu cahnu.

⁶ Ta tañi minoo ñúhu cuu yaa yo. Cuaha xaan sa ña vaha cahan si. Zatívi si sii tandihí yo, ta zatívi si sii yo tandihí quiñi iyo yo ihyá ñuu ñiyivi. Andyaya cuu nu quita tandihí tysiño ña vaha sa zavaha yaa yo.

⁷ Vatyí cuu zandumazu ñiyivi sii tandihí cuii nuu quiti xaan a zaa a coo a quiti iyo sisi tyañuhu, ta cuu cundyaca ñaha ra sii ti.

⁸ Zoco yaa ra ña cuu cundyaca ñaha ra. Ndyaa vaha ñi cuhva ndyaa listo si sa cahan si sa quiñi caa ta zatívi si sii inga ñiyivi.

⁹ Sihin yaa yo zacahnu yo sii ra Ndyoo Zutu yo, ra ndyaca ñaha sii yo. Ta zuun ñi sihin yaa yo cahan yo ndya vaha ñi sii ñiyivi, ta maa ra Ndyoo i zavaha sii ñu vatyi cuu ñu zeha ra.

¹⁰ Zuun ñi sihin yuhu yo zacahnu yo sii ra Ndyoo. Ta zuun ñi sihin yuhu yo cahan yo ndya vaha ñi sii ñiyivi. Hermanos, ña tahan si zacuu yo cuhva cuan.

¹¹ ¿Atu quita ndutya cuii ta ndutya quiñi caa iñi ñi zoco?

¹² ¿Atu cuu quihin yo mango numinoo tundyica a quihin yo visi numinoo tuticaha? Ma cuu. Ta zuun ñi cuhva cuan ma cuu cuhun yo tyañuhu ta tava yo ndutya vaha.

Sa siñi tuñi sa saha ra Ndyoo

¹³ Tatu iyo cuaha sa siñi tuñi vaha suun, zañohon vatyi tacuan iyon sihin cuhva zavohon. Ta ma zacahnun suun ta ma catyun vatyi sito xoon.

¹⁴ Zoco tatu cucuihna iñun, a tatu cuñun vatyi iñi ñi sii moo cua tyaa ñiyivi yahvi, ma zacahnun suun ta catyun vatyi iyo xaan sa siñi tuñi suun. Cuhya cuan nduun miñoo ra vatya vatyi ña zavohon sa vaha.

¹⁵ Ihyá cuu sa siñi tuñi sa iyo ñuu ñiyivi ya, cuhva sica iñi maa ñiyivi, ta yivi cuhva sica iñi Tatyí Ii. Sa siñi tuñi sii ra cuihna cuu si.

¹⁶ Vatyí tandihí nu iyo sa cuihna iñi ñiyivi ta cuñi xaan ñu sa iñi ñi sii maa ñu tyaa ñiyivi yahvi, yucuan iyo xaan tizihi ta iyo tandihí cuii nuu cuatyi.

¹⁷ Zoco sa siñi tuñi vaha sa saha ra Ndyoo, maa ñi sa vaha cua zavaha ñiyivi tatu iyo si sii ñu. Ma coo tizihi nu yucu ñu. Vii ñi cua coo ñu. Ta cuu natuhun tahan vaha ñu iyo sa siñi tuñi vaha sii, ta ma cuxaan ñu. Iyo tumañi iñi sii ñu sihin ñiyivi. Ta cuaha xaan inga nuu tysiño vaha zavaha ñiyivi iyo sa siñi tuñi sa saha ra Ndyoo. Ma ndu-uu iñi ñu, ta ma zandavi ñaha ñu.

¹⁸ Ta ñiyivi nducu cuhva coo sa taxi, yucuan cuu ñu tasi siti vaha. Ta sa cua naquihin ñu cuu maa ñi sa vaha. (Cuñi si catyi si vatyi cua cuu ñu ñiyivi vaha xaan tandihí saha.)

4

Ma cuñi xaan yo sa iyo ñuu ñiyivi

¹ ¿Ñaa cuenda iyo tizihi nu yucu ndo ta sahñi tahan ndo? Tacuan

iyo ndo vatyi iyo cuaha xaan sa ña vaha sa cuñi ndo zavaha ndo.

² Cuñi xaan ndo coo sa sii ndo. Yucuan cuenda sahñi ndo ñiyivi. Cuñi xaan ndo sa sii inga ñiyivi, ta ma cuu ñihí ndo sii si. Yucuan cuenda iyo tizihi nu yucu ndo, ta sahñi tahan ndo. Ñahñi sa sii ndo iyo vatyi ña sica ndo sii si sii ra Ndyoo.

³ Ta iyo saha sica ndo sii si ta ña ñihí ndo vatyi ña vaha cuhva sica ndo. Sica ndo maa ñi sa cuenda sa cuzii iñi ndo.

⁴ Cuu ndo tañi minoo ñaha i zandoo sii yii cuhva zandoo ndo sii ra Ndyoo. ¿Atu ña sito ndo vatyi tatu cuñi xaan ndo sii sa iyo ñuu ñiyivi ya, nduu ndo ñiyivi xaan iñi sii ra Ndyoo? Yoo ra cuñi xaan sa ña vaha sa iyo ñuu ñiyivi ya, nduu ra minoo ra xaan iñi sii ra Ndyoo.

⁵ ¿Atu sica iñi ndo vatyi sa caha ñi cuu sa catyi Tuhun Ndyoo vatyi Tatyi Ii sa tyihi ra Ndyoo añima yo zacuenda xaan si sii yo? Cuñi ra Ndyoo vatyi iin ñi sii maa ra cua cuñi xaan yo.

⁶ Tyindyee xaan ra Ndyoo sii yo. Yucuan cuenda catyi si: "Sii ñiyivi zanduluhlu sii, saha ra Ndyoo tu-mañi iñi. Zoco ra zacahnu sii, ña tyindyee ra Ndyoo sii ra."

⁷ Yucuan cuenda zanduluhlu ndo sii ndo, ta tyaa ndo yahvi sii ra Ndyoo. Cuxaan ndo sihin cuihna, ta cua cono ra sii ndo.

⁸ Tuhva ndo sii ra Ndyoo, ta cua tuhva ra sii ndo. Zaña ndo sii sa ña vaha, ndoho ra iyo xaan cuaty. Ta ndoho ra cuñi zuhva sa iyo ñuu ñiyivi ya, ta zuhva cuñi tucu ndo sii ra Ndyoo, zandu-iin ndo iñi ndo ta minoo ñi cuhva caca iñi ndo, ta iin ñi sii ra Ndyoo cuñi xaan ndo.

⁹ Zanducuihya ndo iñi ndo ta vacu xaan ndo sa cuenda cuaty ndo. Nacoo tucuihya iñi sii ndo ta ma cuzii xaan iñi ndo.

¹⁰ Zanduluhlu ndo sii ndo ityinuu ra Ndyoo, ta ziqui cua zandu-cahnu ra sii ndo.

Ma cahan ndo sii yañi ndo

¹¹ Ma cahan ndo sii minoo ndo ta sii inga ndo. Yoo ra cahan sii inga hermano, sahñi tahan ra sihin ley ra Ndyoo sihin cuhva cuan ta ña tyaa ra yahvi sii ley ra Ndyoo vatyi yoo ra ña zavaha cuhva catyi ley ra Ndyoo, ña tyaa ra yahvi sii si.

¹² Zoco iyo minoo ñi ra sa cuu tava ley, ta minoo ñi ra cuu catyi tatu vaha si a ña vaha si. Iyo cuhva sii ra sa zacacu ra sii ñiyivi a sa zanaa ra sii ñu. ¿Ta yoo ra cuu oo vatyi cuu catyun atu vaha a ña vaha sa zavaha ra tohon?

Ña sito yo ñaa sa cua cuu sii yo ityaan

¹³ Tyizoho ndoho ra tuhva catyi: "Vityi a ityaan cua cuhun ndi inga ñuu, ta cua yaha ndi minoo cuiya. Yucuan cua zatyiño ndi, ta cua ñihí ndi xuhun." Catyi ndo.

¹⁴ Zoco ña sito ndo ñaa sa cua cuu sii ndo ityaan. Tañi minoo vico nuhu ñi cuu ndo. Ta vico nuhu cuan zuhva ñi cuhva ndyehe yo sii si, ta ziqui naa ñi si.

¹⁵ Yucuan cuenda inga cuhva cuñi si cahan ndo. Tyehen catyi ndo: "Tatu cuhva cuñi ra Ndyoo cuu, cua condito ca ndi ta zavaha ndi cuhva ya."

¹⁶ Zoco ndoho, cahnu zaha ndo sii ndo. Ta cuhva zacahnu ndo sii ndo, ña vaha.

¹⁷ Ta yoo ra sito ñaa sa cuu sa vaha ta ña zavaha ra sii si, cuaty cuu si.

5

Minoo cuhva cua cuu sii ra cuca

¹ Tyizoho ndoho ra cuca, vacu ndo ta vacu saa ndo sa cuenda tun-doho sa vasi ziqui ndo.

² Sa cuñi tyahyu sa cuca ndo, ta zahma vaha xaan ndo cua casi tiquixi.

³ Cua cuxi xuhun cuaan ndo ta xuhun cuihi ndo ta cua cuu si minoo sa ndaa vatyi ma cuu coo si tandihí tyiemvu. Ta tañi zatiyi cuxi cuan sii xuhun ndo, tacuan cua

tívi tucu coño ñuhu maa ndo sihin ñúhu. Ihya cuu sa sicumi vaha xaan ndo, ta cua ndyehe ndo tundoho quívi cua tasi tuñi ra Ndyoo sii ñiyivi.

⁴ Tyizoho ndo cuhva sa sacu ra i zatyíño tyiño ndo ta ñá tyiyahvi vaha ndo sii ra. Saa nduzu ra nuu ra Ndyoo, ra ndyaca ñaha sii yo.

⁵ Vaha xaan i sicoo ndo ñuu ñiyivi ya. I zata ndo ñiaa ñi maa sa cuñi maa ndo. I zandunahnu ndo sii ndo, ta vityi tahan si cuu ndo tañi zindiquí xahan.

⁶ I tyaa ndoho, ra cuca, cuatyi sata ñiyivi vaha, ta sahñi ndo sii ñu, vazu ndrucu ñu cuhva zacacu ñu sii ñu.

Zandyee ndo iñi ndo tandihí cuhva ta cahan ndo sihin ra Ndyoo

⁷ Ta ndoho hermanos, zandyee ndo iñi ndo ndya quívi cua quisi tucu ra ndyaca ñaha sii yo. Tañi minoo ra zatyíño sicuhu, zandyee ra iñi ra ta ndatu ra ndya coon zavi uu a uñi saha ta zíqui cuu tasi ra ta cua coo vaha itu ra.

⁸ Tacuan tucu zandyee ndo iñi ndo, ta ma yuhu ndo vatyi sa cuñi quisi tucu ra ndyaca ñaha sii yo.

⁹ Ma cahan ndo sii minoo ndo ta sii inga ndo hermanos coto catyi ra Ndyoo vatyi zavaha tucu maa ndo sa ña vaha. Sa ndyaa ra cu juez yuvehe.

¹⁰ Zaha ndo cuenda cuhva i sicoo ra profeta ta sa naha, cuhva i zandyee xaan ra iñi ra quívi i ndyehe xaan ra tundoho.

¹¹ Sito yo vatyi zii xaan cuñi ra vityi vatyi i zandyee ra iñi ra. Ta sa sito ndo cuhva i tahan ra Job ta cuhva i zandyee xaan ra iñi ra. Ta sito ndo cuhva i quita vaha ra Job quívi nu ndihí ndrucu coto ihñi cuihua sii ra vatyi vaha xaan maa ra Ndyoo, ta cundahvi xaan iñi ra sii ñiyivi.

¹² Ta minoo tuhun ñiñi xaan cuu sa cua catyi vityi hermano. Ma tyiñaha ndo Ndyoo nuu ñiyivi ta

catyi ndo ñaa sa cua zavaha ndo a ma zavaha ndo. Ta ma cahan ndo ñaa inga zívi cuhva cuan. Tatu cuñi ndo cahan ndo minoo cuhva catyi ndo: "Tyehen cua zavehi" a catyi ndo "ma zavehi sii si", ta ma zama tucu ndo inga cuhva cuee ca. Tacuan ta cua coto ñiyivi vatyi tuhva ndo cahan sa ndisa, ta ma tasi tuñi ra Ndyoo sii ndo.

¹³ ¿Atu iyo ndo ndyehe ndo tundoho? Nacahan ra cuan sihin ra Ndyoo. ¿Atu zii cuñi ndo? Nacata ra zii cuñi yaa, ta nazacahnu ra sii ra Ndyoo.

¹⁴ ¿Atu iyo ndo cuhu ndo? Nacana ra cuhu sii tandihí ra sahnu vehe ñuhu, ta nacahan ra sahnu cuan sihin ra Ndyoo sa cuenda ra ta natyihí ra zuhva azetye xiñi ra cuhu ta cahan ra zívi ra Jesús.

¹⁵ Ta tatu nii iñi ra, cua nduvaha ra cuhu cuan. Cua zanduvaha ra Jesús sii ra, ta tatu cuhu ra vatyi i zavaha ra cuatyi, cua zandasí ra Ndyoo cuatyíra.

¹⁶ Yucuan cuenda nacatyi ndo sihin ra tahan ndo ñiaa cuatyi i zavaha ndo, ta cahan ndo sihin ra Ndyoo sa cuenda minoo ndo ta inga ndo vatyi cua nduvaha ndo. Tatu iyo minoo ra ndoo xaan ta cahan ra sihin ra Ndyoo, iyo xaan cuhva sihin oración ra. Ta ñihi xaan zatyíño si.

¹⁷ Ra Elías i cuu ra minoo ñiyivi tañi maa yo. Ta sica xaan ra sii ra Ndyoo vatyi ma coon zavi. Ta ña coon ra nu ñuhu ñuu ñiyivi uñi cuiya zazava.

¹⁸ Ta zíqui i cahan ra sihin ra Ndyoo inga saha ta i coon xaan zavi, ta i zatyíño vaha tucu ñuhu inga saha, ta i nacoo ndaha tyiño.

¹⁹ Hermanos, tatu iyo minoo ndo quita ndo ityi vaha ta zandoo ndo tuhun ndisa, ta tatu quita inga ra zanaquihin ityi vaha sii ra ta natüün cuenda tucu ra Tuhun Ndyoo,

²⁰ cuñi si sa coto ra zanaquihin ityi vaha sii ra vatyi i zacacu ra sii

minoo ra iyo cuatyi, ta ma cuhun
ra andyaya. Ta zanaa ra Ndyoo
tandihi cuii cuatyi ra.

Sa Xihna Ni Carta I Tyaa Ra San Pedro

*Tyaa ra Pedro minoo carta sii
ñiyivi sino iñi sii ra Jesucristo, ñu i
sitya cuatyi*

¹ Yuhvi ra Pedro, minoo apóstol ra Jesucristo cui. Maa ra i tava tyiño sii. Ta tasi carta ya sii ñiyivi ña ndyaa ca ñuu ñu. Tandihí ñu i sitya cuatyi. Ta ndyaa ñu nu cu si Ponto ta Galacia ta Capadocia ta Asia ta Bitinia.

² Maa ra Ndyoo Zutu yo i casi sii ndo vatyi tacuan i cuñi maa ra ta sa naha. Sihin Tatyi Ii ra i zanduvaha ra sii ndo vatyi cua tyaa ndo yahvi sii ra, ta zandasi ra cuatyi ndo vatyi sati niñi ra Jesucristo sa cuenda maa yo. Natyindyee xaan ra Ndyoo sii ndo, ta nacuhva ra sa coo sa taxi añima ndo.

*Zii xaan cuñi yo, ta ndatu yo sii
minoo sa cua ñihi yo cuee ca*

³ Zacahnu ndi sii ra cu Ndyoo, Zutu ra Jesucristo, ra ndyaca ñaha sii yo vatyi i cundahvi xaan iñi ra sii yo, ta i zanacacu saa ra sii yo vatyi i nandoto ra Jesucristo sisi sa i sihi ra. Ta vityi zii xaan cuñi yo, ta ndatu yo sii minoo sa cua ñihi yo cuee ca.

⁴ Iyo sa cumi maa ra Ndyoo ndya andiví sa cuenda maa ndo, ta ma tivi si ndaha ñi, ta ñahñi sa quiñi cuu cuhun nu iyo si, ta ma naa si.

⁵ Ta cua ñihi ndo sii si vatyi za cuenda vaha ra Ndyoo sii ndo si hin tundyee iñi sii maa ra. Nii xaan cuu iñi ndo sii ra, ta nu cua ndihí tyiemvu cua zañaha ra Ndyoo cuhva cua zacacu ndihí ra sii ndo vatyi sa ndyaa listo cuhva cuan.

⁶ Yucuan cuenda zii xaan cuñi ndo vazu ndyehe xaan ndo tundoho vityi.

⁷ Sa nii xaan iñi ndo sii ra Ndyoo, cuu si tañi xuhun cuaan. Cuñi si

sa cua tyicuhva ra Ndyoo sii si si hin ñúhu, ta ziqui cua ndyehe ra tatu vaha si a ña vaha si. Tatú nii xaan cuu iñi ndo sa ndisa cuii, cua cundyee iñi ndo vazu ndyehe ndo tundoho, ta sa nii xaan iñi ndo cuhva cuan vale ca si ta ziqui xuhun cuaan vatyi xuhun cuaan sa iyo ñuu ñiyivi ya cua cunaa si. Tatú nii xaan iñi ndo sa ndisa cuii quivi ndyehe ndo tundoho, quivi quisí ra Jesucristo ta cua zacahnu ra Ndyoo sii ndo. Cua catyi ra vatyi vaha xaan cuu cuhva i cunii iñi ndo, ta cua tyaa xaan ra yahvi sii ndo.

⁸ Cuñi xaan ndo sii ra Jesucristo vazu ta ndyehe ca ndo sii ra. Sino xaan iñi ndo sii ra vityi vazu ta ndyehe ca ndo sii ra, ta yucuan cuenda zii xaan zii xaan cuñi ndo ndya cuhva ndya ña cuu ca nacatyi maa ndo.

⁹ Ta sa cuenda sa nii xaan iñi ndo sii ra, ta cuee ca cua ñihi ndo sa cacu ndihí ndo.

¹⁰ Ta sa naha, ra i cahan tuhun i saha ra Ndyoo sii ra, ra profeta cuan, ñá cutuñi vaha iñi ra yozo caa cua cacu ñiyivi, zoco i tyaa ra cuhva i catyi ra Ndyoo sihin ra sa cuenda si, ta i zacoto ra yozo caa cua ñihi maa ndo sa vaha sii ra Ndyoo cuee ca.

¹¹ I zacoto Tatyi Ii ra Cristo sii ra profeta vatyi cua ndyehe xaan ra Cristo tundoho, ta i zacoto si cuhva cua nandoto ra ta cua tiin cuenda ra Ndyoo sii ra andiví, zoco i nducu coto xaan ra profeta yoo ra cuu ra Cristo ta ama cua quisí ra.

¹² Ta i zacoto ra Ndyoo sii ra vatyi ma saa ñaha cuhva cuan nii ñi sa ndito ra profeta, zoco i quisí si cuee ca, quivi maa yo. Ta vityi sa sito maa ndo tuhun cuan vatyi iyo ra zacoto Tuhun Vaha sii ndo sihin tundyee iñi Tatyi Ii sa i tasi ra Ndyoo ndya andiví. Ta ndya cuhva ndya ángel andiví ta cuñi xaan ra coto ra cuaha ca sa cuenda cuhva ya.

Cuñi xaan ra Ndyoo vatyi coo yo minoo cuhva vaha sa ndisa cuii

¹³ Yucuan cuenda nacañi vaha iñi ndo cuhva cua zavaha ndo, ta nacoo vaha sa siñi tuñi sii ndo. Cuhva vaha xaan ndo sii sa cua cuhva ra Ndyoo sii ndo quiví cua quisi tucu ra Jesucristo vatyi vaha xaan añima maa ra Ndyoo, ta cua cuhva ra sii si sii ndo quiví cuan.

¹⁴ Zehe ra Ndyoo cuu sii ndo. Yu-cuan cuenda tyaa ndo yahvi sii ra, ta ma zavaha ca ndo cuhva ña vaha sa i zavaha ndo quiví ta coto ca ndo sii ra.

¹⁵ Ii xaan cuu maa ra Ndyoo, yu-cuan cuenda cuu ndo ñiyiví vaha sa ndisa cuii sihin tandihí cuii cuhva zavaha ndo.

¹⁶ Vatyi catyi Tuhun Ndyoo: "Cuu ndo ñiyiví sa ñahñi cuatyi vatyi yuhvi ra ñahñi cuatyi cui." Catyi ra Ndyoo

¹⁷ Minoo cuhva ndoo xaan cua ndyehe ra Ndyoo tyiño zavaha sa minoo minoo yo. Tatu catyi ndo vatyi Zutu ndo cuu sii ra, yuhu ndo sii ra ta zavaha ndo sa vaha niiñi sa iyo ndo ñuu ñiyiví ya.

¹⁸ I tyiyahvi ra Ndyoo, ta i tava ra sii ndo sii cuhva sahnu sa i zañaha ñiyiví sahnu sii ndo, cuhva i tyaa xaan ndo yahvi sii costumbre sahnu. Ta ñá tyiyahvi ra Ndyoo sihin minoo sa cuu tivi tañi xuhun cuii a xuhun cuaan.

¹⁹ Zoco i tyiyahvi ra sihin minoo sa yahvi xaan ca, sihin niñi ra Cristo. Mvee ticatyi ra Ndyoo cuu sii ra. Ñahñi cuatyi ra, ta ñahni sa ña vaha i zavaha ra.

²⁰ Cuee ca sa zavaha ra Ndyoo ñuu ñiyiví ta sa i catyi ra sihin ra Cristo vatyi cua zavaha ra cuhva ya, zoco ñá quisi ñaha ra ndya vityi vatyi cua tyindye xaan ra sii maa ndo.

²¹ Sa cuenda ra Cristo, ta sino iñi ndo sii ra Ndyoo. Ra Ndyoo cuu ra i zanandoto sii ra sisi sa i sihi ra, ta i natiiñ cuenda ra sii ra nu ndyaa ra. Vityi sino xaan iñi ndo ta ñiiñ xaan cuu iñi ndo sii ra Ndyoo vatyi

ityi nuu ca cua cuyucu ndo sihin ra Cristo nu ndyaa ra.

²² Vityi iyo ca cuhva cuñi xaan ndo sii tandihí ra hermano vatyi sa ndundii añima ndo sa ndisa cuii vatyi tyaa ndo yahvi sii sa ndisa. Cuñi xaan ndo sii minoo ndo ta sii inga ndo minoo sa ndisa ta sihin tandihí cuii añima ndo.

²³ Sa i naçacu saa ndo. Ta ra cuu Zutu ndo vityi, ma cuu ca ra. Maa ra Ndyoo cuu ra catyi yozo caa cua cuu si. Ta ma naa tuhun ra. Ndito si, ta tandihí cuii tyiemvu cua coo si.

²⁴⁻²⁵ Vatyi catyi Tuhun Ndyoo: Tandihí ñiyiví ñuu ñiyiví cuu tañi itya ñi, ta tañi minoo ita itya ñi cuu ñu. Na-ityi itya cuan, ta canacava ita si, zoco Tuhun ra Ndyoo cua coo si tandihí cuii tyiemvu. Ta ihya cuu tuhun cuhva cua cacu ñiyiví, tañi sa i zacoto ñiyiví sii ndo.

2

¹ Yucuan cuenda zandoo ndo tandihí sa ña vaha. Ma zandavi ñaha ca ndo sii ñiyiví. Ma zaha ndo tuhun vatyi vaha xaan ndo tatu ña ndisa. Ma cuxaan ndo ndyehe ndo sii ñiyiví tatu iyo sa vaha sii ñu, ta ma cahan ndo cuendu ziqui ñiyiví.

² Cuu ndo tañi lee sa nacaa cacu ta cuñi xaan si caxi si. Nanducu ndo zicui vaha, zicui sa ñahñi sa ndya vaha ñi zaca sihin. Zicui cuan cuu Tuhun Ndyoo, ta sihin si cua cuahnu ndo.

³ Tacuan zavaha ndo vatyi sa cu-tuhva ndo sa ndisa cuii vatyi vaha xaan ñiyiví cuu maa ra Cristo.

Ra Cristo cuu minoo yuu ndito

⁴ Tuhva ndo sii ra ndyaca ñaha sii yo. Minoo yuu ndito cuu ra. I catyi ñiyiví vatyi ña vaha yuu cuan, zoco i casi ra Ndyoo sii si, ta ñiñi xaan si.

⁵ Maa ndo cuu tucu tañi yuu ndito. Cuhva ndo sa cutyiño ra Ndyoo sii ndo, ta cua zavaha ra vehe ñuhu ra sihin ndo. Ta cuu tucu ndo ra cu zutu sa cuenda ra. Cuhva ndo sii ndo sii ra, zacahnu ndo sii

ra, ta cuhva ndo ñaa inga sa cua cuhva ndo sii ra, ta cua quihin ra sii si sa cuenda ra Jesucristo.

⁶ Tyehen catyi Tuhun Ndyoo sa cuenda ra Cristo:
I casi minoo yuu ñiñi xaan, ta tyei
sii si nu cuu siquí vehe ñuhu.
Tandihi ñiyiví cua sino iñi sii ra
cuan, ma coo ticahan nuu sii
ñu sa cuenda ra.

⁷ Sa cuenda ndoho, ra sino iñi, ta
sa sito ndo vatyi vaha xaan ra, zoco
sa cuenda ñiyiví ña sino iñi ta cuu si
tañi catyi Tuhun Ndyoo:
I zavita ihno ñiyiví zandaa vehe sii
yuu sa siñi ñuhu sa cuenda
siquí vehe.

Ta vityi yuu cuan cuu sa ñiñi ca ta
ziquí tandihi sa cuenda vehe
cuan.

⁸ Ta tañi nu catyi tucu si:
Yuu sa cua catyihi saha ñiyiví cuu
ra. Cua zanduva cuii ra sii
ñu.
Nduva ñu vatyi ña tyaa ñu yahvi
sii Tuhun Ndyoo. Tacuan i tyaa ra
Ndyoo cuhva cua tahan ñu.

Ñiyiví sa cuu cuenda ra Ndyoo
⁹ Zoco maa ndo cuu minoo ityi
ñiyiví i casi ra Ndyoo. Ra cu zutu
cuu ndo sa cuenda rey. Ñiyiví ñahñi
cuatyi cuu ndo; iin ñi sa cuenda ra
Ndyoo cuu ndo. Yucuan cuhva iyo
ndo vatyi cua zacoto ndo sii ñiyiví
tyiño vaha xaan ra Ndyoo, cuhva i
cana ra sii ndo vatyi cua quita ndo
nu ñaa ta quihvi ndo nu iyo ñuhu
vaha xaan ra.

¹⁰ Quiví tañaha ca sino iñi ndo,
ñahñi ñiyiví i cuu ndo, zoco vityi sa
nduu ndo ñiyiví ra Ndyoo. Quiví
cuan yoñi i cundahvi iñi sii ndo,
zoco vityi cundahvi iñi ra Ndyoo sii
ndo.

Zatyiño ndo tyiño ra Ndyoo

¹¹ Ndoho hermanos, cuñi xein sii
ndo. Tañi ñiyiví ndihvi noo ndahvi
cuu ndo vatyi yivi ñuu ndo cuu ñuu
ñiyiví ya, ta yucuan cuenda zañiñi
sii ndo vatyi ma zavaha ndo cuhva
ña vaha sa cuñi coño ñuhu ndo vatyi

cuhva cuan cua zativi si sii añima
ndo.

¹² Zazuenda ndo sii ndo sihin
cuhva zavaha ndo ityi nuu ñiyiví ña
sino iñi. Ta vazu cahan ñu ndya
vaha ñi sii ndo vityi tañi sa ra ña
vaha cuu ndo, zoco cua ndyehe
ñu tandihi sa vaha zavaha ndo ta
ziquí cua zacahnu ñu sii ra Ndyoo
quíví cua ndyehe ra Ndyoo cuhva i
zavaha tandihi ñiyiví.

¹³ Sa cuenda ra Cristo, tyaa ndo
yahvi sii tandihi cuii ra cu tyiño.
Tyaa ndo yahvi sii ra gobierno
vatyi ra cahnu ca cuu ra.

¹⁴ Ta vazu ra gobernador cuu ra,
tyaa tucu ndo yahvi sii ra vatyi tava
ra gobierno tyiño sii ra sa cua tasi
tuñi ra sii ñiyiví ña vaha, ta cua zac
ahnu ra sii ñiyiví zavaha sa vaha.

¹⁵ Vatyi cuñi ra Ndyoo sa cua
zavaha maa ndo sa vaha, ta si
hin cuhva cuan cua cazi ndo yuhu
ñiyiví sa ñahñi maa sito ta cahan ñu
sa tondo ñi sa cuenda ndo.

¹⁶ Ña ndyaca ñaha ca ley sii ndo
sa ndisa, zoco ma caca iñi ndo vatyi
cuu zavaha ndo ndya vaha ñi. Vi
tyi cuñi si cuu ndo muzu maa ra
Ndyoo ta tyaa ndo yahvi sii maa ra.

¹⁷ Ta tyaa ndo yahvi sii tandihi
ñiyiví. Cuñi xaan ndo sii tandihi
ra hermano ta ñu hermana. Yuhu
ndo sii ra Ndyoo. Ta tyaa ndo yahvi
sii ra gobierno.

*Indyehe xaan ra Cristo tundoho
sa cuenda maa yo, ta zandoo ra mi
noo cuhva cua cundyico yo*

¹⁸ Ndoho ra cu muzu, tyaa ndo
yahvi sii patrón ndo tandihi cuii
cuhva. Ña iin ñi sii ra vaha ta ra
mazu iñi, zoco vazu ra quiñi iyo,
tyaa tucu ndo yahvi sii ra.

¹⁹ Vatyi tahan iñi ra Ndyoo tatu
sa cuenda sa tyaa ndo yahvi sii maa
ra ta ndyehe ndo tundoho, vatyi
zavaha ndo sa vaha.

²⁰ Zoco tatu zavaha ndo sa ña
vaha, ta tasi tuñi ñiyiví sii ndo sa
cuenda maa si, ta zandyee ndo
iñi ndo tundoho cuan, ¿yozo caa

tyindyee si sii ndo ityi nuu ra Ndyoo? Ña tyindyee si. Zoco tatu zavaha ndo sa vaha ta zandyee ndo iñi ndo vazu ndyehe ndo tundoho sa cuenda si, yucuan cuu sa tahan iñi ra Ndyoo.

²¹ Vatyi yucuan cuenda i casi ra Ndyoo sii ndo. Vatyi i ndyehe ra Cristo tundoho sa cuenda maa ndo, ta zandoo ra minoo cuhva cua cundyico ndo. Cuhva zavaha maa ra, tacuan zavaha tucu maa ndo.

²² Ñahñi maa numinoo cuatyti i zavaha ra. Ta yoñi sii i zandavi ñaha ra.

²³ Tatu cahan ñiyivi ndya vaha ñi sii ra, ñá nacahan ra sa cahan ñu. Tatu zandyehe ñiyivi tundoho sii ra, ñá zayuhu ra sii ñu. I tyaa ra tandihí tysiño cuan ndaha ra Ndyoo vatyi ra Ndyoo, ndoo xaan zandaa ra tysiño.

²⁴ Zuun ñi maa ra Cristo i ndyehe tundoho sa cuenda cuatyti yo sihin coño fluhu ra quivi i sihi ra nu cruz. Ta vityi cuu zandihí yo tuhun sa zavaha yo sa ña vaha ta coo yo minoo cuhva ndoo xaan sa ndisa cuui. Indoho maa ra sa cuenda maa yo, to yucuan cuenda i nduvaha yo iñi ñi sihin ra.

²⁵ Nu quisí quivi i sica noo ndo tañi mvee ticateyi sa cua naa, zoco vityi sa naquita ndo nu ndyaa ra zacuenda sii ndo. Tañi minoo ra cu pastor, zacuenda xaan ra sii añima ndo.

3

Cuhva cuñi si zavaha ra iyo ñazihí ta ñu iyo yíi

¹ Zuun ñi cuhva cuan, cuñi si sa tyaa xaan ñuzihí yahvi sii ra cu yíi ñu vatyi tatu ña sino iñi yíi ñu Tuhun Ndyoo, zoco cuu sino iñi ra sihin cuhva vaha zavaha ñu vazu ña cahan ñu Tuhun Ndyoo sihin ra.

² Cua ndyehe yíi ndo vatyi yuhu ndo sii ra Ndyoo ta zavaha xaan ndo sa vaha.

³ Ma zandutyaqui xaan ndo sii ndo sihin cuhva zavaha ndo sihin

ixi xiñi ndo ta cuhva sa sityiño xaan ndo ndaha tysiño xuhun cuaan a zahma yahví xaan.

⁴ Vaha ca sa caca iñi ndo yozo caa cuu ndo ñiyivi vaha sa ndisa sihin añima ndo. Ihya cuu sa tyaqui sa ma tivi, tatu cuu ndo ñiyivi vii xaan ta ma nducu ndo tizihí. Ihya cuu sa cahnu ca nuu ra Ndyoo.

⁵ Cuhva ya i zanduvaha ñuzihí sii ñu ta sa naha ta yíi sihin zahma vaha. I siño xaan iñi ñu sii ra Ndyoo, ta vaha xaan ñiyivi i cuu ñu, ta i tyaa xaan ñu yahvi sii yíi ñu.

⁶ Tacuan i cuu ña Sara. I tyaa ña yahvi sii ra Abraham, ta catyi ña vatyi maa ra ndyaca ñaha sii ña. Cua cuu ndo tañi maa ña tatu zavaha ndo sa vaha ta tatu ña yuhu ndo sa tyaa ndo yahvi sii ra Ndyoo.

⁷ Ta zuun ñi cuhva, ndoho ra iyo ñazihí, nacoo vaha sa siñi tuñi sii ndo sihin ñazihí ndo. Tyaa ndo yahvi sii ña tañi tahan si. Cundahvi iñi ndo sii ña vatyi vita ca ña ta ziquí ca maa ndo. Ta tyaa tucu ndo yahvi sii ña vatyi iñi ñi cuhva cua ñihí ndo sa cundito ndo tandihí cuui tyiemvu. Tacuan zavaha ndo ta ma cundazi nu cahan ndo sihin ra Ndyoo.

Iyo saha cua ndyehe ñiyivi tun-doho vatyi zavaha ñu sa vaha

⁸ Ihya tuhun tyaa tucu ndo yahvi. Nacoo sa vaha nu yucu ndo sihin minoo ndo ta sihin inga ndo tañi sa iñi ñi ñiyivi cuu ndo. Cundahvi xaan iñi ndo sii tahan ndo ta ma zacahnu ndo sii ndo.

⁹ Tatu zavaha ñiyivi sa ña vaha sihin ndo, ma zavaha ndo sa ña vaha sihin ñu. Ta tatu cahan ñu ndya vaha ñi sii ndo, ma nacahan ndo nu cahan ñu. Inga cuhva zavaha ndo. Cahan ndo sihin ra Ndyoo vatyi cua cuhva ra sa vaha sii ñu. Vatyi i cana ra Ndyoo sii maa ndo vatyi cua cuhva ra sa vaha sii ndo.

¹⁰ Ta catyi Tuhun Ndyoo vatyi: Ra cuñi coo vaha ñuu ñiyivi ta cuzií iñi ra, nazacuenda vaha ra

yuhu ra ta ma cahan ra sa ña
vaha, ta ma zandavi ñaha ra.

¹¹ Cuñi si sa zacuenda ra sii ra ta
ma zavaha ra sa ña vaha, ta
nazavaha ra sa vaha.

Nanducu xaan ra cuhva coo sa taxi
sii ra sihin tandihi ñiyivi.

¹² Vatyi zacuenda xaan ra Ndyoo sii
ñiyivi ndoo iyo, ta siñi ra sa
cahan ñu sihin ra, zoco cua
tasi tuñi ra sii ñiyivi zavaha
sa ña vaha.

¹³ Yoñi ra cua zavaha sa ña vaha
sihin ndo tatu maa ñi sa vaha
zavaha maa ndo.

¹⁴ Zoco vazu zandyeha ñu tun-
doho sii ndo sa cuenda sa zavaha
ndo sa vaha, zii xaan cua cuñi ndo.
Ta ma yuhu ndo sii ñiyivi zayuhu sii
ndo, ta ma caca xaan iñi ndo.

¹⁵ Zoco sihin tandihi añima ndo
tyaa ndo yahvi sii ra Cristo, ra
ndyaca ñaha sii ndo. Ta cundyaa
listo ndo sa nacatyi ndo sihin ñiyivi
ndaca tuhun sii ndo ñaa cuenda
sino iñi ndo Tuhun Ndyoo. Zoco vii
ñi cahan ndo sihin ñu minoo cuhva
cua zañaha si vatyi tyaa ndo yahvi
sii ñu.

¹⁶ Zavaha ndo sa vaha vatyi sino
iñi ndo sii ra Cristo, ta ziñui tatu
cahan ñiyivi ndya vaha ñi sii ndo
ta tyaa ñu cuatyi sata ndo, zuun
ñi maa ñu cua cucahan nuu vatyi
maa ñi sa vaha zavaha ndo. Ta maa
ndo cua coto ndo vatyi ñahñi cuatyi
ndo.

¹⁷ Tatu cuhva cuñi maa ra Ndyoo
cuu, vaha ca cua ndyehe ndo tun-
doho vatyi zavaha ndo sa vaha ta
ziñui sa ña vaha.

¹⁸ Vatyi zuun ñi maa ra Cristo
i ndyehe ra tundoho minoo saha
sa cuenda cuatyi maa yo. Nahñi
cuatyi maa ra, zoco i ndyehe ra
tundoho sa cuenda maa yo vazu
ñiyivi ña vaha i cuu yo vatyi cuhva
cuan cuu zanduvaha ra sii yo sihin
ra Ndyoo. I sahñi ñiyivi sii coño
ñuhu ra, zoco ñá sihi añima ra.

¹⁹ I sahan ra sihin añima ra, ta
i nacatyi ra Tuhun Ndyoo sihin
añima sa ñoho ndazi.

²⁰ Añima ñiyivi ñá tyaa yahvi sii
ra Ndyoo quívi i cahan ra Noé. Ta i
cundyee xaan iñi ra Ndyoo sihin ñu
nii ñi sa zavaha ra Noé barco cuan,
zoco zuhva ñi ñiyivi i cacu sisi tu nu
ndutya. Uña tahan ñi ñu.

²¹ Ta tañi i cacu ñiyivi nu ndutya
quívi cuan, tacuan tucu zañaha si
cuhva cua cacu maa yo quívi sa
sicoo ndutya yo vatyi i nandoto ra
Jesucristo sisi sa i sihi ra. Zoco ma
caca iñi yo vatyi sa coo ndutya yo
cuu sa cua zacacu sii yo, zoco sa
caca yo sii ra Ndyoo ta nduvaha sa
siñi tuñi vaha sii yo vatyi sino iñi yo
sii ra Jesús.

²² Ta vityi cuahan ra andivi, ta
ndyaa ra ityi siyo cuaha ra Ndyoo.
Ta ndyaca ñaha ra sii ángel ta sii
inga ra ndyaca ñaha ta ra nahnu.

4

*Cuñi si sa zatyiño yo tyiño ra
Ndyoo sihin cuhva saha ra sii yo*

¹ Yucuan cuenda, tañi i ndyehe
ra Cristo tundoho sihin coño ñuhu
ra, tacuan tucu tahan si sii maa
ndo. Cundyaa listo ndo sa ndyehe
ndo tundoho sa cuenda ra. Ra sa
ndyehe tundoho sihin coño ñuhu
ra, ña ndyaca ñaha ca cuatyi ra sii
ra.

² Ta vityi zavaha ra cuhva cuñi ra
Ndyoo. Ña zavaha ca ra cuhva ña
vaha sa cuñi coño ñuhu ra tandihi
quívi sa iyo ra ñuu ñiyivi.

³ Sa vaha ñi cuu si cuhva i zavaha
ndo quívi ta sino ca iñi ndo, tañi
zavaha ñiyivi ña sito sii ra Ndyoo. I
zavaha ndo ñaa sa ña vaha sa cuñi
ndo sihin coño ñuhu ndo, tandihi sa
quiñi. I sihi xaan ndo ndixi ta i siñi
ndo. I zacahnu xaan ndo vico, ta
i zacahnu ndo sii zandu yutu sihin
minoo cuhva ña cuñi ra Ndyoo.

⁴ Ta ñiyivi ña sito sii ra Ndyoo,
iyo xaan cuñi ñu vatyi ña cutahan
ca ndo sihin ñu sihin tandihi cuhva
ñi vaha sa zavaha ñu. Ta yucuan
cuenda cahan ñu ndya vaha ñi sii
ndo.

⁵ Zoco cuá cuhva maa ñuu cuenda sii ra cua tyicuhva sii ñiyiví ndito ta sii ñiyiví i sihi.

⁶ Yucuan cuenda i nacatyi ra Jesúz Tuhun Ndyoo sihin ñiyiví i sihi. Ñiyiví cuu ñuu, ta yucuan cuenda i sihi coño ñuhu ñuu, zoco cuá cundito añima ñuu tañi ndito maa ra Ndyoo.

⁷ Sa cuñi naa ñuu ñiyiví. Yucuan cuenda cuu ndo ñiyiví iyo sa siñi tuñi vaha, ta cuaha xaan cahan ndo sihin ra Ndyoo.

⁸ Ta sa ñiñi ca ta zíqui tandihí cuu sa cuñi xaan ndo sii minoo ndo ta sii inga ndo vatyi tatu cuñi xaan yo sii tahan yo ma ndyehe xaan yo ñaa cuatyi zavaha ñuu.

⁹ Tiin cuenda vaha ndo sii minoo ndo ta sii inga ndo vehe ndo, ta ma cuxaan ndo tatu saa ra hermano vehe ndo.

¹⁰ Ta tahan tahan cuhva saha ra Ndyoo sii sa minoo minoo ndo, tacuan tyindyee ndo sii tahan ndo sihin cuhva saha ra Ndyoo sii ndo vatyi saha xaan ra cuaha xaan nuu sa vaha sii tandihí ndo iin ñi.

¹¹ Yoo ndo nacatyi Tuhun Ndyoo, cahan ndo tañi sa maa ra Ndyoo cahan, a tatu tyindyee ndo sii ñiyiví, tyindyee ndo sihin tandihí tundayee iñi sa saha ra Ndyoo sii ndo. Ta tandihí sa zavaha ndo, zavaha ndo sii si sihin minoo cuhva sa cua zacahnu sii maa ra Ndyoo sa cuenda ra Jesucristo. Ta nazacahnu xaan yo sii ra, ta nacundyaca ñaha ra tandihí cuii tyiemvu. Ta nacuu si tacuan, ta nacuu si sa ndisa.

Cua ndyehe yo tundoho vatyi sino iñi yo sii ra Cristo

¹² Ndoho hermanos, cuñi xein sii ndo. Ma cu-iyo xaan cuñi ndo sa cuenda tundoho cahnu xaan sa vasi zíqui ndo vatyi tacuan cua tahan si sii tandihí yo ra sino iñi sii ra Cristo.

¹³ Zoco zíi xaan cuñi ndo sa cuenda sa ndyehe ndo tundoho sihin ra Cristo vatyi tatu ndyehe ndo tundoho sa cuenda ra, quívi cua

quisi ra ta cundyaca ñaha ra ñuu ñiyiví, zíi xaan ca cua cuñi ndo.

¹⁴ *Tatu cahan ñiyiví ndya vaha ñi sii ndo sa cuenda ra Cristo, zíi xaan cua cuñi ndo vatyi situ xaan Tatyi Ii sii ndo. Ta Tatyi Ii cuu sa zañaha vatyi vaha xaan maa ra Cristo. Quiñi xaan cahan ñiyiví sii maa ra, zoco maa ndo zacahnu ndo sii ra.*

¹⁵ *Zoco ma cahñi ndo ñiyiví ta ma zuhu ndo; ma nducu ndo tizihi, ta ma tyihi ndo sii ndo sihin inga ñiyiví vatyi cua ndyehe ndo tundoho sa cuenda cuhva cuan. Ta yívi tundoho sa cuñi maa ra Ndyoo sa ndyehe ndo cuu tundoho cuan.*

¹⁶ *Zoco tatu ndyehe ndo tundoho sa cuenda Tuhun Ndyoo, ña tahan si sa cucahan nuu ndo. Zacahnu ndo sii ra Ndyoo sa cuenda tundoho sa ndyehe ndo vatyi ñiyiví ra Cristo cuu ndo.*

¹⁷ *Sa cua saa quívi cua tyicuhva ra Ndyoo sii ñiyiví cuenda ra. Ta tatu cua quisaha cuhva cuan sihin maa yo, ¿ta yozo caa cua tahan ñiyiví ñá tyaa yahvi sii Tuhun Vaha ra Ndyoo?*

¹⁸ *Ta tatu sihin tundoho ta cua cacu ñiyiví vaha, ¿yozo caa cua tahan si sii ñiyiví ña vaha ta ñiyiví iyo cuatyi?*

¹⁹ *Yucuan cuenda tatu ndyehe ndo tundoho vityi vatyi tacuan cuñi ra Ndyoo, cuñi si sa zavaha ca ndo sa vaha ta cuhva cuenda ndo añima ndo sii ra Ndyoo. I zavaha ra sii ndo, ta ma zandoo ra sii ndo.*

5

Saha xaan ra tyiño sii ñuu sino iñi

¹ *Vityi sehi tyiño sii ra sahnu, ra ndyizo tyiño nu yucu ndo. Minoo ra sahnu cuu tucu ii, ta i ndyehi sii ra Cristo quívi i ndyehe ra tundoho. Ta cua ñiñi tuqui sa vaha sihin ra Cristo cuee ca.*

² *Tañi zacuenda minoo ra cu pastor sii mvee ticatyi zono ra, tacuan zacuenda maa ndo sii ñiyiví cumi ndo. Ma cuatu ndo ndya sa zañiñi*

ñiyívi sii ndo, zoco cuñi ndo zavaha ndo sii si sihin sa vaha. Ta ma zavaha ndo sii si vatyi cuñi ndo xuhun zoco sa cuenda sa vatyi cuñi ndo zatyiño ndo tysiño ra Ndyoo.

³ Ma ñihi xaan cundyaca ñaha ndo sii ñu, zoco zañaha ndo minoo cuhva vaha sii ñu sihin cuhva vaha iyo maa ndo.

⁴ Ta quivi cua quasi tucu ra cu pastor cahnu ca, cua ñihi maa ndo minoo sa vaha xaan sa ma tivi, ta ma cunaa si.

⁵ Ndoho ra cuatyi, tyaa ndo yahvi sii ra sahnu. Ta tandihí ndo, tyaa ndo yahvi sii tahan ndo ta zanduluuhlu ndo sii ndo, vatyi:

Cuxaan ra Ndyoo sihin ñiyívi sa zacahnu sii, zoco saha ra sa vaha sii ñiyívi zanduluuhlu sii.

⁶ Yucuan cuenda quivi ndyehe ndo tundoho, tiin cuenda ndo sii si tañi minoo sa tasi ra Ndyoo sii ndo, ta cuee ca, quivi tahan si, cua tyaa siyo ra sii si ta zii xaan cua cuñi ndo inga saha.

⁷ Nacatyi ndo sihin maa ra tandihí sa sica xaan iñi ndo ta zandoo ndo sii si sihin maa ra vatyi sica iñi maa ra sa cuenda ndo, ta zacuenda ra sii ndo.

⁸ Zazuenda vaha xaan ndo sii ndo vatyi ra xaan iñi sii ndo, ra cuihna, sica noo ra tañi minoo ndicaha cuahyi. Nanducu ra yoo sii cua casi ra.

⁹ Sino vaha iñi ndo sii ra Ndyoo, ta tava ndyizo ndo sii ra cuihna. Ta cundyee iñi ndo vatyi sa sito ndo vatyi nacahnu ñuu ñiyívi ndyehe ñu sino iñi tundoho zuun ñi cuhva tañi ndyehe maa ndo.

¹⁰ Saha xaan ra Ndyoo sa vaha sii yo tandihí quivi. Maa ra catyi vatyi cua ndyehe xihna ndo zuhva tundoho, ta ziqui cua coo sa vaha xaan sii ndo tandihí cuii tyiemvu vatyi iñi cuu ndo sihin ra Jesucristo. Tatu sa ndyehe ndo zuhva tundoho, maa ra Ndyoo cua zanduvaha sii ndo sihin tundoho cuan. Cua zandundyee xaan ra iñi ndo.

Cua cuhva ra tundyee iñi sii ndo, ta ma ndoyo ñuhu ndo ndaha fi.

¹¹ Nazacahnu xaan yo sii ra, ta nacundyaca ñaha ra tandihí cuii tyiemvu. Ta nacuu si tacuan ta nacuu si sa ndisa.

Saha ra minoo nacumi sii ñu nu ndihí cahen ra

¹² Tasi carta ya sii ndo sihin ra Silvano. Sica iñi vatyi minoo hermano vaha cuu ra. Zuhva ñi i tyei ihya. Saha xein tysiño sii ndo vatyi ma zaña ndo cuhva sino iñi ndo. Sa ndisa sa saha maa ra Ndyoo cuu cuhva sino iñi ndo; ma zaña ndo sii si.

¹³ Ñu sino iñi ihya ñuu Roma tasi ñu minoo nacumi sii ndo. I casi tucu ra Ndyoo sii maa ñu tañi i casi ra sii maa ndo. Ta ra Marcos, zehi, tasi tucu ra minoo nacumi sii ndo.

¹⁴ Cuhva ndo minoo Ndyoo nacumi xaan sii minoo ndo ta sii inga ndo. Nacoo sa taxi añaima tandihí ndo, ra cuu cuenda ra Jesucristo. Amén.

Sa Cu Uu Carta I Tyaa Ra San Pedro

*Tyaa ra Pedro inga carta sii
ñiyivi sino iñi*

¹ Yuhvi ra Simón Pedro, minoo muzu ra Jesucristo cui ta minoo apóstol ra. Tyei carta ya sii ndoho ra sa nañihí cuhva vaha ta nii xaan cuu iñindo sii ra Jesucristo tañi nii iñi maa ndi. Ñihíndo cuhva cuan tañi ñihí maa ndi sii si vatyi ndoo xaan cuu ra Ndyoo ta ra Jesucristo, ra ndyaca ñaha sii yo.

² Nacoo xaan ca sa vaha sa saha ra Ndyoo siindo, ta nacoo sa taxi añima ndo cuhva cuahan nacoto ca ndo sii ra Ndyoo ta sii ra Jesús, ra ndyaca ñaha sii yo.

*Cuhva iyo ñiyivi sino ndisa cuii
iñi sii ra Cristo*

³ Sihin tundyee iñi sa iyo sii maa ra Ndyoo, ta i saha ra sii yo tandihí cuii sa cuñi si sa cuenda cuhva cundito yo ta zavaha yo cuhva cuñi maa ra. I saha ra cuhva cuan sii yo quívi i quisaha nacoto yo sii ra. I cana ra sii yo sihin cuhva vaha xaan iyo ra ta sihin sa vaha xaan i zavaha ra.

⁴ Ta zuun ñi sihin cuhva cuan i saha ra tuhun ra sii yo sa cuenda cuhva cua zavaha ra. Cahnu xaan cuu tuhun ya, ta vale xaan si. Ta sa cuenda tuhun i saha ra Ndyoo sii yo, cuu nduu ndo ñiyivi vaha xaan tañi maa ra Ndyoo, ta cuu zandoo ndo sii sa ña vaha sa cuñi coño ñuhu ndo, sa cuñi zatívi siindo. Ta ma cuu ca zacuu si sihin ndo.

⁵ Ta sa cuenda ya cuñi si sa zañiñi ndo siindo. Nii xaan cuu iñindo, ta vityi nducu tucu ndo cuhva zavaha ndo sa vaha. Ta sihin sa zavaha ndo sa vaha, nducu ndo cuhva coto ca ndo sii ra Ndyoo.

⁶ Ta tatu sa sito vaha ndo sii ra Ndyoo, cutuhva ndo cundyaca ñaha ndo sii maa ndo. Ta tatu sa cuu cundyaca ñaha vaha ndo siindo, cutuhva ndo cundyee xaan

iñindo. Ta tatu sa cuu cundyee iñindo, yuhu ndo sii ra Ndyoo ta nducu xaan ndo cuhva zavaha ndo sa cuñi ra.

⁷ Tatu sa cuñi ndisa cuii ndo sii ra Ndyoo, cuñi ndisa cuii ndo sii tandihí hermano, ta tatu sa cuñi ndisa cuii ndo sii tandihí hermano, cuñi xaan ndo sii tandihí ñiyivi.

⁸ Tatu iyo tandihí cuii cuhva ya siindo ta cuahan nduñihí ca cuhva iyo si sihin ndo, cua cuu ndo ñiyivi sityiño ra Ndyoo sa ndisa, ta yivi sa caha ñi cuu sa sito ndo sii ra Jesucristo, ra ndyaca ñaha sii yo.

⁹ Zoco ra sa ñahñi cuhva ya iyo sii, cuu ra tañi minoo ra cuaa a ra ña ndisi ndyehe. Sa naa iñi ra sa catyi ra vatyi cua zavaha ra cuhva cuñi ra Ndyoo quívi i zandasi ra Ndyoo cuatyi i zavaha ra quívi cuan.

¹⁰ I cana ra Ndyoo siindo ta i casi ra siindo hermanos vatyi cua cuu ndo ñiyivi cua cuahnu vaha sihin Tuhun ra. Yucuan cuenda nducu xaan ndo cuhva zañaha ndo vatyi ñiyivi sii maa ra cuu siindo sa ndisa cuii. Vatyi tatu zavaha ndo tandihí cuii cuhva ya, ma ndoyo ñuhu ndo nu yozo cuii ca.

¹¹ Ta cua nuña vaha ra Ndyoo andívi quíhví ndo nu ndyaca ñaha ra Jesucristo. Maa ra cuu ra ndyaca ñaha, ta zacacu ra sii yo.

¹² Ta ma zandoi sa zanacohin iñi ndo tandihí cuhva ya vazu sa sito ndo sii si ta sa ndyee xaan iyo ndo sihin sa ndisa sa iyo sii ndo.

¹³ Ta sica ifíi vatyi vaha tatu nii ñi sa ndito que ta zanacohin iñi ndo ta cuhve zuhva tyiño sii ndo.

¹⁴ Sa i zañaha ra Jesucristo, ra ndyaca ñaha sii yo, sii vatyi ña nahá ca ta cua cui.

¹⁵ Zoco nii ñi sa ndite ta tyei tandihí cuhva ya, ta tatu sa sihi zoco cua nacohon iñi maa ndo tandihí cuhva ya ndya vaha ñi cuhva.

*Ñiyivi sa ndyehe cuhva vaha
xaan iyo ra Cristo*

¹⁶ Cuhva i nacatyi ndi sihin ndo sa cuenda tundyee iñi sa iyo sii ra Jesucristo, ra ndyaca ñaha sii yo ta sa cuenda cuhva cua quisi tucu ra, yivi xemvlu sa cahan ñiyivi ñi cuu cuhva cuan. Maa ndi sa sihin nuu ndi i ndyehe ndi vatyi minoo ra cahnu xaqan cuu ra ta zehe ra Ndyoo cuu sii ra.

¹⁷ I ndyehe ndi cuhva i zanduyaqui xaan ra Ndyoo Zutu yo sii ra, ta siñi ndi cuhva i zacahnu xaan sa zuun ñi maa ra Ndyoo sii ra nu i cahan ra sihin ra, ta i catyi ra: "Ihya ra cuu zehi. Cuñi xein sii ra. Zii xaan cuñi sihin ra."

¹⁸ Ta maa ndi siñi ndi nduzu cuan sa quita andivi, ñii ñi sa yugu ndi sihin ra Jesùs xiñi yugu nu i zacahnu xaan ra Ndyoo sii ra.

¹⁹ Ta sa sito ndi vatyi ndisa xaan cuu tuhun i tyaa ra profeta sa cuenda ra Cristo. Vaha tatu tyaa maa ndo yahvi sii si tañi minoo lámpara zandisi nu ñaa ndya quiví cua coo sa ndisi añima ndo vatyi cua cuhva ra Cristo sa cutuñi ca iñi ndo quiví cua quisi ra. Maa ra cuu tañi minoo tiñoo sa caña tatu sa vasi cundisi.

²⁰ Zoco coto vaha ndo vatyi tuhun i tyaa ra profeta, ñahñi numinoo si sa cuu cutuñi vaha iñi yo sa maa ñi maa yo.

²¹ Vatyi ra i tyaa cuhva cuan, ña tyaa ra cuhva cuñi ñi maa ra. Ra i sityiñi ra Ndyoo cuu ra, ta i cahan ra cuhva cahan Tatyi li ra Ndyoo sihin ra.

2

Ra zacuaha sa ña ndisa

¹ I sicoo tucu ra zandavi ñaha sii ñiyivi hebreo ta sa naha. I catyi ra vatyi cahan ra tuhun i saha ra Ndyoo sii ra, zoco ña ndisa ra. Ta cua coo tucu ra zandavi ñaha nu yugu maa ndo. Zuhva zuhva ñi cua zacuaha ra tuhun sa cua zativi sii ñiyivi. Cua cahan ra tuhun ra ndyaca ñaha sii yo, zoco cua zacuaha ra tuhun sa ña ndisa. Tatyi xaan cua

zanaa ra Ndyoo sii ra sa cuenda cuhva ña vaha zacuaha ra.

² Cuaha xaan ñiyivi cua cundyico sii ra, ta cua zavaha ñu cuaha xaan cuatyi sihin coño ñuhu ñu. Ta sa cuenda maa ñu, ta cua cahan ñiyivi ndya vaha ñi sii Tuhun Ndyoo ta sii sa ndisa sa zañaha si.

³ Cuñi ra ña vaha cuan xuhun, ta yucuan cuenda cua zandavi ñaha ra sii maa ndo sihin tuhun sa ña ndisa. Zoco ma cacu maa ra cuan. Cua ndyehe xaan ra tundoho vatyi ndya ta sa naha sa catyi ra Ndyoo yozo caa cua zavaha ra sihin ñiyivi zavaha tacuan. Ñahñi inga ca cuhva sa cuenda maa ra.

⁴ Ná zandasí ra Ndyoo cuatyí ángel quiví i zavaha ra cuatyí. I zavita ra sii ra sisi andaya, ta yucuan i zandoo ra sii ra nuhñi ra sihin cadena nu ñaa. Ndatu ra quiví cua tasi tuñi ra Ndyoo sii ra. ⁵ Ta ñá zandasí ra Ndyoo cuatyí fiyivi i zavaha sa ña vaha ta sa naha. I zacoón ra zavi xaan ziquí ñu, ta i situ ndutya ñuu ñiyivi, ta sii ñi ra Noé i zacacu ra sihin usa tahan ñiyivi sii ra vatyi i nacatyi ra sihin ñiyivi cuhva cuñi si sa zandoo ñu cuatyí ñu.

⁶ Ta i zanaa tucu ra Ndyoo ñuu Sodoma ta ñuu Gomorra. I sahmi ra sii si, ta i nduu si ñiyaa vatyi cuñi ra vatyi cua cuu si sa ndaa nuu ñiyivi cua zavaha sa ña vaha cuee ca vatyi tacuan cua tahan tucu maa ñu. ⁷ Zoco i zacacu ra Ndyoo sii ra Lot ñuu Sodoma cuan vatyi minoo ra vaha i cuu ra Lot, ta ñá cundyee iñi ra ndyehe ra cuhva quiñi xaan zavaha ñiyivi ña vaha cuan. ⁸ Tandihi quiví i sindyaa ra vaha cuan ticui ñiyivi ña vaha cuan, ta uhu xaan cuu añima ra sa ndyehe ra ta sa siñi ra tandihi sa ña vaha i zavaha ñu. ⁹ Ta zuun ñi cuhva cuan, sito maa ra Ndyoo yozo caa cua tyindyee ra sii ñiyivi yuhu sii ra ta zavaha ñu cuhva cuñi maa ra, ta cua zacacu ra sii ñu quiví nducu coto ihñi cuihna sii ñu. Ta cua tyaa ziñ ra sii ñiyivi ña vaha

ndya quiví cua tyicuhva ra sii ñu, ta ziquí cua tasi tuñi ra sii ñu.¹⁰ Ta ñihí ca cua tasi tuñi ra sii ñiyíví catyi vatyi sito ñu sii ra ta zavaha ñu tandihí sa ña vaha sa cuñi maa ñu sihin coño ñuhu ñu, ta ña saha ñu sa cundyaca ñaha ra sii ñu. Zacahnu xaan ñu sii ñu, ta maa ñi sa cuñi maa ñu cuu sa zavaha ñu. Ña yuhu ñu cahan ñu ndya vaha ñi sii ra nahnu ca.

¹¹ Zoco ángel, vazu nahnu ca ra ta iyo ca sa ndyaca ñaha ra, zoco ña caña iñi ángel tyaa ra cuatyí sata ra nahnu ca cuan ta ña cahan ra ndya vaha ñi sii ra ityi nuu ra ndyaca ñaha sii yo.

¹² Zoco ñiyíví sa quehin tuhun, tañi quítí cuu ñu. Ñahñí sa siñi tuñi vaha iyo sii ñu. Ndito ñi maa ñu tañi ndito quítí. Cahan ñu ndya vaha ñi sii sa ña cutuñi iñi ñu. Ta sa cuenda cuatyí ñu, ndaha cua tíví ñu, ta cua coo quiví ta ta sica ñi cua zanaa ra Ndyoo sii ñu.

¹³ Cua ñihí ñu sa tahan si sii ñu sa cuenda sa ña vaha i zavaha ñu. Zii xaan cuñi ñu zavaha ñu sa ña vaha vazu ora. Saha ñu ticalhan nuu, ta zatívi ñu tysiño ra Ndyoo nu sasi ñu sihin ndo nu zacahnu ndo vico. Ñiyíví quiñi caa cuu ñu, ta zandavi ñaha ñu ta zaha ñu tuhun vatyi ñiyíví vaha cuu ñu.

¹⁴ Ta ra quiñi caa cuan, cuñi ra sa tandihí ñu zihí cuzu sihin ra. Ñahñí cuhva sa zandihí ra sa zavaha ra cuatyí. Nducu ra cuhva zandavi ñaha ra sii ñu ña cutuñi vaha iñi ta cuzu ñu sihin ra. Cuñi xaan ra cuaha ca xuhun ta ndaha tysiño. Cua tasi tuñi ra Ndyoo sii ra sa ndisa cuii.

¹⁵ Sa zandoo ra ityi vaha, ta cua naa ra. Ndyico ra cuhva i zavaha ra Balaam zehre Beor vatyi i cuñi xaan ra Balaam cuan xuhun, ta yucuan cuenda i zavaha ra cuhva sa ña tahan iñi ra Ndyoo.

¹⁶ Ta i cahan burro zono ra sihin ra sihin minoo nduzu tañi cahan ñiyíví, ta i cuxaan ti sihin ra, ta i

catyi ti vatyi ma zavaha ca ra cuhva ña tahan iñi ra Ndyoo.

¹⁷ Ra ña vaha sa zacuaha sa ña ndisa cuan, cuu ra tañi zoco sa ñahñí ndutya ñoho, ta cuu ra tañi vico cuahan sihin tatyí. Cua cuhun ra nu ñaa xaan, ta yucuan cua ndoo ra tandihí cuii tyeimvu.

¹⁸ Vatyi zacahnu xaan ra sii ra sihin cuhva cahan ra, ta cuaha tuhun cahan ra sa ñahñí yahvi ndyaa. Ta nu iyo ñiyíví nacaa sino iñi ta cuñi ca ñu zavaha ñu sa ña vaha, tylíhi ra tysiño ta cuñi ra zatívi ndihí ra sii ñu.

¹⁹ Catyi ra cuan vatyi cuu zavaha ñiyíví ñaa sa cuñi maa ñu, ta caca noo nuña ñu catyi ra, zoco zuun ñi maa ra sa cahan cuan, ta minoo muzu cuu ra sii sa ña vaha. Tahan tahan yo cuu yo muzu sii sa ndyaca ñaha sii yo.

²⁰ Ta ñiyíví sa sito sii ra Jesucristo, ra zacacu ta ndyaca ñaha sii yo, ta sa quita ñu sisi sa ña vaha sa iyo ñuu ñiyíví ya, ta ziquí cuee ca ta nandihví tucu ñu ta quisaha zavaha tucu ñu sii sa ña vaha cuan ta ndyaca ñaha si sii ñu. Yaha ca cua cuu ñu ta ziquí sa xihna ñi.

²¹ Vaha ca tatu sa ñá nacoto ñu ityi ndoo ta ziquí sa sito ñu sii si ta zandoo tucu ñu sii ley vaha ra Ndyoo.

²² Ta sa cuenda ñu cuan, quita ndisa cuii minoo cuhva tuhva ñiyíví cahan. Catyi ñu: "Nandusa ina ta ziquí nacasi tucu ti. Ta quiñi nacaa sityi ta cua nandihví tucu ti nu ndyahyu."

3

Cuhva cua quisi tucu ra ndyaca ñaha sii yo

¹ Ihya cuu sa cu uu carta tyei sii ndo, ndoho hermanos. Cuñi xein sii ndo. Nu nduu tahan carte nduqui cuhva zanacohin iñi ndo tandihí tuhun vaha sa sa sito ndo.

² Cuñi si sa nacohon iñi ndo cuhva i cahan ra profeta ta sihin

ley ra ndyaca ñaha sii yo sa i zacuaha nduhvi ra apóstol sii ndo. Ta maa ra ndyaca ñaha sii yo cua zacacu sii yo.

³ Sa xihna ñi cuñi zanacohin iñindo vatyi tatu sa cuñi naa ñuu ñiyivi cua coo ñiyivi cua vacu ndyaa sii Tuhun Ndyoo. Ta cua zavaha ñuñaas ndihí sa ña vaha sa cuñi maa ñu.

⁴ Ta cua catyi ñu: “¿Ñacu yoñi ra Cristo? Ta maa ra i catyi vatyi cua quisi tucu ra. Zoco ndya quivi i sihi ñiyivi sahnu sii yo ta ña zama maa si, ta inuu ñi cuu tandihí si ndya quivi i zavaha ra Ndyoo ñuu ñiyivi.”

⁵ Tacuan cua catyi ñu vatyi cuñi ñu sa naa iñi ñu vatyi i cahan ra Ndyoo ta tyiemvu ta i sino andivi. Ta sihin tuhun cahan ñi ra ta i sino ñuu ñiyivi mahñu tyañuhu ta ndoo tucu zuhva ndutya sa cu yuu nuñuhu.

⁶ Ta zuun ñi sihin ndutya i naa ñuu ñiyivi minoo saha vatyi i situ cuii ndutya ñuu ñiyivi.

⁷ Zoco andivi ta ñuu ñiyivi sa iyo vityi, i catyi tucu ra Ndyoo vatyi cua ndoo si cuhva ndya quivi cua cayu si, quivi cua tyicuhva ra sii ñiyivi, ta cua zanaa ra sii ñiyivi ña sino iñi sii ra.

⁸ Zoco ma naa iñi ndo yañi xaa vatyi sa cuenda ra Ndyoo, inuu ñi cuu minoo ñi quivi ta minoo mil cuiya. Ta minoo mil cuiya cuu si tañi minoo quivi ñi nuu Ndyoo.

⁹ Ma naa iñi ra ndyaca ñaha sii yo cuhva i catyi ra, ta ña cucuee xaan ra tañi sica iñi ñiyivi. Zoco ndyee xaan iñi ra sihin maa yo. Ña cuñi ra sa cunaa numinoo ñiyivi. Cuñi ra vatyi zaña ñu sa zavaha ñu sa ña vaha ta cacu ñu.

¹⁰ Zoco quivi cua quisi tucu ra ndyaca ñaha sii yo, cua saa ra tañi saa minoo ra zuhu sa sa cuaa vatyi ña sito yo ñaa cuhva cua saa ra. Quivi cuan cua naa andivi sihin minoo nduzu ñihi xaan. Cua cayu ñicandyi ta yoo ta tiñoo ta cua naa si,

ta cua cayu ñuu ñiyivi sihin tandihí sa iyo.

¹¹ Cua naa candii cuui sa iyo. Yu-cuan cuenda, jcuñi si sa cuu ndo ñiyivi vaha sa ndisa cuui, ta cuñi xaan ndo sii ra Ndyoo!

¹² Cuatu ndo sii quivi cuan, ta zavaha ndo ñaa cuhva cuu sii minoo minoo ndo, ta cua quisi si yatyi ca. Quivi cuan cua cayu andivi ta fíicandyi ta yoo ta tiñoo, ta cua naa si.

¹³ Zoco maa yo ndatu yo sa cua coo minoo andivi saa ta inga ñuu ñiyivi saa vatyi i catyi ra Ndyoo vatyi cua coo si. Ta ma zavaha ca ñiyivi cuatyi yucuan.

¹⁴ Sa sito ndo ñaa sa cua tahan ñuu ñiyivi ya, yucuan cuenda nducu xaan ndo cuhva sa ñahñi ca cuatyi ndo coo quivi cua quisi tucu ra Cristo, ta cua coo vaha ndo sihin ra Ndyoo.

¹⁵ Ta nacohon iñi ndo vatyi iyo xaan tucahnu iñi sii ra ndyaca ñaha sii yo sihin ñiyivi, yucuan cuenda ndatu ra vatyi cua cuu cacu ñu. Zuun ñi cuhva ndyaa ya i tyaa ra Pablo yañi yo nuu carta i tasi ra sii ndo. Cuñi xaan yo sii ra, ta i tyaa ra sihin sa siñi tuñi i saha ra Ndyoo sii ra.

¹⁶ Ta i cahan tucu ra cuhva ya tandihí nuu carta i tyaa ra. Iyo zuhva si yii xaan cutuñi iñi yo. Ta iyo ñiyivi ña sino vaha iñi ñu ta zama ñu cuhva cahan si tañi zama ñu sii inga parte Tuhun Ndyoo. Ta zuun ñi sii maa ñu zandoyo ñuhu ñu.

¹⁷ Vityi sa zacote tandihí cuhva ya sii ndo cuee ca sa tahan si; yucuan cuenda ndoho yañi xaa zacuenda vaha ndo sii ndo coto zandavi ñaha ñiyivi ña vaha sii ndo, ta cua coo cuatyi ndo, ta ma sino vaha ca iñi ndo.

¹⁸ Nacoto vaha ndo sii ra ndyaca ñaha sii yo. Maa ra Jesucristo cuu ra, ta zacacu ra sii yo. Ta nacoo xaan ca tumañi iñi sa saha maa ra sii yo sihin ndo. jTa nazacahnu xaan yo sii ra vityi ta tandihí cuui

tyiemvu! Ta nacuu si tacuan ta
nacuu si sa ndisa. ta ñicandyi ta yoo
ta tiñoo, ta cua naa si.

Sa Xihna Ñi Carta I Tyaa Maa Ra San Juan

Cuhva cundito ñiyiví tandihí cuii tyiemvu

¹ Ra sa iyo ndya ta xihna ñi quivi nu i sino tandihí cuui sa iyo, siñi maa ndi sa cahan ra quivi i sica noo ndi sihin ra. I ndyehe ndi sii ra sihin siti nuu ndi. I cutuñi iñi ndi sa ndyehe ndi. Ta ndya cuhva ndya i tiin tucu ndi sii ra. Maa ra cuu Tuhun Ndyoo, ta saha ra sa cundito ñiyiví tandihí cuui tyiemvu sihin ra.

² I ndyehe ndi sii ra, ta saha ndi sa ndaa cuenda ra vatyi saha ra sa cundito ñiyiví sihin ra tandihí tyiemvu. I sindyaa ra sihin ra Ndyoo Zutu yo, ta zañaha ra sii ra sii ndi.

³ Ta cuhva sa ndyehe ndi ta sa siñi ndi, zacoto ndi sii maa ndo vatyi ndu-iin tucu maa ndo sihin ndi. Ta cua ndu-iin tandihí yo sihin ra Ndyoo Zutu yo ta sihin ra Jesús zehe ra, ra i zaquisi ra.

⁴ Ta tyaa ndi tuhun ya sii ndo vatyi tatu sito ndo sii si, cua cuzii xaan iñi tandihí yo.

Maa ra Ndyoo cuu ra tañi minoo núhu

⁵ Ihya cuu tuhun i cutuhva ndi sihin maa ra Cristo, ta zacoto ndi sii ndo. Maa ra Ndyoo cuu ra tañi minoo ñúhu, ta ñahñi sa ña vaha (tañi sa ñaa) iyo sii ra.

⁶ Tatu catyi yo vatyi iin ñi cuu yo sihin ra Ndyoo Zutu yo, ta zuun ñi sica noo ca yo nu ñaa, vatyia xaan yo sa tacuan cahan yo. Ña zavaha yo sa ndoo. Ña iin ñi iyo yo sihin ra Ndyoo.

⁷ Zoco tatu maa yo ta sica noo yo nu ndisi ta zavaha yo sa vaha tañi maa ra ndisi xaan ra ta zavaha ra maa ñi sa vaha, tatu tacuan iyo tucu maa yo, iin ñi iyo yo sihin

minoo yo ta sihin inga yo. Ta niñi ra Jesús zehe ra Ndyoo zandasi si tandihí cuui cuatyi yo.

⁸ Tatu catyi maa yo vatyi ñahñi cuatyi yo iyo, zuun ñi sii maa yo zandavi ñaha yo. Ta ñahñi sa ndisa iyo sii yo.

⁹ Zoco tatu nahma yo cuatyi yo, cuu sino iñi yo vatyi cua zaha ra Ndyoo tucahnú iñi sii yo ta cua zandasi ra cuatyi yo. Vatyi maa ñi sa vaha ta sa ndoo zavaha maa ra, ta cua nacatya ra tandihí cuui cuatyi yo.

¹⁰ Zoco tatu catyi yo vatyi ñahñi cuatyi yo, tañi zacuu yo minoo ra vatyia sii ra Ndyoo cuu si (vatyi catyi maa ra vatyi iyo cuatyi yo). Tatu tacuan iyo yo, ña sino ndisa cuui iñi yo Tuhun ra.

2

Ra Cristo cuu ra cua cahan sa cuenda yo

¹ Tyei cuhva ya sii ndoho, zehe ndyihí, vatyi ma zavaha ndo cuatyi. Zoco tatu iyo minoo ndo sa zavaha minoo cuatyi, iyo minoo ra cahan sa cuenda yo nuu ra Ndyoo Zutu yo. Ta ra cahan cuan, Jesucristo nañi ra. Maa maa ñi sa vaha zavaha ra.

² Ta maa ra cuu ra i tyiyahvi sa cuenda cuatyi yo. Ta ña iin ñi sa cuenda cuatyi maa yo. Tyiyahvi tucu ra ndya sa cuenda tandihí cuatyi zavaha tandihí cuui ñiyiví ñuu ñiyiví.

³ Ta tatu tyaa yo yahvi sa cahan ra, sito yo vatyi sito vaha yo sii ra.

⁴ Zoco tatu minoo yo catyi yo: "Nacote sii ra", catyi yo, ta ña tyaa yo yahvi sa cahan ra, minoo ra vatyia cuu yo, ta sa ndisa cuan ñahñi si iyo sii yo.

⁵ Zoco minoo ra zavaha cuhva catyi ra Ndyoo, cuñi xaan ra sii ra Ndyoo sa ndisa cuui. Ta sihin cuhva cuan ta sito yo vatyi iin ñi cuu yo sihin ra Cristo.

⁶ *Tatu catyi minoo ra vatyi sa ndu-iin ra sihin ra Cristo, cuñi si vatyi coo ra cuhva i sico maa ra Cristo.*

Minoor cuhva saa cuñi si zavaha yo

⁷ *Ndoho yañi xaa, yívi minoo tuhun saa sa ndisa cuii cuu sa zacote sii ndo vatyi sa iyo si sihin ndo ndya quívi quisaha sino iñi ndo. Ihya tuhun sahnu cuu tuhun sa siñi ndo sa xihna ñi.*

⁸ *Zoco tañi sa zacote minoo tuhun saa sii ndo cuu si vatyi sa ndusaa si sa ndisa cuii sa cuenda maa ra Cristo ta sa cuenda maa ndo vatyi sa cua ndihí cuhva sica noo ñiyívi nu ñaa, ta vityi sa iyo inga cuhva vatyi vityi zandisi minoo ñúhu sa cuu ñúhu sa ndisa cuii.*

⁹ *Tatu iyo yo catyi yo vatyi ndyaa yo nu ndisi zoco ña cuu ndyehe yo sii hermano yo, sica noo ca yo nu ñaa cuu si cuan.*

¹⁰ *Ra cuñi sii hermano ra, ndyaa ñúhu cuan sihin ra. Ta ñahñi sa cuu zandoyo ñuhu sii ra.*

¹¹ *Zoco ra ña cuu ndyehe sii hermano ra, iyo ra ta sica noo ra nu ñaa. Ta ña sito ra ndya ityi cuahan ra vatyi sa ñaa cuan zacuua si sii ra.*

¹² *Tyei carta ya sii ndo, zehe ndyihí, vatyi sa i zandasi ra Ndyoo cuatyi ndo sa cuenda maa ra Jesucristo.*

¹³ *Ta tyei sii tucu maa ndoho, ra sahnu, vatyi nacoto ndo sii ra Cristo. Sa iyo ra ndya quívi cumañi ca sino ñuu ñiyívi. Ta tyei sii maa ndo, ra yoco, vatyi vazu cuñi cuihna zandavi ñaha ra sii ndo, zoco sa i zahacanaa maa ndo. Tyei carta ya sii maa ndo, zehe ndyihí, vatyi sa sito ndo sii maa ra Ndyoo Zutu yo.*

¹⁴ *Ta tyei sii maa ndo, ra sahnu, vatyi sito ndo sii ra sa iyo ndya quívi cumañi ca sino ñuu ñiyívi. Ta tyei carta ya sii ndoho, ra yoco, vatyi iyo xaan tundyee iñi sii ndo. Ta iyo xaan Tuhun ra Ndyoo sihin ndo, ta yucuan cuenda zahacanaa ndo sii cuihna.*

¹⁵ *Ma ndyiyi iñi ndo ñuu ñiyívi ya ta nu sa iyo ñuu ñiyívi ya. Tatú cuñi xaan ndo sa iyo ihya ñuu ñiyívi ya, ña cuñi ndo sii ra Ndyoo Zutu yo.*

¹⁶ *Vatyi tandihí cuhva sa iyo ñuu ñiyívi ya tucuñun sa ña vaha sa cuñi coño ñuhu yo a sa ndyehe siti nuu yo ta ndyiyi iñi yo sii si a sa zii xaan cuñi yo sihin ndaha tyiño yo ihya ñuu ñiyívi ya, yívi cuenda ra Ndyoo cuu tandihí cuhva ya. Sa cuenda ihya ñi ñuu ñiyívi ya cuu cuhva cuan.*

¹⁷ *Ta cunaa ñuu ñiyívi ya. Ta tandihí sa ndyiyi iñi ñiyívi ihya, cunaa si. Zoco ñiyívi zavaha cuhva cuñi ra Ndyoo, cua cundito ñu tandihí cuii tyiemvu.*

Minoor a cua cahan ndya vaha ñi sii ra Cristo

¹⁸ *Zehe ndyihí, sa cuñi cundihi tyiemvu, ta tañi sa i siñi ndo, vasi ra cua cahan ndya vaha ñi sii ra Cristo. Ta vityi sa iyo cuaha xaan ra zavaha cuhva cuan. Ta sihin cuhva cuan ta sito yo vatyi sa cuñi cundihi tyiemvu.*

¹⁹ *I quita ra zavaha cuhva cuan zuun ñi ticui maa yo vatyi yívi ra tahan yo cuu sii ra sa ndisa cuii. Vatyi tatu ra tahan yo cuu sii ra sa ndisa cuii cua ndoo ra sihin yo. Zoco i quita ra, ta sihin cuhva cuan ndisi xaan ndyehe yo vatyi yívi ñiyívi cuenda maa yo cuu tandihí ra cuan.*

²⁰ *Zoco sii maa ndo sa saha ra Cristo Tatyi Ii ra, ta sa sito ndo Tuhun maa ra sa ndisa cuii.*

²¹ *Ta tyei carta ya sii ndo vatyi sa sito ndo sa ndisa, ta yívi sa cuenda sa vatyi ña sito ndo. Ta sito ndo vatyi ñahñi tuhun vatya quita sisi tuhun ndisa.*

²² *¿Yoo ra cuu ra vatya? Ra catyi vatyi yívi ra Ndyoo i zaquisi sii ra Cristo. Ra cahan tacuan, yucuan ra cuu ra cahan ndya vaha ñi sii ra Cristo. Zaha ra cuan tuhun vatyi yoñi Ndyoo iyo ta yoñi zehe ra.*

²³ *Tandihí cuii ra cahan tuhun sa yoñi zehe Ndyoo iyo, yoñi ra*

Ndyoo Zutu yo a ra Cristo ndyaa sihin ra cuan. Zoco ra catyi sihin ñiyivi vatyi Zehe ra Ndyoo cuu sii ra Cristo, ndyaa tucu maa ra Ndyoo Zutu yo sihin ra cuan.

²⁴ Yucuan cuenda, cucumi vaha xaan ndo tuhun i siñi ndo ndya quivi i quisaha sino iñi ndo. Ta tatu tuhun cuan coo vaha xaan si sihin ndo, tacuan tucu maa ndo cuu coo vaha ndo sihin Zehe ra Ndyoo ta sihin ra Ndyoo Zutu yo.

²⁵ Ta ihya cuu minoo sa vaha xaan sa i catyi ra sihin yo vatyi cua cuhva ra sa cundito yo tandihi cuii tyiemvu.

²⁶ I tyei cuhva ya sii ndo sa cuenda ra cuñi zandavi ñaha sii ndo.

²⁷ Zoco sii maa ndo sa iyo Tatyi Li sa i saha maa ra Jesucristo sii ndo. Ta ña cuñi si yoo ca ra cua zacuaha sii ndo vatyi zuun ñi Tatyi Li cuan cuu sa zacuaha sii ndo tandihi. Ta cuhva sa zacuaha maa ra, maa ñi sa ndisa cuu si, ta yivi sa vatya. Ta tañi sa zacuaha Tatyi Li cuan sii ndo, tacuan cuu cuhva cuñi si vatyi iñin xaan cuu ndo sihin ra Cristo.

²⁸ Ta vityi ndoho, zehe ndyihî, iñin xaan cuu ndo sihin ra Cristo vatyi tatu tacuan zavaha ndo ñahñi maa sa cua yuhu ndo, ta ma cucahan nuu ndo ityi nuu ra quivi quisira.

²⁹ Sa sito ndo vatyi maa maa ñi sa vaha zavaha ra Cristo. Ta cuñi tucu si coto ndo vatyi tandihi cuii ñiyivi zavaha maa ñi sa vaha, zehe ra Ndyoo cuu sii ñu.

3

Ñiyivi sa cuu zeha ra Ndyoo

¹ Nacañi iñi ndo cuhva cuñi xaan maa ra Ndyoo Zutu yo sii yo ndya cuhva ndya nduu yo zehe ra Ndyoo. Zuun ñi yucuan cuu sa cuu maa yo, ta yucuan cuenda ña nacoto ñiyivi ñuu ñiyivi ya sii yo vatyi ña nacoto ñu sii maa ra Ndyoo.

² Ndoho yañi xaa, cuñi xein sii ndo. Vityi sa cuu yo zehe ra Ndyoo,

ta tañaha ca cucasi si cuhva cua cuu yo ityi nuu ca. Zoco sito yo vatyi quivi cua quisira Jesùs inga saha ta cua nduu yo tañi maa ra vatyi cua ndyehe yo sii ra tañi iyo ra sa ndisa.

³ Ta tandihi ñiyivi sa ndatu cuhva cuan, zanduvaha ñu cuhva iyo ñu. Zandoo ñu cuatyi ñu, ta ma zavaha ca ñu sii si. Tañi maa ra Jesùs, ñahñi cuatyi ra.

⁴ Ta tandihi ñiyivi zavaha cuatyi, ña tyaa ñu yahvi cuhva cuñi ra Ndyoo. Vatyi sa zavaha ñu cuatyi, yucuan cuu cuhva ña tyaa ñu yahvi cuhva cuñi ra Ndyoo.

⁵ Ta sa sito ndo vatyi i quisira Jesucristo ñuu ñiyivi ya vatyi cua zanaa ra tandihi cuatyi ñiyivi. Ta ñahñi cuatyi maa ra iyo.

⁶ Yucuan cuenda tandihi ñiyivi sa iyo vaha sihin ra Cristo, ñahñi ca cuatyi zavaha ñu. Zoco ñiyivi sa tuhva zavaha cuatyi, tañaha ca cua ndyehe ñu cuhva iyo ra Cristo, ta tañaha ca nacoto ñu sii ra.

⁷ Zehe ndyihî, ma cuhva ndo sa zandavi ñaha ñiyivi sii ndo. Ñiyivi zavaha sa vaha, yucuan ñu cuu ñiyivi vaha tañi maa ra Jesùs vaha xaan ra.

⁸ Zoco ñiyivi zavaha cuatyi cuu cuenda cuihna. Vatyi cuihna cuu ra zavaha sa ña vaha ndya quivi i quisaha cuatyi. Ta yucuan cuenda i quisira Zehe ra Ndyoo vatyi cua cani ra tyiño cuihna.

⁹ Ta tandihi ñiyivi sa nacacu saa sa cuenda maa ra Ndyoo, ña tuhva ca ñu zavaha cuatyi vatyi ndito ñu sihin tundyee iñi sa saha maa ra Ndyoo sii ñu. Ma cuu ca zavaha ñu sa ña vaha vatyi zehe ra Ndyoo cuu sii ñu.

¹⁰ Sihin cuhva ya zañaha casi si yoo ñiyivi cuu zehe ra Ndyoo ta yoo cuu zehe cuihna vatyi tandihi ñiyivi ña zavaha sa vaha a ña cuñi ñu sii tandihi hermano, yivi cuenda ra Ndyoo cuu sii ñu.

Nacuñi yo sii minoo yo ta sii inga yo

¹¹ Vatyi ihyá cuu tuhun sa siñindo ndya sa xihna cuii fi: Cuñi si vatyi cuñi xaan yo sii minoo yo ta sii inga yo.

¹² Ña tahan si coo yo cuhva i sicoomaar Caín. Cuenda cuhna i sicoora, ta i sahñi ra sii yañi ra. ¿Ta ñaa cuenda i sahñi ra sii yañi ra? I sahñi ra sii ra vatyi maa ñi maa sa ña vaha i zavaha ra, ta i cuxaan ra vatyi maa ñi maa sa vaha i zavaha yañi ra.

¹³ Ma iyo xaan cuñi ndo, hermano, tatu ña cuu ndyehe ñiyivi ñuu ñiyivi ya sii ndo.

¹⁴ Sito yo vatyi sa i yaha yo sisi tuhun nu cua cuu cuii yo, ta sa i saa yo inga cuhva nu cua condito yo. Cuñi xaan yo sii tandihí hermano. Ta cuhva cuan sito yo vatyi ndito ndisa cuii yo ityi nuu ra Ndyoo. Ra sa ña cuñi sii inga hermano, nu ñoho ra sisi tuhun sa cua cuu cuii ra.

¹⁵ Yoo ra ña cuu ndyehe sii inga hermano, minoo ra sahñi cuu ra. Ta sito ndo vatyi yoñi ra sahñi ñiyivi ta ndito añima ra ityi nuu ra Ndyoo. Tañi sa i sihi ndisa cuii ra cuu si.

¹⁶ Ta nacoto yo cuhva cuñi xaan maa ra Ndyoo sii yo vatyi saha maa ra Jesucristo sa cuu ra sa cuenda maa yo. Ta tacuan tucu maa yo, cuñi si vatyi cuñi xaan yo sii inga ñiyivi sino iñi ta vazu cuu yo sa cuenda ñu.

¹⁷ Tatu iyo minoo yo ta iyo tandihí cuii sii yo ta iyo xaan ndaha tyiño yo ta ndyehe yo sii minoo hermano yo vatyi siñi ñuhu xaan si sii ra ta ña cundahvi iñi yo sii ra ta ña tyindyee yo sii ra, ma cuu catyi yo vatyi cuñi xaan yo sii ra Ndyoo tatu ña tyindyee yo sii hermano yo.

¹⁸ Zehe ndyihi, ma cuu cuñi yo sii inga ñiyivi sihin tuhun cahan ñiyo. Nacuñi yo sii ñu sa ndisa cuii, ta nazañaha yo sa cuñi yo sii ñu sihin cuhva vaha zavaha yo sihin ñu.

Cuhva sa ma cuyuhu yo ityi nuu maa ra Ndyoo

¹⁹ Ta sihin cuhva ya, sito yo vatyi ndyico yo sa ndisa, ta cuu zanaa yo cuhva sica xaan iñi yo vatyi sa sito yo vatyi iyo vaha yo ityi nuu maa ra Ndyoo.

²⁰ Ta tatu sica iñi yo vatyi iyo cutayi yo, zoco sito ca maa ra Ndyoo ta ziñi cuhva sica iñi maa yo vatyi sito ra tandihí.

²¹ Ndoho hermanos, cuñi xein sii ndo. Tatu ñahñi maa sa catyi sa siñi tuñi vaha sii yo vatyi iyo cuatayi yo, ma cuyuhu yo ityi nuu maa ra Ndyoo.

²² Ta ñaa ndihí ca sa cua caca yo sii ra, cua ñihi yo sii si vatyi tyaa xaan yo yahvi tuhun ra, ta zavaha yo tandihí sa tahan iñi maa ra.

²³ Ta ihyá cuu tuhun i saha ra sii yo vatyi sino iñi yo sii ra Jesucristo vatyi zehe ra Ndyoo cuu sii ra ta zacacu ra sii yo. Ta cuñi si vatyi cuñi xaan yo sii minoo yo ta sii inga yo cuhva i catyi maa ra Cristo sihin yo.

²⁴ Ta ñiyivi sa tyaa xaan yahvi tuhun cahan ra Ndyoo, iyo ñu sihin ra Ndyoo, ta maa ra Ndyoo ndyaa sisi añima ñu cuan. Ta sito yo vatyi ndyaa maa ra Ndyoo sisi añima yo vatyi saha maa ra Tatyi Ii ra sii yo.

4

Ihya cahan si cuenda Tatyi Ii maa ra Ndyoo ta cuenda tatyi cuihna sa cahan ndya vaha ñi sii ra Cristo

¹ Ndoho ra sa cuñi xein, ma sino iñi ndo yoo ñi maa ñiyivi catyi vatyi cahan ñu sa cuenda maa ra Ndyoo. Cuñi si vatyi nducu coto vaha ndo sii ñu, ta cua coto ndo tatu Tatyi Ii maa ra Ndyoo cuu sa iyo sihin ñu a yivi. Vatyi sa cuaha xaan ra vatyta quita coyo nacahnu ñuu ñiyivi, ta catyi ra vatyi cahan ra sa cuenda maa ra Ndyoo.

² Ihya cuu cuhva cuu nacoto ndo tatu cahan ñiyivi sa cuenda Tatyi

Ii maa ra Ndyoo a yivi. Tatu catyi ñu vatyi i quisi maa ra Jesucristo, ta i nduu ra ñiyivi sa ndisa cuii, ta sihi ra sa cuenda maa yo, iyo Tatyi Ii maa ra Ndyoo sihin ñu tatu sino ndisa cuii iñi ñu cuhva cuan.

³ Zoco ñiyivi ña sito sii ra Jesús cuhva cuan, ñahñi Tatyi Ii maa ra Ndyoo iyo sihin ñu. Tatyi cuhnha cuu sa iyo sihin ñu, tatyi sa cahan ndya vaha ñi sii ra Cristo. Ta sa sito maa ndo vatyi tahan si quisi tatyi ña vaha cuan, ta vityi sa iyo si ihya ñuu ñiyivi.

⁴ Maa ndo cuu ñiyivi cuenda maa ra Ndyoo, zehe ndyihi, ta sa zahacanaa ndo sii ñiyivi cahan tuhun vatya cuan vatyi Tatyi Ii maa ra Ndyoo sa iyo sihin maa ndo, iyo xaan ca tundyee iñi sii si cuan ta ziqui tatyi cuhnha sa iyo sihin ñiyivi ityi sata.

⁵ Maa ñu cuu cuenda ñuu ñiyivi ya. Ta yucuan cuenda cahan ñu sa cuenda sa iyo ñuu ñiyivi ya. Ta inga ñiyivi sa cuu cuenda ñuu ñiyivi ya, tyizoho ñu sa cahan ñu.

⁶ Zoco maa yo cuu cuenda ra Ndyoo. Ta ñiyivi sa sito sii ra Ndyoo, tyizoho ñu sa cahan maa yo, zoco ñiyivi sa yivi cuenda ra Ndyoo, ma tyizoho ñu sa cahan yo. Ta sihin cuhva ya ta cuu nacoto yo yoo cuu ñiyivi sa iyo Tatyi Ii maa ra Ndyoo sihin ñu ta yoo cuu ñiyivi sa iyo tatyi cuhnha sa zandavi ñaha.

Cuñi xaan maa ra Ndyoo sii ñiyivi

⁷ Ndoho hermanos, nacuñi xaan yo sii minoo yo ta sii inga yo vatyi sa cuenda maa ra Ndyoo cuu cuhva cuan. Tandihí ñiyivi sa cuñi xaan sii inga ñiyivi, yucuan cuu ñu sa cuu zehe ra Ndyoo, ta sito ñu sii ra.

⁸ Ra sa ña cuñi sii ñiyivi, ña sito ra sii maa ra Ndyoo vatyi maa ra Ndyoo cuñi xaan ra sii ñiyivi.

⁹ Ihya cuu cuhva i zañaha maa ra Ndyoo cuhva cuñi xaan ra sii yo vatyi i zaquisira sii sa minoo tuhun ñi ra cuu zehe ra. I zaquisira sii

ra ñuu ñiyivi vatyi cua cuu cundito yo tandihí cuii tyiemvu sa cuenda maa ra.

¹⁰ Ta ihya cuu cuhva i cuñi xaan maa ra Ndyoo sii yo. Yivi maa yo i cuñi sii maa ra Ndyoo. Maa ra i cuñi sii yo sa xihna ñi. Ta i zaquisira sii zehe ra vatyi cua cuu ra sa cuenda cuatyi yo.

¹¹ Tacuan cuu cuhva sa cuñi xaan maa ra Ndyoo sii yo, ndoho hermanos. Ta cuñi si vatyi cuñi tucu maa yo sii minoo yo ta sii inga yo.

¹² Yoñi maa sa ndyehe sii ra Ndyoo numinoo saha, zoco tatu cuñi xaan maa yo sii minoo yo ta sii inga yo, iyo maa ra Ndyoo sisi añima yo. Ta vaha xaan cuu cuhva sa cuñi yo sii ñu, tañi cuñi maa ra Ndyoo sii ñu.

¹³ Ihya cuhva cuu coto yo vatyi ñin ñi iyo yo sihin maa ra Ndyoo, ta ñin ñi iyo tucu maa ra sihin yo vatyi saha maa ra Tatyi Ii ra sii yo.

¹⁴ Ta maa ndi sa ndyehe ndi ta saha ndi sa ndaa vatyi i zaquisira maa ra Ndyoo Zutu yo sii zehe ra vatyi cua zacacu ra sii ñiyivi ñuu ñiyivi.

¹⁵ Tandihí ñiyivi sa cua catyi sihin inga ñiyivi vatyi ra Jesús cuu zehe ra Ndyoo, ñin xaan cuu ñu sihin ra Ndyoo, ta maa ra Ndyoo iyo sisi añima ñu.

¹⁶ Ta vityi sa sito yo ta sino iñi yo vatyi cuñi xaan maa ra Ndyoo sii yo. Cuñi xaan ra Ndyoo sii ñiyivi, ta tatu cuñi xaan maa yo sii maa ra Ndyoo ta sii ñiyivi, sa ndu-ñin yo sihin ra Ndyoo. Ta iyo ra sisi añima yo.

¹⁷ Ihya cuhva cuahan nduvaha ca cuhva cuñi xaan maa yo sii ra Ndyoo, ta sihin cuhva ya ta ma yuhu yo quivi cua zanahma ra Ndyoo sii ñiyivi vatyi cuhva iyo maa ra Jesucristo ta tacuan tucu iyo maa yo ñuu ñiyivi ya.

¹⁸ Tatu cuñi xaan yo sii maa ra Ndyoo sa ndisa cuii, ma yuhu yo sii ra. Sihin sa cuñi xaan yo sii

ra Ndyoo ta tyaa siyo si sa yuhu yo. Vatyi tatu yuhu yo, yuhu yo coto ndoho yo zacuu ra Ndyoo sa cuenda cuatyi yo. Yucuan cuenda tatu yuhu xaan yo, cuñi si catyi si vatyi ña cuñi vaha yo sii maa ra Ndyoo sa ndisa cuii.

¹⁹Cuñi xaan yo sii ra Ndyoo vatyi xihna ca maa ra i cuñi xaan ra sii yo.

²⁰Tatu catyi minoo yo: "Yuhvi cuñi xein sii maa ra Ndyoo", catyi yo. Zoco ña cuu ndyehe yo sii minoo hermano. Sa nduu yo minoo ra vatyia sihin cuhva cuan. Ña ndisa yo sa catyi yo vatyi cuñi xaan yo sii ra Ndyoo vatyi tatu ña cuñi yo sii hermano yo ta ndyehe yo sii ra ihyá ñuu ñiyiví ya ¿yozo caa cua cuu cuñi yo sii maa ra Ndyoo ta ña ndyehe yo sii ra?

²¹Ihya cuu tuhun sa i saha ra Ndyoo sii yo: Tatú cuñi xaan yo sii maa ra Ndyoo, cuñi si vatyi cuñi xaan tucu yo sii hermano yo.

5

Cuhva zahacanaaa yo ziqui cuhva ña vaha sa iyo ñuu ñiyiví ya

¹Tandihi ñiyiví sa sino iñi vatyi i nduu ra Jesús ñiyiví ta i sihi ra sa cuenda maa yo, ñiyiví sa sino iñi cuhva cuan, yucuan ñu cuu zehe maa ra Ndyoo. Ta ñiyiví sa cuñi sii maa ra Ndyoo Zutu yo, cuñi tucu ñu sii tandihi ñiyiví sa sino iñi sii ra vatyi zehe ra Ndyoo cuu sii ñu.

²Ihya cuu cuhva sito yo vatyi cuñi yo sii tandihi zehe ra Ndyoo vatyi cuñi yo sii maa ra Ndyoo ta tyaa yo yahvi tuhun cahan ra.

³Vatyi cuhva cuñi yo sii maa ra Ndyoo sa ndisa cuii cuu sa tyaa yo yahvi tandihi sa catyi ra. Ta ña yíi xaan sa tyaa yo yahvi tuhun cahan ra.

⁴Vatyi tandihi ñiyiví sa cuu zehe maa ra Ndyoo, zahacanaaa ñu ziqui cuhva ña vaha sa iyo ñuu ñiyiví ya, ta zavaha ñu cuhva cuñi maa ra

Ndyoo. Ta ihyá cuu cuhva zahacanaaa yo ziqui cuhva ña vaha sa iyo ñuu ñiyiví ya, sihin sa nii xaan iñi yo sii ra Jesús.

⁵Maa ñi ñiyiví sa nii xaan iñi vatyi ra Jesús cuu zehe ra Ndyoo, yucuan cuu ñu sa zahacanaaa ziqui cuhva ña vaha sa iyo ñuu ñiyiví ya, ta ñihi ñu cuhva zavaha ñu cuhva cuñi ra Ndyoo.

Sa ndaa sa cuenda Zehe ra Ndyoo

⁶I tava ra Ndyoo tyiño sii ra Jesucristo, ta i quisi ra, ta i yaha ra sihin ndutya, ta i yaha ra sihin niñi; ña iin ñi sihin ndutya zoco ndutya ta niñi. Ta zuun ñi Tatyi Ii maa ra Ndyoo cuu sa saha sa ndaa cuhva cuan, ta maa maa ñi sa ndisa nacatyi ra.

⁷Ta iyo uñi tahan ra saha sa ndaa ityi ziqui: ra Ndyoo Zutu yo, ra cuu Tuhun Ndyoo, ta Tatyi Ii. Ta iin ñi cuu sa uñi tahan ra.

⁸Ta iyo uñi tahan sa ndaa ñuu ñiyiví: Tatyi Ii, ta ndutya, ta niñi. Ta iin ñi cuhva nacatyi tandihi uñi tahan si.

⁹Sino iñi yo sa ndaa sa saha ñiyiví, zoco cahnu xaan ca cuu sa ndaa sa saha maa ra Ndyoo vatyi sa ndaa cuu si sa zuun ñi maa ra Ndyoo saha sa cuenda Zehe ra.

¹⁰Ra sa sino iñi sii Zehe ra Ndyoo, zuun ñi sisi añima ra iyo sa ndaa. Ra sa ña sino iñi sa catyi ra Ndyoo, zacuu ra tañi minoo ra vatyia sii maa ra Ndyoo vatyi ña sino iñi ra sa ndaa sa saha maa ra Ndyoo sa cuenda Zehe ra.

¹¹Ta ihyá cuu sa ndaa cuan. I saha maa ra Ndyoo sa cundito yo tandihi cuii tyiemvu. Ta ñihi yo cuhva cuan sa cuenda Zehe ra.

¹²Ra sa ndu-iin sihin Zehe ra Ndyoo, sa ndu-iin ra sihin cuhva cua cundito ra. Zoco ra ña ndu-iin sihin Zehe ra Ndyoo tañaha ca cua ñihi ra cuhva cua cundito ra tandihi tyiemvu.

Nu ndihi cahan ra Juan ta saha xaan ra tyiño

13 I tyei tandihí cuhva ya sii ndoho sa sino iñi sii Zehe ra Ndyoo vatyi coto ndo vatyi sa ndito añima ndo. Ta cua cundito ndo tandihí cuii tyiemvu.

14 Ta vityi ñahñi maa sa yuhu yo ityi nuu maa ra Ndyoo, ta sito yo vatyi ñaa ndihí ca sa caca yo sii ra, tyizoho ra sa cahan yo tatu caca yo minoo cuhva cuñi maa ra.

15 Ta tañi sa sito yo vatyi tyizoho ra Ndyoo sa cahan yo, ñaa sa caca yo sii ra. Sito tucu yo vatyi cua ñihi yo tandihí cuii sa sica yo sii ra.

16 Tatu ndyehe yo sii minoo hermano vatyi zavaha ra cuatyí zoco tañaha ca cua quihin ra ityi andyaya sa ndisa cuii, cuñi si vatyi cahan yo sihin ra Ndyoo sa cuenda ra, ta cua zandasi ra Ndyoo cuatyí ra, tatu tañaha ca quihin ra ityi andyaya sa ndisa cuii. Zoco iyo tucu cuatyí ñiyivi sa ma zandasi maa ra Ndyoo, ta ña catyi vatyi cahan ca ndo sihin ra Ndyoo sa cuenda ñiyivi zavaha cuatyí cuan.

17 Tandihí cuii sa ña vaha sa zavaha yo, cuatyí cuu si. Zoco iyo cuatyí zavaha ñiyivi ta cua zaha ra Ndyoo tucahnu iñi sii ñu tatu nandaca ñu tucahnu iñi sii ra, ta ma cuhun ñu andyaya.

18 Sito yo vatyi tandihí ñiyivi sa cuu zehe ra Ndyoo, ña zavaha ca ñu cuatyí vatyi zacuenda maa Zehe ra Ndyoo sii ñu. Ta ñahñi sa cuu zacuu cuihna sihin ñu.

19 Ta sito yo vatyi maa yo cuu zehe ra Ndyoo, ta ndyaca ñaha cuihna sii tandihí cuii ñiyivi sa iyo cuenda ñuu ñiyivi ya.

20 Ta sito yo vatyi sa i quisí Zehe ra Ndyoo. Ta sito yo vatyi i saha ra minoo sa siñi tuñi vaha sii yo vatyi coto yo sii ra cuu Ndyoo sa ndisa cuii. Ta iñi ñi iyo yo sihin ra sa cuenda Zehe ra, ra Jesucristo. Ihya cuu maa ra cuu Ndyoo sa ndisa cuii, ta ihya cuu cuhva cundito yo tandihí cuii tyiemvu.

21 Zehe ndyihi, zacuenda ndo sii ndo, ta coto ñáha zacahnu ndo sii inga ndyoo.

Sa Cu Uu Carta I Tyaa Maa Ra San Juan

*Tasi ra Juan minoo nacumi sii
ñiyivi sino iñi Tuhun Ndyoo*

¹ Yuhvi ra sahnu tyei carta ya suun, hermana. Sa i casi maa ra Ndyoo suun ta sii tandih*i* zehun. Sa ndisa cuii vatyi cuñi xein sii tandih*i* ndo. Ta tacuan tucu tandih*i* ñiyivi sa sito sa ndisa ta cuñi xaan ñu sii ndo.

² Cuñi ndi sii ndo sa cuenda sa ndisa sa iyo añima yo. Ta tandih*i* cuii tyiemvu cua coo si sihin yo.

³ Cuñi sa cua cuhva xaan maa ra Ndyoo Zutu yo sa vaha sii ndo, ta nacuhva xaan ra tumañi iñi sii ndo, ta natyindyee ra sii ndo ta cua coo sa taxi ñi sii ndo sihin ra ta sihin ñiyivi. Ta tacuan tucu nacuhva maa ra Jesucristo tandih*i* cuhva cuan sii ndo vatyi Zehe Ndyoo cuu sii ra. Nacuhva ra sii si vatyi sino iñi ndo sii ra sa ndisa cuii ta cuñi xaan ndo sii inga ñiyivi.

*Coto ñáha cuiñi siyo ndo sii sa
ndisa sa iyo cuenda ra Jesucristo*

⁴ Zii xaan cuñi vatyi sa ñihi tyiño sa cuenda zuhva zehun vatyi vaha xaan ndyico ñu sii sa ndisa, cuhva saha maa ra Ndyoo Zutu yo tuhun ra sii yo.

⁵ Ta vityi ñihi xaan sique suun hermana vatyi nacuñi yo sii tahan yo. Ta yivi minoo tuhun saa cuu sa zacote sii ndo vityi. Zuun ñi si cuu si sa iyo sihin yo ndya quívi i quisaha sino iñi yo.

⁶ Ta cuhva cuñi yo sii tahan yo ta sii maa ra Ndyoo sa ndisa cuu si tatu coo yo cuhva saha ra tuhun ra sii yo. Ta tañi sa i siñi ndo ndya sa xihna cuii ñi, ihya cuu tuhun i saha ra sii yo sa vatyi nacuñi yo sii tahan yo.

Ra zandavi ñaha

⁷ Sa cuaha xaan ra zandavi ñaha sica noo ñuu ñiyivi ya. Ta catyi ra

cuan vatyi ñá nduu ra Jesucristo minoo ñiyivi sa ndisa cuii quívi i quisi ra ihya ñuu ñiyivi. Ñiyivi zacuaha cuhva cuan cuu cuenda ra zandavi ñaha. Yivi cuenda ra Cristo cuu ñu vatyi cahan ñu ndya vaha ñi ziqui ra Cristo.

⁸ Zazuenda xaan ndo sii ndo sa ma ndoyo ñuhu tyiño ndo vatyi tacuan ta cua ñihi ndo tandih*i* sa vaha sa cuñi ra Ndyoo cuhva ra sii ndo.

⁹ Ñiyivi ña cuñi zacuaha cuhva vaha tañi zacuaha ra Cristo ta quita ñu ityi ndisa ta nazaca ñu inga tuhun sihin si, ña iñi iyo ñu sihin ra Ndyoo. Zoco ñiyivi zacuaha maa ñi cuhva zacuaha ra Cristo, iñi ñi cuu ñu sihin ra Ndyoo Zutu yo ta sihin Zehe ra.

¹⁰ Tatu saa minoo ra nu yulu ndo ta ña zacuaha ra cuhva zacuaha ra Cristo, ma cuhva ndo sa ndoo ra vehe ndo ta nu ma catyi ndo nacumi suun tatu saa ra.

¹¹ Vatyi tatu saha yo nacumi sii ra, cuu si tañi zatyiño yo cuhva ña vaha tañi zatyiño maa ra cuan.

*Nu ndih*i* cahan ra Juan*

¹² Iyo cuaha xaan sa cuñi catyi sihin ndo, zoco ña cuñi tyei sii si nuu tutu vatyi cuñi quisi nu yulu ndo. Cuñi ndyehi sii ndo ta natuhin sihin ndo vatyi tacuan ta zii xaan cuu cuñi tandih*i* yo.

¹³ Zehe cuhun tasi ñu minoo nacumi suun. I casi tucu maa ra Ndyoo sii cuhun.

Sa Cu Uñi Carta I Tyaa Maa Ra San Juan

*Saha ra minoo nacumi sii ra
Gayo*

¹ Yuhvi ra sahnu tyei carta ya suun, yoho Gayo. Sa ndisa cuui vatyi cuñi suun.

² Hermano, sica xein tumañi iñi sii maa ra Ndyoo vatyi naquita vaha tandihí cuii tyifon ta nacco vaha xoon tañi sa sino vaha xaan iñun.

³ Zii xaan i cuñi quiví i quasi zuhva ra hermano vatyi i nacatyi ra sihin, cuhva zavohon tandihí cuhva catyi Tuhun Ndyoo. Ta catyi ra vatyi vaha xaan iyón sihin tandihí cuii cuhva catyi tuhun ndisa.

⁴ Tatú ñihi tuhun vatyi ndyico zehe luhli tandihí cuii cuhva catyi tuhun ndisa, yaha xaan zii cuñi.

⁵ Hermano, vaha xaan cuhva zavohon cuhva catyi Tuhun Ndyoo tatu tyindyeun sii inga hermano ta ra cahan Tuhun Ndyoo, ra quasi inga ñuu.

⁶ Saha ra hermano cuan sa ndaa ityi nuu tandihí ca hermano sa cuenda cuhva i cuñi xoon sii ra. Sa ndyoo ñi tyindyee con sii ra sihin minoo cuhva sa tahan iñi maa ra Ndyoo vatyi tacuan ta cua cuu cuhun ca ra ityi nuu nu cuahan ra.

⁷ Vatyi i quita ra cuan ñuu ra sa cuenda tyiño maa ra Jesús. Ta ña saha ra sa tyindyeet ñiyiví ña sito sii ra Ndyoo sii ra sihin xuhun.

⁸ Yucuan cuenda cuñi si sa ñihi xaan tyindyee maa yo sii ra sihin xuhun a ñaa sa cumañi sii ra vatyi tacuan ta zatiyoñi tuco maa yo sihin ra nu nacatyi ra tuhun ndisa.

*Cuhva ña vaha sa zavaha ra
Diótrefes*

⁹ Sa tasi minoo carta sii tandihí ñiyiví sino iñi. Zoco cuñi xaan ra

Diótrefes cuu ra ra cu nuu, ta ña saha ra sa cundyaca ñehi.

¹⁰ Yucuan cuenda tatu quisí nu yucu ndo cua zacote sii ñiyiví cuhva zacuu ra vatyi cahan ra ndya vaha ñi sii ndi, ta vatya tuco ra. Ta yiví sa yucuan ñi, zoco inga cuhva tuco vatyi ña tiñ cuenda vaha ra sii ra hermano saa coyo nu yucu ndo. Ta tatu cuñi inga hermano tiñ cuenda ra sii ra saa coyo cuan, ña saha ra Diótrefes, ta tava ndyizo ra sii ra cuñi tiñ cuenda sii ra saa coyo yucuan.

¹¹ Hermano, ma cundyicon nu-minoo cuhva ña vaha. Maa ñi cuhva vaha cundyicon. Ñiyiví zavaha sa vaha, yucuan ñu cuu cuenda ra Ndyoo. Zoco ñiyiví zavaha sa ña vaha, ña sito ñu cuan sii maa ra Ndyoo.

*Cuhva vaha xaan sa zañaha ra
Demetrio*

¹² Vaha cahan tandihí cuii ñiyiví sa cuenda maa ra Demetrio. Ta zuun ñi sa ndisa sa ndyico ra, zacoto si sii yo vatyi vaha ra. Ta maa tuco ndi catyi ndi vatyi vaha xaan ñiyiví cuu ra, ta sito ndo vatyi cahan ndi sa ndisa.

Nu ndihí cahan ra Juan

¹³ Iyo cuaha xaan ca sa cuñi catyi suhun, zoco ña cuñi tyei sii si.

¹⁴ Vatyi ña naha ca ta cua ndyehi suun cuñi, ta cua cuu natuhun vaha maa ñi maa yo.

¹⁵ Nacuhva ca ra Ndyoo vatyi coo ca sa taxi ñi suun sihin ra ta sihin ñiyiví. Tandihí ra amigun ihyá tasi ra minoo sa nacumi suun. Sa ndyoo ñi cuhvon minoo nacumi sii sa minoo minoo amigo mi yucuan.

Carta Sa I Tyaa Ra San Judas

Tyaa ra Judas minoo carta sii ñiyivi i casi ra Ndyoo

¹ Yuhvi ra Judas cui minoo muzu ra Jesucristo. Ta yañi ra Jacobo cuu sii. Tyei carta ya sii ñiyivi i casi ra Ndyoo Zutu yo. Sa zama ra cuhva iyo ndo vatyi cuenda maa ra cuu sii ndo. Ta zacuenda ra Jesucristo sii ndo.

² Cuñi sa cua cundahvi xaan iñi maa ra Ndyoo sii ndo. Nacuhva ra sa coo sa taxi ñi sii ndo sihin ra, ta nacuñi xaan ca maa ra sii ndo.

Ra zacuaha sa vatya

³ Ndoho amigo, cuñi xein sii ndo. I cuñi xein tyei minoo carta sii ndo cuhva cacu añima yo. Zoco vityi zañiñi ca si sii, sa tyei minoo carta sii ndo ta zañiñi sii ndo vatyi nducu xaan ndo cuhva, cuhva sino iñi ñiyivi tuhun ndisa sa ndyico yo. Yucuan cuu tyiño i zandoo maa ra Ndyoo sii maa yo sa cuu yo ñiyivi ra.

⁴ Catyi cuhva ya vatyi sa i quíhví zuhva ra zandavi ñaha ticui maa ndo. Catyi ra cuan vatyi saha xaan ra Ndyoo tumañi iñi sii yo ta cuu zacuu yo ñaa ñi maa sa cuñi maa yo ta ma tasi tuñi ra Ndyoo sii yo, catyi ra cuan. Sa naña xaan ndyaa si nuu tutu cuhva cua ndoho ñiyivi cuan vatyi sa nanuhu sata ñu, ta ña zacahnu ca ñu sii ra Ndyoo. Minoo tuhun ñi maa ra ndyaca ñaha sii yo, ta tacuan tucu ra Jesucristo.

⁵ Sa sito maa ndo yozo caa iyo si, zoco cuñi zanacohin iñi ndo cuhva i zacacu ra Ndyoo sii ñiyivi hebreo ndya ñuu Egipto, zoco sa yaha cuan ta ziqui i zanaa ra sii ñiyivi ñá sino iñi sii ra ticui ñiyivi sa i zacacu ra.

⁶ Ta ángel tucu, i cuu ra ra ii xaan, ta ñahñi cuatyi ra. Zoco sa nanuhu sata zuhva ra, ta i zandoo ra cuhva vaha sa i zavaha ra. Ta vityi nuhñi

ra sihin cadena zacuu ra Ndyoo minoo nu ñaa xaan. Ndatu ra quiví cahnu sa cua tasi tuñi ra Ndyoo sii ra.

⁷ Ta zuun ñi cuhva, ñuu Sodoma ta ñuu Gomorra ta inga tucu ñuu yatyi ñi, i zavaha tucu ñiyivi cuan sa ña vaha. I quixi rayii sihin ziñi ziñi ñaha. Ta iyo tucu ra quixi ra sihin inga rayii. Ta ndya vityi ta sito yo vatyi yaha xaan cuhva ña vaha i zavaha ñiyivi ñuu cuan. Ta zacoto si sii yo vatyi iyo minoo nu cua ndoho ñu sisi ñúhu sa ma ñdahva ca.

⁸ Zoco vazu sa sito ñiyivi cuhva cuan, zoco ra sa ñoho sihin maa ndo cuu ra tañi ra quixi ta ndyehe ra ñimahna vatyi zavaha ra tandihí nuu sa ña vaha sihin coño ñuhu ra, ta ña yuhu ra sii ra Ndyoo. Ña saha ra cundyaca ñaha ra tahan si cundyaca ñaha sii ra. Ta cahan ra ndya vaha ñi sii ángel ta sii inga ra nahnu ca.

⁹ Zoco zuun ñi ra ángel cahnu sa nañi Miguel quiví i tusi tahan ra tuhun sihin cuíhna sa cuenda coño ñuhu ra Moisés, ñá caña iñi ra Miguel cahan ra ndya vaha ñi sihin cuíhna. Ihya ñi tuhun i cahan ra: “Nacuxaan maa ra Ndyoo suhun.” Catyi ra.

¹⁰ Zoco ra sa ñoho sihin maa ndo caña iñi ra cahan ra ndya vaha ñi ziqui tandihí vazu ñahñi maa sa sito ra sa cuenda si. Cuhva sa nacoto maa ra, nacoto ra tañi nacoto quití vatyi ña nacañi iñi ra tatu vaha si a ña vaha si. Zavaha ra sa ña vaha, ta zuun ñi sii maa ra zatívi si.

¹¹ ¡Ndahvi ra cuan! vatyi zavaha ra cuatyi nuu ra Ndyoo tañi i zavaha maa ra Caín. Ta sa cuenda sa cuñi xaan ra xuhun ta i quita ra ityi vaha tañi zavaha ra Balaam. Ta tañi ra Coré quiví ñá tyaa ra yahvi sii ra ndyaca ñaha, ta tacuan tucu ra ya, zatívi xaan ra zuun ñi sii maa ra.

¹² Cuu ra tañi minoo ra quiñi xaan caa nu titahan ndo cua casi ndo ta zacahnu ndo minoo vico sihin tandihí ra hermano. Vatyi ra cuan, sasi ra, sihi ra, ta ziñi xaan cuñi

ra. Ña cahan nuu ra, ta ña sica iñi ra sa cuenda inga hermano. Maa ñi sa cuenda maa ra sica iñi ra. Cuu ra tañi minoo vico sa cuahan sihin tatyi ta ñahñi zavi coon. Cuu ra tañi yutu sa ñahñi siti saha quivi tahan si cuhva tu. Sa sihi ra, ta yivi sa minoo tuhun ñi saha. Sa uu saha sihi ra tañi sihi minoo yutu i quita ndya yoho.

13 Yaha xaan, yaha xaan cuhva zavaha ra, ta saha ra sa cahan nuu. Cuu ra tañi tyauhu tatu yaha xaan coon zavi. Ndaa noo tyauhu, ta cuxi xaan caa tiñi nuu nduty. Tañi tiñi cuxi caa cuan, tacuan iyo sa zavaha ra. Cuu ra tañi tiñoo sa cua naa vatyi cua cuhun ra nu ñaa xaan. Yucuan cua ndoo ra tandihí cuii tyiemvu.

14 Ra Enoc i cuu minoo ñiyivi ra Adán ta tyiemvu, ta i cahan ra Tuhun i saha ra Ndyoo sii ra. Ta i cahan ra sa cuenda ñiyivi ñia vaha ya, ta catyi ra: "I ndyehi sii ra ndyaca ñaha. Vasi ra sihin cuaha xaan cuaha xaan ángel ra

15 vatyi cua tasi tuñi ra sii tandihí ñiyivi, ta cua catyi ra cuhva cua ndoho ñiyivi zavaha sa ña vaha. Cua ndoho ñu sa cuenda sa ña vaha sa zavaha ñu ta sa cuenda tandihí cuii tuhun ndya vaha ñi sa i cahan ñu sii ra Ndyoo."

16 Ñahñi minoo tuhun vaha cahan ñu. Cahan ñu ndya vaha ñi sii inga ñiyivi. Nanducu xaan ñu maa maa ñi sa cuñi maa ñu ta cuhva cuzii iñi ñu. Zacañu xaan ñu sii ñu sihin cuhva cahan ñu. Ta tatu cahan vaha ñu sihin minoo ñiyivi, zavaha ñu tacuan vatyi iyo minoo sa cuñi ñu ñihi ñu sihin ñu cuan.

Nacatyi ra cuhva cua zavaha ñiyivi sa sino iñi Tuhun Ndyoo sa ndisa cuii

17 Zoco ndoho hermanos, nacohon iñi ndo tuhun i cahan ra apóstol ra Jesús ta quivi cuan

18 vatyi i nacatyi ra cuhva cua coo si nu sa cua ndihí tyiemvu. Catyi ra vatyi nu sa cua ndihí tyiemvu cua coo cuaha xaan ñiyivi

sa cua vacu ndyaa sii Tuhun Ndyoo. Minoo cuhva ndya vaha ñi cua coo ñu, cuhva cuñi maa ñu.

19 Yucuan cuu ñiyivi cua quiti cuateyi sii hermano. Tyaa xaan ñu yahvi sii sa cuñi coño ñuhu ñu. Ta ñahñi maa Tatyi li maa ra Ndyoo iyo sihin ñu.

20 Zoco ndoho hermanos, tyindyeo ndo sii minoo ndo ta sii inga ndo vatyi tacuan ta ndoo xaan cua cuu tandihí ndo sihin cuhva sino iñi ndo. Cahan ndo sihin ra Ndyoo sihin cuhva sa saha Tatyi li maa ra sii ndo.

21 Cuñi xaan maa ra Ndyoo sii ndo. Ñáha quita ndo ityi vaha sa ndyico ndo ta zavaha ndo sa ña vaha, ta ma cuñi ca ra Ndyoo sii ndo. Zoco cuatu vaha ndo quivi sa cua cuhva ra Jesucristo sa cundito yo tandihí cuii tyiemvu. Tacuan cua zavaha ra vatyi cundahvi xaan iñi ra sii yo.

22 Cahan vaha xaan ndo sihin ñiyivi cumañi sino vaha iñi, ta zasino vaha xaan ndo iñi ñu.

23 Tyindyeo ndo sii ñiyivi ta cuhva cacu ñu. Tavon sii ñu nu cayu ñuhu. Ta cundahvi iñi ndo sii inga ñiyivi, zoco zacuenda ndo sii ndo vatyi ndya zahma ñu ta ña vaha si sa cuenda cuatyi sa zavaha ñu sihin coño ñuhu ñu. Yuhu ndo coto zavaha tucu ndo tacuan.

Zacañu ra sii ra Ndyoo, ta i ndihí cahan ra

24-25 Ta sa minoo tuhun ñi ra cuu Ndyoo sa ndisa, cuaha xaan sa siñi tuñi iyo sii ra. Ta maa ra cuu ra zacacu sii yo. Iyo xaan cuhva sii ra sa zacuenda ra sii ndo, ta ma canacava ndo sisi cuatyi. Ta ñahñi ca cuatyi ndo cua coo quivi cua zacuhun ra sii ndo ityi nuu maa ra, ta zii xaan zii xaan cua cuñi ndo. Nazacahnu xaan yo sii ra. Nacatyi yo vatyi tyaqui xaan nu ndyaca ñaha ra. Cuaha xaan tundyee iñi iyo sii ra. Ndyaca ñaha ra ziqui tandihí cuii sa cuenda cuhva i zavaha ra Jesucristo ndya

ta sa naha, ta ndya cuhva ndya
vityi, ta tandihci cuii tyiemvu. Ta
nacuu si tacuan.

Cuhva I Ndyehe Ra San Juan

Cuhva i zañaha ra Jesucristo sii ra Juan

¹ Ihya cuu sa i zañaha ra Ndyoo sii ra Jesucristo vatyi cua zañaha ra sii muzu ra cuhva sa cua cuu. Ta i sitiño ra Jesucristo minoo ángel, ta i zañaha ra cuhva sa zañaha ra Ndyoo sii ra sii ra Juan, ra cu muzu ra.

² Ta ra Juan cuu ra nacatyi tandihí sa i ndyehe ra. Saha ra sa ndaa sa cuenda tandihí sa i catyi ra Ndyoo sihin ra Jesucristo ta i nacatyi Jesucristo sihin maa ra.

³ Zii xaan cuñi ñiyívi cua cahvi tuhun ya, ta zii xaan cuñi ñiyívi cua tyizoho cuhva catyi tuhun ya sa i saha ra Ndyoo ta tyaa ñuu yahvi cuhva catyi si vatyi sa ndyaa yatyi quívi cua tahan si cuhva cahan si ihya.

Tyaa ra Juan carta ya sii ñiyívi sino iñi sii ra Jesús usa tahan ñuu nu cu si Asia

⁴ Yuhví ra Juan tyei carta ya sii ñiyívi sino iñi usa tahan ñuu nu cu si Asia. Nacuhva xaan ra Ndyoo tumañi iñi sii ndo ta sa coo sa taxi añima ndo vatyimaa ra cuu ra ndya vityi, ta maa ra cuu ra ta sa naha, ta cua coo ra tandihí cuii tyiemvu. Ta cuhva cuan nacuhva tucu sa usa tahan cuhva sa iyo sii Tatyí Ií sa ndyaa ityi nuu ra Ndyoo nu ndyaa ra.

⁵ Ta tacuan tucu nacuhva xaan maa ra Jesucristo tumañi iñi sii ndo. Maa ra cuu ra cu sa ndaa ra cahan sa ndisa cuii. Xihna ca maa ra i nandoto sisi tuhun sihi, ta ndyaca ñaha ra sii tandihí inga ra ndyaca ñaha ñuu ñiyívi. Cuñi xaan ra sii yo. Sati niñi ra, ta zanaa ra cuatyí yo sihin niñi ra.

⁶ Maa ra cuu ra saha sa nduu maa yo ra ndyaca ñaha nahnu ta sa nduu yo ra cu zutu ityi nuu ra

Ndyoo Zutu ra. Nazacahnu yo sii ra Jesucristo, ta nacundyaca ñaha ra tandihí cuii tyiemvu. Ta nacuu si tacuan.

⁷ ¡Ndyehe!, sa vasi ra sisi vico, ta tandihí cuii ñiyívi cua ndyehe sii ra. Ñiyívi i cuxaan sihin ra ta catyi ñu vatyi cua cuu ra nuu cruz cua ndyehe ñu sii ra. Ta cua vacu saa xaan tandihí ñiyívi ñuu ñiyívi cuhva cua ndyehe ñu sii ra. Ta tacuan cua cuii si sa ndisa.

⁸ Catyi ra Ndyoo ra ndyaca ñaha sii yo: Yuhvi cui ra ndya ta xihna cuii ñi tañi letra A, ta ra cua coo ca nu cua ndihí tandihí sa iyo cui tañi letra Z, catyi ra Ndyoo. Ta iyo tandihí cuii tundyee iñi sii maa ra. Maa ra cuu ra iyo vityi, ta maa ra cuu ra iyo ndya ta xihna cuii ñi, ta cua coo ra tandihí cuii tyiemvu.

Ndyehe ra Juan minoo cuhva tyaquí xaancaa ra Cristo

⁹ Yuhvi ra Juan cui yañi ndo. Zuun ñi ndyehe xaan tucu mi tundoho ta cua cuhun tuqui nu ndyaca ñaha ra Ndyoo iin ñi sihin maa ndo. Ta ñihi tuqui cuhva sa cundyee xaan iñi vatyi saha maa ra Jesucristo cuhva cuan sii yo. I siñohi vehe caa minoo ñuhu mahñu tyañuhu sa nañi Patmos vatyi i nacatyi Tuhun Ndyoo sihin ñiyívi, ta i sehi cuenda yozo caa iyo ra Jesucristo.

¹⁰ Minoo quívi tumingu i situ cuii Tatyí Ií ra Ndyoo sii, ta i siñi minoo nduzu ñiyívi saa xaan ityi sate. Tañi minoo nduzu cutu, tacuan i cuu nduzu cuan.

¹¹ Ta catyi nduzu cuan: Yuhvi cui ra iyo ndya ta xihna cuii ñi tañi letra A, ta ra cua coo ca nu cua ndihí tandihí sa iyo cui tañi letra Z. Cuaha xaan sa cua ndyehun vityi. Tyoon sii si nu tutu, ta tasun sii si nu yucu ñiyívi sino iñi usa tahan ñuu nu cu si Asia. Tasun sii si ndya ñuu Efeso, ñuu Esmirna, ñuu Pérgamo, ñuu Tiatira, ñuu Sardis, ñuu Filadelfia ta ñuu Laodicea.

¹² Ta sa ndihî cahan nduzu cuan ta i nasico cave ta i ndyehi ityi sate vatyi cua ndyehi yoo ra cahan. Ta ityi sate i ndyehi usa tahan candelero xuhun cuaan.

¹³ Ta mahñu candelero cuan nandyaa minoo ra caa ra tañi caa ra Jesúz, ra i quisi ndya gloria. Ñoho ra minoo zahma cañi xaan ndya cuhva ndya nu saha ra, ta ñuhñi minoo yoho xuhun cuaan yíquicra ra.

¹⁴ Cuisi xaan ixi xiñi ra tañi ixi mvee ticateyi a tañi caa ñieve. Ta tañi caa ñúhu, tacuan caa siti nuu ra.

¹⁵ Ta saha ra ndisi xaan tañi caa minoo caa sa nañi bronce tatu cayu si. Ta saa xaan quita nduzu ra tañi cucayu yuu nahnu.

¹⁶ Ndaha siyo cuaha ra ñaa ra usa tahan tiñoo. Ta yuhu ra quita minoo espada sa xaan nduu siyo yuhu. Ta nuu ra ndisi xaan si tañi sa ndisi ñicandyi quiví sa ndisi vaha si.

¹⁷ Ta cuhva sa ndyehi sii ra i nduve saha ra, ta i ndui tañi minoo ra sihi. Zoco i tyizo ra ndaha siyo cuaha ra sii, ta i catyi ra sihin: Ma yuhun. Yuhvi cui ra iyo ndya ta xihna cuii ñi, ta cua coo que vazu sa naa tandihî sa iyo.

¹⁸ Yuhvi cui ra ndito. I sihi, zoco vityi ndite. Ta cua cundite tandihî cuii tysiemu. Cumi ndaha ticui andyaya. Ta cuu catyi ama cua cuu ñiyivi.

¹⁹ Tyoon cuhva sa ndyehun, cuhva iyo si vityi ta cuhva cua coo cuee ca.

²⁰ Sa usa tahan tiñoo sa ndyehun ndaha siyo cuehi cuu sa cuenda sa usa tahan ra zacuenda sii sa usa tahan vehe ñuhu ñiyivi sino iñi ziin ziin ñuu. Ta sa usa tahan candelero cuu sa cuenda sa usa tahan vehe ñuhu cuan.

2

Tiñoo i tasi ra sii ñu ñuu Esmirna

¹ Tyoon minoo carta sii ra zacuenda sii ñiyivi ñuu Efeso, ta tyehen catyun: “Ihya cuu tuhun cahan ra ñaa sa usa tahan tiñoo ndaha siyo cuaha ra ta sica ra mahñu sa usa tahan candelero xuhun cuaan.

² Site tandihî sa zavaha ndo ta cuhva sa ñihi xaan zatyïño ndo ta cuhva cundyee xaan iñi ndo ta zatyïño ndo. Ta site vatyi ña cuu cundyee iñi ndo tatu zavaha ñiyivi cuatyí. Ta site cuhva nducu coto ihñi ndo sii ra catyi vatyi apóstol cuu ra ta ña ndisa ra. Ta sa nacoto ndo sii ra vityi vatyi ra vatya cuu ra.

³ Ta i zandyee xaan ndo iñi ndo ta cundyee iñi ndo ta zatyïño ndo sa cuenda mi. Ta ña sitatu ndo sa zavaha ndo sa vaha.

⁴ Zoco site vatyi iyo ca sa cumañi sii ndo vatyi ña cuñi ca ndo sii, tañi i cuñi xaan ndo sii, sa xihna ñi.

⁵ Yucuan cuenda nacohon iñi ndo cuhva i sico ndo sa xihna ñi ta ndyehe ndo cuhva iyo ndo vityi ta zandoo ndo cuatyí ndo, ta zavaha tucu ndo cuhva i zavaha ndo sa xihna ñi. Tatu ma zama ndo cuhva iyo ndo, yatyi xaan cua cuhin nu yucu ndo ta cua quindyei candelero ndo. (Cuñi si catyi si vatyi cua nduu tucu ñu tañi ñiyivi ña sino iñi.)

⁶ Zoco iyo minoo cuhva vaha sii ndo vatyi ña tahan maa iñi ndo cuhva zavaha ñiyivi ndyico sii ra Nicolás. Ta tacuan tucu mi. Ña tahan maa iñi cuhva zavaha ñu.

⁷ Tatu ndyaa zoho ndo tyizoho ndo cuhva catyi Tatyi Ii sihin sa usa tahan vehe ñuhu ñu sino iñi. Catyi ra: Tatu cundyee iñi ndo ta zahacanaa ndo (sii cuihna) cua cuhve sa casi ndo yucu vixi sa iñi nu minoo yutu nandyaa ndya gloria, ta cua cundito ndo tandihî cuii tysiemu.”

Tiñoo i tasi ra sii ñu ñuu Esmirna

⁸ Tyaa tucun minoo carta sii ra zacuenda sii ñiyivi sino iñi ñuu Esmirna, ta tyehen catyun: “Ihya cuu tuhun cahan ra iyo ndya ta xihna cuii ñi, ta cua coo ca ra vazu

sa naa tandihí sa iyo. Zuun ra cui ra i sihi ta i nandote.

⁹ Site cuhva iyo ndo. Cuhva ndyehe xaan ndo tundoho ta cuhva ndahvi xaan iyo ndo. Zoco cuca xaan ndo ityi nuu ra Ndyoo. Ta site sii ñiyivi catyi vatyi ñiyivi hebreo cuu ñu, ta cahan ñu ndya vaha ñi sii ndo, zoco yivi ñiyivi hebreo cuu maa ñu sa ndisa cuii. Vehe fiuhu ra cuihna cuu sii ñu.

¹⁰ Ma yuhu ndo tundoho cua ndyehe ndo. Cua tyihi cuihna sii zuhva ndo vehe caa vatyi cuñi ra nducu coto ihñi ra sii ndo. Ta cua ndyehe ndo tundoho usi tahan quivi, zoco ma ndu-uu iñi ndo vazu cuu ndo sa cuenda mi, ta cua cuhve sa vaha sii ndo sa cundito ndo tandihí cuii tyiemvu.

¹¹ Tatu ndyaa zoho ndo, tyizoho ndo cuhva catyi Tatyi li sihin sa usa tahan vehe ñuhu ñu sino iñi: Tatu cundyee iñi ndo ta zahacanaa ndo sii cuihna, ma cuu cuii ndo.”

Tyiño i tasi ra sii ñu ñuu Pérgamo

¹² Tyaa tucun minoo carta sii ra zacuenda sii ñu sino iñi ñuu Pérgamo, ta tyehen catyun: “Ihya cuu tuhun cahan ra cumi espada sa xaan nduu siyo yuhu.

¹³ Site vatyi ndyaa ndo minoo ñuu nu ndyaca ñaha cuihna, zoco ña ndu-uu iñi ndo, ta ña catyi ndo vatyi ña sino iñi ndo sii, vazu i ndyehe ndo cuhva i sahñi ñiyivi sii ra Antipas ñuu cuan nu ndyaa cuihna vatyi saha vaha xaan ra Antipas sa ndaa sa cuenda mi.

¹⁴ Zoco iyo zuhva sa zavaha ndo ta ña tahan iñi sii si vatyi ñuu Pérgamo cuan iyo zuhva ndo ndyico ca ndo cuhva i zacuaha ra Bal-aam vatyi i nacatyi ra sihin ra Balac vatyi vaha cua zavaha ñiyivi hebreo cuatyi sa casi ñu ndyayu sa saha maa ñiyivi sii inga ndyoo ta cua cuzu rayii sihin ñaha vazu yivi ñazihí ra cuu, catyi ra cuan.

¹⁵ Ta nu yucu ndo iyo tucu zuhva ndo ña cuñi ndo zandoo ndo sa

ndyico ndo cuhva zacuaha ra Nicolás.

¹⁶ Yucuan cuenda zama ndo cuhva iyo ndo vatyi tatu ma zama ndo, yatyi xaan cua quisi nu yucu ndo ta cua cahñi tehin sihin ra zavaha sa ña vaha sihin espada sa quita yuhi.

¹⁷ Tatu ndyaa zoho ndo tyizoho ndo cuhva catyi Tatyi li sihin sa usa tahan vehe ñuhu ñu sino iñi: Tatu cundyee iñi ndo ta zahacanaa ndo sii cuihna cua cuhve sa casi ndo pan maná sa ñoho xehe, ta cua cuhve minoo yuu cuii sii tahan tahan ndo. Ta nu yuu cuan ndyaa minoo ziví saa, zoco yoñi sito sii si. Maa ñi ñiyivi ñihi yuu cuan cua coto ñaa ziví ndyizo si.”

Tyiño i tasi ra sii ñu ñuu Tiatira

¹⁸ Ta tyaa tucun minoo carta sii ra zacuenda sii ñu sino iñi ñuu Tiatira. Tyehen tyoon: “Ihya cuu tuhun cahan zehe ra Ndyoo, ra sa caa siti nuu tañi caa ñúhu. Ta saha rä caa tañi caa sa nañi bronce sa xiño xaan.

¹⁹ Site tandihí sa vaha sa zavaha ndo. Site cuhva cuñi xaan ndo sii ñiyivi ta cuhva niñi xaan iñi ndo ta cuhva tyindyeo ndo sii tahan ndo ta cuhva cundyee xaan iñi ndo. Ta site vatyi zavaha ca ndo sa vaha vityi ta ziqui ndyata xihna ñi.

²⁰ Zoco iyo zuhva sa zavaha ndo ta ña tahan iñi vatyi saha ndo sa zavaha minoo ñaha ña vaha nu yucu ndo ndya vaha ñi, cuhva i zavaha ña Jezabel ta sa naha. Catyi ña vatyi cahan ña tuhun saha ra Ndyoo sii ña, zoco zandavi ñaha ña ta zacuaha ña sii ñiyivi cuu muzu mi vatyi vaha cua cuzu rayii sihin ñaha vazu yivi ñazihí ra cuu, ta cuu casi ndo sa saha maa ñiyivi sii inga ndyoo, catyi ña.

²¹ Sa ndatu xein sa zama ña cuhva iyo ña ta zandoo ña cuatyi zavaha ña sihin rayii, ta ña cuñi ña.

²² Cua tasi tuñi sii ña ta sii tandihí ñiyivi zavaha ndya vaha ñi cuhva zavaha maa ña. Tatu ma zama ñu

cuuhva zavaha ñu cua tasi cuehe ziqui ñu, ta ma cuu nduvita ñu.

²³ Ta cua cahñi sii tandihí ñu. Ta cua coto tandihí ñiyiví sino iñi vatyi yuhvi cui ra sito tatu vaha sica iñi ñiyiví sihin añima ñu a ña vaha. Ta sii sa minoo minoo ndo cua cuhve cuuhva tahan si sii ndo sa cuenda tyiño i zavaha ndo.

²⁴ Ta sii inga ndo ñuu Tiatira, ndoho ña zavaha cuuhva ña vaha cuan ta ña zavaha ndo tandihí sa ndya vaha ñi cuuhva cuñi cuihna, ña cua cahan que inga ca tuhun sihin maa ndo vatyi vaha ñi cuuhva yucu ndo.

²⁵ Zoco ma zaña ndo sa zavaha ndo sa vaha. Cuhva sa zavaha ndo vityi, tacuan zavaha ndo ndya quívi cua quisi tuqui.

²⁶ Ta tatu zahacanaa ndo sii cuihna ta zavaha ndo cuuhva catyi ndya quívi cua cuu ndo, cuee ca cua cuhve sa cundyaca ñaha ndo sii ñiyiví ñuu ñiyiví.

²⁷ Ta ñihi xaan cua tasi tuñi ndo sii ñu

²⁸ tañi saha Zuti cuuhva sii, sa tasi tuñi sii ñu. Ta cua cundyei sihin maa ndo.

²⁹ Tatu ndyaa zoho ndo, tyizoho ndo cuuhva catyi Tatyi Ii sihin ñu sino iñi."

3

Tyiño i tasi ra sii ñu ñuu Sardis

¹ Tyaa tucun minoo carta sii ra zacuenda sii ñu sino iñi ñuu Sardis. Tyehen catyun: "Ihya cuu tuhun cahan ra iyo sa usa tahan cuuhva sii Tatyi Ii ra. Ta cumi tucu ra sa usa tahan tiñoo, ta tyehen catyi ra: Site cuuhva iyo ndo. Catyi ñiyiví vatyi sino xaan iñi ndo ta sa ndito ndisa cuii añima ndo, zoco ña ndisa sa ndito añima ndo vatyi sa ndoyo ñuhu ndo.

² Zacuenda ndo sii ndo, ta zandu-
vaha ndo cuuhva zavaha ndo coto
ndoyo ñuhu ndihí ndo. Sa ndyehi
vatyi ña vaha cuuhva zavaha ndo
ityi nuu ra Ndyoo.

³ Nacohon iñi ndo cuuhva i za-
cuaha ñiyiví sii ndo, ta zavaha ndo

sii si. Zandoo ndo sa ña vaha sa zavaha ndo. Tatu ma cundayaa listo ndo ta zavaha ndo sa vaha, cua quisi ziqui ndo tañi cua quisi minoo ra zahu vatyi ma coto ndo ñaa cuuhva cua sei.

⁴ Iyo zuhva ca ñiyiví nu yucu ndo sa ña zavaha cuatyi. Cua cuhun ñu sihin mi, ta cua ndihví ñu zahma cuihna vatyi ñiyiví vaha xaan cuu ñu.

⁵ Ta ñiyiví zahacanaa sii cuihna, zuun ñi cua ndihví ñu zahma cuihna, ta ma zanei ziví ñu nu libro sa ndyaa ziví ñiyiví cua cundito sihin ra Ndyoo. Ityi nuu ra Ndyoo Zuti ta ityi nuu ángel cua catyi vatyi ñiyiví sii mi cuu sii ñu.

⁶ Tatu ndyaa zoho ndo tyizoho ndo cuuhva catyi Tatyi Ii sihin ñu sino iñi."

Tyiño i tasi ra sii ñu ñuu Filadelfia

⁷ Tyaa tucun minoo carta sii ra zacuenda sii ñu sino iñi ñuu Filadelfia, ta tyehen catyun: "Ihya cuu tuhun cahan ra ii xaan, ta ra ndisa cuii cuu ra. Cumi ra ndaha ticui ra rey David (cuñi si catyi si vatyi iyo xaan cuuhva sii ra tañi i sicoo sii ra rey David), tatu nuña ra yoñi cuu nacazi. Ta tatu nacazi ra, yoñi cuu nuña.

⁸ Site tandihí sa vaha sa zavaha ndo. Sehi cuuhva sii ndo sa nacatyi ndo Tuhun Ndyoo, ta yoñi cua cuu cazi. Ta vazu zuhva ñi tundyeet iñi iyo sii ndo, zoco zavaha ndo cuuhva catyi, ta ña catyi ndo sa ña sito ndo sii.

⁹ Iyo ñiyiví zavaha xaan cuuhva cuñi cuihna. Catyi ñu vatyi ñiyiví hebreo cuu ñu, ta zavaha ñu cuuhva cuñi mi catyi ñu, zoco vatyta xaan ñu. Cua zañiñi sii ñu, ta cua quisi ñu nu yucu ndo, ta cua zacahnu ñu sii ndo. Ta cua coto ñu vatyi cuñi xein sii maa ndo.

¹⁰ Cundyee xaan iñi ndo tañi i cundyee xaan iñi mi, ta yucuan cuenda cua zacuenda sii ndo, ta ma ndyehi ndo tundoño cahnu sa vasi ziqui tandihí ñiyiví ñuu ñiyiví vatyi cua nducu coto ihñi sii tandihí

ñiyiví ñuu ñiyiví, ta cua cote tatu cuñi ñu sii, sa ndisa a ña cuñi ñu sii.

11 Sa cuñi quisi tuqui. Ma zaña ndo cuhva vaha iyo sii ndo coto ma ñihí ndo sa vaha sa cuñi ra Ndyoo cuhva ra sii ndo.

12 Tandihi ñu zahacanaa sii cuihna cua zandui ñiyiví ñifí sii ñu ityi nuu ra Ndyoo, ta ma cuu ca ndoyo ñuhu ñu. Cua tyei ziví ra Ndyoo mi ta ziví ñuu ra Ndyoo nuu tandihi ñu cuan. Ñuu cuan cuu ñuu Jerusalén saa. Cua quita si andiví nu iyo ra Ndyoo, ta cua noo si. Ta tandihi ñu zahacanaa sii cuihna, cua tyei ziví sei nuu ñu.

13 Tatu ndyaa zoho ndo tyizoho ndo cuhva catyi Tatyi Ii sihin ñu sino ifí.”

Tyiño i tasi ra sii ñu ñuu Laodicea

14 Tyaa tucun minoo carta sii ra zacuenda sii ñu sino ifí ñuu Laodicea, ta catyun: “Ihya cuu tuhun cahan minoo ra zavaha ndisa cuii cuhva catyi ra. Sa ndaa, ra cahan sa ndisa cuui cuu ra. Ta maa ra i zavaha tandihi sa i zavaha ra Ndyoo.

15 Site yozo caa iyo ndo, ta ña vaha cuhva iyo ndo. Nu sa ña zandoo ndo sii, ta nu sa ña zatyíño vaha ndo tyiñe. Vaha ca tatu zandoo ndihi ndo sii a nduñihi ca zatyíño ndo tyiñe. Ña vaha sa zuhva cuñi ndo sii, ta zuhva ña cuñi ndo.

16 Zoco maa ndo zuhva cuñi ndo sii, ta zuhva ña cuñi ndo. Ta nu ña zandoo ndihi ndo sii, ta nu ña cuñi ndo zatyíño vaha ndo tyiñe. Yucuan cuenda cua tava ndyize sii ndo.

17 Tacuan catyi vatyi catyi maa ndo vatyi iyo xaan sa vaha sii ndo. Iyo xuhun ndo. Ñahñi sa cumañi sii ndo cuñi maa ndo, ta ña nacoto ndo vatyi ñahñi cuenda cuzíi ifí ndo. Ndahvi xaan ndo; cuaa ndo; ta ñahñi sa vaha iyo sii ndo sa ndisa cuii.

18 Yucuan cuenda catyi sihin ndo vatyi zata ndo sa vaha sa iyo sii mi ta cua cucuca ndo sa ndisa

cuii. Zata ndo xuhun cuaan vaha ta zahma cuii sa cua ndihví ndo ta ma cucahan ca nuu ndo. Ta zata ndo colirio quehe nuu ndo ta cua cuu nandyehe ndo. (Cuñi si catyi si vatyi nazama ñu cuhva iyo ñu ta nanducu ñu sa vaha iin ñi sii maa ra Ndyoo.)

19 Saha xein tuhun vaha sii ñiyiví, ta cañi sii ñu vatyi cuñi xein sii ñu. Yucuan cuenda zavehi cuhva cuan sihin maa ndo. Ta vityi cuñi si sa zama ndo cuhva iyo ndo ta zavaha ndo sa vaha sa ndisa cuii.

20 Ndyeehe ndo vatyi nandyei yuvehe ta cati. Yoo ra cua cuiñi nduzi ta nuña ra yuvehe, cua quihví ta cua ndoi sihin ra. Ta iin ñi cua cuu ra sihin.

21 Ta ñiyiví cua zahacanaa sii cuihna, cua cuhve sa cundayaa ñu sihin mi nu ndyaca ñehi tañi i zahacanei sii cuihna ta vityi ndyei sihin Zuti nu ndyaca ñaha ra.

22 Tatu ndyaa zoho ndo tyizoho ndo cuhva catyi Tatyi Ii sihin ñu sino ifí.”

4

Cuhva zacahnu ñu sii ra Ndyoo ndya gloria

1 Yaha cuan ta ziqui i ndyehi vatyi tacoho minoo yuvehe andiví. Ta i siñi tuqui nduzu ra cahan sihin sa xihna ñi. Ñihí cahan ra tañi nduzu minoo cutu. Ta i catyi ra sihin: Ñaha ihyá ta cua zañehi suun ñaa sa cua coo cuee ca. Catyi ra.

2 Ta zuun fií caa cuhva cuan i situ cuii Tatyi Ii ra Ndyoo sii, ta i ndyehi vatyi ndyaa minoo tyayu ra rey andiví ta ndyaa minoo ra nuu si.

3 Ta ra ndyaa tyayu cuan, xiño xaan ra tañi xiño yuu vaha sa nañi jaspe ta cornalina. Ta siconduu minoo coo yahndyi sii tyayu cuan ta xiño xaan si tañi yuu sa nañi esmeralda.

4 Ta nu ndyaa tyayu cuan i ndyehi vatyi siconduu yulu oco cumi tahan ca tyayu rey. Ta yucuan ndyaa oco cumi tahan ra

5

Ihya cahan si sa cuenda minoo libro ta sa cuenda ra cu Mvee Ticatyi ra Ndyoo

¹ Tacuan ta ziqui i ndyehi vatyi ra ndyaa tyayu mahñu, ndaha ra minoo libro ndaha siyo cuaha ra. Ndyaa letra sisi si, ta sata si. Ta iyo usa tahan sa nacazi sii si.

² Ta i ndyehi sii minoo ángel ñihi xaan, ta saa xaan cahan ra, ta catyi ra: ¿Yoo ra cuu ra cahnu sa ndisa cuii ta sii ra tahan si sa nuña ra sa nacazi libro ya? ¿Yoo ra cua nuña libro ya? Catyi ra.

³ Tacuan ta yoñi i cuu nuña libro cuan ta ndyehe sisi si. Yoñi minoo ra ñiñi xaan andivi a nu ñihu a xu ñihu ta cuu nuña ra sii si.

⁴ Ta i sacu xein vatyi yoñi sa cuu nuña sii si ta ndyehe sisi si.

⁵ Tacuan ta minoo ra sahnu ndyaca ñaha i catyi ra sihin: Ma vacun. Iyo minoo ra cahnu, ñiyiví ra Judá. Ta zuun tucu ñiyiví ra David cuu ra. Sa i zahacanaa maa ra, ta cuu cani ra sii sa usa tahan sa nacazi libro cuan ta nuña ra sii si.

⁶ Ta i ndyehi vatyi mahñu nu yucu tyayu ta sa cumi tahan quiti ta tandihí ra sahnu ndyaca ñaha cuan nandyaa minoo ra caa tañi caa minoo mvee ticatyi sa i sahñi ñiyiví. Usa tahan ndiqui ti, ta usa tahan siti nuu ti sa cuu cuenda sa usa tahan cuhva iyo sii Tatyi li ra Ndyoo sa tasi ra Ndyoo nacahnu ñuu ñiyiví.

⁷ Tacuan ta i sahan ra cu mvee ticatyi cuan, ta i quihin ra libro sa ñaa ra ndyaa tyayu cahnu cuan ndaha cuaha ra.

⁸ Ta cuhva i quihin ra libro cuan ta sa cumi tahan quiti cuan sihin sa oco cumi tahan ra sahnu ndyaca ñaha cuan i sicuiñi siti ra ityi nuu ra cu mvee ticatyi cuan. Tahan tahan ra cuan ndaha ra arpa ra ta ndaha ra minoo coho xuhun cuaan. Sisi coho cuan cayu cutu. Ta cutu cuan cuu xico sa sica tahvi ñiyiví ra Ndyoo sii ra.

sahnu ndyaca ñaha. Ñoho ra zahma cui, ta minoo corona xuhun cuaan ñoho xiñi tahan tahan ra.

⁵ Ta tyayu sa ndyaa mahñu cuan quita tasa zavi ta sa cahan zavi ta inga nduzu ndihi ca. Ta ityi nuu tyayu cuan cayu usa tahan ñúhu. Ñúhu cuan cuu sa cuenda sa usa tahan cuhva iyo sii Tatyi II.

⁶ Ta ityi nuu tyayu cuan iyo tucu minoo sa caa tañi caa tyañihu, zoco xiño xaan si tañi ino. Ta siconduu nu nandyaa tyayu cuan nandyaa cumi tahan quiti. Situ cuii siti nuu sii ti. Ityi nuu ti ta ityi sata ti.

⁷ Minoo ti caa ti tañi caa minoo ndicaha. Ta quití cu uu cuan, caa ti tañi caa minoo toro. Quití cu uñi cuan caa nuu ti tañi caa nuu rayíi. Quití cu cumi cuan, caa ti tañi caa minoo tazu sa ndava.

⁸ Ta sa cumi tahan quiti cuan iyo iñiu tahan ndisi ti sa minoo minoo ti. Ta iñi siti nuu nacahnu tandihí ndisi ti. Ñiyaca ta ndiyiyaca ñá sicuita quiti cuan sa catyi ti: Yoho ra ndyaca ñaha nacahnu cuii cuun. Ii xaan; ii xaan cuun. Iyon vityi, ta ndya ta xihna cuii ñi iyon, ta cuu coon tandihí cuii tyiemvu.

⁹ Tacuan zacahnu quiti cuan sii ra ndyaa nu tyayu cuan. Ra ndito tandihí cuii tyiemvu cuu ra, ta saha xaan tucu quiti cuan tyahvi ndyoo sii ra.

¹⁰ Ta cuhva sa zavaha quiti cuan cuhva cuan, i sicuiñi siti sa oco cumi tahan ra sahnu ndyaca ñaha ityi nuu ra ndyaa nu tyayu rey cuan, ta i zacahnu ra sii ra ndito tandihí cuii tyiemvu. I tava tandihí ra sahnu cuan corona ra, ta i saqui ra sii si ityi nu tyayu cuan, ta i catyi ra:

¹¹ Yoho ra ndyaca ñaha ta Ndyoo cuun sii ndi.

Ra cahnu xaan ca cuun.

Tahan si sa zacahnu xaan ndi suun ta tyaa xaan ndi yahvi suun.

Ta tahan si sa cundyaca ñohon sii tandihí cuii sa iyo.

Vatyi i zavaha moo tandihí si.

I sino si vatyi tacuan cuñi moo.

⁹ Ta cuhva sa yucu ra yucuan, i sata ra minoo yaa saa. Tyehen catyi si:

Yoho, minoo ra vaha xaan cuun.

Yucuan cuenda cuu cuhun libro ta canun sa ndazi yuhu si.

Vatyi yoho, sohon sa cahñi ñiyivi suun. Satan niñun, ta sihin si zanduvohon sii ndi sihin ra Ndyoo.

Ta ñiyivi nacahnu ñuu ñiyivi cuu ndi, ta ziin ziin cuhva cahan ndi.

Ñiyivi ziin ziin tata cuu ndi.

¹⁰ I sohon cuhva sii ndi ta cuu ndi rey ta cuu ndi ra cu zutu sa cuenda ra Ndyoo, ta cua cundyaca ñaha ndi ñuu ñiyivi.

¹¹ Tacuan i sata ra cuan yaa cuan, ta ziqui i nandyehi inga saha ta siñi nduzu ángel sa nandyaa siconduu nu ndyaa tyayu cahnu ta nu yucu sa cumi tahan quiti sihin sa oco cumi tahan ra sahnu ndyaca ñaha. Cuaha xaan cuaha xaan ángel cuenda millón.

¹² Saa xaan i cahan si, ta catyi si: Ra cu mvee ticatyi sa sahñi ñiyivi, ra vaha xaan cuu ra.

Yucuan cuenda iyo xaan cuhva sii ra.

Iyo xaan sa sii ra.

Iyo xaan sa siñi tuñi sii ra.

Cuu xaan cundyaca ñaha ra.

Tahan si sa zacahnu xaan ñiyivi sii ra.

Ra cahnu xaan ca cuu maa ra. Catyi ángel cuan.

¹³ Ta ziqui siñi vatyi cahan tandihí sa i zavaha ra Ndyoo, sa iyo ityi ziqui, ta sa iyo nu ñuhu ta sa iyo xu ñuhu ta sa iyo sisi tyañuhu. Tandihí cuii sa i zavaha ra Ndyoo i cahan si ta catyi si:

Cahnu xaan cuu ra ndyaa tyayu cahnu cuan sihin ra cu mvee ticatyi cuan.

Iyo xaan cuhva sii ra, ta cuu xaan cundyaca ñaha ra.

Tahan si zacahnu yo sii ra tandihí cuii maa tyiemvu.

¹⁴ Ta sa cumi tahan quiti cuan i catyi ti:

¡Nacuu si tacuan, ta nacuu si sa ndisa!

Tacuan ta tandihí sa oco cumi tahan ra sahnu ndyaca ñaha i sicuñi siti ra, ta i zacahnu ra sii ra ndito tandihí cuii maa tyiemvu.

6

Nuña ra usa tahan sa ndaziyuhu libro

¹ Tacuan ta ziqui i ndyehi vatyi ra cu Mvee Ticatyi ra Ndyoo, i nuña ra minoo sa usa tahan sa ndazi yuhu libro cuan. Ta siñi sa cahan minoo sa cumi tahan quiti sa yucu yucuan. Saa xaan i cahan ti tañi cahan zavi ta catyi ti: ¡Ñaha ihya ta ndyehun! Catyi ti.

² Ta ziqui i ndyehi minoo caballo cuiis. Yozo minoo ra sii ti, ta ndaha ra minoo nduva. I ñihi ra minoo corona ñoho xiñi ra vatyi sahñi tahan ra ta zahacanaa ra, ta cua zahacanaa ca ra nu cuahan ra.

³ Ta ra cu Mvee Ticatyi i nuña ra sa cu uu sa ndazi yuhu libro cuan. Ta siñi sa cahan sa cu uu quiti cuan, ta catyi ti: ¡Ñaha ta ndyehun!

⁴ Tacuan ta i quita inga caballo. Caballo cuaha cuu ti. Ta ra yozo sii ti, iyo cuhva sii ra quindyaa ra cuhva vaha yucu ñiyivi ñuu ñiyivi. Ta cua quisaha cahñi ñiyivi sii tahan ñu. Ta ra yozo caballo cuan i ñihi ra minoo espada cahnu xaan.

⁵ Yaha cuan ta ziqui i nuña ra cu Mvee Ticatyi cuan sa cu uñi sa ndazi yuhu libro cuan ta siñi sa cahan sa cu uñi tahan quiti cuan, ta i catyi ti: ¡Ñaha ta ndyehun! Ta i ndyehi inga caballo toon. Ta ra yozo sii ti ñaa ra minoo ticatya.

⁶ Ta mahñu nu yucu sa cumi tahan quiti cuan, siñi minoo nduzu tañi cahan ñiyivi ta catyi si:

Minoo kilo nuñi, yahvi xaan cua cundyaa si.

Ta tacuan tucu siti cebada, yahvi xaan cua cundyaa si.

Zoco cua coo cuaha azetye ta vino.
Catyi nduzu cuan.

⁷ Cuhva sa nuña ra cu Mvee Ticatyi sa cu cumi tahan sa ndazi yuhu libro cuan, i siñi vatyi cahan sa cu cumi tahan quiti cuan ta catyi ti: ¡Ñaha ta ndyehun!

⁸ Ta i ndyehi sii minoo caballo cuaan. Ta ra sa yozo sii ti, nañi ra Tuhun Sihi Ñiyivi. Ta ityi sata ra vasi inga ra sa nañi Andyaya. I ñihi ra cuan cuhva ziqui zuhva ñuu ñiyivi sa cahñi ra ñiyivi. Sahñi ra sii ñu sihin cuhva i zacanda ra cuatyi ta sihin tama, ta sihin cuehe ta sihin quiti xaan.

⁹ Yaha cuan, ta ziqui i nuña ra cu Mvee Ticatyi sa cu ohon tahan sa ndazi yuhu libro cuan, ta i ndyehi minoo altar, ta xuu si i ndyehi añima ñiyivi i sihi sa cuenda Tuhun Ndyoo ta sa cuenda sa nacatyi xaan ñu Tuhun Ndyoo sihin ñiyivi.

¹⁰ Ta i cana saa ñu sihin minoo nduzu saa xaan, ta catyi ñu: Zutu mañi yuu, ii xaan moo, ta ndoo xaan zavohon, ¿ta ama ta cua tyicuhvon sii ñiyivi ta cua tasi tuñun sii ñiyivi ñuu ñiyivi vatyi maa ñu cuu ñu i sahñi sii ndi? Catyi ñu.

¹¹ Tacuan i cuu si, ta i saha ra zahma cui si ndihvi tandihi ñu cahan, ta i catyi ra sihin ñu vatyi naquitatu ñu zuhva ca quiivi vatyi cumañi ca casi tahan ñu, tandihi ca ñu sa cuca cahñi ñiyivi sa cuenda ra Cristo cuhva i sihi maa ñu.

¹² Ta ziqui i ndyehi vatyi sa nuña ra cu Mvee Ticatyi sii sa cu iñu tahan sa ndazi yuhu libro cuan. Sa yaha i nuña ra sii si, ta ziqui i taan minoo sa ñihi xaan. Indutoon xaan ñicandyi tañi zahma toon. Ta luna, i nducuaha si tañi caa niñi.

¹³ Ta tiñoo sa iyo andivi, i canaco yo ti ndya nu ñuhu tañi coyo tandihi yucu vixi tatu nu yutya si tatu ñihi xaan caa tatyi.

¹⁴ Ta ziqui i ndata zava yutya andivi, ta i natuu si tañi natuu minoo tutu. Ta tandihi yucu ta tandihi ñuhu sa ndyaa mahñu tyañuhu, i

nacanda si ta i nazama si nu ndyaa si.

¹⁵ Ta tandihi ra cu rey ta ra nahnu ta ra cuca ta ra ñiñi ta ra ndyaca ñaha sihin tandihi ra cu muzu ta tandihi inga ñiyivi ndya vaha ñi, cua quihvi xehe ñu sisi ñuhu ta sisi yavi yuu ta ticui yuu sa iyo yucu.

¹⁶ Ta cua cahan ñu sihin yucu ta sihin yuu, ta catyi ñu: Canacava ndo ziqui ndi, ta tyixehe ndo sii ndi sii ra ndyaa tyayu cahnu cuan ta sii ra cu Mvee Ticatyi cuan vatyi sa cuxaan xaan ra vityi.

¹⁷ Sa saa quiivi cuxaan xaan ra sa ndisa, ta yoñi cua cuu cundyee iñi sii si. Catyi ñu.

7

Ñiyivi hebreo sa cuu ñiyivi ra Ndyoo sa ndisa

¹ Yaha cuan ta ziqui i ndyehi cumi tahan ángel. Nandyaa ra sa cumi tahan siqui ñuu ñiyivi, ta ñá saha ra yaha tatyi. Yucuan cuenda ñá cuu cava tatyi ñuu ñiyivi ta nu nu tyañuhu ta nu nu yutu. Ñahñi maa tatyi i caa.

² Ta i ndyehi sii inga ángel. Vasi ra ndya ityi caña ñicandyi, ta ndyizo ra zeyu ra Ndyoo ndito. I cana saa ra ta cahan ra sihin inga cumi tahan ángel cuan vatyi sa cumi tahan ra cuan iyo cuhva sii ra sa zativi ra ñuu ñiyivi ta tyañuhu.

³ Zoco ángel sa vasi cuan, i catyi ra sihin ra: Cuatu noo ndo. Ma zativi ñaha ndo sii ñuu ñiyivi ta sii tyañuhu ta nu sii yutu ndya cua tyaa xihne zeyu ra Ndyoo Zutu yo yiqui nuu ñiyivi sa cuu muzu maa ra Ndyoo.

⁴ Tacuan i cuu si, ta siñi nacatyi ra yozo tahan ñiyivi i tyaa ra zeyu cuan. Ta cuu si minoo ziendu uu xico cumi mil ñiyivi sisi tandihi sa usi uu ityi ñiyivi hebreo.

⁵ Usi uu mil ñu cuu ñu ñiyivi ra Judá. Usi uu mil ñu cuu ñu ñiyivi ra Rubén. Usi uu mil ñu cuu ñu ñiyivi ra Gad.

⁶ Usi uu mil ñu cuu ñu ñiyivi ra Aser. Usi uu mil ñu cuu ñu ñiyivi ra Neftalí. Usi uu mil ñu cuu ñu ñiyivi ra Manasés.

⁷ Usi uu mil ñu cuu ñu ñiyivi ra Simeón. Usi uu mil ñu cuu ñu ñiyivi ra Leví. Usi uu mil ñu cuu ñu ñiyivi ra Isacar.

⁸ Usi uu mil ñu cuu ñu ñiyivi ra Zabulón. Usi uu mil ñu cuu ñu ñiyivi ra José. Ta usi uu mil ñu cuu ñu ñiyivi ra Benjamín.

Ndyehe ra cuaha xaan ñiyivi ñoho zahma cui

⁹ Yaha cuan ta ziqui i ndyehi sii cuaha xaan ñiyivi. Ñiyivi tandihí cuii tata cuu ñu ta tandihí cuii nación ta tandihí cuii ñuu. Ta ziin ziin yuhu cahan ñu, tandihí nuu zahan ta tyehen ñi sa iyo ñuu ñiyivi. Nandyaa ñu cuan ityi nuu tyayu cahnu, ta nandyaa ñu ityi nuu ra cu Mvee Ticatyi. Cuaha xaan cuaha xaan ñiyivi cuu ñu ndya cuhva yoñi cuu cahvi sii ñu. Ñoho ñu zahma cui, ta ñaa ñu ndaha ticaña.

¹⁰ Tandihí ñu cana saa ñu sihin minoo nduzu saa xaan, ta catyi ñu: Ra Ndyoo, ra ndyaa tyayu cahnu cuu ra zacacu sii ndi, Ta ra cu Mvee Ticatyi cuu ra zacacu sii ndi.

Catyi ñu.

¹¹ Ta tandihí cuii ángel cuan nandyaa ra siconduu ra nu ndyaa tyayu cahnu cuan ta nu yucu tandihí ra sahnu ndyaca ñaha ta nu yucu sa cumi tahan quiti. Ta tandihí cuii ángel cuan i sicava ndyayu ra nu ñuhu ityi nuu tyayu cahnu cuan, ta i zacahnu ra sii ra Ndyoo.

¹² Ta i catyi tandihí ángel: Yoho Ndyoo Zutu ndi, nazacahnu xaan maa ndi suun. Tyaqui xaan coon. Cuaha xaan sa siñi tuñi iyo suun. Nacuhva xaan ñiyivi tyahvi ndyoo suun, ta nazacahnu ñu suun. Cuaha xaan cuhva iyo suun, ta cuaha xaan sa ndyaca ñohon.

Ta nacuu si tacuan, ta nacuu si sa ndisa tandihí cuii tyiemvu.

¹³ Tacuan i cuu si, ta ziqui minoo ra sahnu ndyaca ñaha i ndaca tuhun ra sii, ta catyi ra: ¿Yoo ñiyivi cuu ñu sa ñoho zahma cui ña? ¿Ta ndya ityi i quasi ñu? Catyi ra.

¹⁴ Ta i catyi sihin ra: Tata, sa sito moo. Ta ziqui i catyi ra sihin mi: I quita ñu ndya nu iyo tundoho cahnu xaan. Sa nacatya ñu zahma ñu ta nducuisi zahma ñu sihin niñi ra cu Mvee Ticatyi. (Cuñi si catyi si vatyi sa nduvaha añima ñu sa cuenda ra Cristo.)

¹⁵ Ta vityi nandyaa ñu ityi nuu tyayu maa ra Ndyoo. Ndyiyaca ta ñiyaca zatyño ñu tyiño ra sisi vehe nu zacahnu ñiyivi sii ra. Ta maa ra sa ndyaa tyayu cahnu cuan zacuenda ra sii ñu vatyi ndyaa ra sihin ñu.

¹⁶ Ma cuzoco ca ñu. Ta ma cu-ityi ca ñu. Ma cahmi ca ñicandyi sii ñu, ta ma quehe ca yoco sa ihñi sii ñu.

¹⁷ Vatyi ra cu Mvee Ticatyi, ra ndyaa yatyi ñi tyayu cahnu cuan, cua zacuenda ra sii ñu tañi sa mvee ticatyi zono ra cuu sii ñu, ta cua cundyaca ra sii ñu nu iyo ndutya coho ñu, ta cua cundito ñu tandihí cuii tyiemvu. Ta cua zanaa ra Ndyoo tandihí cuii tucuihya iñi sii ñu.

8

Nuña ra sa cu usa tahan sa ndazi yuhu libro

¹ I nuña ra cu Mvee Ticatyi sii sa cu usa tahan sa ndazi yuhu libro, ta cuhva cuan i cutaxi gloria tañi zava ora.

² Ta ziqui i ndyehi vatyi sa usa tahan ángel sa nandyaa ityi nuu ra Ndyoo, i ñihi minoo minoo ra minoo cutu.

³ Ta ziqui i quasi inga ángel, ta i sicuiñi ndyaa ra ityi nuu altar. Ñaa ra minoo cuun xuhun cuaan. Ta i ñihi ra cuaha xaan cutu vatyi cua cahmi ra sii si nuu altar xuhun cuaan sa ndyaa ityi nuu tyayu

cahnu. Cua cahmi ra sii si ityi nuu ra Ndyoo cuhva sa cahan tandihí ñiyiví sa cuu cuenda ra Ndyoo sihin ra. Ta cua quihin ra Ndyoo xico cutu ta oración cuan.

⁴ Ta i quita ñuhma cutu cuan sisi sa ndaha ángel cuan, ta i ndaa si ndya nuu ra Ndyoo iin ñi sihin oración sa zavaha ñiyiví sa cuu cuenda ra.

⁵ Ta ziqui i zacutu ángel cuan cuun cuan sihin ñúhu sa cayu nu altar. Ta i cañi ra ñúhu cuan nu ñuhu ñiyiví. Ta sicoo minoo nduzu ñihi xaan tañi cahan zavi, ta sicoo xaan inga nduzu ta tasa zavi, ta i taan ndihí ca.

Tivi ángel cuan cutu

⁶ Tacuan i cuu si, ta i nacundayaa listo tandihí sa usa tahan ángel cuan vatyi cua tivi ra cutu ra.

⁷ Ta ángel sa xihna ñi cuan i tivi ra cutu ra, ta zaca noo yuu zavi ta ñúhu ta niñi i canacava nu ñuhu ñiyivi. Ta i cayu sa yaty i zava ñuu ñiyiví sihin yutu ta cuhu.

⁸ Ta ziqui sa cu uu ángel cuan, i tivi ra cutu ra, ta i canacava tañi minoo yucu cahnu sisi tyañuhu. Cayu si i canacava si. Ta sa yaty i zava tyañuhu i nduu si niñi.

⁹ Ta quití sa iyo sisi tyañuhu nu nduu niñi cuan, i sihi ti. Ta i tivi cuaha xaan barco.

¹⁰ Tacuan ta ziqui i tivi tucu ángel sa cu uñi cuan cutu ra ta i canacava minoo tiñoo cahnu xaan. Cayu xaan ti tañi minoo ñúhu. I canacava ti nuu sa yaty i zava yuu sa iyo ñuhu ñiyiví ta nu cuaha xaan zoco ndutya.

¹¹ Nañi tiñoo cuan Ajenjo vatyi ndu-uya tandihí ndutya nu canacava ti, ta cuaha xaan ñiyiví i sihi vatyi sihi ñu ndutya cuan, ta uña xaan si.

¹² Tacuan ta i tivi tucu sa cu cumi tahan ángel cuan cutu ra. Cuhva cuan ta i tivi sa yaty i zava ñicandyi ta sa yaty i zava yoo ta sa yaty i zava tiñoo. I nduñaa sa yaty i zava ñicandyi ta sa yaty i zava yoo

ta sa yaty i zava tiñoo. Yucuan cuenda ñá ndundisi vaha ca ora, ta i nduñaa ca sa sa cuua.

¹³ Ta ziqui i ndyehi vatyi ndava minoo ángel ta cuahan ra zava mahñu andiví. Ta saa xaan i cahan ra ta siñi sa cahan ra. Tyehen catyi ra: ¡Ndhahvi ñi cuu ñiyiví iyo ñuu ñiyiví!, vatyi sa cuñi tiví inga uñi tahan ángel cutu ra.

9

¹ Tacuan i cuu si, ta ziqui ángel cu ohon cuan i tivi ra cutu ra, ta i ndyehi sii minoo ra caa tañi caa minoo tiñoo. I quita ra ndya andiví, ta i canacava ra ndya nu ñuhu. Ta ñaa maa ra ndaha ticii sa cuu nuña yavi cono xaan nu ñoho ñiyiví zavaha sa ña vaha.

² Ta i nuña ra sii si, ta i quita ñuhma tañi quita ñuhma minoo nu cayu siin. Ta i nduñaa ñicandyi, sihin ñuhma sa quita yavi cuan, ta ñuhma xaan i nduu nacahnu.

³ Ta i quita quití tañi caa tica sisi ñuhma cuan, ta i ndava ti ñuu ñiyiví. Ta quití xaan cuu ti, tañi xaan tizuhma sa iyo nu ñuhu.

⁴ Ta tica xaan cuan, cuu zandyhe ti tundoho sii tandihí ñiyiví sa ñahñi zeyu ra Ndyoo ndyaa yiqui nuu. Zoco ma cuu zatíví ti cuhu ta nu yutu sa iyo ñuu ñiyiví.

⁵ Ta ña cuu cahñi ti sii ñiyiví. Maa sa ndyehi ñi ñu tundoho ohon yoo. Cua zandyhe quití cuan tundoho sii ñu tañi zandyhe tizuhma tundoho sii yo vatyi cua tyaa ti sii ñu.

⁶ Quivi cuan cua cuñi ñiyiví sa cuu ñu, zoco ma ñihi ñu cuhva. Cua nanducu xaan ñu cuhva cuu ñu, zoco ma cuu cuu ñu.

⁷ Tica cuan caa ti tañi caa caballo nahnu. Quití cuahan nu iyo cuatyi. Ta xiñi ti caa si tañi sa ñoho minoo corona xuhun cuaan. Ta nuu ti caa tañi caa nuu ñiyiví.

⁸ Ixi xiñi ti caa tañi caa ixi xiñi ñu zihí. Ta noho ti caa tañi caa noho ndicaha.

⁹ Ta iyo minoo zoo ti ndava xaan si tañi caa. Ta tatu cua ndava ti, cuaha xaan nduzu zavaha ndisi ti tañi nduzu zavaha cuaha xaan carreta sa xita caballo tatu cuahan ti nu iyo cuaty.

¹⁰ Zuhma ti cuu tañi zuhma tizuhma. Iyo minoo iñu xaan nuu si. Ta sihin zuhma ti cua zandyehe ti tundoho sii ñiyivi ohon yoo.

¹¹ Iyo ra ndyaca ñaha sii tica xaan cuan. Zuun ra cuu ra sa ndyaca ñaha yavi nu ñoho ñiyivi i zavaha sa ña vaha. Nañi ra Abadón sihin zahan hebreo. Ta ñiyivi cahan zahan griego catyi ñu vaty Apolión nañi ra. Cuñi si catyi si ra zativi.

¹² Yucuan cuu sa xihna ñi tundoho. Ndyaa coo uu tahan ca.

¹³ Ra ángel cu iñu cuan i tivi ra cutu ra ta siñi nduzu cahan minoo ra. Quita nduzu cuan nu ndyaa tandih sa cumi tahan tutu altar xuhun cuaan sa ndyaa ityi nuu ra Ndyoo.

¹⁴ Ñaa ángel cu iñu cuan cutu ra, ta i catyi ra cahan cuan sihin ra: Ndasun sii sa cumi tahan ángel nuhñi nu ndyaa yutya cahnu Eufrates.

¹⁵ Ta tacuan ta i ndasi sa cumi tahan ángel vaty sa ndatu listo ra sa cuenda cuhva cuan ta sa cuenda quivi cuan ta sa cuenda yoo cuan ta cuiya cuan. Ta sa tahan si cuhva sa ndatu xaan ra, ta cua zavaha ra tyiño sa tahan si sii ra. Cua cahñi ra sa yaty zava ñiyivi ñuu ñiyivi.

¹⁶ I ndyehi cuaha xaan zandaru ángel cuan; yozo ra caballo ta cuahan ra. Ta siñi vaty uu ziendu millón ra cuu ra.

¹⁷ Tyehen cuu cuhva caa caballo cuan sisi sa i ndyehi. Ra yozo sii ti ñoho minoo caa yiqui ndyica ra. Iyo si cuaha si. Iyo si azu si, ta iyo si cuaan si. Xiñi caballo cuan caa si tañi caa xiñi ndicaha. Ta yuhu ti quita ñuhma ta ñuhma ta azufre.

¹⁸ Ta sihin ñúhu ta ñuhma ta azufre sa quita yuhu caballo cuan, i sihi sa yaty zava ñiyivi ñuu ñiyivi.

¹⁹ Vaty iyo cuhva sii ti sihin yuhu ti ta sihin zuhma ti. Zuhma ti caa tañi caa coo sihin xiñi ti. Ta sihin si zañicuehe ti sii ñiyivi.

²⁰ Zoco numaa sihi xaan ñiyivi sihin tundoho cuan, zoco inga ñiyivi sa ñá sihi, ñá ndu-uu iñi ñu cuaty ñu. Ñá zaña ñu sa zacahnu ñu sii cuihna ta sii ndyoo xuhun cuaan ta ndyoo xuhun cuii ta ndyoo caa ta ndyoo yuu ta ndyoo yutu. Zacahnu ñu sii si vazu ña ndyehe si ta ña siñi si ta ña cuu caca si.

²¹ Ta ñá zaña ñu tuhun sa sahñi ñu sii ñiyivi ta sa zatazi ñu ta sa zuhu ñu ta sa quixi rayii sihin ñaha ta ñá tandaha ra ta sa quixi ra sihin ñazihí inga ra. Ñá zaña ñu sii tandihí cuii cuaty zavaha ñu.

10

Minoo ángel sa ndyizo minoo libro luhlu

¹ Tacuan ta ziqui i ndyehi sii inga ángel ñihi xaan. I quita ra andivi ta vasi noo ra ndya nu ñuhu. Ñoho ra sisi minoo vico, ta ñoho minoo coo yahndyi xiñi ra. Ndisi xaan nuu ra tañi ñicandyi, ta saha ra ndisi xaan si tañi cayu ñúhu.

² Ta ndaha ra minoo libro luhlu, ta nuña si. Ta i sañi ra saha siyo cuaha ra nu tyañuhu, ta i sañi ra saha siyo zaty i ra nu ñuhu.

³ Ta ziqui i cana saa ra sihin minoo nduzu ñihi xaan tañi tana minoo ndicaha. Cuhva sa cana saa ra, i siñi usa tahan nduzu tañi nduzu zavi.

⁴ Ta sa yaha cahan zavi cuan ta ziqui cua tyei sii si, zoco siñi mino nduzu sa quita andivi ta tyehen catyi si sihin: Cucumi xehun cuhva i cahan sa usa tahan nduzu zavi cuan, ta ma tyoon sii si.

⁵ Ta ziqui i ndyehi ángel sa sañi saha siyo cuaha ra nu tyañuhu ta saha siyo zaty i ra nu ñuhu vaty i zandaa ra ndaha siyo cuaha ra ndya andivi.

⁶ Ta i tyiñaha ra Ndyoo. Cahan ra sa cuenda ra Ndyoo ra ndito

tandihi cuii tyiemvu, ra i zavaha andivi ta ñuhu ñuu ñiyivi ta tyañuhu ta tandihi cuii sa iyo. Ta i catyi ángel cuan: Sa cua ndihí tuhun

⁷ vatyi tatu sa quisaha tivi ra ángel cu usa cuan cutu ra, cuñi si catyi si vatyi sa yaha zavaha ra Ndyoo cuhva xehe sa cua zavaha ra tañi sa zacoto ra sii ra cu muzu ra, ra cu profeta.

⁸ Tacuan i catyi ángel cuan, ta ziqui i siñi tuqui nduzu sa tuhve siñi. Minoo nduzu sa quita andivi cuu si, ta i cahan si sihin inga saha, ta catyi si: Cuahan ta cuhun libro luhlu sa ndaha ángel ra nandyaa nu tyañuhu ta nu ñuhu ñuu ñiyivi. Catyi ra.

⁹ Ta i sehin nu nandyaa ángel cuan, ta i sique libro luhlu cuan sii ra, ta i catyi maa ra sihin: Cuhun sii si, ta casun sii si. Vixi xaan cua cuu si sisi yuhun tañi tyahiñu ñuñu. Zoco cua ndu-uya xaan si sisun.

¹⁰ Ta tacuan i zavehi. I quihin libro luhlu sa ndaha ángel cuan, ta i sasi sii si. Sisi yuhi vixi xaan i cuu si tañi tyahiñu, zoco i ndu-uva xaan si sisi sa yaha sasi sii si.

¹¹ Ta ziqui i catyi ra sihin: Vityi cuñi si sa nacatyi moo cuhva catyi ra Ndyoo nu libro cuan yozo caa cua cuu si sa cuenda cuaha xaan ñiyivi ta cuaha xaan nación ta sa cuenda ñiyivi cahan ziñ ziñ zahan ta sa cuenda ra ndyaca ñaha sii ñu, ndihí ca.

11

Uu tahan ra saha sa ndaa

¹ Tacuan ta ziqui i saha ra minoo tuñii sii, ta cua tyicuhve sihin si, ta i catyi ángel cuan sihin: Nduviton ta tyicuhvon vehe ñuhu ra Ndyoo ta altar si ta cahvun yozo tahan ñiyivi zacahnu sii ra Ndyoo yucuan.

² Zoco nu cuu nuquehe vehe ñuhu, ma tyicuhvon vatyi cua ndoo si cuenda ñiyivi sa yivi ñiyivi hebreo cuu, ta cua zanduquiñi caa ñu sii ñuu vaha xaan ya uu xico uu yoo.

³ Ta cua tasi sii uu tahan ra cua cuhva sa ndaa sa cuenda mi. Cua ndihí ra zahma toon, ta cua cahan ra sa cuenda mi mil uu ziendu uñi xico quiví.

⁴ Sa uu tahan ra ya cua cuu ra tañi uu tahan yutu olivos ta cua cuu ra tañi uu tahan candelero sa ndyaa ityi nuu ra Ndyoo ra ndyaca ñaha sii tandihi yo.

⁵ Tatu iyo ñiyivi cuñi cuhva tundoho sii ra, cua quita ñúhu yuhu ra ta cua cahmi si sii ñiyivi cuxaan sii ra. Cuhva cuan cua cuu ñiyivi tatu cuñi ñu cuhva ñu tundoho sii ra.

⁶ Sa uu tahan ra ya, iyo cuhva sii ra ta cuu cazi ra andivi ta ma coon zavi tandihi quiví sa cua cahan ra sa cuenda ra Ndyoo. Ta iyo tucu cuhva sii ra sa nazama ra ndutya ta cua nduu si niñi, ta cua cuu zandyehe xaan ra tundoho sii ñiyivi. Cua quihin cuehe sii ñu, ta cua coo inga tundoho sii ñu yozo cuhva cuñi maa ra.

⁷ Zoco quiví sa yaha saha ra tandihi sa ndaa, cuhva cua nacatyi ra sihin ñiyivi, ta ziqui cua quita minoo quiti xaan sisi yavi nu ñoho ñiyivi zavaha sa ña vaha, ta cua cahñi tahan ti sihin ra, ta cua zahacanaa ti ta cua cahñi ti sii ra.

⁸ Cua cava coño ñuhu ra ityi cahnu ñuu cahnu nu i sahñi ñiyivi sii ra ndyaca ñaha sii yo. Catyi tucu ñiyivi vatyi nañi ñuu cuan Sodoma ta nañi si Egipto vatyi cuaha xaan cuatyi zavaha ñiyivi ñuu cuan.

⁹ Ta uñi quiví zazava ñiyivi ziñ ziñ ñuu ta ziñ ziñ tata ta ñiyivi ziñ ziñ nación, ñu cahan ziñ ziñ zahan cua ndyehe ñu sii coño ñuhu ra, ta ma cuhva ñu sa quihví si ñuhu.

¹⁰ Ta ziñ xaan cua cuñi ñiyivi ñuu ñiyivi vatyi sihi ra cuan. Cua cuziñ xaan iñi ñu, ta cua tasi ñu regalo sii amigo ñu vatyi sihi uu tahan ra saha sa ndaa cuan ta zayanga xaan ra sii ñu.

¹¹ Zoco cua yaha uñi quiví zazava, ta ziqui cua zanandoto ra Ndyoo sii ra, ta cua nduvita ra inga

saha. Ta tandihí ñiyiví ndyehe, cua yuhu xaan ñu.

12 Ta ziquí sa uu tahan ra saha sa ndaa, cua cuiñí ra minoo nduzu saa xaan sa quita andívi, ta cua catyi si sihin ra: Ñaha ndo. Ndaa ndo ihya. Catyi si. Ta cua ndaa ra ndya andívi sisi minoo vico, ta cua ndyehe ra xaan iñi sii ra cuhva cuan.

13 Ta zuun ñi caa cuhva cuan i taan minoo sa ñihi xaan, ta i nacoyo xaan vehe minoo parte ñuu cuan, ta i sihi usa tahan mil ñiyiví sa cuenda sa taan cuan. Ta ñiyiví sa nandoo i yuhu xaan ñu, ta i zacahnu ñu sii Ndyoo ra ndyaa andívi.

14 Tacuan cuá cuu sa cu uu tundoho, ta sa yatyí cua coo tucu sa cu uñi tundoho.

Tívi ángel sa cu usa cuan cutu ra

15 Tacuan ta ziquí i tívi ángel sa cu usa cuan cutu ra, ta ziquí saa xaan i quisaha cahan ñiyiví sisi gloria, ta i catyi ñu: Vityí cua cundyaca ñaha ra Ndyoo ta ra Cristo sii tandihí sa i sindyaca ñaha ñiyiví. Ta cua cundyaca ñaha ra tandihí cuii maa tyiemvu.

16 Ta sa oco cumi tahan ra sahnu, ra ndyaa nu tyayu ityi nuu ra Ndyoo, i sicava ndyayu ra, ta i zacahnu ra sii ra Ndyoo.

17 Tyehen i catyi ra:
Nacuhva ndi tyahvi ndyoo suun, Ndyoo ra ndyaca ñaha, ra iyo tandihí cuii cuhva sii.
Moo cuu ra sa iyo nu quisaha si, ta ndito moo vityí,

Ta cua conditon tandihí cuii tyiemvu.

Nacuhva ndi tyahvi ndyoo suun vatyí cahnu xaan cuhva iyo suun,

Ta vityí sa quisaha cundyaca ñaha moo sii tandihí.

18 I cuxaan xaan ñiyiví ñuu ñiyiví sihin moo, zoco vityí sa saa quiví cua cuxoon sihin maa ñu.

Vityí sa saa si quiví cua tyicuhvon sii ñiyiví i sihi,

Zoco cua cuhvon sa vaha sii ra cu profeton ta sii ra cu muzun, Ta cua cuhvon sa vaha sii tandihí ñiyiví cuñí xaan suun ta sii ñu yuhu suun vazu cahnu ñu a vazu luhlu ñu. Ta sa saa si cuhva cua zanaa moo sii ñiyiví i zatívi ñuu ñiyiví.

19 Tacuan i catyi tandihí ra sahnu ndyaca ñaha ta ziquí i nuña yuvehe vehe maa ra Ndyoo sa iyo andívi, ta sisi vehe ra i ndyehi minoo satu sa cuenda tyiño sahnu i zandaa ra Ndyoo. Ta i sicoo xaan tasa zavi ta nduzu ñihi, ta cahan zavi. Ta i taan, ta i coon xaan yuu zavi.

12

Cuhva i zavaha minoo dragón sihin minoo ñaha

1 Tacuan i cuu si, ta ziquí i sicoo minoo sa iyo cahnu xaan andívi. I ndyehi sii minoo ñaha, ta zahma ña cuu ñicandyi ta sañi ña nu yoo. Ifí usi uu tahan tiñoo xiñi ña, ta cuu si corona ña.

2 Ñoho zehe ña, ta sacu saa ña. Uhvi sisi ña vatyí sa cuñí cacu si.

3 Ta ziquí i quituu tucu inga sa iyo andívi. I ndyehi sii minoo dragón cahnu. Cuaha ti, ta iyo iñu tahan xiñi ti. Usi tahan ndiquí ti. Ta ñoho minoo corona tahan tahan xiñi ti.

4 I xita cañoho ti sa yatyí zava tiñoo andívi sihin zuhma ti, ta i cañi ti sii ti nu ñuhu ñuu ñiyiví. Ta ziquí i sicuiñí ndyaa ti ityi nuu ñaha sa cuñí cacu zehe vatyí cua casi ti sii zehe ña tatu sa cacu si.

5 Ta i zacacu ña sii zehe ña, ta rayíí cuu ra, ta ityi nuu ca ñihi xaan cua cundyaca ñaha ra sii tandihí ñiyiví ñuu ñiyiví. Ta i quihin ra Ndyoo sii zehe ña, ta i sindyaca ra sii ra ndya nu ndyaa maa ra.

6 Ta ziquí i sino ñaha cuan, ta i ndihví ña sisi cuhu minoo nu sa i zanduvaha maa ra Ndyoo cuenda ña vatyí yucuan cua casi ña mil uu ziendu uñi xico quiví.

7 Ta ziquí i sicoo minoo cuatyí andívi. Minoo ángel cahnu, ra sa

nañi Miguel sihin ángel sa ndyaca ñaha ra, i sahñi tahan ra sihin dragón cuan ta sihin ángel ndíhi sihin ra dragón cuan.

⁸ Ta ñá cuu zahacanaa dragón cuan. Yucuan cuenda ñá cuu ca ndoo quítí cuan andívì.

⁹ I tava ra Ndyoo sii ra andívì, ta i quisí ra ñuu ñiyiví sihin ángel sa sino iñi sii ra vatyi i tava tucu ra Ndyoo sii tandíhi ra cuan. Ta ra dragón cuan, zuun ñi ra cuu coo ta sa naha, ta nañi ra cuihna, ta nañi ra Satanás, ta zandavi ñaha ra sii tandíhi cíui ñiyiví ñuu ñiyiví.

¹⁰ Ta ziquí i siñi vatyi saa xaan cahan minoo ra andívì, ta catyi ra: Vityi sa saa cuhva zacacu ra Ndyoo sii ñiyiví. Vityi iyo xaan cuhva sii ra, ta ndyaca ñaha xaan ra, ta tacuan tucu ra Cristo vatyi saha xaan ra Ndyoo cuhva sii ra. Tacuan cuu si vityi vatyi i tava ra Ndyoo sii cuihna, ta maa cuihna cuu ra sahan ityi nuu ra Ndyoo ta tyaa ra cuatyi sata ñu sino iñi ndiyiyaca ta ñiyaca.

¹¹ Zoco i zahacanaa ñiyiví sino iñi sii ra Ndyoo sii cuihna vatyi i sati ra cu Mvee Ticatyi ra Ndyoo niñi ra. Ta i zahacanaa tucu ñu sii ra vatyi i nacatyi ñu sihin ñiyiví cuhva i sino iñi ñu sii ra Ndyoo, ta ñá yuhu ñu sa cuu ñu cuenda ra.

¹² Yucuan cuenda cuzíi xaan iñi ndo, ndoho sa iyo andívì, zoco ndahvi ndoho sa iyo ñuu ñiyiví ta ndoho sa iyo tyañuhu vatyi sa i noo cuihna ndya nu ndyaa ndo. Ta cuxaan xaan ra vatyi sito ra vatyi ñahñi ca quívì ra.

¹³ Ta cuhva sa ndyehe ra dragón cuan vatyi i zavita ra Ndyoo sii ra ndya ñuu ñiyiví ya, ta ziquí i quisaha zayanga ra sii ñaha sa i zacacu sii lee cuan.

¹⁴ Ta i saha ra Ndyoo uu tahan ndisi sii ñaha cuan tañi sa iyo sii minoo tazu cahnu. Yucuan cuenda i cuu ndava ña, ta i quihví ña sisi cuhu nu cua ñihi ña sa casi ña

uñi cuiya zazava, ta ma nañihi coo cuan sii ña.

¹⁵ Zoco coo cuan, i tava ti cuaha xaan ndutya yuhu ti, ta i nduu si tañi minoo yuu, ta cua zatyañi si sii ñaha cuan.

¹⁶ Zoco i tyindyee ñuhu sii ña vatyi i ndata ñuhu, ta i quihví ndutya sa i tava coo cuan sihin yuhu ti.

¹⁷ Ta ziquí i cuxaan xaan coo cuan sihin ñaha cuan, ta yucuan cuenda i quita ti ta cuahan ti vatyi cua cahñi tahan ti sihin tandíhi inga ñiyiví sa cuu zehe ñaha cuan. Maa ñu cuu ñiyiví sa zavaha cuhva catyi ra Ndyoo. Ta ndyico ñu sii sa ndisa sa i zañaha ra Jesucristo.

13

Uu tahan quítí quiñi caa

¹ I sicuñi ndyei nu ñiyití yuhu tyañuhu, ta i ndyehi vatyi minoo quítí quiñi caa i quita sisi tyañuhu. Usa tahan xiñi ti, ta usi tahan ndiquí ti. Tahan tahan ndiquí ti ñoho minoo corona. Ta tahan tahan xiñi ti ndyizo si minoo tuhun quiñi.

² Quítí sa i ndyehi, caa ti tañi caa minoo cuiñi. Zoco saha ti caa tañi saha oso, ta yuhu ti cuu tañi yuhu ndicaha. Ra dragón saha cuhva maa ra sii ti. Saha ra sa cundyaca ñaha ti, ta sa coo xaan cuhva sii ti.

³ Minoo xiñi quítí cuan, ndyehi vatyi sa ñicuehe si, ta yucuan cuenda cuñi cuu ti. Zoco i nduvaha ti nu ñicuehe ti, ta iyo xaan i cuñi tandíhi ñiyiví ñuu ñiyiví, ta i sindyico ñu sii quítí quiñi caa cuan cuhva i ndyehi.

⁴ Cua zacahnu ñu sii ra dragón vatyi saha xaan ra cuhva sii quítí cuan, ta cua zacahnu tucu ñu sii quítí cuan, ta catyi ñu: Yoñi sa iyo cuhva sii tañi iyo cuhva sii quítí ya. Tatú cahñi tahan ñiyiví sihin ti, zoco ma zahacanaa ñu sii ti.

⁵ Saha dragón cuan vatyi zacahnu quítí cuan zuun ñi sii maa ti sihin cuhva cahan ti, ta cua cahan

tí ndya vaha ñi sii ra Ndyoo. Ta uu xico uu yoo cua cundyaca ñaha tí.

⁶ Ta quiñi xaan cua cahan tí sii ra Ndyoo, ta cua cahan tí ndya vaha ñi sii ziví ra Ndyoo ta cuenda nu ndyaa ra Ndyoo ta cuenda tandihí ñu sa iyo andívi.

⁷ Ta cua ñihí tí cuhva cahñí tahan tí sihin ñiyiví ñoho cuenda ra Ndyoo, ta cua zahacanaa tí. Ta cua ñihí tí cuhva cundyaca ñaha tí sii tandihí ñiyiví ñuu ñiyiví vazu ziin ziin tata ñu ta ziin ziin zahan cahan ñu ta ziin ziin ñuu ñu.

⁸ Ta ra cu Mvee Ticatyí ra Ndyoo, cuee ca sa sino ñuu ñiyiví ta sa tyaa ra Ndyoo cuhva vatyi cua cuu ra, ta cumi ra minoo libro ndyaa ziví ñiyiví cua cacu. Ta tandihí ñiyiví ñuu ñiyiví tatu ña ndyaa ziví ñu nu libro cuan, cua zacahnu ñu sii quiti quiñi cua cuan.

⁹ Tatu ndyaa zoho ndo, tyizoho ndo sa quehin.

¹⁰ Tatu cua tiin ñiyiví sii ndo ta tyihi ñu sii ndo vehe cua, cuee ca cua quihi ndazi tucu maa ñu cua zacuu ra Ndyoo. Ta ra cua cahñí sii ndo sihin mityi, cua cuu tucu maa ra sihin mityi. Yucuan cuenda cundyee xaan iñi ndo, ta cuníi xaan iñi ndo sii ra Ndyoo.

¹¹ Yaha cuan ta ziquí i ndyehi vatyi quita inga quiti quiñi cua sisi ñuhu. Ndyaa ndiquí tí tañi ndiquí mvee ticatyí, zoco cahan tí tañi cahan minoo dragón.

¹² Iyo tandihí cuii cuhva sii tí tañi iyo sii inga quiti sa quisi sa xihna ñi, ta yucuan cuenda zañiñi tí sii ñiyiví ñuu ñiyiví vatyi zacahnu ñu sii inga quiti sa xihna ñi cuan. Maa tí cuu quiti yaha xaan iñi cuehe xiñi, zoco iñduvaha tí, ta ñá sihi tí.

¹³ Ta quiti sa quita sisi ñuhu cuan, i zavaha xaan tí sa ndyetyi nahnu ndya cuhva cuu sii tí zacoon tí ñúhu sa quita andívi nu ñuhu ñuu ñiyiví. Ta i ndyehe ñiyiví cuhva zavaha tí.

¹⁴ Ta sihin sa ndyetyi sa cuu zavaha tí ityi nuu quiti sa xihna ñi

cuan, cua zandavi ñaha tí sii ñiyiví ñuu ñiyiví ta ziquí cua catyi tí sihin ñu vatyi nazavaha ñu minoo ndyoo yutu cuhva cua inga quiti cuan. Maa tí cuu quiti ñicuehe xiñi sihin mityi, zoco ñá sihi tí.

¹⁵ Ta cua ñihí quiti cu uu cuan cuhva ta cua cuhva tí sa condito sa i zavaha ñiyiví cuhva cua quiti sa xihna ñi cuan. Ta cua cuu cahan si, ta cua catyi si vatyi cua cahñí ñiyiví sii tandihí ñiyiví ña zacahnu sii si.

¹⁶ Ta cua tava tucu si tyiño vatyi cua cundyaa minoo marca sii tandihí ñiyiví a siyo ndaha cuaha ñu a yiquí nuu ñu. Cua ñihí tandihí ñiyiví marca cuan vazu cahnu ñu a luhlu ñu a cuca ñu a ndahvi ñu ta vazu muzu cuu ñu ta vazu yivi.

¹⁷ Ta yoñi cua cuu zata ta yoñi cua cuu xico tatu ña ndyaa marca cuan sii ñu a ndyaa ziví quiti cuan sii ñu a minoo número sa cuenda ziví tí.

¹⁸ Ihyá cuñi si sa coo xaan sa siñi tuñi sii yo. Yoo ndoho iyo xaan sa siñi tuñi sii, nacafñi iñi ndo sa cuenda número sii quiti cuan vatyi número sii minoo rayíi cuu si. Iñu ziendu uñi xico iñu cuu número cuan.

14

Cuhva i sata ñiyiví cuu cuenda ra Ndyoo yaa

¹ Tacuan ta ziquí i ndyehi vatyi nandyaa ra cu Mvee Ticatyí ra Ndyoo xiñi yucu Sión. Ta sihin ra ndihí ziendu uu xico cumi mil tahan ñiyiví. Maa ñi ñiyiví sa ndyaa ziví ra cu Mvee Ticatyí ta ziví Zetu ra yiquí nuu ñu.

² Ta ziquí i siñi minoo nduzu sa quita andívi. Cuu si tañi nduzu sa cucayu cuaha xaan yuu ta tañi nduzu iyo tatu ñihí xaan cahan zavi. Ta siñi nduzu sa zavacu ñiyiví arpa.

³ Ta sata ñiyiví minoo yaa saa ityi nuu ra ndyaa nu tyayu cahnu ta nuu sa cumi tahan quiti sa yucu sihin ra ta nuu ra sahnu ndyaca ñaha,

ndihí ca. Ta yoñi ca cuu cutuhva yaa cuan, maa ñi sa ziendu uu xico cumi mil tahan ñiyivi sa i cacu nu yucu ñiyivi ñuu ñiyivi sito sii si.

⁴ Maa ñu cuu ñu sa ñá zavaha ndya vaha ñi. Ñá quixi zana rayii sihin ndya vaha ñi ñaha. Ñahñi maa cuatyi zavaha ñu caña ñi. Ta ndyico ñu sii ra cu Mvee Ticatyi vazu ndyaca maa cuahan ra. Cacu ñu nu yucu ñiyivi ñuu ñiyivi, ta cuu ñu tañi sa xihna cuii ñi ofrenda cua ñihí ra Ndyoo ta ra cu Mvee Ticatyi.

⁵ Yoñi cuu catyi vatyi vatya ñu vatyi ña tuhva ñu cahan cuendu. Ta ñahñi maa cuatyi ñu iyo ityi nuu ra Ndyoo.

Tyiño i zacoto uñi tahan ángel

⁶ Tacuan i cuu si ta ziqui i ndyehi vatyi ndava minoo ángel ta cuahan ra zava mahñu andivi sa quisi catyi ra Tuhun Ndyoo sa ma cunaa, ta nacatyi ra yozo caa cua zacacu ra Ndyoo sii ñiyivi. I zacoto ra tuhun cuan sii ñiyivi iyo ñuu ñiyivi, sii ñiyivi ziin ziin nación ta ziin ziin ñuu ta ziin ziin tata. Ta sii ñiyivi cahan zahan ta sii ñiyivi cahan tyehen ñi.

⁷ Saa xaan i cahan ra, ta i catyi ra: Nayuhu ndo sii ra Ndyoo, ta zacahnu ndo sii ra vatyi sa saa cuhva cua tyicuhva ra sii ñiyivi. Zacahnu ndo sii ra i zavaha andivi ta ñuu ñiyivi ta tyañuhu ta tandihí zoco ndutuya.

⁸ Ta i sindyico inga ángel sii ángel sa xihna ñi cuan, ta catyi ra: Sa tivi ñuu cahnu Babilonia vatyi i zativi ñiyivi ñuu cuan sii tandihí ñuu ñiyivi sihin tandihí cuatyi sa quiñi xaan i zavaha ñu.

⁹ Tacuan i catyi ángel cu uu cuan, ta i sindyico inga ángel sii ra, ta saa xaan cahan tucu ra ta catyi ra: Yoo ñiyivi cua zacahnu sii quiti cuan a sii sa zavaha ñiyivi cuhva caa ti, a tatu saha ñiyivi sa cundyaa marca ti yiqui nuu ñu a ndaha ñu.

¹⁰ Cuaha xaan cuaha xaan tun-doho cua ndyehe ñu zavaha cuhva cuan vatyi cua zandoho ra Ndyoo

sii ñu. Sa cuxaan xaan ra vityi, ta cua tasi tuñi ra sii ñiyivi zavaha cuhva cuan ityi nuu ángel ra ta ityi nuu ra cu Mvee Ticatyi vatyi cua tyihi ra sii ñu nu cayu ñúhu sihin azufre.

¹¹ Ñiyivi zacahnu sii quiti cuan a sii sa zavaha ñiyivi cuhva caa ti, a tatu saha ñu cundyaa marca a zivi ti sii ñu, cua cayu ñu. Cua cayu ñu ñiyaca ta ndiyacata, ta cua ndaa ñuhma ñu tandihí cuii tyiemvu.

¹² Yucuan cuenda cuñi si vatyi ñiyivi cuenda ra Ndyoo, yoo ñu tyaa yahvi sa cahan ra ta sino xaan iñi ñu sii ra Jesucristo, cuñi si vatyi nacundyee xaan iñi ñu. Catyi ángel cuan.

¹³ Ta ziqui i siñi minoo nduzu sa quita andivi, ta catyi si sihin: "Vityi ta ityi nuu ca zii xaan cuu sii ñiyivi sino iñi sii ra ndyaca ñaha sii yo cuee ca sa cuu ñu. Avi, catyi Tatyi Li ra Ndyoo vatyi cua quitatu ñu sihin tyiño ñu, ta sa vaha sa i zavaha ñu cua cuhun si gloria sihin ñu."

Cuhva cua tasi tuñi ra Ndyoo sii ñiyivi

¹⁴ Tacuan ta ziqui i nandyehi, ta i ndyehi minoo vico cui, ta nuu si ndyaa minoo ra caa tañi caa ra i quisi ndya gloria. Ñoho minoo corona xuhun cuaan xiñi ra, ta ndaha ra minoo mityi cutya, xaan xaan si.

¹⁵ Ta i quita inga ángel ndya nu ndyaa ra Ndyoo, ta i cana saa ra ta cahan ra sihin ra ndyaa nu vico cuan, ta i catyi ra: Sa saa si cuhva nacuhun ndaha tyiñon vatyi sa sityi xaan sa iyo ñuu ñiyivi. Cahndyon sii si ta nacuhun. Catyi ra.

¹⁶ Ta ziqui ra ndyaa nu vico cuan i zayaha ra mityi ra nuu ñuu ñiyivi, ta i naquihin ra ndaha tyiño ra.

¹⁷ Yaha cuan ta ziqui i quita inga ángel ndya nu ndyaa ra Ndyoo andivi, ta ndyizo tucu maa ra minoo mityi cutya ta xaan xaan si.

¹⁸ Ta i quita inga tucu ángel ndya nu ndyaa altar. Maa ra ndyizo tyiño nu cayu ñúhu nu altar. Ta i cana saa ra ta catyi ra sihin ra ndyizo mityi xaan cuan: Sa sityi xaan yucu vixi uva sa iyo ñuu ñiyivi. Yucuan cuenda cahndyon sii si.

¹⁹ Ta ziqui i zayaha ángel cuan mityi ra nu ñuu ñiyivi ta sahndya ra yucu vixi uva sa iyo ñuu ñiyivi, ta i tyihi ra sii si nu cua quita ndutya si vatyi yucuan cuu nu cua cuxaan xaan ra Ndyoo sihin ñiyivi.

²⁰ Sata ñuu cuu nu i sañi ra yucu vixi uva cuan. Ta cuahá xaan niñi si i quita nu i sañi ra sii si. Yaha xaan cuaha niñi i quita. Cono xaan i nduu si. I ndaa si, ta saa si ndya freno caballo sa zucu. Ta i saa si uñi ziendu kilómetro nu ñuhu cuhva i sino si.

15

Cua coo inga usa tahan tundoho, ta ziqui cua ndihí si

¹ Tacuan ta ziqui i ndyehi inga sa iyo cahnu xaan andivi, ta i zayuhu xaan si sii. I ndyehi usa tahan ángel, ta iyo cuhva sii ra sa zaquisi ra usa tahan ca tundoho. Sihin ihya tundoho cua ndihí si vatyi cua ndihí sa cuxaan ra Ndyoo sihin ñiyivi.

² Ta i ndyehi minoo sa caa tañi caa tyañuhu. Xiño si tañi ino, ta zaca ñúhu sihin ndutya cuan. Ta nandyaña ñiyivi yuhu tyañuhu cuan. Ndaha ñu arpa sa saha ra Ndyoo sii ñu. Maa ñu cuu ñu i zahacanaa sii quiti quiñi caa cuan ta sii si i zavaha ñiyivi cuhva caa ti ta sii número sa cuu cuenda zivi ti.

³ Sata ñiyivi cuan yaa ra Moisés muzu ra Ndyoo ta yaa ra cu Mvee Ticatiyi. Tyehen catyi ñu:

Cahnu xaan ta iyo xaan cuu tandihí sa i zavohon, yoho Ndyoo, vatyi iyo tandihí cuii cuhva suun;

Ndoo xaan ta ndisa xaan cuu cuhva zavohon,

Ta rey cuun sii tandihí ñiyivi ñuu ñiyivi.

⁴ Yoñi ñiyivi iyo sa ma yuhu suun ta ma zacahnu ñu zivun Vatyi maa tuhun ñi moo cuu ra ii. Ta cua quisi tandihí ñiyivi ñuu ñiyivi ta cua zacahnu ñu suun Vatyi sa ndyehe ñu cuhva ndoo cuaan zavohon.

⁵ Yaha cuan ta ziqui i ndyehi vatyi i nuña minoo nu ii xaan ca sisi gloria nu ñoho yuu sa ndyaa ley maa ra Ndyoo.

⁶ Sisi vehe cuan i quita sa usa tahan ángel sa ndyizo sa usa tahan tundoho cuan. Ñoho ra zahma vaha xaan. Cuisi xaan zahma ra, ta xiño xaan si. Ta nuhñi yoho xuhun cuaan yiqui ndyica ra.

⁷ Minoo sa cumi tahan quiti sa yucu yatyi ñi sihin ra Ndyoo i saha ti minoo coho xuhun cuaan sii sa minoo minoo sa usa tahan ángel cuan. Sisi coho cuan ñoho cuhva cuaan xaan maa ra Ndyoo, ra ndito tandihí cuii maa tyiemvu.

⁸ Ta i situ cuii nu ndyaa ra Ndyoo sihin ñuhma vatyi minoo ra cahnu xaan cuu maa ra Ndyoo, ta iyo tandihí cuii cuhva sii ra. Ta yoñi i cuu quiñi nu ndyaa ra ndya sa i yaha sicoo tandihí sa usa tahan tundoho sa ndyizo sa usa tahan ángel cuan.

16

Tundoho sa cua zaquisi sa usa tahan ángel cuan

¹ Tacuan ta ziqui i siñi vatyi saa xaan i cahan minoo ra ñoho nu ndyaa ra Ndyoo, ta i catyi ra sihin sa usa tahan ángel cuan: Cuahan ndo ta coyo ndo sa ñoho sisi coho sa ndyizo ndo ziqui ñuu ñiyivi vatyi sa cuxaan xaan maa ra Ndyoo.

² Ta cuahan ángel sa xihna ñi cuan, ta i sicoyo ra sa ñoho sisi coho ra ziqui ñuu ñiyivi, ta tandihí ñiyivi sa ndyizo marca quiti cuan ta zacahnu ñu sii sa i zavaha ñiyivi cuhva

caa ti, i quita ityi sii ñu. Nahnu xaan si, ta uhu xaan si.

³ Ta ángel sa cu uu cuan i sicoyo ra sa ñoho sisi coho ra nu tyañuhu, ta i nduu si niñi tañi niñi cuxi caa sa quita sii minoo ra tatu sa i sihi ra. Ta tandihí quiti ndito sisi tyañuhu, i sihi ti.

⁴ Ta sa cu uñi ángel cuan i sicoyo ra sa ñoho sisi coho ra nu tandihí yuu, ta nu tandihí zoco ndutya, ta i nduu si niñi.

⁵ Ta ziqui i siñi vatyi ángel ra ndyizo tyiño sa cuenda ndutya i catyi ra: Ndoo xaan cuun vatyi tacuan tasi tuñun, yoho ra ndyaca ñaha. Ii xaan cuun ta tandihí cuii tyiemvu iyo moo.

⁶ Ndoo xaan cuhva zayohon vatyi ñiyivi ñuu ñiyivi i sati ñu niñi ñiyivi cuñi xaan suun ta niñi ra profeta. Ta vityi cua coho ñiyivi ña vaha ña ndutya niñi vatyi tacuan tahan si sii ñu.

⁷ Ta i siñi vatyi cahan inga ra ñoho nu ndyaa altar, ta catyi ra: Ndisa, yoho ra ndyaca ñaha. Ra Ndyoo sa iyo tandihí cuii cuhva cuu suun, ta vaha xaan ta ndoo xaan tasi tuñun.

⁸ Tacuan ta ángel sa cu cumi cuan i sicoyo ra sa ñoho sisi coho ra nu ñicandyi, ta i ñihi ñicandyi cuan cuhva ñihi ca cua cahmi si sii ñiyivi.

⁹ Ta yaha xaan i ndiyi tandihí ñiyivi, zoco ñá zama ñu cuhva zacuu ñu. Ta ñá ndu-uu iñi ñu cuatyi ñu, ta ñá zacahnu ñu sii ra Ndyoo sino ca i cahan ñu ndya vaha ñi sii ra vatyi maa ra i tasi tundoho cuan.

¹⁰ Ta ángel cu ohon cuan i sicoyo ra sa ñoho sisi coho ra nu ndyaca ñaha quiti cuan, ta i nduñaa xaan nacahnu nu ndyaca ñaha ti. Ta i sacu xaan ñiyivi vatyi ña cundyee iñi ñu tandihí sa uhu ñu.

¹¹ Zoco i cahan ñu ndya vaha ñi sii ra Ndyoo ra ndyaa andivi vatyi uhu xaan ñu ta cahvi xaan ñu, zoco ñá ndu-uu iñi ñu cuatyi ñu.

¹² Ta ángel cu iñu cuan i sicoyo ra sa ñoho sisi coho ra nu yuu cahnu

sa nañi Eufrates, ta i ndoco yuu cuan vatyi tacuan ta cua cuu yaha tandihí ra rey, ra ndyaca ñaha ityi caña ñicandyi.

¹³ Tacuan i cuu si, ta ziqui i ndyehi vatyi i quita tatyi cuihna yuhu dragón cuan ta yuhu inga quiti cuan ta yuhu minoo ra i catyi vatyi cahan ra sa cuenda ra Ndyoo zoco yivi. Ta caa tatyi cuihna cuan tañi caa zahva izu.

¹⁴ Ta yucuan cuu tatyi cuihna sa cuu zavaha sa ndyityi, ta cuahan si cua zandu-iñi si sii tandihí ra cu rey ra ndyaca ñaha ra iyo nacahnu ñuu ñiyivi vatyi cua cahñi tahan ra quivi tahan si sihin ra Ndyoo ra iyo tandihí cuii cuhva sii.

¹⁵ Ta i catyi ra Ndyoo: Zaha ndo cuenda vatyi zana ñi iñi ndo ta cua quisi tañi quisi minoo ra zuhu cuhva sa ña sica iñi ñiyivi. Zii xaan cua cuu sii ñiyivi ndatu sii, ta ndyaa listo ñu, ta ñahñi sa cumañi sii ñu. Zoco ñu ña ndyaa listo, cua cuahan xaan nuu ñu. Catyi ra.

¹⁶ Ta cua titahan tandihí ra cu rey sihin tandihí zandaru ra minoo nu nañi si Armagedón sihin zahan hebreo.

¹⁷ Ta ángel cu usa cuan i sicoyo ra sa ñoho sisi coho ra nu tatyi. Ta saa xaan i quita nduzu cahan minoo ra ñoho nu ndyaa tyayu ra Ndyoo. Ta catyi ra ndyaa nu tyayu cuan: Sa cuu vityi. Catyi ra.

¹⁸ Tacuan ta ziqui i sicoo tasa zavi ta nduzu ñihi, ta i sicoo xaan nduzu zavi, ta i sicoo minoo sa taan ñihi xaan ca ta ziqui tandihí sa taan sa iyo cuhva ndya quisaha ñuu ñiyivi.

¹⁹ Sihin sa taan i ndata ñuu cahnu cuan. Uñi cuhva i ndata si. Ta i tani xaan vehe tandihí inga ñuu sa iyo ñuu ñiyivi. Sihin cuhva cuan i nacohon iñi ra Ndyoo sii ñuu cahnu Babilonia cuan cuhva quiñi xaan zavaha ñiyivi ñuu cuan, ta i zandoho xaan ra sii ñu vatyi sa cuxaan xaan ra sihin ñu.

²⁰ Ta i naa tandihí ñuhu sa iyo sisi tyauhu sihin sa taan, ta i nduva tandihí yucu.

²¹ Nahnu xaan yuu zavi i coon ziqui ñiyivi. Ta iyo si vee si uu xico kilo. I cuxaan xaan ñiyivi sihin ra Ndyoo sa cuenda tundoho i zacuu yuu zavi cuan vatyi cahnu xaan tundoho i saha si, ta i cahan ñu ndya vaha fi sii ra Ndyoo.

17

Cuhva cua tyicuhva ra Ndyoo sii minoo ñaha ziqui

¹ Ta ziqui i quisi minoo sa usa tahan ángel sa ndyizo sa usa tahan coho cuan, ta i cahan ra sihin, ta catyi ra: Ñaha ihya. Cua zañehi suun cuhva cua tahan minoo ñaha zi iñi, ñaha sa ndyaa nuu tandihí tyauhu.

² I zavaha ra rey ra ndyaca ñaha ñuu ñiyivi cuatyi sihin ña. Ta ñiyivi ñuu ñiyivi, yaha xaan i tivi ñu sa cuenda sa ña vaha sa zavaha ña. Catyi ra.

³ Ta ziqui sihin cuhva i zandyeh Tatyi Ii ra Ndyoo sii, ta i sindyaca ángel cuan sii sisi cuhu, ta yucuan i ndyehi sii minoo ñaha. Yozo ña zi qui minoo quiti cuaha. Usa tahan xiñi ti, ta usi tahan ndiqui ti. Ta iñi xaan ti tuhun quiñi, tuhun cahan ndya vaha fi sii ra Ndyoo.

⁴ Ñoho ñaha cuan zahma tyacu tixinda ta tyacu cuaha, ta yaha xaan i cucutu ña sihin ndaha tyiño xuhun cuaan ta yuu vaha ta perla. Ndaha ña minoo coho xuhun cuaan situ cuii si sihin tandihí nuu sa ña vaha vatyi cuaha xaan sa ndya vaha fi zavaha ña.

⁵ Yiqui nuu ña ndyaa minoo zivi, zoco ñá sito ñiyivi ñaa zivi cuu si, ta catyi si: "Ihya ñaha cuu ñuu Babilonia cahnu, maa ña cuu zihí tandihí ñu zii iñi ta sii tandihí sa ña vaha sa iyo ñuu ñiyivi."

⁶ Ta ziqui i ndyehi vatyi siñi ñaha cuan vatyi i sihi ña niñi ñiyivi cuñi

xaan sii ra Ndyoo ta ñiyivi i sihi sa cuenda ra Jesú, ta i yuhu xein.

⁷ Ta ziqui i catyi ángel cuan sihin: ¿Ñacu yuhu xoon? Cua zacote suun yoo ña cuu ña ya ta ñaa sa cuñi si catyi si sa cuenda quiti sa iyo usa tahan xiñi ta usi tahan ndiqui ta ndyizo ti sii ña.

⁸ Quiti sa i ndyehun ihya, i sindito ti, zoco ña ndito ca ti, zoco cua quita ti sisi yavi cono ñu ñoho ñiyivi i zavaha ndya vaha ñi, ta cua cuhun ti nu cua cuu ndihí ti. Ta ñiyivi ñuu ñiyivi tatu ña ndyaa zivi ñu nu libro i zavaha ra Ndyoo ndya ta cumañi ca sino ñuu ñiyivi, libro sa catyi yoo cuu ñiyivi cua cundito tandihí cuii tyiemvu, tatu ña ndyaa zivi ñu nuu libro cuan, iyo xaan cua cuñi maa ñu ndyehe ñu sii quiti sa sicoo ta i sihi ti, zoco cua naquita tucu ti inga saha.

⁹ Ta ihya cuu minoo sa cuu coto ñiyivi tatu cuu cutuñi iñi ñu sii si. Sa usa tahan xiñi ti cuu usa tahan yuco nu ndyaa ñaha cuan.

¹⁰ Ta iyo tucu usa tahan rey. Ohon tahan ra sa i ndoyo ñuhu ra, ta minoo ra ndyaca ñaha vityi. Ta rey sa cu usa cuan cumañi ca quisi ra. Cua quisi ra, zoco zuhva ñi quiñi cua cundyaca ñaha ra.

¹¹ Ta sa cu uña tahan rey cuu quiti sa i sicoo ta i sihi ti, ta zuun ñi ra i cuu tucu rey sa cu usa cuan, ta cua cuhun ra nu cua naa ra.

¹² I ndyehun vatyi iyo usi tahan ndiqui quiti cuan. Sa usi tahan ndiqui ti cuu usi tahan rey. Tañaha ca cundyaca ñaha ra. Cua cundyaca ñaha sa usi tahan rey cuan zuhva ñi quiñi iñi sihin quiti cuan.

¹³ Fin xaan cua cuu sa usi tahan rey cuan, ta cua cuhva ra tandihí cuhva iyo sii ra sii quiti cuan. Cua cuhva ra sa cundyaca ñaha quiti cuan sii sa ndyaca ñaha maa ra.

¹⁴ Cua cahñi tahan tandihí ra sihin ra cu Mvee Ticatyi, ta cua zahacanaa ra cu Mvee Ticatyi sii tandihí ra cuan vatyi ra cu Mvee Ticatyi, ra

ndyaca ñaha cuu ra sii tandihí inga ra ndyaca ñaha ta rey sii tandihí inga rey. Ta ñiyiví sa cuu cuenda ra cu Mvee Ticatyí, ra i casi ra Ndyoo cuu sii ra, ta i cana ra sii ra, ta ma ndu-uu iñi ra ta ma zandoo ra sii ra Ndyoo.

¹⁵ Tacuan i catyi ángel cuan, ta i catyi tucu ra sihin: I ndyehun vatyi ndyaa ñaha zii iñi cuan nuu tandihí tyañuhu. Tyañuhu cuan cuu tañi ñuu sa iyo ñuu ñiyiví, ta tañi ñiyiví ziiñ ziiñ nación ta ñiyiví cahan ziiñ ziiñ zahan ta ziiñ ziiñ tyehen ñi.

¹⁶ Ta sa usi tahan ndiquí sa ndyehun xiñi quíti cuan cuu rey sa cua cuxaan xaan sihin ñaha zii iñi cuan, ta ñaha cuan cuu tañi minoo ñuu, ta cua zanaa ra cu rey cuan sii si sihin tandihí sa iyo sii sí. Cua cahñi ra sii ñiyiví, ta cua cahmi ra ñuu cuan.

¹⁷ Tacuan cua zavaha ra vatyi maa ra Ndyoo saha minoo sa siñi tuñi sii ra, ta cua zavaha ra cuhva cuñi maa ra Ndyoo cuhva cuan vazu ña sito ra. Yucuan cuenda cua cu-iñi ra ta cua cuhva ra tandihí cuhva iyo sii maa ra sii quíti cuan ndya quíví cua cuu tandihí cuii tyiñ cuhva i catyi maa ra Ndyoo.

¹⁸ Ta ñaha sa sindyehun cuan cuu minoo ñuu cahnu sa ndyaca ñaha sii tandihí ra cu rey sa iyo ñuu ñiyiví.

18

Cuhva cua tiví ñuu Babilonia

¹ Tacuan i cuu si, ta ziquí i ndyehi sii inga ángel. I quita ra andivi, ta noo ra ndya nu ñuhu. Cuaha xaan cuhva iyo sii ra, ta ndisi xaan nduu ñuu ñiyiví sihin sa ndisi maa ra.

² Ta i cana saa ra sihin minoo nduzu saa xaan, ta catyi ra: Sa i tiví ñuu cahnu Babilonia. Maa ñi ca tatyí cuñhna iyo ñuu cuan vityí, maa ñi ca tandihí cuii nuu tatyí ña vaha ta tyasii ta inga zaa quiñi caa.

³ Tacuan iyo ñuu cuan vityí vatyi ñiyiví ñuu cuan i zatíví xaan sii ñiyiví ñuu ñiyiví, ta i zavaha ñu ndya vaha ñi. Ra rey ra ndyaca

ñaha ñuu ñiyiví iñi ñi cuhva ndya vaha ñi i zavaha ra sihin ñiyiví ñuu cuan. Ta ra xico ndaha tyiñ, cuca xaan nduu ra sa xico ra ndaha tyiñ sii ñiyiví ñuu cuan vatyi zanaa xaan ñu xuhun ñu tandihí cuii cuhva.

⁴ Tacuan i catyi ángel cuan, ta ziquí i siñi vatyi cahan inga ra andivi ta catyi ra: Quita ndo ñuu cuan, ndoho sa cuu ñiyiví sii. Ma zavaha ndo sa quiñi xaan tañi zavaha ñiyiví yucuan ta ndoho ndo tañi cua ndoho maa ñu.

⁵ Cuaha xaan cua nduu cuatyí zavaha ñu ndya cuhva ndya sa saa si ndya andivi, ta ma naa iñi ra Ndyoo cuatyí zavaha ñu.

⁶ Uu saha cua zandyeha ra tundoho sii ñu sa cuenda minoo minoo sa ña vaha i zavaha ñu. Uu saha cua nacuhva ra coho ñu sa xaan cuhva i zacoho tucu maa ñu sii ñiyiví.

⁷ I zacahnu xaan ñu sii ñu, ta i cuzíi xaan iñi ñu zavaha ñu tandihí cuii cuhva cuñi maa ñu. Yucuan cuenda nandyeha xaan maa ñu tundoho vatyi sica iñi ñiyiví ñuu cuan: “Ñuu ndi cuu tañi minoo ñaha ndyaca ñaha. Ña ndahvi ndi, ta ñahñi tucuihya iñi cua ndyeha ndi.”

⁸ Sa cuenda cuhva zacahnu ñu sii ñu, ta minoo ñi quíví cua quisí xaan tundoho ziquí ñu. Cua cuu ñu; cua nducuihya xaan iñi ñu; cua cuzoco ñu. Ta cua cayu ndihí ñuu cuan vatyi iyo xaan cuhva sii ra Ndyoo ra ndyaca ñaha sii yo, ta sa tyaa ra cuhva tasi tuñi ra sii ñuu cuan.

⁹ Ra rey ra ndyaca ñaha ñuu ñiyiví, ra i zavaha ndya vaha ñi ñuu cuan, cua vacu xaan ra ta cua nducuihya xaan iñi ra quíví ndyeha ra vatyi cayu ñuu cuan vatyi i zavaha ra rey cuan ñaa ndihí sa cuñi maa ra iñi ñi cuhva sihin ñiyiví ñuu cuan.

¹⁰ Cua cuiñi ndyaa ra ndya zava vatyi yuhu ra tundoho cahnu xaan sa cua coo ñuu cuan, ta cua catyi ra: Ndahvi yoho ñuu cahnu Babilonia. Tañi tyehen ñi ta sa i zanaa ra Ndyoo suun.

11 Ra xico ndaha tyiño tucu, cua vacu xaan ra, ta cua nducuihya iñi ra sa cuenda sa cua tahan ñuu cuan vatyi yoñi ca zata ndaha tyiño ra

12 tañi xuhun cuaan, xuhun cuiyi, yuu vaha, perla, zahma yahvi xaan, zahma seda, ta zahma yuhva tixinda ta yuhva cuaha, ta tandihí nuu vitu vaha sa tyaqui sahan xico ta ndaha tyiño sino sihin noho nahnu uru yulu ta vitu vaha ta caa ta yuu.

13 Yucuan i cuyahvi tucu yutu canela, ta yulu ta cutu ta perfume ta vino ta azetye ta yutyi pan vaha ta trigo, ta i cuyahvi tucu quiti tañi quiti ndyizo ndaha tyiño ta mvee ticateyi, ta caballo, ta carreta. Ta yucuan i cuyahvi tucu ñiyivi ndihí ca vatyi cua cuu ñu muzu ñiyivi.

14 Ta ra xico ndaha tyiño, cua catyi ra sihin ñuu cuan: ¡Ña cumi con tandihí ndaha tyiño vaha xaan sa tahan xaan iñun; sa ndaha cua naa tandihí cuii sa cucon! Catyi ra.

15 Ndyaa zava cua cuiñi ndyaa ra i nducuca sa xico xaan ra ndaha tyiño ra ñuu cuan. Ndyaa zava cua cuiñi ndyaa ra vatyi yuhu xaan ra ndyehe ra cuhva ndoho xaan ñuu cuan. Ta cua vacu saa xaan ra, ndya cuhva cana saa ñi ca ra, ta catyi ra:

16 ¡Ndahvi ñuu cahnu xaan cuan! Tañi minoo ñaha i cuu si vatyi ñiyivi ñuu cuan i siñoho ñu zahma vaha xaan, zahma yuhva tixinda ta zahma cuaha, ta i sityiño ñu ndaha tyiño xuhun cuaan ta yuu vaha ta perla.

17 ¡Ta tañi tyehen ñi cua naa tandihí cuii sa cuca xaan ñu! Tandihí ra xu sii barco ta ra zacaca sii tu sihin ra zatyiño sihin tu, cua cuiñi ndyaa ra ndya zava.

18 Ta cuhva sa ndyehe ra cuhva cayu ñuu cuan, cua catyi ra: Ñahñi inga ñuu iyo tañi ñuu cahnu ya. Cua catyi ra.

19 Ta cua tyizo ra ñuhu xiñi ra vatyi nducuihya xaan iñi ra, ta cua

vacu saa xaan ra ndya cuhva cana saa ñi ca ra, ta cua catyi ra: ¡Ay! ¡Ndahvi ñuu cahnu cuan! Tandihí ñiyivi sa iyo barco, nducuca xaan ra ñuu cuan vatyi i zata xaan ñiyivi ndaha tyiño ra yucuan. Ta vityi, tañi tyehen ñi ta sa cua naa ñuu cuan. Tacuan cua catyi ra.

20 Zoco vityi cuzii xaan iñi maa ndo ndoho sa yulu andivi ta ndoho ra apóstol ta ndoho ra profeta vatyi vityi tasi tuñi ra Ndyoo sii ñiyivi ñuu cuan sa cuenda sa ña vaha i zavaha ñi sihin maa ndo.

21 Tacuan ta ziqui i ndyehi vatyi i cañihi minoo ángel sii minoo yuu. Cahnu xaan yuu cuan tañi minoo yuu molino cahnu, ta i zavita ángel cuan sii si sisi tyañuhu, ta catyi ra: Zuun ñi cuhva ya cua zavita ra Ndyoo sii ñuu cahnu Babilonia. Ta yoñi cua ndyehe ca sii si.

22 Ñahñi ca yaa cua coo ñuu cuan vatyi yoñi ca cua zavacu ndyalin, ta yoñi ca cua tiví tiyoo a cutu. Yoñi ca cua zatyiño yucuan, ta yoñi ca cua ndyico nuñi.

23 Ñahñi ca ñúhu cua cayu ñuu cuan sa sa cuaa. Ta ma coo ca vico tindaha vatyi ra ñuu cuan cuca xaan ra, ta cahnu xaan i nduu ra sa xico ra ndaha tyiño ra nacahnu ñuu ñiyivi. Ta i zandavi ñaha xaan ñiyivi ñuu cuan sii tandihí ñiyivi ñuu ñiyivi (sihin sa ña vaha sa i zavaha ñu.)

24 Ta ñuu cuan i sahñi ñiyivi sii ra profeta ta sii ñiyivi cuñi xaan sii ra Ndyoo, ta nacahnu ñuu ñiyivi i sahñi tucu ñu sii ñiyivi vaha.

19

1 Yaha cuan ta ziqui i siñi minoo nduzu ñihi xaan vatyi cuaha xaan ñiyivi cahan sisi gloria, ta catyi ñu: ¡Aleluya! Maa ra Ndyoo Zutu yo cuu ra zacacu sii yo. Iyo tandihí cuii cuhva sii maa ra. Nazacahnu yo sii ra.

2 Vatyi ndoo xaan ta vaha xaan zandaa ra tysiño. Ta sa i tasi tuñi ra sii ñaha zii iñi cuan. Ta maa ña i zativi xaan sii ñiyivi ñuu ñiyivi

vatyi yaha xaan i zavaha ña sa ña vaha. Sa tasi tuñi ra sii ñaha cuan. (Ta ñaha cuan cuu ñuu Babilonia sa cahan si tuhun.) Ta i tasi tuñi ra sii ñuu cuan vatyi i sahñi ñiyivi ñuu cuan sii muzu ra.

³ Tacuan i catyi ñiyivi cuan, ta ziñui i catyi tucu ñu: ¡Aleuya! Cua cayu ñuu cuan tandihí cuii tyiemvu.

⁴ Ta sa oco cumi tahan ra sahnu ndyaca ñaha ta sa cumi tahan quiti sa yulu yatyi ñi nu ndyaa ra Ndyoo i sicava ndyayu ra, ta i zacahnu ra sii ra Ndyoo, ra ndyaa nu tyayu cuan, ta i catyi ra: ¡Nacuu si tacuan, ta nacuu si sa ndisa! ¡Aleyuya!

⁵ Nu ndyaa tyayu cuan i cahan minoo ra, ta catyi ra: Ndoho ra cuu muzu maa ra Ndyoo, ndoho sa yulu sii ra vazu ñiyivi cahnu cuu ndo a vazu ñiyivi ndyahi cuu ndo zoco zacahnu ndo sii ra, catyi ra.

Cuhva cua coo vico tandaha ra cu Mvee Ticatyi ra Ndyoo

⁶ Ta ziñui i siñi vatyi cahan cuaha xaan ñiyivi, ta i cuu si tañi sa cayu cuaha xaan yuu ta tañi nduzu tatu ñihi xaan cahan zavi. Tyehen i catyi ñu: ¡Aleyuya! Vatyi ndyaca ñaha ra ndyaca ñaha sii yo, ta iyo tandihí cuii cuhva sii maa ra Ndyoo, ta ñihi xaan ra.

⁷ Nacuzzi xaan cuñi yo, ta nazacahnu xaan yo sii ra vatyi sa saa cuhva cua tindaha ra cu Mvee Ticatyi ra Ndyoo. Ta sa ndyaa listo ñiyivi cua cuu tañi ñiazihí ra.

⁸ Ñoho ñu zahma vaha; ndii xaan si, ta cuisi xaan si. Vatyi zahma cuan cuu tañi cuhva ndoo xaan zavaha ñiyivi sa cuu cuenda maa ra Ndyoo. Catyi ñu.

⁹ Ta ziñui i catyi ángel cuan sihin: Tyehen tyoon: “Zii xaan cuu sii ñiyivi i cana ra Ndyoo vatyi cuyucu ñu nu iyo vico tandaha ra cu Mvee Ticatyi ra.” Ta i catyi tucu ra: Ihya cuu tuhun i cahan maa ra Ndyoo sa ndisa cuii.

¹⁰ Ta ziñui i sicuiñi siti nuu ángel cuan vatyi cua zacahni sii ra, zoco i

catyi ra sihin: Ma zavohon tacuan. Yuhvi cui muzu maa ra Ndyoo tañi moo ta tañi inga hermanon, tandihí ndoho ra ma zandoo sa ndisa sa i zacoto ra Jesú. Zaca-nun sii ra Ndyoo. Vatyi tandihí tuhun sa cahan ra profeta, iyo si vatyi cua zacahnu si sii ra Jesú.

Minoo ra yozo sii minoo caballo cuisi

¹¹ Ta ziñui i ndyehi vatyi nuña andivi, ta i ndyehi sii minoo caballo cuisi. Ra sa yozo sii ti nañi ra, Ra Vaha Xaan ta Ra Ndisa Xaan vatyi ndoo xaan ndyaca ñaha ra, ta minoo cuhva vaha xaan sahñi tahan ra.

¹² Ndisi xaan i cuu siti nuu ra tañi ñuhu, ta cuaha xaan corona ñoho xiñi ra, ta ndyaa tucu ziví sii ra, zoco yoñi sito sii si; maa ñi maa ra sito.

¹³ Zahma sa ñoho ra, lehle si sihin niñi, ta ziví ra cuu Tuhun Ndyoo.

¹⁴ Tandihí zandaru maa ra Ndyoo sa iyo andivi, ndyico ra sii ra. Ñoho tandihí ra zahma vaha. Cuisi si, ta ndii xaan si. Ta yozo tandihí ra caballo cuisi.

¹⁵ Ta ra cu nuu sii zandaru cuan, ñoho minoo espada xaan yulu ra vatyi cua cañi ra sii ñiyivi ñuu ñiyivi sihin si. Ñihi xaan cua cundyaca ñaha ra sii ñu. Cua zañaha ra cuhva sa cuxaan xaan maa ra Ndyoo cahnu sihin ñiyivi. Tañi ra sañi ziñui yulu vixi uva sihin saha ra ta quita ndutya si, tacuan cua zandyhe ra tundoho sii ñu.

¹⁶ Ta zahma ra ta nu zihin ra ndyaa letra ta catyi si tyehen: “Rey cuu ra sii tandihí inga rey, ta ndyaca ñaha ra sii tandihí inga ra ndyaca ñaha.”

¹⁷ Ta ziñui i ndyehi vatyi ndyaa minoo ángel nu ñicandyi, ta saa xaan i cana saa ra sii tandihí zaa sa ndava andivi, ta catyi ra: Ñaha ndo. Titahan ndo vatyi ra Ndyoo cahnu cua cuhva ra sa cuxiñi ndo.

¹⁸ Cua casi ndo coño ñuhu ra cu rey ta coño ñuhu ra ndyaca ñaha sii

zandaru ta coño ñuhu ra nahnu ta coño ñuhu caballo zono ra ta coño ñuhu ra yozo sii ti. Cua casi ndo coño ñuhu sii tandihí ñiyivi, sii ra cu muzu ta sii sa yivi ra cu muzu ta sii ñiyivi ñiñi ta ñiyivi ña ñiñi.

¹⁹ Ta ziqui i ndyehi sii quiti sa quiñi xaan caa cuan vatyi cu-iin ti sihin ra cu rey ra ndyaca ñaha ñuu ñiyivi ta sihin zandaru ra. Cu-iin tandihí ra vatyi cua cahñi tahan ra sihin ra yozo caballo cuiyi cuan ta sihin zandaru ra.

²⁰ Ta ra yozo caballo cuiyi cuan sihin zandaru ra, i tiin ra sii quiti cuan sihin ra cahan cuendu sihin ti vatyi maa ra cuu ra i zavaha sa ndyityi ityi nuu quiti cuan. Ta i zandavi ñaha ra sii tandihí ñiyivi, ñu i saha sa cundyaa marca quiti cuan sii ñu, ta i zacahnu ñu sii sa i zavaha ñiyivi cuhva caa ti. Ta sa yaha i tiin zandaru ra yozo caballo cuiyi cuan sii nduu tahan ra cuan, ta ziqui i tyihi ra sii ra sisi ñuhu sa cayu sihin azufre. Ndito ra cuan ta quihvi ra yucuan.

²¹ Ta tandihí ñiyivi ñoho cuenda ra, i sahñi ra yozo caballo cuiyi cuan sii ñu sihin espada sa ñoho yuhu ra. Ta i sasi xaan zaa sii coño ñuhu tandihí ñu cuan, ta i ndaha xaan iñi ti.

20

Cuenda sa minoo mil cuiya

¹ Tacuan ta ziqui i ndyehi vatyi i quita minoo ángel ndya andivi ta i noo ra, ta ndaha ra ndaha ticui cuenda minoo yavi cono nu ñoho ñiyivi i zavaha sa ndya vaha ñi, ta ndaha ángel cuan minoo cadena cahnu.

² I ndyehi vatyi tiin ra sii ra dragón. Zuun ra cuu ra i cuu minoo coo ta sa naha. Cuihna cuu ra cuan, ta nañi ra Satanás. Cua cuhñi ángel cuan sii ra minoo mil cuiya.

³ Ta cua tyihi ra sii ra sisi yavi cono cuan, ta cua nacazi ra yuhu si, ta cua tyaa ra minoo zeyu yuhu si vatyi ma cuu quita ra ta ma cuu

zandavi ñaha ra sii ñiyivi ñuu ñiyivi minoo mil cuiya. Tatu sa yaha sa minoo mil cuiya cuan ta ziqui cua ndasi ra zuhva ñi quivi.

⁴ Tacuan i ndyehi, ta ziqui i ndyehi tyayu nahnu nu ndyaa ra sa ñihi cuhva sa cua tyicuhva ra sii ñiyivi. Ta i ndyehi añima ñiyivi i sahndya yuu ñiyivi zulu vatyi i nacatyi ñu Tuhun Ndyoo sa cuenda ra Jesú. Maa ñu ñá zacahnu sii quiti cuan, ta ñá zacahnu ñu sa i zavaha ñiyivi cuhva caa ti. Ta ñá saha ñu sa cundyaa marca ti yiqui nuu ñu ta nu ndaha ñu. Ta i ndyehi vatyi cua nandoto maa ñu, ta cua cundyaca ñaha ñu sihin ra Cristo minoo mil cuiya.

⁵ Ihyu cuu ñiyivi cua nandoto sa xihna ñi. Zoco inga ñiyivi i sihi, ma nandoto ñaha ñu ndya sa yaha minoo mil cuiya cuan.

⁶ Zii xaan cua cuu sii ñiyivi sa cua nandoto sa xihna ñi cuan, ta ma coo cuatyi maa ñu icaña ñi. Ma cuhun ñu nu cua cayu ñuhu sa ma ndahva maa. Ta cua cuu ñu tañi ra cu zutu ityi nuu ra Ndyoo ta ra Cristo, ta cua cundyaca ñaha ñu sihin ra minoo mil cuiya.

⁷ Tatu sa yaha sa mil cuiya cuan, ta ziqui cua ndasi Satanás ta quita ra nu ñoho ndazi ra.

⁸ Cua quita ra, ta cua zandavi ñaha ra sii ñiyivi nacahnu ñuu ñiyivi. Cua zandavi ñaha ra sii ñiyivi ñuu Gog ta ñuu Magog, ta cua zatitahan ra sii zandaru ñiyivi ñuu cuan. Cuaha xaan zandaru ra cua coo, tañi ñiyiti yuhu tyañuhu.

⁹ Ta cua ndaa ra ndya minoo nduhva cahnu ndya nu yucu ñiyivi cuñi xaan sii ra Ndyoo ndya ñuu Jerusalén cu si, ta cua vico nduu ra nu yucu ñu vatyi cuñi ra cahñi ra sii ñu. Zoco cuhva cuan cua tasi ra Ndyoo ñuhu ndya andivi, ta cua cayu tandihí zandaru cuan.

¹⁰ Ta cuihna, ra cua zandavi ñaha sii ñu, cua tyihi ra Ndyoo sii ra nu cayu ñuhu sihin azufre sa ma

ndahva maa nu sa ñoho quiti quiñi caa cuan sihin ra i cahan cuendu sihin ti. Ta yucuan cua ndyehe tandihí uñi tahan ra cuan tundoho ñiyaca ta ndiyaca ta tandihí cuii tylemvu.

Cua cutuñi ñiyivi ityi nuu minoo tyayu cahnu ta cuii si nu ndyaa ra Ndyoo

¹¹ Ta ziqui i ndyehi sii minoo tyayu cahnu, ta cuii xaan si, ta i ndyehi sii ra ndyaa nuu si. Ta i sino ñuhu ñuu ñiyivi ta andiví sii ra, ta cua naa si vatyi ñahñi ca nu cua cundyaa si.

¹² Ta i ndyehi vatyi nandyaa tandihí ñiyivi i sihi ityi nuu ra Ndyoo, ñiyivi ñiñi ta ñiyivi ña ñiñi. Ta cua nuña ra Ndyoo libro ra sa nacatyi cuhva i zavaha ñu, ta cua nuña tucu ra inga libro nu ndyaa zivi ñiyivi cua condito tandihí cuii tylemvu sihin ra Ndyoo. Ta cua zandaa ra Ndyoo tysiño ñiyivi i sihi sa cuenda cuhva i zavaha ñu, cuhva catyi si nu libro cuan.

¹³ Ta ndiyi sa ñoho sisi tyañuhu cua naquita ñu ta tacuan tucu ñu ñoho sisi ñuhu a inga nu yucu ndiyi, ta cua zandaa ra Ndyoo tysiño sii sa minoo minoo ñu, cuhva i zavaha ñu.

¹⁴ Ta ziqui ma cuu ca cuu ñiyivi, zoco ndito ñu ta quihi ñu sisi ñuhu sa ma ndahva maa. Ihya cuu sa cu uu tuhun sihi sii ñu, zoco yivi sa ndaha cua cuu ñu. Cuenda cua cayu ñi ñu.

¹⁵ Tatu ña ndyaa zivi ñiyivi nu libro sa cumi ra Ndyoo sa cuenda ñiyivi cua condito tandihí cuii tylemvu, cua tysihi ra sii ñu sisi ñuhu cuan.

21

Cua coo minoo andiví saa ta minoo ñuu ñiyivi saa

¹ Yaha cuan ta ziqui i ndyehi sii minoo andiví saa ta minoo ñuu ñiyivi saa vatyi sa i naa ñuu ñiyivi sa sicoo sa xihna ñi. Ta ñahñi ca tyañuhu cua coo.

² Ta yuhvi ra Juan i ndyehi sii minoo ñuu ii, ñuu Jerusalén saa cuu si, ta i quita si andiví nu ndyaa ra Ndyoo, ta i noo si. Tyaqui xaan i cuu si vatyi sa ndyaa listo si tañi minoo ñaha sa cua tandaha, tyaqui xaan ña.

³ Ta i siñi vatyi saa xaan cahan minoo ra sisi gloria nu ndyaa tyayu maa ra Ndyoo, ta catyi ra: Ndyeho vatyi vityi ndyaa maa ra Ndyoo sihin ñiyivi. Ñin ñi cua cuyucu ñu sihin ra. Maa ñu cua cuu ñiyivi ra, ta maa ra cua cuu Ndyoo ñu.

⁴ Cua zanaa ra tandihí cuii sa cuihyá iñi ñu, ta ma cuu ca ñu. Ma nducuihyá ca iñi ñu. Ma vacu ca ñu, ta ñahñi ca tundoho a sa uhu cua coo sii ñu vatyi cuhva i cuu ityi sata, sa i yaha si cuan.

⁵ Ta ziqui i catyi tucu ra ndyaa nu tyayu cahnu: Ndyeho vatyi tandihí sa iyo ta vityi zandusei sii si. Ta i catyi tucu ra: Tyaa, vatyi ndisa xaan cuu tuhun ya, ta cuu cunii xaan iñun sii si.

⁶ Ta ziqui i catyi ra sihin: Sa cuu tandihí si vityi. Yuhvi cuu ra sa iyo nu quisaha tandihí, ta cua condite tandihí cuii maa tylemvu. Yucuan cuenda cui tañi letra A ta tañi letra Z. Tatu ityi ndo cua cuhva mi sa caha ñi ndutya coho ndo, ta cua condito ndo tandihí cuii tylemvu.

⁷ Tatu zahacanaa ndo sii cuihna, cua ñihi ndo tandihí sa vaha ya. Yuhvi cua cui ra Ndyoo ra zacahnu ndo, ta maa ndo cua cuu zehe ndyihu.

⁸ Zoco ñiyivi yuhu xaan ta ñiyivi ña sino iñi ta ñiyivi quiñi xaan iyo ta ñiyivi sahñi sii ñiyivi ta ra quixi sihin ñaha sa yivi ñazihí ra cuu a ñu quixi sihin rayii sa yivi yii ñu cuu ta ñiyivi zatazi ta ñiyivi zacahnu sii ndyoo yutu ta tandihí ñiyivi vatya, cua cuhun tandihí ñu cuan nu cayu ñuhu sihin azufre sa ma ndahva maa. Ihya cuu sa cu uu saha cua cuu ñu.

Cuhva cua cuu ñuu Jerusalén saa

⁹ Tacuan ta ziqui i saa minoo sa usa tahan ángel sa i sindaha coho xuhun cuaan sa siñoho tundoho cua ndyehe ñiyivi ñuu ñiyivi, ta i catyi ángel cuan sihin: Ñaha ta cua zañehi suun sii ñaha sa cua tindaha sihin ra cu Mvee Ticaty. Catyi ra.

¹⁰ Ta sisi sa i ndyehi sa sindyaca ra sii, ndya xiñi minoo yulu cahnu xaan ta zucu xaan, ta i zañaha ra ñuu Jerusalén sii. Cahnu xaan ta ii xaan si, ta i quita si ndya andivi ndya nu ndyaa maa ra Ndyoo.

¹¹ Ndisi xaan ñuu cuan tañi sa ndisi maa ra Ndyoo ta tañi minoo yuu vaha xaan sa nañi jaspe. Ta xiño si tañi minoo ino.

¹² Siconduu ñuu cuan i ndyehi vatyi ndyaa minoo nuzama cahnu ta zucu. Ta iyo usi uu tahan yuvehe si. Nandyaa minoo ángel tahan tahan yuvehe. Ta minoo minoo yuvehe ndyaa zivi sa minoo minoo sa usi uu tahan ityi ñiyivi hebreo.

¹³ Ityi caña ñicandyi ndyaa uñi tahan yuvehe nuzama cuan, ta uñi tahan tucu ityi yulu, ta uñi tahan ityi tyañuhu, ta uñi tahan ityi cua iñi.

¹⁴ Nu cimiento nuzama cuan yozo usi uu tahan yuu nahnu, ta tahan tahan si ndyaa zivi minoo sa usi uu tahan ra i cuu apóstol ra cu Mvee Ticaty.

¹⁵ Ra ángel ra cahan sihin, ndaha ra minoo tuñii xuhun cuaan vatyi cua tyicuhva ra ñuu cuan sihin yuvehe si ta nuzama si.

¹⁶ Cumi tahan siqui ñuu cuan, ta inuu cuii ñi caa tandihí cumi tahan si. I tyicuhva ángel cuan ñuu cuan sihin tuñii ra ta cuu si uu mil uu ziendu kilómetro iin iin siqui si, ta tacuan tucu sa zucu si.

¹⁷ Ta i tyicuhva tucu ra nuzama si, ta cuu si uñi xico cumi metro sa quehen si. I tyicuhva ángel cuan tañi tyicuhva ñiyivi.

¹⁸ Nuzama cuan cuu si yuu vaha sa nañi jaspe, ta ñuu cuan maa ñi xuhun cuaan cuu si, ta xiño xaan si tañi ino vaha.

¹⁹ Usi uu tahan toto nuzama cuan. Maa maa yuu vaha cuu si, ta ñoho inga yuu vaha ticui si. Sa xihna ñi yuu yozo toto cuu si yuu sa nañi jaspe. Sa cu uu cuu zafiro. Sa cu uñi cuu ágata. Sa cu cumi cuu esmeralda.

²⁰ Sa cu ohon cuu ónice. Sa cu iñu cuu cornalina. Sa cu usa cuu crisólito. Sa cu uña cuu berilo. Sa cu iin cuu topacio. Sa cu usi cuu criso-prasa. Sa cu usi iin cuu jacinto. Ta sa cu usi uu cuu amatista. (Ziin ziin tyacu tahan tahan yuu vaha cuan.)

²¹ Sa usi uu tahan yuvehe ñuu cuan, maa ñi perla cuu si. Minoo perla cahnu xaan cuu iin iin yuvehe. Ta calle cahnu ñuu cuan xuhun cuaan vaha xaan cuu si, ta xiño xaan si tañi ino.

²² Ñahñi vehe ñuhu i ndyehi ñuu cuan. Ndyaa maa ra Ndyoo Cahnu ra ndyaca ñaha sii yo ta ra cu Mvee Ticaty, ta zacahnu ñiyivi sii maa ra, ta ña cuñi si minoo vehe.

²³ Ta ñahñi ñicandyi ta ñahñi yoo zandisi sii ñuu cuan vatyi ndisi xaan maa ra Ndyoo ta ndisi xaan ra cu Mvee Ticaty, ta sa nduu tahan maa ra saha sa ndisi yucuan.

²⁴ Sa ndisi sii ñuu cuan, cua zandisi si nacahnu ñuu ñiyivi. Ta rey ra ndyaca ñaha ñuu ñiyivi, cua cundyaca ra sa vaha sa iyo sii ra ndya ñuu cuan.

²⁵ Ma cundai yuvehe nuzama ñuu cuan ndyiacaca. Ta ma coo sa sa cuua yucuan.

²⁶ Ta tandihí sa cuca ta sa vaha sa iyo sii ñiyivi ñuu ñiyivi, cua cundyaca ñu ndya ñuu cuan, ta ñuu cuan cua cundyaca ñaha sii tandihí cuii sa iyo.

²⁷ Ñiyivi sa ndyaa zivi nu libro ra cu Mvee Ticaty vatyi cua cundai ñu tandihí cuii tyiemvu, yucuan ñu cuu ñu cua quihvi yucuan, zoco ma cuu quihvi cuatyi ndaha cuii ñi a ñiyivi vatya a ñu zacahnu sii inga ndyoo.

22

¹ Ta zīqui i zañaha ángel cuan minoo yuu cuii xaan sii. Ndutya sa saha sa cundito ñiyivi tandihí cuii tyiemvu cuu si, ta quita si nu ndyaa tyayu cahnu maa ra Ndyoo ta ra cu Mvee Ticatyi.

² Mahñu calle cahnu ñuu cuan, ta nduu siyo yu yuu iyo yutu sa cua cuhva sa cundito ñiyivi tandihí cuii tyiemvu. Tahan tahan yoo ziin ziin nuu yulu vixi cua cuhva tu. Cua cuhva tu yulu vixi usi uu saha sa minoo cuiya. Ta ndaha tu cua cuu tata sa cua zanduvaha sii ñiyivi.

³ Ñuu cuan, ñahñi maa sa ña vaha cua coo vatyi maa ra Ndyoo cua cundyaa ñuu cuan sihin ra cu Mvee Ticatyi. Ta yucuan cua zacahnu ñiyivi ra sii ra.

⁴ Cua ndyehe ñiyivi nuu ra, ta cua cundyaa ziví ra yīqui nuu ñu.

⁵ Ñahñi sa cuaa cua coo ñuu cuan. Ta ñiyivi sa yulu yucuan, ma cuñi si sa coo lámpara sii ñu, ta ñahñi ñicandyi cua coo vatyi maa ra Ndyoo ra ndyaca ñaha sii yo cua zandundisi ra yucuan, ta cua cundyaca ñaha ñu sihin ra.

Sa cuñi quisi ra Jesucristo

⁶ Ta zīqui i catyi ángel cuan sihin: Sa ndisa cuii cuu tuhun ya, ta cunii xaan iñun sii si. Maa ra Ndyoo ra ndyaca ñaha sii yo cuu ra i cahan sihin ra profeta ta sa naha. Ta vityi i tasi ra sii ángel ra vatyi cua zañaha ra sii muzu ra tandihí sa vatyi xaan cuu.

⁷ ¡Sa cuñi quisi! Catyi ra. Zīxaan cuu sii ñiyivi tyaa yahvi cuhva catyi si nuu libro ya.

⁸ Yuhvi ra Juan cuu ra i siñi ta i ndyehi tandihí sa tyei ihya. Ta sa yaha siñi sii si ta ndyehi sii si, ta zīqui i sicuiñi siti ityi nuu ángel sa i zañaha sii, vatyi cua zacahni sii ra.

⁹ Zoco i catyi maa ra sihin: Ma zavohon tacuan vatyi yuhvi cui minoo muzu ra Ndyoo tañi moo ta

tañi inga hermanos, tandihí ra profeta ta tandihí ñiyivi cua tyaa yahvi cuhva catyi si nuu libro ya. ñin ñi sii ra Ndyoo zacahnun.

¹⁰ Ta zīqui i catyi tucu ra sihin: Ma cucumi xehun tuhun sa zacoto ra Ndyoo nuu libro ya vatyi sa cua saa cuhva catyi si.

¹¹ Niñi ñi sa cumañi ca tahan si, nazavaha ca ñiyivi ña vaha sa ña vaha, ta ñiyivi zavaha xaan cuatyi, nazavaha ca ñu cuatyi. Zoco ñiyivi ndoo iyo, nazavaha ca ñu sa ndoo, ta ñiyivi vaha sa ndisa cuii, nazavaha ca ñu sa vaha xaan.

¹² Ndisa, sa cuñi quisi, catyi maa ra Ndyoo. Ta cuize sa cua cuhve sii sa minoo minoo ñiyivi sa cuenda cuhva i zavaha ñu.

¹³ Yuhvi cuu ra sa iyo nu quisaha tandihí, ta cua cundite tandihí cuii maa tyiemvu. Yucuan cuenda cui tañi letra A ta tañi letra Z.

¹⁴ Zīxaan cua cuu sii ñiyivi cua ndoo zahma vatyi cua cuu quihví ñu yuvehe ñuu cuan, ta cua cuu casi ñu yulu vixi sa iñi nu yutu sa cua cuhva sa cundito ñu tandihí cuii tyiemvu.

¹⁵ Zoco ñiyivi zavaha sa ña vaha cua nandoo ñu ityi sata tañi ñiyivi zavaha ndya vaha ñi ta ñiyivi zatazi ta ra quixi sihin minoo ñaha sa yivi ñazihí ra cuu, ta ñiyivi sahñi sii ñiyivi, ta ñiyivi zacahnu ndyoo yutu a zandu, ta tandihí ñiyivi tahan xaan iñi cuvatya.

¹⁶ Yuhvi ra Jesúsa tasi sii ángel mi vatyi cua zacoto ra sii tandihí ra hermano tandihí tuhun ya. Yuhvi cui ñiyivi sahnu sii ra rey David, ta cuu tucu ra ñiyivi sahnu sii mi. Ta cui minoo tiñoo ndisi xaan sa quita sa ñaa ca tatu sa vasi cundisi.

¹⁷ Ta Tatyi Ii maa ra Ndyoo ta ñiyivi cuu tañi ñazihí ra cu Mvee Ticatyi, catyi ñu sihin ra: ¡Ñaha! Ta tacuan tucu catyi tandihí ndo sa siñi tuhun ya. ¡Ñaha! catyi ndo sihin ra. Ta tatu iyo ra ityi xaan naquisi ra nu ndyei ta nacoho

ra ndutya sehi sa caha ñi sa cua cuhva sa cundito ñiyivi tandihí cuii tyiemu.

¹⁸ Ta tyehen nacatyi sihin tandihí ñiyivi tyizoho Tuhun Ndyoo sa ndyaa nu libro ya vatyi tatu iyo ra natyihí zuhva ca tuhun sihin si, cua zandyehe ra Ndyoo sii ra tandihí cuii nuu tundocho sa cahan si nuu libro ya.

¹⁹ A tatu iyo ra cua tava zuhva sa catyi Tuhun Ndyoo nuu libro ya, cua tava ra Ndyoo zivi ra nuu

libro sa nacatyi yoo sa cua cundito tandihí cuii tyiemu, ta ma cuu cuhun ra ñuu vaha xaan cuan, ta ma ñihí ra tandihí sa vaha sa nacatyi libro ya.

²⁰ Ta ra sa nacatyi tandihí tuhun ya, catyi ra: Ndisa vatyi sa cuñi quisi. Ta catyi yuhvi ra Juan: Vaha xaan. ¡Ñaha! yoho ra Jesús ra ndyaca ñaha sii ndi!

²¹ Ta nacuhva xaan ra Jesucristo ra ndyaca ñaha sii yo tandihí nuu sa vaha sii tandihí cuii ndo. Ta nacuu si tacuan, ta nacuu si sa ndisa.